


Didza' cubi rucá'ana
tsahui



New Testament in Zapotec, Rincón (MX:zar:Zapotec, Rincón)

Didza' cubi rucá'ana tsahui' New Testament in Zapotec, Rincón (MX:zar:Zapotec, Rincón)

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

58bf86df-ae22-508c-81dc-936dbf138c25

Contents

Salmos	1
San Mateo	103
San Marcos	147
San Lucas	174
San Juan	218
Hechos	251
Romanos	290
1 Corintios	307
2 Corintios	323
Gálatas	333
Efesios	339
Filipenses	345
Colosenses	349
1 Tesalonicenses	353
2 Tesalonicenses	356
1 Timoteo	358
2 Timoteo	363
Tito	367
Filemón	370
Hebreos	371
Santiago	383
1 Pedro	387
2 Pedro	392
1 Juan	395
2 Juan	399
3 Juan	400
Judas	401
Apocalipsis	403

YUGU' SALMO

1

¹ Bica' ba bönni' biti' runë' ca naca le ta'gú'u yöl-la' lë' nupa tu'cá'ana Dios, en biti' ridälënë' tsözxön nupa tun dul-la',

en biti' runë' tsözxön le tun nupa ta'zì' quidza' Dios.

² Le raza ládxë'ë nácagaca xibá naguixjë' Xanru', en ca nácagaca xibá na' rëla, en te dza rulaba ládxë'ë.

³ Bönni' ni náquië' ca tu yaga dxe' ga naca ra' nisa, le ribía sizxöni cate' ridxín dza que, en biti' ca' rizóa gubá'ayisö.

Yúgu'të le runë' ta'rúaj dxi'a.

⁴ Biti' raca caní quégaca nupa tuá' dö'.

Nácagaca ca bëbu zxe café ruá' le bö'.

⁵ Que lë ni na' biti' ulu'rúajë' tsahui' bönni' tu'ë dö' cate' Dios uchi'a usöröë' quégaquië', en biti' ila'cu'ë bönni' dul-la' ga tu'dubë' bönni' tsahui'.

⁶ Rapa chi'ë Xanru' Dios nōza ga ta'dë' bönni' tsahui' na', pero uniti tsaz nu ridá gapa ta'dá nupa tuá' dö'.

2

¹ Bizx que tu'tsatsa bönachi yugu' yödzo en tu'pá'a nítisö le ilúngaca?

² Bönni' ta'nná bë'ë luyú ta'dá'baguë'ë Dios.

Tun tuz xtídza'gaca nupa dë lu ná'agaca

para ila'dá'baga' Xanru', en Nu na' nabö cazë' para inná bë'ë,

³ ta'nná: "Uzxuzxaj uquinnajru' le ta'nná bë'enë' rë'u, en chú'unaru' yugu' le tu'zenë' bach rë'u."

⁴ Dios na' zoë' yehua' yubá uzxidxisë'.

Xanru' Dios utítaj cazë' léguequi.

⁵ Ní'irö lu yöl-la' rilé queë' güi'ilenë' léguequi didza', en lu yöl-la' ridzá'a queë' uzenë' bach léguequi.

⁶ Innë': "Nuzóa caza' bönni' nabö caza' xilatjë' ga inná bë'ë.

Inná bë'ë lu Gu'a Sión, le naca gu'a lá'ayi quia'."

⁷ Quixjöi'ida' libí'ili' didza' nuzóë' tsaz Dios.

Xanru' Dios gudxi cazë' neda': "Li' nacu' Zxí'ina'.

Na'a dza nuzóa caza' Li'.

⁸ Gunábini neda', ate' guna' ga ilequi quiu' yugu' yödzo.

Guequi ca' quiu' idútë yödzölió.

⁹ Quitsju' léguequi len tu xiyaga guíë.

Uzxuzxju' léguequi ca run nu rilá'a tu zxiga' yö'öna."

¹⁰ Que lë ni na', libí'ili' na' rinná bë'ëli', guli'tséajni'i.

Guli'sedi cuinli', núlöli' ruchí'a rusöröli' le raca luyú.

¹¹ Lu yöl-la' ba'a ladxi' queëli' guli'gún xichinë' Xanru'.

Lu yöl-la' rixxizi queëli' buli'sí' xibë'.

¹² Guli'gún bal Zxí'inë' Dios para cabí ilétenë',

en para cabí udxi queëli' la' nōza.

La' ilentë yöl-la' rilé queë'.

¡Bica' ba yúgu'të nupa tu'zxöni ladxi' Lë'!

3

¹ Xan, chinayángacada' nupa ta'lé neda'.

Zián nupa ta'dá'baga' neda'.

² Zián nupa ta'nnë quia', ta'nná:

"Biti' usölë' Dios lë'."

³ Pero Li', Xan, run chí'itica'su' neda'.

Nacu' yöl-la' ba quia', en Nu rutipa neda'.

⁴ Bë'a zidzaj didza', bulidza'-në' Xanru',

ate' Lë' biyönnë' chi'a ga na' zoë' lataj lá'ayi queë'.

⁵ Neda' rata', en rasía',

ate' rubana', tu' nazöntica'së' Xanru' Dios neda'.

⁶ Biti' gádxida' gayuá' gayuá' bönachi,
nupa na' nagú'ugaca neda' lë'ajlō.

⁷ ¡Guyasa, Xan! ¡Busölá neda', Dios quia'!
Budxía huë' xága'gaca nupa tu'dí'i neda',
en buquínnaida' nupa nácgaca xihui'.

⁸ Xan, rusölá cazu' bönachi quiu'.
Ben ga gaca dxi'a quégaca bönachi quiu'.
¡Ca' gaca!

4

¹ Bubí'i didza' cate' rulidza' Li', Dios.

Nacu' Nu ruchi'a rusörö le raca quia'.

Cate' gurö'a böniga, bida cazu' Li' ga zoa', en gúcalenu' neda'.
Ruhuéchi' ladxí' neda', en ruzé' nagu' le rinábida' Li'.

² Rnnë' Dios: "Libí'ili', bönachi, ¿gáca'xte ulidza dítajli' neda'?
¿Gáca'xte caz idxí'ili' le cabí nazaca', en güí'i ladxí'li' le cabí naca?"

³ Guli'tsöjné nabö cazë' Xanru' nu radxi Lë',
ate' riyönnë' neda' cate' rulidza'-në'.

⁴ Guli'gadxi Lë', en bití'rö gunlí' dul-la'.
Guli'sá' ladxí' ca naca lë' nì cate' dëli' ga ráta'li', en guli'sóa dxisö.

⁵ Guli'cú'u lahuë' Xanru' le naca dxi'a,
en buli'zxöni ladxí' Lë'.

⁶ Zián nupa ta'nná: "¿Nuzxi caz gun ga gaca dxi'a queëru?"

Lu yöl-la' dxi'i ladxí' quiu' buyü netu', Xan.

⁷ Runu' ga rudzéjade'eröda'
ca tu'dzeja nupa tu'zì' xibé zxoa' za guizxi yu, en xisi lubá uva.

⁸ Cate' rata', la' rásitia' lu yöl-la' riböza dxi ladxí' quia',
tu' run cazu' Li', Xan, ga riböza' dxi'a tsáhu'i'do'.

5

¹ Ruzé' nagu' didza' ruá'a, Xan.

Buyú ca rinnëda' ládxa'a lu yöl-la' ruhuf'ini quia'.

² Dios quia', Nu rinná be'e neda', ruzé' nagu' cate' rinábida' Li'
gácalenu' neda', na' gü'ílena' Li' didza'.

³ Yugu' zila yönnu' chi'a.

Zílado' idxina' lo', en cöza' didza' ubi'u.

⁴ Nacu' Li' Dios bití' raza ládxi'u le cabí naca,
en bití' ru'u lataj ibiga' ga zu' nu ruá' dö'.

⁵ Bití' ru'u lataj nupa tun ba rahui ila'dxín lo',
en bití' rilé'enu' dxi'a nupa nácgaca xihui'.

⁶ Rusunítíu' dërö nupa ta'zì' ye'e luzé'eguequi,
en bití' rilé'enu' dxi'a nupa tuti bönachi, en ta'zì' yë'.

⁷ Gaca tsu'a neda' lu yu'u lidxu', tu' nadxí'ide'enu' neda'.

Lu yöl-la' ba'a ladxí' quia' tsu'a ga naca yudo' lá'ayi quiu', en tseaj ládxa'a Li'.

⁸ Tu' nacuá' zían nupa ta'lé neda', buluf'i neda' le naca dxi'a rë'ënu' guna', Xan.
Busëdi neda' para gaca guna' ca rë'ënu' Li'.

⁹ Bití' gaca nu tseajlë' didza' tuí'i nupa na' ta'lé neda'.
Nácgaca xihui' icja ládxi'do'guequi.

Naca ruá'agaca ca tu yeru ba nayalaj,
en lu yöl-la' rizí' yë' quéguequi tuí'i yulaj didza'.

¹⁰ Ben léguequi xigua', Dios.

Ben ga bití' udxín xtídza'guequi.

Gurú'una léguequi tu' túntica'sö dul-la',
en tu' ta'dá'baga' xtídz'u.

¹¹ Ulu'dzeja nupa tu'zxöni ladxí' Li'.

Lu yöl-la' rudzeja quéguequi gúl-lagaca quiu' tu' rácalenu' léguequi.

Tu'zì' xibó' nupa nadxí'igaca Li'.

¹² Run cazu' Li' ga raca dxi'a quégaca nupa tun ca rnna xtídz'u, Xan.

Lu yöl-la' dxi'i ladxi' quiu' run chi'u léguequi.

6

¹ Biti' uzenu' bach neda' lu yöl-la' rilé quiu', Xan.

Biti' gunu' neda' xigua' lu yöl-la' ridzá'a quiu'.

² Buéchi' ladxi' neda', Xan, tu' rudú ládxa'a.

Bun neda', Xan, tu' riguí'i rizáca'a.

³ Rō'ō bōniga idútē le naca'.

¿Gáca' xte caz gaca caní, Xan?

⁴ Gudá dusöló' neda', Xan.

Tu' nadxfínu' neda', busölá neda' lu yöl-la' guti.

⁵ Lu lataj chul-la cuntu nu tsōjnē Lī'.

Cuntu nu zoa ni' nu gaca cu'u Lī' yöl-la' ba.

⁶ Rudú ládxa'a tu' rinnética'sō ládxa'a.

Yugu' dzō' ribisa le rāti'da' len nisa ribōdxi quia'.

Rusubisa' xcúgua' len nisa ribōdxi quia'.

⁷ Rō'ō guí guíōj lahua' tu' ribōdxitica'sa'.

Biti' gaca ilé'eda' tu' nōzigaca nupa tu'dí'i neda'.

⁸ Guli' cuíta ga zoa', libí'ili', ruá'ali' dō',

tu' riyōnnē' Xanru' ribōdxa' neda'.

⁹ Ruzé naguē' le rulidza', ráta'yua' lahuē',

en rubi'ē didza' cate' bi rinábida' Lē'.

¹⁰ Ulu'tuí'i nupa tu'dí'i neda', en ila'bō' bōniga.

Lu yöl-la' rutuí'i quéguequi ulu'biga' ga zoa'.

7

¹ Ruzxōni ládxa'a Lī', gácalenu' neda', Xana' Dios.

Busölá neda' lu ná'agaca nupa ta'bía no neda', en gúcalen neda'

² para cabí soa nu cuéaj neda' ca runba' bēdxi guixi',

en para cabí usuniti neda' ga cuntu nu zoa gácalen neda'.

³ Xana' Dios, channō caní nuna':

Channō nabága'a xigua',

⁴ o channō bubi'a dō' que nu gúcalen neda',

o channō bi'a dō' que nu bití' bi ben quia' lu bití' rilé'e neda' dxi'a,

⁵ bē' lataj soa regu' neda' nu na' bití' rilé'e neda' dxi'a, en ucul-la neda'.

Bē' lataj nu na' quin neda' lu yu,

en uca'ana neda' cá'asō.

⁶ Lu yöl-la' rilé quiu' guyasa, Xan.

Gudá'baga' nupa na' lu yöl-la' ridzá'a quéguequi tá'baga' neda'.

Guyasa, gúcalen neda' tu' nacu' Nu ruchi'a rusörō le raca quia'.

⁷ Ben ga ulu'dubi quiu' yúgu'tē bōnachi,

en gunná be'e léguequi ga ni' zu' xitsá'tērō.

⁸ Ruchi'a rusörōu' quéguequi yúgu'tē bōnachi, Xan.

Bubéaj neda' tsahui', Xan, tsca naca le tsahui' nuna', en tu' naca' idú tsahui'.

⁹ Ben ga udxí que le xihui' tun nupa tuá' dō',

pero buzóa tsutsu nupa tun le naca dxi'a,

tu' nacu' Lī' idú tsahui', Dios, en ruchi'a rusörōu'

le ta'zá' ládxi'gaca bōnachi, en le ta'guínnaj ícjaguequi.

¹⁰ Naca cazē' Dios Nu run chi'i neda'.

Rusölē' nupa náacagaca idú ladxi'.

¹¹ Dios ruchi'a rusörōē' queēru' ca naca le naca tsahui',

en richúgutica'sē' quégaca nupa tuá' dō'.

¹² Channō cabí ulu'bi'i ladxi' bōnachi, utuchē' guíé tuchi' queē'.

Chinucōzē' uxiti' yaga queē'.

¹³ Chinupē'ē yugu' le rudí'inē' lu gudil-la,

en nudxié' lu du uxiti' yugu' yaga túchi'do' zoa guí' láhuiguequi.

¹⁴ Buyútsōca', riguínnaj ícjē' bōnni' ru'ē dō' le xihui' gunē'.

Ruí'i ládxē'ē le naca dō', en rizí' yē'ē.

¹⁵ Nachó'ōnē' ga rē' tu yeru zxōn ga nu ibixi,

pero lē cazē' yōjbixē' lu yeru na' guchō'ōnē'.

¹⁶ Budxín la' queézē' dō' na' bi'ē,
en dxíē' huē' ca naca xigua' nabáguē'ē.

¹⁷ Guía'-nē' Xanru': "Xclenu" tu' náquiē' tsahui',
en gul-la' yōl-la' ba que Lē' Xanru', Nu nayēpisētērō.

8

¹ ¡Xana' Dios,

bica' ba Lo' idútē yōdzōliól!

¡Xitsá'tērō ca lúzxiba nayēpisu' Li'!

² Túl-labr' b'ído', enca' bi'i huē'ēnido' yōl-la' zxōn quiu'
sal-la' nacuá' nupa ta'dá'baga' Li'.

Uzóa dxíu' nupa na' biti' ta'lé'e Li' dxi'a, enca' nupa ta'dá'baga' Li'.

³ Cate' ruyúa' lúzxiba quiu', le nunu' len xibōn na'zu',
enca' beu', en yugu' bōlaj bení' nuzú' xilátjaguequi,

⁴ ní'irō rnníá': ¿Bizxi caz bōnni', tu' rōjné cazu' lē'?

¿Bizxi caz nu naca bōnáchisō, tu' ruí'i ládxi'u Li' nu na'?

⁵ Nunu' ga naquiē' bōnni' ia'lati' cuidi' ca naca cazu' Li'.

Nuzú' queē' yōl-la' ba quiu', en yōl-la' run bal ca
tu le néquini oro dxía icjē'.

⁶ Nunu' ga rinná bé'enē' yugu' le nun cazu' Li'.

Yúgu'tē nuzú' xini'ē lē'.

⁷ Nuzú' xini'ē yúgu'tēba' bō'cu' zxila', en yúgu'tēba' bēdxi,

⁸ en lēs caní nunu' ca' quégacaba' biguínrido',

en quégacaba' bōla dzō'ōba' nísado',

enca' quégacaba' yúgu'tēba' bōa' ta'dódiba' lu nísado'.

⁹ ¡Xana' Dios,

bica' ba lo' idútē yōdzōliól!

9

¹ ¡Idú ládxa'a rigu'a Li' yōl-la' ba, Xan!

¡Usiyōnda' bōnachi ca naca yúgu'tē yōl-la' huáca nunu'!

² ¡Udzéjada', en uzi'a xibó'!

¡Gul-la' yōl-la' ba que Lo', tu' nayēpisētēru'!

³ ¡Ta'zxunnaj nupa ta'dá'baga' neda'!

¡Ta'dzō'ō, en tu'niti lo' Li',

⁴ tu' nubéaju' tsahui' le naca dxi'a runa'!

¡Rō'u ga rinná bē'u, en ruchi'a rusōrōu' queétu' ca naca le naca tsahui'!

⁵ Bulidza zi'u yugu' yōdzō, en busunítu' nupa tuá' dō'.

Tsaz busulu' lu guichi' quiu' gapa gula'zúaj láguequi.

⁶ Chigula'niti nupa gula'dá'baga' Li'.

Tsaz naguínnaigaca gapa gula'cuá'.

Busunítu' yugu' yōdzō gapa na' gula'cuá',

ate' cuntu nu zoa rōjné yugu' yōdzō na'.

⁷ Zóatica'sē' Xanru' Dios.

Naguixjē' tsaz lataj ga rō'ē rinná bē'ē en ruchi'a rusōrōē' quégaca bōnachi.

⁸ Uchi'a usōrōē' quégaca bōnachi yōdzōliól lu le naca tsahui'.

Uchi'a usōrōē' quégaca yugu' yōdzō lu le nácatē.

⁹ Gun chí'ē Xanru' Dios nupa nácagaca yechí'.

Gácalenē' léguequi cate' nu gun léguequi zi'.

¹⁰ Ulu'zxōni ladxi' Li' nupa núnbē'gaca Lo'.

Caní gaca, Xan, tu' cabí nusán ládxi'u nupa tu'guilaj Li'.

¹¹ Gulí'gul-la yōl-la' ba queē' Xanru', zoē' ga na' nazí'i le Sión.

Bulí'siyōn bōnachi yugu' yōdzō ca naca yugu' le nunē'.

¹² Biti' ral-la ládxi'ē nupa ta'guí'i ta'zaca' cate' tu'lidza Lē',
tu' rōjné léguequi Nu na' ruzi' lēbi nu ruti bōnachi.

¹³ Buéchi' ladxi' neda', Xan.

Buyú ca tun neda' zi' nupa tu'dí'i neda'.

Ruchisu' Li' neda' cate' chirequi gátia'

¹⁴ para gaca usiyönda' bönachi yöl-la' ba quiu' Li'.

Ga naca ga nu tsaza yödzö quiu' nazí'i le Sión,
udzéjada' tu' nusölö' neda'.

¹⁵ Yöjbíxigaca bönachi yugu' yödzö lu yeru gula'chö'öna ga tsöjbíxigaca luzé'eguequi.

Bila'röli ni'aguequi lu yöxaj bulu'cachi' para ila'zön léguequi.

¹⁶ Chinunë' Xanru' Dios ga nünbë'gaca bönachi Lé' tu' buchi'a busöröë' quéguequi.

Lu lë na' nun nu ruá' dö' zön la' cuinsi.

¹⁷ Ila'yaza lataj chul-la nupa tuá' dö',

yúgu'të nupa na' nal-la ládxí'gaca Dios.

¹⁸ Calëga tsaz ulu'gá'ana cá'asö nupa ta'yadzaj ta'yudxi,
en biti' initi tsaz yöl-la' run löza quégaca nupa nácgaca yechi'.

¹⁹ Guyasa, Xan.

Biti' gu'u lataj tsëpisë nu naca bönáchisö.

Buchi'a busörö quégaca bönachi yugu' yödzö.

²⁰ Buxös léguequi, Xan.

Ben ga ulu'ünbë' le nácgaca, tu' nácgacasö bönachi.

10

¹ ¿Bizx que zu' zi'tu', Xan?

¿Bizx que rucachi' lo' cate' bi raca quia'?

² Lu yöl-la' run ba rahui quégaca nupa tuá' dö'

ta'bía no nupa nácgaca yechi'.

Ben ga ila'zön du yalaj na' núcachi'gaca la' léguequisö.

³ Run ba zxön cuinë' bönni' ru'ë dö' ca naca le xihui' rizë ládxë'ë.

Bönni' ruhuídi'në' rulidza ditjë' luzë'ë, en ruzóë' Dios tsölá'alö.

⁴ Lu yöl-la' run ba zxön cuinë' bönni' huía' dö' biti' ru'í ládxë'ë Dios.

Rizá'asö ládxë'ë, rnnë': Biti' ca' zoa Dios.

⁵ Ruzi'ë xibë yúgu'të le runë'.

Biti' ca' réquibe'enë' zoë' Dios Nu ruchi'a rusörö quégaca bönachi.

Ruzóë' tsölá'alö nupa biti' ta'lé'e lë' dxi'a.

⁶ Rë' la' cuinsë': "Gatga ichíxida'.

Catu caz bi gaca quia'."

⁷ Didza' ru'ë nácgaca le rudxía dö', enca' le rizi' yë', en le rudidza' yudxi yugu' luzë'ë.

Ruí'tica'së' didza' le cabí nácatë, en le naca xihui'.

⁸ Rucachi' cuinë' yugu' lu yödzö.

Bagáchi'sö rútië' nupa biti' bi nabága'gaca.

Ruyúlanë' nu bi gaca gun que.

⁹ Ribözë' ga na' núcachi' cuinë' ca runba' bëdxi guixi'.

Ribözë' nu gaca sönë'.

Rizönë' bönni' yechi' lu du yalaj queë', en rá'ayöjë' lë' ga nagachi' queë'.

¹⁰ Riguinë' luyú nu na' nazönë'.

Zián nupa rucul-lë' len në'ë nal-la.

¹¹ Rë' la' cuinsë': "Nal-la ládxë'ë Dios.

Nucachi' lahuë', en biti' ca' rilé'enë' le runa'."

¹² ¡Guyasa, Xan!

¡Gulís no'o, Dios!

¡Biti' gal-la ládxu'u nupa ta'guí' ta'zaca'!

¹³ ¿Bizx que bönni' na' ru'ë dö' nuzóë' Dios tsölá'alö?

Gudxë' la' cuinsë': Biti' uzí' lë' Dios neda'.

¹⁴ Li' bilé'e quézinu' lë ni, Xan.

Ruí'í ládxu'u nu riguí' rizáca', en nu risëbi ladxi',

en zóatica'su' gácalenu' léguequi.

Nu naca bayechi' rigú'u cuini lu no'o, Xan,

tu' zóatica'su' gácalenu' nu riyadza riyudxi.

¹⁵ Bugúa yöl-la' unná bë' quégaca nupa tuá' dö', en nácgaca xihui'.

Bubí'í quéguequi ca naca xigua' nabága'gaca.

¹⁶ Inná bë'tica'së' Xanru' Dios.

Nupa tu'béaj ícjaguequi Xanru' ulu'niti tsaz lu xiyú cazë'.

¹⁷ Ruzé nagu', Xan, le ta'nábini Li' nupa nácgaca do' ladxi'.

Rutipu' ládxí'guequi, en ruzé nagu' chí'iguequi.

¹⁸ Ruchi'a rusórou' quégaca nupa nácgaca uzëbi,
en nupa zoa nu ribía no léguequi,
para cabirö ulu'xósa bönachi yödzülió ni luzë'eguequi.

11

¹ Ruzxöni ládxa'a Xanru' gácalenë' neda'.

¿Naru' guíetso' neda'?

“Buzxúnnaj lu guí'a ca runba' biguínido”?

² Buyútsöca', zöngaca nupa tuá' dö' yaga uxiti'.

Nuzóagaca yágado' lahui tuchi' lu du rusé,
para ilútië' bagáchi'só nupa nácgaca dxi'a.

³ Channö ila'guínnaj yugu' le tu'zóa tsutsu le naca dxi'a,

¿bizxi caz gaca gun nu naca tsahui'?

⁴ ¿Zoa cazë' Xanru' yudo' lá'ayi queë'!

Yehua' yubá zoa ga rö'ë rinná bë'ë Xanru' Dios.

Rilé'e guiói lahuë' para uyúë' le tun bönachi.

⁵ Rizí' bë'ë Xanru' nu naca tsahui'.

Biti' rilé'enë' dxi'a nu ruá' dö', en nu raza ladxi' ta'dá'baga' yúlahui'.

⁶ Gunë' ga sáca'gaca nupa tuá' dö' le usuniti léguequi.

Ubi'ë quéguequi guí', en le ruquéla' guí', en tu bö' régui.

⁷ Caní gunë' Xanru' tu' náquië' tsahui', en nadxi'inë' le naca tsahui'.

Nupa tun le nácatë ila'lé'e lahuë'.

12

¹ Busölá neda', Xan, tu' cabirö zoa nitú nu naca dxi'a,

en bití' gaca nu idzüli nitú nu run ca rnna xtídza'a.

² Ta'zí' ye'e yúgu'të bönachi luzë'eguequi.

Lu yöl-la' rizí' yë' quéguequi tui'ilen luzë'eguequi didza' yúlajdo'.

³ Xan, buzóa dxisó nupa na' tuí'i didza' yúlajdo',
en buzaga' ruí'igaca nupa tun ba zxön cúinguequi.

⁴ Ta'nná: “Güí'iru' didza' ca rizësö ládxí'ru',
ate' cuntu nu tá'baga' rë'u.

¿Nuzxi caz inná be'e rë'u ca naca didza' ruí'iru'?”

⁵ Rnnë' Xanru': “Na'a guída' tu' nacua' nupa tun zi' nupa ta'yadzaj ta'yudxi,

ate' rinnë ládxí'gaca nupa ni tu' zoa nu ribía no léguequi.

Ca ta'zësö ládxí'gaca, la' guídatea' dusölá' léguequi.”

⁶ Huáca uzxöni ládxí'ru' didza' ru'ë Xanru'.

Nácgaca ca guíë plata ba nequi,
le nudxi'a gadxi luzuí tu lu guí' lälë'e.

⁷ Li' caz, Xan, gun chí'u léguequi,
en usöló' léguequi lu ná'agaca nupa tuá' dö' na'a dza.

⁸ Gáti'tës nacua' nupa tuá' dö',
cate' tun zxön bönachi le ruá' dö'.

13

¹ ¿Gáca'xte caz gal-la ládxu'u neda', Xan?

¿Naru' tsaz gal-la ládxu'u neda'?

¿Gáca'xte caz ucache' cuinu' lahua'?

² ¿Gáca'xte caz gun bayudxi guá' ilena' le réquida' zi'?

¿Gáca'xte caz huí'inida' rëla, en te dza?

¿Gáca'xte caz ucúl-lágaca neda' nupa ta'dá'baga' neda'?

³ Buyú neda', Xan, en bubí'i didza'.

Butipa ládxa'a para cabí gátia'.

⁴ Ní'irö bití' gaca ila'nná nupa ta'dá'baga' neda', bití' ila'nná: “Bucúl-laru' lë'.”

Bití' gaca ulu'dzeja tu' nótjada' ládxa'a neda'.

⁵ Neda' ruzxöni ládxa'a yöl-la' dxi'i ladxi' quiu'.

Rudzéjada' tu' rusöló' neda'.

⁶ Gul-la' queë' Xanru',
tu' benë' quia' le naca dxi'a.

14

¹ Lu icja ládxi'da'ahuë' rnnë' bönni' tu' canöz, rnnë': Biti' zoa caz Dios.
Nachixi nanítigaquie' bönni' caní, en tunë' le cabí rilé'enë' dxi'a Dios.
Cuntu nu zoa nu run le naca dxi'a.

² Ga zoë' Dios yehua' yubá buyúë' luyú ni ga nacuá' bönachi
para ilé'enë' channö zoa nu réajni'i, nu na' riguila' Dios.

³ Yúgu'të' nadódigaquie' tsólá'aló.

Nachixi nanítigaquie' tu tuë'.

Cuntu nu zoa nu run le naca dxi'a, nitú bönachi.

⁴ ¿Naru' cabí ta'yéajni'i nupa tuá' dö'?

Le tun nupa na' naca tsca tagu bönachi quia' ca nu ragu yöta.

Biti' ca' tu'lidza neda', Xángaca bönachi.

⁵ Lu yöl-la' radxi ridzöbi quéguequi ta'zxizi
tu' ta'lé'e Xanru' Dios, en zóalenë' bönachi tsahui'.

⁶ Tu'titaj xtídza'gaca nupa náacagaca yechi',
pero nupa ni tu'zxöni ladxi' gácalenë' Xanru' léguequi.

⁷ Raca ládxa'a irúaj Sión Nu usólá bönachi Israel.

Cate' gunë' Xanru' ga ulu'dxín bönachi queë' nadzúngaca xilátjaguequi,
ulu'dzeja xzi'ini xi'sóë' Jacob, bönachi Israel, en ulu'zi' xibé' Dios.

15

¹ ¿Nuzxi caz bönachi tsöjsó'a xilatju', Xan?

¿Nuzxi caz tsöjsó'a ga naca lá'ayi quiu'?

² Nu na' naca idú ladxi', en run le naca tsahui',
en lu icja ládxi'da'ahui ru'i didza' le nácatë.

³ Nu na' bití' rizi' quidza' bönachi,
en bití' ruá' dö' que luzë'e,
en bití' ruzë naga nu rizi' quidza' luzë'e.

⁴ Nu na' bití' run bal nu ruá' dö',
pero run bal nupa tun zxön Dios,
en sal-la' bi uniti cate' chinún xtídza', bití' ca' rutsá' didza' na'.

⁵ Nu na' bití' rizi' icja dumí cate' runódzaj dumí que tu chí'ido'só,
en bití' rizi' dumí para si' yë' ca naca le nun nu bití' nabaga' xigua'.
Nu na' run yúgu'të le caní bití' ca' idzá' xilataj.

16

¹ Ben chi'i neda', Dios, tu' ruzxöni ládxa'a Li'.

² Lu icja ládxi'da'ahua' gudxa'-në' Xanru':

"Li' nacu' Xana'.

Bití'rö bi zoa quia' le naca dxi'a, pero tuzu' Li'."

³ Riyaza ládxi'lëna' nupa náacagaca queë' Dios luyú ni,
en nupa náacagaca idú ladxi'.

⁴ Ila'yán le ila'gu'i ila'zaca' nupa ta'yéaj ladxi' yugu' dios izá'a.

Bití' ca' cu'a láhuiguequi rön ca tun bönachi na',
en bití' ulidza' lágaca dios na'.

⁵ Náquie' Xanru' Dios Nu nabánida', en Nu ruzi'a xibé.

⁶ Li', Xan, nuzú' xilatja'.

Lataj na' nuzú' quia' naca le ruzi'a xibé,
en lachi naca lataj na' nequi quia'.

⁷ Gul-la' yöl-la' ba queë' Xanru', Nu rigú'u yöl-la' neda' le naca tsahui',
ga ridxintë ruzéajni'inë' neda' cate' ni' rasía'.

⁸ Chinuna' ga zóatica'së' Xanru' lahua'.

Tu' zoë' cuita' bití' bi utsá' neda'.

⁹ Que lë ni na' budzeja ládxa'a, en buzí' xibé ládxi'da'ahua',
 ate' gun lóza le naca' cate' igácha'a yeru ba,
¹⁰ tu' cabí uca'anú' neda' lataj chul-la,
 en biti' gu'u lataj uniti nu nequi quez quiu'.
¹¹ Nunú' ga núnbë'a nōza ichë' neda' ga soa' ibana'.
 Ga zu' Li' gata' quia' yöl-la' rudzeja idú,
 ate' cuitu' Li' uzi'tica'sa' xibó'.

17

¹ Ruzë nagu' neda', Xan.
 Lu le naca tsahui' quia' rulidza' Li'.
 Bë' ladxí' le rinábida' Li' tu' cabí ca' rizi' yë'a.
² Buchi'a busörö quia'
 tu' runu' Li' le naca tsahui'.
³ Núnbë'u Li' le yu'u ládxi'da'ahua'.
 Ruyú' neda' chí'i dzö'ölö.
 Guzxí' bë'u neda', ate' burúaja' tsahui'.
 Biti' ca' ruá'a didza' le cabí naca idú dxi'a.
⁴ Runa' ca rinná bë' xibá quiu',
 en biti' ca' ruá'a dö' ca tun bal-la bönachi.
⁵ Ridática'sa' la' nōza tsahui' quiu',
 en biti' ca' ridōda' tsölá'alö.
⁶ Rulidza' Li', Dios, tu' rubi'u didza'.
 Ruzë nagu' yugu' didza' ruá'a.
⁷ Buluí'i lahui yöl-la' dxi'i ladxí' quiu'.
 Rusölá cazu' nupa tu'zxōni ladxí' Li'
 lu ná'agaca nupa ta'dá'baga' léguequi.
⁸ Ben chí'i neda' ca run chí'u la' guiōj lo cazu'.
 Bucachí' neda' cuitu' Li' ca runba' böra, rucáchi'gacaba' bōrado' zxan xílabá',
⁹ para cabí bi ilún quia' nupa tuá' dö',
 nupa na' ta'lé neda', en nagú'ugaca neda' lë'ajlö.
¹⁰ Biti' ca' zóalen léguequi yöl-la' ruhuéchi' ladxí',
 ate' tuí'i didza' lu yöl-la' run ba zxōn cúinguequi.
¹¹ Gátí'tës ga ridōda' ta'gú'u neda' lë'ajlö,
 en tē'ēni ila'guín neda' luyú.
¹² Nácaquaquië' ca yugu' bēdxi guíxi'do'.
 Té'ēnē' ulu'sunítië' neda'.
 Nácaquaquië' ca yugu' bēdxi guixi'.
 Nucachí' cúingaqueië' para ila'zōnē' neda'.
¹³ Gudá, Xan, gudá'baga' nupa ta'lé neda', en bucul-la léguequi.
 Busölá neda' lu ná'agaca nupa tuá' dö', ugunu' dxin guíë tuchi' quiu'.
¹⁴ Lu yöl-la' huáca zxōn quiu' busölá neda', Xan,
 lu ná'agaca nupa tu'zi' xibé na'a dza,
 nupa na' nuhuólaj nudzë'egaca yöl-la' tsahui' quiu'.
 Nayángacabi' zxf'inigaquië',
 ate' tu'cá'anē' lu ná'agacabi' le dē sizxōni quégaquië'.
¹⁵ pero neda' ilé'eda' lo' tu' naca' tsahui',
 en tsaza ládxa'a gaca' ca nacu' Li' cate' ubana'.

18

¹ ¡Nadxí'ide'eda' Li', Xan!
 ¡Li' rutipa cazu' ládxa'a!
² Ruzóë' Xanru' neda' tsutsu, en rapa chí'ë neda', en rusölë' neda'.
 Náquië' Dios quia', en Nu rutipa ládxa'a,
 ate' ruzxōni ládxa'a Lë'.
 Rácalenē' neda' lu gudil-la: Rusölë' neda', en rizōnē' neda'.
³ Rulidza'-nē' Xanru' Nu ral-la' cú'uru' yöl-la' ba,
 ate' usölë' neda' lu ná'agaca nupa tu'dí'i neda'.
⁴ Ia'látí'sō la' gútia',
 ate' yōjbaga' neda' le usuniti neda', le ben ga gúdxida'.
⁵ Ia'látí'sō la' yōjtsu'a lataj chul-la que yöl-la' guti,

tu' la' gútitia'.

⁶ Lu le guca quia' bulidza'-nē' Xanru'.
Bulidza'-nē' Dios quia' para gácalenē' neda'.
Ga na' zoē' lataj lá'ayi queē' biyōnnē' chí'a.
Buzē naguē' le gunabi yúdxida' Lē'.

⁷ Ní'irō gudōdi budó' zxu', en guxzizi luyú.
Guxxízida' xilíbigaca yugu' gu'a sibi.
Guxxízigaca tu' gulénē' Lē'.

⁸ Birúaj dzōn zxinē'ē,
ate' birúaj guí' ru'ē le buzegui le dē idú gásibi'ilē',
ate' buguela' guí' yugu' bo' yalaj.

⁹ Benē' ga bōtaj lúxiba, en bōtajē' Lē cazē',
ate' guzóa zzan ní'ē le naca chul-la.

¹⁰ Gudōdē' lu bō'ōs dxiē' tu le nayēpisē nazi'i le querubín.
Carelō gudōdē' tu lu bō' budunu'.

¹¹ Busubaga' cuinē' le naca chúl-lasō.
Lē na' naca bōaj gasaj le richē'lē'e nisa.

¹² Lu le rēpi yōsa queē' lu bōaj gasaj na'
bila'rúaj bo' yalaj, en guiōj bōgui' yōla sunna.

¹³ Gunnē guziú' que chí'ē Xanru' lúxiba xitsá'.
Biyōn chí'ē Dios nayēpisētēre',

lu dzōn, en yugu' lu bo' yalaj, en lu guiōj bōgui' yōla sunna.

¹⁴ Gusól-lē'ē yugu' yaga lahui tuchi' queē', en bēsílásiē' nupa na' tu'dí'i neda'.
Gusól-lē'ē yugu' yōsa queē' yugu' le bulu'cul-la léguequi.

¹⁵ Ní'irō bilá' lahui le zoa zzan nísado',
ate' bilá' lahui xilibi yōdzóliō,
cate' buzenu' bach nupa biti' ta'lé'e Li' dxi'a, Xan,
en lu yōl-la' rilé quiu' bulidza zí'u léguequi.

¹⁶ Bōtjē' zaca' xitsá'alō, en gudélē'ē neda'.
Bubéajē' neda' lu nisa zili.

¹⁷ Busólē' neda' lu na' nu biti' rilé'e neda' dxi'a, en nál-latērō,
enca' lu ná'agaca nupa tu'dí'i neda', en nál-lágacatērō ca neda'.

¹⁸ Cate' ní' chízóa inítia' gula'zóa régu'ē neda',
pero Xanru' gúcalenē' neda'.

¹⁹ Bubéajē' neda', en buzóē' neda' tu lu lataj zxōn.
Busólē' neda' tu' guyaza ládxe'ē neda'.

²⁰ Bubi'ē Xanru' quia' tsca le tsahui' naca',
en benē' quia' le naca dxi'a tu' cabí nabága'a xiguia',

²¹ tu' runa' ca naca le rusēdinē' Xanru' neda',
en biti' ca' ridá'baga'a Lē'.

²² Runa' ca ta'nná xibá nunē' Xanru',
en biti' ridá'baga'a le rinná bē' naguixjē' Lē'.

²³ Biti' bi le naca dō' nabága'a lahuē' Lē',
ate' ben chí'a le innía' para cabí gu'a dō'.

²⁴ Que lē ní na' bubi'ē Xanru' quia' tsca le tsahui' naca',
en tu' cabí nabága'a xiguia' lahuē' Lē'.

²⁵ Ruhuéchi' ládxi'u nupa tu'huechi' ladxí' luzē'eguequi,
en nacu' idú dxi'a len nupa náagaca idú dxi'a.

²⁶ Ruluf'i cuinu' idú ladxí' len nupa náagaca idú ladxí',
pero ridá'bagu'u nupa ta'dá'baga' xtídzu'u.

²⁷ Rusóló' nupa ta'guí'i ta'zaca',
pero ruzōtju' nupa tun ba rahui.

²⁸ Ruquéla' cazu' guí' quia', Xana' Dios,
en rigú'u quia' bení cate' ridá' ga chul-la.

²⁹ Lu yōl-la' huáca queē' Dios rucul-la' bōnni' guizxi yu rōjáquiē' gudil-la.
Tu' zóalenē' Dios quia' neda',
rixítia' ribixa' lu zō'ō run chí'i léguequi.

³⁰ Idú dxi'a náagaca le runē' Dios.

Nurúaj tsahui' xtídzë'.

Rapa chi'ë yúgu'të nupa ta'nábini Lë' gácalenë' léguequi.

³¹ ¡Tuzë' Xanru' náquië' Dios!

¡Tuzë' Dios rapa chi'ë rë'u!

³² Dios ni ruzalë' neda',

en runë' ga naca' idú ládxa'a.

³³ Runë' ga nácacaga ni'a ca ní'agacaba' bidxina' guixi',

en ruzóë' neda' yugu' lu guí'a zxön.

³⁴ Rusédinë' neda' para gaca tseja' gudil-la,

en para gaca uguna' dxin uxití' yaga néquini guíë bronce.

³⁵ Lu yöl-la' rusölá quiu' run chi'u neda'.

Len no'o nál-la rizönu' neda',

en lu yöl-la' dxi'i ladxí' quiu' nunu' ga nayëpisëtëra'.

³⁶ Ruchi'u nöza ga ral-la' töda',

en runu' ga bití' cuila'.

³⁷ Guzóa régu'a nupa tu'dí'i neda', en bucul-la' léguequi.

Bití' buécja' ga bidxintë busunítia' léguequi.

³⁸ Gudina' léguequi luyú, ate' bití' guca ulu'huóása.

Gula'dzö'ö zcan ni'a.

³⁹ Benu' neda' nál-la para tseja' gudil-la,

en benu' ga bucul-la' nupa gula'dá'baga' neda'.

⁴⁰ Benu' ga bulu'zxunnaj lahua' nupa bití' ta'lé'e neda' dxi'a,

ate' busunítia' nupa na' bulu'dí'i neda'.

⁴¹ Bulu'lidza nu gácalen léguequi,

pero cuntú nu zoa usölá léguequi.

Bulu'lidza ca' Xanru', pero bití' bubi'ë didza'.

⁴² Buzzuxzja' léguequi ca bëchtö yu nachë' lu bö'ös.

Buliba' léguequi ca ruliba' guna' la' nöza.

⁴³ Busöló' neda' lu ná'agaca nupa ta'dá'baga',

en nunu' ga rinná bé'eda' bönachi zían yödzö.

Tun ca rnna xtídz'a bönachi bití' núnbë'a zí'alö.

⁴⁴ Cate' ta'yöni neda', la' tun ca rnna xtídz'a.

Tadxi neda' bönachi zían yugu' yödzö izá'a.

⁴⁵ Ta'cuidí' ladxí', en lu yöl-la' rízzizi quéguequi

ta'rúaj yugu' lu yödzö tsutsu quéguequi.

⁴⁶ ¡Zoë' nabanë' Xanru'!

¡Yöl-la' ba Nu na' run chi'i neda'!

¡Gulí'gún zxön Dios Nu rusölá neda'!

⁴⁷ Náquië' Dios Nu rizí' la nupa tu'dí'i neda',

en runë' ga tadxi bönachi guízzí yu neda'.

⁴⁸ Rusölë' neda' lu ná'agaca nupa bití' ta'lé'e neda' dxi'a.

Le nácatë runë' ga rucul-la' nupa ta'dá'baga' neda',

en rusölë' neda' lu na' bönni' ridzá'a.

⁴⁹ Que lë ni na' guí'a Li': Xclenu' Xan, lógaca bönachi zían yödzö,

en gul-la' yöl-la' ba que Lo' La'ayi.

⁵⁰ Rusölá cazë' Xanru' bönni' rinná bë'ë uláz queë',

en nadxí'itica'së' nu na' nabö cazë',

nu na' naca David, en yugu' zxi'ini xi'sóë' ga idxinrö dza udxi.

19

¹ Yugu' le nacuá' lúzxiba tu'lufi lo yöl-la' zxön queë' Dios,

ate' yugu' le raca lu bö'ös nácacaga bë' le nunë'.

² Yugu' dza tu'zéajni'i,

en yugu' dzö' tu'lufi lo yöl-la' réajni'i.

³ Bití' zoa didza' tufí', en bití' riyón tu le ta'nná.

Bití' riyón chí'iguequi.

⁴ Le tu'zéajni'i ridxín ga naguéla'të luyú,

en le tu'sedi ridxín idútē yōdzōlió.
 Ga na' nacuá' nuzōē' Dios xilataj gubidza,
 5 le naca ca tu bōnni' utsaga nē'ē rirúajē' yu'u,
 en naca ca' ca tu bōnni' nál-la rudzéjanē' cate' zéajē' carelō lu huitaj.
 6 Ga nague' lúxiba rilén gubidza,
 en ridōdi ga ridxintē ga ribía.
 Biti' bi zoa le cabí rutsē'e gubidza na'.

7 Tsahui' naca ca rinná bē'ē Xanru', en run ga huóaca ládxi'ru'.
 Idútē li naca didza' nuzōē' Xanru', le run ga réajni' i nu naca nōxaj ládxi'.
 8 Tsahui' nácagaca xibá queē' Xanru', le tun ga rudzeja ládxi'ru'.
 Nácagaca idú dxi'a le gunná bē'ē Xanru', en ta'gú'u bení' icja ládxi'do'oru'.
 9 Dxi'ado' naca gádxiru'-nē' Xanru', para sóatica'siru'.
 Idú li naca ca ruchi'a rusōrōē' Xanru' bōnachi, en idú tsahui'.
 10 Nazáca'gacatērō didza' na' ca oro, enca' ca oro ba nequi.
 Nácagacatērō zxixi ca bidxina' buz, en ca le zxixi queēba'.
 11 Didza' na' tu'zéajni' i neda', huen dxin queē'.
 Uzí'tērō xibé nu run ca rnna xtídzē'ē na'.

12 ¿Nuzxi caz gaca inōz channō richixi rinigui?
 Busólá neda' lu dul-la' nuna' le cabí gúquibe'eda' bena'.
 13 Ben chí' i neda' para cabí udōdi cuina' lu dul-la',
 para cabí inná be'e neda' lē na' naca dul-la'.
 Ní'irō ugá'ana' tsahui', en bití' ibága'a xiguia'.
 14 Ben ga ilaca didza' ruá'a, en le rizá' ládxa'a ca raza ládxi'u Li'.
 Nacu' Xana' ruzú' neda' tsutsu, en ruhuóá'au' neda'.

20

1 Rinábida'-nē' Xanru' uzē' naguē' li' cate' idxín dza qui' i sacú'u.
 Dios queē' Jacob gácalenē' li'.
 2 Rinábida'-nē' isól-lē'ē le gácalen li' le irúaj lataj lá'ayi queē'.
 Lē na' irúaj Sión gun ga gacu' tsutsu.
 3 Rinábida'-nē' tsōjnenē' yúgu'tē le gulú'u queē',
 en si' lu nē'ē le buzégui' u lahuē'.
 4 Rinábida'-nē' gunnē' quiu' tsca naca le rizē ládxi'u,
 en gunē' ga gacatē yúgu'tē le rizá' ládxi'u.
 5 Udzéjatu' cate' usólē' li',
 en uchísatu' le gaca bē' rulidztu'-nē' Dios queēru'.
 Rinábida'-nē' Xanru' gunnē' quiu' yúgu'tē le rinábinu' Lē'.
 6 Na'a nōzda' rusólē' Xanru' nu nabó cazē'.
 Riyōnnē' nu na' nabōē' ga ni' zoē' yehua' yubá la'ayi queē'.
 Isól-lē'ē yōl-la' huáca idú queē' le usólá nu na'.
 7 Nacuá' nupa tu'zxōni ládxi' yugu' carreta que gudil-la,
 ate' nacuá' bōnachi yúbōlō tu'zxōni ládxi' yugu' bōa',
 pero rē'u ruzxōni ládxi'ru' Lē' Xanru' Dios.
 8 Ta'cuídí'nē' nupa na', en ta'dzō'ē,
 pero rē'u ni zuíru', en zóaru' tsutsu.

9 Busólá netu', Xan, tu' nacu' Nu rinná be'e netu'.
 Rinábitu' Li' uzē' nagu' netu' cate' ulídzatu' Li'.

21

1 Rudzéjanē' bōnni' rinná bē'ē tu' zóalen lē' yōl-la' huáca quiu' Li', Xan.
 Tu' busóló' lē', yēnni'tērō rudzéjanē'.
 2 Bunōdzju' queē' le rizē ládxi'ē.
 Bití' gudá'bagu'u le gunábinē' Li'.
 3 Tu' raza ládxi'u lē' ruzú' queē' yugu' le naca dxi'a.
 Nudxiú' icjē' tu le néquini oro idú.
 4 Gunábinē' Li' gu'u queē' yōl-la' na'bán, ate' bē'u le queē'.
 Nunú' ga sóatica'sē' ibanē' yugu' dza si' zaca.
 5 Zxōntē naca yōl-la' zxōn queē' tu' nusóló' lē'.
 Nunú' lē' bal, en nunu' ga nayépisē'.

⁶ Zóatica'sò le naca dxi'a nuzú' queë'.
Runu' ga rudzėjade'enë' tu' zóalenu' lë'.

⁷ Caní raca queë' bönni' na' rinná bē'ē tu' ruzxōni lādxe'ē Xanru'.
Biti' bi utsá' lë' tu' ruhuéchi' lādxe'ē Dios nayēpisētēre' lë'.

⁸ Huadeli' no'o ga nacua' yúgu'tē nupa ta'dá'baga' Li'.
Huadeli' no'o ibēla ga nacua' nupa tu'dí'i Li'.

⁹ Cate' idxín dza usiúdxu' léguequi gaca quéguequi ca tu guí' ruzegui bla'do'.

Usunítui' léguequi, Xan, lu yöl-la' rilé quiu',
ate' tséguiguequi tu lu guí' zxön.

¹⁰ Ucuítu' yugu' xzi'ini xi'sóagaca nupa na' luyú ni,
en ubéaju' yugu' xzi'iniguequi ladjagaca bönachi.

¹¹ Caní gunu' tu' gulë'ëniaguequinë' ilu'ē dō' quiu'.

Gulún xtídza'gaquië' bi ilunë', pero bití' gaca ilunë' ca rnna xtídza'gaquië',

¹² tu' gunu' Li' ga ulu'zxúnnajë'.

Ichisu' uxiti' yaga quiu', en gunu' léguequi huë'.

¹³ Len yöl-la' huáca quiu', Xan, uxicju' lu gudil-la.

Gúl-latu', en cú'utu' yöl-la' ba que yöl-la' huáca quiu'.

22

¹ Dios quia', Dios quia', ¿bizx que nusán no'o neda'?

¿Bizx que bití' riyönnu' le rinnēda' lādxa'a, en bití' rácalenu' neda'?

² Dios quia', idú dza rulidza' Li', pero bití' bi didza' rubi'u.

Idú yēla rulidza', en bití' ca' rasia'.

³ Lá'ayi nacu' Li'.

Zu' ga riyön yöl-la' ba ta'gú'u bönachi Israel Li'.

⁴ Bulu'zxōni lādxe'ē xuz xtó'otu' Li'.

Bulu'zxōni lādxe'ē Li', ate' busöló' légaquië'.

⁵ Bulu'lidzë' Li', ate' gúcalenu' légaquië'.

Bulu'zxōni lādxe'ē Li', en bití' bulu'tuí'inë'.

⁶ Naca' neda' ca tuba' bēla guna', en calēga bönni'.

Tu'dí'i bönachi neda', en tu'cá'ana neda' cá'asō.

⁷ Yúgu'tē nupa ta'lé'e neda' tu'titaj neda'.

Ta'salaj ruí'iguequi lu yöl-la' rutitaj, en tu'tá ícjaguequi, ta'nná:

⁸ "Lë' buzzōni lādxe'ē Xanru' para usölë' lë'.

Xanru' usölë' lë' channō tsaza lādxe'ē lë'."

⁹ Nacu' Li' Nu guléaj neda' lë'ēnu xiná'a.

Benu' ga ruzxōni lādxa'a Li'

cate' ni' gúdxá'a luchú'unu xiná'a.

¹⁰ Nagá'ana' lu no'o Li' ga gudéla'tē gulja'.

Ga gudéla'tē buzóanu xiná'a neda' nacu' Dios quia'.

¹¹ Bití' su' zi'tu' ga ni zoa', tu' zoa gagu le gun neda' zi',

ate' cúnturō nu zoa nu gácalen neda'.

¹² Gula'gu'ē neda' lë'ajlō ca tunba' yugu' bēdxi.

Ca yugu' bēdxi que yōdzō Basán gula'bía dī'ē neda'.

¹³ Ta'salaj ruá'agaquië' lahua' neda'

ca runba' bēdxi guíxi', ridunba', en ribōdxi'aba'.

¹⁴ Nuhuóaca' ca nisa nalalaj luyú, ate' nazángaca bēch dxita quia'.

Nuhuóaca lādxi'da'ahua' ca bidxina' buz la lu lë'a.

¹⁵ Nacuidi' yöl-la' huáca quia' ca tu rō'ō nalá'a,

ate' da' lúdxa'a chichja'.

Nuzú' neda' lu bēchtō yu que yöl-la' guti.

¹⁶ Ta'gu'ē neda' lë'ajlō ca tunba' yugu' bō'cu'.

Nagú'ugaquië' neda' lë'ajlō bönni' tu'ē dō'.

Nuzóagaquië' yeru blaga na'a, en ni'a.

¹⁷ Nalá gaca yúgu'tē dxita néquinida'.

Ta'në'ē neda', en tu'yú yénnië' neda'.

¹⁸ Ta'guisië' zxa' que queégaquië',

en tu'yú' le gaca bē' lahui lari' rixóa cúdza'a.

¹⁹ Bití' gá'anu' zi'tu', Xan.

Gúcalentë neda', Li', Nu naca yöl-la' huáca quia'.

²⁰ Busölá neda' lu guié tuchi'.

Busölá yöl-la' na'bán quia' lu ruá'agacaba' bö'cu'.

²¹ Busölá neda' lu ruá'agacaba' bēdxi guixi',

en lu lúzugacaba' bēdxi gú'una.

Li' riyón quézinu' chí'a.

²² Usiyönda' yugu' böchi' luzá'a ca naca Lo'.

Gatsaj láhui'lō ga na' tu'dubi bōnachi lo' cu'a Li' yöl-la' ba.

²³ ¡Guli'cu'ë Xanru' yöl-la' ba, libí'ili' na' rádxili'-nē'!

¡Guli'gun zxōn Lē', yúgu'tēli' xzí'ini xí'sóē' Jacob!

¡Guli'gadxi Lē', yúgu'tēli' xzí'ini xí'sóē' Israel!

²⁴ Caní ral-la' gunli' tu' cabí bucá'anē' cá'asō,

en bití' budí'inē' nupa gula'guí'i gula'zaca',

en bití' bucachi' lahuē' para cabí ilé'enē' léguequi,

pero cate' bulu'lidza Lē', biyōnnē' léguequi.

²⁵ Cu'a Li' yöl-la' ba ga tu'dubi bōnachi guizxi yu lo'.

Lógaca nupa tadxí Li' usudxina' le guzxi' lu na'a guna' quíu'.

²⁶ Ilágugaca nupa náagaca nōxaj ladxí', en ulu'huölaj ulu'dzē'e.

Nupa ta'guilaj Xanru', en ta'gú'u Lē' yöl-la' ba ulu'zí'tica'sō xibē'.

²⁷ Bōnachi idútē yōdzōlió tsōjnégaca Xanru', en ulu'huóaca queē'.

Bōnachi yúgu'tē yōdzō luyú ila'gú'u Lē' yöl-la' ba.

²⁸ Caní gaca tu' dē lu nē'ë Xanru' inná bē'ë.

Inná bē'enē' yúgu'tē bōnachi luyú.

²⁹ Yúgu'tē nupa dē lu ná'agaca luyú ni ilágugaca, en ila'gú'u Lē' yöl-la' ba.

Yúgu'tē nupa ila'niti ulu'zechu zxibigaca lahuē' Lē',

nupa na' bití' ca' gaca ilún chí'i yöl-la' na'bán quéguequi.

³⁰ Xzí'ini xí'sóali' ilún xichinē'.

Ila'guixjö' lē ni ca naca queē' Xanru' para ila'yōni nupa tsōjsétégaca luyú ni.

³¹ Iidē', en ulu'luí'inē' lahui náquiē' Xanru' tsahui'.

Ulu'siyōnnē' ca' nupa ral-la' ilalaj ca naca yugu' le benē' Lē'.

23

¹ Ruyú cazē' Xanru' Dios neda' ca tu nu ruyú bö'cu' zxila'.

Bití' bi riyádzjada'.

² Runē' ga ruzí' ládxa'a ca tūngacaba' bö'cu' zxila' tu'zí' ládxi'ba' gapa dēda' le iláguba'.

Ga naca ra' nisa rizá' tsahui' ládxi'do' richē'ë neda'.

³ Runē' ga ruhuóaca ládxa'a.

Richē'ë neda' ga naca nōza tsahui' tu' nadxi'inē' neda'.

⁴ Sal-la' ridá' ga zoa bōnadxi gátia',

bití' bi gádxida' tu' zóalen cazu' neda', Dios.

Len xiyaga quíu', en no'o rutipu' ládxa'a.

⁵ Ga nacuá' nupa ta'zóa regu' neda', ni' rucú'u quia' le gahua'.

Rigú'u icja' le za rilá' zxixi, en ruliru' le guí'jada'.

⁶ Le nácatē dusóalengaca neda' le naca dxi'a,

en yöl-la' dxi'i ladxí' queē' yúgu'tē dza soa' ibana',

ate' lu yu'u lidxē' Xanru' sóatica'sa'.

24

¹ Nequi queē' Xanru' Dios luyú ni, en yúgu'tē le dē lahui.

Nequi queē' yōdzōlió, en yúgu'tē nupa nacuá' ni'.

² Naguixjē' le lahui nísado' rō'ō zxánilō,

en nuzóē' xilibi luyú ga rē' zcan nísado'.

³ ¿Nuzxi caz bōnni' dē lu nē'ë cuenē' guí'a lá'ayi queē' Xanru'?

¿Nuzxi caz gaca tsaza lu lataj lá'ayi queē'?

⁴ Huáca bōnni' na' naca dxi'a ca runē', en ca rizá' ládxi'ë,

bōnni' na' bití' runē' bal budó' guí'j budó' yaga,

en bití' rizi' yē'ë cate' rizi' lu nē'ë bí'gunē'.

⁵ Gunē' Xanru' ga gaca dxi'a queē' bōnni' na'.

Caní gunnë' Dios, Nu rusölá lë', en náquië' tsahui'.
 6 Caní nácagaca nupa ta'dxín lahuë' Dios,
 nupa na' ta'biga' lahuë' Dios quégaca xzí'ini xi'sóë' Jacob.

7 Guli'salaj ga nu riyaza yödzö la'ayi.
 Guli'salaj ga nu riyaza xilatjë' Dios le nuzóë' tsaz,
 ate' tsázië' Bönni' unná bë' nayëpisëtërë'.
 8 ¿Nuzxi caz Bönni' unná bë' nayëpisëtërë' na'?
 Náquië' Xanru' nál-latërë', en nápatërë' yöl-la' huáca,
 Lë', Xanru', Nu rideli' lu gudil-la.

9 Guli'salaj ga nu riyaza yödzö la'ayi.
 Guli'salaj ga nu riyaza xilatjë' Dios le nuzóë' tsaz,
 ate' tsázië' Bönni' unná bë' nayëpisëtërë'.
 10 ¿Nuzxi caz Bönni' unná bë' nayëpisëtërë' na'?
 Náquië' Xanru' Dios quéguequi ni'a në'ë guizxi yu.
 Lë' náquië' Bönni' unná bë' nayëpisëtërë' na'.

25

1 Idú ládxa'a rulidza' Li', Xan.
 2 Ruzxöni ládxa'a Li', Dios quia'.
 Ben ga cabí utuf'ida',
 en cabí ulu'dzeja nupa biti' ta'lé'e neda' dxi'a.
 3 Biti' ila'bö' böniga nupa tun löza Li',
 pero ulu'tuf'i nupa ta'dá'baga' xtídz'u.
 4 Buluf'i neda' le ré'ënu' guna', Xan,
 en buzéajni'i neda' le raza ládxa'u Li'.
 5 Busedi neda' para guna' ca naca le naca idútë li quiu'.
 Tu' nacu' Dios, Nu rusölá neda'
 gúntica'sa' löza Li'.
 6 Yöjnë ca naca yöl-la' dxi'i ladxi' quiu', Xan,
 en yöl-la' ruhuéchi' ladxi' quiu', yugu' le nacuá'tica'sö.
 7 Buniti lo neda' ca naca dul-la' bena',
 en le gudá'baga'a Li' cate' ni' zoa' iz cuidi' quia'.
 Lu yöl-la' ruhuéchi' ladxi' quiu',
 en yöl-la' dxi'i ladxi' quiu' yöjnë neda', Xan.

8 Náquië' Xanru' dxi'a tsahui', en li ladxi'.
 Que lë ni na' rulu'inë' nupa tun dul-la' le ral-la' ilún.
 9 Ca naca le naca tsahui' richë'ë Dios nupa nácagaca nöxaj ladxi',
 en rulu'inë' nupa nácagaca do' ladxi' le ré'ënë' ilún.
 10 Lu yöl-la' ruhuéchi' ladxi' queë', en yöl-la' rusudxín didza' queë',
 richë'ë Xanru' nupa tun ca rinná bë' xibá naguixjë',
 en ca naca didza' rucá'ana tsahui' nunë'.

11 Tu' nacu' dxi'i ladxi', Xan,
 buniti lo neda' ca naca dul-la' nuna', le naca dul-la' zxön.

12 Nupa tun bal Xanru'
 uluf'i quézinë' léguequi le naca dxi'a le ral-la' ilún.
 13 Ulu'zì' xibé le naca dxi'a gunnë' quéguequi,
 ate' guequi quégacabi' xzí'ini xi'sóaguequi luyú ni.
 14 Xanru' zóalentic'a'së' nupa tun ca rnna xtídzë'ë,
 en ruzéajni'inë' léguequi ca naca didza' rucá'ana tsahui' nunë'.
 15 Ruyútica'sa' guidë' Xanru' gácalenë' neda',
 tu' usölë' neda' lu na' nu ré'ëni sön neda'.

16 Buécja quia', Xan, en buéchi' ladxi' neda',
 tu' zoa' tuza', en nacuídida'.
 17 Nayán le tu'quí' tu'saca' neda'.
 Busölá neda' lu le ruúbi ruguf'i ládxi'da'ahua'.
 18 Buyú ca riguí' rizáca'a, en rudú ládxa'a.
 Buniti lo neda' ca naca yugu' dul-la' nabága'a.

¹⁹ Buyú ca nayán nupa tun neda' zi'.
Buyú ca tu'dí'i neda'.

²⁰ Ben chí'i neda', en busölá neda'.
Biti' gu'u lataj utuí'ida' tu' ruzxöni ládxa'a Li'.

²¹ Ben ga ilún chí'i neda' le naca idú ladxí',
en le naca li ladxí', tu' runa' löza Li'.

²² Buá'au' bönachi Israel,
Dios lu yugu' le raca quéguequi.

26

¹ Guléaj neda' tsahui', Xan, tu' runa' le naca dxi'a,
en idú ládxa'a ruzxöni ládxa'a Li'.

² Buyú lu icja ládxi' da'ahua', Xan, en guzxi' bē' neda'.
Buyú le rizá' ládxa'a, en le ribequi icja',

³ tu' richē' yöl-la' dxi'i ladxí' quiu' neda',
ate' runa' ca naca le naca idútē li quiu'.

⁴ Biti' runa' tsözxön nupa ta'z' yē',
en bití' ridálena' nupa tu'lui'sö cüinguequi tsahui'.

⁵ Biti' raza ládxa'a udúbilena' nupa tuá' dö',
en bití' guna' tuz didza' len nupa nácagaca xihui'.

⁶ Richisa na'a lo' Li', Dios, cabí dxía dö' na'a,
en idú ládxa'a ribíga'a lo bucugu quiu', Xan,

⁷ para gul-la' le guía' Li': "Xclenu"
en usiyönda' bönachi ca nácagaca le zxön nunu'.

⁸ Nadxí'ida' yu'u lidxu' ga na' zu', Xan,
enca' lataj ga na' yu'u bení' lá'ayi quiu'.

⁹ Biti' usunítíu' neda' tsözxön len nupa tun dul-la',
en bití' gütíu' neda' len nupa tuti bönachi,

¹⁰ nupa na' ta'yaza ladxí' tuá' dö',
en nacuá'tica'sö ila'guizxaj dumí para ulu'rúaj tsahui'.

¹¹ Gúntica'sa' neda' le naca dxi'a.
Buzá' ladxí' quia', en buá'uö neda'.

¹² Nuzóé' Dios neda' ga zoa' tsutsu ladja bönachi guizxi yu
nudúbigaca queé' para cu'a-nē' yöl-la' ba Xanru'.

27

¹ Náquiē' Xanru' Dios bení' quia', en Nu rusólá neda'.
¿Nuzxi caz ral-la' gádxida'?

Rapa chí'ē Xanru' Dios caz yöl-la' na'bán quia'.
¿Nuzxi caz gaca gun ga gadxi idzóbida'?

² Cate' gula dá'baga' neda' nupa tuá' dö' para iluti neda',
nupa na' bití' ta'lé'e neda' dxi'a, en tu'dí'i neda',
yöjchégu'gaca, en yöjbíxigaca.

³ Sal-la' ila' dá'baga' neda' bönachi guizxi yu,
biti' ca' tsaza yöl-la' radxi ládxi' da'ahua'.

Sal-la' ila'díl-lalen bönachi neda',
naca' neda' tsutsu ladxí'.

⁴ Tu le rinaba' lahuē' Xanru' Dios, lē na' güí'i ládxi'sa',
le naca para sóatica'sa' lidxē' Xanru' yúgu'tē dza soa' ibana',
para gaca uyúa' yöl-la' lachi queē' Xanru' Dios,
en para sa' ládxa'a ca naca queē' lu yu'u lá'ayi queē'.

⁵ Cate' idxín dza soa bönadxi quia', ucáchē'ē Lē' neda' lu yu'u lidxē'.
Ga nagachi' lu yu'u lidxē' ucáchē'ē neda'.

Uzóé' neda' tsutsu ca tu lu guiójt'o.

⁶ Gunē' ga ucul-la' nupa tu'dí'i neda',
ate' lu yöl-la' rudzeja quia' códxí'atica'sa'
cate' bi unödza' queē' lu yu'u lidxē'.

¡Gul-la' queē'! ¡Ön, gul-la' queē' Xanru' yöl-la' ba!

⁷ Buzé' nagu', Xan, cate' ulidza' Li'.

Buzá' ladxí' quia', en bubí'i didza' ca naca le inábida' Li'.

⁸ Cate' Li' gudxu' neda': "Buguilaj neda'",

idú ládxa'a bubi'a didza', gunnía': Uguilja' Li', Xan.

⁹ Biti' ucachi' lo' lahua' neda'.

Biti' ta'bagu'u neda' lu yöl-la' rilé quiu'.

Li' nacu' Nu rácalen neda'.

Biti' ucá'anu' neda', en bití' usán no'o neda'.

Nacu' Dios, Nu rusölá neda'.

¹⁰ Huáca ulu'sán ládxë'ë xuz xiná'a neda',

pero uzí' cazë' Xanru' Dios neda'.

¹¹ Busedi neda' para guna' ca rë'ënu' Li', Xan.

Buluf'i neda' para guna' le naca tsahui',

tu' nacuá' nupa ta'dá'baga' neda'.

¹² Biti' usanu' neda' lu ná'agaca nupa bití' ta'lé'e neda' dxi'a

para cabí ilún quia' le té'ëni.

Ta'dá'baga' neda' nupa ta'zí' yë',

en nupa té'ëni iluá' dö' quia'.

¹³ Guzxi' lu në'ë Xanru' Dios gunë' ga ilé'eda' le naca dxi'a,

en le naca tsahui' queë' ga nacuá' nupa nabángaca.

La'tu' cabí réajlë'a lë ni, chibóaj ládxa'a.

¹⁴ ¡Guli'gún lözë' Xanru'!

¡Guli'gaca tsutsu, en bulí'tipa ládxi'li'!

¡Ön, guli'gún lözë' Xanru'!

28

¹ Rulidza' Li', Xan.

Nacu' Guiöj le ruzóa neda' tsutsu.

Ruzë nagu' chí'a, tu' channó usayju' ru'u,

gaca' ca tu bönni' razië' lataj chul-la.

² Ruzë nagu' le rulidza' Li' cate' rinábida' Li' gácalenu' neda',

cate' richisa' na'a zaca' Lataj Lá'ayi ga na' zu'.

³ Biti' ichë'u neda' tsözxön len nupa tuá' dö',

en tsözxön len nupa náagaca xihui',

nupa na' tuí'i didza' dxi'a lahui' lógaca dzaga yu'u quéguequi,

pero yu'u ládxi'do'guequi le cabí naca tsahui'.

⁴ Bubi'i quéguequi tsca naca le tun, en tsca naca dö' ruí'igaca.

Bubi'i quéguequi tsca naca le tun në'eguequi.

Bubi'i quéguequi tsca ral-la' gaca quéguequi.

⁵ Caní gaca quéguequi tu' cabí tun bal le nunë' Xanru',

en bití' tun bal le nun në'ë.

Uquínnajë' léguequi, en bití' ca' uchisë' léguequi.

⁶ ¡Yöl-la' ba Xanru',

tu' riyönnë' cate' rinábida' Lë' gácalenë' neda'!

⁷ Xanru' caz náquië' yöl-la' huáca quia', en le run chí'i neda'.

Ruzxöni ládxa'a Lë', atë' rácalenë' neda'.

Que lë ni na' ruzí' xibë' ládxi'da'ahua',

atë' gul-la' le guía' Lë': "Xclenu'."

⁸ Naca cazë' Xanru' yöl-la' huáca quéguequi bönachi queë',

en náquië' ca' Nu run chí'i Bönni' na' bubéajë' quez queë' para inná bë'ë.

⁹ Busölá bönachi quiu', Dios, en ben ga gaca dxi'a quéguequi nupa néquiquequi quiu'.

Ben chí'i léguequi ca run tu nu ruyú bö'cu' zxila', en guchë'tica'sö léguequi.

29

¹ ¡Guli'cu'ë yöl-la' ba Xanru', libí'ili', nácali' zxi'inigaquië' bönni' nayëpisëgaquië'!

¡Guli'cu'ë yöl-la' ba Xanru', en guli'guië': "Napu' yöl-la' huáca idú"!

² ¡Guli'cu'ë yöl-la' ba Xanru' le ral-la' gata' que Lë' tu' náquië' lá'ayi!

¡Guli'gún bal Xanru', tu' naca lachi le naca lá'ayi queë'!

3 Riyón chi'è Xanru' lu nísado'.
 Riyón chi'è Xanru' nayëpisë' ca riyón guziú' rinnë.
 Riyón chi'è Xanru' lu nísado'.
 4 Nál-latërö naca chi'è Xanru'.
 Nayëpisëtërö chi'è Xanru'.
 5 Chi'è Xanru' rilá'a yugu' yaga zxön.
 Öñ, chi'è Xanru' riguitsaj yugu' yaga lu guí'a Líbano.
 6 Runë' Xanru' ga ta'xiti' guí'a ca tunba' bëdxido'.
 Ta'xiti' guí'a Líbano, en guí'a Sirión ca tunba' bëdx guí'a.
 7 Chi'è Xanru' run ga rëpi yösa.
 8 Ruxizi chi'è Xanru' la' guixi' ga dë lataj.
 Ruxizi chi'è Xanru' la' guixi' nazí'i le Cades.
 9 Chi'è Xanru' run ga ta'bëquiba' bidxina' guixi' böa' huë'ënido' quégacaba',
 en run ga ta'guinnaj yúgu'të laga' dxiágaca yugu' yaga.
 Lu yudo' queë' tuí'i didza' yúgu'të le nacua', ta'nná: "¡Yöl-la' ba Lë'!"
 10 Gurö'ë gunná bë'è Xanru' cate' gurö'ö nisa lu idütë yödzülió.
 Öñ, rö'ë rinná bë'tica'së' Xanru'.
 11 Rutipë' Xanru' ládxi'do' gaca bönachi queë'.
 Gunë' Xanru' ga gaca dxi'a quégaca bönachi queë',
 en gunë' ga ila'böza dxi'a tsáhui'do'.

30

1 Guna' Li' zxön, Xan, tu' buchisu' Li' neda',
 en biti' bë'u lataj bi ilún quia' nupa biti' ta'lé'e neda' dxi'a.
 2 Rigu'a Li' yöl-la' ba, Xana' Dios,
 tu' bulidza' Li' gácalenu' neda', ate' bunu' neda'.
 3 Bubéaju' yöl-la' na'bán quia' lu yeru ba, Xan.
 Runu' ga zoa' nabana', para cabi tsu'a lataj chul-la ga dzö'ö nupa nátigaca.

4 ¡Guli'gul-la yöl-la' ba queë' Xanru', libí'ili' néquili' quez queë'!
 ¡Guli'guíë: "Xclenu'" ca naca Lë' le naca lá'ayi!

5 Tu chí'isö rilenë',
 pero ruzá' ládxi'tica'së' queëru'.
 Channö cödxiru' tu yëla,
 lu yöl-la' rudzeja queëru' cödxu'aru' itö yu.

6 Cate' guca dxi'a quia', ní'irö gunní'a':
 "Gatga bi utsá' neda'."
 7 Tu' buzá' ládxi'u quia', Xan, buzú' neda' ga zoa' tsutsu,
 en cate' bucachi' lo', gurö'a böniga.
 8 Bulidza' Li', Xan,
 en gúta'yua' lo'.
 9 ¿Bizxi xibé uzi'tso' channö gátia', en tsöjtsázia'
 lataj chul-la ga dzö'ö nupa nátigaca?
 ¿Naru' huácatsö cu'a Li' yöl-la' ba channö huóaca' bëchtö yu?
 ¿Naru' huácatsö ulu'a lo le naca idú quiu'?
 10 Ruzé nagu', Xan, en ruzá' ládxi'u quia'.
 Gúcalen neda', Xan.
 11 Buí'inida', ate' benu' ga buyá'a lu yöl-la' rudzeja quia'.
 Bugú' lari' cá'asö gúcua', en bugacu' neda' le ruzi'a xibë.
 12 Bil-la bö' naca caza' yöl-la' ba quiu', en biti' soa dxisö.
 Guíëtica'sa' Li': "Xclenu'", Xana' Dios.

31

1 Ruzxöni ládxa'a Li', Xan.
 Biti' gu'u lataj utuí'ida'.
 Tu' nacu' tsahui', busölá neda'.
 2 Ruzé nagu' quia', en rusöló' neda'.
 Gacu' ca tu guiöjto'o ga soa' tsutsu,
 en ca tu ga soa' dxi'a tsáhui'do' lu gudil-la.
 3 Nacu' Li' guiöjto'o ga zoa' tsutsu, en le run chí'i neda'.

Para gaca yöl-la' ba que Lo' guchë' neda', en buluf'i neda' le dxi'a guna'.

⁴ Ubéaju' neda' lu du yalaj nucáchi'gaquië' bönni' tu'ë dö',

tu' nacu' Li' yöl-la' nál-la quia'.

⁵ Rigu'a lu no'o bö' naca caza'.

Bôá'au' neda', Xan, Dios idú.

⁶ Biti' rilé'eda' dxi'a nupa tun zxön budó' guiöj budó' yaga,

pero neda' ruzxöni ládxa'a Li', Xan.

⁷ Udzéjada', en uzi'a xibë yöl-la' dxi'i ladxi' quiu',

tu' bilé'e quézinu' le gudí'i guzxáca'a.

Nöz quézinu' yugu' le raca quia'.

⁸ Biti' bucá'anu' neda' lu na' nu bití' rilé'e neda' dxi'a,

pero nuzú' neda' tu lataj ga zoa' tsutsu.

⁹ Buzá' ladxi' quia', Xan, tu' zoa tu le raca quia'.

Lu yöl-la' ruhuí'ini quia' ribödxá', en rudú ládxa'a.

¹⁰ Riyechi' dza quia' tu' ruhuí'inide'eda',

en tu' rinnë ládxa'a, en riyechi' iz quia'.

Rudú ládxa'a tu' nözi dö' nu'a,

ate' nadxita idútë le naca'.

¹¹ Tu' nözi le gulún nupa ta'dá'baga' neda'

naca' tu le run gadxi yugu' dzaga yu'u quia',

ate' nupa nünbë'gaca neda' tadxi neda'.

Nupa ta'lé'e neda' la' nöza ta'zxunnaj ga rizá'a.

¹² Nál-la ládxi'gaca neda' ca nál-la ládxi'gaca nupa chinátigaca.

Naca' ca tu rö'ö nayuzxaj naguinnaj.

¹³ Biyönda' didza' zi' ta'nnë bönnachi zían quia' bagáchi'sö.

Gátitës zoa le run gadxi neda'.

Tun xtídza'gaca bi ilún quia'.

Ta'zá' ládxi'gaca nacxi iluti neda',

¹⁴ pero neda' ruzxöni ládxa'a Li', Xan.

Rnnía' nacu' Dios quia'.

¹⁵ Yú'ugaca lu no'o yúgu'të dza soa' ibana'.

Busólá neda' lu ná'agaca nupa bití' ta'lé'e neda' dxi'a,

en lu ná'agaca nupa ta'zóa regu' neda'.

¹⁶ Lu yöl-la' ruzá' ladxi' quiu' buyú neda', huen dxin quiu'.

Lu yöl-la' dxi'i ladxi' quiu' busólá neda'.

¹⁷ Biti' gu'u lataj utuf'ida', Xan, tu' rulidza' Li'.

Ben ga ulu'tuí'i nupa tuá' dö'.

Ben ga ila'cuá' dxisö lu yeru ba.

¹⁸ Ben ga bití' gaca bi inná nu rizí' yë',

nu na' rinnë zi' queë' bönni' tsahui',

en run ba zxön cuini, en rulidza ditaj luzë'e.

¹⁹ jBica' zxön yöl-la' dxi'i ladxi' quiu',

lë na' napu' para gácalenu' nupa tadxi Li'!

Runu' caní quégaca nupa tu'zxöni ladxi' Li'

lógaca nupa tun ba zxön cuíniguequi.

²⁰ Rucáchu'u légaquië' ga na' zu' bagáchi'sö,

ga bití' gaca idxín nu bönni' xihui'.

Run chí'u légaquië' bagáchi'sö ga bití' gaca idxín didza' bizxaj.

²¹ jYöl-la' ba Xanru' Dios,

tu' buluf'inë' neda' ca nadxí'inë' neda' cate' ni' zoa' tu yödzo

ga nagú'ugaquië' lë'ajlô bönni' tu'tíl-lalenë' neda'!

²² Lu yöl-la' radxi ridzöbi quia' gunnía': "Ílútië' neda' lo' Li', Xan",

pero biyönnu' le gunábida' Li', cate' nì' bulidza' Li'.

²³ jGulí'dxí'i-në' Xanru', libí'íli' néquili' queë'!

Rapa chí'ë Xanru' nupa ta'yéajlë' Lë',

en rubí'ë ca sa'yéaj queë' bönni' run ba zxön cuinë'.

²⁴ jGulí'gaca tsutsu, en bulí'tipa ládxi'lí',

yúgu'téli' na' runlí' löza Xanru' Dios!

32

¹ ¡Bica' ba bönni' na' Dios buniti lahuë' lë' ca naca dö' bi'ë,
en bugtë' dul-la' queë'!

² ¡Bica' ba bönni' na' Dios rnnë' biti' nabáguë'ë xigua',
en biti' zóalen lë' yöl-la' rizi' yë'!

³ Cate' guzóa' dxisö ca naca dul-la' quia',
budú ládxa'a tu' gunnética'sö ládxa'a.

⁴ Rëla, en te dza buquí' busácu'u neda', Dios.
Budú ládxa'a ca raca cate' rō' böchila.

⁵ Ní'irō guxóalēpa' dul-la' nabága'a lo' Li',
en biti' bucácha'a le xihui' bena'.

Gunnía': "Ixóalēpa' dö' bi'a lahuë' Xana",
ate' buniti lo' neda' ca naca xigua' gubága'a.

⁶ Que lë ni na', nútí'tës nu nunbë' Li', Dios, ral-la' ulidza Li'
cate' dë lataj gü'ilen Li' didza'.

Cate' rō' nisa bach luyú ni, biti' ca' ideli' idxín ga zoa nu na'.

⁷ Li' nacu' ga gaca ucachi' cuina' cate' zoa bōnadxi quia'.

Li' caz gun chí'u neda' para cabí bi gaca quia'.

⁸ Li' gunu' ga gúl-latíca'sa' quíu' Li' tu' rusöló' neda'.

Rnnë' Dios: "Neda' uzéajni'ida' li', en uluf'ida' li' le ral-la' gunu'.
Usédida' li', en uyútica'sa' li'.

⁹ Biti' gacu' ca tu böa' o tu mula cabí ta'yéajni'iba'.

Ral-la' cu'u guíë en du rú'ugacaba' para inná bé'enu' légacaba'."

Channō cabí gunu' caní, biti' ca' ilunba' ca rë'ënu'.

¹⁰ Zián le tun ga tu'hu'íniguequi nupa tuá' dö',

pero bönni' ruzxöni ládxe'ë Xanru' ilé'enë' yöl-la' dxi'i ladxi' queë'.

¹¹ Bulí'dzéjalenë' Xanru', en bulí'sí' xibë', libí'ili' nácali' tsahui' lahuë' Lë'.

Lu yöl-la' rudzeja queëli' guli'cōdxi'a, libí'ili' nácali' idú dxi'a.

33

¹ Lu yöl-la' rudzeja queëli' guli'gul-la lahuë' Xanru',
libí'ili' nácali' tsahui' lahuë' Lë'.

Nupa nácacaga tsahui' ral-la' ila'gú'u Lë' yöl-la' ba.

² Guli'guíë' Lë': "Xclenu", quínnili' lë'e bihuél-la.

Guli'gul-la yöl-la' ba queë', quínnili' le zë chí du que.

³ Guli'gul-la queë' tu le rul-la cubi.

Guli'quinnaj dxi'ado', en lu yöl-la' rudzeja queëli' guli'cōdxi'a.

⁴ Xtídzë'ë Xanru' naca idú tsahui',
ate' idú ládxe'ë runë' yúgu'të bi runë'.

⁵ Nadxí'në' le naca dxi'a, en le naca tsahui'.

Nalá' lahui yöl-la' dxi'i ladxi' queë' Xanru' idútë yōdzōlió.

⁶ Len didza' bē'ësë' Xanru', benë' lúzxiba,

en benë' yúgu'të bölj bení len bö' rirúaj ru'ë.

⁷ Rutubë' nisa rō'ō nísado' para gaca ca tu guí'a.

Napa chí'ë nisa rō'ō zili ga na' nupë'ë xilataj.

⁸ Yúgu'të bōnachi ral-la' ila'dxi'i Xanru'.

Bōnachi idútë yōdzōlió ral-la' ila'cuá' nōxaj lahuë' Lë'.

⁹ Bē'ësë' didza' Xanru', ate' la' gúcatë ca na' gunnë'.

¹⁰ Gunná bē'ë, ate' guca tsutsu le nunë'.

Runë' Xanru' ga tu'huóaca cá'asó didza' tūngaca bōnachi yugu' yōdzō.

Runë' ga biti' ilaca le té'ëni ilūngaca bōnachi.

¹¹ Sóatica'sō tsutsu didza' nunë' Xanru'.

Le rizá' ládxe'ë ulu'gá'anatica'sō quéguequi xzí'ini xí'sóaru'.

¹² Bica' bágaca bōnachi yōdzō na' náquië' Xanru' cazë' Dios quéguequi,
bōnachi na' nabó cazë' Dios para ilaca quez queë'.

¹³ Zoa cazë' Xanru' yehua' yubá, ruyúë' ga zóaru'.

Rilé'enë' le tun yúgu'të bōnachi nacuá' idútë yōdzōlió.

¹⁴ Ga na' zoa cazë' ruyúë' idú gásibi'iló,

en rilé'enë' yúgu'të nupa nacuá' idútë yōdzōlió ni.

¹⁵ Nun cazë' Lë' lădxi'do'gaca yúgu'tëguequi.

Réajni'i quézinë' ca naca yúgu'të le túngaca.

¹⁶ Biti' ca' ulë' bōnni' unná bē' nacuá' queë' bōnni' guizxi yu rōjáquië' gudil-la.
Biti' ulë' bōnni' zoë' gudil-la tu' nál-latërë'.

¹⁷ Biti' nazaca' gunru' lōza bōa' para idéli'ru' lu gudil-la,
tu' cabí gaca usōlaba' nu bōnni' tu' nál-latërōba'.

¹⁸ Buli'yú, ruyútica'së' Xanru' nupa tadxí Lë',
nupa na' tun lōza yöl-la' dxi'i lădxi' queë',

¹⁹ para usölë' léguequi lu yöl-la' guti,
en para ughuë' léguequi cate' tsu'u gubín.

²⁰ Idú lădxi'ru' runru' lōza Lë' Xanru'.

Rácalen cazë' rë'u, en rapa chi'ë rë'u.

²¹ Rudzeja lădxi'lenru' Lë',
en uzxōni lădxi'ru' Lë', tu' náquië' lá'ayi.

²² Lu yöl-la' dxi'i lădxi' quiu' gúcalen netu', Xan,
tu' runtu' lōza Li'.

34

¹ ¡Innética'sa' queë' Xanru' náquië' dxi'a!

¡Cú'utica'sa' Lë' yöl-la' ba!

² Bō' naca caza' gun zxōn Xanru'.

Nupa nácacaga nōxaj lădxi' ila'yōni lē ni, en ulu'dzeja.

³ Guli'gūi' zxōnë' Xanru' tsōzxōn len neda',
en tsōzxōn usiyōnru' bōnachi ca naca Lë' La'ayi.

⁴ Bulidza'-në' Xanru', ate' bubi'ë didza' quia',
en busölë' neda' lu yugu' le gúdxida'.

⁵ Nupa nácacaga queë' bila'dxín lahuë', en bulu'zí' xibë'.

Biti'rō caz ulu'tuí' nupa na'.

⁶ Bulidza'-në' Xanru', ate' biyōnnë' quia' neda', bōnni' yechi',
en busölë' neda' lu yúgu'të le guca quia'.

⁷ Gubáz lá'ayi que ya'abá queë' Xanru' tapa chi'ë nupa tadxí Lë',
en tu'sölë' léguequi lu yúgu'të le raca quéguequi.

⁸ Guli'sí' bē'ë, ate' inōzili' náquië' Xanru' dxi'a.

¡Bica' ba bōnni' ruzxōni lădxë'ë Lë'!

⁹ Guli'gadxi Xanru', libí'ili' nácali' quez queë',
tu' cabí bi ila'yadzaj nupa tadxí Lë'.

¹⁰ Ta'yadzaj ta'yúdxiba' bēdxi guixi', en ta'dunba',
pero nupa tu'lidza Xanru' bití' ca' ta'yadzaj le naca dxi'a.

¹¹ Guli'dá libí'ili', bí'ido', en buli'zë nágali' xtídza'a.

Uzéajni'ida' libí'ili' para gádxili'-në' Xanru'.

¹² ¿Nuzxi caz bōnni' rē'ënë' soë' ibanë',
en rē'ënë' soë' iz zían para uzi'ë xibë le naca dxi'a?

¹³ Ben chí'i lúdxu'u para cabí gu'u didza' xihui',
en para cabí si' yé'enu' luzó'o.

¹⁴ Bucá'ana le cabí naca tsahui', en ben le naca dxi'a.

Bē' lădxi' cōzu' dxi'a tsáhui'do',
en ben bayudxi gunu' yugu' lē ni.

¹⁵ Ruyútica'së' Xanru' nupa nácacaga tsahui',
en riyōn quézinë' cate' tu'lidza Lë'.

¹⁶ Uzáguë'ë Xanru' xinōzgaca nupa tuá' dō',
en gunë' ga cuntu nu tsōjné' léguequi.

¹⁷ Nupa nácacaga tsahui' tu'lidza Xanru', ate' riyōnnë' quéguequi,
en rusölë' léguequi lu yugu' le raca quéguequi.

¹⁸ Xanru' zóalen cazë' nupa tu'huí'ini lădxi',
en rusölë' nupa nácacaga nōxaj lădxi'.

¹⁹ Zían le riguí'i rizáquë'ë bōnni' tsahui',
pero Xanru' rusölë' lē' lu yúgu'të lē na'.

²⁰ Xanru' rapa chi'ë yúgu'të dxita yu'ë,
ate' bití' gatsaj nitú dxita queë'.

²¹ Le xihui' run nu ruá' dö' gun ga gati nu na',
ate' ila' бага' xigua' nupa biti' ta' lé' e dxi' a le naca tsahui'.
²² Xanru' caz ruhuóá' ué' bö' nácgaca caz huen dxin queé',
ate' biti' irugu que nitú nupa na' tu' xzöni ladxí' Lè'.

35

Tu le bil-lè' David

¹ Xana' Dios, gudá' бага' nupa biti' ta' lé' e neda' dxi' a.
Butíl-lalen nupa ta' díl-lalen neda'.
² Guzxón le gun chí' i neda' lu gudil-la,
en gudá' gácalenu' neda'.
³ Guzxón yaga tuchi' quiu' para uzagu' u xinözguequi nupa ta' zóa regu' neda'.
Gudxi bö' naca caza' nacu' Li' Nu rusölá neda'.
⁴ Ben ga ulu' tuí' i, en ulu' gá' ana cá' asö nupa té' éni iluti neda'.
Ben ga ulu' huécaj, en ulu' gá' ana cá' asö nupa té' éni ilufi dö' quia'.
⁵ Ben ga ilaca ca bëbu zxe café zeaj lu bö' ös,
en ben ga ulaguë' gubáz lá' ayi que ya' abá quiu' léguequi.
⁶ Ben ga gaca chul-la nöza yú' ugaca, en ga cuílagaca,
ate' soa régu' è gubáz lá' ayi quiu' léguequi.
⁷ Bulu' cáchi' du yalaj le sön neda', en biti' bi nuna' quéguequi.
Gula' chö' öna yeru ga tsöjbixa', en biti' bi nuna' quéguequi.
⁸ Ben ga idxín quéguequi tsáldo' os le usuniti léguequi,
en ben ga du yalaj na' bulu' cáchi' sön la' cuínguequi quez.
Ben ga ila' bixi lu yeru na' gula' chö' öna.

⁹ Udzeja ladxí' lena'-nè' Xanru',
en uzi' a xibé yöl-la' rusölá queé'.
¹⁰ Ila' nná dxita néquinida': "Xan, ¿nuzxi caz naca ca nacu' Li'?"
Rusöló' nu riguí' i rizáca' lu na' nu nál-latèrö ca le.
Rusöló' nu riguí' i rizáca', en riyadzaj riyudxi lu na' bönni' ribanè' le nequi que."

¹¹ Ta' dá' bagué' è bönni' xihui' neda', en ta' nnè' quia'.
Ta' nabi yúdxiné' neda' ca naca yugu' le cabí nözda'.
¹² Tu' bi' è quia' le naca dö' cate' runa' le naca dxi' a,
ate' ruhui' inide' e ládxa' a.
¹³ Pero neda' gúcuá' lari' cá' asö cate' guláquiè' hué'.
Bena' gubasa, en busaca' zi' bö' naca caza',
en uláz quéguequi bulidza'-nè' Dios zían luzuí.
¹⁴ Buí' inide' eda' tsca guca luzá' a o bi' i böchi' caza' nu na' guca hué'.
Guródxi yecha' a ca hui' inide' eda' channó gátinu xiná' caza',
¹⁵ pero cate' guchixi guníguida' neda', bulu' dzéjade' e, en bulu' dubi tsözxön.
Yugu' bönni' na' bulu' cá' anè' neda' cá' asö bulu' dubè' para ilunè' ga có' a baguí'.
Yugu' bönni' na' biti' núnbè' a gulúnnatica' sè' neda'.
¹⁶ Bulu' saca' zi' è neda', en bulu' titjè' quia'.
Lu yöl-la' rilé quégaquiè' neda' gulagu zxea láyi' gaquiè'.
¹⁷ Xan, ¿gáca' xte caz uyú iná' asu' le tunè' ?
Busölá neda' lu dö' tu' è quia'.
Busölá neda' lu ná' agaquiè' bönni' na' nácgagué' ca yugu' bëdxi guixi'.
¹⁸ Guía' Li': "Xclenu' lógaca bönachi zían ulu' dúbigaca quiu'.
Cu' a Li' yöl-la' ba ga nudúbigaca ziantè bönachi.
¹⁹ Biti' gu' u lataj ulu' dzeja nupa ta' dá' бага' neda', en ta' zí' yé',
en biti' gu' u lataj ulu' titaj quia', nupa na' tu' dí' i neda', en biti' bi nuna' quéguequi.
²⁰ Catu caz tuí' i didza' le gun ga soa dxisö didza' bizxaj.
Lu yöl-la' rizí' yé' quéguequi ta' nnè' quégaca nupa ta' bö' dxi' a tsáhui' do' yödzüliö ni.
²¹ Bulu' salaj ruí' guequi, en gula' nnè quia', gula' nná:
"¡Ön, bilé' e quézitu' le nunè' !"
²² ¡Bilé' e quézinu' Li' lè ni, Xan! ¡Biti' su' dxisö!
¡Biti' uca' anu' neda', Xan!
²³ ¡Guyasa, Xan! ¡Busubán ládxi' u, Xan, para uchi' a usöröu' quia' !
¡Gúcalen neda', Xana' Dios!
²⁴ ¡Tu' nacu' tsahui', buchí' a busörö quia', Xana' Dios!
¡Biti' gu' u léguequi lataj ulu' dzeja ni' a que le raca quia' !

²⁵ jBiti' gu'u léguequi lataj ila'nna:

“Ön, bidéli'ru' le guzê ládxi'ru'!”

jBiti' gu'u lataj ila'nna: “Chibucúl-laru' lè'!”

²⁶ jBen ga ulu'tuí'i, en ulu'gá'ana cá'asô nupa tu'dzeja cate' ruhuí'inida'!

jBen ga ulu'tuí'i, en ulu'gá'ana cá'asô nupa ta'dá'baga' neda'!

²⁷ jBen ga ila'bódxí'a lu yöl-la' rudzeja quéguequi,

en ulu'zí' xibé nupa tuí'i ládxi'gaca urúaja' tsahui'!

jBé' lataj ila'nnática'sô: “Nayépisetêrê' Xanru' Dios,
tu' raza ládxê'ê gunê' ga gaca dxi'a quégaca huen dxin queê'!”

²⁸ Ní'irô guna' ba nalí quiu', innía': “jNacu' tsahui'!”

en cu'a Li' yöl-la' ba idú dza.

36

¹ Le naca xihui' ruí'ilen bönni' nucá'anê' Dios lu icja ládxi'da'ahuê'.

Biti' ca' rádxinê' Dios.

² Tu' run ba zxôn cuinê'

réquinê' bití' nözínê' Dios nabáguê'ê lè' dul-la', en bití' ichúguiê' Dios queê'.

³ Ru'ê didza' xihui', en rizí' yê'ê.

Biti' réajni'inê', en bití' runê' le naca dxi'a.

⁴ Cate' ní' dè' lu le ráti'nê' rizá' ládxê'ê ca naca le xihui' gunê'.

Ruí'i ládxê'ê gunê' le cabí naca dxi'a,

en bití' rusanê' runê' le naca xihui'.

⁵ Zxöntêrô ca yehua' yubá naca yöl-la' dxi'i ladxi' quiu', Xan,

ate' gúntica'su' ca rnna xtídz'u, tsca zoa yehua' yubá.

⁶ Naca tsutsu le tsahui' nacu' ca nácagaca tsutsu yugu' guí'a zxôn quiu'.

Ca ruchí'a rusórôu' naca ca naca nísado', tu' cabí gaca nu gúnbê'e le.

Run chí'i cazu' bônachi, en yugu bôa' guixi', Xan.

⁷ Nazáca'têrô yöl-la' dxi'i ladxi' quiu', Dios.

Run chí'u yúgu'tê bônachi ca runba' yôjede, run chí'iba' yugu' bôrado' zcan xílaba'.

⁸ Tu'huölaj tu'dzê'e bônachi quiu' le nayánda' lu yu'u lidxu',

ate' ruguí'ju' léguequi le naca yöl-la' dxi'i ladxi' quiu'.

⁹ Yúgu'tê le nacuá' nabánigaca Li'.

Tu' naca cazu' bení' rilé'etu' bení'.

¹⁰ Bidxi'ítica'sô nupa núnbê'gaca Li',

en ben le naca dxi'a quégaca nupa nácagaca tsahui'.

¹¹ Biti' gu'u lataj bi ilún quia' nupa tun ba zxôn cuínguequi,

en bití' gu'u nupa tuá' dô' lataj ulu'laga' neda'.

¹² Nadzô'ögaca nupa tuá' dô'.

Déguequi luyú, en bití' ca' gaca ulu'huóása.

37

¹ Biti' ubi uguí'i ládxi'do'oli' tu' tu'zí'gaca xibé nupa tuá' dô'.

Biti' uzxé'eli' nupa bití' tun le naca dxi'a.

² Huadôditê quéguequi ca raca que guixi' nacuadi,

en udxí quéguequi ca raca quégaca guixi'do' narúgugaca.

³ Buli'zxôni ládxê'ê Xanru', en guli'gún le naca dxi'a.

Buli'gá'ana luyú queê', en guli'côz dxi'a tsáhuí'do'.

⁴ Buli'sí' xibê' Xanru',

ate' gunnê' queéli' le rizê ládxi'li'.

⁵ Buli'dôdi cuinli' lu nê'ê Xanru'.

Buli'zxôni ládxê'ê Lè', ate' gunê' le gácalen libí'ili'.

⁶ Gun cazê' Lè' ga urúajli' tsahui', en gácali' ca bení',

en cate' uchi'a usórôê' queéli', gaca queéli' ca lahui' dza.

⁷ Guli'sóa dxisô lahuê' Xanru', en guli'côza le gunê'.

Biti' cuéqui ícjali' tu' nôzi bönni' ruzi'ê xibé,

bönni' na' ru'ê dô'.

⁸ Biti'rô leli', en buli'sán yöl-la' ridzá'a.

Biti' ubi uguí'i ládxi'do'oli' tu' gun lè ni ga guá'ali' dô'.

⁹ Dios caz uzáguê'ê xinózguequi nupa tuá' dô',

pero nupa tu'zxôni ladxi' Xanru', guequi quéguequi luyú.

¹⁰ Ia'látí'sô xidzé, en bíti'rô soê' bönni' na' ru'ê dô'.

Uguiljali' xilatjē', pero biti'rō soē' ni'.

¹¹ Nupa nácagaca nōxaj ladxī', guequi quéguequi luyú,
ate' ulu'zī' xibé yōl-la' tsahui' que.

¹² Tun didza' nupa tuá' dō' bi ilúngaca quégaca nupa nácagaca tsahui',
en lu yōl-la' rilé quéguequi tagu zxea láyi' guequi.

¹³ Ruzzidxi' cazē' Xanru' quéguequi,
tu' rilé'enē' dza udxī' quéguequi.

¹⁴ Nupa tuá' dō' chigula'bēaj guíē' tuchi' quéguequi,
en nuá' gaca uxiti' yaga quéguequi
para ulu'xicja nupa ta'zaca' zī', en ta'yadzaj ta'yudxi,
en para iluti nupa tun le naca dxi'a.

¹⁵ Guíē' tuchi' quéguequi ila'chiza la' ládxi'do'guequisō',
ate' ila'guítsaj uxiti' yaga quéguequi.

¹⁶ Dxi'atērō le do' dēsō' queē' bōnni' tsahui'
ca le zían dē queē' bōnni' ru'ē dō'.

¹⁷ Huayúzxjagaca ná'agaca nupa tuá' dō',
pero Xanru' caz rácalenē' nupa nácagaca tsahui'.

¹⁸ Ru'i ladxī' cazē' Xanru' nupa bitī' bi xigua' nabága'gaca,
ate' guéquitica'sō xiyúgaca quéguequi.

¹⁹ Biti' ca' ulu'tuí'i cate' idxín dza bitī' gaca dxi'a,
en cate' tsu'u gubín, gáta'dēra le ilágugaca.

²⁰ Ulu'niti tsaz nupa tuá' dō',
ate' nupa bitī' ta'lé'e dxi'a Xanru' ilaca ca yōl-la' lachi que guixi'.
La' tōditē quéguequi, en ilaca ca dzōn le rinítitē.

²¹ Ta'nábini nu bi gunna quéguequi tu chí'sō, pero bitī' ca' ulu'bí'i lē na'.
Nu naca tsahui' ruzá ladxī' quéguequi, en runōdzaj quéguequi.

²² Gaca luyú quégaca nupa run lá'ayē' Xanru',
pero ila'niti tsaz nupa rudxiē' Lē' dō'.

²³ Le runē' bōnni' dxi'a naca le nuluf'inē' Xanru' lē',
ate' raza ládxi'ē' Lē' le runē' bōnni' na'.

²⁴ Cate' rōjtsō'ē, bitī' ca' rōjtsō'ē tsaz,
tu' rōjzōnē' Xanru' caz bōnni' na'.

²⁵ Guca' ra'bando', pero na'a nagula',
en catu caz bilé'eda' nusán nē'ē Dios bōnni' tsahui',
en catu caz bilé'eda' riyadzaj le ilágubi' zxf'inē'.

²⁶ Yugu' dza ruzá' ládxi'ē' bōnni' tsahui' quéguequi luzē'ē
en runōdzjē' le ta'nábini lē' unōdzjē' tu chí'isō,
Nácagacabi' zxf'ini xī'sóē' tu le run ga raca dxi'a queēru'.

²⁷ Bulí'cá'ana le cabí' nácatē, en guli'gún le naca dxi'a.
Channō caní gunli', sóali' tsaz,

²⁸ tu' nadxf'inē' Xanru' nu run le naca tsahui',
en catu caz usán nē'ē nupa néquiquequi quez queē'.
Gun chí'itica'sē' léguequi,

pero usunítitē' zxf'ini xī'sóagaca nupa tuá' dō'.

²⁹ Guequi luyú quégaca nupa nácagaca tsahui',
ate' ila'cuá'tica'sō luyú na'.

³⁰ Ru'ē bōnni' tsahui' didza' le napa yōl-la' réajni'i,
ate' raca yōl-la' ruchi'a rusōrō ni'a que didza' na' ru'ē.

³¹ Yu'u icja ládxi'da'ahuē' le gunná bē'ē Dios.
Que lē ni na' catu caz ichixi iníguinē'.

³² Ruyuda' nu ruá' dō' le runē' bōnni' tsahui',
en riguila'j nacxi gaca guti lē'.

³³ Xanru' bitī' gu'ē nu na' lataj bi gun queē' bōnni' tsahui' na',
en bitī' gu'ē lataj irugu queē' cate' nu uchi'a usōrō queē'.

³⁴ Bulí'zxōni ládxi'ē' Xanru', en guli'gún ca rē'enē' gunli',
ate' uchisē' libí'ili' para guequi queéli' luyú.

Cate' udxī' quégaca nupa tuá' dō', hualé'e quézili' le.

³⁵ Bilé'eda'-nē' bōnni' huía' dō'.

Gúquiē' ca tu yaga zxōn, en buzí'de'enē' xibé.

³⁶ Ní'irō gudōdi queē', en bitī'rō zoē'.

Yōjdilja' lē', pero bitī' ca' guca udzōlida' lē'.

³⁷ Bulí'yú ca náquiē' bōnni' tsahui'.

Cuntu nu gaca bi innē queē',
 tu' ila'cuá'abi' xzí'ini xi'sóē' bönni' xzön ladxí'.
³⁸ Ulu'niti tsaz nupa tu' cá'ana le gunná bē'ē Dios.
 Usiúdxē' Xanru' yugu' xzí'ini xi'sóagaca nupa tuá' dö',
³⁹ pero rusölá cazē' nupa náacagaca tsahui'.
 Rutipē' ládxí'guequi cate' bi raca quéguequi.
⁴⁰ Rácalenē' léguequi, en rusölē' léguequi.
 Rubéajē' léguequi lu ná'agaca nupa tuá' dö', en rusölē' léguequi,
 tu' tu'xzöni ládxí'guequi Lē'.

38

¹ Biti' ilenu' neda', Xan, en biti' uzenu' neda' bach.
 Biti' gunu' neda' xiguia' lu yöl-la' rilé quiu'.
² Ben zi'u neda', en budxiú' neda' huē'.
 Nuzötju' neda' len no'o.
³ Yu'a yödzöhuē' xzön tu' rilenu' neda'.
 Dxía huē' idútē le naca' tu' nözi dul-la' nabága'a.
⁴ Xiguia' nabága'a naca ca tu nísado' ga ruchicja' nisa.
 Naca ca tu yua' zi'i nabága'a neda'.
⁵ Tu' bena' yugu' le cabí naca dxi'a,
 dxía' huē' le rilá' siguti, en rudzu'.
⁶ Narecji' cúdza'a, en nagá'ana' cá'asö.
 Idú dza ruhuí'inide'eda'.
⁷ Idútē le naca' yú'uda'a xilá,
 ate' nazxí xipēla'a.
⁸ Rudú ládxa'a, en ricuídi'da'.
 Rinnēda' ládxa'a tu' ruúbi ruguí'i ládxí'da'ahua'.
⁹ Nöz quézinu' Li', Xan, le rizé ládxa'a,
 en riyönnu' le rinnética'sö ládxa'a.
¹⁰ Richunchu ládxí'da'ahua', en ricuidi' ládxa'a,
 ga rídxintē richul-la guiöj lahua'.
¹¹ Bítí'rö ta'dzaga neda' yugu' luzá'a, en yugu' böcha'a, tu' nözi xihuē'a,
 ate' tu'biga' dí'a dza quia' ga zoa'.
¹² Nupa té'ēni iluti neda' ta'bequi le ila'zön neda',
 ate' nupa té'ēni ulu'cul-la neda' tun xtídzagaequi nacxi ulu'suniti neda'.
 Idú dza ta'bequi ícjaguequi bi ilún quia'.
¹³ Naca' ca tu bönni' nacódzuē', en bítí'rö riyönda'.
 Naca' ca tu bönni' narugu lúdxē'ē, en biti' risaljē' ru'ē.
¹⁴ Naca' ca tu bönni' bítí'rö riyönnē',
 en que lē ni na' biti' bi didza' rubi'ē.
¹⁵ Tuzu' Li' ruzxöni ládxa'a, Xan.
 Ubí'i cazu' didza', Xana' Dios.
¹⁶ Biti' gu'u lataj ulu'dzeja ni'a que le raca quia'.
 Biti' gu'u lataj ilún ba xzön cúnguequi tu' nagá'ana' cá'asö.
¹⁷ Chizóa' tsöjbixa',
 en zóaléntica'sö xihuē'a neda'.
¹⁸ Que lē ni na' rixóalēpa' xiguia' nabága'a,
 en risēbida' ládxa'a tu' nözi dul-la' nabága'a.
¹⁹ Nacuá' dxi'a, en nál-lagaca nupa téqui neda' zi'.
 Nayánda' nupa tu'dí'i neda', en biti' bi nuna' quéguequi.
²⁰ Ta'dá'baga' neda' nupa tu'bí'i le cabí naca dxi'a que nu run le naca dxi'a.
 Caní tun tu' ruí'i ládxa'a guna' le naca dxi'a.
²¹ Biti' usán no'o neda', Xan.
 Biti' ubigu' ga zoa', Dios quia'.
²² Gudáchi gácalenu' neda', Xan,
 tu' naca cazu' Li' Nu rusölá neda'.

39

¹ Gunnía': Gun chi'i cuina' ca naca le runa',
 en biti' guna' dul-la' ca naca didza' ruá'a.
 Biti' bi didza' gu'a
 cate' nacué' nupa tuá' dö' gal-la' ga zoa'.

² Guzóa' dxisö, en biti' bë'a didza' ga bidxintë
biti' gunniá' le naca dxi'a, pero biyalí' xihuë'a.

³ Bubi buguí'i ládxi'da' ahua',
en cate' guzá' ládxa'a que, guyegui gulá ládxi'da' ahua'.
Que lë ni na' gunábida'-në' Xanru', gunniá':

⁴ Xan, ¿gáca' xte caz soa' ibana'?
Buluí'i neda' tsca iz soa' ibana'.
Ben ga inözda' channö chizóa caz gátia'.

⁵ Nabábasö dza nuzú' quia' soa' ibana'.
Yugu' iz soa' ibana' biti' bi zeaj naca lo' Li'.

Le nácatë biti' bi nácacaga yúgu'të bönachi nacua' luyú ni.

⁶ Nácacacasö ca tu zxul-la rigú'u böaj.
Nítisö tu'ubi tu'guí'i ládxi'do' guequi, en tun dxin.
Tu'tubi yöl-la' tsahui', pero biti' nözguequi nuzxi guequi que.

⁷ ¿Bizxi caz gaca guna' löza, Xan?
Ruzxöni ládxa'a Li'.

⁸ Busölá neda' lu xigua' nabága'a,
en biti' gu'u lataj ulu'titaj quia' nupa nácacaga canöz.

⁹ Soa' dxisö, en biti' bi didza' gu'a,
tu' ben cazu' Li' ga riguí'i rizáca'a lë ni.

¹⁰ Bítirö gunu' neda' xigua'.
Chizóa gátia' tu' rusaca' zi'u neda'.

¹¹ Runu'-në' xigua' bönni' dul-la', en ruzenu' lë' bach.
Ca tu'töba' bëlado' que le yú'uba', rusunítu' le ruí'i ládxi'ë bönni' na'.
Biti' bi naca cazë' bönni' dul-la' na'.

¹² Buzë nagu' le rulidza' Li', Xan, en le rinábida' Li'.
Biti' su' dxisö cate' ribödxá' lo' Li',
en biti' gaca' ca tu bönni' zi'tu' lo' Li',
en ca tu bönni' ridasë' ca guláquië' xuz xtó'otu'.

¹³ Benna neda' lataj idipa ládxa'a
zí'alö ca uzá'a yödzülió ni, en bítirö soa'.

40

¹ Lu yöl-la' riböza zxön ladxí' quia' gulöza' gácalenë' Xanru' neda'.
Níirö buzë naguë' quia', en biyönnë' le bulidza'-në'.

² Bubéajë' neda' ca tu lu yeru ga rë, en lu guna' zili.
Buzöë' neda' tu lu guiöjto'o, en guléquië' neda' tsutsu.

³ Busédinë' neda' tu le cubi le rul-la' le naca yöl-la' ba queë' Dios queëru'.
Zián nupa ila'lé'eni lë ni, en ilún Lë' zxön,
ate' ulu'zxöni ladxí'-në' Xanru'.

⁴ Bica' ba bönni' ruzxöni ládxi'ë Xanru'.
Bíti' runë' tsözxön nu run ba zxön cuini, nu na' run zxön yugu' dios núngaca bönachi.

⁵ Ziántërö naca le nunu' queëtu', Xana' Dios, yugu' le tun ga rubánitu'.
Ziántërö le yu'u icja ládxi'do'o ca naca le gunu' queëtu'.

Biti' ca' gaca nu ulaba lo' Li' tsca nácacaga.
Channö guë'enda' nu usiyönda' tsca nácacaga,
nayántërö tsca le gaca ulaba'.

⁶ Biti' rë'ënu' gútigaca'-ba' böa' guixi' lo', en calëga bi cu'a lo'.
Biti' rinabu' uzégui' gaca'-ba' böa' bëdxi lo',
en calëga tu le guna' lo' para ugúa dul-la',
pero gusalju' naga' para yönda' le guío' neda'.

⁷ Que lë ni na' gunniá': Ni zoa caza' neda' quiu'.
Lu guichi lá'ayi quiu' nazúaj caz ca naca quia'.

⁸ Raza ládxa'a runa' ca rë'ënu' Li', Dios quia'.
Nagu'a icja ládxi'da' ahua' xibá naguixju' Li'.

⁹ Ga tu'dubi bönachi guixxi yu quiu', Xan,
busiyönda' lëguequi nacu' tsahui'.

Biti' ca' guzóa' dxisö.

Nöz quézinu' lë ni, Xan.

¹⁰ Biti' bucáchi'za' icja ládxi'da'ahua' ca ruúnu' tsahui' bönachi.

Bulu'a lahui ca runu' ca rnno', en ca rusöló' bönachi.

Ga nudúbigaca bönachi quiu' biti' guzóa' dxisö,

pero bē'a didza' ca nacu' dxi'i ladxi', en ca ru'u didza' le nácatē.

¹¹ Biti' ugú' quia' yöl-la' dxi'i ladxi' quiu', Xan.

Yöl-la' dxi'i ladxi' quiu', en ca runu' ca rnna xtídzu'u ilún chí'itica'sö neda'.

¹² Zíán le raca quia' nagú'ugaca neda' lē'ajlō, le cabí gaca nu ulaba.

Nabága'a yugu' dō' bi'a, en bítirō gaca ilé'eda'.

Nayanrō ca guitsa' icja', ate' rudú ládxa'a.

¹³ ¡Busólá neda', Xan!

¡Gudáchi gácalenu' neda', Xan!

¹⁴ Ben ga ulu'tuí'i, en ila'bō' baguí'i

nupa na' tē'ēni ulu'suniti neda'.

Ben ga ulu'huécaj, en ulu'gá'ana cá'asō

nupa na' tē'ēni gaca quia' le cabí naca dxi'a.

¹⁵ Ben ga ulu'dú ládxi'gaca tu' nabíxigaca

nupa na' tu'titaj neda', ta'nná: “¡Buyútsōca' le raca queē'!”

¹⁶ Ben ga ulu'dzeja, en ulu'zī' xibó' yúgu'tē nupa tu'guilaj Li'.

Ben ga ila'nnática'sō nupa ta'dxi'i yöl-la' rusólá quiu',

ila'nná: “Nayépsētērē Xanru'.”

¹⁷ Nacuídida', en biti' bi gaca guna',

pero ruí'i ladxi' cazu' Li' neda', Xan.

Naca cazu' Nu rácalen neda', en Nu rusólá neda'.

Biti' tsenu' guídu' quia', Dios quia'.

41

¹ Bica' ba bōnni' ruí'i ládxe'ē nupa nácgaca yechi'.

Xanru' gácalen cazē' bōnni' na' cate' bi gaca queē'.

² Xanru' Dios gun chí'ē lē', en gunē' ga soē' ibanē'.

Gunē' ca' ga uzi'ē xibé xiyú cazē'.

Biti' usán nē'ē lē' lu ná'agaca nupa biti' ta'lé'e lē' dxi'a.

³ Xanru' utipē' ládxe'ē bōnni' na' cate' ré'enē'.

Uchisē' lē' lu da'a le rátinē', en gunē' ga soē' dxi'a.

⁴ Gunnía': Bena' dul-la' lo' Li', Xan.

Buéchi' ladxi' neda', en bun neda'.

⁵ Nupa biti' ta'lé'e neda' dxi'a ta'nnē quia', ta'nná:

“¿Bátaxi gátie', en huáca gal-la ládxi'gaca bönachi lē'?”

⁶ Channō uduyúgaquiē' neda', ta'zī' yē'ē.

Ta'güē' didza' ca naca le raca quia',

en cate' ta'rúajē', tu'siyönnē' bönachi.

⁷ Tu'dubi nupa biti' ta'lé'e neda' dxi'a, en ta'nnē quia'.

Ta'zá' ládxi'gaca zían le naca dō' le ilún quia'.

⁸ Ta'nnē quia', ta'nná: “Yu'ē yödzhohuē' le guti lē'.

Bítirō caz huóásē' ga na' dē' lu le denē'.”

⁹ Lē'sca' caní benē' bōchi' luzá'a ruzxōni ládxa'a-nē'.

Bōnni' gudágulenē' neda' tsözxōn ridá'baguē'ē neda'.

¹⁰ Buéchi' ladxi' neda', Xan, en bun neda',

ate' ubí'i caza' quégaca nupa na' biti' ta'lé'e neda' dxi'a.

¹¹ Gácabe'eda' raza ládxi'u neda',

tu' cabí ulu'xicja neda' nupa biti' ta'lé'e neda' dxi'a.

¹² Gáclen cazu' neda' tu' runa' le naca dxi'a.

Gunu' ga sóatica'sa' lo' Li'.

¹³ ¡Yöl-la' ba Xanru', Dios quégaca bönachi Israel!

¡Guli'cu'ē yöl-la' ba na'a dza, en yugu' dza si' zaca!

¡Ca' gaca!

¡Ön, ca' gaca!

42

¹ Ca rizé ládxi'ba' bidxina' guixi' nisa yégudo',
lësca' caní rizé ládxa'a Li' Dios.

² Ribidxi ládxa'a Li' cazu', Dios.

³ Bátaxi udxina' ga dē quia', en tsu'a le yúbölö yudo' lá'ayi quiu'?

³ Rêla, en te dza ribödxá', en biti' bi rahua'.

Yugu' dza nacuá' nupa ta'nábini neda', ta'nná: "¿Gazxi caz zoa Dios quiu'?"

⁴ Risëbi ládxa'a cate' rōjneda' ca guca zí'alō,

cate' guzá'lena' bōnachi guizxi yu, en yōjnōrua' lāhuilōguequi ra' yu'u queë' Dios.

Lu yōl-la' rudzeja queëtu' bīl-latu', en guyéaj ládxi'tu'-nē' Xanru', en bentu' laní.

⁵ ¿Bixz que risëbida' ládxa'a, en bixz que rō'a bōniga?

Uzxōni ládxa'a-nē' Xanru' Dios, tu' huadxín dza cu'a-nē' yōl-la' ba le yúbölö.

Náquië' Nu rusölá neda', en náquië' Dios quia'.

⁶ Risëbida' ládxa'a, Dios quia'.

Que lē ni na' tsōjneda' Li' tsanni ni zoa', ridá' rizxúnna' ra' yegu Jordán,

en tsanni ni ridá' lu guí'a Hermón, en lu guí'a Mizar.

⁷ Ca tu guziú' rinnē lu nísado', en ca bō ruí'i tu budoá' nísado' queë' Dios,

caní rinnē ladxí' bō' naca caza' lu yōl-la' risëbi ladxí'.

⁸ Rinábida'-nē' Xanru' huéchi' ládxi'ē neda' yugu' dza.

Yugu' dzō' rul-la' yōl-la' ba queë' Lē',

en rulidza' Dios, ruí'lena'-nē' didza', Nu na' runna quia' yōl-la' na'bán.

⁹ Guí'a-nē' Dios, Nu ruzóa neda' tsutsu, inní'a: ¿Bixz que nál-la ládxi'u neda'?

¿Bixz que run bayúdx quí'i sáca'tica'sa' lu ná'agaca nupa biti' ta'lé'e neda' dxi'a?

¹⁰ Rutsaba yúgu'tē dxi'a yu'a tu' tu'didza' yudxi neda'.

Yugu' dza ta'nábini neda', ta'nná: "¿Gazxi caz zoa Dios quiu'?"

¹¹ ¿Bixz que risëbida' ládxa'a, en bixz que rō'a bōniga?

Uzxōni ládxa'a-nē' Xanru' Dios,

tu' huadxín dza cu'a-nē' yōl-la' ba le yúbölö,

tu' náquië' Nu rusölá neda', en náquië' Dios quia'.

43

¹ Guléaj neda' tsahui', Dios, en bē' didza' uláz quia' lógaca bōnachi tuá' dō' quia'.

Busölá neda' lu na' nu rizí' yē', en biti' naca tsahui'.

² Li' cazu' nacu' Dios, Nu rutipa ládxa'a. ¿Bixz que nusán no'o neda'?

¿Bixz que ruhuí'inida' tu' ta'bía no neda' nupa tu'dí'i neda'?

³ Gusöl-la' quia' bení' quiu', en le naca idútē li quiu' para ulu'luí'i neda' nōza.

Ben ga íla'ché' neda' ga naca lá'ayi quiu', ga na' zoa cazu' Li'.

⁴ Tsu'a ra' bucugu queë' Dios.

Ibíga'a lahuë' Dios, Nu run ga rudzéjade'eda'.

Gúl-lalena' bihuël-la, cu'a Li' yōl-la' ba, Dios, nacu' Dios quia'.

⁵ ¿Bixz que risëbida' ládxa'a, en bixz que rō'a bōniga?

Uzxōni ládxa'a-nē' Xanru' Dios,

tu' huadxín dza cu'a-nē' yōl-la' ba le yúbölö,

tu' náquië' Nu rusölá neda', en náquië' Dios quia'.

44

¹ Biyōn quézitu' le, Dios.

Bulu'siyōnnē' netu' xuz xtó'otu'

ca naca yugu' le zxōn benu' dza ni'te,

cate' ni' gula'cu'ē légaquië' luyú ni.

² Bulaga cazu' Li' bōnachi yugu' yōdzō izá'a,

en bucuásu' légaquië' luyú ni.

Busaca' zi'u bōnachi izá'a na', en gurú'unu' léguequi.

³ Biti' gula'déli'nē' xuz xtó'otu' luyú ni rácasō quégaquië',

en biti' bulu'sólá la' cuíngacasé',

pero ben cazu' Li' lē na' len yōl-la' huáca zxōn quiu',

en lu yöl-la' zxön que le naca cazu',
 ate' bulú'u lahui ca nadxí'ínu' légaquië'.
 4 Naca cazu' Li' Dios quia', en Nu rinná be'e neda'.
 Busölá bönachi quiu', yugu' xzí'ini xí'sóë' Jacob.
 5 Uguntu' dxin yöl-la' huáca quiu', uxíjatu' nupa ta'dá'baga' netu',
 ate' tu' zóalen cazu' netu', ucúl-latu' nupa biti' ta'lé'e netu' dxi'a.
 6 Biti' uzzöni ládxa'a uxiti' yaga quia',
 en biti' uzzöni ládxa'a guíë tuchi' quia' para ilácalen neda',
 7 tu' rusölá cazu' Li' netu' lu ná'agaca nupa biti' ta'lé'e netu' dxi'a,
 en ruzötju' nupa tu'dí'i netu'.
 8 Cú'utica'stu' Li' yöl-la' ba,
 en guíëtica'stu' Li': "Xclenu'."
 9 Pero na'a nusán no'o netu', Dios, en bë'u lataj nu buxicja netu'.
 Bítirö réajlenu' bönni' queétu' rójáquië' gudil-la.
 10 Benu' ga buzxúnna'jtu' lógaca nupa ta'díl-lalen netu',
 ate' gula'guë' yugu' le nequi queétu'.
 11 Bë'u lataj gulútië' ziantu' ca nu rúti-gacaba' bö'cu' zxila'.
 Bësilásiu' netu' ládjacaga yödzo izá'a.
 12 Naca tsca bëti'u netu', en láti'do'os guzxi'u.
 Biti' ca' buzi'u xibé tsca guzxi'u.
 13 Bönachi yugu' dzaga yödzo queétu' bila'lé'e lë na' benu' queétu',
 ate' tu'cá'ana netu' cá'asö, en tu'titaj netu'.
 14 Benu' ga tu'didza' yudxi bönachi yugu' yödzo netu'.
 Tu'tá ícjaguequi lu yöl-la' rucá'ana netu' cá'asö.
 15 Yugu' dza rutuí'ida' ca raca queétu',
 en rō'a böniga lu yöl-la' rutuí'i quia',
 16 tu' riyōnda' nupa tu'didza' yudxi neda', en tu'cá'ana neda' cá'asö,
 nupa na' biti' ta'lé'e neda' dxi'a, en tu'dí'i neda'.
 17 Guca queétu' yūgu'të lë ni sal-la' biti' nál-la ládxi'tu' Li',
 en biti' nucá'anatu' didza' dzaga bënenu' netu'.
 18 Biti' ca' böaj ládxi'tu' ca réajlë'ëtu' Li',
 en biti' gudá'baga'tu' le buluí'ínu' netu' guntu'.
 19 pero nusán na' cazu' netu' ladaj nupa náacagaca ca yugu' böa' gui'a sínía',
 en nucá'anu' netu' ga chizóa tseajtsázatu' lataj chul-la.
 20 La'tu' gul-la ládxi'tu' Li', Dios queétu',
 o la'tu' guyéaj ládxi'tu' tu dios izá'a,
 21 la' gáquibe'etënu' lë ni, Dios,
 tu' nōz quézinu' le rizá' ládxi'tu'.
 22 Tu' néquitu' quiu' Li' zóatica'sō nu guti netu'.
 Nactu' ca yugu' bö'cu' xzila'do' lo nu guti léga'caba'.
 23 ¡Bubán, Xan! ¿Bizx que rásitso' Li'?
 ¡Guyasa! ¡Bíti' usán no'o netu' chadía chacanna!
 24 ¿Bizx que nucachi' lo' lotu' netu'?
 ¿Naru' nál-la ládxi'u ca raca queétu', en ca riguí'i rizáca'tu'?
 25 Naguíngaquië' netu' luyú.
 Nadínitu' lu bëchtō yu.
 26 ¡Gudáchi gácalenu' netu',
 en lu yöl-la' dxi'i ládxi' quiu' busölá netu'!

45

1 Rizá' ládxa'a tu le naca dxi'a.
 Ru'a didza' que le runë' bönni' rinná bë'ë.
 Naca lúdxa'a ca le ruzúajlenë' bönni' nabé'ede'enë' ru'ë didza'.
 2 Nácatëru' Li' lachi ca yúgu'të bönachi.
 Nabé'ede'enu' ru'u didza'.
 Que lë ni na' nunë' Dios gaca dxi'a quiu' chadía chacanna.
 3 Bega' lë'u guíë tuchi' quiu', bönni' nayëpisë',
 lu yöl-la' lachi quiu', en lu yöl-la' unná bë' quiu'.
 4 Lu yöl-la' unná bë' quiu' idéli'nu' lu gudil-la,
 ugunu' dxin le naca idütë li, en yöl-la' nōxaj ládxi', en le naca tsahui'.

Yöl-la' huáca zxon quiu' gun ga ilá' lahui yugu' le zxöntërö.

⁵ Natúchi'gacada' yaga lahui tuchi' quiu'.

Bönachi yugu' yödzo zi'tu' ta'dzö'ö lo', nupa na' ta'díl-lalen li'.

Yugu' yaga lahui tuchi' quiu' nachöza'gaca ládxi'do'guequi.

⁶ ¡Chadía chacanna naguixju' ga rö'u rinná bē'u, Dios!

¡Ca naca le naca tsahui' rinná bē'enu' bönachi quiu'!

⁷ Nadxf'ínu' le naca tsahui', en biti' rilé'enu' dxi'a le biti' nácatē.

Que lē ni na' Dios quiu' nabö cazē' li'.

Nachízirē' icja ládxi'do'o yöl-la' rudzeja ca le nápagaca ia'zica'rö bönachi.

⁸ Rilá' zxixi lari' nacu' len zi' mirra, en zi' áloe, en zi' casia.

Tunē' bönni' huil-la ga rudzéjanu' lu yu'u lidxu' zxon.

⁹ Yugu' nigula zxf'inigaquiē' bönni' ta'nná bē'ē

nútsa'gacabi' bi'i nigula nacuá'abi' lidxu'.

Nigula quiu' rinná bē'enu zuínu cuitu' ibēla,

en náccunu le nazí'i biquitaj oro nazaca'.

¹⁰ Bē' ladxí' neda', nigúlado'.

Bē' ladxí' neda', en biyön xtídza'a.

Gul-la ladxí' bönachi yödzo quiu', en yugu' di'a dza quiu'.

¹¹ Ní'irö sē ladxē'ē bönni' rinná bē'ē yöl-la' lachi quiu'.

Buzóa zxibu' lahuē' tu' náquiē' xanu'.

¹² Ní'irö bönachi yödzo Tiro ila'dxin lo' nuá'gaca le nazáca'da' le ilunna quiu'.

Yugu' bönni' ta'lé'enē' yöl-la' tsahui' ila'nábinē' li' bi unödzu' quégaquiē'.

¹³ Yugu' bi'i nigula queē' bönni' rinná bē'ē zóagacabi' lidxē', en nácatērógacabi' lachi.

Lari' náccubi' nadíalen du oro.

¹⁴ Ila'chē'ē-bi' lahuē' bönni' rinná bē'ē, náccubi' lari' nazáca'da'.

Ila'dabi' yugu' bi'i nigula ra'bando' cúdzi'löbi',

ate' ila'chē'ē légacabi' lahuē' bönni' na' rinná bē'ē.

¹⁵ Lu yöl-la' rudzeja, en lu yöl-la' ruzi' xibé quégacabi' ila'dxinbi',

en ila'yázabi' yu'u lidxē' bönni' na' rinná bē'ē.

¹⁶ Ila'cuá'abi' bi'i bönni' quiu' uláz quégaquiē' xuz xto'o.

Gunú' ga ila'nná bē'ēbi' idútē yödzoilió.

¹⁷ Gunu' ga tsöjnégacatica'sö bönachi ca nacu' Li'.

Que lē ni na' yúgu'tē bönachi ilē li' "Xclenu" yugu' dza si' zaca.

46

¹ ¡Náquiē' Dios Nu run chí'i rē'u, en Nu ruzóa rē'u tsutsu!

¡zóatica'sē' gácalenē' rē'u cate' bi' raca queēru'!

² Que lē ni na' biti' gádxiru' sal-la' izxizi idútē yödzoilió,

en ila'niti yugu' guí'a lu nísado',

³ en sal-la' chasa idxía, en tsu'u bö nísado' na',

en ila'zxizi guí'ado' tu' nözi le raca.

⁴ Zoa tu yegu le run ga tu'dzeja nupa nacuá' ladzē' Dios,

ga na' rö'ö yudo' lá'ayi ga zoē' Dios nayépisëtērē'.

⁵ Zoa cazē' Dios yödzo na', le catu caz initi.

Cate' ní' soa itó yu gácalenē' nupa nacuá' ni'.

⁶ Tadxí ta'dzöbi bönachi yugu' yödzo,

ate' ta'bö' baguí'i nupa ta'nná bē',

tu' ru'ē didza' Dios, ate' riniti luyú ni.

⁷ Xanru' nayépisëtērē' zóalen cazē' rē'u.

Dios quégaca zxi'ini xí'sóē' Jacob rapa chí'ē rē'u.

⁸ Guli'dá ilé'eli' le nunē' Xanru'.

Buli'yú ca nusunítē' luyú ni.

⁹ Ruzóa dxiē' gudil-la rácacaca idútē yödzoilió.

Riguitsjē' yugu' uxiti' yaga,

en rusunítē' yugu' yaga lahui tuchi' que gudil-la.

Ruzégui'ē yugu' carreta que gudil-la tu lu guí' zxon.

¹⁰ Rnnē': "Guli'sóa dxisö, ate' guéquibe'eli' naca caza' Dios.

Nayépisëtēra' yugu' lu yödzo, en lu idútē yödzoilió."

¹¹ Xanru' nayëpisëtërë' zóalen cazë' rë'u.
Dios quégaca xzí'ini xí'sóë' Jacob rapa chi'ë rë'u.

47

¹ Lu yöl-la' rudzeja queëli' guli'capa' ná'ali', bönachi yúgu'të yödzö!
¡Guli'cu'ë yöl-la' ba Dios, len yugu' le rúl-lalenli'!

² Ral-la' gunru' bal Xanru' Dios nayëpisëtërë'.

Náquië' Nu rinná bë' idútë yödzölió.

³ Benë' ga bidéli'ru' yugu' lu bönachi izá'a.

Benë' ga rinná be'eru' yugu' yödzö.

⁴ Guró cazë' luyú ga ni nuzóë' rë'u.

Naca tu luyú lachi quégaca xzí'ini xí'sóë' Jacob, nupa na' nadxí'i quézinë'.

⁵ Len yöl-la' ba zxön ribenë' Dios ga rö'ë rinná bë'ë.

Le zían le tu'cödxë' cate' ribenë' Xanru' ni'.

⁶ ¡Guli'gul-la yöl-la' ba queë' Dios! ¡Guli'gul-la!

¡Guli'gul-la yöl-la' ba queë' Bönni' rinná bé'enë' rë'u! ¡Guli'gul-la!

⁷ ¡Rinná bë'ë Dios idútë yödzölió ni!

¡Idú ládxi'li' guli'gul-la yöl-la' ba queë'!

⁸ ¡Zoa cazë' Dios lataj lá'ayi queë' ga rö'ë rinná bë'ë!

¡Rinná bé'enë' bönachi yúgu'të yödzö!

⁹ Tu'dubi nupa ta'nná be'e yugu' yödzö

tsözxön len bönachi queë' Dios queë' Abraham.

¹⁰ ¡Nequi queë' Dios yöl-la' zxön quégaca yúgu'të yödzö nacuá' yödzölió!

¡Nayëpisëtërë' Lë'!

48

¹ Nayëpisëtërë' Xanru', ate' run bayudxi cú'uru'-në' yöl-la' ba idú ládxi'ru'
ga zoa lu yödzö queë' Dios queëru' le zoa lu guí'a lá'ayi queë'.

² Lachi, en sibi naca guí'a lá'ayi na',

ate' raza ládxi'gaca bönachi idútë yödzölió ca naca.

Caní naca guí'a Sión le rö'ö tsölá'aló ga za' bö' ziaga.

Lu yödzö na' dë ga zoa Bönni' Unná Bë' nayëpisë'.

³ Rulu'ë lahui Dios sóaru' tsutsu cuitë' Lë'

ga zoa lu yu'u lidxë'.

⁴ Gula'dá'baga' nupa ta'nná bë' lu yu ni,

en gula'bígui'ë ra' yödzö lá'ayi na'.

⁵ Cate' bila'lé'enë' yödzö na' bulu'báninë'.

Gula'bö'ë böniga, en la' bulu'zxúnajtë'.

⁶ Ra' yödzö na' gula'zxízië'.

Gula'zaca' zí'ë ca raza queënu nigula chizóa uzóanu-bí' bí'ido'.

⁷ Risól-lë'ë Dios tu bö' budunu',

le rusuniti yugu' barco zxön que yödzö Tarsis.

⁸ Biyönru' ca nácagaca le zxön benë' Dios,

ate' na'a rilé'e quéziru' le runë',

lu yödzö lá'ayi queë' Dios quégaca ni'a në'ë guizxi yu,

en náquië' ca' Dios queëru'.

Tsaz naguixjë' yödzö na'.

⁹ Ga zoa lu yudo' quiu', Dios,

röjnetu' ca naca yöl-la' dxi'i ladxi' quiu'.

¹⁰ Ca nayëpisëtërö Lo', Dios,

ca' ta'gú'u Lì' yöl-la' ba bönachi idútë yödzölió.

Ca naca le naca tsahui' rinná bë'u.

¹¹ Ulu'dzeja bönachi nacuá' yödzö Sión.

Ulu'zí'inu xibé nigula xzí'ini xí'sóë' Judá

tu' ruchi'a rusöröu' netu' ca naca le naca tsahui'.

¹² Guli'dá idú gásibi'iló ga dë yödzö Sión,

en buli'laba yugu' yu'u sibi tun ch'i' yödzö na'.

¹³ Buli'yú ca naca zö'ö run chi'i yödzo na',
 en buli'yú ca' le nuzóagaca le tsutsu,
 para gaca quíxjö'i'ili' xzí'ini xi'sóali' ca náquië' Dios zxön ni.
¹⁴ Tsaz náquië' Dios queëru', na'a dza, en dza si' zaca.
 Ulu'inë' rë'u nöza tödi gátiru'.

49

¹ Guli'yöni lë ni, libí'ili', bönachi yúgu'të yödzo.
 Buli'zé nágali', libí'ili', zóali' iduté yödzo'lió.
² Libí'ili', nayépsëtëröli', en libí'ili', nácali' cá'asö.
 Libí'ili', dë yöl-la' tsahui' queëli', en libí'ili', nácali' yechi'.
³ Tsöjsá' ládxa'a ca naca le nápagaca yöl-la' réajni'i,
 en gu'a didza' le nápagaca yöl-la' raca yenni'.
⁴ Güf'i ládxa'a ca naca tu le rucudzu' didza',
 en quíxjö'a ca nápagaca tsanni quinnia' lë'e bihuël-la.
⁵ Biti' bi rádxida' cate' ridxín bi raca quia',
 cate' ta'gu'ë neda' lë'ajlö bönni' tuá' dö' bití' ta'lé'enë' neda' dxi'a.
⁶ Tu'zxöni ládxe'ë bönni' na' yöl-la' tsahui' quégaquië',
 en tun ba zxön cúngaquië' ca nápagaca le dë quégaquië'.
⁷ Biti' gaca huó'uë' la' cuinsë' nitúë' bönni' na'.
 Biti' gaca bi ünödzjë' queë' Dios le gun ga usölë' lë',
⁸ tu' naca zxöntërö le huó'u yöl-la' na'bán que nu bönni',
 ate' catu caz gaca nu bönni' quíxjé' ca naca,
⁹ para idéli'në' sóatica'së' ibanë',
 en cabí tsázië' yeru ba ga yú'ugaquië' bönni' nati.
¹⁰ Ribí'enë' tatië' ca' bönni' ta'yéajni'inë',
 en ta'nitië' tuz ca tati nupa bití' bi nözigaca, en nupa bití' ta'yéajni'i,
 ate' tu'cá'anë' yöl-la' tsahui' quégaquië' le ulu'z'í xibë bönachi yúbólö.
¹¹ Téquinë' ila'cuá'tica'sö lídxaquië' bönni' na',
 ate' tsaz ila'cu'ë ni',
 ate' ta'gu'ë lágaca xiyúgaquië' ca naca la' lágacasë'.
¹² Pero yöl-la' ba zxön napë' bönni' na' bití' gun ga sóatica'së'.
 Gati cazë' ca tátiba' böa' guixi'.
¹³ Caní naca le gaca quégaquië' bönni' tu'zxöni ládxe'ë yöl-la' tsahui' quégaquië',
 enca' quégaca xzí'ini xi'sóagaquië',
 yugu' bí'i na' ta'yaza ládxi'gacabi' didza' gulu'ë xúzgacabi' na'.
¹⁴ Ilátië' ca tátiba' bö'cu' zxila',
 ate' yöl-la' guti gaca quégaquië' ca tu nu uyú bö'cu' zxila'.
 Yugu' bönni' tsahui' ila'nná bé'enë' légaquië' cate' itö yu zila.
 Ila'niti le guta' quégaquië', ate' ila'cuá'tica'së' lataj chul-la ga dzö'ö nupa nátigaca.
¹⁵ Huó'u cazë' Dios yöl-la' na'bán quia' lu yöl-la' guti,
 tu' ichë'ë neda' ga tsöjsóalena' Lë'.
¹⁶ Biti' gádxinu' cate' idéli'në' nu bönni' yöl-la' tsahui' zxön,
 en cate' xön yöl-la' lachi que yu'u lidxë',
¹⁷ tu' cabí bi u'ë cate' gátië',
 en bití' tséajlen lë' yöl-la' lachi que le guta' queë'.
¹⁸ Sal-la' cate' ni' zoë' nabanë' buzí' xibë bö' naca cazë',
 ate' gula'gú'u bönachi lë' yöl-la' ba cate' bidéli'në' yöl-la' tsahui' na'.
¹⁹ Tsázië' ga na' dzö'ë xuz xtá'ahuë',
 en bití'rö ilé'enë' bení'.
²⁰ Náquië' bönni' napë' yöl-la' zxön, pero riyádzjanë' yöl-la' réajni'i,
 ca böa' guixi' tati cázaba'.

50

¹ Ru'ë didza' Xanru' Dios nayépisëtërë'.
 Nutubë' dërö nupa nacua' yödzo'lió ga naguéla'të ga rilén gubidza ga ridxintë ga ribía.
² Lu yödzo Sión rigu'ë Dios bení'.
 Napa yödzo na' yöl-la' lachi idú.
³ Zë'ë Dios queëru', en bití' soë' dxisö.
 Tsöjnöru lahuë' tu guí' zxön,
 ate' tsecja tu bö' budunu' idú gasibí'ilë'.
⁴ Ulidzë' lúzxiba xitsá', enca' luyú

cate' uchi'a usöröë' quégaca bönachi queë'.

⁵ Rnnë' Dios: "Guli'túbi nupa néquiguequi quez quia', nupa na' gulunlen neda' didza' dzaga, en bulu'lalaj rön lahua' le ben tsutsu didza' dzaga na'."

⁶ Naca bë' náquië' tsahui' Dios lúzhiba xitsá',

tu' uchi'a usöröë' Dios bönachi queë'.

⁷ Rnnë': "Buli'zë nágali', bönachi quia', ate' gu'a didza'. Buli'zë nágali', bönachi Israel, ate' uzéguia' libí'ili' didza'. Naca caza' Dios.

Ön, naca' Dios queëli'.

⁸ Biti' uzéguia' libí'ili' didza' ca naca le rúnnali' quia', en caléga ca nácagacaba' bóa' bēdxi ruzégui'li'-ba' lahua'.

⁹ Biti' riquinda'-ba' bēdxi queëli',

en caléga chivo biguiú' nacuá'aba' queëli',

¹⁰ tu' néquigacaba' quia' yúgu'tēba' bóa' guixi',

enca' bóa'-bēdxi nacuá'aba' lu gayuá' gayuá' guf'ado'.

¹¹ Néquigacaba' ca' quia' yúgu'tēba' bóa' zoa xiligacaba',

enca' yúgu'tē le zoa nabán la' guixi'.

¹² La'tu' riduna' bití' guia' ca' libí'ili',

tu' nequi quia' yōdzölió, enca' yúgu'tē le nacuá' ni'.

¹³ ¿Naru' gágutsa' xipéla' gacaba' bēdxi,

o guí'jatsa' xichóngacaba' chivo?"

¹⁴ Le ral-la' unódzjali' queë' Dios naca yöl-la' rē Lē': "Xclenu"

ate' ral-la' gunli' lahuë' Dios nayépisētērē' ca naca le guzxf' lu ná'ali' gunli'.

¹⁵ Rnnë' ca': "Ral-la' ulídzali' neda' cate' bi gaca queëli'.

Gácalen caza' libí'ili', ate' gunli' neda' bal."

¹⁶ Dios rē' bönni' huía' dö', rnnë':

"¿Bizx que ru'u didza' ca nácagaca xibá naguixja'?

¿Bizx que ru'u didza' ca naca didza' dzaga núnlena' bönachi?

¹⁷ Biti' runnu' lataj usédida' li',

pero rucá'anú' cá'asö didza' ruá'a.

¹⁸ Cate' rilé'enu'-në' bönni' gubán rácalenu' lē',

en runu' tsözxón nupa ta' guitsaj xibá que yöl-la' nutsaga na'.

¹⁹ Zóatica'su' gu'u didza' xihui',

en ruí'tica'su' didza' bití' nácate'.

²⁰ Zóatica'su' uzéguii'-në' böchi' cazu',

en rudidza' yudxu' böchi'-zan cazu'.

²¹ Caní benu', ate' bití' bi gunniá',

ate' gúquinu' naca' ca naca cazu' li',

pero na'a uzéguia' li' didza', en ulu'a lahui le nunu'.

²² Buli'zë nágali' didza' ni, núlöli' ruzóali' neda' tsölá'alö.

Channö cabí, usunítia' libí'ili', ate' cuntú nu gaca usólá libí'ili'.

²³ Nu rē' neda': Xclenu', runna quia' le run neda' bal,

ate' nu run ca rnna xtídza'a, usólá caza' nu na'."

51

¹ Dios quia', buzá' ladxi' quia' tsca naca yöl-la' dxi'i ladxi' zxön quiu', en tsca naca le zían le ruzá' lādxu'u quia', bugúa yugu' le gudá'baga'a lo' Li'.

² Buguíbica'sö neda' tsca naca dö' bí'a.

Buchi'a neda' lu dul-la' nuna'.

³ Nöz quézida' le gudá'baga'a,

en röjnétiqi'sida' yugu' dul-la' nuna'.

⁴ Lo' Li' cazu' bena' dul-la',

en lo' Li' ca' bí'a dö'.

Naca bē' nacu' tsahui' cate' ru'u didza',

en idú dxi'a, en tsahui' nacu' cate' ruchi'a rusöröu' queëtu'.

⁵ Buyútsöca', nabága'a dö' cate' gusí lotē gulja',

en lu dul-la' zoa caza' cate' buzóanu xiná'a neda'.

⁶ Rē'ënu' soa le naca idútē li icja lādxí'do'otu'.

Guchiza icja láchxi'da'ahua' yöl-la' réajni'i.

⁷ Buchi'a neda' len le ruchí'aninu', ate' gaca' dxi'a.

Buguibi neda', ate' huóáca' zxíla'do'os.

⁸ Ben ga yönda' le naché' yöl-la' ruzí' xibé, en yöl-la' rudzeja, para huóáca láchxa'a lu le raca quia' tu' benu' ga réquibe'eda' nabága'a dul-la'.

⁹ Biti' uyú' yugu' dul-la' nuna', en busulu yúgu'té le naca dö' nabága'a.

¹⁰ Dios quia', bun dxi'a láchxi'da'ahua', en guchiza neda' tu bö' cubi le nuzú' tsutsu.

¹¹ Biti' ucuítu' neda' ga zoa' lo' Li', en bití' ugú' Dios Bö' Lá'ayi quiu' Nu zóalen neda'.

¹² Bunna quia' yöl-la' rudzeja que yöl-la' rusólá quiu', en ben ga guna' ca rnna xtídz'u idú láchxa'a.

¹³ Ní'irö usédida' nupa ta'guitsaj xibá quiu' ca nácgaca le ré'ënu' ilúngaca, ate' yugu' bönni' dul-la' ulu'huéjca quiu'.

¹⁴ Dios quia', benna neda' lataj cabí ibága'a xigua'. Naca cazu' Dios, Nu rusólá neda'.

Lu yöl-la' rudzeja quia' gul-la' ca naca cazu' tsahui'.

¹⁵ Xana' Dios, gusalaj ruá'a,

ate' usiyönda' bönnachi yöl-la' ba quiu'.

¹⁶ La'tu' raza láchxu'u-ba' böa'-bédxí gútitu'-ba' lo', la' gúntea' caní.

Biti' raza láchxu'u-ba' nu böa' uzégui'tu'-ba' lo'.

¹⁷ Le ré'ëné' Dios le naca ca tu le cú'uru' lahué' naca bö' naca cáziru' le nótaj nagula láchxi'.

Dios quia', biti' uca'anu' cá'asö láchxi'do'otu' le ruhuf'ini láchxi', en le naca nöxaj láchxi'.

¹⁸ Lu yöl-la' ruzá' láchxi' quiu' ben le naca dxi'a quégaca bönnachi yödzo Sión.

Buchisa zö'ö le run chí'i yödzo Jerusalén.

¹⁹ Ní'irö taza láchxu'u yugu' le cú'utu' lo' le naca idú dxi'a, yugu' böa' guíxi'do' gútitu'-ba' lo',

en yugu' böa'-bédxido' uzégui'tu'-ba' lo'.

Ní'irö ilútié'-ba' yugu' bédxi biguiú'do',

en ila'gu'é-ba' lu bucugu quiu'.

52

¹ ¿Bizx que run ba zxön cuinu' ni'a que dö' ru'u, bönni' nál-la? Zóatica'sö yöl-la' dxi'i láchxi' queé' Dios.

² Len lúdxu'u rúnlenu' luzó'o didza' para usunítu' bönnachi.

Naca lúdxu'u, bönni' rizí' yé', ca tu guié' tuchi'.

³ Nadxí'irönu' le naca dö' ca nadxí'inu' le naca dxi'a, en nadxí'irönu' le cabí nácaté ca nadxí'inu' le naca idúté li.

⁴ Nadxí'inu' yúgu'té didza' tun ditaj bönnachi,

li' na', bönni' rizí' yé'ë.

⁵ Tsaz uzötaj cazé' Dios li'.

Söné' li', en ubéajé' li' lu yu'u lúdxu',

en ucuíté' li' ga nacuá' nupa nabángaca.

⁶ Yugu' bönni' tsahui' ila'lé'ené' lé ni, en iládxiné' Dios.

Ulu'zxidxé' queé' bönni' na' rizí' yé'ë, ila'né':

⁷ “¡Buli'yútsöca! Bönni' ni bití' gú'unné' uzxöni láchxé'ë Dios, pero buzzöni láchxé'ë yöl-la' tsahui' queé',

en le zían le guzé láchxé'ë le cabí bi nazaca'.”

⁸ Naca' neda' ca tu yaga olivo ya'a le rö' ra' yu'u lúdxé' Dios.

Uzxöni láchxa'a yöl-la' dxi'i láchxi' queé' Dios yugu' iz si' zaca.

⁹ Guítica'sa' Li': “Xclenu” tu' ben cazu' Li' ga naca caní, ate' guna' löza Lo' le naca dxi'a lógaca nupa néquiquequi quez quiu'.

53

¹ Ta'zá' láchxé'ë bönni' canóz, ta'nné':

“Biti’ ca’ zoë’ Dios.”

Nácagaquië’ xihui’ bönni’ caní, en núngaquië’ le nácatërö xihui’.
Cuntu nu bönni’ zoë’ runë’ le naca dxi’a.

² Ga na’ zoë’ Dios yehua’ yubá ruyúë’ gáti’tës,
en rilé’enë’ bönachi nacuá’ idútë yödžölió,
para inöžinë’ channö zoa nu réajni’i,
o channö zoë’ nu bönni’ ruí’i ládxë’ë Dios.

³ Yúgu’të bönachi sōjáquië’ ga yúbölö.

Yúgu’të’ nácagaquië’ xihui’.

Cuntu nu zoa run le naca dxi’a, nitúë’ bönni’.

⁴ ¿Naru’ cabí nápagaquië’ yöl-la’ réajni’i bönni’ na’ tu’ë dö’?

Tu’sunítie’ bönachi quia’ ca tu nu ragu yöta,

en biti’ ca’ tu’lidžë’ neda’.

⁵ Tadxí ta’džöbinë’ bönni’ caní, en biti’ bi nuna’ quégaquië’.

Caní raca tu’ rusunítie’ Dios caz nupa ta’díl-lalen libí’ili’.

Gunli’ ga ulu’tuí’inë’ tu’ chigurú’unë’ Dios légaquië’.

⁶ Raca ládxi’ru’ irúaj Sión Nu usölá bönachi Israel.

Cate’ uchisa cazë’ Dios bönachi queë’ nadžúngaca,

ulu’dzeja xzí’ini xí’sóë’ Jacob, en ulu’z’i xibë bönachi Israel.

54

¹ Busölá neda’, Dios, para gaca yöl-la’ ba que Lo’.

Len yöl-la’ huáca quiu’ guléaj neda’ tsahui’.

² Ruzë nagu’ le rulidza’ Li’, Dios.

Ruzë nagu’ didza’ ruá’a.

³ Ta’díl-lalen bönni’ zi’tu’ neda’,

tu’ té’ënë’ bönni’ zidzaj ilútië’ neda’.

Biti’ ca’ tádxinë’ Dios.

⁴ Buli’yútsöca’, naca cazë’ Dios Nu rácalen neda’.

Ruzóë’ tsutsu Xanru’ yöl-la’ na’bán quia’.

⁵ Ubi’ë quégaca nupa ta’díl-lalen neda’ le usuniti léguequi.

Tu’ runu’ ca rnna xtídzu’u, Dios, busuniti léguequi.

⁶ Idú ládxa’a gútiá’-ba’ böa’-bëdxi lo’.

Guía’ Li’: “Xclenu’” Xan, tu’ naca dxi’a Lo’.

⁷ Busölá cazu’ Li’ neda’ lu yugu’ le guca quia’,

ate’ rilé’eda’ zeaj nanítitica’sö nupa ta’díl-lalen neda’.

55

¹ Ruzë nagu’ le rulidza’ Li’, Dios,

en biti’ tá’bagu’ le rinábida’ Li’.

² Ruzë nagu’ neda’, en rubí’u didza’.

Rulidza yúdxida’ Li’, en rö’a böniga

³ ni’a que chí’ë bönni’ biti’ rilé’enë’ neda’ dxi’a,

en tu’ tu’tsá’ neda’ nupa tuá’ dö’, en tu’saca’ zi’ neda’,

en lu yöl-la’ rilé quéguequi ta’bía no neda’.

⁴ Réqui zi’ ládxi’da’ahua’,

ate’ yöl-la’ radxi que yöl-la’ guti röjtsaza ládxi’da’ahua’.

⁵ Chigula’yaza yöl-la’ radxi, en yöl-la’ rizxizi neda’,

ate’ nabaga’ yöl-la’ radxi ridžöbi neda’.

⁶ Gunnía’: “Gaca ládxa’a gata’ quia’ xílaba’ gu’dödo’,

para gaca tóda’ lu bö’ös, en idxina’ tu lataj ga gaca uzí’ ládxa’a.

⁷ Raca ládxa’a tseja’ zi’tu’,

en tsöjsóa’ la’ guixi’ ga dë lataj.

⁸ Uyija’ carelö tu lataj ga tsöjsóa’ tsutsu,

para cabí bi gun quia’ le naca ca bö’ budunu’.”

⁹ Busuniti légaquië’, Xan, en buxí ruá’agaquië’,

tu’ bilé’eda’ ta’díl-lë’, en tu’tsatsë’ lu yödžö.

¹⁰ Rëla, en te dza ta’dödë’ nöza lu yödžö.

Tu’ë dö’, en tunë’ le xihui’ idú gásibi’ilö yödžö.

11 Tu'sunitië' le nacuá' ni'.

Tu'saca' zi'ë bônachi, en ta'zì' yë'ë la' nōza que yōdz.

12 Calēga bōnni' biti' rilé'enē' neda' dxi'a nu rudidza' yudxi neda',

tu' huáca guá' ilena' le gunē',

en calēga bōnni' rudí'inē' neda' nu ridíl-lalen neda',

tu' huáca ucachi' cuina' lahuē',

13 pero nacu' li', tu bōnni' ca neda'.

Nacu' bōchi' luzá'a, en nacu' tuz len neda'.

14 Lu yōl-la' dxi'i ladxi' queēru' gúcaru' tuz.

Ladañ bônachi zían gudarú', en bidxinru' lidxē' Dios.

15 Xana' Dios, bē' yōl-la' guti lataj idxín quégaquiē' bagáchi'sō.

Ben ga tsōjtsázagaquiē' nabángaqiē' lataj chul-la ga nacuá' nupa nátigaca, tu' yu'u le xihui' lidxigaquiē', en lu yu'u ca' gapa tu'dubē'.

16 Pero neda' ulidza'-nē' Dios,

ate' usolá cazē' Xanru' neda'.

17 Chi'i dzō'ölō, en zílado', en gatsaj dza ulidza yúdxida' Lē',

en innē ládxa'a lahuē', ate' yōn cazē' chi'a.

18 Huōá'uē' yōl-la' na'bán quia' lu na' nupa ta'díl-lalen neda'

en uzōē' neda' lataj ga cōza' dxi'a tsáhuí'do',

tu' nayánda' nupa ta'díl-lalen neda'.

19 Huayón quézínē' Dios, en ubi'ë quégaquiē'.

Rō'ë rinná bē'tica'sē' Lē'.

Caní gunē' Dios tu' cabí tu'sanē' ca tunē',

en biti' tádxinē' Dios.

20 Bōnni' ru'ë dō' ribía nahuē' nu ribōza dxi'a tsáhuí'do',

en rucá'anē' cá'asō didza' dzaga nunē'.

21 Bē'ë didza' yúlado',

pero yu'u icja ládxi'da'ahuē' yōl-la' ridzá'a.

Bē'ë didza' zxi'ido',

pero didza' na' bē'ë gulaca ca guié' tuchi'.

22 Gulú'u le nabágu'u lu nē'ë Xanru', ate' utipa cazē' ládxi'u.

Biti' gu'ë lataj iguinnaj tsaz nu naca tsahui'.

23 Chú'unē' bōnni' tu'ë dō' na' lataj chul-la

ga nacuá' nupa nátigaca ga na' ila'nítigaquiē'.

Biti' ila'cuá' gatsaj tsa ral-la' ila'cu'ë nabángaqiē' bōnni' tutiē' bônachi,

en bōnni' ta'zì' yë'ë.

Pero neda' uxzōni ládxa'a Li'.

56

1 Buéchi' ladxi' neda', Dios, tu' ta'dá'bagá' bônachi neda'.

Yugu' dza nupa tu'dí'i neda' ta'bía no neda'.

2 Yugu' dza nupa biti' ta'lé'e neda' dxi'a tuá' dō' quia'.

Zían nupa ta'díl-lalen neda' lu yōl-la' run ba xzōn cúinguequi.

3 Cate' radxi ridzōbida', uxzōni ládxa'a Xanru'.

4 Ruzxōni ládxa'a-nē' Dios, en rigu'a yōl-la' ba xtídzē'ë.

Ruzxōni ládxa'a-nē', en biti' bi gádxida'.

¿Bizxi caz gaca ilún quia' bônachi?

5 Yugu' dza tun nigui neda' nupa biti' ta'lé'e neda' dxi'a.

Ta'zá' ládxi'tica'sō nacxi iluá' dō' quia'.

6 Tu'dubē' ga nagáchi'sō, en tu'yúlanē' yúgu'tē le runa',

para gata' quégaquiē' lataj ilútiē' neda'.

7 Bubi'ë quégaquiē', Dios, ca naca dō' tu'ë,

en lu yōl-la' rilé' quiu' busuniti légaquiē'.

8 Nōz quézinu' Li' ca rō'a bōniga.

Nurixu' Li' nisa ribōdxi quia'.

¿Naru' cabí nuzú' léguequi lu guichi quiu'?

⁹ Cate' ulidza' Li', la' dza ná'asö ulu'hué'ja gúz cúdzu'lö nupa tu'dí'i neda'.
Nöz quézida' rácalen cazu' neda', Dios.

¹⁰ Ruzxöni ládxa'a-në' Dios, en rigu'a yöl-la' ba xtídzë'ë.
Ruzxöni ládxa'a-në' Xanru', en rigu'a yöl-la' ba xtídzë'ë.

¹¹ Ruzxöni ládxa'a-në', en biti' bí gádxida'.
¿Bizxi caz gaca ilún bönachi quia'?

¹² ¿Gunna' quiu', Dios yugu' le guzxi' lu na'a!
¿Cu'a Li' yöl-la' ba!

¹³ Busöló' neda' lu yöl-la' guti, en nuzú' neda' tsutsu.
Ridá caza' lo' Li', Xantu' Dios, lu bení' ru'u quégaca nupa nabángaca.

57

¹ ¿Buéchi' ladxi' neda', Dios!
¿Buéchi' ladxi' neda' tu' ruzxöni ládxa'a Li' gun chi'u neda'!
Guxóa no'o neda' ca runba' bōra run chí'igacaba' bōrado' zxan xilaba',
ga idxinrō tōdi bōnaxi raca quia'.

² Rulidza'-në' Dios nayēpisētēre'.
Náquiē' Dios Nu run ga raca dxi'a quia'.
³ Ga zoa cazē' yehua' yubá ubi'ē didza', en usölē' neda'.
Usölē' neda' lu na' nu ribía no neda'.
Lu yöl-la' dxi'i ladxi' queē', en yöl-la' idú ladxi' queē' gácalenē' neda'.
⁴ Naca quia' tsa zoa' ládjagacaba' bēdxi guixi'.
Yugu' bōnni' zidzaj nagú'ugaquiē' neda' lē'ajlō.
Nácagaca láyi'gaquiē' ca yugu' yaga tuchi' que gudil-la,
ate' nácagaca lúdxix'gaquiē' ca yugu' guíē tuchi'.

⁵ Dios quia', buluí'i lahui lúzxiba yöl-la' zxōn quiu',
en yōdzōlió ni buluí'i lahui yöl-la' bení' quiu'.

⁶ Nupa tu'dí'i neda' núcachi'gaca du yalaj le sōn neda'.
Rudú ládxa'a tu' rō'a bōniga.
Gula'chō'ōnē' yeru ga tsōjbixa' neda',
pero gula'bixē' la' légacasē' lu yeru na'.

⁷ ¿Chinabá'a quia', Dios!
¿Chinabá'a quia'!
¿Gul-la' quiu', en cu'a Li' yöl-la' ba!

⁸ ¿Bubán, bō' naca caza'!
¿Guli'bán arpa, en bihuēl-la!
¿Zílado' ubana',
⁹ en gul-la' quiu' Li', Xan, ladaj bōnachi yugu' yōdzō!
¿Cu'a Li' yöl-la' ba lógaca yúgu'tē bōnachi!
¹⁰ Zxōntērō naca yöl-la' ruhuéchi' ladxi' quiu', le ridxintē yehua' yubá,
ate' ridxintē yöl-la' idú ladxi' quiu' lúzxiba xitsá'.

¹¹ Dios quia', buluí'i lahui lúzxiba yöl-la' zxōn quiu',
en yōdzōlió ni buluí'i lahui yöl-la' bení' quiu'.

58

¹ ¿Naru' ru'íli' didza' idútē li, libí'ili' na', rinná bē'ēli'?
¿Naru' ruchi'a rusōrōli' ca naca le naca tsahui'?
² ¿Biti' ca'! Rizá' ládxi'li' yugu' le xihui',
en rusaca' zí'ili' bōnachi len yugu' le cabí' nácátē runli'.
³ Ta'dōdi tsólá'alō nupa tuá' dō' ga gudéla'tē gúl'jagaca.
Ta'z'í' yē' ga gudéla'tē bulu'cuá'anu xiná'aguequi léguequi.
⁴ Yu'u ruí'guequi le nachē' yöl-la' guti ca le dxía láyi'gacaba' bēla sínía'.
Nácagaca ca tuba' bēla sínía' nacōdzuba',
⁵ bēla na' biti' riyōnba' chi'ē bōnni' gudzá',
o le rul-lē' bōnni' runē' gudzá'.

6 ¡Dios quia'! ¡Buzxuzxaj láyi'gaquië'!
 ¡Guladzu' yugu' layi' tuchi' quégacaba' bēdxi guixi'!
 nácagaca ca layi' tuchi' quégacaba' bēdxi guixi'!
 7 ¡Ben ga ila'nítie' ca raca que nisa yegu gubó'o cate' ruhuí'!
 ¡Ben ga ila'cuádië' ca raca que guixi' rō'ō la' nōza!
 8 ¡Ben ga ila'nítie' ca yugu' bōruhuinna tu'únaba' lu gubidza,
 o ca tubi' b'í'ido' nuzóanu-bi' nigula zí'alō ca ral-la' gáljabí', en chinátitēbi'!

9 Zí'alō ca gaca utsē'e yusu' tu guí' zxōn,
 ugúë' Dios légaquië' lu yōl-la' ridzá'a queë',
 bōnni' nabángacuië', en bōnni' chizóa ilátie'.
 10 Ulu'dzeja nupa nácagaca tsahui' cate' ila'lé'e
 uzí' lēbē' Dios bōnni' tu'ē dō' na'.
 Ulu'zxinē' len ná'agaquië' xichōngaca nupa na' tuá' dō'.
 11 Ila'nná bōnachi: "Le nácate zoa le rubi'ë Dios quégaca nupa nácagaca tsahui'.
 Le nácate zoë' Dios Nu ruchi'a rusōrō quégaca nupa nacuá' yōdzōlió."

59

1 Busólá neda', Dios, lu ná'agaca nupa ta'zóa regu' neda'.
 Buzóa neda' tsutsu ga biti' gaca ila'dxín nupa ta'díl-lalen neda'.
 2 Busólá neda' lu ná'agaca nupa tuá' dō',
 en guléaj neda' lu ná'agaca nupa tuti bōnachi.
 3 Buyútsōca', ta'bō' nísie' neda' para ilútië' neda'.
 Ta'zóa régu'ë bōnni' zidzaj neda',
 calēga tu' gudá'baga'a légaquië', o tu' ben zi'a légaquië', Xan,
 4 en calēga tu' bétia' bōnachi, pero ta'zē'ë carelō para tíl-lalenë' neda'.
 Gudá gácalenu' neda', ate' ilé'enu' naca caní.
 5 Xantu' Dios quégaca nī'a no'o guizxi yu,
 en Dios quégaca bōnachi Israel,
 gudá dujenu' xiguaia' bōnachi yúgu'tē yōdzō.
 Biti' uzá' lādzu'u quégaca nupa tuá' dō' lu yōl-la' rizí' yē' quéguequi.
 6 Tu'dxinē' chi'i dzō'ölō, ta'bōdxi yechē'ë ca runba' bō'cu' ragu yéchi'ba' beo',
 ate' ta'dōdē' idú gásibi'ilō yōdzō.
 7 Buyútsōca', didza' tu'ë nácagaca ca le rēbigaquië'.
 Nácagaca didza' tu'ë ca yugu' guíë tuchi'.
 Ta'nnē': "¿Nuzxi caz yōni'?"
 8 Ruxidxu' ca naca le tunē', Xan.
 Rutitju' ca naca le tun bōnachi yúgu'tē yōdzō.
 9 Tu' nal-la cazu' Lī' guna' lōza Lī'.
 Nacu' Dios Nu run chi'i neda'.
 10 Tu' náquië' Dios quia' dxi'i ladxi', dutsáquië' neda'.
 Uxícja cazē' Dios nupa ta'díl-lalen neda'.
 11 Biti' gútiu' nupa na' tuá' dō' para cabí ilal-la ladxi' bōnachi ladza'.
 Lu yōl-la' huáca zxōn quiu' bēsílasi nupa tuá' dō', en buzōtaj léguequi luyú.
 Naca cazu' Xantu', Nu run chi'i netu'.
 12 Ben ga sōn légaquië' yōl-la' run ba zxōn cúngaquië'
 tu' nōzi dul-la' tunē' ca tu'isē' didza',
 enca' tu' tu'dxië' dō' luzá'agaquië', en ta'zī' yē'ë.
 13 Lu yōl-la' rilé quiu' busuniti légaquië'.
 Busuniti légaquië' tsaz para cabí ila'cuá'arē',
 en para iléquibe'ë bōnachi Dios caz rinná bé'enē' xzí'ini xi'sóë' Jacob,
 ga ridxintē idútē yōdzōlió.
 14 Tu'dxinē' chi'i dzō'ölō, ta'bōdxi yechē'ë ca runba' bō'cu' ragu yéchi'ba' beo',
 ate' ta'dōdē' idú gásibi'ilō yōdzō.
 15 Ta'dē' ta'guiljē' le ilahuē',
 ate' ta'bōdxi'ë channō cabí ulu'huōlaj ulu'dzé'enē'.
 16 Gul-la' neda' ca naca yōl-la' huáca zxōn quiu'.

Yugu' zila gul-la' lu yöl-la' rudzeja quia' ca naca yöl-la' dxi'i ladxi' quiu',
tu' naca cazu' Li' Nu run chi'i neda',
en nacu' Nu rácalen neda' cate' bi raca quia'.

¹⁷ ¡Naca cazu' Li' Nu rutipa ládxa'a!
¡Gul-la' quiu' yöl-la' ba,
tu' nacu' Li' Nu run chi'i neda', Dios, en Nu nadxí'i neda'!

60

¹ Nusán no'o netu', Dios, en nuzötju' netu'.
Buécja queétu' na'a, en gúcalen netu'.
² Ben cazu' ga gudödi budó' zxu', en guyalaj luyú.
Bun luyú ni tu' chizóa iguinmaj.
³ Sizxöni busaca' zi'u bönachi quiu'.
Le guca queétu' guca tsca bugui'ju' netu' xis uva nal-la
le ben ga yöjchégu'tu' ca tu bönni' nazúdxin'.
⁴ Bunödzu' quégaca nupa tadxi Li' tu lari' ulu'chisa,
le söjácalen cate' bi raca quéguequi,
⁵ para ulu'lágaca nupa na' nadxí'i quézinu'.
Len yöl-la' huáca zxön quiu' busölá netu', en bubí'i didza' cate' rulidztu' Li'.

⁶ Lu le naca lá'ayi queé' bē'ē didza' Dios, gunnē':
"Uzi'a xibē, en quisia' xiyúgaca bönachi Siquem, en urixa' luyú dē cuita yegu Sucot.
⁷ Nequi quia' xiyúgaca bönachi Galaad, enca' xiyúgaca xzí'ini xi'sóē' Manasés.
Naca ca tu le rusubín icja' xiyúgaca xzí'ini xi'sóē' Efraín.
Xiyúgaca xzí'ini xi'sóē' Judá naca ga rinná bē'a.
⁸ Xiyúgaca bönachi Moab naca ca tu ga rigui'bi na'a,
ate' cu'a löla' uléaja' xiyúgaca bönachi Edom.
Códxi'a tu' uxicja' bönachi Filistea."

⁹ ¿Nuzxi caz gaca ichē' neda' lu yödzö zoa zö'ö idú gásibi'ilö le run chi'i yödzö na'?
¿Nuzxi caz ichē' neda' lu xiyúgaca bönachi Edom?
¹⁰ ¿Naru' cabí nusán ládxu'u netu', Dios?
¿Naru' cabí tséajlenu' bönni' queétu' röjáquiē' gudil-la?
¹¹ Gúcalen netu' cate' tíl-lalentu' nupa ridíl-lalen netu',
tu' cabí gaca gácalen netu' nu naca bönáchisö.

¹² Len yöl-la' huáca queē' Dios idéli'ru'
tu' uxicja cazē' Lē' nupa ta'díl-lalen netu'.

61

¹ Ruzē nagu' le rulidza' Li', Dios.
Ruí'i ládxu'u le rinábida' Li'.
² Ga ni zoa' zi'tu' ga dē ladza' rulidza' Li' tu' rudú ládxa'a.
Guchē' neda' ga zoa Nu na' naca ca tu guiöjto'o, Nu na' nál-latērö ca neda'.
³ Nacu' Li' Nu run chi'i neda'.
Nacu' Nu rácalen neda' cate' zoa nu ribía no neda'.
⁴ Bē' lataj sóatica'sa' ga zoa cazu' Li'.
Bē' lataj sóalena' Li', guna' neda' ca tunba' bórado' ta'yázaba' zxan xílabá' yöjede.
⁵ Biyón quézinu' Li' le guxzí' lu na'a guna' quiu' Li', Dios.
Benu' ga nequi quia' le runödzu' quégaca nupa tadxi Li'.
⁶ Gunu' ga soē' xidzé bönni' na' rinná bē'ē uláz quiu'.
Zián iz soē' ibanē'.
⁷ Sóatica'sé' lo' Li', Dios.
Bē' queē' yöl-la' dxi'i ladxi', en le naca idútē li, yugu' le ilún chi'i lē'.

⁸ ¡Gúl-latíca'sa' yöl-la' ba que Lo',
para gaca guna' tu tu dza le guxzí' lu na'a!

62

¹ ¡Tuzē' Dios ruzxöni ládxa'a, en rizē ládxa'a Lē'!
¡Lē' cazē' rusölē' neda'!
² ¡Tuzē' Lē' rapa chi'ē neda', en rusölē' neda'!

¡Ruzóë' neda' tsutsu, ate' biti' gaca nu uzötaj neda'!

³ ¿Gáca'xte caz güf'i ládxi'li' ucúl-lali' neda'?
Ré'énisili' uzötjali' neda' ca tu zō'ō chizōa iguinnaj,
o ca tu lē'aj yaga le chinatēbi.

⁴ Ré'énisili' uzötjali' neda' ga ni tunē' neda' bal.
Ruzí'ili' xibé yugu' didza' biti' nácatē.
Ruí'ili' dxi'a didza' láhui'sō,
pero lu icja ládxi'do'oli' rudidza' yúdxili' neda'.

⁵ ¡Tuzē' Dios ruzxōni ládxa'a,
en runa' löza Lē'!

⁶ ¡Tuzē' Lē' rapa chi'ē neda', en rusölē' neda'!
¡Ruzóë' neda' tsutsu, ate' biti' gaca nu uzötaj neda'!

⁷ ¡Tuzē' Dios rusölē' neda', en runē' ga naca' bica' ba!
¡Dios nuzóë' neda' tsutsu, en rapa chi'ē neda'!

⁸ Libí'ili', bōnachi, buli'zxōni ládxi'ē Dios yúgu'tē dza.
Buli'siyōnnē' yugu' le raca queēli', tu' run chi'i cazē' rē'u.

⁹ Le nácatē nácacaga yúgutē bōnachi ca tu bō' ridōdisō,
en biti' bi nazáca' gaca nupa na' nadéli' gaca lataj lo.
Tu lu zxi'góns biti' bi nál-lí'guequinē'.

Nácacagarē' dzá'asō ca tu bō' riguēla'siru'.
¹⁰ Biti' uzzōni ládxi'li' bi idéli'li' len yōl-la' nál-la queēzili'.
Biti' uzí'ili' xibé le cuanli'.

Channō gata' queēli' yōl-la' tsahui', biti' güf'i ládxi'li' le.

¹¹ Tu luzuísō bē'ē didza' Dios.

Chopa luzuí' biyōnda' ca naca lē' ni rnna:

"Nápatērē' Dios yōl-la' huáca,

¹² ate' zóatica'sō yōl-la' dxi'i ládxi' queē'."

Ubí' i cazu', Xan, quégaca bōnachi tsca naca le núngaca.

63

¹ Dios, nacu' Dios quia', ate' idú ládxa'a ruguilja' Li'.

Ribidxi ládxa'a Li', ate' idutē le naca' rizē ládxi' Li'.
Zoa' tu luyú bidxi ga ni rudú ládxa'a, ate' biti' bi dē nisa.

² Ben ga ilē'eda' Li' lu lataj ga na' zoa cazu',
para ilē'eda' yōl-la' huáca quiu', en yōl-la' bení' quiu'.

³ Tu' nácatērō dxi'a yōl-la' dxi'i ládxi' quiu' ca yōl-la' na'bán caz.
Que lē' ni na' cu'a Li' yōl-la' ba.

⁴ Guí'a Li': "Xclenu'" tsanni ni zoa' nabana'.

Uchisa' na'a, en ulidza' Lo'.

⁵ Ruhuölaj rudzé'e icja ládxi'da'ahua' le nácatērō dxi'a,
ate' lu yōl-la' rudzeja quia' rigu'a Li' yōl-la' ba.

⁶ Rōjneda' Li' cate' déa' lu le rati'da'.

⁷ Rizá' ládxa'a ca nacu' cate' rina'sa' yēla.

Rácalen cazu' neda',

en tu' run chi'u neda', lu yōl-la' rudzeja quia' rul-la' quiu'.

⁸ Nazōn cazu' Li' bō' naca caza'.

Rizōn cazu' Li' neda',

⁹ pero ila' yaza lataj chul-la

nupa té'ēni iluti neda'.

¹⁰ Ilátigaca lu guíē tuchi'.

Ilágugaca bō'cu' zuga' léguequi.

¹¹ Nu rinná bē' uláz queē' Xanru' udzeja ládxi' lahuē' Dios.

Ulu'z'í' xibé yúgu'tē nupa tu'zxōni ládxi' Lē',

tu' usayaj cazē' Lē' ruí'igaca nupa ta'z'í' yē'.

64

¹ Dios, buzé nagu' chi'a le rinabi yúdxida' Li',

para gun chi'u yōl-la' na'bán quia' tu' rádxida' bi gun nu ridíl-lalen neda'.

² Bucachi' neda' para cabí bi ilún quia' bagáchi'sö nupa tuá' dö',
 en para cabí ila' bía di'è neda' bönni' tutië' bönachi.
³ Nácagaca lúdxí'gaquië' ca yugu' guíë' tuchi',
 ate' nácagaca didza' zì' tu'è ca yugu' yaga lahui tuchi'.
⁴ Bagáchi'sö tu'zë yugu' yaga lahui tuchi' na'
 para ilunë' huë' nupa bitì' bi nabága'gaca.
 Tsárido'os tu'zë léguequi, en bitì' bi tádxinë'.
⁵ Bitì' ca' tu'cá'anë' le naca dö' té'ënë' ilunë'.
 Tu'è didza' ca gaca ulu'cáché'ë yugu' du yalaj quégaquië', ta'nnë':
 "¿Nuzxi caz gaca ilé'e yugu' du na'?"
⁶ Tunë' didza' ca naca le naca dö' ilunë', ta'nnë': "Chinabá'a le gunru'."
 Tu'cáchi'gaquië' le ta'zá' ládxë'ë, en le ta'bequi icjë'.

⁷ Uzal-lë' Dios tu yaga lahui tuchi' le ideli' légaquië'.
 Tsárido'os gunë' légaquië' huë'.
⁸ La' didza' tu'isë' ilún ga tseajchégu'gaquië'.
 Lu yöl-la' rubani quéguequi ulu'tá ícjaguequi nupa ila'lé'e légaquië'.
⁹ Ní'irö yúgu'të bönachi iladxi Dios,
 en ulu'siyón luzë'eguequi ca naca le nunë' Dios,
 en ila'zá' ládxí'gaca ca naca lë na' nunë'.
¹⁰ Nu bönni' tsahui' uzi'ë xibë' Xanru', en gunë' löza Lë'.
 Yúgu'të nácagaca idú ladxí' ulu'zì' xibë'.

65

¹ Dios, nupa nacuá' yödzö Sión ila'gú'u Li' yöl-la' ba,
 en ilunna quiu' le gula'zì' lu në'eguequi,
² tu' riyón quézinu' Li' cate' tu'lidza Li',
 ate' yúgu'të bönachi ila'dxín lo'.
³ Tun nigui neda' dul-la' nuna',
 pero runiti lo cazu' netu' ca naca le ridá'baga'tu' Li'.
⁴ Bica' ba nupa nabö cazu' quiu', en nulidzu' quiu',
 para ila'cuá' yugu' lataj lá'ayi quiu'.
 Huölaj udzé'etu' le nácagaca dxi'a yú'ugaca lidxu',
 enca' le yú'ugaca yudo' lá'ayi quiu'.
⁵ Tu' nacu' tsahui' rubi'u didza', en runu' yugu' le zxön le tácalen netu'.
 Naca cazu' Dios Nu rusölá netu'.
 Nupa nacuá' idütë yödzölió ulu'zxöni ladxí' Li',
 enca' nupa nacuá' zì'tu' ia'tsölá'alö nísado'.
⁶ Len yöl-la' huáca quiu' nucu'u yugu' guí'a zxön,
 le naca bë'gaca nál-latërö cazu' Li'.
⁷ Ruzóa dxiu' le riyasa ridxía lu nísado', en le ru'u bö que.
 Ruzóa dxiu' bönachi cate' tu'tsatsa.
⁸ Bönachi idütë yödzölió tadxi Li' ni'a quégaca le zxön nunu'.
 Le run cazu' Li' tun ga tu'dzeja bönachi idapa la'a yödzölió.
⁹ Ru'i ladxu'u luyú, en risöl-lu'u nisa guiøj.
 Runu' ga ruhuóaca yu ya'a.
 Nucu'u luyú na' yugu' yegu yúdzugaca nisa zila,
 le run ga dëtica'sö zxoa'-za, tu' caní raza ladxu'u Li'.
¹⁰ Risöl-lu'u nisa guiøj gapa dëgaca na, en rusubisu' gapa chinadúz.
 Ruúnu' yúludo' luyú zidzaj, en runu' ga ta'gula guixi' cuando'.
¹¹ Runu' ga rulá' yödx yana' le nadúz luyú ni tu iz tu iz,
 en ga zóatica'sö le ilë'aj ilágugaca bönachi.
¹² Nacuá'aba' böa'-bëdxi la' guixi',
 ate' tu'dzeja bönachi yugu' lu guí'ado'.
¹³ Gapa naca lachi' nacuá'aba' bö'cu' zxila',
 ate' dxiada' zxoa' xtila la' yëla.
 Lu yöl-la' rudzeja quéguequi ta'bödxí'a,
 en tul-la bönachi quiu'.

66

¹ ¡Guli'güi' zidzaj didza' lahuë' Dios
 lu yöl-la' rudzeja queéli' yúgu'tëli' zóali' yödzölió!

² ¡Gulí'gul-la ca naca yöl-la' ba que Lë'!

¡Gulí'cu'ë yöl-la' ba!

³ Gulí'guíë' Dios: "¡Zxöntë'rö nácagaca le nunu' tu' naca zxöntë'rö yöl-la' huáca quiu'!"

Nupa bití' ta'lé'e Li' dxi'a ulu'lu'i cuini

ca nupa tun ca rnna xtídz'u.

⁴ Yúgu'të nupa nacuá' yödzo'lió ilún Li' zxön,

en ilúl-la yöl-la' ba quiu'.

Ilúl-la yöl-la' ba que Lo'.

⁵ Gulí'dá ilé'eli' yugu' le nunë' Dios.

Nayëpisëtërë' Dios lu le runë' quégaca bönachi.

⁶ Benë' ga böáca ca luyú bidxi ga dë nísado'.

Gula'dödë' gatsaj láhui'lö yegu, ta'zë'esò ní'agaquië'.

Ní' udzëjade'eru' ca náquië' Lë'.

⁷ Len yöl-la' unná bë' queë' rinná bë'tica'së'.

Ruyútica'së' bönachi yúgu'të yödzo'.

Bití' ral-la' ilún ba zxön cuínguequi nupa ta'dá'baga' xtídzë'ë.

⁸ ¡Gulí'gún zxönë' Dios queëtu', libí'ili' bönachi yúgu'të yödzo',

en gulí'cu'ë yöl-la' ba gátí'tës!

⁹ ¡Run cazë' Lë' ga zóaru' nabanru',

en bití' ru'ë lataj cuila ní'atu'!

¹⁰ Guzxí' bë' cazu' netu', Dios.

Buchi'u netu' ca run nu ruchi'a guíë plata lu guí'.

¹¹ Bë'u lataj bidzuntu' lu du yalaj.

Busubágu'u netu' tu yua' zi'i.

¹² Benu' ga gula'libë' icjtu' bönni' dxíagaquië'-ba' böa'.

Gudöditu' lu guí', en lu nisa,

pero guchë' cazu' netu' tu lataj ga bö'aj budzé'etu'.

¹³ Tsu'a lidxu', en cu'a-ba' lo' böa'do' uzégui'a-ba' lo'.

Guna' lo' Li' le guzxí' lu na'a guna',

¹⁴ lë na' bë'a didza' que,

le gunni'a cate' ní' rígu'i rizáca'a.

¹⁵ Cu'a-ba' lo' Li' böa'-bëdxi renni' uzégui'a-ba' lo',

tsözxön len dzön quégacaba' chivo biguiú'.

Gúti'a-ba' lo' yugu' bëdxi, en yugu' chivo biguiú'.

¹⁶ Gulí'dá uzë nágali', yúgu'tëli' rádxili'-në' Dios,

ate' usiyönda' libí'ili' yugu' le benë' le gulácalen neda'.

¹⁷ Len ruá' cuinsa' bulidza' Lë',

en bena' Lë' zxön len lúdx'a'a.

¹⁸ Channö rucácha'a le naca dö' lu ládxi'da'ahua',

bití' yönnë' Xanru' Dios didza' gu'a,

¹⁹ pero le nácatë biyönnë' Dios didza' bë'a.

Buzë naguë' cate' bulidza' Lë'.

²⁰ ¡Yöl-la' ba Dios!

¡Bití' gudá'baguë'ë neda' cate' bulidza'-në',

en bití' bugüë' yöl-la' nadxí'i queë' neda'!

67

¹ Xantu' Dios, buzá' ladxi' queëtu', en ben ga gaca dxi'a queëtu'.

Lu yöl-la' dxi'i ladxi' quiu' buyú netu',

² para gaca bë' le rë'ënu' guntu' yödzo'lió ni,

en para ila'nözi bönachi yúgu'të yödzo' ca naca yöl-la' rusölá quiu'.

³ Ral-la' ila'gú'u bönachi Li' yöl-la' ba, Dios.

Yúgu'të bönachi ral-la' ila'gú'u Li' yöl-la' ba.

⁴ Ral-la' ulu'dzeja bönachi yúgu'të yödzo',

en ilúl-la lu yöl-la' rudzeja quéguequi.

Tu' uchí'a usöröu' bönachi ca naca le naca tsahui',

⁵ ral-la' ila'gú'u Li' yöl-la' ba bönachi, Dios.
Yúgu'tè bönachi ral-la' ila'gú'u Li' yöl-la' ba.

⁶ Yödxí yana' runödzej luyú ní.
Dios queéru' runé' ga raca dxi'a queéru'.

⁷ Runé' Dios ga raca dxi'a queéru',
para iladxi Lé' yúgu'tè nupa nacuá' yödölió.

68

¹ Raca ládxi'ru' chasé' Dios, en usulásié' nupa ta'díl-lalen Lé',
en guné' ga ulu'zxunnaj nupa bití' ta'lé'e Lé' dxi'a.

² Ca rulaga tu bô' recja dzôn, ca' bulaga léguequi.

Ca na' ruúna' lu guí' quízxi'ba' buz,
ca' ila'niti nupa tuá' dö' lahué' Dios.

³ Ulu'dzeja nupa nácgaca tsahui', en ulu'z' xibé' Dios.
Lu yöl-la' rudzeja quéguequi ulu'z' xibé'.

⁴ ¡Guli'gul-la queé' Dios!
¡Guli'gul-la yöl-la' ba que Lé'!
Buli'pá'a nôza ga tódé' gapa dē lataj.
¡Nazí'i lē' Xanru'!
¡Buli'dzeja lahué' Lé'!

⁵ Náquié' ca xúzgacabi' bi'i uzébido',
enca' Nu ruchí'a rusórō quégacanu nigula uzébi.
Caní náquié' Dios ga na' zoé' lataj lá'ayi queé'.

⁶ Rucu'é Dios nupa nagá'anagaca bayechi' tu yu'u.
Rubéajé' nupa nadzúngaca, en runé' ga raca dxi'a quéguequi,
pero ulu'gá'ana tu luyú bidxi nupa ta'dá'baga' Lé'.

⁷ Yöjnöru cazu' lógaca bönachi quiu', Dios,
cate' guché'u léguequi la' guixi' ga na' dē lataj.

⁸ Gudödi budó' zxu' dza ní'.
Lësca' gula guiöjsiu' lahué' Dios.
Guxzizi guí'a Sinaí lahué' Dios quégaca bönachi Israel.

⁹ Benu' ga gulaj guiöjsiu', Dios.
Benu' ga bôáca ya'a xiyú' ga ní' guca yu bidxi.

¹⁰ Yöjcuá' nupa néquiguequi quiu' luyú na'.
Lu yöl-la' dxi'i ladxí' quiu', Dios,
bucözu' le gácalen nupa nácgaca yechi' luyú na'.

¹¹ Bē' cazē' didza' Xanru' Dios.
Ta'guísinu nigula zían didza' dxi'a queé', ta'nnanu:

¹² "¡Ta'zxúnnajé'! ¡Ta'zxúnnajé' bönni' ta'nná bē'é,
enca' bönni' rōjáquié' gudil-la guizxi yu quégaquié'!"
Nigula gula bōzanu lidxigacanu bulu'z'ínu xibé le gutá' quégaquié'.

¹³ Sal-la' 'bucachi' lolí' gapa tun chí'ili' bō'cu' zxila',
gáculi' le naca lachi ca nácgacaba' gu'dódo' néquiguequiniba' guié plata,
en xitúbigacaba' néquiguequini guié oro.

¹⁴ Cate' bēsilásié' Dios bönni' na' gula'nná bē'é lu guí'a Salmón,
bené' ga gula guiöj böguí' lu guí'a na'.

¹⁵ Nequi queé' Dios guí'a Basán.
Naca guí'a Basán na' tu guí'a zxön.

¹⁶ ¿Bizx que ruzxé'eli', yugu' guí'a zxön?
¿Bizx que ruzxé'eli' guí'a na' guzē ládxē'ē Dios tsöjsóé' ga na'?
Le nácaté tsaz soé' Dios ní'.

¹⁷ Gayuá', en gayuá' nácgaca carreta que gudil-la queé' Dios.
Rizé'ē Xanru' lu guí'a Sinaí ga na' tseajtsazié' lataj lá'ayi queé'.

¹⁸ Buëpu' yehua' yubá riché'u bönachi zían gula'dzúngaca.
Nu'u yugu' le bulu'nödzej bönachi quiu',

en le gulunna quiu' nupa ta'dá'baga' Li',
para tsòjsóè' Dios ni' tsaz.

¹⁹ ¡Yöl-la' ba Dios, Nu ruá' sua'ru' tu dza tu dza!
¡Náquiè' Dios Nu rusólá rë'u!
²⁰ ¡Dios queéru' rusólé' rë'u!
¡Rusólé' Xanru' Dios rë'u lu yöl-la' guti!

²¹ Le nácatè Dios udxíè' huè' ícjagaca nupa ta'dá'baga' Lè'.
Udxíè' huè' icjè' bönni' biti' gusanè' ca naca dö' ru'è.
²² Ru'è didza' Xanru', rnnè': "Ubéaja' léguequi lu guí'a Basán,
en ubéaja' léguequi lu nísado',
²³ ate' ulíbili' léguequi ga idxintè írúaj ròn quéguequi,
ate' ilè'ajba' zxículi' xichóngaca nupa ta'díl-lalen libí'ili'."

²⁴ Ta'lé'e yúgu'tè bönachi nupa ta'dalen Li', Dios.
Lu yöl-la' run Li' zxón ta'dá lu lataj lá'ayi quiu', Dios quia', Nu rinná be'e neda'.
²⁵ Nupa tul-la, en nupa ta'guínnaj lè'egaca bihuél-la, ta'dá ni',
ate' bi'i nigula ra'bando' tunbi' léguequi tsózxón, ta'gápabi' lè'egaca guídido'.

²⁶ Bulí'lidzè' Dios dxi'a tsáhui'do' gapa na' rudúbili' queé',
tu' náquiè' Xanru', libí'ili' xzí'ini xi'sóè' Israel.

²⁷ Nacu'è xzí'ini xi'sóè' Benjamín ga na', bönni' gúcarè' cuidi', ate' ta'nná bē'è.
Bönni' lo quégaquiè' xzí'ini xi'sóè' Judá nútsa'gaquiè' ládjagaquiè',
enca' ládjagaquiè' bönni' lo quégaquiè' xzí'ini xi'sóè' Zabulón, en Neftalí.

²⁸ Buluf'i lahui yöl-la' huáca quiu', Dios.
Buluf'i lahui yöl-la' huáca quiu', Dios, tu' chibenu' zían le gulácalen netu'.

²⁹ Tu' dē yudo' quiu' lu yödzö Jerusalén,
bönni' ta'nná bē'è ila'chē'è ni' le ilunnē' quiu'.
³⁰ Buzé le bach bönachi yödzö na' nácagaca ca bōa' guixi',
enca' bönachi yugu' yödzö nácagaca ca yugu' bēdxi tsózxón len xzí'iniguequi.
Tu'libi bönachi yechi' tu' ta'zè lādxi'gaca dumí.
Bēsílási nupa na' ta'yaza lādxi' rōjaca gudil-la.
³¹ Bönni' gubáz quégaca bönachi Egipto ila'dxinē' lo'.
Bönni' Etiopía ila'chisa ná'agaquiè' lo', Dios.

³² ¡Gulí'gul-la queè' Dios, bönachi yúgu'tè yödzó!
¡Gulí'gul-la yöl-la' ba queè' Xanru'!
³³ Rō'è yehua' yubá xítsá'tërō, le zoa caz dza ni'te.
Bulí'yútsóca', ru'è zidzaj didza', en naca chí'è ca guziú' rinné.
³⁴ ¡Gulí'gún zxónè' Dios!
Yöl-la' nayēpisè queè' rusubaga' bönachi Israel.
Yöl-la' huáca zxón queè' nalá' lúzxiba xítsá'.

³⁵ Rubániru' ca nacu' Li', Dios, lu lataj lá'ayi quiu'.
Runnu' quégaca bönachi quiu' yöl-la' nal-la, en yöl-la' huáca.

Náquiè' Dios quégaca bönachi Israel.
¡Yöl-la' ba Lè' Xanru' Dios!

69

¹ Busólá neda', Xana' Dios,
tu' raca quia' tsa nabága' nisa ga ridxintè ruchicja' nisa.
² Raca quia' tsa ruhuötja' ga rē' lu guna', en biti' zoa ga gaca uliba'.
Zoa' ca tu lu nisa zila, en chízóa uchicja' nisa.

³ Rudú lādxa'a tu' rulidza' nu gácalen neda', ate' da' lubá'a.
Chirichul-la guiój lahua' tu' ruyúa' ga guídu' dusóló' neda'.
⁴ Nayántërō ca guítsa' icja' nupa biti' ta'lé'e neda' dxi'a,
en biti' bi nuna' quéguequi.
Nál-lagaca nupa ta'díl-lalen neda', en tē'eni iluti neda',

en biti' bi nuna' quéguequi.
Tunë' bayúdx ubi'a dumí le cabí gulana'.

⁵ Nöz quézinu' Li', Dios, yöl-la' canöz quia',
en biti' nagachi' lo' Li' dul-la' nuna'.
⁶ Biti' gu'u lataj nupa tu'zxöni ladxí' Li' ulu'tuf'i ni'a quia' neda',
Xana' Dios nayépisètëru'.
Biti' gu'u lataj nupa tun Li' zxön ila'gá'ana cá'asö ni'a quia',
Dios quégaca bönachi Israel.
⁷ Tu' nadxí'ida' Li' tu'lidza ditjë' neda',
en que lë ni na' rutu'ida'.
⁸ Naca' ca tu bönni' zi'tu' lógacabi' bi'i böcha'a,
en ca tu bönni' zi'tu' lógaquië' di'a dza quia'.
⁹ Tu' rui'i ládxa'a yudo' quiu' régui rilá ládxi'da'ahua'.
Naca ca tu'lidza ditaj neda' nupa tu'lidza ditaj Li'.
¹⁰ Ruzötaj cuina', en runa' gubasa,
en que lë ni na' tu'didza' yudxi neda'.
¹¹ Rácu'a' lari' cá'asö ca run nu ribödxí yechi',
ate' tu'titaj neda'.
¹² Ta'nnë' quia' yugu' la' nöza,
ate' nupa nazúdxigaca tul-la ca naca quia',
¹³ pero neda' ulidza' Li', Xan.

Bubí'i didza', Dios, cate' idxín dza raza ládxu'u Li'
tu' nadxí'ide'enu' neda',
en tu' guzxi' lu no'o usöló' neda'.
¹⁴ Guléaj neda' para cabí huötja' lu le naca ca guna'.
Ben ga ulá' lu ná'agaca nupa ta'díl-lalen neda',
en lu le naca ca nisa zila le chizóa ibaga' neda'.
¹⁵ Biti' gu'u lataj ibaga' neda' lë na'.
Biti' gu'u lataj uchicja' lu le naca ca nísado',
enca' cabí huötja' tu lu yeru ba.
¹⁶ Bubí'i didza', Xan, tu' nacu' dxi'i ladxí',
en tu' ruhuéchi' ládxu'u neda', gudá quia'.
¹⁷ Biti' ucachi' cuinu' lahua' neda', huen dxin quiu'.

jRö'a böniga! jGudáchi gúcalen neda'!
¹⁸ jGudá ga zoa' dusöló' neda'!
jBen ga ulá' lu ná'agaca nupa ta'díl-lalen neda'!

¹⁹ Nöz quézinu' Li' ca tu'didza' yudxi neda',
en ca tu'lidza ditaj neda', en tu'cá'ana neda' cá'asö.
Rilé'e quézinu' yúgu'të nupa biti' ta'lé'e neda' dxi'a.
²⁰ Rudú ládxa'a tu' tu'didza' yudxi neda', en biti' bi gaca guna'.
Gulöza' nu huéchi' ladxí' neda', pero cuntú nu guzóa.
Gú'unida' nu huë tsahui' neda', pero cuntú nu bidzöli.
²¹ Cate' guduna' bulu'gahuë' neda' tu le silá',
en cate' gubidxa' nisa, bulu'gui'jë' neda' nupe zi.
²² Ben ga huóaca laní quégaquië' ca tu le sön légaquië',
en ben ga huóaca le tu'zi'ë xibë ca tu le gun ga ila'chixi ila'níguinë'.
²³ Ben ga ichul-la guiöj lógaquië' para cabirö ila'lé'enë'.
Ben ga ila'zéchutica'sö cúdzu'gaquië' zxaan yua' nuá'gaquië'.
²⁴ Busubaga' légaquië' lu yöl-la' rilé quiu',
en bë' quégaquië' yöl-la' ridzá'a quiu'.
²⁵ Ben ga cuntú nu soa ládzagaquië',
en ga bítirö nu soa lu yu'u lídxigaquië'.

²⁶ Ta'zóa régu'ë nupa na' benu' léguequi xigua'.
Tu'siyönnë' ca ta'guí'i ta'zaca' nupa na' nunu' léguequi huë'.
²⁷ Buzúaj lu guichi yugu' dul-la' tunë',
en biti' gu'u légaquië' lataj ila'déli'në' yöl-la' rusólá quiu'.
²⁸ Busulu lágaquië' nazúajgaca lu guichí quégaca nupa nabángaca.

Biti' gu'u légaquië' lataj ila'bábalenë' nupa nácacaga tsahui'.

²⁹ Neda' riguí'i rizáca'a, en rudú ládxa'a.

Guchisa neda', Dios, en busólá neda'.

³⁰ ¡Cu'a-në' yöl-la' ba Dios len tu le gul-la'!

¡Guna' Lë' zxon, en guía'-në': "Xclenu"!

³¹ Chaza ládxë'ë Xanru' Dios lë ni

ca raza ládxë'ë-ba' bôa'-bëdxi rúti'a'-ba' lahuë',

o ca raza ládxë'ë-ba' tuba' bëdxi zxon chinagúlaba'.

³² Nupa ta'guí'i ta'zaca' ila'lé'eni lë ni, en ulu'dzeja.

Ila'dipa ládxi'gaca nupa tu'guilaj Dios.

³³ Ruzé naguë' Xanru' Dios nupa ta'yadzaj ta'yudxi,

en biti' ral-la ládxë'ë bônachi queë' nadzúngaca.

³⁴ ¡Guli'cu'ë yöl-la' ba Dios, libí'ili' yehua' yubá, en luyú ni,

enca' nísado', en yúgu'të le nacuá' tu tu lataj na'!

³⁵ Usólá cazë' Dios bônachi Sión,

en uchisë' yugu' yödzo quégaca zxi'ini xi'sóë' Judá.

Ila'cuá' bônachi queë' ga na', ate' guequi quéguequi luyú na'.

³⁶ Zxi'ini xi'sóagaquië' huen xichinë' ila'z'ibi' luyú na',

ate' ila'cuá'tica'só ni' nupa nadxi'igaca Lë'.

70

¹ ¡Busólá neda', Dios!

¡Gudáchi gácalenu' neda', Xan!

² Ben ga ulu'tuí'i, en ila'bó' bôniga nupa na' tē'ëni iluti neda'.

Ben ga ulu'huécja, en ulu'gá'ana cá'asó nupa na' tē'ëni gaca bi gaca quia'.

³ Ben ga ulu'huécja lu yöl-la' rutuí'i quéguequi

nupa na' tu'titaj neda', ta'nná: "Ja, ja."

⁴ Ben ga ulu'dzeja, en ulu'z' xibó' yúgu'të nupa tu'guilaj Li'.

Ben ga ilu'ítica'só didza' nupa ta'dxi'i yöl-la' rusólá quiu', ila'nná:

"¡Zxóntërô náquië' Dios!"

⁵ Neda' nacuídi'da, en biti' bi gaca guna'.

¡Gudáchi gácalenu' neda', Dios!

Nacu' Nu rácalen neda', en Nu rusólá neda'.

¡Biti' ca' tsenu' guídu' quia', Xan!

71

¹ Nuzóa cazu' neda' dxi'a tsáhui'do' ga na' zu', Xan.

¡Biti' gu'u lataj utuí'ida'!

² ¡Tu' nacu' tsahui' gúcalen neda', en busólá neda'!

¡Buzé nagu' neda', en busólá neda'!

³ Nacu' le uzóa neda' tsutsu,

en le gun chí'i neda' ga gaca ucachi' cuina'.

Chigunná bé'enu' nu usólá neda' tu' nacu' Nu ruzóa neda' tsutsu,

en Nu run chí'i neda'.

⁴ Dios quia', busólá neda' lu na' nu ruá' dö',

en lu na' nu ridá'baga' Li', en run dzatsa.

⁵ Tuzu' Li' runa' löza, Xan.

Ruzxöni ládxa'a Li' ga gudéla'të naca' bf'ido'.

⁶ Ruzxöni ládxa'a Li' ga gudéla'të gulja',

tu' guzóalen cazu' neda' cate' ni' buzóanu xiná'a neda'.

¡Cú'utica'sa' Li' yöl-la' ba!

⁷ Zían nupa tu'bani ca naca quia',

tu' run chí'i cazu' Li' neda'.

⁸ ¡Rigú'utica'sa' Li' yöl-la' ba,

en tu dza tu dza rulu'a lahui yöl-la' ba quiu'!

⁹ ¡Biti' usán no'o neda' na'a, ni naca' bönni' gula!

¡Biti' ucá'anu' neda' na'a cate' ni rudú ládxa'a!

¹⁰ Tuf'i didza' nupa biti' ta'lé'e neda' dxi'a ca gaca bi ilún quia',

ate' tun tuz xtída' gaca nupa tē'ēni iluti neda'.

¹¹ Ta'nná: "¡Nusán nē'ē Dios lē'!

¡Gulí'dá sönru'-nē' tu' cuntú nu zoa gácalen lē'!"

¹² ¡Dios, bití' su' zí'tu' ga ní zoa'!

¡Dios quía', gudáchi gácalenu' neda'!

¹³ Ben ga ulu'tuí'i, en ila'niti nupa tē'ēni iluti neda'.

Ben ga ulu'tuí'inē', en ila'bō'ē böniga bönni' tē'ēnē' ilu'ē dö' quía'.

¹⁴ ¡Neda' gúntica'sa' löza Lí',

en cú'utica'sa' Lí' yöl-la' ba!

¹⁵ Idú dza usiyönda' bönachi nacu' tsahui',

en rusöló' yúgu'tē bönachi.

Bití' nözda' bal-laxi luzuí busöló' neda'.

¹⁶ ¡Gu'a didza' ca nácgaca le zxön benu' Lí', Xana' Dios!

¡Usiyönda' bönachi tuzu' Lí' nacu' tsahui'!

¹⁷ Dios, rusédinu' neda' ga gudéla'tē ní' naca' bí'ido',

ate' ga ridxintē na'a dza ruá'a didza' ca nácgaca le zxön nunu'.

¹⁸ Na'a naca' bönni' gula, en chinagucha'.

¡Bití' usán no'o neda', Dios!

Benna neda' lataj usiyönda' yugu' xzí'ini xsoa' ca naca yöl-la' huáca quiu',

ate' quíxjói'da' nupa ilalaj ca naca yöl-la' nál-la quiu'.

¹⁹ ¡Le tsahui' nacu', Dios, ridxintē lúzxiba!

¡Nunu' Lí' yugu' le zxöntērō!

¡Cúnturō nu zoa nu naca ca nacu' Lí', Dios!

²⁰ Gusöl-la' casu' quía' yugu' le guca quía' le gulún neda' zí',

pero ruúnu' neda' tsutsu,

en le yúbölō uchisu' neda' para cabí gátia'.

²¹ Gunu' ga tsépisea',

en huē tsahú'u neda' le yúbölō.

²² ¡Le nácatē cu'a Lí' yöl-la' ba, en gul-la' tu bihuēl-la, Dios!

¡Gul-la' ca runu' ca rnno', en nacu' Nu naca lá'ayi lógaca bönachi Israel!

²³ ¡Lu yöl-la' rudzeja quía' cōdxi'a cate' gul-la' quiu',

en idú ládxa'a gul-la' tu' busöló' neda'!

²⁴ ¡Idú dza gu'a didza' ca nacu' tsahui'!

¡Tu'tuí'i, en ta'bō' baguí'i nupa gulē'ēni iluá' dö' quía'!

72

¹ Dios, buzéajni'inē' bönni' rinná bē'ē

para gaca uchi'a usörōē' ca ruchí'a rusörōu' Lí'.

Ben ga ilácgacabi' tsahui' xzí'inē' ca nacu' Lí' tsahui'.

² Bē'ē lataj uchi'a usörōē' quégaca bönachi quiu' ca naca le naca tsahui',

enca' quégaca bönachi quiu' ta'guí'i ta'zaca'.

³ Ben ga ila'cuá' dxi'a tsáhui'do' bönachi quiu' yugu' lu guí'a,

en ilácgaca tsahui' yugu' lu guí'ado'.

⁴ Bē'ē lataj ubéajē' tsahui' nupa ta'guí'i ta'zaca' ladaj bönachi quiu',

en usölē' yugu' xzí'inigaca nupa ta'yadzaj ta'yudxi,

en ucul-lē' nu ribía no léguequi.

⁵ Ben ga iladxi bönachi quiu' Lí' tsanni ní' soa gubidza,

enca' tsanni ní' soa beo' ga idxintē dza udxi.

⁶ Ben ga gáquiē' bönni' rinná bē'ē ca nisa guiōj ribixi lu guíxi'do',

en ca yugu' guiōj gúpa'do' tu'subisa luyú.

⁷ Ben ga gaca dxi'a quégaca nupa nácgaca dxi'a yugu' dza inná bē'ē lē',

en ila'cuá' dxi'a tsáhui'do' ga idxintē bítí'rō soa beo'.

⁸ Ben ga inná bē'ē idapa la'a yōdzölió,

ga naguēla' ra' yegu Eufates ga idxintē idútē luyú.

⁹ Ben ga ulu'zechu xzíbigaca lahuē' lē' nupa nacuá' luyú bidxi,

en iladxi lē' nupa ta'díl-lalen lē'.

¹⁰ Ben ga ila' dxiñe' lahuë' bönni' ta' nná bē'ē luyú Tarsis en yugu' lu yödö, nuá'gaquië' yugu' le ulu'nödzejē' queë'.

Bönni' ta' nná bē'ē luyú Sabá, en luyú Seba ilá' dxiñe' bi ulu'nödzejē' queë'.

¹¹ Ben ga ulu' zechu zxibigaquië' lahuë' yúgu'tē bönni' ta' nná bē'ē, en ilúngaca xichinë' bönnachi yúgu'tē yödö.

¹² Usölë' nu riyadzaj riyudxi cate' ulidza lē', enca' nu riguí' rizaca', en nu biti' zoa nu gácalen nu na'.

¹³ Huéchi' ládxë'ē nupa nácagaca yechi', en nupa ta'yadzaj ta'yudxi, en gun chi'ē yöl-la' na' bân quégaca nupa nácagaca yechi'.

¹⁴ Usölë' léguequi lu ná'agaca nupa tun léguequi zi', en lu ná'agaca nupa tuá' dö',

en gúí' i ládxë'ē léguequi cate' nu guë'ēni guti léguequi.

¹⁵ Soë' ibanë', ate' iluá' gaca bönnachi queë' oro que lu xiyúgaca bönnachi Sabá. Ben ga ulu'lidza Dios bönnachi, ila'nábitica'sö Li' gácalenu' lē'.

Ben ga ulu'lidza lē' dxi'a tsáhui'do' idú dza.

¹⁶ Ben ga unödzejada' zxoá' luyú queë', enca' yugu' lu guí'ado', le unödzej yödxi yana' xiyúë' ca run guí'a Líbano.

Ben ga ila'yán nupa nacuá' ladzë' ca rō'ō guí'ado' lu xiyúë'.

¹⁷ Ben ga tsöjnégaca le lē' ga idxintē dza udxí.

Ben ga gaca yöl-la' ba que lē' tsanni ni' soa gubidza.

Ben ga ila'nabi bönnachi Li' yúgu'tē yödö

gunu' ga gaca dxi'a quéguequi ca benu' queë' lē'.

Ben ga ila'gú'u lē' yöl-la' ba bönnachi yúgu'tē yödö.

¹⁸ ¡Yöl-la' ba Xanru' Dios, Dios quégaca bönnachi Israel!

¡Tuzë' Lē' runë' le túngaca ga rubániru'!

¹⁹ ¡Yöl-la' ba Lē' le naca lachi ga idxintē dza udxí!

¡Rizë' ládxi'ru' ilí idútë yödölió le naca bení' queë'!

¡Ca' gaca! ¡Ön, ca' gaca!

²⁰ Chibudxi le rinábida'-në' Dios neda', David, zxi'inë' Isai.

73

¹ Le nácatë runë' Dios ga raca dxi'a quégaca bönnachi Israel, nupa na' naca dxi'a tsáhui' ládxi'do' guequi.

² Ia'láti'sö guchixi guníguida'.

Ia'láti'sö tsöjdöda' tsölá'alö,

³ tu' buzxe'eda' nupa tun ba zxön cuínguequi, en tu' dëda' yöl-la' tsáhui' quégaca nupa tuá' dö'.

⁴ Biti' ca' téquinë' zi' bönni' tu'ē dö' na'.

Nácagaquië' tsutsu, en nacu'ē dxi'a.

⁵ Biti' ta'guí' i ta'záquë'ē ca ta'guí' i ta'zaca' ia'zica'rö bönnachi.

Biti' ca' raca quégagaquië' ca raca quégaca bönnachi yúbölö.

⁶ Naca yöl-la' run ba zxön cuini quégagaquië'

ca tu le néquini oro dxía ícjagaquië'.

Yöl-la' rutsatsa quégagaquië' naca ca zxágaquië' nácugaquië'.

⁷ Tu'zi'ē xibé le ta'dödi bē'ē tē'aj tahuë',

en ta'zá' ládxi'gaquië' quégaca le zían le ila'déli'në'.

⁸ Tu'titjē' ia'zica'rö bönnachi,

en tu'ē didza' lu yöl-la' run ba zxön cuini quégagaquië'.

Tun ba zxön cuíngagaquië',

en tē'ënë' ila'bía nahuë' ia'zica'rö bönnachi.

⁹ Ta'nnë' queë' Dios zoë' yehua' yubá,

en tu'didza' yudxë' nupa nacuá' yödölió.

¹⁰ Que lē' ni na' ta'dá' bönnachi queë' Dios légaquië',

en ta'yéajlë' didza' tu'ē.

¹¹ Ta'nnë': "Biti' ca' nōzinë' Dios, en biti' ilé'e lē' ni Nu na' zoa xitsá'alö."

¹² Caní nácagaca nupa tuá' dö'.

Dëda' yöl-la' tsáhui' quéguequi, en ta'zítica'sö ia'lati'.

¹³ ¡Naru' nítisö ben chi' i cuina' para gaca' dxi'a

en para cabí ibága'a dul-la'?

¹⁴ Dios, benu' ga gudí'i guzxáca'a idú dza.

Yugu' zila benu' neda' zi'.

¹⁵ La'tu' bē'a didza' ca nácagaca lē ni

guzxí' yé'eda' bōnachi quiu'.

¹⁶ Que lē ni na' bē' lādxa'a tséajni'ida' lē ni,

sal-la' gúcada' bōniga

¹⁷ ga bidxintē dza guyu'a yudo' quiu'

en guyéajni'ida' ca gaca quégaca nupa tuá' dō'.

¹⁸ Le nácatē nuzú' léguequi ga ta'chixi ta'nigui,

en runu' ga ila'niti tsaz.

¹⁹ La' ila'nítitē,

en ila'yaza ga udxí quéguequi.

²⁰ Nácagaca ca tu le rinetu' yēla le ridōdi que cate' ritō yu.

Cate' chasu', Xan, la' udōditeu' léguequi tsōlá'alō.

²¹ Cate' yōjdín icja' le nácagaca ca tu le silá',

en guzá' lādxa'a yugu' le gúquida' zi',

²² guca' tu' canōz, en bití' bi guyéajni'ida'.

Guca' ca tuba' bōa' guixi' lo' Li'.

²³ Zóatica'sa' lo' Li',

ate' rízőn cazu' neda'.

²⁴ Rigú'u yōl-lu'u neda' le rugú'u neda' nōza quiu',

en ga údxitē uzi'u neda', en gunu' neda' bal.

²⁵ ¿Núzxirō zoa yehua' yubá nu gácalen neda'?

¡Tuzu' Li'!

Tu' rácalenu' neda' cúnturō nu zoa yōdzōlió nu riquinda'.

²⁶ Ricuidí' le naca', en rudú lādxa'a.

Le ruzóa tsutsu lādxi'da'ahua',

en le ruzí'tica'sa' xibé naca cazu' Li', Xan.

²⁷ Le nácatē ila'niti nupa tu'cá'ana Li'.

Usunítíu' yúgu'tē nupa tu'zóa Li' tsōlá'alō.

²⁸ Raca dxi'a quía' cate' ribiga' ga zu' Li', Dios.

¡Naca cazu' Li', Xana' Dios, Nu run chí'i neda'

para ulu'a lahui yúgu'tē le nun cazu'!

74

¹ Dios, ¿naru' tsaz nusán lādxi'u netu'?

¿Riléde'enu' netu', bō'cu' zxila' queē cazu'?

² Yōjnē netu', bōnachi tu'dubi quiu', nupa bōá'u cazu' dza ni'te,

nupa bōá'u cazu' para gácatu' bōnachi queē cazu'.

Yōjnē guí'a Sión, ga ni guzóa cazu' Li'.

³ Gudá tōdu' ga ni naguínnajdērō yōdzō lá'ayi quiu'.

Bulu'sunítidērō nupa gula'dá'baga' Li'

yúgu'tē le gula'cuá' lataj lá'ayi quiu'.

⁴ Tu'tsatsa nupa na' gula'dá'baga' Li'

idú gásibi'ilō ga ni budúbitu' quiu'.

Nucué'gaquiē' ni le naca bē'gaca

nuxícjagaquiē' yōdzō lá'ayi quiu'.

⁵ Nalá' lahui yōdzō ni ca nalá' tu guí'a cate' nu gulú'u le bidín,

en nurixi nu na' yugu' yaga gula'cuá' lu guí'a na'.

⁶ Bulu'zxuzxjē' le nácagaca lachi lu yōdzō ni

len yugu' guíe huága quégagaquiē', en yugu' yaga zidzaj.

⁷ Bulu'zégui'ē idútē lataj lá'ayi quiu'.

Nucá'anagaquiē' cá'asō lataj ga benru' bal Lo'.

⁸ Lu icja lādxi'do'gaquiē' gula'nē': "Nuxícjadērōtu' bōnachi ni."

Idútē lu xiyutu' bulu'zégui'ē yúgu'tē yu'u ga na' budúbitu' lo'.

⁹ Bítí'rō caz rilé'etu' yugu' le bulu'subán lādxi'tu' gulísatu' lu xiyutu'.

Bítí'rō zoa nu bōnni' ru'ē didza' uláz quiu'.

Bítí'rō zóalen netu' nu bōnni' nōzinē' gáca'xte caz gaca caní queētú'.

10 Dios, ¿gáca'xte caz ulu'lidza ditaj netu' nupa ta'díl-lalen netu'?
 ¿Gáca'xte caz ulu'cá'ana ditaj Lo' nupa ta'dá'baga' Li'?
 11 ¿Naru' cabí gácalenu' netu'?
 ¿Bizx que núcachu'u yöl-la' huáca zxön quiu'?
 12 Rinná be'e quézinu' netu' Li', Dios, dza ni'te quez,
 en rusolá cazu' bönachi idütë yödzölió.
 13 Len yöl-la' huáca zxön quiu' bubéaj cazu' choplö nísado'.
 Gulá'a cazu' ícjagacaba' böa' zxön nacuá'aba' nísado'.
 14 Bzxuzxja cazu' ícjagacaba' böa' sínia' lëba' Leviatán.
 Ben cazu' ga guláguba' yugu' böa' guixi' xipëla'ba' böa' sínia' na'.
 15 Gusalaj cazu' yugu' beaj nisa, en gapa rálajda' nisa.
 Busubidxi cazu' yugu' yegu nisa gula'yúdzutica'sö nisa.
 16 Nequi queë cazu' lahui' dza, en nequi ca' quiu' chi'i dzö'ölö.
 Ben cazu' Li' bení, enca' gubidza.
 17 Naguixaj cazu' Li' yúgu'të buzá' nacuá' yödzölió.
 Nun cazu' Li' beo' la, en beo' ziaga.
 18 Yöjné lë ni, Dios. Nupa ta'dá'baga' Li' nucá'anagaca ditaj Lo',
 ate' nupa nácagaca canöz nucá'anagaca cá'asö Lo'.
 19 Biti' usán no'o nupa nadxí'inu' lu ná'agaca nupa nácagaca ca yugu' böa' guixi' sínia'.
 Biti' gal-la ládxu'u tsaz nupa néquiquequi quiu', en ta'gui'i ta'zaca'.
 20 Yöjné didza' dzaga na' núnlenu' netu',
 tu' nacuá' nupa tuti bönachi gapa naca chul-la lu xiyutu'.
 21 Biti' gu'u lataj ulu'gá'ana cá'asö nupa nácagaca bayechi'.
 Ben ga íla'gú'u Li' yöl-la' ba nupa ta'gui'i ta'zaca', en ta'yadzaj ta'yudxi.
 22 ¡Guyasa, Dios, en ben ca rnna xtídzu'u!
 ¡Ruzë nagu' ca rulidza ditjë' Li' bönni' canöz idú dza!
 23 Biti' gal-la ládxu'u didza' zi' tu'i nupa ta'dá'baga' Li'.
 Yöl-la' dzatsa tun nupa tu'cá'ana Li' cá'asö riyöntica'sö.

75

1 ¡Rëtu' Li': "Xclenu', Dios!"
 ¡Rëtu' Li': "Xclenu",
 tu' zóatica'su' gal-la' ga zóatu!
 ¡Tu'i didza' bönachi ca nácagaca le zxön nunu'!
 2 Rnnë' Dios: "Nuzóa' dza cate' uchi'a usöröa' bönachi.
 Uchi'a usörö caza' léguequi ca naca le nácaté.
 3 Tu'suniti yödzölió, en nupa nacuá' ni',
 pero tsaz nuzóa caza' le."
 4 Gudxa' nupa tun ba zxön cuínguequi, gunnía': "Biti' gun ba zxön cuinli",
 en gudxa' nupa tuá' dö: "Biti' huë tsahui' cuinli".
 5 Biti' huë tsahui' cuinli,
 en biti' guí'ili' didza' lu yöl-la' run ba zxön cuinli'."
 6 Calëga ga rilén gubidza, en calëga ga ribía gubidza,
 en calëga la' guixi' ga dë lataj irúaj le huë tsahui' bönachi,
 7 pero uchi'a usörö cazë' Dios bönachi.
 Uzötjë' tuë' bönni', en uchisë' ia'tué'.
 8 Nuá' cazë' Xanru' lu në'ë tu xziga' yudzu xisa le ribía lubá uva le ribixi rilëbi.
 Chinugútsi'dërë' le, ate' rigu'ë le para ilë'aj le nupa tuá' dö' yödzölió ni,
 ate' ilë'jadërö le silá' que.
 9 Neda' usiyöntica'sa' bönachi lë ni,
 en gul-la' yöl-la' ba queë' Dios queë' Jacob.
 10 Ugüë' yöl-la' unná bë' quégaca nupa tuá' dö'.
 Quixjë' tsaz yöl-la' unná bë' quégaca nupa nácagaca tsahui'.

76

1 Zxi'ini xi'sóë' Judá núnbë'gaquië' Dios.
 Nayëpisë le lë' ladaj bönachi Israel.
 2 Zoa caz lataj lá'ayi queë' lu yödzö Jerusalem,
 ate' nazí'i le Sión lataj ga na' zoa cazë'.

³ Ni' guditsjē' yugu' yaga lahui tuchi' zoa guí' láhuiguequi,
enca' yugu' gué' la, en yugu' le ta'díl-lalen bônachi lu gudil-la.

⁴ ¡Yöl-la' ba Li', Dios!
¡Nayēpisētēru' ca yugu' guí'a zxön!

⁵ Buxicju' bönni' nál-lagaquiē'.
Gudōdi yēla guiōj lógaquiē' bönni' rōjáquiē' gudil-la,
en biti' guca ila'chisa ná'agaquiē'.

⁶ Cate' Li', Dios queē' Jacob, gudíl-lalen cazu' légaquiē'
gulátiba' bōa', ate' gulati ca' nupa dxíagaca légacaba'.

⁷ Li' caz ral-la' gádxitu',
tu' cabí gaca nu soa lo' cate' ilenu'.

⁸ Ga zu' Li' yehua' yubá gunnó' uchi'a usörōu' bônachi.

Ní'irō guladxi nupa nacuá' lu yu, en gula'cuá' dxisō,
⁹ cate' guzuinē' Dios para uchi'a usörōē' quégaca bônachi,
para usólē' nupa nácgaca nōxaj ladxí' yōdzōlió ni.

¹⁰ Sal-la' ta'léde'e bônachi, gaca yöl-la' ba queē' Lē'.

Uzi'ē xibégaca nupa ulu'gá'ana ládjaguequi.

¹¹ Guli'sí' lu ná'ali' bi gunli' lahuē' Xanru' Dios,
en guli'gún ca na' innali'.

Yúgu'tē nupa nacuá' ga na' zoē' ral-la' bi ulu'nōdzaj queē',
tu' náquiē' Nu ral-la' gádxiru'.

¹² Ubéaj cazē' bō' nácgaca caz nupa nadéli'gaca lataj lo.
Bönni' ta'nná bē'ē luyú ni tádxinē' Lē'.

77

¹ Rulidza'-nē' Dios, en ruá'a zidzaj didza'.

Rulidza'-nē' Dios, ate' riyōnnē' chí'a.

² Cate' bi guca quia' bulidza'-nē' Dios.

Chí'i dzō'ölō guchisa na'a lahuē', en biti' busana' rulidza'-nē'.

Biti' guca nu huē' tsahui' neda'.

³ Cate' rōjneda'-nē' Dios, rō'a bōniga.

Cate' rinnē ládxa'a, ní'irō rudú ládxa'a.

⁴ Bubéaj cazu' yēla guiōj lahua'.

Tu' ribō'a bōniga biti' gaca gu'a didza'.

⁵ Chiguzá' ládxa'a ca guca dza ni'te,

ca guca yugu' iz chigula'dōdi.

⁶ Tsōjneda' le bulá' chí'i dzō'ölō,

en tsōjsá' ládxa'a ca naca que, ate' rinábini cuina':

⁷ ¿Naru' tsaz nusán Xanru' neda'?

¿Naru' cabirō uzá' ládxe'ē quia'?

⁸ ¿Naru' cabirō gáquiē' dxi'í ladxí'?

¿Naru' cabirō tsōjnenē' le guxzí' lu nē'ē gunē'?

⁹ ¿Naru' nál-la ládxe'ē Dios tu' cabirō ruzá' ládxe'ē queēru'?

¿Naru' bítirō huéchi' ládxe'ē rē'u tu' rilenē'?

¹⁰ Ní'irō gudxi cuina': Raca caní quia' tu' risēbida' ládxa'a,
en que lē ni na' réquida' nadzá' yöl-la' unná bē' queē' Dios nayēpisē'.

¹¹ Tsōjneda' yugu' le nun cazu' Li', Xantu'.

Tsōjneda' yugu' yöl-la' huáca benu' dza ni'te.

¹² Sa' ládxa'a ca nácgaca le nunu',

en cuéqui icja' ca nácgaca le runu'.

¹³ Naca lá'ayi ca run cazu' Li', Dios.

Cúnturō nu zoa naca dios ca nacu' Li', Dios queētu'.

¹⁴ Naca cazu' Li' Dios, runu' yugu' yöl-la' huáca zxön.

Bulú'u lahui yöl-la' huáca quiu' lógaca bônachi yúgu'tē yōdzō.

¹⁵ Len yöl-la' huáca zxön quiu' busóló' bônachi quiu',

nupa nácgaca xzí'ini xi'sóagaquiē' Jacob, en José.

¹⁶ Bila'lé'e yugu' nísado' Li', Dios.

Bila'lé'e yugu' nísado' Li', en gula'bõ' bõniga.

Gula'xizilê'e yugu' nísado'.

¹⁷ Bulu'lalaj bõaj lúxiba nisa.

Lúxiba xitsá' gunnêda' guziú'.

Guyëpi yõsa ca yugu' yaga lahui tuchi'.

¹⁸ Lu bõ' budunu' biyõn guziú' quiu' gunnêda'.

Yõsa gula'yëpi bulu'zení' luyú.

Gudódida' budó' xzu', en guzxizi luyú.

¹⁹ Bilá' lahui nõza quiu' gatsaj láhui'lõ nísado',

ate' guzóa nõza ga gudõdu' gatsaj láhui'lõ nisa zila.

Biti' nalá' lahui na'a ga na' bulibu'.

²⁰ Guchê'cazu' bõnachi quiu' ca runê' bõnni' richê'ê-ba' bõ'cu' zxila' huê'ênido'.

Guchê'u léguequi lu ná'agaquiê' Moisés, en Aarón.

78

¹ Buli'zê nágali' le uzéajni'ida' libí'ili', bõnachi quia'.

Buli'zê nágali' didza' gu'a.

² Usalja' ruá'a, en ucúdu'a didza'.

Gu'a didza' tu le nagachi' dza ni'te quez,

³ tu didza' chibiyõnru', en núnbê'ëru',

le gulê' xuz xtó'oru' rê'u.

⁴ Biti' ucáchi'ru' didza' na' lógacabi' xzí'iniru'.

Usiyõnru' yugu' xzí'ini xi'sóaru' yõl-la' ba queê' Xanru',

ca naca yõl-la' huáca queê', en yugu' le zxõn benê'.

⁵ Gudixjê' tu didza' naca bê' queê' Jacob,

en nuzóê' le rinná bê'ê' quégaca bõnachi Israel,

le gunná bē'enē' yugu' xuz xtó'oru'.

Ulu'zéajni'inê' xzí'inigaquiê' ca naca,

⁶ para ilúnbê'gacabi' le, bi'i si' zá'gacabi', enca' bi'i si' iláljabi',

para ulu'luí'ibi' ca' xzí'inigacabi' ca naca lê na' gunná bē'ê' Dios.

⁷ Ulu'zxõni ládxi'gacabi' Dios,

en biti' gal-la ládxi'gacabi' yugu' le nunê' Dios.

Ilunbi' ca nácacaga le gunná bē'ê',

⁸ en biti' ilácagacabi' ca guláquiê' xuz xtó'ogacabi'.

Guláquiê' zidzaj ladxí' tu' gula'dá'baguê'ê' xtídzê'ê' Dios,

en biti' guláquiê' nõxaj ladxí',

ate' lu icja ládxi'do'gaquiê' biti' gula'yéajlê'ê' Dios.

⁹ Yugu' xzí'ini xi'sóê' Efraín guluá'gaquiê' yaga uxiti',

pero bulu'zxúnajê' lu gudil-la.

¹⁰ Biti' gula'dá'gaquiê' didza' dzaga Dios bēnlenê' légaquiê',

en biti' gulunê' ca naca le gunná bē'enē' légaquiê'.

¹¹ Gulal-la ládxi'gaquiê' yugu' le benê' Dios,

en yugu' yõl-la' huáca zxõn benê' lógaquiê'.

¹² Benê' Dios le gulún ga bulu'bánninê' xuz xtó'ogaquiê'

luyú Egipto, en luyú Zoán.

¹³ Gusaljê' nísado', en benê' ga gula'dôdê' gatsaj láhui'lõ nísado' na'.

Benê' ga guca nísado' na' ca yugu' guí'ado' tsólá'a huéaj.

¹⁴ Buluí'inê' légaquiê' nõza lahui' dza, bugunê' dxin tu bõaj,

ate' chi'i dzó'õlõ bugunê' dxin tu bõaj ruzení' ca guí'.

¹⁵ Bulê'ê' tu guiõj ga naca la' guixi' ga dê' lataj,

en bē'ê' le gulê'ajê' le guca ca tu nísado'.

¹⁶ Gulê'ajê' nisa yegu le gulén lu guiõjto'o.

Benê' ga birúaj nisa ca tu yegu zxõn lu guiõjto'o na'.

¹⁷ La' ní'só gulunê' dul-la' lahuê' Lê',

en gula'dá'baguê'ê' Dios nayëpisëtêrê' la' guixi' na'.

¹⁸ Lu icja ládxi'do'gaquiê' gula'z' bē'ê' Dios quégagaquiê',

cate' gula'nábinê' Lê' ugahuê' légaquiê' ca gula'zēsõ ládxi'gaquiê'.

¹⁹ Ní'irõ gula'nnê' queê' Dios, gula'nnê':

“¿Naru' huáca cu'ê' Dios le gáguru' la' guixi' ni ga dê' lataj?

²⁰ Buli'yútsõca', bē'ê' guiõjto'o, ate' birúajda' nisa,

le guca ca nisa yegu gubó'o zxõn.

¿Naru' huáca gunnê' ca' queêru' yõta gáguru'?

¿Naru' gaca ughuë' bönachi queë' le naca bëla'?"

²¹ Biyönnë' Xanru' Dios didza' ni, en guléde'enë',
ate' gulén tu guí' le buzegui zían xzí'ini xi'sóë' Jacob,
tu' guléde'enë' bönachi Israel,

²² tu' cabí gula'yéajlë'ë Dios,
en biti' bulu'zxöni ládxi'gaquië' Lë' usölë' légaquië'.

²³ Gunná bé'enë' Lë' yugu' böaj lúzxiba,
en gusaljë' yehua' yubá.

²⁴ Gusöl-lë'ë yöta maná le ilahuë',
en bugahuë' légaquië' la' huagu que yehua' yubá.

²⁵ Gulahuë' bönni' ni' yöta tahuë' gubáz que yehua' yubá.
Gusöl-lë'ë guizxi yu le ilahuë'.

²⁶ Benë' ga guyecja bö' birúaj ga rilén gubidza,
ate' len yöl-la' huáca queë' gunná bé'enë' bö' recja
le birúaj tsölá'alö ga ridödi gubidza beo' ziaga.

²⁷ Benë' ga böxaj bëla' ca bëchtö yu ládjalö ga na' nacu'ë,
le naca böa' zoa xiligacaba' gurö'öba' ca yuzxi dë tu ra' yegu zxön.

²⁸ Benë' ga böxjagacaba' gatsaj láhui'lö ga na' nacu'ë,
en ládjagaca yugu' yu'u guídido' quégaquië'.

²⁹ Ca' guca, gulahuë', en bulu'huölaj gula'dzé'enë',
tu' bë'ë quégaquië' le gula'zësö ládxi'gaquië'.

³⁰ Zí'alö ca budxi bulu'huölaj gula'dzé'enë',
tsanni ni' yu'u ruá'agaquië' le tahuë',

³¹ gulénë' Dios légaquië',
en bëtië' bál-lagaquië', bönni' nál-latërögaquië' ládjagaquië',
en bucul-lë' bönni' Israel nayëpisëtërögaquië'.

³² Sal-la' guca caní, gulunrë' dul-la',
en biti' gula'yéajlë'ë Lë' ni'a quégaca le zxön benë'.

³³ Que lé ni na' benë' ga böáca nítisö dxin gulunë',
ate' lu yöl-la' radxi gula'zöë' yugu' lu iz quégaquië'.

³⁴ Cate' bëtië' zíangaquië', ní'irö bulu'lidzë' Lë'.
Bulu'bí'i ládxi'gaquië', en yöjtá'gaquië' Dios.

³⁵ Ní'irö yöjnéguë' náquië' Dios Nu run chí'i légaquië',
en náquië' Dios nayëpisëtërë' Nu böá'uö légaquië'.

³⁶ Gula'zí' yé'enë' Lë' len didza' gulu'ë,
tu' gulu'ë diza' biti' nácatë' lahuë' Lë' len ruá'agaquië'.

³⁷ Biti' gudá'gaquië' Lë' idú ládxi'gaquië',
en biti' gulunë' ca rnna didza' dzaga na' bénlenë' légaquië'.

³⁸ Tu' buéchi' ládxë'ë Dios légaquië',
buniti lahuë' ca naca xigua' gulunë', en biti' busunitië' légaquië'.

Bubequi lahuë' quégaquië', en bíti'rö gulénë' légaquië',
en biti' benë' ca sa'yéaj yöl-la' ridzá'a queë'.

³⁹ Ca' guca, yöjnenë' nácagaquië' bönáchisö.
Nácagaquië' ca tu bö' recja le ridödisö, en biti' rudxín.

⁴⁰ Zían luzuí gula'dá'baguë'ë Lë' ga na' naca la' guixi',
en bulu'suhu'ínë' Lë' lu yu bidxi na'.

⁴¹ Zían luzuí gula'zí' bë'ë Dios,
en gulunë' zí' Dios Lá'ayi quégaca bönachi Israel.

⁴² Biti' yöjnéguë' yöl-la' huáca zxön queë',
le bulu'e lahui dza ni' böá'uë' légaquië'

lu ná'agaca nupa biti' bila'lé'e légaquië' dxi'a,
⁴³ cate' ni' benë' le gulaca bë' luyú Egipto,

en benë' yugu' yöl-la' huáca queë' luyú Zoán,

⁴⁴ cate' benë' ga böáca nisa rön yugu' lu yegu luyú Egipto,
enca' nisa yugu' lu beaj quégaquië' para cabí guca ilé'ajë' le.

⁴⁵ Gusöl-lë'ë ládjagaquië' bötsugayu guizxi yu,
böa' gula'guídxiba' légaquië'.

Gusöl-lë'ë ca' riu bulu'sunitiba' le nequi quégaquië'.

⁴⁶ Budödë' le naz nuzóagaquië' lu ruá'agacaba' böchi' zu,
ate' guláguba' böchi' zu na' le rö'ö yugu' la' yëla quégaquië'.

⁴⁷ Busunitië' yugu' lubá uva quégaquië' len nisa guiöj yöla sunna na',
en busunitië' yugu' yaga higo quégaquië' len bögui'.

48 Bētiē'-ba' böa'-bēdxi quégaquiē' len nisa guiōj yōla sunna na',
en lu yōsa gula'yēpi.

49 Lu yōl-la' rilé queē' gusōl-lē'ē quégaquiē' yugu' lē ni,
en lu yōl-la' ridzá'a queē' busaca' zī'ē légaquiē',
en gusōl-lē'ē quégaquiē' gubáz que yehua' yubá para bulu'sunítiē' légaquiē'.

50 Biti' bubequi lahuē' quégaquiē' para cabirō lenē' légaquiē',
en bitī' buniti lahuē' légaquiē' para cabí ilátiē'.

Budōdē' légaquiē' lu yōl-la' guti,

51 en bētiē' yúgu'tēbi' bi'i bōnni' lo quégaquiē' bōnni' Egipto,
yugu' bi'i bōnni' lo quégaquiē' zxf'ini xī'sóē' Ham.

52 Guchē'ē bōnachi queē' ca yugu' bō'cu' zxíla'do',
en buluí'inē' légaquiē' nōza la' guixi' ga dē lataj.

53 Guchē'ē légaquiē' lu nē'ē para cabí bi iládxinē',
pero gubaga' nísado' nupa bitī' bila'lē'e légaquiē' dxi'a.

54 Ca' guca, guchē'ē légaquiē' ga zoa luyú lá'ayi queē',
luyú ni bidéli'nē' uláz quégaquiē' len yōl-la' huáca queē'.

55 Buláguī'ē bōnachi izá'a luyú ni lógaca bōnachi queē',
en burixē' que quégaquiē' xiyúgaquiē' ga ila'cu'ē,

en benē' ga gula'cu'ē bōnachi Israel yugu' lu yu'u guídido'.

56 Le yúbōlō gula'zī' bē'ē Lē', en gula'dá'baguē'ē Dios nayēpisētērē',
en bitī' gulunē' yugu' le gunná bē'enē' légaquiē'.

57 Bulu'huōa ládxi'gaquiē', en bulu'cá'anē' Lē' ca gulunē' xuz xtó'gaquiē'.
Gula'dōdē' tsólá'alō ca run tu yaga lahui tuchi' bitī' nácate li.

58 Gulún lenē' Lē' tu' gulunē' xilátjagaca budó' guiōj budó' yaga yugu' lu guí'a,
en gulunē' ga budúli'nē' légaquiē' ní'a quégaca budó' na'.

59 Cate' bilé'enē' lē ni Dios, guléde'enē',
en budí'inē' bōnachi Israel.

60 Ní'irō buca'anē' xilatjē' lu yōdzō Siló,
ga na' guzóa yu'u lá'ayi queē' ládjagaquiē' bōnni' ní'.

61 Bē'ē lataj gula'chē'ē bōnni' zī'tu' guí'ina lá'ayi queē',
guí'ina na' buluí'i lahui yōl-la' zxōn queē'.

62 Budōdē' bōnachi queē' lu ná'agaca nupa bétigaca léguequi,
63 en gúquinē' zī' nupa nácagaca quez queē'.

Buzegui tu guí' zxōn yugu' bi'i bōnni' quégaquiē',
ate' cuntu nu bugá'ana nu ulu'tsaga na'lenbi' yugu' bi'i nigula ra'bando'.

64 Yugu' bixúz quégaquiē' gulátiē' lu guíē' tuchi',
ate' bitī' guca ila'bōdxinu nigula uzēbi quégaquiē'.

65 Ní'irō gúquiē' Xanru' ca tu bōnni' rubanē' lu yōl-la' rasi.

Gúquiē' ca bōnni' rejē' gudil-la gudōdi bē'ē gu'ē xisi lubá uva nál-la.

66 Buláguī'ē yugu' bōnni' gula'díl-lalenē' bōnachi queē',
en tsárido'os burixē' légaquiē'.

67 Lē'sca' budōdē' tsólá'alō yugu' zxf'ini xī'sóē' José,
en bitī' gurōē' yugu' zxf'ini xī'sóē' Efraín.

68 Gurōē' yugu' zxf'ini xī'sóē' Judá,
en yōdzō Siōn le nadxf'i quézínē' Lē'.

69 Ní' benē' tu lataj lá'ayi queē' le naca ca tu guí'a zxōn,
le zoa tsutsu ca yōdzōlió ni nuzóē' tsaz.

70 Gurōē' ca' David, huen dxin queē',
en bubéajē' lē' ga na' zoē' ruyúē'-ba' yugu' bō'cu' zxíla'do'.

71 Bubéajē' lē' ga na' rapa chí'ē-ba' yugu' bō'cu' zxíla' guná',
nacuá'aba' böa' huē'ēnido' quégacaba,
para gáquiē' nu uyú bōnachi queē', yugu' zxf'ini xī'sóē' Jacob,

en bōnachi Israel, nupa na' nácagaca quez queē'.

72 Ca' guca, idú ládxiē'ē buyúē' David bōnachi na',
en lu yōl-la' rácada' queē' guchē'ē légaquiē' lu nē'ē.

79

1 Dios, nacuá' bōnachi izá'a lu xiyúgaca bōnachi quiu'.

Nuca'anagaca cá'asō yudo' lá'ayi quiu',
en nusunitigaca yōdzō Jerusalén.

2 Bulu'cá'anē' bōnachi quiu' nátigaca luyú para iláguba' bíchulab léguequi,
en bēla' rōn quégaca huen xichinu' ga iláguba' böa' guixi' le.

³ Bulu' laljē' xichōngaca bōnachi quiu' ca nisa idútē lu yōdzō Jerusalén,
ate' cuntu nu bugá'ana nu ucache' léguequi.

⁴ Bōnachi yugu' dzaga luyú queētu' tu' titaj netu'.
Tu'zxidxē', en tu'didza' yudxi netu'.

⁵ ¿Naru' tsaz ilenu' netu', Xan?

¿Naru' sóatica'sō yōl-la' rilé quiu' ca tu guí' ruzegui netu'?

⁶ Gulégaca bōnachi yugu' yōdzō zī'tu' bití' tun Li' bal,
enca' bōnachi bití' tu'lidza Li'.

⁷ Bétigaca bōnachi quiu' nácagaca xzí'ini xi'sóē' Jacob,
en nusunítigaca xiyutu' ga zoa cazu' Li'.

⁸ Bití' gunu' netu' xiguia' tu' nōzi dul-la' gulunē' xuz xtó'otu'.
Buéchi' ladxi' netu' na'a, tu' rudú ládxi'tu'.

⁹ Gúcalen netu', Dios, Nu rusölá netu', para guntu' bal Lo'.
Busölá netu', en buniti lo netu' ca naca dul-la' nabága'tu' para idxí'itu' Lo'.

¹⁰ ¿Bizx que ta'nabi bōnachi yugu' yōdzō izá'a netu',
ta'nná: "Gázxité zoa Dios queéli'?"

Bē' lataj ilé'etu', en ben ga gaca bē' lógaca yúgu'tē bōnachi
rizí' lo' nupa tu'lalaj xichōngaca huen xichinu'.

¹¹ Buzē nagu' ca ta'nnē ládxi'gaca nupa nadzúngaca.

Len yōl-la' huáca xzōn quiu' busölá nupa na' narugu quéguequi ilátigaca,

¹² en bubí'i quégaca bōnachi yugu' dzaga yōdzō queētu'
ia'gadxi cō'lō ca' t'sca naca didza' zí' gula'nnē quiu' Li', Xan.

¹³ Netu', bōnachi quiu', enca' bō'cu' xzila' ruyú cazu' Li',
guíetica'stu' Li': "Xclenu",

en cú'utica'stu' Li' yōl-la' ba na'a dza, en dza si' zaca.

80

¹ Ruzē nagu' netu', Dios, Nu rapa chí'i bōnachi Israel.

Nacu' Nu ruyú yugu' xzí'ini xi'sóē' José ca nu ruyú yugu' bō'cu' xzila'.

Buzení' queētu', Li' na' rō'u rinná bē'u ga nacua'

nupa nál-lágacatērō quiu' lēgaca querubín.

² Buluf'i yōl-la' huáca quiu' lógaca xzí'ini xi'sóagaquiē' Efraín, en Benjamín, en Manasés.
Gudá queētu', en busölá netu'.

³ Ben ga huécjatu' quiu' Li', Dios.

Buluf'i netu' nadxi'inu' netu', ate' ulatu'.

⁴ Xantu' Dios quéguequi ní'a no'o guizxi yu,

¿gáca'xte caz ilenu' netu', en bití' yōnnu' le rulidztu' Li'?

⁵ Rugagu' netu' nisa ribōdxi queētu',

en rugui'ju' netu' sizxōni nisa ribōdxi.

⁶ Nunu' ga bōnachi dzaga yōdzō queētu' tu'zxidxi queētu',

ate' nupa bití' ta'lé'e netu' dxi'a tu'titaj netu'.

⁷ Ben ga huécjatu' quiu' Li', Dios quégaca ní'a no'o guizxi yu.

Buluf'i netu' nadxi'inu' netu', ate' ulatu'.

⁸ Guléaju' tu lubá uva le nácatu' netu' luyú Egipto.

Bulagu' bōnachi izá'a yugu' lu yōdzō luyú ní, en budó'o lubá na' ni.

⁹ Buchi'u lataj ga guzxōn lubá na'.

Benu' ga ben luí ga rē', ate' bulí idútē luyú ní.

¹⁰ Gulú'u xzul-la lubá na' yúgu'tē lu guí'ado',

ate' ní'a nē'e gula'baga' yugu' guí'a xzōn.

¹¹ Gula'tunna ní'a nē'e ga bidxintē ra' nísado',

enca' ga bidxintē ra' yegu Eufates.

¹² ¿Bizx que buquínaju' yugu' lē'aj gulún chí'i lubá na',

en ru'u lataj nupa ta'dódisō ta'bán le ribía lubá uva na'?

¹³ Tu'líbigacaba' cuchi guixi' le,

ate' táguba' bōa' guixi' le.

¹⁴ Buécja queētu', Dios quégaca ní'a no'o guizxi yu.

Ga ni' zu' yehua' yubá buyú ca raca que lubá quiu', en busölá netu'.

¹⁵ Gudá dusöló' lubá ni budá' cazu',
le naca ca tu lubá hué'ëni buxön cazu' Li'.

¹⁶ Nupa bití' ta'lé'e netu' dxi'a gula'chugu ni'a në'e lubá na', en bulu'quela' le guí'.
Buyú ca tun, en lu yöl-la' rilé quiu' busuniti léguequi.

¹⁷ Gúcalen bönni' na' gurö cazu' quiu',
netu', bönachi na' nuzóa cazu' tsaz quiu'.

¹⁸ Caní gaca, bíti'rö ucá'anatu' Li'.
Bunna queétu' yöl-la' na'bán, ate' uzxöni ládxi'tu' Lo'.

¹⁹ Ben ga huécjatu' quiu' Li', Dios quégaca ni'a no'o guizxi yu.
Bulu'í' netu' nadxí'nu' netu', ate' ulatu'.

81

¹ Lu yöl-la' rudzeja queéli' guli'gul-la queé' Dios.

Lë' náquië' yöl-la' nál-la queéli'.

Lu yöl-la' rudzeja queéli' guli'cödxí'a lahué' Dios queé' Jacob.

² Guli'gul-la tu le gúl-lali', cápa'li' lë'e guídido'.

Guli'quinnaj lë'egaca bihuël-la.

³ Guli'cödxí luzu chivo cate' zoa beo' hué'ëni,
en cate' zoa beo' nál-la, en cate' raca laní.

⁴ Lë' ni naca tu xibá quégaca bönachi Israel,
le naca tu le gunná bé'enë' Xanru' Dios zxf'ini xi'sóë' Jacob.

⁵ Gudixjé' le para gaca tu le gun ba nalí queé' lógaca zxf'ini xi'sóë' José,
le gudixjé' cate' gudödë' luyú Egipto,
ga ni' biyönda' didza' izá'a bití' guyéajni'ida'.

⁶ Rnnë' Dios: "Gudúa' yua' zxoá ya'zxicjagaquié',
en bucuita' le nuá'gaquié' le bulu'subaga' légaquié'
nupa bití' bila'lé'e légaquié' dxi'a.

⁷ Bulídzali' neda' cate' bi guca queéli', ate' busölá' libí'ili'.
Bubi'a didza' cate' bi gunábili' neda', ni' nucachi' cuina' tu lu böaj gasaj.

Guzxí' bë'a libí'ili' ga zoa nisa na' lë Meriba.

⁸ Bulí'zé nágali', libí'ili', bönachi quia', ate' uxösa' libí'ili'.

Raca ládxa'a uzé nágali' neda', bönachi Israel.

⁹ Bití' ral-la' soa tu dios izá'a ga na' zóali',
en bití' gunlí' zxön tu dios quégaca bönachi zi'tu'.

¹⁰ Neda', Xanli', naca' Dios queéli'.

Guléaja' libí'ili' luyú Egipto.

Guli'salaj ruá'ali', ate' cu'a ruá'ali' le gáguli'.

¹¹ Bití' bulu'zé nágagaca bönachi quia' chí'a.

Bití' gulún bönachi Israel ca rnna xtídz'a'a.

¹² Que lë' ni na' busán ládxa'a léguequi
para gulún ca sa'yéaj yöl-la' ridá'baga' quéguequi,
en para gulún ca gula'za'sö ládxi'gaca.

¹³ Guzá' ládxa'a ulu'zé nágagaca bönachi quia' xtídz'a'a,
para ilún bönachi Israel ca ré'ënda' neda'.

¹⁴ La'tu' ilún caní, uxicja caza' nupa bití' ta'lé'e léguequi dxi'a,
en tíl-lalena' nupa ta'díl-lalen léguequi.

¹⁵ Ulu'luf'í cuínguequi nupa bití' ta'lé'e neda' dxi'a,
ca nupa tun ca rnna xtídz'a'a,
pero tsaz guna' léguequi xigua'.

¹⁶ Lësca' ugahua' libí'ili', bönachi quia', zxoá' xtila dxí'ado',
en guna' ga huölaj idzé'eli' le zxixi que buz, le irúaj lë'e guiöj."

82

¹ Zuínë' Dios ladaj nupa tu'dubi queé' ni' yehua' yubá.
Ruchi'a rusöröë' nupa ta'nná bë'.

² Rnnë': "¿Gáca'xte caz uchi'a usöröli' quégaca bönachi
lu yöl-la' bití' naca tsahui' queéli'?

Caní naca tu' rubéajli' tsahui' nupa tuá' dö'.

³ Bulí'béaj tsahui' nupa ta'cuidi', en yugu' bi'í uzëbi.

Guli'gún le naca tsahui' quégaca nupa ta'guí'i ta'zaca',
en quégaca nupa ta'yadzaj ta'yudxi.

⁴ Buli'sólá nupa ta'cuidi', en nupa náacagaca yechi'.

Buli'sólá léguequi lu ná'agaca nupa tuá' dō'.

⁵ Biti' nōziguequi, en biti' ta'yéajni'i.

Ta'dá ga chul-la.

Rizzizi xilibi yōdzōlió."

⁶ Rnna caza' neda': "Nácali' ca yugu' dios.

Nácali' yúgu'téli' xzí'inē' Dios nayépisètērē',

⁷ pero gátili' ca tati bōnachi,

en ibíxili' lu gudil-la ca ta'bixi xzí'inē' bōnni' lo."

⁸ Guyasa, Dios, en buchi'a busōrō quégaca bōnachi yōdzōlió ni,

tu' náacagaca queē cazu' yúgu'tē yōdzō bōnachi.

83

¹ Biti' ugá'anu' dxisō, Dios.

Biti' su' dxisō, Dios, en biti' usayaj ru'u,

² tu' tu'tsatsa nupa ta'dá'baga' Li',

ate' nupa biti' ta'lé'e Li' dxi'a tun ba zxōn cúnguequi.

³ Tun tuz xtídza'guequi bi ilún quégaca bōnachi queē cazu',

en tu'pá yugu' le ilún quégaca nupa nadxí'i quézinu', ta'nná:

⁴ "Guli'dá, usunítiru' léguequi para cabirō ilaca tu yōdzō bōnachi,

en para cūnturō nu tsōjné bōnachi Israel."

⁵ Nūngaca tuz xtídza'guequi.

Nuzóagaca tsutsu xtídza'guequi ta'dá'baga' Li'.

⁶ Yugu' bōnni' Edom, en yugu' bōnni' Ismael,

en yugu' bōnni' Moab, en yugu' bōnni' Agar,

⁷ en yugu' bōnni' Gebal, en yugu' bōnni' Amón, en yugu' bōnni' Amalec,

en yugu' bōnni' Filisteo, en yugu' bōnni' Tiro,

⁸ enca' yugu' bōnni' Asiria nūngaquiē' légaquiē' tsōzxōn.

Rácalengaqiē' yugu' bōnni' xzí'ini xi'sóé' Lot.

⁹ Ben quégaquiē' ca benu' quégaca bōnachi Madián, nupa na' busunítu' dērō,

en ca na' benu' queē' Sísara, en ca na' benu' queē' Jabín ra' yegu Cisón,

¹⁰ nupa na' busunítu' lu yōdzō Endor,

ate' gulaca ca xiquē'ēba' bēdxi luyú ni'.

¹¹ Ben quégaquiē' bōnni' lo quéguequi

ca benu' quégaquiē' Oreb, en Zeb,

en ben quégaquiē' bōnni' ta'nná bé'enē' léguequi

ca benu' quégaquiē' Zeba, en Zalmuna,

¹² nupa na' gula'nná: "Ilequi queēru'

yugu' lataj gapa na' gulequi queē' Dios."

¹³ Dios quia', ben ga ilácagaquiē' ca bēchtō yu le richē' bō',

en ca bēbu zxe café le ruá' bō' budunu'.

¹⁴ Ca run tu guí' zxōn, ruzegui' yugu' yaga zxōn,

o ca run tu guí', ruzegui' tu guí'a zxōn,

¹⁵ gusí regu' léguequi tu lu bō' budunu',

en ben gadxi léguequi tu lu nisa guiōjsiu' zili.

¹⁶ Ben ga ulu'tuí'i

para ulu'guilaj Li', Xan.

¹⁷ Ben ga ulu'tuí'i, en ila'bō' tsaz bōniga.

Ben ga ulu'gá'ana cá'asō, en tsaz ila'niti,

¹⁸ para iléquibe'e nayépisètēru' tuzu' Li' idútē yōdzōlió

en ulu'zóa xzíbiguequi lo', Xantu' Dios.

84

¹ ¡Bica' lachi gapa zoa cazu' Li', Dios!

¡Nacu' Xángaca ni'a no'o guizxi yu!

² Rizē ládxa'a soa' lu yu'u lidxu', Xana' Dios.

Lu yōl-la' rudzeja quia' idú ládxa'a rul-la' quiu' Li', Dios ban.

³ Bidzōliba' biguínni chulí' lataj ga nuzóaba' lédxiba',

en bidzõliba' xiguichi guziú' ga budxíaba' xicá'aba',
ga na' rigú'uba' biguínido' queëba',
gala' ga dë lu bucugu quiu' Li', Xángaca ni'a no'o guizxi yu.
Nacu' Nu rinná be'e neda', en nacu' ca' Dios quia'.

4 ¡Bica' ba nupa ta'yaza lu yu'u lidxu'!
¡Ta'gú'utica'sõ Li' yõl-la' ba!

5 ¡Bica' ba bönni' nápagaquei' yõl-la' nál-la le nequi queë cazu',
en ta'zë lãdxi'gaquei' ila'yu'ë nõza le ridxín yõdzõ Siõn!

6 Cate' ta'dödë' lu yu bidxi tunë' ga ruhuõáca gapa ralaj nisa beaj.
Tun ga rizí' xibë yu bidxi na' yugu' nisa guiõj ta'dxín bayõn.

7 Lu yõl-la' huáca quëgaquei' røjáquei', en tu'zì'rõnë' yõl-la' huáca.
Ta'dxinë' yúgu'tëgaquei' lo' Li', Dios, lu yõdzõ Siõn.

8 Ruzë nagu' le rulidza' Li', Dios, Xángaca ni'a no'o guizxi yu.
Ruzë nagu' neda', Dios queë' Jacob.

9 Buyüë' bönni' rinná bé'enë' netu', Dios.
Buyüë' bönni' na' nabõ cazu'.

10 Nácáro dxi'a soa' tu dza lu yu'u lidxu' ca le soa' idú chi gayuá' dza ga yúbölö.
Cõa' zì'alõ gaca' huen dxin ga nu riyaza yu'u lidxë' Dios
ca le soa caza' tu yu'u zxõn ga bitì' zoa Dios.

11 Náquei' Xanru' Dios ca gubidza, en le rusubín rë'u.
Xanru' caz runnë' queëru' yõl-la' ruzá' ladxi' queë', en yõl-la' zxõn queë'.
Bitì' ugüë' nitú le naca dxi'a gapa nacua' nupa tun le naca tsahui'.

12 ¡Li', Xángaca ni'a no'o guizxi yu,
bica' ba bönni' ruzxõni lãdxë'ë Li'!

85

1 Buzá' lãdxu'u quégaca bõnachi quiu', Xantu' Dios.
Buchë'u Li' zxi'ini xi'sõë' Jacob gula'dzunë'.

2 Buniti lo' bõnachi quiu' ca naca xiguia' gula'baga'.
Bucáchu'u yugu' dul-la' gulúngaca.

3 Buzóa dxíu' yõl-la' rilë quiu'.
Bugú' yõl-la' ridzá'a quiu'.

4 Buzóa netu' xilátjatu' le yúbölö, Dios, Nu rusölá netu',
en bitì'rõ lenu' netu'.

5 ¿Naru' tsaz ilenu' netu'?

¿Naru' tsaz ilenu' yugu' zxi'ini xsoatu'?

6 ¿Naru' cabí usubanu' lãdxi'tu' le yúbölö,
para udzeja lãdxi'lentu' Li' netu', bõnachi quiu'?

7 Lu yõl-la' dxi'i ladxi' quiu' gúcalen netu',
en busölá netu', Xan.

8 Uzë naga' didza' gu'ë Xanru' Dios.
Le guië' bõnachi queë' gun ga gaca dxi'a quëguequi,
nupa na' nácagaca quez queë',
pero run bayúdx bitì' ulu'huõa lãdxi'gaca.

9 Le nácatë chizóë' usölë' nupa tun Lë' bal,
para soa yõl-la' ba queë' luyú queëtu'.

10 Dzágagaca yõl-la' dxi'i ladxi', en le naca idútë li.
Tagu zxixi luzë' eguequi nu naca tsahui', en nu ribõza dxi'a tsáhui'do'.

11 Luyú caz rilén le naca idútë li,
ate' yehua' yubá rirúaj le naca tsahui'.

12 Le nácatë Xanru' unõdzjë' queëru' le naca dxi'a,
ate' xiyuru' unõdzaj le uláparu'.

13 Le naca tsahui' røjnõru lahuë' Xanru',
en gun ga soa nõza gátì'tës ga ulibë'.

86

¹ Ruzě nagu', Xana' Dios, en rubí'u didza',
tu' zoa nu rusaca' zi' neda', ate' riyadzaj riyúdxida'.
² Ben chi'í bö' naca caza', Dios, tu' naca' quiu' Li'.
Busólá neda', huen dxin quiu', Dios quia', tu' ruzxõni ládxa'a Li'.
³ Buzá' ladxi' quia', Xan,
tu' rulidza' Li' idú dza.
⁴ Ben ga udzeja ládxa'a neda', huen dxin quiu',
tu' rigu'a lu no'o bö' naca caza', Xan.
⁵ Nacu' dxi'a, Xan, en chizú' uniti lo' bõnachi quiu'.
Nadxi'ítica'su' yúgu'tē nupa tu'lidza Li'.
⁶ Ruzě nagu' le rulidza' Li', Xan,
en ruí'i ládxi'u gunu' yugu' le inábida' lo'.
⁷ Cate' bi gaca quia' ulidza' Li',
tu' ubí'i cazu' didza' bi gunu' quia'.
⁸ Cúnturõ nu zoa ládjagaca dios nu naca ca nacu' Li', Xan,
en biti' zoa ia'tú nu run ca nácagaca le runu' Li'.
⁹ Ila'dxín bõnachi yúgu'tē yõdzõ naguixju' Li', Xana' Dios,
en ila'yéaj ládxi'gaca Li', en ilún zxõn Lo'.
¹⁰ Nayépisētērõsu' Li', en tuzu' Li' runu' yugu' yöl-la' huáca zxõn.
Tuzu' Li' nacu' Dios.
¹¹ Busēdi neda' ca naca le rē'ēnu' guna', Xan.
Guna' ca naca le naca idútē li naguixju' Li'.
Ben ga gádxida' Lo' idú ládxa'a.
¹² Idú ládxa'a guía' Li': "Xclenu'", Xana' Dios,
en guna' zxõn Lo' yugu' iz si' zaca.
¹³ Nadxi'ide'enu' neda',
en chibusóló' bö' naca caza' lu lataj chul-la ga nacuá' nupa chinátigaca.
¹⁴ Dios quia', nupa ta'dá'baga' neda' ta'díl-lalen neda',
ate' yugu' bõnni' zidzaj ladxi' té'ēnē ilútiē' neda',
yugu' bõnni' na' biti' tunē' Li' bal.
¹⁵ Nacu' Dios ruhuéchi' ládxi'u netu', Xan, en ruzá' ládxi'u queētū'.
Ridzenu' para ilenu' netu', en nadxi'ide'enu' netu', en runu' ca rnna xtídzū'u.
¹⁶ Buyú neda', en buzá' ladxi' quia'.
Butipa ládxa'a neda', huen dxin quiu',
en busólá neda', zxi'ininu nigula huen dxin quiu'.
¹⁷ Bulu'í neda' tu le gaca bē' gaca dxi'a quia',
para ila'lé'e le nupa biti' ta'lé'e neda' dxi'a.
Ulu'tu'í, tu' gúcalenu' neda',
en buē tsahú'u neda', Xan.

87

¹ Nuzóē' Dios xilibi zõ'õ que yõdzõ queē' lu guí'a lá'ayi.
² Nadxi'irõnē' Xanru' lataj ga na' tu'chi'a tu'sörõ bõnachi Siõn
ca nadxi'inē' ia'zica'rõ lataj gapa nacuá' bõnachi Israel.
³ Zián le lachi ta'nná bõnachi ca naca
yõdz na' nequi queē' Dios.

⁴ Cate' ulidza' bõnachi núnbē'gaca neda', Dios,
ulidza' bõnachi nníta'gaca Egipto, en Babilonia.
Ca naca quégaca bõnachi Filistea, en Tiro, en Etiopía
innía' nabábagaca yõdzõ lá'ayi na'.
⁵ Cate' gu'a didza' que yõdzõ Siõn innía':
Bõnachi ni, en bõnachi izá'a ni nabábagaca le,
ate' neda', Dios nayépisētērē', uzó'a' tsutsu yõdzõ na'.

⁶ Cate' ulabē' Xanru' nupa nácagaca queē' innē':
"Bõnni' ni nababē' yõdzõ quia'."
⁷ Ní'irõ ilu'í didza' nupa tul-la, en nupa tu'cõdxi gui, ila'ná:
"Ruzí'itu' xibé tuzi yõdzõ ni."

88

¹ Xana' Dios, Nu rusölá neda',
 rulidza' Li' rêla, en te dza.
² Bê' lataj idxín lo' le rulidza' Li'.
 Ruzê nagu' le rinaba yúdxida' Li'.
³ Ruúbi ruguí' i ládxi' da' ahua',
 en chizóa tsöjtsázia' lataj chul-la.
⁴ Chinabábalena' nupa chinátigaca.
 Naca' ca tu bönni' nudú dërö lădxê'ë,
⁵ en nagá'anê' cá'asô ladaj nupa chinátigaca,
 en ca nupa dëgaca yeru ba,
 nupa na' bítirô rôjnenu',
 en nusán no' o léguequí.
⁶ Nuzú' neda' tu lu yeru zila,
 ga naca chul-la, en le nácada' zila.
⁷ Rilenu' neda',
 en rusaca' zi'u neda' tu lu nísado' quiu'.
⁸ Nucuasú' yúgu'tê nupa núnbê'a.
 Nunu' neda' ca tu le ta'guti bônachi.
 Nadzuna, en bití' gaca írúaja'.
⁹ Tu' riguí' i rizáca' a nudú guiój lahua'.
 Tu dza tu dza rulidza' Li', Xan.
 Richisa na' a zaca' ga na' zu'.
¹⁰ ¿Naru' guntso' yugu' yöl-la' huáca zxôn
 para gácalenu' nupa chinátigaca?
 ¿Naru' ulu'yasa nupa yú'ugaca lataj chul-la,
 en ila'gú'u Li' yöl-la' ba?
¹¹ ¿Naru' ulu'luí' i lahui yöl-la' dxi' i ladxi' quiu'
 nupa nagáchi' gaca yeru ba?
 ¿Naru' ulu'luí' i lahui nupa yú'ugaca lataj chul-la
 ca runu' ca rnna xtídzu'u?
¹² ¿Naru' gaca bê' le zxôn runu' ga na' naca chul-la?
 ¿Naru' gaca bê' nacu' tsahuí' ga na' cuntú nu bi rôjné?

¹³ Rulidza' Li' neda' para gácalenu' neda',
 ate' yugu' zila ridxín lo' le rinábida' Li'.
¹⁴ ¿Bizx que nusán lădxu'u neda', Xan?
 ¿Bizx que rucachi' lo' lahua' neda'?
¹⁵ Riguí' i rizáca'a, en chizóa gátia' ga gudela' naca' bí'ido'.
 Réquida' zi' tu' ruxösu' neda', en rudú lădxa'a.
¹⁶ Nabága'a neda' yöl-la' rilé quiu',
 ate' chizóa usuniti neda' le ruxösu' neda'.
¹⁷ Idú dza naca quia' ca nabaga' neda' nisa.
 Nagú'ugaca neda' lë'ajlô yugu' nisa.
¹⁸ Nucuasú' ga zoa' nu nadxi' i neda', enca' luzá'a.
 Zóalensô le naca chul-la neda'.

89

¹ Gúl-latica'sa' ca naca yöl-la' dxi' i ladxi' quiu', Xan.
 Usiyönda' xzí'ini xsoatu' ca runu' ca rnna xtídzu'u.
² Gunnía': "Sóatica'sô yöl-la' dxi' i ladxi' quiu'.
 Tsaz naca bê' yehua' yubá ca runu' ca rnna xtídzu'u."
³ Rnnê' Dios: "Naguixja' tsaz didza' dzaga núnlena' nupa nabô caza' quia'.
 Bena' tsutsu xtídzá'a ca guna' queê' David, huen dxín quia'.
⁴ Gunnía': Ucuá'a tsaz xzí'ini xí'sú'.
 Guna' ga sóatica'sô nu inná bê' uláz quiu'."
⁵ Nupa nacuá' yehua' yubá quiu' ila'gú'u yöl-la' ba le nunu' le tun ga rubánitu', Xan.
 Ga nudúbigaca nupa nácagaca quez quiu' ila'gú'u yöl-la' ba ca runu' ca rnna xtídzu'u.
⁶ ¿Nuzxi caz zoa ni' yehua' yubá naca ca nacu' Li', Xan?
 ¿Nuzxi caz zoa ladaj nupa nayépisëgaca naca ca nacu' Li', Xan?

⁷ Nupa nátagaca lá'ayi tun Li' bal, Dios.

Ral-la' gúnroŕu' Li' bal ca tun nupa nacuá'len Li'.

⁸ Dios, Xángaca ni'a no'o guizxi yu, ¿nuzxi caz naca ca nacu' Li', Xantu' nayépisëtëroŕu'?

Naca bē' rúntica'su' ca rnna xtídzu'u.

⁹ Rinná be'e quézínu' le riyasa ridxía que nísado'.

Cate' riyasa ridxía nísado', ruzóa cazu' le dxisô.

¹⁰ Busuniti cazu' bônachi Egipto, ate' gulaca ca nupa chinátigaca.

Bësilásiu' léguequi len no'o nál-la.

¹¹ Nequi quiu' yehua' yubá,

en nequi ca' quiu' luyú ni, tu' nuzóa cazu' léguequi.

¹² Naguixaj cazu' le dē tsólá'a ga za' bō' ziaga,

en le dē tsólá'a ga ridōdi gubidza beo' ziaga.

Lu yól-la' rudzeja quéguequi ta'bódxi'a guí'a Tabor,

en guí'a Hermón cate' ta'yōni Lo'.

¹³ ¡Nál-latërō naca no'o!

¡Nápatërō no'o yól-la' huáca!

¡Nayépisëtërō no'o ibëla!

¹⁴ Le naca dxi'a, en le naca tsahui' tun tsutsu le rinná bē'u.

Nacuá'len Li' yól-la' dxi'i ladxi', en le naca idútë li.

¹⁵ Bica' bágaca nupa ta'yōni didza' que yól-la' rudzeja.

Ta'dá lu bení' que lo', Xantu' Dios.

¹⁶ Idú dza tu'dzeja tu' zóalen Lo' léguequi,

en tu' zóalen léguequi le naca tsahui' quiu', le nayépisëtërō.

¹⁷ Naca cazu' Li' yól-la' zxôn que yól-la' huáca quéguequi,

en tu' ruzá' ládxi'u queëtu' nazxōnda' yól-la' nál-la queëtu'.

¹⁸ Nequi queë' Xanru' le run chí'i rē'u,

ate' néquinë' queë' Dios bōnni' rinná bé'enë' rē'u.

Dios na' náquië' lá'ayi ladaj bônachi Israel.

¹⁹ Dza ni'te bē'lenu' nupa néquiguequi quiu' didza'

lu yugu' le bulufínu' léguequi,

gunnó': "Gúcalena' tu nu nayépisëtërō.

Nuchisa' tu nu guró caza' quia' ladaj bônachi.

²⁰ Budzólida'-në' David, huen dxin quia'.

Gulu'a-në' le za le naca lá'ayi quia'.

²¹ Len na' caza' naguixja' lë',

ate' len na'a ca' utipa' ládxi'ë.

²² Biti' si' ye'e lë' nu rilé lë',

en biti' usaca' zi' lë' nu ruá' dō'.

²³ Uquínna' lahuë' nupa ta'díl-lalen lë',

en gu'a nupa bití' ta'lé'e lë' dxi'a.

²⁴ Sóalena' lë' lu yól-la' run ca rnna xtídza'a,

en lu yól-la' dxi'i ladxi' quia',

ate' tu' ulidzë' La', uxōna' yól-la' nál-la queë'.

²⁵ Guna' ga inná bē'ë ga naguela' ra' nísado',

ga idxintë ra' yegu Eufates.

²⁶ Ulidzë' neda', innë': Li' nacu' Xuza', en Dios quia',

enca' Nu run chí'i neda', en Nu rusólá neda'.

²⁷ Gun caza' neda' ga gáquië' ca bi'i lo queë caza',

ate' tsépisëtërë' ca yugu' bōnni' ta'nná bē'ë yōdzólió.

²⁸ Lu yól-la' dxi'i ladxi' quia' gun chí'tica'sa' lë',

en uzóa' tsaz queë' didza' dzaga quia'.

²⁹ Ucuá'a tsaz xxi'ini xi'sóë',

ate' sóatica'só lataj ga inná bē'ë, tsca soa yehua' yubá.

³⁰ Channó ulu'cá'anë' xxi'ini xi'sóë' xibá quia',

en cabí ilunë' ca naca le buchi'a busörōa',

³¹ en channó ila' guitsjë' xibá que le gunná bē'a,

en cabí ilunë' ca nátagaca le gunná bé'eda' légaquië',

³² ní'irō guna' légaquië' xiguia' ca sa'yéaj le ta'dōdi bē' tunë',

en gu'a léquequi ca naca xigua' nabága'gaquié'.

³³ Pero biti' ugúa' queë' yöl-la' dxi'i ladxi' quia',
en biti' usana' guna' ca rnna le guzxi' lu na'a guna'.

³⁴ Biti' ucá'ana' cá'asö didza' dzaga nuna',
en biti' utsá'a didza' bē'a.

³⁵ Tu le nuzó'a' tsutsu, en nuna' ba nali que le naca lá'ayi quia'.
Biti' ca' si' yé'eda' David.

³⁶ Gunnía' ila'cuá'tica'sē' zxi'ini xi'sóē',
en ga rō'ē rinná bē'ē sóatica'sö lahua' ca gubidza.

³⁷ Naguixja' le tsaz ca nuzó'a' tsaz beo',
ate' nacuá'tica'sö lúzxiba le tun ba nali."

³⁸ Pero nuzú' tsóla'alö, en nusán ládxi'u,
en riléde'enu' nupa na' gurö cazu' quiu'.

³⁹ Nuzú' tsóla'alö didza' dzaga bēnlenu' huen dxin quiu'.
Nuzótju' luyú yöl-la' unná bē' queë'.

⁴⁰ Nuquínajü' zö'ö gulún chí'i lē',
en nusunítü' yugu' lataj tsutsu queë'.

⁴¹ Yúgu'tē nupa ta'dōdisö ta'bán le nequi queë',
ate' bönni' dzaga yu'u queë' tu'cá'ana lē' cá'asö.

⁴² Nuchisu' nupa ta'dá'baga' lē',
en runu' ga tu'dzeja nupa biti' ta'lé'e lē' dxi'a.

⁴³ Runu' ga biti' sequi' idéli'nē' lu gudil-la,
ate' cuntü nu sequi' ucul-lē' lu gudil-la na'.

⁴⁴ Bugú' yöl-la' lachi queë',
en nuzótju' yöl-la' unná bē' queë' lu yu.

⁴⁵ Benu' ga chinagulē' sal-la' ni zoē' iz cuidi',
en nunu' ga rutu'inē'.

⁴⁶ ¿Gáca'xte caz gunu' caní, Xan?

¿Naru' tsaz nucachi' lo?

¿Naru' gácatica'sö yöl-la' rilé quiu' ca tu guí' réguide'e?

⁴⁷ Yöjné nabábasö iz soa' ibana',
en tu chí'isö nacuá' bōnachi yōdzölió ni.

⁴⁸ ¿Nuzxi caz bönni' gaca sóatica'sē' ibanē', en cabí gátie'?

¿Naru' huáca usólá cuin cazē' lu yöl-la' unná bē' que lataj chul-la?

⁴⁹ ¿Gázxité zoa yöl-la' dxi'i ladxi' quiu' guzóa zí'alö, Xan,
lē na' buzú' tsutsu xtídzü'u gunu' queë' David,

len yöl-la' run ca rnna xtídzü'u?

⁵⁰ Yöjné ca tu'cá'ana cá'asö netu', huen dxin quiu', Xan,
enca' ca tu'cá'ana neda' cá'asö bōnachi zían yōdzö izá'a.

⁵¹ Tu'cá'ana neda' cá'asö nupa biti' ta'lé'e Li' dxi'a, Xan.

Tu'cá'ana cá'asö yugu' le runa' neda', bönni' gurö cazu' quiu'.

⁵² ¡Yöl-la' ba Xanru' Dios iz si' zaca!

¡Ca' gaca! ¡Ön, ca' gaca!

90

¹ Naca cazu' Li', Xan, ca yu'u lidxa'.

² Zí'atélö ca gulata' yugu' guí'a, o ca guta' yōdzölió,
ga naguela' cate' gusí lo ga idxintē dza udxí, tsaz naca cazu' Dios.

³ Runu' ga tu'huóaca bōnachi bēchtö yu cate' rnno':

"Guli'huóaca le néquinili', bōnachi."

⁴ Quiu' Li' chí gayuá' iz nácagaca

ca dza neje le chigudödi que,

o ca tu chí'isö chí'i dzö'ölö.

⁵ Bugacu' bōnachi ca tu lu yegu gubó'o, ate' gúcagaca ca tu yēla rineru'.

Cate' naca zila zéaj naca ca tu guíxi'do' rilentē luyú.

⁶ Cate' naca lahui' dza rizxön, en rō' ni'a nē'e,

pero cate' chiral-la, ricuadi', en ridödi que.

⁷ Rinítitu' tu' rilenu' netu',

ate' tu' ridzó'o ruúbi ruguí'tu'.

8 Nuzú' lo' xigua' nabága'tu',
 en nubéaju' lu bení' quiu' dul-la' yu'u ládxi'do'otu'.
 9 Tu' riléde'enu' netu' ridödi quégaca dza queétu',
 ate' chibú'u iz queétu' ca tu le rinné ládxi'tu'.
 10 Tsónnalalaj yu' chi ízisö zóatu' nabantu',
 o channö nál-latu', huazóatu' idú tápalalaj iz,
 pero runtu' dxin bayudxi, en ruhui'initu' yugu' iz na',
 tu' ridödité quéguequi iz na', ate' uzá'atu'.
 11 ¿Nuzxi caz réajni'i tsa naca yöl-la' rilé quiu'?
 ¿Nuzxi caz nözi ca naca tsöbi yu'u nu na' rilenú'?
 12 Que lé ni na' busédi netu' para guéquibe'etu' tsa gácagaca iz zóatu',
 para gácatu' bönachi ta'yéajni'i lo' Li'.
 13 ¿Gáca'xte caz biti' huéchi' ládxi'u netu', Xan?
 Buéchi' ládxi' netu', yugu' huen dxin quiu'.
 14 Tu zila tu zila buluf' i netu' ca naca yöl-la' dxi'i ládxi' quiu',
 para gúl-latu' lu yöl-la' rudzeja queétu', en uzí'itu' xibé yugu' dza na'.
 15 Ben ga udzéjatu' tsa chigulaca dza busaca' zi'u netu',
 en tsa gulaca iz biti' guca dxi'a queétu'.
 16 Buluf' i netu', yugu' huen dxin quiu', ca naca le nunu',
 en buluf' i xzí'initu' ca naca yöl-la' zxön quiu'.
 17 ¡Buzá' ládxi' queétu', Xantu' Dios,
 en ben ga írúaj dxi'a dxin runtu'!
 ¡Ön, ben ga gaca dxi'a lo' dxin runtu'!

91

1 Nu bönni' ruzxöni ládxi'ë Dios para gun chi'ë lé',
 en rizi'ë Dios Nu napa idútë yöl-la' huáca, para gácalenë' lé',
 2 gaca guië' Xanru': "Nacu' Nu run chi'i neda', en Nu ruzóa neda' tsutsu.
 Nacu' Dios quia', ate' ruzxöni ládxi'a Li'."
 3 Usöla cazë' Dios Li' lu du yalaj que nu rizön bönachi,
 en lu yödzhüë' le rusuniti.
 4 Usubáguë'ë li' ca rusbága'ba' böra yugu' bórado' queéba',
 ate' gaca chi'u lu në'ë ca raca quégacaba' bórado' zzan xílaba' yöjede.
 Le run chi'i rë'u, en le ruzóa rë'u tsutsu naca yöl-la' run ca rnna xtídzë'ë cheë'.
 5 Biti' gádxinu' le run gadxi bönachi chi'i dzö'ölö,
 en biti' gádxinu' yaga lahui tuchi' tu'sé bönachi lahui' dza,
 6 en biti' gádxinu' yödzhüë' le rilén ga naca chul-la,
 en biti' gádxinu' le naca xihui' le ruti bönachi lahui' dza.
 7 Ilátigaca chi gayuá' bönachi cuitu' li',
 en ia'chí cö' chi gayuá' cuitu' ibëla,
 pero biti' bi gaca quiu' li'.
 8 Le nácatë uyú iná'asu',
 en ilé'enu' le rubí'i quégaca nupa tuá' dö'.
 9 Tu' nuzú'-në' Xanru' Nu run chi'i li',
 nuzú'-në' Dios nayépisëtë'rë' Nu gácalen li',
 10 biti' bi gaca quiu' le cabí naca dxi'a,
 en nitú le nachë' yödzhüë' biti' tsu'u lidxu',
 11 tu' cu'u cazë' Dios li' lu ná'agaquië' gubáz lá'ayi queë',
 para ilún chí'ë li' gátí'tës ga ridó'.
 12 Lu ná'agaquië' ila'chë'ë li',
 para cabí tsójchégu'u guiöj.
 13 Uléaj ulibu' bédxi guíxi', en bëla sínia'.
 Usunu' lë'e labu' bédxi guíxi'do', en bëla xitsiní'.
 14 Rnnë' Dios: "Nadxi'inë' neda', ate' que lé ni na' usöla' lé'.
 Uzóa'-në' tsaz xitsá'tërö tu' núnbë'ë La'.
 15 Ulidzé' neda', ate' ubí'a didza'.
 Sóalena' lë' cate' bi gaca queë'.
 Usöla' lë', en guna' lë' bal.
 16 Uzánda'a dza soë' ibanë',
 en uluf'ida'-në' ca gaca usöla' lë'."

92

¹ ¡Bica' tsahui' naca rigú'utu' Li' yöl-la' ba, Xan,
 en rúl-latu' le tun Li' bal, Dios nayépisëtërë',
² en rusiyöntu' bönachi yugu' zila ca ruhuéchi' ládzu'u netu',
 en ruluf'itu' lahui yugu' dzö' ca runu' ca rnna xtídzu'ul
³ Rúl-latu' len yugu' bihuël-la,
 en rúl-latu' yugu' le lachi ca tul-la.
⁴ Le zxön nunu' Li', Xan, run ga rudzéjatu',
 ate' ruzi'tu' xibé le núngaca lu no'o.
⁵ Bica' zxön nácagaca le nunu' Li', Xan.
 Zxöntërö le rizá' ládzu'u gunu'.
⁶ Zoa tu le cabí gaca inöziné' bönni' naxí icjè',
 en biti' gaca tséjni'iné' bönni' canöz le.
⁷ Nupa nucá'anagaca Dios ila'yán ca ta'yán guíxi'do',
 en ulu'zì' xibé le tun nupa tuá' dö', pero ila'niti tsaz,
⁸ tu' nayépsëtëru' Li' tsaz, Xan.
⁹ Naca bē' le gaca quégaca nupa biti' ta'lé'e Li' dxi'a, Xan.
 Naca bē' ila'niti nupa biti' ta'lé'e Li' dxi'a.
 Ulu'gá'ana cá'asö yúgu'tē nupa tuá' dö'.
¹⁰ Nunu' ga nácatëra' nal-la ca nácaba' bēdxi.
 Nagú'u neda' le za le run ga rudzéjada'.
¹¹ Ilé' quézida' cate' uxicju' nupa biti' ta'lé'e Li' dxi'a,
 en yönda' cate' ila'bödx yechi' nupa tuá' dö', nupa na' ta'díl-lalen neda'.
¹² Ila'yán nupa nácagaca tsahui' ca ta'yán yaga zina' ca'.
 Ila'zxön ca ta'zxön yaga rō'gaca lu guí'a Líbano.
¹³ Nácagaca ca yaga nudá'gacu' ra' yu'u lidxu', Xan,
 le ta'zxön lu lö'a lataj quiu', Dios queétu'.
¹⁴ Cate' ni' yú'ugaca iz zían ila'bia le zxixi quéguequi.
 Ilácagaca tsutsu, en ila'cuá'tica'sö ya'a.
¹⁵ Caní gaca para gaca bē' náquiē' tsahui' Xanru', Nu run chi'i neda'.
 Biti' bi zóalen Lē' le cabí naca tsahui'.

93

¹ ¡Rinná bē'ē Xanru'!
 ¡Nácuē' yöl-la' ba zxön queē'!
 ¡Nácuē' zxē' Xanru', en núguiē' lē'ē yöl-la' unná bē'!
 ¡Nuzóē' tsutsu yōdzōlió, ate' biti' utá cuini!
² ¡Tsaz nuzú' tsutsu ga rō'u rinná bē'u, Xan,
 en zóatica'su' Li'!
³ Riyasa ridxía nisa yugu' lu nísado', Xan.
 Riyasa ridxía nisa, en ru'u bō que.
 Riyasa ridxía nisa yugu' lu nísado', en yugu' lu yegu.
⁴ Xanru' Dios yehua' yubá nápatërë' yöl-la' unná bē'
 ca bō ru'u lu nísado' le riyón ca guziú' rinnē,
 enca' ca le riyasa ridxía nisa lu nísado'.
⁵ Tsaz naguixju' xibá quiu', Xan,
 ate' idú lá'ayi naca ga zoa cazu' Li'.
 Caní zóatica'sö na'a dza, en dza si' zaca.

94

¹ Nacu' Dios, Xan, Nu ruzí' lēbi bönachi.
 Buluf'i cuinu', Dios, Nu ruzí' lēbi.
² Ruchi'a rusörö cazu' yúgu'tē bönachi.
 Guzé, ate' len yöl-la' huáca zxön quiu' bubf'i quégaca nupa tun ba zxön cuínguequi.
³ ¿Gáca'xte caz ulu'zì' xibé nupa tu'cá'ana Li', Xan?
 ¿Gáca'xte caz ulu'zì' xibé?
⁴ ¿Gáca'xte caz ilún ba zxön cuínguequi, en iluf'i didza' zi?
 ¿Gáca'xte caz ilún ba zxön cuínguequi nì'a que dö' tuá'gaca?
⁵ Tu'sunítie' nupa néquiguequi quiu', Xan.
 Tu'saca' zì'ē nupa néquiguequi quez quiu'.

⁶ Tútigaquië' nigula uzëbi, enca' yugu' bi'i uzëbido',
en tunë' le naca xihui' ladaj bônachi zi'tu'.

⁷ Ta'nnë': "Biti' ilé'enë' Xángaquië' rë'u,
en biti' ruí'i ládxë'ë Dios queë' Jacob lë ni."

⁸ Guli'tséajni'i, bônachi biti' nözguequi,
ate' libí'ili', bônachi catún bal, ¿bátaxi tséajni'ili'?

⁹ Benë' Dios guiði nágaru'. ¿Naru' cabí riyón quézinë'?

Benë' Dios guiðj loru'. ¿Naru' cabí rilé'e quézinë'?

¹⁰ Ruzéajni'i quézinë' Dios bônachi yúgu'të yódzö.

¿Naru' cabí gunë' léguequi xiguia'?

Ruchiza cazë' icja ládxí'do'oru' yöl-la' réajni'i.

¿Naru' cabí réquibe'enë' bi runlí'?

¹¹ Nöz quézinë' Xanru' yugu' le ta'zá' ládxí'gaca bônachi.
Nözinë' canöz naca le ta'zá' ládxí'gaca.

¹² Bica' ba bönni' na' ruzéajni'i quézinu'-në', Xan,
en rusedi quézinu'-në' ca naca xibá naguixju' Li'.

¹³ Gunu' ga uzí' ládxë'ë cate' bi gaca queë',
ga idxinrö dza tsú'ugaca yeru ba nupa tuá' dö'.

¹⁴ Biti' usán në'ë Xanru' bônachi queë',
en biti' uca'anë' nupa néquiguequi quez queë'.

¹⁵ Ca naca le naca tsahui' uchi'a usöröë' rë'u le yúbölö,
ate' ulu'zí' xibé nupa nácgaca tsahui'.

¹⁶ ¿Nuzxi caz tíl-lalen nupa tuti bônachi para gácalen neda'?

¿Nuzxi caz gácalen neda' cate' nacuá' nupa tuá' dö' quia'?

¹⁷ La'tu' cabí gúcalenë' Xanru' neda',
la' yöjtsú'utea' lataj chul-la que yöl-la' guti.

¹⁸ Gunnía': "Chizóa' ibixa",
ate' lu yöl-la' dxi'i ladxí' quiu' guzxönu' neda', Xan.

¹⁹ Cate' ruúbi ruguí'i ladxí'da'ahua',
ruhuë' tsahú'u neda', en runu' ga rudzējada'.

²⁰ Biti' ca' gunu' tsözxön nupa tu'chí'a tu'sörö netu' ca naca le cabí naca tsahui',
nupa na' tu'béaj tsahui' le cabí naca tsahui'.

²¹ Tu'dubë' tsözxön para ilútië' nupa nácgaca tsahui',
en ta'chúguië' quégaca nupa biti' bi nabága'gaca ilátigaca,

²² pero run chí'i cazë' Xanru' Dios neda'.

Nuzöë' neda' tsutsu, ate' ruzxöni ládxa'a lë'.

²³ Ubi'ë quégaquië' ca naca dö' tu'ë,
en usunítië' légaquië' tu' nözi xiguia' nabága'gaquië'.

Usunítië' dërö Xanru' Dios légaquië'.

95

¹ Guli'dá, gúl-laru' queë' Xanru' lu yöl-la' rudzeja queëru'.

Lu yöl-la' rudzeja queëru' cödxí'aru' que Nu na' naca ca tu guiðjto'o ga nuláru'.

² Uyéajru' lahuë', en guiëru'-në': "Xclenu'."

Lu yöl-la' rudzeja queëru' cödxí'aru' lahuë', gúl-laru' yugu' salmo.

³ Xanru' Dios náquië' Dios nayépisëtërë'.

Nápatërë' yöl-la' unná bë' ca yúgu'të dios izá'a.

⁴ Lu na' cazë' yu'u le dë ga rë' zxan luyú,

ate' néquiguequi ca' queë' guí'a sibi.

⁵ Nequí queë' nísado', tu' nun cazë' le,

en len ná'asë' benë' luyú bidxi.

⁶ Guli'dá, gunru'-në' zxön, en uzóa zxiëru' lahuë'.

Uzóa zxiëru' lahuë' Xanru' Nu ben rë'u.

⁷ Naca cazë' Lë' Dios queëru',

ate' nácaru' bônachi rugagu cazë', en ca bö'cu' zxila' richë' cazë'-ba' lu në'ë.

Rnna cazë' Dios: "Na'a, channö rë'ënili' yónili' chí'a,

⁸ biti' gunli' zidzaj icja ládxí'do'oli' ca gulunë' xuz xtó'oli' lataj na' lë Meriba,
en caléga ca gulunë' la' guixi' ga dë lataj lë Masa,

⁹ cate' ni' gula'zì' bē'ē xuz xtó'oli' neda'.

Gula'zì' bē'ē neda' sal-la' bila'lé'enē' yugu' le bena'."

¹⁰ Idú choá' iz gúquida' zì' bōnachi gula'cuá' dza ni',
ate' gunniá': "Ta'chixi ta'níguinē' lu icja ládxi'do'gaquie',
en bitì' nōzguequinē' le rē'ēnda' ilunē'."

¹¹ Que lē ni na' lu yōl-la' rilē quia' bena' tsutsu xtídza'a,
gunniá': "Bitì' ca' ila'yáziē' ga ulu'zì' ládxi'ē tsōzxōn len neda'."

96

¹ ¡Gulì'gul-la queē' Xanru' tu le cubi!

¡Gulì'gul-la queē' Xanru', yúgu'tēlì' zóali' yōdzōlió!

² ¡Gulì'gul-la queē' Xanru'! ¡Gulì'gún zxōn lē'!

Tu dza tu dza bulì'siyōn bōnachi didza' dxi'a ca rusölē' rē'u.

³ Bulì'siyōn bōnachi yúgu'tē yōdzō yōl-la' ba queē'.

Bulì'siyōn yúgu'tē bōnachi le nácagaca zxōn nunē'.

⁴ Zxōntērō náquie' Xanru', ate' runda' bayúdx cú'uru-nē' yōl-la' ba.

Ral-la' gádxitēru' Lē' ca tadxì bōnachi izá'a dios quéguequi.

⁵ Yugu' dios quégaca bōnachi izá'a nácagacasō budó' guiōj budó' yaga,
pero Xanru' Dios nunē' lúzxiba xitsá'.

⁶ Nacuá' yōl-la' bení', en yōl-la' ba lahuē' Lē'.

Nacuá' yōl-la' huáca, en yōl-la' lachi ga zoa cazē'.

⁷ ¡Gulì'cu'ē Xanru' yōl-la' ba, bōnachi yúgu'tē yōdzō!

¡Gulì'cu'ē yōl-la' ba, en yōl-la' huáca!

⁸ ¡Gulì'cu'ē Xanru' yōl-la' ba ni'a que Lē'!

¡Gulì'guá' le unōdzjali', en gulì'dá lahuē'!

⁹ ¡Gulì'gún Lē' zxōn, náculi' le naca ba'a!

¡Gulì'zxizi lahuē', bōnachi idútē yōdzōlió!

¹⁰ Gulì'nná lógaca bōnachi yúgu'tē yōdzō: "Rinná bē'ē Xanru'.

Naguijē' tsaz luyú, ate' bitì' utá cuini.

Ca naca le naca tsahui' uchi'a usōrōē' quégaca yúgu'tē bōnachi."

¹¹ Ral-la' udzeja lúzxiba, en ulu'zì' xibé luyú.

Ral-la' cōdxi'a nísado', en ila'bōdxi yúgu'tē le nacuá' lu nísado'.

¹² Ral-la' udzeja guixi' caz, en yúgu'tē le nacuá' la' guixi'.

Lu yōl-la' rudzeja quéguequi ilúl-la yaga

¹³ lahuē' Xanru', tu' si' ulē'.

Guídē' duchì'a dusōrōē' nupa nacuá' yōdzōlió.

Ca naca le naca tsahui' uchi'a usōrōē' quégaca yúgu'tē bōnachi,

enca' quégaca bōnachi yúgu'tē yōdzō para ilunē' ca rnna xtídze'ē.

97

¹ ¡Rinná bē' cazē' Xanru' Dios!

¡Ral-la' ulu'dzeja bōnachi idútē yōdzōlió!

Bulì'sí' xibé', libí'ili' zóali' yúgu'tē yōdzō izá'a.

² Rō'gaca bōaj, en le chul-la idú gásibi'ilō ga na' zoē'.

Le naca dxi'a, en le naca tsahui' tu'zóa tsutsu le rinná bē'ē.

³ Rinōru tu guí' zxōn lahuē',

le uzegui' nupa ta'dá'baga' Lē'.

⁴ Tu'zení' le ta'yēpi yōsa yōdzōlió.

Rilé'e luyú lē ni, en rizzizi.

⁵ Tu'úna' guí'ado' ca ruún bidxina' buz lahuē' Xanru'.

Náquie' Xani idútē yōdzōlió.

⁶ Lúzxiba xitsá' naca bē' náquie' tsahui',

ate' ta'lé'e bōnachi yúgu'tē yōdzō yōl-la' zxōn queē'.

⁷ Tu'tuí' yúgu'tē nupa tun zxōn budó' guiōj budó' yaga,

nupa na' tun ba zxōn cúnguequi ni'a quégaca budó' quéguequi na'.

Ulu'gá'ana cá'asō yúgu'tē dios quégaca bōnachi izá'a lahuē' Xanru'.

⁸ Bila'yōni bōnachi Sión, en bulu'dzeja,

enca' yugu' xxi'ini xi'sóe' Judá.

Tu'dzéjanë' ca ruchi'a rusóröu' netu', Xan.

⁹ Nayépisëtërö cazu' Li', Xan, ca yúgu'të nupa nacuá' yödölió.

Nayépisëtërö cazu' Li' ca yúgu'të dios quégaca bönachi izá'a.

¹⁰ Núlöli' nadxi'ili'-në' Xanru', guli'guequi zi' le naca dö'.

Run chi'i cazë' bö' nácgaca caz nupa néquiquequi queë'.

Rusölë' léguequi lu ná'agaca nupa tuá' dö'.

¹¹ Ruzení'tica'sö bení' queë' nupa nácgaca tsahui',

ate' tu'zi' xibë' nupa nácgaca dxi'a.

¹² ¡Buli'sí' xibë' Xanru' núlöli' nácali' tsahui'!

¡Buli'subán ládxi'li' ca nunë' Dios Lá'ayi, en guli'cu'ë yöl-la' ba!

98

¹ ¡Guli'gul-la queë' Xanru' tu le cubi,

tu' nunë' le tun ga rubániru'!

Len yöl-la' unná bë' zxön queë', en yöl-la' huáca lá'ayi queë' nadéli'në' lu gudil-la.

² Nunë' Xanru' ga naca bë' le nadéli'në'.

Nuluf'inë' bönachi yúgu'të yödö náquië' tsahui'.

³ Len yöl-la' dxi'i ladxi' queë', en yöl-la' li ladxi' queë'

benë' ca rnna xtídzë'ë le guzxi' lu në'ë gunë' quégaca bönachi Israel.

Bila'lë'e bönachi idütë yödölió ca busölë' rë'u Dios queëru'.

⁴ ¡Lu yöl-la' rudzeja queëli' guli'gul-la queë' Xanru', yúgu'tëli' zóali' yödölió!

¡Idü ládxi'li' guli'cu'ë yöl-la' ba, en guli'gul-la queë' le naca lá'ayi!

⁵ ¡Guli'gul-la queë' Xanru' yugu' salmo, en guli'quinnaj yugu' bihuëli-lal

¡Guli'quinnaj lë'egaca arpa, en guli'gul-la yöl-la' ba queë'!

⁶ ¡Guli'cödxí lúzugacaba' chivo, en lúzugacaba' bëdxi

lahuë' Xanru' Dios, Nu rinná bë'!

⁷ ¡Buli'lidza zidzaj, nísado', en yúgu'të le nacuá' nisa na'!

¡Guli'gul-la yödölió, en yúgu'të nupa nacuá' ni'!

⁸ ¡Guli'capa' ná'ali', yugu' yegu,

ate' lu yöl-la' rudzeja queëli' guli'gul-la lahuë' Xanru', libí'ili', guí'ado',

⁹ tu' zë'ë duchi'a dusöröë' quégaca bönachi yödölió!

Ca naca le naca tsahui' uchi'a usöröë' quéguequi,

en ca naca le naca dxi'a tsahui' inná bé'enë' yúgu'të bönachi.

99

¹ ¡Rinná bë'ë Xanru' Dios! Ta'zxizi yúgu'të bönachi.

Rö'ë rinná bë'ë ladaj nupa nápagacatërö yöl-la' huáca,

légaca Querubín, ate' rizxizi luyú.

² Nayépisëtërë' Xanru' lu yödö Sión,

ate' rinná bé'enë' bönachi yúgu'të yödö izá'a.

³ Ral-la' ila'gú'u Lë' yöl-la' ba yúgu'të bönachi,

tu' caní sa'yéaj, en le run ga runru' Lë' bal.

¡Lá'ayi náquië' Lë'!

⁴ Nadxi'i quézinu' le naca tsahui', Li', Bönni' unná bë' nayépisë.

Tsaz naguixju' le naca dxi'a tsáhui'do',

en nuzú' quégaquië' xxi'ini xi'sóe' Jacob le naca tsahui', en le naca idütë li.

⁵ ¡Guli'gún zxönë' Xanru' Dios!

Buli'zechu xíbili' lahuë' Lë' ga rö'ë rinná bë'ë.

¡Lá'ayi náquië' Lë'!

⁶ Guláquië' Moisés, en Aarón bixúz queë',

ate' benë' Samuel tsözxön nupa gula'yéaj ládxi'gaca Lë'.

Bulu'lidzë' Xanru', ate' bubí' cazë' didza'.

⁷ Tu lu böaj bé'lenë' légaquië' didza'.

Gulunë' ca ta'nná bë' xibá queë', en yugu' le gunná bé'enë' légaquië'.

⁸Bubi'u didza' lógaca bönachi quiu', Xantu' Dios.
Bulu'ínu' légaquié' nacu' Dios, en runiti lo' bönachi,
pero rubi'u quégaquié' ca sa'yéaj dö' tu'ë.

⁹¡Guli'gún zxöné' Xanru' Dios!
¡Buli'zechu zxíbili' lahui' lo guí'a lá'ayi ga zoa cazé',
tu' náquié' lá'ayi Xanru' Dios!

100

¹¡Lu yöl-la' rudzeja queéli' guli'gul-la queé' Xanru',
libí'ili' zóali' idúté yódzölió!
²¡Lu yöl-la' rudzeja queéli' guli'cu'ë yöl-la' ba Xanru'!
¡Guli'dá lahué' Lë', en lu yöl-la' rudzeja queéli' guli'gul-la queé'!
³¡Guli'tsöjné Xanru', náquié' Dios!

Buzá' cazé' rë'u, en calëga rácasö queëru' zóaru'.
Nácaru' bönachi queé', en nácaru' ca bö'cu' zxila' queé'.
⁴Guli'tsaza zaca' ra' yu'u queé', guiéli'-në': "Xclenu'."
Guli'tsaza gapa naca lö'a queé', cú'uli'-në' yöl-la' ba.
Guli'guié': "Xclenu'", en guli'guné' zxön.

⁵¡Náquié' dxi' tsahui' Xanru' Dios, ate' zóatica'sö yöl-la' dxi'i ladxi' queé'!
¡Zóatica'sö yöl-la' run ca rnna xtídzë'ë queé'!

101

¹¡Gul-la' ca runu' ca rnna xtídz'u, en ca nacu' tsahui'!
¡Gul-la' yöl-la' ba quiu' Li', Xan!

²Güf'i ládxa'a guna' le naca idú dxi'a.
¿Bátaxi huécju' quia' neda'?

Lu yu'u lidxa' guna' le naca idú ladxi'.

³Biti' gu'a lataj sóalen neda' nitú le naca xihui'.

Biti' rilé'eda' dxi'a le tun nupa tu'cá'ana Li'.

Biti' ca' guna' léguequi tsözxön.

⁴Biti' ca' gaca' chopa ladxi'.

Biti' ca' guna' le naca dö'.

⁵Usunítia' dërö nu bönni' rinné' que luzé'ë balándo'os.

Biti' ca' guá' ilena' nu run ba zxön cuíni.

⁶Uyúa' dxi'a tsáhui'do' nupa tun ca rnna xtídz'a'guequi luyú ni, para ila'cuá'len neda'.

Nu bití' bi xigua' nabaga' huáca gun xichina'.

⁷Biti' ca' tsöjsóala lidxa' nu rizi' yë'.

Biti' gu'a lataj ugá'ana lahua' nu ruf'i didza' le cabí naca.

⁸Yugu' zila usunítia' yúgu'té nupa tuá' dö' luyú ni,
para ucuita' lu yódzö queé' Xanru' yúgu'té nupa tuti bönachi.

102

¹¡Buzé nagu' le rulidza' Li', Xan!

¡Bë' lataj idxín lo' le rinaba yúdxida' Li'!

²Biti' ucache' cuinu' lahua' cate' bi rusaca' zi' neda'.

Buzé nagu' neda', en gudáchi ubi'u didza' cate' rulidza' Li'.

³Yöl-la' na'bán quia' ruúlu ca dzön,
ate' régui rilá lu dxita lu bin quia' ca tu guí'.

⁴Rudú ládxa'a ca raca que guixi' nabidxi,
en bití'rö rizé ládxa'a bi gahua'.

⁵Tu' rinnéda' ládxa'a nadxítalë'a.

⁶Naca' ca tuba' biguínni zóaba' luyú bidxi,
o ca tuba' cuturú dxíaba' tu lu yu'u nadachi.

⁷Nabéaj yéla guiöj lahua',
ate' naca' ca tuba' biguínido' dxíaba' tüziba' ícjo'o yu'u.

⁸Yugu' dza nupa bití' ta'lé'e neda' dxi'a tu'didza' yudxi neda'.

Nupa tu'titaj neda' tu'gún dxin la' cate' nu tu'dxía dö'.

⁹Naca le rahua' ca dódo'sö,

en nutsi' nisa ribödxá' le rë'ja'.

¹⁰ Caní raca quia' tu' rilenú' neda', en réquinu' neda' zì'.

Gulisu' neda', en gurú'unu' neda' tsölá'alö.

¹¹ Naca yöl-la' na'bán quia' ca tu xzul-la rilá' cate' ribía gubidza, en rudú quia' ca raca que guixi' ricuádi.

¹² ¡Li', Xan, zóatica'su',

en zóaléntica'sö Lo' bönachil!

¹³ ¡Chasu', en huéchi' ládxu'u bönachi yödzö Sión!

¡Chibidxín dza güf'i ládxu'u léguequi!

¡Ön, chibidxín dza na'!

¹⁴ Netu', huen dxin quiu', nadxí'itu' yugu' guiöj nacua' lu zö'ö run chi'i yödzö Sión, en ruí'i ládxu' tu' ga rídxintë bëchtö rö'ö la' nöza que.

¹⁵ Bönachi yugu' yödzö izá'a iladxi Lë' Xanru', ate' nupa ta'nná bë' yödzölió iladxi yöl-la' zxön queë'.

¹⁶ ¡Nuchisë' Xanru' caz yödzö Sión,

ate' uluf'i lahuë' ni' lu yöl-la' zxön queë'!

¹⁷ Riyönnë' le tu'lidza Lë' nupa ta'yadzaj ta'yudxi.

Biti' ca' uzöë' tsölá'alö le tu'lidza yudxi Lë'.

¹⁸ Buli'zúaj lë ni lu guichi para ulu'laba xxf'ini xi'sóali' le, ate' nupa si' ilalaj ila'gú'u Xanru' yöl-la' ba.

¹⁹ Ga ni' ribözë' Xanru' xitsá' lu lataj lá'ayi queë', ga ni' zoë' Xanru' yehua' yubá, ruzë' naguë'.

²⁰ Riyönnë' le ta'nnë' ladxi' nupa nadzúngaca, en usanë' nupa narugu quéguequi ilátigaca.

²¹ Soa nu usiyöni bönachi yödzö Sión ca naca Lë' Xanru', ate' ila'gú'u Lë' yöl-la' ba lu yödzö Jerusalén,

²² cate' ulu'dubi tsözxön bönachi yugu' yödzö izá'a, en bönachi yugu' luyú, ate' tsözxön ila'gú'u yöl-la' ba Xanru'.

²³ Benë' Xanru' ga gucuídi'da' la' nöza, en nunë' ga soa' nabábasö dza.

²⁴ Gunnía': Dios quia', biti' gútiu' neda' cate' ni zoa' gatsaj iza ral-la' soa' ibana'. Zóatica'sö cazu' Li'.

²⁵ Dza ni'te gudixju' yödzölió, ate' len na' cazu' benu' lúzxiba.

²⁶ Huadödi quéguequi, pero Li', tsaz idi'u.

¡lexu' yúgu'tëguequi ca riyexu' lari', en ca tu lari' utubu' léguequi, en utsó'o léguequi.

²⁷ Li', biti' ca' utsá' cuinu', en biti' ca' guexu'.

²⁸ Xxf'inigaca huen dxin quiu' ila'böza dxi'a tsáhui'do', ate' ucú'u tsutsu xxf'ini xi'sóagaquië' lo'.

103

¹ ¡Bil-la yöl-la' ba queë' Xanru', li', bö' naca caza', ate' idütë le naca', bil-la yöl-la' ba que Lë' lá'ayi!

² ¡Bil-la yöl-la' ba queë' Xanru', li', bö' naca caza', en biti' gal-la ládxu'u yúgu'të le ruzi'u xibë'!

³ Runiti lo cazë' neda' ca naca yúgu'të dul-la' nabága'a, en rugüë' yúgu'të xihuë'a.

⁴ Ruhuoá'uë' neda' lu lataj chul-la, en ruzá' ládxë'ë quia' yöl-la' dxi'i ladxi', en yöl-la' ruhuéchi' ladxi'.

⁵ Rígu'ë xinöza' yugu' le naca dxi'a, lë na' run ga ruhuoáca' ca tu bönni' zoë' iz cuidi' queë', ca na' raca queéba' bisía'.

⁶ Runë' yugu' le naca dxi'a, en ruchí'a rusöröë' quégaca yúgu'të nupa zoa nu rusaca' léguequi zì'.

7 Buzéajni'inē' Moisés yugu' le gun cazē' Lē',
 en bulu'i'inē' bōnachi Israel yugu' le zxōn runē'.
 8 Xanru' ruhuéchi' ladxī' cazē' bōnachi, en ruzá' ladxē'ē quéguequi.
 Biti' rilétenē', pero nadxī'itiqui'sinē' léguequi.
 9 Biti' ruzétiqui'sinē' rē'u le bach,
 en biti' rilétiqui'sinē'.
 10 Biti' runē' rē'u xiguia' ca sa'yéaj dō' nuá'aru',
 en biti' rubi'ē queēru' ca naca le xihui' nabágaru'.
 11 Naca caní tu' ca na' naca xitsá'tērō lúzxiba ca luyú ni,
 la' canísō naca zxōn ca nadxī'inē' Xanru' nupa tadxī Lē'.
 12 Tsca nácatērō zi'tu' ga rilén gubidza ga ridxintē ga ribía,
 la' canísō rucuitē' yugu' le ta'bágaru' Lē'.
 13 Ca na' ruhuéchi' ladxē'ē xúzgaca cázabi' yugu' zxf'inē',
 la' canísō ruhuéchi' ladxē'ē Xanru' nupa tadxī Lē'.
 14 Caní runē' tu' nōzinē' le nácaru'.
 Rōinenē' néquiniru' bēchtō yu.
 15 Tsca nácgaca dza zóaru' nabanru',
 nácgaca ca raca que xiyija guíxi'do'.
 16 Cate' recaj bō', ruúlu runítisō xiyija na',
 en biti' naca bē' ga na' guzóa.
 17 Xanru', tsaz nadxī'inē' nupa tadxī Lē',
 en runē' quégaca zxf'iniguequi le naca dxi'a.
 18 Caní runē' quégaca nupa tun ca rnna xtídzē'ē,
 en quégaca nupa tun ca rinná bē' xibá queē'.
 19 Naguixjē' Xanru' xilatjē' yehua' yubá ga na' rō'ē rinná bē'ē.
 Rinná bé'enē' yúgu'tē le dē.
 20 jGuli'cu'ē yōl-la' ba Xanru', libí'ili', gubáz lá'ayi queē',
 nápatērōli' yōl-la' huáca zxōn, en runli' ca rnna xtídzē'ē,
 libí'ili' na' runli' ca rnna didza' ru'ē!
 21 jGuli'cu'ē yōl-la' ba Xanru', libí'ili' nácali' ni'a nē'ē guizxi yu,
 libí'ili', huen dxin queē' na', runli' ca rē'ēni quézínē' Lē'.
 22 jGuli'cu'ē yōl-la' ba Xanru', yúgu'tēli' na' nucu'ē libí'ili',
 libí'ili' zóali' yúgu'tē lataj ga na' rinná bē'ē Lē'.
 jBil-la yōl-la' ba queē' Xanru', li', bō' naca caza'!

104

1 jGulu'ē yōl-la' ba Xanru', li', bō' naca caza'!

jNayēpisētēru' Li', Xana' Dios!
 jZxo' nacu' naca yōl-la' zxōn, en yōl-la' ba!
 2 jNusubaga' cuínu' bení' ca zxo' nacu cazu',
 ate' naguixaj cazu' lúzxiba ca tu lari' zxōn!
 3 Naguixju' xilataj lidxu' lahui nisa dē xitsá'alō.
 Dxía cazu' lu bōaj ca tu lu carreta, en ridó' lu bō'ōs.
 4 Rugunu' dxin bō' raca ca tu gubáz quiu',
 enca' yugu' guí' ca huen dxin quiu'.
 5 Nuzú' tsutsu luyú ni lu xilibi,
 en biti' ca' gaca nu utsá' xilataj.
 6 Gudixju' nisa zxōn luyú ni ca tu lari' nabaga' le,
 ate' yōjbaga' nísado' na' yugu' guí'a.
 7 Buzenu' le bach nisa na', ate' burúaj,
 en cate' biyōn chí'u, bayúdx buzunnaj nisa na'.
 8 Gurén yugu' lu guí'a, en bōtaj ga naca ra' yegu,
 ga bidxintē yōjsóa ga nupó'o que nisa na'.
 9 Gudixju' buzá' que nísado' ga bití' gaca tōdi.
 Bítí'rō caz tseajbaga' nisa na' luyú bidxi.
 10 Runu' ga ralaj beaj yugu' lē'e guí'ado',
 enca' ga ta'dōdi yegu ga rō'ōgaca rōga'.
 11 Yudzu yugu' yegu na' nisa té'ajba' bōa' guixi',
 le rugúa yōl-la' ribídx quégacaba' burro ta'dásiba' la' guixi'.
 12 Yugu' ra' yegu rō'ōgaca yaga ga tu'dxiaba' biguínmido' xcá'agacaba',

en túl-laba' yugu' lu ni'a ně'eguequi.

¹³ Rigú'u nisa guiøj quiu' yugu' lu guí'a,
en runu' ga tu'huóla tu'dzé'e yugu' le dzö'ö luyú.

¹⁴ Runu' ga rizzón yö le táguba' böa' bēdx,

en yugu' cuan guixi' tu'gún dxin bōnachi,

le ilagu ni'a que le nudó'o luyú,

¹⁵ en xisi uva le run ga tudzeja lādxi'guequi,

en za olivo le ta'gú'u láhuiguequi lu yöl-la' ruzí' xibé quéguequi,

en yōta le nabániguequi.

¹⁶ Tu'zì' xibé nisa guiøj yaga cedro dzö'ö lu guí'a Líbano,

yugu' yaga na' budó'o, Xantu'.

¹⁷ Nì' tu'dxiaba' biguinni xcá'agacaba',

ate' tunba' biyúz līdxigacaba' nì'.

¹⁸ Nunu' Lì' yugu' guí'a sibi ga dzö'öba' bdxina' guixi',

enca' yugu' zخان bulóaj gapa tapa chí'i cuíngacaba' bizzidxu'.

¹⁹ Benu' beo' le naca bē' yugu' beo' que iz,

ate' ribía gubidza ga ral-la' cuía.

²⁰ Benu' chí'i dzö'ölō, en cate' naca chul-la

ta'rúajba' ta'daba' böa' guixi'.

²¹ Ta'bōdxi'aba' bēdxi guíxi'do', ta'zóa régu'ba' le ila'zōnba'.

Tu'guíajba' le nuzóē' Dios iláguba'.

²² Cate' rilén gubidza tu'dxinba' līdxigacaba',

en rōjōxagacaba' yugu' lu zخان bulóaj quégacaba'.

²³ Ní'irō ta'rúaj bōnachi sōjaca huen dxin,

en tun caz dxin ga ridxintē ribía gubidza.

²⁴ Xan, zíántērō yugu' le nunu' Lì'.

Len yöl-la' réajni'i zxōn quiu' nunu' yúgu'tē.

Nalí luyú yōdzōlió ni yugu' le dxi'a nunu'.

²⁵ Nì' zoa nisa nácatērō zxōn,

ga na' nacuá'aba' böa' guizxi yu,

böa' cuidi', enca' böa' zxōn.

²⁶ Nì' ta'dōdi barco zxōn,

enca' böa' zxōn lēba' leviatán, böa' na' nuzóa cazu'.

²⁷ Yúgu'tēba' ta'bōzaba' Lì',

cate' idxinrō ugagu' légacaba'.

²⁸ Rugagu' légacaba', ate' táguba'.

Runōdzju' le iláguba', ate' tu'huólaj ta'dzé'eba'.

²⁹ Cate' ruhuecju' quiu', tádxiba',

en cate' ruzi'u bö' quiu', tátiba',

en ruhuóáca yu le néquinigacaba'.

³⁰ Cate' rigú'u légacaba' bö', nabángacaba'.

Rucubu' yúgu'tē le nacuá' yōdzōlió.

³¹ ¡Ral-la' gácatíca'sō yöl-la' ba queē' Xanru'!

¡Ral-la' ila' yaza lādxi'tica'sō bōnachi le nun cazē' Lē'!

³² Ruyúē' Xanru' luyú, ate' rizzixi.

Riganē' yugu' guí'a, ate' rirúaj dzōn.

³³ ¡Gul-la' queē' Xanru' yúgu'tē dza soa' ibana'!

¡Gul-la' yöl-la' ba queē' Dios tsanni ni zoa' nabana'!

³⁴ ¡Zxixi naca le rízá' lādxa'a ca naca queē'!

¡Udzéjalenda'-nē' Xanru'!

³⁵ Ila'nítiē' bōnni' dul-la' nacu'ē yōdzōlió ni,

en bítì'rō ila'cuá' nupa tuá' dō'.

¡Gulú'u yöl-la' ba Xanru', lí, bö' naca caza'!

¡Yöl-la' ba Lē' Xanru'!

¡Buli'siyōn bōnachi ca nácagaca le benē'!

² ¡Guli'gul-la queē'! ¡Guli'gul-la yōl-la' ba queē'!

¡Guli'gūl' didza' ca nácagaca le zxōn nunē'!

³ ¡Buli'sí' xibé Lē' lá'ayi!

Ral-la' ulu'dzeja ladxi' yúgu'tē nupa ta'guilaj Xanru'.

⁴ Guli'guiljē' Xanru', enca' yōl-la' huáca queē'.

Guli'gūl' lādxi'tica'sō idxinli' lahuē'.

⁵ Guli'tsōjné le nácagaca zxōn benē' Lē',

lē na' tun ga rubániru', enca' ca nácagaca didza' bē'ē cate' buchi'a busörōē' bōnachi,

⁶ libí'ili', xzí'ini xí'sóē' Abraham, huen dxin queē' Dios,
en libí'ili', xzí'ini xí'sóē' Jacob, nácali' nupa guró cazē' queē'.

⁷ Lē' náquiē' Xanru' Dios.

Idútē yōdzōlió naca bē' ca buchi'a busörōē' bōnachi.

⁸ Rōjnétiqi'sinē' didza' dzaga nunē',

didza' na' gunná bē'ē ila'z' lu ná'agaquiē' chi gayuá' cō' xzí'ini xí'sóē' Abraham,

⁹ didza' dzaga na' benlenē' Abraham,

le naca didza' na' benē' tsutsu Dios ca gunē' queē' Isaac.

¹⁰ Ní'irō benē' tsutsu didza' na' lahuē' Jacob,

le naca tu le rinná bē'enē' lē' gunē',

para gaca quégaca bōnachi Israel tu didza' dzaga le zoa tsaz.

¹¹ Gunnē': "Ginna' queēli' xiyúgaca bōnachi Canaán,

le guequi tsaz queēli', en quégaca xzí'ini xí'sóali'."

¹² Caní gunné' Dios cate' nī' gula'cu'ē nabábagaquiē' bōnni' Israel.

Tu chópasē' guláquiē', en guláquiē' bōnni' zí'tu' luyú.

¹³ Gula'dē' tu ia'tú yōdzō izá'a.

Bulu'zē'ē tu ga nu gunná bē', en bila'dxínē' ga nacuá' bōnachi izá'a,

¹⁴ pero biti' bē'ē lataj Dios nu usaca' zí' bōnachi queē' na',

en buzenē' le bach bōnni' gula'nná bē'ē para gulácalenē' bōnachi queē'.

¹⁵ Gunnē': "Biti' bi gunlí' quégaca bōnachi nabō caza' quia',

en biti' bi dō' guá'ali' quégaquiē' bōnni' tu'ē didza' uláz quia'."

¹⁶ Benē' ga guyú'u gubín yōdzōlió,

en benē' ga biyadzaj yōta ilahuē'.

¹⁷ Gusól-lē'ē tubi' bi' i bōnni', bi' i bidxinbi' nī' zí'alō ca légaquiē',

tu' gulúti'ē-bi' José para gácabi' bi' i nadó'o.

¹⁸ Gulúgui'ē bōnni' Egipto ní'abi' len du guíē,

en bulu'dē'ē yen ná'abi' bregui' guíē,

¹⁹ ga bidxintē dza budxín xtídzē'ē Xanru',

tu' guzxi' bē'ē Xanru' Dios José na'.

²⁰ Ní'irō gusól-lē'ē bōnni' gunná bē'ē luyú Egipto nu busán-bi'.

Bōnni' na' gunná bē'enē' yōdzō izá'a zían busólē'-bi'.

²¹ Benē' ga gúcabi' xan yu'u queē',

ate' guta' lu ná'abi' yúgu'tē le dē queē' bōnni' na' rinná bē'ē.

²² Guta' lu ná'abi' gulú'ubi' lidxi guíē bōnni' ta'nná bē'ē tsca rē'ēni quézibi',

para busédibi' bōnni' gula queē' yōl-la' réajni'i.

²³ Ní'irō bila'dxín ca' bōnachi Israel luyú Egipto.

Caní guca, guzóē' Jacob lu xiyúgaca xzí'ini xí'sóē' Ham.

²⁴ Benē' Dios ga gula'yántērō bōnachi queē' luyú nī',

ate' guláquiē' zíántērē' ca nupa gula'díl-lalen légaquiē'.

²⁵ Benē' Dios ga gulunē' zí' bōnni' Egipto bōnachi queē'.

Lu yōl-la' banís quégaquiē' gula'z' yé'enē' nupa na' nácagaca huen dxin queē' Lē'.

²⁶ Ní'irō gusól-lē'ē Moisés, huen dxin queē', lógaquiē',

enca' Aarón, bōnni' na' nabō cazē' Lē'.

²⁷ Gulunē' chopē' nī zían yōl-la' huáca zxōn queē' Dios lógaca bōnachi Egipto na'.

Gulunē' zían yōl-la' huáca que yehua' yubá lu xiyúgaca xzí'ini xí'sóē' Ham.

²⁸ Gusól-lē'ē Dios le naca chul-la, ate' bōáca chul-la lahuí' dza,

en biti' guca ila'dá'baguē'ē xtídzē'ē.

²⁹ Benē' ga nisa yegu nacuá' lu yegu quégaquiē' bōáca rōn,

en benē' ga gulátiba' bōla dzō'ōba' yugu' yegu na'.

³⁰ Gula'yanba' riu lu xiyúgaquiē',

ga bidxintē gula'yázaba' yu'u lidxē' bōnni' rinná bē'enē' légaquiē'.

³¹ Bē'ē didza' Dios, ate' gulátsjaba' bōtsugayu guizxi yu,

en gulátsjaba' ca' bö'iyudo' idútë lu xiyúgaquië'.

³² Benë' ga guró'ö guió'j bögui' yôla sunna uláz que nisa guió'j, ate' böxaj ca' guí' lu xiyúgaquië'.

³³ Guditsjé' yugu' lubá uva quégaquië', en yugu' yaga higo, en busunítié' yaga rő'gaca lu xiyúgaquië'.

³⁴ Bë'ë didza', ate' bila'dxinba' böchi'zu guizxi yu, enca' böchi'zu hué'ënido', cuntu nu gaca ulaba légacaba',

³⁵ ate' guláguba' idútë guixi' cuan rő'ö lu xiyúgaquië', en guláguba' ca' idútë le naz nudá'agaquië' lu xiyúgaquië'.

³⁶ Benë' ga gulátibi' yúgu'tébi' bi'i bönni' lo idútë lu xiyúgaquië'.

Bi'i lo na' quégaquië' bönni' nál-la.

³⁷ Ní'irö bubéajé' Dios yugu' bönni' Israel luyú na', nuá'agaquië' dumí plata, en oro, ate' cuntu nu yő'jchegu' nu nutsa' légaquië'.

³⁸ Bulu'dzeja bönachi Egipto cate' bulu'zë'ë bönni' Israel lu xiyúgaquië',

ate' guladxi gula'dzöbi tu' nő'ziguequinë' bönni' Israel na'.

³⁹ Gusöl-lë'ë Dios tu böaj le gulú'u bönachi queë' zxul-la,

ate' chi'i dzö'ölö gusöl-lë'ë guí' le buzení' quégaquië'.

⁴⁰ Gula'nábinë' Lë', ate' gusöl-lë'ë böra guíxi'do' zían le ilahuë',

en benë' ga bulu'huölaj gula'dzé'enë' yöta que yehua' yubá.

⁴¹ Bulu'ë lahui tu guió'jto'o, ate' gulalaj nisa yégudo'.

Gudödi nisa na' luyú bidxi ni' ca tu nisa yegu gubó'o.

⁴² Caní benë' Dios tu' yő'jnenë' didza' lá'ayi queë',

le guzxi' lu në'ë gunë' queë' Abraham, huen dxin queë'.

⁴³ Bubéajé' bönachi queë' lu yöl-la' rudzeja quéguequi,

ate' lu yöl-la' rudzeja quéguequi gula'bödxí'a bönachi gurö cazë' queë'.

⁴⁴ Bunödžjé' xiyúgaca bönachi yugu' yödzö izá'a quégaquië'.

Bulu'zi'ë xibé le ilá' luyú ni'a que dxin gulún bönachi izá'a na'.

⁴⁵ Caní benë' Dios para ilunë' ca rnna le gunná bé'enë' légaquië' ilunë',

en ilunë' ca rinná bë' xibá gudixjé' Lë'.

¡Guli'cu'ë yöl-la' ba Xanru'!

106

1 ¡Guli'cu'ë yöl-la' ba Xanru'!

¡Guli'guië' Xanru': "Xclenu'" tu' náquië' idú dxi'a!

¡Zóatica'sö yöl-la' dxi'i ladxi' queë'!

2 ¡Nuzxi caz gaca quixjó' ca nácagaca le zxön nunë' Xanru',

en uluf'i lahui ca naca yöl-la' ba queë'?

3 ¡Bica' ba nupa tun le naca tsahui',

nupa na' túntica'sö le naca dxi'a!

4 Yő'jné neda', Xan, cate' ruzá' lădxu'u quégaca bönachi quiu'.

Buzá' ladxi' quia' yöl-la' rusólá quiu',

5 para gaca ilé'eda' gata' yöl-la' tsahui' quégaca nupa narö cazu' quiu',

en para gaca udzėjalenda' bönachi quiu' cate' tu'dzeja,

en para gaca uzí'lena' xibé nupa néquiquequi quiu'.

6 Nuntu' dul-la' ca gulunë' xuz xtó'otu'.

Biá'atu' dö', en bentu' le naca xihui'.

7 Cate' gula'cu'ë xuz xtó'otu' luyú Egipto,

biti' gula'yéajni'inë' le nácagaca zxön benu'.

Biti' yő'jnéquequinë' yugu' le benu' quégaquië' lu yöl-la' dxi'i ladxi' quiu',

pero gula'dá'baguë'ë xtídz'u cate' gula'cu'ë ra' nísado' lë Nísado' Xíná.

8 Busölë' Xanru' Dios légaquië' para gaca bë' runë' ca rnna xtídzë'ë,

en para ulu'e lahui yöl-la' huáca zxön queë'.

9 Caní guca, buzenë' le bach Nísado' Xíná na', ate' la' gubídxité.

Guchë'ë légaquië' ga rë'do' lu nísado' na',

ate' gula'dé' lu yu bidxi ga na' guró'ö nisa.

10 Caní guca, busölë' légaquië' lu na' nu na' benë' légaquië' zi',

en buá'uë' légaquië' lu na' nu na' gudíl-lalen légaquië'.

11 Ní'irö gubaga' nísado' na' nupa gula'sí regu' légaquië'.

Cuntu nu bugá'ana nu bidzaga léguequi.

12 Ní'irō gula'yéajlë' bōnachi queë' xtídzë',
 ate' gulul-la yōl-la' ba queë'.
 13 Pero la' gulál-latë lādxi'gaquië' yugu' le benë'.
 Biti' gula'nábinë' Lë' uluí'inë' légaquië' le ral-la' ilunë'.
 14 Zían le gula'zé lādxë'ë cate' nì' gula'cu'ë la' guixi' ga dë lataj,
 en gula'zì' bë'ë Dios la' guixi' na'.
 15 Ní'irō bë'ë Dios quégaquië' le gula'nábinë' Lë',
 pero gusól-lë'ë quégaquië' tu yōdzōhuë' le bëti zíangaquië'.
 16 Cate' bulu'zxë'enë' Moisés ga nì' gula'cu'ë tsōzxōn,
 en bulu'zxë'enë' ca' Aarón, bōnni' nubéajë' Xanru' quez queë',
 17 la' ná'asō guyalaj luyú, en bucachi' Datán.
 Bucachi' ca' nupa gulún tsōzxōn Abiram.
 18 Gulaj tu guí' zxōn ga na' nudúbigaquië',
 en buzegui' nupa na' guluá' dō'.
 19 Lu guí'a Horeb gulunë' tu bēdxido' néquiniba' oro,
 en gula'yéaj lādxë'ë budó' oro na'.
 20 Caní guca bulu'cá'anë' Dios nayëpisëtërë',
 para gula'yéaj lādxë'ë budó' oro le naca ca tu bēdxi ráguba' guixi'.
 21 Gulal-la lādxë'ë Dios Nu busólá légaquië'.
 Lë' benë' zían le zxōn le gulácalen légaquië' luyú Egipto.
 22 Benë' zían le tun ga rubániru' lu xiyúgaca xzí'ini xí'sóë' Ham,
 en zían le tun ga rádxiru' Lë' le benë' ra' Nísado' Xiná.
 23 Que lë' nì na' gunné' Dios usunítíë' légaquië', ate' la' cá'asō gunë'
 la'tu' cabí guzuínë' Moisés, bōnni' rō queë', lahuë' Lë',
 en buzóa dxië' yōl-la' rilé queë' para cabí usunítíë' légaquië'.
 24 Ní'irō bití' gulé'ënë' ila'yázië' luyú dxi'a na' dë lógaquië'
 tu' cabí gula'yéajlë'ë xtídzë'ë Dios.
 25 Gula'nnë' zì'ë queë' Dios gapa naca lu yu'u guídí quégaquië',
 en bití' bulu'zé náguië' chí'ë Xanru'.
 26 Que lë' nì na' benë' tsutsu Dios xtídzë'ë le bē'lenë' légaquië',
 gunné' gunë' ga ilátíë' ga na' naca la' guixi' ga dë lataj.
 27 Gunnë' gunë' ga ilasi lásië' xzí'ini xí'sóagaquië' ladaj zían yōdzō izá'a,
 en gúsië' légaquië' gapa nacuá' bōnachi zì'tu'.
 28 Ní'irō bulu'dōdi cuíngaquië' lu na' budó' guíë' lë Baal-peor,
 en gulahuë' xipéla'gacaba' bōa' guixi' gulútië'-ba'
 para gulunë' zxōn yugu' dios nati.
 29 Ca' guca, gulún lenë' Dios nì'a que le gulunë',
 ate' gulén tu yōdzōhuë' zxōn lādjaquië'.
 30 Ní'irō guzuínë' Finees, en benë' le raza lādxë'ë Dios,
 ate' guzóa dxi yōdzōhuë' zxōn na'.
 31 Buzóë' Dios queë' Finees na' náquië' tsahui' nì'a que
 lë' na' benë' le nuzóë' tsaz ca naca queë'.
 32 Lësca' gulún lenë' Dios ga na' zoa nisa lë Meriba,
 ate' Dios gulénë' Moisés tu' nōzi lë na' gulunë'
 33 tu' gula'dá'baguë'ë xtídxë'ë Bō' Lá'ayi queë',
 ate' Moisés, lu yōl-la' ridzá'a queë', gunné' lizë'.
 34 Bití' bulu'sunítíë' bōnachi tuá' dō' gula'cuá' lu yu nì,
 ca na' gunná bé'enë' Xanru' légaquië' ilunë'.
 35 Gulunë' léguequi tsōzxōn
 en bila'zéde' ilunë' ca gulún bōnachi na',
 36 ate' gula'yéaj lādxë'ë budó' guiōj budó' yaga quéguequi,
 le guca quégaquië' ca tu du yalaj le guzxōn légaquië'.
 37 Gulútië'-bí' xzí'inigaquië' lógaca bō' xihui',
 yugu' bí'i bōnni', en nigúlado',
 38 en bulu'laljë' xichōngaca nupa bití' bí' nabága'gaca
 tu' bulu'laljë' xichōngacabí' bí'i bōnni' quégaquië', en bí'i nigula quégaquië',
 yugu' bí'i na' gulútië'-bí' lógaca budó' guiōj budó' yaga nacuá' luyú Canaán,
 ate' gúcada' xihui' luyú nì tu' nōzi rōn na' bulu'laljë'.
 39 Ca' guca, guláquië' xihui' nì'a que le gulunë'.
 Guláquië' ca tu nigula udá dzaga tu' bulu'cá'anë' Dios quégaquië'.
 40 Que lë' nì na' guléde'enë' Xanru' Dios bōnachi queë',
 en bití' bilé'enë' dxi'a nupa na' néquiguequi queë'.

41 Ní'irō budödē' légaquiē' lu ná'agaca bōnachi zían yōdzō izá'a,
 ate' nupa bulu'dí'i légaquiē' gula'nná be'e légaquiē'.
 42 Nupa na' bití' bila'lé'e légaquiē' dxi'a gulunda' légaquiē' dxin,
 en bulu'zxicaj légaquiē' lu yöl-la' unná bē' quéguequi.
 43 Zían luzuí' gú'unē' Dios usölē' légaquiē',
 pero gula'dá'baguē'ē le rē'ēnē' ilunē',
 ate' guzxōntērō xigua' nabága'gaquiē'.
 44 Bilé'enē' Dios yöl-la' bayechi' quégaquiē'
 en biyōnnē' ta'bōdxi yechē'ē.
 45 Yōjnenē' didza' dzaga nūnlenē' légaquiē',
 ate' bubequi lahuē' quégaquiē' tu' nazzōntērō yöl-la' dxi'i ladxi' queē'.
 46 Benē' Dios ga bulu'huéchi' ladxi' légaquiē'
 nupa na' gula'chē' légaquiē' nadzúngaquiē'.
 47 jBusólá netu', Xantu' Dios!
 Guléaj netu' ladjagaca yōdzō izá'a
 para gufētu' Li': "Xclenu" ni'a que Lo' lá'ayi,
 en lu yöl-la' rudzeja zxon queétu' cú'utu' Li' yöl-la' ba.
 48 jYöl-la' ba Lē' Xanru', Dios quégaca bōnachi Israel
 na'a dza, en yúgu'tē dza sí' zaca!
 Ral-la' ila'nná yúgu'tē bōnachi: "jCa' gaca!
 jGuli'cu'ē yöl-la' ba Xanru' Dios!"

107

1 jGuli'guíē' Xanru': "Xclenu" tu' náquiē' dxi'a,
 en tu' zóatica'sō yöl-la' dxi'i ladxi' queē'!
 2 Ral-la' ila'nná caní nupa na' buá'uē' Xanru',
 nupa na' buá'uē' lu ná'agaca nupa gulún léguequi zí',
 3 en nubéajē' léguequi zían lu yōdzō izá'a,
 saca' ga rilén gubidza, en saca' ga ribia,
 saca' ga za' bō' ziaga, en saca' ga ridōdi gubidza beo' ziaga.
 4 Bal-lē' gula'dē' nanítigaquiē' la' guixi' ga dē' lataj,
 en ga nī' bití' zoa nōza.
 Bití' guca ulu'dzōlinē' tu yōdzō ga gaca tsōjcu'ē.
 5 Gula'dunē', en gula'bidxē' nisa,
 en gudú lādxi'gaquiē'.
 6 Ní'irō lu lē na' raca quégaquiē' bulu'lidzē' Xanru',
 ate' busölē' légaquiē' lu zían le gula'guí'i gula'záquē'ē.
 7 Guchē'ē légaquiē' tu la' nōza tsahui',
 en guchē'ē légaquiē' tu lu yōdzō ga tsōjcu'ē.
 8 Ral-la' ilē' Xanru': "Xclenu" tu' nadxf'inē' légaquiē',
 en tu' benē' yugu' le zxon, gúcalenē' légaquiē'.
 9 Rugui'jē' nupa ta'bidxi ladxi',
 en rugahuē' nupa ta'dún le nácagaca dxi'a queē'.
 10 Bal-lē' gula'cu'ē ga chul-la, en ga zoa bōnadxi ilátiē'.
 Gula'dzunē' yugu' lu du guíē, en gula'guí'i gula'záquē'ē
 11 tu' gula'dá'baguē'ē xtídzē'ē Xanru' Dios,
 en bulu'zōē' tsölá'alō le rigu'ē icja lādxi'do'gaquiē'.
 12 Tu' gulunē' bayúdx dxin, gudú lādxi'gaquiē'.
 Gula'dzō'ē lu yu zxan yua' nuá'agaquiē',
 ate' cuntu nu zoa gácalen légaquiē'.
 13 Ní'irō lu lē na' raca quégaquiē' bulu'lidzē' Xanru',
 ate' busölē' légaquiē' lu zían le gula'guí'i gula'záquē'ē.
 14 Bubéajē' légaquiē' ga na' gula'cu'ē ga chul-la,
 en ga guzóa bōnadxi ilátiē',

ate' guditsjè' yugu' du guié núga'gaquiè'.

15 Ral-la' ilè' Xanru': "Xclenu" tu' nadxí'inè' légaquiè',
en tu' benè' yugu' le zxön, gúcalenè' légaquiè'.

16 Ruquínnejè' le tá'baga' gapa nu riyaza lidxi guié le néquiniguequi guié bronce,
en ruzzuzxjè' yugu' vara néquiniguequi guié.

17 Bal-lè' gula'guí'i gula'záquë'è tu' gula'dá'baguë'è Dios,
en tu' nōzi dō' gulu'ë.

18 Gula'güti'nè' bítí'tès la' huagu,
en gula'zóa ilátië'.

19 Ní'irō lu lè na' raca quégaquiè' bulu'lidzè' Xanru',
ate' busölè' légaquiè' lu zían le gula'guí'i gula'záquë'è.

20 Gusöl-lè'è quégaquiè' xtídzè'è, en bunè' légaquiè',
en busölè' légaquiè' lu yöl-la' guti.

21 Ral-la' ilè' Xanru': "Xclenu" tu' nadxí'inè' légaquiè',
en tu' benè' yugu' le zxön, gúcalenè' légaquiè'.

22 Ral-la' ilè' Dios: "Xclenu", en bi ulu'nōdzjè' queë',
en lu yöl-la' rudzeja quégaquiè' ilul-lè' ca nácagaca le nunè'.

23 Bal-lè' gula'dödè' lahui nísado' yugu' lu barco zxön,
en gulunè' dxin yugu' lu nísado'.

24 Bila'lé'enè' yugu' le nunè' Xanru',
en yugu' le zxön nucu'ë lu nísado'.

25 Bè'èsè' didza', ate' guyecja bö' budunu',
ate' guyasa gudxía nísado'.

26 Gula'yasa barco ca tu lu guí'ado' nisa,
en la' bótjatè ga rō'ō rōga' lu nisa na'.
Tu' guzóale'ë bōnaxi ilátië' gudú lādxi'gaquiè'.

27 Gula'zxízië', en yōjchégu'gaquiè' ca bōnni' ta'zúdxinè',
ate' nítisō guca yöl-la' rácada' quégaquiè'.

28 Ní'irō lu lè na' raca quégaquiè' bulu'lidzè' Xanru',
ate' busölè' légaquiè' lu zían le gula'guí'i gula'záquë'è.

29 Benè' Dios ga guzóa dxisō bö' budunu' na' recja,
ate' guzóa dxi le rasa ridxía lu nísado'.

30 Bulu'dzéjanè' tu' guzóa dxi lu nísado',
en tu' guchè'è Dios légaquiè' dxi'a tsáhui'do' ga na' sōjáquiè'.

31 Ral-la' ilè' Xanru': "Xclenu" tu' nadxí'inè' légaquiè',
en tu' benè' yugu' le zxön, gúcalenè' légaquiè'.

32 Ral-la' ulu'lu'è lahui yöl-la' zxön queë' ga nudúbigaca bōnachi queë',
en ila'gu'è Lè yöl-la' ba ga nudúbigaquiè' bōnni' gula tu'chi'a tu'söröë'.

33 Runè' Xanru' Dios ga tu'huí'i dērō yugu' yegu,
enca' yugu' beaj nisa.

34 Ga naca yu ya'a runè' ga ruhuóaca yu bidxi,
ni'a que le xihui' nabága'gaca nupa nacuá' ni'.

35 Ga naca yu bidxi runè' ga ruhuóaca yu nabisa,
ate' ralaj nisa ga bití' bi nisa guzóa.

36 Ní' ru'è lataj ila'cuá' nupa ta'dún
para ilunè' ni' yōdzō ga ila'cu'ë.

37 Tazè' yugu' le tazè', en tu'dé'è yugu' lubá uva,
yugu' le ta'bia yōdxi yana'.

38 Runè' Xanru' ga raca dxi'a quégaquiè',
en ga ta'cuá'bi' zíanbi' bi'i quégaquiè',
en runè' ga ta'yanba' bōa' bēdxi quégaquiè'.

39 Cate' yugu' bōnni' unná bē' zi'tu' tu'zxicjè' bōnachi queë',

en tu'zõtjê' léguequi,
 en tu'saca' zi'ê léguequi, en tu'ê dô' quéguequi,
⁴⁰ rucá'anê Dios bõnni' na' dê lu ná'agaquiê' cá'asö,
 en runê' ga ta'dê' la' guixi' ga dê lataj, en tu luyú bidxi.
⁴¹ Rusölê' yugu' bõnni' yechi' lu le ta'guf'i ta'záquê'ê,
 en runê' ga ta'yanbi' xzí'inigaquiê' ca ta'yanba' bõ'cu' xzíla'do'.
⁴² Ta'lê'e lê ni nupa nácacaga tsahui', en tu'dzeja,
 pero biti' bi ta'nná nupa tuá' dô'.
⁴³ Nupa ta'yéajni'i ral-la' sa' ládxí'gaca ca nácacaga lê ni,
 ate' iléquibe'e náquiê' Xanru' Dios dxi'i ladxi'.

108

¹ ¡Chinabá'a quia', Dios!
 ¡Gul-la' quiu'! ¡Õn, idú ládxa'a gul-la' yöl-la' ba quiu'!
² ¡Guli'bán, libí'ili' riguinnali' bihuêl-la!
 ¡Gúl-laru' cate' ni' ritö yu!
³ ¡Guía' Li': "Xclenu'" Xan, ládjagaca bõnachi yugu' yödzö izá'a!
 ¡Gul-la' yöl-la' ba quiu' lógaca yúgu'tê bõnachi!
⁴ ¡Zxöntêrö naca yöl-la' dxi'i ladxi' quiu', le ridxintê lúxiba xitsá'!
⁵ Buluf'i lahui lúxiba yöl-la' zxön quiu', Dios,
 ate' lahui yödzölió ni buluf'i lahui yöl-la' bení' quiu',
⁶ para usöló' netu', bõnachi quiu', nupa nadxí'inu'.
 Len yöl-la' huáca zxön quiu' busólá netu', en bubí' didza'.

⁷ Lu lataj lá'ayi queê' bē'ê didza' Dios, gunnê':
 "Uzi'a xibé, en quisia' xiyúgaca bõnachi Siquem,
 en urixa' luyú dê cuiti yegu Sucot.
⁸ Nequi quia' xiyúgaca bõnachi Galaad,
 enca' xiyúgaca xzí'ini xi'sóê' Manasés.
 Naca ca tu le rusubín icja' xiyúgaca xzí'ini xi'sóê' Efraín.
 Naca ga rinná bē'a xiyúgaca xzí'ini xi'sóê' Judá.
⁹ Naca ca tu ga riguibi na'a xiyúgaca bõnachi Moab,
 ate' lu xiyúgaca bõnachi Edom chú'una' lōla'.
 Cõdxi'a tu' uxicja' bõnachi Filistea."

¹⁰ ¿Nuzxi caz gaca ichê' neda' lu yödzö
 dê zó'ö idú gásibi' iló le run chi'i yödzö na'?
 ¿Nuzxi caz gaca ichê' neda' lu xiyúgaca bõnachi Edom?
¹¹ ¿Naru' cabí nusán ládxu'u netu', Dios?
 ¿Naru' cabí tséajlenu' bõnni' queétu' rójáquiê' gudil-la?
¹² Gúcalen netu' cate' tíl-lalentu' nupa dutíl-lalen netu',
 tu' naca dádusö gácalen netu' nu naca bõnáchisö.

¹³ Len yöl-la' huáca queê' Dios idéli'ru'
 tu' uxicja cazê' Lē' nupa ta'díl-lalen rē'u.

109

¹ Rigu'a Li' yöl-la' ba, Xana' Dios.
 Biti' su' dxisö,
² tu' ta'nná quia' nupa tuá' dô', en ta'zí' yē'.
 Lu yöl-la' rizí' yē' quéguequi tui' didza' le tu'zegui' neda'.
³ Nagú'ugaca neda' lē'ajlō,
 en lu yöl-la' bití' rilé'e neda' dxi'a tuf'ítica'sö didza'.
⁴ Sal-la' nadxí'ida' léguequi, tu'zegui' neda' didza',
 pero neda' rulidza' Li'.
⁵ Bena' quéguequi le naca dxi'a, pero bulu'bí'i quia' le naca dô'.
 Nadxí'ida' léguequi, pero biti' ta'lé'e neda' dxi'a.
⁶ Buzóa tu bõnni' huía' dô'
 para uchi'a usörôê' que nu na' biti' rilé'e neda' dxi'a.
 Ben ga soa gagu nu uzegui' nu na' didza'.
⁷ Cate' nu uchi'a usörö bõnni' na', biti' gu'u lataj urúajê' dxi'a.

Buyú le rinábinë' Li' tsca naca dul-la' nabáguë'ë.

⁸ Ben ga ilaca nabábasô dza soë' ibanë'.

Ben ga tsu'u nu yúbölö uláz queë'.

⁹ Ben ga ilácabi' zxi'inë' bi'i uzëbi,

en ga gácanu nigula queë' nigula uzëbi.

¹⁰ Ben ga ila'dásöbi' zxi'inë' ila'nábibi' nu bi unödzej quégacabi'.

Ben ga ila'guíljabí' le ilágubi' zi'tu' ga zoa lídxigacabi' le nadachi.

¹¹ Ben ga ugúa nu bi benna lë' tu chí'isô idútë le dë queë',

en ben ga ila'banë' bönni' zi'tu' le rulá' dxin runë'.

¹² Ben ga bití' soa nu huéchi' ladxi' lë',

en bití' soa nu uzá' ladxi' quégacabi' zxi'inë' náccagacabi' bi'i uzëbi.

¹³ Ben ga udxí quégaca zxi'ini xi'sóë',

en ga idxín dza bítí'rô soa nu si' la ca guzxi'i lë'.

¹⁴ Yöjnética'sô le xihui' gula'báguë'ë xuz xtá'ahuë', Xan,

en bití' gal-la ládxu'u dul-la' bennu xinë'ë.

¹⁵ Ben ga ila'cuá'tica'sô dul-la' na' lo' Li', Xan,

para cabirô nu soa yôdzôlió nu tsójné lë'.

¹⁶ Bití' buéchi' ládxë'ë luzë'ë,

pero gudxiá nahuë' nupa gula'guí'i gula'zaca',

en nupa gula'yadzaj gula'yudxi,

enca' nupa gula'sëbi ladxi', ate' bëtië' léguequi.

¹⁷ Bidxi'inë' le rudxiá luzë'ë dô'.

Ben ga ulu'bí'i ca' queë'.

Bití' raza ládxë'ë gaca dxi'a que luzë'ë.

Ben ga bití' gaca dxi'a queë'.

¹⁸ Gulaca ca zxë' nácuë' didza' xihui' bë'ë,

ate' gula'yaza le nayá' nabanë' ca nisa,

en gula'yú'u ca' dxita queë' ca le za.

¹⁹ Ben ga ilaca queë' ca tu lari' rixóa cúdzë'ë,

en ca xipanë' rúgui'ë lë'ë.

²⁰ Bubi'í caní quégaca nupa tu'zegui' neda' didza', Xan,

enca' quégaca nupa tu'i didza' zi' que bö' naca caza'.

²¹ Li', Xana' Dios, ben quia' le naca dxi'a

para gaca bë' runu' ca rnna xtídzu'u.

Tu' naca dxi'a yöl-la' dxi'i ladxi' quíu', busölá neda'.

²² Riguí'i rizáca'a, en riyadzaj riyúdxida',

en raca zi' ládxí'da'ahua'.

²³ Ridödi quia' ca raca que tu zxul-la cate' ribía gubidza.

Naca' ca tuba' böchi'zu, richë' bö' recja lëba'.

²⁴ Ta'cuidi' zxiba' tu' runa' gubasa.

Nadxita', en bítí'rô rô'ô za lu bëla' rön quia'.

²⁵ Nupa bití' ta'lé'e neda' dxi'a tu'titaj neda'.

Cate' ta'lé'e neda', tu'tá ícjaguequi.

²⁶ Gúcalen neda', Xana' Dios.

Lu yöl-la' dxi'i ladxi' quíu' busölá neda'.

²⁷ Ben ga iléquibe'e rácalen cazu' neda'.

Nun cazu' Li' lë ni, Xan.

²⁸ Tu'dxia neda' dô', pero Li', ben ga gaca dxi'a quia'.

Cate' ila'yasë', ulu'tuí'inë',

pero udzëjada' neda', huen dxin quíu'.

²⁹ Ben ga ulu'gá'ana cá'asô nupa tu'zegui' neda' didza',

en ben ga gaca yöl-la' rutuí'i quéguequi ca tu lari' nabaga' léguequi.

³⁰ Len ruá' cuina', zían luzuí guía'-në' Xanru': "Xclenu",

en ladaj bönachi zían cu'a Lë' yöl-la' ba,

³¹ tu' zuinë' cuita lë'e ibëla nu riyadzaj riyudxi

para usölë' nu na' lu ná'agaca nupa tu'siúdxí bö' naca caz nu na'.

110

¹ Xanru' Dios gudxë' Xana': "Gurö'i cuita lë'a ibëla cate' gunra' ga ulu'zechu zxíbigaca lo'

nupa bití' ta'lé'e Li' dxi'a."

² Ga zoë' yôdzô Sión gusól-lë'ë Xanru' yôl-la' unná bē' quiu',
gunné': "Gunná be'e nupa bití' ta'lé'e Li' dxi'a.

³ Ulu'dôdi cúinguequi lu no'o bônachi quiu'

cate' si'u yôl-la' unná bē' quiu'

tu' napu' yôl-la' lachi que le naca lá'ayi."

Ila'cuá' bí'i bônni' ga zu' ca ribô'ô buzén zílado'.

⁴ Runë' tsutsu xtídzë'ë Xanru', en bití' utsë'ë le, rnnë':

"Tsaz nacu' bixúz ca na' gúquië' Melquisedec bixúz."

⁵ Zoa cazë' Xanru' cuita lë'u ibëla.

Ucul-lë' bônni' ta'nná bē'ë cate' idxín dza usiúdxë' luyú.

⁶ Uchi'a usöröë' quégaca bônachi yúgu'të yôdzô izá'a,

ate' ilí yôdzôlió len bëla' rôn quéguequi.

Uzôjtjë' nupa ta'nná bē' zían lu yôdzô izá'a.

⁷ Guí'jë' nisa beaj ra' nôza,

en ni'a que lë ni huóaca ládxë'ë.

111

¹ ¡Guli'cu'ë yôl-la' ba Xanru'!

Idú ládxa'a rea-në' Xanru': "Xclenu'."

Runa' caní tsazxón len bônni' tsahui' zían ga na' nudúbigaca bônachi queë'.

² Zxôn nácacaca le nunë' Xanru'.

Yúgu'të nupa ta'yaza ládxi'gaca lë na' benë' tu'sëda ca nácacaca.

³ Idútë dxi'a nácacaca, en nayëpisëtërogaca le nunë' Lë',

ate' idiá'tica'sô le naca tsahui' queë'.

⁴ Chinunë' ga tsójneru' yugu' le benë', le tun ga rubániru'.

Náquië' Xanru' dxi'i ladxí', en ruí'i ládxë'ë rë'u.

⁵ Rugahuë' nupa tadxi Lë'.

Röjnética'së' didza' dzaga núnlenë' bônachi queë'.

⁶ Buzéajni'inë' bônachi queë' ca naca yôl-la' huáca quégaca le nunë',

le benë' ga gula'déli'në' xiyúgaca bônachi izá'a.

⁷ Tsahui', en idútë li nácacaca le núngaca lu në'ë.

Nácacaca tsutsu yúgu'të xibá gunná bē'ë.

⁸ Rucuá'tica'së' tsutsu xibá queë',

en rusudxinë' léguequi lu le naca idútë li, en le naca tsahui'.

⁹ Gusól-lë'ë Nu buá'uô bônachi queë'.

Tsaz nuzóë' didza' dzaga nunë'.

Lá'ayi, en ba'a ladxí' naca Lë'.

¹⁰ Lu yôl-la' radxi queëru' Lë' risí loru' ridéli'ru' yôl-la' réajni'i.

Yúgu'të nupa tun ca ta'nná bē' xibá queë' nápagaca yôl-la' réajni'i.

Ila'cuá'tica'sô nupa ila'gú'u Lë' yôl-la' ba.

112

¹ ¡Guli'cu'ë yôl-la' ba Xanru'!

¡Bica' ba bônni' na' rádxinë' Xanru',

bônni' na' raza ládxë'ë runë' ca gunná bē'ë Dios!

² Tsëpisëgaca zxi'ini xi'sóë' bônni' na' yôdzôlió ni.

Gáquië' bica' ba bônni' na' runë' le naca dxi'a.

³ Lu yu'u lidxë' gata' yôl-la' tsahui',

ate' idiá'tica'sô le naca tsahui' runë'.

⁴ Gulén bení' ga ridë' bônni' tsahui' ga na' naca chul-la.

Ruzá' ládxë'ë que luzë'ë, en ruí'i ládxë'ë lë', en runë' le naca dxi'a.

⁵ Gaca dxi'a queë' bônni' ruzá' ládxë'ë que luzë'ë,

en rnnë' que tu chí'isô le riyadzaj que.

Urúajë' dxi'a cate' nu uchi'a usörö queë'.

⁶ Catu caz gaca nu utsá' bônni' na',

ate' sóatica'sô nu tsójné lë'.

⁷ Bití' gádxinë' cate' nu usiyóni lë' le cabí raca dxi'a.

Ridipa ládxë'ë tu' ruzxóni ládxë'ë Xanru' Dios.

⁸ Dios rutipë' ládxë'ë, ate' bití' gádxinë'

cate' idxinrö dza ilé'enē' nuhuötjagaca nupa ta'díl-lalen lē'.

⁹ Idú ládxē'ē runōdzjē' quégaca bōnachi yechi'.

Idía'tica'sō le naca dxi'a runē'.

Dios uchisé' lē' ga tsépisē'.

¹⁰ Ila'lé'e lē ni nupa tuá' dō', en ila'bō' bagu'isō.

Ilagu zxe láyi'gaca, en ila'niti cuínguequi.

Tsaz initi le ta zē ládxi'gaca nupa tuá' dō'.

113

¹ ¡Guli'cu'ē yōl-la' ba Xanru'!

¡Guli'cu'ē yōl-la' ba, libí'ili' huen dxin queē' Xanru'!

¡Guli'cu'ú yōl-la' ba Lē' Xanru'!

² ¡Cú'uru' yōl-la' ba Lē' Xanru',

cate' risí lo na'a, en yugu' iz si' zaca!

³ ¡Ga naguela' ga rilén gubidza ga ridxintē ga ribía,

cú'uru' yōl-la' ba Lē' Xanru'!

⁴ ¡Nayēpisētērē' Xanru' Dios ca yúgu'tē yōdzō izá'a!

¡Nazxōntērō yōl-la' zxōn queē' ca naca lúzxiba!

⁵ ¿Nuzxi caz zoa naca ca náquiē' Xanru' Dios?

Rō'ē rinná bē'ē ga na' nayēpisētērē'.

⁶ Ruzōtaj cuinē' para uyuē'

le dē lúzxiba, en le dē luyú ni.

⁷ Ruchisé' nupa náacagaca yechi', rubéajē' léguequi lu bēchtō yu.

Ruchisé' nupa ta'yadzaj, rubéajē' léguequi lu dō bēbu.

⁸ Runē' ga ta'bō'len nupa ta'nná bē'.

Ta'bō'len nupa ta'nná bē'e bōnachi queē'.

⁹ Runē' ga zóanu nígula huōdx yu'u lúdxinu.

Rudzeja ládxi'nu tu' runē' ga nacuá'abi' zxi'ininu.

¡Guli'cu'ē yōl-la' ba Xanru'!

114

¹ Cate' bila'rúaj bōnachi Israel luyú Egipto

bila'rúajē' zxi'ini xi'sóē' Judá ladaj nupa tu'í didza' izá'a.

² Zxi'ini xi'sóē' Judá guláquiē' ca lidxē' Xanru' Dios,

ate' gulaca bōnachi Israel nupa rinná bē'enē' Dios.

³ Lahuē' Dios bubiga' nísado',

ate' bubí'i nisa yegu Jordán.

⁴ Gula'xiti' guí'a zxōn ca yugu' bō'cu' zxila' biguiú',

ate' gula'xiti' ca' guí'ado' ca yugu' bō'cu' zxila'do'.

⁵ ¿Bi raca quiu', nísado', tu' rubigu'?

¿Bi raca quiu', yegu Jordán, tu' rubí'i nisa quiu'?

⁶ ¿Bi raca queéli', guí'a zxōn, tu' rixítí'li' ca yugu' bō'cu' zxila' biguiú'?

¿Bi raca queéli', guí'ado', tu' rixítí'li' ca yugu' bō'cu' zxila'do'?

⁷ Guzxizi lahuē' Xanru', yōdzōlió.

Guxizi lahuē' Dios queē' Jacob.

⁸ Benē' Dios ga gulaj nisa tu lē'e guiōjto'o,

en benē' ga bōáca le guca guiōj jara tu ga rilén nisa.

115

¹ Calēga queētu', Xan, calēga queētu',

pero que lo' gaca yōl-la' ba

tu' nacu' dxi'í ladxi', en le naca idútē li.

² ¿Bizx que ta'nná bōnachi yugu' yōdzō izá'a:

“Gazxi caz zoē' Dios quégaquiē'”?

³ Zoē' Dios queēru' yehua' yubá.

Runē' le raza ládxē'ē gunē'.

⁴ Néquiquequini plata, en oro budó' quégaca bōnachi izá'a na',

yugu' le núngaca lu ni'a lu na' bōnachi.

⁵ Nacuá' ru'iguequi, pero biti' gaca iluf'i didza'.

Nacuá' guiøj lógaca, pero biti' gaca ila'l'é'e.

⁶ Nacuá' náagaca, pero biti' gaca ila'yöni.

Nacuá' xziniguequi, pero biti' gaca ila'l'é'e.

⁷ Nacuá' ná'agaca, pero biti' bi gaca ila'gán.

Nacuá' ní'agaca, pero biti' gaca ila'zá'.

Biti' gaca ilün bö lubá'agaca.

⁸ Nupa tun budó' guiøj budó' yaga ilaca ca náagaca budó' na',

núti'tës nu ruzxöni ladxi' budó' guiøj budó' yaga.

⁹ Libí'ili', bönachi Israel, buli'zxöni ládxë'ë Xanru' Dios.

Rácalen cazë' libí'ili', en rapa chi'ë libí'ili'.

¹⁰ Libí'ili', xzi'ini xi'söë Aarón, buli'zxöni ládxë'ë Xanru' Dios.

Rácalen cazë' libí'ili', en rapa chi'ë libí'ili'.

¹¹ Libí'ili' na' rádxili'-në' Dios, buli'zxöni ládxë'ë Xanru' Dios.

Rácalen cazë' libí'ili', en rapa chi'ë libí'ili'.

¹² Xanru' Dios ru'í' ládxë'ë rë'u, en gunë' ga gaca dxi'a queëru'.

Gunë' ga gaca dxi'a quégaca bönachi Israel.

Gunë' ga gaca dxi'a quégaca xzi'ini xi'söë Aarón.

¹³ Gunë' ga gaca dxi'a quégaca nupa tadxí Lë',

nupa na' náagaca cá'asö, en nupa na' nayépisëgaca.

¹⁴ Gunë' Xanru' Dios ga tsan le nequi queëli',

lë na' nequi queëli', en le nequi quégaca xzi'inili'.

¹⁵ Raca ládx'a' gunë' Xanru' ga gaca dxi'a queëli'.

Náquië' Nu ben lúzxiba, en luyú ni.

¹⁶ Nequi queë' Xanru' Dios lúzxiba xitsá',

pero nudödë' lu ná'agaca bönachi luyú ni.

¹⁷ Nupa chinátigaca biti' gaca ila'gú'u Xanru' yöl-la' ba,

en calëga nupa nacua' dxisö lataj chul-la que yöl-la' guti.

¹⁸ ¡Cú'uru' yöl-la' ba Xanru' Dios

na'a dza, en yúgu'të dza si' zaca!

¡Guli'cu'ë Xanru' yöl-la' ba!

116

¹ Nadxí'ida'-në' Xanru' Dios, tu' riyönnë'

le rulidza' Lë', en le rinábida'-në'.

² Ruzë' naguë' chi'a.

Que lë ni na' ulidza' Lë' tsanni ni zoa' nabana'.

³ Guzóa bönadxi quia' gátia',

en guyu'a tsöbi que lataj chul-la que yöl-la' guti,

ate' gusëbi ládx'a'a, en buí'inide'eda' ládx'a'a.

⁴ Ní'irö bulidza'-në' Xanru' Dios, gunnía':

"Ráta'yua' lo', Xan, usöló' neda'."

⁵ Xanru' Dios ruzá' ládxë'ë queëru', en náquië' tsahui'.

Dios queëru' ru'í' ládxë'ë rë'u.

⁶ Rapa chi'ë Xanru' nupa náagaca do' ladxi'.

Bulu'xicja bönachi neda', ate' busölë' neda'.

⁷ Buzí' ladxi' bö' naca caza',

tu' runë' Xanru' Dios ga raca dxi'a quia'.

⁸ Busöló' bö' naca caza', Xan, lu yöl-la' guti.

Benu' ga buí' nisa ribödxi guiøj lahua',

en ga bítirö cuílagaca ni'a.

⁹ Ta'a lahuë' Xanru' Dios

ga nacua' nupa nabángaca.

¹⁰ Guyéajlë'a Lë' cate' gunnía':

"Zoa le rusaca' neda' zi'."

¹¹ Lu yöl-la' rö' böniga quia' gunnía':

"Ta'zi' yë' yúgu'të bönachi."

¹² ¿Bizxi caz gu'a-nē' Xanru' Dios
ni'a que yugu' le runē' le ruzi'a xibé?
¹³ Si' lu na'a yöl-la' rusölá queē' Xanru',
en ulidza'-nē' Xanru' Dios.

¹⁴ Ünödza' queē' Xanru' le guzxi' lu na'a ünödza'.
Raca ládxa'a gaca guna' caní lógaca yúgu'tē bönachi queē'.

¹⁵ Rúndē'ē Xanru' bal
yöl-la' guti quégaca nupa néquiquequi quez queē'.

¹⁶ Le nácatē naca' huen dxin quiu', Xan.
Naca' huen dxin quiu', enca' zxi'ininu nigula huen dxin quiu'.
Busedxu' le biröli neda'.

¹⁷ Cu'a lo' le ünödza' quiu', en guía' Li': "Xclenu",
en ulidza' Li', Xan.

¹⁸ Ünödza' queē' Xanru' le guzxi' lu na'a ünödza'.
Raca ládxa'a gaca guna' caní lógaca yúgu'tē bönachi queē'.

¹⁹ Ga zoa lö'a que yu'u lidxē' Xanru',
lu yödzo Jerusalén guna' caní.

¡Guli'cu'ē yöl-la' ba Xanru' Dios!

117

¹ ¡Guli'cu'ē yöl-la' ba Xanru' Dios, libí'ili', bönachi yúgu'tē yödzo ízá'a!

¡Guli'cu'ē yöl-la' ba yúgu'tēli',
² tu' buxönē' queēru' yöl-la' dxi'i ladxi' queē',
en zóatica'sö le naca idú ladxi' queē'!

¡Yöl-la' ba Lē'!

118

¹ ¡Guli'guíē' Xanru': "Xclenu", tu' náquiē' dxi'a!
¡Zóatica'sö yöl-la' dxi'i ladxi' queē'!

² Ral-la' ila'nná bönachi Israel:
"¡Zóatica'sö yöl-la' dxi'i ladxi' queē'!"

³ Ral-la' ila'nná zxi'ini xi'sóē' Aarón:
"¡Zóatica'sö yöl-la' dxi'i ladxi' queē'!"

⁴ Ral-la' ila'nná nupa tadxi Xanru' Dios:
"¡Zóatica'sö yöl-la' dxi'i ladxi' queē'!"

⁵ Cate' gudí' le guzáca'a bulidza'-nē' Xanru',
ate' bubi'ē didza', en busölē' neda'.

⁶ Zoē' Xanru' cuita' neda', ate' biti' bi gádxida'.

¿Bizxi caz gaca ilún bönachi quia'?

⁷ Zoē' Xanru' cuita' neda' ladaj nupa tácalen neda'.
Que lē' ni na' idéli'da' láhuigaca nupa biti' ta'lé'e neda' dxi'a.

⁸ Nácarö dxi'a uzxöni ládxa'a-nē' Xanru',
en biti' uzxöni ládxa'a nu naca bönáchisö.

⁹ Nácarö dxi'a uzxöni ládxa'a-nē' Xanru',
en biti' uzxöni ládxa'a nupa ta'nná bē'.

¹⁰ Bönachi yúgu'tē yödzo ízá'a gula'gú'u neda' lē'ajlō.
Len yöl-la' huáca queē' Xanru' buxicja' léguequi.

¹¹ Gula'gu'ē neda' lē'ajlō. Ön, gula'gu'ē neda' lē'ajlō,
pero len yöl-la' huáca queē' Xanru' buxicja' léguequi.

¹² Gula'gu'ē neda' lē'ajlō ca yugu' buzú' rön,
pero gula'nítiē' ca tu lu guí' guixi' yötsi' bidx.
Len yöl-la' huáca queē' Xanru' buxicja' léguequi.

¹³ Bulu'dxíguë'ë neda' ga bidxintë guzóa tsöjtsö'a,
pero gúcalenë' Xanru' neda'.

¹⁴ Naca cazë' Xanru' yöl-la' huáca quia', en le rul-la'.
Naca cazë' yöl-la' rusölá quia'.

¹⁵ Lu yu'u lidxigaca nupa nácgaca tsahui'
ru'u bô que nupa ta'bôdxi'a lu yöl-la' rudzeja quéguequi tu' nulágaca.

jRunda' dxin në'ë ibëla Xanru'!
¹⁶ jNayëpisëtërö në'ë ibëla Xanru'!
jRunda' dxin në'ë ibëla Xanru'!

¹⁷ Biti' ca' gátia', pero soa' ibana',
ate' usiyönda' bönachi le nunë' Xanru'.

¹⁸ Xanru' bëndë'ë neda' xiguaia',
pero biti' budödë' neda' lu yöl-la' guti.

¹⁹ Guli'salaj quia' ga ta'yazë' bönni' tsahui'.

Tsu'a ni', en guía'-në' Xanru': "Xclenu'."

²⁰ Naca lataj ni ga riyaza cazë' Xanru' Dios.
Ila'yazë' ni bönni' tsahui'.

²¹ jGuía' Li': "Xclenu'" Xan, tu' bubi'u didza' quia',
en tu' nacu' Nu rusölá neda'!

²² Zoa tu guiöj bulu'zöë' tsölá'alö bönni' tu'cu'ë zö'ö.
Na'a naca guiöj na' guiöj len squin zö'ö.

²³ Benë' Xanru' Dios ga naca caní.
Naca tu le run ga rubániru'.

²⁴ Dza ni naca dza nunë' Xanru' Dios.
Udzéjaru', en uzí'iru' xibé.

²⁵ Ráta'yutu' lo', Xan, usöló' netu'.
Ráta'yutu' lo', Xan, gunu' ga gaca dxi'a queëtu'.

²⁶ Bica' ba bönni' na' zë'ë uláz queë' Xanru'.
Guntu' Li' zxön lu yu'u lidxë' Xanru'.

²⁷ Dios náquië' Xanru', ate' bennë' queëru' bení'.
Buli'nödzej queë' Dios yugu' bëdxi renni' uzégui'ru'-ba' lahuë' lu bucugu queë'.

²⁸ Naca cazu' Li' Dios quia', ate guía' Li': "Xclenu'."
Naca cazu' Li' Dios quia', ate' guna' Li' zxön.

²⁹ jGuli'-guië' Xanru' Dios: "Xclenu'" tu' náquië' dxi'a!
jZóatica'sö yöl-la' dxi'i ladxí' queë'!

119

Le run le gunná bé'enë' Xanru' rë'u

¹ jBica' ba nupa nácgaca idú dxi'a tsáhui'do',
nupa na' tun ca rnna xibá naguixjë' Xanru'!

² jBica' ba nupa tun ca nácgaca le benë' ba nalí,
en idú ládxi' gaca ta'zë ladxí' Lë'!

³ Biti' bi le cabí naca tsahui' tun,
pero tun ca nácgaca le nulu'ë lahui.

⁴ Nuzú' queëtu' xibá quiu', Xan,
para idú ládxi'tu' guntu' ca ta'nná.

⁵ Raca ládxa'a gúntica'sa' ca ral-la' guna',
en guna' yugu' le gunná bë'u.

⁶ Ní'irö bití' ca' utu'ida'
channö gapa chí'a yugu' le gunná bë'u.

⁷ Lu yöl-la' ba'a ladxí' quia' guía' Li': "Xclenu'"
cate' chinazi'a le buchí'a busöröu' le naca tsahui'.

⁸ Guna' ca ta'nná le gunná bē'u.
Biti' usán no'o neda' tsaz.

Ral-la' gunru' ca gunnē' Dios

⁹ ¿Nacxi gaca gunbi' tu bi'i bōnni' ga ugá'ana tsahui' lādxi'do'obi'?

Ral-la' gunbi' ca rnna xtídz'u.

¹⁰ Idú lādxa'a rizé lādxa'a Li', Xan.

Biti' gu'u lataj ucá'ana' yugu' le gunná bē'u.

¹¹ Lu ícja lādxi'da'ahua' runa' ca rnna xtídz'u,

para cabí guna' dul-la' lo' Li'.

¹² ¡Bica' xibó', Xan!

Busedi neda' yugu' le gunná bē'u.

¹³ Len ruá' cuina' ru'a didza'

ca nácacaga yúgu'tē le rusedi quézinu' netu'.

¹⁴ Rudzējada' ca nácacaga le nunu' ba nalí

ca nu rudzeja tu' dē yōl-la' tsahui' que.

¹⁵ Sa' lādxa'a ca nácacaga xibá quiu'

en gūi' lādxa'a yugu' le nulú'u lahui.

¹⁶ Udzējada' ca nácacaga le gunná bē'u.

Biti' gal-la lādxa'a xtídz'u.

Rudzējade'eru' runru' le rnna cazē' Dios

¹⁷ Ben ga gaca dxi'a quia' neda', huen dxin quiu', Xan,

para soa' ibana', en guna' ca rnna xtídz'u.

¹⁸ Gusalaj guiōj lahua' para gaca ilé'eda'

le tun ga rubánitu' nazúajgaca lu xibá naguixju' Li'.

¹⁹ Zoa' yōdzōlió ca tu bōnni' ridasō.

Biti' ucachu'u yugu' xibá nunu' ga bití' gaca ilé'eda' léguequi.

²⁰ Yúgu'tē dza ruhui'ini lādxa'a tu' rizé lādxa'a

yugu' le nusédinu' netu' ca ral-la' guntu'.

²¹ Ruzenu' le bach nupa tun ba zxōn cuínguequi, en nupa nudxiagaca dō',

nupa na' tu'zóa tsōlá'ālō yugu' xibá gunná bē'u.

²² Biti' gu'u lataj nu guequi neda' zi' o nu ucá'ana neda' cá'asō,

tu' runa' ca ta'nná le nunu' ba nalí.

²³ Sal-la' ta'bō' nupa ta'nná bē', en ta'nnē quia',

rizá' lādxa'a neda', huen dxin quiu', ca nácacaga le gunná bē'u.

²⁴ Raza lādxa'a yugu' le nunu' ba nalí.

Nácacaga le tu'zéajni'i neda'.

Idú lādxi'ru' gunru' ca gunná cazē' Dios

²⁵ Nadinni lu yu bō' naca caza'.

Busubán lādxa'a, ugunu' dxin xtídz'u.

²⁶ Buluí'ida' Li' yugu' le nuna', ate' bubi'u didza'.

Busedi neda' yugu' le gunná bē'u.

²⁷ Buzéajni'i neda' ca nácacaga xibá quiu',

ate' sa' lādxa'a ca nácacaga le nunu', le tun ga rubánitu'.

²⁸ Ribōdxi bō' naca caza' tu' risēbida' lādxa'a.

Butipa lādxa'a, ugunu' dxin xtídz'u.

²⁹ Ben ga bití' guna' le cabí sa'yéaj,

en buzá' lādxi' quia' xibá naguixju' Li'.

³⁰ Gurōa' le naca idútē li para guna' ca rnna.

Nuzóa' lahua' yugu' le nusédinu' netu'.

³¹ Nazí' lu na'a yugu' le nunu' liná' lo.

Biti' gu'u lataj bí gun ga utuí'ida', Xan.

³² Guna' ca ta'nná xibá gunná bē'u,

tu' rutipa cazu' lādxa'a.

Rē'éniru' tséajni'iru' xtídzē' Dios

³³ Busedi neda', Xan, ca ta'nná le gunná bē'u,

ate' gun chí'a léguequi ga idxinrō dza udxí.

³⁴ Benna quia' yōl-la' réajni'i para gun chí'a xibá quiu',

en para idú lādxa'a guna' ca ta'nná.

³⁵ Ben ga guna' ca ta'nná le gunná bē'u,

tu' raza lādxa'a guna' ca ta'nná xibá na'.

36 Ben ga güi'i ládxa'a yugu' le nunu' ba nalí,
para cabí güi'i ládxa'a yöl-la' ruhuidi'.
37 Buchi'a guiöj lahua' para cabí uyúa' le cabí nazaca'.
Butipa ládxa'a para guna' le uluí'inu' netu'.
38 Ben tsutsu didza' bë'lenu' neda', huen dxin quiu',
para gádxida' Li'.
39 Bucuíta ga zoa' nu rudidza' yudxi neda', lë na' rádxida'
tu' nácgaca dxi'a tsahui' le nusédinu' netu' ca guntu'.
40 Buyútsöca', rizë ládxa'a yugu' xibá quiu'.
Busubán ládxa'a, ugunu' dxin le tsahui' quiu'.

Ruzxöni ládxi'ru' xtídzë'ë Dios

41 Lu yöl-la' dxi'i ládxi' quiu' buyú neda', Xan,
en busölá neda' ca rnna xtídzu'u gunu'.
42 Ubi'a didza' bi guía' nu run ga rutuí'ida', innía':
"Ruzxöni ládxa'a xtídzu'u", Xan.
43 Biti' ucuítu' tsaz didza' idútë li lu ru'a
tu' runa' löza yugu' le nusédinu' netu'.
44 Gúntica'sa' ca ta'nná xibá naguixju' Li'
yúgu'të dza, en yúgu'të iz si' zaca.
45 Lu yöl-la' rusölá quiu' soa' ibana'
tu' bë' ládxa'a guna' ca ta'nná bë' xibá quiu'.
46 Gu'a didza' que le nunu' ba nalí lógaquië' bönni' ta'nná bë'ë
en biti' ca' utuí'ida'.
47 Tsaza ládxa'a yugu' xibá gunná bë'u,
yugu' lë na' nadxí'ida'.
48 Guna' ca' ca ta'nná xibá nunu', lë na' së ládxa'a,
en sa' ládxa'a ca nácgaca le gunná bë'u.

Zóatica'sö xtídzë'ë Dios

49 Yöjné didza' na' bë'lenu' neda', huen dxin quiu',
tu' benu' ga runa' löza le.
50 Didza' na' ruhuë tsahui' neda' cate' riguí'i rizáca'a,
tu' tu'subán ládxa'a didza' bë'u.
51 Tu'títjalë'e neda' nupa tun ba zxön cuínguequi,
pero biti' ca' usana' xibá naguixju' Li'.
52 Röjneda' yugu' le busédinu' netu' dza ni'te, Xan,
ate' lë na' ruhuë tsahui' neda'.
53 Lu yöl-la' ridzá'a quia' rö'a böniga ni'a quégaca nupa tuá' dö',
nupa na' tu'cá'ana xibá naguixju' Li'.
54 Rul-la' ca nácgaca le gunná bë'u.
Zoa' ni ca tu bönni' ridé' zi'tu'.
55 Chi'i dzö'ölö röjneda' Lo', Xan,
en run chi'a xibá naguixju' Li'.
56 Nacuá'len neda' le ruzi'a xibé
ate' runa' ca rnna yugu' xibá quiu'.

Raza ládxi'ru' xtídzë'ë Dios

57 Nacu' Li', Xan, le ruzi'a xibé.
Chigunnía' guna' ca rnna xtídzu'u.
58 Idú ládxa'a inábida' Li' sóalenu' neda'.
Buéchi' ládxi' neda' ca rnna xtídzu'u gunu'.
59 Guz' ládxa'a ca nácgaca le runa',
ate' bubí'i ládxa'a para guna' ca rnna le nunu' liná' lo.
60 Bénd'a bayúdx, en biti' gudzed'a
para guna' ca rinná bë' xibá quiu'.
61 Bönachi zían bönachi tuá' dö' gula'gú'u neda' lë'ajlō,
pero biti' gul-la ládxa'a xibá naguixju' Li'.
62 Gulahuéla riyasa', en rigú'a Li' yöl-la' ba
tu' nácgaca tsahui' yugu' le nusédinu' netu'.
63 Runa' tsözxön nupa tadxi Li',
enca' nupa tun ca rnna xibá quiu'.
64 Ridxín idútë yödžöliö yöl-la' dxi'i ládxi' quiu', Xan.

Busedi neda' yugu' le gunná bē'u.

Naca le saca' le gunná cazē' Dios

⁶⁵ Benu' quia' neda', huen dxin quiu', le naca dxi'a, ca rnna xtídz'u gunu', Xan.

⁶⁶ Busedi neda' yöl-la' réajni' i idú, en yöl-la' raca yenni', tu' réajlē'a yugu' xibá gunná bē'u.

⁶⁷ Zí'alō cate' buzōtju' neda' gudá' nanitia', pero na'a runa' ca rnna xtídz'u.

⁶⁸ Idú dxi'a tsahui' nacu', en runu' le naca dxi'a. Busedi neda' yugu' le gunná bē'u.

⁶⁹ Nupa tun ba zxōn cuínguequi ta'zì' yē' ca naca quia', pero idú ládxa'a guna' ca rnna xibá quiu'.

⁷⁰ Chul-la niti naca icja ládxi'do'guequi, pero raza ládxa'a neda' xibá naguixju' Lì'.

⁷¹ Naca dxi'a buzōtju' neda' para bizédida' yugu' le gunná bē'u.

⁷² Nácagacarō dxi'a quia' xibá rinná bē'u ca nácagaca gayuá' gayuá'sō dumí oro, en plata.

Naca tsahui' le gunná cazē' Dios

⁷³ Len no'o benu' neda', en buzú' neda'.

Buzéajni' i neda' para gúnbē'a xibá gunná bē'u.

⁷⁴ Nupa tadxi Lì' ila'lē'e neda', en ulu'dzeja ládxi'guequi, tu' runa' löza xtídz'u.

⁷⁵ Nözda' naca tsahui' ca ruchi'a rusörōu' quia' neda', Xan, ate' lu yöl-la' li ladxi' quiu' busaca' zì'u neda'.

⁷⁶ Na'a, lu yöl-la' dxi'i ladxi' quiu' buē tsahui' neda', ca rnna didza' chibē'lenu' neda', huen dxin quiu'.

⁷⁷ Gudá duhuechi' ládxu'u neda' para soa' ibana', tu' raza ládxa'a xibá naguixju' Lì'.

⁷⁸ Ben ga ulu'tuí' i nupa tun ba zxōn cuínguequi, tu' gula'nnē quia', en biti' bi bena' quéguequi, pero neda' sa' ládxa'a ca naca xibá quiu'.

⁷⁹ Ral-la' udxín quia' nupa tadxi Lì', nupa na' núnbē'gaca le nunu' ba nalí.

⁸⁰ Ben ga udxín ca rnna le gunná bē'u, para cabí utuí'ida'.

Runē' Dios ca rnna xtídzē'ē

⁸¹ Rudú ládxa'a tu' ribōza' yöl-la' rusölá quiu', pero runa' löza xtídz'u.

⁸² Chirequi ichul-la lahua' tu' rizēda' ládxa'a xtídz'u, rnñía: "¿Bátaxi huē tsau'u neda'?"

⁸³ Caní raca tu' naxú'unida' ca tu buzudi guídi nal-la' lahui guí', pero catu caz gal-la ládxa'a yugu' le gunná bē'u.

⁸⁴ ¿Bál-laxi dza soa' ibana' neda', huen dxin quiu'? ¿Bátaxi usiúdxu' nupa ta'bía no neda'?

⁸⁵ Nupa tun ba zxōn cuínguequi gula'chō'ōna tu yeru ga tsōjbixa', nupa na' biti' tun ca rnna xibá naguixju' Lì'.

⁸⁶ Idútē li nácagaca yúgu'tē xibá gunná bē'u. Lu yöl-la' rizi' yē' quéguequi ta'bía no neda'.

jGúcalen neda'!

⁸⁷ Gula'zóa ulu'sunítiē' neda' lu yōdzölió ni, pero biti' busán na'a xibá quiu'.

⁸⁸ Lu yöl-la' dxi'i ladxi' quiu' busubán ládxa'a, para gapa chí'a le nunu' ba nalí len ruá' cuinu'.

Réajlē'ēru' xtídzē'ē Xanru'

⁸⁹ Rulidza' Lì', Xan.

Tsaz naguixju' xtídz'u yehua' yubá.

⁹⁰ Gunu' ca rnna xtídz'u quégaca bōnachi na'a dza, en yúgu'tē dza si' zaca. Gudixaj cazu' yōdzölió, ate' idía'tica'sō.

⁹¹ Ní'a que le gunná bē'u nacuá' caz yúgu'tē ga ridxintē na'a dza,

tu' tun xichinu' yúgu'tè lè na'.

⁹² La'tu' cabí raza ládxa'a xibá naguixju' Li',
chigunítia' lu le busaca' zi' neda'.

⁹³ Catu caz gal-la ládxa'a yugu' xibá quiu',
tu' busubanu' ládxa'a ni'a quéguequi.

⁹⁴ Néquida' quiu'.

¡Busölá neda', tu' ruf'i ládxa'a xibá quiu'!

⁹⁵ Nupa tuá' dö' ta'bö' nisi neda' para ulu'suniti neda',
pero neda' güi' ládxa'a le nunu' ba nalí.

⁹⁶ Chibilé'eda' ruúdxí que yúgu'tè le naca idútè yödzölió ni,
pero catu caz udxí que le gunná bē'u guntu'.

Nadxi'iru' xtídzē'ē Xanru'

⁹⁷ Nadxi'ide'eda' xibá naguixju' Li'.

Idú dza rizá' ládxa'a ca naca que.

⁹⁸ Réajni'iröda' ca nupa ta'dá'baga' neda'

tu' ruf'i ládxa'a yugu' le gunná bē'u, en tu' dá'tica'sa' léguequi.

⁹⁹ Réquibe'eröda' ca yúgu'tè nupa tu'sedi neda',

tu' rizá' ládxa'a le nunu' ba nalí.

¹⁰⁰ Réajni'iröda' ca yugu' bönni' gula,

tu' rapa chí'a xibá quiu'.

¹⁰¹ Gudapa chí'i cuína' para cabí guna' le cabí naca tsahui',

en para guna' ca rnna xtídz'u.

¹⁰² Biti' ca' nucá'ana' yugu' le nusédinu' netu',

le nusedi quézinu' neda'.

¹⁰³ Bica' zxixi nácagaca xtídz'u.

Ön, nácagacarö zxixi ca le zxixi que buz.

¹⁰⁴ Tu'zéajni'i xibá quiu' neda'.

Que lè ni na' réquida' zi' yúgu'tè le cabí naca.

Xtídzē'ē Dios ruzení' lu icja ládrido'oru'

¹⁰⁵ Ca tu bení' naca xtídz'u ga ridá',

en le ruzení' nöza ga ral-la' töda'.

¹⁰⁶ Guzxí' lu na'a bí guna', en nuna' tsutsu xtídz'a'a.

Gapa chí'a le nusédinu' netu' le naca tsahui'.

¹⁰⁷ Zoa le rusaca' zi' neda'.

Busubán ládxa'a, Xan, ugunu' dxin xtídz'u.

¹⁰⁸ Guzxí' yöl-la' ba rigu'a Li' len ru'a, Xan,

en buzéajni'i neda' yugu' le nusédinu' netu'.

¹⁰⁹ Zóatica'sö bönadxi gátia',

pero bití' ral-la ládxa'a xibá naguixju' Li'.

¹¹⁰ Nupa tuá' dö' bulu'zè tu du yalaj le sön neda',

pero bití' bucá'ana' xibá quiu'.

¹¹¹ Tsaz nazi' lu na'a le nunu' ba nalí,

ate' run ga rudzeja ládxa'a.

¹¹² Ruf'i ládxa'a gúntica'sa' ca ta'nná le gunná bē'u.

Guna' caní ga idxintè dza udxí.

Nagá'anaru' dxi'a ni'a que xtídzē'ē Dios

¹¹³ Réquida' zi' nupa nácagaca chopa ladxi',

pero nadxi'ida' xibá naguixju' Li'.

¹¹⁴ Nacu' ca tu ga rucachi' cuína', en le run chí'i neda'.

Runa' löza xtídz'u.

¹¹⁵ Guli'cuíta ga zoa', libí'ili' ruá'ali' dö',

tu' guna' ca ta'nná le gunná bē'ē Xana' Dios.

¹¹⁶ Buzóa neda' tsutsu, ugunu' dxin xtídz'u, ate' soa' ibana'.

Biti' gu'u lataj utuí'ida' ca naca le runa' löza.

¹¹⁷ Buzóa neda' tsutsu, ate' ulá',

en güi'itica'sa' ládxa'a le gunná bē'u.

¹¹⁸ Nusán no'o yúgu'tè nupa nusángaca le gunná bē'u,

tu' naca yöl-la' sina' quéguequi le cabí nazaca'.

¹¹⁹ Ugú' nupa tuá' dö' luyú ni ca nu rugúa bēbu.

Que lè ni na' nadxi'ida' le nunu' ba nalí.

120 Rizzixi idútē le nayá' nabana' tu' rádxida' Li',
en rádxida' le gaca cate' usiúdxu' bōnachi.

Ral-la' gunru' ca rnna xtídžē Dios

121 Bena' le naca tsahui', en le naca li.

Biti' usán no'o neda' lu ná'agaca nupa tu'saca' zi' neda'.

122 Nacu' quia' neda', huen dxin quiu', le naca bē' gaca dxi'a quia'.

Biti' gu'u lataj ulu'saca' zi' neda' nupa tun ba zxon cúnguequi.

123 Richí guiōj lahua' tu' ribōza' yōl-la' rusōlá quiu',

enca' didza' tsahui' quiu'.

124 Lu yōl-la' dxi'i ladxí' quiu' ben quia' neda', huen dxin quiu',

ca rē'ēni quézinu' gunu'.

Busedi neda' yugu' le gunná bē'u.

125 Naca' huen dxin quiu'.

Benna quia' yōl-la' réajni'i para gaca gúnbē'a le nunu' ba nalí.

126 Chibidxín dza bi gunu', Xan,

tu' gula'guitsjē' xibá naguixju' Li'.

127 Que lē ni na' nadxí'rōda' xibá naguixju' Li' ca nadxí'ida' oro.

ǰŌn, ca oro banéquini,

128 en réquida' nácagacarō dxi'a xibá quiu' ca yúgu'tē le dē!

Biti' rilé'eda' dxi'a yúgu'tē le cabí naca.

Raca ladxí'ru' gunru' ca rnna xtídžē Dios

129 Run ga rubánida' le nunu' ba nalí.

Que lē ni na' bō' naca caza' nazí' lu nē'e le.

130 Cate' nalá' lahui xtídzu'u, ruzení' queētu'.

Run ga ta'yéajni'i nupa nácagaca nōxaj ladxí'.

131 Gusalja' ru'a, en gunné ládxa'a,

tu' guzē ládxa'a xibá gunná bē'u.

132 Buyú neda', en buzá' ladxí' quia',

ca run cazu' quégaca nupa ta'dxí'i Li'.

133 Buzóa neda' tsutsu para guna' ca rnna xtídzu'u.

Biti' gu'u lataj le naca xihui' inná be'e neda'.

134 Buá'u neda' lu na' nu rusaca' zi' neda',

para gaca guna' ca naca xibá quiu'.

135 Ben ga gaca bē' nazí' lu no'o neda', huen dxin quiu',

en busedi neda' yugu' le gunná bē'u.

136 Raca nisa ribōdxi guiōj lahua' ca tu yegu gubó'o,

tu' cabí tun bōnachi ca rinná bē' xibá quiu'.

Idutē li naca le rnna cazē Xanru'

137 Nacu' Li' tsahui', Xan.

Dxi'a tsahui' naca le ruchí'a rusōrōu' quegtu'.

138 Nugú'u lu na'tu' le nunu' ba nalí.

Naca tsahui', en tsaz zoa.

139 Tu' ribōza' le naca quiu' run ga régui rilá ladxí'da'ahua',

ate' gulal-la ladxí' xtídzu'u nupa ta'dá'baga' neda'.

140 Idú dxi'a tsahui' naca xtídzu'u.

Que lē ni na' neda', huen dxin quiu', nadxí'ida' le.

141 Nōxaj ladxí' naca', ate' tu'cá'ana bōnachi neda' cá'asō,

pero bití' ral-la ládxa'a le gunná bē'u.

142 Zóatica'sō le naca tsahui' quiu',

en idutē li naca xibá naguixju' Li'.

143 Ba bidxín le raca quia', en le rusaca' zi' neda',

pero raza ládxa'a xibá gunná bē'u.

144 Nácatica'sō tsahui' le nunu' ba nalí.

Buzéajni'i neda' para soa' ibana'.

Ral-la' ulaba ladxí'ru' le gunná cazē Dios

145 Idú ládxa'a rulidza' Li'.

Bubí'i didza', Xan, ate' guna' ca naca le gunná bē'u.

146 Rulídatica'sa' Li'.

Busōlá neda', ate' guna' ca naca le nunu' ba nalí.

147 Riyasa' zí'alō ca ritó yu zila, en rulidza' Li' para gácalenu' neda'.

Riböza' yugu' didza' gu'u.

¹⁴⁸ Chi'i dzö'ölö rubéaja' yëla guiöj lahua',
para ulaba ládxa'a ca naca xtídz'u.

¹⁴⁹ Lu yöl-la' dxi'i ladxi' quiu' buzë nagu' chi'a.

Busubán ládxa'a, Xan, ca naca le nusédinu' netu'.

¹⁵⁰ Ta'biga' nupa tuá' dö' ga zoa' para ila'bía no neda'.

Nucá'anagaca xibá naguixju' Li'.

¹⁵¹ Zu' gala' ga zoa', Xan,

ate' idútë li naca le gunná bë'u.

¹⁵² Dza ni'te quez núnbë'a le nunu' ba nalí,

en nözda' tsaz nuzú' le.

Le gunná cazë' Dios run rë'u tsahui'

¹⁵³ Buyú le rusaca' zi' neda', en busölá neda',

tu' cabí ral-la ládxa'a xibá naguixju' Li'.

¹⁵⁴ Bubí'i didza' uláz quia', en buá'u neda'.

Busubán ládxa'a ca naca xtídz'u.

¹⁵⁵ Zi'tu' zoa yöl-la' rusölá ga nacua' nupa tuá' dö',

tu' cabí tuí'i ládxi'gaca le gunná bë'u.

¹⁵⁶ Zxöntërö naca yöl-la' ruhuéchi' ladxi' quiu', Xan.

Busubán ládxa'a ca naca le nusédinu' netu'.

¹⁵⁷ Zíángaca nupa ta'bía no neda', en ta'dá'baga' neda',

pero bití' nucá'ana' le nunu' ba nalí.

¹⁵⁸ Bití' rilé'eda' dxi'a nupa nucá'anagaca Li',

en bití' tun ca rnna xtídz'u.

¹⁵⁹ Buyú ca nadxí'ida' xibá quiu', Xan.

Lu yöl-la' dxi'i ladxi' quiu' busubán ládxa'a.

¹⁶⁰ Idútë li nácgaca yúgu'të xtídz'u,

en tsaz nacua' yúgu'të le nusédinu' netu' le nácgaca tsahui'.

Ral-la' udödi cuínru' lu në'ë Dios

¹⁶¹ Ta'bía no neda' nupa ta'nná bë', en bití' bi bena' quéguequi,

pero runa' bal xtídz'u lu icja ládxi'da'ahua'.

¹⁶² Rudzéjalenda' xtídz'u,

ca rudzeja nu rudzöli tu yöl-la' tsahui' zxön.

¹⁶³ Réquida' zi', en bití' rilé'eda' dxi'a le cabí nácatë,

pero nadxí'ida' xibá naguixju' Li'.

¹⁶⁴ Gadxi luzuí tu dza rigü'a Li' yöl-la' ba,

ni'a que le nusédinu' netu', le naca tsahui'.

¹⁶⁵ Ta'böza dxi'a tsáhu'i'do' nupa nadxí'igaca xibá naguixju' Li',

en bití' bi run ga röjchégu'gaca.

¹⁶⁶ Runa' löza yöl-la' rusölá quiu', Xan,

en runa' ca rnna xibá nunu'.

¹⁶⁷ Yugu' le nunu' ba nalí tun chi'i bö' naca caza',

ate' nadxí'ide'eda' léguequi.

¹⁶⁸ Runa' ca ta'nná xibá quiu', en yugu' le nunu' ba nalí

tu' rilé'e quézinu' yúgu'të le runa'.

Rudzéjalenru' xtídzë'ë Dios

¹⁶⁹ Ruzë nagu' le rulidza' Li', Xan.

Ruzéajni' i neda' ca rnna xtídz'u.

¹⁷⁰ Ruzë nagu' le rinábida' Li',

en busölá neda' ca rnna xtídz'u gunu'.

¹⁷¹ Bë' neda' lataj cu'a Li' yöl-la' ba,

tu' rusédinu' neda' le gunná bë'u.

¹⁷² Bë' lataj gul-la lúdx'a'a ca naca xtídz'u,

tu' nácgaca tsahui' yúgu'të xibá nunu'.

¹⁷³ Guzótë gácalenu' neda',

tu' naböa' xibá quiu'.

¹⁷⁴ Rizë ládxa'a yöl-la' rusölá quiu', Xan,

en raza ládxa'a xibá naguixju' Li'.

¹⁷⁵ Bë' lataj soa ibán bö' naca caza' para cu'a Li' yöl-la' ba,

en ben ga gácalen neda' le nusédinu' netu'.

¹⁷⁶ Ridöda' tsölá'alö ca tuba' bö'cu' zxila' nanítiba'.
Gudá dudilju' neda', huen dxin quiu', tu' cabí ral-la ládxa'a xibá nunu'.

120

¹ Cate' gudí'i guzxáca'a bulidza'-në' Xanru',
ate' Lë' bubi'ë didza'.
² Busölá bö' naca caza', Xan, lu na' nu rizi' yë',
en lu na' nu biti' run ca gunná caz.
³ Bizxi gunë' quiu' Dios, en bizxi ubi'ë quiu', li' na' rizi' yë'u?
⁴ Ichizë' li' yugu' yaga lahui tuchi' que nu reaj gudil-la,
en cu'ë icju' bo' yalaj que ya' yórido'.
⁵ Bica' bayechi' neda' tu' zóasa' yödzö Mesec,
en zoa' tu lu yu'u guídí quégaca bönachi Cedar.
⁶ Xidzélë'ë chiguzóa bö' naca caza'
len nupa tu'suniti yöl-la' riböza dxi'a tsáhui'do'.
⁷ Ré'ënda' cöza' dxi'a tsáhui'do', pero cate' ruá'a didza'
té'ënnë' ila'díl-lalen neda'.

121

¹ Uchisa icja' uyúa' le raca yugu' lu guí'a.
¿Gazxi za' le gácalen neda'?
² Le gácalen neda' za' lu në'ë Xanru'.
Lë' benë' lúzxiba, en luyú.
³ Biti' gu'ë lataj cuilu' ga ridó'.
Biti' ca' gasi Nu na' run chi'i li'.
⁴ Buyútsöca', biti' ridödi yëla guiöj lahuë',
en biti' rásië', Lë' na' rapa chi'ë bönachi Israel.
⁵ Run chi'ë Xanru' Dios li'.
Zoë' Xanru' Dios cuítu' ibëla, rigu'ë li' zxul-la.
⁶ Biti' uzegui' gubidza li' lahui' dza,
en biti' bi gun beo' quiu' chi'i dzö'ölö.
⁷ Gun chi'ë Xanru' Dios li' ga rizó'o, en ga rudxinu',
dza ni zóaru' na'a, en yugu' dza si' zaca.
⁸ Xanru' Dios gun chi'ë li' ga rizó'o, en ga rudxinu',
dza ni zóaru' na'a, en yugu' dza si' zaca.

122

¹ Budzējada' cate' gulë bönachi neda', gula'nná:
"Uyeajru' yu'u lidxë' Xanru' Dios."
² Na'a zuíru' ni
ga nu riyaza yödzö Jerusalén.
³ Dxi'ado' gulunë' yödzö Jerusalén,
ate' naca lachi, en tuz ca röjlözgaca yu'u zxön que.
⁴ Ta'yaza yugu' cö' bönachi queë' Xanru' ga ni
ca na' nusédinë' Dios bönachi Israel,
para ila'gú'u yöl-la' ba Xanru' Dios.
⁵ Ta'bö' nupa tu'chi'a tu'sórö queëru' ga ni,
ga ta'bö' ta'nná bë' zxi'ini xi'sóë' David.
⁶ Guli'nábinë' Dios gunë' ga gaca dxi'a que Jerusalén,
en ga ulu'zi' xibé nupa ta'dxi'i yödzö ni yöl-la' tsahui'.
⁷ Dios gunë' ga ila'böza dxi'a tsáhui'do' nupa nacuá' yödzö ni,
en ga ulu'zi' xibé nupa ta'nná bë' yöl-la' tsahui'.
⁸ Tu' nadxí'ida' yugu' böcha'a, en yugu' böchi' luzá'a,
rnná'a: "Gaca yöl-la' riböza dxi ladxí' lu yödzö ni."
⁹ Tu' nadxí'ida' lidxë' Xanru' Dios,
rinábida'-në' gunë' ga gaca dxi'a que yödzö ni.

123

¹ Uchisa lahua' uyúa' ga zu' Li',
rö'u rinná bë'u yehua' yubá ni'.
² Ca runë' bönni' nadó'o, ruyüë' bi ulu'ë xanë',
ate' ruyubi' bi'i nigula nadó'o bi ulú'unu nigula xanbi',

lësca' caní ruyuru' rë'u bi ulu'ë Xanru' Dios,
ga idxinrö dza uzá' ládxe'ë queëru'.

³ Buzá' ladxi' queëtu', Xan. Buzá' ladxi' queëtu',
tu' nacuá' nupa tu'cá'ana netu' cá'asö.

⁴ Rudú ládxi'tu' tu' titaj netu' nupa tu'zi' xibé yúgu'të le dë,
en tu' tu'cá'ana netu' cá'asö nupa tun ba zxon cuínguequi.

124

¹ “La'tu' cabí gúcalenë' Xanru' rë'u”,
ral-la' ila'nná bönachi Israel:

² “La'tu' cabí gúcalenë' Xanru' rë'u
cate' nupa biti' ta'lé'e rë'u dxi'a gula'díl-lalen rë'u,

³ la' gulútité rë'u
tu' gula'léde'e rë'u.

⁴ Guca queëru' ca la' usubága'të rë'u nisa,
en la' uchícjatëru' lu nisa na'.

⁵ La' uchícjatëru' tu lu nisa zila.”

⁶ ¡Bica' lá'ayi Xanru' Dios
tu' cabí bi'ë lataj nupa biti' ta'lé'e rë'u dxi'a ulu'suniti rë'u!

⁷ Bularu' ca rulaba' biguínido' tu lu le zön lëba'.
Narôza' du yalaj, ate' nuláru'.

⁸ Le rácalen rë'u za' lu në'ë Xanru' Dios.
Lë' benë' lúzxiba, en lu yu.

125

¹ Nupa tu'zxöni ládxi'gaca Xanru' Dios nácagaca ca guí'a Sión,
tu' cabí bi gaca utá guí'a na', pero tsaz zoa caz.

² Ca rō'gaca guí'a idú gásibi'ilō yōdzō Jerusalén,
la' canisō zoë' Xanru' Dios idú gásibi'ilō bönachi queë',
na'a dza, en yúgu'të dza si' zaca.

³ Biti' ral-la' ila'nná bë' nupa tuá' dö' lu xiyúgaca bönachi tsahui',
para cabí iún ga ilu'ë dö' bönni' tsahui' na'.

⁴ Xan, ben ga gaca dxi'a quégaca nupa nácagaca dxi'a,
en quégaca nupa idú ládxi'gaca tun ca rnna xtídz'u.

⁵ Nupa tu'dōdi cuínguequi lu le cabí nácaté,
ben léguequi xiguia' tsōzxon len nupa tuá' dö'.
Ben ga ila'cuá' bönachi Israel dxi'a tsáhui'do'.

126

¹ Cate' Xanru' Dios buchë'ë bönachi yōdzō Sión
nupa gula'dzún zi'tu', gúquiru' yëlasö rineru'.

² Ní'irō idú ládxi'ru' buzxidxiru',
en lu yöl-la' rudzeja queëru' gurōdxi'aru'.
Ní'irō xuluf'i didza' bönachi yugu' yōdzō izá'a, gula'nná:
“Dios, Xángauie', benë' le nácagaca zxon, gúcalenë' légaquie'.”

³ Xanru' Dios benë' le nácagaca zxon, gúcalenë' rë'u,
ate' ruzí'iru' xibë'.

⁴ Buchë' netu', irúajtu' ga ni nadzuntu', Xan,
para gácatu' ca nisa rudxín lu yegu nuhuí'igaca.

⁵ Lu yöl-la' rudzeja ila'bōdxi'a cate' ila'lapa
nupa lu yöl-la' ribōdxi' quéguequi rōjōzagaca.

⁶ Nu bönni' lu yöl-la' ribōdxi' rizë'ë, nu'ë binnedo' rōjōzë',
lu yöl-la' rudzeja cōdxi'ë cate' udxinë', nu'ë le nulapë'.

127

¹ Channō cabí runë' tsutsu Xanru' Dios tu yu'u,
nítisō tunë' dxin bönni' tunë' yu'u na'.

Channō cabí run chi'ë Xanru' Dios tu yōdzō,
nítisō ruyúë' bönni' na' yu'u lu në'ë yōdzō na'.

² Nítisō naca rubanu' zílado', en rōjōxu' cate' chigúl-lada',

en ragu' le guzxi'u ni'a que le busaca' zi' cuinu',
 tu' runnë Xanru' Dios que nu nadxi'inë cate' ni' rasi nu na'.
³ Buli'yú, nácacacabi' xxi'iniru' le runnë Xanru' Dios queëru',
 ate' bí'ido' tu'cuá'anú nígula queëru'
 nácacacabi' le rubi'ë Xanru' Dios queëru'.
⁴ Ca nácacaga yaga lahui' tuchi' lu na' nu bönni' rejë' gudil-la
 nácacacabi' xxi'inë bönni' zoë' iz cuidi' queë'.
⁵ Bica' ba bönni' nacuá'abi' queë' ziantërobi'.
 Biti' ca' utuí'inë cate' ru'ë didza' láhui'gaquië'
 bönni' tu'chi'a tu'söröë' queë', en lógaca nupa ta'díl-lalen lë'.

128

¹ Bica' ba yúgu'të nupa tadxi Xanru' Dios,
 nupa na' tun ca rë'ëni quézinë' Lë'.
² Cate' gagu' le gata' quiu' ni'a que dxin nun cazu',
 uzi'u xibé lë na', en gaca dxi'a quiu'.
³ Gácanu nígula quiu' ca tu lubá uva dxía ga naca lö'a lidxu',
 ate' ilácabi' xxi'inu' ca yugu' yaga olívodo' ta'bö'öbi' ga ni' ráguli'.
⁴ Buli'yútsöca', caní gáquië' bica' ba
 bönni' na' rádxinë' Xanru' Dios.
⁵ Xanru' Dios zoë' Sión gunë' ga gaca dxi'a quiu',
 en gu'ë li' lataj ilé'enu' le dxi'a gaca que yödzo Jerusalén
 yúgu'të dza su' ibanu'.
⁶ Dios gu'ë li' lataj ilé'enu' yugu' xxi'ini xi'sú',
 en gunë' ga ila'böza dxi'a tsáhui'do' bönachi Israel.

129

¹ "Zian luzuí gula'bía no netu' ga gudela' nácatu' ra'bando",
 huáca ila'nná bönachi Israel:
² "Zian luzuí gula'bía no netu' ga gudela' nácatu' ra'bando",
 pero bití' gula'deli' ulu'xíca netu'.
³ Guca tsca bulu'gá'ana-ba' bëdxi lu bëla' cúdzu'tu',
 en gulún tunna ga gudödi xiyágaba' bëdxi quégaquië'."
⁴ Tsahui' náquië' Xanru' Dios.
 Chinachúguë' du quégaca nupa tuá' dö' le gulúgui'ni netu'.
⁵ Ben ga ulu'tuí'i, en ulu'huécja guz cúdzu'lö
 yúgu'të nupa bití' ta'lé'e dxi'a netu', bönachi Sión.
⁶ Ben ga ilácagaca ca guíxi'do' da' ícjo'olö yu'u,
 le ribídxité cate' ni' naca huë'ëno'.
⁷ Bití' gaca ulí nê'e nu tsöjchugu le,
 en bití' gaca nu gachi tsólén guizxi que,
⁸ en bití' ta'nná nupa ta'dödi ní':
 "Rinábitu'-në' Xanru' Dios gunë' ga gaca dxi'a quiu'.
 Lu Lë' Xanru' rinábitu' Lë' gunë' ga gaca dxi'a quiu'."

130

¹ Ga ni nőtjada' rulidza' Li', Xan.
² Ruzë nagu' chí'a, Xana' Dios.
 Ruzëda' nagu' le rinábida' Li'.
³ La' nnaru' tsöjnenu' xigua' nabága'gaca bönachi,
 çnuzxi caz urúaj tsahui' lo', Xan?
⁴ Runiti lo cazu' netu', Xan,
 para guntu' Li' bal.
⁵ Runa' löza Li', Xana' Dios. Run löza bö' naca caza' Li',
 ate' runa' löza gaca ca rnna xtídu'u.
⁶ Bö' naca caza' runrö löza Li', Xan,
 ca tunë bönni' tapa chí'ë yödzo chí'i dzö'ölö ta'bözë' itö yu zila,
 ca tunë löza itö yu zila yugu' bönni' na'.
⁷ Gulí'gún löza Xanru' Dios, libí'ili', bönachi Israel,
 tu' náquië' dxi'i ladxi' Xanru',

en ruhuá'uē' bōnachi Israel.

⁸Xanru' Dios huóá'uē' bōnachi Israel

lu yúgu'tē xiguia' nabága'gaca.

131

¹Biti' run ba zxōn cuina', Xan, en biti' rigú'u cuina' yōl-la' ba, en biti' ulapa' na'a le nácagaca zxōn, en le nácagaca bōniga.

²Idú ládxa'a nuzóa cuina' nōxaj, en zoa' dxisō.

Ca runbi' bi'i huē'ēni ruzí' ládxi'bi' cuítanu xiná'abi', ca' ribōza bō' naca caza' lu icja ládxi'da'ahua'.

³Libí'ili', bōnachi Israel, guli'gunē' lōza Xanru' Dios ga nagueła' na'a dza, en yúgu'tē dza si' zaca!

132

¹Rinábida' Li', Xan, uláz queē' David tsōjnénu' yúgu'tē le gudí'i guzxáqueē',

²en ca benē' tsutsu xtídzē'ē, Xan, en guzxí' lu nē'ē bi gunē' lo', nacu' Nu nál-latērō láhuigaquiē' xzí'ini xí'sóē' Jacob, gunnē':

³"Biti' ca' tsu'a lidxa', en biti' gáta'a le ráti'da',

⁴en biti' gu'a lataj tōdi yēla guiōj lahua',

en biti' utsudi' lahua',

⁵ga idxinrō dza ucōza' tu lataj ga soē' Xanru' Dios, le gaca yu' u lidxi Nu na' nál-latērō láhuigaquiē' xzí'ini xí'sóē' Jacob."

⁶Biyōnitu' didza' que guí'ina lá'ayi queē' Dios cate' ni' zóatu Efrata, ate' budzólitu' le lu xiyúē' Jaar.

⁷Uyéajru' ga na' zoa cazē' Xanru' Dios.

Tseaj ládxi'ru'-nē' ga naca xilibi ni'ē.

⁸Gudōdi, Xan, ga na' soa cazu' Li'.

Gudá tsōzxōn len guí'ina lá'ayi que yōl-la' zxōn quiu'.

⁹Ben ga sóalen le naca tsahui' yugu' bixúz quiu'

ca tu lari' ta'xóē' cúdzu'gaquiē'.

Ben ga ilúl-la bōnachi quiu' lu yōl-la' rudzeja quéguequi.

¹⁰Uláz queē' David, huen dxin quiu', rinábida' Li'

cabí ucá'anu' bōnni' na' gurō cazu' Li'.

¹¹Xanru' Dios benē' tsutsu xtídzē'ē bi gunē' queē' David, le naca idútē li, ate' Lē' biti' unítē' xtídzē'ē na', gunnē':

"Uzóa' tuē' xzí'ini xí'sú' xilatju' ga inná bē'ēbi'.

¹²Channō ilunbi' xzí'ini xí'sú' ca rnna didza' dzaga quia',

en le nuna' ba nalí para uzéajni'ida' légacabi',

ila'nná bē'ēbi' ga rō'u rinná bē'u yúgu'tē dza si' zaca."

¹³Xanru' Dios nabō cazē' queē' yōdzō Sión.

Raca ládxe'ē gaca Sión ga soa cazē' Lē'.

¹⁴Rnnē': "Nácatica'sō lataj ni ga soa caza' neda'.

Soa' ni tu' raca ládxa'a soa' ni.

¹⁵Guna' ga gátada' le ilágugaca bōnachi ni,

en guna' ga ulu'huōlaj ila'dzé'e yōta xtila

nupa ta'yadzaj ta'yudxi lu yōdzō ni.

¹⁶Guna' ga sóalen yōl-la' rusölá yugu' bixúz quia'

ca tu lari' ila'xóa cúdzu'gaquiē',

ate' ilúl-la bōnachi quia' lu yōl-la' rudzeja quéguequi.

¹⁷Guna' ni ga ilá' lahui yōl-la' unná bē' queē' David.

Guna' ga sóatica'sō nu inná bē' xilatjē' bōnni' na' nabō caza'.

¹⁸Guna' ga sóalen nupa biti' ta'lé'e lē' dxi'a yōl-la' rutufí

ca tu lari' ilácuguequi, pero tsépi yōsa bení' le dxía icjē'."

133

¹Buli'yútsōca': ¡Bica' dxi'a tsahui' naca

cate' nupa nácagaca bōchi' luzē'e

ta'bōza lu yöl-la' tuz quéguequi!

² Naca ca le za ta'gú'u ícjaguequi bōnachi,
le ridzún lu guitsa' láhuiguequi,
en bidzún lu guitsa' lúzxuē' Aarón,
le bidzún ga ridxintē lu yeni zxē'.

³ Naca ca buzén le ridinni lu guí'a Hermón,
en ca le ribō'a lu guí'a Sión,
tu' gunná bē'ē Xanru' gaca dxi'a queēru' lu guí'a na',
en gata' yöl-la' na'bán idú queēru'.

134

¹ ¡Buli'yútsōca'!

¡Guli'cu'ē Xanru' Dios yöl-la' ba, yúgu'tēli' runli' xichiné' Xanru',
yúgu'tēli' na' zóali' yu'u lidxē' Xanru' chi'i dzō'ölō!

² ¡Guli'chisa ná'ali' ga zóali' lataj lá'ayi queē',
en guli'nná dxi'a queē'!

³ Xanru' Dios, zoa cazē' yōdzō Sión, gunē' ga gaca dxi'a queēli'.
Naca cazē' Nu ben yehua' yubá, en yōdzōlió ni.

135

¹ ¡Guli'cu'ē yöl-la' ba Xanru' Dios!

¡Guli'cu'ē yöl-la' ba La la'ayi queē' Xanru' Dios!
¡Guli'cu'ē yöl-la' ba, libí'ili' runli' xichiné' Xanru',

² libí'ili' na' zuili' yu'u lidxē' Xanru',
ga na' zóali' lö'a que yu'u lidxē' Dios queēru'!

³ ¡Guli'cu'ē yöl-la' ba Xanru' Dios tu' náquiē' dxi'a!
¡Guli'gul-la yöl-la' ba que La la'ayi queē', tu' naca lachi!

⁴ Nabō cazē' Xanru' zxi'ini xi'sōē' Jacob para ilaca quez queē'.
Gurōē' bōnachi Israel para ilequi queē'.

⁵ Nōzda' nayēpisē' Xanru' Dios.

Nayēpisētērē' ca yugu' dios quégaca bōnachi izá'a.

⁶ Run cazē' Xanru' ca riyaza ladxi' cazē' yehua' yubá ni',
en luyú ni, en lu nísado', en zxan lu yu.

⁷ Runē' ga rō' bōaj gátitēs luyú ni,
en runē' ga rēpi yōsa cate' ralaj guiōj.

Rubéajē' bō' recja ga rapa chi'ē le nequi queē'.

⁸ Bētiē' yugu' bi'i bōnni' zí'alō quégaca bōnachi Egipto,
zxi'inigaca bōnachi, en bōa' huē'ēnido' quégacaba' bōa' guixi'.

⁹ Benē' yugu' yöl-la' huáca zxōn le gulaca bē' luyú Egipto,
yugu' lē na' gulaca queē' Faraón, en quégaca huen xichiné'.

¹⁰ Busunitiē' Dios bōnachi zían yōdzō izá'a,
en bētiē' bōnni' lo ta'nná bē'ē.

¹¹ Bētiē' Sehón, bōnni' gunná bē'enē' bōnachi Amorreo,
en Og, bōnni' gunná bē'enē' bōnachi Basán,
en bōnni' gula'nná bē'enē' bōnachi yōdzō nacuá' luyú Canaán.

¹² Budōdē' xiyúgaquiē' bōnni' na'
lu ná'agaquiē' bōnni' Israel, bōnachi queē' cazē'.

¹³ Tsaz zoa caz Lo', Xan.

Ila'cuá'tica'sō nupa tsōjnégaca Li', Xan,

¹⁴ tu' uchi'a usōrōu' bōnachi queu', Xantu' Dios,
en huéchi' lādxi'u nupa tun xichinu'.

¹⁵ Budó' quégaca bōnachi yugu' yōdzō izá'a néquiniguequi
plata, en oro, yugu' le nūngaca lu ní'a lu ná'agaca bōnachi.

¹⁶ Zóagaca ruí'iguequi, pero biti' bi didza' tuí'i.

Zóagaca guiōj lóguequi, pero biti' bi ta'lé'e.

¹⁷ Zóagaca náagaca, pero biti' bi ta'yōni,
en biti' ta'guela' bō' ruí'igaca.

¹⁸ Nupa tun léguequi ilaca ca náagaca budó' na',
en caní ilaca yúgu'tē nupa tu'zxōni ladxi' léguequi.

¹⁹ Libí'ili', bönachi Israel, guli'guië' Xanru' náquië' dxi'a.
 Libí'ili', xzí'ini xi'sóë' Aarón, guli'guië' Xanru' náquië' dxi'a.
²⁰ Libí'ili', xzí'ini xi'sóë' Levi, guli'guië' Xanru' náquië' dxi'a.
 Libí'ili', núlöli' rádxili'-në' Xanru', guli'guië' Xanru' náquië' dxi'a.
²¹ Núlöli' zóali' yödzó Sión ral-la' guiëli'-në' Xanru' náquië' dxi'a,
 tu' zoa cazë' Xanru' Dios yödzó Jesusalén.

¡Guli'cu'ë yöl-la' ba Xanru'!

136

¹ ¡Xclenë' Xanru' Dios tu' náquië' dxi'a!
 Zóatica'sö yöl-la' dxi'i ladxi' queë'.
² ¡Xclenë' Dios nayépisëtërë' ca yugu' dios izá'a!
 Zóatica'sö yöl-la' dxi'i ladxi' queë'.
³ ¡Xclenë' Xanru', nayépisëtërë' ca yugu' xángaca bönachi!
 Zóatica'sö yöl-la' dxi'i ladxi' queë'.
⁴ ¡Xclenë' Dios, tuzë' Lë' runë' yugu' yöl-la' huáca zxön!
 Zóatica'sö yöl-la' dxi'i ladxi' queë'.
⁵ ¡Xclenë' Dios, len yöl-la' rácada' queë' benë' lúzxiba!
 Zóatica'sö yöl-la' dxi'i ladxi' queë'.
⁶ ¡Xclenë' Dios, gudixjë' luyú láhuilö nísado'!
 Zóatica'sö yöl-la' dxi'i ladxi' queë'.
⁷ ¡Xclenë' Dios, benë' gubidza, en beo'!
 Zóatica'sö yöl-la' dxi'i ladxi' queë'.
⁸ ¡Benë' Dios gubidza para tseni' lahui' dza!
 Zóatica'sö yöl-la' dxi'i ladxi' queë'.
⁹ ¡Benë' Dios beo', en yugu' böla para ulu'zeni' chi'i dzö'ölö!
 Zóatica'sö yöl-la' dxi'i ladxi' queë'.
¹⁰ ¡Xclenë' Dios, bëtië' yugu' bi'i bönni' lo quégaca bönachi Egipto!
 Zóatica'sö yöl-la' dxi'i ladxi' queë'.
¹¹ ¡Bubéajë' bönachi Israel ladaj bönachi Egipto na'!
 Zóatica'sö yöl-la' dxi'i ladxi' queë'.
¹² ¡Len yöl-la' huáca zxön queë', en lu yöl-la' nadxí'i queë' benë' caní!
 Zóatica'sö yöl-la' dxi'i ladxi' queë'.
¹³ ¡Xclenë' Dios, bubéajë' choplö Nísado' Xiná!
 Zóatica'sö yöl-la' dxi'i ladxi' queë'.
¹⁴ ¡Benë' ga gula'dödi bönachi Israel gatsaj láhui'lö nísado' na'!
 Zóatica'sö yöl-la' dxi'i ladxi' queë'.
¹⁵ ¡Lu nísado' na' busunítië' Faraón, en bönni' queë' röjáquië' gudil-la!
 Zóatica'sö yöl-la' dxi'i ladxi' queë'.
¹⁶ ¡Xclenë' Dios, guchë'ë bönachi queë' la' guixi' ga ni' naca yu bidxi!
 Zóatica'sö yöl-la' dxi'i ladxi' queë'.
¹⁷ ¡Xclenë' Dios, bëtië' bönni' gula'nná bë'ë, guláquië' nal-la!
 Zóatica'sö yöl-la' dxi'i ladxi' queë'.
¹⁸ ¡Bëtië' bönni' gula'nná bë'ë, dëda' lu ná'agaquië' yöl-la' unná bë'!
 Zóatica'sö yöl-la' dxi'i ladxi' queë'.
¹⁹ ¡Bëtië' Sehón, bönni' gunná bé'enë' bönachi Amorreo!
 Zóatica'sö yöl-la' dxi'i ladxi' queë'.
²⁰ ¡Bëtië' Og, bönni' gunná bé'enë' bönachi Basán!
 Zóatica'sö yöl-la' dxi'i ladxi' queë'.
²¹ ¡Budödë' xiyúgaquië' lu ná'agaca bönachi queë'!
 Zóatica'sö yöl-la' dxi'i ladxi' queë'.
²² ¡Budödë' le lu ná'agaca bönachi Israel, bönachi tun xichinë'!
 Zóatica'sö yöl-la' dxi'i ladxi' queë'.
²³ ¡Yöjnenë' rë'u cate' ni' bugá'anaru' cá'asó!
 Zóatica'sö yöl-la' dxi'i ladxi' queë'.
²⁴ ¡Busölë' rë'u lu ná'agaca nupa gula'díl-lalen rë'u!
 Zóatica'sö yöl-la' dxi'i ladxi' queë'.
²⁵ ¡Rugahuë' yúgu'të bönachi!
 Zóatica'sö yöl-la' dxi'i ladxi' queë'.
²⁶ ¡Xclenë' Dios, zoa cazë' yehua' yubá!
 Zóatica'sö yöl-la' dxi'i ladxi' queë'.

137

¹ Ra' yegu nacua' lu yu Babilonia gurö'ötu',
en gurödxí yéchi'tu', cate' yöjnetu' yödzo Sión.

² Lu yaga rö'gaca yugu' ra' yegu ni'
bugála'tu' yugu' le rül-lalentu'.

³ Caní bentu' tu' gula'nabi yudxi nupa gulaché' netu' nadzuntu' ni' gúl-latu'.
Nupa bulu'saca' zi' netu' gula'naba queétu' yöl-la' ruzzidxi, gula'nná:
"Guli'gul-la queétu' tu le rul-la que yödzo Sión."

⁴ ¿Nacxi caz gaca gúl-latu' le rul-la queé' Xanru'
ga ni nadzuntu' tu lu yödzo izá'a?

⁵ Channö gal-la ládxa'a yödzo Jerusalén,
rinábida'-nē' Dios ugüē' yöl-la' raca que na'a ibēla.

⁶ Rinábida'-nē' gunē' ga ta' lúdxá'a chíchja'
channö cabí tsöjneda' ladza',
en channö cabí huí' xzönrá' yödzo Jerusalén ca ia'tú le ruzí'ida' xibé.

⁷ Yöjné le gulunē' xzí'ini xi'sóē' Edom, Xan,
le gulunē' dza busiúdxu' yödzo Jerusalén,
ca na' gula'nnē': "Guli'quinnaj dēra.
Guli'quinnaj dēra ga idxintē xilibi zö'ö yödzo na'."

⁸ Libí'ili', bönachi Babilonia, libí'ili' rusunítili',
bica' ba nu ubí'i queéli' ca na' benli' queétu'.

⁹ Bica' ba nu quela' yugu' bí'ido' queéli'
en uzuzxaj légacabi' yugu' lu guiój.

138

¹ Idú ládxa'a guía' Li', "Xclenu" Xan.

Gul-la' yöl-la' ba quiu' lógaca le tun xzön bönachi yugu' yödzo izá'a.

² Uzóa zxiiba' saca' yudo' lá'ayi quiu', en guía' Li', "Xclenu"
ni'a que Lo', tu' nacu' dxi'i ladxi', en runu' ca rnna didza' bē'u,
tu' benu' ca naca lu xtídxu'u, en lu le naca ca nazí'i lo.

³ La' dza ná'asö cate' bulidza' Li', bubi'u didza'.
Tu' butipu' ládxa'a, guca' rugu ladxi'.

⁴ Yúgu'tē bönni' ta'nná bē'ē ilé' Li': "Xclenu" Xan,
cate' ila'yönnē' didza' ru'u.

⁵ Ilul-lē' ca nácgaca le runē' Xanru' Dios,
tu' nácatērö xzön yöl-la' ba queé' Xanru'.

⁶ Sal-la' nayēpisētērē' Xanru' Dios
rufí' ládxē'ē nupa nácgaca cá'asö,
pero zi'tu' zí'tu'sö ruyüē' nupa tun ba xzön cúnguequi.

⁷ Sal-la' ridá' ga zoa bönadxi quia', Li' utipa cazu' ládxa'a.
Tíl-lalen cazu' nupa ta'díl-lalen neda',
ate' len yöl-la' huáca quiu' usöló' neda'.

⁸ Xanru' gun cazē' quia' ca chinuzóa cazē' gunē'.

Zóatica'sö yöl-la' dxi'i ladxi' quiu', Xan.
Biti' usán no'o le nun cazu' len na' cuinu'.

139

¹ Ruyú cazu' le yu'u icja ládxi'da'ahua', Xan, en nunbē' cazu' neda'.

² Nöz quézinu' cate' ribö'a, en cate' riyasa'.
Nözinu' le rizá' ládxa'a ni' zu' zi'tu'.

³ Ruyú cazu' neda' cate' bi runa', en cate' rasía',
en nözinu' yúgu'tē le runa'.

⁴ Zí'atélö ca bi didza' ru'a,
chí nöz quézinu' bi innía', Xan.

⁵ Röjnöru cazu' lahua', en za' cazu' cúdza'a,
en naxóatica'sö no'o neda'.

⁶ Run ga rubánida' tu' nöz quézinu' Li'.

Biti' séqui'da' tséajni'ida' ca naca.

⁷ ¿Naru' huáca tseja' ga biti' idxín Bō' quiu'?

¿Naru' huáca izxúnnaja' ga biti' zoa cazu' Li'?

⁸ La'tu' huabena' lúzixiba, ni' soa cazu' Li',
en la'tu' huótja' lataj chul-la, ni' zoa cazu' ca'.

⁹ La'tu' uyija' ga rilén gubidza,
o la'tu' huadôda' ia'tsôlá'alô nísado',

¹⁰ ni' caz ichê'u neda',

ate' len no'o ibêla sôn cazu' neda'.

¹¹ La'tu' innía': "Ucachi' neda' le naca chul-la",

en la'tu' huôáca chul-la bení' zóalen neda',

¹² biti' gaca chul-la lo' Li' lê na' naca chul-la quia',

pero chí'i dzô'ôlô gaca quiu' ca lahui' dza.

Tuz ca nácgaca lo' Li' le naca chul-la, en le naca lahui' dza.

¹³ Nun cazu' Li' le zoa icja ládxi'da'ahua'.

Benu' ga guya' lê'enu xiná'a le naca caza'.

¹⁴ Guía' Li': "Xclenu'" tu' run ga rubánida' ca nun cazu' neda',

ate' rádxida' Li' tu' tun le nunu' ga rubánida',

ate' bō' naca caza' nōzi caz naca caní.

¹⁵ Biti' bigachi' lo' le naca caza' cate' ni' si' galja',

cate' ni' yu'a lê'enu xiná'a.

¹⁶ Bilé'e quézinu' neda' cate' ni' si' galja',

tu' chinuzúajgaca lu guichi quiu'

yugu' dza ral-la' soa' ibana',

sal-la' biti' ridxini nitú dza na'.

¹⁷ Nazáca'têrôgaca quia' le rizá' ládxi'u, Dios.

Ziántêrô nácgaca lê na' rizá' ládxi'u.

¹⁸ La'tu' huáca nu ulaba léguequi,

ilácgaca ziántêrô ca nácgaca guiôj yuzxi.

Cate' rubana', ni' zóalena' Li'.

¹⁹ Raca ládxa'a usunítui' nupa tuá' dô', Dios.

Que lê ni na', guli'cuíta ga zoa', núlôli' rútili' bônachi.

²⁰ Tuf'i didza' zi' ca nacu' Li', Dios,

ate' nupa ta'dá'baga' Li' ta'nnê liz que Lo'.

²¹ ¿Naru' cabí rileda' nupa ta'lé Li', Xan?

¿Naru' cabí ruzóa' tsôlá'alô nupa ta'dá'baga' Li'?

²² Idú ládxa'a biti' rilé'eda' léguequi dxi'a.

Nuzóa' léguequi ca nupa ta'díl-lalen neda'.

²³ Buyú neda', Dios, en gúquibe'e le zoa icja ládxi'da'ahua'.

Guzxí' bē' neda', en gúquibe'e le rizá' ládxa'a.

²⁴ Buyú channô zóalen neda' le naca dô',

en bului'i neda' nōza tsahui' quiu' zóatica'sô.

140

¹ Busôlá neda', Xan, lu ná'agaca nupa tuá' dô'.

Ben chí'i neda' para cabí bi ilunê' bōnni' zi' quia'.

² Ta'zá' ládxe'ê le nácgaca xihui' ilunê',

en tunê' ga ila'díl-lalen bônachi luzé'eguequi.

³ Didza' tu'ê tun ga nácgaca lúdxí'gaquiê' ca yugu' bêla sínia'.

Yu'u ruá'agaquiê' le nachê' yôl-la' gutí ca le dxía lu láyi'ba' bêla na'.

⁴ Ben chí'i neda', Xan, para cabí bi ilunê' bōnni' tu'ê dô' quia'.

Ben chí'i neda' para cabí bi ilunê' bōnni' zidzaj quia',

bōnni' na' tē'ênê' ilunê' ga ichixi iníguida'.

⁵ Nupa tun ba zxôn cúnguequi nucáchi'gaca le sôn neda',

enca' du yalaj irôli neda'.

Nucáchi'gaca du yalaj ga ral-la' tôda'.

Nucôzagaca le ila'zôn neda'.

⁶ Gudxa'-nê' Xanru': "Nacu' Dios quia'.

Ruzě nagu' Xan, yugu' le rinábida' Li'.

⁷ Xana' Dios, naca cazu' Nu rusölá neda' len yöl-la' huáca quiu'.

Ben chi'i cazu' icja' cate' ni' zoa' lu gudil-la.

⁸ Biti' gu'u lataj, Xan, gaca quia' le rě'ëně' guně' bōnni' ru'ě dö'.

Biti' gu'u lě' lataj idéli'ně' le rizá' lădxě'ě, para cabí tsépisě'.

⁹ Nacuá' nupa nagú'ugaca neda' lě'ajlō.

Busubaga' ícjagaquiě' dö' tě'ëně' ilu'ě quia'.

¹⁰ Ben ga ila' bixaj bo' yalaj lahui ícjagaquiě'.

Bě' lataj tsőjtsázagaquiě' tu lu guí' zxon,

en yugu' lu yeru zila ga bití' ila' zéqui'ně' ulu'ruájě'.

¹¹ Biti' gu'u lataj soě' bōnni' rizi' yě'ě luyí ni.

Ben ga udxín queě' bōnni' zidzaj dö' ru'ě."

¹² Nōzda' guně' Xanru' ga ulu'ruáj tsahui' nupa ta'guí' ta'zaca',
en uchi'a usöröě' quégaca bōnachi yechi'.

¹³ Le nácatě ilě Li': "Xclenu'" nupa nácacaga tsahui' tu' tu'lidza Lo'.
Ila'cuá' ga zoa cazu' Li' nupa nácacaga dxi'a.

141

¹ Rulidza' Li', Xan. Gudáchi ga zoa'.

Ruzě nagu' chi'a cate' rulidza' Li'.

² Buyú le rulidza' Li' ca dzōn yalaj le ridxín lo',

en cate' richisa na'a, buzí' le ca tu bōa'do' uzégui'a-ba' lo'.

³ Ben chi'i ruá'a, Xan,

en gudapa chí'i guídí ruá'a para cabí gu'a didza' zi'.

⁴ Biti' gu'u lataj gaca lădxa'a le cabí nácatě,

para cabí guna' le naca xihui'

len yugu' bōnni' tutiě' bōnachi.

Biti' gu'u lataj guna' léguequi tsőzxōn.

⁵ Bě' lataj gu'ě neda' bōnni' tsahui' lu yöl-la' nadxí'i queě'

para uzéajni'ině' neda'.

Le guně' gaca quia' ca le za cu'ě icja'.

Biti' gu'u lataj tá'baga' icja' le ilún nupa tuá' dö'.

Rinábida' Li' uzagu' xinőzguequi.

⁶ Ila'lădzu'gaquiě' bōnni' lo' quéguequi lě'e guí'a guiőj,

ate' iléquibe'e gulaca dxi'a didza' bē'a.

⁷ Ca raca cate' nu rugá'ana-ba' bēdxi, en rulá'a yu,

ca' gaca que dxi'a yú'ugaquiě',

le gulásilasi ra' ba que xilátjagaca nupa nátigaca.

⁸ Richisa lahua' ruyúa' ga zu' Li', Xantu' Dios.

Rucachi' cuina' ga na' zu'. Biti' usán no'o neda'.

⁹ Ben ga bití' tsőjbixa' lu le sōn neda', lě na' nucáchi'gaca,

en ga bití' tsőjtsaza' lu du yalaj nucőzagaca nupa tuá' dö'.

¹⁰ Bě' lataj ila' yaza la' cuíngacasō lu du yalaj bulu'cachi' nupa tuá' dö',

pero benna lataj tōdisa' neda' ga na' nagachi' du yalaj na'.

142

¹ Rulidza'-ně' Xanru', ru'a zidzaj didza'.

Ráta'yua' lahuě' Xanru' uzá' lădxě'ě quia'.

² Rudōda' lahuě' yöl-la' rinaba yudxi quia',

en rusiyōnda' Lě' le rácagaca quia'.

³ Cate' budú lădxa'a,

gunőzi quézinu' Li' le guca quia'.

La' nōza ga ridá' neda'

bulu'cachi' le sōn neda'.

⁴ Buyú cuita' ibēla

tu' cuntu nu zoa nu ruí'i ladxi' neda'.

Biti' bi zoa le gácalen neda'.

Cuntu nu run chí'i bō' naca caza'.

⁵ Gurōdxi'a lo' Li', Xan, gunniá'.

Run chí'i cazu' neda' Li',
 en naca cazu' Nu rácalen neda' ladaj nupa nabángaca.
⁶ Ruzě nagu' le rulidza' Li',
 tu' nagá'ana' cá'asö.
 Busölá neda' lu ná'agaca nupa ta'zóa regu' neda',
 tu' nácatërögaca nál-la ca neda'.
⁷ Guléaj bö' naca caza' lu yu'u lidxi guíë,
 para gaca guía' Li': "Xclenu'" tu' rulidza' Lo'.
 Nupa nácgaca tsahui' ulu' dubi idú gásibi'ilö ga zoa',
 tu' gunnu' sizxöni quia' le riquinda'.

143

¹ Ruzě nagu' le rulidza' Li', Xan.
 Ruzě nagu' le rinabi yúdxida' Li'.
 Tu' runu' ca rnna didza' bē'u, en nacu' tsahui' gunnú'
² bití' ichē'u neda' lo' ga uchi'a usöröu' quia', huen dxin quiu'.
 Cuntu nu zoa naca tsahui' lo' Li'.
³ Nu bití' rilé'e neda' dxi'a zoa regu' bö' naca caza'.
 Nuzöjtjē' yöl-la' na'bán quia' lu yu.
 Benē' ga zoa' lataj naca chul-la ca raca quégaca nupa gulati dza ni'te.
⁴ Que le ni na' rudú ládxa'a, en rō'a böniga.
⁵ Rōjneda' dza chígula'dōdi.
 Rizá' ládxa'a ca nácgaca le benu' Li'.
 Ribequi icja' ca nácgaca le nun no'o.
⁶ Richisa na'a zaca' ga zu' Li'.
 Rizě ládxa'a Li' ca tu luyú bidxi rizě ladxi' nisa guiöj.
⁷ Bubi'itē didza', Xan, tu' rudú ládxa'a.
 Biti' ucachi' lo' lahua' neda',
 para cabí gaca' ca tu bönni' ru'ë lataj chul-la ga nacua' nupa nátigaca.
⁸ Ben ga yōnda' yugu' zila ca naca yöl-la' dxi'i ladxi' quiu',
 tu' ruzxöni ládxa'a Li'.
 Busēdi neda' ca ral-la' guna',
 tu' ruchisa' lo' Li' bö' naca caza'.
⁹ Busölá neda', Xan, lu ná'agaca nupa bití' ta'lé'e neda' dxi'a.
 Nacu' Nu ruzóa neda' tsutsu.
¹⁰ Busedi neda' para guna' ca rē'enu' Li',
 tu' naca cazu' Li' Dios quia'.
 Bē' lataj ichē' Bö' Lá'ayi quiu' neda' lu nōza tsahui'.
¹¹ Butipa ládxa'a, Xan, para gaca yöl-la' ba que Lo'.
 Tu' nacu' tsahui' busölá neda' lu le raca quía'.
¹² Lu yöl-la' dxi'i ladxi' quiu' guchugu quégaca nupa bití' ta'lé'e neda' dxi'a.
 Busuniti yúgu'tē nupa tu'saca' zi' bö' naca caza',
 tu' naca' huen dxin quiu'.

144

¹ jYöl-la' ba Lē', Xanru' Dios!
 jNáquiē' ca tu guiöj ga zoa' tsutsu!
 Rutipē' na'a para gaca tseja' gudil-la,
 en rutipē' ca' xibön na'a para gaca tíl-lalena' bönni' nácaquie' nál-la.
² Naca cazē' Xanru' yöl-la' dxi'i ladxi' quia',
 enca' ca tu ga zoa' tsutsu lu gudil-la.
 Rusölē' neda', en náquiē' ca tu ga zoa' tsaz.
 Náquiē' ca tu le run chí'i neda' lu gudil-la, ate' rucachi' cuina' ga na' zoē'.
 Runē' ga tun nupa rinná bé'eda' ca rnna didza' ru'a.
³ ¿Bíxatē caz náquiē' bönni' tu' runu' lē' ba lá'ana, Xan?
 ¿Bíxatē caz náquiē' bönni' tu' ru'i ladxi' cazu' lē'?
⁴ Naca cazē' bönni' na' ca tu bö'do' recja,
 ate' yugu' dza zoē' nabanē' nácgacasó ca tu zxul-la le rigú'u tu böaj ridödisö.
⁵ Buzötaj lúxiba, en bđinne ni, Xan.
 Gudán yugu' guí'a, ate' irúaj dzön lē'eguequi.
⁶ Ben ga tsēpi yōsa quiu', en bésilasi léguequi.

Busë yugu' yaga lahui tuchi', en ben ga ila'bõ' bagu'isõ.

⁷ Buli no'o ga na' zu' xitsá'alõ.

Busõlá neda', en guléaj neda' lu ná'agaca bõnachi zi'tu',
le gaca ca rubéaju' neda' lu nisa zila.

⁸ Ta'zi' yë' bõnachi na',
ate' le cabí nácatë naca yõl-la' unná bë' quéguequi.

⁹ ¡Gul-la' quiu' Li', Dios, tu le cubi!
¡Gul-la' quiu' yõl-la' ba, en quínnia' bihuël-la nuá' chi du que!

¹⁰ Rusõlá cazu' bõnni' ta'nná bë'ë.
Busõló' David, huen dxin quiu', lu guíë tuchi' queë' bõnni' ru'ë dö'.
¹¹ Gúcalen neda', en busõlá neda' lu ná'agaca bõnachi zi'tu'.

Ta'zi' yë' bõnachi na',
ate' le cabí nácatë naca yõl-la' unná bë' quéguequi.

¹² Ben ga ilácabi' bi'i bõnni' queëtu' ni yu'ugacabi' iz cuidi'
ca yugu' yaga nazxõngaca,
en ben ga ilácabi' bi'i nigula queëtu'
ca nácagaca ya'zxén que tu yu'u nazaca'.

¹³ Ben ga ilígaca yu'u queëtu' zxoa' za utúbitu',
en ben ga iláljaba' gayuá' gayuá'aba' chíbodo',
en bõ'cu' zxíla'do' ga nucuá'atu'-ba'.

¹⁴ Ben ga ulu'cuá'aba' bõa' huë'ënido' quégaca bõa' guixi' queëtu',
en ga bití' bi gaca quégacaba' bëdxi zxõn, en bëdxi'do' ca'.
Bití' gu'u lataj soa nu cõdxi yechi' la' nõza que lãdzatu'.

¹⁵ ¡Bica' bágaca bõnachi raca caní quéguequi!
¡Bica' bágaca bõnachi na' Xanru' Dios náquië' Dios quéguequi!

145

¹ ¡Guna' Li' zxõn, Dios!

¡Nacu' Nu rinná be'e neda'!
¡Gádxitica'sa' Lo', Xana' Dios!

² ¡Tu dza tu dza cu'a Li' yõl-la' zxõn,
en cú'utica'sa' Lo' yõl-la' ba!

³ ¡Nayëpisëtë'rë' Xanru' Dios, ate' cú'uru'-në' yõl-la' ba!
¡Bití' ca' gaca gúnbë'ëru' ca naca yõl-la' zxõn queë'!

⁴ Yúgu'të bõnachi ila'gú'u yõl-la' ba le nun cazu' Li',
para ulu'siyõn xí'inigaca,
en ulu'luf'i lahui le nácagaca zxõn benu'.

⁵ Sa' lãdxa'a ca naca yõl-la' zxõn que yõl-la' unná bë' quiu',
en ca nácagaca yõl-la' huáca zxõn runu'.

⁶ Iluf'i didza' yúgu'të bõnachi ca naca yõl-la' zxõn
quégaca yõl-la' huáca runu'.

Úsiyõnda' bõnachi ca naca yõl-la' zxõn quiu'.

⁷ Idú lãdxi'gaca iluf'i didza' cate' tsõjnégaca yõl-la' dxi'i lãdxi' zxõn quiu'.
Lu yõl-la' rudzeja quéguequi ila'bõdxi'a tu' nacu' tsahuí'.

⁸ Xanru' Dios ruzá' lãdxë'ë queëru', en ruhuéchi' lãdxë'ë rë'u.
Bití' ilética'së', ate' zxõntë'rõ naca yõl-la' dxi'i lãdxi' queë'.

⁹ Runë' Xanru' Dios le naca dxi'a quégaca yúgu'të bõnachi,
en ruhuéchi' lãdxë'ë yúgu'të le nunë'.

¹⁰ Yúgu'të le nunu' ilë Li': "Xclenu'" Xan,
ate' nupa néquigüequi quez quiu' ilún Li' zxõn.

¹¹ Iluf'i didza' ca naca yõl-la' zxõn que le rinná bë'u,
en ulu'luf'i lahui yõl-la' zxõn quiu',

¹² para ulu'siyõn bõnachi ca nácagaca le zxõn runu',
en ca naca yõl-la' zxõn que le rinná bë'u le nayëpisëtë'rõ.

¹³ ¡Zóatica'sö le rinná bē'u,
ate' idia'tica'sö yöl-la' unná bē' quiu'!
¡Lu le naca idú ladxi' queē' runē' Dios ca rnnágaca yúgu'tē didza' ru'ē,
en lu yöl-la' dxi'i ladxi' queē' runē' yúgu'tē le runē'!

¹⁴ ¡Röjzönē' Xanru' yúgu'tē nupa röjtsö'ögaca,
en ruchisē' yúgu'tē nupa ndínnegaca!

¹⁵ ¡Yúgu'tē bönachi tu'yú Li', Xan,
ate' runödzu' le ilágugaca cate' ridxín dza que!

¹⁶ ¡Rusalaj cazu' no'o
en rugagu' yúgu'tē le nacuá' nabángaca!

¹⁷ Náquiē' tsahui' Xanru' Dios ca naca yúgu'tē le runē'
en náquiē' ca' dxi'i ladxi'.

¹⁸ Zoē' Xanru' gala' ga nacuá' yúgu'tē nupa tu'lidza Lē',
nupa na' tu'lidza Lē' idú ládxi'guequi.

¹⁹ Gunnē' le ta'zē ládxi'gaca quégaca nupa tadxi Lē'.
Riyönnē' cate' tu'lidza Lē', en rusölē' léguequi.

²⁰ Run chí'i cazē' Xanru' yúgu'tē nupa nadxí'igaca Lē',
pero usunítie' nupa tuá' dö'.

²¹ Len ru'a cuina' cu'a-nē' Xanru' yöl-la' ba,
ate' yúgu'tē bönachi ilúntica'sö Lē' zxön.

146

¹ ¡Guli'cu'ē yöl-la' ba Xanru'!

¡Li', bö' naca caza', gulu'ē yöl-la' ba Xanru'!

² ¡Cu'a-nē' Xana' yöl-la' ba tsanni ni zoa' nabana'!

¡Gul-la' yöl-la' ba queē' Dios quia' tsanni ni zoa bö' naca caza'!

³ Biti' uzzöni ládxi'li' bönni' ta'nná bē'ē,
en calēga bönni' tati cazē', bönni' biti' ca' gaca ulu'sölē' rē'u.

⁴ Rurúaj bö' yu'ē nu bönni', ate' ruhuóáquiē' yu.
La' dza ná'asö riniti le rizá' ládxē'ē gunē'.

⁵ Bica' ba bönni' rácalenē' Dios queē' Jacob lē',
bönni' na' runē' löza Xanru' Dios.

⁶ Nunē' Xanru' Dios lúzxiba, en luyú ni,
enca' nísado', en yúgu'tē le nacuá' yugu' lataj na'.

Rúntica'sē' Lē' ca rnna didza' bē'ē,

⁷ en ruchi'a rusöröē' nupa zoa nu rusaca' zi' léguequi.
Rugagu cazē' nupa ta'dún.

Rusanē' Xanru' Dios nupa nadzúngaca.

⁸ Rusaljē' Xanru' Dios guiöj lógaca nupa nácacaca lo chul-la.

Ruchisē' Xanru' Dios nupa nadzö'ögaca.

Nadxí'inē' Xanru' Dios nupa nácacaca tsahui'.

⁹ Rapa chí'ē Xanru' Dios yugu' bönni' zi'tu'.

Rácalenē'-bi' yugu' bi'i uzēbi, enca' yugu' nigula uzēbi,
pero ruzaguē' xinózguequi nupa tuá' dö'.

¹⁰ Inná bē'tica'sē' Xanru' Dios.

Náquiē' Dios queēli', bönachi Sión.

¡Guli'cu'ē yöl-la' ba Xanru'!

147

¹ ¡Guli'cu'ē yöl-la' ba Xanru'!

¡Tsahui' naca gúl-laru' yöl-la' ba queē' Dios queēru'!

¡Naca lachi, en le ral-la' gunru', cú'uru'-nē' yöl-la' ba!

² Runē' Xanru' Dios ga rizxón yödö Jerusalén.

Rutubē' bönni' Israel násilasigaquiē'.

³ Ruúnē' bönni' nácacaguiē' yechi' ladxi',
en rudē'ē lari' ga dxíagaguiē' huē'.

⁴ Rulabē' tsca nacuá' bölaj lúzxiba.

Nucu'ë lágacaba' tu tuba' yúgu'të böla' na'.

⁵ Nayëpisëtërë' Xanru' Dios, en näl-latërë'.

Ga rë'ë dzu réajni'inë' yúgu'të.

⁶ Xanru' Dios rácalenë' nupa ta'guí' ta'zaca'.

Ruzöjtë' nupa tuá' dö' lu yu.

⁷ ¡Guli'gul-la queë' Xanru' Dios, guiëli'-në': "Xclenu"!

¡Guli'gul-la yöl-la' ba queë' Xanru', quínmili' lë'egaca bihuël-lado'!

⁸ Riguísië' yugu' böaj lúzxiba,

en risöl-lë'ë nisa guiöj luyú.

Runë' ga rilén yö yugu' lu guí'ado'.

⁹ Rugahuë' yugu' böa' guíxi'do',

enca' bóiquiajdo' ta'bödxi'aba'.

¹⁰ Biti' raza ládxë'ë yöl-la' näl-la queëba' böa',

en biti' ruzi'ë xibë yöl-la' näl-la queë' bönni'.

¹¹ Raza ládxë'ë Xanru' Dios nupa tadxi Lë',

nupa na' tun löza yöl-la' dxi'i ladxi' queë'.

¹² ¡Guli'cu'ë yöl-la' ba Xanru', libí'ili' zóali' Jerusalén!

¡Guli'cu'ë yöl-la' ba Dios queëli', libí'ili' zóali' Sión!

¹³ Bucu'ë tsutsu le tu'baga' gapa nu riyaza yödzö queëli',

en runë' ga raza dxi'a quégaca xzí'inili' ga na' zóali'.

¹⁴ Runë' ga ribözali' dxi'a tsáhui'do',

en runë' ga ruhuölaj ridzé'eli' xzoa' xtila dxi'atërö.

¹⁵ Rinná bé'enë' yödzölió ni,

ate' xtídzë'ë ridödité gáti'tës.

¹⁶ Risöl-lë'ë guiöj bögui' ca xzila',

en riguísië' buzén ca dö.

¹⁷ Riguísië' bögui' ca yugu' guiöj ruaj.

¿Nuzxi caz gaca guá' ilén le naca ziaga queë'?

¹⁸ Risöl-lë'ë xtídzë'ë, ate' ruúna' bögui' na'.

Runë' ga recja bö', ate' ruhuóáca nisa.

¹⁹ Ruí'ilenë' xzí'ini xisóë' Jacob didza',

en riguíxjë' xibá queë' para ilún bönachi Israel ca rnna.

²⁰ Biti' benë' caní ni'a quégaca bönachi ia'tú yödzö izá'a,

ate' biti' nözigaca ca nácgaca le gunná bë'ë.

¡Guli'cu'ë yöl-la' ba Xanru'!

148

¹ ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' zóali' yehua' yubá!

¡Guli'cu'ë yöl-la' ba, libí'ili' zóali' xitsá'aló!

² ¡Guli'cu'ë yöl-la' ba, libí'ili' gubáz lá'ayi queë'!

¡Guli'cu'ë yöl-la' ba, libí'ili' tscali' dá'ali' Lë'!

³ ¡Guli'cu'ë yöl-la' ba, libí'ili' gubidza, en beo'!

¡Guli'cu'ë yöl-la' ba, libí'ili' böla' bení'!

⁴ ¡Guli'cu'ë yöl-la' ba, libí'ili' zóali' xzan lúzxiba!

¡Guli'cu'ë yöl-la' ba, libí'ili' nisa, xzóali' láhuilö lúzxiba!

⁵ ¡Guli'cu'ü yöl-la' ba La la'ayi queë' Xanru', yúgu'tëli',

tu' bë'ëse' didza', en canísö benë' libí'ili'!

⁶ Naguíxjë' tsaz libí'ili'.

Naguíxjë' xtídzë'ë le catu caz tödi que.

⁷ ¡Guli'cu'ë yöl-la' ba Xanru' idútë yödzölió,

en libí'ili' böa' ridali' lu nísado', en nísado' caz,

⁸ en libí'ili' guí', en guiöj bögui' yöla sunna, bögui', en böaj,

enca' li', bö' budunu', runu' ca rnna xtídzë'ë,

⁹ en libí'ili' yugu' guí'a, en yúgu'të guí'ado',

en libí'ili' yaga dxiágaca le ta'bia, en yugu' yaga dxi'a,

¹⁰ en libí'ili' böa' guixi', en böa' bēdxí,
 böa' tá'ayōj lē'ēba' lu yu, en böa' zoa xilíagacaba',
¹¹ enca' libí'ili' rinná bē'ēli' yōdzōlió, en bōnachi yugu' yōdzō izá'a,
 yugu' zxf'iníaguiē' bōnni' ta'nná bē'ē, en bōnni' ruchi'a rusōrōli' yōdzōlió,
¹² enca' libí'ili' bi'i bōnni', en bi'i nigúlado',
 yugu' bōnni' zxōn, en yugu' b'ído'!
¹³ ¡Guli'cu' u yōl-la' ba La la'ayi queē' Xanru'
 tu' nayēpisētērō tuzē' Lē'!
 ¡Nayēpisētērō yōl-la' ba queē' ca luyú ni, en ca lúzxiba xitsá'!

¹⁴ Nuchisē' tu le nuzóa tsutsu bōnachi queē',
 le naca yōl-la' ba ta'gú'u Lē' nupa néquiquequi queē',
 yugu' zxf'ini xi'sóé' Israel, nupa na' nadxf'inē'.

¡Guli'cu'ē yōl-la' ba Xanru'!

149

¹ ¡Guli'cu'ē yōl-la' ba Xanru'!
 ¡Guli'gul-la queē' Xanru' Dios tu le cubi,
 en guli'gul-la yōl-la' ba queē' ga nudúbigaca nupa néquiquequi quez queē'!

² Ral-la' ulu'z'í xibē' Xanru' Dios bōnachi Israel,
 tu' náquiē' Nu ben léguequi.

Ral-la' ulu'dzéjalen Dios nupa nacuá' Sión,
 tu' náquiē' Nu rinná be'e léguequi.

³ Ral-la' ila'gú'u yōl-la' ba La la'ayi queē',
 en lu yōl-la' rudzeja ulu'yá'a lahuē'.

Ral-la' ilúl-la yōl-la' ba queē', ila'capa' lē'e guídi,
 en ila'quínni lē'egaca bihuél-lado',

⁴ tu' raza ládxē' Xanru' Dios bōnachi queē'.

Uchisē' nupa ta'guí'i ta'zaca', en usölē' léguequi.

⁵ Nupa néquiquequi quez queē' ral-la' ulu'dzeja ládxí'gaca lu bení' queē'.
 Lu yōl-la' rudzeja quéguequi ral-la' ilúl-la queē' cate' ni' dēgaca lu le rati'gaca.

⁶ Yōl-la' ba queē' Xanru' Dios ral-la' sóatica'sō ruí'iguequi,
 en tu guíē tuchi' natuchi' iropa la'a lu ná'agaca,

⁷ para ulu'z'í lēbi bōnachi yugu' yōdzō izá'a,
 en ilún xigua' bōnachi izá'a na',

⁸ para ilúguē' bregui' guíē ná'agaquiē' bōnni' ta'ná bē'enē' bōnachi yōdzō izá'a na',
 en ulu'cu'ē bregui' guíē yen ná'agaquiē' bōnni' lo quégaquiē',

⁹ para ilunē' quéguequi ca nachuguē' Dios gaca quéguequi.
 Naca lē ni le run bal nupa néquiquequi quez queē' Dios.

¡Guli'cu'ē yōl-la' ba Xanru'!

150

¹ ¡Guli'cu'ē yōl-la' ba Xanru'!

¡Guli'cu'ē yōl-la' ba Dios lu lataj lá'ayi queē'!

¡Guli'cu'ē yōl-la' ba ga dēda' lataj queē'!

² ¡Guli'cu'ē yōl-la' ba ca nácagaca le zxōn nunē'!

¡Guli'cu'ē yōl-la' ba ca naca yōl-la' zxōn queē'!

³ ¡Guli'cu'ē yōl-la' ba, ucódxili' lúzugacaba' chivo!

¡Guli'cu'ē yōl-la' ba, quínnili' lē'egaca bihuél-la ca'!

⁴ ¡Guli'cu'ē yōl-la' ba, cápa'li' lē'e guídi, en uya'ali'!

¡Guli'cu'ē yōl-la' ba, quínnili' lē'egaca bihuél-la, en ucódxili' gui!

⁵ ¡Guli'cu'ē yōl-la' ba, utíl-lali' guíē lē'e luzē'e!

¡Guli'cu'ē yōl-la' ba, utíl-lali' guíē zxōn lē'e luzē'e!

⁶ ¡Guli'cu'ē yōl-la' ba Xanru', tscali' rizi'ili' bō'!

¡Guli'cu'ē yōl-la' ba Xanru'!

DIDZA' DXI'A BUZÚAJĚ' MATEO

*Yugu' xuz xině'e gudōdi queě' Jesús
(Lc. 3:23-38)*

¹ Ni ruzúaja' lágaquiě' xuz xině'e gudōdi queě' Jesucristo. Nabábagaquiě' David, enca' Abraham xuz gudōdi queě'.

² Abraham gúquiě' xuzě' Isaac.

Isaac gúquiě' xuzě' Jacob.

Jacob gúquiě' xúzgaquiě' Judá, en yugu' bōnni' bōchě'ě.

³ Judá gúquiě' xúzgaquiě' Fares, en Zara, ate' Tamar gúcanu xiná'agaquiě'.

Fares gúquiě' xuzě' Esrom.

Esrom gúquiě' xuzě' Aram.

⁴ Aram gúquiě' xuzě' Aminadab.

Aminadab gúquiě' xuzě' Naasón.

Naasón gúquiě' xuzě' Salmón.

⁵ Salmón gúquiě' xuzě' Booz, ate' Rahab gúcanu xině'ě.

Booz gúquiě' xuzě' Obed, ate' Rut gúcanu xině'ě.

Obed gúquiě' xuzě' Isaí.

⁶ Isaí gúquiě' xuzě' David.

David na' gunná bé'eně' bōnachi Israel, ate' butsaga ná'alene'-nu nigula na' gúcanu zí'aló nigula queě' Urías, ate' David, en nigula ni guláquiě' xuz xině'ě Salomón.

⁷ Salomón gúquiě' xuzě' Roboam.

Roboam gúquiě' xuzě' Abías.

Abías gúquiě' xuzě' Asa.

⁸ Asa gúquiě' xuzě' Josafat.

Josafat gúquiě' xuzě' Joram.

Joram gúquiě' xuzě' Uzías.

⁹ Uzías gúquiě' xuzě' Jotam.

Jotam gúquiě' xuzě' Acaz.

Acaz gúquiě' xuzě' Ezequías.

¹⁰ Ezequías gúquiě' xuzě' Manasés.

Manasés gúquiě' xuzě' Amón.

Amón gúquiě' xuzě' Josías.

¹¹ Josías gúquiě' xúzgaquiě' Jeconías, en yugu' bōnni' bōchě'ě.

Yugu' bōnni' ni gula'cu'ě dza ni' cate' yugu' bōnni' Babilonia gula'chě'ě bōnachi Israel nadzúngaca lu xiyúgaquiě'.

¹² Jeconías gúquiě' xuzě' Salatiel.

Salatiel gúquiě' xuzě' Zorobabel.

¹³ Zorobabel gúquiě' xuzě' Abiud.

Abiud gúquiě' xuzě' Eliaquim.

Eliaquim gúquiě' xuzě' Azor.

¹⁴ Azor gúquiě' xuzě' Sadoc.

Sadoc gúquiě' xuzě' Aquim.

Aquim gúquiě' xuzě' Eliud.

¹⁵ Eliud gúquiě' xuzě' Eleazar.

Eleazar gúquiě' xuzě' Matán.

Matán gúquiě' xuzě' Jacob.

¹⁶ Jacob gúquiě' xuzě' José.

José ni gúquiě' bōnni' queěnu María, ate' María ni gúcanu xině'ě Jesús, lě' ca' Cristo, Bōnni' na' tun lōza bōnachi judío guídě' idinná bé'eně' légaquiě'.

¹⁷ Caní naca, gulaca chidá' cō' di'a dza ga gusí lo zoě' Abraham ga bidxintě zoě' David, ate' gulaca ca' ia'chidá' cō' di'a dza ga gusí lo zoě' David ga bidxintě dza yugu' bōnni' Babilonia gula'chě'ě bōnachi Israel nadzúngaca, ate' gulaca ca' ia'chidá' cō' di'a dza ga gusí lo dza ni' gula'chě'ě léguequi ga bidxintě dza guljě' Cristo.

*Yugu' le guca cate' guljě' Jesucristo
(Lc. 2:1-7)*

¹⁸ Caní guca cate' guljě' Jesucristo. Cate' ni' chinazí lu ná'abi' María, xině'ě Jesucristo utsaga ná'alene'bi' José, en zí'atēlō cate' si' utsaga ná'alene'-bi', en cabí ne sóalene'-bi', gugu'ubi' tubi' bí'ido' lě'ēbi' María na'. Guca caní ni'a que yōl-la' huáca queě' Dios Bō' Lá'ayi.

¹⁹ Náquië José na, bönni' queëbi' María, bönni' tsahui', pero biti' gú'unnë' uzéguië'-bi' didza' lógaca bönachi. Gú'unnë' ulá'alenë'-bi' bagáchi'sö. ²⁰ Tsanni ni' rizá' ládxë'ë José ca na' gunë', bulufi' lahuë' gubáz lá'ayi queë' Xanru' lahuë' José lu yëla bëchigal, en gudxë' lë':

—José, xzí'ini xzí'sóë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bö' Lá'ayi. ²¹ Gáljabi' tubi' bi'i bönni'do' queëbi', ate' gu'u labi' Jesús, tu' usölábi' bönachi queëbi' lu dul-la' nabága'gaca.

²² Caní guca yúgu'të lë ni para gaca lë na' gunnë' Xanru' lu ru'ë bönni' bë'ë didza' uláz queë' Dios, gunné':

²³ Buli'yútsöca, tu nigula ra'bando',

tsú'ubi' bí'ido' lë'ëbi',

ate' gáljabi' tubi' bi'i bönni'do',

ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

²⁴ Cate' bubanë' José lu yëla bëchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. ²⁵ Biti' guzóalenë'-bi' cate' bidxinrö dza chigúlajbi' bi'i bönni'do' queëbi', bi'i zí'alö queëbi', ate' gulu'ë labi' Jesús.

2

Bönni' ta'yéajni'inë' ridiyúgaquië' bí'ido' Jesús

¹ Cate' gúlajbi' Jesús lu yödzo Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzo dë saca' ga rilén gubidza. ² Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bë'ëbi' bönachi judío, bí'ido' na' si' gúlajbi'? Cate' ni' zóatu' ga rilén gubidza bilé'etu'-ba' bôljaj bení' naca bë' chigúlajbi', ate' za tu' ni para tseaj ládxi'tu'-bi'.

³ Cate' gúquibe'enë' Herodes, bönni' rinná bë'ë, lë ni, guró'ödë' böniga, en lësca' caní gula'bó' böniga yúgu'të bönachi nacua' Jerusalén. ⁴ Ní'irö Herodes na' bulidzë' yúgu'të bixúz unná bë', len bönni' yudo' tu'sédinë', ate' gunábinë' légaquië' gazxi ral-la' galjé' Cristo, bönni' na' tunë' löza bönni' judío ilá' lahuë' para inná bë'enë' légaquië'. ⁵ Të' lë':

—Lu yödzo Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna cani:

⁶ Biti' nácarö cá'asö yödzo Belén luyú Judá lahuë' Dios

ca nácagaca yödzo gapa nacua' nupa ta'nná bë' luyú ni,

tu' irúajë' tu bönni' yödzo Belén, en gáquië' lo,

bönni' na' gun chí'ë bönachi Israel quia'.

⁷ Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inözinë' dxi'a gáca'xte chiguca bulufi' lahui bôljaj na' bila'lé'enë'. ⁸ Ní'irö gusöl-lë'ë légaquië' tsójáquië' Belén. Rë' légaquië':

—Guli'tséaj ni', en guli'tsójnaba dxi'a nacxi naca queëbi' bí'ido' na'. Cate' chibidzölili'-bi', ididixjör'ili' neda', para tseja' ca' neda', tseaj ládxa'a-bi'.

⁹ Gudödi bila'yönnë' didza' bë'ë Herodes na', sójáquië' bönni' ta'yéajni'inë' na', ate' bôljaj na' bila'lé'enë' cate' ni' nacu'ë ládzagaquië' sójnóruba' lógaquië' ga bidxintë yösóa ga na' dëbi' bí'ido' na'. ¹⁰ Cate' bila'lé'enë' bôljaj na', bulu'dzëjade'enë'. ¹¹ Cate' gula'yázië' yu'u, bila'lé'enë'-bi' bi'i bönni'do' na', zóalenbi'-nu María, xiná'abi'. Bulu'zóa zxi'bigaquië' lobi', en gula'yéaj ládxi'gaquië'-bi'. Gudödi na' gula'saljé' yugu' yôxaj quégaquië', ate' bulu'nödzjé' queëbi' oro, en yalaj, en nörído' rilá' zxi'xi que yaga mirra. ¹² Tu' chibuzéajni'inë' Dios légaquië' lu yëla bëchigal para cabí tsójhuójquië' ga zoë' Herodes na', que lë ni na' yójhuójquië' ládzagaquië' nöza yúbölö.

José, en María, ta'chë'ë-bi' Jesús luyú Egipto

¹³ Gudödi bulu'zë'ë yugu' bönni' ta'yéajni'inë' ni', bulufi' lahuë' tuë' gubáz lá'ayi queë' Xanru' lu yëla bëchigal, ga na' dë' José, en rë' lë':

—Guyaschi. Guchë'-bi' bí'ido' ni, enca' xiná'abi', ate' buzunnaj ni. Guyéaj luyú Egipto, ate' ugá'anu' ni' cate' guiëra' li' ia'tú. Caní gunu' tu' uguiljé' Herodes bí'ido' ni para gútië'-bi'.

¹⁴ Ní'irö guyasë' José, en ni' naca chí'i dzó'ölö, guchë'ë-bi' bí'ido' na', enca' xiná'abi', ate' yójáquië' luyú Egipto. ¹⁵ Bulu'gá'anë' ni' cate' gütirë' Herodes. Caní guca para gaca lë na' gunné' Xanru' Dios lu ru'ë tu bönni' bë'ë didza' uláz queë', gunné': “Ga naca luyú Egipto bulidza' Xzí'ina'.”

Risöl-lë'ë Herodes bönni' ilútië'-bi' bi'i huë'énido' nacua'abi' yödzo Belén

¹⁶ Cate' gúquibe'enë' Herodes biti' gulunë' bönni' ta'yéajni'inë' ca rnnë', gulénë', ate' gunná bë'enë' bönni' tsójáquië' ni' para ilútië'-bi' yúgu'tëbi' bi'i bönni'do' nacua'abi' yödzo Belén, en idú gásibi'ilö ga dë Belén na', yugu' bí'ido' chiyú'ugacabi' chopa iz, en bí'ido'

nahuë'ë nigacaröbi'. Caní benë' ca busáquië' queë' Herodes na', tsca chiguca dza buluí'i lahui bölj na', dza na' bulu'zéajni'inë' bönni' ta'yéajni'inë' na' lë'. ¹⁷ Caní guca, bidxin lë na' gunné' Jeremías, bönni' bë'ë didza' uláz queë' Dios, gunné':

¹⁸ Lu yödzo Ramá riyön chí'igaca

nupa ta'bödxi, en nupa ta'bödxi yechi'.

Raquel ribödxi nu ní'a quégacabi' xzí'ininu.

Biti' gaca nu huë tsahui' lënu, tu' chinátigacabi'.

¹⁹ Gudödi gütië' Herodes na', ní'irö buluí'i lahuë' gubáz lá'ayi na' queë' Xanru' lu yëla bëchigal lahuë' José ga ni' zoë' luyú Egipto, ate' rë' lë':

²⁰ —Guyasa. Guchë'-bi' bi'i bönni'do' ni, enca' xiná'abi, ate' böaj luyú Israel, tu' chigulatië' bönni' ni' gulë'ënnë' ilütië'-bi' bi'i bönni'do' ni.

²¹ Ní'irö guyasë' José, ate' guchë'-bi' bi'i bönni'do' na', enca' xiná'abi, ate' yöhuöjquië' luyú Israel. ²² Cate' gúquibe'enë' José rinná bë'ë Arquelao luyú Judea tu' chigütië' Herodes, xuzë' Arquelao na', que lë ni na' gúdxinë' José huöjë' ni'. Cate' buzéajni'inë' Dios lë' lu yëla bëchigal, guyijë' luyú Galilea. ²³ Cate' bidxinë' ni', yöjsöë' lu yödzo Nazaret. Caní guca para gaca lë na' gula'nnë' yugu' bönni' gulu'ë didza' uláz queë' Dios ca ral-la' gaca queë' Jesús, si' Lë', Bönni' Nazaret.

3

Juan, bönni' ruquilë' bönachi nisa runë' libán lu lataj cá'asö

(Mr. 1:1-8; Lc. 3:1-9, 15-17; Jn. 1:19-28)

¹ Yugu' lu dza ni' buluí'i lahuë' Juan, bönni' na' buquilë' bönachi nisa, en runë' libán lu lataj cá'asö luyú Judea. ² Juan na' rnnë':

—Buli'bi'i ládxi'li', tu' chizó'a idxín dza idinná bë' Nu na' zoa yehua' yubá luyú ni.

³ Ca naca queë' Juan na', buzúajë' Isaías, bönni' bë'ë didza' uláz queë' Dios dza ni'të, le rnna caní:

Riyön chí'ë bönni' rulidzë' lu lataj cá'asö, rnnë':

“Buli'pá'a nöza para idxín Xanru' ga zóali'.

Guli'béaj li yugu' nöza lasi tödë' lu icja ládxi'do'oli'.”

⁴ Nácuë' zxë' Juan lari' néquini lítsa'ba' böa', ate' núguë'ë lë'ë le néquini guídi. Rahuë'-ba' böchi'zu, en re'jë' bidxindo' que buzdo'. ⁵ Yugu' bönni' yödzo Jerusalén len bönachi narúajgaca idú luyú Judea, en idú gásibi'llö ga dë yegu Jordán bila'dxinë' ga zoë' Juan na'. ⁶ Cate' gula'xóalëpë' dul-la' nabága'gaquië', Juan na' buquilë' légaquië' nisa lu yegu Jordán na'.

⁷ Cate' bilé'enë' Juan ta'dxinë' zían bönni' yudo' fariseo len yugu' bönni' yudo' saduceo ga zoë' para ila'dilë' nisa, gudxë' légaquië':

—Libi'ili', di'a dza quégacaba' bëla sínia'. ¿Zoa nu buzéajni'i libi'ili' para izxúnajli' yöl-la' rusiúdxí na' si' gaca quégaca bönachi? ⁸ Guli'gún le gaca bë' chibubí'i ládxi'li'. ⁹ Biti' cuéqui ícjalí, bití innalí' nácalí' tsahui' tu' naca Abraham xuz gudödi queéli'. Rea' libi'ili', huáca gunë' Dios ga ulu'huóáca yugu' guió'j nacua' ni di'a dza queë' Abraham. ¹⁰ Chizó'a ribóza guíë huáca para ichugu yugu' yaga le ruluí' ca gaca queéli'. Yúgu'të yaga bití' ta'bía le naca dxi'a, irúgugaca, ate' ila'gu'ë léguelui lu guí'. ¹¹ Le nácatë neda' ruquila' libi'ili' nisa lu nisa, núlöli' chibubí'i ládxi'li', pero Bönni' na' ral-la' guíde' cate' tödi quia' neda', Lë' gunë' le ruluí'isó yöl-la' ridila nisa ni, uchizië' libi'ili' Dios Bö' Lá'ayi len guí' queë'. Bönni' ni nácatërë' lo ca neda', ate' neda' bití' naca' lesaca' ilecja' xiráchuë' nudë'ë. ¹² Zönë' lu në'ë böcö' queë', le ulúbinë' ga ridxi'a xzoa' xtíla queë'. Cu'ë xzoa' xtíla queë' lu yu'u ga ni' gun chí'ë le, pero uzégui'ë bëbu que lu guí', ate' guí' na' bití' ca' ulu.

Ridile' nisa Jesús

(Mr. 1:9-11; Lc. 3:21-22)

¹³ Ní'irö buzë'ë Jesús luyú Galilea, ate' bidxinë' ra' yegu Jordán ga na' zoë' Juan, para idilë' nisa lu në'ë Juan na'. ¹⁴ Juan buzáguë'ë xinözë', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

¹⁵ Bubi'ë didza' Jesús, rë' lë':

—Benna lataj na'a, tu' caní ral-la' gunru' idütë le naca tsahui'.

Ní'irö Juan bë'ë Lë' lataj. ¹⁶ Cate' chinadilë' Jesús nisa, la' burúajtë' lu nisa. Ní'irö guyalaj lúzxi'ba lahuë' Jesús, ate' bilé'enë' ruhuötjë' Dios Bö' Lá'ayi, en bidxinë' ga na' zoë', rinë'ë ca riná'aba' gu'dódo'. ¹⁷ Ní'irö biyön chí'i nu rufí didza' yehua' yubá, rnna:

—Bönni' ni náquië' Xzí'ina'. Nadxí'ida' Lë', en raza ládxa'a Lë'.

4

Rë'ëni Satanás tu' xihui' ibaga' Jesús dul-la'

(Mr. 1:12-13; Lc. 4:1-13)

¹ Ní'irò lá' guchè'tè' Dios Bò' Lá'ayi Jesús lu lataj cá'asò para gata' lataj si' bè' Satanás tu' xihui' Lè'.

² Idú choá' dza choá' yèla biti' bi gudahuè' Jesús, ate' gudödi ni' ridunè'. ³ Ní'irò tu' xihui', nu na' run ga tá'baga' bônachi dul-la', bidxín ga zoè' Jesús, en rè Lè':

—Channò nacu' idú Zxí'inè' Dios, gunná na'a ulu'huóaca guiöj nacuá' ni yöta xtila.

⁴ Bubi'è didza' Jesús, rè le:

—Nazúaj lu guichi lá'ayi le rnna: “Calègasö yöta xtila nabánigaca bônachi, pero lèsc'a' yúgu'tè didza' ru'è Dios nabánigaca bônachi.”

⁵ Ní'irò tu' xihui' guchè' Jesús lu yödzo lá'ayi Jerusalén, ate' budxía Lè' ga naca xitsá' ícjo'olò yudo'. ⁶ Ní'irò tu' xihui' rè Lè', rnna:

—Channò nacu' Li' idú Zxí'inè' Dios, busuladzu' cuinu' ni, tu' nazúaj lu guichi lá'ayi le rnna:

Dios isöl-lè'è gubáz lá'ayi queè' para ilún chi'è Li',

ate' ulu'chisè' Li' lu ná'agaquiè',

para cabí tsöjchégu'u guiöj, en cabí gunu' zi' ni'u.

⁷ Bubi'è didza' Jesús, rè le:

—Ia'stú nazúaj lu guichi lá'ayi, le rè bônachi, rnna: “Biti' ugunu' dxin Xanu' Dios.”

⁸ Ní'irò tu' xihui' guchè' Jesús ga naca tu lu gu'a sibi, ate' ni' bulufi' Lè' yúgu'tè yödzo nacuá' yödzo'lió ni, en yúgu'tè yöl-la' tsahui' quéguequi. ⁹ Ní'irò rè Lè':

—Yúgu'tè lè ni udöda' lu no'o channò uzöa zxibu' lahua', en gunu' neda' zxön.

¹⁰ Jesús rè le:

—Böaj quui' li', Satanás tu' xihui', tu' nazúaj lu guichi lá'ayi le rè netu', rnna: “Xanu' Dios tseaj ládzu'u, en udödi cuinu' lu na' tuzè' Lè'.”

¹¹ Ní'irò buzá' Satanás tu' xihui' ga na' zoè' Jesús, ate' gubáz lá'ayi queè' Dios bila'dxinè' ga zoè', en gulácalenè' Lè', en gula'gu'è le gudahuè'.

Risí lahuè' Jesús runè' libán luyú Galilea

(Mr. 1:14-15; Lc. 4:14-15)

¹² Cate' biyönnè' Jesús nadzunè' Juan lidxi guiè, guyijè' luyú Galilea. ¹³ Buzè'è yödzo Nazaret, ate' yöjsöè' lu yödzo Capernaum ga naca ra' nísado', lu buzá' quégaca bônachi Zabulón, en bônachi Neftalí. ¹⁴ Caní guca, bidxín lè na' gunnè' Isaías, bönni' bè'è didza' uláz queè' Dios, gunnè':

¹⁵ Luyú Zabulón, en luyú Neftalí,

la' nöza ra' nísado' ia'tsölá'a yegu Jordán saca' ga rilén gubidza.

Luyú Galilea, ga nacuá' bônachi biti' nácagaca judío.

¹⁶ Bônachi chul-la niti' ni' bila'lè'e bení,

ate' bönni' ni' nácagaquiè' ca nupa chinátigaca, gulén quégaquiè' bení.

¹⁷ Cate' ni'irò gusi lahuè' Jesús runè' libán, en rè' bônachi ni':

—Buli'bí'i ládxi'li', tu' chizóa idxín dza idinná bè' Nu na' zoa yehua' yubá luyú ni.

Jesús rulidzè' tapè' bönni' uzxön böla para tsöjtá'gaquiè' Lè'

(Mr. 1:16-20; Lc. 5:1-11)

¹⁸ Cate' gudè' Jesús ra' nísado' que Galilea, bilé'enè' chopè' bönni'. Tuè' lè' Simón, en zoa ia'tú lè' Pedro, ate' dzáguiè' Andrés, bönni' böchè'è, lè'. Chopè' ni ta'chiljè' yöxaj böla quégaquiè' lu nísado' na' tu' nácagaquiè' uzxön böla. ¹⁹ Jesús rè' légaquiè':

—Guli'dutá' neda', ate' guna' ga ichè'èli' bônachi quia', gunli' ca runli' rizönli'-ba' böla.

²⁰ Chopè' ni la' bulu'cá'anatè' yugu' yöxaj böla quégaquiè', ate' sôjácálenè' Jesús.

²¹ Cate' gudödè' Jesús ia'lati' ni'ilò, bilé'enè' ia'chopè' bönni'. Tuè' lè' Jacobo, ate' dzáguiè' Juan, bönni' böchè'è lè'. Nácagaquiè' zxi'inè' Zebedeo. Nacu'è lè'e bárcodo' dzégaquiè' Zebedeo, xúzgaquiè', en tu'únè' yöxaj böla quégaquiè'. Ní'irò Jesús bulidzè' chopè' ni para tsöjtá'gaquiè' Lè'. ²² La' bulu'cá'anatè' bárcodo' na', enca' xúzgaquiè', ate' sôjácálenè' Jesús.

Jesús rusédinè' bônachi zían

(Lc. 6:17-19)

²³ Gudè' Jesús idú luyú Galilea, rusédinè' bônachi gapa naca lu yu'u ga tu'dubè' bönni' judío, en tu'sèdè' queè' Dios. Benè' libán ni' que didza' dxi'a ca si' idinná bè'è Dios luyú ni', en bunè' yúgu'tè nupa te'e tsc'a naca yödzo'huè' té'eguequi. ²⁴ Guzè' didza' que yöl-la' huáca queè' Jesús, ate' bila'yöni bônachi idú luyú Siria, ate' dujuá'gaquiè' yúgu'tè bönni' té'enè' zían yödzo'huè' que quégaquiè', en ta'guí'i ta'zaquiè', ga zoè' Jesús. Dujuá'gaquiè' ca' yugu' bönni' yú'ugaquiè' bó' xihui', en yugu' bönni' té'enè' huè' xjote', en yugu' bönni' nacú'unigaquiè' bin ni'a ná'agaquiè', ate' Jesús bunè' yúgu'tè bönni' na'. ²⁵ Bônachi zían bila'rúajgaca luyú Galilea, en yugu' yödzo Decápolis, en yödzo Jerusalén, enca' luyú Judea, en yugu' yödzo nacuá' ia'tsölá'alò yegu Jordán saca' ga rilén gubidza, ate' rójácálen Jesús.

5

Libán benë' Jesús ga naca lu guí'ado'
(Lc. 6:20-23)

¹ Cate' bilé'enë' Jesús bönachi zían sōjácálen Lë', ní'irō gurenë' tu lu guí'ado' ga naca xitsá'alō, ate' gurō'ē lu guí'a nī'. Ní'irō bulu'dubē' bōnni' usēda queē' ga zoē'. ² Gusí lahuē' rusédinē' légaquiē', rñnē':

³ —Bica' ba yugu' bōnni' téquibe'enē' ta'yádzjanē' le naca queē' Dios, tu' nadéli'gaquiē' lataj ga rinná bē'ē Bōnni' na' zoē' yehua' yubá.

⁴ Bica' ba yugu' bōnni' tu'huí'ini lādxi'gaquiē' tu' nabága'gaquiē' dul-la', tu' huē' tsahuē'ē Dios caz légaquiē'.

⁵ Bica' ba yugu' bōnni' nácagaquiē' nōxaj lādxi' lahuē' Dios, tu' gata' quégaquiē' luyú ni.

⁶ Bica' ba yugu' bōnni' ta'zē lādxi'gaquiē' le naca tsahui' lahuē' Dios, ate' raca quégaquiē' ca raca quégaca nupa ta'dún, en ta'bídxi nisa, tu' gunē' Dios ga ulu'zī'ē xibé lē na' ta'zē lādxi'gaquiē'.

⁷ Bica' ba yugu' bōnni' tu'huechi' lādxi'gaquiē' luzá'agaquiē', tu' huéchi' lādxē'ē Dios légaquiē'.

⁸ Bica' ba yugu' bōnni' naca tsahui' icja lādxi'do'gaquiē', en bití' bi dul-la' nabága'gaquiē', tu' ila'lē'enē' Dios.

⁹ Bica' ba yugu' bōnni' ta'bequi dxiē' didza' bizxaj, tu' ila'zī' lāgaquiē' xzī'ini cazē' Dios.

¹⁰ Bica' ba yugu' bōnni' ta'zaca' ta'gui'ē lu le ta'bía lādxi'gaca bōnachi légaquiē' cate' tunē' le naca tsahui', tu' dē lataj quégaquiē' ga rinná bē'ē Bōnni' na' zoē' yehua' yubá.

¹¹ Bica' ba libí'ili' cate' tu'lidza bōnachi libí'ili' zī', en ta'bía lādxi'gaquiē' libí'ili', ate' lu yōl-la' rizi' yē' ta'nnē' queēli' le xihui' tu' dá'ali' neda'. ¹² Buli'dzeja, en guli'chaza lādxi'li', tu' uzi'dá'ali' xibé yehua' yubá. Ca raca queēli', guca quégaquiē' bōnni' gulu'ē didza' uláz queē' Dios, en gula'cu'ē zī'atēlō ca libí'ili', tu' gula'bía lādxi'gaca ca' bōnachi légaquiē'.

Bōnachi dá'gaca Cristo ilaca ca zōdi', en ca bení'
(Mr. 9:50; Lc. 14:34-35)

¹³ Gunnē' ca' Jesús:

—Libí'ili' nácali' ca zōdi' luyú ni, pero channō initi zōdi' na' yōl-la' siná'a que, bití' gaca gunru' ga huóaca siná'a. Bití'rō naca lesaca', pero chinaca tu le chú'unaru', ate' ulu'libi bōnachi le.

¹⁴ Libí'ili' nácali' ca bení' yōdzólió ni para ulu'ili' lahui le naca queē' Dios. Ral-la' gácali' ca tu yōdzō rō'ō tu lu guí'a, tu' cabí gaca igachi' yōdzō na'. ¹⁵ Cate' ruquéla'ru' guí', bití' rigú'uru' le tu zxan guí'ina, pero ruzóaru' le ga liná' para uzení' yúgu'tē nupa nacuá' lu yu'u. ¹⁶ Ca na' run bení', ral-la' gunli' ca' libí'ili', guí'ili' lataj gaca bē' le nácali' lógaca yúgu'tē bōnachi, para cate' ila'lē'ē le naca tsahui' runli', ila'gú'u-nē' Xúzili' Dios zoē' yehua' yubá yōl-la' ba.

Rusédinē' Jesús que le gunná bē'ē Dios lu nē'ē Moisés

¹⁷ Gunnē' ca' Jesús:

—Bití' guéquili' bida' para usunítia' yugu' le gunná bē'ē Moisés, o xibá na' bulu'sédinē' bōnni' gulu'ē didza' uláz queē' Dios. Bida', calēga para usunítia' yugu' lē na', pero para ulu'a lahui idútē le tu'sedi lē na'. ¹⁸ Le nácátē rea' libí'ili'. Tsanni nacuá' lúzxiba, en yōdzólió ni, bití' tōdi cá'sō nitú dídza'do', en nitú le rinná bē' xibá na', cate' gácarō yúgu'tē le ral-la' gaca. ¹⁹ Que lē ni na', nūti'tēs bōnni' quítsjē' tu xibá cuídí'do'os le zoa lu xibá na', en usédinē' bōnachi para ilún caní, bōnni' ni gácatērē' cuídí'do'os ca yúgu'tē nupa ila'cuá' ga rinná bē' Bōnni' na' zoē' yehua' yubá, pero nūti'tēs bōnni' gunē' ca rinná bē' xibá na', en usédinē' bōnachi para ilún ca' caní, bōnni' ni tsēpisētērē' ga rinná bē' Nu na' zoa yehua' yubá. ²⁰ Rea' ca' libí'ili': Channō cabí gunli' le nácátērō tsahui' ca le tunē' bōnni' yudo' usedi, enca' ca tunē' bōnni' yudo' fariseo, bití' ca' tsú'uli' ga rinná bē'ē Dios yehua' yubá.

Rusédinē' Jesús ca naca que nu rilé luzē'e
(Lc. 12:57-59)

²¹ Gunnē' ca' Jesús:

—Chibiyōnili' ca gula'nnē' bōnni' guta' lu ná'agaquiē' le gulē' xuz xtó'oli': "Bití' gútili' bōnachi. Nu bōnni' gútiē' bōnachi, nabáguē'ē xíguia', ate' huadxinē' ga uchi'a usōrōē' Dios lē'." ²² Na'a, neda' rea' libí'ili': Nu bōnni' rilenē' bōchi' luzē'ē, nabáguē'ē xíguia' huadxinē' ga uchi'a usōrōē' Dios lē'. Lēscá' caní, nu bōnni' innē' zī'ē queē' bōchi' luzē'ē nabáguē'ē xíguia' ulu'chi'a ulu'sōrōē' bōnni' lo tu'chi'a tu'sōrōē' lē', ate' nu bōnni' guíē' luzē'ē: "¡bōa' canōzi!" nabáguē'ē xíguia' tsōjtsu'ē lu guí' gabila.

²³ Caní naca, channō chizó'a cu'u tu le unōdzju' lu bucugu lá'ayi, ate' tsōjnenu' nī' zoa bizx que rilenē' bōchi' luzó'o li', ²⁴ bucá'ana lē na' unōdzju' lu bucugu nī', en bōaj lidxu'. Zí'alō yōjcá'ana tsahui' le benu' queē' bōchi' luzó'o, ate' ní'irō gudá unōdzju' lē na' nu'u.

²⁵ 'Channò zoa nu bönni' rinábiné' li' bi ubi'u queé', en iché'è li' ga uchi'a usöröé' tu bönni' li', budzágaté tsahui' bönni' na' tsanni ni' yú'ulenu' lè' nòza, para cabí udödè' li' lahué' bönni' ruchi'a rusöröé', ate' bönni' ni udödè' li' lu nē'è bönni' rusayjé' lidxi guié, ate' lè' cu'è li' lidxi guié na'. ²⁶ Le nácaté rea' li', bití' ca' uruju' ni' cate' idxinrö dza quizzju' ga buitè le ral-lu'u.

Rusédiné Jesús ca naca que nu riguitsaj xibá que yöl-la' nutsaga na'

²⁷ Gunné' ca' Jesús:

—Chibiyónili' ca na' gula'nné': "Biti' gunu' dul-la' le riguitsaj xibá que yöl-la' nutsaga na'." ²⁸ Na'a, neda' rea' libí'ili': Núti'tés bönni' ruyúé' tu nígula len yöl-la' rizé ladxi' le ruá' dö', chibené' dul-la' len lènu lu icja ládxi'da'ahué'.

²⁹ Que lè ni na', channò guiój lo' ibèla gun ga gunu' dul-la', guléaj le, en gurú'una le. Gácarö dxi'a quiu' unítu' tu guiój lo', en calèga idúteo' tsöjtsú'u lu guí' gabila. ³⁰ Channò no'o ibèla gun ga gunu' dul-la', guchugu le, en gurú'una le. Gácarö dxi'a quiu' unítu' tu no'o, en calèga idúteo' tsöjtsú'u lu guí' gabila.

Rusédiné Jesús ca naca que nu bönni' rulá'alené' nigula queé'

(Mt. 19:9; Mr. 10:11-12; Lc. 16:18)

³¹ Gunné' ca' Jesús:

—Lësca' gula'nné': "Núti'tés bönni' rusané'-nu nígula queé', ral-la' unödzejé' queénu tu guichi le rnna rulá'alené'-nu." ³² Na'a, neda' rea' libí'ili', channò zoé' nu bönni' rusané'-nu nígula queé', en bití' zoa le ruá' dö' runnu, guné' bönni' na' ga gunnu dul-la' le riguitsaj xibá que yöl-la' nutsaga na' channò utsaga ná'lennu bönni' yúbölo, ate' bönni' na' si'è-nu nígula na', lësca' guné' dul-la' le riguitsaj xibá que yöl-la' nutsaga na'.

Rusédiné Jesús ca naca que nu ruzötaj La la'ayi queé' Dios

³³ Gunné' ca' Jesús:

—Lësca' biyónili' ca yugu' bönni' guta' lu ná'agaquié' gulé' xuz xtó'oli', gula'nné': "Biti' si' yé'u cate' run tsutsu xtídz'u ni'a queé' Dios, en ral-la' gunu' lahué' Xanru' Dios idútè lè na' run tsutsu xtídz'u ni'a queé' Lè'." ³⁴ Na'a, neda' rea' libí'ili', bití' ca' gun tsutsu xtídz'a li'. Biti' gun tsutsu xtídz'a li' ni'a que yehua' yubá, tu' naca ga rō'è rinná bē'è Dios. ³⁵ Biti' gun tsutsu xtídz'a li' ni'a que luyú ni, tu' naca luyú ni ca xilibi ni'è Dios, en calèga ni'a que Jerusalén, tu' naca ladzè' Bönni' nayépisètèrè' rinná bē'è. ³⁶ Biti' gun tsutsu xtídz'u ni'a que icju', tu' cabi gaca gunu' ga huóaca chiguichi o gasaj nitú guitsa' icju'. ³⁷ Ral-la' innásili': "Ön", o innásili': "Biti", tu' naca que tu' xihui' le nadódi bē' ca náacagaca didza' ni.

Rusédiné Jesús ca naca que nu ruzí' lēbi luzē'e

(Lc. 6:29-30)

³⁸ Gunné' ca' Jesús:

—Chibiyónili' ca naca le gunná bē'è Moisés, gunné': "Nu bi run que guiój lahui luzē'e, ubí'i ca' que, enca' nu bi run que layí' luzē'e, ubí'i ca' que." ³⁹ Na'a, neda' rea' libí'ili': Biti' tá'baga'li' nu guá' dö' queéli', ate' channò nu capa' xagu' ibèla, bē' lataj capa' ca' ia'tú xagu' yögöla. ⁴⁰ Channò zoa nu gun ga uchi'a usöröé' tu bönni' li', en cué' xzo', bē' ca' queé' lari' rixóa cúdzu'u. ⁴¹ Channò zoa nu gun bayudxi gu'u yua' que tu chi'i, guyéajlen nu na' chopa chi'i. ⁴² Nu bi rinábini li', bunódzaj que, en nu bi gué'eni gunnu' que tu chi'i, bití' tá'bagu' le lè na' inabi li'.

Rusédiné Jesús ca ral-la' idxi'iru' nupa bití' ta'lé'e rē'u dxi'a

(Lc. 6:27-28, 32-36)

⁴³ Gunné' ca' Jesús:

—Lësca' caní biyónili' lè na' gula'nné': "Ral-la' idxi'inu' nu nadxí'i li', en udí'inu' nu bití' rilé'e li' dxi'a." ⁴⁴ Na'a, neda' rea' libí'ili', guli'dxi'i nupa bití' ta'lé'e libí'ili' dxi'a. Guli'nábiné' Dios gácalené' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzè' Dios inábili'-nè' guné' ga gaca dxi'a quégaca nupa ta'nné' queéli', en tuá' dö' queéli'. ⁴⁵ Channò gunli' caní, gácali' zxi'ini cazè' Xúziru' Dios, zoé' yehua' yubá, tu' runé' Lè' ga ruzení' gubidza queé' ga nacua' bönachi tuá' dö', enca' ga nacua' bönachi tsahui'. Risöl-lé'è tu nisa guiój lu yu quégaca bönachi tsahui', enca' lu yu quégaca bönachi bití' náacagaca tsahui'. ⁴⁶ Channò nadxí'isili' bönni' nadxí'iguequiné' libí'ili', çnuzxi caz cu'u libí'ili' yöl-la' ba? Lësca' caní tuné' bönni' bití' náacagaca tsahui' na', bönni' tu'quizzjé' uláz que yödzo zi'tu', nadxí'iguequiné' luzá'agaquié'. ⁴⁷ Channò rugápali' Dios tuzé' bôchi' luzá'ali', çbizzi caz runli' le nácatèrö dxi'a? Lësca' caní tuné' bönni' bití' núnbé'gaquié' Dios. ⁴⁸ Pero libí'ili', guli'gaca idú tsahui', ca na' náquié' Xúziru' Dios, zoé' yehua' yubá, náquié' idú tsahui'.

¹ Gunnë' ca' Jesús:

—Gulí'güf' ládxi'li' gaca idú ca reaj ládxi'li'-në' Dios. Biti' gúnsili' lë ni lógaca bönachi para ila'lé'e ca na' runli'. Channö runli' caní, bití' bi' gunnë' Xúziru' Dios zoë' yehua' yubá queëli'. ² Cate' bi' unödzu' que nu bi' riyadzaj, bití' gunu' ga ilá' lahui lë na' runu' ca tunë' bönni' tu'luf'isö tsahui' cuíngaquië' ga naca lu yu'u ga tu'dubë' bönni' judío, en tu'sëdë' queë' Dios, enca' ga naca lu yë'ëyi. Caní tunë' para ila'gú'u bönachi légaquië' yöl-la' ba. Le nácatë rea' libí'ili', cá'asö naca yöl-la' ba gata' quégaquië'. ³ Pero lí', cate' bi' unödzu' que nu bi' riyadzaj, bití' ca' gu'u lataj nu inözi. ⁴ Na'a, lë na' unödzu', bagáchi'sö ral-la' unödzu', ate' Xúziru' Dios, Nu rilé'e ca na' runu' bagáchi'sö, Lë' ubi'ë quiu'.

Rusédinë' Jesús ca ral-la' ulídzarú'-në' Dios

(Lc. 11:2-4)

⁵ Gunnë' ca' Jesús:

—Cate' ulídzali'-në' Dios, bití' gunli' ca tunë' bönni' tu'luf'isö tsahui' cuíngaquië', tu' ta'yaza ládxi'gaquië' ta'zuínë' tu'lidzë' Dios gapa naca lu yu'u ga tu'dubë' tu'sëdë' bönni' judío queë' Dios, en gapa naca lu yë'ëyi para ila'lé'e bönachi légaquië'. Le nácatë rea' libí'ili', cá'asö naca yöl-la' ba gata' quégaquië'. ⁶ Pero libí'ili', cate' ulídzali'-në' Dios guli'tsaza lídxi'li', en buli'sayaj yu'u. Buli'lidzë' Dios inábili'-në' Xúziru' Dios, zóalenë' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lë' ubi'ë queëli'.

⁷ 'Cate' ulídzali'-në' Dios bití' gunli' la' yë'ëyi la' lez ca na' tunë' bönni' bití' núnbë'gaquië' Dios, tu' téquinë' huayönnë' Dios légaquië' tu' tu'lidzë' la' yë'ëyi la' lez. ⁸ Bití' gunli' ca na' tunë' légaquië', Xúziru' Dios, zí'atëlö cate' si' inábali'-në', chinöz quézinë' le riyadzaj queëli'. ⁹ Que lë ni na', ral-la' ulídzali'-në' Dios innali' caní:

Xuz netu', zu' yehua' yubá, gaca xzön Lo'.

¹⁰ Gudá inná bë'u luyú ni.

Ben ga gaca luyú ni ca raza ládxi'u Li'

ca na' raca yehua' yubá.

¹¹ Benna le gágutu' na'a dza.

¹² Buniti lo netu' le huiá' dö' bentu' Lo' Li'

ca runtú' netu', runiti lotu' nupa bi' tun queëtu'.

¹³ Bití' gu'u lataj si' bë' tu' xihui' netu',

pero busólá netu' lu na' nu ruá' dö'.

Nequi quiu' ga rinná bë'u, en yöl-la' unná bë', en yöl-la' ba.

Caní rë'ënitú' gácatíca'sö. ¡Ca' gaca!

¹⁴ 'Channö uniti loli' luzá'ali', nupa tuá' dö' queëli', uniti lahuë' Xúziru' Dios, zoë' yehua' yubá, libí'ili'. ¹⁵ Channö cabí uniti loli' luzá'ali', bití' uniti lahuë' Xúziru' Dios libí'ili' ca naca dul-la' nabága'li'.

Rusédinë' Jesús ca ral-la' gunru' gubasa

¹⁶ Gunnë' ca' Jesús:

—Cate' gunli' gubasa, bití' gunli' bayechi' loli' ca tunë' bönni' tu'luf'isö tsahui' cuíngaquië', tu' tunë' bayechi' lógaquië' para iléquibe'e bönachi tunë' gubasa. Le nácatë rea' libí'ili', cá'asö naca yöl-la' ba gata' quégaquië'. ¹⁷ Libí'ili', cate' gunli' gubasa, buli'pá'a ícjali', en guli'quibi loli', ¹⁸ para cabí iléquibe'e bönachi runli' gubasa. Bagáchi'sö ral-la' gunli' gubasa, ate' Xúziru' Dios, zóalenë' libí'ili' ga na' zóali' queézili', Lë' ubi'ë queëli'.

Yehua' yubá ral-la' utúbiru' yöl-la' tsahui' queëru'

(Lc. 12:33-34)

¹⁹ Gunnë' ca' Jesús:

—Bití' utúbili' yöl-la' tsahui' luyú ni, ga ni bëlado' que tu'töba' le, ate' raca ditaj, en ga ni ta'yaza gubán, ta'banë'. ²⁰ Buli'tubi yöl-la' tsahui' yehua' yubá, ga ni' bëlado' que bití' ulu'töba' le, en bití' gaca ditaj, en ga ni' bití' ila'yázië' bönni' gubán, en bití' ila'banë'. ²¹ Ga ni' dë yöl-la' tsahui' queëli', ni' güf'i ládxi'li' idxinli'.

Le rigú'u bení' icja ládxi'do'oru'

(Lc. 11:34-36)

²² Gunnë' ca' Jesús:

—Guiöj loru' naca ca tu le rigú'u bení' icja ládxi'do'oru'. Que lë ni na', channö guiöj loli' naca tsahui', idútëli' tsépili' yösa bení'. ²³ Channö guiöj loli' bití' naca tsahui', idútëli' nachúl-lali'. Que lë ni na', channö bení' zóalen libí'ili' nuhuóaca le naca chul-la, yénni'tërö nachúl-lali'.

Dios, en dumí

(Lc. 16:13)

²⁴ Gunnë' ca' Jesús:

—Cuntu nu bönni' gaca gunë' xichíngaquië' chopa xanë', tu' uzóë' tuë' tsölá'alö, ate' ia'tué' na' idxi'inë', o ugá'analënë' tuë', ate' ia'tué' na' usán ládxë'ë. Biti' gaca gunli' xichinë' Dios, enca' dumí.

Dios rapa chi'ë nupa néquiquequi queë'

(Lc. 12:22-31)

²⁵ Gunnë' ca' Jesús:

—Ia'stú rea' libí'ili': Biti' ubi uguf'ili' ni'a que le gáguli' o ni'a que le guí'jali', yugu' le nabánili', o ni'a que lari' gáguli'. Nazáca'tërö yöl-la' na'bán queëli' ca le gáguli', ate' nácatërö lesaca' le nácali' ca lari' gáguli'. ²⁶ Buli'yú ca raca quégacaba' biguínido' ta'daba' lúzxiba. Biti' bi taz tu'zóaba', en biti' tu'lápaba', en biti' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë' légacaba'. Nazáca'tëröli' libí'ili' ca yugu' biguínido' na'. ²⁷ ¿Nuzxi caz bönni' nútsë'ë ládjali' gaca gunë' ga soë' ibanë' ia'túz dza tu' ruúbi ruguf'inë' para gaca caní queë'?

²⁸ ¿Bizx que ruúbi ruguf'ili' ni'a que le gáguli'? Buli'yútsöca' ca raca quégaca yöjdo' rő'gaca la' guixi' ca ta'zxön. Biti' tun dxin, en biti' tun du lari'. ²⁹ Neda' rea' libí'ili', Salomón, bönni' ni' gunná bē'ë, sal-la' gúta'da' yöl-la' tsahui' queë', lari' gúcuë' biti' gunná'tërö lachi ca rinná'gaca yöjdo' na'. ³⁰ Dios caz runë' lachi yöj guixi'do', le rő'gaca la' guixi', le nacua' na'a dza, ate' cuxó huidzaj ila'yegui lu guí'. Channö caní ruí' ládxë'ë yöj guixi'do', runë' léguequi lachi, gúnda'arë' ca queëli', sal-la' biti' réajlë'ëli'-në' idú ládx'i'li'. ³¹ Que lë ni na', biti' ubi uguf'ili', en biti' innali': "¿Bizxi gágutsatu?" o "¿Bizxi guí'jatsatu?" o "¿Bizxi lari' gágutsatu?" ³² Bönachi yödžölió ni tu'ubi tu'guí' ni'a que yúgu'të lë ni, pero zoë' Xúziru' yehua' yubá, ate' Lë' nözinë' naquínili' yúgu'të lë ni. ³³ Na'a, guli'güf'irö ládx'i'li' inná bé'enë' Dios libí'ili', en gunli' le naca tsahui' lahuë' Lë', ate' Lë' cu'ë xinözali' yúgu'të lë ni. ³⁴ Que lë ni na', biti' ubi uguf'ili' ni'a que le ral-la' gaca cuxó huidzaj, tu' huáca güf'i ládx'i'li' cuxó huidzaj le gaca queëli' dza na'. Tu tu dza ilaca le ral-la' güf'i ládx'i'li' dza na'.

7

Biti' ral-la' ichugu bē'ëru' böchi' luzá'aru'

(Lc. 6:37-38, 41-42)

¹ Gunnë' ca' Jesús:

—Biti' ichugu bē'ëli' böchi' luzá'ali', para cabí ichugu bē'ë Dios queëli', ² tu' ichugu bē'ë Lë' queëli' la' leze ca na' richugu bē'ëli' queë' böchi' luzá'ali', ate' ca na' rurixi rudödi' que luzá'ali', la' cá asö urixi udödë' Dios queëli'. ³ ¿Bizx que ruyú' bēbudo' yu'u guiöj lahuë' böchi' luzó'o, en biti' réquibe'enu' yu'u le zxöntërö guiöj lo' li'? ⁴ ¿Guíëtso' böchi' luzó'o: "Gulöz, cueja' bēbudo' yu'u guiöj lo", ate' li' le zxöntërö ca' yu'u guiöj lo' li'? ⁵ Li', bönni' rulu'isö tsahui' cuinu'. Gulëaj zí'alö le zxön yu'u guiöj lo' li', ate' ní'irö ilé'enu' tsahui'do' para gaca cueju' bēbudo' yu'u guiöj lahuë' böchi' luzó'o.

⁶ Biti' güf'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en biti' chú'unali' le naca lesaca' queëli' láhuigacaba' cuchi, para cabí ulu'zadi' ní'aba' le.

Guli'naba, guli'guilaj, en buli'lidza ra' yu'u

(Lc. 11:9-13; 6:31)

⁷ Gunnë' ca' Jesús:

—Guli'naba, ate' Dios gunnë' queëli'. Guli'guilaj, ate' gunnë' lataj idžöli queëli'. Buli'lidza ra' yu'u, ate' Lë' isaljë' queëli'. ⁸ Núti'täl bönni' rinabë', ridéli'në', ate' bönni' riguiljë', ridžöli queë', ate' bönni' rulidžë' ra' yu'u, talaj queë'.

⁹ Channö zoë' nu bönni' ládjali' libí'ili', ate' zóabi' bi'i queë', channö inábibi' lë' yöta xtila, ¿naru' unödžjë'-bi' guiöj? ¹⁰ Channö inábibi' lë' tuba' böla, ¿naru' unödžjë'-bi' bëla? ¹¹ Libí'ili' nácali' huiá' dö, pero nözili' unödžjali' xxi'inili' le naca tsahui'. Nácatërö löza, Xúzili' zoë' yehua' yubá unödžjë' nupa ta'nábini Lë' le naca dxi'a.

¹² Que lë ni na', ca na' rē'ënil' ilün bönachi queëli', lësca' caní guli'gún quégaquië'. Lë ni naca le rinná bē' xibá queë' Moisés, enca' le gula'nnë' bönni' gulu'ë didza' uláz queë' Dios.

Tu ga ral-la' tsú'uru' le naca tsúpi'do'

(Lc. 13:24)

¹³ Gunnë' ca' Jesús:

—Guli'táz ga nu riyaza le naca tsúpi'do'. Blaga' naca ga nu riyaza, en yalaj naca nöza le rőjácälënë' bönni' ga ni' ila'nútië', ate' ta'yázië' bönni' zían ni'. ¹⁴ Tsúpi'do' naca ga nu riyaza, en lásido'os naca nöza le rőjácälën bönachi ga ni' ila'deli' yöl-la' na'bán idú, ate' nabábasö nupa ta'džöli le.

Le runru' naca bē' le nácaru'

(Lc. 6:43-45)

¹⁵ Gunnë' ca' Jesús:

—Guli'gün chi'i cunli' para cabí ila'z'í yé'enë' bönni' ta'z'í yë'ë libí'ili, ta'nnë' tu'ë didza' uláz queë' Dios. Ila'dxinë' bönni' caní ga zóali', en ulu'luf'í cuíngaquië' nōxaj lādxi'do' ca nácagacaba' bō'cu' xzila'do', pero lu icja lādxi'do'gaquië' nácagaquië' ca bō'cu' guí'a sínia'. ¹⁶ Yugu' le tunë' ilaca bē' le nácagaquië'. Biti' ruchibiru' le ribía lubá uva lu yaga yōtsi', en bití' ruchibiru' le ribía yaga higo lu guixi' legui lāsido'. ¹⁷ Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a. ¹⁸ Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a. ¹⁹ Yúgu'të yaga bití' ta'bía le naca dxi'a ila rugu, ate' ila'gu'ë léguequi lu guí'. ²⁰ Caní naca, yugu' le tunë' bönni' na' ilaca bē' le nácagaquië'.

Nupa bití' ila'yázië' ga rinná bē'ë Dios

(Lc. 13:25-27)

²¹ Gunnë' ca' Jesús:

—Zian nupa tē neda': "Xan, Xan", pero calēga yúgu'të' ila'yázië' ga rinná bē'ë Dios yehua' yubá. Ila'yázasë' ni' bönni' tunë' ca rē'enë' Xuza' Dios, zoë' yehua' yubá. ²² Cate' idxin dza údxi que yōdzōliō ni, bönni' zían ilē' neda', ila'nnë': "Xan, Xan, bentu' libán que xtidzë'ë Dios, buguntu' dxin Lo', en buguntu' ca' dxin Lo' para bubéajtu' yugu' bō' xihui', en buguntu' ca' dxin Lo' bentu' zían yōl-la' huáca xzōn." ²³ Ní'irō neda' guía' légaquië': "Bití' ca' nūnbë'a libí'ili'. Guli'cuíta ga zoa', libí'ili' ruá'ali' dó'."

Chopa ca gaca udxíaru' xilibi zō'ö

(Lc. 6:47-49; Mr. 1:22)

²⁴ Gunnë' ca' Jesús:

—Ia'stú ca', nu bönni' riyōnnë' xtidza'a ni, en gunë' ca' rnna, bönni' ni náquië' ca tu bönni' réajni'inë', budxië' lidxë' ga naca lu guiōj. ²⁵ Cate' gulaj guiōjsiu', en guzxōn yegu gubó'o, en guyecja bō', gudibi nisa cuita yu'u na', pero bití' gubixi, tu' dxia xilibi lu guiōj. ²⁶ Na'a, nu bönni' riyōnnë' xtidza'a ni, en bití' runë' ca' rnna, bönni' ni náquië' ca tu bönni' bití' réajni'inë', budxië' lidxë' lu yu dzōbi. ²⁷ Cate' gulaj guiōjsiu', en guzxōn yegu gubó'o, en guyecja bō', ní'irō gudá'a nisa cuita yu'u na', ate' gubixitë, en tsaz biguinna'.

²⁸ Cate' Jesús budxi bē'lenë' légaquië' didza' ni, bulu'bani bōnachi zían nacua' ni' ca naca le rusédinë', ²⁹ tu' rusédinë' légaquië' ca tu bönni' dē lu nē'ë, en calēga ca tunë' bönni' yudo' usedi quégaquië'.

8

Ruhuōáquië' tu bönni' ré'enë' huë' nudzu' ruzōdi

(Mr. 1:40-45; Lc. 5:12-16)

¹ Cate' bōtjë' Jesús lu guí'a na', sōjácalen bōnachi zían Lë'. ² Bidxinë' tu bönni' ré'enë' huë' nudzu' ruzōdi ga zoë' Jesús, ate' buzóa xzibë' lahuë' Jesús, en rē' Lë':

—Xan, channō rē'ënu', huáca unu' neda'.

³ Ní'irō Jesús la' bulitë nē'ë, en gudanë' lë'. Rē' lë':

—Rē'ënda', Huōácu' dxi'a.

La' bunítitë xihuë'ë bönni' huë' na'. ⁴ Ní'irō Jesús gudxë' lë':

—Buyú, cuntu nu guío' caní, pero guyéaj, yōjluf'í cuinu' lahuë' bixúz, ate' yōjnōdzaj le gunná bē'ë Moisés le uluf'í bōnachi chibōácu'.

Jesús ruínë' bi' i huen dxin queë' tu bönni' rinná bē'ë lu gudil-la

(Lc. 7:1-10)

⁵ Cate' guyázië' Jesús yōdzō Capernaum, bidxinë' tu bönni' ga zoë', bönni' rinná bé'enë' tu gáyú'ë bönni' rōjáquië' gudil-la, ate' gūta'yue' lahuë' Jesús, ⁶ en rē' Lë':

—Xan, bi' i huen dxin quia' dēbi' yu'u, ré'ebi' huë' nacú'unibi' bin, ate' riguf'í rizáca'da'abi'.

⁷ Jesús rē' lë':

—Neda' guída' una'-bi'.

⁸ Bubi'ë didza' bönni' na' rinná bé'enë' bönni' rōjáquië' gudil-la, en rē' Jesús:

—Xan, bití' naca' zi tsáziu' lidxa', pero tsa innasu' quia', ate' huōácabi' bi' i huen dxin quia'. ⁹ Lësca' neda', zoa nu rinná bē'e neda', en nacué' ca' bönni' rōjáquië' gudil-la rinná bé'egacada'-në'. Cate' rea'-në' tuë': "Guyéaj ni", rejë'. Cate' rea'-në' ia'tué': "Gudá ni", ridë'. Cate' rea'-në' bönni' huen dxin quia': "Ben dxin ni", la' runtë' dxin na'.

¹⁰ Cate' biyōnnë' Jesús didza' ni, bubáninë', ate' gudxë' bönni' sōjácalenë' Lë', rnnë':

—Le nácaté rea' libí'ili', ga nacua' bōnachi Israel, cuntu nu bönni' rōjxéqui'da'-në' réajlë'ë neda' ca runë' bönni' ni. ¹¹ Ia'stú rea' libí'ili': Ila'rúaj bōnachi zían saca' ga rilén gubidza, en saca' ga ribía gubidza, ate' ila'bō'len tsōzxōn Abraham, en Isaac, en Jacob, yehua' yubá ni' ga rinná bē'ë Dios, ¹² pero yugu' bönni' na' guró cazë' Dios para ila'yázië' ga na' rinná bē'ë

Lë', chú'unë' légaquie' ní'ilò ga na' naca chul-la, ate' ní' ila'bòdxë', en ulu'til-la láyë'ë lu yöl-la' ruhuf'ini quégaquie'.

¹³ Ní'irò Jesús gudxë' bönni' na' rinná bé'enë' bönni' rójáquie' gudil-la, rnnë':

—Bòaj lidxu'. Ca na' réajlë'u, ca' gaca quiu'.

La' ná'asò bóacatëbi' bi'i huen dxin queë' na'.

Jesús ruinë' xiná'anu nigula queë' Pedro

(Mr. 1:29-31; Lc. 4:38-39)

¹⁴ Bidxinë' Jesús lidxë' Pedro, ate' ní' bilé'enë'-nu xiná'anu nigula queë', dënu lu da'a, en yú'unu tu xilá. ¹⁵ Gudanë' Jesús ná'anu, ate' la' burúajtë xilá na' yú'unu. Ní'irò bóásanu, en bunödžjanu le gulahuë'.

Jesús ruinë' zían nupa te'e

(Mr. 1:32-34; Lc. 4:40-41)

¹⁶ Cate' chiridzò' dza na', dujuá'agaquie' zían bönni' yú'ugaca bö' xihui' légaquie' ga zoë' Jesús, ate' len yöl-la' rinnësò queë' bubéajë' yugu' bö' xihui' na', en bunë' ca' yúgu'të nupa te'e. ¹⁷ Cani guca para gaca ca na' gunnë' Isaias, bönni' bë'ë didza' uláz queë' Dios, gunnë': "Lë' bu'ë yugu' le rizáca'ru', en bu'ë ca' yugu' yödžohuë' queëru'."

Nupa gulë'ëni tsójácalen Jesús

(Lc. 9:57-62)

¹⁸ Cate' bilé'enë' Jesús nacuá' bönachi zían gásibi'ilë', gunná bé'enë' yugu' bönni' usëda queë' ila'dödë' ia'tsólá'a nísado' ní'. ¹⁹ Bidxinë' tu bönni' yudo' usedi ga na' zoë' Jesús, en rë' Lë':

—Bönni' Usedi, sá'lëna' Li' gátitës ga tseju'.

²⁰ Jesús rë' lë':

—Yugu' bōza' nacuá' zzan guiōj quégacaba', ate' yugu' biguinnido', nudxiagacaba' xicá'agacaba', pero neda', Bönni' Guljë' Bönachi, biti' dë ga quíxaj icja'.

²¹ Ia'tuë' bönni', náquie' bönni' usëda queë' Jesús, gudxë' Lë':

—Xan, benna neda' lataj huōja' ga idxinrō dza chibucácha'a-në' xuza'.

²² Jesús gudxë' lë':

—Gudá' neda'. Bë' lataj yugu' bönni' tati cazë' ulu'cáché'ë nupa ilátigaca quégaquie'.

Jesús ribequi dxie' bö' budunu'

(Mr. 4:35-41; Lc. 8:22-25)

²³ Gurenë' Jesús lë'e bárcodo', ate' dzágagaquie' Lë' bönni' usëda queë'. ²⁴ Ní'irò guyecja bö' budunu' lu nísado' na', ate' riyasa ridxiada' nísado' na' ga bidxintë riyaza nisa lë'e bárcodo' na'. Dë' rásië' Jesús lë'e barco na'. ²⁵ Ní'irò bila'dxinë' bönni' usëda queë' Jesús ga na' zoë', ate' bulu'subanë' Lë', en tē' Lë':

—Xan, busölá netu'. Chirigáchi'ru' lu nisa.

²⁶ Bubi'ë didza' Jesús, en rë' légaquie':

—¿Bizx que rádxi? Láti'do'os réajlë'ëli'-në' Dios.

Ní'irò guyasë' Jesús, en bulidzë' bö' na' recja, en nísado' na', ate' la' gurō'ötë dxi.

²⁷ Bulu'báninë' bönni' na', ta'nnë':

—¿Nuzxi caz bönni' ní? Ruí'isë' didza', ate' bö' recja, en nísado' tun ca rnnë'.

Yugu' bönni' Gadara yú'ugaca bö' xihui' légaquie'

(Mr. 5:1-20; Lc. 8:26-39)

²⁸ Cate' bidxinë' Jesús ia'tsólá'a nísado' ga na' naca lu xiyú yödž Gadara, bila'ruájë' chopë' bönni' ga nacuá' ba quégaca nupa nátigaca, dutságagaquie' Jesús. Nácagaquie' sínia', ate' cuntu nu gaca tódi la' nōza ní'. ²⁹ La' guluf'itë' zidzaj didza' chopë' ní, ta'nnë':

—¿Bizxi ral-la'tu' quiu', Jesús, Zxf'inë' Dios? ¿Naru' bidxintso' ni dusaca' zi'u netu' zí'alō ca idxin dza queëtu'?

³⁰ Ga ní' nacu'ë nacuá'aba' cuchi zían ta'daba' táguba', nacuá'aba' láti'do' ga naca zi'tu'.

³¹ Gula'naba yechi' bö' xihui' na' Jesús, en tē' Lë':

—Channō ubéaju' netu', benna lataj tsójtšú'ugacatu'-ba' cuchi zían ní'.

³² Ní'irò Jesús gudxë' léguequi:

—Guli'tséaj.

La' bila'ruájë bö' xihui', en yōjcházagaca cuchi zían ní'.

Ní'irò yúgu'tëba' cuchi zían na' yōjbixitégacaba' ga naca lë'e guiōj, en yōjcházagacaba' lu nísado', ga ní' gula'yépiba' nisa, en gulátiba'.

³³ Guládxinë' bönni' tu'yúë'-ba' cuchi na', ate' bulu'zxunnajë'. Cate' bila'dxinë' lu yödž, gula'guíxjō'ë yúgu'të lë na' guca quégaquie' bönni' ní' gula'yú'u bö' xihui' légaquie'. ³⁴ Ní'irò bila'ruáj bönachi lu yödž ní', yōjtšágagaquie' Jesús. Cate' bila'lé'enë' Lë', guláta'yuë' lahuë' uzë'ë lu xiyúgaquie' na'.

9

Jesús ruünē' tu bönni' nacú'uniē' bin

(Mr. 2:1-12; Lc. 5:17-26)

¹ Ní'irō bubenē' Jesús lē'e bárcodo', en gudōdē' ia'tsōlá'a nísado' nī', ate' budxinē' ga naca ladzē'. ² Ní' dujuá'gaquiē' tu bönni' nacú'uniē' bin ga zoē' Jesús, zxoē' lu da'a yaga. Cate' bilé'enē' Jesús ca na' ta'yéajlē'ē bönni' nī' Lē', gudxē' bönni' na' nacú'uniē' bin, rnnē':

—Butipa lādxi'u, zxi'ina'do'. Chibuníti lahua' dul-la' nabágu'u.

³ Nacu'ē ca' bönni' yudo' tu'sédinē' nī', ate' ta'nnē' lu icja lādxi'do'gaquiē', ta'nnē': “Didza' ru'ē bönni' nī' ruzóa Dios tsōlá'alō.”

⁴ Cate' réquibe'enē' Jesús le ta'zá' lādxi'gaquiē', rē' légaquiē':

—¿Bizx que rizá' lādxi'li' caní le cabí naca tsahui? ⁵ Biti' naca bōniga nu guiēsō bönni' nī: “Yugu' dul-la' nabágu'u chibuníti lahua”, pero naca bōniga nu gun ga huóásē', en uzé'enē'.

⁶ Na'a, uluf'ida' lib'ili' neda', Bönni' Guljē' Bōnachi, dē lu na'a yōl-la' unná bē' uniti lahua' dul-la' luyú nī.

Ní'irō Jesús gudxē' bönni' na' nacú'uniē' bin, rnnē':

—Guyása. Buchisa da'a yaga quiu', en bōaj lidxu'.

⁷ Ní'irō la' guyásatē' bönni' na' nacú'uniē' bin, en bōajē' lidxē'. ⁸ Cate' bila'lé'enē' bönni' nacu'ē nī' lē nī, bulu'bánninē', ate' gula'gu'ē Dios yōl-la' ba tu' bunōdzjē' yōl-la' huáca caní quégaca bōnachi.

Jesús rulidzē' Mateo

(Mr. 2:13-17; Lc. 5:27-32)

⁹ Cate' buzē'ē Jesús nī', bilé'enē' bönni' lē' Mateo, rō'ē ga na' ruquíxjē' uláz que yōdzō zī'tu', ate' Jesús gudxē' lē':

—Gudá' neda'.

Ní'irō la' guyásatē' Mateo na', ate' sa'yéajlenē' Jesús.

¹⁰ Ia'tú le guca, cate' nī' rō'ē Jesús rahuē' ga naca lidxē' Mateo, zían bönni' tu'quíxjē', en yugu' bönni' cá'asō bila'dxinē' ga zoē', ate' gula'bō'lenē' Jesús tsōzxōn len yugu' bönni' usēda queē'. ¹¹ Cate' bönni' yudo' fariseo bila'lé'enē' lē nī, gula'nábinē' yugu' bönni' usēda queē' Jesús, ta'nnē':

—¿Naru' bönni' rusédinē' lib'ili' rágulentsē' tsōzxōn bönni' tu'quíxjē', en iá'zica'rē' bönni' dul-la'?

¹² Cate' biyōnnē' Jesús lē nī, rē' légaquiē':

—Biti' naquíniguequinē' bönni' nácagaquiē' dxi'a nu un bōnachi, pero bönni' té'enē' naquíniguequinē' nu un bōnachi. ¹³ Guli'tséaj, en buli'sēda le rnna lē na' nazúaj lu guichi lá'ayi, le rnna caní: “Rē'ēnda' ulu'huéchi' lādxi'gaquiē' bönni' luzá'agaquiē', en calēga ilútiē'-ba' bōa' bēdxi lu bucugu lá'ayi quia'.” Bida' nī, calēga para ulídzagaca'-nē' bönni' tsahui', pero bida' para ulídzagaca'-nē' bönni' dul-la' para ulu'bi' lādxi'gaquiē'.

Rusédinē' Jesús ca ral-la' gunru' gubasa

(Mr. 2:18-22; Lc. 5:33-39)

¹⁴ Ní'irō bönni' dá'gaquiē' Juan, bönni' na' buquilē' bōnachi nisa, bila'dxinē' ga zoē' Jesús, ate' gula'nábinē' Lē', ta'nnē':

—¿Bizx que na' netu', enca' yugu' bönni' yudo' fariseo, zían luzuí runtu' gubasa, pero yugu' bönni' usēda quiu' Li' biti' tunē' gubasa?

¹⁵ Bubi'ē didza' Jesús, en rē' légaquiē':

—¿Naru' huácatsō' ila'sēbi lādxi'gaca nupa nacué' laní que yōl-la' rutsaga na' tsanni nī' bönni' rutsaga nē'ē zóalenē' légaquiē'? Za' dza cate' idúē' bönni' na' rutsaga nē'ē ga nacu'ē. Dza ní'irō ilunē' gubasa.

¹⁶ Bucúdzu'ē didza' Jesús, rnnē':

—Cuntu nu un tu lari' tēbi len lari' cubi, tu' uxú'uni lari' cubi na' nugu'ē lari' tēbi na', ate' ichōza'rō lari' tēbi na'. ¹⁷ Lēscā caní, cuntu nu bönni' riguē'ēnē' xisi uva cubi tu lu buzudi guídi gula, tu' galaj ilēbi xisi uva cubi na', en uzxuzxaj buzudi guídi gula na', ate' gaca dítaj xisi uva na', ate' initi ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatē taca chí'i.

Rubanbi' bi'i nigula queē' Jairo, en ruhuóácanu tu nigula gudannu lari' nácué' Jesús

(Mr. 5:21-43; Lc. 8:40-56)

¹⁸ Tsanni nī' Jesús ru'ilenē' légaquiē' didza' nī, tu bönni' rinná bē'enē' bōnachi judío bidxinē' ga zoē', ate' buzóa zxi'bē' lahuē' Jesús, en rē' Lē':

—Bi'i nigúlado' quia' la' gútitēbi'. Gudá ixóa no'o lēbi', ate' ubanbi'.

¹⁹ La' guzuítēnē' Jesús, en sa'yéajlenē' lē'. Dzágagaquiē' bönni' usēda queē' Lē'.

²⁰ Ní'irō bidxinnu tu nigula zaca' cúdzu'lē' Jesús, chiguca chinnu iz ré'enu, biti' ruhuí'i rōn queēnu que huē' quégaca cázanu nigula, ate' gudannu lari' nácuē' Jesús. ²¹ Caní bennu tu' rizá' ládxi'nu, rnnanu: Channō cansa' zxiē', huóaca'. ²² Ní'irō buécjē' Jesús, en ruyúē' lēnu, ate' rē'ē-nu:

—Butipa ládxu'u, zxi'ina'do'. Chibóacateu' tu' réajlē'u neda'.

La' ná'asō bóacatēnu.

²³ Cate' bidxinē' Jesús lidxē' bōnni' unná bē' na', bilé'enē' nacu'ē ni' bōnni' tu' cōdxē' gui, en nupa ta'bōdxi yechi'. ²⁴ Jesús rē' légaquiē':

—Guli'cuita ni, tu' cabí nátibi' bi'í nigúlado' ni. Rásisibi' na'.

Ní'irō nupa nacuá' ni' bulu'titaj Lē'.

²⁵ Cate' chinubéajē' Jesús bōnachi na' ní'ilō, guyáziē', en gudélē'ē ná'abi' bi'í nigula na', ate' la' guyásatēbi'. ²⁶ Guzē didza' ca guca lē ni, ate' bila'yōni bōnachi nacuá' idútē luyú na'.

Jesús ruúnē' bōnni' nachul-la guiōj lógaquiē'

²⁷ Cate' Jesús burúajē' ní', chopē' bōnni' nachul-la guiōj lógaquiē' sōjácalenē' Lē'. Tu'ē zidzaj didza', ta'nnē':

—Zxi'ini xi'sóē' David, buéchi' ladxí' netu'.

²⁸ Cate' bidxinē' Jesús ga naca lu yu'u, bila'dxinē' chopē' bōnni' na' nachul-la guiōj lógaquiē' ga zoē'. Jesús gunábinē' légaquiē', rnnē':

—¿Ba réajlē'ēli' neda', huáca una' libí'ili'?

Légaquiē' ta'nnē':

—Ōn, Xan.

²⁹ Ní'irō Jesús gudanē' guiōj lógaquiē', ate' rnnē':

—Ca réajlē'ēli', ca' gaca queēli'.

³⁰ La' bōáljatē guiōj lógaquiē'. Ní'irō Jesús buzenē' bach légaquiē', rnnē':

—Guli'gú'itica sō ladxí'li' cuntu nu inōzi lē ni.

³¹ Cate' bulu'rúajē' ní', la' bulu'zētē' didza' idútē luyú ni' ca naca lē na' benē' Jesús.

Jesús ruúnē' tu bōnni' biti' ru'ē didza'

³² Cate' Jesús, en yugu' bōnni' usēda queē' bulu'rúajē' tu lu yu'u, bila'dxinē' bōnni' ga zoē' Jesús nachē'gaquiē' lahuē' tu bōnni' biti' ru'ē didza', tu' yu'u lē' bō' xihui'. ³³ Cate' bubéajē' Jesús bō' xihui' na', la' gunnētē' bōnni' na' biti' guca gu'ē didza'. Bulu'bábinē' bōnni' nacu'ē ni', ta'nnē':

—Catu caz rilē'etu' le caní ladaj bōnachi Israel.

³⁴ Ní'irō bōnni' yudo' fariseo gula'nnē' queē' Jesús, ta'nnē':

—Bōnni' ni rubéajē' yugu' bō' xihui', rugunē' dxin yōl-la' unná bē' que xángaca bō' xihui' na'.

Jesús ruhuéchi' ladxē'ē bōnachi zían

³⁵ Gudē' Jesús idú gásibi'ilō gapa nacuá' yōdzō zxiōn, en gapa nacuá' yōdzōdo', ate' gapa naca lu yu'u ga tu'dubē' tu'sedē' bōnni' judío queē' Dios. Rusédinē' Jesús bōnachi nacuá' ni', en runē' libán que didza' dxi'a ca rinná bē'ē Dios. Bunē' yúgu'tē nupa bi ta'guí' ta'zaca' yugu' lu yōdzō na'. ³⁶ Cate' Jesús bilé'enē' bōnni' zían ni', buéchi' ladxē'ē légaquiē', tu' ta'guí' ta'záquiē', en nudú ladxí'gaquiē' ca raca quégacaba' bō'cu' zxila' biti' zoa nu ruyú légacaba'. ³⁷ Ní'irō Jesús rē' yugu' bōnni' usēda queē', rnnē':

—Le nácatē dēda' yōla, pero nabábasō nupa tu'lapa. ³⁸ Que lē ni na', guli'gáta'yu lahuē' Dios, náquiē' Xan yōla na', inábili'-nē' isōl-lē'ē bōnni' huen dxin ulu'lape' yōla queē'.

10

Jesús ribōē' bōnni' ilácagaquiē' gubáz queē'

(Mr. 3:13-19; Lc. 6:12-16)

¹ Ní'irō bulidzē' Jesús idxínnutē' bōnni' usēda queē', en budōdē' lu ná'agaquiē' yōl-la' unná bē' para ulu'béajē' bō' xihui' yú'ugaca bōnachi, en ulu'únē' yúgu'tē nupa te'e, en yúgu'tē nupa bi ta'guí' ta'zaca'.

² Caní naca lágaquiē' idxínnutē' gubáz na' nasōl-lē'ē Jesús:

Simón, (lē' ca' Pedro),

Andrés, (bōché'ē Simón na'),

Jacobo, (zxi'inē' Zebedeo),

Juan, (bōché'ē Jacobo na'),

³ Felipe, Bartolomé, Tomás,

Mateo, (bōnni' uquíxzaj),

Jacobo, (zxi'inē' Alfeo),

Lebeo, (lē' ca' Tadeo),

⁴ Simón, (bõnni' ru'í láchxë'ë yödzo' queë'), Judas Iscariote, (bõnni' udödë' Jesús lu ná'agaquië' bõnni' ilútië' Lë').

Jesús risól-lë'ë gubáz queë' tsójéngaquië' libán
(Mr. 6:7-13; Lc. 9:1-6)

⁵ Ní'iró Jesús gusól-lë'ë idxinnutë' bõnni' ni tsójéngaquië' libán, ate' gunná bé'enë' légaquië', rnnë':

—Biti' tséajli' ga nacuá' bõnachi bití' náacagaca judío, en bití' tsú'uli' láchzagaca bõnachi nacuá' luyú Samaria. ⁶ Guli'tséaj ga nacuá' bõnachi Israel, náacagaquië' ca bõ'cu' xzila'do' nanítigacaba'. ⁷ Guli'tsójén libán, innali': "Chibidxín gala' dza Dios, Nu na' zoa yehua' yubá, inná bë'ë luyú ni." ⁸ Buli'ún nupa te'e. Buli'ún dxi'a nupa te'e huë' nudzu' ruzodi. Buli'subán nupa chinátigaca. Buli'béaj bõ' xihui' yú'ugaca bõnachi. Bénnessa' queëli' yöl-la' unná bë' ni. Buli'gún dxin le, en bití' bi uquízxali'.

⁹ Biti' bi guá'ali' lu buzudi queëli', calëga dumí oro, en calëga dumí plata, en calëga dumí lásido'. ¹⁰ Biti' guá'ali' yõxaj yõta queëli' le gáguli' la' nõza. Tuz lari' ixóa yenli', en bití' guá'ali' xiráchuli' o xiyaga queëli', tu' idzöli' quézinë' bõnni' huen dxin le gahuë'.

¹¹ Gátitës yödzo' xzõn o yödzo'do' ga idxinli', guli'naba nuzzi naca idú ladxí' lu yödzo' ni', ate' ugá'anali' lidxi nu na' cate' gála'rõ dza urúajli' yödzo' na'. ¹² Cate' tsú'uli' tu lu yu'u, buli'gapa Dios bõnachi nacuá' lu yu'u na', inábili'-në' Dios unödzejë' quégaquië' le cuéqui dxi icja láchxi'do'gaquië'. ¹³ Channõ bõnachi nacuá' lu yu'u ni' náacagaca lesaca', ugá'analen le ribequi dxi ladxí' na' léguequi, pero channõ bõnachi na' cabí náacagaca lesaca', inábali' cabí ugá'ana lë na' ribequi dxi ladxí' len léguequi. ¹⁴ Gátitës ga idxinli' ga bõnachi ni' bití' ilún libí'ili' bal, en bití' ulu'zë nagui xtídzá'li', buli'rúaj lu yu'u ni' o yödzo' ni', ate' guli'cuíbi bëchtõ da' lë'e lábali', le ulu'í léguequi nabá'gaca xíguia'. ¹⁵ Le nácatë rea' libí'ili', cate' idxín dza ichúguie' Dios quégaca bõnachi, ila'guí' ila'záca'rõ bõnachi yödzo' na' ca ila'guí' ila'záca' bõnachi gula'cuá' yödzo' Sodoma, en yödzo' Gomorra, nupa ni' busunitié' Dios.

Nupa bití' ta'yéajlë' ulu'saca' zí' nupa dá'gaca Cristo

¹⁶ Gunnë' ca' Jesús:

—Buli'yútsõca', neda' risól-la'a libí'ili', ate' gácali' ca bõ'cu' xzila'do' ta'daba' ga dzõ'õba' bõ'cu' gu'a sínia'. Guli'gaca sina' ca náacagacaba' sina' bëla sínia', pero guli'gaca ca' nõxaj ladxí' ca náacagacaba' gu'dõdo'. ¹⁷ Guli'gún chí' cuinli' quégaca bõnachi, tu' ulu'dödë' libí'ili' lu ná'agaquië' bõnni' yúlalui', en ila'guínë' libí'ili' gapa naca lu yu'u ga tu'dubë' tu'sedë' bõnni' judío queë' Dios. ¹⁸ Lësca' caní, ila'chë'ë libí'ili' lógaquië' bõnni' lo, en lógaquië' bõnni' ta'nná bë'ë, tu' dá'ali' neda'. Caní gaca para gaca gunli' ba nalí quia' lógaquië' bõnni' ni', en lógaquië' bõnni' bití' náacagaquië' judío. ¹⁹ Ní'iró cate' ulu'dödë' libí'ili' lu ná'agaquië' bõnni' unná bë' na', bití' cõ'õli' bõniga nacxi innali', tu' ichizë' Dios icja láchxi'do'oli' didza' gú'ili', en ca innali' la' dza ná'asõ. ²⁰ Calëga libí'isili' na' innali', pero Dios Bõ' Lá'ayi, Nu na' risól-lë'ë Xúziru' Dios queëli', Lë cazë' sóalenë' libí'ili', en gu'ë didza'.

²¹ Ila'cuá' bõnachi ulu'dõdi bõchi'guequi lu ná'agaquië' bõnni' ilútië' légaquië', en lësca' caní, bõnni' náacagaquië' xuz ulu'dödë' xzínigaquië', ate' ila'cuá'abi' bi'í ila'dá'baga'bi' xúzgacabi', en ilunbi' ga ilátie' xúzgacabi' na'. ²² Yúgu'të bõnachi ulu'zõa libí'ili' tsólá'alõ tu' dá'ali' neda', pero nu ugá'ana tsutsu ga idxinrõ dza údxi, nu ni ulá. ²³ Cate' ulu'saca' zí' bõnachi libí'ili' tu lu yödzo', buli'zxunnaj ni', ate' tséajli' ia'tú yödzo', tu' rea' libí'ili', huõda' neda', Bõnni' Guljë' Bõnachi, zí'alõ cate' údxi gunli' libán gapa nacuá' yugu' yödzo' quégaca bõnachi Israel.

²⁴ Nútítës bõnni' náquie' bõnni' usëda bití' nácarë' lo ca nu rusëdi lë', en lësca' caní, nu bõnni' náquie' huen dxin bití' nácarë' lo ca xanë'. ²⁵ Nu na' naca bõnni' usëda ral-la' udzéjanë' channõ huadéli'në' gáquie' ca naca nu rusëdi lë', ate' bõnni' huen dxin na' ral-la' udzéjanë' channõ gáquie' ca naca xanë'. Channõ ta'nnë' quia' neda', bõnni' xan yu'u, ta'nnë' naca' Belzebú tu' xihui', ila'nnë' zí'irë' quégaca bõnachi tá'gaquië' neda'.

Nural-la' gádxiru'
(Lc. 12:2-9)

²⁶ Gunnë' ca' Jesús:

—Que lë ni na', bití' gádxili' bõnachi. Hualá' lahui' yúgu'të le raca bëdxi lándõ'os, ate' huáca bë' yúgu'të le nagachi'. ²⁷ Yugu' didza' ru'ílëna' libí'ili' ga naca chul-la, guli'quixjõ' ga naca lu bení', ate' le rea' libí'ili' ga nagachi', guli'nnë zidzaj ga naca lahui' lógaca bõnachi. ²⁸ Bití' gádxili' nupa tuti le náacagaca caz bõnachi, pero bití' gaca ulu'suniti bõ' naca cázaru'. Guli'gadxí Dios, Bõnni' na' gaca gútië' idútë le nácali', en chú'unë' bõ' naca cázali' lu guí' gabila.

²⁹ Ta'dá'uba' chópaba' biguínido' len tu dumí lásido', pero bití' ibíxiba' tuba' lu yu channõ cabí ru'ë Xúziru' Dios lataj gaca caní. ³⁰ Lësca' caní, nabábagaca yúgu'të guitsa' icjali' lahuë'

Dios. ³¹ Que lë ni na', biti' gádxili'. Ru'itë'rö láchxë'ë Dios libí'ili' ca ru'í láchxë'ë-ba' zianba' biguínido'.

Yugu' bönni' ta'z'i' lu ná'agaquië' Cristo lógaca bönachi
(Lc. 12:8-9)

³² Gunnë' ca' Jesús:

—Nu bönni' si' lu në'ë neda' lógaca bönachi, neda' si' lu na'a bönni' na' lahuë' Xuza' zoë' yehua' yubá. ³³ Bönni' ta'dá'baguë'ë lógaca bönachi, ila'nnë' biti' ta'dë'ë neda', lësca' caní neda' tá'baga'a légaquië' lahuë' Xuza' zoë' yehua' yubá.

Jesús náquië' le run ga ila'rúaj choplō bönachi
(Lc. 12:51-53; 14:26-27)

³⁴ Gunnë' ca' Jesús:

—Biti' guéquili' za'a idigu'a le ribequi dxi bönachi yödžolió ni. Biti' za'a idigu'a le ribequi dxi, pero za'a idigu'a le gun ga ila'rúaj choplō bönachi. ³⁵ Za'a ni, ate' guna' ga ila'dá'baga' bönachi xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula zxoá' lédxigacanu ila'dá'baga'nu xto' zxi'íninu. ³⁶ Caní gaca, la' di'a dzasó quégaca bönachi ulu'saca' zi' luzë'eguequi.

³⁷ 'Nu nadxi'irō xuz xinë'e ca nadxi'i neda', biti' naca bachi nu na' ta' neda', ate' nu nadxi'irō bi'i bönni' que o bi'i nigula que ca nadxi'i neda', biti' naca bachi nu na' ta' neda'. ³⁸ Nu biti' si' lu në'e gaca ca tu bönni' sōjtë'ë lë'e yaga cruz, en ta' neda', biti' naca bachi guequi quia' neda'. ³⁹ Nu ru'í ladxí' gun chí'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

Yugu' le ubi'ë Dios queëru'
(Mr. 9:41)

⁴⁰ Gunnë' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasöl-lë'ë neda'. ⁴¹ Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadelí' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadelí' nu na' lu në'ë Dios la' leze na' idéli'në' bönni' tsahui'. ⁴² Nüti'tës nu unödžaj queë' tu bönni'do' ni tu zxi'bindo'os nisa tu' náquië' bönni' usëda quia' neda', le nácatë rea' libí'ili', biti' uniti nu na' le ral-la' si' lu në'ë Dios.

11

Ta'dxinë' bönni' nasöl-lë'ë Juan ga zoë' Jesús
(Lc. 7:18-35)

¹ Cate' Jesús budxi buzëajni'inë' yugu' bönni' usëda queë', buzë'ë ni', sa'yéajë' röjsédinë' bönachi, en röjenë' libán yugu' lu lédzagaca bönachi na'.

² Juan, bönni' buquilë' bönachi nisa, ni' yu'ë lédxi guíë, ate' biyönnë' ca nácagaca le runë' Jesús. Ní'irō Juan na' gusöl-lë'ë chopë' bönni' dá'gaquië' lë', ate' bila'dxinë' ga na' zoë' Jesús. ³ Chopë' ni' gula'nábinë' Jesús, tē' Lë':

—¿Nacu' Li' Cristo, Bönni' na' ral-la' idxinë' yödžolió ni, o ral-la' cōztu' dza idxinë' ia'tué' bönni'?

⁴ Bubi'ë didza' Jesús, rë' légaquië':

—Guli'tséaj tsōjtíxjöi'ili'-në' Juan lë ni riyónili', en rilé'eli'. ⁵ Guli'tsōjdōxë' ca raca, tu'lé'enë' bönni' guchul-la guíōj lógauíë', ate' tu'zë'ë bönni' biti' guca ila'dë'. Nuhuōábagaquië' bönni' guí'iguequinë' huë' nudzu' ruzōdi, ate' ta'yönnë' bönni' gula'cōdžue'. Nnita' nabāgaquië' bönni' gulatië', ate' raca libán que didza' dxi'a lógaca bönachi yechi'. ⁶ Bica' ba nu bönni' biti' gáquië' chopá láchxë'ë, biti' ubéaj láchxë'ë neda'.

⁷ Cate' yugu' bönni' na' dá'gaquië' Juan bulu'zë'ë sōjhuōjgaquië', ní'irō gusí lahuë' Jesús ru'ílenë' bönachi nacua' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asó? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le? ⁸ Channō cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxi'ado'? Nöz quézili' bönni' nácugaquië' lari' dxi'ado' nacué' lédxigaquië' bönni' ta'nná bë'ë. ⁹ Channō cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatë'rë' lo ca ia'zica'rë' bönni' gulu'ë didza' uláz queë' Dios. ¹⁰ Caní naca, tu' náquië' Juan bönni' na' ru'í didza' le nazúaj lu guichi lá'ayi ca naca queë', le rnna:

Buyú, risöl-la'a bönni' gubáz quia', inōruë' ca Li'.

Lë' upë'ë nōza ga tōdu'.

¹¹ Le nácátë rea' libí'ili'. Idútë yödžölió ni, cuntú nu zoa nácarö lo ca Juan, bönni' ni' buquilë' bönachi nisa, pero nu naca cuidi' do'os ga rinná bë' Nu na' zoa yehua' yubá nácátërö lo ca Juan na'.

¹² 'Cate' ni' gusi lahuë' buquilë' Juan bönachi nisa, ga ridxintë na'a dza, bayudxi túngaca bönachi para ta'yaza ga rinná bë'ë Bönni' na' zoë' yehua' yubá, ate' nupa tunsö bayudxi ta'deli' le. ¹³ Ga bidxintë dza na' blë'ë Juan, le rinná bë' xibá queë' Moisés, en le bulu'zúajë' lu guichi yúgu'të bönni' gulu'ë didza' uláz queë' Dios guluf'i didza' ca rinná bë'ë Bönni' na' zoë' yehua' yubá. ¹⁴ Channö rë'ënili' si' lu ná'ali' lë ni, ral-la' inözili' Juan na' náquië' Elías, bönni' ni' bë'ë didza' uláz queë' Dios, bönni' na' Dios gunnë' ral-la' ilá' lahuë' leyúbölö dza ni zóaru' na'a. ¹⁵ Nu zoa nagui, en riyöni ral-la' uzë nagui.

¹⁶ 'Bizxi ubéqui'tseda' ca nácagaca bönachi nacaú' dza ni zóaru' na'a? Nácagaquië' ca yugu' bí'ido' ta'bö'öbi' lu yë'ëyi. Zidzaj tu'lídžabi' luzá'agacabi', ¹⁷ ta'nnabi': "Rucódxitu' queëli' gui. ¿Bizx que biti' ruyá'ali'? Rul-la' yéchi'tu' queëli'. ¿Bizx que biti' ribödxi yéchi'li'?" ¹⁸ Caní nácali', tu' bidë' Juan, ate' tu' cabí gü'i' gudahuë' ca ráguli' libí'ili', gunnëli' queë', gunnali': "Tu' xihui' dzágu' lë'." ¹⁹ Ní'irö bidxina' neda', Bönni' Guljë' Bönachi, ate' re'aj rahua', ate' rnnëli' quia', rnnali': "Náquië' bönni' huágulë'ë, en bönni' re'jë'. Náquië' luzá'agaquië' bönni' uquízxaj, en ia'zica'rö huen dul-la'." Yöl-la' réajni'i queë' Dios naca bë' ni'a que le tun nupa ta'z'í lu në'eguequi le.

Le gaca que nu biti' run ca rnna xtídžë'ë Dios

(Lc. 10:13-15)

²⁰ Ní'irö gusi lahuë' Jesús ruzenë' bach bönachi nacaú' yugu' yödžö gapa ni' benë' zían yöl-la' huáca, tu' cabí tu'bí'ini ládxi'guequi. ²¹ Gudxë' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödžö Tiro, en lu yödžö Sidón yugu' yöl-la' huáca bena' ga zóali', dza ní'tëlö ulu'bí' ládxi'gaca bönachi yödžö Tiro, en yödžö Sidón na', en ilácugaca lari' tēbi, en ulu'dxia dö ícaguequi, le ulu'luf'i tu'bí'ini ládxi'gaca bönachi na'. ²² Na'a, neda' rea' libí'ili', cate' idxín dza ichúguie' Dios quégaca bönachi, quí'í sáca'röli' libí'ili' ca ila'guí'í ila'zaca' bönachi yödžö Tiro, en yödžö Sidón, nupa na' busunítie' Dios. ²³ Libí'ili', bönachi Capernaum, gaca queëli' ca bidxintëli' ga nu riyaza yehua' yubá. Huötjali' lu guí' gabila. La'tu' gulaca yugu' yöl-la' huáca bena' ga zóali' lu yödžö Sodoma, ulu'gá'ana bönachi yödžö ni' ga ridxintë na'a dza. ²⁴ Na'a, neda' rea' libí'ili', cate' idxín dza ichúguie' Dios quégaca bönachi, quí'í sáca'röli' libí'ili' ca ila'guí'í ila'zaca' bönachi Sodoma na'.

Rnnë' Jesús: "Gulí'dá ga zoa', uzi' ládxi'li'"

(Lc. 10:21-22)

²⁵ Dza na' bë'ë didza' Jesús, rnnë':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucachu'u lë ni, para cabí ila'le'enë' bönni' ta'yéajni'ide'enë' le, pero buluí'inu' nupa nácagaca ca yugu' bí'ido' le. ²⁶ Ca' gaca, Xuza', tu' caní guyaza ládxi'u Li'. ²⁷ Yúgu'të nudödë' Xuza' lu na'a. Cuntu nu nunbë' neda', Zxi'inë' Dios, pero tuzë' Dios Xuz, en cuntú nu nunbë' Dios Xuz, pero tuza' neda', Zxi'inë' Dios, enca' nupa na' rë'enda' ulu'ida' léguequi Dios Xuz. ²⁸ Gulí'dá ga zoa' yúgu'tëli' rójxéqui'li' tu' rúntica'sili' dxin que yöl-la' yudo', en nuá'ali' yua' z'í' quégaca xibá que, ate' neda' guna' ga uzi' ládxi'li'. ²⁹ Lu yöl-la' nōxaj ládxi' queëli' gulí'gún xichina', gácali' ca bēdxi ta'z'í'iba' yugu' quégacaba'. Gulí'sēda lu na'a neda', tu' naca' nōxaj ládxi', en do' ládxi', ate' idžöli yöl-la' ruzi' ládxi' queëli', le cuéqui dxi ládxi'li'. ³⁰ Yugu' na' ugu'a libí'ili', le naca le inná bē'da' libí'ili', biti' naca bōniga, ate' yua' ugu'a libí'ili' le naca le rusēdida', dza' do'os naca.

12

Ta'lecjë' do bönni' usēda queë' Jesús dza lá'ayi

(Mr. 2:23-28; Lc. 6:1-5)

¹ Dza ni', le naca dza lá'ayi quégaquië' bönni' judío, gudödë' Jesús gapa dë yōla xzoa' xtila, ate' ta'dunë' bönni' usēda queë', en gusi lógaquië' ta'lecjë' do ga dxia xzoa' xtila, en tahuë' xzoa' xtila na'. ² Cate' bila'le'enë' bönni' yudo' fariseo lë ni, tē' Jesús:

—Buyútsöca', tunë' bönni' usēda quiu' le cabí ral-la' gunru' dza lá'ayi.

³ Ní'irö Jesús gudxë' légaquië':

—¿Naru' cabí nulábanili' lu guichi lá'ayi bi benë' David cate' gudunë', ate' gula'dún ca' nupa gula'cuá'len lë'? ⁴ Guyu'ë lu yu' u queë' Dios, en gudahuë' yugu' yōta xtila nagú'ugaquië' lu bucugu lá'ayi, le cabí ral-la' gahuë' lë', en biti' ral-la' ilahuë' bönni' gula'cuá'lenë' lë', pero légacsë' bixúz dë lataj ilahuë' le. ⁵ ¿Naru' cabí nulábanili' le rinná bë' xibá queë' Moisés ca tunë' bixúz yugu' dza lá'ayi? Tunë' dxin lö'a yudo' yugu' dza lá'ayi, en biti' ta'báguë'ë xíguia'. ⁶ Na'a, neda' rea' libí'ili', zoa' neda' ni, en naca' bönni' nácarë' lo ca yudo'. ⁷ Biti' réajni'ili' lë

na' nazúaj lu guichi lá'ayi, le rnna: "Rě'ěnda' huéchi' lădx'i'li' luzá'ali', en caléga gútigacali'-ba' bôa' bédxido' ruzégui'gacali'-ba' lu bucugu lá'ayi quia'." La'tu' réajini'ili' lě ni, biti' ichúguli' quégaca nupa biti' nabága'gaca xíguia'. ⁸ Ca' naca, tu' naca' neda', Bónni' Guljě' Bónachi, Xani dza lá'ayi.

Jesús ruíně' tu bōnni' narequi' nē'ě

(Mr. 3:1-6; Lc. 6:6-11)

⁹ Ní'irō buzě'ě Jesús ni', ate' guyu'ě lu yu'u ga tu'dubě' bōnni' judío, en tu'sedě' queě' Dios. ¹⁰ Lu yu'u na' zoě' tu bōnni' narequi' nē'ě, ate' tu' tē'ěnně' bōnni' judío unná bē' ila'dzōlině' bi ulu'zégui'ě Jesús didza', que lě ni na' gula'nábině' Lě', ta'nně':

—¿Naru' dē lataj unru' nu re'e cate' naca dza lá'ayi?

¹¹ Bubi'ě didza' Jesús, rē' lēgaquiē':

—Nu bōnni' nůtsě'ě lădjali', channō zóaba' tuba' bō'cu' xzila' queě', en channō ibíxiba' lu yeru cate' naca dza lá'ayi, ¿naru' cabí tsōjxōnē'-ba', en tsōjlējě'-ba'? ¹² Nazáca'tērě' tu bōnni' ca tuba' bō'cu' xzila'. Que lě ni na', dē lataj gunru' le naca dxi'a quégaca bōnachi cate' naca dza lá'ayi.

¹³ Ní'irō Jesús gudxě' bōnni' huě' na':

—Bulí no'o.

Cate' bulí nē'ě, la' bōacatē dxi'a ca naca ia'tsōlá'a nē'ě.

¹⁴ Ní'irō bulu'rúajě' bōnni' yudo' fariseo na', ate' gulún xtídza'gaquiē' para gaca ilútiē' Jesús.

Le gunně' tu bōnni' bē'ě didza' uláz queě' Dios ca ral-la' gaca queě' Jesús

¹⁵ Cate' réquibe'eně' Jesús lě ni, buzě'ě ni', ate' sōjácalen bōnachi zían Lě'. Jesús buně' yúgu'tē nupa te'e ladaj bōnachi na', ¹⁶ en gunná bē'eně' lēguequi biti' usiyōnguequi bōnachi Nu náquiē'. ¹⁷ Caní gunně', para gaca lě na' gunně' Isaías, bōnni' bē'ě didza' uláz queě' Dios, gunně':

¹⁸ Bulí'yútsōca', Bōnni' ni náquiē' Huen Dxin quia', na' gurō caza' neda' Lě'.

Nadxi'ida' Lě', en raza lădxa'a Lě'.

Ichiza' Lě' Bō' Lá'ayi.

Lě' usiyōnně' yúgu'tē bōnachi ca guna', uchi'a usōrōa' quéguequi.

¹⁹ Cuntu nu tıl-laleně' didza', en biti' ulidzě' zidzaj.

Cuntu nu yōni chí'ě ga naca zi'tu'.

²⁰ Tu guído' zoa bō biti' quítsjě' le, ate' guí' chizóa ulu, biti' usúluē' le, cate' uzóarē' le naca tsahui' queě'.

²¹ Yúgu'tē bōnachi ilún löza Lě'.

Ta'nně' bōnni' judío unná bē': "Dzaga Jesús tu' xihui'"

(Mr. 3:19-30; Lc. 11:14-23; 12:10)

²² Ní'irō dujuá'gaquiē' tu bōnni' ga zoě' Jesús, nachul-la lahuē', en biti' raca gu'ě didza', tu' yu'u bō' xihui' lě', ate' Jesús buně' bōnni' na'. Caní guca, rilé'eně', en ru'ě didza' bōnni' na' guchul-la lahuē', en biti' guca gu'ě didza'. ²³ Que lě ni na' bulu'bani yúgu'tē bōnachi nacua' ni', ta'nná:

—¿Naru' nácatsě' bōnni' ni Xzí'ini Xí'sōē' David, Bōnni' na' ral-la' guídě'?

²⁴ Cate' bíla'yōnně' bōnni' yudo' fariseo lě ni, ta'zá' lădxě'ě, ta'nně': Bōnni' ni rubéajě' yugu' bō' xihui' tu' dzaga Beelzebú tu' xihui', xángaca bō' xihui', Lě'.

²⁵ Réquibe'eně' Jesús lě na' ta'zá' lădx'i'gaquiē', ate' rē' lēgaquiē':

—Gátitēs ga ta'nná bē' bōnachi, channō bōnachi ni' ila'rúaj choplō, en ila'dıl-lalen luzě'eguequi, iníti yōl-la' unná bē' quéguequi. Lěsca' caní, channō ila'rúaj choplō bōnachi nacua' tu yōdzō o tu yu'u, en ila'dıl-la, biti' gaca ila'día' bōnachi nacua' yōdzō na' o yu'u na'. ²⁶ Lěsca' caní, channō ubéaj Satanás tu' xihui' la' luzě'esó, ate' yugu' bō' xihui' na' ila'dıl-lalen la' lēguequisō, ¿naru' idía' yōl-la' unná bē' que tu' xihui'? ²⁷ Rnnali' quia' rubéaja' yugu' bō' xihui' tu' dzaga Beelzebú tu' xihui' neda'. Channō runa' caní, ¿nuzxi dzaga nupa dá'gaca libí'ili' cate' tu'béaj yugu' bō' xihui'? Que lě ni na' le túngaca caz naca bē' nachíxili'. ²⁸ Na'a, channō neda' rubéaja' yugu' bō' xihui' tu' zóalen yōl-la' huáca queě' Dios Bō' Lá'ayi neda', le nácate' chibidxín le rinná bē'ě Dios ga zóali'.

²⁹ ¿Naru' huácatsō nu bōnni' tsu'ě lidxě' bōnni' nal-la, en cuéajě' yōl-la' tsahui' dzō'ō lidxě' channō cabí gúguē'ě bōnni' nal-la na' zí'aló? Ní'irō gaca tsu'ě, en ulatjě' lidxě' bōnni' nal-la na'.

³⁰ Nu bití' run neda' tsözxön, ridá'baga' neda', en nu bití' rutubi tsözxön len neda', rusilasi nu na'.

³¹ 'Que lê ni na' rea' libí'ili', ca naca yúgu'tè dul-la' tun bönachi, en yugu' didza' xihui' ta'nná, uniti lahuë' Dios léguequi, pero nu bönni' inné' zi'è queë' Dios Bó' Lá'ayi, bití' ca' uniti lahuë' Dios lê'. ³² Lësca' caní, nu bönni' inné' quia' neda', Bönni' Guljê' Bönachi, Dios uniti lahuë' lê', pero nu bönni' inné' queë' Dios Bó' Lá'ayi, bití' ca' uniti lahuë' Dios lê'. Bití' uniti lahuë' lê' dza ni zóaru' na'a, en bití' uniti lahuë' lê' dza si' za'.

Le runru' naca bē' le nācaru'

(Mt. 7:15-20; Lc. 6:43-45)

³³ Gunnē' ca' Jesús:

—Channō naca dxi'a tu yaga, cuía le naca dxi'a, pero channō naca cá'asō yaga na', cuía ca' le naca cá'asō. Caní naca, le ribía tu yaga naca bē' yaga na'. ³⁴ Libí'ili' nácali' dí'a dza quégacaba' bēla sínia'. ¿Nacxi gaca gū'ili' dxi'a didza', channō cabí nácali' dxi'a? Ca naca le ta'zá' lādxi' gaca bönachi, lësca' caní tuf'i didza'. ³⁵ Tu bönni' tsahui' ru'è didza' tsahui' tu' yu'u le naca tsahui' icja lādxi'da'ahuë', pero tu bönni' huiá' dö' ru'è didza' bití' naca tsahui' tu' yu'u le cabí naca tsahui' icja lādxi'da'ahuë'. ³⁶ Que lê ni na' rea' libí'ili', cate' idxín dza ichúguië' Dios quégaca bönachi, uchi'a usöröë' tu tu bönni' ca naca yúgu'tè didza' gula'nnazē' ca'. ³⁷ Ca naca didza' ru'u, uchi'a usöröë' li', ate' uruju' tsahui' o ibágu'u xíguia' ní'a que didza' na' bē'u.

Ta'nábinē' Jesús gunē' le gaca bē' nu náquiē'

(Mr. 8:12; Lc. 11:29-32)

³⁸ Ní'irō bulu'bi'è didza' yugu' bönni' yudo' fariseo, en yugu' bönni' yudo' tu'sédinē', en tē' Jesús:

—Bönni' Usedi, rē'énitu' ilé'etu' tu le gunu' le gaca bē' dē lu no'o yöl-la' unná bē'.

³⁹ Bubi'è didza' Jesús, en rē' légaquië':

—Yugu' bönni' tuá' dö' ni, bití' zoa idú lādxi'do'gaquië', ta'nábinē' neda' guna' tu le gaca bē' nu naca'. Bití' bi le gaca bē' ila'lé'enē', pero le naca bē'sō na' ca guca queë' Jonás, bönni' bē'è didza' uláz queë' Dios. ⁴⁰ Ca na' guca queë' Jonás na', bugá'anē' lē'ēba' tu bóla zxön idú tsonna dza tsonna yēla, lësca' caní gaca quia' neda', Bönni' Guljê' Bönachi, tsonna dza tsonna yēla ugá'ana' zxan yu. ⁴¹ Ila'yasē' bönni' gula'cu'è yödzo Nínive dza ichúguië' Dios quégaca bönachi cate' uchi'a usöröë' bönachi nacuá' dza ni zóaru' na'a, ate' le gulunē' usubaga' bönachi ní xíguia' tu' bulu'bi' lādxi'gaquië' bönni' Nínive na' cate' ni' busiyönnē' Jonás légaquië' xtidzē'è Dios, ate' na' a zoa' ni neda', en nácaterá' lo ca Jonás na'. ⁴² Lësca' caní, nigula ni' gunná bé'enu yödzo dē saca' ga ridódi gubidza beo' ziaga chásanu dza ichúguië' Dios quégaca bönachi cate' uchi'a usöröë' bönachi nacuá' dza ni zóaru' na'a, ate' le bennu usubaga' légaquië' xíguia', tu' birúajnu nigula na' ga nácaterō zi'tu' para yóninu didza' réajni' i bē'è Salomón, ate' na'a zoa' ni neda', en nácaterá' lo ca Salomón na'.

Cate' rudxín tu bō' xihui' xilataj

(Lc. 11:24-26)

⁴³ Gunnē' ca' Jesús:

—Cate' rirúaj tu bō' xihui' yu'u bönni', ridá gapa nabidxi, riguila' ga uzí' lādxi'. Channō cabí idzōli ga na' uzí' lādxi', ⁴⁴ ní'irō inná: "Huója' xilatja' ga ni' birúaja'." Cate' udxín ga ni' birúaj, tsöjxaca' bönni' na', náquië' ca tu yu'u nadachi', en nalúaj, en chinabá'a para nu tsöjsóa ni'. ⁴⁵ Ní'irō tseaj, tsöjzxi' ia'gadxí bō' xihui' nácagacatērō xihui' ca le, ate' ila'yaza yúgu'tè, en ila'cuá' icja lādxida'ahuë' bönni' na', ate' ga údxi huayálitērō ca gaca queë' bönni' na' ca guca queë' zí'aló. Lësca' caní gaca quégaca bönachi tuá' dö' ni.

Xinē'è Jesús, en yugu' bönni' böché'è

(Mr. 3:31-35; Lc. 8:19-21)

⁴⁶ Cate' ni' ruí'ilenē' Jesús bönachi didza' ni, xinē'è, en yugu' bönni' böché'è bila'dxinē' ni'. Gula'cu'è lō'aló, en gulē'éniguequinē' ilu'ilenē' Jesús didza'. ⁴⁷ Ní'irō tu bönni' busiyönnē' Jesús, en rē' Lē':

—Buyútsōca', nacu'è xinó'o, en yugu' bönni' böchu'u lō'aló, en tē'ennē' ilu'ilenē' Lī' didza'.

⁴⁸ Bubi'è didza' Jesús, en rē' bönni' na' busiyönnē' Lē' caní, rnnē':

—¿Nözili' nuzxi' caz xiná'a, en nupxi' caz bönni' böcha'a?

⁴⁹ Ní'irō bulí' nē'è, en bulu'e yugu' bönni' usēda queë', en rnnē':

—Bulí'yútsōca', bönni' ni' nácagaquië' ca xiná' caza', en yugu' böchi' caza'. ⁵⁰ Nútí'tēs nu run ca rē'eni quéziné' Xuza' zoë' yehua' yubá, nu ni naca bi'i böchi' caza', en bi'i zan caza', en xiná' caza'.

13

Rucúdzu'ë didza' Jesús ca naca queë' tu bönni' guz

(Mr. 4:1-9; Lc. 8:4-8)

¹ La' dza ní'sò birúajë' Jesús niu' yu'u, ate' yöjchö'ë ra' nísado'. ² Tu' bila'dxín bönnachi zían ga zoë' Jesús, gurenë' tu lë'e bárcodo', en gurö'ë ní', ate' bönnachi zían na' gula'cuá' luyú bidxi ra' nísado' na'. ³ Ní'irö Jesús bé'lenë' légaquië' didza', zían le busédinë' légaquië'. Bucúdzu'ë didza', rnnë':

—Buli'yútsöca', birúajë' tu bönni' guz, söljesië' xisedo'. ⁴ Tsanni ní' söljesië', bal-la xisedo' na' gulasi ra' nöza, ate' bila'dxinba' biguinnido', en gulë'ajba' xisedo' na'. ⁵ Gulasi ia'zica'rö xisedo' na' luyú ga rö'ö guiöj, ga na' rö'ö láti'sò yu, ate' la' gula'lentë, tu' cabí rö'öda' yu ní'. ⁶ Ní'irö cate' budzá'a gubidza, lë na' bësië' la' gula'cuáditë, en gula'bidxi, tu' cabí dë ga ilún lui. ⁷ Gula'lén ia'zica'rö xisedo' na' ga bulu'lén lubá yötsi', ate' gula'zxón lubá yötsi' na', en bila'röli lë na' bësië', en gulún ditaj le. ⁸ Gulasi ia'zica'rö xisedo' na' ga naca luyú bëbu, ate' bulu'nödzej. Bal-la lë na' bësië' bulu'nödzej ia'tú gayuá'tërö ca'. Ia'zica'rö bulu'nödzej ia'tsónnalaj ca', ate' ia'zica'rö bulu'nödzej ia'chí uruá' ca'. ⁹ Nu zoa nagui, en riyöni, ral-la' uzë nagui.

Le t'ëni ilún le bucúdzu'ë Jesús didza'

(Mr. 4:10-12; Lc. 8:9-10)

¹⁰ Ní'irö bila'dxinë' bönni' usëda queë' Jesús ga zoë', en gula'nábinë' Lë', ta'nnë':

—¿Bixz que ru'ilenu' bönnachi didza' yugu' le rucúdzu'u didza'?

¹¹ Bubi'ë didza' Jesús, en rë' légaquië':

—Dios ru'ë libí'ili' lataj tséajni'ili' le nagachi' ca rinná bë'ë Lë' yehua' yubá, pero bönnachi ní' bití' t'ëni ila'yéajni'í. ¹² Nu sí' xtídzë', Dios unódzjë' que ia'lati', ate' gáta'da'arö que, pero nu bití' sí' le, la's dui le dë que udúa. ¹³ Que lë ní' na' ru'ilena' légaquië' didza' yugu' le rucúdzu'a didza', tu' tu'yüë' pero bití' ta'lé'enë'. Ta'yönnë' pero bití' tu'zë nágagaquië', en bití' ta'yéajni'inë'. ¹⁴ Caní raca quégaquië' para gaca ca na' gunnë' Isaías, bönni' bë'ë didza' uláz queë' Dios, gunnë':

Le nácatë yónili' pero bití' tséajni'ili'.

Uyuli' iná'ali' pero bití' ilé'eli'.

¹⁵ Caní raca tu' nazidi ládxi'do'gaca bönni' ní,

en bití' bi riyaza icja nágagaquië'.

Nadzudi' guiöj lógaquië',

para cabí ila'lé'enë' len guiöj lógaquië' na'.

Bití' ulu'zë nágagaquië',

en bití' ulu'zéajni'í ládxi'gaquië',

en bití' ulu'huóáquië' quila' neda'

para gaca una' légaquië'.

¹⁶ Na'a, bica' ba libí'ili', tu' rilé'e guiöj loli', en riyöni nágalí. ¹⁷ Le nácatë rea' libí'ili', zían bönni' gulu'ë didza' uláz queë' Dios en yugu' bönni' tsahui' gulë'ënnë' ila'lé'enë' le rilé'eli' libí'ili' pero bití' bila'lé'enë' le. Gulë'ënnë' ila'yönnë' le riyónili' libí'ili' pero bití' bila'yönnë' le.

Riguíjõ'ë Jesús le bucúdzu'ë didza'

(Mr. 4:13-20; Lc. 8:11-15)

¹⁸ Gunnë' ca' Jesús:

—Buli'zë nágalí' ca naca le bucúdzu'a didza' que bönni' guz. ¹⁹ Núti'tës nu riyöni didza' ca rinná bë'ë Dios yehua' yubá, en bití' réajni'í le, raca que didza' riyöni nu na' ca guca que xisedo' na' gulasi ra' nöza. La' za'të tu' xihui', en rugá didza' na' guyú'u icja ládxi'da'ahuë' bönni' na'. ²⁰ Xisedo' na' gulasi luyú ga rö'ö guiöj rulu'í ca raca queë' bönni' riyönnë' didza' na', en la' ruzëtë náguië' lu yöl-la' rudzeja queë', ²¹ pero ca na' bití' ridia' xisedo' na' tu' cabí dë ga gun lui, lësca' caní raca queë' bönni' ní. Cate' idxín tu le usaca' zi' lë', ate' ila'bía ná'gaca bönnachi lë' tu' nazí' lu në'ë didza' na', la' gácatë chopá ládxi'ë. ²² Xisedo' na' gulasi ga na' bulu'lén lubá yötsi' rulu'í ca raca queë' bönni' na' riyönnë' didza' na', pero ru'í ládxi'ë yugu' le dë yödzoilió ní, ate' nazí' yë'ë bönni' na', tu' ru'í ládxi'ë yugu' yöl-la' tsahui' que. Yugu' lë ní ta'röli didza' na', en tun ga bití' gun dxin lu icja ládxi'da'ahuë'. ²³ Xisedo' na' gulasi luyú bëbu rulu'í ca raca queë' bönni' riyönnë' didza' na', en réajni'inë' le, ate' run dxin didza' na' lu icja ládxi'da'ahuë'. Nácagaca bal-la bönnachi ca xisedo' na' bulu'nödzej ia'tú gayuá'tërö ca'. Nácagaca ia'zica'rö bönnachi ca xisedo' na' bulu'nödzej ia'tsónnalaj ca', ate' nácagaca ia'zica'rö bönnachi ca xisedo' na' bulu'nödzej ia'chí uruá' ca'.

Tu guíxi'do' cané le nalá' ca rilá' yöla' xzoa' xtila

²⁴ Ia'tú le bucúdzu'ë didza' Jesús, ate' rë' légaquië':

—Ca gaca cate idxín ni le rinná bē'ē Dios yehua' yubá naca ca guca que xisedo' dxi'a le guzē' tu bōnni' ga naca lu xiyuē'. ²⁵ Tsanni na' tasiē' bōnni' nacu'ē lidxē', bidxín tu nu bití' rilé'e xan yu'u na' dxi'a, ate' yōjōza lu xiyuē' xisedo' guíxi'do' cané le nalá' ca naca yōla zxaa' xtila, ate' bōaj xilataj. ²⁶ Cate' gulén zxaa' xtila na', en gurō'ō do que, ga na' dxía xui'i, ní'irō gulaca bē' guíxi'do' cané na'. ²⁷ Ní'irō bila' dxinē' bōnni' huen dxin ga zoē' bōnni' xan la' yēla na', en tē' lē': "Xan, channō guzu' xisedo' dxi'a lu yu quíu', ¿naxci guca gula'lén guíxi'do' cané na'?" ²⁸ Xan yu na' gudxē' légaquiē', rnnē': "Tu bōnni' bití' rilé'enē' neda' dxi'a benē' caní." Ní'irō gula'nábinē' huen dxin queē' lē', ta'nnē': "¿Ba ré'ēnu' tséajtu' tsōjōlajtu' guíxi'do' cané na'?" ²⁹ Xángaquiē' rē' légaquiē': "¡Biti' ca! Nadx ca' cate' iládu'li' guíxi'do' cané na', iládu'lentēli' ca' yōla zxaa' xtila. ³⁰ Gácarō dxi'a guí'ili' lataj ila'zōngarō tsōzōn cate' idxinrō dza tsōjtúbiru' le, ate' ní'irō guía' nupa ulu'tubi le: Buli'tubi zí'alō guíxi'do' cané na', en guli'guga' tsōjxili huéaj para uzégui'ru' le, ate' ní'irō utúbili' zxaa' xtila lu yu'u quia'."

Rucúdu'ē didza' Jesús ca naca que xisé mostaza

(Mr. 4:30-32; Lc. 13:18-19)

³¹ Ia'tú le bucúdu'ē didza' Jesús, ate' rē' légaquiē':

—Ca gaca ga idxín le rinná bē'ē Dios yehua' yubá, gaca ca raca que tu xisé mostaza, le guzē' tu bōnni' ga naca lu xiyuē'. ³² Le nácatē xisé mostaza na' nácatērō cuidi' ca yúgu'tē xisedo' ia'zica'rō, pero cate' chinadúz, rizxōntērō ca yúgu'tē guixi' cuan, en rizxōn ca naca tu yaga, ate' ta'dxinba' biguínido', en tunba' xicá'agacaba' lu ni'a nē'e.

Rucúdu'ē didza' Jesús que cúa zi que yōta xtila

(Lc. 13:20-21)

³³ Ia'tú le bucúdu'ē didza' Jesús, ate' rē' légaquiē':

—Ca gaca ga idxín le rinná bē'ē Dios yehua' yubá gaca ca le run cúa zi que yōta xtila, le buchíxinu tu nígula len tsonna libixi yōjza zxaa' xtila, ate' guyazxa idútē cúa na'.

Le rē'ēni gun le rucúdu'ē didza' Jesús

(Mr. 4:33-34)

³⁴ Yúgu'tē lē ni bucúdu'ē didza' Jesús, le bē'lenē' bōnachi nacuá' ni' didza', en bití' bi didza' bē'lenē' légaquiē' le cabí bucúdu'ē didza'. ³⁵ Caní benē' para gaca lē na' buzúajē' lu guichi tu bōnni' bē'ē didza' uláz queē' Dios, gunné':

Gu'a didza' yugu' le ucúdu'a didza'.

Inniá yugu' le nagachi' cate' ni' gusí lo si' guta' yōdzōlió.

Riguíxjō'ē Jesús le bucúdu'ē didza' que guíxi'do' cané

³⁶ Ní'irō buzenē' Jesús bōnachi nacuá' ni' didza', en gusól-lē'ē légaquiē', ate' guyu'ē yu'u. Ní'irō bila' dxinē' bōnni' usēda queē' ga zoē', en tē' Lē':

—Gudíxjō'i netu' le rē'ēni inná lē na' bucúdu'u didza' que guíxi'do' cané le nalá' ca naca yōla zxaa' xtila.

³⁷ Bubi'ē didza' Jesús, ate' rē' légaquiē':

—Bōnni' razē' xisedo' dxi'a naca' neda', Bōnni' Guljē' Bōnachi. ³⁸ La' yēla na' naca yōdzōlió ni, ate' xisedo' dxi'a na' tu'lu'fi ca nácacaga nupa nabábagaca ga rinná bē'ē Dios. Guíxi'do' cané na' le nalá' ca naca yōla zxaa' xtila tu'lu'fi ca nácacaga nupa néquiquequi que tu' xihui'.

³⁹ Nu na' bití' rilé'e dxi'a xan la' yēla na', en yōjōza guíxi'do' cané na', tu' xihui' caz naca. Dza ulu'tubē' na' rulu'fi ca gaca dza údxi que yōdzōlió ni, ate' nupa na' tu'tubi nácacaga gubáz lá'ayi queē' Dios. ⁴⁰ Ca na' guca, bulu'tubē' guíxi'do' cané na', en bulu'zégui'ē le lu guí', lē'sca' caní gaca cate' údxi que yōdzōlió ni. ⁴¹ Neda', Bōnni' Guljē' Bōnachi, isól-la'gaca'-nē' gubáz lá'ayi quia', ate' ulu'béajē' ga rinná bē'ē Dios yúgu'tē nupa tun ga tun dul-la' luzé'eguequi, enca' nupa tuá' dō'. ⁴² Yugu' gubáz lá'ayi na' ila'gu'ē bōnni' tuá' dō' na' lu guí' gabila. Ní' ila'bōdxē', en ulu'tí-la láyi'gaquiē'. ⁴³ Ní'irō ila'yēpi yōsa bení' bōnachi tsahui', en ilácacagaquiē' ca gubidza ga ni' rinná bē'ē Dios yehua' yubá. Nu zoa nagui, en riyōni ral-la' uzé nagui.

Rucúdu'ē didza' Jesús que tu yōl-la' tsahui' nagachi'

⁴⁴ Lē'sca' caní bucúdu'ē didza' Jesús, rnnē':

—Le rinná bē'ē Dios yehua' yubá naca ca tu yōl-la' tsahui' nagachi' tu la' yēla. Cate' bidzōlinē' tu bōnni' le, bucáchē'ē le leyúbölō ga na' bigachi', ate' lu yōl-la' rudzeja queē' guyijē', yōjēti'ē yúgu'tē le dē queē' ate' gú'uē' la' yēla na' para gata' yōl-la' tsahui' na' queē'.

Rucúdu'ē didza' Jesús que tu bugá le nazáca'da'

⁴⁵ Gunné' ca' Jesús:

—Ca ral-la' sē ládxí'li' le rinná bē'ē Dios yehua' yubá naca ca benē' tu bōnni' rá'uē', en ruuti'ē, en riguiljē' bugá nazáca'gaca. ⁴⁶ Cate' bidzōlinē' yu bugá le nazáca'da', guyijē', yōjēti'ē yúgu'tē le dē queē', ate' gú'uē' bugá na'.

Rucúdu'ē didza' Jesús que tu yōxaj böla

⁴⁷ Lësca' caní gunnë' Jesús:

—Ca gaca ga ridxín le rinná bē'ē Dios yehua' yubá, gaca ca run tu yōxaj bōla le ta'chiljē' bōnni' lu nísado', le rōjxí' zían bōla izá'a. ⁴⁸ Cate' chibidzá' yōxaj na', bulu'béajē' le luyú bidxi ra' nísado' na', ate' gula'bō'ē ni', en gula'gu'ē-ba' yugu' bōla dxi'a tu lu ga'bōra, pero gula'rú'unē'-ba' yugu' bōla cá'asō. ⁴⁹ Lësca' caní gaca cate' údxi que yōdzōlió ni. Ila'rúajē' gubáz lá'ayi queē' Dios, ate' ulu'béajē' quez yugu' bōnachi tsahui', ate' ulu'cuítie' légaquie' ladaj bōnachi tuá' dō'.

⁵⁰ Ní'irō ila'gu'ē bōnachi tuá' dō' na' lu guí' gabila. Ní' ila'bōdxē', en ulu'tíl-la láyē'ē.

Yōl-la' tsahui' le naca gula, en le naca cubi

⁵¹ Ní'irō Jesús gunábinē' yugu' bōnni' usēda queē', rnnē':

—¿Ba réajni'ili' yúgu'tē lē ni?

Bulu'bi'ē didza', tē' Lē':

—Ōn, Xan.

⁵² Jesús gudxē' légaquie':

—Cate' tu bōnni' yudo' usedi chinazí' lu nē'ē le rinná bē'ē Dios yehua' yubá, náquie' ca tu bōnni' xan yu'u, rubéajē' ladaj yōl-la' tsahui' queē' le naca cubi, en le naca gula, le nácagaca tsahui' le ruzi'ē xibé.

Le benē' Jesús lu yōdzō Nazaret

(Mr. 6:1-6; Lc. 4:16-30)

⁵³ Cate' budxi bucúdu'ē Jesús yugu' didza' ni, buzē'ē ni'. ⁵⁴ Cate' budxinē' ladzē', busédinē' bōnachi nacuá' lu yu'u ga tu'dubē' bōnni' judío, en tu'sēdē' queē' Dios, ate' bulu'bánninē', ta'nnē':

—¿Gazxi caz guzēdē' bōnni' ni yōl-la' réajni'ini? ¿Nacxi caz naca, runē' yugu' yōl-la' huáca ni?

⁵⁵ Náquie' bōnni' ni xzí'inē' bōnni' gubēdxi yaga, ate' xinē'ē lēnu María. Náquie' bōchi'gaquie' Jacobo, en Josē, en Simón, en Judas. ⁵⁶ Lësca' nigula zanē' nacuá'lennu rē'u ni. ¿Gazxi caz guzēdē' yúgu'tē lē ni?

⁵⁷ Que lē ni na' gulaca chopá lādxi'gaquie', ate' bulu'cá'anē' Lē'. Ní'irō Jesús gudxē' légaquie':

—Yúgu'tē bōnachi tun bal tu bōnni' ru'ē didza' uláz queē' Dios, pero bōnachi uládz queē', en bōnachi nacuá' lidxē' bití' tun lē' bal.

⁵⁸ Que lē ni na' bití' benē' Jesús zían yōl-la' huáca ni', tu' cabí ta'yéajlē'ē Lē'.

14

Ca bētgaquie' Juan, bōnni' buquilé' bōnachi nisa

(Mr. 6:14-29; Lc. 9:7-9)

¹ Lu dza ni', biyōnnē' Herodes, bōnni' rinná bē'ē luyú Galilea, ca nácagaca yugu' yōl-la' huáca runē' Jesús. ² Herodes na' gudxē' yugu' ni'a nē'ē, rnnē':

—Bōnni' na' Juan, bōnni' buquilé' bōnachi nisa. Chibubanē' lu yōl-la' guti. Que lē ni na' dē lu nē'ē yōl-la' huáca zxōn na'.

³ Caní gunnē' Herodes tu' gusól-lē'ē lē cazē' bōnni' gula'zōnē' Juan, en gulúgui'ē lē' du guié, ate' gula'gu'ē lē' lidxi guié tu' gú'uninu Herodías ilunē' caní. Herodías na' gúcanu nigula queē' Felipe, bōchē'ē Herodes na'. ⁴ Caní benē' Herodes, tu' gudxē' Juan na' lē': "Bití' ralla' sóalenu'-nu."

⁵ Que lē ni na' gú'unnē' Herodes gútiē' Juan, pero gúdxinē' ila'dá'baga' bōnachi lu yōdzō ni' lē', tu' téquiquequi bōnachi náquie' Juan na' tu bōnni' ru'ē didza' uláz queē' Dios. ⁶ Ní'irō cate' guca lani que dza guyé'enē' iz Herodes, birúajbi' bi'i nigula queēnu Herodías na', en buyá'abi' lógaca nupa nacuá' lani na', ate' guyaza lādxē'ē Herodes le benbi'. ⁷ Guzxi' lu nē'ē Herodes, en benē' tsutsu xtídzē'ē unōdzjē' queēbi' bití'tēs bi inábibi' lē'. ⁸ Tu' chibusédinu-bi' zí'alō xiná'abi', gúdxibi' lē':

—Benna quia' na'a icjē' Juan, bōnni' buquilé' bōnachi nisa. Gulú'u le tu lu zxiga' zxōn.

⁹ Ní'irō bui'innē' Herodes, pero tu' chibenē' tsutsu xtídzē'ē, en tu' bila'yōni nupa te'aj tágulen lē', que lē ni na' gunná bē'enē' nu tsōjnōdzaj icjē' Juan na' queēbi'. ¹⁰ Caní guca, gusól-lē'ē nu tsōjrxí yenē' Juan ga ni' yu'ē lidxi guié. ¹¹ Bōnni' na' nasól-lē'ē bu'ē icjē' Juan na', zxoa lu zxiga' zxōn, ate' bunōdzjē' le queēbi' bi'i nigula na', ate' lēbi' buá'abi' le queēnu xiná'abi'.

¹² Ní'irō bila'dxinē' bōnni' gula'dē'ē Juan na', ate' bulu'ú'ē lē', en bulu'cáché'ē lē'. Gudōdi ni', yōjtíxjōi'iguequinē' Jesús ca gulaca lē ni.

Jesús rugahuē' zíanrō ca chi-un gayuá' bōnachi

(Mr. 6:30-44; Lc. 9:10-17; Jn. 6:1-14)

¹³ Cate' réquibe'enē' Jesús lē ni, buzē'ē ni', ate' gurenē' tu lē'e bárcodo, en sa'yéajē' la' queēzē' tu lataj cá'asō. Cate' bila'yōni bōnachi zéajē' ni', bila'rúaj yugu' yōdzō ni', en yōjaca ga

ni' idxinë' Jesús, ta' zë'e ní'aguequi. ¹⁴ Cate' burúajë' Jesús lë'e barco, bilé'enë' nacuá' bönachi zían ni', ate' buéchi' ládxi'ë léguequi, en bunë' nupa te'e, nùtsa'gaca ládaguequi. ¹⁵ Cate' chiridzò' dza na', bila'dxinë' yugu' bönni' usëda queë' Jesús ga zoë', en tè' Lë':

—Chiridzò' na'a, ate' cá'asò naca lataj ni. Busòl-la' bönachi ni para tsòjaga gapa dë yòdzòdo' para gá'ugaca bi ilagu.

¹⁶ Ní'irò Jesús gudxë' légaquië':

—Biti' run bayudxi tsòjáquië'. Buli'nòdzaj libí'ili' le ilahuë'.

¹⁷ Ní'irò tè' Lë':

—Gáyu'sò yòta xtila dë, en chópasöba' böla dëba' queëtu' ni.

¹⁸ Jesús rë' légaquië':

—Buli'dödi le lu na'a.

¹⁹ Ní'irò Jesús gunná bé'enë' bönachi na' ila'bö' ga yu'u daca'. Gudödi na' gudélë'ë gayu' yòta xtila na', en chópaba' böla na', ate' guchisa lahuë', ruyúë' zaca' yehua' yubá. Gudxë' Dios: "Xclenu'." Ní'irò buzxuxxjë' yòta xtila na', en budödë' le lu ná'agaquië' bönni' usëda queë', ate' légaquië' gula'guisië' le lógaca bönachi zían na'. ²⁰ Gulahuë' yúgu'tëgaquië', en bulu'huöljanë'. Ní'irò bulu'tubë' yugu' bizxaj nagá'anagaca, en bulu'lié' chinnu ga'böra. ²¹ Bönni' ni' gulahuë' guláquië' idú chi-un gáyu'ë, pero cuntú nu bulaba yugu' nigula, en bí'ido'.

Jesús rizë'e ni'ë lu nísado'

(Mr. 6:45-52; Jn. 6:16-21)

²² Ní'irò la' bentë' Jesús ga gula'benë' bönni' usëda queë' lë'e bárcodo', en tsòjáquië', ila'nóruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacuá' ni' didza'. ²³ Cate' chibusöl-lë'ë Jesús bönachi na', gurenë' tu lu guí'ado' ga ni' yòjsóë' tuzë'. Ni' bulidzë' Dios. Cate' chigul-la, tuzë' zoë' ni'. ²⁴ Bárcodo' ga na' nacu'ë bönni' usëda queë' ridödi gatsaj lálhui'lò nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'. ²⁵ Gudödi guluhuëla, gubígui'ë Jesús gala' ga na' nacu'ë, rizë'e ni'ë lu nísado'. ²⁶ Cate' yugu' bönni' usëda queë' bila'le'enë' Lë', rizë'e ni'ë lu nísado', gula'bö'dë'ë böniga tu' tádxinë'. Gula'bódx'i'ë, ta'nnë':

—Tu' ridasö na'.

²⁷ Ní'irò Jesús la' bulidztë' légaquië', rnnë':

—Buli'zxöni ládxi'li'. Neda' ni. Biti' gádxili'.

²⁸ Ní'irò bubi'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

²⁹ Jesús gudxë' lë':

—Gudá.

Ní'irò bötjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús.

³⁰ Ní'irò cate' bilé'enë' Pedro ca bö' na' recja rutá nisa, gúdxinë'. Ní'irò gusi lahuë' rötjë' lu nisa, ate' guródx'i'ë. Bulidzë' Jesús, rnnë':

—Xan, busölá neda'.

³¹ Jesús la' bulitë në'ë. Buguélë'ë lë', en rë' lë':

—Láti'sö reájle'u neda'. ¿Bizx que guca chopa ládxi'u?

³² Cate' bulu'benë' lë'e bárcodo' na', guró'ö dxi bö' na' recja. ³³ Ní'irò bönni' nacu'ë lë'e bárcodo' na' gula'yéaj ládxi'gaquië' Jesús, ta'nnë':

—Le nácatë, Zxí'inë' Dios nacu'.

Jesús ruínë' yugu' bönni' huë' nacu'ë yòdzö Genesaret

(Mr. 6:53-56)

³⁴ Cate' chigula'dödë' ia'tsölá'a nísado' na', la' bila'dxintë' lu xiyú yòdzö Genesaret. ³⁵ Cate' bulu'ünbë'ë bönni' yòdzö ni' Jesús, gula'söl-lë'ë didza' idútë luyú ni', ate' dujuá'gaquië' yúgu'të nupa te'e ga na' zoë' Jesús. ³⁶ Guláta'yuë' lahuë' Jesús gu'ë légaquië' lataj ila'gansë' ruí' lari' nácue', ate' la' bulu'huóacatë yúgu'të nupa na' bila'gán lari' na'.

15

Le tun ga bití' nácaru' tsahui' lahuë' Dios

(Mr. 7:1-23)

¹ Ní'irò yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' tè' Lë':

² —¿Bizx que tunë' bönni' usëda quiu' le ridödi bë' ca naca le nulaga loru' runru' ca gulunë' xuz xtó'oru? Biti' ta'guíbi në'ë ca naca que yudo' cate' si' ilahuë'.

³ Bubi'ë didza' Jesús, en gunábinë' légaquië', rnnë':

—¿Bizx que libí'ili' ca' rucá'anali' cá'asò xibá queë' Dios para gunli' le nulaga loli' runli'?

⁴ Caní raca, tu' gunná bé'enë' Dios libí'ili', gunné': "Ben bal xuz xino'o", en gunné' ca': "Nu

innë zi' que xuz xinë'e, tsaz gati nu na'." ⁵ Pero libí'ili' rnnali': "Channö nu guíë xuz xinë'e: Biti' bi gaca gunna' quíu' tu' chiguzxi' lu na'a gunna' yúgu'të queë' Dios, ⁶ bítirö bi run bayudxi gun nu na' que xuz xinë'e." Caní runli', rucá'anali' cá'asö le gunná bë'ë Dios, para gunli' le nulaga loli' runli'. ⁷ Libí'ili', bönni' ruluf'isö tsahui' cuinli', idú ca nácali' gudíxjö'ë Isaiás, bönni' bë'ë didza' uláz queë' Dios, gunné':

⁸ Bönni' ni, len rú'agacsë' tunë' neda' bal, en calëga idú ládxi'gaquië'.

⁹ Nítisö naca le ta'yéaj ládxi'gaquië' neda', tu' tu'sédinë' yugu' le gula'nná bë' bönachi.

¹⁰ Ní'irö bulidzë' Jesús bönachi nacuá' ni', en rë' léguequi:

—Buli'zë nágalí' le guía' libí'ili', en guli'tséajni'i. ¹¹ Calëga le riyaza ru'ë nu bönni' run ga bití' náquië' tsahui' lahuë' Dios, pero le rirúaj ru'ë, lë ni run ga bití' náquië' tsahui' lahuë' Dios.

¹² Ní'irö yugu' bönni' usëda queë' Jesús gula'bígui'ë ga zoë', en tē' Lë':

—¿Naru' nöztsenu' gula'lenë' yugu' bönni' yudo' fariseo cate' bila'yönnë' didza' ni bë'u?

¹³ Ní'irö bubi'ë didza' Jesús, en rë' légaquië':

—Yúgu'të le nadúz, le cabí guzë' Xuza' zoë' yehua' yubá, huadúl'agaca idú luí. ¹⁴ Bulí'cá'ana légaquië'. Chinachúl-la lógaquië', en ta'chë'ë nupa nachul-la lógaca. Channö tu bönni' lo chul-la ichë'ë ia'tuë' bönni' lo chul-la, iropë' ila'bixë' tu lu yeru.

¹⁵ Ní'irö bubi'ë didza' Pedro, en rë' Jesús:

—Buzéajni'i netu' lë ni rucúdu'u didza'.

¹⁶ Jesús rë' légaquië':

—¿Naru' cabí réajni'itseli' ca' libí'ili'? ¹⁷ ¿Naru' cabí réajni'itseli' riyaza lë'ëru' yúgu'të le riyaza ruá'aru', ate' rurúaj lë'ëru'? ¹⁸ Na'a, le rirúaj rúa'ali', lu icja ládxi'do'oli' za', ate' lë ni run ga bití' nácali' tsahui' lahuë' Dios. ¹⁹ Caní raca, tu' ta'lén lu icja ládxi'do'oli' yugu' le riza' ládxi'li' le ruá' dö', le ilún ga gütli' bönachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizë ládxi'li' cuanli', en yugu' le rinnëli' que luzá'ali' le cabí nácate, en yugu' le rinnë xihui'li'. ²⁰ Yugu' le caní tun ga bití' náquië' tu bönni' tsahui' lahuë' Dios, pero channö cabí nayari në'ë ca naca que yudo' cate' bi gahuë', bití' gun ga bití' náquië' tsahui' lahuë' Dios.

*Tu nigula izá'a réajlë'ënu Jesús
(Mr. 7:24-30)*

²¹ Ní'irö buzë'ë Jesús ni', en guyéajë' lu xiyú yödzo Tiro, en yödzo Sidón. ²² Tu nigula nabábanu luyú Canaán birúajnu yödzo ni', ate' bë'ënu zidzaj didza', rënu Jesús:

—Xan, xzi'ini xi'sóë' David, buéchi' ladxí' neda'. Bi'i nigúlado' quia' rigú'í rizáca'da'abi' tu' yu'u bö' xihui' lëbi'.

²³ Biti' bi didza' bubi'ë Jesús. Ní'irö gula'bígui'ë bönni' usëda queë' ga zoë', ate' gulë' Lë', ta'nnë':

—Busöl-la'-nu, tu' zá'anú cúdzu'ru' ribödxi'anú.

²⁴ Ní'irö bubi'ë didza' Jesús, ate' rë'ë-nu:

—Dios nasól-lë'ë neda' gácalena' bönachi Israel, nupa nácacaga ca bö'cu' xzila'do' nanítigacaba'.

²⁵ Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

²⁶ Bubi'ë didza' Jesús, rnnë':

—Biti' naca dxi'a ugúaru' yóta quégacabi' bí'ido', en chú'unaru' le lógacaba' bö'cu'do'.

²⁷ Ní'irö nigula na' rënu Jesús, rnnanu:

—Ön, Xan, pero táguba' bö'cu'do' na' le bizxaj tu'huóxaj ga tagu xángacaba'.

²⁸ Ní'irö bubi'ë didza' Jesús, rnnë':

—Nigúlado'. Idú naca ca réajlë'u neda'. Gaca quiu' ca rë'ënnu'.

La' ní'sö böacatëbi' bi'i nigúlado' queënu.

Jesús ruinë' zían nupa te'e

²⁹ Ní'irö buzë'ë Jesús ni', en gudödë' ga naca ra' nísado' que Galilea. Gurenë' tu lu guí'ado', ate' gurö'ë ni'. ³⁰ Bönachi zían dujuá'gaquië' nupa bití' guca ila'zá', en nupa nachul-la guió'j lógaca, en nupa bití' guca ila'nnë', en nupa narugu ni'a në'eguequi, en ia'zica'rö zían nupa te'e, ate' gula'guíxaj léguequi xini'ë Jesús, ate' Lë' bunë' léguequi. ³¹ Bulu'bani bönachi ni' ca naca le benë' Jesús, tu' bila'lë' tu'nnë nupa bití' guca ila'nnë', ate' nuhuóacagaca nupa gurugu ni'a në'eguequi, ate' tu'zá' nupa bití' guca ila'zá', ate' tu'lë' nupa guchul-la lógaca. Que lë ni na' gula'gu'ë yöl-la' ba Dios quégaca bönachi Israel.

Jesús rugahuë' zíanrö ca choá' gayuá' bönachi
(Mr. 8:1-10)

³² Ní'irö Jesús bulidzë' yugu' bönni' usëda queë', en rë' légaquië':
—Ruhuechi' ládxa'a bönachi zían ni, tu' chiguca tsonna dza zá'lenguequi neda', en biti' bi dë le ilagu. Biti' rë'ënda' usöl-la'gaca'-në' tsöjhuöajgaquië' lídxigaquië' ta'dunsë' ca', nadxi ca' udú ládxi'gaquië' la' nöza.

³³ Ní'irö yugu' bönni' usëda queë' të' Lë', ta'nnë':

—¿Gaxi caz idzölitu' yöta xtila zían lu lataj cá'asö ni, le ugágutu' bönachi zían ni?

³⁴ Gunábinë' Jesús légaquië', rnnë':

—¿Bal-laxi yöta xtila dë queëli'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queëtu' ni.

³⁵ Ní'irö Jesús gunná bé'enë' bönachi zían na' ila'bö' lu yu. ³⁶ Gudélë'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzuxzjë' iroptë na', en bunödzejë' quégaquië' bönni' usëda queë', ate' légaquië' gula'guisíë' le lógaca bönachi zían na'. ³⁷ Gulahuë' yúgu'të', en bulu'huöljanë'. Gudódi ni' bulu'tubë' le bizxaj nagá'anagaca, ate' bulu'lié' gadxi ga'böra. ³⁸ Yugu' bönni' na' gulahuë' nácagaquië' choá' gáyú'e, pero cuntú nu bulaba yugu' nigula, en bí'ido'. ³⁹ Ní'irö busöl-lë'ë Jesús bönachi na' tsöjhuöajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzö Magdala.

16

Ta'nábinë' Jesús gunë' tu le gaca bë' nuzxi náquië'
(Mr. 8:11-13; Lc. 12:54-56)

¹ Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zi' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'.
² Bubi'ë didza' Jesús, en rë' légaquië':

—Cate' ridzö', rnnali' caní: "Gun dxi'a cuxö, tu' rö'ö böaj xiná lúzxiba." ³ Cate' naca zílado', rnnali' caní: "Biti' gun dxi'a na'a dza tu' rö'ö böaj xiná, en ruchul-la lúzxiba." Libí'ili', bönni' rulul'isö tsahui' cuinli'. Raca innë ya'ali' naca gun lúzxiba, pero biti' gaca tséajni'ili' le tu'sedi le taca dza ni zóaru' na'a. ⁴ Yugu' bönachi tuá' dö' ni, en biti' zoa idú ládxi'gaca ta'nábini neda' guna' tu le gaca bë' Nu naca, pero biti' bi le gaca bë' ila'lë'enë'. Ila'lë'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús bucá'anë' légaquië', söhuöjë'.

Le tu'sédinë' bönni' yudo' naca ca cúa zi que yöta xtila
(Mr. 8:14-21)

⁵ Cate' bila'dxinë' ia'tsölá'a nísado' ni', guléquibe'enë' bönni' usëda queë' Jesús gulál-la ládxi'gaquië' ilu'ë le ilahuë'. ⁶ Ní'irö Jesús gudxë' légaquië':

—Buli'yútsöca'. Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

⁷ Ní'irö la' légacasë' gulún xtídza'gaquië' bönni' usëda queë', ta'nnë':

—Rnnë' caní tu' cabí nuá'aru' yöta xtila.

⁸ Réquibe'enë' Jesús lë ni, ate' rë' légaquië':

—¿Bizx que run xtídza'li' la' libí'isili' tu' cabí nuá'ali' yöta xtila? Láti'do'os réajlë'ëli' neda'.

⁹ ¿Naru' cabí réajni'itseli', en biti' röjnëtseli' ca guca quégaca gayu' yöta xtila ni', lë na' gulahuë' chi-un gáyú'e bönni', ate' tsca xö ga'böra butúbili'? ¹⁰ ¿Naru' cabí röjnëtseli' ca' ca guca quégaca gadxi yöta xtila ni', lë na' gulahuë' choá' gáyú'e bönni', ate' tsca xö ga'böra butúbili'? ¹¹ ¿Naru' cabí réajni'ili'? Biti' bë'a didza' que yöta xtila cate' gudxa' libí'ili' gun chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

¹² Ní'irö gula'yéajni'inë' biti' gudxë' Jesús légaquië' ilún chi'i cuíngaquië' que cúa zi que yöta xtila, pero ral-la' ilún chi'i cuíngaquië' que le tu'sédinë' yugu' bönni' yudo' fariseo, en yugu' bönni' yudo' saduceo.

Pedro rnnë' Jesús náquië' Cristo
(Mr. 8:27-30; Lc. 9:18-21)

¹³ Cate' bidxinë' Jesús lu xiyú yödzö Cesarea, ga na' rinná bë'ë Filipo, gunábinë' yugu' bönni' usëda queë', rnnë':

—¿Bizxi ta'nná bönachi nu naca' neda', Bönni' Guljë' Bönachi?

¹⁴ Bulu'bi'ë didza', ta'nnë':

—Bal-lë' ta'nnë': "Juan nacu', bönni' ni' buquilë' bönachi nisa." Ia'zica'rë' ta'nnë': "Elías nacu', bönni' ni' bë'ë didza' uláz queë' Dios dza ni'te." Ia'zica'rë' ta'nnë': "Jeremías nacu', o ia'tué' bönni' bë'ë didza' uláz queë' Dios."

¹⁵ Ní'irö Jesús gudxë' légaquië':

—Naru' libí'ili', ¿nuzxi rnnali' naca' neda'?

¹⁶ Bubi'ë didza' Simón Pedro, en rë' Lë':

—Li' nacu' Cristo, Zxi'inë' Dios ban.

¹⁷ Bubi'ë didza' Jesús, rë' lë':

—Bica' xibó' li', Simón, zxi'inë' Jonás, tu' cabí buluf'inë' nu' bönni' li' lë' ni. Xuza' zoë' yehua' yubá buluf'inë' li' lë' ni. ¹⁸ Neda' rea' li', li' nacu' Pedro, ate' lu guió'j ni ucuá'a nupa ulu'dubi quia', ate' yöl-la' unná bë' que tu' xihui' bití' sequi' uzaga' xinó'zgaquië'. ¹⁹ Gunna' quiu' yugu' zxi'ini guíë que lataj ga rinná bë' Nu zoa yehua' yubá. Le inná bë' u luyú ni, chigunná bë' ca' Nu na' zoa yehua' yubá, ate' le gu'u lataj gaca luyú ni, chibë' lataj gaca lë' na' Nu na' zoa yehua' yubá ni'.

²⁰ Ní'irö Jesús gunná bé'enë' yugu' bönni' usëda queë' cuntú nu ilë'ë náquië' Lë' Cristo.

Jesús rigúxjö'ë ca si' ilútië' Lë'

(Mr. 8:31–9:1; Lc. 9:22–27)

²¹ La' dza ní'isö gusí lahuë' Jesús rigúxjö'i'inë' yugu' bönni' usëda queë' run bayudxi tsejë' Jerusalén, ga ni' yugu' bixúz unná bë' en bönni' gula tu'zéajni'inë', en bönni' yudo' tu'sédinë' ulu'saca' zi'ë Lë', ate' ní'irö ilútië' Lë', pero cate' gaca tsonna dza ubanë' lu yöl-la' guti.

²² Ní'irö Pedro guchë'ë Jesús quez, en gusí lahuë' ridil-lë' Lë' didza', rnnë':

—Xan, bití' gu'ë Dios lataj. Bití' ca' gaca quiu' ca rnnó'.

²³ Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopá ládxa'a tu' cabí naca le rizá' ládxa'u li' ca rizá' ládxe'ë Dios, pero ca ta'za'sö ládxi' gaca bönachi.

²⁴ Ní'irö Jesús gudxë' yugu' bönni' usëda queë', rnnë':

—Channó zoë' tu bönni' rë'enë' tē'ë neda', ral-la' uzóë' tsólá'alö yugu' le rë'ëni quézinë', en gáquië' ca tu bönni' sa'yéajë' zeajtë'ë lë'e yaga cruz, ate' ní'irö gaca tē'ë neda'. ²⁵ Nu bönni' guë'ënnë' gun chí'ë yöl-la' na'bán queë', unítie' le, pero bönni' unítie' yöl-la' na'bán queë' tu' dē'ë neda', gata' yöl-la' na'bán idú queë'. ²⁶ ¿Naru' uzi'tsë' xibé tu bönni' channó utubë' yúgu'të le dē yödžolió ni pero unítie' yöl-la' na'bán idú queë'? Bití' bi gaca unódzjë' tu bönni' para gata' yöl-la' na'bán idú queë'. ²⁷ Caní rnnía', tu' huóda neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubí'a que queë' bönachi tsca naca le núngaca. ²⁸ Le nácatë rea' libí'ili': "Bití' ca' ilátigaca bal-la nupa nacuá' ni cate' ila'lé'eró idinná bë'a neda', Bönni' Guljë' Bönachi."

17

Ridzá' ca nalá' lahuë' Jesús

(Mr. 9:2–13; Lc. 9:28–36)

¹ Gudódi xopa dza, Jesús gudélë'ë Pedro len Jacobo, en Juan, böché'ë Jacobo na', en guchë'ë légaquië', ate' yó'jáquië' quez tu lu guí'a sibi. ² Ní' bidzá' ca nalá' lahuë' Jesús lógaquië'. Guyëpi yósa bení' lahuë' Jesús ca ruzení' gubidza, ate' lari' nácuë' böáca chiguíchido'os ca bení'. ³ Ní'irö bila'lé'enë' bönni' usëda queë' bulufí lógaquië' Moisés, en Elías, ate' tui'ilenë' Jesús didza'. ⁴ Ní'irö Pedro rë' Jesús:

—Xan, naca dxi'a zóaru' ni. Channó rë'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

⁵ Tsanni ní' ru'ë Pedro didza' ni, la' guró'ötë tu böaj bení' le guzxóa légaquië', ate' lu böaj na' biyón chí'i nu rnná:

—Bönni' ni Zxi'ini caza'. Nadxi'ida'-në', en raza ládxa'a Lë'. Buli'zë nágali' didza' gu'ë.

⁶ Cate' bila'yönnë' bönni' usëda queë' chí'i na', gula'dzö'ë gusurú'alö, en guladxi bila'dzöbinë'. ⁷ Ní'irö gubigui'ë Jesús ga na' nacu'ë, ate' gudanë' légaquië', rnnë':

—Gulí'chasa. Bití' gádxili'.

⁸ Cate' gula'chisa lógaquië', en bulu'yüë', cúnturö nu bila'lé'enë', pero tuzë' Jesús.

⁹ Cate' ní' tu'dinnië' lu guí'a na', Jesús gunná bé'enë' légaquië', rnnë':

—Cuntu nu guiéli' ca guca lë' ni bilé'eli' cate' ubanra' lu yöl-la' guti neda', Bönni' Guljë' Bönachi.

¹⁰ Ní'irö yugu' bönni' usëda queë' gula'nábinë' Lë', ta'nnë':

—¿Bizx que ta'nnë' bönni' yudo' usëdi run bayudxi ulufí lahuë' Elías zí'alö ca ulufí lahuë' Cristo?

¹¹ Bubi'ë didza' Jesús, rë' légaquië':

—Le nácatë ulufí lo cazë' zí'alö Elías, en uca'anë' tsahui' yúgu'të. ¹² Neda' rea' libí'ili': "Chibulufí lahuë' Elías na', pero bití' bulu'únbë'ë lë', ate' yúgu'të ca rnnasö quégaquië' gulunë' queë'." Lë'sca caní ilunë' quia' neda', Bönni' Guljë' Bönachi, ulu'saca' zi'ë neda'.

¹³ Ní'irö gula'yéajni'inë' bönni' usëda queë', bē'lenë' Jesús légaquië' didza' ca guca queë' Juan, bönni' na' buquilë' bönachi nisa.

Ruínē-bi' Jesús tubi' bi'i bōnni' ré'ebi' xjote'

(Mr. 9:14-29; Lc. 9:37-43)

¹⁴ Cate' bila'dxinē' ga na' nacuá' bōnachi zían, gubígu'i'ē tu bōnni' ga zoē' Jesús, ate' buzóa zxi'bē' lahuē' Lē', ¹⁵ en rē' Lē':

—Xan, buéchi' ladxi'-bi' bi'i bōnni'do' quia', tu' ré'ebi' xjote', en riguí'i rizáca'da'abi', ate' zían luzuí ridzō'ōbi' lu guí' o lu nisa. ¹⁶ Chidiguá'a-bi' lógaquiē' bōnni' usēda quiu' pero biti' guca ulu'únē'-bi'.

¹⁷ Bubi'ē didza' Jesús, rnnē':

—Libi'ili', bōnachi cabi réajlē'ēli', en biti' nácali' tsahui'. ¿Gáca'xte caz ral-la' sóalena' libi'ili' para tséajlē'ēli' neda'? ¿Gáca'xte caz ral-la' guá' ilena' queēli'? Guli'diguá'-bi' quia' ni.

¹⁸ Ní'irō Jesús buzenē' le bach bō' xihui' na' yu'u lēbi', ate' la' burúajtē lēbi', ate' la' ná'asō bōacatébi' bi'i bōnni'do' na'.

¹⁹ Ní'irō, yugu' bōnni' usēda queē' Jesús gula'biguē'ē quez ga zoē', ate' gula'nábinē' Lē', ta'nnē':

—¿Bizx que na' biti' guca ubéajtu' netu' bō' xihui' na'?

²⁰ Jesús rē' légaquiē':

—Biti' guxzéqui'li' tu' cabi réajlē'ēli' Dios idú ládxi'li'. Le nácatē rea' libi'ili', sal-la' cuídísō naca yöl-la' réajlē' queēli' Dios, nácatē ca tu xisedo' mostaza, huáca guiēli' guí'ado' ni: “Gucuita ni, en yōjsōa ní'ilō”, ate' la' icuítatē guí'ado' na'. Biti' bi' zoa le cabi gaca gunli' channō réajlē'ēli' Dios idú ládxi'li'. ²¹ Tu bō' xihui' caní gácasō ubéajli' channō ulídzali'-nē' Dios, en gunli' gubasa.

Rigu'xjō'ē Jesús leyúbölō ca si' ilútiē' Lē'

(Mr. 9:30-32; Lc. 9:43-45)

²² Tsanni ni' ta'dē' luyú Galilea, Jesús gudxē' yugu' bōnni' usēda queē', rnnē':

—Zoa nu udōdi neda', Bōnni' Guljē' Bōnachi, lu ná'agaca bōnachi. ²³ Ilútiē' neda', pero cate' gaca tsonna dza Dios usubanē' neda'.

Ní'irō bulu'huf'innē' bōnni' usēda queē'.

Jesús riguíxaj lazē' que yudo'

²⁴ Cate' bulu'dxinē' Jesús, en yugu' bōnni' usēda queē' lu yōdzō Capernaum, bila'dxinē' yugu' bōnni' tu'quixxjē' bōnachi lázagaca que yudo' ga zoē' Pedro, ate' tē' lē':

—¿Naru' cabi quixxaj lazē' que yudo' bōnni' rusédinē' libi'ili'?

²⁵ Bubi'ē didza' Pedro, rnnē':

—Ōn, huaguixxjē'.

Cate' buáziē' Pedro lu yu'u, Jesús la' bulidztē' lē', en rē' lē':

—¿Nacxi' rusaca' quiu', Simón? Bōnni' ta'nná bē'ē luyú ni, ¿nupxi' tu'quixxjē' le riguíxaj laz, en lazzaj que yu? ¿Naru' tu'quixxjē' bōnachi uládz quēgaquiē' o bōnachi izá'a?

²⁶ Bubi'ē didza' Pedro, rē' Lē':

—Bōnachi izá'a tu'quixxjē'.

Ní'irō Jesús rē' lē':

—Que lē' ni na', biti' run bayudxi quixxaj laza' que yudo' tu' naca' Zxí'inē' Dios ca na' biti' bi ta'guixxaj nupa nácgaca bōnachi uládz queē' bōnni' na' ruquixxjē'. ²⁷ Na'a, para cuntú nu gun leru', guyéaj ra' nísado', yōjzalai lu nisa le rizóninu'-ba' bōla, ate' bōla cueju'-ba' zí'alō, guzxí'i-ba'. Cate' isalju' ruá'aba', ní' idzōlinu' tu dumí lásido'. Guzxí'i le, ate' gudizxaj laza', en lazu'.

18

¿Núzxilō gaca lo?

(Mr. 9:33-37; Lc. 9:46-48)

¹ La' dza ní'isō bila'dxinē' bōnni' usēda queē' Jesús ga zoē', ate' gula'nábinē' Lē', ta'nnē':

—¿Núzxilē' bōnni' ni gáquiē' lo ga rinná bē'ē Dios yehua' yubá?

² Bulidzē'-bi' Jesús tubi' bi'i bōnni'do', ate' buzóē'-bi' gatsaj láhui'lō ga na' nacu'ē. ³ Ní'irō rē' légaquiē':

—Le nácatē rea' libi'ili', channō cabi huóacali' ca zeaj nácabi' bí'ido', biti' ca' tsú'uli' ga ní' rinná bē'ē Dios yehua' yubá. ⁴ Que lē' ni na', nútí'tēs nu gaca nōxaj ladxi', en huóaca ca nácabi' bí'ido' ni, nu ní' gaca lo ga ní' rinná bē'ē Dios yehua' yubá. ⁵ Nútí'tēs nu gun bal tubi' bí'ido' caní tu' néquibi' quia', neda' caz gun bal.

Le tun ga nu gun dul-la'

(Mr. 9:42-48; Lc. 17:1-2)

⁶ Gunnē' ca' Jesús:

—Nu gun ga gunbi' dul-la' tubi' b'ído' caní réajlë'ëbi' quia', gácarö dxi'a queë' bönni' na' la'tu' ugalë'ë guiöj riyétuni yaga yenë', ate' tsöjsuladzu' cuinë' lu nísado'. ⁷ Bica' bayechi' bönachi yödölió ni tun ga gun dul-la' luzë'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

⁸ Que lë ni na', channö gun no' o ni'u ga gunu' dul-la', guchugu le, en gurú'una le. Gácarö dxi'a quiu' tsöjtsáziu' ga su' ibanu' biti' rizó'o o narugu ni'a no' o, en calëga nacuá' chopo no' o, en chopo ni'u ate' tsöjtsáziu' lu guí' gabila le catu caz ulu. ⁹ Channö gun guiöj lo' ga gunu' dul-la', gulëaj le, en gurú'una le. Gácarö dxi'a quiu' tsöjtsáziu' ga su' ibanu', zoa tuz guiöj lo', en calëga nacuá' chopo guiöj lo', ate' tsöjtsáziu' lu guí' gabila.

Jesús rucúdz'u'ë didza' que tu bö'cu' zxila' nanítiba'

(Lc. 15:3-7)

¹⁰ Gunnë' ca' Jesús:

—Guli'gún chi'i cuinli' para cabí uzóali'-bi' tsölá'aló tubi' b'ído' caní. Neda' rea' libí'ili', gubáz lá'ayi tapa chi'ë légacabi' nacuá'tica'së' lahuë' Xuz'a zoë' yehua' yubá. ¹¹ Bida' ni neda', Bönni' Guljë' Bönachi, para usölá' nu ni naniti.

¹² ¿Nacxi rusáca'li' queëli'? Tu bönni', nacuá'aba' tu gayuá' bö'cu' zxila' queë', channö nítiba' tuba', ¿naru' cabí uca'anë'-ba' tápalalay yu' chënnaba' na', ate' tsejë' gapa naca lu guí'a, para tsöjtiljë'-ba' bö'cu' zxila'do' na' nanítiba'? ¹³ Channö udzölinë'-ba', le nácatë rea' libí'ili', udzëjarönë' ni'a queëba' bö'cu' zxila'do' na' ca gunë' quëgacaba' ia'tápalalay yu' chënnaba' ni' biti' gula'nítiba'. ¹⁴ Lësca' caní, Xúziru' Dios, zoë' yehua' yubá, biti' rë'enë' nitibi' tubi' b'ído' caní.

Ca ral-la' uniti loru' böchi' luzá'aru'

(Lc. 17:3)

¹⁵ Gunnë' ca' Jesús:

—Channö böchi' luzó'o guá' dö' quiu', guyéajtsöca', en yöjcá'analenë' tsahui' la' libí'isili'. Channö uzë' náguië' li', chibuguélu'u böchi' luzó'o. ¹⁶ Channö cabí uzë' náguië' xtídz'u' chupä' tsonnë' bönni', nupa gaca ilún ba nali que xtídz'a'li'. ¹⁷ Channö cabí uzë' náguië' xtídz'a'gaquië', gudxi ca' bönachi tu'dubi tu'sëdi queë' Dios, en channö cabí uzë' náguië' xtídz'a'gaca bönachi na', ní'irö bönni' na' gáquië' quiu' ca tu bönni' biti' réajlë'ë Dios, en ca tu bönni' ruquízjë' uláz que yödö zì'tu'.

¹⁸ Le nácatë rea' libí'ili', yúgu'të le inná bë'ëli' lu yödölió ni, naca le chigunná bë'ë Dios yehua' yubá, ate' yúgu'të le guí'ili' lataj lu yödölió ni, naca le chibë'ë lataj Dios yehua' yubá.

¹⁹ Lësca' caní rea' libí'ili', channö chópasili' gun tuz xtídz'a'li' lu yödölió ni ca naca tu le inábili'-në' Dios, gunë' Xuz caza' Dios, zoë' yehua' yubá, lë' na' rinábili'-në'. ²⁰ Ga nacuá' chopo tsonna nupa ni nudúbigaca quia' neda', zoa caza' neda' gatsaj láhu'i'lo ga na' nacu'ë.

²¹ Ní'irö gubígui'ë Pedro ga zoë' Jesús, en gunábinë' Lë', rnnë':

—Xan, ¿bál-laxitë luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

²² Jesús rë' lë':

—Neda' rea' li', calëgasö gadxi luzuí, pero idú tsónnalalay yu' chi cuía le naca gadxi luzuí.

Jesús rucúdz'u'ë didza' que tu bönni' huen dxin biti' buniti lahuë' luzë'ë

²³ Gunnë' ca' Jesús:

—Ia'stú, ca gun Nu na' rinná bë' yehua' yubá naca ca benë' tu bönni' rinná bë'ë. Gú'unnë' uca'analenë' tsahui' yugu' bönni' huen dxin queë'. ²⁴ Cate' gusí lahuë' rucá'analenë' légaquië' tsahui', dujuá'gaquië' ga zoë' tu bönni' ral-lë'ë queë' zian gayuá' dumí. ²⁵ Tu' cabí guca quíxzjë', gunná bë'ë xanë' idó'ogaquië' lë', en nigula queë', en yugu' bi'i queë', en yúgu'të le dë' queë', ate' ní'irö gazxaj le ral-lë'ë queë' xanë' na'. ²⁶ Ní'irö bönni' huen dxin na' buzóa xzibë' lahuë' xanë', en gunábinë' lë', rnnë': "Xan, ben xzön ládxu'u neda'. Huaguíxzaj caza' li' idutë." ²⁷ Ní'irö xanë' na' buéchi' ládxë'ë bönni' huen dxin queë' na', en buniti lahuë' lë' lë' na' ral-lë'ë queë', ate' busanë' lë'. ²⁸ Cate' burúajë' bönni' huen dxin na', la' yöjtságatë' tu bönni' rúnlenë' lë' tsözxön dxin, ate' bönni' na' ral-lë'ë queë' láti'do'os dumí. Ní'irö guzxönë' lë', en guzxinnajë' yenë', ate' rë' lë': "Gudíxzjatë lë' na' ral-lu'u quia'." ²⁹ Ní'irö luzë'ë na' buzóa xzibë' lahuë', en gunaba yechë'ë lahuë', rnnë': "Ben xzön ládxu'u neda'. Huaguíxzaj caza' li' idutë." ³⁰ Biti' gú'unnë' bönni' huen dxin na', ate' yöjlu'ë lë' lidxi guíë dza quíxzjarë' lë' na' ral-lë'ë queë'. ³¹ Cate' bila'lë'enë' lë' ni ia'zica'rë' huen dxin, bulu'hu'inide'enë' ni'a queë', ate' yöjtxjörí'guequinë' xángaquië' yúgu'të lë' na' guca. ³² Ní'irö xángaquië' bulidzë' bönni' huen dxin na', ate' rë' lë': "Li', huen dxin catsahui'. Yúgu'të dumí na' gúl-lu'u quia' buniti lahua' li'. Busúluu' lë' na' gúl-lu'u quia' tu' gunaba yechu'u lahua'." ³³ ¿Naru' cabí ral-la' huéchi' ládxu'u ca' luzó'o ca na' bena' neda', buéchi' ládx'a' li'?" ³⁴ Ní'irö guléde'enë' xanë', en budödë' lë' lu ná'agaca nupa ulu'saca' zì' lë' dza quíxzjarë' idutë le ral-lë'ë queë'.

³⁵ Ní'irō rnnē' Jesús:
—Lēscá' caní gunē' Xuza' zoē' yehua' yubá queēli' channō cabí uniti loli' idú ládxí'li' yugu' böchi' luzá'ali'.

19

Nupa tu'lá'a yöl-la' nutsaga na'
(Mr. 10:1-12; Lc. 16:18)

¹ Cate' budxi bē'ē Jesús yugu' didza' ni, buzē'ē luyú Galilea, ate' bidxinē' luyú Judea le dē ia'tsölá'a yegu Jordán saca' ga rilén gubidza. ² Bönachi zían sōjácálen Jesús, ate' 'bunē' léguequi ni'.

³ Ní'irō bila'dxinē' bal-lē' bönni' yudo' fariseo ga zoē' Jesús para ila'z'í' bē'ē Lē', ate' gula'nábinē' Lē', ta'nnē':

—¿Naru' dē lataj bönni' nutsaga nē'ē usanē' nigula queē' tu' nōzi bítí'tēs bi raca?

⁴ Bubi'ē didza' Jesús, rē' légaquiē':

—¿Naru' cabí nulábanili' le nazúaj lu guichi lá'ayi ca benē' Dios bönachi cate' si' benē' yōdzölíó? Bönni', en nigula benē' légaquiē'. ⁵ Caní gunnē' Dios: "Que lē ni na', ral-la' usanē' tu bönni' xuz xinē'ē, ate' tsaz tsōjsóalenē'-nu nigula queē', ate' iropē' na' ulu'huóáquiē' tuz bönachi." ⁶ Caní naca, bítí'rō nácagaquiē' chopē' pero tuz bönachi chinuhuóáquiē'. Que lē ni na', bítí' ral-la' ulu'lē'ē bönni' nupa na' benē' Dios tuz.

⁷ Ní'irō bönni' yudo' na' gula'nábinē' Jesús, ta'nnē':

—¿Bíxz que na' gunná bē'enē' Moisés légaquiē' le ruf'i lataj nu bönni' unōdzjē' tu guichi queēnu nigula queē' le rnna nulá'a yöl-la' nutsaga na', ate' usanē'-nu nigula queē' na'?

⁸ Jesús rē' légaquiē':

—Caní benē' Moisés tu' nazidi icja ládxí'do'oli'. Bennē' libí'ili' lataj usanli'-nu nigula queēli', pero cate' gusi lo guta' guró'ō yōdzölíó, bítí' guca caní. ⁹ Neda' rea' libí'ili', channō tu bönni' usanē'-nu nigula queē', en bítí' gudálennu bönni' yúbölō, ate' utsaga ná'alēnē'-nu nigula yúbölō, gunē' dul-la' le riguitsaj xibá que yöl-la' nutsaga na'. Lēscá' caní, channō nu bönni' utsaga ná'alēnē'-nu nigula na', nusanē'-nu bönni' queēnu, gunē' dul-la' le riguitsaj xibá que yöl-la' nutsaga na'.

¹⁰ Ní'irō yugu' bönni' usēda queē' Jesús gulē' Lē', ta'nnē':

—Channō caní naca queē' tu bönni' zóalenē'-nu nigula queē', gácarō dxi'a queē' la'tu' cabí utsaga caz nē'ē, ugá'anē' tuzē'.

¹¹ Bubi'ē didza' Jesús, rē' légaquiē':

—Bíti' gaca ila'z'í' lu ná'agaca yúgu'tē bönachi didza' ni, pero núpasō na' Dios ruzéajni'inē' léguequi. ¹² Nacu'ē bönni' bítí' tu'tsaga ná'alengaquiē' nigula tu' cabí nácagaquiē' idú bönni' biguíú, tu' gulaljē' ca', ate' ia'z'ica'rē' bönni' bítí' tu'tsaga ná'alengaquiē' nigula tu' bulu'zaga' bönachi xinózgacquiē', ate' ia'z'ica'rē' bönni' bítí' tu'tsaga ná'alengaquiē' nigula para gaca ilunē' xichinē' Dios, Nu rinná bē' yehua' yubá. Nu sequi' si' lu nē'e didza' ni ral-la' si' lu nē'e le.

Jesús rulidza tsáhuē'ē-bi' yugu' b'í'ido'
(Mr. 10:13-16; Lc. 18:15-17)

¹³ Ní'irō yugu' xuz xiná'agacabi' b'í'ido' dujuá'agaquiē'-bi' ga zoē' Jesús para ixó'a nē'ē légacabi', en ulidzē' Dios ni'a quégacabi', ate' bönni' usēda queē' bulu'zágui'ē xinózgacquiē'.

¹⁴ Ní'irō Jesús rē' légaquiē', rnnē':

—Gulí'gü'i-bi' yugu' b'í'ido' lataj ila'dxinbi' ga zoa', en bítí' uzága'li' xinózgacabi', tu' ila'z'í' lataj nupa nácagaca ca yugu' b'í'ido' caní ga ní' rinná bē'ē Dios yehua' yubá.

¹⁵ Jesús guxó'a nē'ē légacabi', ate' ní'irō buzē'ē ni'.

Tu bönni' unná bē' cuidi' dē yöl-la' tsahui' queē'
(Mr. 10:17-31; Lc. 18:18-30)

¹⁶ Tu bönni' ni zoē' iz cuidi' queē' buduyúē' Jesús, en rē' Lē':

—Bönni' Usedi idú tsahui'. ¿Bíxzi le naca tsahui' ral-la' guna' para gata' yöl-la' na'bán idú quia'?

¹⁷ Bubi'ē didza' Jesús, rē' lē':

—¿Naru' nōztsenu' lē na' rnno' quia', rnno' naca' idú tsahui'? Cuntu nu bönni' náquiē' idú tsahui'. Tuzē' Dios náquiē' idú tsahui'. Channō rē'ēnu' gata' yöl-la' na'bán idú quíu', ben ca rinná bē' xibá queē' Dios.

¹⁸ Ní'irō bönni' na' rē' Jesús, rnnē':

—¿Bízxi' xibá na'?

Jesús rē' lē':

—Xibá na' gunná bē'ē Moisés:

Biti' gútiu' bönachi.

Biti' gunu' dul-la' le riguitsaj xibá que yöl-la' nutsaga na'.

Biti' cuanu'.

Biti' innío' que böchi' luzó'o le cabí nácate.

¹⁹ Ben bal xuz xinó'o.

Bidxi' böchi' luzó'o ca nadx'i' cuinu'.

²⁰ Bönni' na' ni zoë' iz cuidi' queë' gudxë' Jesús, rnnë':

—Yügu'të lë ni runa' ga gudela' naca' bí'ido'. ¿Naru' zoa ia'tú le ral-la' guna'?

²¹ Jesús rë' lë':

—Channö rë'ënu' gacu' tsahui', guyéaj, yöjëti' le dë quiu', ate' dumí na' si'u, bunödzej quégaca bönachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá' neda'.

²² Cate' bönni' na' ni zoë' iz cuidi' queë' biyönnë' didza' ni, söhuöjë' ruhuí'innë' tu' dëda' yöl-la' tsahui' queë'.

²³ Ní'irö Jesús gudxë' yugu' bönni' usëda queë', rnnë':

—Le nácatë rea' libí'ili', böniga naca tsázië' nu bönni' dë yöl-la' tsahui' queë' ga rinná bë'ë Dios yehua' yubá. ²⁴ Ia'stú rea' libí'ili', nácarö böniga tsázië' tu bönni' dë yöl-la' tsahui' queë' ga ni' rinná bë'ë Dios ca tödiba' böa' lu nagui yötsi'.

²⁵ Cate' bila'yönnë' yugu' bönni' usëda queë' didza' ni, bulu'bánninë, ta'nnë':

—¿Nuzxi caz gaca ulá, channö?

²⁶ Jesús buyü' légaquië', en rë' légaquië':

—Biti' gaca ilün bönachi lë ni, pero Dios huáca gunë' yügu'të.

²⁷ Ní'irö bubi'ë didza' Pedro, en rë' Jesús:

—Buyütsöca', netu' chibucá'anatu' yügu'të, en zá'lentü' Li'. ¿Bízxirö gata' queëtu'?

²⁸ Jesús rë' légaquië':

—Le nácatë rea' libí'ili', dza ni' cate' ucubi yödzölió, ate' cö'a inná bë'a neda', Bönni' Guljë' Bönachi, ga ni' gácatëra' lo, lësca' libí'ili' zá'lenli' neda' na'a, cö'öli' chinu lataj ga inná bë'ëli', en uchi'a usöröli' quégaca idxinu cö'të yödzö quégaca xzi'ini xi'söë Israel. ²⁹ Nu bönni' rucá'anë' lidxë', o yugu' böché'ë, o yugu' zanë', o xuzë', o xinë'ë, o nigula queë', o yugu' xzi'inë', o yugu' xiyüë', para gunë' xichina', bönni' ni si'ë ia'tú gáyua'tërö ca' queë', en gata' ca' yöl-la' na'bán idü queë'. ³⁰ Zián nupa nácatëca lo na'a, ulu'gá'ana cá'asö, ate' nupa nagá'anagaca cá'asö na'a, hualácagaca lo.

20

Rucúdzu'ë didza' Jesús ca tunë' bönni' huen dxin

¹ Gunnë' ca' Jesús:

—Ca gun Bönni' na' rinná bë'ë yehua' yubá naca ca benë' tu bönni' xan yu'u. Birúajë' zílado', yöjdiljë' yugu' bönni' ilunë' dxin ga naca lu xiyüë' ga na' nadúzgaca lubá uva. ² Cate' chibugá'analenë' tsahui' yugu' bönni' huen dxin na', quízxjë' légaquië' tu dumí lazzaj que tu dza, gusöl-lë'ë légaquië' ilunë' dxin ga naca lu xiyüë'. ³ Cate' burúajë' idü xsila, bilë'enë' ia'zica' rë' bönni' nacuá'asë' ca' ga naca lu yë'ëyi. ⁴ Rë' légaquië': "Guli'tséaj ca' libí'ili' ga naca lu xiyüa', ate' quízxja' libí'ili' le naca tsahui'." La' yöjácatë' ca' légaquië'. ⁵ Burúajë' bönni' xan yu'u na' leyúbölö idü huagubidza, enca' idü xihuó udzö', en la' tuz ca benë', gusöl-lë'ë yugu' bönni' yöjxáquië' lu xiyüë'. ⁶ Burúajë' ca' cate' ni' zoa ia'láti'do'os gubidza, en yöjxáquië' ia'zica' rë' bönni' nacuá'asë' ca' ni', ate' rë' légaquië': "¿Bizx que zóatsali' ni cá'asö idü dza, biti' bi dxin runli'?" ⁷ Yugu' bönni' na' të' lë', ta'nnë': "Cuntu nu benna xichintu'." Ní'irö rë' légaquië': "Guli'tséaj ca' libí'ili' ga naca lu xiyüa', ate' quízxja' libí'ili' le naca tsahui'." ⁸ Cate' chizöa gal-la, bönni' xan yu na' rë' bönni' yu'u lu në'ë yugu' huen dxin na', rnnë': "Bulidza yugu' bönni' huen dxin na', ate' gu'u lázxjagaquië'. Quízxju' zí'alö yugu' bönni' na' bila'dxinë' yöjsetë. Udxí na' quízxju' yugu' bönni' na' bila'dxinë' zí'atëlö." ⁹ Ní'irö bila'dxinë' bönni' yöjéngaqüë' dxin cate' ni' zoa ia'láti'do'os gubidza, en gula'zi'ë tu tuhuéajë' dumí lazzaj que tu dza. ¹⁰ Cate' bila'dxinë' bönni' yöjéngaqüë' dxin zí'atëlö, guléquinë' huazí'gaquië' ia'láti', pero lësca' gula'zi'ë tu tuhuéajë' dumí lazzaj que tu dza. ¹¹ Cate' gula'zi'ë le, gula'nnëdë'ë queë' bönni' xan yu'u na', ¹² ta'nnë': "Yugu' bönni' ni bila'dxinë' ga yöjsetë, tu chí'sö gulunë' dxin, en tuz ca gudízxjatso' légaquië' ca netu', ate' netu' ni bentu' dxin idü dza, en gúguida'atu' gubidza." ¹³ Bubi'ë didza' xan yu na', en rë' tuë': "Böcha'a, biti' bi runa' quiu' le cabí naca tsahui'. ¿Naru' cabí bugá'ana tsáhuiru' si'u tu dumí lazzaj que tu dza?" ¹⁴ Guzí' lazzaju', en böaj lidxu'. Neda' rë'ënda' quízxja' bönni' ni yöjenë' dxin ga yöjsetë la' leze ca na' riguízxja' li'. ¹⁵ ¿Naru' cabí dë lu na'a guna' ca rë'ënda' len le nequi quia? ¿Naru' ruzxë'etsenu'-në' luzó'o tu' runnada'a queë'?" ¹⁶ Caní naca, bal-lë' bönni', tu'cá'ana bönachi légaquië' cá'asö, ilácagaquië' lo, ate' ia'zica'rë' bönni', nácatëcaquië' lo na'a, ulu'gá'anë' cá'asö. Zián nupa nulidza', pero nabábasö nupa narógaca.

Riguúxjö'ë Jesús leyúbölö ca si' ilútië' Lë'

(Mr. 10:32-34; Lc. 18:31-34)

¹⁷ Cate' ni' yu'ë Jesús nōza, sa'yéajë' Jerusalén, guchë'ë quez idxínnutë' bönni' usëda queë', en rë' légaquië':

¹⁸ —Buli'yútsōca', ribenru' zéajru' Jerusalén, ate' ni' soa nu udōdi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'. ¹⁹ Ulu'dōdë' neda' lu ná'agaquië' bönni' zi'tu' para ulu'titjë' neda'. Ila'guinë' neda', en ulu'dë'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

Le gunábanu xiná'agaquië' Jacobo, en Juan

(Mr. 10:35-45)

²⁰ Ní'irō bidxinnu xiná'agaquië' Jacobo, en Juan, yugu' xzí'inë' Zebedeo, ga zoë' Jesús, dzáagaquië'-nu chopë' ni, ate' buzóa xzíbinu lahuë' Jesús, en gunábinu Lë' tu le uzá' ládxë'ë queënu. ²¹ Jesús gunábinë'-nu, rnnë':

—¿Bizxi rë'ënu'?

Rënu Lë':

—Gunná bë' cō'ōbi' tubi' xzí'ina' ni cuita lë'u ibëla, en ia'tubi' cō'ōbi' cuita lë'u yögōla ga ni' inná bë'u.

²² Bubi'ë didza' Jesús, rë' légaquië':

—Biti' nōzili' le rinábali'. ¿Naru' huáca guá' ilenli' le qui'i saca' neda', en idílali' nisa ca idila' neda' nisa, gátia'?

Të' Lë':

—Huácatu'.

²³ Ní'irō Jesús rë' légaquië':

—Le nácatë' le ral-la' qui'i saca'a neda', gaca ca' queëli', en le ral-la' idila' neda' nisa, gátia', idílali' ca' nisa libí'ili', pero que cō'ōli' cuita lë'a ibëla o cuita lë'a yögōla, bití' dë lu na'a nu gu'a que, pero gata' quégaca nupa ni' chinupë'ë Xuza' quéqueui.

²⁴ Cate' ia'chíë' bönni' usëda queë' Jesús bila'yönnë' lë ni, gula'lenë'. ²⁵ Ní'irō Jesús bulidzë' légaquië', rnnë':

—Nōzquézili' ca tunë' yugu' bönni' ta'nná bé'enë' bönachi izá'a, ridōditë bë' ta'nná bé'enë' légaquië', ate' nupa ni' nácacarō lo ta'nná be'e la' luzë'eguequisō. ²⁶ Biti' gaca caní queëli'. Nútí'tësölí' libí'ili' nu rë'ëni gaca zxōn ga zóali', nu ni ral-la' gun dxin que ia'zica'rōli'. ²⁷ Lësca' caní, nútí'tësölí' libí'ili' nu guë'ëni gaca lo, ral-la' gaca ca tu bönni' nadō'o que ia'zica'rōli'. ²⁸ Lësca' neda', Bönni' Guljë' Bönachi, bida' ni, calëga para nu gun xichina', pero para guna' xichingaca bönachi, en udōda' yöl-la' na'bán quia', le quízxjada' ni'a quégaca bönachi zían para ulu'lágaca.

Ruínë' Jesús chopë' bönni' nachul-la lógaquië'

(Mr. 10:46-52; Lc. 18:35-43)

²⁹ Cate' ni' tu'rúajë' yōdzō Jericó, bönachi zían sōjácalen Jesús. ³⁰ Nacu'ë chopë' bönni' nachul-la lógaquië' ni, rō'gaquië' ra' nōza. Cate' bila'yönnë' ridōdë' Jesús ni, gulu'ë zidzaj didza', ta'nnë':

—Xan, xzí'ini xi'sōë' David, buéchi' ladxi' netu'.

³¹ Bönachi zían nacuá' ni' gulë' légaquië' ila'cu'ë dxisō, pero zídzejrō gulu'ë didza', ta'nnë':

—Xan, xzí'ini xi'sōë' David, buéchi' ladxi' netu'.

³² Ní'irō guzë' ribōzë' Jesús, en bulidzë' légaquië', ate' gunábinë' légaquië', rnnë':

—¿Bizxi rë'ënili' guna' queëli'?

³³ Të' Jesús:

—Xan, rë'ënitú' gunu' ga huōálaj guiōj lotu'.

³⁴ Ní'irō Jesús buéchi' ládxë'ë légaquië', ate' gudanë' guiōj lógaquië'. La' bōáljatëgaca guiōj lógaquië', ate' yōjácalenë' Jesús.

21

Rídxinë' Jesús yōdzō Jerusalén len yöl-la' ba zxōn

(Mr. 11:1-11; Lc. 19:28-40; Jn. 12:12-19)

¹ Cate' bila'dxingalë' yōdzō Jerusalén, en ni' nacu'ë ga dë yōdzō Betfagé ga na' zoa Guí'a Yaga Olivo, ní'irō gusöl-lë'ë Jesús chopë' bönni' usëda queë', ² ate' rë' légaquië':

—Guli'tséajtsōca' yōdzōdō ni' ca dōdílō ga ni zóaru', ate' la' tsōjxáca'tëli'-ba' tuba' burro guná nága'ba', ate' dzaga lëba'tuba' burro biguiú'do'. Guli'tsōjxedxi-ba', en ichë'ëli'-ba' quia' ni. ³ Channō nu bi guië libí'ili', guli'guië nu na': "Xanru' riquinnë'-ba'." Ní'irō isöl-lë'ë lëgacaba' quia'.

⁴ Caní guca para gaca lë na' buzúajë' lu guichi bönni' bë'ë didza' uláz queë' Dios, gunnë':

⁵ Guli'guië nupa nacuá' yödzo Sión,
Buli'yútsöca', zë'ë Bönni' inná bé'enë' libí'ili'.
Lu yöl-la' nōxaj ladxí' queë' dxië'-ba' tuba' burro.
Dxië' cūdzu'ba' búrrodo' nácaba' zxi'iniba' bōa' ruá'aba' yua'.

⁶ Ní'irō bönni' usēda queë' yōjáquië' nī', ate' gulunë' ca na' gunná bé'enë' Jesús légaquië'.
⁷ Gula'chë'-ba' burro guná' na', en burro biguiú'do' na', ate' bulu'dxië' cūdzu'gacaba' yugu' lari' guitsa' quēgaquië', ate' gudxië' Jesús lahui' lari' na'. ⁸ Nacuá' ca' bōnachi zían nī', ate' gula'chilaj yugu' lari' ta'xóa cūdzu'guequi la' nōza. Ia'zica'rë' bulu'chibë' zin le bulu'zxóë' ga naca la' nōza. ⁹ Gulu'í zidzaj didza' bōnachi na' nanōrugaca, en nupa na' sōjácálen Jesús, ta'nná:

—¡Yöl-la' ba Lë', zxi'ini xi'sóë' David! ¡Bica' ba nu ni za' nī'a que Lë' Xanru'! ¡Yöl-la' ba Dios!

¹⁰ Cate' guyázië' Jesús yödzo Jerusalén, bulu'dzatsa yúgu'të bōnachi lu yödzo na', ate' zían nupa gulë' luzë'eguequi, ta'nná:

—¿Nuzxi caz bönni' nī'?

¹¹ Ia'bal-la bōnachi nī' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

Jesús rulatjë' lö'a yudo'

(Mr. 11:15-19; Lc. 19:45-48; Jn. 2:13-22)

¹² Cate' guyázië' Jesús lö'a yudo' queë' Dios, bulágui'ë ní'ilō yúgu'të nupa tuti' to'o ga naca lö'a yudo' na'. Burixë' ca' yugu' blaga quēgaquië' bönni' tu'tsë'ë dumí yödzo zi'tu', en yugu' le ta'bō'i nupa tuti' gu'dōdo'. ¹³ Rë' légaquië':

—Nazúaj lu guichi lá'ayi le rñna: “Lídxá' si'í le, yu'u ga nu ulidza Dios”, pero libí'ili' chinunli' lataj ni ca naca yu'u lídxigaca gubán.

¹⁴ Cate' nī' zoë' Jesús chila yudo', bal-lë' bönni' nachul-la lōgaquië', en bönni' biti' raca ila'zë'ë bila'dxinë' ga na' zoë', ate' Lë' bunë' légaquië'. ¹⁵ Gula'lenë' yugu' bixúz unná bë', en bönni' yudo' tu'sédinë' cate' bila'lë'enë' yugu' yöl-la' huáca nī' runë' Jesús, en bila'yōmnë' tu'íbi' bí'ido' zidzaj didza' ga naca chila yudo', ta'nnabi':

—¡Bica' ba Lë', zxi'ini xi'sóë' David!

¹⁶ Ní'irō tē' Jesús:

—¿Naru' cabí riyōnnu' ca ta'nnabi' bi'í nī'?

Bubi'ë didza' Jesús, rñnë':

—Ön, riyōnda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rñna: “Lí' benu' ga yugu' bi'í cuidí, en yugu' bí'ido' nī' tádxí'bi' gulúl-labi' yöl-la' ba le naca idú.”

¹⁷ Ní'irō Jesús bucá'anë' légaquië', ate' burúajë' Jerusalén. Guyijë' yödzo Betania ga nī' bugá'anë' idú yëla.

Jesús rulidza zi'ë yaga higo

(Mr. 11:12-14, 20-26)

¹⁸ Cate' za' rení', ate' nī' sōhuōjë' Jesús Jerusalén, ridunë'. ¹⁹ Bilë'enë' tu yaga higo rō' gal-la' cuite nōza, ate' gubígui'ë ga na' rō', pero biti' bi' bidzōlinë' lu yaga na'. Xilágui'sō dxiá. Ní'irō Jesús gudxë' le:

—Biti'rō cuía le ribía quiu'.

La' gubídxitë yaga higo na'. ²⁰ Cate' bila'lë'enë' bönni' usēda queë' lë ni, bulu'bánninë', ate' gula'nábinë' Jesús, ta'nnë':

—¿Nacxi caz guca, gubídxitë yaga nī'?

²¹ Bubi'ë didza' Jesús, rë' légaquië':

—Le nácate' rea' libí'ili', channō tséajlë'ëli' Dios, en biti' gaca chopa ladxí'li', calégasō huáca gunli' ca na' bena' que yaga nī, pero channō guiëli' gu'a nī: Gucuíta, en yōjsóa lu nísado', gaca ca na' innali'. ²² Lë'sca' caní, yúgu'të le inábali' cate' ulídzali'-në' Dios, channō huayéjlë'ëli' gunnë' Dios queëli', huazí'ili' lë na' inábali'.

Yöl-la' unná bë' dë lu në'ë Jesús

(Mr. 11:27-33; Lc. 20:1-8)

²³ Ní'irō guyázië' Jesús chila yudo', ate' tsanni nī' rusédinë' bōnachi nacuá' nī', bila'dxinë' yugu' bixúz unná bë' len bönni' gula tu'zéajni'inë' ga zoë', ate' gula'nábinë' Jesús, ta'nnë':

—¿Bixzi yöl-la' unná bë' dë lu no'o, runtso' yugu' lë nī? ¿Nuzxi budōdi lu no'o yöl-la' unná bë' nī?

²⁴ Bubi'ë didza' Jesús, rë' légaquië':

—Lë'sca' neda' inábatsōqui'da' libí'ili' tu didza'. Channō quíxjō'ili' neda' ca naca, neda' ca' guía' libí'ili' bixzi yöl-la' unná bë' dë lu na'a runa' caní. ²⁵ ¿Nuzxi caz gusöl-la' Juan para buquílë' bōnachi nisa? ¿Naru' Dios gusöl-lë'ë lë', o gula'sól-lë'ë yugu' bönni' lë'?

Ní'irō gula'sí lógaquiē' bōnni' yudo' na' ta'nnē' la' légacasē':

—Channō innaru': Dios gusōl-lē'ē lē', la' guiētē' rē'u: “¿Bizx que biti' guyéajlē'ēli' lē'?”

²⁶ Na'a, channō innaru': Gula'sōl-lē'ē yugu' bōnni' lē', rádxiru' le ilún bōnachi lu yōdzō tu' ta'yéajlē'ē yúgu'tē' Juan na' bē'ē didza' uláz queē' Dios.

²⁷ Que lē' ni na' bulu'bi'ē didza', tē' Jesús:

—Biti' nōztu'.

Jesús rē' légacuiē':

—Neda' ca', biti' guía' libí'ili' bizxi yōl-la' unná bē' dē lu na'a runa' lē' ni.

Rucúdu'ē didza' Jesús ca gulinbi' chópabi' xzí'inē' tu bōnni'

²⁸ Ní'irō Jesús gudxē' yugu' bōnni' yudo' na':

—¿Nacxi rusáca'li' queēli'? Guzóē' tu bōnni' nacuá'abi' chópabi' bi'i bōnni' queē', ate' yōjōdxē'-bi' tubi' bi'i queē' na', gunnē': “Xzí'ina', guyéaj na'a tsōjenu' dxin ga naca luyú quia' ga rō'gaca lubá uva.” ²⁹ Bubi'ibi' didza' bi'i na', gúdxibi'-nē': “Biti' rē'ēnda' tseja'.” Gudōdi ni' bubi'í ládxi'bi', ate' yōjenbi' dxin. ³⁰ Ní'irō bōnni' na' yōjōdxē'-bi' ia'tubi' bi'i queē' na', en la' tuz ca gunnē', ate' bubi'ibi' didza' bi'i ni, gúdxibi'-nē': “Huaca, Dad. Uyéaja'.” Biti' guyéajbi' bi'i ni. ³¹ ¿Núzxilōbi' bi'i chopá ni benbi' le guyaza ládxi'ē xúzibi'?

Bulu'bi'ē didza', tē' Jesús:

—Bi'i zí'alō na'.

Ní'irō Jesús rē' légacuiē':

—Le nácate' rea' libí'ili', ila'nōruē' bōnni' uquízxaj tuá' dō, en yugu' nigula udá dzaga ca libí'ili', ate' ila'yáziē' ga nī' rinná bē'ē Dios. ³² Caní gaca, tu' bidē' Juan, bōnni' buquile' bōnachi nisa, ga zóali', en busédinē' libí'ili' le naca tsahui' ca ral-la' gunli', ate' libí'ili' biti' guyéajlē'ēli' lē', pero yugu' bōnni' uquízxaj, en yugu' nigula udá dzaga gula'yéajlē'ē lē'. Sal-la' bilé'eli' lē' ni, biti' bubi'í ládxi'li' para tséajlē'ēli' lē'.

Rucúdu'ē didza' Jesús ca bēngaquiē' bōnni' huen dxin biti' nácagaquiē' tsahui'

(Mr. 12:1-12; Lc. 20:9-19)

³³ Gunnē' ca' Jesús:

—Buli'zē' nágali' ia'tú le ucúdu'a didza'. Guzóē' tu bōnni' xan yu'u, ate' bōnni' ni budē'ē yugu' lubá uva luyú queē'. Guléquiē' lē'aj que, en guchō'ōnē' tu lerui guiōj ga isiē' xisi uva na'. Benē' ca' tu yu'u xitsá' ga gaca nu uyú idutē luyú queē'. Ní'irō budōdē' luyú na' lu ná'agaquiē' bōnni' huen dxin, para ila'zi'ē' quégaquiē' gatsaj huéaj, ate' sa'yéajē' yōdzō zí'tu'.

³⁴ ‘Cate’ chibidxín dza ulu'chibē' yugu' lubá uva na', gusōl-lē'ē bōnni' xan luyú na' bal-lē' ni'a nē'ē ga na' nacu'ē bōnni' huen dxin ni' para ulu'zi'ē' lu ná'agaquiē' uláz queē'. ³⁵ Ní'irō gula'zōnē' bōnni' huen dxin na' yugu' ni'a nē'ē na'. Gulunē' huē' tuē', en ia'tuē' bētigaquiē' lē', en ia'tuē' bulu'ládxē' lē' guiōj. ³⁶ Leyúbólō bōnni' xan luyú na' gusōl-lē'ē ca' ia'zica'rē' ni'a nē'ē, ate' guláquiē' zíanterē' ca nupa na' gusōl-lē'ē zí'alō, ate' la' tuz ca gulunē' bōnni' huen dxin ni' quégaquiē'.

³⁷ ‘Ga’ yōjsete, gusōl-lē'ē ca' xzí'inē' ga na' nacu'ē. Guzá' ládxi'ē, rnnē': Hualunē' bal bi'i quia'. ³⁸ ‘Cate’ yugu' bōnni' huen dxin na' bila'lē'enē'-bi' xzí'inē', la' gula'nnatē' la' légacasē': “Bi'i ni guequi queēbi' luyú ni. Guli'dá, gútiru'-bi', ate' le ral-la' guequi queēbi' guequi queēru'.” ³⁹ Ní'irō gula'zōnē'-bi', ate' bulu'béajē'-bi' ní'ilō luyú ga na' rō'gaca lubá uva, ate' bētigaquiē'-bi' ni'.

⁴⁰ Ní'irō Jesús gunábinē' légacuiē', gunnē':

—Cate' udxinē' bōnni' xan luyú na', ¿nacxi gunē' quégaquiē' bōnni' huen dxin ni'?

⁴¹ Bulu'bi'ē didza' bōnni' yudo' na', tē' Jesús:

—Usunítiē' bōnni' tuá' dō' na', ate' luyú queē' na' udōdē' lu ná'agaquiē' ia'zica'rē' bōnni' huen dxin, bōnni' ilu'ē' lē' uláz queē' cate' idxín dza ulu'chibē' le.

⁴² Ní'irō Jesús gudxē' légacuiē':

—¿Naru' catu caz nulábanili' lē' na' nazúaj lu guichi lá'ayi ca naca lē' ni? Caní rnna:

Guiōj na' gula'rú'unē' bōnni' tu'cu'ē zō'ō,

la' guiōj ná'asō chinaca guiōj len zō'ō.

Lē' cazē' Xanru' benē' ga naca caní,

ate' naca tu le run ga rubániru'.

⁴³ ‘Que’ lē' ni na' rea' libí'ili', xilátjali' ga na' rinná bē'ē Dios idúa queēli', en gata' quégaca bōnachi ilún ca ral-la' gun nu nadelí' lataj ni'. ⁴⁴ Nu tsōjchegu' lu guiōj ni, la' cuinsi quitsaj, ate' channō guiōj ni tseajbaga' bōnni' na', uzxuzxaj lē'.

⁴⁵ ‘Cate’ yugu' bixúz unná bē', en yugu' bōnni' yudo' fariseo bila'yōnnē' lē' na' bucúdu'ē didza' Jesús, téquibe'enē' bē'ē Jesús didza' ca naca quégaquiē'. ⁴⁶ Gula'zóa gula'bō'ē ila'zōnē' Jesús, pero guládxinē' bi ilún bōnachi zían nacuá' ni' tu' ta'yéajlē' náquiē' Jesús bōnni' ru'ē didza' uláz queē' Dios.

22

Rucúdzu'ë didza' Jesús ca naca que laní que yöl-la' rutsaga na'

¹ Jesús b'ëlenë' légaquie' didza' leyúbölö, ate' bucúdzu'ë didza', rnnë':

² —Ca gaca quégaca nupa ila'yaza ga rinná b'ë Dios yehua' yubá naca ca guca quégaca nupa bulidzë' tu bönni' rinná b'ë cate' benë' laní que dza utsaga ná'abi' bi'i bönni' queë'. ³ Gusöl-lë'ë ni'a n'ë'ë tsójx'gaquie' yugu' bönni' chinulidzë' para guídagaquie' laní queëbi', pero biti' gulë'ënë' guídagaquie'. ⁴ Ní'irö gusöl-lë'ë ia'zica'rë' ni'a n'ë'ë, en gudxë' légaquie': "Guli'tsójödxitsöca' nupa na' chinulidza', na' guiëli' légaquie': Buli'yútsöca', chinupá'a la' huagu. Chibëtia'-ba' yugu' xpëdxa', en yugu' böa' bëdxi renni' quia'. Yúgu'të chinupá'a. Guli'dá, sóaru' laní queëbi' bi'i bönni' quia' utsaga ná'abi'." ⁵ Yugu' bönni' na' yölídzagaquie' biti' gulunë' légaquie' bal, ate' yójáquie' que queégaquie'. Tuë' yöjenë' dxin, en ia'tüë' guyijë' tsójö'u tsójëti'ë. ⁶ Ia'zica'rë' gula'zönë' yugu' ni'a n'ë'ë na', ate' gulu'ë dö' quégaquie', en bëtgaquie' légaquie'. ⁷ Cate' bönni' na' rinná b'ë biyönnë' lë ni, gulënë', en gusöl-lë'ë yugu' bönni' queë' rójáquie' gudil-la, ate' bëtigaquie' yugu' bönni' hueti bönachi na', en bulu'quéle'ë guí' ládzaquie'. ⁸ Ní'irö bönni' na' rinná b'ë'ë gudxë' yugu' ni'a n'ë'ë, gunnë': "Le nácatë chinupá'a que laní na', pero yugu' bönni' bulidza' biti' guláquie' lesaca' guídagaquie' laní quia'. ⁹ Guli'tséajtsöca' gapa naca la' nöza, en buli'lidza yúgu'të nupa tsójxáca'li' ni' para guídagaca laní queëbi' bi'i bönni' quia' utsaga ná'abi'." ¹⁰ Ní'irö bila'ruájë' ni'a n'ë'ë na', sójáquie' gapa naca la' nöza, ate' bulu'tubë' yúgu'të nupa yójxáca'gaquie', yugu' bönni' dxi'a, en yugu' bönni' tuá' dö', ate' ga na' raca laní bilíró bönachi.

¹¹ "Cate' guyázië' bönni' na' rinná b'ë'ë para uyüé' nupa ni' nudúbigaca, bilé'enë' tu bönni' biti' nácuë' lari' tsahui' le bunödzjë' quégaquie' bönni' nacué'ë laní na'. ¹² Ní'irö gudxë' bönni' na': "Bönni'do', ¿zóatso' ni, en biti' nacué' lari' tsahui' bunödzja' quégaca nupa nacué' laní?" Bönni' na' busayaj ru'ë. ¹³ Ní'irö bönni' na' rinná b'ë'ë gudxë' nupa na' tun xichinë', gunnë': "Guli'guga' ni'a n'ë'ë bönni' ni. Guli'tsójchú'un-në' ní'ilo ga na' rö'ö chul-la. Ní' cödxë', en utíl-la láyé'ë, lu yöl-la' ruhu'ini queë'."

¹⁴ Ní'irö Jesús gudxë' légaquie':

—Zian nupa nulidza', pero nabábasö nupa ila'rögaca.

Jesús ru'ë didza' ca naca le riguíxaj lázaru'

(Mr. 12:13-17; Lc. 20:20-26)

¹⁵ Ní'irö yugu' bönni' yudo' fariseo na' bulu'zë'ë ni', ate' gulún xtídza'gaquie' ilunë' ga bi innë' Jesús para gaca ulu'zéguië' Lë' didza'. ¹⁶ Para ilunë' caní, gula'söl-lë'ë bal-lë' bönni' dá'gaquie' légaquie', len bönni' dá'gaquie' Herodes, ga zoë' Jesús, nupa na' gulë' Jesús:

—Bönni' Usedi, nöztu' Li' ru'u didza' cáteze naca, en naca idütë li ca rusédinu' ca naca queë' Dios, en biti' rufi' ládzu'u le ta'nná quíu' bönachi, tu' cabi ruchi'a rusórou' bönachi ca naca le ta'nnasö bönachi na'. ¹⁷ Gudíxjoi' netu'. ¿Nacxi runi li? ¿Naru' run bayudxi, o biti' run bayudxi quíxaj laztu' queë' César, bönni' yödzö zi'tu' na' rinná b'ë'enë' rë'u?

¹⁸ Réquibe'enë' Jesús t'ë'ënnë' ulu'béajë' Lë' didza', ate' gudxë' légaquie':

—Libi'ili', bönni' rulu'isö tsahui' cuinli', ¿bizx que ru'ili' didza' le ruzóa neda' ra' guí'a? ¹⁹ Buli'lufi' neda' dumí le riguíxaj lázali'.

Ní'irö bulu'lufi'inë' Lë' tu dumí que yödzö Roma. ²⁰ Jesús gunábinë' légaquie', rnnë':

—¿Nuzxi lahui da' ni, en nuzxi le nazúaj lë'e dumí ni?

²¹ Të' Lë':

—Queë' César na'.

Ní'irö Jesús gudxë' légaquie':

—Guli'guíxjë' César le nequi queë' César, ate' Dios le nequi queë' Dios.

²² Cate' bila'yönnë' lë ni, bulu'bánnë' ca naca didza' tsahui' bubi'ë Jesús, ate' bulu'cá'anë' Lë', söhuóajtëgaquie'.

Ta'nabi yúdxinë' Jesús ca ulu'bán nupa chinátigaca

(Mr. 12:28-27; Lc. 20:27-40)

²³ La' dza ná'asö yugu' bönni' yudo' saduceo, bönni' na' ta'nnë' biti' ulu'bán nupa chinátigaca, bila'dxinë' ga zoë' Jesús, ate' gula'nábinë' Lë', ²⁴ ta'nnë':

—Bönni' Usedi, Moisés gunnë': "Channö gátië' tu bönni' zóanu nigula queë', en cuntu nu bi'i zóabi' queë', ní'irö bi'i böché'ë bönni' na' ral-la' utsaga ná'alénbi'-nu nigula uzëbi queë', para cabi initi di'a dza queë' bönni' böchi'bi' na'." ²⁵ Gula'cuá'abi' gadxi bi'i bönni' ga zóatu', naca böchi'gacabi'. Bi'i zí'alö na' butsaga ná'alénbi'-nu nigula, ate' gútitébi'. Tu' cuntu nu bi'i queëbi' zóabi', bi'i buropi na' butsaga ná'alénbi'-nu nigula uzëbi queëbi' bi'i böchi'bi' na'. ²⁶ Lësca' caní guca queëbi' bi'i buropi na', enca' queëbi' bi'i bunni, en la' tuz ca guca quégacabi' igádxitébi', gulátibi' yúgu'tëbi'. ²⁷ Ga búdxité gútinu ca' nigula na'. ²⁸ Cate' idxin

dza ulu'bán nupa chinátigaca, ¿núzxilögacabi' bi'i gadxi ni' guéquinu nigula na' queëbi', tu' bulu'tsaga ná'alenbi'-nu yúgu'tèbi' nigula na'?

²⁹ Ní'irō bubi'ē didza' Jesús, ate' rē' légaquiē':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbē'ēli' yōl-la' huáca queē' Dios. ³⁰ Cate' idxín dza ulu'bán nupa chinátigaca, bití'rō gaca yōl-la' rizóalen nigula, en bití' ulu'tsaga ná'agaquiē', pero gácagaquiē' ca nácagaquiē' gubáz lá'ayi queē' Dios nacu'ē yehua' yubá. ³¹ Ca na' ral-la' ulu'bán nupa chinátigaca, ¿naru' cabí nulábanili' lē na' gudxi cazē' Dios libí'ili'? ³² Caní gunné': "Neda' naca' Dios queē' Abraham, en Dios queē' Isaac, en Dios queē' Jacob." Dios na' bití' náquiē' Dios quégaca nupa nátigaca tsaz, pero náquiē' Dios quégagaquiē' bōnni' ni nabángagaquiē' sal-la' gulátie'.

³³ Cate' bila'yōni bōnachi nacua' ni' didza' ni, bulu'bani ca naca lē na' rusédinē' Jesús légequi.

Xibá queē' Dios le naca lo

(Mr. 12:28-34)

³⁴ Cate' guléquibe'enē' bōnni' yudo' fariseo ca benē' Jesús, busayjē' ruá'agaquiē' bōnni' yudo' saduceo, ní'rō bulu'dubē' yúgu'tē'. ³⁵ Tuē' bōnni' nútsē'ē ládjagaquiē', en nazēdē' xibá queē' Moisés, gū'unnē' sí' bē'ē Jesús. ³⁶ Que lē ni na' gunábinē' Jesús, rnnē':

—Bōnni' Usedi, ¿bízxiłō xibá queē' Dios naca lo?

³⁷ Jesús rē' lē':

—Idxi'inu' Xanu' Dios idú ládxi'u, en idú icja ládxi'do'o, enca' len idú yōl-la' réajni'i quiu'. ³⁸ Xibá ni naca lo, en nazáca'tērō. ³⁹ Xibá na' naca buropi, la' ca nácate, en caní rna: "Idxi'inu' bōchi' luzó'o ca nadxi'i cuinu'." ⁴⁰ Chopa xibá ni nácagaca ga rōjlōz yúgu'tē le rinná bē' xibá queē' Dios, en yúgu'tē le bulu'sédinē' bōnni' gulu'ē didza' uláz queē' Dios.

¿Nuzxi xxi'ini náquiē' Cristo?

(Mr. 12:35-37; Lc. 20:41-44)

⁴¹ Tsanni ni' nacu'ē tsōzxōn bōnni' yudo' fariseo na', Jesús gunábinē' légaquiē', ⁴² rnnē':

—¿Nacxi rusáca'li' queēli' queē' Bōnni' na' lē' Cristo? ¿Nuzxi xxi'ini náquiē'?

Bulu'bi'ē didza', ta'nnē':

—Zxi'ini xi'sóē' David náquiē'.

⁴³ Ní'irō Jesús rē' légaquiē':

—¿Bizx que na' lē cazē' David bulidzē' Lē', gunné': "Xana"? Caní gunné' cate' ni' bē'ē didza' uláz queē' Dios Bō' Lá'ayi, gunné':

⁴⁴ Xanru' Dios gudxē' Xana':

"Gurō'ō cuita lē'a ibēla,

cate' gunra' ga ulu'zechu xzibigaca Lo' nupa tequi Li' zi'."

⁴⁵ Channō David na' gunné' queē' náquiē' Xanē', ¿nacxi caz naca, rnnali' náquiē' xxi'ini xi'sóē' David na'?

⁴⁶ Cuntu nu guca ubí'i didza', ate' ga gusí lo dza na', cúnturō nu burugui bi inábini Lē'.

23

Jesús ruzéqui'ē yugu' bōnni' yudo' didza'

(Mr. 12:38-40; Lc. 11:37-54; 20:45-47)

¹ Ní'irō Jesús bē'lenē' bōnachi nacua' ní' len yugu' bōnni' usēdi queē' didza'. ² Rē' légaquiē': —Yugu' bōnni' yudo' fariseo, en yugu' bōnni' yudo' usedi nuhuóázagaquiē' xilatjē Moisés, en tu'sédinē' bōnachi. ³ Que lē ni na', guli'gún yúgu'tē le ilē' libí'ili', pero bití' gunli' libí'ili' ca na' tunē' légaquiē', tu' tu le ta'nnē', en ia'tú le tunē'. ⁴ Le ta'nná bē'enē' bōnachi naca ca tu yua' zi'le cabi sequi' nu guá', ate' tu'gu'ē le ya'zxícjagaca bōnachi, pero légaquiē' bití' tē'ēnnē' ulu'tenē' le, calēga len tuze xibōn ná'agaquiē'. ⁵ Yúgu'tē le tunē', tunē' para ila'lé'e bōnachi légaquiē', tu' tunē' zxōn le tūgu'ē yen ná'agaquiē', en ra' xigágaquiē' ga na' nuzúajgaquiē' tu le nazúaj lu guichi lá'ayi, en tu'tunnē' luzxi lari' nácugaquiē'. ⁶ Té'ēnnē' ila'bō'ē ga naca lataj lo ga na' tu'dubē' tahuē', enca' ga na' naca lataj lo lu yu'u ga tu'dubē' tu'sédē' queē' Dios. ⁷ Lēsa' caní, té'ēnnē' ulu'gapa bōnachi légaquiē' didza' ba zxōn gapa naca lógaca bōnachi, en té'ēnnē' ilē' bōnachi légaquiē': "Padiux, bōnni' usedi."

⁸ Pero libí'ili', bití' ral-la' gunli' ga nu guíē libí'ili'. Bōnni' Usedi, tu' zoa tuz Nu naca Bōnni' Usedi queēli', neda', Cristo, ate' yúgu'tēli' nácali' bōchi'li' tuli' ia'tuli'. ⁹ Cuntu nu guíēli' luyú ni, bití' innali': Xuz, tu' zoa tuz Nu naca Xúzili', zoē' yehua' yubá. ¹⁰ Bití' gunli' ga nu guíē libí'ili': Xan, tu' zoa tuz Nu naca Xanli', neda', Cristo. ¹¹ Nu nutsa' ládjali' nu run xichinli' ia'zica'rōli', nu ni na' gácarō lo ga zóali'. ¹² Channō nu uzóa cuini lataj lo, cá'asō ugá'ana nu na', pero nu naca nōxaj ladxí', gaca lo.

¹³ 'Bica' bayechi' libí'ili, bönni' yudo' usedi, enca' libí'ili, bönni' yudo' fariseo, bönni' rulu'isö tsahui' cuinli'. Ruzága'li' nöza sôjácalen bônachi para ila'dxin ga ni' rinná bē'ē Dios yehua' yubá. La' libí'isili' bití' sequi' tsú'uli', en bití' ruí'ili' lataj ila'yú'u nupa té'ēni ila'yú'u.

¹⁴ 'Bica' bayechi' libí'ili, bönni' yudo' usedi, enca' libí'ili, bönni' yudo' fariseo, bönni' rulu'isö tsahui' cuinli'. Rugúali' yugu' lidxigacanu nigula uzêbido', en para ulufisö tsahui' cuinli', xidzé rulídzali-nē' Dios. Que lê ni na', zítêrô irugu queêli' quí'í sáca'li'.

¹⁵ 'Bica' bayechi' libí'ili, bönni' yudo' usedi, enca' libí'ili, bönni' yudo' fariseo, bönni' rulu'isö tsahui' cuinli'. Ridôdili' idú lu nísado', en idú yôdzôliô ni para gunli' ga tseaj ládxē'ē tu bönni' Dios tsôzxôn len libí'ili', en cate' chiguzxéqui'li'-nē', runli' ga nabága'rē' xíguia' ca libí'ili', ate' tsôjtsu'ē lu guí' gabila.

¹⁶ 'Bica' bayechi' libí'ili. Nachul-la loli', ate' rē'ēnili' ulufí'ili' nöza bônachi. Caní naca queêli' tu' rnnali': "Channô bi rizí' lu nē'ē tu bönni' ni'a que yudo', bití' run bayudxi, pero channô runē' le ni'a que oro dzô'ô yudo', bayudxi gun." ¹⁷ Libí'ili', bönni' lo chul-la, en tu' caréajni'í. ¿Bízxiô nácarô lo? ¿Naru' oro na', o yudo' le run lá'ayi oro na'? ¹⁸ Lësca' caní rnnali': "Channô nu bönni' gunē' le ni'a que bucugu lá'ayi, bití' gun bayudxi, pero channô gunē' le ni'a que gun zxoa lahui, bayudxi gun." ¹⁹ Libí'ili', nazí'dili', en nachul-la loli'. ¿Bízxiô nácarô lo? ¿Naru' gun zxoa láhuísô, o bucugu lá'ayi na' run lá'ayi gun na'? ²⁰ Que lê ni na', channô nu bönni' runē' le ni'a que bucugu lá'ayi, runē' le ni'a que le, enca' ni'a que yúgu'tē le zxôagaca láhuísô. ²¹ Lësca' caní, channô nu bönni' runē' le ni'a que yudo', runē' le ni'a que le, enca' ni'a queē' Dios, nun cazē' xilatjē' ni'. ²² Lësca' caní, channô nu bönni' runē' le ni'a que yehua' yubá, runē' le ni'a que lataj ga rō'ē rinná bē'ē Dios, enca' ni'a que Lê cazē' Dios rō'ē ni'.

²³ 'Bica' bayechi' libí'ili, bönni' yudo' usedi, enca' libí'ili, bönni' yudo' fariseo, bönni' rulu'isö tsahui' cuinli'. Caní naca queêli' tu' riguixzjali' que yudo' tu cō' huéaj tu' chi cō' le rizí'ili' que xôhuéaj, en que guixi' anís, en que comino la' huagu, pero rucá'anali' le nácarô lo le rinná bē' xibá queē' Dios, tu' cabí runli' le naca tsahui', en bití' ruhuéchi' ládxali' luzá'ali', en bití' réajlē'ēli'-nē' Dios. Yugu' lê ni run bayudxi gunli', en lēs bití' ucá'anali' ia' zíca'rô lê na' runli', le riguixzjali' que yudo'. ²⁴ Libí'ili', nachul-la loli', en rē'ēnili' ulufí'ili' nöza bônachi. Ca na' runli' naca ca rudôdili' bôdzádzado' le ré'jali', rubéajgacali'-ba' bōiyudo', pero ré'jali'-ba' bōa' ta'bíē'-ba' bönni'.

²⁵ 'Bica' bayechi' libí'ili, bönni' yudo' usedi, enca' libí'ili, bönni' yudo' fariseo, bönni' rulu'isö tsahui' cuinli'. Nácali' ca zxíga'do' ré'jali', en yō'ôna ráhuili'. Riguibili' le nuá' cuita lē'e, pero lu icja ládxí'do'oli' nali' yugu' le ribanli', en yugu' le ruá' dō' runli'. ²⁶ Libí'ili', bönni' yudo' fariseo lo chul-la. Zí'alô guli'quibi le nuá' lu zxíga'do', en lu yō'ôna, lê na' sa'yéaj gácali' tsahui' lu icja ládxí'do'oli', para gácali' ca' tsahui' cuita lē'ēli'.

²⁷ 'Bica' bayechi' libí'ili, bönni' yudo' usedi, enca' libí'ili, bönni' yudo' fariseo, bönni' rulu'isö tsahui' cuinli'. Caní naca queêli' tu' nácali' ca yugu' yeru ba quégaca nupa chinátigaca, le nacagaca chiguichido'os cuita lē'e, en le nácate lachi nalá'gaca, pero nalígaca dxita quégaca nupa chinátigaca, enca' yúgu'tē le siguti. ²⁸ Lësca' caní nácali' libí'ili'. Le nácate láhuísô rulu'isö cuinli' tsahui' lógaca bônachi, pero lu icja ládxí'do'oli' nali'li' yugu' le rulu'isö tsahui' cuini, en le ruá' dō' runli'.

²⁹ 'Bica' bayechi' libí'ili, bönni' yudo' usedi, enca' libí'ili, bönni' yudo' fariseo, bönni' rulu'isö tsahui' cuinli'. Ruchísali' biquitaj que ba gapa nagáchi'gaquiē' bönni' gulu'ē didza' uláz queē' Dios, en ruí'ili' biquitaj gapa nagáchi'gaca bônachi tsahui'. ³⁰ Lësca' caní rnnali': "La'tu' zóatu' dza ni'te cate' gula'cu'ē xuz xtó'otu', bití' guntu' légaquiē' tsôzxôn cate' gulútiē' yugu' bönni' gulu'ē didza' uláz queē' Dios." ³¹ Tu' rnnali' caní, la' libí'isili' runli' ba nali' nácali' xzi'ini xi'sógaca nupa ni' bétigaca yugu' bönni' gulu'ē didza' uláz queē' Dios. ³² Caní naca, rusubaga' cuinli' xíguia' na' gula'báguie' xuz xtó'oli'.

³³ 'Libí'ili' na', nácali' ca yugu' bēla sínia', en di'a dza quégacaba' bēla sínia'. ¿Nacxi caz uláli' lu le usaca' zí' libí'ili' lu guí' gabila? ³⁴ Que lê ni na', neda' isól-la'a queêli' yugu' bönni' ilu'ē didza' uláz queē' Dios, enca' yugu' bönni' ta'yéajni'inē', en yugu' bönni' usedi. Yugu' bönni' ni, bal-lē' gútili'-nē', en ia' zíca'rē' udá'ali' lē'e yaga cruz, en ia' zíca'rē' quinli' gapa naca lu yu'u ga rudúbili' rusédali' queē' Dios, ate' ulágali' légaquiē' tu ia'tú yôdzô. ³⁵ Caní gaca, ibága'li' libí'ili' xíguia' que idútē rôn quégacquiē' bönni' tsahui' le gulalaj luyú, ga gudela' nu bēti Abel, bönni' tsahui', ga ridxintē nupa bétigaca Zacarías, xzi'inē' Berequías, bönni' na' bétili'-nē' gatsaj láhuilô ga dē yudo', en ga dē bucugu lá'ayi ga na' tu zégui'ē' bōa' bédxido' lahuē' Dios. ³⁶ Le nácate rea' libí'ili', yúgu'tē lê ni ila'baga' bônachi nacuá' dza ni zóaru' na'a.

*Jesús ribôdxē' ni'a que yôdzô Jerusalén
(Lc. 13:34-35)*

³⁷ Lësca' caní gunné' Jesús:

—Jerusalén, Jerusalén, libí'ili' na' rútigacali'-nē' bönni' tu'ē didza' uláz queē' Dios, en ruládxí'gacali' guioj nupa nasól-lē'ē Dios. Zíán luzuí' gú'unida' utuba' libí'ili' quia', ca runba'

yöjede, rutúbiba' börado' queëba' xzan xliba', pero biti' gú'unili'. ³⁸ Buli'yútsöca', cá'asö ugá'ana yu'u lúdxili'. ³⁹ Caní gaca, tu' rea' libí'ili', na'a isí lo biti' ulé'eli' neda' cate' innárolí': "Lá'ayi náquië' Bönni' na' zë'ë uláz queë' Xanru'."

24

Rigútxjö'ë Jesús ca si' ulu'quínajë' yudo'

(Mr. 13:1-2; Lc. 21:5-6)

¹ Birúajë' Jesús chila yudo', en tsanni ni' rizë'ë ni', gula'bígüi'ë bönni' usëda queë' ga na' zoë', ate' bulu'luf'inë' Lë' ca nácagaca zö'ö nagú'ugaca lë'a yudo'. ² Bubi'ë didza' Jesús, ate' rë' légaquië':

—*¿Rilé'etseli' yúgu'të lë ni? Le nácatë rea' libí'ili', biti' ca' ugá'ana guiój nabaga' luzë'e ni, le cabí igúnnaj.*

Le ilaca bë' chizóa idxín dza údxi que yödzölió

(Mr. 13:23; Lc. 21:7-24; 17:22-24)

³ Cate' ni' rö'ë Jesús ga naca lu Guí'a Yaga Olivo, bila'dxinë' bönni' usëda queë' ga na' zoë' queëzë', en të' Lë':

—*Gudíxjö'i' netu', ¿bátaxi ilaca lë ni, en bizxi gaca bë' dza huödu', en dza údxi que yödzölió ni?*

⁴ Ní'irö bubi'ë didza' Jesús, ate' rë' légaquië':

—*Buli'yú para cabí nu si' ye'e libí'ili', ⁵ tu' zá'gaquië' zían bönni' légaquië' ca lea' neda'. Ila'nnë' nácagaquië' Cristo, en ila'z' yé'enë' bönachi zían. ⁶ Huayönili' raca gudil-la, en le rufi' didza' que gudil-la, pero biti' cö'öli' böniga, tu' ral-la' ilaca yúgu'të lë ni, pero cabí ridxini dza údxi cate' ilacarö lë ni. ⁷ Til-la tu yödzö len ia'tú yödzö, ate' tu ga nu rinná bë' len ia'tú ga nu rinná bë'. Ilatsaj yödzöhuë' zxön, en gaca gubin, ate' zían lataj tódi budó' xzu'. ⁸ Yúgu'të lë ni nácagaca le isí lógaca yugu' le ila'guí'i ila'zaca' bönachi.*

⁹ Ní'irö ulu'dödi bönachi libí'ili' lu na' nu usaca' zi' libí'ili'. Yúgu'të bönachi ulu'dí'i libí'ili' tu' dá'ali' neda', en ilutíë' bál-lali' libí'ili'. ¹⁰ Cate' gaca caní, gaca chopá ládxi'gaca zían bönachi, en ulu'cá'ana neda', ate' udödi tu ia'tú luzë'e, en tu ia'tú udf'i luzë'e. ¹¹ Ní'irö ulu'luf'i lógaquië' zían bönni' ta'z' yë'ë. Ulu'luf'i cuíngaquië' ca yugu' bönni' tu'ë didza' uláz queë' Dios, en ila'z' yé'enë' bönachi zían. ¹² Iluá'ada' dö' bönachi, ate' que lë ni na' bítirö ila'dxí'i böchi' luzë'eguequi. ¹³ Nu guequi tsaz queë' Dios ga idxintë dza údxi, nu ni ulá. ¹⁴ Idú yödzölió gaca libán que didza' dxí'a ca rinná bë'ë Dios para gaca ba nalí que lógaca yúgu'të bönachi izá'a, ate' ní'irö idxín dza údxi.

¹⁵⁻¹⁶ Nu ulaba lë ni ral-la' uzéajni' ladxí'. Gunnë' Daniel, bönni' bë'ë didza' uláz queë' Dios, gunnë': "Tsaza le rudí'inë' Dios lataj lá'ayi queë' Dios, lë na' rusuniti." Cate' ilé'eli' gaca caní, ní'irö nuli' zöali' luyú Judea ral-la' tsöjzxúnajli' saca guí'ado'. ¹⁷ Nu dxía ícjo'olö bítí' gal-la' huötaj tsöjxí' bi dë que lu yu'u, pero ral-la' izxúnajtë. ¹⁸ Nu zoa la' guixi', bítí' gal-la' huöaj tsöjxí' lari' que. ¹⁹ Bica' bayechi' yugu' nigula si' ulu'zöanu bífido' quégacanú, enca' nigula ni' tu'gádxí'nu-bí' bífido' quégacanú cate' idxín dza ni'. ²⁰ Buli'lidzë' Dios inábili'-në' cabí idxín dza ni' izxúnajli' cate' raca beo' ziaga o cate' naca dza lá'ayi, ²¹ tu' ila'guí'i ila'zaca'tërö bönachi dza ni' ca gula'guí'i gula'zaca' bönachi dza ni'te cate' si' guta' gurö'ö yödzölió, ga ridxintë na'a dza, en calëga dza zá'gaca bítí' ila'guí'i ila'zaca' caní. ²² Cate' idxín dza ni', channö Dios bítí' cuéqui lahuë' quégaquië', cuntú nu ulá, pero cuéqui lahuë' quégaquië' dza ni', en gácalenë' nupa gurö cazë' Lë'.

²³ Ní'irö bítí' tséajlë'ëli' channö nu idxín queëli', en guíë libí'ili': "Buli'yútsöca', ni zoë' Cristo", o inná: "Ní' zoë'." ²⁴ Ulu'luf'i lógaquië' zían bönni' ta'z' yë'ë, en ila'nnë' nácagaquië' Cristo, o ila'nnë' tu'ë didza' uláz queë' Dios. Ilunë' le ilaca bë', en le ilún ga ulu'bani bönachi, ate' ila'z' yé'enë' nupa gurö cazë' Dios channö huala'zéqui'në'. ²⁵ Buli'yútsöca', chigudxi caza' libí'ili' yúgu'të lë ni z'fatelö ca si' ilaca. ²⁶ Que lë ni na', bítí' irúajli' channö ila'dxín queëli' nupa ilë libí'ili': "Buli'yútsöca', ni' zoë' Cristo lu lataj cá'asö." Lë'sca' caní, bítí' tséajlë'ëli' channö ila'nná: "Buli'yútsöca', lu yu'u zoë'." ²⁷ Ca na' raca cate' rëpi yösa ga rilén gubidza, en ruzení' ga ribía gubidza, lë'sca' caní gaca cate' huöda' neda', Bönni' Guljë' Bönachi. ²⁸ Ilácatë caní, ca na' ta'nná bönachi: "Gátitës ga dë tu le nati, ni' ulu'dubi cázaba' bíchulab."

Ca gaca cate' huödë Bönni' Guljë' Bönachi

(Mr. 13:24-37; Lc. 21:25-33; 17:26-30, 34-36)

²⁹ Gunnë' ca' Jesús:

—*Tódi yugu' dza ni' cate' ila'guí'i ila'zaca' bönachi caní, ichul-la gubidza, ate' beo' bítí' gunna bení' que. Ila'guínnajba' böla'j lúzxiba, ate' ila'zxízi le nalá'gaca naca tsutsu lúzxiba. ³⁰ Ní'irö ilá' lahuí lúzxiba le gaca bë' huöda' neda', Bönni' Guljë' Bönachi, ate' ila'bödxí yechi' yúgu'të bönachi yödzölió ni, cate' ila'lé'e neda', Bönni' Guljë' Bönachi, suzá'a lu böaj lúzxiba, dë lu na'a yöl-la' unná bë', en yöl-la' huáca zxön. ³¹ Ní'irö isól-la'gaca-në' gubáz lá'ayi quia'.*

Ulu'cödxë' zidzaj lúzuba' böa' guixi', ate' ulu'tubë' nupa naböa' quia', nacuá' idapa la'atë yödžöli, en yúgu'të lataj zxan lúziba.

³² 'Buli'zéajni' ládxi'li' le rusedi libí'ili' le raca que yaga higo. Cate' ta'lén ni'a në'e yúludo', en chirubía xilagui' yúludo', inözili' chizóa idxín cusubá. ³³ Lësca' caní, cate' ilé'eli' taca yúgu'të lë ni, inözili' chizóa idxín dza údxi na', en chiridzaga lahui. ³⁴ Le nácatë rea' libí'ili', yúgu'të lë ni ilaca zi'atëlö ca ilátigaca bönachí nacuá' dza ni'. ³⁵ Huadödi quégaca lúziba, en luyú ni, pero yugu' xtídz'a a bití' ila'dödi cá'asö.

³⁶ 'Cate' idxín dza ni' cuntú nu nōzi. Bití' nōzguequinë' gubáz lá'ayi queë' Dios nacu'ë yehua' yubá, en bití' nōzda' neda', Zxí'inë' Dios, pero tuzë' Dios Xuz nōzinë'.

³⁷ 'Ca na' guca dza cate' ni' zoë' Noé, lësca' caní gaca cate' huöda' neda', Bönni' Guljë' Bönachí. ³⁸ Yugu' dza ni' zi'atëlö ca si' idxín nisa guiöj le busuniti yödžöli, gulë'aj gulahuë', bulu'tsaga ná'agaquië', en bulu'dödë' zxi'inigaquië' lu yöl-la' rutsaga na' ga bidxintë dza guyázië' Noé lë'e barco zxon ni' benë', ³⁹ en bití' gulë'quibe'enë' cate' bidxintë nisa guiöj le busuniti yödžöli, ate' gula'nitië' yúgu'të'. Lësca' caní gaca cate' si' huöda' neda', Bönni' Guljë' Bönachí, cuntú nu guë'quibe'e. ⁴⁰ Dza huöda' ila'cu'ë chopë' bönni' la' guixi'. Tuë' uchë'a-në' quia', ate' ia'túë' ucá'ana-në'. ⁴¹ Ila'cuá'anú chópánu nigula nacuá'anú huëtu. Tunu uchë'a-nu quia', ate' ia'tunu ucá'ana-nu.

⁴² 'Buli'subán ládxi'li' tu' cabí nōzili' bizxi dza huöda' neda', Xanli'. ⁴³ Na'a, guli'tséajni' lë ni. La'tu' nōzinë' xan yu'u bizxi dza guidë' gubán, huanë'ë yëla, en bití' gu'ë lataj nu quida' zö'ö para cuan le dzö'ö lidxë'. ⁴⁴ Que lë ni na', buli'subán ládxi'li' ca' libí'ili', tu' huöda' neda', Bönni' Guljë' Bönachí, tu dza bití' nuzóa icjali'.

Bönni' huen dxin tsahui', en bönni' huen dxin bití' náquië' tsahui'
(Lc. 12:41-48)

⁴⁵ Gunnë' ca' Jesús:

—¿Nuzi caz bönni' huen dxin náquië' tsahui', en réajni'inë', bönni' huen dxin na', xanë' cu'ë lu në'ë bönachí nacuá'lidxë' para gu'ë le ilágugaca cate' idxín dza? ⁴⁶ Bica' ba bönni' huen dxin na' náquië' tsahui', bönni' na', cate' udxinë' xanë', uduxáquië' lë' caní runë' le nudödë' xanë' lu në'ë. ⁴⁷ Le nácatë rea' libí'ili', yúgu'të le dë queë' xanë', udödë' lu në'ë bönni' huen dxin na' runë' caní. ⁴⁸ Channö huöáquië' bönni' huen dxin queë' huiá' dö', en sa' ládxië'ë, innë': "Huadzenë' xana', en bití' huödätië'", ⁴⁹ en channö isí lahuë' gundë' zi' bönni' túnlenë' lë' tsözxön dxin, en isí lahuë' ca' guí'aj gágulenë' nupa ta'zudxi, ⁵⁰ ni'irö huödë' xanë' bönni' huen dxin na' tu dza cate' bití' zoë' ribözë', o tu yëla bití' réquinë'. ⁵¹ Ní'irö xanë' na' usaca' zí'dë'ë bönni' huen dxin na', en gunë' ga gaca queë' ca na' ral-la' gaca quégaca nupa tu lu'isö tsahui' cuínguequi. Ní'irö cödxí yechë'ë, en gagu zxea láyë'ë.

25

Rucúdzü'ë didza' Jesús ca naca quégacabi' chibi' bi'i nigula ra'bando'

¹ Gunnë' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'z'ibi' le nuá'gaca guí' quégacabi', ate' bila'rúajbi' tsöjtságagacabi' bönni' utsaga në'ë. ² Gáyu'bi' nácacacabi' bi'i bití' ta'yéajni'ibi' ate' ia'gáyu'bi' nasína'gacabi'. ³ Yugu' bi'i nigula bití' ta'yéajni'ibi' na' gula'z'ibi' le nuá'gaca guí' quégacabi' pero bití' guluá'abi' ia'lati' za régui. ⁴ Yugu' bi'i sina' na' guluá'abi' za régui lu böga'do' quégacabi' len le nuá'gaca guí' quégacabi'. ⁵ Tu' gudzenë' bönni' utsaga në'ë, gudödi yëla lógacabi', en gulásitëbi'. ⁶ Cate' bidxín idú guluhuëla, biyön chi'í nu rinnë' zidzaj, rnna: "¡Chizë'ë bönni' utsaga në'ë! ¡Guli'rúaj tsöjtságali-në'!" ⁷ Ní'irö gula'yásabi' yúgu'tëbi' bi'i nigula na', ate' bulu'pá'abi' le nuá'gaca guí' quégacabi'. ⁸ Guluf'ibi' didza' bi'i bití' ta'yéajni'ibi' na', en gulëbi' yugu' bi'i sina' na': "Guli'gunna queëtu' láti'do' za régui queëli' tu' tu'ulu le nuá'gaca guí' queëtu' ni." ⁹ Bulu'bi'ibi' didza' bi'i sina' na', gula'nabi': "Bití' gaca, tu' cabí bi uga'ana queëtu', en queëtu'. Guli'tséajtsöca' ga ridó'o za régui, tsöj'ö'uli' queëli'." ¹⁰ Tsanni' ni' sōjácabi' sōjxi'gacabi' le, bidxinë' bönni' utsaga në'ë. Yugu' bi'i na' nacuá'abi' sina', en ta'bözabi' lë' gula'yú'ulentëbi' lë' ga na' raca laní que utsaga na', ate' la' guyáyajtë yu'u. ¹¹ Gudödi ni' ia'zica'röbi' bi'i nigula ra'bando' na' bila'dxinbi' ni', ate' bulu'lídzabi-në', en gula'nabi': "Xan, Xan, gusalaj queëtu'." ¹² Lë' bubí'ë didza', rnnë': "Le nácatë rea' libí'ili', bití' nōzda' gazxi libí'ili'."

¹³ Ní'irö Jesús gudxë' légaquië':

—Buli'subán ládxi'li', tu' cabí nōzili' bizxi dza o bizxi yëla huöda' neda', Bönni' Guljë' Bönachí.

Rucúdzü'ë didza' Jesús ca naca que dumí zaca'

¹⁴ Gunnë' ca' Jesús:

—Ca gun Nu na' rinná bē' yehua' yubá naca ca benē' tu bōnni', chizóa tsejē' zī'tu'. Bulidzē' yugu' bōnni' huen dxin queē' en gulu' le dē queē' lu ná'agaquiē'.

¹⁵ "Tuē' bōnni' huen dxin na', gulu'ē gayu' dumí nazaca' lu nē'ē, ate' ia'tué' gulu'ē chopa dumí nazaca' lu nē'ē. Ia'tué' gulu'ē tu dumí nazaca' lu nē'ē. Tu tuē' gulu'ē lu nē'ē tsca huéaj le ila'zéqui'nē'. Ní'irō la' guzá'atē' ga naca zī'tu'. ¹⁶ Guyijē' bōnni' huen dxin na' guzxi'ē gayu' dumí nazaca' na', en yōjtjlalenē' le ia'gayu' dumí nazaca'. ¹⁷ Lēscá' caní, bōnni' na' guzxi'ē chopa dumí na', yōjtjlalenē' le ia'chopa ca'. ¹⁸ Bōnni' na' guzxi'ē tu dumí guyijē', en yōjchō'ōnē' lu yu, ate' bucáché'ē dumí queē' xanē' lu yu nī'.

¹⁹ "Cate' chigudzē, budxinē' xángaquiē' bōnni' huen dxin na', ate' bucá'analenē' légaquiē' tsahui'. ²⁰ Ga gusí lo bidxintē' bōnni' na' guzxi'ē gayu' dumí nazaca' na', en sunu'ē ia'gayu' dumí ca', ate' rē' xanē': "Xan, gayu' dumí gulu' u lu na'a. Ni dē ia'gayu' dumí ca' yōjtjlalena' le." ²¹ Xanē' na' rē' lē': "Naca dxi'a. Nacu' huen dxin tsahui'. Tsáhui'do' benu' cate' nī dē lu no'o láti'do'os. Na'a yēnni'tērō cu'a lu no'o. Guyaza ga zoa', udzējalenu' neda'." ²⁴ Ní'irō cate' bidxinē' bōnni' huen dxin na' guzxi'ē tu dumí nazaca' na', rnnē': "Xan, chopa dumí gulu' u lu na'a. Ni dē ia'chopa dumí ca' yōjtjlalena' le." ²³ Ní'irō xanē' na' rē' lē': "Naca dxi'a. Nacu' huen dxin tsahui'. Tsáhui'do' benu' cate' nī dē lu no'o láti'do'os. Na'a, yēnni'tērō cu'a lu no'o. Guyaza ga zoa', udzējalenu' neda'." ²⁴ Ní'irō cate' bidxinē' bōnni' huen dxin na' guzxi'ē tu dumí nazaca' na', rnnē': "Xan, nōzda' nacu' bōnni' bizxaj, tu' rulapu' ga bití' guzu', en rutubu' ga bití' guchilju'. ²⁵ Que lē nī na' gúdxida' lí, ate' guyija', yōjchá'a dumí quiu' lu yu. Ni dē na'a le nequi quiu'. ²⁶ Ní'irō bubí'ē didza' xanē', en rē' lē': "Nacu' huen dxin bití' naca tsahui', en xōhuēdi. Nōz quézinu' rulapa' ga bití' guza', en rutuba' ga bití' guchilja'. ²⁷ Que lē nī na', gácarō dxi'a quiu' la'tu' bunōdzju' dumí quia' lu ná'agaquiē' bōnni' ulu'gunē' le dxin, ila'guiljalēnē' le ia'lati', para cate' huōda' neda', uzi' a le nequi quia' len icja ca'." ²⁸ Ní'irō xanē' na' gudxē' nupa nacuá' nī': "Gulí'cúa dumí na' dē lu nē'ē bōnni' nī, en gulí'cú'u le lu nē'ē bōnni' na' dē queē' chí dumí." ²⁹ Nūti'tēs nu rugún tsahui' dxin le dē queē', zoa nu unōdzaj queē' ia'lati', ate' gáta'da' queē', pero nu na' bití' rugún tsahui' dxin le dē lu nē'ē, la's dui le dē queē' idúa. ³⁰ Na'a, bōnni' huen dxin bití' naca tsahui' nī, gulí'tsōjchí'una-nē' nīlō ga naca chul-la. Nī' cōdxi yéché'ē, en gagu xzea láyē'ē.

Cristo uchi'a usōrōē' quégaca bōnachi

³¹ Gunnē' ca' Jesús:

—Cate' nī huōda' neda', Bōnni' Guljē' Bōnachi, idinná bē'a, ate' dzágagaquiē' neda' yúgu'tē gubáz lá'ayi quia', ní'irō cō'a lataj tsahui' quia', ga na' uchi'a usōrō'a quégaca bōnachi. ³² Ulu'dubi dērō lahua' neda' bōnachi yōdzōlió nī, ate' ucu'a léguequi tsólá'a huéaj ca runē' bōnni' uyú bō'cu' zxila', rucu'ē-ba' tsólá'a huéajba' yugu' chivo, en yugu' bō'cu' zxila'. ³³ Yugu' bō'cu' zxila' na' ucu'ē-ba' cuita lē'ē ibēla, ate' yugu' chivo na' ucu'ē-ba' cuita lē'ē yōgōla. ³⁴ Ní'irō, neda', bōnni' unná bē', guí'a nupa nacuá' cuita lē'a ibēla, inní'a: "Gulí'dá ga zoa', libí'ili' bubéajē' Xuxa' libí'ili' quez queē'. Nequi queéli' lataj ga na' rinná bē'ē, lē na' bupé'ē queéli' dza nī'te cate' nī' benē' yōdzōlió. ³⁵ Caní nequi queéli' tu' guduna', ate' bēnnali' le gudahua'. Gubidxa' nisa, ate' bēnnali' le gu'a. Guca' ca tu bōnni' ridá zī'tu', ate' gulú'uli' neda' līdxili'. ³⁶ Biyadzaj le gácu'a, ate' bugáculi' neda' le ráculi'. Gūf'ida', ate' buduyúli' neda'. Guyu'a lidxi guíe, ate' buduyúli' neda'." ³⁷ Ní'irō ulu'bi'ē didza' bōnni' tsahui' na', ilē' neda': "Xan, ¿bátaxi bilé'etu' Lí' gudunu', ate' bugágutu' Lí'? ¿Bátaxi gubidxu', ate' bēnnatu' le gu'u? ³⁸ ¿Bátaxi bilé'etu' Lí' gudó' zī'tu', ate' gulú'utu' Lí' līdxitu'? ¿Bátaxi biyadzaj le gacu', ate' bugácutu' Lí' le rácutu'? ³⁹ ¿Bátaxi bilé'etu' Lí' gūi'inu', o guyu' u lidxi guíe, ate' buduyúli' Lí'?" ⁴⁰ Ubi'a didza' neda', bōnni' unná bē', ate' guí'a légaquiē': "Le nácatē rea' libí'ili', tu' benli' caní queē' nu bōnni' bócha'ado' nī, sal-la' náquiē' bōnni' cá'asō, quia' neda' caz benli' ca'."

⁴¹ "Ní'irō guí'a nupa nacuá' cuita lē'a yōgōla, inní'a: "Gulí'cuí'a ga zoa', libí'ili' na' nabága'li' xígua', tsōjtsázali' lu guí' na' bití' ulu, lē na' bupé'ē Dios nī'a que tu' xihui', en quéguequi gubáz dá'gaca le. ⁴² Caní gaca queéli' tu' guduna', ate' bití' bēnnali' le gahua'. Gubidxa' nisa, ate' bití' bēnnali' le guí'ja'. ⁴³ Guca' ca bōnni' ridē' zī'tu', ate' bití' gulú'uli' neda' līdxili'. Biyadzaj le gácu'a, ate' bití' bugáculi' neda' le ráculi'. Gūf'ida', enca' guyu' a lidxi guíe, ate' bití' buduyúli' neda'." ⁴⁴ Ní'irō ila'nná ca' nupa na', ilē neda': "Xan, ¿bátaxi bilé'etu' Lí' gudunu', o gubidxu', o gucu' ca bōnni' ridē' zī'tu', o biyadzaj le gacu', o gūi'inu', o guyu' u lidxi guíe, ate' bití' gúcalentu' Lí'?" ⁴⁵ Ní'irō ubi'a didza' neda', bōnni' unná bē', guí'a légaquiē': "Le nácatē rea' libí'ili', tu' cabí bi benli' que tu nu nutsa' ladaj nupa nacuá' nī, sal-la' naca cá'asō nu na', bití' bi benli' quia' neda'." ⁴⁶ Ní'irō bōnachi tuá' dō' na' la' tsōjtsázagacatē ga nī' ila'guí'i ila'záca'tica'sō, pero bōnachi tsahui' nī' gata' yōl-la' na'bán idú quéguequi.

26

Tun xtídza'gaquië' bönni' yudo' ila'zönë' Jesús

(Mr. 14:1-2; Lc. 22:1-2; Jn. 11:45-53)

¹ Cate' budxi bë'ë Jesús yugu' didza' ni, gudxë' yugu' bönni' usëda queë', ² rnnë':

—Nöz quézili' ia'chopa dza idxín Laní Pascua, ate' dza na' neda', Bönni' Guljé' Bönachi, ulu'dödë' neda' lu ná'agaca nupa ulu'dá' neda' lë'e yaga cruz.

³ Ní'irö bila'dxinë' yugu' bixúz unná bë' len yugu' bönni' yudo' usedi, en bönni' gula tu'zéajni'inë' bönachi judío, ate' bulu'dubë' ga naca lö'a lidxi bixúz lo, lë' Caifás. ⁴ Ní' gulún xtídza'gaquië' ila'zönë' Jesús, lu yöl-la' rizí' yë' quégaquië', para ilútië' Lë'. ⁵ Ta'nnë':

—Biti' gunru' lë ni dza laní, para cabi ila'dzatsa bönachi.

Tu nigula rigú'unu le rilá' zxixi icjé' Jesús

(Mr. 14:3-9; Jn. 12:1-8)

⁶ Cate' ní' zoë' Jesús lu yödzo Betania lu yu'u lidxë' Simón, bönni' na' güf'inë' huë' nudzu' ruzödi, ⁷ bidxinnu cüdzu'lë' Jesús tu nigula, nuá'anu tu böga'do' néquini guió'j nazaca', en yudzu tu le rilá' zxixi le nazáca'da', ate' gulú'unu le icjé' Jesús cate' ní' rö'ë rahuë'. ⁸ Cate' bila'lë'enë' bönni' usëda queë' Jesús lë ni, gula'lenë', ta'nnë':

—¿Bizx que réqui ditaj lë ni? ⁹ Guca nu guti' lë ni, en si' dumí zían para gácalenru' yugu' bönachi yechi'.

¹⁰ Cate' biyönnë' Jesús lë ni, rë' légaquië':

—¿Bizx que rnnëli' queënu nigula ni? Tsahui' naca le bennu quia'. ¹¹ Yugu' bönachi yechi' ila'cuá'lentica'só libí'ili', pero neda' bití' ugá'analentica'sa' libí'ili'. ¹² Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba. ¹³ Le nácatë rea' libí'ili', gátitës luyú yödzo'lió ga gaca libán que didza' dxi'a ni, lësca' ila'guixjô' bönachi le bennu nigula ni quia' para nu tsöjné' lënu.

Rizí' lu në'ë Judas udödë' Jesús lu ná'agaquië' bönni' unná bë'

(Mr. 14:10-11; Lc. 22:3-6)

¹⁴ Ní'irö guyjé' Judas Iscariote ga na' nacu'ë bixúz unná bë'. Náquië' bönni' dzáguie' chinnuë' na' dá'gaquië' Jesús, ¹⁵ ate' gudxë' légaquië':

—¿Bizxi gúnnali' quia' channö neda' udöda'-në' Jesús lu ná'ali'?

Bulu'gá'analenë' lë' tsahui' ilu'ë lë' chi uruá' dumí plata. ¹⁶ Ní'irö gusí lahuë' Judas na' risí ribö'ë udödë' Jesús lu ná'agaquië'.

Le ráguru' le rusá' ládxi'ru' ca gútië' Xanru'

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Cate' naca dza risí lo laní quégaquië' bönni' judío cate' tahuë' yöta xtila le cabí nazí'i cúa zi que, gula'bígui'ë bönni' usëda queë' Jesús ga zoë', en të' Lë':

—¿Gazxi rë'ënu' tsöjpa'atu' queëru' para ráguru'-ba' bö'cu' zxíla'do' dzö' Laní Pascua?

¹⁸ Jesús rë' légaquië':

—Guli'tséajtsöca' yödzo ni' ga na' zoë' tu bönni', en guli'guíë': "Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxíla'do' dzö' Laní Pascua."

¹⁹ Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pë'ë le ilahuë' dzö' Laní Pascua.

²⁰ Cate' chigudzo' dza na', Jesús gurö'lenë' idxinnutë' bönni' usëda queë' tahuë'. ²¹ Tsanni ní' tahuë', Jesús rë' légaquië':

—Le nácatë rea' libí'ili', tu nu nutsa' ládjali' ni udödi neda'.

²² Ní'irö bulu'huí'ini ládxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

²³ Bubi'ë didza' Jesús, rnnë':

—Bönni' ni runë' në'ë tsözxön len na'a lu yö'öna, bönni' ni udödë' neda'. ²⁴ Le nácatë neda', Bönni' Guljé' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabi guljé'.

²⁵ Ní'irö bubi'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rë' lë':

—Ön, lí' na'.

²⁶ Tsanni ní' tahuë', gudélé'ë Jesús yöta xtila, en gudxë' Dios: "Xclenu'." Ní'irö buzxuzxjé' le, en bunödzejë' quégaquië' bönni' usëda queë', rnnë':

—Guli'sí, guli'gagu. Lë ni le naca caza'. Ca bena' que yöta xtila ni rulu'i ca gaca que le naca caza'.

²⁷ Gudélë'ë ca' tu xzığa'do', en gudxë' Dios: "Xclenu'." Ní'irö bunödzejë' ca' quégauquie', rnnë':

—Guli'gui'aj yúgu'tëli'. ²⁸ Lë ni rulu'i ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi zían para gaca uniti lahuë' Dios yugu' dul-la' nabága'gauquie'. ²⁹ Rea' ca' libí'ili', bíti'rö guí'ja' xisi le ribía lubá uva ni cate' idxinrö dza ni guí'jalena' libí'ili' tu le cubi ga ni' rinná bë'ë Xuza'.

Jesús rnnë' innë' Pedro biti' núnbë'ë Lë'

(Mr. 14:26-31; Lc. 22:31-34; Jn. 13:36-38)

³⁰ Cate' budxi gulúl-lë' yöl-la' ba queë' Dios, yöjáquie' lu Guí'a Yaga Olivo. ³¹ Ní'irö Jesús rë' légaquie':

—Yúgu'tëli' gaca chopa ládxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: "Guna' ga gátie' Bönni' Uyú Bō'cu' Zxila', ate' ilásilasiba' bō'cu' zxila' na'." ³² Cate' ubana' lu yöl-la' guti, ní'irö tséaja' tsöjnörüa' loli' saca' luyú Galilea.

³³ Ní'irö bubi'ë didza' Pedro, en rë' Jesús:

—Sala' ilaca chopa ládxi'gauquie', en ulu'cá'anë' yúgu'të' Li', neda' biti' gaca chopa ládxa'a, biti' ucá'ana' Li'.

³⁴ Jesús gudxë' lë':

—Le nácatë rea' li', na'a dzö' ni, cate' si' cōdxilōba' böra, li' innó' tsonna luzuí biti' núnbë'ü neda'.

³⁵ Ní'irö Pedro gudxë' Jesús:

—Sal-la' gátiletea' Li', biti' ca' innía' biti' núnbë'a Li'.

Lësca' caní gula'nnë' yúgu'të bönni' usëda queë'.

Jesús rulidzë' Dios la' yëla Getsemaní

(Mr. 14:32-42; Lc. 22:39-46)

³⁶ Ní'irö Jesús bidxinlenë' légaquie' la' yëla Getsemaní, ate' gudxë' yugu' bönni' usëda queë' na', rnnë':

—Guli'cō'tsóca' ni tsanni tséaja' ia'lati' ní'ilö, tsöjlidza'-në' Dios.

³⁷ Jesús guchë'ë Pedro len iropë' xzfínë' Zebedeo, ate' gusí lahuë' ruhuí'innë', en risëbi ládxë'ë. ³⁸ Ní'irö Jesús gudxë' légaquie':

—Ruhuí'ini ládxa'a, en huátí caza' lu yöl-la' risëbi ladxi'. Guli'gá'ana ni, en guli'ná' yëla tsözxön len neda'.

³⁹ Gudödë' Jesús ia'lati'do' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunnë':

—Xuza', channö huáca, ben ga biti' gun bayudxi qui'i saca'a lë ni, calëga ca rë'ënda' neda', pero ca rë'ënu' Li' gunu'.

⁴⁰ Cate' budxinë' Jesús ga na' nacu'ë bönni' usëda queë', yöjxáquie' légaquie' tasië', ate' rë' Pedro:

—¿Naru' cabí gúcatsö iná' alenu' neda' tsözxön yëla tu chí'ido'? ⁴¹ Guli'ná' yëla, en buli'lidzë' Dios inábili'-në' gácalenë' libí'ili', para cabí gú'ili' Satanás tu' xihui' lataj si' bë' libí'ili' le xihui'. Bö' naca cázali' nasína'tica'sö, pero lu yöl-la' bönáchisö queëli' nacuí'di'li'.

⁴² Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga biti' qui'i saca'a lë ni, ben ca raza ládxu'u Li'.

⁴³ Cate' bōajë', leyúbölö buduxaquie' légaquie' tasië' tu' nadōdirö yëla guiōj lógaquie'. ⁴⁴ Ní'irö buca'anë' Jesús légaquie', ate' guyijë' leyúbölö, en bulidzë' Dios le bunni luzuí, ate' tuz ca gunnë' zí'alö rnnë'. ⁴⁵ Leyúbölö bōajë' ga na' nacu'ë bönni' usëda queë', en rë' légaquie':

—¿Rásitsali' na'a, en ruzi'tsö ládxi'li'? Buli'yútsōca', chibudzaga lo. Neda', Bönni' Guljë' Bönachi, chinadōda' lu ná'agaquie' bönni' dul-la'. ⁴⁶ ¡Guli'chasa, uyéajru! Buli'yútsōca', bönni' na' rudödë' neda' chibidxinë' ni.

Ta'chë'ë Jesús nadzunë'

(Mr. 14:43-50; Lc. 22:47-53; Jn. 18:2-11)

⁴⁷ Tsanni ni' ru'ë Jesús didza' ni, Judas, bönni' nabábalenë' idxinnutë' na', la' bidxintë' ni', ate' dzágagaquie' bönni' zían'lë', nuá'agaquie' guíë tuchi', en yugu' yágado'. Yugu' bixúz unná bë', en bönni' gula tu'zéajni'innë' bönachi judío nasöl-la'gaquie' légaquie'. ⁴⁸ Judas, bönni' na' rudödë' Jesús, chibuluf'innë' légaquie' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. Guli'sönë'.

⁴⁹ Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'. ⁵⁰ Jesús rë' lë':

—Bōcha'a, ¿bizxi huen zo'o ni?

Ní'irō gula'biguē'ē bōnni' na', ate' gula'zōnē' Jesús. ⁵¹ Tuē' bōnni' dzáguē' Jesús gulecjē' guié' tuchi' queē', en benē' huē', guchúguē' guídi náguē' bōnni' huen dxin queē' bixúz lo. ⁵² Jesús gudxē' lē':

—Bugú' guié' tuchi' quiu' lidxi. Yúgu'tē nupa tu'dí'ini guié' tuchi', lu guié' tuchi' ilátigaca. ⁵³ ¿Naru' cabí nōzinu' huáca ulidza' Xuza', ate' Lē' la' isöl-la'tē' zíántērō ca chinnu cō' gubáz lá'ayi le naca zían gáyu'ē tu cō' huéaj? ⁵⁴ Channō guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irō Jesús gudxē' yugu' bōnni' ni':

—¿Birúajtsali' nuá'ali' guié' tuchi', en yágado' para sōnli' neda' ca runli' rizōnli'-nē' gubán? Yugu' dza gurō'a loli' ga naca lu chila yudo', en busédigacada' bōnachi, pero biti' guzxōnli' neda'. ⁵⁶ Raca caní yúgu'tē lē' ni para udxín le nazúaj lu guichi lá'ayi, ca na' gula'nnē' bōnni' gulu'ē didza' uláz queē' Dios.

Ní'irō yúgu'tē bōnni' usēda queē' Jesús bulu'cá'anē' Lē', en bulu'zxxunnajē' ni'.

Ridxinē' Jesús lógaquiē' bōnni' yudo'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ní'irō yugu' bōnni' na' zōngaquiē' Jesús gula'chē'ē Lē', ate' bila'dxinē' lahuē' Caifás, bixúz lo, ga ni' nudúbigaquiē' ca' yugu' bōnni' yudo' usedi len bōnni' gula tu'zéajni'inē'. ⁵⁸ Pedro sōjnahuē' Jesús zí'tu' zí'tu'sō, en bidxinē' ga naca lō'a lidxi bixúz lo na', para ilē'enē' nacxi utságuē' Jesús.

⁵⁹ Yugu' bixúz unná bē' len bōnni' gula tu'zéajni'inē', en bōnni' yudo' tu'chi'a tu'sörōē', bulu'guiljē' nu uzegui Jesús didza' sal-la' si' yē'ē bōnni' na', para gaca ila'chúguē' queē' gátie'. ⁶⁰ Cuntu nu bila'dzōlinē' sal-la' bila'dxinē' bōnni' zían, en gula'nnē' queē' le cabí nácatē. Ga búdxitē bila'dxinē' chopē' bōnni', ate' lu yöl-la' rizi' yē' quégaquiē' gula'nnē' queē', ⁶¹ ta'nnē':

—Bōnni' ni gunnē': "Huaca uquínna' yudo' queē' Dios, ate' uchisa' le ia'tsonna dzasō."

⁶² Ní'irō guzuínē' bixúz lo na', en rē' Jesús:

—¿Naru' cabí rubí'tso' didza'? ¿Bizxi caz lē' ni ta'nnē' bōnni' ni quiu'?

⁶³ Jesús biti' bi gunnē'. Ní'irō bixúz lo gudxē' Lē':

—Ní'a queē' Xanru' Dios ban rinná bē'eda' Li' quíxjö'u le nácatē. Gudíxjö'i' netu' channō nacu' Li' Cristo, Zxi'inē' Dios.

⁶⁴ Jesús rē' lē':

—Ca na' rnno' naca'. Le nácatē rea' libí'ili', ilē'eli' neda', Bōnni' Guljē' Bōnachi, rō'a cuita lē' ē ibēla Dios, ga ni' dē lu na' a yöl-la' unná bē', ate' guída' lu bōaj lúxriba, en idxina' ga zóali'.

⁶⁵ Ní'irō lu yöl-la' rilē' queē' guchōzē' bixúz lo lari' nácuē', rnnē':

—¿Gunnē' zí'ē bōnni' ni queē' Dios! ¿Núzxirō naquíniru' nu innē' queē' bōnni' ni? Chibiyōn quézili' didza' zí' bē'ē queē' Dios. ⁶⁶ ¿Nacxi rusáca'li' quēē'li'?

Bulu'bi'ē didza', gula'nnē':

—Nabáguē'ē xíguia' gátie'.

⁶⁷ Ní'irō bulu'chejē' zxōna' lahuē' Jesús, en gulu'ē dō' queē'. Gula'gápē'ē ru'ē Jesús ia'zica'rē', ⁶⁸ en tē' Lē':

—¿Nácatso' Li' Cristo? Gunnēya'atsōca' na'a, ¿nuzxi na' gudapa' Li'?

Pedro rnnē': "Biti' núnbē'a-nē' Jesús"

(Mr. 14:66-72; Lc. 22:56-62; Jn. 18:15-18, 25-27)

⁶⁹ Tsanni ni' gulaca lē' na', rō'ē Pedro lō'alō, ate' bidxinnu tunu nígula huen dxin ga na' zoē', ate' rnnanu:

—Lē'sca' li' gudálenu' Jesús, bōnni' Galilea na'.

⁷⁰ Gudá'baguē'ē Pedro lógaca bōnachi nacuá' ni', rnnē':

—Biti' nōzda' nuzxi que na' ru'u didza'.

⁷¹ Cate' birúajē' Pedro ga nu riyaza lō'a, bilé'enu-nē' ia'tunu nígula, ate' gúdxinu nupa nacuá' ni':

—Bōnni' ni gudálenē' ca' Jesús, bōnni' Nazaret na'.

⁷² Leyúbölō gudá'baguē'ē Pedro, en buzōtjē' Dios, rnnē':

—Biti' ca' núnbē'a-nē' bōnni' ni.

⁷³ Íá'láti'do'os gudzé, gula'bíga' nupa nacuá' ni' ga na' zoē' Pedro, en tē' lē':

—Le nácatē li' nunu' ca' tsōzxōn légaquiē' tu' naca bē'u yöl-la' ru'isō quiu' didza'.

⁷⁴ Ní'irō gusi lahuē' Pedro ruxía dō' cuinē', en ruzōtjē' Dios, rnnē':

—Biti' ca' núnbē'a-nē' bōnni' ni.

La' ná'asō guródxitēba' bōra. ⁷⁵ Ní'irō yōjnenē' Pedro didza' gudxē' Jesús lē', gunnē': Cate' si' cōdxilōba' bōra, tsonna luzuí chigunnō' biti' núnbē'u neda', ate' burúajē' Pedro ni', en guródxí yéchi'dē'ē.

27

Tu dödö' Jesús lu në'ë Pilato

(Mr. 15:1; Lc. 23:1-2; Jn. 18:28-32)

¹ Cate' za' reni' dza na', gulún xtídza'gaquië' yúgu'tè bixúz unná bē' len bönni' gula tu'zéajni'inē' bönni' judío para ilútiē' Jesús. ² Gula'chē'ë Jesús náguē'ë, ate' bulu'dödē' Lē' lu në'ë Poncio Pilato, bönni' rinná bē'ë uláz que yödzo Roma.

Ratië' Judas

³ Cate' chinözinē' Judas, bönni' na' budödē' Jesús lu ná'agaquië' bönni' yudo', narugu queë' Jesús gátiē', bui'innē', ate' yöju'ë chi uruá' dumí plata na' lu ná'agaquië' bixúz unná bē', en yugu' bönni' gula na'. ⁴ Rē' légaquië':

—Bena' dul-la' tu' budöda'-nē' bönni' tsahui' gátiē'.

Ní'irö të' lē':

—Biti' gun lē' ni ga cō'ötu' böniga. Le ben cazu' li' na'.

⁵ Ní'irö gurú'unē' Judas yugu' dumí plata na' ga naca chila yudo', ate' buzē'ë ni', en yöjsi yenē'.

⁶ Bulu'zi'ë bixúz unná bē' yugu' dumí plata na', ta'nnē':

—Biti' sa'yéaj cú'uru' dumí ni ga rigú'uru' dumí que yudo', tu' naca lazzjē' tu bönni' ratië' bönachi.

⁷ Ní'irö gulún xtídza'gaquië', ate' gulá'uinë' dumí na' tu la' yēla queë' tu bönni' huen rö'ö para gaca ga ila'gáchē'ë bönni' zi'tu'. ⁸ Que lē' ni na', ga ridxintē' na'a dza nazí'i le lataj na', La' Yēla Rön. ⁹ Caní guca ca na' gunnē' Jeremías, bönni' bē'ë didza' uláz queë' Dios, gunnē': "Gula'guélé'ë chi uruá' dumí plata na', tsca le gula'zéqui'nē' bönni' Israel Lē', ¹⁰ ate' dumí na' gulá'uinë' la' yēla queë' tu bönni' huen rö'ö. Lē' ni buluf'inē' Xana' neda'."

Ridxinē' Jesús lahuē' Pilato

(Mr. 15:2-5; Lc. 23:3-5; Jn. 18:33-38)

¹¹ Cate' bulu'sudxinē' Jesús lahuē' Pilato, bönni' na' rinná bē'ë uláz que yödzo Roma, bönni' ni gunábinē' Jesús, rē' Lē':

—¿Nacu' Li' Bönni' inná bé'enē' bönachi judío?

Jesús rē' lē':

—Ca nácasö rño'.

¹² Cate' yugu' bixúz unná bē' len bönni' gula tu'zéajni'inē' bulu'zégui'ë Jesús didza', biti' bi didza' bubi'ë Jesús. ¹³ Ní'irö Pilato rē' Jesús:

—¿Naru' cabí riyöntsenu' cate' xö le ta'nnē' quiu'?

¹⁴ Jesús biti' bi didza' bubi'ë. Caní guca, bubábinē' bönni' unná bē' na'.

Rirugu queë' Jesús gátiē'

(Mr. 15:6-20; Lc. 23:13-25; Jn. 18:38–19:16)

¹⁵ Cate' naca dza Laní Pascua na', dē caz tu le runē' Pilato, bönni' unná bē' na', ca ta'naba bönachi rusanē' tuē' bönni' yu'ë lidxi guíë, núti'tēs nu té'eni usané'. ¹⁶ Dza na' tu bönni' nabáguē'ë xíguia', lē' Barrabás, yu'ë lidxi guíë ni'. ¹⁷ Cate' bulu'dubi bönachi zían ni', Pilato gunábinē' légaquië', rnnē': —¿Nuzzi rē'ënili' usana' queéli'? ¿Naru' Barrabás o Jesús, Bönni' na' lē' Cristo?

¹⁸ Caní gunnē' Pilato tu' réquibe'enē' bulu'dödē' bönni' yudo' Jesús lu në'ë tu' tuxzé'enē' Lē'.

¹⁹ Tsanni ni' rö'ë Pilato ga na' ruchi'a rusöröë', nigula queë' gusöl-la'nu nu tsöjödxi lē', rñna:

—Biti' bi gunu' queë' bönni' tsahui' ni, tu' gúdxide'eda' guduyēla lu yēla béchigal tu' nözinē' Lē'.

²⁰ Yugu' bixúz unná bē' len bönni' gula tu'zéajni'inē' gula'gú'u yö'l-lē'ë bönachi zían na' para ila'nabi Pilato usané' Barrabás na', ate' gútiē' Jesús. ²¹ Leyúbölö bē'ë didza' bönni' unná bē' na', rē' légaquië':

—¿Núzxilē' chopē' ni rē'ënili' usana'-nē' queéli'?

Gula'nnē':

—Barrabás.

²² Ní'irö Pilato gunábinē' légaquië', rnnē':

—¿Nacxi guna' queë' Jesús, bönni' na' lē' Cristo?

Yúgu'tē' ta'nnē':

—¡Budē'ë lē'e yaga cruz!

²³ Ní'irö bönni' unná bē' na' rē' légaquië':

—¿Bizxi dö' benē'?

Zídzajrö gulu'ë didza', ta'nnē':

—¡Budé'è lè'e yaga cruz!

²⁴ Cate' réquibe'ené' Pilato biti' birúaj xtídzé'è, pero gula'dzátsarö bönachi, ní'irö gudélé'è nisa, en gudibi në'è lógaquié', rnné':

—Biti' bi xíguia' nabága'a neda' tu' nözi yöl-la' guti queé' bönni' tsahui' ni. Le gun cázali' libí'ili' lè ni.

²⁵ Bulu'bí'i didza' yúgu'té bönachi ni, ta'nná:

—¡Yöl-la' guti queé' bönni' ni ibága'tu' netu', en ila'bagá' ca' xzí'initu'!

²⁶ Ca' guca, Pilato busané' Barrabás na' lu ná'agaquié'. Ní'irö gunná bé'ené' bönni' rójáquié' gudil-la ila'guiné' Jesús, ate' gudödi ni' budödé' Lè' lu ná'agaquié' para ulu'dé'è Lè' lè'e yaga cruz.

²⁷ Yugu' bönni' rójáquié' gudil-la nacu'è lu në'è bönni' unná bé' na' gula'ché'è Jesús lu yu'u yúlalui' nazí'i le pretorio, ate' ni' bulu'tubé' yúgu'té bönni' rójáquié' gudil-la nacu'è ni' ga na' zoé' Jesús. ²⁸ Ní'irö gula'lecjé' lari' nácué' Jesús, en bulu'gácué' Lè' tu lari' xiná chul-la, ca rácugaca nupa ta'nná bé'. ²⁹ Bulu'dxié' icjé' tu le néquini ni'a në'e yaga yötsi' le naca ca le dxia icjé' bönni' rinná bé'è, en bulu'zóé' tu guído' lu në'è ibèla le ruluí' ca tu yaga que bönni' yúlalui'. Ní'irö bulu'zóa zxi'é' lahué', en bulu'titjé' Lè', ta'nné':

—¡Bica' ba Li', rinná bé'enu' bönachi judío!

³⁰ Ní'irö bulu'chejé' Lè' zxóna', ate' bulu'guélé'è gui na', en gula'guiné' icjé'. ³¹ Gudödi bulu'titjé' Jesús, gula'lecjé' lari' na' nácué', ate' bulu'gácué' Lè' lari' que cazé'. Ní'irö gula'ché'è Lè' para tsöjdá'agaquié' Lè' lè'e yaga cruz.

Tu'dé'è Jesús lè'e yaga cruz

(Mr. 15:21-32; Lc. 23:26-43; Jn. 19:17-27)

³² Cate' ni' bila'rúajé' bönni' na', yójxáca'gaquié' Simón, tu bönni' Cirene, ate' guluné' ga bi'è yaga cruz queé' Jesús.

³³ Cate' bila'dxiné' lataj nazí'i le Gólgota, le rnna lu didza' xidza', Lataj Que Böga' Ícjaru', ³⁴ bulu'gui'jé' Jesús nupi zi nutsí'i xzí'gala'aba' böa' guixi'. Cate' buxí'i ru'è Jesús, biti' gú'unné' guí'jé'.

³⁵ Cate' chinudá'agaquié' Lè' lè'e yaga cruz, gula'guisié' lari' nácué', en bulu'quitjé' lahui le gaca bé' núzxilé' guequi queé'. Caní guca, budxín lè na' gunné' bönni' bé'è didza' uláz queé' Dios, gunné': "Gula'guisié' lari' nácué', en bulu'quitjé' lahui le gaca bé'." ³⁶ Ní'irö gula'bó'è ni', tu'yúé' Jesús. ³⁷ Lésca' bulu'zóé' lè'e yaga cruz ícjale' Jesús tu didza' le riguixjé' le nabágué'è le rnna caní: "Bönni' ni Jesús, Bönni' rinná bé'ené' bönachi judío."

³⁸ Ga ni' dé'è Jesús, bulu'dé'è ca' lè'egaca yaga cruz chopé' bönni' gubán. Tué' bulu'dé'è cuita lè'è ibèla, en ia'tué' na' cuita lè'è yögöla. ³⁹ Gula'dödé' ni' yugu' bönni' bulu'lidza zi'è Jesús, en bulu'tá ícjagaquié', tu'titjé' Lè', ⁴⁰ ta'nné':

—¡Ön, Li' na' uquínna' yudo', ate' tsonna dzasö ca' uchísatso' le! ¡Busólá cuinu' na'a channö nacu' Li' Xzí'iné' Dios! ¡Bójtatsöca' lè'e yaga cruz na'!

⁴¹ Lésca' caní bulu'titjé' Lè' yugu' bixúz unná bé' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'iné', ta'nné':

⁴² —Yugu' nu yúbölö busólé' bönni' ni, pero biti' gaca usólá cuiné'. Channö náquié' Bönni' inná bé'ené' bönachi Israel, huójtatsöquié' na'a lè'e yaga cruz, ate' tséajlé'èru' Lè'. ⁴³ Lè' buzxóni ládxé'è Dios. Dios usólá cazé' Lè' na'a channö raza ládxé'è Lè', tu' gunné': "Xzí'iné' Dios naca'."

⁴⁴ Lésca' caní yugu' bönni' gubán na' dá'gaquié' lè'egaca yaga cruz ga ni' dé'è Jesús bulu'lidza zi'è Lè'.

Ratié' Jesús

(Mr. 15:33-41; Lc. 23:44-49; Jn. 19:28-30)

⁴⁵ Cate' bidxín huagubidza, guchul-la iduté yödzölió ga bidxinté idú ridödi xihuó. ⁴⁶ Idú ridödi xihuó na', bé'è zidzaj didza' Jesús, rnné':

—Elí, Elí, ¿lama sabactani?

Didza' ni rnna lu didza' xidza': "Dios quia, Dios quia, ¿bixz que nubéaj ládxu'u neda'?"

⁴⁷ Cate' nupa nacuá' ni' bila'yóni didza' ni, ta'nná:

—Bönni' ni rulidzé' Elías, bönni' ni' bé'è didza' uláz queé' Dios.

⁴⁸ La' guxítí'té' tué' bönni' nútsé'è ládjagaquié', en gudélé'è tu le bululu rizxupi nisa, ate' buxúpiné' le nupi zi, en buzöé' le tu lu gui, ate' butságuié' le ru'è Jesús para xupé'. ⁴⁹ Ní'irö ia'zica'ré' bönni' ni' ta'nné':

—¡Gulözagarö! ¡Uyútsöca'ru' channö huidé' Elías usólé' Lè'!

⁵⁰ Leyúbölö gurödxí'è zidzaj Jesús, ate' burúajté bö' naca cazé', gútité'. ⁵¹ La' ná'asö biröza'té lari' nal-la' lu yudo', birúaj choplö, le gudela' ícjlö ga bidxinté xiní'i. Ní'irö gudödi budó' xzu', en gula'lá'a guiöj. ⁵² Gula'yala' yeru ba quégaca nupa chinátigaca, nupa ni'

gula'yéajlê Dios, ate' bulu'bán bönachi na'. ⁵³ Gudödi bubanê Jesús, bulu'rúajê bönni' na' yeru ba quégaquiê, en gula'yáziê yödzo lá'ayi Jerusalén, ga ni' bila'lê'e bönachi zían légaquiê.

⁵⁴ Ní'irö gúdxinê bönni' na' rinná bé'enê bönni' rōjáquiê gudil-la, enca' yugu' bönni' rōjáquiê gudil-la nacuá'lenê lē tu'yúé Jesús, ate' gunnê:

—Le nácatê bönni' ni' gúquiê Zxí'inê Dios.

⁵⁵ Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzê'è luyú Galilea, ate' gulunnu xichinê, gula'gú'unu le gulahuê'. ⁵⁶ Lēscá' María Magdalena, en María, xiná'agaquiê Jacobo, en José, nūtsa'gacanu ladjagacanu, ate' zóanu ca' ni' xiná'agaquiê yugu' zxi'inê Zebedeo.

Ta'gu'ê Jesús yeru ba le nadaj lē'e gu'a guiōj

(Mr. 15:42-47; Lc. 23:50-56; Jn. 19:38-42)

⁵⁷ Cate' chiridzō dza na', bidxinê José, bönni' Arimatea, tu bönni' rilē'enê yöl-la' tsahui' queê, en dē'è ca' Jesús. ⁵⁸ Bönni' ni' yōjyüê Pilato, en gunabê lataj u'è Jesús. Ní'irö Pilato gunná bē'è ulu'nōdzjê' queê Jesús. ⁵⁹ Guzxi'ê José Lē, en buchōlinê Lē tu lari' nazaca'. ⁶⁰ Ní'irö gulu'è Lē lu yeru ba cubi queê le naguidjê lē'e gu'a guiōj. Budê'è tu guiōj blaga zxon ga nu riyaza yeru ba na', ate' sōhuōjê'. ⁶¹ Gula'cuá'anu María Magdalena, en ia'tunu María ni', rō'gacanu ra' yeru ba na'.

Yugu' bönni' rōjáquiê gudil-la tapa chi'è ba queê Jesús

⁶² Cate' za' reni' ia'tú dza, gudōdi bulu'pē'è que dza lá'ayi quégaquiê bönni' judío, bulu'dubê' yugu' bixúz unná bē, en yugu' bönni' yudo' fariseo ga zoê Pilato. ⁶³ Tē Pilato:

—Bönni', rōjnetu' bi gunnê bönni' rizi' yē'è na', cate' ni' zoê nabanê, gunnê: “Cate' gaca tsonna dza ubana' lu yöl-la' guti.” ⁶⁴ Que lē ni na' gunná bē'e nupa ilún chi' i ba ni' ga idxintê dza bunni, para cabi idigaquiê bönni' usēda queê chi' i dzō'ölō, en ulu'béajê Lē. Ní'irö ilē' bönachi: “Bubanê Jesús lu yöl-la' guti.” Channō caní gaca, didza' cabi nácatê ni ilu'è güntērō huiá' dō' ca ben didza' cabi nácatê na' gulu'è zí'alō.

⁶⁵ Pilato gudxê' légaquiê:

—Ni nacu'è bönni' rōjáquiê gudil-la. Guli'ché'è queēli'. Guli'tséaj, guli'gún chi' i yeru ba na' tsa séqui'li' gunli'.

⁶⁶ Ní'irö yōjáquiê' ni', en bulu'sayjê dxi'a yeru ba na', en bulu'dē'è lē'e guiōj na' tu le gaca bē' channō isalaj, ate' bulu'cá'anê ni' bönni' rōjáquiê gudil-la ilún chi'è le.

28

Rubanê Jesús lu yöl-la' guti

(Mr. 16:1-8; Lc. 24:1-12; Jn. 20:1-10)

¹ Cate' chigudōdi dza lá'ayi quégaquiê bönni' judío, en chizá' reni' dza domingo, yōjyugacanu María Magdalena en ia'tunu María na' yeru ba queê Jesús. ² Tsárido'os gudōdi budó' zxu'. Cani guca, tu' bōjtjê tuê' gubáz lá'ayi queê Xanru' narúajê' yehua' yubá. Bidxinê ra' yeru ba na', ate' gudúé' guiōj blaga zxon na', en gurō'è lu guiōj na'. ³ Nalá' lahui gubáz lá'ayi na' ca yōsa bení, ate' zxila'do'os naca lari' nácúé'. ⁴ Cate' yugu' bönni' na' rōjáquiê gudil-la tapa chi'è yeru ba na' bila'lē'enê lē', guládxinê, en gula'zxíziê'. Gula'dzō'è lu yu, en guláquiê' ca bönni' nati caz. ⁵ Ní'irö gubáz lá'ayi na' gudxê' yugu' nigula na', rnnê:

—Biti' gádxili'. Nōzda' ruguǎljali'-nē Jesús, bönni' na' bulu'dē'è lē'e yaga cruz. ⁶ Biti' zoê' ni tu' chibubanê ca na' chigunná cazê Lē'. Guli'dá, uyuli' ga ni' gutê' Xanru'. ⁷ Guli'tséaj na'a, guli'tsōjōdxi yugu' bönni' usēda queê chibubanê Jesús lu yöl-la' guti, ate' na'a Lē cazê inōruê' lolí' saca' luyú Galilea. Ní' ulé'eli'-nē. Chigudxa' libi'ili' le gulu'è Dios lu na'a.

⁸ Ní'irö la' bulu'zá'tēnu ra' yeru ba na', tádxinu, en tu'dzéjanu, ate' carelō sōjācanu sōjtjxōi'iguequinu yugu' bönni' usēda queê'. ⁹ Tsanni ni' sōjācanu, Jesús yōjtságuiê' légaicanu, ate' rē' légaicanu:

—Padiux.

Ní'irö gula'bíga'nu ga zoê' Jesús, en bulu'nída'nu ni'è. Gula'yéaj lādxí'gacanu Lē'. ¹⁰ Ní'irö Jesús rē' légaicanu:

—Biti' gádxili'. Guli'tséaj, guli'tsōjtjxōi' i yugu' bōcha'a tsōjáquiê' saca' luyú Galilea, ate' ni' ulu'lē'enê' neda'.

Le gula'guíxjō'è yugu' bönni' rōjáquiê' gudil-la

¹¹ Tsanni ni' sōjācanu nigula na', yugu' bönni' na' rōjáquiê' gudil-la gulún chi'è yeru ba na' bulu'dxinê lu yödzo ni', ate' gula'guíxjōi'inê yugu' bixúz unná bē' yúgu'tē lē na' gulaca. ¹² Cate' chibulu tubê yugu' bönni' gula tu'zéajni'inê, gulún xtídzagaquiê'. Ní'irö bulu'nōdzjê' dumí zían quégaquiê' bönni' na' rōjáquiê' gudil-la. ¹³ Tē légaquiê':

—Caní innali': "Bila'dxinë' bönni' usëda queë' chi'i dzö'ölö, en bulu'béajë' Lë' tsanni ni' rásitu'." ¹⁴ Channö huayönnë' bönni' rinná bē'ë lë ni, netu' uzéajni'itu' lë', en guntu' ga biti' bi gunë' queëli'.

¹⁵ Ní'irö yugu' bönni' röjáquië' gudil-la na' gula'zi'ë dumí na' ate' yôjéngaquië' ca na' chinazédagaquië'. Caní guca, tu'zë' bönni' judío didza' ni ga ridxintë na'a dza.

Jesús risöl-lë'ë yugu' bönni' gubáz queë'

(Mr. 16:14-18; Lc. 24:36-49; Jn. 20:19-23)

¹⁶ Ní'irö idxinéajtë' bönni' usëda queë' Jesús yöjáquië' luyú Galilea, ate' bila'dxinë' lu guí'ado' na' chibuluí'inë' Jesús légaquië'. ¹⁷ Cate' bulu'lé'enë' Jesús, gula'yéajládxi'gaquië' Lë', pero bal-lë' gulaca chopa ládxi'gaquië'. ¹⁸ Ní'irö gubígui'ë Jesús ga na' nacu'ë, en rë' légaquië':

—Dios chinudödë' lu na'a yúgu'të yöl-la' unná bē' yehua' yubá, en luyú ni. ¹⁹ Que lë ni na', guli'tséaj, guli'tsöjsëdi yúgu'të bönachi idütë yödzölió. Buli'quíla légaquië' nisa, ugunli' dxin Lë' Dios Xuz, en Lë' Dios Zxi'ini, en Lë' Dios Bö' Lá'ayi. ²⁰ Guli'sëdi légaquië' ilunë' yúgu'të lë na' gunná bé'eda' libí'ili'. Buli'yútsöca', neda' caz zóalena' libí'ili' yúgu'të dza ga idxinrö dza údxi que yödzölió. Ca' gaca.

DIDZA' DXI'A BUZÚAJĚ' MARCOS

Libán beně' Juan, bōnni' buquilě' bōnachi nisa

(Mt. 3:1-12; Lc. 3:1-9, 15-17; Jn. 1:19-28)

¹ Cani gusi lo didza' dxi'a ca guca queē' Jesucristo, Zxi'ině' Dios.

² Budxín lě na' buzúajě' lu guichi Isaías, bōnni' bē'ě didza' uláz queē' Dios, le gunnē' Dios: Buyútsōca', risól-la'a bōnni' gubáz quia', inōruē' Lo'. Lě' upě'ě nōza ga tōdu'.

³ Yōn chi'ě tu bōnni' ulidzě' zidzaj lu lataj cá'asō, inně':

"Buli' pá'a nōza para idxín Xanru' yichaj lázxdō'oli'.

Buli'běj li yugu' nōza lasi ga tōdē'."

⁴ Cani budxín, tu' ruquilě' Juan bōnachi nisa lu lataj cá'asō, en runě' libán para ila'dila bōnachi nisa, bōnni' na' bulu'bí'i lādxi'gaquiē' para uniti lahuē' Dios dul-la' nabága'gaquiē'.

⁵ Bila'rúaj bōnachi zían yúgu'tě yōdzō luyú Judea, enca' yōdzō Jerusalén, en yōjáquiē' ga na' zoē' Juan, ate' Juan na' buquilě' légaquiē' nisa lu yegu Jordán, bōnni' na' gula'xóalépě' dul-la' nabága'gaquiē'.

⁶ Nácuē' Juan lari' néquini lítsa'ba' bōa', en núguē'ě lě'ě tu guídi. Rahuē'-ba' bōchi'zu, en re'jě' le zxixi que buzdo'. ⁷ Runě' Juan libán, rnně':

—Si' zě'ě bōnni' tōdi na'a, náparě' yōl-la' unná bē' ca neda'. Biti' naca' neda' lesaca' yéchua', para ilecja' xiráchuē' nudě'ě. ⁸ Neda' ruquilla' libí'ili' nisa, pero Lě' guně' le ruluf'isō yōl-la' ridila nisa ni, uchíziē' libí'ili' Dios Bō' Lá'ayi.

Ridilě' Jesús nisa

(Mt. 3:13-17; Lc. 3:21-22)

⁹ Tu dza ni' birúajě' Jesús yōdzō Nazaret luyú Galilea, ate' Juan na' buquilě' Lě' nisa lu yegu Jordán. ¹⁰ Cate' burúajě' Jesús lu nisa, la' ná'asō bilé'eně' guyalaj lúzxiba, en ruhuōjtjě' Dios Bō' Lá'ayi, ruluf'i cuinē' ca tuba' gu'dōdo', en bidisóaleně' Lě'. ¹¹ Biyōn chi'i nu ruí'i didza' yehua' yubá, rnná:

—Li' nacu' Zxf'ina'. Nadxf'ida' Li', en raza lādxa'a Li'.

Rě'eni tu' xihui' gun ga ibáguē'ě Jesús dul-la'

(Mt. 4:1-11; Lc. 4:1-13)

¹² Ní'irō Dios Bō' Lá'ayi guchě'ě Jesús bayudxi lu lataj cá'asō. ¹³ Guzōē' Jesús lataj cá'asō na' idú choá' dza, ate' gu'uni Satanás tu' xihui' gun ga ibáguē'ě Jesús dul-la'. Guzōē' Jesús ga ní' ta'daba' bōa' guixi' dzō'ōba' gu'ado'. Yugu' gubáz lá'ayi queē' Dios gulácaleně' Jesús, en gula'gu'ě le gudahuē'.

Rusédině' Jesús bōnachi luyú Galilea

(Mt. 4:12-17; Lc. 4:14-15)

¹⁴ Gudōdi gula'gu'ě Juan na' lidxi guíē, sa'yéajě' Jesús luyú Galilea. Runě' libán ni' que didza' dxi'a ca rinná bē'ě Dios. ¹⁵ Cani rnně':

—Chibidxín dza. Chizóa idinná bē'ě Dios. Buli'bí'i lādxi'li', en guli'tséajlě' didza' dxi'a ni.

Rulidzě' Jesús tapě' bōnni' uzxōn bōla

(Mt. 4:18-22; Lc. 5:1-11)

¹⁶ Tsanni ni' ridě' Jesús ra' nísado' luyú Galilea, bilé'eně' Simón len Andrés, bōnni' bōchě'ě Simón na'. Nácagaquiē' uzxōn bōla, en ta'chiljě' yōxaj bōla quégaquiē' lu nisa na'. ¹⁷ Jesús gudxě' légaquiē', rnně':

—Guli'dutá' neda', ate' guna' ga ichě'ēli' bōnachi quia' neda', gunli' ca runli' rizōnli'-ba' bōla.

¹⁸ La' bulu'cá' anatē' yōxaj quégaquiē', en sōjácaleně' Jesús.

¹⁹ Gudōdē' Jesús ia'láti'do' ní'lō, ate' bilé'eně' Jacobo, en Juan, yugu' zxf'ině' Zebedeo, nacu'ě lě'e bárcodo' quégaquiē', tu'úně' yōxaj bōla quégaquiē'. ²⁰ Jesús la' bulidztě' légaquiē', ate' bulu'cá'aně' xúzgaquiē' Zebedeo, dzáguíē' yugu' huen dxin queē' lě'e bárcodo' na', ate' sōjácaleně' Jesús.

Tu bōnni' yu'u lě' bō' xihui'

(Lc. 4:31-37)

²¹ Bila'dxině' Jesús, en yugu' bōnni' dá'gaquiē' Lě' lu yōdzō Capernaum. Cate' ni' naca dza lá'ayi quégaquiē' bōnni' judío, guyáziē' Jesús yu'u ga tu'dubě' bōnni' judío, en tu'sédě' queē' Dios, ate' gusi lahuē' rusédině' nupa nudúbigaca ni'. ²² Bulu'bánině' ca na' rusédině' Jesús, tu' rusédině' ca runě' tu bōnni' dē lu nē'ě, en calēga ca tuně' bōnni' yudo' usédi. ²³ Zóatě' ca' tu

bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' gurödx'i'ë bönni' na', rnnë':

²⁴—¿Bixzi rál-la'tu' quiu', Jesús, bönni' Nazaret? ¿Za'tsu' usunítu' netu'? Núnbë'a Li', nacu' Bönni' Lá'ayi queë' Dios.

²⁵Jesús buzenë' le bach, rnnë':

—Busayaj ru'u, en burúaj lu bönni' ni.

²⁶Ní'irö bö' xihui' na' buxízida' bönni' na' yu'u lë', ate' gurödx'i'a zidzaj, en la' burúajtë.

²⁷Bulu'bánni' yúgu'të bönni' nacu'ë ni', ate' gula'nabi luzë'egaquíë', ta'nnë':

—¿Bixzi caz lë' ni? ¿Naru' nácatsó xibá cubi? ¡Len yöl-la' unná bë' rinná bë'enë' yugu' bö' xihui', ate' tun ca rnnë'!

²⁸La' guzëtë didza' que yöl-la' huáca queë' Jesús, ate' bila'yöni bönachi idütë luyú Galilea na'.

Ruúnë' Jesús xiná'anú nigula queë' Pedro

(Mt. 8:14-15; Lc. 4:38-39)

²⁹Ní'irö burúajë' Jesús lu yu'u ga na' tu'dubë' tu'sëdë' queë' Dios, en la' guyéajlentë' Jacobo, en Juan, ate' bila'dxinë' lódxigaquíë' Simón, en Andrés. ³⁰Ní' dënu xiná'anú nigula queë' Pedro, yú'unu tu xilá. La' gula'guíxjöi'itenë' Jesús ca raca queënu. ³¹Ní'irö gubígu'i'ë Jesús, ate' gudélë'ë ná'anú, en guchisë'-nu. La' burúajtë tu xilá na' yú'unu, ate' bupá'anú le gulahuë'.

Ruúnë' Jesús zían nupa te'e

(Mt. 8:16-17; Lc. 4:40-41)

³²Cate' chiridzö', ca gudxía gubidza, la' dujuá'gacaté' yúgu'të nupa te'e, en yugu' bönni' yu'u légaquíë' bö' xihui' ga zoë' Jesús. ³³Yúgu'të bönachi lu yödzö bila'guíró ga nu riyaza yu'u ga na' zoë' Jesús. ³⁴Jesús bunë' zían nupa te'e, naca zían yödzöhuë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë' bö' xihui' na' tu' núnbë'gaca Lë' Nu náquíë'.

Runë' libán Jesús luyú Galilea

(Lc. 4:42-44)

³⁵Zí'acado' guyasë' Jesús, ní' naca chul-la. Burúajë' yödzö na', en sa'yéajë' tu lataj cá'asö, ate' ní' bulidzë' Dios. ³⁶Simón, en nupa nacuá'len lë' söjdíljagaquíë' Jesús. ³⁷Cate' yójxáca'gaquíë' Lë', té' Lë':

—Yúgu'të bönachi tu'guílaj Li'.

³⁸Ní'irö Jesús gudxë' légaquíë', rnnë':

—Uyéajru' yugu' dzaga yödzö, para guna' ca' libán ní'. Que lë ni na' birúaja'.

³⁹Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sëdinë' queë' Dios, ate' rubéajë' bö' xihui' yú'ugaca bönachi.

Tu bönni' ré'enë' huë' nudzu' ruzödi

(Mt. 8:1-4; Lc. 5:12-16)

⁴⁰Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxi'bë', en gúta'yuë' lahuë', rnnë':

—Channö rë'ënu', huáca unu' neda'.

⁴¹Jesús buéchi' lódxë'ë lë'. Bulí në'ë, gudanë' lë', en gudxë' lë':

—Rë'ënda'. Chinuhuóácu'.

⁴²Ca gunné' ca', la' bunítitë huë' ré'enë', en böáquíë' dxi'ado'. ⁴³Ní'irö Jesús buzenë' bach bönni' na', en la' busól-la'të' lë'. ⁴⁴Caní gudxë' lë':

—Cuntu nu guío' ca bena' quiu', pero guyéaj, yójlu'i' cuinu' lahuë' bixúz, en yöjnödzej para le böácanu' li' que yudo' ca na' gunná bë'ë Moisés, lë' na' ulu'i' bönachi chinuhuóácu'.

⁴⁵Burúajë' bönni' ní', en gusi lahuë' riguíxjöi'inë' bönachi zían ca guca queë'. Tu' buzë' didza' ní', bítirö guca tsázië' Jesús yálajdo' tu lu yödzö, pero guzóasë' ní'ilo gapa naca lu lataj cá'asö. Bönachi yúgu'të yödzö bila'dxin ga na' zoë' Jesús.

2

Bönni' ré'enë' huë' nací'unië' bin

(Mt. 9:1-8; Lc. 5:17-26)

¹Cate' chigudödi chopá tsonna dza, buázië' Jesús yödzö Capernaum, ate' guzé didza' zoë' yu'u. ²La' bulu'dúbitë bönachi zían ga na' zoë' Jesús, ga bidxintë bítirö guzxequí' ila'cuá' ní', ní' ra' yu'u, ate' Jesús benë' libán que xtídzë'ë lógaquíë'. ³Ní'irö bila'dxinë' ga na' zoë' Jesús tapë' bönni', nuá'agaquíë' tu bönni' huë' nací'unië' bin. ⁴Biti' guca ila'dxinë' lahuë' Jesús tu' nacuá' bönachi zían ní'. Que lë ni na' gula'saljë' ícjo'olö ca dödílo ga zoë' Jesús. Cate' budxi

bulu'dxiñe' yeru na', ni' bulu'zõtjê' le denê' bõnni' huê' na'. ⁵ Cate' gúquibe'enê' Jesús ca na' ta'yéajlê' Lê', gudxê' bõnni' huê' na':

—Zxi'ina', chibunít lahua' li' ca naca dul-la' nabágu'u.

⁶ Rõ'õgaquiê' bal-lê' bõnni' yudo' usedi ni'. Ta'zá' ládxi'gaquiê', ta'nnê': ⁷ ¿Bizx que ru'ê caní didza' bõnni' ni? Rucá'anê' cá'asõ Dios. Cuntu nu bõnni' gaca uniti lahuê' dul-la'. Tuzê' Dios gaca gunê' lê ni. ⁸ La' gúquibe'etenê' Jesús le ta'zá' ládxi'gaquiê', ate' gudxê' légaquiê':

—¿Bizx que rizá' ládxi'li' caní? ⁹ Biti' naca bõniga nu guiê'sõ bõnni' huê' ni chibunít lo dul-la' nabáguê'ê, pero naca bõniga nu gun ga huóásê', en u'ê le denê', en uzê'e ni'ê. ¹⁰ Guna' le gaca bê' neda', Bõnni' Guljê' Bõnachi, dê lu na'a luyú ni uniti lahua' dul-la' nabága'gaca bõnachi.

Ní'irõ Jesús gudxê' bõnni' huê' na':

¹¹ —Li' rea': Guyasa. Buá' le denu', en bõaj lidxu'.

¹² La' guyásatê' bõnni' huê' na', bu'ê le gúti'nê', en burúajê' lógaca yúgu'tê nupa nacua' ni'. Bulu'bánninê' yúgu'tê', en gula'gu'ê Dios yól-la' ba, ta'nnê':

—Catu caz rilé'etu' le caní.

Jesús rulidzê' Leví

(Mt. 9:9-13; Lc. 5:27-32)

¹³ Burúajê' Jesús yõdzõ Capernaum, na' gudödê' leyúbölõ ra' nísado'. Bulu'dubi bõnachi zían ga zoê' Jesús, ate' Lê' busédinê' légaquiê'. ¹⁴ Cate' ridödê' Jesús ni', bilé'enê' Leví, zxf'inê' Alfeo, rõ'ê ga ruquíxjê' uláz que yõdzõ zi'tu'. Jesús gudxê' lê':

—Gudá' neda'.

La' guyásatê' Leví na', sa'yéajlenê' Jesús.

¹⁵ Gudödí guca lê ni, rõ'ê Jesús rahuê' lu yu'u lidxê' Leví na', ate' zían bõnni' uquíxaj, en ia'bal-lê' bõnni' cá'asõ rõ'õlengaquiê' tsõzxõn Jesús, en yugu' bõnni' usêda queê'. Caní guca, tu' røjaca bõnachi zían len Jesús. ¹⁶ Cate' yugu' bõnni' yudo' usedi, en yugu' bõnni' yudo' fariseo, bila'lê'enê' Lê' rõ'ê ráguilenê' tsõzxõn yugu' bõnni' uquíxaj, en ia'bal-lê' bõnni' cá'asõ, gulê' yugu' bõnni' usêda queê' Jesús, ta'nnê':

—¿Bizxi caz runtse'¿ ¿Rê'aj ráguilentse' yugu' bõnni' uquíxaj, en ia'bal-lê' bõnni' dul-la'!

¹⁷ Biyõnnê' Jesús didza' ni tu'ê, en gudxê' légaquiê':

—Nupa nacua' dxi'a bití' naquíniguequi nu un bõnachi, pero nupa te'e naquíniguequi nu un bõnachi. Za'a neda', calêga dulídzagaca' bõnachi tsahuí', pero rulídzagaca' bõnachi dul-la' para ulu'bí'i ládxi'gaca.

Ru'ê Jesús didza' que yól-la' run gubasa

(Mt. 9:14-17; Lc. 5:33-39)

¹⁸ Tu dza ni' tunê' gubasa bõnni' dá'gaquiê' Juan, en bõnni' dá'gaquiê' yugu' bõnni' yudo' fariseo, ate' bila'dxin nupa gula'nabi Jesús, ta'nná:

—¿Bizx que tunê' gubasa bõnni' dá'gaquiê' Juan, en bõnni' dá'gaquiê' yugu' bõnni' yudo' fariseo, pero bõnni' dá'gaquiê' Li' bití' tunê' gubasa?

¹⁹ Bubi'ê didza' Jesús, rê' légaquiê':

—¿Naru' réquitseli' ilún gubasa nupa nacua' laní queê' bõnni' rutsaga nê'ê tsanni ni' bõnni' na' rutsaga nê'ê zóalenê' légaquiê'? Tsanni ni' bõnni' na' rutsaga nê'ê zóalenê' légaquiê', bití' gaca ilunê' gubasa. ²⁰ Idxín dza cate' udúê' bõnni' na' rutsaga nê'ê, en bítí'rõ sóalenê' légaquiê', ate' dza ní'irõ ilunê' gubasa.

²¹ 'Cuntu nu bõnni' udê'ê tu lari' cúbido' lu lari' chinatêbi, tu' utsupí' lari' cubi na', en huachõza' lari' tēbi na', ate' huarõza'rõ lari' tēbi na'. ²² Lêsca' caní cuntu nu bõnni' quê'ê xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

Bõnni' dá'gaquiê' Jesús ta'lecjê' do dza lá'ayi

(Mt. 12:1-8; Lc. 6:1-5)

²³ Tu dza lá'ayi quégaquiê' bõnni' judío, gudödê' Jesús gapa dê yõla xzoa' xtila, ate' bõnni' usêda queê' gula'sí lógachiê' ta'lecjê' do ga dxía xzoa' xtila. ²⁴ Ní'irõ bõnni' yudo' fariseo gulê' Jesús, ta'nnê':

—Buyútsõca'. ¿Bizx que tunê' bõnni' dá'gaquiê' Li' le cabí ral-la' gunru' dza lá'ayi?

²⁵ Jesús gudxê' légaquiê':

—¿Naru' cabí nulábanilí' ca benê' David cate' gudunê'? Biyadzaj le ilahuê' lê', en nupa nacua'len lê' ²⁶ ate' guyáziê' lu yu'u queê' Dios cate' ni' náquiê' bixúz lo Abiatar, en gudahuê' yõta xtila tu'cu'ê lahuê' Dios, lê na' bití' dê lataj nu gagu, pero tuz bixúz dê lataj ilahuê' le. Bê'ê ca' le ilahuê' bõnni' nacua'lenê' lê'.

²⁷ Ní'irõ Jesús gudxê' légaquiê':

—Dios benë' dza lá'ayi le ulu'zí' xibé bönachi, calëga benë' bönachi para ilün chi'i dza lá'ayi.
 28 Que lê ni na', neda', Bönni' Guljê' Bönachi, naca' Xani dza lá'ayi.

3

Ruünë' Jesús tu bönni' narequi' në'ë

(Mt. 12:9-14; Lc. 6:6-11)

¹ Leyúbölö guyu'ë Jesús tu lu yu'u ga tu'dubë' tu'sédë' bönni' judío queë' Dios, ate' zoë' ca' ni' tu bönni' narequi' në'ë. ² Bönni' yudo' nacu'ë ni' tu'yúë' Jesús channö ünë' bönni' na' dza lá'ayi, tu' t'ënnë' ulu'zégui'ë Lë' didza'. ³ Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

⁴ Jesús gunábinë' bönachi ni', rnnë':

—¿Naru' dë lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöl-la' na'bán o usunitiru' le?

Gula'cuá' dxisö bönachi ni'. ⁵ Ní'irö len yöl-la' rilé queë', buyúë' Jesús bönachi na' nacuá' gásibi'ilë'. Ruhui'innë' tu' nácagaquië' zidi ladxi'. Gudxë' bönni' na' narequi' në'ë, rnnë':

—Buli no'o.

Ní'irö buli në'ë bönni' na', ate' böacaté dxi'ado' në'ë. ⁶ Ní'irö bulu'rúajë' bönni' yudo' fariseo, ate' la' guluntë' tsözxón didza' len bönni' dá'gaquië' Herodes bi ilünë' queë' Jesús, para ilutië' Lë'.

Tu'dubi bönachi zían ra' nísado'

⁷ Buzë'ë Jesús ni' tsözxón len bönni' dá'gaquië' Lë', en bidxinë' ra' nísado', ate' sōjácalen Lë' bönachi zían narúajgaca luyú Galilea, en luyú Judea. ⁸ Bönachi zían narúajgaca Jerusalén, en luyú Idumea, en ia'tsölá'a yegu Jordán, en yugu' yödzö nacuá' idú gásibi'ilö ga nacuá' yödzö Tiro, en yödzö Sidón bila'dxin ca' ga zoë' Jesús. Caní gulunë', tu' bila'yönnë' ca nácagaca yugu' le zxón runë' Jesús. ⁹ Que lê ni na' Jesús gunná bé'enë' bönni' dá'gaquië' Lë' ulu'cóztica'së' tu bárcodo' ga gaca cuenë', para cabí ulu'quí bönachi zían na' Lë'. ¹⁰ Caní guca tu' chibunë' zían nupa te'e, ate' bila'guirö bönachi zían na' ga zoë' para ila'gán Lë'. ¹¹ Cate' bö' xihui' yú'ugaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bödxí'a, ta'nná: —Nacu' Li' Zxi'inë' Dios.

¹² Jesús buzenë' le bach bö' xihui' na', cabí ila'guixjō' nu náquië' Lë'.

Riböë' Jesús chinnu bönni' ilácagaquië' gubáz queë'

(Mt. 10:1-4; Lc. 6:12-16)

¹³ Ní'irö gurenë' Jesús tu lu guí'ado', ga ni' bulidzë' nupa rë'ënë'. Gula'biguë'ë bönni' ni gásibi'ilë'. ¹⁴ Jesús bucu'ë chinnuë' bönni' ni, para ila'cuá'lenë' Lë', en para isöl-lë'ë légaquië' tsöjéngaquië' libán. ¹⁵ Budödë' lu ná'agaquië' yöl-la' huáca ulu'ünë' nupa te'e, en ulu'béajë' bö' xihui' yú'ugaca bönachi. ¹⁶ Caní nácagaca lágaquië':

Simón, (buzóë' Jesús ia'tú lë', Pedro),

¹⁷ Jacobo,

Juan, (bönni' böchë'ë Jacobo, ate' nácagaquië' zxi'inë' Zebedeo. Chopë' ni, Jesús buzóë' ia'tú lágaquië', Boanerges, le rnna lu didza' xidza': Bönni' sinia' ca guziú'),

¹⁸ Andrés, Felipe, Bartolomé, Mateo, Tomás,

Jacobo, (zxi'inë' Alfeo),

Tadeo,

Simón, (bönni' ru'í láchxë'ë yödzö queë'),

¹⁹ Judas Iscariote, (bönni' udödë' Jesús lu ná'agaquië' bönni' ilutië' Lë').

Yugu' bönni' yudo' ta'nnë': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u. ²⁰ Leyúbölö bila'guirö bönachi zían ga zoë' Jesús, ate' bití'rö guta' lataj bi ilahuë' Jesús, en bönni' na' dá'gaquië' Lë'. ²¹ Cate' dí'a dza queë' Jesús bila'yönnë' ca raca queë', bila'dxinë' ni' para ulu'ché'ë Lë', ta'nnë': Richixi icjê'.

²² Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

²³ Ní'irö Jesús bulidzë' yugu' bönni' yudo' usedi na', en bucúdu'ë didza', rnnë':

—¿Naru' ubéaj la' cuinsi Satanás tu' xihui'? ²⁴ Channö ila'rúaj choplö bönachi tu yödzö, en ila'díl-lalen luz'eguequi, bití' gaca idía' yödzö na'. ²⁵ Lësca' caní channö ila'rúaj choplö bönachi nacuá' tu yu'u, en ila'díl-lalen luz'eguequi, bití' gaca ila'día' bönachi nacuá' yu'u na'.

²⁶ Que lê ni na', channö Satanás tu' xihui' tá'baga' luzë'e, narúajgaca choplö bö' xihui'. Bití' gaca idía' yöl-la' unná bë' que, pero chizóa údxi que.

²⁷ 'Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequi' cuéaj le dzö'ö lidxë'.

²⁸ 'Le nácatë rea' libí'ili': Dios gaca uniti lahuë' bönnachi ca naca yúgu'të dul-la' nabága'gaca, en ca naca yúgu'të didza' schanni' ta'nná, ²⁹ pero nútí'tës nu innë schanni' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

³⁰ Caní gunnë Jesús tu ta'nnë' queë' bönni' yudo' usedi na', ta'nnë':
—Tu' xihui' dzaga Lë'.

Nu naca xinë'ë Jesús, en bönni' böchë'ë

(Mt. 12:46-50; Lc. 8:19-21)

³¹ Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë lö'alö, en gula'söl-lë'ë nu tsöjlidza Jesús. ³² Bönnachi zían na' rō'gaca cuitë' Jesús gulë' Lë', ta'nná:

—Yugu' bönni' böchu'u, enca' xinó'o nacu'ë lö'alö, tu'lidzë' Lì'.

³³ Bubi'ë didza' Jesús, gudxë' légaquië':

—¿Nuzxi caz na' xíná'a, en nupxi caz yugu' bönni' böcha'a?

³⁴ Ní'irö buyúë' nupa na' rō'gaca gásibi'ilë', rnnë':

—Buli'yútsöca'. Nupa ni nácagaca ca xíná'a, en yugu' bönni' böcha'a. ³⁵ Nu run ca rë'ënë' Dios, nu ni naca ca bi'i böcha'a, en bi'i zana' enca' xíná'a.

4

Rucúdzu'ë didza' Jesús ca naca queë' bönni' guz

(Mt. 13:1-9; Lc. 8:4-8)

¹ Leyúbölö gusí lahuë' Jesús rusédinë' bönnachi ga naca ra' nísado'. Bulu'dubi bönnachi zían ga zoë', ate' gurenë' Jesús tu lë'e bárcodo' zxoá lu nisa na', en gurö'ë ni', ate' yúgu'të bönnachi na' gula'cuá' luyú ra' nisa na'. ² Zían le busédinë' Jesús légaquië', bucúdzu'ë didza'. Tsanni ni' rusédinë' légaquië', rnnë':

³—Gulí'zé nágalí' didza' ni. Birúajë' tu bönni' guz, söjësië' xisedo'. ⁴ Tsanni ni' rúsië', gulasí bal-la xisedo' na' ra' nōza, ate' bila'dxinba' biguínmido', gulë' ajba' le. ⁵ Gulasí ía'bal-la xisedo' na' ga rō'ö guíöj ga bití' rō'ö yenni' yu. Bayón gula'lén xisedo' na' tu' cabí rō'ö yenni' yu. ⁶ Ní'irö cate' gulén gubidza, buquexu' le, ate' gubidxi, tu' cabí nun luí ga rë'. ⁷ Gulasí ía'bal-la xisedo' na' ga tu'lén lubá yōtsi'. Cate' gula'lén xisedo' na', bulu'lén ca' lubá yōtsi' na', en gula'rōli le, ate' lë na' bēsīë' bití' bi bunōdzaj. ⁸ Gulasí ía'bal-la xisedo' na' ga naca luyú bēbu, ate' gula'zōñ, en xitsá' ra' gula'bō'. Bulu'nōdzaj lë na' bēsīë'. Tu dxigu' xisedo' na' bēsīë' bunōdzaj ía'chí uruá' xisedo' ca'. Ía'tú bunōdzaj ía'tsónnalalaj ca', ate' ía'tú na' bunōdzaj ía'tú gayuá' ca'.

⁹ Ní'irö Jesús gudxë' légaquië', rnnë':

—Nu zoa nagui, en riyōni ral-la' uzë nagui.

Rigúxjö'ë Jesús bizx que rucúdzu'ë didza'

(Mt. 13:10-17; Lc. 8:9-10)

¹⁰ Cate' chibugá'anë' tuzë' Jesús, bila'dxín nupa dá'gaca Lë' ga zoë', núngaca tsözxōñ idxínnutë' bönni' usëda queë', ate' gula'nábinë' Lë' bi sa'yéaj lë na' bucúdzu'ë didza'. ¹¹ Jesús gudxë' légaquië', rnnë':

—Libí'ili' nadéli'li' tséajni'ili' le nagachi' ca rinná bē'ë Dios, pero nupa na' bití' nácagaca tuz len rë'u, ru'ílena' légaquië' didza' yugu' le rucúdzu'a didza'. ¹² Caní runa' para gaca lë na' nazúaj lu guichi lá'ayi, rnna:

Ulu'yúë', en bití' íla'lé'enë'.

Ulu'zë nágagaquië', en bití' ía'yéajni'inë'.

Bití' ulu'bí'í ládxi'gaquië' para gaca uniti lahua' légaquië' ca naca dul-la' nabága'gaquië'.

Rigúxjö'ë Jesús le bucúdzu'ë didza'

(Mt. 13:18-23; Lc. 8:11-15)

¹³ Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdzu'a didza'? ¿Nacxi caz gaca tséajni'ili' ía'zica'rö le ucúdzu'a didza'? ¹⁴ Bönni' guz na' náquië' nu ruzé xtídzë'ë Dios.

¹⁵ 'Nácagaca bal-la bönnachi ca xisedo' na' gulasí ra' nōza. Ta'yōnnë' xtídzë'ë Dios, en ca ta'yōnisinë' ca', la' za'të Satanás tu' xihui', en rigúa didza' na' bidxín lu ícja ládxi'do'gaquië'.

¹⁶ 'Nácagaca ía'bal-la bönnachi ca xisedo' na' gulasí ga rō'ö guíöj. Ta'yōnnë' didza' na', ate' len yöl-la' rudzeja quégaquië' ta'zi'ë le. ¹⁷ Bití' riyaza ícja ládxi'do'gaquië', ate' tu chí'isö ta'dë'ë le. Cate' bi' raca quégaquië', o zoa nu ribía ládxi' légaquië' tu' ta'dë'ë didza' na', la' tu'huōatë ládxi'gaquië'.

¹⁸ 'Nácagaca ía'bal-la bönnachi ca xisedo' na' gulasí ga na' tu'lén lubá yōtsi'. Ta'yōnnë' didza' na', ¹⁹ pero tufí ládxi'gaquië' le nácagaca que yōdzōlió ni. Nazi' yé'eguequinë'

tu' nadxí'iguequiné' yugu' yöl-la' tsahui', en ta'zê lădxí'gaquié' yugu' le dē. Ta'yaza icja lădxí'do'gaquié' yúgu'tē lē ni, en tu'suniti didza' na', para cabí gun dxin lu icja lădxí'do'gaquié'.

²⁰ Năcagaca ia'bal-la bônachi ca xisedo' na' gulasi ga naca luyú bēbu. Ta'yönnē didza' na', en ta'zi' lu ná'agaquié' le, ate' run dxin lu icja lădxí'do'gaquié'. Năcagaca bal-la bônachi caní ca xisedo' na' bulu'nôdzaj ia'chí uruá huéaj. Năcagaca ia'bal-lē ca xisedo' na' bulu'nôdzaj ia'tsónnalalaj ca', ate' năcagaca ia'bal-la bônachi ca xisedo' na' bulu'nôdzaj ia'tú gayuá' ca'.

Rucúdu'ē didza' Jesús que tu le rigú'u bení

(Lc. 8:16-18)

²¹ Jesús gudxé' ca' bônni' dá'gaquié' Lē, rnnē':

—¿Naru' rigála'ru' guí, ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu' u bení'. ²² Yúgu'tē le nagachi' ilá' lahui, ate' yúgu'tē le raca balándo'os ila'rúaj ga liná'. ²³ Nu zoa nagui, en riyóni ral-la' uzé nagui.

²⁴ Gudxé' ca' légaquié':

—Gulí'gú' lădxí'li' le riyónili'. Ca naca le ruríxili', la' leze urixé' Dios queéli', ate' gunné' queéli' ia'lati'. ²⁵ Nu nazí'i le za' que, gu'ē que ia'lati', pero nu bití' nazí'i le, la's dui le dē que, udúa.

Rucúdu'ē didza' Jesús ca rizxôn zxoa' xtila

²⁶ Gunné' ca' Jesús:

—Ca raca ni le rinná bē'ē Dios naca ca raca cate' ruchejé' tu bônni' zxoa' xtila lu yu. ²⁷ Chí'i dzó'öló rásíē', en riyasé' cate' za' rení'. Ta'lén zxoa' xtila na', en ta'zxón, pero bití' nōzinē' lē' nacxi raca ta'zxón. ²⁸ La' cuinsi luyú na' ruxón le nadúzgaca luyú na', zí'aló xiyazi, ní'iró za' do que, en tōdi na' cuía xui'i nál-la lu do que. ²⁹ Cate' chinal-la xui'i na', la' tséajtē' tsójchibē' do na' tu' chibidxín dza uzi'ē xui'i.

Rucúdu'ē didza' Jesús ca raca que xisé mostaza

(Mt. 13:31-32; Lc. 13:18-19)

³⁰ Gunné' ca' Jesús:

—¿Bizxi caz innaru' ca raca ni le rinná bē'ē Dios? ¿Bizxi ucúdu'ru' didza' ca raca? ³¹ Raca ca raca que tu xisedo' mostaza. Cate' riyaza luyú naca tu xisedo' năcatērō cuidí' ca yúgu'tē xisedo' dzó'ō luyú, ³² pero cate' chinadúz, rilén, en rizxóntērō ca yúgu'tē guixi' cuan rō'gaca luyú. Tsca run yana' ní'a nē'e, gaca ila'dxinba' biguinnido', en ulu'dxiaba' xicá'agacaba' lu zxul-la que.

Ca rugunē' dxin Jesús le rucúdu'ē didza'

(Mt. 13:34-35)

³³ Caní guca, busédinē' Jesús légaquié', en zianró ca' le bucúdu'ē didza' tsca guca ila'yéajni'inē'. ³⁴ Yúgu'tē didza' bē'lenē' bônachi bucúdu'ē didza', ate' yúgu'tē didza' ni buchila lá'anē', buzéajni'inē' légacasē' bônni' usēda queē'.

Jesús ribequi dxiē' bō' budunu'

(Mt. 8:23-27; Lc. 8:22-25)

³⁵ La' dza ná'asō, cate' ridzō', Jesús gudxé' yugu' bônni' dá'gaquié' Lē, rnnē':

—Tōditsōca'ru' ia'tsölá'a nísado' ni.

³⁶ Ní'iró bulu'lá'alēnē' bônachi zían nacuá' ni', ate' bulu'sē'ē bārcodo' ga na' chizóasē' Jesús. Gula'cuá' ca' ni' ia'zica'rō bārcodo' sōjácālen légaquié'. ³⁷ Gusí lo recja bō' budunu' lu nisa na', ate' gudá'a nisa lē'e bārcodo' na'. Ca' guca, zeaj ridzá' nisa lē'e bārcodo' na'. ³⁸ Dē' rásíē' Jesús lu xicúguē' ga naca xitsá'alō lē'e bārcodo' na', ate' bulu'subanē' Lē'. Tē' Lē':

—¡Bónni' Usedi! ¿Naru' cabí ruí'i lădxí'tso' netu'? ¡Huáti caztu' lu nisa ni!

³⁹ Ní'iró guyasē' Jesús, en gunná bē'enē' bō' na' recja, gunné':

—Gurō'ō dxi.

Gudxé' ca' nisa na', gunné':

—Dxisō guzóa.

Gurō'ō dxi bō' na' guyecja, en guzóa dxi lu nísado' na'. ⁴⁰ Ní'iró Jesús gudxé' yugu' bônni' dá'gaquié' Lē', rnnē':

—¿Bizx que radxi ridzōbili' caní? ¿Naru' cabí réajlē'ēli' Dios?

⁴¹ Ní' tădxinē' gulē luzē'ē tuē' ia'túē':

—¿Nuzxi caz bônni' ni? ¡Tun bō' recja, en nísado' ca rnna xtídzē'ē!

Bónni' Gadara yu'u bō' xihui' lē'

(Mt. 8:28-34; Lc. 8:26-39)

¹ Ní'irō bila'dxinē' Jesús, en yugu' bōnni' dá'gaquiē' Lē' ia'tsōlā'a nísado' ga naca lu xiyúgaca bōnachi Gadara. ² Cate' burúajē' Jesús lē'e bárcodo' na', tu bōnni' rirúajē' zzan bulóaj ga nacuá' yeru ba la' dutsáatē' Lē'. Bōnni' ni yu'u bō' xihui' lē', ³ ate' nun xilatjē' ga na' nacuá' yeru ba. Cuntu nu guca guga' bōnni' na', calēga len du guíē'. ⁴ Zián luzuí' bulu' zóē' bregui' guíē' yen ne'ē, en ni'ē, en gulúgu'i'ē lē' du guíē'. Yugu' du guíē' na' bul'ē'ē, ate' bregui' guíē' na' guditsjē'. Biti' rizéqui'nē' nu bōnni' inná bé'enē' lē'. ⁵ Ridática'sē' ribódx'i'ē rēla, en tē dza ga na' nacuá' yeru ba, en gapa naca lu guí'ado', run huē' cuinē' yugu' lu guíōj dzō'ō ni'. ⁶ Cate' bilé'enē' zē'ē zi'tu' Jesús, guxiti'ē guyijē' ga na' zē'ē, ate' buzóa zxiibē' lahuē' Lē'. ⁷ Bē'ē zidzaj didza', rē' Jesús:

—¿Bizxi ral-la'a quiu' Jesús, Zxí'inē' Dios nayépisetērē'? Ní'a queē' Xanru' Dios ráta'yua' lo', bití' usaca' zi'u neda'.

⁸ Caní gunné' bōnni' na' tu' chigudxē' Jesús bō' xihui' na':

—Li', bō' xihui', burúaj lu bōnni' ni.

⁹ Jesús gunábinē' le, rnnē':

—¿Bi leu'?

Bubí'i didza' le, gudxi Lē':

—Lea': Le Zián, tu' rō'ō ziantu'.

¹⁰ Gula'nabi yechi' yugu' bō' xihui' na' Jesús para cabí isól-lē'ē léguequi zi'tu' luyú ni'.

¹¹ Nacuá'aba' cuchi zían lu guí'ado' ní'isó, ta'daba' táguba' ni'. ¹² Gula'nabi yechi' bō' xihui' na' Jesús, ta'nná:

—Gusól-la' netu' ga ni' dzō'ōba' cuchi zían. Bē' netu' lataj tsōjtsú'ugacatu'-ba'.

¹³ La' bē'tē' Jesús léguequi lataj, ate' bila'rúaj bō' xihui' na', en yōjtsú'ugaca cuchi zían na', ate' gula'xiti'ba' cuchi zían na', yōjixigacaba' ga naca ra' guí'a, yōjcházagacaba' nísado'. Lu nísado' na' gula'yēpiba' nisa, gulátiba', en nácagacaba' ca galaj gayuá'aba'.

¹⁴ Ní'irō bulu'zunnaj nupa ni' gulún chí'i cuchi zían na'. Yōjtíxjōi'iguequinē' bōnachi lu yōdzō ni', enca' bōnachi nacuá' la' guixi' ni'. Bila'rúaj bōnachi lu yōdzō, sōjyúgaquiē' bizxi na' guca ni'. ¹⁵ Cate' bila'dxinē' ga ni' zoē' Jesús, bila'lē'enē' bōnni' na' zí'alō yú'ugaca bō' xihui' lē'. Bōnni' ni rō'ē ni', nácuē' lari', en zoē' dxí'ado', ate' guladxi bōnachi na'. ¹⁶ Nupa na' bila'lē'e le benē' Jesús gula'guixjōi' bōnachi na' bila'rúaj lu yōdzō ca na' guca queē' bōnni' na' zí'alō yú'ugaca bō' xihui' lē', enca' ca guca quégacaba' cuchi na'. ¹⁷ Ní'irō gula'sí lógaca bōnachi zían na' ta'ta'yu lahuē' Jesús urúajē' lu xiyúguequi.

¹⁸ Cate' bubenē' Jesús lē'e bárcodo', bōnni' na' zí'alō yú'ugaca bō' xihui' zían lē', gúta'yuē' lahuē' Jesús gu'ē lē' lataj tséajlenē' Lē'. ¹⁹ Jesús bití' bē'ē lē' lataj, pero gudxē' lē':

—Bōaj lidxu'. Yōjtíxjōi' di'a dza quiu' yugu' le zxōn bena' quiu' neda', naca' Xanu', en ca bena' buéchi' ládxa'a lí'.

²⁰ Sōhuōjē' bōnni' na', en ruzē' didza' yugu' yōdzō Decápolis ca nácagaca le zxōn benē' Jesús queē', ate' bulu'bani yúgu'tē bōnachi nacuá' yugu' yōdzō ni'.

Bi'i nigula queē' Jairo, en nigula na' gudannu lari' nácuē' Jesús

(Mt. 9:18-26; Lc. 8:40-56)

²¹ Cate' budxinē' Jesús ia'tsōlā'a nísado' na', ní'irō bulu'dubi bōnachi zían ga na' zoē' ra' nísado'. ²² Bōnni' lē' Jairo, bōnni' rinná bē'ē lu yu'u ga tu'dubē' bōnni' judío, en nazēdē' queē' Dios, bidē' ga zoē' Jesús. Cate' bilé'enē' Jesús, buzóa zxiibē' lahuē', ²³ en gúta'yuē' lahuē', rnnē':

—Chiraqui gátibi' bi'i nigúlado' quia'. Gudá ixóa no'o lēbi' para huóácabi', en bití' gátibi'.

²⁴ Sa'yéajlenē' Jesús lē', ate' bōnachi zían sōjácalen Jesús, tu'quirō Lē'. ²⁵ Tu nigula, chinaca chinnu iz ré'enu, zóanu ca' ni'. Biti' ruhuí' rōn queēnu que huē' quégaca cázanu nigula.

²⁶ Yenni' chigudí' guzxacá'nu lu ná'agaquiē' zían bōnni' tu'únē' bōnachi. Nítisō chibutōnu dēra le dē queēnu, tu' cabí bi' gúcalen lēnu, pero riyali' queēnu. ²⁷ Cate' biyōninu tu'í didza' bōnachi ca naca queē' Jesús, gudódinu ládjaló bōnachi zían na', en bidxinu zaca' cúdzu'lē' Jesús, en gudannu lari' nácuē'. ²⁸ Caní bennu tu' rnnanu: "Channō cansa' le nácuē', huóáca'."

²⁹ La' buí'itē rōn queēnu, ate' réquibe'enu chibóácanu que le guca queēnu.

³⁰ La' gúquibe'etenē' Jesús ben dxin yól-la' huáca queē', ate' buécjē', ruyúē' bōnachi zían na'. Rnnē':

—¿Nuzxi na' gudán neda'?

³¹ Ní'irō bōnni' dá'gaquiē' Lē' tē' Lē', ta'nnē':

—Rilé'e quézinu' bōnachi zían ni tu'quirō Li', en rnnatso: "¿Nuzxi na' gudán neda'?"

³² Ruyúē' Jesús gásibi'ilē' para ilé'enē' nuzxi na' gudán Lē'. ³³ Ní'irō nigula na' gubíga'nu lahuē'. Rádxinu, en rizxízinu tu' chinōzinu bi na' guca queēnu, ate' buzóa zxiibinu lahuē' Jesús, en gúdxinu Lē' idútē le nácatē. ³⁴ Jesús rē'ē-nu:

—Nigúlado'. Chibóácu' tu' réajlē'u neda'. Bōaj lidxu' idú ládzu'u. Tsaz nuhuóácu' que le guca quiu'.

³⁵ Tsanni ni' ru'è caní didza' Jesús, bönni' narúajgaquie' lidxë' bönni' na' rinná bē'ē lu yu'u ga tu'dubë' tu'sedë' queë' Dios bila'dxnë' ni', en tē' bönni' na':

—Chigútibi' bi'i nigúlado' quiu'. Biti'rō upíxjanu' Bönni' Usedi.

³⁶ Biti' bē' lādxë'ē Jesús lē na' ta'nnë', ate' gudxë' bönni' unná bē' na', rnnë':

—Biti' gádxinu'. Guyéajlë'ēsë' Dios.

³⁷ Biti' bē'ē lataj Jesús tsójácalen Lē' ia'zica'rō bönachi, pero légasasë' Pedro, en Jacobo, en Juan, böchë'ē Jacobo na'. ³⁸ Cate' bidxinë' lidxë' bönni' na' rinná bē'ē ga tu'dubë' tu'sedë' queë' Dios, bilé'enë' raca dzatsa, enca' nupa ni' ta'bödxí, en nupa ta'bödxí yechi'. ³⁹ Guyázië' Jesús, en gudxë' légaquie':

—¿Bizx que rutsátsali', en ribödxili' caní? Biti' nátibi' bi'i nigúlado' ni. Rásisibi' na'.

⁴⁰ Ní'irō bulu'titjë' Jesús, pero Lē' bubéajë' yúgu'të bönachi na' ní'illō, ate' guchë'ē xuz xiná'abi' bi'i nigúlado' na', enca' nupa nacuá'len Lē', ate' guyázië' ga na' dëbi'. ⁴¹ Gudélé'ē ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rnna lu didza' xidza': Bi'i nigúlado', guyasa. ⁴² La' guyásatëbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacuá' ni'. ⁴³ Ní'irō Jesús gunná bē'enë' légaquie' cuntu nu ulu'siyönnë' lē na' guca. Gudxë' légaquie':

—Gulí'güf' le gágubi' bi'i nigúlado' ni.

6

Ridxinë' Jesús Nazaret, le naca ladzë'

(Mt. 13:53-58; Lc. 4:16-30)

¹ Buzë'ē Jesús ni', budxinë' ladzë', ate' yugu' bönni' dá'gaquie' Lē' sōjácalenë' Lē'. ² Cate' bidxín dza lá'ayi quégaquie' bönni' judío, gusi lahuë' Jesús rusédinë' bönachi ga na' tu'dubë' tu'sedë' queë' Dios. Gula'cuá' bönachi zían ni' ta'yöni Lē'. Bulu'bani, ta'nná:

—¿Gazxi caz bizédë' bönni' ni yugu' lē ni? ¿Bizxi caz yöl-la' réajni' ni nadéli'në'? ¿Nacxi caz runë' le náacaga bē' na' zá'gaca yehua' yubá? ³ Náquie' bönni' ni gubëdxi yaga na', en xzí'ininu María. Náquie' böchi'gaquie' Jacobo, en José, en Judas, en Simón. Nigula zanë' nacuá'len nu ca' rē'u.

Que lē ni na' bulu'cá'anë' Lē' cá'asö. ⁴ Ní'irō Jesús gudxë' légaquie', rnnë':

—Gátit'es tunë' bal nu bönni' ru'ë didza' uláz queë' Dios, pero bönachi uláz queë', en bönachi di'a dza queë', en bönachi nacuá' lidxë' bití' tun lē' bal.

⁵ Que lē ni na' bití' guca gunë' Jesús nitú yöl-la' huáca zxon ni'. Bunsë' nabábasö bönachi te'e cate' guxóa ne'ë léguequi. ⁶ Bubáninë' Jesús tu' cabí ta'yéajlë' Lē'. Gudödi na' gudödë' yugu' yödödö' nacuá' gásibi'llö, rusédinë' bönachi ni'.

Risöl-lë'ē Jesús bönni' dá'gaquie' Lē' tsójéngaquie' libán

(Mt. 10:5-15; Lc. 9:1-6)

⁷ Ní'irō bulidzë' Jesús idxínnutë' bönni' dá'gaquie' Lē', en gusi lahuë' risöl-lë'ē légaquie' chopa huéajgaquie'. Budödë' lu ná'agaquie' yöl-la' unná bē' ulu'béajë' yugu' bö' xihui' yú'ugaca bönachi. ⁸ Gunná bē'enë' légaquie' bití' bi' ilu'ē la' nōza, calëga yōxaj, calëga yōta, en calëga dumí bití' ila'gu'ē lu buzudi quégaquie', pero iluá'asë' xiyágado'. ⁹ Ral-la' ulu'dë'ē xiráchugaquie', pero calëga chopa lari' ulu'xóa yéngaquie'. ¹⁰ Gudxë' ca' légaquie':

—Gátit'es ga tsú'uli' tu yu'u, guli'sóa yu'u na' cate' uzá'aröli' yödö na'. ¹¹ Channö tsú'uli' tu yödö ga bití' ilún bönachi lu yödö na' libí'ili' bal, en bití' ulu'zë nágagaquie' xtídza'li', buli'rúaj ni', en buli'quinnaj bëchtö da' lē'e lálali'. Lē ni gaca bē' nabága'gaquie' xigua'. Le nácátë rea' libí'ili', cate' idxín dza ichúguie' Dios quégaca bönachi, ila'gu'í ila'záca'rō bönachi lu yödö na' ca ila'gu'í ila'záca' bönachi Sodoma, en Gomorra, yugu' yödö na' busunítie' Dios.

¹² Ní'irō bila'rúajë' bönni' dá'gaquie' Lē', yójéngaquie' libán ca ral-la' ulu'bí'i lādxí'gaca bönachi. ¹³ Bulu'béajë' zían bö' xihui' yú'ugaca bönachi. Gula'gu'ē le za zían nupa te'e, ate' bulu'huóáquie'.

Ca bëtigaquie' Juan, bönni' buquile' bönachi nisa

(Mt. 14:1-12; Lc. 9:7-9)

¹⁴ Biyönnë' Herodes, bönni' unná bē', ca naca le runë' Jesús, tu' rizë didza' gátit'es que yöl-la' huáca queë'. Bal-la bönachi ta'nná:

—Chibubané' Juan, bönni' ni' buquile' bönachi nisa, lu yöl-la' guti. Que lē ni na' napë' yöl-la' huáca runë' yugu' lē ni.

¹⁵ Ia'bal-la bönachi ta'nná:

—Naquie' Elías, bönni' bē'ē didza' uláz queë' Dios dza ni'te.

Ia'bal-la bönachi ta'nná:

—Naquie' bönni' ru'ë didza' uláz queë' Dios ca guláquie' bönni' gulu'ē didza' uláz queë' dza ni'te.

¹⁶ Cate' biyönnë' Herodes yugu' lë ni, gunnë':

—Naquië' Juan, bönni' na' burixa' yenë'. Chibubanë' lu yöl-la' guti.

¹⁷ Cani gunnë' Herodes tu' gusöl-lë'ë lë cazë' bönni' yøjxongaquië' Juan na', ate' gulúguië' lë' du guié' lu yu'u lidxi guié. Cani benë' Herodes tu' rileni Herodías Juan na'. Nácanu nigula na' gúcanu nigula queë' Felipe, böchë'ë Herodes na'. Herodes gudüë'-nu Herodías na', en butsaga ná'alënë'-nu. ¹⁸ Juan na' gudxë' Herodes:

—Biti' ral-la' sóalenu'-nu nigula queë' böchu'u.

¹⁹ Que lë ni na' gusi gurö'önu Herodías. Gú'uninu bi gunnu queë' Juan, tu' gú'uninu gútinu lë', pero biti' bi guzxequi'nu ²⁰ tu' rádxinë' Herodes Juan. Nözinë' náquië' Juan na' tsahui', en lá'ayi. Que lë ni na' gudapa chi'ë lë', en buzë náguië' lë' idú ládxë'ë sal-la' lë na' rnnë' Juan ben ga gurö'ë böniga Herodes na'. ²¹ Ní'irö bidxin tu dza guzxequi'nu Herodías na', le naca dza runë' Herodes laní que dza guyë'enë' iz. Bupë'ë le ilë'aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' rójáquië' gudil-la, enca' bönni' nácagaquië' lo luyú Galilea. ²² Guyázabi' bi'i nigula queënu Herodías ga na' tē'aj tahuë', en buyá'abi' lógaquië'. Guyaza ládxë'ë Herodes ca runbi', en gula'yaza ládxigaca ca nupa tē'aj tágulen lë'. Ní'irö Herodes gudxë'-bi' bi'i nigula na', gunnë':

—Gunaba bi rē'ënu' gunna' quiu', ate' guna' ca'.

²³ Benë' tsutsu xtídzë'ë, gudxë'-bi':

—Ní'a queë' Xanru' Dios gunna' quiu' bítitēs bi inabu' ga idxintē gatsaj ga rinná bē'a.

²⁴ Burúajbi' lēbi', ate' gunábabi' xíná'abi':

—¿Bizxi inábatsa'?

Lēnu gúdxinu-bi':

—Icjë' Juan, bönni' buquilë' bönachi nisa, inabu'.

²⁵ La' buázatēbi' ga na' zoë' Herodes, en rēbi'-në':

—Rē'ēnda' ixú' quia' na'a lu xziga' xzön icjë' Juan, bönni' na' buquilë' bönachi nisa.

²⁶ Ní'irö buí'innë' Herodes, pero tu' buzötjë' Dios, en tu' bila'yöni ca' nupa tágulen lë', biti' gú'unnë' iníti xtídzë'ë na' guzxi' lu nē'ë queëbi'. ²⁷ Herodes la' gusöl-la'të' tu bönni' rejë' gudil-la zoë' rapa chi'ë, ate' gunná bé'enë' lë' tsöjxi'ë icjë' Juan. ²⁸ Bönni' na' rejë' gudil-la guyijë' lidxi guié, yøjrixë' yen Juan na', ate' bu'ë icjë', nuxóë' le tu lu xziga' xzön. Budödë' le lu ná'abi' bi'i nigula na', ate' lēbi' bunódzabi' le queënu xíná'abi'.

²⁹ Cate' bönni' dá'gaquië' Juan na' bila'yönnë' didza' chiguca lë na', bila'dxinë' ni', en bulu'ú'ë lë', ate' yøjcáchi'gaquië' lë' yeru ba.

*Rugahuë' Jesús zíanrö ca chi-un gayuá' bönachi
(Mt. 14:13-21; Lc. 9:10-17; Jn. 6:1-14)*

³⁰ Gudödi ni' bulu'dubë' bönni' gubáz queë' Jesús ga zoë', en gula'guixjör'inë' Lë' yúgu'të le gulunë', en yugu' le bulu'sëdinë' bönachi. ³¹ Nacuá' bönachi zían ni', nupa zá'gaca, en nupa sójaca, ga bidxintë bítirö dë lataj ilahuë' Jesús, en yugu' bönni' dá'gaquië' Lë'. Que lë ni na' Jesús gudxë' légaquië', rnnë':

—Guli'dá. Uyëaj cázaru' ga naca lataj cá'asö, en uzí' ládxiru' tu chi'i.

³² La' légasasë' yøjáquië' tu lë'ë bárcodo', ate' bila'dxinë' tu lataj cá'asö. ³³ Bila'lë'ë bönachi zían légaquië' sójáquië' ni', en núnbë'gaca Jesús. Que lë ni na' bönni' yúgu'të yödzo ni' carelö yøjáquië' ni'. Gula'zë'ë ní'agaquië', ate' bila'dxinë' ni' zí'atëlö ca Jesús, en yugu' bönni' dá'gaquië' Lë'. ³⁴ Cate' burúajë' Jesús lë'ë bárcodo' na', bilé'enë' bönachi zían na', ate' buéchi' ládxë'ë légaquië' tu' nácagaquië' ca bö'cu' xzila'do' biti' zoa nu gapa chi'i léga'caba'. Gusí lahuë' rusëdinë' légaquië' le zían. ³⁵ Cate' chiridzö' dza na', yugu' bönni' dá'gaquië' Jesús bila'dxinë' ga zoë', en tē' Lë':

—Chiridzö', ate' lataj cá'asö naca ni. ³⁶ Busöl-la' bönachi zían ni para tsójaca yugu' yú'udo', en yugu' yödzo'do' nacuá' gásibi'ilö, tsöjögaca yöta, tu' cabí bi dë ni le ilagu.

³⁷ Bubi'ë didza' Jesús, gudxë' légaquië':

—Guli'güi' libí'i cázali' le ilahuë'.

Gulë' Lë':

—¿Naru' tsöjö'utsatu' yöta xtila len láxzjatu' que idú xunu' beo', ate' gü'itu' le ilahuë'?

³⁸ Jesús gudxë' légaquië':

—¿Bal-laxi yöta xtila dë queëli'? Guli'tsöjyútsöca'.

Cate' chinóziguequinë', tē' Lë':

—Gáyu'sö yöta xtila dë, en chópasöba' böla dëba'.

³⁹ Ní'irö gunná bē'ë Jesús ilunë' ga ila'bö' bönachi zían na', ila'cuá' tu cö' huéajaguequi ga naca lachi' lu daca'. ⁴⁰ Gula'cu'ë tu cö' huéajgaquië', tu gayuá' huéajgaquië', en chi-un huéajgaquië'. ⁴¹ Ní'irö gudélë'ë Jesús igáyu'të yöta xtila na', en irópaba' böla na'. Buyüë' zaca' lúzxiba, en gudxë' Dios: "Xclenu'." Ní'irö buzuxzjë' yöta xtila na', en bē'ë quégaquië' bönni' uséda queë' para ila'guisië' quégaca bönachi zían na'. Gudísië' ca' irópatëba' böla na' quégaca

yúgu'tè bônachi na'. ⁴² Gulahuë' yúgu'tè', en bulu'huöljanë'. ⁴³ Ní'irö bulu'tubë' le bizxaj que yôta xtila na', en quégacaba' böla, ate' chinnu ga'böra bulu'lié'. ⁴⁴ Guláquië' ca chi-un gáyu'e bönni' na' gulahuë'.

Rizë'e ni'ë Jesús lu nísado'

(Mt. 14:22-27; Jn. 6:16-21)

⁴⁵ La' bentë' Jesús ga gula'benë' yugu' bönni' dá'gaquië' Lë' lë'e bárcodo', para ila'nöruë' lahuë', ila'dödë' lu nísado' na', para ila'dxinë' lu yödzo Betsaida, tsanni ni' Lë' rusöl-lë' bônachi zían na' lidxiguequi. ⁴⁶ Cate' chibudxi busöl-lë' légaquië', guyjíë' tu lu guí'ado', ate' ni' ruí'ilenë' Dios didza'. ⁴⁷ Cate' chizá' ral-la, zeaj bárcodo' na' gatsaj láhui'ló nísado', ate' zoë' Jesús tuzë' luyú bidxi na'. ⁴⁸ Bilé'enë' Jesús légaquië', bôniga tu'së'ë bárcodo' na' tu' recja bö' za' ga na' ta'dödë'. Gudödi guluhuëla bidxinë' Jesús ga na' nacu'ë, rizë'e ni'ë lu nísado' na', ate' gu'unnë' tódisë' ga na' nacu'ë. ⁴⁹ Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bödxí'ë ⁵⁰ tu' bila'lé'enë' yúgu'të' Lë', en guladxi gula'dzöbinë'. Ní'irö la' bulidztë' Jesús légaquië', rnnë':

—Buli'tipa ládxi'li'. Neda' caz. Biti' gádxili'.

⁵¹ Gurenë' Jesús lë'e bárcodo' ga na' nacu'ë, ate' gurö'ö dxi bö' na' recja, ate' légaquië' gula'niti gula'tíqui'sinë' bulu'báininë'. ⁵² Biti' ta'yéajni'ininë' le ruluí'i lë na' benë' Jesús que yôta xtila na'. Ní' naca zidi icja ládxi'do'gaquië'.

Ruünë' Jesús nupa te'e lu yödzo Genesaret

(Mt. 14:34-36)

⁵³ Gula'dödë' Jesús, en yugu' bönni' dá'gaquië' Lë' ia'tsölá'a nísado', ate' bila'dxinë' ga naca lu xiyúgaca bônachi Genesaret. Bulu'dxiguë'ë bárcodo' luyú bidxi ni'. ⁵⁴ Cate' bulu'ruajë' lë'e bárcodo' na', la' bulu'únbë'të bônachi ni' Jesús. ⁵⁵ Gula'xiti' bônachi na', yójaca yúgu'të yödzo'do' idú gásibi'ló, en gula'sí légaquië' dujuá'agaquië' yúgu'të nupa te'e ga zoë' Jesús, xzöagaca yugu' le déguëquini, ate' bila'dxinë' gátí'tës ta'yönnë' zoë' Jesús. ⁵⁶ Gátí'tës ga ridödë' Jesús, yugu' lu yödzo'do', en yugu' yödzo' xzön, en yugu' yú'udo', tu'cu'ë nupa te'e quégaquië' gapa naca la' nöza, en gapa naca lu yë'ëyi, en ta'tá'yuë' lahuë' Jesús gu'ë légaquië' lataj ila'gansë' luzxi lari' nacuë'. Yúgu'të nupa na' bila'gán lari' nacuë' bulu'huóacaté dxi'ado'.

7

Le tun ga biti' náagaca bônachi tsahui' lahuë' Dios

(Mt. 15:1-20)

¹ Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. ² Bönni' yudo' ni bila'lé'enë' bönni' usëda queë' Jesús tahuë' yôta, biti' nuchí'agaquië' ná'agaquië', lë na' rnna: Biti' nayárigaca ca nalëbiguequinë' tunë' bönni' yudo' na'. Que lë ni na' gula'nnë' quégaquië'. ³ Yugu' bönni' yudo' fariseo na', en ia'zica'rö bônachi judío tunë' ca gulëbiguequinë' gulunë' xuz xtó'ogaquië', ate' channö cabí ta'guíbi ná'agaquië' zían luzuí ca na' nalëbiguequinë' tunë', biti' ca' tahuë'. ⁴ Cate' tu'dxinë' rójó'ugaquië' lu yë'ëyi, channö cabí ta'guibë' lë na' ca nalëbiguequinë' tunë', biti' ca' tahuë'. Zíanrö ca' tunë', yugu' le nalëbiguequinë' tunë'. Caní ta'guibë' xziga' yó'öna, en yugu' xziga' guíë, en yugu' le tati'në'. ⁵ Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulëbiguequinë' gulunë' xuz xtó'oru', pero tahuë' yôta biti' nuchí'agaquië' ná'agaquië'?

⁶ Bubi'ë didza' Jesús, rë' légaquië':

—Libí'ili', bönni' ruluí'isö tsahui' cuinli'. Nácátë le gudíxjö'ë Isaías, bönni' ni' bë'ë didza' uláz queë' Dios, ca naca queëli'. Buzúajë' lu guichi, gunné':

Yugu' bönni' ni, len rú'agacasë' tunë' neda' bal, calëga idú ládxi'gaquië'.

⁷ Niti'sö naca yöl-la' ba ta'gu'ë neda'

tu' tu'sëdinë' le ta'nná bë' bônachi, calëga xibá quia'.

⁸ Caní naca, tu' rucá'anali' le gunná bë'ë Dios, ate' runli' yugu' le nazí' láhuili' lu ná'agaca bônachi.

⁹ Gudxë' ca' légaquië':

—Idú ládxi'li' rucá'anali' cá'asö le gunná bë'ë Dios para gunli' ca naca le nulaga loli' runli'. ¹⁰ Moisés gunné' caní: “Ben bal xuz xinó'o.” Gunnë' ca: “Nu ulidza zi' xuzi o xinë'e, guli'gútité nu na'.” ¹¹⁻¹² Libí'ili' rnnali' caní: “Channö nu bönni' guíë' xuzë' o xinë'ë: Biti' gaca bi gunna' queëli', tu' naca Corbán.” (Didza' ni rnna lu didza' xidza': Tu' nuzóa' quez queë' Dios yúgu'të.) Ní'irö rnnali': “Biti' run bayudxi bi gunë' bönni' na' quégaquië' xuz

xinë'ë." ¹³ Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le rudódili' lu ná'agaca xzí'ini xí'sóali'. Ziánrö ca' le caní runli'.

¹⁴ Ní'irö Jesús bulidzë' bönni' zían na' nacu'ë ni', en rë' légaquië':

—Guli'zë nágalí' didza' gu'a, yúgu'téli', en guli'tséajni'i. ¹⁵ Biti' bi dë le riyaza nu bönni' le gaca gun ga bití' náquië' tsahui' lahuë' Dios, pero le rirúaj lë', lë ni gaca gun ga bití' náquië' tsahui' lahuë' Dios. ¹⁶ Channö zoa nágalí', en riyónili', buli'zë nágalí'.

¹⁷ Cate' Jesús bulá'alenë' bönachi zían na', guyu'ë tu yu'u, ate' yugu' bönni' usëda queë' gula'nábinë' Lë' ca naca lë na' bucúdzu'ë didza'. ¹⁸ Jesús gudxë' légaquië':

—¿Riyádzjatsö ca' queëli' yöl-la' réajni'i? ¿Naru' cabí réajni'ili', yúgu'të le riyaza nu bönni', bití' gaca gun ga bití' náquië' tsahui' lahuë' Dios? ¹⁹ Naca caní tu' cabí riyaza icja ládxi'da'ahuë', pero lë'ësë' riyaza, ate' rurúaj lë'ë.

Tu' gunnë' caní Jesús, buluí'inë' rë'u naca dxi'a yúgu'të le rë'aj ráguru'. ²⁰ Gunnë' ca' Jesús:

—Le rirúaj lu bönni' run ga bití' náquië' tsahui' lahuë' Dios. ²¹ Caní naca, tu' ta'rúaj icja ládxi'do'gaquië' bönni' yugu' le ta'zá' ládxi'gaquië' le naca xihui', yugu' le tun ga tunë' dul-la' ta'guitsjë' xibá que yöl-la' nutsaga na', en yugu' le ruá' dö'. Tun ga tútië' bönachi, ²² en ta'banë', en ta'zë' ládxi'gaquië' le dë que luzá'agaquië', en tu'ë dö', en ta'z'í' yë'ë, en tu'zxë'ë, en ta'nná zí'ë que luzá'agaquië', en tun ba zxon' cuíngaquië', en tunë' le canöz. ²³ Yúgu'të le xihui' caní ta'rúaj icja ládxi'da'ahuë' nu bönni', en tun ga bití' náquië' tsahui' lahuë' Dios.

*Tu nigula izá'a réajlë'ënu Jesús
(Mt. 15:21-28)*

²⁴ Buzë'ë Jesús ni', ate' bidxinë' gala' ga nacuá' yödzo Tiro, en yödzo Sidón. Guyázië' tu yu'u ni', en gú'unnë' cuntú nu inózi, pero bití' ca' guca ucachí' cuinë'. ²⁵ Tu nigula zóabi' bi'i nigúlado' queënu, yu'u bö' xihui' lëbi', biyóninu didza' rizë ca naca queë' Jesús, ate' la' bidatënu ga zoë' Jesús, en buzóa zxibinu xini'ë. ²⁶ Nigula ni bití' nácánu judío, pero nabábanu bönachi Sirofenicia. Gúta'yunu lahuë' Jesús ubéajë' bö' xihui' na' yu'u-bi' bi'i nigúlado' queënu. ²⁷ Ní'irö Jesús gudxë'-nu, rnnë':

—Bë' lataj ulu'huölaj zí'alö nupa nácagaca ca xzí'ini xan yu'u, tu' cabí naca dxi'a ugúaru' yóta' quégacabi' bi'i na', en chú'unaru' le lógacaba' bö'cu'do'.

²⁸ Bubi'inu didza' nigula na', gúdxinu Jesús:

—Ön, Xan, pero yugu' bö'cu'do' nacuá'aba' zxani ga tágubi', táguba' le bizxaj tu'huöxaj ga na' tágubi'.

²⁹ Ní'irö Jesús gudxë'-nu, rnnë':

—Tu' gunnó' caní, huáca huöajyu'. Chiburúaj bö' xihui' na' guyu'u-bi' bi'i nigúlado' quíu'.

³⁰ Cate' budxinnu lúdxinu, bilé'enu-bi' bi'i nigúlado' queënu na', dëbi' lu da'a, en chinurúaj bö' xihui' na' guyu'u lëbi'.

Jesús ruínë' tu bönni' nacödzuë', en bití' gaca innë'

³¹ Burúajë' Jesús lataj na' nababa yödzo Tiro, ate' gudödë' gapa dë yödzo Sidón, en yugu' yödzo Decápolis, ate' bidxinë' ra' nísado' lu xiyú Galilea. ³² Bönachi ni' dujuá'gaca tuë' bönni' nacödzuë', en bití' raca innë' ga zoë' Jesús, ate' ta'ta'yu lahuë' Jesús ixóá në'ë lë'. ³³ Jesús bubéajë' lë' tsólá'alö ládjagaca bönachi na', ate' bunë'ë xibön në'ë yeru náquië' bönni' na'. Gurú'unë' zxoná'do', en gudanë' lúdxë'ë. ³⁴ Ní'irö buyúë' lúzxibálö, en gunnë' lúdxë'ë, rnnë':

—Efata.

Didza' hebreo ni rnna lu didza' xidza': Guyalaj.

³⁵ La' bóaljatë náquië', en la' buguitjatë lúdxë'ë, en gunnë'të dxi'ado'. ³⁶ Jesús gunná bé'enë' légaquië' cuntú nu ilë' ca', pero tscá gunná bé'enë' légaquië', bulu'zëtërë' ca' didza' que lë na' benë'. ³⁷ Bulu'bánninë, ta'nnë':

—Tsáhui'do' runë' yúgu'të. Runë' ga tu'yöni nupa gulaca cödzu, en ga tu'í didza' nupa bití' guca ila'nnë.

8

*Rugahuë' Jesús ziánrö ca choá' gayuá' bönachi
(Mt. 15:32-39)*

¹ Yugu' dza na' bulu'dubi bönachi zían ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bë'lenë' légaquië' didza'. ² Gudxë' légaquië':

—Ruhuechí' ládxa'a bönachi zían ni tu' chinaca tsonna dza nacuá'len neda' ni, en bití' dë le ilágugaca. ³ Channö usöl-la' a léguequi lúdxigaca ta'dunsö ca', huala'cuídi' la' nōza, tu' zá'gaca zí'tu' bál-lagaca.

⁴ Bulu'bi'ë didza' bönni' usëda queë', të' Lë':

—¿Bizxi ugágutsaru' bönachi guízxi yu ni, ga ni naca lataj cá'asö?

⁵ Gunábinë' Jesús légaquië', rnnë':

—¿Bál-laxi yôta xtila dē queēli’?

Tē’ Lē’:

—Gádxisō.

⁶ Ní’irō Jesús gunná bé’enē’ bōnachi zían na’ ila’bó’ lu yu. Gudélē’ē gadxi yôta xtila na’, ate’ gudxē’ Dios: “Xclenu.” Ní’irō buzxuxjē’ léguequi, en bē’ē quégaquiē’ bōnni’ usēda queē’ para ila’guisiē’ lógaca bōnachi zían na’. ⁷ Guta’ ca’ quégaquiē’ tu chópaba’ bōla cuidi’. Jesús gudxē’ Dios: “Xclenu”, ate’ gunná bé’enē’ légacabā’ lógaca bōnachi. ⁸ Gulagu yúgu’tē bōnachi na’, en bulu’huólaj. Ní’irō bulu’tubē’ le bizxaj nagá’anagaca, ate’ gula’lí idú gadxi ga’bōra. ⁹ Bōnachi na’ gulagu gulaca idú ca choá’ gayuá’gaca. Jesús busól-lē’ léguequi lidxigaca, ¹⁰ ate’ gurenē’ lē’e bárcodo’ tsōzxōn len yugu’ bōnni’ usēda queē’, ate’ bila’dxinē’ lu xiyúgaca bōnachi Dalmanuta.

Ta’nábinē’ Jesús gunē’ tu le gaca bē’ nuzxi náquiē’

(Mt. 16:1-4; Lc. 12:54-56)

¹¹ Ní’irō bila’dxinē’ bōnni’ yudo’ fariseo ga zoē’ Jesús, en gula’sí lógacuiē’ ta’dí-lalenē’ Lē’ didza’. Gulē’ennē’ ila’z’i’ bē’ē Jesús. Que lē’ ni na’ gula’nábinē’ Lē’ gunē’ tu le naca bē’ za’ yehua’ yubá. ¹² Gunnēda’ lādxē’ Jesús, rnnē’:

—¿Bizx que ta’nábitsō bōnachi ni neda’ guna’ tu le naca bē’ za’ yehua’ yubá? Le nácátē rea’ libí’ili’, bití’ ca’ ilē’eli’ tu le naca bē’ za’ yehua’ yubá.

¹³ Ní’irō bulá’alenē’ légacuiē’. Bubenē’ lē’e bárcodo’, en sa’yéajē’ ia’tsólá’a nísado’.

Le tu’sēdinē’ bōnni’ yudo’ naca ca cúa zi que yôta xtila

(Mt. 16:5-12)

¹⁴ Gula-la lādx’i’gacuiē’ bōnni’ usēda queē’ Jesús ilu’ē bi ilahuē’, ate’ tuz yôta xtila dē lē’e bárcodo’ na’. ¹⁵ Ní’irō Jesús buzéajni’inē’ légacuiē’, rnnē’:

—Buli’yútsōca’ queēli’. Guli’gún chí’i cuinli’ para cabí sí’ili’ le naca ca cúa zi que yôta xtila quégaquiē’ bōnni’ yudo’ fariseo, en queē’ Herodes.

¹⁶ Gula’sí lógacuiē’ tu’ē didza’ bōnni’ usēda queē’ la’ légacasē’, ta’nnē’:

—Gunnē’ caní tu’ cabí dē yôta xtila gáguru’.

¹⁷ Réquibe’enē’ Jesús le ta’nnē’, ate’ rē’ légacuiē’:

—¿Bizx que ruí’ili’ caní didza’ tu’ cabí dē yôta xtila gáguru’? ¿Naru’ cabí réajni’itseli’, en bití’ réquibe’itseli’? ¿Ni nácatsō zidi icja lādx’i’do’oli’? ¹⁸ ¿Zóatsō guió’j loli’, en bití’ rilé’eli’, en zóatsō guídi nágali’, en bití’ riyónili’? ¿Naru’ cabí rōjnétseli’? ¹⁹ Cate’ ni’ buzxuxjā’ gayu’ yôta xtila, ate’ gulahuē’ chí-un gáyue’ bōnni’, ¿bál-laxi ga’bōra bulili’ le bizxaj butúbili’?

Gula’nnē’:

—Chinnu.

²⁰ Gunnē’ ca’ Jesús:

—Cate’ ni’ buzxuxjā’ gadxi yôta xtila, ate’ gulagu choá’ gayuá’ bōnachi, ¿bál-laxi ga’bōra bulili’ le bizxaj butúbili’?

Gula’nnē’:

—Gadxi.

²¹ Ní’irō Jesús gudxē’ légacuiē’:

—¿Naru’ cabí réajni’itseli’ na’a, bē’a didza’ que le tu’sēdinē’ bōnni’ na’?

Jesús ruúnē’ bōnni’ Betsaida nachul-la lahuē’

²² Cate’ Jesús, en bōnni’ dá’gacuiē’ Lē’ bila’dxinē’ yōdzō Betsaida, bila’dxín ga zoē’ Jesús nupa dujuá’gacuiē’ queē’ tu bōnni’ nachul-la lahuē’. Ta’tá’yue’ lahuē’ canē’ bōnni’ na’.

²³ Jesús gudélē’ē nē’ē bōnni’ na’ nachul-la lahuē’, ate’ guchē’ē lē’ ní’ilo ra’ yōdzō. Ní’ budxiē’ zxōna’ guió’j lahuē’, en guxóa nē’ē lē’. Ní’irō gunábinē’ lē’, rnnē’:

—¿Ba rilé’enu’ latí’?

²⁴ Buyúē’ bōnni’ na’ nachul-la lahuē’, rnnē’:

—Rilé’egacada’ bōnachi, nalá’gaca ca yugu’ yaga, pero ta’dá bōnachi na’.

²⁵ Leyúbólō guxóa nē’ē Jesús guió’j lahuē’, ate’ buyúde’ē bōnni’ na’ nachul-la lahuē’, ate’ bōacaté dxf’ado’ guió’j lahuē’. Na’a rilé’enē’ dxf’ado’ yúgu’tē. ²⁶ Ní’irō Jesús gusól-lē’ē lē’ lidxē’, rnnē’:

—Bití’ tsōjdōdu’ lahui’ yōdzō, en cuntu nu guío’ le bena’ nu zoa lu yōdzō ni.

Rnnē’ Pedro: “Jesús náquiē’ Cristo”

(Mt. 16:13-20; Lc. 9:18-21)

²⁷ Gudōdi na’, bulu’zē’ē Jesús, en yugu’ bōnni’ usēda queē’ ni’, ate’ gula’dōdē’ yugu’ yōdzōdo’ nabábagaca Cesarea, ga na’ rinná bē’ē Filipo. Tsanni ni’ yú’ugaquiē’ nōza, Jesús rinabi yudxē’ yugu’ bōnni’ usēda queē’, rnnē’:

—¿Nuzxi ta’nná bōnachi naca’?

²⁸ Bulu’bi’ē didza’, ta’nnē’:

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-la nacu' Elías, bönni' bē'ē didza' uláz queë' Dios dza ni'te. Ta'nná ia'bal-la nacu' bönni' yúbölö bē'ē didza' uláz queë' Dios dza ni'te.

²⁹ Ní'irö Jesús gunábinë' légaquië', rnnë':

—Nazxi libí'ili', ¿nuzxi rnnali' naca'?

Bubi'ē didza' Pedro, rnnë':

—Li' nacu' Cristo.

³⁰ Ní'irö Jesús gunná bē'enë' légaquië' cuntú nu ulu'siyönnë' Nu náquië'.

Riguñjō'ē Jesús ca si' ilútië' Lē'

(Mt. 16:21-28; Lc. 9:22-27)

³¹ Ní'irö gusí lahuë' Jesús rusëdinë' bönni' dá'gaquië' Lē', rnnë':

—Run bayudxi qui'i saca'a neda', Bönni' Guljē' Bönachi. Bönni' gula tu'zéajni'inë', en yugu' bixúz unná bē', en bönni' yudo' tu'sëdinë' ulu'zóë' neda' tsölá'alö. Ilútië' neda', pero cate' gaca tsonna dza ubana'.

³² Yálajö bē'lenë' légaquië' didza' ni. Ní'irö Pedro guchë'ē Jesús tsölá'alö, en gusí lahuë' ridil-lë' lë' didza'. ³³ Buécjē' Jesús, en buyúë' ia'zica'rë' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' ládxi'u biti' za' lu nē'ē Dios, pero ca ta'zá' ládxi'gaca bönachi naca.

³⁴ Ní'irö Jesús bulidzë' yugu' bönni' usëda queë', enca' bönachi nacua' ni', en gudxë' légaquië':

—Channö rē'enë' nu bönni' tē'ē neda', ral-la' uzóë' tsölá'alö le rē'ēni quëzinë', en gáquië' ca tu bönni' sa'yéajë' sōjtë'ē lē'e yaga cruz, ate' ní'irö huáca tē'ē neda'. ³⁵ Nu bönni' ruí'ida' ládxi'ē yöl-la' na'bán queë', unítie' le, pero nu bönni' unítie' yöl-la' na'bán queë' tu' dē'ē neda', o tu' dē'ē didza' dxi'a quia', udéli'në' bönni' ni yöl-la' na'bán queë'. ³⁶ ¿Naru' uzi'tsë' xibë tu bönni' channö utubë' yúgu'të le dë yödžölió ni, pero uniti cuinë'? ³⁷ Biti' bi gaca unödžjë' tu bönni' le huóá'ni cuinë'. ³⁸ Channö zoë' nu bönni' rutuf'inë' quia' neda', en que xtidza'a lógaca bönachi ni naca'anagaca Dios, en tun dul-la', lë'sca' caní neda', Bönni' Guljē' Bönachi, utuf'ida' queë' bönni' na' cate' guídalena' yöl-la' huáca zxön queë' Xuza', ate' dzágagaquië' gubáz lá'ayi neda'.

9

¹ Jesús gudxë' ca' légaquië', rnnë':

—Le nácatë rea' libí'ili', nacua' ni nupa biti' ilátigaca cate' ila'lé'erö idinná bē'ē Dios luyú ni, en ilá' lahui yöl-la' huáca zxön queë'.

Ridzá'a ca riná' lahuë' Jesús

(Mt. 17:1-13; Lc. 9:28-36)

² Cate' chigudödi xopa dza, Jesús guchë'ē Pedro, en Jacobo, en Juan, ate' légacasë' yōjáquië' tu lu gu'a sibi. Ní' bidzá'a ca riná' lahuë' Jesús lógaquië' yonnë' na'. ³ Guyëpi yōsa bení' lari' nácúë' Jesús, ate' gaca chiguíchido'os. Zxíla'do'os guca, le cuntú nu ra' lari' yödžölió ni gaca gun chiguíchido'os ca guca lari' na'. ⁴ Bulu'lu'i lógaquië' Elías, en Moisés, tu'ilenë' Jesús didza'. ⁵ Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsóca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

⁶ Caní gunné' Pedro tu' cabí nōzinë' bi na' rnnë', tu' tádxinë' bönni' usëda queë' Jesús na'.

⁷ Ní'irö gurō'ö bōaj le gulú'u xzul-la légaquië', ate' biyōn chí'i nu ruí'ida' lu bōaj na', rnná: —Bönni' ni Zxí'ina'. Nadxí'ida' Lē'. Buli'zë' nágali' Lē'.

⁸ La' bulu'yutë' pero cünturö nu ta'lé'enë'. Tuzë' Jesús zóalenë' légaquië'.

⁹ Tsanni ni' yú'ugaquië' nōza, tu'dínnië' lu gu'a sibi na', Jesús gunná bē'enë' légaquië' cuntú nu ulu'siyönnë' ca', lë na' bila'lé'enë', cate' ubanrë' lu yöl-la' guti Lē', Bönni' Guljē' Bönachi. ¹⁰ Que lë ni na' gula'gú'usë' ícjagaquië' didza' ni bē'ē, ate' la' légacasë' ta'nabi yúdxinë' luzá'agaquië' bizxi sa'yéaj didza' na' bē'ē, gunné' ubanë' lu yöl-la' guti. ¹¹ Gula'nábinë' Jesús, ta'nnë':

—¿Bizx que ta'nnë' bönni' yudo' usedi run bayudxi guídë' Elías zí'alö ca guídë' Cristo?

¹² Bubi'ē didza' Jesús, rnnë':

—Le nácatë guídë' Elías zí'alö, en ucu'ē yúgu'të ca ral-la' gaca. Na'a, ¿bizxi sa'yéaj le nazúaj lu guichi rnná run bayudxi qui'i sáquë'ē Bönni' Guljē' Bönachi, ate' cá'asö ulu'ca'ana bönachi Lē'? ¹³ Rea' libí'ili': Chibidë' Elías, ate' gulunë' queë' tsca gulë'ënnë', tsca nazúaj lu guichi lá'ayi ca ral-la' gaca queë'.

Jesús ruúnë'-bi' bi'i bönni' yu'u lëbi' bö' xihui'

(Mt. 17:14-21; Lc. 9:37-43)

¹⁴ Cate' ni' bulu'dxinë Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lé'enë' nacua' bönnachi zían ni', ate' bönni' yudo' tu'sédinë' ta'díl-lalenë' yugu' bönni' usëda queë' na' didza'. ¹⁵ Cate' bönnachi zían na' bila'lé'e Jesús, bulu'bani, en carelô zá'gaca ga na' zë'ë, dijôdxigaca Lë': "Padiux."

¹⁶ Ní'irô Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli' légaquië'?

¹⁷ Bubi'ë didza' tu bönni' nútsë'ë ladaj bönnachi zían na', rnnë':

—Bönni' Usedi, nachë'a-bi' bi'i bönni'do' quia' ni' quiu', yu'u lëbi' bö' xihui' le run ga biti' raca innëbi'. ¹⁸ Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábigacada'-në' bönni' usëda quiu' ulu'béajë' bö' xihui' na', pero biti' gula'zéqui'në'.

¹⁹ Bubi'ë didza' Jesús, rnnë':

—Libi'ili', bönni' cabi ta'yéajlë'ë. ¿Gáca'xte caz ral-la' sóalena' libi'ili'? ¿Gáca'xte caz ral-la' guá' ilena' queëli'? Gulí'diguá'-bi' quia' ni.

²⁰ Dujúa'agaquië'-bi' ga na' zoë' Jesús. Cate' bö' xihui' na' bilé'e Lë', la' buxizité lëbi'. Gudzô'öbi' lu yu, ate' burixi butula lëbi', ate' bidxía bidxina' zidi' ruá'abi'. ²¹ Ní'irô Jesús gunábinë' xúzibi' bi'i na', rnnë':

—¿Gáca'xi chiguca raca caní queëbi'?

Rnnë' xúzibi' na':

—Ni' nácatëbi' bí'ido' ré'ebi' caní. ²² Zían luzuí rirú'una lëbi' lu guí', en lu nisa para guti lëbi'. Que lë ni na', channô racu' lati', buéchi' ladxí netu', gácalenu' netu'.

²³ Jesús gudxë' lë':

—Channô huáca tséajlë'u, yúgu'të huáca channô tséajlë'u Dios.

²⁴ La' bë'të' zidzaj didza' xúzibi' bi'i na', rnnë':

—¡Réajlë' a! ¡Gúcalen neda' para tséajlë'ëra' Lë'!

²⁵ Cate' bilé'enë' Jesús zá'gaca bönnachi zían, tu'quí Lë', buzenë' bach bö' xihui' na', rë' le: —Li', bö' xihui' runu' ga biti' raca inná, en biti' raca yöni bönnachi, rinná bé'eda' li' uruju' lu bi'i ni, en bití'rô tsu'u lëbi'.

²⁶ Gurôdxí'a bö' xihui' na', en burixi butúlada' bi'i na'. Ní'irô burúajtë, en bucá'ana bi'i na' ca bi'i nati cázabi'. Ca' naca, gulufí didza' bönnachi zían ni', ta'nná:

—Chinátibi'.

²⁷ Ní'irô Jesús gudélë'ë ná'abi', en buchisë'-bi', ate' guzuíbi' bi'i na'.

²⁸ Ní'irô guyazië' Jesús tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

²⁹ Jesús gudxë' légaquië':

—Biti' gaca ubéajli' cá'asô bö' xihui' caní, pero tuz channô ulídzali'-në' Dios, en gunli' gubasa.

Jesús rigúxjö'ë leyúbölô ca si' ilútië' Lë'

(Mt. 17:22-23; Lc. 9:43-45)

³⁰ Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Biti' rë'enë' Jesús nu inôzi ga na' zoë' ³¹ tu' rusédinë' yugu' bönni' usëda queë'. Rë' légaquië':

—Ulu'dödë' neda', Bönni' Guljë' Bönnachi, lu ná'agaquië' bönni' ilútië' neda', pero tódi gátia', cate' gaca tsonna dza ubana'.

³² Biti' gula'yéajni'inë' didza' ni rë' légaquië', ate' tu' tádxinë', biti' bi gula'nábinë' Lë'.

Nu naca lo

(Mt. 18:1-5; Lc. 9:46-48)

³³ Ní'irô Jesús, en bönni' dá'gaquië' Lë' bila'dxinë' yôdzô Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nôza?

³⁴ Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nôza ni' núzxilôgaquië' gáquië' bönni' lo. ³⁵ Ní'irô gurôë Jesús, en bulidzë' idxinnutë' bönni' usëda queë'. Rë' légaquië':

—Nu rë'ëni gaca lo ral-la' gaca ca tu bönni' cuídi'sô, enca' ca ni'a ná'ali' yúgu'tëli'.

³⁶ Ní'irô Jesús gudélë'ë-bi' tubi' bí'ido', en buzôë'-bi' gatsaj láhui'lô ga na' nacu'ë. Ni' runidë'-bi', rë' légaquië':

³⁷ —Nu bönni' si' lu në'ë tu bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga néda'sô si' lu në'ë, pero si' lu në'ë ca' Xuza', Bönni' na' nasôl-lë'ë neda'.

Nu biti' ridá'baga' rë'u, rácalen rë'u

(Mt. 10:42; Lc. 9:49-50)

³⁸ Ní'irô Juan gudxë' Jesús:

—Bönni' Usedi, bilé'etu'-nē' tu bönni' rubéajē' yugu' bō' xihui', rugunē' dxin lo'. Gunná bé'etu' lē' bítirō gunē' ca', tu' cabí dē'ē rē'u.

³⁹ Ní'irō Jesús gudxē' lē':

—Biti' inná bé'eli'-nē', tu' channō zoē' nu bönni' runē' tu yöl-la' huáca le za' yehua' yubá, en rugunē' dxin La' neda', bití' ca' gaca bönni' na' innē' zī'ē quia'. ⁴⁰ Caní naca, nu bití' ridá'baga' rē'u, rácalen nu na' rē'u. ⁴¹ Núti'tēs nu gunna queēli' tu' xziga'do' nisa guí'jali' tu' dá'ali' neda', Cristo, si'í caz nu na' le ral-la' gata' que.

Zoa bōnadxi queēru' gunru' ga nu gun dul-la'

(Mt. 18:6-9; Lc. 17:1-2)

⁴² Gunnē' ca' Jesús:

—Núti'tēs nu gun ga gunbi' dul-la' tubi' bí'ido' caní réajlē'ēbi' neda', gácarō dxi'a ugal-la' nu na' guichi riyētu yaga yeni, en tsōjchú'una cuini lu nísado'. ⁴³ Channō tu no'o gun ga gunu' dul-la', guchugu le. Dxi'arō gaca quiu' tsōjtsáziu' ga su' ibanu' zoa tuz no'o, calēga zoa chopá no'o, ate' tsōjtsáziu' lu guí' gabila, ga nī' bití' ulu guí' que. ⁴⁴ Lataj nī' bití' ilátiba' buzuga' yú'ugacaba' nupa tsōjcuá' nī', ate' guí' na' bití' ca' ulu. ⁴⁵ Lēasca' caní, channō tu nī'u gun ga gunu' dul-la', guchugu le. Gácarō dxi'a quiu', tsōjtsáziu' ga su' ibanu' zoa tuz nī'u, calēga zoa chopá nī'u, ate' tsōjtsáziu' lu guí' gabila, ga nī' bití' ulu guí' que. ⁴⁶ Lataj nī' bití' ilátiba' buzuga' yú'ugacaba' nupa tsōjcuá' nī', ate' guí' na' bití' ca' ulu. ⁴⁷ Lēasca' caní, channō tu guíōj lo' gun ga gunu' dul-la', gulēaj le. Gácarō dxi'a quiu' tsōjtsáziu' ga rinná bē'ē Dios zoa tuz guíōj lo', calēga zoa chopá guíōj lo', ate' tsōjtsáziu' lu guí' gabila. ⁴⁸ Lataj nī' bití' ilátiba' buzuga' yú'ugacaba' nupa tsōjcuá' nī', ate' guí' na' bití' ca' ulu.

⁴⁹ Ruxi'iru' bēla' zōdi', en rugála'ru' le ra' guí', para cabí gaca ditaj. Lē ni rusedi rē'u ca ulu'huóaca dxi'a yúgu'tē bōnachi. Lēasca' caní, rē'ēnē' Dios izxí'i zōdi' yúgu'tē bōa' bēdxido' tu'zēguí'gaquiē'-ba' lu bucugulá'ayi queē'. ⁵⁰ Dxi'a naca zōdi', pero channō iníti yöl-la' síná'a que, ¿naxci úniru' le síná'a? Gulí'gaca la' libí'isili' ca' zōdi' dxi'a, sóali' dxi'ado' tulí' len ia'tulí'.

10

Rusēdinē' Jesús que nu rulá' yöl-la' nutsaga na'

(Mt. 19:1-12; Lc. 16:18)

¹ Buzē'ē Jesús yōdzō Capernaum, ate' guyijē' luyú Judea, en gudōdē' ia'tsólá'a yegu Jordán saca' ga rilén gubidza. Bulu'dubi leyúbólō bōnachi zían ga zoē', ate' leyúbólō busēdinē' légaquiē' ca run cazē'. ² Ní'irō bila'dxinē' bönni' yudo' fariseo ga zoē' Jesús, ate' tē'ēnnē' ilunē' ga bí innē' Jesús para gaca ulu'zēguíē' Lē' didza'. Gula'nábinē' Lē', ta'nnē':

—¿Dē lataj bönni' nutsaga nē'ē usanē'-nu nigula queē'?

³ Bubi'ē didza' Jesús, rnnē':

—¿Bizxi gunná bē'enē' Moisés libí'ili'?

⁴ Gula'nnē':

—Moisés bē'ē lataj nu bönni' uzúajē' lu guichi le rnná rulá'alenē'-nu nigula queē' na', ate' ní'irō usanē'-nu.

⁵ Bubi'ē didza' Jesús, rnnē':

—Gunná bē'enē' Moisés libí'ili' caní tu' naca zidi icja lādxi'do'oli', ⁶ pero cate' gusí lo rata' yōdzōlió, Dios benē' légaquiē' bönni', en nigula. ⁷ Gunnē': "Que lē ni na' ucá'anē' bönni' xuz xinē'ē, en tsōjsóalenē'-nu nigula queē', ⁸ ate' chopē' ni ulu'huóáquiē' ca tuz bōnachi." Que lē ni na' bití'rō nácagaquiē' chopē' pero tuz chinácagaquiē'. ⁹ Que lē ni na' ca', nu naca bōnachi bití' ral-la' ulá'a nupa na' chinutságuíē' Dios.

¹⁰ Cate' gula'yáziē' yu'u, gula'nabi yúdxinē' bönni' usēda queē' Jesús ca naca didza' na' bē'ē.

¹¹ Jesús gudxē' légaquiē':

—Núti'tēs bönni' ulá'alenē'-nu nigula queē', en utsaga ná'alenē'-nu nigula yúbólō, runē' dul-la' le riguitsaj xibá que yöl-la' nutsaga na' tu' rusubáguē'-ē-nu dul-la' nigula na' guzóalenē'-nu zí'aló. ¹² Lēasca' caní channō tu nigula nutsaga ná'lennu bönni' usannu-nē', en sí'inu-nē' bönni' yúbólō, runnu ca' dul-la' le riguitsaj xibá que yöl-la' nutsaga na'.

Jesús rulidza tsáhuē'ē-bi' yugu' bí'ido'

(Mt. 19:13-15; Lc. 18:15-17)

¹³ Ní'irō bila'dxin bōnachi ga zoē' Jesús dujuá'gaquiē' bí'ido' quéguequi. Tē'ēni ixóa nē'ē légacabi', ate' gula'sí lógaquiē' bönni' usēda queē' Jesús ta'dil-la didza'gaquiē' nupa na' dujuá'agaca légacabi'. ¹⁴ Cate' bilé'enē' Jesús lē ni, gulēnē' légaquiē', en gunné':

—Gulí'guí'-gácabi' bí'ido' lataj ila'dxinbi' quia'. Biti' uzágagacali'-bi', tu' gata' quégaca nupa nácagaca ca bí'ido' ni, lataj ga rinná bē'ē Dios. ¹⁵ Le nácatē rea' libí'ili': Nu cabí sí' lu nē'e le rinná bē'ē Dios ca runbi' tu bí'ido', bití' ca' tsaza ga nī' rinná bē'ē.

¹⁶ Ní'irō Jesús bunidē'-bi' yugu' bí'ido' na'. Guxóa nē'ē légacabi', en bulidza tsáhuē'ē-bi'.

Bönni' cuidi' napë' yöl-la' tsahui'
(Mt. 19:16-30; Lc. 18:18-30)

¹⁷ Cate' bu'ë Jesús nōza, carelō bidë' tu bönni', en buzóa xzibë' lahuë' Jesús, en gunábinë' Lë', rnnë':

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

¹⁸ Jesús gudxë' lë':

—¿Bizx que ru'u neda' didza', rnno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. ¹⁹ Chinōz quézinu' yugu' le gunná bë'ë Dios, gunnë':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bōnachi.

Biti' cuanu'.

Biti' innío' que luzó'o le cabí nácatë.

Biti' ucáchi'lanu'.

Ben bal xuz xinó'o.

²⁰ Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' bí'ido'.

²¹ Len yöl-la' dxi'i ladxi' queë', Jesús buyúë' lë', rnnë':

—Tu le riyadzaj quiu'. Guyéaj, yōjēti' yúgu'të le dë quiu', en bunōdzaj quégaca bōnachi yechi' lë na' si'u, atë' gata' quiu' yöl-la' tsahui' yehua' yubá. Ní'irō huōdu' quia', gacu' ca tu bönni' sa'yéajë' sōjtë'ë lë'e yaga cruz, atë' to'o neda'.

²² Cate' biyōnnë' didza' ni, bui'innë', atë' sōhuōjë' risëbi lādxë'ë tu' dēda' yöl-la' tsahui' queë'.

²³ Ní'irō buyúë' Jesús gāsibi'llë', en gudxë' yugu' bönni' usēda queë':

—Bōniga naca ila' yaza nupa ta'lé'e yöl-la' tsahui' ga rinná bë'ë Dios.

²⁴ Bulu'bāninë' bönni' usēda queë' ca naca xtídzë'ë, atë' leyúbölō Jesús gudxë' légaquië':

—Libi'ili', xzí'ina'do', bōniga naca ila'yázië' bönni' tu'zxōni lādxigāquië' yöl-la' tsahui' quégaquië' ga rinná bë'ë Dios. ²⁵ Nācarō bōniga tsázië' nu bönni' rilë'enë' yöl-la' tsahui' ga rinná bë'ë Dios, ca tōdiba' bōa' ta'bía-ba' bōnachi lu nagui yōtsi'.

²⁶ Cate' bila'yōnnë' didza' ni, bulu'bānitë'rōnë' ca'. Ta'nnë' la' légacasë':

—¿Nuzxi caz gaca ulá, channō?

²⁷ Buyúë' Jesús légaquië', rnnë':

—Biti' gaca gun bōnachi lë ni, pero huáquië' Dios, tu' rizéqui'në' Dios yúgu'të.

²⁸ Ní'irō Pedro gudxë' Lë':

—Xan, netu' nucá'anatu' yúgu'të, en dá'atu' Li'.

²⁹ Bubi'ë didza' Jesús, rnnë':

—Le nácatë rea' libi'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' xzí'inë', o xiyúë', tu' runë' xichina' o tu' runë' libán que didza' dxi'a quia', ³⁰ bönni' ni huazí' queë' ia'tú gayuá'tërō ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' xzí'inë', en yugu' xiyúë', enca' yugu' le ila'bía lādxigaca bōnachi lë', atë' lu yōdzōliō si' za', gata' yöl-la' na'bán idú queë'. ³¹ Zián nupa nácagaca lo na'a, ilaca cuídi'sō ni', atë' nupa nácagaca cuídi'sō na'a, ilaca lo ni'.

Leyúbölō rigubxjö'ë Jesús ca si' ilútië' Lë'

(Mt. 20:17-19; Lc. 18:31-34)

³² Cate' ni' yú'ugaquië' nōza, ta'benë' sōjāquië' Jerusalén, nanōruë' Jesús lógaquië' bönni' usēda queë'. Nanítiguequinë', en lu yöl-la' rádxisō sōjácalenë' Lë'. Leyúbölō Jesús guchë'ë quez idxínnutë' na'. Gusí lahuë' ru'ílenë' légaquië' didza' ca naca le ral-la' gaca queë'. ³³ Rnnë':

—Rilë'e quézili' ribenru' zéajru' Jerusalén ga ni' zoa nu udōdi neda', Bönni' Guljë' Bōnachi, lu ná'agaquië' bixúz unná bë', en lu ná'agaquië' bönni' yudo' usedi, atë' chúguie' quia' gátia', en ulu'dōdë' neda' lu ná'agaquië' bönni' zi'tu'. ³⁴ Bönni' na' ulu'titjë' neda', en ilúndë'ë neda' zi'. Ulu'chejë' neda' zxōna'. Ní'irō ilútië' neda', pero cate' gaca tsonna dza ubana' lu yöl-la' guti.

Jacobo en Juan ta'nábinë' Jesús bi gunë' quégaquië'

(Mt. 20:20-28)

³⁵ Ní'irō gula'biguë'ë Jacobo, en Juan, xzí'inë' Zebedeo, lahuë' Jesús, en tē' Lë':

—Bönni' Usedi, rë'ënitú' gunu' queëtu' le inábatu'.

³⁶ Jesús gudxë' légaquië':

—¿Bizxi rë'ënilí' guna' queëli'?

³⁷ Guljë' Lë':

—Cate' idxín dza cō'u ga inná bë'u, ben ga cō'ōtu' tutu' cuitu' ibëla, en ia'tutu' cuitu' yōgōla.

³⁸ Ní'irō Jesús gudxë' légaquië':

—Biti' nōzili' bi rinábali'. ¿Naru' huáca si'ili' le ral-la' si'a neda', le naca le qui'i saca'a? ¿Naru' huáca idílali' nisa ca idíla' neda' nisa, gátia'?

³⁹ Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácátë, le qui'i saca'a neda', sí'ili' ca' libí'ili', en ca idila' neda' nisa, idí'lali' ca' nisa,
⁴⁰ pero bití' dë lu na'a có'a' nu cuía cuita' ibëla, en nu cuía cuita' yögöla. Dios unódzjë' quégaquië' bönni' chinupë'ë quégaquië' yugu' lataj na'.

⁴¹ Cate' bila'yönnë' ia'chíë' bönni' usëda queë' Jesús didza' ni, gula'lenë' Jacobo, en Juan na'. ⁴² Ní'irö Jesús bulidzë' légaquië', rnnë':

—Nöz quézili' ca tun nupa ta'nná be'e yugu' yödzö, tu'zenë' bach bönachi, ate' nupa nácagaca lo ládjagaquië' ta'nná be'e luzë'eguequi. ⁴³ Bití' gaca caní queëli', pero nu guë'ëni gaca zxön ga zóali', ral-la' gun xichinli' ia'zica'röli', ⁴⁴ ate' nütí'tëslöli' nu guë'ëni gaca lo ral-la' gaca ca bönni' huen dxin tsaz queëli' yúgu'tëli'. ⁴⁵ Caní ral-la' gunli' tu' bida' ni neda', Bönni' Guljë' Bönachi, calëga para nu gun xichina', pero para guna' xichíngaca bönachi, en udöda' yöl-la' na'bán quia' le huó'a'uida' bönachi zían.

Jesús ruinë' Bartimeo, bönni' lo chul-la

(Mt. 20:29-34; Lc. 18:35-43)

⁴⁶ Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ni' rurujë' Jesús yödzö ni, dzágagaquië' Lë' yugu' bönni' usëda queë', enca' bönachi zían. Ra' nöza ni' rö'ë tu bönni' nachul-la lahuë', lë' Bartimeo, zxi'inë' Timeo. Rinabë' nu bi gúnnasö queë'. ⁴⁷ Cate' biyönnë' Bartimeo ridödë' Jesús, bönni' Nazaret, ni', gusi lahuë' ru'ë zidzaj didza', rnnë':

—¡Jesús, zxi'ini xi'sóë' David! ¡Buéchi' ladxi' neda'!

⁴⁸ Nupa ta'dödi ni' gula'dil-la lë' didza'. Të lë':

—Busayaj ru'u.

Ní'irö zidzajrö bulidzë', rnnë':

—¡Zxi'ini xi'sóë' David! ¡Buéchi' ladxi' neda'!

⁴⁹ Ní'irö guzóë' dxisö Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të lë':

—¡Butipa ládxi'u! ¡Guyaschi! ¡Rulidzë' li'!

⁵⁰ Ní'irö gurú'unë' tsólá'alö lari' naxóa yenë'. La' guyásatë', en bidë' ga na' zoë' Jesús.
⁵¹ Jesús gunábinë' lë', rnnë':

—¿Bizxi rë'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, rë'ënda' gunu' ga huó'alaj guiöj lahua'.

⁵² Jesús gudxë' lë':

—Bóaj lidxu'. Chinuhuóácu' tu' réajlë'u neda'.

La' bóaljatë guiöj lahuë', ate' sa'yéajlenë' Jesús.

11

Riyazië' Jesús yödzö Jerusalén

(Mt. 21:1-11; Lc. 19:28-40; Jn. 12:12-19)

¹ Bila'dxinë' Jesús, en yugu' bönni' dá'gaquië' Lë' gala' ga dë Jerusalén, ga na' nacuá' yödzö Betfagé, en yödzö Betania, en ga na' dë ca' Guí'a Yaga Olivo. Ní'irö Jesús gusöl-lë'ë chopë' bönni' usëda queë', ² en rë' légaquië':

—Guli'tséaj lu yödzödo' dë loru' ni', en cate' tsú'uli' ni', tsöjxáca'li'-ba' tuba' búrrodo' nága'ba' ni', en cuntú nu ribáni lëba'. Guli'sedxi-ba', en guli'chë'-ba' quia' ni'. ³ Channö nu bi guíë libí'ili' tu' runli' lë ni, guli'guië nu na': "Xanru' riquinnë'-ba', ate' la' usöl-la'të'-ba' quiu'."

⁴ Ní'irö yójáquië', en yójxáca'gaquië'-ba' búrrodo' na', nága'ba' ra' nöza ga nu riyaza lö'a, ate' gula'sedxë'-ba'. ⁵ Nupa nacuá' ni' tē légaquië':

—¿Bizxi ni runli'? ¿Bizx que risédxili'-ba' búrrodo' na'?

⁶ Bulu'bi'ë didza' bönni' usëda queë' Jesús, gulë' légaquië' ca na' chigudxi cazë' Jesús légaquië', ate' gulu'ë légaquië' lataj. ⁷ Ní'irö gula'chë'-ba' búrrodo' na' ga na' zoë' Jesús. Gula'xóë' lari' quégaquië' cúdzu'ba', ate' Jesús gudxië'-ba'. ⁸ Zían bönni' nacu'ë ni' gula'chiljë' lari' quégaquië' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

⁹ Gula'sí lo nupa nanörugaca lahuë' Jesús, en nupa na' zá'gaca cúdzu'lë' tu'i zidzaj didza', ta'nnë':

—¡Yöl-la' ba! ¡Xanru' Dios gun lá'ayë' Bönni' zë'ë ni, nasöl-lë'ë Dios Lë'! ¹⁰ ¡Dios gun lá'ayë' Bönni' ni si' inná bë'ë, ca na' gunná bë'ë xuz xtó'oru' David! ¡Yöl-la' ba Dios!

¹¹ Caní guca, bidxinē' Jesús Jerusalén, ate' guyáziē' lō'a yudo'. Cate' budxi buyúē' yúgu'tē le nacuá' idú gásibi'lō ni', burúajē' zaca' yōdzō Betania tu' chiridzō', ate' dzágagaquiē' Lē' yugu' bōnni' usēda queē'.

Jesús rulidza zi'ē tu yaga higo

(Mt. 21:18-19)

¹² Cate' za' rení' ia'tú dza, ate' tu'rúajē' Jesús, en yugu' bōnni' dá'gaquiē' Lē' yōdzō Betania, ridunē' Jesús. ¹³ Zi'tu' bilé'enē' tu yaga higo dxía xilagui'. Gubígui'ē ga na' zoa yaga na' channō utsōjxaquiē' lati' le ribía. Cate' bidxinē' ni' bití' bi yōjxáquiē' le ribía. Xilágui'sō dxía tu' cabí ridxini dza cuía. ¹⁴ Ní'irō Jesús bulidzē' yaga na', rnnē':

—Bití'rō nu gagu le ribía quiu'.

Yugu' bōnni' usēda queē' bila'yōnnē' didza' ni.

Jesús rulatjē' lō'a yudo'

(Mt. 21:12-17; Lc. 19:45-48; Jn. 2:13-22)

¹⁵ Cate' bila'dxinē' Jesús, en yugu' bōnni' dá'gaquiē' Lē', yōdzō Jerusalén, guyáziē' Jesús lō'a yudo', en gusi lahuē' rubéajē' ní'lō nupa tuti', en nupa to'o lu lō'a yudo'. Burixē' yugu' blaga quégaca nupa tu'tsá' dumí izá'a, enca' yugu' ga ta'bō' nupa tuti' yugu' gu'dōdo'. ¹⁶ Bití' ca' bē'ē lataj nu bi guá', uzóa nōza ga naca lō'a yudo'. ¹⁷ Busēdinē' nupa nacuá' ni', rnnē':

—Nazúaj lu guichi lá'ayi, rnna: “Lidxa' si'i le, yu'u ga bōnachi idútē yōdzólió ulu'lidza Dios.” Libí'ili' chinunli' le ca naca lidxigaca gubán.

¹⁸ Cate' yugu' bixúz unná bē', en yugu' bōnni' yudo' usedi bila'yōnnē' didza' ni, gula'sí lógaquiē' tu'guljē' naxci ilútiē' Jesús, pero tu' tádxinē' le ilún bōnachi, bití' bi gulunē' queē', tu' tu'bani yúgu'tē bōnachi ca naca le rusēdinē' Jesús. ¹⁹ Cate' chiridzō' burúajē' Jesús lu yōdzō na'.

Ribidxi yaga higo bulidza zi'ē Jesús

(Mt. 21:20-22)

²⁰ Cate' za' rení' ia'tú dza, gula'dōdē' Jesús, en yugu' bōnni' dá'gaquiē' Lē' ga zoa yaga higo na' bulidza zi'ē Jesús, en bila'lé'enē' le, chinabidxi idú luí. ²¹ Ní'irō yōjnenē' Pedro bi guca, ate' gudxē' Jesús:

—Bōnni' Usedi, buyútsōca'. Chinabidxi yaga higo ni bulidza zi'u néaje.

²² Bubi'ē didza' Jesús, rē' légaquiē':

—Gulí'tseajlē' Dios. ²³ Le nácátē rea' libí'ili', channō nu bōnni' guíē' gu'ado' ni: “Gucuíta ni, yōjsóa lu nísado”, en bití' gaca chopá lādxē'ē bōnni' na', pero idú lādxē'ē tseajlē'ē gunē' Dios ca na' rnnē', ca' gaca. ²⁴ Que lē ni na' rea' libí'ili': Yúgu'tē le inábali' cate' ulídzali-nē' Dios, gulí'tseajlē' gachennē' Dios queéli' lē na' rinábali', ate' gunnē' queéli'. ²⁵ Cate' nī' rulídzali-nē' Dios, channō zoa nu ríleli' nu bi ben queéli', bulí'niti lo nu na', para uniti lahuē' ca' libí'ili' Xúzili' na' zoē' yehua' yubá ca naca dul-la' nabága'li'. ²⁶ Channō cabí uniti loli' bōnachi, bití' uniti lahuē' Xúzili' zoē' yehua' yubá libí'ili' dul-la' nabága'li'.

Yöl-la' unná bē' dē lu nē'ē Jesús

(Mt. 21:23-27; Lc. 20:1-8)

²⁷ Ní'irō Jesús, en yugu' bōnni' dá'gaquiē' Lē' yōjhuōjgaquiē' Jerusalén. Cate' nī' ridē' Jesús ga naca chila yudo', bila'dxinē' yugu' bixúz unná bē', en yugu' bōnni' yudo' usedi, en bōnni' gula tu'zéajni'inē', ga zoē'. ²⁸ Gula'nábinē' Jesús, ta'nnē':

—¿Bizxi yöl-la' unná bē' dē lu no'o runu' yugu' lē ni? ¿Nuzxi caz budōdi lu no'o yöl-la' unná bē' gunu' caní?

²⁹ Bubi'ē didza' Jesús, rē' légaquiē':

—Neda' ca' inábida' libí'ili' tu didza'. Channō ubí'ili' quia' didza', ní'irō guía' libí'ili' bi yöl-la' unná bē' rúnida' yugu' lē ni. ³⁰ ¿Nuzxi budōdi lu nē'ē Juan uquilē' bōnachi nisa? ¿Naru' Dios o bōnachi? Gulí'nnátsōca'.

³¹ Gula'sí lógaquiē' tun xtídzá'gaquiē' la' légacasē', ta'nnē':

—Channō innaru' Dios gusól-lē'ē lē', guíē' rē'u: “¿Bizx que bití' guyéajlē'ēli' lē'?” ³² ¿Naru' guíetsaru'-nē': Gula'sól-lē'ē bōnni' lē'?

Caní ta'zá' lādxí'gaquiē' tu' tádxinē' le ilún bōnachi zían nacuá' ni' tu' téquiguequi yúgu'tē bōnachi na' bē'ē didza' Juan na' uláz queē' Dios. ³³ Que lē ni na' gulē' Jesús:

—Bití' nōztu'.

Ní'irō Jesús gudxē' légaquiē':

—Neda' ca' bití' quíxjōi'ida' libí'ili' bi yöl-la' unná bē' dē lu na'a rúnida' yugu' lē ni.

12

Rucúdu'ē didza' Jesús ca gaca quégaca huen dxin bití' nácagaca tsahui'

(Mt. 21:33-46; Lc. 20:9-19)

¹ Ní'irō gusí lahué' Jesús ru'ílenē yugu' bōnni' dá'gaquiē' Lē' didza' yugu' le rucúduz'ē didza', rnnē':

—Guzōē' tu bōnni', budē'ē lubá uva zían ga naca lu xiyúē'. Guléquie' lē'a que, en guchō'ōnē' tu rōga' guiōj ga isíē' xisi uva na'. Budxiē' tu yu'u gupa ga naca xitsá' ga nu uyú xiyúē' na'.

Ní'irō budōdē' xiyúē' na' lu ná'agaquiē' huen dxin, ila'zi'ē gatsaj huéaj le unōdzaj, ate' guyijē' yōdzō zi'tu'. ² Cate' bidxín dza ulu'chibē' le ribía, gusól-lē'ē-bi' bi'i huen dxin tsōjxi'ibi' lu ná'agaquiē' huen dxin na' le ral-la' si'ē xanbi' que le gula'bía lubá uva na'. ³ Ní'irō yugu' huen dxin na' gula'guélē'ē-bi' bi'i na', en gulundē'-bi' zi', ate' bulu'sól-lē'ē-bi' cá'asōbi'. ⁴ Ní'irō bōnni' xan luyú na' gusól-lē'ē-bi' ia'tubi' bi'i huen dxin queē', ate' bi'i ni bulu'ladxē'-bi' guiōj. Bulu'lē'ē ícjabi'. Gulu'ē dō' queēbi'. ⁵ Ní'irō bōnni' xan luyú na' gusól-lē'ē-bi' ca' ia'tubi' bi'i huen dxin queē', ate' bi'i ni gulútiē'-bi'. Gusól-lē'ē-bi' ca' zíanrōbi', ate' bál-labi' gulúngacadē'-bi' zi', en ia'bál-labi' gulútigaquiē'-bi'.

⁶ Cúnturō nu nagá'ana queē' xan luyú na'. Nagá'anasibi' zxi'inē', ate' nadxí'ide'enē'-bi'. Ga yōjsetē', gusól-lē'ē-bi' zxi'inē', rnnē': "Ilunē' bal zxi'ina'." ⁷ Ní'irō yugu' bōnni' huen dxin na' gula'nnē' la' lé'gacase', ta'nnē': "Bi'i ni ral-la' guequi queēbi' luyú ni. Guli'dá, gútiru'-bi', ate' guequi queēru' luyú ni." ⁸ Que lē ni na' gula'zōnē'-bi', en gulútiē'-bi'. Gula'ru'unē'-bi' ní'lo ga dá'gaca lubá uva na'.

⁹ Ní'irō Jesús gunábinē' bōnni' nacu'ē ni', rnnē':

—¿Naxi gunē' bōnni' xan luyú na', channō? Huidē', en gútigaquiē' bōnni' huen dxin na', ate' udōdē' luyú na' lu ná'agaquiē' bōnni' yúbōlō.

¹⁰ ¿Naru' cabí nulábanilí' lē na' nazúaj lu guichi lá'ayi? Caní rRNA:

Guiōj na' gula'ru'unē' bōnni' tu'cu'ē zō'ō, na'a naca guiōj len, squin zō'ō.

¹¹ Xanru' Dios benē' ga naca caní ate' rubániru' ca naca lē ni rilē'eru'.

¹² Ní'irō ta'zóa ta'bō'ē ila'zōnē' Jesús tu' téquibe'enē' bucúduz'ē didza' ca naca quégaquiē', pero tádxinē' le ilún bōnachi zían nacua' ni', en que lē ni na' bulu'cá'anē' Lē', sōhuōjgaquiē'.

Ca naca le ta'guízaj lázagaca bōnachi

(Mt. 22:15-22; Lc. 20:20-26)

¹³ Gudōdi lē ni yugu' bōnni' yudo' unná bē' na' gula'sól-lē'ē bal-lē' bōnni' yudo' fariseo len bōnni' dá'gaquiē' Herodes ga zoē' Jesús para ilunē' ga bi innē' para gaca ulu'zéguiē' Lē' didza'. ¹⁴ Bila'dxinē' bōnni' ni ga na' zoē' Jesús, en tē' Lē':

—Bōnni' Usedi, nōzitu' ru'u didza' idútē li. Biti' ru'i lādxu'u bi ta'nnasō bōnachi, tu' cabí ruyusu' le tu'lu'isō cuínguequi bōnachi, pero rusédinu' ca nácatē le rē'ēnē' Dios ilún bōnachi. ¿Ru'i netu' lataj xibá queē' Moisés quízaj lastu' le tu'quízaj' uláz queē' César? ¿Naru' uguízajtu' o biti' quízajtu'?

¹⁵ Réquibe'enē' Jesús tu'ē didza' lu yōl-la' rigulaj ladxi' quégaquiē', ate' rē' légaquiē':

—¿Bizx que rubéajli' neda' didza'? Guli'diguá'tsōca' tu dumí ridá para ilé'eda' le.

¹⁶ Diguá'agaquiē' le, ate' Jesús gunábinē' légaquiē', rnnē':

—¿Nuzzi lahuí da' lē'e ni, en nuzzi lē ni?

Bulu'bi'ē didza', ta'nnē':

—Queē' César na'.

¹⁷ Ní'irō Jesús gudxē' légaquiē', rnnē':

—Buli'nōdzaj queē' César le nequi queē' César, ate' queē' Dios le nequi queē' Dios.

Bulu'bábinē' ca naca didza' bubi'ē Jesús.

Ca naca que yōl-la' rubán lu yōl-la' guti

(Mt. 22:23-33; Lc. 20:27-40)

¹⁸ Ní'irō bila'dxinē' bal-lē' bōnni' yudo' saduceo ga zoē' Jesús. Bōnni' ni ta'nnē' biti' ulu'bán nupa chinátigaca. Que lē ni na' gulé' Jesús, ta'nnē':

¹⁹ —Bōnni' Usedi, Moisés nuzúaj' queēru' lu guichi channō gátie' tu bōnni' biti' zoa bi'i queē', ate' ugá'ananu nigula queē', bi'i bōchē'ē bōnni' na' ral-la' utsaga ná'alēnbi'-nu, en uzóabi' bí'ido' gácabi' bi'i queēbi' bōchi'bi'. ²⁰ Gula'cuá'abi' gádxibi' bi'i ná'cagacabi' bōchi'gacabi'. Bi'i huáca na' butsaga ná'alēnbi'-nu nigula, ate' gútibi', cuntú nu zoa bí'ido' queēbi'. ²¹ Bi'i buropi na' butsaga ná'alēnbi'-nu nigula uzēbi' na', ate' gútibi' ca', cuntú nu zoa bí'ido' queēbi'. Lē'sca' caní guca queēbi' bi'i bunni. ²² Caní guca, bulu'tsaga ná'alēnbi'-nu yúgu'tēbi', cuntú nu zoa bí'ido' qué'gacabi'. Ga yōjsetē', gútinu' ca' nigula na'. ²³ Na'a, cate' ulu'bán nupa chinátigaca, ¿nuzxilōbi' guéquinu nigula na' queēbi', tu' bulu'tsaga ná'alēnbi'-nu igádxitēbi'?

²⁴ Bubi'ē didza' Jesús, rē' légaquiē':

—Richíxili' tu' cabí núnbē'ēli' le nazúaj lu guichi lá'ayi, en biti' nōzili' ca naca yōl-la' huáca queē' Dios. ²⁵ Cate' ulu'bán nupa chinátigaca, biti' ca' ulu'tsaga ná'agaquiē', ate' yugu' bōnni' biti' ila'cuá'lenē' nigula, pero ilácagaquiē' ca ná'cagaquiē' gubáz lá'ayi queē' Dios,

nacu'ë yehua' yubá. ²⁶ Na'a, ca naca quégaca nupa chinátigaca channö ulu'bán, ¿naru' cabí nulábanili' le buzúajë' lu guichi Moisés? Ruí'i didza' ca na' bulidzë' Dios lë' lu yaga yôtsi'do' régui. Gudxë' lë': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunnë' caní quégaquië', naca bë' nabángaquië' sal-la' gulátí' zí'alö. ²⁷ Dios náquië' Dios quégaca nupa nabángaca, calëga quégaca nupa nátigaca tsaz. Richíxitéröli'.

Le naca lo le gunná bë'ë Dios

(Mt. 22:34-40)

²⁸ Bidë' ca' tu bönni' yudo' usedi ga zoë' Jesús. Biyönnë' ca na' guluf'ilenë' Jesús didza', en nözínë' dxí'ado' bubi'ë Jesús didza'. Que lë' ni na' gunábinë' Jesús, rnnë':

—¿Bízxiölö le gunná bë'ë Dios nácatërö lo ca yúgu'të le gunná bë'ë?

²⁹ Bubi'ë didza' Jesús, rë' lë':

—Le gunná bë'ë le nácatërö lo ca yúgu'të naca lë' na' rnna: "Guli'yöni bönachi Israel. Xanru' Dios, tuzë' Lë' náquië' Xanru'. ³⁰ Ral-la' idxí'inu' Xanu' Dios idú ládxu'u, en lu idú icja ládxí'do'o, en lu idú yöl-la' réajni' quiu', en lu idú yöl-la' huáca quiu'." Lë' ni naca le gunná bë'ë le nácatërö lo. ³¹ Le gunná bë'ë le naca buröpi, lëbisö ca naca. Caní rnna: "Ral-la' idxí'inu' luzó'o ca nadxí'i cuinu'." Biti' ca' zoa ia'tú le gunná bë'ë le nácarö lo ca chopa ni gunná bë'ë.

³² Ní'irö bönni' yudo' usedi na' gudxë' Jesús, rnnë':

—Dxí'ado' gunnö', Bönni' Usedi. Le nácatë rnno'. Tuzë' náquië' Dios, en cúnturö nu zoa naca Dios. ³³ Para idxí'iru'-në' Dios idú ládxí'ru', en lu idú yöl-la' réajni' queëru', en lu idú icja ládxí'do'oru', en lu idú yöl-la' huáca queëru', en para idxí'iru' luzá'aru' ca nadxí'i cuinru', nácarö lesaca' ca yúgu'të böa' bëdxido' rútigacaru'-ba' lu bucugu lá'ayi queë' Dios, enca' ca yúgu'të böa' bëdxido' ruzégui'gacaru'-ba' lu bucugu na'.

³⁴ Cate' biyönnë' Jesús dxí'ado' rubi'ë didza' bönni' ni, ní'irö gudxë' lë', rnnë':

—Ia'látí'sö riyadzaj quiu' gúnbë'u le rinná bë'ë Dios.

Cúnturö nu burugui bi inábini Jesús.

¿Nuzxi zxf'ini náquië' Cristo?

(Mt. 22:41-46; Lc. 20:41-44)

³⁵ Cate' ni' rusédinë' Jesús bönachi ga naca chila yudo', rnnë':

—¿Bizx que ta'nnë' bönni' yudo' usedi náquië' Cristo zxf'ini xi'sóë' David? ³⁶ Lë' cazë' David na' bë'ë didza', zóalenë' Dios Bö' Lá'ayi lë', gunné':

Xanru' Dios gudxë' Xana':

"Gurö'ö cuíta lë'a ibëla

cate' gunra' ga ulu'zóa xzíbigaca lo'

nupa bití' ta'lé'e Li' dxí'a."

³⁷ ¿Naru' nácatsë' Cristo zxf'ini xi'sóë' David channö lë' cazë' David na' rnnë' queë' náquië' Xanë'?

Bönachi zían nacuá' ni' tu'zé nágagaca Lë' gula'yaza ládxí'gaca didza' ni.

Jesús ruzéqui'ë didza' bönni' yudo' tu'sédinë'

(Mt. 23:1-36; Lc. 11:37-54; 20:45-47)

³⁸ Ni' rusédinë' Jesús yugu' bönni' dá'gaquië' Lë', rë' légaquië':

—Guli'gún chí'i cuinli' quégaquië' bönni' yudo' tu'sédinë'. Ta'yaza ládxí'gaquië' ta'dë' nilö na'lö, nácugaquië' lari' tunna. Ta'yaza ládxí'gaquië' ca' tu'lidza tsahui' bönachi légaquië' gapa naca lu yë'ëyi. ³⁹ Ta'bö'ë yugu' lataj lo lu yu'u ga tu'dubë' tu'sédë' queë' Dios, enca' gapa tu'dubë' tē'aj tahuë'. ⁴⁰ Rugúagaquië' lédigacanu nigula uzëbi, en para ulu'lu'isö tsahui' cuíngaquië', xidzé tu'lidzë' Dios. Bönni' ni, gúnda'rë' Dios légaquië' xíguia'.

Le bunödžjanu tu nigula uzëbido' queë' Dios

(Lc. 21:1-4)

⁴¹ Tsanni ni' rë'ë Jesús chila yudo' ga zoa guí'ina ga ta'gú'u bönachi dumí que yudó', ruyúë' ca tun bönachi ta'gú'u dumí lu guí'ina. Dumí zían ta'gu'ë bönni' dë yöl-la' tsahui' quégaquië'. ⁴² Ní'irö bidxinnu tu nigula yechi' uzëbido' ni', ate' gulú'unu chopa dumí lásido', le nazáca'gaca láti'do'os. ⁴³ Ní'irö bulidzë' Jesús yugu' bönni' usëda queë', en rë' légaquië':

—Le nácatë rea' libí'ili', nigula yechi' uzëbido' ni gulú'urönu ca yúgu'të nupa bi ta'gú'u lu guí'ina que yudo'. ⁴⁴ Yúgu'të bönni' ni ta'gu'ë que le nagá'anasö quégaquië', pero nigula ni, lu yöl-la' yéchi'do' queënu gulú'unu idütë la's dui tsca le dësö queënu, le ral-la' gáhuinu.

13

Rigúxjö'ë Jesús ca si' ulu'químmajë' yudo'

(Mt. 24:1-2; Lc. 21:5-6)

¹ Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guiöj lë'e zö'ö quéguequi.

² Bubi'ë didza' Jesús, rë' lë':

—Rilë'enu' yugu' yu'u zxön ni, pero biti' ca' ugá'ana guiöj lahui luzë'e ni, tu' ulu'quínaj bönachi léguequi.

Le ilaca bë' cate' si' údxi que yödölió

(Mt. 24:3-28; Lc. 21:7-24; 17:22-24)

³ Ní'irö yójáquië' Jesús, en yugu' bönni' dá'gaquië' Lë' lu Gu'fa Yaga Olivo, gu'fa na' dë ca dödlö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulë' Lë', ta'nnë':

⁴ —Gudíxjói' netu' bátaxi ilaca lë ni. ¿Bizxi gaca bë' chizóa ilaca yúgu'të lë ni?

⁵ Bubi'ë didza' Jesús, rusëdinë' légaquië', rnnë':

—Guli'gún chí' iuinli' para cabí nu si' ye'e libí'ili'. ⁶ Ila'lá' lahuë' zían bönni' si' légaquië' ca lea' neda', ila'nnë' náccagaquië' Cristo. Caní ila'z'í' yé'enë' bönachi zían.

⁷ Ní'irö cate' yönlí' raca gudil-la nilö ná'alö, biti' gádxili'. Yúgu'të lë ni ral-la' ilaca, pero biti' ridxini dza údxi. ⁸ Tu yödözöl-tál-lalen ia'tú yödöz, en tu ga nu rinná bë'. Zían lataj tödi budö' zxu', en tsu'u gubín. Ila'tsatsa bönachi. Yugu' lë ni ilaca le isí lo ila'gu'í ila'zaca' bönachi dza ni'.

⁹ Ní'irö guli'gún chí' iuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dubë' tu'sëdë' queë' Dios bönni' judío. Idxinli' lógaquië' bönni' ta'nná bé'enë' libí'ili', en lógaquië' bönni' ta'nná bé'enë' yödöz z'itu'. Ilunë' caní queëli' tu' dá'ali' neda', pero gunli' ba nali' quia' neda' ni'. ¹⁰ Zí'alö ca idxín dza údxi, run bayudxi gaca libán que didza' dxi'a quia' lógaca bönachi idütë yödölió. ¹¹ Cate' ni' ila'chë'ë libí'ili', en ulu'dödë' libí'ili' lu ná'agaquië' bönni' yúlahui', biti' gü'í ládxi'li' bizxi innali'. La' dza ni'isö Dios gunné' queëli' didza' gü'í'ili', ate' lë ni innali'. Cate' ni' gü'í'ili' didza', calëga libí'isili' na' innali', pero Dios Bö' Lá'ayi innë'. ¹² Ulu'dödi bönachi la' böchi'gacasö lu ná'agaquië' bönni' ilütie' légaquië'. Yugu' bönni' nacua'abi' bi'í' quégaquië' ulu'dödë' la' zxi'inigaca cazë' ca', ate' zxi'inigacaquië' na' ulu'dödi'bi' la' xuz xiná'agaca cázabi' lu ná'agaquië' bönni' ilütie' légaquië'. ¹³ Yúgu'të bönachi ulu'zóa libí'ili' tsölá'alö tu' dá'ali' neda', pero nülöli' guá' ilenli' lë na' ga idxinrö dza údxi, uláli'.

¹⁴ Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bë'ë didza' uláz queë' Dios, le rnna caní: "Tsaz tu' le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacua' luyú Judea, en tsöjaca gapa naca lu gu'ado'. ¹⁵ Nu zoa icjo'olö dza ni' ral-la' izxunnajtë, en biti' huötaj zzan yu'u para tsöjzxi' bi dë que lu yu'u. ¹⁶ Nu zoa la' guixi' ral-la' izxunnajtë, en biti' huötaj tsöjzxi' lari' rixóa yeni. ¹⁷ Bica' bayechi' yugu' nigula dza ni' nuá'agacanu-bi' bí'ido', enca' nigula tu'gádxí'nu-bi' bí'ido'. ¹⁸ Buli'lidzë' Dios inábili'-në' cabí gun bayudxi izxunnajli' cate' raca beo' ziaga ca'. ¹⁹ Yugu' dza ni' ila'gu'í ila'zaca'rö bönachi ca le guca zí'atëlö cate' si' guta' yödölió le benë' Dios ga ridxintë na'a dza, ate' dza zá'gaca biti' gaca caní. ²⁰ La'tu' cabí nunë' Dios ga ulu'huóaca nabábasö yugu' dza ni', cuntu nu ulá, pero tu' nadxi'inë' nupa chigurö cazë', chinunë' queë' gunë' ga ulu'huóaca nabábasö yugu' dza ni'.

²¹ Na'a, channö nu guíë libí'ili': "Buli'yútsöca', ni zoë' Cristo", o inná: "Buli'yútsöca', ni zoë'", biti' ca' tséajlë'ëli' nu na'. ²² Ila'lá' lahuë' zían bönni' ila'z'í' yé'enë' bönachi. Ila'nnë' náccagaquië' Cristo, en ila'nnë' náccagaquië' bönni' tu'ë didza' uláz queë' Dios. Ulu'lu'f'inë' le ilaca bë', en ilunë' yugu' yöl-la' huáca zxön. Huala'z'í' yé'enë' ca' nupa gurö cazë' Dios channö ila'zéqui'në'. ²³ Ní'irö libí'ili', guli'sóa ban ladxí'. Yúgu'të chigudxa' libí'ili' zí'atëlö ca gaca.

Ca huödë' Bönni' Guljë' Bönachi

(Mt. 24:29-35, 42-44; Lc. 21:25-36)

²⁴ Gunnë' ca' Jesús:

—Yugu' dza ni', tödi gaca dza na' ila'gu'í ila'zaca' caní bönachi, ichul-la gubidza, en biti' cu'u bení' beo'. ²⁵ Ila'guinnaj böljá lúzxiba, en ila'zxizi le nál-lagaca nalá'gaca lúzxiba na'. ²⁶ Ní'irö ila'lé'eni neda', Bönni' Guljë' Bönachi, za'a lu böljá lúzxiba, napa' yöl-la' huáca zxön, en yöl-la' bení' quia'. ²⁷ Isöl-la'gaca-në' gubáz lá'ayi quia', ate' ulu'tu'gë' bönachi gurö caza' quia' nacua' idapa la'a yödölió, ga naguëla'të luyú bidxi, ga ridxintë ga naguëla' lúzxiba.

²⁸ Guli'tséajni'i le rusedi yaga higo ni'. Cate' ta'lén ni'a në'e huë'énido', en rubía xilagui' yulu, nözilí' chizóa idxín beo' cusubá. ²⁹ Lësca' caní, cate' ilé'eli' taca lë ni, inözili' chizóa idxín dza údxi na', en chiridzaga lo. ³⁰ Le nácatë rea' libí'ili', yúgu'të lë ni ilaca zí'atëlö ca ilátigaca nupa nacua' dza na'. ³¹ Huadödi que lúzxiba, en que luyú ni, pero xtídza'a catu caz tödi que.

³² Cate' idxín dza ni' o rëla ni', cuntu nu nözi. Biti' nözguequinë' gubáz lá'ayi nacu'ë yehua' yubá, en biti' nözda' neda', Zxi'inë' Dios. Tuzë' Dios Xuz nözinë'. ³³ Que lë ni na', buli'subán

ládxi'li'. Guli'sóa sina', en buli'lidzë' Dios tu' cabí nózili' bizxi dza gaca lë ni. ³⁴ Gaca ca raca cate' sa'yéajë' zì'tu' tu bönni'. Cate' chizóa uzë'ë lidxë', udödë' lu ná'agaquië' huen dxin queë' yugu' le dë queë'. Que queëgaquië' gu'ë xichíngaquië', en inná bë'ë soa ban ladxì' nu zoa huen chi' ga nu riyaza. ³⁵ Guli'sóa libí'ili' ban ladxì' tu' cabí nózili' bátaxi huödë' xan yu'u, cate' chiridzö', o gatsaj lahui' yëla, o cate' ribödxiba' böra, o zílado'. ³⁶ Guli'gún caní, para cabí idixáquië' libí'ili' rásili' channö huödë' tsálido'os. ³⁷ Lë ni rea' libí'ili', rea' ca' yúgu'të bönachi: Guli'sóa ban ladxì'.

14

Tun xtídzagaquië' bönni' yudo' ila'zönë' Jesús

(Mt. 26:1-5; Lc. 22:1-2; Jn. 11:45-53)

¹ Ia'chopa dza ca' gaca Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. Naca laní cate' tahuë' yóta xtila bití' nazi' cúa zi que. Ta'zóa ta'bö'ë yugu' bixúz unná bë', en bönni' yudo' tu'sédinë' ila'zönë' Jesús bagáchi'sö para ilútië' Lë'. ² Ta'nnë':

—Bití' gaca sönru'-në' dza laní tu' ila'tsatsa bönachi.

Nigula rigú'unu le rilá' zxixi icjë' Jesús

(Mt. 26:6-13; Jn. 12:1-8)

³ Zoë' Jesús yödzo Betania, lu yu'u lidxë' Simón, bönni' güf'inë' huë' nudzu' ruzödi. Tsanni ni' rö'ë rahuë' Jesús, guyázanu tu nigula, nuá'anu tu böga'do' néquini guiöj zaca', yudzu le rilá' zxixi que yöj susën lasi idú, le nazaca' yenni'. Gulá'anu böga'do' na', en gulú'unu le rilá' zxixi na' icjë' Jesús. ⁴ Gula'lélanë' bal-lë' bönni' nacu'ë ni'. Ta'nnë' la' légacasë':

—¿Bizx que guca ditaj le zxixi na'? ⁵ La'tu' nu guti' lë na', huazí' que ia'lati' ca láxjaru' que tu iz para nu quisi le quégaca bönachi yechi'.

Gula'nnëdë'ë queënu.

⁶ Ní'irö Jesús bë'ë didza', rnnë':

—Guli'güf'i-nu lataj. ¿Bizx que rinnë zí'ili' queënu? Naca dxi'a le bennu quia'. ⁷ Nacuá'lentica'sö bönachi yechi' libí'ili', en bátati'tës gu'ë'nili', huáca gunli' dxi'a quégaquië', pero neda' bití' sóatica'sa' ga zóali'. ⁸ Tscá le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atëlö ca igácha'a yeru ba. ⁹ Le nácatë rea' libí'ili', gátí'tës ga gaca libán que didza' dxi'a quia' idú yödzólió, soa nu quixjö' ca' lë ni bennu nigula ni quia'. Caní gaca para nu tsójné lënu.

Rizí' lu në'ë Judas udödë' Jesús

(Mt. 26:14-16; Lc. 22:3-6)

¹⁰ Ní'irö birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'. ¹¹ Cate' bila'yönnë' xtídzë'ë Judas na', bulu'dzéjanë', ate' gula'zí' lu ná'agaquië' ilu'ë lë' dumí. Ní'irö gusi lahuë' Judas rizóa ribö'ë udödë' Jesús lu ná'agaquië'.

Le rë'aj ráguru' rusubanru' ca gútië' Xanru'

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Naca dza risí lo laní cate' tahuë' yóta xtila bití' nazí' cúa zi que, dza na' tutië'-ba' bö'cu' xzíla'do' tahuë'-ba' dzö' Laní Pascua na', cate' tu'subanë' ca benë' Dios busölë' bönachi judío luyú Egipto. Ní'irö bönni' usëda queë' Jesús gula'nábinë' Lë', ta'nnë':

—¿Gaxzi rë'ënu tséajtu' tsöjpa'atu' le gáguru' xtsö' que Laní Pascua?

¹³ Ní'irö Jesús gusöl-lë'ë chopë' bönni' usëda queë', en rë' légaguië':

—Guli'tséaj lu yödzo. Ní' huadzágali' tu bönni' nu'ë tu rö'ö nisa. Guli'tséajlenë'. ¹⁴ Ga na' tsázíë', guli'guië' xan yu'u na': "Rnnë' Bönni' Usedi: ¿Gaxzi zoa yu'u ga na' gágulengaca-në' bönni' usëda quia' xtsö' que Laní Pascua?" ¹⁵ Ní'irö uluf'inë' libí'ili' tu yu'u xzön ga naca buropi cuía ga chinabá'a. Buli'pá'a le gáguru' ni'.

¹⁶ Bila'rúajë' bönni' usëda queë' na', en bila'dxinë' lu yödzo, ate' yöjxáca'gaquië' yúgu'të ca na' chigudxë' légaguië' Jesús. Bulu'pë'ë le ilahuë' ni' que Laní Pascua.

¹⁷ Cate' chizá' ral-la, bidxinë' Jesús ni', dzágagaguië' idxínmutë' bönni' usëda queë' Lë'.

¹⁸ Tsanni ni' rö'ögaquië' tahuë', bë'ë didza' Jesús, rnnë':

—Le nácatë rea' libí'ili', zoa nu dzaga libí'ili', nu rágulen neda' tsözxön, nu udödi neda' lu ná'agaca bönachi.

¹⁹ Ní'irö bulu'huí'innë', en gula'sí lógaquië' tu tuë' të' Lë':

—¿Naru' neda'?

Ia'túë' ca' gunné':

—¿Naru' neda'?

²⁰ Bubi'ë didza' Jesús, rë' légaguië':

—Naca tu nu nutsa' ladaj chínnuli' ni, bönni' na' nunë'ë në'ë tsözxön len na'a lu yö'öna.
²¹ Tseja' ga gátia' neda', Bönni' Guljé' Bönachi, ca na' nazúaj lu guichi lá'ayi ca gaca quia',
 pero bica' bayechi' bönni' na' udödë' neda' lu ná'agaquie' bönni' ilútië' neda'. Gácarö dxi'a
 queë' bönni' na' la'tu cabi guljé'.

²² Tsanni ni' tahuë', gudélë'ë Jesús yöta xtila. Gudxé' Dios: "Xclenu'." Buzxuzxjé' le, en
 bë'ë quégaquie', rnnë':

—Guli'gagu. Lë ni naca bëla' rön quia'.

²³ Gudélë'ë ca' tu xziga'do', en gudxé' Dios: "Xclenu'." Ní'irö bë'ë quégaquie', ate' yúgu'té'
 gulé'ajé' le. ²⁴ Jesús rë' légaquie':

—Lë ni xichöna' le run tsutsu didza' cubi rucá'ana tsahui', le núnlenë' Dios bönachi. Rön
 ni ilalaj ni'a quégaca bönachi zían. ²⁵ Le nácatë rea' libí'ili', bití'rö guí'ja' xisi uva ga idxinrö
 dza guí'ja' le cubi ga ni' rinná bë'ë Dios.

Jesús rnnë' innë' Pedro biti' núnbë'ë Lë'

(Mt. 26:30-35; Lc. 22:31-34; Jn. 13:36-38)

²⁶ Gudödi gulúl-lë' yöl-la' ba, bila'rúajé' sôjáquie' Guí'a Yaga Olivo. ²⁷ Ní'irö Jesús gudxé'
 légaquie', rnnë':

—Yúgu'téli' gaca chopa ládxi'li', ucá'anali' neda' na'a dzö', tu' nazúaj lu guichi lá'ayi, rnna:
 "Gutia'-në' uyú bö'cu' xzila', ate' ilásilasiba' bö'cu' xzila' na'." ²⁸ Tödi ubana' lu yöl-la' guti,
 tseja' luyú Galilea zí'alö ca libí'ili'.

²⁹ Ní'irö Pedro gudxé' Jesús, rnnë':

—Sal-la' yúgu'té' ilaca chopa ládxi'gaquie', en ulu'cá'anë' Li', biti' ca' gaca chopa ládxa'a
 neda'.

³⁰ Jesús gudxé' lë', rnnë':

—Le nácatë rea' li', la' dzö' nisö, si' cödxilöba' böra le buropi luzuí, tsonna luzuí innó' biti'
 núnbë'u neda'.

³¹ Ní'irö Pedro buzötjé' Dios, rnnë':

—Sal-la' gátilentea' Li' tsözxön, biti' ca' innía' biti' núnbë'a Li'.

Lësca' caní gula'nnë' yúgu'té'.

Jesús rulidzé' Dios la' yëla Getsemani'

(Mt. 26:36-46; Lc. 22:39-46)

³² Ní'irö Jesús, en bönni' dá'gaquie' Lë' bila'dxinë' la' yëla Getsemani', ate' Jesús gudxé'
 légaquie', rnnë':

—Guli'cö' ni, tsanni tseja' neda', tsöjlidza'-në' Dios.

³³ Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxë'ë.

³⁴ Gudxé' légaquie', rnnë':

—Huati caza' lu yöl-la' risëbi ladxí'. Guli'cöz ni, en guli'ná' yëla.

³⁵ Ní'irö guzé'ë Jesús ia'láti'do', en busudxín lahuë' lu yu, bulidzé' Dios. Gunábinë' Lë',
 channö huáca, ucuítë' queë' le ral-la' qui'i sáquë'ë dza na'. ³⁶ Ní' rulidzé' Dios, rnnë':

—Xúza'do', yúgu'té' huáca gunu' Li'. Gucuíta lë na' ral-la' qui'i saca'a, pero calëga ca rë'ënda'
 neda', pero ca rë'ënu' Li', gunu'.

³⁷ Ní'irö böajé' Jesús ga na' nacu'ë bönni' usëda queë', ate' yöjxáquie' légaquie' tasië'. Gudxé'
 Pedro:

—Simón, ¿rásitso'? ¿Naru' cabí rubéajtso' yëla lo' tu chí'ido'? ³⁸ Guli'ná' yëla, en buli'lidzé'
 Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali'
 zoa caz sina', pero lu yöl-la' bönáchisö queë'li' ricuítí'li'.

³⁹ Ní'irö sa'yéajé' Jesús leyúbölö, rulidzé' Dios, en la' tuz ca gunnë'. ⁴⁰ Cate' böajé' leyúbölö
 ga na' nacu'ë, yöjxáquie' légaquie' tasië' tu' nadödité yëla lógaquie'. Biti' nözguequinë' bizxi
 didza' ulu'bi'ë, le ilë' Lë'. ⁴¹ Cate' böajé' le bunni luzuí ga na' nacu'ë, rë' légaquie':

—¿Rásitsali'? ¿Ruzi'tsa ládxi'li'? ¿Tsca'ti' gaz! ¿Chibidxín dza! ¿Buli'yútsöca', Neda', Bönni'
 Guljé' Bönachi, chinadöda' lu ná'agaca bönachi dul-la'! ⁴² ¿Guli'chasa, uyéajru! ¿Buli'yútsöca',
 chizë'ë bönni' na' udödë' neda' lu ná'agaca bönachi!

Ta'zönë' Jesús

(Mt. 26:47-56; Lc. 22:47-53; Jn. 18:2-11)

⁴³ Ní' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquie' Jesús,
 ate' zá'lengaquie' bönni' zían lë', nuá'agaquie' guie' tuchi', en yaga. Yugu' bixúz unná bë',
 en yugu' bönni' yudo' usedi, en bönni' gula tu' zéajni'inë' nasöl-la'gaquie' légaquie'. ⁴⁴ Judas,
 bönni' na' rudödë' Jesús lu ná'agaquie' chinuluf'inë' légaquie' tu le gunë' le gaca bë' nu naca
 Jesús, gunnë':

—Bönni' na' utsaga lahua'-në', Lë' na' Jesús. ¿Guli'sönë', en guli'ché'ë! ¿Guli'yútsöquie'!

⁴⁵ Cate' bidxinë' Judas ni', la' gubíga'të' ga na' zoë' Jesús, en gudxé' Lë':

—Bönni' Usedi, Bönni' Usedi.

Ní'irō busudxín lahuē' Jesús. ⁴⁶ Ní'irō gula'zōnē' Jesús, en gula'chē'ē Lē' nadzunē'.

⁴⁷ Ní'irō tuē' bönni' nī' dē'ē Jesús guléajē' guíē tuchi', en benē'-bi' huē' bi'i huen dxin queē' bixúz lo. Guchúguíē' guídi nágabi'. ⁴⁸ Jesús gudxē' bōnachi na', rnnē':

—¿Narúajtsali' nuá'ali' guíē tuchi', en yaga para sōnli' neda', runli' ca runli' cate' rizōnli'-nē' gubán? ⁴⁹ Yugu' dza guzólana' libí'ili' rusédigacada' bōnachi ga naca chila yudo', ate' biti' guzxlōnli' neda', pero raca caní para gaca le nazúaj lu guichi lá'ayi.

⁵⁰ Ní'irō yúgu'tē bönni' usēda queē' Jesús bulu'cá'anē' Le', ta'zxúnna'jē'.

Ríxúnna'jbi' tubi' bi'i ra'bán

⁵¹ Zóabi' ca' nī' tubi' bi'i ra'bán sōjnobi' Jesús, nuxóasō cuinbi' tu lari' blaga'. Yugu' bönni' na' nachē'gaquiē' Jesús gula'zōnē'-bi' ⁵² pero busanbi' lari' na', en xiguídisōbi' buzxúnna'jbi'.

Rídxinē' Jesús lógaquiē' bönni' yúlahui' lo

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Gula'chē'ē Jesús lahuē' bixúz lo, ate' bulu'dubē' nī' yúgu'tē bixúz unná bē', en bönni' gula tu'zéajni'inē', en yugu' bönni' yudo' usedi. ⁵⁴ Pedro yōjnahuē' Jesús zī'tu' zī'tu'sō, en guyáziē' lō'a lidxi bixúz lo na', en gurō'ōlenē' tsōzxōn yugu' nī'a nē'ē bixúz lo na', rutsē'e cuinē' ra' guí'.

⁵⁵ Yugu' bixúz unná bē' len yúgu'tē bönni' yúlahui' lo bulu'guiljē' tu le ulu'subáguíē' Jesús para gaca ila'chúguíē' queē' gátíē' pero biti' bi bulu'dzōlinē'. ⁵⁶ Bönni' zían gula'nnē' queē' Jesús le cabi'nacatē, pero biti' yōjlōzagaca le gula'nnē' queē'. ⁵⁷ Ní'irō gula'zuínē' yugu' bönni' gula'nnē' queē' Jesús le cabi'nacatē, ta'nnē':

⁵⁸ —Netu' biyōnitu' didza' bē'ē bönni' nī, gunnē': "Uquínna' yudo' nī, lē nī nequi lu nī'a lu na' bōnachi, ate' tsonna dzasō uchisa' ia'tú le cabi nequi lu nī'a lu na' bōnachi."

⁵⁹ Lē'sca' lē nī, biti' yōjlōzagaca xtídza'gaquiē'.

⁶⁰ Ní'irō guyasē' bixúz lo na' gatsaj láhui'lō bōnachi nacuá' nī', en gunábinē' Jesús, rnnē':

—¿Naru' cabi'rubi'tso' didza'? ¿Bizxi na' ta'nnē' quiu' bönni' nī?

⁶¹ Jesús, dxisō zoē'. Biti' bi didza' rubi'ē. Gunábinē' Lē' leyúbölō bixúz lo na', rnnē':

—¿Naru' nacu' Li' Cristo, Zxi'inē' Dios Lá'ayi?

⁶² Bubi'ē didza' Jesús, rnnē':

—Naca'. Ilé'eli' neda', Bönni' Guljē' Bōnachi, soa' cō'a cuitē' ibēla Dios napa cazē' yōl-la' huáca cate' nī' huōda' lu bōaj lúxiba.

⁶³ Ní'irō bixúz lo na', lu yōl-la' rilé queē' guchōzē' lari' nácuē', rnnē':

—¿Núzxirō naquíniru' nu quixjō'? ⁶⁴ ¡Riyōn quézili' rucá'anē' Dios cá'asō len didza' ru'ē! ¿Nacxi rusáca'li' queēli'?

Yúgu'tē' gula'chúguíē' queē' gátíē'.

⁶⁵ Ní'irō gula'sí lógaquiē' bal-lē' tu'chejē' Jesús zxōna'. Bulu'sayjē' lahuē', en gulundē' Lē' zī', ta'nnē':

—Gunnē' yá'atsōca' nuzxi na' bē' Li'.

Yugu' bönni' nī'a nē'ē bixúz lo gula'gápē'ē ru'ē Jesús.

Rnnē' Pedro biti' núnbē'ē Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Cate' nī' zoē' Pedro lō'a xzan yu'u, bidxinbi' tubi' bi'i nigula huen dxin queē' bixúz lo na' ga na' zoē'. ⁶⁷ Cate' bilé'ebi' Pedro, rō'ē rutsē'e cuinē' ra' guí, buyubi' lē', rnnabi':

—Do'o ca' li' Jesús, bönni' Nazaret na'.

⁶⁸ Gudá'baguiē' Pedro, rnnē':

—Biti' núnbē'a-nē', en biti' nōzda' bizxi na' ranno'.

Burúajē' Pedro yōjsóē' ga nu riyaza lō'a. Ní'irō gurōdxiba' bōra. ⁶⁹ Buyubi' lē' leyúbölō bi'i nigula huen dxin na', en gusí lobi' rēbi' nupa nacuá' nī':

—Bönni' nī dzáguíē' légaquiē'.

⁷⁰ Leyúbölō gudá'baguiē' Pedro. Ia'lati' gudzé nupa nacuá' nī' tē Pedro, ta'nná:

—Le nacatē dzagu' légaquiē', tu' nacu' bönni' Galilea. Yōl-la' ruf'isō quiu' didza' naca bē'u, tu' tuz ca ru'ili' didza'.

⁷¹ Gusí lahuē' Pedro rudxía dō' cuinē', en ruzōtjē' Dios, rnnē':

—Biti' ca' núnbē'a-nē' bönni' na' ru'ili' didza' ca naca queē'.

⁷² La' gurōdxitēba' bōra le buropi luzuí. Ní'irō yōjnenē' Pedro didza' na' bē'ē Jesús, gudxē' lē': "Zi'alō cōdxiba' bōra le buropi luzuí innó' biti' núnbē'u neda'." Cate' yōjnenē' didza' nī, gusí lahuē' ribōdxidē'.

15

Ridxinë' Jesús lahuë' Pilato, bönni' rinná bé'ë

(Mt. 27:1-2, 11-14; Lc. 23:1-5; Jn. 18:28-38)

¹ Ní' naca zílado', yugu' bixúz unná bé' len bönni' gula tu' zéajni' iné', en yugu' bönni' yudo' usedi, en yúgu'té bönni' yúlahui' lo gulún xtídza' gaquië'. Ní'iró gula'chë'ë Jesús náguë'ë, en bulu'dödë' Lë' lu nê'ë Pilato, bönni' rinná bé'ë uláz que yôdz Roma. ² Pilato gunábinë' Jesús, rnnë':

—¿Naru' nacu' Li' Bönni' inná bé'enë' bönachi judío?

Bubi'ë didza' Jesús, rnnë':

—Ca nácatë rnno'.

³ Yugu' bixúz unná bé' bulu'zéguië' Jesús didza' le zían. ⁴ Ní'iró Pilato gunábinë' Lë' leyúbölö, rnnë':

—¿Naru' cabí rubi'itso' didza'? Buzétsóca' nagu' cate' xó zían le ta'nnë' quiu'.

⁵ Biti' bi didza' bubi'ë Jesús. Ca' guca, bubábinë' Pilato.

Ta'chúguië' queë' Jesús gátie'

(Mt. 27:15-31; Lc. 23:13-25; Jn. 18:38-19:16)

⁶ Dë tu le runë' Pilato cate' raca laní na', rusanë' lu ná'agaca bönachi tu bönni' nadzunë' lidxi guië', núti'tës nu ta'naba. ⁷ Nadzunë' tu bönni' lë' Barrabás lidxi guië', ate' dzágagaquië' lë' ia'bal-lë' luzë'ë, yugu' bönni' gulútië' bönachi cate' gula'dá'báguië' yúlahui'. ⁸ Cate' bila'dxin bönachi zían ni', gula'sí lógaquië' ta'nabë' lahuë' Pilato gunë' quëgaquië' ca run cazë'. ⁹ Bubi'ë didza' Pilato, rnnë':

—¿Rë'ënili' usana'-në' queë'li' Bönni' Inná Bé'enë' Bönachi Judío?

¹⁰ Caní gunnë' Pilato tu' réquibe'enë' bulu'dödë' yugu' bixúz unná bé' Jesús lu nê'ë tu' tu'xzë'enë' Lë'. ¹¹ Yugu' bixúz unná bé' na' gula'gu'ë xilá ládxi'gaca bönachi zían na', para ila'nabë' lahuë' Pilato usanë' lu ná'agaquië' Barrabás. ¹² Ní'iró Pilato gunábinë' légaquië' leyúbölö, rnnë':

—¿Bizxi ré'ënili' guna' queë' bönni' na' ru'íli' lë', Bönni' Inná Bé'enë' Bönachi Judío?

¹³ Gulu'ë zidzaj didza', ta'nnë':

—¡Budë'ë lë'e yaga cruz!

¹⁴ Gunábinë' Pilato légaquië', rnnë':

—¿Bizxi caz dö' nu'ë?

Leyúbölö tu'ë zidzaj didza', ta'nnë':

—¡Budë'ë lë'e yaga cruz!

¹⁵ Tu' gú'unnë' Pilato gunë' ga ila'yaza ládxi'gaca bönachi zían na', busanë' Barrabás lu ná'agaquië'. Ní'iró gunná bé'enë' nu quin Jesús, ate' budödë' Lë' lu ná'agaquië' bönni' ulu'dë'ë Lë' lë'e yaga cruz.

¹⁶ Ní'iró yugu' bönni' rójáquië' gudil-la gula'chë'ë Jesús lö'a yúlahui', ate' bulu'tubë' luzá'agaquië' ní'. ¹⁷ Bulu'gácuë' Jesús tu lari' xiná gul-la, en gulunë' tu bregui' ní'a nê'e yötsi', le bulu'dxië' icjë'. ¹⁸ Ní'iró gula'sí lógaquië' tu lidzë' Jesús, ta'nnë':

—¡Yöl-la' ba li', rinná bé'enu' bönachi judío!

¹⁹ Gula'guinë' gui icjë', en bulu'chejë' Lë' zxöna'. Bulu'zóa zxibigaquië' lahuë', en lu yöl-la' rutitaj gulunë' Lë' bal. ²⁰ Cate' budxi bulu'titjë' Lë', bulu'güë' lari' xiná chul-la na' nácuë' ate' bulu'gácuë' Lë' lari' que cazë'. Ní'iró gula'chë'ë Lë' ní'iló yúlahui' na' para tsójda'gaquië' Lë' lë'e yaga cruz.

Tu'dë'ë Jesús lë'e yaga cruz

(Mt. 27:32-44; Lc. 23:26-43; Jn. 19:17-27)

²¹ Gulunë' ga bi'ë tu bönni' Cirene yaga cruz queë' Jesús, ridödisë' ni' suzë'ë la' guixi'. Lë' Simón, xúzgacabi' Alejandro, en Rufo.

²² Gula'chë'ë Jesús lataj na' nazí'i le Gólgota, tu didza' hebreo le rnna lu didza' xidza', Lataj Que Böga' Ícjaru'. ²³ Gulu'ë le guf'jë' Jesús xisi uva nutsi' nōri silá' que yaga mirra, pero Lë' bití' gu'ë le. ²⁴ Ní'iró bulu'dë'ë Jesús lë'e yaga cruz, ate' gula'guisíë' lari' nácuë', le gula'zi' que queëgaquië' bönni' na' rójáquië' gudil-la. Bulu'béajë' le gaca bé' para ila'nōzinë' bízxilö idela' que queëgaquië'.

²⁵ Naca idú xsila cate' bulu'dë'ë Lë' lë'e yaga cruz. ²⁶ Didza' na' bulu'zózë' lë'e yaga cruz ícalë' Jesús ca naca le tu'quië' Lë' rnna caní: "Bönni' Rinná Bé'enë' Bönachi Judío." ²⁷ Bulu'dá'lenë' Jesús tsözxön lë'egaca yaga cruz chopë' gubán, tuë' cuíta lë'ë ibëla, en ia'tué' cuíta lë'ë yögöla. ²⁸ Caní guca lë na' nazúaj lu guichi lá'ayi, rnna: Gubábalenë' bönni' tuá' dö'.

²⁹ Yugu' bönni' ta'dödë' ní' tu lidza zi'ë Jesús, en tu'tá ícja'gaquië', ta'nnë':

—¡Ön! ¿Naru' uquinnajtso' yudo' queë' Dios, ate' tsonna dzasó uchísatsu' le? ³⁰ ¡Busölá cuinu' na'a, en bötaj lë'e yaga cruz na'!

³¹ Lësca' caní yugu' bixúz unná bē', en yugu' bönni' yudo' usedi tu'titjē' Lē'. Tē' luzá'agaquiē' tuē' ia'túē':

—Bönachi yúbölö busölē', pero biti' gaca usölá cuinē'.

³² Ta'nnē' ca':

—i'Ön! ¿Nácatsu' Cristo, Bönni' Inná Bé'enē' Bönachi Israel? i'Böjtatsöca' na'a lē'e yaga cruz para ilē'etu', ate' tséajlē'etu' Li'!

Yugu' bönni' na' dá'gaquiē' tsözxön len Lē' lē'egaca yaga cruz bulu'lidza zi'ē ca' Lē'.

Le guca cate' gútiē' Jesús

(Mt. 27:45-56; Lc. 23:44-49; Jn. 19:28-30)

³³ Cate' bidxín idú huagubidza, guchul-la idútē yödžölió. Guca caní ga bidxintē idú ridödi xihuó. ³⁴ Idú ridödi xihuó na' bē'ē Jesús zidzaj didza', rnnē':

—Eloi, Eloi, ¿lama sabactani?

Didza' hebreo ni rnnu lu didza' xidza': Dios quia', Dios quia', ¿bizx que nubéaj ládxu'u neda'?

³⁵ Yugu' bönni' nacu'ē ni' bila'yönnē' didza' ni, ate' ta'nnē':

—Buli'zētsöca' nágali'. Elías rulidzē'.

³⁶ Ní'irö guxiti'ē tu bönni' nútsē'ē ládjagaquiē', en buxúpinē' nupi zi tu le bululu rē'aj nisa. Budē'ē le lahui gui, en bē'ē le xupē' Jesús, rnnē':

—Cöžtsöca'ru', uyuru' channö huidē' Elías uzötjē' Lē'.

³⁷ Gurödxí'ē zidzaj Jesús, en la' gútité'. ³⁸ Biröza' lari' yödx nala' lu yudo'. Birúaj choplö, gudela' icjöl, en birúajtē zxánilö. ³⁹ Bönni' na' rinná bē'enē' bönni' röjáquiē' gudil-la zuinē' lahuē' Jesús, en bilé'enē' ca na' guca gurödxí'ē Jesús, en la' gútité', ate' gunnē':

—Le nácatē bönni' ni gúquiē' Zxí'inē' Dios.

⁴⁰ Nacuá'anu ca' ni' nigula, zí'tu'sö tu'yunu. Nútsa'gacanu ládjagacanu María Magdalena, en Salomé, en María, xiná'agacabi' Jacobo cuidi', en José. ⁴¹ Nigula ni yójácalennu Jesús cate' ni' gudē' luyú Galilea, en gulácalennu Lē', gula'gú'unu le gulahuē'. Nacuá'anu ca' ni' ia'bálanu nigula zían gula'zá'lennu Lē' lu yödžö Jerusalén.

Ta'gu'ē Jesús yeru ba

(Mt. 27:57-61; Lc. 23:50-56; Jn. 19:38-42)

⁴² Chizá' rad-la, en naca dza tu'pē'ē, dza si' idxín dza lá'ayi quégaquiē' bönni' judío. ⁴³ Que lē ni na' bilē' José, bönni' yödžö Arimatea, bönni' lo ládjagaquiē' bönni' yúlahui' lo. Ribözē' ca' dza idinná bē'ē Dios. Idú ládxē'ē guyáziē' ga na' zoē' Pilato, en gunábinē' lē' gu'ē lē' lataj u'ē Jesús. ⁴⁴ Bubáninē' Pilato tu' gunnē' chigútiē' Jesús, ate' bulidzē' bönni' na' rinná bē'enē' bönni' röjáquiē' gudil-la para inábinē' lē' channö chinátiē' Jesús. ⁴⁵ Cate' biyönnē' ca na' gunnē' bönni' na' rinná bē'enē' bönni' röjáquiē' gudil-la, bē'ē José lataj u'ē Jesús. ⁴⁶ Ní'irö José na' gú'uē' tu lari' xtila dxí'ado', ate' buzötjē' Jesús lē'e yaga cruz, en buchölinē' Lē' lari' na'. Ní'irö gulu'ē Lē' yeru ba nadaj lē'e gu'á guiöj. Budē'ē tu guiöj blaga zxön ga nu riyaza ba na'. ⁴⁷ María Magdalena, en María, xinē'ē José tu'yunu ga na' ta'gu'ē Jesús.

16

Rubanē' Jesús lu yöl-la' guti

(Mt. 28:1-10; Lc. 24:1-12; Jn. 20:1-10)

¹ Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xinē'ē Jacobo, ta'z'ínu yugu' le rilá' zxixi para tsöjlú'ugacanu Jesús. ² Ní' naca zílado' dza risi lo, yójácanu ra' yeru ba queē'. Bila'dxinnu ni' cate' si' gulén gubidza.

³ Gula'nábinu luzá'agacanu:

—¿Nuzxi cúatsö queēru' guiöj na' da' ga nu riyaza ba queē'?

⁴ Cate' bila'dxinnu ni', bulu'yunu, en bila'lē'enu chinadúa guiöj na', ate' guiöj zxön naca. ⁵ Gula'yú'unu yeru ba lē'e gu'á guiöj na', ate' ni' bila'lē'enu-bi' tubi' bi'i bönni' ra'bán, nácabi' gubáz lá'ayi queē' Dios. Rö'öbi' tsölá'a ibēla lu yeru ba na', nácubi' lari' tunna chiguíchido'os. Guládxide'enu. ⁶ Ní'irö bi'i na' gúdxibi' légacanu, rnnabi':

—Bíti'rö gádxili'. Ruguílajli' Jesús, Bönni' Nazaret, Bönni' na' gudē'ē lē'e yaga cruz. Chibubanē'. Biti' zoē' ni. Buli'yú ga ni gula'gu'ē Lē'. ⁷ Guli'tséaj na'a, guli'tsöjtíxjöi' ca' yugu' bönni' usēda queē', enca' Pedro. Guiēli' légaquiē': "Tsejē' Jesús luyú Galilea zí'alö ca libí'ili". Ní' ulé'eli'-nē' ca na' chigudxi cazē' libí'ili."

⁸ Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridžöbi quégacanu. Cuntu nu gulēnu ca' tu' tádxinu.

Rulu'i lahuē' Jesús lonu María Magdalena

(Jn. 20:11-18)

⁹ Cate' bubanë' Jesús zílado' dza na', buluí' lahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu. ¹⁰ Guyéajnu yójtíxjöi' inu nupa na' gula'dalen Jesús. Nupa ni ta'sëbi ládxi'gaca, en ta'bödxí yechi'. ¹¹ Cate' bila'yöni didza' ruí'inu, zoë' nabanë' Jesús, ate' bilé'e quézínu Lë', biti' gula'yéajlë' lënu.

Chopë' bönni' usëda queë' Jesús tu'lé'enë' Lë'
(Lc. 24:13-35)

¹² Gudödi na', nadzá'alö buluí' lahuë' Jesús lógaquië' chopë' bönni' usëda queë' yú'ugaquië' nöza, söjáquië' ga naca ladaj guixi'. ¹³ Ní'irö bulu'dxinë', dutíxjöi'iguequinë' ia zíca'rë', ate' ni xtídzagaquië' biti' gula'yéajlë'ë.

Le rigu'ë Jesús lu ná'agaquië' bönni' gubáz queë'
(Mt. 28:16-20; Lc. 24:36-49; Jn. 20:19-23)

¹⁴ Ga yósetë, buluí' lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídzaga nupa na' bila'lé'e Lë' nubanë'. ¹⁵ Ní'irö gudxë' légaquië', rnnë':

—Gulí'tséaj idútë yödzólió tsöjenli' libán que didza' dxi'a lógaca yúgu'të bönachi. ¹⁶ Nu tséajlë' neda', en idila nisa, ulá nu na', pero nu biti' tséajlë', irugu que gati nu na'. ¹⁷ Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a. ¹⁸ Channö ila'zönë'-ba' bëla sínia' lu ná'agaquië', o channö ilé'jë' le nachë' yöl-la' guti, biti' bi gun quégaquië'. Ila'xóa në'ë nupa te'e, ate' ulu'huóacatë.

Ruhuëpë' Jesús yehua' yubá
(Lc. 24:50-53; Hc. 1:6-11)

¹⁹ Cate' Xanru' budxi bë'lenë' légaquië' didza' ni, buchisé' Dios Lë' yehua' yubá ga ni' gurö'ë cuitë' ibëla Lë'. ²⁰ Bila'rúajë' légaquië', yójégaquië' libán yúgu'të yödzó. Gúcalenë' Xanru' légaquië', en benë' ga gulunë' le nácagaca bë' naca idútë li didza' tu'ë. Ca' naca.

DIDZA' DXI'A BUZÚAJĚ' LUCAS

Didza' rigu'ê Lucas lu nê'ê Teófilo

¹ Zián nupa chigulún bayudxi ulu'zúaj lu guichi idútê le nácatê, le guca ga zóaru', ² ca na' bila'lê'e nupa ni' dza ni'te, ate' bulu'lu'i rê'u, en bulu'zê didza' que. ³ Teófilo, bônni' tsáhui'do', runi neda' naca dxi'a uzúaja' quiu' lu guichi, ga ze lo dzô' yúgu'tê lê ni, tu' chibuguilaj bubéquia' ga ze lo dzô' ca naca yúgu'tê lê na' guca dza ni'te. ⁴ Ruzúaja' quiu' lu guichi ni para inózinu' naca idútê li lê na' chinazêdu'.

Rulu'i'inê' gubáz lá'ayi queê' Dios ca si' gálajbi' Juan, bônni' uquilê' bônachi nisa

⁵ Dza ni'te cate' gunná bê'ê Herodes luyú Judea, ni' zoê' tu bixúz lê' Zacarías. Nabábalenê' cō' bixúz, nazí'i le Cō' Queê' Abías. Elisabet, nigula queê' Zacarías na' nácanu ca' xzí'ini xi'sóê' Aarón, bônni' gúquiê' bixúz lo dza ni'te. ⁶ Nácagaquiê' Zacarías, en Elisabet tsahui' lahuê' Dios, ate' idú ládxi'gaquiê' tunê' ca rnna xtídzê'ê Dios, en le rinná bê' xibá queê'. Caní guca, cuntu nu guca bi innê' quégaquiê'. ⁷ Cuntu nu zoa bi'i quégaquiê', tu' nácanu Elisabet nigula huôdx, ate' chinagúлагаquiê' irópatê'.

⁸ Guca beo' gul-la' uláz que cō' na' nabábalenê' Zacarías ilunê' dxin lahuê' Dios, lu yöl-la' bixúz quégaquiê'. ⁹ Ca naca le nulaga lógaquiê' tunê' bixúz, gul-la' uláz queê' Zacarías guyóziê' lu lataj lá'ayi que yudo' para uzódes yalaj lahuê' Xanru' Dios. ¹⁰ Tsanni ni' ruzéguiê' Zacarías na' yalaj, gula'cuá' yúgu'tê bônachi ní'lô, tu'lidza Dios. ¹¹ La' ná'asô bulu'lu'i lahuê' gubáz lá'ayi queê' Xanru' ga zoê' Zacarías na'. Zuínê' gubáz na' tsölá'a ibêla bucugu lá'ayi ga na' régui yalaj. ¹² Cate' bilé'enê' Zacarías gubáz lá'ayi na', gurô'ê bôniga, en gudxi bidzôbinê'. ¹³ Ní'irô gubáz lá'ayi na' gudxê' lê', gunnê':

—Zacarías, bití' gádxinu', tu' chibiyönnê' Dios le rinabu' lahuê', ate' Elisabet, nigula quiu', uzóanu-bi' tubi' bi'i bônni'do', ate' gu'u labi' Juan. ¹⁴ Gata' quiu' le uzi'u xibê, en udzêjanu', ate' zián nupa ulu'dzeja ládxi'gaca cate' gálajbi' bí'ido' na', ¹⁵ tu' gátatêbi' zxôn lahuê' Dios. Biti' gu'ájbi' xisi uva, en calêga tu le rusudxi bônachi, ate' sóalenê'-bi' Dios Bô' Lá'ayi cate' isí lo si' gálajbi'. ¹⁶ Gunê' Juan ni ga ulu'huôaca zián bônachi Israel queê' Xanru'. ¹⁷ Inóruê' lê' ca Xanru', ate' ila'cuá'alen lê' Bô' na', en yöl-la' huáca na' gula'cuá'alen Elías, bônni' bê'ê didza' uláz queê' Dios dza ni'te. Caní gunê' para únê' tuz nupa nácagaca xuz len xzí'inigaquiê', en uzéajni'inê' nupa ta'dá'baga' para ilácagaca tsahui', en ucôzê' bônachi para ila'z'í lu nê'eguequi Xanru'.

¹⁸ Zacarías gunábinê' gubáz lá'ayi na', rnnê':

—¿Bixzi gaca bê' para inózda' ilaca lê ni? Chinagúla' neda', en chinagúlanu ca' nigula quia'.

¹⁹ Bubi'ê didza' gubáz lá'ayi na', rnnê':

—Neda' lea' Gabriel. Runa' dxin lahuê' Dios. Lê cazê' gusöl-lê'ê neda' para gü'ilená' li' didza', en usiyönda' li' didza' dxi'a ni. ²⁰ Na'a, tu' cabí guyóajlê'u xtídzá'a, icôdzu', en bití'rô gaca innô' cate' gácarô lê ni. Yúgu'tê lê ni udxín cate' idxín dza que.

²¹ Tsanni ni' raca' lê ni, nacaú' bônachi ní'lô, ta'bôza Zacarías, ate' tu'bani tu' ridzenê' xidzé ga na' zoê' lu lataj lá'ayi. ²² Cate' burúajê' Zacarías, bití' guca gü'ilenê' légaquiê' didza', ate' guléquibe'enê' bilé'enê' tu le bulu'i'inê' Dios lê' lu lataj lá'ayi. Bulá'a bulu'i'isê' Zacarías, buzéajni'inê' légaquiê', tu' cabí raca innê'.

²³ Cate' bizá'a yugu' dza na' ral-la' gunê' dxin Zacarías lahuê' Dios, ní'irô bôajê' lidxê'.

²⁴ Gudödi yugu' dza na' Elisabet, nigula queê' Zacarías na', biá'anu-bi' lê'ênu bí'ido', ate' idú gayu' beo' bugá'anasinu ga zoa lódxigaquiê'. Guzâ' ládxi'nu, rnnanu: ²⁵ “Caní runê' Xanru' quia'. Ruzá' ládxê'ê quia' bí'ido', en runê' ga bití'rô utu'ida' lógaca bônachi.”

Rigúxjö'ê gubáz lá'ayi ca si' gálajbi' Jesús

²⁶ Cate' chiguca xopa beo', bulu'lu'i lahuê' gubáz lá'ayi na', tu' gusöl-lê'ê Dios lê cazê' Gabriel, tsejê' Nazaret, tu yödzo luyú Galilea. ²⁷ Dios gusöl-lê'ê lê' ni' tsóyüjê'-bi' tubi' bi'i nigula ra'bando' lêbi' María. Chinazí' lu ná'abi' María utsaga ná'alenbi'-nê' bônni' lê' José. Nababê' José di'a dza queê' David, bônni' gunná bê'enê' bônachi Israel dza ni'te. ²⁸ Cate' guyóziê' Gabriel na' ga zóabi' María, gudxê'-bi':

—Padiux. Dios ruzá' ládxê'ê quiu'. Xanru' Dios zóalenê' li'. Lê cazê' benê' ga nácaru' li' bica' ba ca yúgu'tê nigula.

²⁹ Cate' bilé'ebi' María gubáz lá'ayi na', gurô'öbi' bôniga tu' nözi didza' na' bê'ê, en rubani ládxi'bi' naxci sa'yéaj didza' na' bulidzê'-bi' gubáz lá'ayi na'. ³⁰ Ní'irô gubáz lá'ayi na' gudxê'-bi', rnnê':

—María, bití' gádxinu', tu' chibidéli'nu' le ruzá' ládxê'ê Dios quiu'. ³¹ Na'a, tsú'ubi' tubi' bí'ido' lê'u, ate' uzú'-bi' tubi' bi'i bônni'do', ate' gu'u labi' Jesús. ³² Jesús ni tsépísêtêrê', en si' Lê' Xzí'inê' Dios, Nu nayépísêtêrô. Xanru' Dios gunê' ga inná bê'ê ca na' gunná bê'ê David,

xuz gula gudödi queë'. ³³ Jesús na' inná bé'etica'sinë' bönachi Israel, ate' le inná bë'ë Lë' catu caz tödi que.

³⁴ Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

³⁵ Bubi'ë didza' gubáz lá'ayi na', rë'ë-bi':

—Guidë' Dios Bô' Lá'ayi ga zu', ate' yöl-la' huáca queë' Dios, Nu nayépisëtërö, sóalen li', le gaca ca tu xzul-la' rigú'u bôaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxi'inë' Dios. ³⁶ Cá'anqueze Elisabet, nigula di'a dza quíu', chinuá'anubi' lë'ënu tubi' bi'i bönni'do' sal-la' chinagúlanu. Gula'nnë' queënu: "Nácanu nigula huödx", pero chizéaj xopa beo' nuá'anubi' lë'ënu bí'ido' na'. ³⁷ Biti' bi' zoa le cabí séqui'në' Dios.

³⁸ Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'të' gubáz lá'ayi na' ga zóabi' María.

María sôjyubi'-nu Elisabet

³⁹ La' dza ní'sö guyú'ubi' nôza María, ate' carelö sa'yéajbi' ga naca gu'ado', en bidxinbi' tu yödö luyú Judea. ⁴⁰ Ní' guyázabi' lidxë' Zacarias, en gúdxibi'-nu Elisabet:

—Padiux.

⁴¹ Cate' biyönninu Elisabet didza' na' bë'ëbi' María, la' butátë cuinbi' bi'i huë'ëndo' na' yú'ubi' lë'ënu, ate' bidisóalenë'-nu Dios Bô' Lá'ayi. ⁴² Ní'irö bë'ënu Elisabet zidzaj didza', rnnanu:

—¿Chinunë' Dios ga nácaru' li' bica' ba ca yúgu'të nigula, en chinunë' ca' ga nácabi' bica' ba bí'ido' na' yú'ubi' lë'u! ⁴³ ¿Núzxitë neda', zá'anu xinë'ë Xana' quia'? ⁴⁴ Cate' biyönda' didza' bë'u, bulidzu' neda', lu yöl-la' rudzeja queëbi' la' butátë cuinbi' bi'i huë'ëndo' ni yú'ubi' lë'a. ⁴⁵ ¿Bica' ba li' tu' guyéajlë'u xtídzë' gubáz lá'ayi, ate' udxín caz lë na' gudxë' li' uláz queë' Xanru'!

⁴⁶ Ní'irö gunabi' María:

¡Idütë le naca' rigú'u Xanru' yöl-la' ba,

⁴⁷ en rudzeja ládxí'lëna'-në' Dios, Nu rusölá neda'!

⁴⁸ ¡Dios caz buzá' ládxë'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca quia' ila'nná:

Bica' ba nigula na'.

⁴⁹ ¿Zxöntëro naca le benë' Dios unná bë' quia'!

¡Lá'ayi naca Lë'!

⁵⁰ Lë' ruhuéchi' ládxí'tica'së' bönachi tadxi Lë' na'a dza, en dza zá'gaca.

⁵¹ Yugu' yöl-la' huáca zxön chibenë' Lë'.

Buzöjtë' nupa gulún zxön yöl-la' réajni'í quéguequi.

⁵² Bugúë' yöl-la' unná bë' quégaca nupa gulaca lo, en benë' ga gulaca lo nupa gulaca nōxaj ladxí'.

⁵³ Benë' ga bulu'huölaj bulu'dzë'e nupa gula'dún, en bucá'anë' cá'asö nupa bila'lë'e yöl-la' tsahui'.

⁵⁴ Gücalenë' bönachi Israel, nupa na' tun xichinë', tu' yōjnenë' légaquië', en buéchi' ládxë'ë légaquië'.

⁵⁵ Benë' ca guzxí' lu në'ë gunë' quégaquië' xuz xtó'oru' enca' queë' Abraham, en quégaca di'a dza queë'.

⁵⁶ María bugá'analenbi'-nu Elisabet idú ca tsonna beo', ate' gudödi ni' bōajbi' lidxibi'.

Le guca cate' gúlajbe' Juan, bönni' uquilë' bönachi nisa

⁵⁷ Cate' bidxín dza ral-la' sóabi' bí'ido' queënu Elisabet, buzóanu-bi' tubi' bi'i bönni'do'. ⁵⁸ Bila'yöni dzaga yu'u queënu, en yugu' di'a dza queënu ca na' guca, buéchi' ládxë'ë-nu Dios, ate' bulu'dzéjalen lënu. ⁵⁹ Cate' chiguca xunu' dza zóabi' bí'ido' na', bila'dxinë' di'a dza queënu para ila'chúguië' lu xipëla'bi' bi'i bönni'do' na' lë na' gaca bë' néquibi' queë' Dios, ate' t'ë'ënnë' ilu'ë labi' Zacarias ca na' lë' xúzibi'. ⁶⁰ Ní'irö buhí'inu didza' Elisabet, xiná'abi', rnnanu:

—Calëga. Juan si' labi'.

⁶¹ Gula'nábinë'-nu, ta'nnë':

—¿Bizx que? Cuntu nu di'a dza quíu' lë' Juan.

⁶² Ní'irö bulu'lá' bulu'lu'isinë', gula'nábinë' xúzibi' nacxi rë'ëne' gu'ë labi'. ⁶³ Zacarias na' gunabë' tu blágado', ate' buzúajë' lahui caní: Juan lëbi'. Bulu'bábinë' yúgu'të'. ⁶⁴ La' ní'sö bōáljatë ru'ë Zacarias na', en buguíjatë lúdxë'ë, ate' bë'ë didza' le gulu'ë Dios yöl-la' ba. ⁶⁵ Ní'irö guládxinë', en bulu'bábinë' yúgu'të dzaga yu'u quégaquië', ate' yúgu'të yödödo'

nacuá' lu guí'ado' luyú Judea, guzé didza' ca guca lë ni. ⁶⁶ Gula'zá' láchx'gaca yúgu'të nupa bila'yöni ca na' guca, ta'nná: "¿Nacxi caz gácabi' bi'i bönni'do' ni? Le nácatë Xanru' zóalenë-bi'."

Didza' bë'ë Zacarías uláz queë' Dios

⁶⁷ Ní'irö Dios Bö' Lá'ayi bidisóalenë Zacarías, xúzibi' Juan, ate' bë'ë didza' uláz queë' Dios, rnnë':

⁶⁸ jYöl-la' ba Dios, Xángaca bönachi Israel tu' buduyúë' rë'u, bönachi queë', en böá'uë' rë'u!

⁶⁹ jGusöl-lë'ë queëru' Bönni' usölë' rë'u, len yöl-la' huáca zxxön queë'!

Bönni' ni guljë' ládajgaca di'a dza queë' David, huen dxin queë' Dios.

⁷⁰ jDza ni'te guzxi' lu në'ë gunë' ga gaca caní! Raca ca na' gunnë' lu ruá'agaquië' bönni' gulu'ë didza' uláz queë'.

⁷¹ Guzxi' lu në'ë usölë' rë'u

lu ná'agaca nupa tequi rë'u zi',

enca' lu ná'agaca nupa biti' ta'lé'e rë'u dxi'a.

⁷² Guzxi' lu në'ë huéchi' láchxë'ë xuz gudödi queëru', en tsöjnenë' le guzxi' lu në'ë le naca lá'ayi.

⁷³ Lë ni benë' tsutsu xtídzë'ë, en guzxi' lu në'ë, le gunë' queë' Abraham, xuz gudödi queëru', le naca tu' le ral-la' gunë' queëru' rë'u.

⁷⁴ Guzxi' lu në'ë usölë' rë'u

lu ná'agaca nupa biti' ta'lé'e rë'u dxi'a

para cabirö gádxiru' gunru' xichinë' Lë',

⁷⁵ en para gácaru' ba'a lachxi', en idú dxi'a

lahuë' Lë' yúgu'të dza sóaru' ibanru'.

⁷⁶ Li', zxi'ina do', si' lo' bönni' ru'ë didza' uláz queë' Dios unná bë' tu' tsöjnöru' ca Xanru' caz, en upó'o nöza ga tödë'.

⁷⁷ Gunu' ga ila'nözi bönachi queë' ca gaca ulu'lágaca, en ca na' uniti lahuë' Dios dul-la' nabága'gaca.

⁷⁸ Caní gaca, tu' ruhuéchi'da' láchxë'ë Dios rë'u, en runë' ga tseni' queëru' Bönni' na' náquië' bení idú.

⁷⁹ Lë' uzení'ë quégaca nupa nacué' gapa naca chul-la, en gapa nacué' nupa chízóa ilátigaca

para ugú'ë rë'u nöza ga cö'ö dxi'láchxi'do'oru'.

⁸⁰ Guzxönbí' bi'i bönni'do' na', en bidipa láchxi'bi'. Guzóasibi' gapa naca lu lataj cá'asö cate' bidixinrö dza buluí'i lobi' lógaca bönachi Israel.

2

Le guca cate' gúlajbi' Jesús

(Mt. 1:18-25)

¹ Lu dza na' gunná bë'ë Augusto César, bönni' Roma, ila'yaza lu guichi yúgu'të bönachi nacué' yödöliö. ² Cate' gusi lo ta'yaza lu guichi caní, rinná bë'ë bönni' lë' Cirenio luyú Siria.

³ Yúgu'të bönachi yöjaca yödö que queëguequi ga na' zeaj nababa para ila'yaza lu guichi.

⁴ Guzé'ë José yödö Nazaret luyú Galilea, sa'yéajë' luyú Judea, en bidxinë' yödö Belén, ga ni' guljë' David, tu' guljë' José ládajgaca di'a dza queë' David na'. ⁵ Guyijë' José ni' para tsázië' lu guichi, ate' dzágabi'-në' Maria, bi'i nigula nazí' lu ná'abi' utsaga ná'alenbi' lë', en chízóa sóabi' bí'ido' queëbi'. ⁶ Cate' ni' nacué' lu yödö Belén, bidxin dza sóabi' bí'ido' queëbi'. ⁷ Buzóanu-bi' tubi' bi'i bönni'do', bi'i huáca queënu. Buchölinu-bi' yugu' lári'do', ate' gudíxjanu-bi' tu lu yú'udo' ga tun chí'i le táguba' böa' quégaca bönachi yú'ugaca nöza. Caní guca, tu' cabí bidzöli lataj ila'cu'ë lu yu'u' ga ni' ta'dxin bönachi yú'ugaca nöza.

Tu'lu'i lahuë' gubáz lá'ayi queë' Dios ga nacué'ë bönni' tu'yúë'-ba' bö'cu' zxila'

⁸ Gala' ra' yödö Belén nacué'ë bönni' tu'yúgaquië'-ba' bö'cu' zxila' la' guixi', tapa chí'igaquië'-ba' chí'i dzö'ölö. ⁹ La' buluí'itë lahuë' gubáz lá'ayi queë' Xanru' ga na' nacué'ë. Yöl-la' bení queë' Xanru' buzení' ga na' nacué'ë, ate' guládxinë'. ¹⁰ Ní'irö gubáz lá'ayi na' gudxë' légaquië', rnnë':

—Biti' gádxili'. Na'a rusiyönda' libí'ili' didza' le gun ga udzëjade'eli', le ulu'zí' ca' xibé yúgu'të bönachi. ¹¹ Na'a chigúlajbi' lu ladvé' David Nu usölá libí'ili'. Nu ni naca Cristo, Xanru'. ¹² Lë ni gaca bë'ëbi'. Udzöli'bi' Bí'ido' na', narölibi' yugu' lári'do', en dëbi' tu lu yú'udo' ga tun chí'i le táguba' böa' quégaca bönachi yú'ugaca nöza.

¹³ Ga na' zoë' gubáz lá'ayi na', tsárido'os bulu'lu'i lógaquië' zíanrö ca' gubáz lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nnë':

¹⁴ ¡Yöl-la' ba Dios zoë' xitsá',
ate' luyú gaca le cuéqui dxi ládxi'do'gaquië'
bönni' raza ládxi'ë Dios légaquië'!

¹⁵ Cate' bulu'zë'ë gubáz lá'ayi na' ga ni' nacu'ë, sôjhuôjgaquië' yehua' yubá, ní'rö gulë luzë'ë tuë' ia'tuë' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca ca na' chibusiyönnë' Xanru' rë'u.

¹⁶ La' yôjácatië', ate' yôjxáca'gaquië' María len José, enca' bí'ido' na', dëbi' tu lu yú'udo' ga tun chi'i le táguba' böa' quégaca bônachi yú'ugaca nöza. ¹⁷ Cate' bila'lé'enë' lëbi', gula'guixjô'ë lë na' si' busiyönnë' gubáz lá'ayi na' légaquië' ca naca queëbi' bí'ido' na'. ¹⁸ Bulu'bani yúgu'të nupa bila'yöni didza' gulu'ë bönni' tu'yüë' bö'cu' zxila' na'. ¹⁹ María gulú'usö icja náganu didza' ni, ate' guzá' ládxi'nu ca naca que. ²⁰ Sôjhuôjgaquië' bönni' na' tu'yüë'-ba' bö'cu' zxila', tunë' xzön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu në'ë Dios

²¹ Cate' chiguca xunu' dza zóabi' bí'ido' na', gula'chúguie' lu xipëla'bi' lë na' naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz lá'ayi na' zí'alö cate' si' tsú'ubi' lë'ënu xiná'abi'.

²² Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'chë'ë-bi' bí'ido' Jesús yödzo Jerusalén para ila'gu'ë-bi' lu në'ë Xanru' Dios. ²³ Caní gulunë', tu' nazúaj lu guichi lu xibá queë' Xanru' le rnna: “Yúgu'tëbi' bi'i bönni'do' nácagacabi' bi'i zí'alö queënu xiná'agacabi', ulu'béajë'-bi' quez queë' Xanru' Dios.” ²⁴ Que lë ni na' yôjáquië' ni' para ilütë'-ba', en ila'gu'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

²⁵ Dza ní'isö zoë' tu bönni' lë' Simeón lu yödzo Jerusalén. Bönni' ni náquië' tsahui', en reaj ládxi'ë Dios. Ribözë' Bönni' na' isöl-lë'ë Dios, Bönni' na' gácalenë' bônachi Israel. Dios Bö' Lá'ayi zóalenë' Simeón na', ²⁶ en chibulu'inë' lë' biti' gátie' cate' ilé'erönë' Cristo, Bönni' na' isöl-lë'ë Xanru' Dios. ²⁷ Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'chë'ë-bi' bí'ido' Jesús chila yudo' para ilunë' queëbi' ca rinná bë' xibá na', ²⁸ ní'rö bunidë'-bi' Simeón na', en guyéaj ládxi'ë Dios, rnnë':

²⁹ Xana', na'a huáca gunnu' neda' lataj gátia', soa dxi ládxa'a
tu' chiguca le gudxu' neda', huen dxin quíu'.

³⁰ Chibilé'eda' Nu na' buzóa cazu', Nu usölá bônachi,

³¹ Nu na' ulú'u lahui lógaca yúgu'të bônachi.

³² Lëbi' nácabi' bení' le uzení' bônachi izá'a,
en nácabi' ca' bení' quégaca bônachi Israel quíu'.

³³ Bulu'bánninë' José, en María, xiná'abi' bí'ido' Jesús, ca naca lë na' gunnë' Simeón ca naca queëbi' Jesús. ³⁴ Simeón na' gunábinë' Dios gunë' ga gaca dxi'a quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzöë'-bi' Dios para gunbi' ga ila'chixi bônachi zían, ate' ulu'huóasa bônachi zían ladaj bônachi Israel. Gácabi' tu le naca bë', ate' ila'nnë' bônachi queëbi'. ³⁵ Gaca caní para ila'lá' lahui le ta'zá' ládxi'gaca bônachi zían. Yugu' lë ni ilaca quíu' ca tu guíë tuchi' le tsaza ládxi'do'o.

³⁶ Ana, nigula ru'ínu didza' uláz queë' Dios, zóanu ca' ni'. Nácanu xzf'inë' Fanuel, bönni' nababë' di'a dza queë' Aser. Chinagúlada'anu Ana na', tu' guzóalennu bönni' queënu idú gadxi iz gudödi gúcanu ra'bando', ³⁷ ate' bugá'ananu tuzi cate' bidxintë dza chiyú'unu idú ga tápalalaj yu' tapa iz. Biti' ca' rubí'i ruzá'anu ga naca chila yudo'. Rëla, en te dza reaj ládxi'nu-në' Dios, runnu gubasa, en rulidzanu-në' Dios. ³⁸ La' ná'asö bidxintënu ni', rënu-në' Dios: “Xclenu.” Gudixjoi'ínu yúgu'të bônachi ca naca queëbi' bí'ido' Jesús, bônachi na' nacuá' Jerusalén, nupa ta'böza dza idxín Nu na' isöl-lë'ë Dios para gácalen bônachi.

Sôjhuôjgaquië' José, en María yödzo Nazaret

³⁹ Gudödi gulunë' José, en María yúgu'të le rinná bë' xibá queë' Xanru' Dios, yôjhuôjgaquië' ládzaquië' Nazaret luyú Galilea. ⁴⁰ Guzxönbí' bí'ido' Jesús, en bidipa ládxi'bi'. Guta' queëbi' yöl-la' réajni', ate' xzön naca le ruzá' ládxi'ë queëbi' Dios.

Rudxinbi' bí'ido' Jesús chila yudo'

⁴¹ Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁴² Cate' chiyú'ubi' chinnu iz bi'i Jesús, yôjáquië' Jerusalén ca tun cazë' cate' raca laní na'. ⁴³ Cate' gudödi laní, sôjhuôjgaquië', ate' bugá'anabi' bí'ido' Jesús Jerusalén, pero biti' téquibe'enë' José, en María,

xiná'abi' Jesús. ⁴⁴ Tu' téquinē' nútsa'bi' ladaj bönachi zían yú'ulengaca légaquiē' nōza, tu dza nayá' gula'zē'ē. Ní'irō cate' bulu'guiljē'-bi' gapa nacua' di'a dza quégaquiē', en gapa nacua' nupa núnbē'gaquiē' ⁴⁵ biti' bulu'dzōlinē'-bi'. Que lē ni na' yōjhuōjgaquiē' Jerusalén, sōjdíljagaquiē'-bi'.

⁴⁶ Cate' chiguca dza bunni, bulu'dzōlinē'-bi' ga naca chila yudo', rō'ōbi' gatsaj láhui'lē' bōnni' yudo' tu'sédinē'. Ruzē nágabi' didza' tu'ē, en rinaba yúdxibi' légaquiē'. ⁴⁷ Bulu'bani yúgu'tē nupa bila'yōni didza' bē'ēbi' ca naca yōl-la' réajni'i queēbi', en ca nácagaca didza' bubí'ibi'. ⁴⁸ Cate' bila'lē'enē'-bi' xuz xiná'abi', bulu'bánninē', ate' gúdxinu-bi' xiná'abi', rn-nanu:

—Zxi'ina', ¿bizx que benu' caní queētu'? Buyútsōca', len yōl-la' ruúbi ruguf'i neda', en xuzu' buguiljatu' li'.

⁴⁹ Ní'irō gúdxibi' Jesús légaquiē', rnnabi':

—¿Bizx que buguiljali' neda'? ¿Naru' cabí nōzili' run bayudxi guna' xichinē' Xuza'?

⁵⁰ Biti' gula'yéajni'inē' xuz xiná'abi' didza' na' gúdxibi' légaquiē'.

⁵¹ Jesús bōajlenbi' légaquiē', budxinbi' Nazaret, ate' benbi' ca rnna xtídza'gaquiē' xuz xiná'abi'. María, xiná'abi' Jesús, gulú'usōnu icja ládxi'do'onu yúgu'tē lē ni. ⁵² Ráta'rō yōl-la' réajni'i queēbi' bi'i Jesús, en rizxōnbi'. Burúajbi' dxi'a lahuē' Dios, en lógaca bönachi.

3

Libán runē' Juan, bōnni' ruquilē' bönachi nisa

(Mt. 3:1-12; Mr. 1:1-8; Jn. 1:19-28)

¹ Cate' chiguca chinu iz rinná bē'enē' Tiberio César idútē yōdzōlió, rinná bē'ē Poncio Pilato luyú Judea, ate' Herodes rinná bē'ē ca' luyú Galilea. Felipe, bōchē'ē Herodes na', rinná bē'ē luyú Iturea, en luyú Tracónite, ate' Lisánias rinná bē'ē luyú Abilinia. ² Yugu' dza na' nácagaguiē' bixúz lo Anás, en Caifás, ate' la' ná'asō Dios bē'lenē' Juan, xxi'inē' Zacarías, didza' cate' ni' zoē' Juan lu lataj cá'asō. ³ Ridē' Juan ni yúgu'tē lataj nacua' ra' yegu Jordán, runē' libán ca ral-la' ila'dila nisa nupa tu'bi'i ládxi'gaca para uniti lahuē' Dios dul-la' nabága'gaca. ⁴ Guca caní ca na' nazúaj lu guichi lá'ayi yugu' didza' bē'ē Isaiás, bōnni' bē'ē didza' uláz queē' Dios, rnna:

Riyōn chī'ē bōnni' rulidzē' lu lataj cá'asō, rnnē':

“Buli'pá'a nōza lu icja ládxi'do'oli' para idxín Xanru' queēli'.

Buli'béaj li yugu' nōza lasi ga tōdē'.

⁵ Ral-la' ulígaca yúgu'tē gapa naca rōga',

en ulu'huóaca lachi' yúgu'tē gu'fa sibi, en gu'fado'.

Ral-la' ulu'rúaj li nōza nayecja nabí'igaca,

ate' ulu'huóaca dxi'a nōza guíoj.

⁶ Ila'lē'eni yúgu'tē bönachi Bōnni' na' isöl-lē'ē Dios,

Nu usólá bönachi.”

⁷ Cate' bila'rúaj bönachi zían para ila'dila nisa lu nē'ē Juan, lē' gudxē' légaquiē':

—Libí'ili', di'a dza quégacaba' bēla sínia'. ¿Zoa nu buluf'i libí'ili' ral-la' izxúnajli' yōl-la' rusiúdxí si' gaca quégaca bönachi? ⁸ Na'a, guli'gún le ilaca bē' chibubí'i ládxi'li', en biti' sa' ládxi'li', biti' innali': “Nácatu' tsahui' tu' nácatu' di'a dza queē' Abraham”, tu' rea' libí'ili', huáca quélē'ē Dios yugu' guíoj ni, en gunē' ga ulu'huóaca di'a dza queē' Abraham. ⁹ Nácali' ca yugu' yaga. Chizóa ribóza guíē huága para ichugu yugu' yaga. Yúgu'tē yaga biti' ta'bía le naca dxi'a, ila'chúguíē' yaga na', en ila'gu'ē' légequi lu guí'.

¹⁰ Ní'irō bönachi nacua' ni' gula'nabi lē', ta'nná:

—¿Nacxi gúntsatu'?

¹¹ Bubi'ē didza' Juan, rē' légaquiē':

—Nu dē chopá có' zxe ral-la' unōdzaj que nu biti' dē que, ate' nu dē le gagu, lēscá' caní ral-la' quisi quégaca nupa biti' dē le ilágugaca.

¹² Bal-lē' bōnni' tu'quízzjē' lázagaca bönachi uláz que yōdzō zítu' bila'dxinē' ca' ni' para ila'dilē' nisa, ate' gula'nábinē' lē', ta'nnē':

—Bōnni' usēdi, ¿nacxi gúntsatu' netu'?

¹³ Juan gudxē' légaquiē':

—Biti' uquízzjaróli' tsa le chigunnē' bōnni' yú'uli' lu nē'ē.

¹⁴ Bal-lē' bōnni' rōjáquiē' gudil-la gula'nábinē' ca' lē', ta'nnē':

—¿Nazxi netu', nacxi guntu'?

Juan gudxē' légaquiē':

—Bíti'rō gun gádxili' bönachi para cúali' le dē quéguequi. Bíti'rō innēli' quégaca bönachi le cabí nácatē para gunli' ga ila'guízzaj libí'ili', pero guli'tsaza ládxi'li' tsa rázzjali'.

¹⁵ Ta'zá' ládxi'gaca bönachi na' ta'böza Bönni' na' ral-la' isöl-lë'ë Dios, channö náquië' Juan na' Bönni' lë' Cristo. ¹⁶ Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le ruluf'isö yöl-la' ridila nisa ni, ichízië' libí'ili' Dios Bô' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' biti' naca' lesaca' ilecja' le nudë'ë ni'e. ¹⁷ Zönë' lu në'ë böc'ó' queë', ate' ulubë' ga rilubi xxa' xtila queë', lë' ni ruluf'i le gaca quégaca bönachi. Utubë' xxa' xtila, en cu'ë le xilataj, pero bëbu que uzégu'ë lu guí' le catu caz ulu.

¹⁸ Ca nácgaca didza' ni, en ia'zica'rö zían didza' le guchízië' icja nácgaca bönachi, benë' libán Juan lógaquië' que didza' dxi'a. ¹⁹ Juan na' buzégui'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böchë'ë, enca' tu' runë' zían le ruá' dö'.

²⁰ Ní'irö benë' Herodes tu le nácarö huiá' dö', gulu'ë Juan na' lidxi guíë'.

Ridíle' Jesús nisa

(Mt. 3:13-17; Mr. 1:9-11)

²¹ Dza na' cate' cabí nadzunë' Juan lidxi guíë', cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, gualaj lúzxiba, ²² ate' bôtjë' Dios Bô' Lá'ayi, bidxinë' ga na' zoë' Jesús. Buluf'i lahuë', rinë'ë ca riná' tuba' gu'dödo', ate' biyón chi'i Nu ruí'i didza' yehua' yubá, rnna:

—Li' nacu' Zxí'ina'. Nadxí'ida' Li', en raza ládxa'a Li'.

Yugu' xuz xin'ë'e gudödi queë' Jesús

(Mt. 1:1-17)

²³ Cate' gusi lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxi'inë' José. Jesús náquië' zxi'ini xi'sóë' Elí, nu na' náquië' xúzinu María, nigula queë' José na'.

²⁴ Elí na' gúquië' zxi'inë' Matat,

nu ni guca zxi'inë' Leví,

nu ni guca zxi'inë' Melqui,

nu ni guca zxi'inë' Jana,

nu ni guca zxi'inë' ia'tué' José.

²⁵ José ni gúquië' zxi'inë' Matatías,

nu ni guca zxi'inë' Amós,

nu ni guca zxi'inë' Nahum,

nu ni guca zxi'inë' Esli,

nu ni guca zxi'inë' Nagai.

²⁶ Nagai na' gúquië' zxi'inë' Mat,

nu ni guca zxi'inë' ia'tué' Matatías,

nu ni guca zxi'inë' Semei,

nu ni guca zxi'inë' ia'tué' José,

nu ni guca zxi'inë' Judá.

²⁷ Judá na' gúquië' zxi'inë' Joana,

nu ni guca zxi'inë' Resa,

nu ni guca zxi'inë' Zorobabel,

nu ni guca zxi'inë' Salatiel,

nu ni guca zxi'inë' Neri.

²⁸ Neri na' gúquië' zxi'inë' ia'tué' Melqui,

nu ni guca zxi'inë' Adi,

nu ni guca zxi'inë' Cosam,

nu ni guca zxi'inë' Elmodam,

nu ni guca zxi'inë' Er.

²⁹ Er na' gúquië' zxi'inë' Josué,

nu ni guca zxi'inë' Eliezer,

nu ni guca zxi'inë' Jorim,

nu ni guca zxi'inë' ia'tué' Matat.

³⁰ Matat na' gúquië' zxi'inë' Leví,

nu ni guca zxi'inë' Simeón,

nu ni guca zxi'inë' Judá,

nu ni guca zxi'inë' ia'tué' José,

nu ni guca zxi'inë' Jonán,

nu ni guca zxi'inë' Eliaquim.

³¹ Eliaquim na' gúquië' zxi'inë' Melea,

nu ni guca zxi'inë' Mainán,

nu ni guca zxi'inë' Matata,

nu ni guca xzí'ině' Natán.

³² Natán na' gúquiě' xzí'ině' David,

nu ni guca xzí'ině' Isái,

nu ni guca xzí'ině' Obed,

nu ni guca xzí'ině' Booz,

nu ni guca xzí'ině' Salmón,

nu ni guca xzí'ině' Naasón.

³³ Naasón na' gúquiě' xzí'ině' Aminadab,

nu ni guca xzí'ině' Aram,

nu ni guca xzí'ině' Esrom,

nu ni guca xzí'ině' Fares,

nu ni guca xzí'ině' ia'túě' Judá.

³⁴ Judá na' gúquiě' xzí'ině' Jacob,

nu ni guca xzí'ině' Isaac,

nu ni guca xzí'ině' Abraham,

nu ni guca xzí'ině' Taré,

nu ni guca xzí'ině' Nacor.

³⁵ Nacor na' gúquiě' xzí'ině' Serug,

nu ni guca xzí'ině' Ragau,

nu ni guca xzí'ině' Peleg,

nu ni guca xzí'ině' Heber,

nu ni guca xzí'ině' Sala.

³⁶ Sala na' gúquiě' xzí'ině' Cainán,

nu ni guca xzí'ině' Arfaxad,

nu ni guca xzí'ině' Sem,

nu ni guca xzí'ině' Noé,

nu ni guca xzí'ině' Lamec.

³⁷ Lamec na' gúquiě' xzí'ině' Matusalén,

nu ni guca xzí'ině' Enoc,

nu ni guca xzí'ině' Jared,

nu ni guca xzí'ině' Mahalalel,

nu ni guca xzí'ině' ia'túě' Cainán.

³⁸ Cainán na' gúquiě' xzí'ině' Enós,

nu ni guca xzí'ině' Set,

nu ni guca xzí'ině' Adán,

nu ni guca ca xzí'iní cazě' Dios.

4

Satanás tu' xihui' rě'ěni usubaga' Jesús dul-la'

(Mt. 4:1-11; Mr. 1:12-13)

¹ Buzě'ě Jesús ra' yegu Jordán, zóaleně' Dios Bō' Lá'ayi Lě', ate' Dios Bō' Lá'ayi na' guché'ě Jesús lu lataj cá'asō. ² Guzōé' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuě' Jesús yugu' dza na', ate' gudōdi ni' riduně'. ³ Ní'irō tu' xihui' na' gudxi Jesús, rnna:

—Channō naca cazu' Li' Xzí'ině' Dios, gunnátsōca' ulu'huóaca guiōj ni yōta xtila.

⁴ Bubi'ě didza' Jesús, rě' le:

—Nazúaj lu guichi, rnna: “Calégasō yōta xtila nabánigaca bōnachi, pero nabánigaca ca' yúgu'tě xtídzě'ě Dios.”

⁵ Ní'irō guché' tu' xihui' na' Jesús ga naca tu lu guí'a sibi ate' tu ch'ído'osō bulu'í Lě' yúgu'tě xilátjagaca nupa ta'nná bě' yōdzōlió. ⁶ Tu' xihui' na' rě Jesús, rnna:

—Gunna' quiu' yúgu'tě xilátjagaca nupa ta'nná bě' ni, en yōl-la' tsahui' quéguequi, tu' nadōdi lu na' yúgu'tě lě ni, ate' nu rě'ēnísida' ruá'a que. ⁷ Channō Li' uzóa zxiбу' lahua', en gunu' neda' zxon, yúgu'tě lě ni guequi quiu'.

⁸ Bubi'ě didza' Jesús, rě' le:

—Gucuita ga zoa', Satanás, tu' nazúaj lu guichi lá'ayi le rě netu', rnna: “Xanu' Dios tseaj ládxu'u-ně', en tuzě' Lě' gunu' xichině'.”

⁹ Ní'irō tu' xihui' na' guché' Jesús Jerusalén, ate' budxía Lě' lu zō'ō ícjo'olō yudo', en rě Lě':

—Channō nacu' Xzí'ině' Dios, busuládzu'tsōca' cuinu' ni ¹⁰ tu' nazúaj lu guichi lá'ayi, rnna: Dios isól-lě'ě gubáz lá'ayi queě', ilácaleně' Li'.

¹¹ Lu ná'agaquie' ulu'chisé' Li' para cabí tsōjchégu'u guiōj, en biti' gunu' zí' ni'u.

¹² Bubi'ë didza' Jesús, rë' le:

—Nazúaj lu guichi lá'ayi le rë netu': "Biti' si' bē'u Xanu' Dios."

¹³ Cate' biti' budzöli tu' xihui' na' ia'tú le si' bē' Jesús, buzá' ga zoë' tu chí'ido'.

Risí lahuë' Jesús runë' xichinë' luyú Galilea

(Mt. 4:12-17; Mr. 1:14-15)

¹⁴ Bôajë' Jesús luyú Galilea, dë lu nē'ë yöl-la' huáca queë' Dios Bô' Lá'ayi. Guzë didza' ca naca queë', ate' bila'yöni bönachi nacuá' yúgu'të yödzo idú gásibi'ilö. ¹⁵ Busédinë' Jesús bönachi gapa naca lu yu'u ga tu'dubë' tu'sëdë' bönni' judío queë' Dios, ate' yúgu'të bönachi gulún Lë' zxon.

Le benë' Jesús yödzo Nazaret, ga naca ladzë'

(Mt. 13:53-58; Mr. 6:1-6)

¹⁶ Ní'irö budxinë' Jesús yödzo Nazaret ga ni' guzxönë'. Cate' bidxin dza lá'ayi quégaquië' bönni' judío, ca run cazë' Jesús, guyazië' lu yu'u ga tu'dubë' tu'sëdë' bönni' judío queë' Dios, ate' guzuinë' para ulabë' tu le nazúaj lu guichi lá'ayi. ¹⁷ Bulu'dödë' lu nē'ë Jesús guichi ga na' nazúaj didza' bē'ë Isaiás, bönni' bē'ë didza' uláz queë' Dios. Cate' gusaljë' guichi na', budzölinë' ga nazúaj lu guichi le rnna:

¹⁸ Zóalenë' Bô' Lá'ayi queë' Xanru' neda'

tu' nubéajë' neda' quez queë'

para usiyönda' bönachi yechi' didza' dxi'a.

Gusöl-lë'ë neda' para una' nupa raca zi' ladxí'do'guequi,

en usiyönda' nupa nadzúngaca, ca gaca ulu'lágaca,

en úna' bönachi nachul-la lóguequi,

en usölá' bönachi zoa nu run léguequi zi',

¹⁹ en guna' libán que dza ruzá' ladxë'ë Xanru' Dios quégaca bönachi.

²⁰ Ní'irö butubë' Jesús guichi na', en bugu'ë le lu nē'ë bönni' rapa chi'ë yugu' guichi lá'ayi, ate' gurö'ë. Ní'irö yúgu'të nupa nudúbigaca lu yu'u na' gula'ná' Jesús. ²¹ Gusí lahuë' Jesús rë' légaquië':

—Na'a dza ni zóali' libí'ili', rudxin caz le nazúaj lu guichi ni.

²² Yúgu'të' gula'nnë' dxi'a queë', en bulu'báininë' ca naca didza' dxi'a ru'ë, ate' ta'nnë':

—¿Naru' calëga bönni' ni zxi'inë' José?

²³ Jesús rë' légaquië', rnnë':

—Nadxi huëli' neda' lë ni ta'nná bönachi, le rnna: "Li', bönni' ruún bönachi, bun cuinu'." Lësca' caní huëli' neda': "Yugu' le biyönitu' benu' Capernaum, ben ca' ga ni naca ladzu'."

²⁴ Gunnë' ca' Jesús:

—Le nácatë rea' libí'ili', channö zoë' nu bönni' ru'ë didza' uláz queë' Dios, biti' tun bönachi uláz queë' lë' bal. ²⁵ Le nácatë rea' libí'ili', gula'cuá'anu zían nigula uzëbi luyú Israel yugu' dza ni' zoë' Elías, bönni' bē'ë didza' uláz queë' Dios, cate' ni' biti' gulaj guiój idú ca tsonna iz yu' xopa beo', ate' guca gubín luyú na', ²⁶ pero Dios biti' gusöl-lë'ë Elías na' ga nacuá'anu nigula uzëbi nabábagacanu Israel, pero gusöl-lë'ë lë' ga na' zóanu tu nigula uzëbi lu yödzo Sarepta, le nababa yödzo Sidón. ²⁷ Lësca' caní, gula'cuá' zían nupa te'e huë' nudzu' ruzödi luyú Israel dza ni' zoë' Eliseo, bönni' bē'ë didza' uláz queë' Dios, pero biti' böáquië' nu bönni' nütse'ë ladaj bönachi Israel na', pero böáquië' tuzë' Naamán, bönni' nababë' luyú Siria.

²⁸ Cate' bila'yönnë' didza' ni, gula'lenë' yúgu'të bönni' nacu'ë lu yu'u ga na' tu'dubë' tu'sëdë' queë' Dios. ²⁹ Ní'irö gula'yasë', en bulu'béajë' Jesús nfi'lö ra' yödzo. Gula'ché'ë Lë' ga naca lë'ë gu'fa guiój ga na' dë lädzagaquië' para ulu'suláduë' Lë' ga naca lë'ë gu'fa guiój na'. ³⁰ Ní'irö gudödë' Jesús gatsaj lálhui'lö ga na' nacu'ë, söhuöajtë'.

Tu bönni' yu'u lë' bö' xihui'

(Mr. 1:21-28)

³¹ Ní'irö guiyjë' Jesús yödzo Capernaum luyú Galilea, ate' busédinë' bönachi yugu' dza lá'ayi quégaquië' bönni' judío. ³² Bulu'báininë' ca naca le rusédinë' Jesús légaquië', tu' bē'ë didza' ca tu bönni' dë lu nē'ë yöl-la' unná bē'.

³³ Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' bē'ë zidzaj didza', ³⁴ rnnë':

—¿Busán netu'! ¿Biziz rála'tu' quiu', Jesús, bönni' Nazaret? ¿Naru' zo'o para usunitiu' netu'? Núnbë'a Li' Nu nacu'. Bönni' Lá'ayi queë' Dios nacu'.

³⁵ Jesús buzenë' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacuá' ni'. Burúajtë lu bönni' na', en bítirö bi ben queë'. ³⁶ Bulu'báininë' yúgu'të', en gulu'ë didza' tuë' len ia'tuë', ta'nnë':

—¿Bizxi didza' ni ru'è? Len yöl-la' unná bē', en yöl-la' huáca zẏōn rinná bē'enē' yugu' bō' xihui', ate' tu'rúajtē bō' xihui' na'.

³⁷ Guzē didza' ca naca queē' Jesús, ate' bila'yōni bōnachi yúgu'tē yōdzō idú gásibi'ilō.

Ruínē' Jesús xiná'anú nigula queē' Pedro

(Mt. 8:14-15; Mr. 1:29-31)

³⁸ Ní'irō guyasē' Jesús, en burúajē' lu yu'u ga na' tu'dubē' tu'sēdē' queē' Dios, ate' guýaziē' lidxē' Simón. Xiná'anú nigula queē' Simón na' zóanu ni', en yú'unu xilá, ate' guláta'yuē' lahuē' Jesús únē'-nu. ³⁹ Gubígui'ē Jesús ga na' dēnu, ate' bulidzē' huē' xilá na' yú'unu. La' birúajtē xilá na' yú'unu, ate' la' guýastēnu, en bē'ēnu le gulahuē'.

Ruínē' Jesús zían nupa te'e

(Mt. 8:16-17; Mr. 1:32-34)

⁴⁰ Cate' chiribía gubidza, yúgu'tē nupa nacuá'len léguequi nupa na' te'e que queéguequi yōdzhuē' bila'dxin ni', ate' dujuá'gaca léguequi ga na' zoē' Jesús. Lē' guxóá nē'ē nupa na' te'e, en bunē' léguequi. ⁴¹ Bulu'rúaj ca' zían bō' xihui' yú'ugaca bōnachi te'e na'. Ta'bōdxi'a bō' xihui' na', ta'nná:

—Li' nacu' xzí'inē' Dios.

Ní'irō Jesús buzenē' le bach yugu' bō' xihui' na', en biti' bē'ē lataj ila'nná, tu' nōziguequi náquiē' Cristo.

Runē' Jesús libán luyú Galilea

(Mr. 1:35-39)

⁴² Cate' za' rení' ia'tú dza, burúajē' Jesús Capernaum na', ate' guýijē' tu lataj cá'asō. Bila'dxin bōnachi zían ni', tu'guilaj Jesús. Cate' bila'dxinē' ga na' zoē', gulē'éniguequinē' ulu'tsenē' Lē', para cabí uzē'ē ga na' nacu'ē. ⁴³ Ní'irō Jesús gudxē' légaquiē', rnnē':

—Run bayudxi tseja' gapa nacuá' ia'zica'rō yōdzō, tsōjena' ca' libán ni' que didza' dxi'a ca rinná bē'ē Dios. Que lē' ni na' gusōl-lē'ē neda' ni.

⁴⁴ Caní guca, benē' libán yugu' yōdzō luyú Galilea gapa naca lu yu'u ga tu'dubē' bōnni' judío, en tu'sēdē' queē' Dios.

5

Ta'dzunba' bōla zían

(Mt. 4:18-22; Mr. 1:16-20)

¹ Cate' ni' zoē' Jesús ra' nísado' nazí'i le Genesaret, lu xiyú Galilea, bulu'quída' bōnachi zían Lē' para ila'yōni xtídzē'ē Dios. ² Ní'irō bilé'enē' Jesús chopá bárcodo', zẏóagaca lu nísado' ga na' naca ra' yu bidxi, ate' narúajgaquiē' bōnni' uzẏōn bōla lē'egaca bárcodo' na', en ta'guibē' yōxaj bōla quégaquiē'. ³ Gurenē' Jesús tu lē'e bárcodo' na', le nequi queē' Simón Pedro, ate' gunábinē' lē' udxíguiē' le ia'láti'do' zítu' ga naca ra' yu bidxi na'. Ní'irō gurō'ē Jesús lē'e bárcodo' na', en rō'ōsē' ca' ni' rusēdinē' bōnachi zían nacuá' lu yu bidxi na'. ⁴ Cate' budxi bē'ē didza' Jesús, ní'irō gudxē' Simón, rnnē':

—Busá' bárcodo' ni lu nísado' ga na' rō'ō zila, ate' ni' guli'zalaj yōxaj bōla queēli' para sōnli'-ba' bōla.

⁵ Bubi'ē didza' Simón, rē' Jesús:

—Bōnni' Usēdi, idú yēla chibentu' dxin, en biti' bi bōla nazōnitu'-ba', pero didza' quiu' izáljagara' yōxaj.

⁶ Cate' chigula'zaliē' le, gula'zōnē' zían'tērōba' bōla, ate' réquitiqui' irōza' yōxaj bōla na'. ⁷ Ní'irō bulu'lá'a bulu'lu'isinē', bulu'lídzē' luzá'agaquiē' nacu'ē ia'tú lē'e bárcodo' na' para zá'gaquiē' ilácalenē' légaquiē'. Cate' bila'dxinē' ni' bulu'dzē'ē-ba' bōla irópatē bárcodo' na', ate' chirequi ulu'huótaj bárcodo' na' lu nisa. ⁸ Cate' bilé'enē' Simón Pedro lē' ni, ní'irō buzóa zẏibē' lahuē' Jesús, rnnē':

—Gucuita ga zoa', Xan, tu' naca' bōnni' dul-la'.

⁹ Caní gunnē' tu' radxi ridzōbinē' Pedro ni'a quégacaba' bōla zían na' gula'zōngaquiē'-ba', en lē'sca' caní guca quégaca nupa nacuá'len lē'. ¹⁰ Guladxi gula'dzōbinē' ca' Jacobo, en Juan, yugu' xzí'inē' Zebedeo, nupa ni nácagaca luzē'ē Simón Pedro na'. Ní'irō Jesús rē' Simón na', rnnē':

—Biti' gádxinu'. Na'a isí lo' ichē'u quia' bōnachi ca runu' rizōnu'-ba' bōla.

¹¹ Cate' chibulu'sudxinē' yugu' bárcodo' na' ga naca ra' yu bidxi, ní'irō bulu'cá'anē' yúgu'tē ni', ate' sōjácalenē' Jesús.

Ruínē' Jesús tu bōnni' ré'enē' huē' nudzu' ruzōdi

(Mt. 8:1-4; Mr. 1:40-45)

¹² Cate' zoē' Jesús tu lu yōdzō ni', bidxinē' tu bōnni' ré'ede'enē' huē' nudzu' ruzōdi ga na' zoē'. Cate' bilé'enē' Jesús, busudxín lahuē' lu yu, en gúta'yuē' lahuē', rnnē':

—Xan, channö rë'ënu', huáca unu' neda'.

¹³ Ní'irö bulí nē'ë Jesús, en gudanē' lē'. Rē' lē':

—Rē'ënda'. Gacu' dxi'a.

La' gubídxitē huē' nudzu' queē' bōnni' na'. ¹⁴ Ní'irö Jesús gunná bé'enē' lē' cuntu nu guíē' ca'. Gudxē' lē':

—Guyéaj, yöluf'i cuinu' lahuē' bixúz, ate' yōjnōdzaj que yudo' le ruluf'i nuhuóácu' dxi'a ca gunná bē'ë Moisés, lē na' uluf'i légaquiē' chibóácu'.

¹⁵ Guzētērō didza' que yöl-la' huáca queē' Jesús, ate' bulu'dubi bōnachi zían ga na' zoē' para ila'yōni xtídzē'ë, en para únē' léguequi, ugúē' yōdzōhuē' té'eguequi. ¹⁶ Ní'irö buzē'ë Jesús ni', en guyijē' tu lataj cá'asō, ate' ni' bulidzē' Dios.

Ruínē' Jesús tu bōnni' huē' nacú'uniē' bin

(Mt. 9:1-8; Mr. 2:1-12)

¹⁷ Ia'tú dza, cate' ni' rusédinē' Jesús bōnachi, rō'ōgaquiē' yugu' bōnni' yudo' fariseo len bōnni' yudo' tu'sédinē' xibá queē' Moisés ni', narúajgaquiē' yúgu'tē yōdzō luyú Galilea, en luyú Judea, en lu yōdzō Jerusalén. Naca bē' dē lu nē'ë Jesús yöl-la' huáca queē' Xanru' Dios tu' ruínē' bōnachi te'e nacua' ni'. ¹⁸ Ní'irö bōnni' nuá'agaquiē' le denē' tu bōnni' huē' nacú'uniē' bin bila'dxinē' ga ni', ate' bulu'guiljē' nacxi ilunē' para ila'gu'ë lē' lu yu'u para ila'guixjē' lē' lahuē' Jesús. ¹⁹ Cate' biti' gula'dzōlinē' nacxi ilunē', tu' nacua' bōnachi zían ni', gula'benē' ícjo'olō yu'u na', en gula'saljē' ícjo'o na'. Ní'irö bulu'zōtjē' le denē' bōnni' huē' na', ate' gula'guixjē' lē' gatsaj láhuilō bōnachi ni' lahuē' Jesús. ²⁰ Cate' gúquibe'enē' Jesús ca na' ta'yéajlē'ë Lē', gudxē' bōnni' huē' na':

—Bōnni', yugu' dul-la' nabágu'u chibuníti lahua'.

²¹ Ní'irö gula'si lógaquiē' ta'zá' lādxi'gaquiē' bōnni' yudo' tu'sédinē' na', en yugu' bōnni' yudo' fariseo, ta'nnē': "¿Nuzxi caz bōnni' ni' rnnē' le rucá'ana Dios cá'asó? ¿Nuzxi caz gaca uniti lo dul-la'? Tuzē' Dios runiti lahuē' dul-la'."

²² Réquibe'enē' Jesús le ta'zá' lādxi'gaquiē', ate' rē' légaquiē':

—¿Bizx que rizá' lādxi'li' caní? ²³ Biti' naca bōniga nu guíēsō bōnni' ni: "Yugu' dul-la' nabágu'u chibuníti lahua'", pero naca bōniga nu gun ga chasē', en sē'e ni'ë. ²⁴ Guna' ga inözili' dē lu na' a neda', Bōnni' Guljē' Bōnachi, yöl-la' unná bē' uniti lahua' dul-la' luyú ni.

Ní'irö gudxē' bōnni' na' nacú'uniē' bin, rnnē':

—Li' rea', guyasa. Buá' le denu', en bōaj lidxu'.

²⁵ La' guyásatē' bōnni' huē' na' lógaquiē', ate' bu'ë lē na' gúti'nē', en sōhuójē' lidxē', rigu'ë Dios yöl-la' ba. ²⁶ Gula'nítitiquisínē' yúgu'tē', ate' gula'gu'ë Dios yöl-la' ba, en tádxisinē' ca', ta'nnē':

—Na'a bilé'eru' le run ga rubániru'.

Jesús rulidzē' Leví

(Mt. 9:9-13; Mr. 2:13-17)

²⁷ Gudōdi gulaca yugu' lē ni burúajē' Jesús ni', ate' bilé'enē' tu bōnni' uquíxaj lázagaca bōnachi, lē' Leví, rō'ë ga na' ruquíxjē', ate' Jesús rē' lē':

—Gudá' neda'.

²⁸ La' guyásatē' Leví, ate' bucá'anē' yúgu'tē, en sa'yéajlenē' Jesús.

²⁹ Gudōdi ni' benē' Leví na' tu gúf'i huagu queē' Jesús ga naca lu yu'u lidxē', ate' gula'cu'ë zían bōnni' uquíxaj ni' len ia'bal-lē' bōnni' ta'bōlenē' légaquiē' tahuē'. ³⁰ Ní'irö bōnni' yudo' tu'sédinē' len yugu' bōnni' yudo' fariseo gula'nnē' quégaquiē' bōnni' uséda queē' Jesús, ta'nnē':

—¿Bizx que rē'aj rágulenli' yugu' bōnni' uquíxaj, en ia'zica'rē' bōnni' dul-la'?

³¹ Bubi'ë didza' Jesús, rē' légaquiē':

—Yugu' bōnni' nacué dxi'a biti' naquíniguequinē' nu un bōnachi, pero bōnni' té'enē' naquíniguequinē' nu un bōnachi. ³² Za'a, calēga ulidzagaca-nē' bōnni' tsahui', pero za'a ulidzagaca-nē' bōnni' dul-la' para ulu'bi'i lādxi'gaquiē'.

Ta'nábinē' Jesús ca naca que yöl-la' run gubasa

(Mt. 9:14-17; Mr. 2:18-22)

³³ Ní'irö bōnni' yudo' na' gula'nábinē' Jesús, ta'nnē':

—¿Bizx que tunē' gubasa zían luzuí bōnni' dá'gaquiē' Juan, en tu'lidzē' Dios, ate' tunē' ca' caní bōnni' dá'gaquiē' yugu' bōnni' yudo' fariseo, pero bōnni' dá'gaquiē' Li' té'aj tahuē'?

³⁴ Jesús rē' légaquiē':

—¿Naru' huácatsō gunli' ga ilunē' gubasa bōnni' nacué laní que yöl-la' rutsaga na' tsanni ni' bōnni' rutsaga nē'ë zóalenē' légaquiē'? ³⁵ Huadxín dza cate' udúē' bōnni' rutsaga nē'ë ga nacu'ë. Dza ní'irö ilunē' gubasa.

³⁶ Ní'irö bucúdzü'ë didza' Jesús ca naca lē ni, ate' rē' légaquiē':

—Cuntu nu bönni' ichúguië' tu lari' cubi chinadí, en cuejë' tsötaca' le udë'ë lë'e lari' tēbi. Channō gunë' caní, calégasō gaca ditaj lari' cubi na', pero lári'do' na' birúaj lë'e lari' cubi na' bití' tsōjloza lari' tēbi na'. ³⁷ Lēsa' caní, cuntu nu bönni' rigüë'ë xisi uva cubi lu buzudi guídi gula. Channō nu gun caní, xisi uva cubi na' uchōza' buzudi guídi gula, ate' ilalaj xisi uva na', ate' gaca ditaj buzudi guídi gula na'. ³⁸ Que lë ni na' ral-la' cá'aru' xisi uva cubi lu buzudi guídi cubi, ate' irópatë ilaca chí'i. ³⁹ Channō zoa nu rë'aj xisi uva gula, bití' guë'ënitë guí'aj xisi uva cubi, tu' rnna: "Nácarō sizxi' xisi uva gula na'."

6

Bönni' usēda queë' Jesús ta'lecjē' do xzoa' xtila dza lá'ayi

(Mt. 12:1-8; Mr. 2:23-28)

¹ Cate' naca tu dza lá'ayi quégaquië' bönni' judío, ridödë' Jesús gapa dë yōla xzoa' xtila, ate' bönni' usēda queë' ta'lecjē' do ga dxia xzoa' xtila. Ta'zxi'ni ná'agaquië' le, en tahuë'.

² Ní'irō gula'nábinë' bönni' yudo' fariseo légaquië', ta'nnë':

—¿Bíx que runli' le cabí ral-la' gunru' dza lá'ayi?

³ Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'? ⁴ Guyázië' lu yu'u queë' Dios, en guzxi'ë yōta xtila tu'cu'ë lahuë' Dios, lë na' bití' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

⁵ Ní'irō Jesús gudxë' légaquië', rnnë':

—Neda', Bönni' Guljē' Bónachi, naca' xani dza lá'ayi.

Tu bönni' narequi' nē'ë

(Mt. 12:9-14; Mr. 3:1-6)

⁶ Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sëdë' queë' Dios, en busédinë' nupa nacuá' ni'. Zoë' ca' tu bönni' ni' narequi' nē'ë ibëla.

⁷ Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channō únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'. ⁸ Réquibe'enë' Jesús le ta'zá' láchxi'gaquië', ate' gudxë' bönni' na' narequi' nē'ë, rnnë':

—Guyasa. Guzuí gatsaj láhui'lō ni.

La' guyásatë' bönni' na', guzuínë'. ⁹ Ní'irō Jesús gudxë' yugu' bönni' yudo' na', rnnë':

—Unábitsōqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö? ¿Naru' dë lataj uguéla'ru' yöl-la' na' bán quégaca bönachi, o ugúaru' le?

¹⁰ Ní'irō buyüë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí nē'ë bönni' na', ate' la' böacaté nē'ë na'. ¹¹ Ní'irō gula'lenë' bönni' yudo' na', ate' gulún xtidza'gaquië' la' légacasë' nacxi bi ilunë' queë' Jesús.

Ribödë' Jesús chínnuë' bönni' ilácagaquië' gubáz queë'

(Mt. 10:1-4; Mr. 3:13-19)

¹² Dza ni' guyijë' Jesús ga naca tu lu guí'ado'. Bulidzë' Dios ni', ate' idú yëla bé'lenë' Dios didza'. ¹³ Cate' za' rení', bulidzë' yugu' bönni' dá'gaquië' Lë', ate' gurödë' chínnuë' para iláquië' gubáz queë'. ¹⁴ Bulidzë':

Simón, (lë' ca' Pedro),

Andrés, (böchë'ë Pedro),

Jacobo, en Juan, en Felipe, en Bartolomé,

¹⁵ Mateo, en Tomás,

Jacobo, (zxi'inë' Alfeo),

Simón, (bönni' ruí'i láchxë'ë yödzo queë'),

¹⁶ Judas, (böchë'ë Jacobo),

en Judas Iscariote, (bönni' udödë' Jesús lu ná'agaquië' bönni' ilútië' Lë').

Ruínë' Jesús bönachi zían

(Mt. 4:23-25)

¹⁷ Jesús bötjalenë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë zíanrō ca' bönni' usēda queë', ate' nacuá'len légaquië' bönachi zían narúajgaca yúgu'të yödzo luyú Judea, en yödzo Jerusalén, en yugu' yödzo'do' dëgaca ra' nísado' ga na' nacuá' yödzo Tiro, en yödzo Sidón. Bila'dxín bönachi ni ga ni' para ulu'zë nágagaca xtidzë'ë Jesús, en ulu'huóaca lu yödzo'hué' té'eguequi. ¹⁸ Bulu'huóáquië' ca' bönni' ni' ta'guí' ta'záquië' lu ná'agaca bö' xihui'. ¹⁹ Yúgu'të bönachi zían na' tuí'i láchxi'gaca ila'gán Jesús tu' ruúnë' léguequi len yöl-la' huáca queë'.

Nupa nácagaca bica' ba, en nupa nácagaca bica' bayechi'
(Mt. 5:1-12)

²⁰ Ní'irò buyúé' Jesús yugu' bõnni' usêda queé' nacu'ê ni', en gudxê' légaquié':

—Bica' ba libí'ili', réquibe'eli' riyadzjali' le naca queé' Dios, tu' gata' queéli' lataj ga rinná bē'ê Dios.

²¹ 'Bica' ba libí'ili' ridunli' le gunnê' Dios queéli', tu' huóljali'.

'Bica' ba libí'ili' ribõdxili' tu' bi nadéli'li' le naca tsahui', tu' huadxín dza uzxidxili'.

²² 'Bica' ba libí'ili', tu' za' dza cate' biti' ila'lé'e bõnachi libí'ili' dxi'a, en ulu'béaj libí'ili' ga nacuá', en ila'nné' zì' queéli', en ulu'cá'ana cá'asô le nazí'i lali' ca tu le naca xihui' tu' dá'ali' neda', Bõnni' Guljê' Bõnachi. ²³ Buli'sí' xibé dza na', en buli'dzeja, tu' naca zxõn le guequi queéli' yehua' yubá. Lêscá' caní gulunê' xuz xtó'ogaca bõnachi ní' quégaquié' bõnni' gulu'ê didza' uláz queé' Dios.

²⁴ 'Bica' bayechi' libí'ili', dē yöl-la' tsahui' queéli', tu' chidê le ruzí'ili' xibé.

²⁵ 'Bica' bayechi' libí'ili' nuhuólaj nudzé'eli' na'a, tu' huadunli'.

'Bica' bayechi' libí'ili' ruzxidxili' na'a, tu' huf'inili', en cõdxi yéchi'li'.

²⁶ 'Bica' bayechi' libí'ili' ta'nnê yúgu'tê bõnachi dxi'a queéli'. Lêscá' caní gulunê' xuz xtó'oli', gula'nnê' dxi'a quégaquié' bõnni' gula'zì' yê'ê, gula'nnê' nácagaquié' bõnni' tu'ê didza' uláz queé' Dios.

Ral-la' idxí'iru' nupa biti' ta'lé'e rē'u dxi'a
(Mt. 5:38-48; 7:12)

²⁷ Gunnê' ca' Jesús:

—Libi'ili' zóali' ni, en riyõnili' xtídz'a, rea' libí'ili': Guli'dxí'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'. ²⁸ Guli'nabi Dios gaca dxi'a quégaca nupa tua' dō' queéli', en buli'lidzê' Dios inábili'-nê' gácalenê' nupa ta'nnê' zì' queéli'. ²⁹ Channõ nu capa' tsólá'a xagu', buzê' ia'tsólá'a ca' xagu'. Channõ nu cúa lari' naxó'a cúdz'u, bē' lataj cúa ca' xzo'. ³⁰ Nútí'tes nu bi inaba le dē quíu', bunõdzaj que, ate' nu cúa le nequi quíu', biti' unabu' le. ³¹ Ca rē'enili' ilún bõnachi queéli', lêscá' caní guli'gún quéguequi.

³² 'Channõ nadxf'isili' nupa nadxf'igaca libí'ili', ¿bizxi yöl-la' ba idéli'li'? Lêscá' caní tunê' bõnni' dul-la', ta'dxí'inê' nupa nadxf'iguequi légaquié'. ³³ Channõ runli' le naca dxi'a quégacasô nupa tun dxi'a queéli', ¿bizxi yöl-la' ba idéli'li'? Lêscá' caní tunê' bõnni' dul-la'. ³⁴ Channõ runõdzjali' quégaca nupa runli' löza ulu'bí'i queéli', ¿bizxi yöl-la' ba idéli'li'? Lêscá' caní tunê' bõnni' dul-la', tu' nõdzjê' quégaca nupa tun dul-la', tu' tunê' löza ulu'bí'i quégaquié' lê na' bulu'nõdzjê'. ³⁵ Neda' rea' libí'ili': Guli'dxí'i nupa biti' ta'lé'e libí'ili' dxi'a, en guli'gún le naca dxi'a. Buli'nõdzaj quégaca bõnachi sal-la' biti' runli' löza nu ubí'i queéli'. Channõ caní gunli', zxõn naca le gata' queéli', ate' gácali' zxf'ini cazê' Dios, Nu nácaterõ lo, tu' runê' Lê' le naca dxi'a quégaca bõnachi biti' ta'yaza ládxi'gaca, en quégaca bõnachi tuá' dō'. ³⁶ Buli'huéchi' ládxi'li' bõnachi ca na' runê' Xúzili' Dios, ruhuéchi' ládxi'ê yúgu'tê bõnachi.

Biti' ral-la' ichugu bē'êru' que luzá'aru'
(Mt. 7:1-5)

³⁷ Gunnê' ca' Jesús:

—Biti' ichugu bē'êli' que luzá'ali', ate' cuntú nu ichugu bē' queéli'. Biti' cuéaj bē'êli' que luzá'ali', ate' cuntú nu cuéaj bē' queéli'. Buli'niti lo luzá'ali', ate' Dios uniti lahué' ca' libí'ili'. ³⁸ Buli'nõdzaj que luzá'ali', ate' Dios gunnê' queéli'. Ulu'nõdzjê' queéli' le ulu'rixê' len tu guí'ina ribixi le naca idú, le naguirõ, en naguí gate ga rē', en zóatica' gubá. Ca naca le ruríxili', la' cá'asô urixê' Dios ca' queéli'.

³⁹ Bucúdz'uê didza' Jesús, rē' légaquié':

—¿Naru' huácatsõ nu bõnni' lo chul-la ichê'ê ia'tué' bõnni' lo chul-la? Biti' ca' gaca, tu' ila'bixê' iropê' tu lu yeru. ⁴⁰ Biti' ca' gácarê' lo tu bõnni' usêda ca nu rusêdi lê', pero cate' údxi izêdê' bõnni' na', gáquié' ca naca nu na' rusêdi lê'.

⁴¹ ¿Bizx que ruyú' bēbudo' yu'u guiõj lahué' bõchi' luzó'o, en biti' rilé'enu' le zxõn yu'u guiõj lo cazu'? ⁴² ¿Naru' huácatsõ guío'-nê' bõchi' luzó'o: "Bõcha'a, benna lataj cueja' bēbudo' yu'u guiõj lo", en biti' rilé'enu' le zxõn yu'u guiõj lo cazu'? Li', bõnni' ruluf'isô tsahui' cuinu', guléaj zí'alô le zxõn yu'u guiõj lo cazu', ate' ní'irô ilé'enu' dxi'a para cueju' bēbudo' yu'u guiõj lahué' bõchi' luzó'o.

Le runru' naca bē' le nácaru'
(Mt. 7:17-20; 12:34-35)

⁴³ Gunnê' ca' Jesús:

—Tu yaga dxi'a biti' cuía le naca cá'asô. Lêscá' caní, tu yaga guí'a biti' gaca cuía le naca dxi'a. ⁴⁴ Caní naca, le ribía tu yaga naca bē' ca naca yaga na'. Biti' ruchíbiru' le ribía yaga higo lu yaga yõtsi', en calêga lu bisequi' yõtsi' biti' ruchíbiru' le ribía lubá uva. ⁴⁵ Tu bõnni'

dxi'a ru'ë didza' dxi'a tu' yu'u le naca dxi'a icja lãdxi'da'ahuë', ate' didza' xihui' ru'ë bönni' xihui' tu' yu'u icja lãdxi'da'ahuë' le xihui'. Rinnë ruá'aru' ca naca le yu'u icja lãdxi'do'oru'.

Chopa ca gaca cuéquiru' xilibi yu'u
(Mt. 7:24-27)

⁴⁶ Gunnë' ca' Jesús:

—¿Bizx que rulidzali' neda', rnnali': "Xantu', Xantu'", pero biti' runli' ca rinná bé'eda' libí'ili"? ⁴⁷ Ulu'ida' libí'ili' ca naca nu na' za' quia', en riyöni xtídza'a, en run ca rnna xtídza'a. ⁴⁸ Nu ni naca ca tu bönni', cate' benë' lidxë', guchö'önë' ga rë', en gulë'quie' xilibi yu'u ga naca lu guiöj. Cate' bötaj yegu gubó'o, guchö'öna cuita yu'u na', pero biti' guca uquinnaj le, tu' nulibi ga naca lu guiöj. ⁴⁹ Na'a, nu riyöni xtídza'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchö'öna yegu gubó'o cuita yu'u na', la' biguinnajtë, ate' gubixi dërö zö'ö que.

7

Jesús ruinë'-bi' bi'i huen dxin queë' tu bönni' unná bë'

(Mt. 8:5-13)

¹ Cate' Jesús budxi bé'lenë' légaquie' didza' ni, guyázië' yödzo Capernaum. ² Lu yödzo ni' zoë' tu bönni' Roma rinná bé'enë' bönni' rōjáquie' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. ³ Cate' biyönnë' bönni' ni didza' tu'ë bōnachi ca naca queë' Jesús, la' gusöl-la'të' bal-lë' bönni' gula tu'zéajni'inë' bönni' judío ga na' zoë' Jesús, tsójōta'yugaquie' lahuë' Lé' guidë' uduhuënë'-bi' bi'i huen dxin queë' na' ré'ebi'. ⁴ Bönni' gula tu'zéajni'inë' na' bila'dxinë' ga zoë' Jesús, ate' guláta'yuë' lahuë' idú lãdxi'gaquie', ta'nnë':

—Náquie' lesaca' bönni' na' gunu' queë' lë ni, ⁵ tu' runë' bal bōnachi ulãdz queëru', en benë' tu yu'u queëru' ga rudúbiru' rusëdaru' queë' Dios.

⁶ Ní'irō Jesús guyéajlenë' légaquie'. Cate' chizóa ila'dxinë' lidxë' bönni' na', lë' gusöl-lë'ë bal-lë' böchi' luzë'ë ga zë'ë Jesús, ate' tē' Lë':

—Xan, rnnë' bönni' na': "Biti' uguí'inu', tu' cabí naca' lesaca' tsáziu' lidxa', ⁷ en biti' naca' lesaca' guida' ga zu'. Que lë ni na' biti' burúguida' guida' ga zu'. Bë'ësö didza', ate' huóacatébi' bi'i huen dxin quia'. ⁸ Neda' ca', zoa nu rinná be'e neda', ate' nacu'ë ca' bönni' rōjáquie' gudil-la rinná bé'eda' légaquie'. Rea'-në' tuë': Guyéaj ni', ate' rejë'. Rea'-në' ia'tué': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'."

⁹ Cate' biyönnë' Jesús didza' ni, bubánnë' queë' bönni' na', ate' buécjë', en gudxë' bōnachi na' zá gaca cúdu'lë', rnnë':

—Le nácatë rea' libí'ili', cuntu nu bönni' Israel biti' rōjxáquid'a'-në' réajlë'ë quia' ca réajlë'ë quia' bönni' ni.

¹⁰ Cate' bulu'dxinë' bönni' na' gusöl-lë'ë bönni' rinná bé'enë' bönni' rōjáquie' gudil-la, gula'yázië' ga naca lu yu'u lidxë', en bila'lë'enë' chibóacabi' bi'i huen dxin na'.

Jesús rusubanë'-bi' bi'i bönni' queënu tu nigula uzëbi

¹¹ Gudödi guca lë ni, sa'yéajë' Jesús yödzo Naín, ate' dzágagaquie' bönni' usëda queë' Lë', len bōnachi zían. ¹² Cate' bidxinë' gala' ra' yödzo na', bilé'enë' yugu' bönni' nuá'agaquie'-bi' tubi' bi'i bönni' nati. Sójcáchi'gaquie'-bi'. Bi'i nati na' nácabi' la's dui bi'i queënu tu nigula uzëbido'. Zían bōnachi uladza queënu nigula uzëbi na' sōjácálen-nu. ¹³ Cate' Xanru' bilé'enë'-nu, buéchi' lãdxë'ë-nu, ate' gudxë'-nu:

—Biti'rō cödxu'.

¹⁴ Ní'irō gubíguie' Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquie'-bi', ate' Jesús gunnë':

—Bi'ido', li' rea', guyasa.

¹⁵ Ní'irō hubanbi'. Gurö'öbi' bi'i na' z'álö nátibi', ate' gusí lobi' ru'íbi' didza'. Jesús budöde'-bi' lu ná'anu xiná'abi'. ¹⁶ Cate' bönni' ni' bila'lë'enë' lë ni, gulãdxinë' yúgu'të', ate' gula'gu'ë Dios yöl-la' ba, ta'nnë':

—Bidxin queëru' tu bönni' lo, ru'ë didza' uláz queë' Dios. Dios caz rácalenë' bōnachi queë'.

¹⁷ Guzë' didza' ca naca yöl-la' huáca queë' Jesús, ate' bila'yōni bōnachi yúgu'të yödzo luyú Judea, en yúgu'të yödzo idú gásibi'illö.

Le rinabë' Juan, bönni' buquilë' bōnachi nisa

(Mt. 11:2-19)

¹⁸ Bönni' dá'gaquie' Juan gula'guixjōi'inë' lë' yúgu'të lë ni runë' Jesús. Ni' yu'ë Juan lidxi guie', bulidzë' chopë' bönni' na' dá'gaquie' lë, ¹⁹ ate' gusöl-lë'ë légaquie' ga na' zoë' Jesús para ila'nábinë' Lë', ila'nnë': "¿Nacu' Li' Cristo, bönni' ral-la' guidë', o naru' ral-la' cöztu'-në' bönni' yúbölo?" ²⁰ Cate' bila'dxinë' bönni' na' nasöl-lë'ë Juan ga na' zoë' Jesús, tē' Lë':

—Juan, bönni' buquülë' bönachi nisa, nasöl-lë'ë netu' para inábitu' Li', innatu': "¿Nacu' Li' Cristo, bönni' na' ral-la' guidë', o naru' ral-la' cöztu'-në' bönni' yúbölö?"

²¹ La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chul-la busaljë' guiöj lógaquië'. ²² Bubi'ë didza' Jesús, rë' chopë' bönni' na' nasöl-lë'ë Juan, rnnë':

—Guli'tséaj, guli'tsöjixjöi'-i-në' Juan ca naca le bilé'eli', en le biyónili'. Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuóacagaquië' bönni' guí'iguequinë' huë' nudzu' ruzödi. Tu'yönnë' bönni' gula'códzuë'. Nubángacagië' bönni' gulátie'. Ta'yönnë' bönni' yechi' didza' dxi'a. ²³ Bica' ba nu biti' gaca chopa ladxi', ate' za'len neda' sal-la' biti' runa' ca réqui nu na' ral-la' guna'.

²⁴ Cate' bönni' na' gusöl-lë'ë Juan bulu'zë'ë ni', gusi' lahuë' Jesús rulu'ínë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? ²⁵ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quezili' nupa nácuagaca lari' nazáca'de'e, en tu'z' xibë yöl-la' tsahui', nacuá' lídixagacië' bönni' ta'nná bë'ë. ²⁶ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libí'ili', ate' nayëpisëtërë' ca nu ru'i didza' uláz queë' Dios. ²⁷ Náquië' Juan bönni' na' nazúaj lu guichi lá'ayi ca naca queë', rnna:

Buyútsöca', risöl-la'-a-në' gubáz quia', inöruë' ca Li'.

Bönni' ni uchi'ë nöza ga tödu'.

²⁸ 'Neda' rea' libí'ili': Gapa nacuá' bönachi, channö zoë' nu bönni' ru'ë didza' uláz queë' Dios, biti' nácarë' lo ca Juan, bönni' na' buquülë' bönachi nisa, pero nu nácatërö cuidi'sö ga rinná bë'ë Dios nayëpisëtërö ca Juan na'.

²⁹ Cate' bönachi ni', en bönni' tu'quixxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan, ³⁰ pero yugu' bönni' yudo' fariseo, en bönni' yudo' tu'sédinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

³¹ Gunnë' ca' Xanru':

—¿Nacxi uséqui'tseda' bönachi nacuá' dza ni zóaru' na'a? ¿Nacxi caz náacagaquië'? ³² Náacagaquië' ca bí'ido' ta'guítjabi'. Ta'bö'öbi' lu yë'ëyi, en ta'bödx'abi'. Ta'nnabi' tubi' ia'tubi': "Rucödxitu' queëli' gui, pero biti' ruyá'ali'. Rul-la yéchi'tu', pero biti' ribödxili'." ³³ Caní nácali' tu' bidë' Juan, bönni' buquülë' bönachi nisa, en biti' gudahuë' yöta xtila, en biti' gu'ë xisi uva, ate' rnnali' queë': "Tu' xihui' dzaga lë'." ³⁴ Cate' bida' neda', Bönni' Guljë' Bönachi, en rë'aj rahua', rnnali' quia': "Bönni' ni náquië' bönni' huágulë'ë, en bönni' re'jë'. Náquië' luzá'agaquië' bönni' tu'quixxjë', en ia'zica'rë' bönni' dul-la'." ³⁵ Rea' libí'ili': Naca bë' nupa nápagaca yöl-la' réajni'i queë' Dios ni'a que le túngaca.

Le benë' Jesús lidxë' tu bönni' yudo' fariseo

³⁶ Tu bönni' yudo' fariseo bulidzë' Jesús gágulenë' lë' tsözxön, ate' guyazië' Jesús lidxë' bönni' na', en gurö'ë rahuë'. ³⁷ Zóanu lu yödzö na' tu nigula udá dzaga, en cate' nözinu rö'ë rahuë' Jesús lidxë' bönni' yudo' fariseo na', ní'irö bidxinnu ni' nuá'anu tu böga'do' néquini guiöj nazaca' le yudzu tu le rilá' zxixi. ³⁸ Cate' bidxinnu zaca' cüdzu'lë' Jesús, gurö'önu xini'ë ribödxinu. Ní'irö gusi' lonu rigú'unu nisa ribödxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxixi. ³⁹ Cate' bönni' yudo' fariseo na' nulidzë' Jesús bilé'enë' lë ni, guzá' lidxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquibe'enë' nuzxi na', en nacxi nácanu nigula ni rigannu Lë', tu' nácanu nigula udá dzaga." ⁴⁰ Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

⁴¹ Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxië' que chopa iz, ate' ia'tué' na' ral-lë'ë queë' lazxië' que chopa beo'. ⁴² Tu' cabí dë quégaquië' dumí ulu'guixxjë' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxi'irönë' bönni' na' buniti lahuë' légaquië'?

⁴³ Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rnno'.

⁴⁴ Ní'irö buécjë' Jesús, ate' ni' ruyüë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quíbidá' ni'a, pero nigula ni gulu'unu ni'a nisa ribódxinu, en buzxinu ni'a len guitsa' ícjanu. ⁴⁵ Biti' buttsaga lo' neda', pero cate' bidxíntea' lidxu', biti' ruzóá dxinu nigula ni, rutsaga lonu ni'a. ⁴⁶ Biti' gulu'u icja' le za, pero nigula ni gulu'unu ni'a lê na' rilá' zixixi. ⁴⁷ Que lê ni na' rea' li', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahué' le láti'do'os, láti'do'os nadxí'i Dios nu na'.

⁴⁸ Ní'iró Jesús gudxé'-nu nigula na', rnné':

—Dul-la' gubágu'u chiguyú'u yöl-la' runiti lo que.

⁴⁹ Yugu' bõnni' na' ta'bõ'lené' Jesús tahué' gula'sí lógaquié' tē' luzá'agaquié', ta'nné':

—¿Nuzxi caz bõnni' ni, runiti lotsé' ca' dul-la'?

⁵⁰ Ní'iró Jesús gudxé'-nu nigula na', rnné':

—Tu' réajlê'u neda', chibuló' li'. Bõaj lidxu', zoa dxi ládxi'u.

8

Yugu' nigula tácalennu Jesús, ta'gú'unu le tahué'

¹ Gudódi gulaca lê ni, gudé' Jesús gapa nacuá' zían yödzo zxon, en yugu' yödzo'do, ate' bené' libán ni', en bē'ē didza' que didza' dxi'a ca rinná bē'ē Dios, ate' idxínnutē' bõnni' usēda queé' dzágagaquié' Lē'. ² Bál-lanu nigula buné' Jesús légacanu dzágagacanu ca' Lē'. Bubéajé' bō' xihui' yú'ugaca légacanu, en bugúé' yugu' yödzo'hué' gú'igúequinu. Nútsa'nu ládjagacanu María, lēnu ca' Magdalena, nigula na' bubéajé' gadxi bō' xihui' yú'ugaca lēnu. ³ Juana, nigula queé' Chuza, bõnni' yu'u lu nē'ē le dē lidxé' Herodes, nútsa'nu ca' ládjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en zíanrónu ca', le tahué' Jesús, en yugu' bõnni' usēda queé'. Tu'nódzjanu le dē quégacanu.

Rucúdzu'ē didza' Jesús ca naca queé' bõnni' guz

(Mt. 13:1-9; Mr. 4:1-9)

⁴ Bila'rúaj bõnachi zían yugu' yödzo ni', en bilá'gaca ga na' zoé' Jesús. Cate' bulu'dubé' ga na' zoé', Lē' bucúdzu'ē didza', rē' légaquié':

⁵ —Birúajé' bõnni' guz, sōjēsiē' xisedo'. Cate' ni' sōjēsiē', bulu'huóxaj bal-la xisedo' na' ga naca la' nōza, ate' bulu'libi bõnachi léguequi. Bila'dxinba' ca' biguínido', en gulé'ajba' xisedo' na' dzó'ō la' nōza. ⁶ Bulu'huóxaj ia'bal-la xisedo' na' lu yu ga rō'ō guiój. Cate' gula'lén xisedo' na', la' gula'bidxité' tu' cabi nalupa' yu na'. ⁷ Bulu'huóxaj ia'bal-la xisedo' na' ga bulu'lén lubá yōtsi'. Tsōzxón gula'zxón lubá yōtsi' na', en xisedo' na', ate' lubá yōtsi' na' bila'rōli xisedo' na' gula'lén, en gulún ditaj léguequi. ⁸ Bulu'huóxaj ia'bal-la xisedo' na' ga naca luyú bēbu. Cate' chigula'zxón, bulu'nódzaj. Tu dxi'gu' na' bunódzaj ia'tú gayuá'tērō xisedo' ca'.

Cate' budxi gunné' caní Jesús, bē'ē zidzaj didza', rnné':

—¡Nu zoa nagui, en riyōni ral-la' uzé nagui!

Bizx que rucúdzu'ē Jesús didza'

(Mt. 13:10-17; Mr. 4:10-12)

⁹ Ní'iró yugu' bõnni' usēda queé' Jesús gula'nábiné' Lē', ta'nné':

—¿Bizxi sa'yéaj lê na' bucúdzu'u didza'?

¹⁰ Jesús gudxé' légaquié':

—Dios ruzéajni'iné' libí'ili' le nagachi' ca rinná bē'ē Lē', pero ia'zica'rō bõnachi ni, ru'ilena' léguequi didza' le rucúdzu'a didza' para cate' ulu'yúé', biti' ila'lé'ené', en cate' ila'yōnné', biti' ila'yéajni'iné'.

Rigúxjō'ē Jesús le rulu'i le bucúdzu'ē didza'

(Mt. 13:18-23; Mr. 4:13-20)

¹¹ Gunné' ca' Jesús:

—Caní naca le rulu'i lê na' bucúdzu'a didza'. Xisedo' na' naca xtídzē'ē Dios. ¹² Xisedo' na' bulu'huóxaj la' nōza tu'lufi' ca raca quégaca bõnni' ta'yōnné' didza' na', pero la' za'tē tu' xihui', en rigúa didza' na' bidxín lu icja ládxi'do'gaquié', para cabi ila'yéajlê'ē, en cabi ulu'lē'. ¹³ Xisedo' na' bulu'huóxaj lu yu ga rō'ō guiój tu'lufi' ca raca quégaquié' bõnni' ta'yōnné' didza' na', en tu'dzéjané' ta'zi'ē le, pero nácaagaquié' ca xisedo' na' biti' ben lui. Tu chí'isō ta'yéajlê'ē, tu' ridxín le rizi' bē' légaquié', ate' la' tu'huoatē ládxi'gaquié'. ¹⁴ Xisedo' na' bulu'huóxaj ga bulu'lén lubá yōtsi' tu'lufi' ca raca quégaquié' bõnni' ta'yōnné' didza' na', en cate' chibila'yōnné', yugu' le tufi' ládxi'gaquié' yödzo'lió ni, en yugu' yöl-la' tsahui' que, en yugu' le ta'yaza ládxi'gaquié' le taca ni, tun nigui légaquié', ate' biti' run dxin didza' na' lu icja ládxi'do'gaquié'. ¹⁵ Xisedo' na' bulu'huóxaj ga naca luyú bēbu tu'lufi' ca raca quégaquié' bõnni', idú ládxi'gaquié' ta'yōnné' didza' na', en ta'gu'ē tsutsu le lu icja ládxi'do'gaquié', ate' lu yöl-la' ribōza zxon ladxí' tuné' ca rnna didza' na'.

Rucúdzu'è didza' Jesús que le rigú'u bení' lídxiu'
(Mt. 4:21-25)

¹⁶ Gunně' ca' Jesús:

—Cuntu nu bōnni' ruquelē'è guí', ate' la' rudúsi'tē' le guí'ina, en bití' rigú'è le zxani le ráti'nē', pero ruzóē' le xilataj ga naca liná' lu yu'u, ate' nupa ila yaza ni' ulu'z' xibé guí' na'.

¹⁷ Ilá' lahui yúgu'tē le nagachi', ate' gaca bē', ate' irúaj ga liná' yúgu'tē le raca balándo'os.

¹⁸ 'Que lē ni na', buli'zē nágali', tu' huadéli'nē' ia'lati' bōnni' ruzóē' tsutsu icja ládxi'da'ahuē' didza' riyōnnē', en huazi'rē' xtídzē'è Dios, pero bōnni' bití' ruzóē' tsutsu icja ládxi'da'ahuē' didza' riyōnnē', huadúa didza' na' biyōnnē'.

Xinē'è Jesús, en yugu' bōnni' bōchē'è

(Mt. 12:46-50; Mr. 3:31-35)

¹⁹ Ní'irō bila'dxinē' xinē'è Jesús, en yugu' bōnni' bōchē'è ga na' zoē', pero bití' guca ila'bíguē'è gala' ga zoē' tu' nacuá' bōnachi zían ni'. ²⁰ Zoa ni' nu bulidza Jesús, rnna:

—Nacu'è xinó'o, en yugu' bōnni' bōchu'u lō'a. Tē'ēnnē' ilu'ilenē' Lì' didza'.

²¹ Bubi'è didza' Jesús, rē' légaquiē':

—Nupa ni ta'yōni xtídzē'è Dios, en tun ca rnna, bōnni' ni nácagaquiē' ca xiná' caza', en yugu' bōnni' bōchi' caza'.

Jesús ribequi dxiē' bō' budunu'

(Mt. 8:23-27; Mr. 4:35-41)

²² Tu dza gurenē' Jesús tu lē'e bárcodo', dzágagaquiē' bōnni' usēda queē' Lē', ate' Jesús rē' légaquiē':

—Udōditsōca'ru' ia'tsōlá'a nísado' ni.

Ní'irō sōjácate'. ²³ Tsanni ni' ta'dōdē' lu nísado' na', rásiē' Jesús. Ní'irō gusí lo recja bō' budunu' lu nísado' na', ate' chirequi huōtaj bárcodo' na' zcan nisa, en zoa bōnadxi quégaquiē'.

²⁴ Ní'irō gula'biguē'è ga dē' Jesús, en bulu'subanē' Lē', ta'nnē':

—[Bōnni' Usedi! |Bōnni' Usedi! |Chirequi huōtjaru' lu nisa!

Cate' bubanē' Jesús, bulidzē' bō' na' recja, en nisa na' riyasa ridxiáda', ate' guzóa dxi bō' na' recja, en gurō'ō dxi lu nísado' na'. ²⁵ Ní'irō Jesús gudxē' yugu' bōnni' usēda queē', rnnē':

—¿Naru' cabí réajilē'ēli' Dios?

Guládxinē' légaquiē', en tu'bánninē'. Gulē luzá'agaquiē' tuē' ia'tuē':

—¿Nuzxi caz bōnni' ni? Rinná bē'enē' bō' recja, en nísado', ate' tun ca rnna xtídzē'è.

Tu bōnni' yōdzō Gadara yu'u lē' bō' xihui'

(Mt. 8:28-34; Mr. 5:1-20)

²⁶ Ní'irō bila'dxinē' lu xiyúgaquiē' bōnni' Gadara, le dē ia'tsōlá'a nísado' ca dōdilō ga dē luyú Galilea. ²⁷ Cate' birúajē' Jesús lē'e bárcodo' na' ga naca lu yu na', dutságuie' tu bōnni' yōdzō na' Lē'. Chigudzē yu'u bō' xihui' lē', ate' bití'rō rácuē' lari', en bití'rō rizóē' lu yu'u, pero nun xilatjē' lu zcan bulóaj ga nádjagaca yeru ba. ²⁸ Cate' bōnni' na' yu'u bō' xihui' lē' bilé'enē' Jesús, gurōdxi'è zidzaj, ate' buzóa zxiabē' lahuē' Jesús, en bē'è zidzaj didza', rnnē':

—¿Bizxi ral-la'a quíu', Jesús, Zxi'inē' Dios nayépisetērē'? Ráta'yua' lo' cabí usaca' zi'u neda'.

²⁹ Caní gunnē' tu' chigunná bē'enē' Jesús bō' xihui' na' uruáj lu bōnni' na'. Zían luzuí zí'atēlō burixi butúluda' bō' xihui' na' bōnni' na', ate' yugu' bōnni' yōdzō ni' gulúguie' lē' du guíē, en bulu'xéjanē' bregui' guíē ni'a nē'è, pero blē'è yugu' du guíē na', ate' bō' xihui' na' yu'u lē' guchē' lē' lu lataj cá'asō. ³⁰ Ní'irō Jesús gunábinē' bō' xihui' na', rnnē':

—¿Bi leu'?

Bō' xihui' na' gudxi Lē':

—Le Zían lea'.

Caní gunná tu' yú'ugaca bō' xihui' zían bōnni' na'. ³¹ Ní'irō yugu' bō' xihui' na' guláta'yugaca lahuē' Jesús cabí isól-lē'è léguequi lataj chul-la quégaca nupa nátigaca.

³² Nacuá'aba' ca' tu có'ōba' cuchi zían ta'daba' táguba' lu guí'ado' ni', ate' bō' xihui' na' gula'naba yechi' Jesús gu'è léguequi lataj tsójtusú'ugaca cuchi zían na'. Jesús bē'è léguequi lataj.

³³ Bulu'rúaj yugu' bō' xihui' lu bōnni' na', en yójtusú'ugaca cuchi zían na', ate' yójacaba' cuchi zían na' ga naca tu lē' guíōj. Yójbixigacaba' lu nísado', ate' ni' gula'yēpiba' nisa, gulátiba'.

³⁴ Cate' bila'lē'enē' bōnni' tu'yúgaquiē'-ba' cuchi zían na' ca na' guca quégacaba', guládxí gula'dzōbinē'. Bulu'zxúnnajē' ni', ate' yóihuōjgaquiē' yójtixjōi'iguequinē' nupa nacuá' yōdzō na', en nupa nacuá' la' guixi' ni'. ³⁵ Ní'irō bila'rúajē' bōnni' yōdzō na', yóyúgaquiē' lē' na' guca. Cate' bila'dxinē' ga na' zoē' Jesús, bila'lē'enē' bōnni' na' gula'yú'u bō' xihui' lē', rō'è xini'è Jesús. Nacuē' lari', en dxi'ado' chizóē', ate' guládxinē'. ³⁶ Nupa na' bila'lē'è lē' na' guca gula'guíxjōi' légaquiē' ca guca, bōáquiē' bōnni' na' gula'yú'u bō' xihui' lē'. ³⁷ Ní'irō yúgu'tē bōnachi zían na' quégaca yōdzō nabábagaca Gadara na' guláta'yu lahuē' Jesús urúajē' lu xiyúguequi, tu' tádxinē'. Bubenē' Jesús lē'e bárcodo' na', en sōhuojē'. ³⁸ Bōnni' na' bulu'rúaj

bō' xihui' na' lē' gūta'yue' lahuē' Jesús gu'ē lē' lataj tséajlenē' Lē' tsōzxōn. Gunná bé'enē' Jesús lē' ugá'anē' ni', rnnē':

³⁹—Bōaj lidxu'. Yōjtíxjōi' bōnachi uládz quiu' yugu' le zxōn benē' Dios quiu'.

Bōajē' bōnni' na' lidxē', ate' buzē' didza' idú lu yōdzō ni' ca naca le zxōn benē' Jesús queē'.

Jesús ruúnē'-bi' bi'i nigula queē' Jairo enca' nigula na' gudannu lari' nácué'

(Mt. 9:18-26; Mr. 5:21-43)

⁴⁰ Cate' budxinē' Jesús ia'tsōlá'a nísado' na', bulu'dzeja bōnachi zían nacuá' ni' ni'a queē' Lē', tu' ta'bōza Lē'. ⁴¹ Ní'irō bidxinē' Jairo ga zoē' Jesús. Náquiē' bōnni' lo que yu'u ga tu'dubē' bōnni' judío, en tu'sedē' queē' Dios. Biyéchuē' xini'ē Jesús, en gūta'yue' lahuē' tsejē' lidxē'. ⁴² Caní benē' tu' zóabi' tubi' bi'i nigula queē', chirequi gátibi'. Nácabi' bi'i la's dui queē', en yú'ubi' ca chinnu iz. Tsanni ni' sa'yéajē' Jesús, sōnógaca tu'quirō bōnachi zían Lē'.

⁴³ Nútsa'nu tu nigula ladaj bōnachi zían na', chiguca chinnu iz riguí' rizáca'nu. Biti' ruhuí' rōn queēnu que huē' quégaca cázanu nigula, ate' chibutōnu dēra le dē queēnu, riguízxjanu nupa tu'ún bōnachi, pero biti' guca nu bōnni' únē'-nu. ⁴⁴ Gubíga'nu zaca' cúdzu'lē' Jesús, en gudannu ruí' lari' nácué', ate' la' buí'tē huē' rōn queēnu.

⁴⁵ Ní'irō Jesús gunábinē' nupa nacuá' ni', rnnē':

—¿Nuzxi na' gudán neda'?

Gula'dá'baguí'ē yúgu'tē. Ní'irō Pedro, en nupa nacuá'len lē' gulē' Lē', ta'nnē':

—Bōnni' Usedi, nacuá' bōnachi zían ni, tu'quirō Li', en tu'dxíga' Li', ate' ¿rnnatso?: “¿Nuzxi na' gudán neda'?”

⁴⁶ Ní'irō Jesús gunnē':

—Zoa nu gudán neda', tu' gúquibe'eda' birúaj yōl-la' huáca neda' le ruún bōnachi.

⁴⁷ Cate' réquibe'enu nigula na' nōzinē' Jesús le bennu, ní'irō guzxízinu. Biyéchunu xini'ē Jesús, en gudíxjōi'nu Lē' lógaca bōnachi zían na' bixx que na' gudannu lari' nácué', en ca na' guca, la' bōacatēnu. ⁴⁸ Ní'irō Jesús gudxē'-nu:

—Nigúlado', tu' réajlē'u neda' chibōácu'. Bōaj lidxu', zoa dxi ládxu'u.

⁴⁹ Cate' ni' ru'ē Jesús didza' ni, bidxinē' tu bōnni' ni', zē'ē lidxē' bōnni' lo na' que yu'u ga tu'dubē' tu'sedē' queē' Dios, ate' gudxē' bōnni' lo na':

—Chigútibi' bi'i nigúlado' quiu'. Biti'rō upízxjanu'-nē' Bōnni' Usedi.

⁵⁰ Cate' biyōnnē' Jesús lē' ni, bubi'ē didza', rē' bōnni' lo na':

—Biti' gádxinu'. Guyéajlē'ēsō Dios. Huōácabi' bi'i nigúlado' quiu'.

⁵¹ Cate' guyáziē' Jesús yu'u na', biti' bē'ē lataj nu tsázalen Lē', pero légacasē' Pedro, en Jacobo, en Juan, enca' xuz xiná'abi' nigúlado' na'. ⁵² Ta'bōdxi nupa nacuá' ni'. Ta'bōdxi yechē'ē ni'a queēbi' bi'i nigúlado' na', ate' Jesús rē' légaquiē', rnnē':

—Biti'rō cōdxili'. Biti' nátibi' nigúlado' ni. Rásisibi'.

⁵³ Bulu'titjē' Lē' tu' nōzguequinē' chinátibi'. ⁵⁴ Ní'irō gudélé'ē Jesús ná'abi', en bē'ē zidzaj didza', rnnē':

—Bi'i nigúlado', guyaschi.

⁵⁵ Ní'irō bu'u bō' naca cázabi', bubanbi', ate' la' guyásatēbi'. Jesús gunná bé'enē' légaquiē' ilu'ē le gágubi'. ⁵⁶ Bulu'bánnē' xuz xiná'abi', pero Jesús gunná bé'enē' légaquiē' cuntu nu ilē' ca na' guca.

9

Risól-lē'ē Jesús bōnni' usēda queē' tsōjéngaquiē' libán

(Mt. 10:5-15; Mr. 6:7-13)

¹ Ní'irō butubē' Jesús idxínnutē' bōnni' usēda queē', ate' budōdē' lu ná'agaquiē' yōl-la' huáca, en yōl-la' unná bē' para ulu'béajē' bō' xihui' yú'ugaca bōnachi, en ulu'únē' nupa te'e. ² Gusól-lē'ē légaquiē' tsōjéngaquiē' libán ca rinná bē'ē Dios, en tsōjhuéngaquiē' nupa te'e. ³ Jesús gudxē' légaquiē':

—Biti' bi guá'ali' para la' nōza, calēga xiyágado', en calēga yōxaj, en calēga yōta, en calēga dumí, en biti' ixóa yenlí' chopa lari'. ⁴ Biti'tés yu'u ga tsú'uli', guli'sóa ni' cate' uzá'arōli' yōdzō na'. ⁵ Gátitēs ga biti' ilún bōnachi libí'ili' bal, buli'ruáj yōdzō na', en guli'cuíbi' bēchtō da' lē'e lálali', le ulufi' légaquiē' nagá'ana xíguia' nabága'gaquiē'.

⁶ Ní'irō bila'ruájē' bōnni' usēda queē' na'. Gula'dōdē' yúgu'tē yōdzōdo', tunē' libán que didza' dxi'a, en tu'únē' nupa te'e yúgu'tē lu yōdzō na'.

Ca gútiē' Juan, bōnni' buquilē' bōnachi nisa

(Mt. 14:1-12; Mr. 6:14-29)

⁷ Biyōnnē' Herodes, bōnni' rinná bē'ē, ca naca yúgu'tē le runē' Jesús, ate' gurō'ē bōniga, tu' ta'nná bōnachi:

—Juan na' chibubané' lu yōl-la' guti.

⁸ Ia'bal-lē' ta'nnē':

—Chibulë'ë Elías, bönni' na' bē'ë didza' uláz queë' Dios.

Ia'bal-lë' ta'nnë'.

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

⁹ Herodes na' gunnë'.

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilë'enë' Jesús.

Rugahuë' Jesús chi-un gayuá' bönachi

(Mt. 14:13-21; Mr. 6:30-44; Jn. 6:1-14)

¹⁰ Cate' bulu'dxinë' bönni' gubáz nasöl-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquië' quez. Yöjáquië' tu lataj cá'asó lu xiyú yödzö Betsaida.

¹¹ Cate' chinöziguequi bönachi lë ni, yöjínoguequi Lë', ate' Jesús benë' léguequi bal, en bē'lenë' léguequi didza' ca rinná bē'ë Dios, ate' bunë' nupa te'e.

¹² Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en tē' Lë':

—Busöl-la' bönachi ni tsöjaca gapa dē yödzödo', en gapa dē yú'udo' idú gásibi'ilö para tsöjtíjagaquië' gapa ulu'gá'anë', en bi ilahuë', tu' naca lataj cá'asó ga ni zóaru'.

¹³ Ní'irö Jesús rē' léguaquië'.

—Guli'gu'ë libí'ili' le ilahuë'.

Tē' Lë':

—Gáyu'sö yöta xtládo' dē, en chópasöba' bōla dēba' queëtü', o ¿naru' huayéajtsatu' tsöjō'öutu' le ilágugaca bönachi zían ni?

¹⁴ Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bō'ë tu cō' huéajgaquië', ilaca ca chi-un huéajgaquië'.

¹⁵ Caní gulunë', ate' gula'bō'ë yúgu'të'. ¹⁶ Ní'irö gudélë'ë Jesús gayu' yöta xtila na', en chópaba' bōla na', ate' guchisa lahuë' ruyúé' lúzxiba, en rē' Dios: "Xclenu'." Ní'irö buzuxzjë' léguequi, en bē'ë quégaquië' bönni' usëda queë' para ulu'cu'ë lógaca bönachi na'. ¹⁷ Gulahuë' yúgu'të', en bulu'huöljanë'. Gudödi na' bulu'tubë' yugu' bizxaj bugá'ana, ate' bulu'lié' idú chinnu ga'bōra.

Rnnë' Pedro Jesús náquië' Cristo

(Mt. 16:13-19; Mr. 8:27-29)

¹⁸ Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' léguaquië', rnnë':

—¿Nuzxi ta'nná bönachi naca' neda'?

¹⁹ Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

²⁰ Ní'irö Jesús gunábinë' léguaquië', rnnë':

—Náxzi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasöl-lë'ë Dios.

Rigubxjö'ë Jesús ca si' ilútië' Lë'

(Mt. 16:20-28; Mr. 8:30-9:1)

²¹ Ní'irö Jesús gúdxidë'ë léguaquië', en gunná bé'enë' léguaquië' cuntú nu ilë' Nu náquië' Lë'. ²² Ní'irö rē' léguaquië':

—Run bayudxi qui'i saca'a neda', Bönni' Guljë' Bönachi, zían le gaca quia'. Ulu'cá'anë' neda' cá'asó yugu' bönni' gula tu'zéajni'inë', en yugu' bixúz unná bē', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

²³ Gudxë' ca' yúgu'të':

—Channö rē'enë' nu bönni' tē'ë neda', ral-la' uzóé' tsölá'alö le dē queë', en gáquië' ca tu bönni' sa'yéajë' sötjé'ë lē'e yaga cruz, ate' ní'irö gaca tē'ë neda'. ²⁴ Nüti'tës bönni' ruí'íládxë'ë gun chí'ë yöl-la' na'bán queë', unítië' le, pero channö unítië' yöl-la' na'bán queë' tu' dē'ë neda', bönni' ni gata' yöl-la' na'bán idú queë'. ²⁵ Biti' bi uzi'ë xibë tu bönni' channö utubë' queë' yúgu'të le dē yödzölió ni, pero unítië' tsaz yöl-la' na'bán queë'. ²⁶ Nu bönni' rutuí'inë' neda', en rutuí'inë' ca' xtídza'a, lësca' neda', Bönni' Guljë' Bönachi, utuí'ida' bönni' na' cate' huöda' idinná bē'a, dzágagaca neda' yöl-la' zxön queë' Xuza', en yöl-la' zxön quégaquië' gubáz lá'ayi queë' Dios. ²⁷ Le nácatë' rea' libí'ili', nacuá' bal-lë' bönni' ni biti' ilátië' cate' ila'lé'erönë' dza idinná bē'ë Dios.

Ridzá' ca riná' lahuë' Jesús

(Mt. 17:1-8; Mr. 9:2-8)

²⁸ Cate' bizá'a xunu' gubidza gudödi bē'ē Jesús yugu' didza' ni, nī'irō guchē'ē Pedro, en Juan, en Jacobo, ate' gurenē' tu lu guí'ado', ga na' bulidzē' Dios. ²⁹ Tsanni ni' ru'ilenē' Dios didza', bidzá' ca riná' lahuē', ate' böáca chiguí'chido'os lari' nácuē', en guyēpi yōsa bení'. ³⁰ Nī'irō bulu'lu'í lógaquiē' chopē' bönni' ga zoē' Lē' tu'ilenē' Lē' didza'. Nácagaquiē' Moisés, en Elías. ³¹ Chopē' ni gula'yēpē' yōsa bení', ate' tu'ilenē' Jesús didza' ca si' uzē'ē yōdzōlió ni, gátie' lu yōdzō Jerusalén. ³² Sal-la' chirácada' ilásiē' Pedro, en nupa nacua'lenē' Lē', bayudxi gula'ná'sē', ate' bila'lé'enē' yöl-la' bení' queē' Jesús, en chopē' na' nacua'lenē' Lē'. ³³ Cate' bulu'zē'ē chopē' na' ga na' zoē' Jesús, nī'irō Pedro gudxē' Lē'.

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queē' Moisés, en ia'tú queē' Elías.

Biti' réquibe'enē' Pedro bi na' rnnē'. ³⁴ Tsanni ni' ru'ē didza' ni, la' gurō'ötē böaj le bugacu légaquiē', ate' guládxinē' tu' nacué' lu böaj na'. ³⁵ Nī'irō biyōn chi'i Nu ru'í didza' lu böaj na', rnna:

—Bönni' ni náquiē' Zxí'ina'. Nadxí'ida' Lē'. Buli'zē' nágali' didza' gu'ē.

³⁶ Cate' budxi bē' didza' chi'i na', tuzē' Jesús nagá'analenē' légaquiē'. Ta'cuá' dxiē' bönni' usēda queē', ate' dza na' cuntu nu gulē' ca naca le bila'lé'enē'.

Ruúnē' Jesús bi'i bönni' yu'u bö' xihui' lēbi'

(Mt. 17:14-21; Mr. 9:14-29)

³⁷ Cate' za' rení' ia'tú dza bulu'huötjē' Jesús, en bönni' na' dzágagaquiē' Lē' lu guí'ado' na', ate' bila'ruáj bönachi zían dutságagaca Jesús. ³⁸ Nī'irō bē'ē zidzaj didza' tu bönni' núsē'ē lada'j bönachi zían na'. Bulidzē' Jesús, rnnē':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'. ³⁹ Yu'u bö' xihui' lēbi' le run ga ribódxí'abi', en ruxízida' lēbi'. Run ga ribía bidxina' zxōna' ruá'abi', en rurixi rutúluda' lēbi', ate' catu caz rusán lēbi'. ⁴⁰ Gúta'yua' lógaquiē' bönni' usēda quiu' ulu'béajē' le, pero bití' gula'zéquínē'.

⁴¹ Bubi'ē didza' Jesús, rnnē':

—Libi'ili', bití' réajlē'ēli', en nachixi ícjali'. ¿Gáca'xte ral-la' sóalena' libí'ili', en guá' ilena' queēli'? Dijuá'a-bi' bi'i bönni' quiu' ni.

⁴² Cate' ni' zá'abi' ribíga'bi' ga na' zoē' Jesús, burixi butúluda' bö' xihui' na' lēbi'. Jesús gudil-lē' bö' xihui' na', en bunē'-bi' bi'i bönni' na'. Nī'irō bugu'ē-bi' lu nē'ē xúzibi'. ⁴³ Bulu'bani yúgu'tē bönachi ni' ca naca yöl-la' huáca zxōn queē' Dios.

Jesús ru'ē didza' leyúbólō ca si' ila'zōnē' Lē'

(Mt. 17:22-23; Mr. 9:30-32)

Tsanni ni' tu'bani yúgu'tē bönachi ca naca le zxōn runē' Jesús, Lē' gudxē' yugu' bönni' usēda queē', ⁴⁴ rnnē':

—Guli'cú'u icja nágali' didza' ni, tu' si' ulu'dödē' neda', Bönni' Guljē' Bönachi, lu ná'agaca bönachi.

⁴⁵ Biti' gula'yéajni'inē' bönni' usēda queē' didza' ni, tu' cabí ru'ínē' Dios légaquiē' lataj ila'yéajni'inē', pero bití' bulu'rúguinē' ila'nábinē' Jesús ca naca didza' ni.

Nu naca lo

(Mt. 18:1-5; Mr. 9:33-37)

⁴⁶ Nī'irō gula'sí lógaquiē' bönni' usēda queē' Jesús tu'ē didza'. Ta'nábini luzá'agaquiē' tuē' ia'tué' núzxilē' gáquiē' lo. ⁴⁷ Réquibe'enē' Jesús le ta'zá' ládxi'gaquiē', ate' gudélé'ē-bi' tubi' bí'ido', en buzóē'-bi' cuitē'. ⁴⁸ Nī'irō rē' légaquiē':

—Núti'tēs bönni' gunē' bal tu' bí'ido' caní tu' néquibi' quia' neda', neda' caz gunē' bal, ate' nu bönni' gunē' neda' bal, gunē' ca' bal Xuza' nasól-lē'ē neda'. Que lē ni na' bönni' núsē'ē ládjali' nácarē' nōxaj ladxí', bönni' ni náquiē' lo.

Nu bití' ridá'baga' rē'u, rácalen rē'u

(Mr. 9:38-40)

⁴⁹ Nī'irō Juan bulidzē' Jesús, rnnē':

—Bönni' Usedi, bilé'etu'-nē' tu bönni' rugunē' dxin Lo' rubéajē' bö' xihui', ate' gunná bé'etu'-nē' tu' cabí dē'ē rē'u.

⁵⁰ Jesús rē' lē':

—Bití' inná bé'eli'-nē', tu' rácalen rē'u nu bití' ridá'baga' rē'u.

Jesús ridil-lē' Jacobo, en Juan

⁵¹ Cate' chizá' gal-la' dza ral-la' gátie' Jesús, en huépē' yehua' yubá, benē' bayudxi tsejē' Jerusalén. ⁵² Gusól-lē'ē yugu' bönni' gubáz queē' ila'nóruē' ca Lē', ate' yōjáquiē' tu yōdzōdo' quégaca bönachi Samaria para tsójpá'agaquiē' ga ugá'anē' Jesús tu yēla. ⁵³ Yugu' bönni' yōdzō na' bití' gulunē' Jesús bal tu' chinaca queē' sa'yéajē' Jerusalén. ⁵⁴ Cate' Jacobo, en Juan, bönni' usēda queē' Jesús, bila'lé'enē' lē ni, tē' Lē':

—Xan, ¿naru' inábatsöca'tu' huötaj guí' le za' yehua' yubá, en usuniti légaquié', guntu' ca na' bené' Elías?

⁵⁵ Buécjé' Jesús, en gudil-lé' légaquié', rnné':

—Biti' nözili' bizxi bō' dzágui libí'ili'. ⁵⁶ Bida' ni neda', Bōnni' Guljé' Bónachi, caléga para usunítia' yöl-la' na'bán quégaca bōnachi, pero bida' dusölá' bōnachi.

Ní'irō yōjáquié' yōdzō yúbölō.

Nupa té'ēni tsójacalen Jesús

(Mt. 8:19-22)

⁵⁷ Tsanni ni' yu'ugaquié' nōza Jesús, en yugu' bōnni' dá'gaquié' Lē', bidxiné' tu bōnni' yōdzō Jerusalén, en rē' Jesús:

—Xan, rē'ēnda' sá'lena' Li' gátitēs ga tseju'.

⁵⁸ Jesús rē' lē':

—Yúgu' bōza', nacuá' zzan bulóaj quégacaba', ate' biguínido', dxiagaca xcá'agacaba', pero neda', Bōnni' Guljé' Bónachi, biti' dē quia' ga gáta'a uzí' ládxa'a.

⁵⁹ Ní'irō Jesús gudxé' tu bōnni' yúbölō, rnné':

—Gudá' neda'.

Bōnni' ni gudxé' Lē':

—Xan, benna neda' lataj huōja' lidxa' ga idxinrō dza chibucácha'a-nē' xuza'.

⁶⁰ Jesús gudxé' lē':

—Bē' lataj bōnni' chizóa ilátié' ulu'cáché'ē nupa chinati quégaquié', pero li' guyéaj, yōjén libán ca inná bē'ē Dios.

⁶¹ Ní'irō bidxiné' ia'túé' ca', en rē' Jesús:

—Xan, rē'ēnda' sá'lena' Li', pero benna neda' lataj tseja' tsōjzégacada-nē' didza' di'a dza quia'.

⁶² Jesús gudxé' lē':

—Núti'tēs bōnni' ruí'í ládxé'ē le raca yōdzólió náquié' ca tu bōnni' rugá'ané'-ba' bēdxi, en ruyúé' zaca' cúdzulē'. Nu run caní biti' naca lesaca' tsaza ga rinná bē'ē Dios.

10

Risöl-lē'ē Jesús tsónnalalaj yu' chié' bōnni' tsōjéngaquié' libán

¹ Gudödi gulaca yugu' lē' ni, guröé' Xanru' ia'tsónnalalaj yu' chié' bōnni' usēda queé', ate' gusöl-lē'ē légaquié' chopa huéajgaquié' para ila'nórué' ca Lē', en tsójáquié' yúgu'tē yōdzō, en yōdzōdo' gapa chizóa tōdē' Lē'. ² Gudxé' légaquié':

—Le nácatē, dēda' dxin quia', le naca ca tu la' yēla xzōn ga nu tsōjlapa', pero nabábasō huen dxin quia' nacuá'. Que lē' ni na', guli'gáta'yu lahué' Dios, náquié' Xan la' yēla na', isöl-lē'ē yugu' huen dxin ga naca la' yēla queé'. ³ Guli'tséaj na'a. Buli'yútsöca', neda' risöl-la'a libí'ili', nácali' ca yugu' bō'cu' xzila' sōjácaba' ládjagacaba' bō'cu' guí'a sínia'. ⁴ Biti' guá'ali' yōxaj dumí, en caléga buzudi yōta, en biti' guá'ali' ia'tú cō' xiráchuli', en biti' tseli' para guí'ilenli' bōnachi didza' gapa naca la' nōza. ⁵ Gátitēs yu'u ga tsú'uli', innali': "Le ribequi dxi ladxi' gaca quégaca bōnachi nacuá' yu'u ni." ⁶ Channō zoa ni' nu bōnni' si'ē yöl-la' ribequi dxi ladxi', ugá'analen lē' le ribequi dxi ladxi' na' inábali', pero channō cabí zoa ni' nu bōnni' caní, ugá'analen libí'ili' le ribequi dxi ladxi' na' inábali'. ⁷ Guli'gá'ana yu'u ga na' tsú'uli', en guli'guí'aj guli'gagu bi ilunné' queéli', tu' udzóli quéziné' bōnni' huen dxin le gahué'. Biti' tódili' yu'u yu'u. ⁸ Gátitēs yōdzō ga tsú'uli', ate' ilún libí'ili' bal, guli'gagu le ulu'cu'ē loli'. ⁹ Buli'ún nupa te'e nacuá' yōdzō na', en guli'guíé' léguequi: "Chibidxín le rinná bē'ē Dios ga zóali'." ¹⁰ Gátitēs yōdzō ga tsú'uli', channō cabí ilún libí'ili' bal, guli'rúaj, tsójsóali' la' nōza que yōdzō na', en innali': ¹¹ "Bēchtō que ládzali' le da' lē' e lábatu' ruquínajtu', le ruluí'í nabága'li' xigüla', pero ral-la' inözili' lē' ni, chibidxín le rinná bē'ē Dios ga zóali'." ¹² Neda' rea' libí'ili', cate' idxín dza ichúguíé' Dios quégaca bōnachi, ila'guí'í ila'zaca'rō bōnachi yōdzō ni' ca ila'guí'í ila'zaca' bōnachi yōdzō Sodoma, nupa ni' busunítie' Dios.

Le gaca quégaca nupa biti' ulu'bí'í ládxi' gaca

(Mt. 11:20-24)

¹³ Gunné' ca' Jesús:

—Bica' bayechi' libí'ili', bōnachi yōdzō Corazín. Bica' bayechi' libí'ili', bōnachi yōdzō Betsaida. La'tu' gulaca lu yōdzō Tiro, en lu yōdzō Sidón yugu' yöl-la' huáca rubani ca yugu' le bena' ga zóali', dza ni'te ulu'bí'í ládxi'gaquié' bōnni' ni', ate' ilacué' lari' cá'asō, en ila'gu'ē dō ícja'gaquié', le ulu'ígaca chibulu'bí'í ládxi'gaquié'. ¹⁴ Que lē' ni na', cate' idxín dza ichúguíé' Dios quégaca bōnachi, quí'í sáca'róli' ca ila'guí'í ila'záquié' bōnni' yōdz Tiro, en yōdz Sidón. ¹⁵ Libí'ili', bōnachi Capernaum. Réquili' tsázali' yehua' yubá. Huótjali' tsójtsázali' lataj chul-la quégaca nupa nátigaca.

¹⁶ Ní'irō Jesús gudxé' yugu' bōnni' usēda queé', rnné':

—Nu ruzě nagui libí'ili', ruzě nagui ca' neda', ate' nu rucá'ana libí'ili' cá'asó, rucá'ana ca' neda' cá'asó, en nu rucá'ana neda' cá'asó, rucá'ana ca' cá'asó Xuza', nasól-lě'ē neda'.

Bōnni' yōjēngaqiē' libán tu' dxinē' ga zoē' Jesús

¹⁷ Cate' tsónnalalaj yu' chie' bōnni' na' gusól-lě'ē Jesús bulu'dxinē' ga zoē' Lě', bōnni' na' yōjēngaqiē' libán, ta'nnē':

—Xan, tun bō' xihui' ca' rnnatu' cate' ruguntu' dxin Lo'.

¹⁸ Jesús gudxē' légaqiē':

—Neda' bilé'eda' Satanás tu' xihui', gubixi xzan lúzxiba ca' run yōsa, le riyaza luyú.
¹⁹ Buli'yútsōca', neda' nudōda' lu ná'ali' yōl-la' unná bē' para gaca sōngacali'-ba' bēla sínia', en xōjnō', en bití' bi gaca queēli', ate' ucúl-lali' yōl-la' unná bē' que tu' xihui', nu bití' rilé'e rē'u dxi'a'. ²⁰ Na'a, buli'dzeja, calégasō tu' tun bō' xihui' ca' rnnali', pero tu' nuzúajgaca lali' lu guichi ni' yehua' yubá.

Rudzéjanē' Jesús

(Mt. 11:25-27; 13:16-17)

²¹ La' ní'isō rudzéjanē' Jesús, dzáguiē' Dios Bō' Lá'ayi Lě', rnnē':

—Rigu'a Li' yōl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lē ni lōgaqiē' bōnni' táquiē' yenni', en bōnni' ta'yéajni'inē', pero buluf'iguequinu'-bi' bí'ido' ca' naca. ¡Ca' gaca, Xuza', tu' caní guyaza ládxi'u!

²² Ní'irō gunné':

—Yúgu'tē budōdē' Xuza' lu na'a. Cuntu nu bōnni' nōzinē' Nu náquiē' Zxi'inē' Dios, pero tuzē' Dios Xuz nōzinē', ate' cuntu nu nōzi Nu náquiē' Dios Xuz, pero tuzē' Zxi'inē' nōzinē', ate' inōzigaca ca' nupa na' Zxi'inē' rē'ēnē' uluf'inē' léguequi Xuzē'.

²³ Ní'irō Jesús buyúē' yugu' bōnni' usēda queē', en rē' légaqiē':

—Bica' bágaca nupa ta'lé'e le rilé'eli' libí'ili', ²⁴ tu' rea' libí'ili': Zían bōnni' gulu'ē didza' uláz queē' Dios, enca' bōnni' gula'nná bē'ē, gulē'ēnnē' ila'lé'enē' le rilé'eli', pero bití' bila'lé'enē' le. Gulē'ēnnē' ila'yōnnē' le riyōnili', pero bití' bila'yōnnē' le.

Tu bōnni' Samaria, bōnni' tsahui'

²⁵ Ní'irō guyasē' tu bōnni' yudo' usedi, en para si' bē'ē Jesús, gunábinē' Lě', rnnē':

—Bōnni' Usedi, ¿bizzi ral-la' guna' para idéli'da' yōl-la' na'bán idú?

²⁶ Jesús rē' lē':

—¿Bizzi caz nazúaj lu guichi lu xibá queē' Moisés? ¿Nacxi rusaca' quiu' lē na' rulabu'?

²⁷ Bubi'ē didza' bōnni' na', rnnē':

—Caní rRNA: "Idxi'inu' Xanu' Dios idú ládxi'u, en len idú icja ládxi'do'o, en len idú yōl-la' run quiu', en len idú yōl-la' réajni' i quiu', ate' idxi'inu' bōnni' luzó'o ca' nadxi'i cuinu'."

²⁸ Jesús rē' lē':

—Dxi'ado' bubi'u didza'. Ben caní, ate' gata' quiu' yōl-la' na'bán na'.

²⁹ Tu' gú'unnē' bōnni' na' ubéaj dxi'a' cuinē', rē' Jesús:

—¿Nuzxi na' bōnni' luzá'a?

³⁰ Bubi'ē didza' Jesús, rē' lē':

—Buzē' ē tu bōnni' Jerusalén, rudínniē', sa'yéajē' yōdzō Jericó. La' nōza ni' gula'zōnē' gubán lē'. Gula'gūē' lari' nácūē', en gulunē' lē' huē'. Ní'irō bulu'zē'ē ni', en nucá'anagaqiē' lē', chirati cazē'. ³¹ Ní'irō gudōdē' tu bixúz la' nōza ni'. Cate' bilé'enē' bōnni' huē' na', tsólá' alō gudōdē'. ³² Gudōdē' ca' ní' tu bōnni' nababē' zxi'ini xi'sóē' Levi, yugu' bōnni' na' tunē' dxin que yudo'. Cate' bilé'enē' lē', tsólá' alō ca' gudōdē'. ³³ Lē'sca' yu'ē tu bōnni' Samaria nōza na', ate' bidxinē' gala' ga dē' bōnni' huē' na'. Cate' bilé'enē' lē', buéchi' ládxi'ē lē'. ³⁴ Gubígui'ē ga na' dē', ate' gulu'ē le za, en xisi uva nál-la' lu huē' queē', ate' buchólinē' le lari'. Ní'irō budxiē' lē' cúdzu'ba' bōa' queē', en bu'ē lē' yu'u ga ta'dxinē' bōnni' yú'ugaqiē' nōze, ate' ní' gudapa chi'ē lē'. ³⁵ Cate' za' rení' ia'tú dza, en chizóa uzē'ē bōnni' Samaria na', guléajē' lázxjaru' que chopa dza, le bucá'anē' lu nē'ē bōnni' xan yu'u na', en rē' lē': "Gudapa chi'ē bōnni' ní, en channó utóu' ia'lati' dumí, ubi'a neda' quiu' cate' huóda'." ³⁶ Na'a, ¿nacxi runi li'? ¿Núzxilē' bōnni' yonna ni' guquiē' bōnni' luzē'ē bōnni' na' gulu'ē dō' bōnni' gubán queē'?

³⁷ Bubi'ē didza' bōnni' yudo' usedi na', rē' Jesús:

—Bōnni' na' buéchi' ládxi'ē lē'.

Ní'irō Jesús gudxē' lē':

—Guyéaj na'a, yōjén ca' li'.

Le benē' Jesús lédigacanu Marta, en María

³⁸ Ní'irō bu'ē nōza Jesús, ate' bidxinē' tu yōdzōdo' ga ní' tu nigula lēnu Marta guchē'ēnu Lě' lédixinu. ³⁹ Marta ní' zóanu nigula zxi'lanu lēnu María, ate' María na' guró'otēnu ga naca xini'ē Jesús, en ruzē' náganu xtídzē'. ⁴⁰ Marta na' bubi' buguí'inu, zían dxin runnu, ate' gubíga'nu ga na' zoē' Jesús, en rēnu Lě':

—Xan, ¿naru' cabí ru'í ládxi'tso' neda' tu' núcá'anabi' bi'i xzila' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ē didza' Jesús, rē'ē-nu:

—Marta, Marta, ruúbi ruguf'ide'enu', en zían le ru'í ládxi'u runu'. ⁴² Tuz le run bayudxi nu gun, ate' María ni guröbi' lē na' nácatērö dxi'a, ate' lē na' guröbi' biti' udúa queēbi'.

11

Ca ral-la' ulídzarú'-nē' Dios

(Mt. 6:9-15; 7:7-11)

¹ Tu dza ni' Jesús rulidzē' Dios. Cate' budxi bé'lenē' Dios didza', tuē' bōnni' usēda queē' rē' Lē', rnnē':

—Xan, busedi netu' ulídzatu'-nē' Dios gūf'ilentu'-nē' didza', ca benē' Juan, busédinē' bōnni' dá'gaquiē' lē'.

² Ní'irö Jesús rē' lēgaquiē':

—Cate' ulídzali'-nē' Dios gūf'ilenli'-nē' didza', guli'ná: Xuztu', zu' yehua' yubá, gá'ana xzōn Lo'.

Gudá inná bē'u.

Gaca ca raza ládxi'u Li' luyú ni, ca na' raca yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu'

ca netu' ca' runiti lotu' nupa tua' dō' queētu'.

Biti' gu'u lataj si' bē' tu' xihui' netu', pero busólá netu' lu na' nu ruá' dō'.

⁵ Jesús rē' ca' lēgaquiē':

—Channö zoē' nu bōnni' ládjali', en zoē' bōchi' luzē'ē, en channö huidē' ga na' zoē' guluhuēla, ate' ulidzē' lē', innē': "Bōcha'a, benna quia' tsonna yōta xtila ⁶ tu' si' bidxinē' quia' bōchi' luzá'a, zē'ē zi'tu', pero biti' bi dē le gu'a-nē' gahuē'." ⁷ ¿Naru' ubi'ē didza' caní bōnni' na' zoē' yu'u, guíē' lē': "Biti' utsó'o neda' tu' chinayayaj yu'u, en chidēlengacabi' bi'i quia' neda', ate' biti' gaca chasa' bi gunna' quiu'?" ⁸ Neda' rea' libí'ili': Sal-la' biti' chasē' bi unōdzjē' queē' tu' náquiē' bōchi' luzē'ē, pero chasē', en unōdzjē' queē' idutē le riquinnē' para cabiró upízzjanē' lē'. ⁹ Que lē ni na' rea' libí'ili': Guli'naba, ate' Dios gunnē' queēli'. Guli'quilaj, ate' idzōli queēli'. Buli'lidza ra' yu'u, ate' tsalaj queēli'. ¹⁰ Nu rinaba, rizi' que, ate' nu riguilaj, ridzōli que, ate' nu rulidza ra' yu'u, ralaj que.

¹¹ Channö zoē' nu bōnni' ládjali', en náquiē' xuz, ate' channö xzí'inē' inábibi' lē' yōta xtila, ¿naru' unōdzjatsē' queēbi' guíōj? Channö inábibi' lē' tuba' bōla, ¿naru' unōdzjatsē' queēbi' bēla? ¹² Channö inábibi' lē' dxita que bōra, ¿naru' unōdzjatsē' queēbi' xōjnō? ¹³ Caní naca, nácali' libí'ili' huiá' dō', pero nōzili' unōdzjali' quégacabi' xzí'inili' le naca dxi'a. Nácatērö lōza Xúzili' zoē' yehua' yubá gunnē' queēli' Dios Bō' Lá'ayi, núlōli' inábili' Lē'.

Ta'nnē' runē' dxin Jesús len yōl-la' huáca que tu' xihui'

(Mt. 12:22-30; Mr. 3:19-27)

¹⁴ Tu dza bubéajē' Jesús bō' xihui' yu'u tu bōnni', le run ga biti' raca innē'. Cate' burúaj bō' xihui' na', bē'ē didza' bōnni' na' biti' guca innē', ate' bulu'bani bōnachi nacuá' ní'. ¹⁵ Bal-la bōnachi nacuá' ní' ta'nná:

—Len yōl-la' huáca que tu' xihui' Beelzebú, xángaca bō' xihui', rubéajē' yugu' bō' xihui' na'.

¹⁶ Ia'bal-la bōnachi na' gulē'ēni ila'z'í' bē' Jesús, ate' gula'nabi Lē' gunē' tu le gaca bē' le za' yehua' yubá. ¹⁷ Réquibe'enē' Jesús le ta'zá' ládxi'gaquiē', ate' rē' lēgaquiē':

—Gáti'tēs ga ta'nná be'e bōnachi luzē'eguequi, channö ila'rúaj choplō la' lēguequisō bōnachi na', ila'niti. Channö ila'rúaj choplō bōnachi nacuá' tu yu'u, údxi quéguequi. ¹⁸ Lē'sca' caní raca que Satanás, tu' xihui', nazí'i le ca' Beelzebú. Channö ila'rúaj choplō nupa dá'gaca le, ¿nacxi gaca idía' yōl-la' unná bē' que? ¿Rnnátsali' na'a: Len yōl-la' huáca que Beelzebú rubéaja' yugu' bō' xihui'? ¹⁹ Channö neda', len yōl-la' huáca que Beelzebú rubéaja' yugu' bō' xihui', ¿nuzxi runna quégaca nupa dá'gaca libí'ili' yōl-la' huáca tu'béaj yugu' bō' xihui'? Que lē ni na', le tun nupa ni naca bē' nachíxili'. ²⁰ Channö neda', len yōl-la' huáca queē' Dios rubéajgaca' bō' xihui', le nácatē chibidxín le rinná bē'ē Dios ga zóali'.

²¹ Cate' tu bōnni' nál-la dē lu nē'ē le rudí'inē', en rapa chi'ē lidxē', naca chi'i dērö le dē queē'. ²² Na'a, channö zē'ē ia'tuē' bōnni' nál-latērē' ca lē', en ucul-lē' lē', ní'irö cuē' yugu'tē le rudí'inē', lē na' ruzxōni ládxi'ē, ate' quisiē' le dē queē' bōnni' na'.

²³ Nu biti' rácalen neda', ridá'bagá' neda'. Nu biti' rutúbilen neda', rusilasi nu na'.

Ca naca que bō' xihui' rudxín xilataj

(Mt. 12:43-45)

²⁴ Gunnē' ca' Jesús:

—Cate' rirúaj bö' xihui' lu bönni', ridá gapa nabídx, riguila' ga uzi' ladxí'. Channö cabí idzöli que, inná: "Huôja' xilatja' ga ni' birúaja'." ²⁵ Cate' rudxín ni', röjxaca' bönni' na', náquië' ca tu yu'u chinulúa, en chinabá'a para nu tsöjsó'a ni'. ²⁶ Ní'irö reaj, en röjxí' ia'gadxi bö' xihui', nácacatêrö xihui' ca le, ate' ta'yú'u bönni' na'. Na'a, le raca queë' bönni' na' nayáli'têrö ca le guca queë' zí'alö.

Le naca bica' ba le naca idú

²⁷ Tsanni ni' ru'ë Jesús didza' ni, tu nigula nútsa'nu ladaj bönachi zían na' bë'ënu zidzaj didza', rnnanu:

—Bica' ba nigula na' biá'anu Li' lë'ënu, en bica' ba ca' luchú'unu ga na' gúdxu'u.

²⁸ Bubi'ë didza' Jesús, gunné':

—Nácacatêrö bica' ba nupa ta'yöni xtídzë'ë Dios, en tun ca rnna.

Ta'nábinë' Jesús gunë' le gaca bë' nuzxi náquië'

(Mt. 12:38-42; Mr. 8:12)

²⁹ Tsanni ni' ta'biga' bönachi zían ga zoë' Jesús, gusí lahuë' ru'ë didza', rnnë':

—Ta'nába bönachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lë'enë'. Tuz le gaca bë' ca na' guca queë' Jonás ila'lë'enë'. ³⁰ Ca na' guca queë' Jonás, gúquië' tu le naca bë' lógaca bönachi yödzo Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lógaca bönachi dza ni zóaru' na'a. ³¹ Cate' idxín dza ichúguie' Dios quégaca bönachi ila'gu'i ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bë'ënu bönachi dza ni'te luyú ni' dë tsólá'a ga ridödi gubidza beo' ziaga, ate' le bennu ulu'i nabága'gaca bönachi ni xíguia', tu' bídanu lënu, birúajnu ga naca zi'tu' para uduzë náganu didza' réajni' i bë'ë Salomón, bönni' gunná bë'enë' bönachi Israel, pero na'a, zoa' neda' ni, en nayëpisëtëra' ca Salomón na'. ³² Lësca' caní, Dios uchisë' bönni' gula'cu'ë yödzo Nínive cate' idxín dza ichugu bë'ë quégaca bönachi, en uchi'a usöröë' bönachi dza ni zóaru' na'a, ate' le gulunë' ulu'i nabága'gaca bönachi ni xíguia', tu' bulu'bí' ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayëpisëtëra' ca Jonás na'.

Le rigú'u bení' lu icja ládxi'do'oru'

(Mt. 5:15; 6:22-23)

³³ Gunnë' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'. ³⁴ Guiöj loru' naca ca tu le rigú'u bení' lu icja ládxi'do'oru'. Channö guiöj lo' naca dxi'a, idúteo' yudzu le naca bení', pero channö naca xihui' guiöj lo', idúteo' yudzu le naca chul-la. ³⁵ Ben chi'i cuinu' na'a, para cabí huóaca chul-la lë na' rigú'u bení' lu icja ládxi'do'o. ³⁶ Caní naca, channö idúteo' nalísimu' le naca bení', en biti' bi zóalen li' le chul-la, yúgu'të ilé'ënu' dxi'a ca raca cate' ruzeni' quiu' guí'.

Jesús ruzéguí'ë yugu' bönni' yudo' didza'

(Mt. 23:1-36; Mr. 12:38-40; Lc. 20:45-47)

³⁷ Cate' budxi bë'ë didza' ni Jesús, tu bönni' yudo' fariseo bulidzë' Lë' para tsöjtágulenë' lë'. Cate' guyazië' Jesús lidxë' bönni' yudo' na', gurö'ë rahuë'. ³⁸ Cate' bönni' yudo' fariseo na' bilé'enë' Lë', bubánnë' tu' cabí gudibi në'ë Jesús cate' si' gahuë'. ³⁹ Xanru' rë' lë':

—Libí'ili', bönni' yudo' fariseo, riguibi cuinli' ca riguíbili' láhuilögaca le rë'aji ráhuili', pero lu icja ládxi'do'oli' ruhuídi'li', en rízá' ládxi'li' le ruá' dö'. ⁴⁰ Libí'ili', bönni' biti' réajni'ili'. ¿Naru' cabí nözili', Nu ben le zoa láhuísö ben ca' le yu'u lë'elö? ⁴¹ Na'a, guli'gún gun le dë queëli', ate' ní'irö huóaca dxi'a yúgu'të le dë queëli'.

⁴² 'Bica' bayechi' libí'ili', bönni' yudo' fariseo. Riguízxjali' que yudo' tu có' huéaj tu' chi có' le rízi'ili' que xöluéaj, en que guixi' ruda, en quégaca guixi' cuando', pero rudódísili' le naca tsahui', en yöl-la' nadxi'i queëli' Dios. Yugu' lë ni run bayudxi gunli', en biti' uca'anali' ia'zica' lë na' runli'.

⁴³ 'Bica' bayechi' libí'ili', bönni' yudo' fariseo. Rë'ënili' có'öli' gapa naca lo lu yu'u ga rudúbili' rusédali' queë' Dios, en rë'ënili' ulu'lidza bönachi libí'ili' ba xzön gapa naca láhuilöguequi bönachi.

⁴⁴ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli', tu' nácali' ca nácacaca yeru ba quégaca nupa nátigaca le cabí nalá'gaca, ate' ta'dá bönachi láhuigaca yeru ba na', en biti' téquibe'e.

⁴⁵ Ní'irö bubi'ë didza' tu bönni' yudo' usedi raquië' xibá queë' Moisés. Rë' Jesús:

—Bönni' Usedi, cate' rnno' caní, netu' ca' runu' zi'.

⁴⁶ Jesús rë' lë':

—Bica' bayechi' ca' libí'ili, bōnni' yudo' usedi rácali' xibá queë' Moisés, tu' rusubága'gacali' bōnachi tu' yua' zi'i le cabí gaca nu guá', pero libí'ili' calēga láti'do'os biti' ruláhui'li' le len ná'ali'.

⁴⁷ 'Bica' bayechi' libí'ili', tu' richísali' biquitaj quégaca ba ga nagáchi'gaquië' bōnni' gulu'ë didza' uláz queë' Dios, ate' gulútië' xuz xtó'oli' légaquië'. ⁴⁸ Caní naca, runli' ba nali' runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

⁴⁹ 'Que lë ni na', lu yöl-la' réajni'i queë', Dios gunné' caní: "Isöl-la' a queë'li' bōnni' ilu'ë didza' uláz quia', en yugu' bōnni' gubáz quia', ate' yugu' bōnni' ni, bal-lë' gútili', en ia' bal-lë' cuia na'li' légaquië'." ⁵⁰ Caní guné' Dios tu' uchi'a usöröë' quégaca bōnachi dza ni zóaru' na'a, ni'a que rōn quégaca yúgu'të bōnni' gulu'ë didza' uláz queë', bōnni' ni' bëtigaca bōnachi légaquië' cate' gusí lo rata' yōdzōlió, ⁵¹ ga gusí lo nu bēti Abel, ga bidxintë gulútië' Zacarías, bōnni' na' gulútië' gatsaj láhui'lō ga dë bucugu lá'ayi ga na' tu' zégui'gaquië'-ba' böa' bēdxido' lahuë' Dios, en ga dë lataj lá'ayi. Que lë ni na', rea' libí'ili', Dios uchúguë' quégaca bōnachi dza ni zóaru' na'a, ni'a que rōn quégaca yúgu'të bōnni' na' gulútië' xuz xtó'oli' légaquië'.

⁵² 'Bica' bayechi' libí'ili', bōnni' yudo' usedi, rácali' xibá queë' Moisés. La' libí'isili' dë lu ná'ali' xzi'ini guíë que lataj ga ta'dzōli bōnachi yöl-la' réajni'i. Libí'ili' biti' riyázali', ate' ruzága'li' xinōzigaca nupa tē'ëni ila'yaza.

⁵³ Cate' Jesús budxi bē'lenë' légaquië' didza' ni, bōnni' yudo' tu' sédinë', en yugu' bōnni' yudo' fariseo gula'léde'enë' Lë', ate' gula'sí lōgaquië' ta'naba yúdxide'enë' Lë' ca naca zían le taca, ⁵⁴ en tu'béajë' Lë' didza' para gaca ulu'zéguië' Lë' didza' ni'a que didza' ubië'.

12

Rusédinë' Jesús ca naca yöl-la' ruluf'isō tsahui' cuini

¹ La' dza na' bulu'dubi zían gayuá' bōnachi ga zoë' Jesús ga bidxintë ta'rōlisō luzë'eguequi bōnachi na'. Ní'irō gusí lahuë' Jesús rë' yugu' bōnni' usëda queë' cazë', rnnë':

—Gul'gūn chí'i cuinli' que le naca ca cúa zi que yōta xtila quégaquië' bōnni' yudo' fariseo, le naca yöl-la' ruluf'isō tsahui' cuini quégaquië'. ² Biti' bi dë le naca balánd'o's le cabí ilá' lahui, en biti' bi dë le nagachi' le cabí gaca bē'. ³ Que lë ni na', yúgu'të le chigunnáli' ga naca chul-la, ila'yōni bōnachi ga naca lu bení', ate' didza' bē'ëli' bagáchi'sō ga guzóa lu yu'u nayayaj, gaca libán que ga naca lógaca bōnachi.

Nu ral-la' gádxiru'

(Mt. 10:28-31)

⁴ Gunnë' ca' Jesús:

—Bōcha'ado', rea' libí'ili': Biti' gádxili' bōnni' tútigaquië' bōnachi, ate' tōdi na' bití'rō bi gaca ilunë' quéguequi. ⁵ Ulu'ida' libí'ili' nu ral-la' gádxili'. Gul'gádxu Nu na' gaca ugúa yöl-la' na'bán queë'li', en tōdi na' dë lu nē'ë yöl-la' unná bē' chū'unë' libí'ili' lu guí' gabila. Ōn, rea' libí'ili', gul'gádxu Nu na'.

⁶ 'Túti'gaquië'-ba' gáyu'ba' biguínido' len chopa dumí lásido'. Biti' ral-la ládxe'ë-ba' Dios tu biguínido' na'. ⁷ Lësca' caní, yúgu'të guitsa' ícjali' nabábagaca lahuë' Dios. Que lë ni na', biti' gádxili'. Nazáca'tërōli' libí'ili' ca zianba' biguínido'.

Nupa ta'nnasō néquiguequi queë' Jesús

(Mt. 10:32-33; 12:32; 10:19-20)

⁸ Gunnë' ca' Jesús:

—Rea' libí'ili': Yúgu'të bōnni' ta'nnë' néquiguequinë' quia' neda' lógaca bōnachi, lësca' neda', Bōnni' Guljë' Bōnachi, inná' néquiguequinë' quia' lōgaquië' gubáz lá'ayi queë' Dios, ⁹ ate' bōnni' ta'dá'baguë'ë néquiguequinë' quia' lógaca bōnachi, lësca' neda' tá'baga'a néquiguequinë' quia' lōgaquië' gubáz lá'ayi queë' Dios.

¹⁰ 'Yúgu'të nupa bi ila'nnë quia' neda', Bōnni' Guljë' Bōnachi, gaca uniti lahuë' Dios léguequi, pero nu innë zi' queë' Dios Bō' Lá'ayi, biti' uniti lahuë' Dios nu na'.

¹¹ 'Cate' ila'chë'ë libí'ili' gapa naca lu yu'u ga tu'dubë' bōnni' judío, en tu'sëdë' queë' Dios, en lōgaquië' bōnni' ulu'chi'a ulu'söröë' libí'ili', en lōgaquië' bōnni' dë lu ná'agaquië', biti' ubi uguí'ili' naxxi gunli' o bizxi didza' ubí'ili', o bizxi innali'. ¹² La' dza ná'asō usédinë' Dios Bō' Lá'ayi libí'ili' le ral-la' innali'.

Huáca gun yöl-la' tsahui' queëru' ga gal-la ládxi'ru'-në' Dios

¹³ Tu bōnni' nütse'ë ladaj bōnachi zían na' rë' Jesús, rnnë':

—Bōnni' Usedi, gudxë' bōcha'a gunné' uláz quia' le guta' queë' xuztu'.

¹⁴ Jesús rë' lë':

—Bōnni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queë'li'?

¹⁵ Ní'irō Jesús gudxë' bōnachi nacué' ni', rnnë':

—Buli'yútsöca'. Guli'gún chi'i cuinli' para cabí uhuídi'li'. Le uzi'ë xibé nu bönni' bití' nácasö le zían le dë queë'.

¹⁶ Ní'irö Jesús bē'lenē' légaquiē' didza', bucúdu'ë didza', rnnē':

—Zoē' tu bönni' rilē'enē' yöl-la' tsahui' queē', ate' runödžjada' gulapa lu xiyúē'. ¹⁷ Ní'irö guzá' ládxē'ë bönni' na', rnnē': "¿Nacxi guntsa'? Bití' dë ga gapa chí'a le rulá' quia'." ¹⁸ Ní'irö rnnē': "Caní guna'. Uquínnaigaca' yu'u ga rapa chí'a le rulá' quia', ate' guna' yugu' yu'u zxöntērō ca', ate' gapa chí'a le rulá' quia' ni', len yugu' le dë quia'. ¹⁹ Ní'irö gaca guíē cuína': Chidēda' quia' zían le chinutuba', le gáhuida' zían iz. Uzi' ládx'a. Gu'aj gahua', en udzējada'." ²⁰ Ní'irö Dios rē' lē': "Li', bönni' bití' bi' nōzinē'. Na'a dzō' gátíu'. Na'a, ¿nuzxi caz guequi que, lē na' chinutubu'?" ²¹ Caní raca queē' bönni' rutubē' la' queēzē' yöl-la' tsahui', en bití' runē' le naca ca yöl-la' tsahui' lahuē' Dios.

Dios run chí'ë yugu' bönachi queē'

(Mt. 6:25-34)

²² Gudōdi ni' Jesús gudxē' yugu' bönni' usēda queē', rnnē':

—Que lē ni na' rea' libí'ili': Bití' ubi uguí'ili' ni'a que le gu'aj gáguli', lē na' nabánili', o ni'a que lari' gáguli'. ²³ Nácáro lesaca' yöl-la' na'bán queēli' ca le ráguli', ate' nácáro lesaca' idú le nácáli' ca lari' ráculi'. ²⁴ Buli'yutēz ca raca quégacaba' boíquiaj. Bití' tázaba', en bití' ta'lápaba', en bití' nacuá' quégacaba' ga ilún chí'iba' le rulá' quégacaba', pero Dios rugahuē' légacaba'. ¿Naru' cabí nazáca'tērōli' libí'ili' ca yugu' biguínido'? ²⁵ ¿Nuzxi caz bönni' ládjali' gaca gunē' ga soē' ibanē' ia'tú chí'do'os tu' ruubi ruguf'i ládxí'da'ahuē'? ²⁶ Que lē ni na', channō cabí gaca gunli' lē ni naca cuídi'sō, ¿bizx que ruubi ruguf'ili' ni'a que le naca zxöntērō?

²⁷ Buli'yutēz ca ta'zxón yōjdo'. Bití' tun du lari', en bití' taba lari', pero rea' libí'ili', bití' gúcarō lachi le gúcúē' Salomón ca nácagaca yōjdo' ni, sal-la' gúta'da' yöl-la' tsahui' queē'. ²⁸ Channō Dios runē' lachi yōj guíxi'do' rō'gaca na'a la' guixi', ate' cuxō huidzaj ila'gu'ē léguequi lu guí', ¿naru' cabí gunē' le nácáro dxi'a queēli', libí'ili' na' bití' réajlē'eli' Dios idú ládxí'li'? ²⁹ Que lē ni na', bití' gúfi' ládxí'li' le ral-la' gáguli', en le ral-la' guí'jali', en bití' ubi uguí' ládxí'do'oli'. ³⁰ Yúgu'tē lē ni ta'guilaj bönachi yōdzóliō ni, pero chinōz quézinē' Xúzili' Dios le riquínili'. ³¹ Guli'guí' ládxí'li' tsú'uli' ga rinná bē'ë Dios, ate' yúgu'tē lē ni cu'ë xinōza queēli'.

Yöl-la' tsahui' rigú'uru' yehua' yubá

(Mt. 6:19-21)

³² Gunnē' ca' Jesús:

—Bití' gádxili', libí'ili' na' nácáli' bō'cu' zxíla'do' quia'. Nabábasili' zóali', pero raza ládxē'ë Xúzili' Dios gunnē' queēli' lataj tsú'uli' ga ni' rinná bē'ë Lē'. ³³ Guli'guti' le dë queēli', en buli'nōdzaj quégaca bönachi yechi'. Caní gaca, gunli' queēli' yōxaj dumí le cabí gaca ditaj, en cú'uli' yöl-la' tsahui' na' yehua' yubá le bití' ubidxi udú, ga ni' bití' idxinē' bönni' gubán, en bití' usunítiba' bōa'do' le. ³⁴ Ga ni' dë yöl-la' tsahui' queēli', ni' gúfi' ládxí'li' idxinli'.

Ral-la' sóaru' ban ladxi'

³⁵ Gunnē' ca' Jesús:

—Guli'sóa sina', en guli'quela' guí' le uzení' queēli'. ³⁶ Guli'gaca ca bönni' huen dxin ta'bōzē' dza huōdē' xángaquiē', bönni' sa'yéajē' laní que yöl-la' rutsaga na', para cate' udxinē', en ulidzē', la' ila'sáljatē' queē' tsu'ë. ³⁷ Bica' bágaca huen dxin na' ila'cu'ë ban ladxi' cate' huōdē' xángaquiē'. Le nácate' rea' libí'ili', upá'a cuinē' xángaquiē' na', ate' gunē' ga ila'bō'ë ga ilahuē', ate' cu'ë le ilahuē'. ³⁸ Sal-la' huōdē' cate' chiral-la o idú guluhuēla, channō idixáquiē' légaquiē' nacu'ë ban ladxi', bica' bágaca huen dxin na'. ³⁹ Lē ni ral-la' inōzili'. La'tu' nōzinē' xan yu'u bizxi dza huadxinē' bönni' gubán, usubán ládxē'ë, en bití' gu'ë lataj bönni' na' udxíē' yeru lidxē', para cabí cuanē' le dzō'ō lidxē'. ⁴⁰ Que lē ni na', guli'sóa ban ladxi' ca' libí'ili', tu' huōda' neda', Bönni' Guljē' Bönachi, tu dza bití' ribōzali' neda'.

Bönni' huen dxin tsahui', en bönni' huen dxin bití' náquiē' tsahui'

(Mt. 24:45-51)

⁴¹ Ní'irö Pedro gunábinē' Jesús, rnnē':

—Xan, ¿naru' reo' nētu'sō lē ni rucúdu'u didza', o reo' ca' caní yúgu'tē bönachi?

⁴² Rē' Xanru' lē':

—¿Nuzxi na' bönni' huen dxin tsahui', en réajni'inē', dë lu nē'ë uláz queē' xanē'? Bönni' ni, xanē' udōdē' lu nē'ë lidxē' para cate' gála'rō ilahuē' bönni' nacu'ë lidxē', gu'ë que quéegaquiē' le ilahuē'. ⁴³ Bica' ba bönni' huen dxin na' cate' huōdē' xanē', idixáquiē' lē runē' caní dxin na' nudōdē' lu nē'ë. ⁴⁴ Le nácate' rea' libí'ili', udōdē' xanē' lu nē'ë bönni' huen dxin tsahui' na' idutē le dë queē'. ⁴⁵ Channō guéquinē' bönni' huen dxin na' huadzenē' huōdē' xanē', ate' isí lahuē' gu'ë dō' quégaquiē' ia'zica'rē' huen dxin, bönni' en nigula, en isí lahuē' gu'aj gahuē', en súdxinē', ⁴⁶ ní'irö huōdē' xanē' bönni' huen dxin na' cate' bití' ribōzē' lē', en

cate' biti' réquibe'enë, ate' usaca' zi'ë bönni' huen dxin biti' náquië' tsahui' na', en ichúguië' queë' qui'i sáquië' ca narugu quégaquië' bönni' biti' ta'yéajlë'ë.

⁴⁷ Bönni' huen dxin na' nōzinë' le rë'ënë' xanë', en biti' zoë' sina', en biti' runë' ca rnnë' xanë', bönni' ni, quinitërë' xanë' lë'. ⁴⁸ Channō cabi nōzinë' tu bönni' huen dxin le rë'ënë' xanë', en gunë' le gun ga ibáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxōni lādxë'ë lë' le zxōn, le zxōntërō ca unabë' xanë' lu në'ë bönni' huen dxin na'.

Le náquië' Jesús gun ga ila'rúaj choplō bōnachi

(Mt. 10:34-36)

⁴⁹ Gunnë' ca' Jesús:

—Bida' neda' dujéna' ga tseguí guí' yōdzōlió ni, en caba lādxa'a chinaguéla' guí' na'. ⁵⁰ Na'a, dë tu le ral-la' qui'i saca'a le naca ca tu le idílida' nisa, ate' rō'a bōniga ga idxintë' gaca caní quia'. ⁵¹ ¿Naru' réquili' bida' dulequi dxía' le raca yōdzōlió ni? Rea' libí'ili': ¡Calëgal! Bida' dulequia' le gun ga ila'rúaj choplō bōnachi. ⁵² Na'a isí lo ulu'lá'alén luzë'eguequi gayu' bōnachi nacuá' tu yu'u. Tsonnë' ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonnë' na'. ⁵³ Nu bönni' zóabi' bi'i bönni' queë' tá'baguë'ë zxf'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queënu tá'baga'nu zxf'ininu na', ate' bi'i nigula na' tá'baga'bi' xiná'abi'. Nigula zóanu nigula zxoa' lídxiu tá'baga'nu zxoa' lídxiu na', ate' nigula zxoa' lídxiu na' tá'baga'nu xto' zxf'ininu.

Le nácacaga bë' le taca na'a dza

(Mt. 16:1-4; Mr. 8:11-13)

⁵⁴ Jesús gudxë' ca' bōnachi zían nacuá' ni', rnnë':

—Cate' rilë'eli' za' bōaj saca' ga ribla gubidza, la' rnnátëli': "Hualaj guiōj", ate' caní raca. ⁵⁵ Cate' recja bō' za' saca' ga ridōdi gubidza beo' ziaga, rnnali': "Udzá'a na'a", ate' caní raca. ⁵⁶ Libí'ili', bönni' rulu'isō tsahui' cuinli'. Nōzili' le rulu'f'i le raca lúzxiba, en le raca luyú ni, pero biti' réquibe'eli' le rulu'f'i le nácacaga bë' taca dza ni zóaru' na'a.

Ral-la' ugá' analenru' tsahui' nu rilë' rë'u

(Mt. 5:25-26)

⁵⁷ Gunnë' ca' Jesús:

—¿Bizx que biti' ruchi'a rusōrōli' la' libí'isili' ca naca le naca tsahui'? ⁵⁸ Channō zoa nu bi unabí yudxi li', ate' zéajli' idxinli' yúlauhi', bë' ladxi' ugá' analenu' tsahui' nu na' tsanni ni' yú'uli' nōza, para cabi uzegui li' lahuë' bönni' uchi'a usōrōë' libí'ili', ate' bönni' uchi'a usōrōë' na' udōdë' li' lu në'ë bönni' rusayjë' lidxi guíë, ate' bönni' na' rusayjë' lidxi guíë cu'ë li' lidxi guíë na'. ⁵⁹ Rea' li', biti' uruju' ni' cate' údxirō quízxju' yúgu'të dumi lāsido' ral-lu'u que nu na'.

13

Run bayudxi ubí'i lādxí'ru'

¹ La' dza ní'sō bila'dxinë' bönni' ta'guíxjōi'inë' Jesús ca benë' Pilato, bëtië' bal-lë' bönni' Galilea, en guzxi'ë rōn quégaquië', le bugútsi'në' xichōngacaba' bōa' bëdxi chigulútië' léga'caba' para ila'gu'ë xichōngacaba' na' lahuë' Dios. ² Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'zica'rë' bönni' Galilea, tu' gula'guí' gula'zaquië' caní? ³ Rea' libí'ili': ¡Calëgal! Channō cabi ubí'i lādxí'li', nítili' ca' yúgu'tëli'. ⁴ Lëscá' caní guca quégaquië' chizxunë' bönni' ni', yōjbaga' yu'u sibi na' nazí'i le Siloë' leguá'ie', ate' gulatië'. ¿Naru' réquili' gula'bága'tërë' légaquië' xiguia' ca ia'zica'rō bōnachi nacuá' Jerusalén? ⁵ Rea' libí'ili': ¡Calëgal! Channō cabi ubí'i lādxí'li', nítili' ca' yúgu'tëli'.

Rucúdzu'ë didza' Jesús que yaga higo biti' bi ribía

⁶ Ní'irō bucúdzu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Rōjtijlë' le ribía yaga na', pero biti' bi ridzōlinë'. ⁷ Ní'irō gudxë' bönni' runë' dxin lu xiyúë' na', rnnë': "Chiguca tsonna iz rida' rududilja' le cuia yaga higo ni, en biti' bi ridzōlida'. Guchugu le. ¿Bizx que run nigui luyú ni?" ⁸ Ní'irō bubi'ë didza' bönni' huen dxin na', rë' lë': "Xan, bucá'anagarō le ia'tú ízatëz, ate' uzatsa' yu zxani, en cu'a bëbu zxani. ⁹ Channō cuia yaga ni, gaca dxi'a, pero channō cabi bi cuia, ní'irō ichugu' le."

Ruinë' Jesús tu nigula ré'enu cate' naca dza lá'ayi

¹⁰ Tu dza rusëdinë' Jesús bōnachi nacuá' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquië'. ¹¹ Zóanu tu nigula ni' chiguca chizxunu' iz ré'enu, tu' yu'u lënu bō' xihui' run ga te'e bōnachi, ate' nayéchutica'sinu ridanu, en biti' ca' raca uli cuinnu. ¹² Cate' bilë'enë'-nu Jesús, bulidzë'-nu, rnnë':

—Nigúlado', chibóacu' que yōdzōhuë' quiu'.

¹³ Ní'irō Jesús guxóa ně'ē lēnu, ate' la' bulitē cuinnu, en gulú'unu-nē' Dios yōl-la' ba. ¹⁴ Ní'irō gulénē' bōnni' lo que yu'u ga na' tu'dubē' tu'sédē' queē' Dios. Rilenē' tu' bunē' Jesús nigula na' cate' naca dza lá'ayi. Bōnni' lo na' gudxē' nupa nacua' ni', rnnē':

—Xopa dza nacua' cate' runru' dxin. Dē lataj yugu' dza ni guídali' para nu un libí'ili', en calēga dza lá'ayi.

¹⁵ Ní'irō bubi'ē didza' Xanru', rnnē':

—Libí'ili', bōnni' rulu'isō tsahui' cuinli', ¿naru' cabí rusédxigacali'-ba' bōa' bēdxi que queēli' ga na' dá'gacaba' cate' naca dza lá'ayi, ate' tsójuá'agacali'-ba' para ilē'ajba' nisa? ¹⁶ Nācanu nigula ni xzí'ini xi'sóē' Abraham, ate' idú chixxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lēnu sal-la' naca dza lá'ayi?

¹⁷ Cate' bē'ē didza' ni Jesús, bulu'tuf'inē' yúgu'tē bōnni' nacu'ē ni' ta'lenē' Lē', pero bulu'dzeja ia'zica'rō bōnachi, yúgu'tē nupa nacua' ni', tu' ta'lé'enē' yugu' le zxōn runē' Jesús.

Rucúdzu'ē didza' Jesús que xisedo' mostaza

(Mt. 13:31-32; Mr. 4:30-32)

¹⁸ Ní'irō rnnē' Jesús:

—¿Naxi caz raca rixxōn le rinná bē'ē Dios, o bizxi uséqui'tseru' le? ¹⁹ Raca ca raca que xisedo' mostaza, le guzxi'ē tu bōnni', ate' guzē' le ga naca lu xiyúē'. Guzxōn yaga mostaza na', en guca ca tu yaga zxōn, ate' bila'dxinba' biguinnido', gulunba' xcá'agacaba' lu ni'a ně'ē yaga mostaza na'.

Rucúdzu'ē didza' Jesús que cúa zi que yōta xtila

(Mt. 13:33)

²⁰ Lēsa' caní rnnē' Jesús:

—¿Bizxi caz uséqui'tseda' le rinná bē'ē Dios? ²¹ Naca ca cúa zi que yōta xtila, le guzxi'inu tu nigula, en bugútsi'nu sonna cō' cúa yōta xtila, ate' guyazxaj idutē cúa na'.

Tu ga tōdiru' le naca guído'

(Mt. 7:13-14, 21-23)

²² Tsanni ni' yu'ē nōza Jesús, sa'yéajē' Jerusalén, ridōdē' yugu' yōdzō zxōn, en yugu' yōdzōdō', ate' rusédinē' bōnachi nacua' gapa na'. ²³ Tu bōnni' zoē' ni' gunábinē' Jesús, rnnē':

—Xan, ¿naru' nabábasō nupa ulu'lágaca?

Jesús rē' nupa nacua' ni', rnnē':

²⁴ —Gulí'gū'i lādxi'li' tsú'uli' saca' ga nu ridōdi le naca guído', tu' rea' libí'ili': Zían nupa ilē'ēni ila'yaza ni', pero bití' ila'zéqui'nē'. ²⁵ Tōdi chasē' Xan yu'u, en usayjē' yu'u, isi loli' libí'ili' na' zóali' ní'ilo ulídzali'-nē' ra' yu'u na', ate' guiēli'-nē': “Xan, Xan, gusalaj queētu'.” Ní'irō ubi'ē didza' Lē', en guiē' libí'ili': “Bití' nōzda' nuzxi libí'ili'.” ²⁶ Ní'irō isi loli' innali': “Gū'i gudágulentu' Li', ate' busédinu' gapa naca lu yē'ēyi queētu'.” ²⁷ Ní'irō guiē' libí'ili': “Rea' libí'ili', bití' nōzda' gazxi bōnachi libí'ili'. Gulí'cuíta ga zoa', yúgu'tēli' ruá'ali' dō'.” ²⁸ Ní'irō cōdxi yéchi'li', en gagu zxea láya'li' cate' ilé'egacali'-nē' Abraham, en Isaac, en Jacob, en yúgu'tē bōnni' gulu'ē didza' uláz queē' Dios, nacu'ē ga ni' rinná bē'ē Dios, pero libí'ili' sóali' ní'ilo. ²⁹ Ila'dxin bōnachi ila'rúaj saca' ga rilén gubidza, en saca' ga ribía gubidza, en saca' ga za' bō' ziaga, en saca' ga ridōdi gubidza beo' ziaga, ate' ila'bō'ē ilahuē' ga ni' rinná bē'ē Dios. ³⁰ Ní'irō ilaca lo bal-la bōnachi nácagaca cá'asō na'a, ate' ulu'gá'ana cá'asō bal-la nupa nácagaca lo na'a.

Ribōdxi yechē'ē Jesús ni'a quégaca bōnachi Jerusalén

(Mt. 23:37-39)

³¹ La' dza ní'isō bila'dxinē' bal-la bōnni' yudo' fariseo ga zoē' Jesús en tē' Lē':

—¡Burúaj! ¡Buzxunnaj ni! ¡Rē'ēnē' Herodes gútiē' Li'!

³² Jesús rē' légaquiē':

—Gulí'tséaj, gulí'tsójōdxē' bōnni' na' náquiē' ca tuba' bōza', innali': “Buyútsōca', rubéajgaca' bō' xihui', en ruúna' bōnachi na'a, en cuxō, en cate' gaca lidzaj, údxi guna' dxin quia'.” ³³ Run bayudxi tséajlensa' ca' nōza na'a, en cuxō, en huidzaj, ate' idxina' Jerusalén, tu' tútigaquiē' bōnni' tu'ē didza' uláz queē' Dios ni'.

³⁴ ‘Libí'ili', zóali' Jerusalén. Rútigacali'-nē' bōnni' tu'ē didza' uláz queē' Dios, en ruládxigacali'-nē' guiōj bōnni' gubáz risól-lē'ē Dios ga zóali'. Cate' xō zían luzuí gu'unida' utuba' libí'ili' quia' ca runba' yōjede, rutúbiba' bōrado' queēba' xzan xiliba', pero bití' gu'unili'. ³⁵ Bulí'yútsōca', cá'asō ugá'ana lídxi'li', ate' rea' libí'ili', bití'rō ilē'eli' neda' cate' idxinrō dza innali': “Bica' ba Nu na' za' uláz queē' Xanru'.”

¹ Cate' naca dza lá'ayi quégaquië' bönni' judío, guyu'ë Jesús lidxë' tu bönni' unná bē', bönni' yudo' fariseo. Rō'ë Jesús rahuë', ate' nacu'ë bönni' yudo' fariseo ni' ta'nē'ë Lē'. ² Zoë' ca' tu bönni' ré'enē' huë' gui ga na' zoë' Jesús. ³ Ní'irō Jesús gunábinē' bönni' yudo' usedi táquië' xibá queë' Moisés, en yugu' bönni' yudo' fariseo, rnnē':

—¿Naru' dē lataj unru' nu re'e cate' naca dza lá'ayi?

⁴ Légaquië' bulu'sayaj ruá'agaquië'. Ní'irō Jesús gudélē'ë bönni' huë' na', en bunē' lē', ate' la' busól-la'tē' lē'. ⁵ Ní'irō Jesús rē' yugu' bönni' yudo' na', rnnē':

—Channō nu bönni' lādjali' nacuá'aba' queë' bōa' bēdxi, ate' ibíxiba' tuba' lu yeru, ¿naru' cabí tsōjléajtē'-ba', sal-la' naca dza lá'ayi?

⁶ Biti' bi didza' guca ulu'bi'ë ca naca lē ni.

Nu cō' lataj lo

⁷ Cate' bilé'enē' Jesús ca tunē' bönni' yudo' fariseo na', ta'bō'ë lataj lo ga na' ta'bō'ë tahuë', ní'irō bucúdu'ë didza', ate' rē' légaquië':

⁸ —Cate' nu bönni' ulidzē' li' guidu' ga raca laní que yōl-la' rutsaga na', bití' cō'u lataj lo. Nadxi ca' nulidzē' ca' tu bönni' nácatērē' lo ca li'. ⁹ Ní'irō bönni' na' bulidzē' li' huidē' ga zu', en guíē' li': "Bē' lataj bönni' ni cō'ë ga zu'", ate' ní'irō lu yōl-la' rutuf'i quiu' tsōjchō'u xzánitēlō. ¹⁰ Que lē ni na', cate' nu bönni' ulidzē' li', guyéaj yōjchō' xzánitēlō, para cate' idxinē' bönni' na' bulidzē' li', huē' li': "Bōcha'a, gudōdi ia'lati' nilō." Ní'irō gácaru' li' lo lógaca nupa ta'bō'len li' tsōzxōn. ¹¹ Nu run ba xzōn cuini, ilunē' ga huōta' huōxaj, pero nu zoa nōxaj ladxi, ilunē' ga gácarō lo nu na'.

¹² Jesús rē' ca' bönni' na' bulidzē' Lē', rnnē':

—Catí' gunu' tu gúfi' huagu o tu lanído', bití' ulidzagacu'-nē' yugu' bōchi' luzó'o, en yugu' bönni' bōchu'u, en yugu' di'a dza quiu', en dzaga yu'u quiu' ta'lē'enē' yōl-la' tsahui' quégaquië', tu' ulu'lidzē' ca' li', ate' caní'gaca, ubí' quiu'. ¹³ Cate' gunu' tu gúfi' huagu, bulidza yugu' bōnachi yechi', en nupa nabixi ni' a ná'agaca, en nupa bití' raca sá'gaca, en yugu' bönni' lo chul-la. ¹⁴ Ní'irō gacu' bica' ba, tu' cabí'gaca bi ulu'bi'ë bönni' caní' quiu', pero ubí' quiu' cate' idxin dza ulu'bán nupa gulún le naca tsahui', en gulátigaca.

Rucúdu'ë didza' Jesús que tu laní xzōn

¹⁵ Cate' tu bönni' rō'ë rágulenē' Jesús biyōnnē' didza' ni, rē' Lē':

—Bica' ba nu gagu ga ni' rinná bē'ë Dios.

¹⁶ Jesús rē' lē':

—Zoë' tu bönni' benē' laní xzōn, ate' zían nupa bulidzē'. ¹⁷ Cate' chinabá'a la' huagu, gusól-lē'ë bönni' huen dxin queë' tsōjōdxē' nupa na' chinulidzē', gunnē': "¡Guli'dá! ¡Yúgu'tē chinabá'a!" ¹⁸ Gula'sí lógaquië' yúgu'tē' ta'nabē' lataj cabí tsōjáquië'. Bönni' zí'alō na' rnnē': "Sí' guzxi'a tu luyú, en runda' bayudxi tsōjyúa' le. Ráta'yua' lo' gunnu' neda' lataj." ¹⁹ Ia'tué' rnnē': "Sí' guzxi'a gayu' nōzaba' bēdxi, ate' tsōjzxi' bē'a lēgacaba' ugúngaca'-ba' dxin. Ráta'yua' lo' gunnu' neda' lataj." ²⁰ Ia'tué' rnnē': "Sí' butsaga na'a, en que lē ni na' bití' gaca guía'a." ²¹ Cate' bōajē' bönni' huen dxin na', yōjtíxjōi'nē' xanē' yúgu'tē lē ni. Ní'irō gulénē' bönni' xan yu'u na', ate' gudxē' bönni' huen dxin na', rnnē': "Guyéajtē na'a gapa naca lu yē'eyi, en gapa naca la' nōza que yōdzō ni, ate' ichē'u yugu' bōnachi yechi' ni, en nupa nabixi ni' a ná'agaca, en nupa bití' raca sá'gaca, en yugu' bönni' lo chul-la." ²² Cate' chinunē' bönni' huen dxin na' caní, rnnē': "Xan, chibena' ca na' gunná bē'enu' neda', ate' ni dē lataj." ²³ Ní'irō xanē' gudxē' bönni' huen dxin na', rnnē': "Guyéaj gapa naca la' nōza, en gapa naca nōza lasi, ate' ben bayudxi guidigaca nupa nacuá' ni' para ilí lidxa," ²⁴ tu' rea' libí'ili: Bití' gahuë' que laní quia' nítüē' bönni' ni' bulidza' zí'alō."

Le sáca'ru' cate' zéajlenru'-nē' Cristo

²⁵ Yugu' dza ni' rōjácalen Jesús bōnachi zían, ate' buécjē' Jesús, en rē' légaquië':

²⁶ —Channō guíalalenē' neda' tu bönni', en bití' idxi'irōnē' neda' ca nadxi'inē' xuz xinē'ë, en nigula queë', en yugu' xzí'inē', en yugu' bi'i bōché'ë, en yugu' bi'i zanē', en yōl-la' na'bán queë', bití' gaca gáquië' bönni' usēda quia'. ²⁷ Nu bönni' bití' gáquië' ca tu bönni' sa'yéajē' sōjtē'ë lē'ë yaga cruz, ate' tē'ë neda', bití' gaca gáquië' bönni' usēda quia'. ²⁸ Channō zoë' nu bönni' ladaj libí'ili' guē'ënnē' gunē' tu yu'u zían cuía, ¿naru' cabí cō'ë zí'alō ulabē' gáca'xi dumí ral-la' utōē' para inōzinē' channō dē queë' tsca le riquinnē' para údxi gunē' yu'u na'? ²⁹ Channō cabí gunē' caní, en isí lahuë' cuéquië' xilibi yu'u na', ate' bití' gaca údxi gunē' yu'u na', ní'irō ila'sí lógaca yúgu'tē nupa ila'lé' le ulu'titaj lē', ³⁰ ila'nná: "Bönni' ni gusí lahuë' runē' yu'u, pero bití' guca údxi gunē' le." ³¹ Lē'sca' caní, channō zoë' nu bönni' rinná bē'ë, en ral-la' tsejē' gudil-la tsōjtí-lalenē' ia'tué' bönni' rinná bē'ë, ¿naru' cabí cō'ë zí'alō, en cuéqui icjē' channō séqui'nē' tsōjtí-lalenē' bönni' ni' naché'ë galaj milē' bönni', ate' lē' chí milsē' bönni' naché'ë? ³² Channō cabí séqui'nē', cate' ni' zoë' zí'tu' ia'tué' bönni' na' rinná bē'ë, isól-lē'ë bönni' gubáz

queë', ate' inábinë' lë' nacxi ral-la' gunë' para ulu'dzáguië' dxi'a. ³³ Caní naca, channö zoë' nu bönni' ladaj libí'ili' bití' ucá'anë' yúgu'të le dë queë', bití' gaca gáquië' bönni' uséda quia'.

Zödi' le naniti yöl-la' siná'a que

(Mt. 5:13; Mr. 9:50)

³⁴ Gunnë' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a? ³⁵ Bití'rö nazaca' zödi' na', calëga para luyú, en calëga para ga rirú'uniru' bëbu, pero chú'unaru' le ní'ilo. Nu zoa nagui, en riyóni, ral-la' uzë nagui nu na'.

15

Rucúdzu'ë didza' Jesús ca naca queëba' bö'cu' zxila' gunítiba'

(Mt. 18:10-14)

¹ Bulu'dubë' yúgu'të bönni' tu' quízxië' lázagaca bönachi, en yugu' bönni' cá'asö ga zoë' Jesús para ulu'zë náguië' Lë'. ² Que lë ni na' yugu' bönni' yudo' fariseo, en yugu' bönni' yudo' usedi gula'nnë' queë' Jesús, ta'nnë':

—Bönni' ni runë' bal yugu' bönni' dul-la', en ráguenë' légaquië'.

³ Ní'irö bucúdzu'ë didza' Jesús, rë' légaquië':

⁴ —Channö zoë' tu bönni' ladaj libí'ili', nacuá'aba' queë' tu gayuá'aba' bö'cu' zxila', en channö nítiba' tuba', ¿naru' cabí ucá'anë' ia'zica'röba' tápalalaj yu' chënnaba' na' ga naca lu lataj cá'asö, ate' tsejë' tsöjdiñë'-ba' bö'cu' zxila' na' nanítiba', cate' udzölirönë'-ba'? ⁵ Cate' udzölirönë'-ba', lu yöl-la' rudzeja queë' ixóë'-ba' ya' zxicjë', ⁶ en cate' udxinë' lidxë' utubë' yugu' böchi' luzë'ë, en yugu' dzaga yu'u queë', ate' guíë' légaquië': "Buli'dzéjalen neda', tu' chibudzölida'-ba' bö'cu' zxila' quia' gunítiba'." ⁷ Rea' libí'ili': Lësca' caní gácatërö yöl-la' rudzeja yehua' yubá ni'a queë' tuë' bönni' dul-la' ubí'i ládxë'ë ca gaca quëgaquië' tápalalaj yu' chënnë' bönni' tsahui', bönni' téquinë' bití' naquíniguequinë' ulu'bí'i ládxí'gaquië'.

Rucúdzu'ë didza' Jesús que tu dumí guniti

⁸ Rnnë' ca' Jesús:

—Channö zóanu tu nigula, dë queënu chi dumí plata, en channö initi tu dumí plata na', ¿naru' cabí uquëla'nu guí', ate' ulúanu yu'u, uguillaj yúdxinu le cate' udzölirönë le? ⁹ Cate' udzöliru le, utúbinu yugu' nigula luzá'anú, en yugu' nigula dzaga yu'u queënu, ate' guíënu légacanu: "Buli'dzéjalen neda', tu' chibudzölida' dumí plata na' guniti." ¹⁰ Rea' libí'ili': Lësca' caní, ulu'dzéjade'erönë' gubáz lá'ayi queë' Dios ni'a queë' tuë' bönni' dul-la' ubí'i ládxë'ë.

Rucúdzu'ë didza' Jesús queëbi' tu bi'i gunítibi'

¹¹ Rnnë' ca' Jesús:

—Zoë' tu bönni' nacuá'abi' chópabi' bi'i bönni' queë'. ¹² Bi'i cuidi' na' rëbi'-në' xúzibi': "Dad, benna quia' le dë quiu' le ral-la' guequi quia'." Ní'irö xúzibi' na' gudisië' quégacabi' le dë queë'. ¹³ Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzo zítu', ate' ni' butóbi' dërö le dë queëbi'. Le ruá' dö' benbi'. ¹⁴ Cate' chibutóbi' dërö le dë queëbi', guca gubín lu yödzo ga na' zóabi', ate' biyadzaj queëbi'. ¹⁵ Ní'irö guyéajbi' yöjsóabi' huen dxin queë' tu bönni' lu yödzo ni', ate' bönni' na' gusól-lë'ë-bi' ga dë xiyúë' tsöjgágu'ba' yugu' cuchi queë'. ¹⁶ Guca ládxí'bi' gágubi' guixi' cá'asö na' táguba' cuchi, pero cuntu nu bi' bë' le gágubi'. ¹⁷ Ní'irö bubí'i ládxí'bi', rnnabi': "Cate' xö bönni' huen dxin nacu'ë lidxë' xuzá', en dëda' le tahuë', pero neda' ni huáti caza' yöl-la' ridún. ¹⁸ Uzá'a ni, huója' ga zoë' xuzá', en tsöjódxa'-në: Dad, bena' dul-la' lahuë' Dios, zoë' yehua' yubá, en lo' li'. ¹⁹ Bití'rö naca' neda' lesaca' gaca' xzí'inu'. Ben neda' ca bönni' huen dxin quiu'." ²⁰ Ní'irö guyú'ubi' nöza, söhuóajbi' ga zoë' xúzibi'.

'Cate' ni' zóabi' zítu' suzá'abi', bilé'enë'-bi' xúzibi', en buéchi' ládxë'ë-bi'. Carelò yöjxí'galë'-bi' xúzibi', en yöjnidë' yenbi', gudahuë'-bi' zxixi. ²¹ Ní'irö xzí'inë' na' rëbi'-në: "Dad, bena' dul-la' lahuë' Dios, zoë' yehua' yubá, en lo' li'. Bití'rö naca' neda' lesaca' gaca' xzí'inu'." ²² Ní'irö xúzibi' rë' yugu' bönni' huen dxin queë', rnnë: "Guli'tsöjléajtë larí' nazácatërö, en guli'gacu-bi'. Guli'cú'u le nazaca' xibón ná'abi', en bulí'dá' huarache ní'abi'. ²³ Guli'tsöjxí'i-ba' bëdxi renni', ate' guli'guci-ba'. Gáguru'-ba', en gunru' laní, ²⁴ tu' guca bi'i bönni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a." Ní'irö gula'sí lógaquië' tu'dzéjanë'.

²⁵ 'Tsanni ni' raca lë ni, zóabi' bi'i bönni' zí'aló queë' bönni' na' la' guixi'. Cate' suzá'abi' rudxinbi' gala' ra' yu'u, riyónibi' raca huila, en raca huó'a lu yu'u na'. ²⁶ Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca. ²⁷ Bönni' huen dxin na' rë'ë-bi': "Bi'i böchu' na' budxinbi', ate' gunná bë'ë xuzu' gulútië'-ba' bëdxi renni', tu' budxinbi' lu në'ë dxi'a tsáhuí'do'." ²⁸ Ní'irö gulébi' bi'i zí'aló na', en bití' gú'unibi' tsú'ubi' yu'u. Ní'irö birúajë' xúzibi', en gúta'yüë' lobi' tsú'ubi'. ²⁹ Bubí'ibi' didza' bi'i zí'aló na', rëbi'-në' xúzibi':

“Nöz quézinu’ cate’ xö iz bena’ dxin lo’, en catu caz gudá’baga’a li’, pero catu caz bennu’ quia’ tuba’ bö’cu’ xzila’do’ para güi’lena’ xibé yugu’ luzá’a. ³⁰ Na’a, cate’ budxinbi’ bi’i quiu’ ni busunítibi’ yugu’ le guta’ quiu’, gudálenbi’-nu yugu’ nigula udá dzaga, benu’ ga gulútié’-ba’ bédxi renni’ ni’a queébi’.” ³¹ Ní’irö xúzibi’ rē’ē-bi’, rnnē’: “Xzf’ina’, li’ zóalen cazu’ neda’ ate’ yúgu’tē le dē quia’, quiu’ nequi. ³² Ben bayudxi gunru’ laní, en udzējaru’, tu’ gúcabi’ bi’i böchu’ ni ca tu bi’i chinati cázabi’, ate’ nubanbi’. Gunítibi’ ate’ chibulá’abi’.”

16

Rucúdzu’ē didza’ Jesús queē’ bönni’ huen dxin biti’ náquiē’ tsahui’

¹ Jesús rē’ ca’ yugu’ bönni’ dá’gaquiē’ Lē’, rnnē’:

—Zoē’ tu bönni’ dē yöl-la’ tsahui’ queē’, en zoē’ ca’ queē’ tuē’ bönni’ huen dxin dē lu nēē uláz queē’. Bila’ dxinē’ yugu’ bönni’ tu’ zéguiē’ bönni’ huen dxin na’ lahuē’ xanē’, ta’nnē’ queē’ rutōsē’ le dē queē’ xanē’ na’. ² Ní’irö xan yu’u na’ bulidzē’ bönni’ huen dxin na’, en rē’ lē’: “¿Bizxi didza’ ni riyönda’ quiu’? Buluí’i neda’ le naca bē’ dxin nunu’, tu’ cabirö gata’ lu no’o uláz quia’.” ³ Ní’irö guzá’ ládxe’ē bönni’ huen dxin na’, rnnē’: ¿Nacxi guntsa’? Rubéajē’ xana’ neda’ lataj lo ga runa’ dxin. Biti’ séqui’da’ guna’ dxin gú’una, en utuf’ida’ inaba’ nu bi gúnnasö quia’. ⁴ Na’a nōzda’ naca guna’ para cate’ ubéajē’ neda’ lataj lo ni, ila’cuá’ nupa ulu’z’i neda’ lídxi queui. ⁵ Ní’irö bönni’ huen dxin na’ bulidzē’ yugu’ bönni’ bi tál-lē’ē queē’ xanē’, ate’ rē’ bönni’ z’alō: “¿Gáca’xi ral-lu’u queē’ xana’?” ⁶ Lē’ rnnē’: “Tu gayuá’ rō’o chugu le za ral-la’a.” Bönni’ huen dxin lo na’ rē’ lē’, rnnē’: “Ni dē guichi ga nazúaj le ral-lu’u. Gurö’otē ni, en buzúaj ia’tú lu guichi le inná chi-un rō’o chugu ral-lu’u.” ⁷ Gudödi ni’ gunábinē’ ia’tué’, rnnē’: “Nazxi li’, ¿gáca’xi ral-lu’u?” Lē’ rnnē’: “Tu gayuá’ da’a xzoa’ xtila.” Ní’irö bönni’ huen dxin lo na’ rē’ lē’, rnnē’: “Ni dē guichi ga nazúaj le ral-lu’u. Buzúaj ia’tú lu guichi le inná tápalalaj da’a ral-lu’u.” ⁸ Réquibe’enē’ xanē’ na’ sína’tē benē’ bönni’ huen dxin biti’ náquiē’ tsahui’ na’. Caní naca, nácagacarē’ sina’ bönni’ yödžölió ni lu le tunē’ la’ légacasē’, ca nácagaca bönachi ta’dalen Dios lu bení’ queē’.

⁹ ‘Neda’ rea’ libí’ili’: Gulí’cözalun bönachi dxi’a, ugunli’ dxin yöl-la’ tsahui’ dē queéli’ yödžölió ni, para cate’ idxín dza ucá’anali’ yugu’ lē ni, ilunē’ libí’ili’ bal lataj ni’ zóatica’sö.

¹⁰ ‘Nu rugún dxi’a dxin tu le cuíd’isö dē lu nē’e, lē’sca’ ugún dxi’a dxin tu le xzön gata’ lu nē’e. Nu biti’ rugún dxi’a dxin tu le cuíd’isö dē lu nē’e, biti’ ugún dxi’a dxin tu le xzön gata’ lu nē’e. ¹¹ Que lē ni na’, channö cabí rugunli’ dxi’a dxin yöl-la’ tsahui’ dē queéli’ yödžölió ni, ¿nuzxi caz udödi lu ná’ali’ yöl-la’ tsahui’ le naca idú? ¹² Channö cabí rugunli’ dxi’a dxin le dē lu ná’ali’ le nequi que nu yúbölö, ¿nuzxi caz udödi lu ná’ali’ le ral-la’ guequi que quézili’?

¹³ ‘Biti’ gaca nitüē’ bönni’ huen dxin gunē’ xichíngaca chopa xanē’, tu’ udf’inē’ tuē’, en idxi’inē’ ia’tué’, o gunē’ bal tuē’, en uzóē’ tsölá’alö ia’tué’ na’. Biti’ gaca gunli’ xichinē’ Dios, en gunli’ ca’ dxin para uzf’ili’ xibé yöl-la’ tsahui’ que yödžölió.

¹⁴ Bila’yönnē’ bönni’ yudo’ fariseo didza’ ni, ate’ tu’ nadxf’iguequinē’ yöl-la’ tsahui’ quégaquiē’, que lē ni na’ bulu’titjē’ Jesús. ¹⁵ Ní’irö Jesús rē’ légaquiē’:

—Libí’ili’ rubéaj dxi’a cuinli’ lógaca bönni, pero nözinē’ Dios le yu’u icja ládxi’do’oli’, tu’ naca lē na’ tun xzön bönachi tu le ruzóē’ Dios tsölá’alö.

Xibá queē’ Moisés, en le rinná bē’ē Dios

¹⁶ Gunnē’ ca’ Jesús:

—Ga bidxintē dza zoē’ Juan, ben dxin le rinná bē’ xibá queē’ Moisés, en le bulu’zúajē’ lu guichi yugu’ bönni’ gulu’ē didza’ uláz queē’ Dios. Ní’irö cate’ bidxinē’ Juan na’, gusi lo raca libán ca gaca nu tsaza ga rinná bē’ē Dios, ate’ tun bayudxi yúgu’tē bönachi ila’yaza ni’.

¹⁷ ‘Sal-la’ raca caní, gácarö ila’dödi que lúzxiba, en que luyú ni ca initi tu dídza’sö nazúaj lu guichi lu xibá queē’ Dios.

Le rulá’a yöl-la’ nutsaga na’

(Mt. 19:1-12; Mr. 10:1-12)

¹⁸ Gunnē’ ca’ Jesús:

—Channö tu bönni’ ulá’alenē’ nigula queē’, ate’ utsaga ná’alenē’-nu nigula yúbölö, gunē’ dul-la’ le riguitsaj xibá que yöl-la’ nutsaga na’, ate’ nu utsaga ná’alen nigula na’ nusanē’-nu bönni’ queē’nu, gun ca’ dul-la’ le riguitsaj xibá que yöl-la’ nutsaga na’.

Bönni’ dē yöl-la’ tsahui’ queē’, en Lázaro

¹⁹ Ní’irö bucúdzu’ē didza’ Jesús, rnnē’:

—Zoē’ tu bönni’ rilé’enē’ yöl-la’ tsahui’ queē’. Rácuē’lari’ xiná, en lari’ nazáca’da’, ate’ yugu’ dza rúntica’sē’ laní, ate’ tē’aj tahuē’ le banéquini. ²⁰ Zoē’ ca’ ni’ tu bönni’ yéchi’do’ lē’ Lázaro, bönni’ rinabē’ nu bi unödzaj queē’, ate’ huē’tézē’ rō’ē ra’ yu’u queē’ bönni’ na’ rilé’enē’ yöl-la’ tsahui’. ²¹ Raca ládxe’ē bönni’ yéchi’do’ na’ gahuē’ le bizxaj tu’huóxaj xzani ga rahuē’ bönni’ na’ rilé’enē’ yöl-la’ tsahui’. Ta’dxinba’ ca’ bö’cu’, en ta’lē’ēba’ lu huē’ queē’ bönni’ yéchi’do’ na’.

²² Bidxín dza gútië' bönni' yéchi'do' na', ate' gubáz lá'ayi queë' Dios gula'chë'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba. ²³ Cate' ni' riguf'i rizáqué'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahuë', en bilé'enë' Abraham zoë' zi'tu', en dzáguie' Lázaro na' lë'. ²⁴ Ní'irö bë'ë zidzaj didza', rnnë': "Xuza', Abraham, buéchi' ladxí' neda'. Gusól-la' Lázaro quia' para usubisë' xibón në'ë, en udusuhoálë' lúdx'a, tu' riguf'i rizáca'a lu guí' ni." ²⁵ Abraham rë' lë', rnnë': "Zxí'ina', busá' ladxu'u ca guca quíu', buzi'u xibé yöl-la' tsahui' tsanni ni' zu' nabanu', pero Lázaro ni, guca queë' yöl-la' yechi', ate' na'a, ruzí' zxönë' Lázaro ni, pero li' riguf'i rizácu'u. ²⁶ Ia'stú, tu ra' guí'a sibi rō, le zoa gatsaj láchui'lō ga ni' zóali' libí'ili', en ga ni' zóatu' netu'. Que lë' ni na' nupa nacuá' ni, en ilë'ëni ila'dōdi ga zóali' libí'ili', bití' ca' gaca ilunë' ca', en bití' gaca ilida ni nupa nacuá' ni'." ²⁷ Ní'irö bönni' na' bilé'enë' yöl-la' tsahui' rë' lë', rnnë': "Xuza' Abraham, ráta'yua' lo' isöl-lu'u-në' Lázaro tsejé' lidxë' xuza', ²⁸ tu' nacu'ë gáyú'ë bönni' böcha'a ni'. Gusól-lë'ë tsöjenë' liná' lo que le raca ni, para cabí guídagaquie' ca' lataj ga ni riguf'i rizáca'a." ²⁹ Ní'irö Abraham rë' lë', rnnë': "Dë quégagaquie' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégagaquie' na' ral-la' ulu'zë náguie'." ³⁰ Bubi'ë didza' bönni' na' bilé'enë' yöl-la' tsahui', rnnë': "Xuza' Abraham, bití' gaca caní, pero channō ubanë' tu bönni' lu yöl-la' guti, en tsejé' ga na' nacu'ë, ulu'bf'i ladxí'gaquie'." ³¹ Abraham rë' lë', rnnë': "Channō cabí tu zë náguie' didza' bë'ë Moisés, en le gula'nnë' bönni' gulu'ë didza' uláz queë' Dios, bití' ila'yéajlë'ë sal-la' nu ubán lu yöl-la' guti."

17

Run bōnadxi queëru' gunru' ga nu gun dul-la'
(Mt. 18:6-7, 21-22; Mr. 9:42)

¹ Jesús rë' yugu' bönni' dá'gaquie' Lë', rnnë':
—Nacuá'tica sō le tun ga ilún bōnachi dul-la', pero bica' bayechi' bönni' na' runë' ga nu gun dul-la'. ² Dxi'arō gaca queë' bönni' na' runë' caní, nu ugal-la' tu guiōj riyétu yaga yenë', en tsōjchú'una lë' lu nísado', cáte'lō gunë' ga gun dul-la' nu bī'i néquibi' quia'. ³ Guli'gún chí'i cuinli'. Channō böchi' luzó'o gu'ë dō' quíu', buzéajni'i-në', en channō ubí'i ladxë'ë, buniti lo lë'. ⁴ Sal-la' gadxi luzuí tu dza gu'ë dō' quíu', en gadxi luzuí ca' guidë' ga zu', en guie' li': "Rubí'i ladx'a", ral-la' uniti lo' lë'.

Yöl-la' huáca que le réajlë'ëru' Cristo

⁵ Ní'irö yugu' bönni' gubáz queë' Xanru' tē' Lë', ta'nnë':

—Ben ga tséajlë'ërōtu-në' Dios.

⁶ Xanru' rë' légaquie', rnnë':

—La'tu' naca cuídi'sō yöl-la' réajlë' queéli' Dios, nácasō ca tu xisedo' mostaza, huáca guié'li' yaga zxón ni: "Gucuíta ni, en yōjsōa lu nísado'", ate' gun yaga na' ca' rnnali'.

Le ral-la' gun nu naca huen dxin

⁷ Gunnë' ca' Jesús:

—Channō zoë' tuë' bönni' lada' libí'ili', en zoë' queë' tuë' bönni' nadó'o rugá'anë'-ba' bēdxi o rulapë', cate' údxi gunë' xichinë' xanë', ¿naru' huëtsë' xanë' lë', innë': "Gudá, gurō'ō gagu'?" ⁸ ¡Caléga! Caní guie' lë': "Bupá'a le gahua". Guzóa sina' cu'u le guí'aj gahua, ate' tōdirō na' huáca guí'aj gagu' li'." ⁹ ¿Naru' huëtsë' bönni' nadó'o queë' na': "Xclenu", tu' benë' ca gunná bé'enë' lë'? Runi neda', bití' gunë' caní. ¹⁰ Lésca' caní gaca queéli'. Cate' chinunli' yúgu'të le gunná bé'enë' Dios libí'ili', ral-la' innali': "Nácatu' huen dxin cabí nácatu' lesaca', tu' bēnsōtu' le run bayudxi guntu'."

Chië' bönni' té'enë' huë' nudzu' ruzōdi

¹¹ Tsanni ni' yu'ë Jesús nōza, sa'yéajë' Jerusalén, ridōdë' gapa dë yōdzōdo' nabábagaca luyú Samaria, en luyú Galilea. ¹² Cate' guyázië' tu yōdzōdo', bila'rúajë' dutságagaquie' Lë' chië' bönni' té'enë' huë' nudzu' ruzōdi, ate' gula'cu'ë zí'tu'só, ¹³ en tu'ë zidzaj didza', ta'nnë':

—¡Jesús, Bönni' Usedi! ¡Buéchi' ladxí' netu'!

¹⁴ Cate' bilé'enë' Jesús légaquie', rë' légaquie':

—Guli'tséaj, guli'tsōjlú'i cuinli' lógaca bixúz.

Tsanni ni' sōjáquie', bulu'huoáquie' dxi'a. ¹⁵ Ní'irö tuë' bönni' nútsë'ë ladjagaquie', cate' réquibe'enë' chinuhuóáquie' dxi'a, bōajë' ga na' zoë' Jesús, ruí'tica'së' zidzaj didza', riguf'ë Dios yöl-la' ba. ¹⁶ Biyéchuë', en busudxín lahuë' lu yu lahuë' Jesús, en rë' Lë': "¡Xclenu'!"

Bönni' ni nababë' Samaria. ¹⁷ Ní'irö Jesús rë' lë':

—¿Naru' cabí bulu'huoáquie' dxi'a chië' bönni'? ¿Gazxi nacuá'tsë' ia'zica'rë' bönni' na'? ¹⁸ ¿Naru' cabí zoa nu huóda cu'u Dios yöl-la' ba, pero tuzë' bönni' zí'tu' ni?

¹⁹ Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböäcu' dxi'a tu' réajlë'u neda'!

Ca idxín le rinná bē'ē Dios

(Mt. 24:23-28, 36-41)

²⁰ Cate' yugu' bönni' yudo' fariseo ta'nábinē Jesús bátaxi ral-la' idxín le rinná bē'ē Dios, Lē' bubi'ē didza', rē' légaquiē':

—Ca idxín le rinná bē'ē Dios, biti' naca le ilé'eli'. ²¹ Cuntu nu gaca inná: "¡Ni bidxín!", o inná: "¡Ni' bidxín!" ¡Buli'yútsöca'! ¡Rinná bē'ē Dios lu icja ládxi'do'gaca bönachi!

²² Ní'irō Jesús gudxē' yugu' bönni' usēda queē', rnnē':

—Huadxín dza cate' guē'ēnili' ilé'eli' dza huōda' neda', Bönni' Guljē' Bönachi, pero biti' ilé'eli' le. ²³ Ila'cuá' nupa ilé libí'ili': "¡Ni zoē'!", o ila'nná: "¡Ni' zoē'!" Biti' tséajli' nī', en biti' tséajlenli' légaquiē'. ²⁴ Ca raca cate' rēpi yösa, ruzenī' idá'alō lúzxiba, lēasca' caní gaca cate' idxín dza huōda' neda', Bönni' Guljē' Bönachi. ²⁵ Zí'alō ca gaca lē nī, run bayudxi quí'í sáca'da', ate' bönachi dza nī zóaru' na'a ulu'cá'ana neda' cá'asō. ²⁶ Ca na' guca dza nī' zoē' Noé, lēasca' caní gaca cate' idxín dza huōda' neda', Bönni' Guljē' Bönachi. ²⁷ Dza nī'te na' gulē'aj gulahuē'. Bulu'tsaga na'agaquiē', en bulu'dōdē' xz'ínigaquiē' lu yöl-la' rutsaga na' ga bidxintē dza guyázē' Noé lē'e barco zxōn na' nazí'le le arca, ate' bidxintē nisa guiōj usuniti yōdzōlió le busuniti yūgu'tē'. ²⁸ Lēasca' caní guca dza nī' zoē' Lot. Gulē'aj gulahuē'. Gulá'uē', en gulú'tiē'. Gulazē' xiyúgaquiē', en gulunē' yugu' yu'u quégaquiē'. ²⁹ Cate' bidxín dza na' burúajē' Lot lu yōdzō Sodoma, bōxaj guí' ca tu nisa guiōj, enca' le ruzéguida' nazí'le le azufre, ate' bulu'suniti yūgu'tē'. ³⁰ Lēasca' caní gaca cate' idxín dza uluf'í lahua' neda', Bönni' Guljē' Bönachi.

³¹ 'Cate' idxín dza na', channō zoē' tu bönni' ícjo'olō, en dzō'ō le dē queē' lu yu'u na', biti' ral-la' huōtjē' tsōjzxi'ē le dē queē', ate' nu zoa la' guixi', lēasca' caní, biti' ral-la' huōjē' lidxē'.

³² Guli'sá' ládxi'li' ca guca queēnu nigula queē' Lot. ³³ Nu bönni' rē'ēnē' gun chí'ē yöl-la' na'bán queē', unítē' le, pero bönni' udōdē' yöl-la' na'bán queē' nī'a quia', udélé'ē le.

³⁴ 'Rea' libí'ili': Cate' idxín rēla na', ila'cu'ē chopē' bönni' tsōzcxōn ga tasiē', ate' tuē' uduzxi'a-nē', en ia'tuē' ucá'ana' lē'. ³⁵ Ila'cuá'anu huētū tsōzcxōn chōpanu nigula, ate' tunu uduzxi'a-nu, en ia'tunu ucá'ana'-nu. ³⁶ Ila'cu'ē chopē' bönni' la' guixi', ate' tuē' uduzxi'a-nē', en ia'tuē' ucá'ana' lē'.

³⁷ Cate' bila'yōnnē' lē nī bönni' usēda queē' Jesús, gula'nábinē' Lē', ta'nnē':

—Xan, ¿gazxi gaca lē nī?

Jesús rē' légaquiē':

—Ga dē tu le nati, nī' ulu'dubi quéziba' bíchulab.

18

Tu nigula uzēbi, en bönni' ruchi'a rusörōē'

¹ Ní'irō bucúdzu'ē didza' Jesús, rē' légaquiē' ca run bayudxi ulídzatica'siru'-nē' Dios, en biti' gaca chopa ládxi'ru'. ² Rnnē':

—Zoē' tu bönni' ruchi'a rusörōē' tu yōdzō, bönni' biti' rádxinē' Dios, en biti' runē' nu bönni' bal. ³ La' yōdzō ná'asō zóanu tu nigula uzēbi, ate' bidxinnu nigula nī ga zoē' bönni' ruchi'a rusörōē' na', rnnanu: "Buchi'a busörō le run quia' nu ruá' dō' quia'." ⁴ Xidzé biti' gú'unnē' bi gunē' queēnu, pero gudōdi nī' guzá' ládxē'ē, rnnē': "Biti' rádxida'-nē' Dios, en biti' runa' nu bönni' bal, ⁵ pero tu' rupízxjanu nigula uzēbi nī neda', que lē nī na' uchi'a usörōa'-nu, para cabí guídatica'sinu nī, en para cabí tōdi bē' upízxjanu neda'."

⁶ Ní'irō Xanru' rē' légaquiē', rnnē':

—Gulí'zē nágali' ca na' gunné' bönni' ruchi'a rusörōē' na', bönni' biti' náquiē' tsahui'.

⁷ ¿Naru' cabí uchi'a usörōē' Dios bönachi gurō cazē' queē', nupa na' tu'lidza Lē' rēla te dza? ¿Naru' huadzétsenē' gácalenē' légaquiē'? ⁸ Rea' libí'ili': La' uchi'a usörōtenē' légaquiē'. Cate' huōda' neda', Bönni' Guljē' Bönachi, ¿naru' idzōlida' nupa ta'yéajlë' neda' luyú nī?

Tu bönni' yudo' fariseo, en tu bönni' uquízxaj

⁹ Bucúdzu'ē didza' Jesús ca naca quégaquiē' bönni' tu'béaj tsahui' cuíngaquiē', en tu'cá'anē' cá'asō ia'zica'rō bönachi. ¹⁰ Gunnē':

—Bila'dxinē' chopē' bönni' ga naca chila yudo' para ulu'lidzē' Dios. Tuē' bönni' na' náquiē' bönni' yudo' fariseo, ate' ia'tuē' na' náquiē' bönni' ruquízxjē' lázagaca bönachi. ¹¹ Guzuínē' bönni' yudo' fariseo na', en caní bulidzē' Dios, rnnē': "Dios, rea' Li': Xclenu', tu' cabí naca' ca nácagaquiē' ia'zica'rē' bönni', nácagaquiē' gubán, en biti' nácagaquiē' tsahui'. Ta'guitsjē' xibá que yöl-la' nutsaga na'. Lēasca' biti' naca' ca bönni' uquízxaj nī. ¹² Neda' runa' gubasa chopa luzuí tu' xunu' dza huéaj, en runōdzja' que yudo' tu cō' huéaj tu' chí cō' que yūgu'tē le rata' quia'." ¹³ Guzóazē' zí'tu' bönni' uquízxaj na', en biti' bōázxjanē' ichisa lahuē' uyúē' lúzxiba, pero gudapē' luchu'ē, rnnē': "Dios, buéchi' ladxi' neda', bönni' dul-la'." ¹⁴ Neda' rea' libí'ili': Bōajē' lidxē' bönni' uquízxaj na', nuhuōáquiē' tsahui' lahuē' Dios, calēga ia'tuē' bönni' nī'.

Núti'tës bönni' run ba zxön cuinë', gunë' Dios ga huöta' igulë', pero nu bönni' rizóë' nöxaj ladxì', gunë' Dios ga gácarë' lo.

Jesús rulidza tsáhuë'ë-bi' yugu' bí'ido'

(Mt. 19:13-15; Mr. 10:13-16)

¹⁵ Ní'irö bila'dxinë' yugu' bönni', en nigula ga zoë' Jesús, nachë'gaquië'-bi' yugu' bí'ido' quëgaquië' para ixóa në'ë Jesús légacabi'. Cate' bila'lé'enë' yugu' bönni' usëda queë' Jesús lë ni, gula dil-lë' légacuië'. ¹⁶ Ní'irö Jesús bulidzë' yugu' bönni' dá'gaquië' Lë', rnnë':

—Gul'gü'i-bi' lataj ila'dxinbi' bí'ido' ni ga zoa'. Biti' uzága'li' xinözagacabi', tu' gata' quégaca nupa nácgaca ca bi'i caní lataj ga rinná bë'ë Dios. ¹⁷ Le nácatë rea' libí'ili': Nu cabí si' lu në'e le rinná bë'ë Dios, ca runbi' tubi' bí'ido', biti' ca' tsaza ga ni' rinná bë'ë Lë'.

Tu bönni' rilé'enë' yöl-la' tsahui'

(Mt. 19:16-30; Mr. 10:17-31)

¹⁸ Tu bönni' unná bë' gunábinë' Jesús, rnnë':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

¹⁹ Jesús rë' lë':

—¿Bizx que rë'u neda': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. ²⁰ Nöz quézinu' yugu' le gunná bë'ë Dios:

Biti' gunu' dul-la' le riguitsaj xibá que yöl-la' nutsaga na'.

Biti' gútagacu' bönachi.

Biti' cuanu'.

Biti' innío' que luzó'o le cabí nácatë.

Ben bal xuz xinó'o.

²¹ Bönni' na' rë' Jesús, rnnë':

—Yúgu'të lë ni runa' ga gudela' naca' bí'ido'.

²² Cate' biyönnë' Jesús didza' ni, rë' lë':

—Ia'tú le riyadzaj quíu' gunu'. Bëti' yúgu'të le dë quiu', ate' lë na' si'u bunödzej quégaca bönachi yechi', ate' gata' quíu' yöl-la' tsahui' yehua' yubá. Ní'irö gudá, gudá' neda'.

²³ Cate' bönni' na' biyönnë' didza' ni, ruhuí'innë', tu' dëda' yöl-la' tsahui' queë'. ²⁴ Cate' bilé'enë' Jesús ca na' ruhuí'innë' bönni' na', rnnë':

—¡Bica' böniga gaca, ila'yaza nupa ta'lé'e yöl-la' tsahui' ga rinná bë'ë Dios! ²⁵ Gácarö tódiba' böa' nagui yótsi', ca tsázië' tu bönni' rilé'enë' yöl-la' tsahui' ga rinná bë'ë Dios.

²⁶ Ní'irö nupa bila'yöni didza' ni gula'nná:

—¿Nuzxi caz gaca ulá, channó?

²⁷ Jesús gudxë' légacuië':

—Le biti' gaca ilunë' bönni', huáca gunë' Dios.

²⁸ Ní'irö Pedro rë' Jesús:

—Buyútsöca', netu' nucá'anatu' yúgu'të le dë queëtu', en dá'atu' Li'.

²⁹ Ní'irö Jesús rë' légacuië':

—Le nácatë rea' libí'ili', nu bönni' uca'anë' lidxë', o xuz xinë'ë, o yugu' böchi' zanë', o nigula queë', o yugu' xzí'inë', tu' rufí'ládxë'ë inná bë'ë Dios, ³⁰ bönni' ni huazí'irë' dza ni zóaru' na'a, ate' dza si' za' idéli'në' yöl-la' na'bán idú.

Jesús rigúxjö'ë leyúbölö ca si' ilútië' Lë'

(Mt. 20:17-19; Mr. 10:32-34)

³¹ Jesús guchë'ë quez queë' idxínnutë' bönni' usëda queë', en rë' légacuië':

—Bul'yútsöca', ribenru' zéajru' Jerusalén, ga ni' ilaca yúgu'të le nazúajgaca lu guichi ca gula'nnë' bönni' gulu'ë didza' uláz queë' Dios ca ral-la' gaca quia' neda', Bönni' Guljë' Bönachi.

³² Yugu' bönni' Jerusalén ulu'dödë' neda' lu ná'agaquië' bönni' zì'tu', ate' ulu'titjë' neda', en ulu'lidza zì'ë neda', en ulu'chejë' neda' zxóna'. ³³ Ila'guinë' neda', ate' tódirö ni' ilútië' neda', pero cate' gaca tsonna dza ubana'.

³⁴ Biti' gula'yéajni'inë' bönni' usëda queë' didza' ni, en biti' guléquibe'enë' ca sa'yéaj le ruf'ilenë' légacuië' didza' que, tu' naca le cabí sequi' ila'yéajni'inë'.

Jesús ruínë' tu bönni' yödzö Jericó nachul-la lahuë'

(Mt. 20:29-34; Mr. 10:46-52)

³⁵ Cate' chizóa idxinë' Jesús yödzö Jericó, zoë' tu bönni' ni' nachul-la lahuë'. Rö'ë ra' nöza rinabë' nu bi gúnnasö queë'. ³⁶ Bönni' ni' biyönnë' ta'dódi bönachi zían ní', ate' gunabë' bizxi na' raca. ³⁷ Bönachi ni' të lë':

—Jesús, bönni' Nazaret, ridödë' ni.

³⁸ Ní'irö bönni' na' nachul-la lahuë' bë'ë zidzaj didza', rnnë':

—¡Jesús, xzí'ini xí'sóë' David, buëchi' ladxì' neda'!

³⁹ Yugu' bönni' nanöruagaquie' lahuë' Jesús gula'dil-lë' bönni' na' nachul-la lahuë' para usayaj ru'ë, pero lë' zidzajrö bë'ë didza', rnnë':

—[zxi'ini xi'söë David, buëchi' ladxì' neda']

⁴⁰ Ní'irö guzë' dxiz Jesús ribözë', ate' gunná bé'enë' nu tsöjlidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

⁴¹ —¿Bizxi rë'ënu' guna' quiu'?

Bönni' na' nachul-la lahuë' rnnë':

—Rë'ënida' huöálaj guiöj lahua'.

⁴² Jesús rë' lë':

—Chiböálaj guiöj lo'. Chiböácu' tu' réajlë'u neda'.

⁴³ La' ní'isö bulé'etenë', ate' sa'yéajlenë' Jesús, rigü'ë Dios yöl-la' ba. Lësca' yúgu'të bönachi nacua' ni', en bila'lé'e lë na' guca gula'gú'u Dios yöl-la' ba.

19

Jesús, en Zaqueo

¹ Ní'irö guyázië' Jesús yödzo Jericó, en ridödë' lu yödzo na'. ² Zoë' tu bönni' lë' Zaqueo ni', bönni' lo ladjagaquie' bönni' uquízaxaj, ate' dë yöl-la' tsahui' queë'. ³ Rufi ladxë'ë bönni' ni ilé'enë' Jesús, pero biti' guca queë' tu' nacua' bönachi zían ni', en náquie' bönni' ga rë'ëdo'. ⁴ Ní'irö carelò yöjnöruë' lógaca bönachi zían na', ate' yöjchenë' tu lu yaga para gaca ilé'enë' Jesús, tu' ral-la' tödë' ni'. ⁵ Cate' bidxinë' Jesús ni', guchisa lahuë' ruyúë' ga na' dxië' Zaqueo na', en rë' lë':

—Zaqueo, bötjatë lu yaga na', tu' run bayudxi tsöjgá'ana' lidxu' na'a.

⁶ Ní'irö la' bötjatë Zaqueo lu yaga, ate' lu yöl-la' rudzeja queë' guchë'ë Jesús lidxë'. ⁷ Cate' bila'lé'e bönachi nacua' ni' lë ni, gula'si lógaquie' yúgu'të ta'nnë' queë', ta'nnë':

—Guyázië' Jesús ugá'analénë' bönni' dul-la'.

⁸ Ní'irö guzuínë' Zaqueo, en rë' Xanru':

—Xan, buyútsöca'. Gatsaj le dë quia' gu'a quégaca bönachi yechi', en channö bi gudödi bë' buquizxja' bönachi, ubi'a quégaca bönachi na' tapa có'tëilö ca'.

⁹ Jesús rë' lë':

—Na'a dza ni bidxin yöl-la' rusólá quégaca nupa nacua' yu'u ni, tu' nababë' bönni' ni dí'a dza queë' Abraham. ¹⁰ Bida' neda', Bönni' Guljë' Bönachi, ududilja', en udusólá' nupa nanítigaca.

Rucúdzu'ë didza' Jesús que chi cö' dumí

¹¹ Tsanni ni' ta'yönnë' didza' ni ru'ë Jesús, rë' légaquie' le rucúdzu'ë didza', tu' chizóa ila'idxinë' yödzo Jerusalén, ate' téquinë' chizóatë ilá' lahui le rinná bë'ë Dios. ¹² Caní rnnë' Jesús:

—Zoë' tu bönni' lo, sa'yéajë' tu yödzo zi'tu' para si' lu në'ë yöl-la' unná bë', ate' ní'irö huödë'.

¹³ Cate' chizóa tsejë' ni' bulidzë' chië' bönni' huen dxin queë', en bë'ë que queégaquie' tu cö' huéaj dumí, ate' rë' légaquie': "Guli'guilajlen dumí ni tsanni huöda'." ¹⁴ Yugu' bönni' uládz queë' biti' ta'lé'enë' lë' dxi'a, ate' gula'sól-lë'ë yugu' gubáz quégaquie' ga ni' tsejë', ila'nnë': "Biti' rë'ënit'u inná bé'enë' bönni' ni netu'." ¹⁵ Ní'irö guzxi' lu në'ë yöl-la' unná bë', ate' budxinë' ladjë'. Cate' bidxinë' ni' gunná bé'enë' nu tsöjlidza yugu' bönni' huen dxin na' budödë' lu ná'agaquie' dumí na', para inözinë' gáca'xi bulu'guilajlenë' le tu tuë'. ¹⁶ Cate' bönni' zí'aló na' bidxinë' lahuë', rnnë': "Xan, tu cö' dumí quiu' na' chibén icja ia'chí cö' ca'." ¹⁷ Xanë' na' rë' lë': "Tsahui' benu'. Nacu' huen dxin tsahui'. Tu' dxi'ado' bugunu' dxin láti'do'os na' guta' lu no'o, na'a, guna' ga inná bé'enu' chi yödzo." ¹⁸ Ní'irö bidxinë' ia'tué' bönni' huen dxin na' lahuë' lë', rnnë': "Xan, tu cö' dumí quiu' na' chibén icja ia'gayu' cö' ca'." ¹⁹ Xanë' na' rë' ca' lë': "Inná bé'enu' gayu' yödzo." ²⁰ Ní'irö bidxinë' ia'tué' lahuë' lë', rnnë': "Xan, ni dë tu cö' dumí quiu' na'. Ben chi'a le, butúlida' le lari'. ²¹ Caní bena' tu' rádxida' li', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'." ²² Ní'irö xanë' na' rë' lë': "Nacu' huen dxin biti' naca tsahui'. Ni'a que didza' bë'u uchi'a usöröa' li'. ¿Réquibë'ënu' naca' bönni' bizxaj: Ruzi'a le cabí buzóa', en rulapa' ga biti' guza'?" ²³ Na'a, ¿bizx que biti' yöjlú'u dumí quia' na' ga gun icja, para cate' huöda', uzi'a le idú len icja na'?" ²⁴ Ní'irö rë' nupa nacua' ni': "Guli'cúa lu në'ë dumí na', ate' guli'güf'i queë' bönni' na' dë queë' chi cö' dumí." ²⁵ Légaquie' të' lë': "Xan, chidë queë' chi cö' dumí." ²⁶ Ní'irö bubí'ë didza' xángaquie', rnnë': "Rea' libí'ili': Nu rugún dxi'a dxin le do' dë lu në'e, ulu'béaj lu në'e lë na' guta' lu në'e. ²⁷ Ca naca quégaquie' bönni' ni' biti' ta'lé'enë' neda' dxi'a, en biti' gulë'ënnë' inná bé'eda' légaquie', guli'tsöjzxi' légaquie' para ídigaquie' ni, ate' guli'guti légaquie'."

*Len yöl-la' ba zxön razie' Jesús yödzo Jerusalén
(Mt. 21:1-11; Mr. 11:1-11; Jn. 12:12-19)*

²⁸ Cate' budxi gunnë' caní Jesús, buguelë'ë xinözë', sa'yéajë' zaca' yödzo Jerusalén. ²⁹ Cate' bila'dxinë' gala' ga nacuá' yödzo Betfagé, en yödzo Betania, ga naca ra' gu'ado' nazi'ile Gu'á Yaga Olivo, gusöl-lë'ë Jesús chopë' bönni' usëda queë', ³⁰ ate' rë' légaquië':

—Guli'tséaj yödzo'ni' ni' ca dödilö ga zóaru', en cate' idxinli' ni', tsöjxáca'li'-ba' tuba' búrrodo' nága'ba' ni', búrrodo' na' cantu nu ribíani lëba'. Guli'sedxi-ba', en guli'duchë'-ba' quia' ni'. ³¹ Channö zoa nu rinábini libí'ili', inná: “¿Bizx que risédxili'-ba'?", ubí'ili' didza' caní innali': “Xanru' riquinnë'-ba'.”

³² Söjáquië' bönni' usëda queë' na' nasöl-lë'ë, ate' yöjxáca'gaquië'-ba' ca na' chigudxë' Jesús légaquië'. ³³ Cate' gula'sedxë'-ba' búrrodo' na', yugu' bönni' xanba' tē' légaquië':

—¿Bizx que risédxili'-ba' búrrodo' na'?

³⁴ Bulu'bi'ë didza', ta'nnë':

—Xanru' riquinnë'-ba'.

³⁵ Gula'chë'-ba' ga na' zoë' Jesús. Cate' chigula'xóë' yugu' lari' tsölá'a quégaquië' cúdzu'ba' búrrodo' na', bulu'dxië' Jesús cúdzu'ba' lahui lari' na'. ³⁶ Gapa ral-la' tödë' Jesús, gula'chiljë' lari' quégaquië' la' nöza. ³⁷ Cate' chibila'dxinë' gala' ga zoa lidinni que Gu'á Yaga Olivo, lu yöl-la' rudzeja quégaquië' gula'sí légaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxon bila'lé'enë' benë' Jesús. ³⁸ Ta'nnë':

—¡Yöl-la' ba bönni' unná bē' ni zē'ë uláz queë' Xanru' Dios! ¡Yehua' yubá za' le ribequi dxi ládxi'ru'! ¡Yöl-la' ba Dios!

³⁹ Ní'irö yugu' bönni' yudo' fariseo nútsa'gaquië' ladaj bönachi zían ni' tē' Jesús, ta'nnë':

—¡Bönni' Usedi, gudil-la yugu' bönni' usëda quiu'!

⁴⁰ Bubi'ë didza' Jesús, rë' légaquië':

—Rea' libí'ili': Channö ila'cuá' dxië' bönni' ni, yugu' guiöj hualu'í caz zidzaj didza'.

⁴¹ Cate' bidxinë' Jesús gala' ra' yödzo na', en rilé'enë' le, ní'irö ribödxë' que, ⁴² rnnë':

—Raca ládxa'a huanózili' na'a dza le gaca gun ga cuéqui dxi ládxi'li' lahuë' Dios, pero na'a chinagachi' queéli', para cabí ilé'eli' le. ⁴³ Huala'dxín queéli' dza cate' nupa biti' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gu'u libí'ili' lē'alö, ate' yúgu'të lataj idú gásibi'ilö ilúnlenë' libí'ili' gudil-la. ⁴⁴ Ulu'quinnajë' zö'ö run chí'i yödzo queéli', en ilútië' nupa nacuá' lu yödzo ni. Biti' ugá'ana guiöj lahui luzé'e. Yúgu'të lē ni gaca queéli' tu' cabí gúquibe'eli' dza bidë' Dios buduyúë' libí'ili'.

Rulatjë' Jesús lö'a yudo'

(Mt. 21:12-17; Mr. 11:15-19; Jn. 2:13-22)

⁴⁵ Ní'irö guyázië' Jesús lö'a yudo', en gusi lahuë' rubéajë' ní'ilö yúgu'të nupa tuti', en nupa to'o ga naca lö'a yudo'. ⁴⁶ Rë' légaquië':

—Nazúaj lu guichi lá'ayi, rnná: “Lídxá' naca yu'u ga ulu'lidza bönachi Dios”, pero libí'ili' chinunli' le ca tu lídxigaca bönni' gubán.

⁴⁷ Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bē', len bönni' yudo' tu'sédinë', en yugu' bönni' lo que lu yödzo ilútië' Lē'. ⁴⁸ Biti' bulu'dzölinë' naxxi ilútië' Lē', tu' idú ládxi'gaca tu zē'ë nágagaca yúgu'të bönachi xtídzë'.

20

Yöl-la' unná bē' dē lu nē'ë Jesús

(Mt. 21:23-27; Mr. 11:27-33)

¹ Tu dza, cate' ni' rusédinë' Jesús bönachi ga naca chila yudo', en riguixjö'ë didza' dxi'a, bila'dxinë' yugu' bixúz unná bē', en bönni' yudo' tu'sédinë', len bönni' gula tu'zéajni'inë', ga na' zoë', ² ate' tē' Jesús:

—Gudixjö'i' netu'. ¿Bizxi yöl-la' unná bē' dē lu no'o runu' caní? ¿Nuzxi caz budödi lu no'o yöl-la' unná bē' ni'?

³ Bubi'ë didza' Jesús, rë' légaquië':

—Inábida' ca' libí'ili' tu didza', ate' ubí'ili' innali'. ⁴ ¿Nuzxi gusöl-la' Juan ruquilë' bönachi nisa? ¿Naru' Dios, o bönachi?

⁵ Gulún xtídzá'gaquië' la' légacasë' bönni' yudo' na', ta'nnë':

—Channö innaru': Gusöl-lë'ë Dios lē', guië' rë'u: “¿Bizx que biti' guyéajlë'ëli'-në'?”

⁶ Channö guiëru'-në': Gula'söl-lë'ë yugu' bönni' lē', bönachi lu yödzo ni ulu'ladxi' rë'u guiöj, tu' nöziguequi bē'ë didza' Juan na' uláz queë' Dios.

⁷ Ní'irö bulu'bi'ë didza', ta'nnë':

—Biti' nöztu' nuzxi na' gusöl-la' Juan.

⁸ Ní'irö Jesús rë' légaquië':

—Neda' ca' biti' guá' libí'ili' bi yöl-la' unná bē' rúnida' caní.

Yugu' bönni' huen dxin biti' nácagaquië' tsahui'

(Mt. 21:33-44; Mr. 12:1-11)

⁹ Ní'irō la' gusí lotē' Jesús ru'ilenē' bōnachi nacuá' nī' didza'. Rucúdzu'ē didza', rnnē':

—Zoē' tu bōnni' budē'ē yugu' lubá uva lu xiyúē', ate' budōdē' luyú na' lu ná'agaquiē' bōnni' huen dxin para ilún gatsjē' len lē' le ulu'zi'ē, ate' guyijē' zi'tu' ga nī' bugá'anē' xidzé. ¹⁰ Cate' bidxín dza ulu'chibē' uva luyú na', gusól-lē'ē tuē' bōnni' gubáz queē' ga na' nacu'ē huen dxin na' para si'ē uláz queē' que le ulu'zi'ē, pero huen dxin na' gulúndē'ē lē' zi', en bulu'sól-lē'ē lē' cá'asō. ¹¹ Leyúbölō gusól-lē'ē ia'tuē' gubáz queē', ate' légaquiē' gulúndē'ē lē' ca' zi', en gulu'ē dō' queē', ate' bulu'sól-lē'ē lē' cá'asō. ¹² Leyúbölō gusól-lē'ē quégaquiē' bōnni' bunni gubáz queē', ate' bulu'dxiē' ca' lē' huē', en bulu'béajē' lē' ní'ilō luyú na'.

¹³ Ní'irō guzá' ládxē'ē xani luyú na', gunnē': "¿Nacxi guntsa'? Isól-la'a xzí'ini caza' nadxí'ida'-bi' quégaquiē'. Cate' ila'lē'enē'-bi', nadxi ca' ilunē'-bi' bal." ¹⁴ Ní'irō, cate' yugu' bōnni' huen dxin na' bila'lē'enē'-bi', gulún xtídza'gaquiē' la' légacasē', ta'nnē': "Bi'i ni guequi queēbi' luyú ni. Gulí'dá, gútiru'-bi', para guequi queēru' le ral-la' guequi queēbi'."

¹⁵ Bulu'béajē'-bi' ní'ilō luyú na', en gulútiē'-bi'.

'Na'a, ¿nacxi caz' queē' xani luyú na' quégaquiē'? ¹⁶ Guídē', en gútiē' yugu' huen dxin na', ate' udōdē' luyú queē' lu ná'agaca bōnachi yúbölō.

Cate' bōnachi nacuá' nī' bila'yōni lē' ni, gula'nnē':

—¿Inná Dios biti' gaca caní!

¹⁷ Ní'irō buyúē' Jesús légaquiē', rnnē':

—¿Bizxi sa'yéaj lē' na' nazúaj lu guichi lá'ayi, rnna:

Guiōj na' gula'ru'unē' bōnni' huen zō'ō,

guiōj ni chinaca guiōjlen squin zō'ō?

¹⁸ Nútí'tēs nu ibixi lahui guiōj ni, quítsaj nu na', ate' nu bōnni' tsōjbága' guiōj ni lē', uzuzuxaj lē'.

Ca naca dumí ta'guixxaj lázagaca bōnachi

(Mt. 21:45-46; 22:15-22; Mr. 12:12-17)

¹⁹ La' dza ní'isō, yugu' bixúz unná bē' len bōnni' yudo' tu'sédinē' gula'zóa gula'bō'ē ila'zōnē' Jesús, tu' téquibe'enē' gunnē' quégaquiē' lē' na' bucúdzu'ē didza', pero guládxinē' bi ilún bōnachi zían nacuá' nī'. ²⁰ Ní'irō bulu'yúeniē' Jesús, en gula'sól-lē'ē yugu' bōnni' para ulu'béajē' Lē' didza', bōnni' ulu'lu'i cuíngaquiē' ca bōnni' tsahui', para ilunē' ga bi innē' Jesús, para gaca ulu'dōdē' Lē' lu nē'ē bōnni' rinná bé'enē' uláz queē' César. ²¹ Para ilunē' caní, gula'nábinē' Jesús, ta'nnē':

—Bōnni' Usedi, nōztu' rño' le nácatē, en rusédinu' le nácatē, en biti' ruchi'a rusōrōu' ca naca le tu'lu'isō lahui bōnachi, pero idútē li naca ca rusédinu' xibá queē' Dios. ²² Gudíxjōi' netu'. ¿Naru' run bayudxi quixxaj laztu' queē' César, bōnni' Roma rinná bē'ē, o cabí?

²³ Réquibe'enē' Jesús le té'ēnnē' ilunē' queē', ate' rē' légaquiē':

—¿Bizx que rizi' bē'ēli' neda'? ²⁴ Buli'lu'itsōqui' neda' tu dumí ridá. ¿Nuzxi lahui da' lē'ē ni, en nuzxi le nazúaj nī?

Bulu'bi'ē didza', ta'nnē':

—Queē' César na'.

²⁵ Ní'irō Jesús rē' légaquiē':

—Buli'nódzaj queē' César le nequi queē' César, ate' queē' Dios le nequi queē' Dios.

²⁶ Biti' guca ilunē' ga bi innē' Jesús para gaca ulu'zéguiē' Lē' didza' lógaca bōnachi zían na', pero bulu'bábinē' ca naca didza' bubi'ē, ate' bulu'sayaj ruá'agaquiē'.

Ca gaca quégaca nupa ulu'bán lu yól-la' guti

(Mt. 22:23-33; Mr. 12:18-27)

²⁷ Ní'irō yugu' bōnni' yudo' saduceo, nupa na' ta'nná biti' ulu'bán nupa chinátigaca, bila'dxinē' nī', ate' gula'nábinē' Jesús, ta'nnē':

²⁸ —Bōnni' Usedi, Moisés buzúajē' queēru' lu guichi, le rnna: "Channō gátíē' nu bōnni', ate' ugá'anau nigula queē', en channō cantu nu zoa bi'i queē', ní'irō bi'i bōchi'bi' ral-la' sí'ibi'-nu nigula queē' na', para uzóabi' bi'i queēbi' bōchi'bi' na' gútibi'." ²⁹ Gula'cuá'abi' gadxi bi'i bōnni' náacagabi' bōchi'bi', ate' bi'i zí'aló na' butsaga ná'alēnbi' bi'i nigula, en gútibi', biti' zóabi' bi'i queēbi'. ³⁰ Ní'irō bi'i buropi na' butsaga ná'alēnbi'-nu nigula na', ate' gútibi' ca' bi'i ni, biti' zóabi' bi'i queēbi'. ³¹ Butsaga ná'alēnbi'-nu bi'i bunni na', ate' la' tuz ca gulunbi' igádxitēbi', ate' gulátibi', biti' zóabi' bi'i quégacabi'. ³² Ga búdxitē, gútinu ca' nigula na'. ³³ Na'a, cate' ulu'bán nupa chinátigaca, ¿núzxilōbi' guéquinu nigula na' queēbi', tu' bulu'tsaga ná'alēnbi'-nu igádxitēbi'?

³⁴ Ní'irō bubi'ē didza' Jesús, rē' légaquiē':

—Tu'tsága ná'agaca bōnachi dza ni zóaru' na'a, en tu'nódzjē'-bi' xzí'inigaquiē' para ulu'tsaga ná'agacabi'. ³⁵ Na'a, nupa náacagaca lesaca' ulu'bán lu yól-la' guti, en tsōjcuá' yódzölōi' si' gata', biti' ilún yól-la' rizóalen nigula, en biti' ulu'tsaga ná'agaca. ³⁶ Caní gaca, tu' cabirō ilati nupa na' ulu'bán lu yól-la' guti, pero iláacagaca ca náacagaquiē' gubáz lá'ayi queē'

Dios, en iláčagaca xzí'ini cazë' Dios. ³⁷ Ca na' ral-la' ulu'bán nupa chinátigaca, ruluf'inë' rë'u Moisés caz ga na' nazúaj lu guichi ca naca que yaga yôtsi' régui, ga ni' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob. ³⁸ Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bônachi, sal-la' gualti luyú ni.

³⁹ Ní'irö bulu'bi'ë didza' bal-lë' bönni' yudo' usedi, ta'nnë':

—Bönni' Usedi, dxí'ado' gunnó'.

⁴⁰ Bítirö bulu'rúguinë' ila'nábinë' Lë' didza'.

¿Nuzxi xzí'ini náquië' Cristo?

(Mt. 22:41-46; Mr. 12:35-37)

⁴¹ Ní'irö Jesús rë' légaquië':

—¿Nacxi caz na' ta'nnë': “Cristo náquië' xzí'inë' David”? ⁴² David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

“Gurö'i cuita lë'a ibëla

⁴³ cate' gunra' ga ulu'zechu xzíbigaca lo' nupa ta'dá'baga' Li'.”

⁴⁴ David caz na' gunné' queë' náquië' Xanë'. ¿Nacxi caz naca, rnnali' libí'ili' náquië' xzí'inë'?

Jesús ruzéqui'ë diza' bönni' yudo' tu'sédinë'

(Mt. 23:1-36; Mr. 12:38-40; Lc. 11:37-54)

⁴⁵ Tsanni ni' yúgu'të bônachi nacuá' ni' tu'zë náagaca Jesús, rë' yugu' bönni' usëda queë':

⁴⁶ —Gulí'gún chí'i cuinli' quégaquië' bönni' yudo' tu'sédinë', tu' ta'yaza ládxí'gaquië' ta'dë' nácugaquië' lari' tunna, en tē'ennë' ulu'lidza bônachi légaquië' xzön gapa naca lu yë'eyi, en ta'yaza ládxí'gaquië' ca' ta'bō'ë lataj lo gapa tu'dubë' tu'sédë' queë' Dios, en gapa ta'bō'ë tahuë'. ⁴⁷ Ta'gúë' lidxigacanu nigula uzëbido', ate' para ulu'lufi' tsahui' cuíngaquië', xidzé tu'lidzë' Dios. Yugu' bönni' ni, yénni'tërö gunë' Dios ga ila'gui' ila'záquië'.

21

Gun le gulú'unu tu nigula yechi' lahuë' Dios

(Mr. 12:41-44)

¹ Ga na' zoë' Jesús chila yudo', guchisa lahuë', en rilé'enë' yugu' bönni' dë' yöl-la' tsahui' quégaquië', ta'gu'ë dumí lu guí'ina que dumí gun que yudo'. ² Bilé'enë' ca' tu nigula yechi' uzëbido', rigú'unu chopa dumí lásido', le nazáca'gaca láti'do'os. ³ Rnnë' Jesús:

—Le nácatë rea' libí'ili', tu le xzöntërö gulú'unu nigula yechi' uzëbido' ni ca ia'zica'rö bônachi na' ta'gu'ë dumí. ⁴ Yúgu'të, tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queënu gulú'unu idútë le dë queënu, le ral-la' gáhuinu.

Rigúxjö'ë Jesús ca ulu'sunítië' yudo'

(Mt. 24:1-2; Mr. 13:1-2)

⁵ Nacuá' ni' nupa tuí' didza' ca naca que yudo' na', ca na' nazí'i biquitaj que, yugu' guiöj nazácalë'egaca, en yugu' gundo' nácagaca lachi, ate' Jesús rë' légaquië', rnnë':

⁶ —Yúgu'të lë ni rilé'eli', huadxín dza cate' bítirö ugá'ana guiöj lahui luzë'e ni, tu' ulu'suníti bônachi yudo' ni.

Le ilaca bë' cate' si' idxín dza údxí

(Mt. 24:3-28; Mr. 13:2-23)

⁷ Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

⁸ Bubi'ë didza' Jesús, rnnë':

—Gulí'gún chí'i cuinli', para cabí nu si' ye'e libí'ili', tu' ila'lá'gaquië' bönni' zían, en ila'zí'i lágaquië' ca lea' neda', ila'nnë' nácagaquië' Cristo, en ila'nnë': “Chizá' gala' dza údxí.” Neda' rea' libí'ili': Biti' tséajlenli' légaquië'. ⁹ Cate' yönili' raca gudil-la, en ta'dá'baga' bônachi yúlalui', bití' gadxi idzóbili', tu' run bayudxi ilaca le caní, pero bití' zuitëni dza údxí.

¹⁰ Ní'irö rë' ca' légaquië':

—Til-la tu yödzo len ia'tú yödzo, ate' bônachi tu ga nu rinná bë' ila'díl-lalen bônachi ia'tú ga nu rinná bë'. ¹¹ Tödígaca budó' xzu', ate' zían lataj gaca gubín, en ilatsaj yödzhuhë' xzön. Ila'lá' lahui lúxiba le ilún gadxi bônachi, en le ilaca bë'.

¹² “Zí'atëlö cate' si' ilaca lë ni, ila'zön bônachi libí'ili', en ila'bía ládxí'gaca libí'ili'. Ila'chë'ë libí'ili' gapa tu'dubë' tu'sédë' queë' Dios para ilútië' libí'ili', en ila'gu'ë libí'ili' lidxi guíë. Ila'chë'ë libí'ili' lógaquië' bönni' ta'nná bë'ë, en lógaquië' bönni' lo, tu' dá'ali' neda'. ¹³ Gaca caní queëli' para séqui'li' gunli' ba nalí quia' neda'. ¹⁴ Tsutsu gulí'gún ládxí'li', para cabí cuéqui ícjali' zí'alö nacxi innali' uláz queëli', ¹⁵ tu' gunna' queëli' didza' ubí'ili', en yöl-la' réajni'i, para cabí gaca ulu'cul-lë' libí'ili', en para cabí gaca bi ila'nnë' que xtídza'li' bönni' ni'

biti' ila'lé'ené' libí'ili' dxi'a. ¹⁶ Ní'irō xuz quézili' ulu'dödē' libí'ili', en cá'anqueze yugu' bönni' bōchi' quézili', en yugu' di'a dza que quézili', en yugu' bōchi' luzē'e quézili', ate' ilútiē' bál-lali'. ¹⁷ Yúgu'tē bōnachi ulu'zóa libí'ili' tsölá'alō tu' dá'alí' neda', ¹⁸ pero biti' iníti nitú guitsa' ícjali'. ¹⁹ Channō ugá'anali' tsutsu, idéli'li' yöl-la' na'bán idú.

²⁰ 'Cate' ilé'eli' bönni' rōjáquiē' gudil-la nagú'ugaquiē' lē'a Jerusalén, inōzili' chibidxín dza iníti yōdzō ni. ²¹ Ní'irō nupa nacuá' luyú Judea ral-la' ila'zxunnaj ni, en tsōjaca gapa naca guf'ado', ate' nupa nacuá' lu yōdzō ni ral-la' ila'rúaj ni, ate' nupa nacuá' la' guixi', biti' ral-la' ulu'dxín lu yōdzō ni. ²² Yugu' dza ni' Dios gunē' xíguia' nupa nacuá' yōdzō ni para gaca yúgu'tē le nazúaj lu guichi lá'ayi ca ral-la' gaca quégaquiē'. ²³ Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbi', en nigula tu'gádxí-nu-bi' bí'ido', tu' ila'gui'i ila'záca'da' bōnachi nacuá' ni', ate' Dios gúndē'ē bōnachi ni' xíguia'. ²⁴ Ilátiē' zianē' lu gudil-la na', ate' ila'chē'ē ia'bal-lē' nadzúngaquiē' ga ila'dxinē' idútē yōdzōlió, ate' yōdzō Jerusalén ni, ulu'léaj ulu'libē' le bönni' zi'tu', cate' izá'arō dza quégaquiē'.

Le ilaca bē' si' huōdē' Bönni' Guljē' Bōnachi

(Mt. 24:29-35, 42-44; Mr. 13:24-37)

²⁵ Gunnē' ca' Jesús:

—Ní'irō ila'cuá' le ilaca bē' lu gubidza, en lu beo', en yugu' lu bōlaj lúzxiba, ate' luyú ni ulu'chixi bōnachi, en iládxiguequi, tu' yōn chi'i guziú' yu que nísado', en que le riyasa ridxía nisa na'. ²⁶ Ulu'dú ládxigaca lu yöl-la' radxi quéguequi tu' ila'zá' ládxigaca quégaca le ral-la' ilaca lu yōdzōlió, en ila'zxizi le nalá'gaca lúzxiba. ²⁷ Ní'irō ila'lé'ené' neda', Bönni' Guljē' Bōnachi, guída' lu bōaj lúzxiba, dē lu na'a yöl-la' unná bē', ate' ilá' lahui yöl-la' zxōn quia'. ²⁸ Cate' isí lo ilaca lē ni, buli'tipa ládxili', en guli'chisa loli', tu' chizóa udxina' neda', para huó'ua' libí'ili'.

²⁹ Jesús gudxē' ca' légaquiē' tu le bucúdzu'ē didza', rnnē':

—Buli'yútsōca' ca raca que yaga higo, en que bítitēs yaga yúbölō. ³⁰ Cate' rilé'eli' ta'lén ni'a nē'e huē'ēnido', nōz quézili' chizá' gala' cusu ba. ³¹ Lēasca' caní, cate' ilé'eli' chitaca yugu' lē ni, inōzili' chizá' gala' dza idinná bē'ē Dios luyú ni.

³² 'Le nácátē rea' libí'ili', biti' ilátigaca bōnachi ila'cuá' dza ni' cate' ilaca yúgu'tē lē ni. ³³ Ila'dōdi que lúzxiba, en que luyú ni, pero xtídza'a, biti' tōdi cá'asō, tu' idxín caz ca rñna.

³⁴ 'Guli'gún chi'i cuinli' para cabí guí'ili' lataj tsaza icja ládxí'do'oli' le gun ditaj libí'ili', lē na' naca yöl-la' rágulē'e, en yöl-la' rizudxi, en yöl-la' ruúbi ruguí'i, para cate' idxín dza ni', cabí sōali' niti ladxi', ³⁵ en para cabí gaca queéli' ca tu le rizōn bōnachi, ca naca le gaca quégaca yúgu'tē bōnachi nacuá' idútē yōdzōlió. ³⁶ Que lē ni na', guli'sóa ban ladxi', en buli'lídzatica'sē' Dios, para gaca uláli' lu lē na' ral-la' ilaca, en para cabí utuí'ili' cate' idxinli' lahua' neda', Bönni' Guljē' Bōnachi.

³⁷ Lahui' dza rizōē' Jesús chila yudo', rusédinē' bōnachi, ate' chi'i dzō'ölō rirúajē' ni', en rejē' lu guí'ado' nazí'i le Guí'a Yaga Olivo. ³⁸ Yugu' zila bila'dxín yúgu'tē bōnachi ga zoē' Jesús chila yudo' para ulu'zē nágagaca xtídzē'ē.

22

Tun xtídza'gaquiē' ilútiē' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Cate' chizóa idxín laní cate' tahuē' yōta xtila cabí nazí'i cúa zi que, nazí'i le Pascua laní na', ² bulu'dubē' yugu' bixúz unná bē' len bönni' yudo' tu'sédinē'. Ta'zóa ta'bō'ē ilútiē' Jesús, pero biti' gula'zéqui'nē' tu' tádxinē' bi ilún bōnachi.

³ Ní'irō Satanás tu' xihuí' yōjtsaga Judas. Judas lē' ca' Iscariote, en nababē' idxínnutē' gubáz nasöl-lē'ē Cristo. ⁴ Guyijē' Judas na', yōjē'lenē' didza' yugu' bixúz unná bē', en bönni' dē lu ná'agaquiē' que yudo', nacxi gunē' para udōdē' Jesús lu ná'agaquiē'. ⁵ Bulu'dzéjanē' bönni' yudo' na', en gula'zi' lu ná'agaquiē' ulu'nōdzjē' queē' dumí. ⁶ Raza ládxē'ē Judas lē ni, ate' rizóa ribō'ē udōdē' Jesús lu ná'agaquiē' bagáchi'sō.

Le ráguru' le rusá' ládxí'ru' ca gútiē' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidxín dza na' tahuē' yōta xtila cabí nazí'i cúa zi que, cate' ral-la' ilútiē'-ba' bō'cu' zxila' le tahuē' dzō' Laní Pascua. ⁸ Jesús gusöl-lē'ē Pedro, en Juan, rnnē':

—Guli'tséaj, guli'tsōjpá'a queēru' le gáguru' dzō' Laní Pascua.

⁹ Tē' Lē':

—¿Gaxzi rē'ēnu' tsōjpá'atu' queēru'?

¹⁰ Jesús rē' légaquiē', rnnē':

—Buli'yútsōca', cate' tsú'uli' lu yōdzō ni, irúajē' tu bönni' dutságuiē' libí'ili', sōjnu'ē tu rō'ō nisa. Guli'tséajlenē' ga idxintēli' yu'u ga tsáziē'. ¹¹ Guli'guíē' xan yu'u na': "Bönni' Usedi rē' li':

¿Gazxi zoa yu'u laní ga gágulena' yugu' bönni' usëda quia' dzö' Laní Pascua?" ¹² Ní'irö uluf'inë' libí'ili' tu yu'u zxön xitsá' ga nì' chinabá'a. Bulí'pá'a nì' le gáguru'.

¹³ Ní'irö yöjáquië', en yöjáca'gaquië' ca na' chigudxë' Jesús légaquië', ate' bulu'pë'ë nì' le ilahuë' dzö' Laní Pascua.

¹⁴ Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bó'lenë' Lë' tsözxön. ¹⁵ Ní'irö Jesús rë' légaquië':

—Gúcada' ládxa'a gágulena' libí'ili' tsözxön xtsö' nì' zí'atëlö cate' si' qui'i saca'a, en gátia'.

¹⁶ Rea' libí'ili': Biti'rö gahua' lë nì cate' idxinrö dza gaca le rulu'f'isö xtsö' nì ga nì rinná bë'ë Dios.

¹⁷ Gudélë'ë Jesús tu xziga'do', en gudxë' Dios: "Xclenu'." Ní'irö rë' légaquië':

—Gulí'si' lë nì, en gulí'guí'aj latí' huéaj, ¹⁸ tu' rea' libí'ili': Biti'rö guí'ja' xisi uva cate' idxinrö le rinná bë'ë Dios.

¹⁹ Ní'irö gudélë'ë yöta xtila, en gudxë' Dios: "Xclenu'." Gudödi nì' buzuxzjé' le, en bë'ë que queégaquië', rnnë':

—Lë nì naca idütë le naca' le rudöda' uláz queëli'. Gulí'gún caní para usá' ládxi'li' neda'.

²⁰ Cate' budxi gulahuë', lësca' caní bë'ë didza' que xziga'do' na', rnnë':

—Xziga'do' nì rulu'f'i ca naca didza' cubi rucá'ana tsahuí', ate' rön quia' run tsutsu le, rön na' ilalaj nì'a queëli'.

²¹ 'Na'a, bönni' na' udödë' neda' lu ná'agaca bönachi rö'ë rágulenë' neda' tsözxön. ²² Le nácatë huayija' ga ilütie' neda', Bönni' Guljé' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

²³ Ní'irö gula'sí lógaquië' ta'nábinë' Lë' tu tuë', ta'nnë':

—¿Núzxilötu' nu gun caní?

Tu'i xtída'gaquië' núzxilögaquië' gáquië' lo

²⁴ Ní'irö gulu'ë didza' la' légacasë' núzxilögaquië' idéli'në' lataj lo. ²⁵ Jesús gudxë' légaquië': —Yugu' bönni' unná bë' tu'gunë' dxin yöl-la' unná bë' quégaquië', ta'nná bé'enë' bönachi, ate' nupa nì dë lu ná'agaca yöl-la' unná bë', légaquië' bönni' tácalen. ²⁶ Libí'ili' bití' ral-la' gunlí' caní, pero nu naca lo ládjali' ral-la' gaca ca nu naca cuíd'tërö, ate' nu rinná bë' ral-la' gaca ca nu run dxin quégaqui' luzë'e. ²⁷ ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

²⁸ 'Libí'ili' nì guzóalenli' neda' cate' nì' bi guca quia', yugu' le gula'z' bë' neda'. ²⁹ Que lë nì na' udöda' lu ná'ali' tu ga inná bë'ëli', ca na' benë' Xuza', budödë' lu na'a ga inná bë'a neda'. ³⁰ Caní guna' para gaca cö'öli', en guí'aj gágulenli' neda' ga nì inná bë'a, ate' cö'öli' xilataj cázali' ga uchi'a usöröli' idxinnu cö' xzí'ini xí'sóë' Israel.

Rnnë' Jesús innë' Pedro bití' núnbë'ë Lë'

(Mt. 26:31-35; Mr. 14:27-31; Jn. 13:36-38)

³¹ Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihuí' libí'ili', para urixi udödi libí'ili' ca nu rurixi rudödi xzoa' xtila, ³² pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlë' quiu' neda'. Na'a, cate' huóacu' quia', butipa ládxi'gaquië' böchi' luzó'o.

³³ Pedro rë' Lë':

—Xan, chizóa' sá'lëna' Li', calëgasö tseja' lidxi guíë, pero lësca' gátilëna' Li'.

³⁴ Jesús rë' Lë':

—Pedro, rea' li': Zí'alö cödxiba' böra na'a, chigudá'bagu'u tsonna luzuí, innó' cabí núnbë'u neda'.

Le benë' Jesús cate' chizóa' ilütie' Lë'

³⁵ Jesús gunábinë' légaquië', rnnë':

—Cati' gusöl-la'a libí'ili' cabí nuá'ali' yöxaj yöta, en calëga buzudi dumí, en calëga chopá cö' xiráchuli', ¿naru' bi biyadzaj queëli'?

Légaquië' ta'nnë':

—Bití' bi.

³⁶ Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu bití' dë que guíë tuchi' ral-la' guti' lari' rixóa yeni, en si' tu guíë tuchi'. ³⁷ Rea' libí'ili': Run bayudxi gaca quia' lë na' nazúaj lu guichi lá'ayi, rnná: "Gulunë' queë' ca tunë' quégaca nupa tua' dö'", ate' ilaca yúgu'të le nazúajgaca lu guichi ca ral-la' gaca quia'.

³⁸ Ní'irö légaquië' ta'nnë':

—Xan, nì dë chopá guíë tuchi'.

Lë' rë' légaquië':

—Chinaca.

Jesús rulidzë' Dios la' yëla Getsemani
(Mt. 26:36-46; Mr. 14:32-42)

³⁹ Ní'irō birüajë' Jesús, en ca run cazë' sa'yéajë' lu Guí'a Yaga Olivo, ate' yugu' bönni' usëda queë' sôjâcalenë' Lë'. ⁴⁰ Cate' bila'dxinë' nî', Jesús rë' légaquië', rnnë':

—Buli'lidzë' Dios, inábili-në' cabí gata' lataj si' bë' tu' xihui' libí'ili'.

⁴¹ Ní'irō Jesús guzë'ë ga na' nacu'ë, en gudödë' ia'lati' tsca ga ridxín tu guiöj rirú'uniru', ate' nî' buzóa zxië', en rulidzë' Dios. ⁴² Rnnë':

—Xúz, channö rë'ënu', bucuása ga zoa' lë na' ral-la' quí'i saca'a, pero calëga ca rë'ënda' neda', pero ca rë'ënu' Li' gunu'.

⁴³ Ní'irō buluí'i lahuë' gubáz lá'ayi queë' Dios, zë'ë yehua' yubá, ate' butipë' ládxë'ë Jesús.

⁴⁴ Lu yöl-la' risëbi ladxí' queë', idú ládxë'ë Jesús bulidzë' Dios, ate' nisa yósa queë' guca ca rôn raba' luyú.

⁴⁵ Cate' budxi bulidzë' Dios, guyasë', en bóajë' ga na' nacu'ë bönni' usëda queë', ate' duxáquië' légaquië' tásie' tu' tu'hu'ínigaquië'. ⁴⁶ Ní'irō Jesús rë' légaquië':

—¿Rásitsali'? ¡Guli'chasa, en buli'lidzë' Dios! Inábili-në' cabí gata' lataj si' bë' tu' xihui' libí'ili'.

Ta'zönë' Jesús

(Mt. 26:47-56; Mr. 14:43-50; Jn. 18:2-11)

⁴⁷ Tsanni nî' ru'ë didza' Jesús, la' bila'dxintë' bönni' zían nî', ate' Judas, bönni' na' nababë' idxínnuë' bönni' usëda queë' Jesús dzáquië' légaquië', ate' nanóruë' légaquië' bönni' zían na'. Gubígui'ë ga zoë' Jesús para utsaga lahuë' Lë'. ⁴⁸ Ní'irō Jesús rë' lë':

—Judas, ¿narú' rudóditso' caní neda', Bönni' Guljë' Bönachi, rutsaga lo' neda'?

⁴⁹ Cate' yugu' bönni' na' nacuá'lenë' Jesús bila'lé'enë' ca na' raca queë' Lë', tē' Lë':

—Xan, ¿narú' guí'itu' légaquië' guíë tuchi'?

⁵⁰ Tuë' bönni' usëda queë' Jesús benë' huë' guídi náguië' bönni' huen dxin queë' bixúz lo. Burixë' guídi náguië' ibëla. ⁵¹ Jesús rnnë':

—Chinaca na' a. Tsca' gaz.

Gudanë' Jesús guídi náguië' bönni' huen dxin na', en bunë' le. ⁵² Ní'irō rë' yugu' bixúz unná bë', en bönni' dë lu ná'agaquië' que yudo', en bönni' gula tu'zéajni'inë', bönni' na' bití' ta'lé'enë' Lë' dxi'a, rnnë':

—¿Narúajtsali' nuá'ali' guíë tuchi', en yaga para sönli' neda' ca runli' rizönli-në' gubán?

⁵³ Yugu' dza guzóalen caza' libí'ili' chila yudo', ate' bití' bi benli' quia', pero na'a chibidxin dza queëli', le naca dza dë lu nē'e nu na' zoa lataj chul-la.

Rnnë' Pedro: "Biti' núnbë'a-në' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'irō gula'zönë' Jesús, en gula'chë'ë Lë' ga na' bulu'sudxinë' Lë' lidxë' bixúz lo. Pedro yójnahuë' Jesús zi'tu' zí'tu'sö. ⁵⁵ Cate' nî'a nē'ë bixúz lo chigula'béquië' guí' lö'a lidxë' bixúz lo na', gula'bö'ë idú gásibi'llö ra' guí' na', ate' Pedro guró'lenë' légaquië' tsözxön. ⁵⁶ Cate' tubi' bi'i nigula huen dxin bilé'ebi-në' Pedro, nî' rō'ösë' ra' guí', buyubi' lë', en rnnabi':

—Bönni' nî' dë'ë ca' Jesús.

⁵⁷ Gudá'baguië' Pedro, rnnë':

—Nigúla, bití' ca' núnbë'a-në' bönni' na'.

⁵⁸ Ia'lati' gudzé ia'túë' bönni' bilé'enë' Pedro, ate' rnnë':

—Li' do'o ca' légaquië'.

Pedro gunné':

—Bönni', calëga neda'.

⁵⁹ Ia'lati'sö gudzé, gunné' ia'túë' bönni':

—Le nácatë bönni' nî' dë'ë Jesús, tu' náquië' bönni' Galilea.

⁶⁰ Ní'irō Pedro gunné':

—Bönni', bití' nózda' bizxi na' ru'u didza' que.

Tsanni nî' ru'ë didza' nî, la' guródxitëba' böra. ⁶¹ Ní'irō buécjë' Xanru', en ruyúë' Pedro, ate' yójenë' Pedro xtídzë'ë Xanru', ca na' gudxë' lë': "Zí'alö códxiba' böra na'a, lí' chigudá'bagu'u tsonna luzuí, innó' bití' núnbë'u neda'." ⁶² Burúajë' Pedro ní'ilö, ate' rôn caz guródxë'.

Tu'titjë' Jesús

(Mt. 26:67-68; Mr. 14:65)

⁶³ Yugu' bönni' na' nazöngaquië' Jesús bulu'titjë' Lë', ate' gula'guiné' Lë'. ⁶⁴ Ní'irō bulu'sayjë' lahuë' Jesús, ate' gula'gápë'ë lahuë', en gula'nábinë' Lë', ta'nnë':

—¡Gunnëya'atsóca'! ¿Nuzxi na' gudapa' Li'?

⁶⁵ Ziánrö ca' gula'nnë' queë' le gulu'ë dö' queë'.

Ridxinë' Jesús lógaquie' bönni' yudo' tu'chi'a tu'söröë'
(Mt. 26:59-66; Mr. 14:55-64; Jn. 18:19-24)

⁶⁶ Cate' chizá' rení' dza na', bulu'dubé' bönni' gula tu'zéajni'inë' bönachi judío len yugu' bixúz unná bë', en bönni' yudo' tu'sedinë', ate' gula'chë'ë Jesús lógaquie' bönni' yudo' tu'chi'a tu'söröë', ate' gula'nábinë' Lë', ⁶⁷ ta'nnë':

—Gudíxjöi' netu'. ¿Naru' nactso' Li' Cristo?

Jesús rë' légaquie':

—Channó guía' libí'ili' naca' Cristo, biti' tséajlë'ëli' neda', ⁶⁸ en channó inábida' libí'ili' tu didza', biti' ubí'ili' didza', en biti' usanli' neda'. ⁶⁹ Na'a isí lo, neda', Bönni' Guljé' Bönachi, có'a cuita lë'ë ibëla Dios, nápatërë' yöl-la' unná bë'.

⁷⁰ Gula'nábinë' Lë' yúgu'të', ta'nnë':

—¿Naru' nactso' Li' Zxi'inë' Dios?

Lë' gudxë' légaquie':

—Le nácasö rnnali'.

⁷¹ Ní'irö ta'nnë':

—¿Núzxirö naquíniru' nu gun ba nali' queë'? La' rë'usö chibiyóniru' didza' ru'ë.

23

Ridxinë' Jesús lahuë' Pilato, bönni' rinná bë'ë uláz queë' César
(Mt. 27:1-2, 11-14; Mr. 15:1-5; Jn. 18:28-38)

¹ Ní'irö gulazuinë' yúgu'të bönni' zían ni', ate' gula'chë'ë Jesús lahuë' Pilato, ² ga ni' gula'sí lógaquie' tu'zéguie' Lë' didza', ta'nnë':

—Bönni' ni, budzölitu' ca runë'. Runë' ga ta'dá'baga' bönachi uládz queëtu' yúlahui', en ruzáguë'ë xinözigaca nupa ta'guíxaj laz ruquíxjé' César, en rnnë' lë cazë' náquie' Cristo, bönni' ral-la' inná bë'ë.

³ Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rnno'.

⁴ Ní'irö Pilato gudxë' yugu' bixúz unná bë', en bönachi nacuá' ni', rnnë':

—Biti' bi rudzöldida' le naca xíguia' nunë' bönni' ni.

⁵ Ní'irö gulunrë' tsutsu xtídza'gaquie', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë runë' ca' ni.

Ridxinë' Jesús lahuë' Herodes, bönni' rinná bë'ë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquie' channó náquie' Jesús bönni' Galilea. ⁷ Cate' gunózinë' nababë' Jesús ga ni' rinná bë'ë Herodes, gusöl-lë'ë Lë' lahuë' Herodes na', tu' zoë' ca' Herodes Jerusalén yugu' dza na'.

⁸ Cate' Herodes na' bilé'enë' Jesús, budzéjanë', tu' chiguca xidzé rë'enë' ilé'enë' Lë' tu' chibiyönnë' le zían ca naca queë' Jesús, en runë' löza ilé'enë' tu yöl-la' huáca gunë'. ⁹ Ní'irö Herodes gunábinë' Jesús le zían, pero Jesús biti' bi didza' bubi'ë. ¹⁰ Nacu'ë ca' ni' yugu' bixúz unná bë', len bönni' yudo' tu'sedinë', ate' bulu'zéguie'ë Jesús didza'. ¹¹ Ní'irö Herodes, en bönni' queë' röjáquie' gudil-la bulu'ca'anë' Jesús cá'asö, en para ulu'titjé' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúböölö bulu'sudxinë' Lë' lahuë' Pilato. ¹² Dza na' bulu'dzáguie' dxi'a Pilato, en Herodes, tu' zí'alö gula'lé luzë'ë tuë' ia'túë'.

Ta'chúguie' queë' Jesús gátie'

(Mt. 27:15-26; Mr. 15:6-15; Jn. 18:39-19:16)

¹³ Ní'irö butubë' Pilato yugu' bixúz unná bë', en bönni' dë lu ná'agaquie', en bönachi lu yödzo, ¹⁴ ate' rë' légaquie':

—Dujuá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, biti' bi budzöldida' le naca xíguia' nabáguë'ë, yugu' lë na' ruzéguili'-në' didza'. ¹⁵ Cate' gusöl-la'a libí'ili' lahuë' Herodes, biti' bi budzölinë' le benë' bönni' ni le naca xíguia' nabáguë'ë para nu ichugu queë' gátie'. ¹⁶ Na'a usaca' zí'a-në', ate' tödi na' usana'-në'.

¹⁷ Run bayudxi tu le gunë' Pilato, usanë' lu ná'agaca bönachi tuë' bönni' nadzunë' cate' raca laní na', ca na' run cazë'. ¹⁸ Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busanë' queëtu' Barrabás.

¹⁹ Nadzunë' Barrabás na' lidxi guíe' tu' gudíl-lalenë' yúlahui' lu yödzo' na', en tu' bëtië' bönachi. ²⁰ Bulidzë' Pilato légaquie' leyúbölö, tu' rë'enë' usané' Jesús. ²¹ Leyúbölö gulu'ë zidzaj didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

²² Ní'irö Pilato gudxë' légaquie' le bunní luzuí, rnnë':

—¿Bizxi caz le ruá' dö' benë' bönni' ni? Biti' bi budzölida' nunë' le run ga nabáguë'ë xíguia' gátie'. Usaca' z'i'a-në', ate' ní'irö usana'-në'.

²³ Zidzajrö gulu'ë didza', ta'nabë' tē'ë Jesús lë'e yaga cruz. Tu' gula'bödxi'ë yenni' yugu' bönni' na', en yugu' bixúz unná bë', gula'déli'në' gaca ca na' tē'ennë'. ²⁴ Ní'irö Pilato guchúguie' queë' Jesús, para gaca queë' ca na' ta'nabë'. ²⁵ Busanë' quégaquie' bönni' na' nadzunë' lidxi guíe' tu' gudíl-lalenë' yúlahui', en bëtië' bönachi, bönni' na' chígula'nabë', ate' budödë' Jesús para gaca queë' ca na' tē'ennë'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19:17-27)

²⁶ Cate' ni' ta'ché'ë Jesús tsöjdá'gaquie' Lë' lë'e yaga cruz, gula'zönë' Simón, bönni' yödzo' Cirene, suzë'ë la' guixi', ate' gula'xóë' yen xzicjë' yaga cruz na' para gu'ë le, en tsejë' cüdzu'lë' Jesús.

²⁷ Bönachi zían, enca' yugu' nigula söjnógaca Jesús, ta'bödxi'nu nigula na', en ta'bödxi yéchi'nu queë' Lë'. ²⁸ Ní'irö buécjë' Jesús, en ruyúë' légacanu, ate' rë' légacanu:

—Libí'ili' nigula Jerusalén. Biti' cödxi'li' quia' neda', pero guli'cödxi que quézili', en quégacabi' xzi'inili' ²⁹ tu' huadxin dza ila'nná: “Bica' bágaca yugu' nigula huödx, en nigula bití' guluá'anu-bi' b'í'ido', en bití' bulu'gádxí'nu-bi' b'í'ido'.” ³⁰ Ní'irö ila'sí lógaca ila'nná bönachi, ilë' yugu' guí'a sibi: “Guli'dubága' netu”, en ilë' ca' yugu' guí'ado': “Guli'cachi' netu.” ³¹ Channö caní tunë' quia' neda', naca' ca tu yaga ya'a, ¿naru' cabí ilüntërë' ca' queë'li', nácali' ca yaga bidxi?

³² Gula'ché'ë ca' chopë' bönni' tuá' dö', para ilútië' légaquie' tsözxön len Jesús. ³³ Cate' bila'dxinë' lataj nazi'i le Calavera, le rnna len didza' xidza' Lataj Que Böga' Ícjaru', bulu'dë'ë Jesús lë'e yaga cruz. Bulu'dë'ë ca' lë'egaca yaga cruz chopë' bönni' tuá' dö'. Tuë' bulu'dë'ë cuita lë'ë ibëla Jesús, en ia'tué' bulu'dë'ë cuita lë'ë yögöla. ³⁴ Ní'irö Jesús rnnë':

—Xuz, buniti lo légaquie', tu' cabí nözguequinë' bi tunë'.

Bönni' rójáquie' gudil-la nacu'ë ni' bulu'lë'ë que queëgaquie' le nácue' Jesús, en bulu'quitjë' le gaca bë' lahui. ³⁵ Bönachi nacuá' ni' tu'yú, en yugu' bönni' dë lu ná'agaquie' bulu'titjë' Jesús, ta'nnë':

—Yugu' nu yúbölö busölë' bönni' ni. Na'a ral-la' usölá cuinë' channö náquie' Cristo, bönni' gurö cazë' Dios.

³⁶ Yugu' bönni' na' rójáquie' gudil-la bulu'titjë' ca' Jesús. Gula'biguë'ë ga na' zoë', en bulu'gui'jë' Lë' nupi zi, ³⁷ ta'nnë':

—Channö nacu' Li' bönni' inná bé'enë' bönachi judío, busölá cuinu'.

³⁸ Da' ca' lë'e yaga cruz icjlë' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: “Bönni' Rinná Bé'enë' Bönachi Judío.” ³⁹ Tuë' bönni' huiá' dö' na' dë'ë lë'e yaga cruz bulidza zi'ë Jesús, rnnë':

—Channö nacu' Li' Cristo, busölá cuinu', enca' netu'.

⁴⁰ Bubi'ë didza' ia'tué' bönni' huiá' dö' na', en gudil-lë' luzë'ë na', rnnë':

—¿Naru' cabí rádxinu'-në' Dios? Lësca' li' narugu quiu' gátu'. ⁴¹ Le nácate rë'u, le rál-la'sö gaca queëru' riguí' rizáca'ru', ca na' sa'yéaj dö' biá'aru', pero Bönni' ni, bití' bi dö' nu'ë.

⁴² Ní'irö bönni' ni rë' Jesús:

—Yöjnë neda' cate' idxinu' ga ni' inná bë'u.

⁴³ Jesús rë' lë':

—Le nácate rea' li', na'a dza ni sóalenu' neda' lataj lachi quia'.

Ratië' Jesús

(Mt. 27:45-56; Mr. 15:33-41; Jn. 19:28-30)

⁴⁴ Cate' bidxin idú huagubidza, guchul-la idütë yödzo'lió ga bidxinrö idú ridödi xihuö. ⁴⁵ Guchul-la gubidza, ate' lari' nal-la' lu yudo' biröza' chopa dí'ilö. ⁴⁶ Ní'irö bë'ë zidzaj didza' Jesús, rnnë':

—Xuz, rigú'a lu no'o bö' naca caza'.

Cate' budxi gunné' caní, birúajtë bö' naca cazë', gútië'.

⁴⁷ Cate' bönni' rinná bé'enë' bönni' rójáquie' gudil-la bilé'enë' ca na' guca, gulu'ë Dios yöl-la' ba, rnnë':

—Le nácate bönni' ni gúquie' bönni' tsahui'.

⁴⁸ Cate' yúgu'tè bõnni' nacu'è ni' tu'yúé' bila'lé'enè' lè na' guca, yõjhuõjgaquiè' yõdzõ, ta'gapa' luchú'ugaquiè' tu' tu'bánninè'. ⁴⁹ Zí'tu'sõ bulu'gá'ana yúgu'tè nupa ni' núnbè'gaca Jesús, en yugu' nigula na' yõjácalennu Lè' cate' ni' gudé' luyú Galilea, ate' tu'yúé' lè ni raca.

Rigáchè'è Jesús yeru ba

(Mt. 27:57-61; Mr. 15:42-47; Jn. 19:38-42)

⁵⁰ Zoè' ca' ni' tu bõnni' yõdzõ Arimatea que luyú Judea, lè' José. Bõnni' ni náquiè' dxi'a, en tsahui', en nabábalenè' yugu' bõnni' yudo' tu'chi'a tu'söröè'. ⁵¹ Biti' benè' tzu nupa na' gula'chugu queè' Jesús gátiè', tu' ribözè' ca' José ni le rinná bè'è Dios. ⁵² Ní'irõ guyiye' José na' lahuè' Pilato, en gunabè' lataj u'è Jesús. ⁵³ Cate' chinuzõtjè' Lè', buchõlinè' Lè' lari', ate' gulu'è Jesús yeru ba, le nadajlè'e guí'a guiõj, ate' lu ba na', cuntun nu nagüí'iguequinè'. ⁵⁴ Dza na' naca dza tu'p'è è que dza lá'ayi quégaquiè' bõnni' judío, tu' si' idxín dza na'.

⁵⁵ Yõjácanu ca' ni' nigula na' gula'zá'lennu Jesús, cate' ni' gudé' luyú Galilea, ate' bila'lé'enu yeru ba na', en ca na guca, gula'gu'è Lè' ni'. ⁵⁶ Cate' yõjhuõjgacanu yu'u, bulu'pá'anu nõri rilá' zxixi, en yugu' le za rilá' zxixi. Ní'irõ bulu'zì' ládxi'gacanu dza lá'ayi na' quégaquiè' bõnni' judío ca na' rinná bè' xibá queè' Dios.

24

Rubanè' Jesús lu yõl-la' guti

(Mt. 28:1-10; Mr. 16:1-8; Jn. 20:1-10)

¹ Cate' bidxin dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queè' Jesús. Nuá'gacanu yugu' le rilá' zxixi, lè na' chinupá'agacanu, ate' dzágagacanu légacanu ia'bál-lanu nigula. ² Cate' bila'dxinnu ni', bila'lé'enu chinadúa' guiõj na' gudá' ga nu riyaza yeru ba queè'. ³ Cate' gula'yázanu yeru ba na', biti' bulu'dzõlinu zoa Xanru' Jesús ni'. ⁴ Cate' ni' ta'bõ'õnu bõniga ni'a que lè ni, chopè' bõnni' nácugaquiè' lari' rëpi yõsa bení' la' bila'dxintè' ni', en gula'zuínè' ga na' nacuá'anu. ⁵ Ní'irõ guládxinu, en bulu'zõtaj ícagacanu, tu'yunu lu yu, ate' chopè' gubáz lá'ayi na' tè' légacanu, ta'nnè'.

—¿Bizx que ruguíajli' nu zoa nabán xilataj nu nati? ⁶ Biti' zoè' ni, tu' chibubanè'. Guli'tsojné lè na' chigudxi cazè' libí'ili' cate' ni' zoè' luyú Galilea. ⁷ Gunnè': "Run bayudxi nu udõdi neda', Bõnni' Guljè' Bõnachi, lu ná'agaquiè' bõnni' dul-la', ate' ulu'dé'è neda' lè'e yaga cruz, ate' ubana' cate' gaca tsonna dza."

⁸ Ní'irõ yõjnégacanu didza' na' bè'è Jesús, ⁹ ate' bulu'zá'anu ra' yeru ba na', yõjtixjõ'iguequinu idxinéajtè' bõnni' gubáz queè' Cristo, en ia'zica'rè' ca', ca naca lè na' guca. ¹⁰ Nigula na' yõjtixjõ'iguequinu bõnni' gubáz na' yugu' lè ni, nácagacanu María Magdalena, en Juana, en María, xinè'è Jacobo, en ia'bál-lanu nigula na' dzágagacanu légacanu. ¹¹ Guléquinè' bõnni' gubáz na' tu'ínu didza' chixi, en biti' gula'yéajlè'è légacanu.

¹² Ní'irõ guyasè' Pedro, en carelõ sa'yéajè' ra' yeru ba na'. Cate' buyé'è lu ba na', bilé'enè' yugu' lári'sõ nacuá' ni', ate' ní'irõ bõajè' lidxè', rubánninè' ca naca lè na' guca.

Le guca la' nõza ridxintè' Emaús

(Mr. 16:12-13)

¹³ La' dza na' asõ sõjáquiè' chopè', yú'ugaquiè' nõza le ridxintè' Emaús, le rø'õ ca chopa hora rizá'aru' Jerusalén. ¹⁴ Yú'ugacasè' ca' nõza, tu'è didza' ca naca yúgu'tè lè na' guca. ¹⁵ Tsanni ni' yú'ugaquiè' nõza, tu'è didza' la' légacasè', gubígui'è gala' Lè' cazè' Jesús, ate' gudálenè' légaquiè' tsõzxõn. ¹⁶ Biti' bulu'únbè'è Lè' tu' naca ca tu le nabaga' guiõj lógaquiè'. ¹⁷ Ní'irõ Jesús gunábinè' légaquiè', rnnè'.

—¿Bizxi didza' na' ruí'ili' la' libí'isili' yú'uli' nõza? ¿Bizx que na' ruhuí'inili'?

¹⁸ Bubi'è didza' bõnni' na' lè' Cleofas, rè' Lè'.

—¿Nácatso' bõnni' zì'tu' lu yõdzõ Jerusalén, en tuzu' li' biti' nõzinu' lè na' guca néaje nasi ni'?

¹⁹ Ní'irõ Jesús rè' légaquiè'.

—¿Bizxi na' guca?

Tè' Lè'.

—Lè' na' guca queè' Jesús, bõnni' Nazaret. Gúquiè' bõnni' bè'è didza' uláz queè' Dios, ate' len yõl-la' huáca zxõn benè' dxin, en bè'è didza' lahuè' Dios, en lógaca yúgu'tè bõnachi. ²⁰ Yugu' bixúz unná bè', len bõnni' ta'nná bé'enè' netu' bulu'dödè' Lè', en gulunè' ga nu guchugu queè' gátiè', ate' bulu'dé'è Lè' lè'e yaga cruz. ²¹ Netu' bentu' lõza gúquiè' Lè' bõnni' na' ral-la' huóá'uè' bõnachi Israel, pero na'a chiguca tsonna dza cate' gulaca lè ni. ²² Ia'stú, bál-lanu nigula nús'a'gacanu netu' gulunnu ga gurõ'õtu' bõniga. Yõjácanu ra' yeru ba queè' cate' si' gulén gubidza na'a dza, ²³ en cate' biti' bulu'dzõlinu Lè', buduhuõjgacanu, en gulènu netu' bila'lé'enu yugu' gubáz lá'ayi queè' Dios, nupa ni' gulé' légacanu zoè' nabanè' Jesús. ²⁴ Ní'irõ bal-lè' bõnni' luzá'atu' yõjáquiè' ra' yeru ba na', en bila'lé'enè' naca ca na' gula'nnanu nigula na', pero biti' bila'lé'enè' Jesús.

²⁵ Ní'irò Jesús gudxè' légaquiè':

—Libi'ili', bōnni' bití' réajni'iniñé'. Nazidi icja ládxi'do'oli' para cabí tséajlè'èli' yúgu'tè le gula'nné' bōnni' gulu'è didza' uláz queé' Dios. ²⁶ ¿Naru' cabí ben bayudxi qui'i sáquē'è Cristo yugu' lè ni, en tsázié' ga ni' tsépisètèrè'?

²⁷ Ní'irò gusí lahué' Jesús riguixjōi'iné' légaquié' yúgu'tè le ru'i didza' ca naca queé' le nazúajgaca lu guichi lá'ayi, ca na' gusí lo bē'è didza' Moisés ga bidxinté yugu' le gula'nné' yúgu'tè bōnni' gulu'è didza' uláz queé' Dios.

²⁸ Cate' bila'dxiné' yōdzōdo' ga na' sōjáquié', bené' Jesús ca tu bōnni' zéajtèrè' zì'tu'.
²⁹ Guluné' bayudxi ugá'analéné' légaquié', ta'nné':

—Bugá'analén netu', tu' chiridzō' na'a, en chizōa gal-la.

Ní'irò guyázié' Jesús yu'u, en bugá'analéné' légaquié'. ³⁰ Cate' ni' Jesús rō'è rágulené' légaquié', gudélé'è yōta xtila, en gudxè' Dios: "Xclenu'." Ní'irò buzzuxxjé' le, en bē'è quégaquié'. ³¹ La' ní'sō bidúa lè na' gubaga' guíōj lógaquié', ate' bulu'únbé'è Jesús, ate' Lè' buniti cuiné' lógaquié'. ³² Ní'irò gulé luzé'è tué' ia'tué':

—¿Naru' cabí bōála'tica' ládxi'do'oru' tsanni ni' ru'ilené' rē'u didza' la' nōza, en cate' ni' ruchila lá'anié' le nazúaj lu guichi lá'ayi?

³³ La' ní'sō gula'zuiné' yōjhuōjgaquié' Jerusalén, ate' yōjxáca'gaquié' nudúbigaquié' idx-inéajté' bōnni' gubáz queé' Jesús, en nupa nacuá'len légaquié'. ³⁴ Ní'irò yugu' bōnni' na' nacu'è ni' gulé' chopé' na':

—Chibubán cazè' Xanru', en bulufi' lahué', ate' bilé'ené' Simón Lè'.

³⁵ Ní'irò chopé' na' gula'guixjō'è ca na' guca quégaquié' la' nōza, en ca na' bulu'únbé'è Jesús cate' ni' buzzuxxjé' yōta xtila na'.

Bōnni' usēda queé' Jesús tu'lé'ené' Lè'

(Mt. 28:16-20; Mr. 16:14-18; Jn. 20:19-23)

³⁶ Tsanni ni' tu'è didza' ca nácagaca lè ni, la' yōjsóatè' Jesús gatsaj láhui'lō ga na' nacu'è, ate' rē' légaquié':

—Guli'sóa dxi ládxi'li'.

³⁷ Ní'irò guladxi gula'dzōbiné' tu' téquiné' bixín ta'lé'ené'. ³⁸ Jesús rē' légaquié':

—¿Bizx que rō'oli' bōniga? ¿Bizx que rízà' ládxi'li' yugu' lè ni? ³⁹ Buli'yútsōca' na'a, en ni'a. Neda' caz ni. Guli'cán neda', en buli'yú neda', tu' cabí da' bixín bēla', en bití' yu'u dxita ca ni rilé'eli' naca quia' neda'.

⁴⁰ Ni' ru'isè' ca' didza' ni, bulu'iné' légaquié' nē'è, en ni'è. ⁴¹ Tu' tu'dzéjaguequiné' bití' gula'yéajlè'è, en gula'bō'è baniga. Que lè ni na' Jesús gudxè' légaquié':

—¿Dē queéli' ni le gahua'?

⁴² Ní'irò bulu'nōdzjé' queé' láti'do'oba' bōla chinégui'ba', en tu quíxzi'ba' buz. ⁴³ Guzxí'è Jesús le, en gudahué' lógaquié'. ⁴⁴ Ní'irò rē' légaquié':

—Yúgu' lè na' gulaca quia' gulaca ca na' gudxi caza' libí'ili' cate' ni' zóalena' libí'ili', gunnía': Run bayudxi gaca yúgu'tè le nazúaj lu guichi lu xibá queé' Moisés, en le gula'nné' bōnni' gulu'è didza' uláz queé' Dios, en le nazúaj lu guichi nazí' le Yugu' Salmo, ca ral-la' gaca quia' neda'.

⁴⁵ Ní'irò buzéajni'iné' légaquié' lè na' nazúajgaca lu guichi lá'ayi. ⁴⁶ Rē' légaquié':

—Caní nazúaj lu guichi ca run bayudxi gaca queé' Cristo, qui'i sáquē'è, en ubané' lu yōl-la' guti cate' gaca tsonna dza, ⁴⁷ ate' idúté yōdzōlió ral-la' gaca libán ca naca quia' neda' para ulu'bí'i ládxi'gaca bōnachi para uniti lahué' Dios dul-la' nabága'gaquié'. Lu yōdzō Jerusalén isí lo gaca libán na' ⁴⁸ ate' libí'i cázali' na' bilé'eli' yugu' lè ni ral-la' gunli' ba nalí que. ⁴⁹ Buli'yútsōca', isōl-la'a queéli' le guzxí' lu nē'è Xuza' gunné' queéli', pero buli'gá'anasō Jerusalén cate' idxinrō queéli' yōl-la' huáca na' za' yehua' yubá.

Ruhuēpè' Jesús yehua' yubá

(Mr. 16:19-20)

⁵⁰ Ní'irò Jesús guché'è yugu' bōnni' dá'gaquié' Lè', sōjáquié' yōdzō Betania, ate' ni' guchisa nē'è, en bulidza tsáhué'è légaquié'. ⁵¹ Tsanni ni' rulidza tsáhuí'sé' ca' légaquié', buzá'atè' ga na' nacu'è, buēpè' yehua' yubá. ⁵² Gudōdi gula'yéaj ládxi'gaquié' Lè', lu yōl-la' rudzeja quégaquié' yōjhuōjgaquié' Jerusalén. ⁵³ Gula'cuá'tica'sé' chila yudo', ta'gu'è Dios yōl-la' ba, en tun zxōné' Lè'. ¡Ca' naca!

DIDZA' DXI'A BUZÚAJË' JUAN

Bönni' na' nazi' i lë' Didza' gúlajë' bönachi

¹ Cate' gusi lo, zí'atëlö cate' si' gata' yödžölió, ni' zoa cazë' Bönni' lë' Didza', ate' Bönni' na' náquië' Didza' zóalenë' Dios, ate' Didza' na' naca caz Dios. ² Bönni' na' náquië' Didza' zóalenë' Dios cate' ni' gusi lo si' rata' yödžölió. ³ Lu në'ë Bönni' ni, Dios benë' yúgu'të le dë, en bití' bi dë le nunë' Dios le cabí benë' lu në'ë Bönni' na'. ⁴ Dë caz queë' yöl-la' na'bán, ate' yöl-la' na'bán na' naca ca tu bení' le ruzení' lu icja ládxi'do'gaca bönachi. ⁵ Ruzení' bení' na' ga naca chul-la que dul-la', pero bití' ca' sequí' le chul-la na' usulu bení' na'.

⁶ Dios gusöl-lë'ë ni tu bönni' lë' Juan. ⁷ Bidë' bönni' ni para gáquië' nu gun ba nali. Bidë' para gunë' ba nali queë' Bönni' na' náquië' bení', para tséjlë'gaca yúgu'të bönachi Dios ni'a que lë na' runë' ba nali. ⁸ Bití' náquië' Juan bení' na', pero bidë' para gunë' ba nali queë' Bönni' na' náquië' bení'. ⁹ Bönni' na' náquië' bení' le naca idú ni' razíë' yödžölió ni, ate' ruzení'ë lu icja ládxi'do'gaca yúgu'të bönachi.

¹⁰ Bönni' na' náquië' bení' bidxinë' yödžölió ni, ate' lu në'ë Lë' Dios benë' yödžölió ni, pero bönachi yödžölió bití' bulu'ünbë'ë Lë'. ¹¹ Bidxinë' ga nequi queë', pero bití' ca' gula'zí' lu ná'agaquië' Lë' bönni' nabábalenë'. ¹² Yúgu'të bönni' gula'zí' lu ná'agaquië' Lë', bönni' ni' gula'yéajlë'ë Jesús, Lë' benë' ga dë lu ná'agaquië' ilácagaquië' zxi'inë' Dios. ¹³ Bönni' ni nácagaquië' zxi'inë' Dios, calëga tu' nácagaquië' zxi'inë' nu bönni', en calëga tu' nálajgaquië' ni'a que le rizë' ládxi'ë nu bönni', o ni'a que tu le rë'ënë' nu bönni', pero nácagaquië' caní' tu' naca le rë'ëni quézinë' Dios.

¹⁴ Bönni' na' náquië' Didza' gúlajë' bönachi, en tu chí'isö guzóalenë' rë'u, idú dzágagaca Lë' le ruzá' ládxi'ë Dios queëru', en le naca idútë li. Bilé'etu' yöl-la' zxon queë', ate' yöl-la' zxon queë' na' naca le rufí' queëbi' bi'i la's dui que, Nu na' naca Xúzibi'. ¹⁵ Juan na' benë' ba nali queë' Bönni' na', en bë'ë zidzaj didza', rnnë':

—Bönni' ni náquië' Nu na' gudíxjö'a que, gunnía': Bönni' si' zá'tëlë' ca neda' nayëpisëtërë' ca neda', tu' zoa cazë' Lë' zí'alö ca neda'.

¹⁶ Le naca idú queë' buzí'iru' xibë yúgu'tëru', lë na' buzá' ládxi'ë queëru' Dios, en zíanrö ca' le ruzá' ládxi'ë queëru'. ¹⁷ Bidxin queëru' xibá queë' Dios lu në'ë Moisés, pero le ruzá' ládxi'ë queëru' Dios, en le naca idútë li bila'dxín queëru' lu në'ë Jesucristo. ¹⁸ Catu caz nu bilé'ë Dios, pero Lë', la's dui Zxi'inë' Dios, Bönni' na' nadxi'ide'enë' Dios Xuz, Bönni' ni na' benë' ga núnbë'ëru'-në' Dios.

Le benë' ba nali Juan, bönni' buquilé' bönachi nisa, ca náquië' Jesús

(Mt. 3:1-12; Mr. 1:7-8; Lc. 3:1-17)

¹⁹ Lë ni naca le benë' ba nali Juan, cate' ni' bönni' judío unná bë' nacu'ë Jerusalén gula'söl-lë'ë yugu' bixúz, en bönni' nabábagaquië' Leví, nupa ni nácagaca ni'a ná'agaquië' bixúz, para ila'nábinë' Juan na', ila'nnë':

—¿Nuzxi bönni' li'?

²⁰ Yálajdo' bë'ë didza' Juan, en bití' gudá'baguië', pero gudíxjö'ë catëz naca, rnnë':

—Bití' naca' Cristo, Bönni' na' guzxi' lu në'ë Dios isöl-lë'ë queëru'.

²¹ Ní'irö gula'nábinë' lë' leyúbölö, të' lë':

—¿Nuzxi caz li'? ¿Naru' nacu' li' Elías, bönni' bë'ë didza' uláz queë' Dios dza ni'të?

Gunnë' Juan:

—Bití' naca'.

Ní'irö të' lë':

—¿Naru' nacu' li' bönni' na' ral-la' guidé' gu'ë didza' uláz queë' Dios?

Bubi'ë didza' Juan, rnnë':

—Calëga neda'.

²² Ní'irö të' lë':

—¿Nuzxi caz nacu'? Gudíxjö'i' netu' para gaca usiyöntu' nupa gula'söl-la' netu'. ¿Bizxi rnnö' li' nuzxi nacu'?

²³ Bubi'ë didza' Juan, rë' légaquië':

—Neda' naca' bönni' na', nazúaj lu guichi lá'ayi ca naca queë', rnnä: Riyón chí'i nu rulidza lu lataj cá'asö, rnnä: Bulí'béaj li nōza para idxín Xanru' queëli'. Caní gunnë' Isaiás, bönni' na' bë'ë didza' uláz queë' Dios.

²⁴ Yugu' bönni' ni nácagaquië' bönni' yudo' fariseo nasöl-la'gaquië' bönni' judío unná bë'.

²⁵ Gula'nábinë' Juan, të' lë':

—¿Bizx que ruquilu' bönachi nisa channö cabí nacu' li' Cristo, en bití' nacu' Elías, en calëga bönni' na' ral-la' guidé' gu'ë didza' uláz queë' Dios?

²⁶ Bubi'ë didza' Juan na', rë' légaquië':

—Neda' ruquila' bönachi nisa lu nisa, pero gatsaj láhuilö ga zóali' zoë' tu bönni' biti' núnbë'ëli-në'. ²⁷ Bönni' ni náquië' Bönni' na' si' zá'tëlë' ca neda', en nayëpisëtërë' ca neda', ate' biti' naca' neda' lesaca' ulecja' xiráchuë' nudë'ë.

²⁸ Yúgu'të lë ni guca lu xiyú yödzo Betábara, ga naca ia'tsölá'a yegu Jordán, zaca' ga rilén gubidza, ga ni' buquilë' Juan bönachi nisa.

Jesús náquië' ca bō'cu' xzila'do' tutië'-ba' lahuë' Dios tu' nōzi dul-la'

²⁹ Dza buropi ni' Juan bilé'enë' Jesús, zë'ë ga zoë', ate' rnnë':

—Buli'yútsōca'. Bönni' ni náquië' bō'cu' xzila'do' queë' Dios, gatië' para ugúë' dul-la' nabága'gaca bönachi yödzoilió. ³⁰ Lë' náquië' bönni' na' gunniá' queë': "Si' zá'tëlë' ca neda' tu bönni', nayëpisëtërë' ca neda', tu' zoa cazë' zí'aló ca neda'." ³¹ Neda' biti' bënbe'a-në' zí'aló, pero bida', ruquila' bönachi nisa para ilúmbë'e bönachi Israel Lë'.

³² Benë' ba nalí Juan ca naca queë' Jesús, rnnë':

—Bilé'eda'-në' Dios Bō' Lá'ayi, bōtjë' birúajë' yehua' yubá, gunë'ë ca riná'aba' gu'dōdo', ate' bidxinë' ga zoë' Jesús, en bugá'analënë' Lë'. ³³ Biti' bënbe'eda' Lë' zí'aló. Gudxi neda' Nu na' gusól-la' neda' para uquila' bönachi nisa, gunnë': "Cate' ilé'enu'-në' huōtjë' Dios Bō' Lá'ayi, tsōsōalenë' Bönni' na', en ugá'analënë' Lë', Bönni' ni gunë' le rulu'isō yōl-la' ridila nisa ni, uchizië' bönachi Dios Bō' Lá'ayi." ³⁴ Na'a, chibilé'eda' lë na', en runa' ba nalí queë' Bönni' ni, náquië' Zxí'inë' Dios.

Yugu' bönni' usēda zí'aló queë' Jesús

³⁵ Ia'tú dza ca', leyúbölö zoë' Juan ni', ate' nacuá'lenë' lë' chopë' bönni' dá'gaquië' lë'. ³⁶ Cate' Juan na' bilé'enë' Jesús, ridödë' ni', ní'irō gudxë' bönni' na' dá'gaquië' lë', rnnë':

—Buli'yútsōca'. Ni' zoë' bönni' na' náquië' bō'cu' xzila'do' queë' Dios, gatië' uláz quegaca bönachi dul-la'.

³⁷ Chopë' bönni' na' dá'gaquië' Juan bila'yönnë' didza' ni bë'ë lë', ate' yōjnógaquië' Jesús.

³⁸ Ní'irō buécjë' Jesús, en buyúë' chopë' ni sōjnógaquië' Lë', ate' rë' légaquië':

—¿Bizxi riguljali'?

Të' Lë':

—Bönni' Usedi, ¿gazxi zu'?

³⁹ Bubi'ë didza' Jesús, rë' légaquië':

—Guli'dá, uyuli'.

Ní'irō yōjácalenë' Lë', en bila'lé'enë' ga na' zoë', ate' bulu'gá'analënë' Lë' dza na', tu' chizá' ral-la.

⁴⁰ Andrés, bōchë'ë Simón Pedro, náquië' tuë' bönni' chopë' ni' bila'yönnë' didza' bë'ë Juan, en yōjnógaquië' Jesús. ⁴¹ Andrés na', zí'aló yōjdiljë' bönni' bōchë'ë, lë' Simón, ate' rë' lë':

—Chibidzólitu'-në' Mesías.

Mesías naca tu didza' hebreo le rnna lu didza' griego: Cristo, ate' lu didza' xidza': Bönni' nasól-lë'ë Dios.

⁴² Ní'irō Andrés na' la' guchë'të' Simón ga na' zoë' Jesús. Cate' Jesús bilé'enë' lë', rë' lë':

—Li' nacu' Simón, zxí'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guiōj.

Jesús rulidzë' Felipe, en Natanael

⁴³ Cate' za' rení' ia'tú dza, gú'unnë' Jesús tsejë' luyú Galilea, ate' yōjxáquië' Felipe, en rë' lë':

—Gudá' neda'.

⁴⁴ Náquië' Felipe bönni' yödzo Betsaida, le naca ládzagaquië' Andrés, en Pedro. ⁴⁵ Felipe budzōlinë' Natanael, en rë' lë':

—Chibidzólitu'-në' bönni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bönni' gulu'ë didza' uláz queë' Dios. Bönni' ni Jesús, zxí'inë' José, bönni' yödzo Nazaret.

⁴⁶ Natanael rë' lë':

—¿Naru' huala'tsō Nazaret tu le naca dxi'a?

Felipe rë' lë':

—Gudá uyú'.

⁴⁷ Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en biti' rnnasë' ca' bönni' ni.

⁴⁸ Ní'irō Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulídzatërë' Felipe li', cate' ni' zu' zxan yaga higo, bilé'eda' li'.

⁴⁹ Ní'irō bubi'ë didza' Natanael, rë' Lë':

—Bönni' Usedi, Li' nacu' Zxi'inë' Dios. Li' nacu' Nu inná be'e bönachi Israel.

⁵⁰ Bubi'ë didza' Jesús, rë' lë':

—¿Réajlë'tso' tu' gudxa' li': Bilé'eda' li' zxan yaga higo? Yugu' le zxöntërö ca lë ni hualé'enu'.

⁵¹ Lësca' caní rë' Jesús légaquië', rnnë':

—Le nácatë rea' libí'ili', ilé'eli' nayalaj lúzxiiba, en ta'benë', en tu'huöjtjë' gubáz lá'ayi queë' Dios ga zoa' neda', Bönni' Guljë' Bönachi.

2

Laní que yöl-la' rutsaga na' le guca lu yödzo Caná

¹ Cate' chiguca tsonna dza, guca laní que yöl-la' rutsaga na' lu yödzo Caná luyú Galilea, ate' zóanu xinë'ë Jesús ni'. ² Lësca' zoa nu bulidza Jesús, en yugu' bönni' usëda queë' dijáquië' laní na'. ³ Cate' biyadzaj xisi uva ilé'ajë', ní'irö xinë'ë Jesús gúdxinu Lë', rnnanu:

—Biti'rö dë xisi uva ilé'ajë'.

⁴ Bubi'ë didza' Jesús, rë'ë-nu:

—Nigúlado'. ¿Bizx que rulidzu' neda'? Biti' ca' ridxini dza ulu'a lahui yöl-la' huáca quia'.

⁵ Ní'irö xinë'ë Jesús gúdxinu bönni' huen dxin ta'gu'ë le tahuë', rnnanu:

—Guli'gún yúgu'të le guië' libí'ili'.

⁶ Nacu'a' ni' xopa yusu' guiöj tu'gunë' dxin bönni' judío cate' tu'pá'a cuíngaquië' ca nalëbiguequinë' tunë', en rúdzugaca chopa tsonna rö'ö nisa tu tu yusu' na'. ⁷ Jesús gudxë' yugu' bönni' huen dxin na', rnnë':

—Buli'lí yugu' yusu' ni nisa.

Bulu'líë' yugu' yusu' na' nisa. ⁸ Ní'irö Jesús rë' légaquië':

—Guli'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'. ⁹ Buyüë' bönni' na' zoë' ra' yusu' channö nazxí'i nisa na' nuhuóaca xisi uva, pero bití' réquibe'enë' gazxi za'. Nöziguequinë' bönni' huen dxin na' guláchë'ë nisa na'. Ní'irö bönni' na' zoë' ra' yusu' bulidzë' bönni' rutsaga në'ë, ¹⁰ en rë' lë':

—Zí'alö tu'nödziej' yúgu'të bönni' xisi uva nácarö sizxí'i, en cate' chigulë'ajë' yenni', ní'irö tu'nödziej' le cabí nazxí'i. Li', ga bidxintë na'a ben chi'u xisi uva nácarö sizxí'i.

¹¹ Yöl-la' huáca naca bë' ni benë' Jesús lu yödzo Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxön queë', ate' gula'yéajlë'ë Lë' bönni' usëda queë'.

¹² Gudödi na' guyijë' Jesús yödzo Capernaum, ate' dzágagaquië' xinë'ë, en yugu' bönni' böchë'ë, en yugu' bönni' usëda queë' Lë', ate' zían dza gula'cu'ë Capernaum na'.

Rulatjë' Jesús lö'a yudo', rubéajë' nupa tun le cabí ral-la' ilún ni'

(Mt. 21:12-13; Mr. 11:15-18; Lc. 19:45-46)

¹³ Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, guyijë' Jesús yödzo Jerusalén. ¹⁴ Lu yödzo na' yöjxáquië' Jesús nacu'ë bönni' lö'a yudo' ga na' túti'ë-ba' yugu' bëdxi, en yugu' bö'cu' zxila', en yugu' gu'dödo', böa' bëdxi na' tútigaquië'-ba' lahuë' Dios. Rö'ögaquië' ca' ni' bönni' tu'tsë'ë dumí za' idütë yödzoiló. ¹⁵ Cate' bilé'enë' Jesús lë ni, buzalë' yugu' du lasi le quindë' bönachi na', ate' bulágui'ë yúgu'të' ní'ilö lö'a yudo', en bulágui'ë-ba' ca' ní'ilö yugu' bö'cu' zxila', en yugu' bëdxi. Bësië' dumí quégaquië' bönni' na' tu'tsë'ë dumí lu yu, en burixë' yugu' blaga quégaquië'.

¹⁶ Ní'irö Jesús gudxë' bönni' na' túti'ë-ba' yugu' gu'dödo', rnnë':

—Guli'cúa yugu' lë ni. Biti' únili' lidxë' Xuza' tu'yë'yi.

¹⁷ Ní'irö yöjnéguequinë' bönni' usëda queë' Jesús le nazúaj lu guichi lá'ayi, rnna: Tu' ruí'ida' ládxa'a lidxu', régui rilá ládxi'da' ahua'.

¹⁸ Ní'irö bulu'bi'ë didza' bönni' judío unná bë' nacu'ë ni', të' Jesús:

—¿Bizxi yöl-la' huáca ulu'ínu' netu' le gaca bë' dë lu no'o runu' yugu' lë ni?

¹⁹ Bubi'ë didza' Jesús, rë' légaquië':

—Guli'quínaj yudo' ni, ate' tsonna dzasö uchisa' le.

²⁰ Ní'irö të' Lë' bönni' judío, ta'nnë':

—Idú xopa-un iz guyá' yudo' ni, ate' Li', ¿tsonna dzasö uchísatso' le?

²¹ Yudo' na' bë'ë didza' que Jesús naca la' cuín cazë'. ²² Que lë ni na', cate' bubanë' Jesús lu yöl-la' guti, yöjnéguequinë' bönni' usëda queë' Jesús ca na' gunnë', ate' gula'yéajlë'ë le nazúaj lu guichi lá'ayi, enca' yugu' didza' bë'ë Jesús.

Jesús núnbë'ë yúgu'të bönachi

²³ Cate' ni' zoë' Jesús Jerusalén, cate' raca Laní Pascua na', gula'yéajlë' bönachi zían Lë', tu' bila'lé'enë' yugu' yöl-la' huáca runë'. ²⁴ Biti' buzzöni ládxië'ë Jesús légaquië', tu' nunbë' cazë'

yúgu'te bönachi. ²⁵ Biti' naquinnë' Jesús nu quíxjoi'i Lë' ca nácagaca bönachi, tu' nöz quézine' Lë' le yu'u icja ládxí'do'gaca bönachi.

3

Jesús, en Nicodemo

¹ Nicodemo, tu bönni' yudo' fariseo, nabábalenë' yugu' bönni' judío unná bë'. ² Bidë' bönni' ni ga zoë' Jesús chí'i dzö'ölö, en rë' Lë':

—Bönni' Usedi. Réquibe'etu' nasöl-lë'ë Dios Li' para usédinu' netu'. Biti' séqui'në' tu bönni' gunë' yugu' yöl-la' huáca nácagaca bë' ca nácagaca le caní runu' Li' channö cabí zóalenë' Dios lë'.

³ Bubi'ë didza' Jesús, rë' lë':

—Le nácate rea' li', nu cabí galaj leyúbölö, bití' ca' ilé'e lataj ga ni' rinná bë'ë Dios.

⁴ Nicodemo gunábinë' Lë', rnnë':

—¿Nacxi caz séqui'në' tu bönni' galjë' leyúbölö cate' chináquië' bönni' gula? ¿Naru' huácatsö tsu'ë leyúbölö lë'ënu xinë'ë, ate' galjë' ia'tú?

⁵ Bubi'ë didza' Jesús, rë' lë':

—Le nácate rea' li'. Nu bönni' cabí galjë' ni'a que nisa, en ni'a queë' Dios Bô' Lá'ayi, bití' gaca tsázië' ga rinná bë'ë Dios. ⁶ Nu na' nalaj lu ni'a lu na' bönachi, bönáchisö naca, pero nu nalaj ni'a queë' Dios Bô' Lá'ayi, Bô' Lá'ayi nabani nu na'. ⁷ Biti' ubáninu' tu' rea' li', run bayudxi galju' leyúbölö. ⁸ Gátí'tës recja bô', ate' riyönnu' rnnë' bô' na', pero bití' nözinu' gazxi za', o gazxi zeaj. Lësca' caní raca quégaca nupa náljagaca ni'a queë' Dios Bô' Lá'ayi.

⁹ Ní'irö Nicodemo gunábinë' Jesús, rnnë':

—¿Nacxi caz gaca lë' ni'?

¹⁰ Bubi'ë didza' Jesús, rë' lë':

—¿Ruséditsenu' li' bönachi Israel, en bití' nözinu' yugu' lë' ni'? ¹¹ Le nácate rea' li', le nöztu' ruí'tu' didza' que, en le bilé'etu' runtu' ba nali que, pero bití' rizi' lu ná'ali lë' na' runtu' ba nali. ¹² Channö cabí réajilë'ëli' nunda' cate' ruí'lëna' libí'ili' didza' ca naca le raca yödzüliö ni, ¿nacxi caz gaca tséajlë'ëli' channö guía' libí'ili' le raca yehua' yubá?

¹³ Catu caz gurenë' nu bönni' yehua' yubá, pero tuza' neda', Bönni' Guljë' Bönachi, bötja' birúaja' yehua' yubá, ate' zoa caza' ni' yehua' yubá. ¹⁴ Ca na' benë' Moisés lu lataj cá'asö, buchisë'-ba' bëla néquiniba' guíë, budë'-ba' lë'e yaga, lësca' caní run bayudxi gaca quia' neda', Bönni' Guljë' Bönachi, ulu'chisë' neda' xitsá'. ¹⁵ Caní gaca quia', para cabí ila'niti yúgu'te nupa ila'yéajlë' neda', pero gata' quéguequi yöl-la' na'bán idú.

Dios nadxi'ide'enë' bönachi yödzüliö

¹⁶ Tu' bidxi'ide'enë' Dios bönachi yödzüliö, buzá' ládxë'ë quéguequi Zxi'inë' la' buduinë', para cabí ila'niti yúgu'te nupa ila'yéajlë' Lë', pero gata' yöl-la' na'bán idú quéguequi. ¹⁷ Dios gusöl-lë'ë Zxi'inë' yödzüliö ni, calëga para ichúguië' quégaca bönachi yödzüliö ni gátigaca, pero para ulu'lágaca bönachi yödzüliö ni ni'a queë' Lë'.

¹⁸ Nu bönni' réajlë'ë Zxi'inë' Dios, bití' ca' narugu queë' inítië', pero bönni' na' bití' réajlë'ë Lë', chinarugu queë' gátie', tu' cabí réajlë'ë Zxi'inë' Dios la' buduinë'. ¹⁹ Que lë' ni na' chinarugu quégaca bönachi gátigaca, tu' bidxinë' Bönni' na' náquië' bení' yödzüliö ni, pero gulunrö zxön bönachi ni le naca chul-la que dul-la' ca gulunë' zxön Bönni' na' náquië' bení', tu' nácagaca xihui' le tunë'. ²⁰ Yúgu'te bönni' tu'ë dö' bití' raza ládxí'gaquië' bení', en bití' ridígaquië' lu bení', para cabí ila' lahui le tunë'. ²¹ Nu run le naca idütë' li ridxín lu bení' para gaca bë' núngaca ni'a queë' Dios le run nu na'.

Juan, bönni' ruquilë' bönachi nisa, ru'ë didza' ca naca queë' Jesús

²² Gudödi na', Jesús guyéajlenë' bönni' dá'gaquië' Lë', ate' bila'dxinë' luyú Judea, en guzóalenë' légaquië' ni', ga na' tu'quilë' bönachi nisa. ²³ Lësca' ruquilë' Juan bönachi nisa ga nazi'i le Enón, gala' dé yödzü Salim, tu' dé nisa zila lataj na', ate' ta'dxin bönachi ni', en ta'dila nisa. ²⁴ Raca caní zí'atëlö cate' bití' idzunë' Juan na' lidxi guíë.

²⁵ Ní'irö gula'sí'lógaquië' bal-lë' bönni' dá'gaquië' Juan ta'díl-lalenë' yugu' bönni' judío didza' ca naca que yöl-la' ruchi'a cuini que yudo'. ²⁶ Bila'dxinë' ga zoë' Juan, en të' lë':

—Bönni' usedi. Buyútsöca'. Bönni' na' guzóalenë' li' ia'tsólá'a yegu Jordán, bönni' na' benu' ba nali queë', ruquilë' bönachi nisa, ate' ta'dxín yúgu'te bönachi ga zoë'.

²⁷ Ní'irö bubi'ë didza' Juan, rë' légaquië':

—Bití' bi dé lu në'ë nu bönni', channö cabí nudödë' Dios le lu në'ë. ²⁸ Biyön quézili' lë' na' bena' ba nali, gunnia': "Bití' naca' neda' Cristo", pero Dios nasöl-lë'ë neda' para guía' bönachi si' zë'ë Lë'. ²⁹ Bönni' na' rizi'ë-bi' bi'i nigula rutsaga ná'abi' náquië' bönni' rutsaga në'ë, pero böchi' luzë'ë bönni' rutsaga në'ë, en dzáguië' lë', ruzë' náquië' didza' ru'ë, en rudzéjanë' tu' riyönnë' didza' ru'ë bönni' rutsaga në'ë. Lësca' caní, rudzéjade'eda' neda' tu' raca lë' ni caní. ³⁰ Run bayudxi gácarë' zxön Cristo, pero neda', run bayudxi gácara' cuidí'sö.

Nu za' zaca' yehua' yubáló

³¹ Gunnë' ca' Juan:

—Bönni' na' zë'ë zaca' xitsá'aló nayépisëtërë' ca yúgu'të bönachi. Nu bönni' náquië' bönachi yödžolió ni, que yödžolió ni náquië', en ru'ë didza' que le raca yödžolió ni, pero Bönni' na' zë'ë zaca' yehua' yubáló nácatërë' lo ca yúgu'të bönachi. ³² Bönni' na' runë' ba nali que le bilë'enë', en le biyönnë', pero cuntú nu rizí' lu në'e le runë' ba nali. ³³ Nüti'tës bönni' rizí' lu në'ë lë na' runë' ba nali, bönni' ni rulu'ë lahui réajlë'ë naca idútë li didza' ru'ë Dios. ³⁴ Bönni' na' nasöl-lë'ë Dios, didza' queë' Dios ru'ë, tu' nuzóadërë' Dios Bö' Lá'ayi queë' lu Bönni' na'. ³⁵ Dios Xuz nadxi'inë' Zxi'inë', ate' yúgu'të le dë chinudödë' lu në'ë Zxi'inë' na'. ³⁶ Nu bönni' réajlë'ë Dios Zxi'ini, dë yöl-la' na'bán idú queë', pero bönni' na' biti' réajlë'ë Dios Zxi'ini, biti' idéli'në' yöl-la' na'bán na', pero nabáguë'ë xíguia' lahuë' Dios.

4

Jesús ru'ilenë'-nu didza' tu nigula Samaria

¹ Bila'yönnë' bönni' yudo' fariseo ca na' dá'gaca Jesús zíanrö bönachi ca dá'gaca Juan, ate' ruquilë' ca' nisa zíanrö bönachi ca ruquilë' nisa Juan. ² Calëga Jesús caz ruquilë' bönachi nisa, pero bönni' usëda queë' tu'quilë' bönachi nisa. ³ Cate' gúquibe'enë' Jesús lë ni, buzë'ë luyú Judea, ate' sa'yéajë' leyúböló luyú Galilea.

⁴ Ga ni' sa'yéajë', run bayudxi tödë' luyú Samaria. ⁵ Caní guca, bidxinë' Jesús tu yödžodó' luyú Samaria, nazí'i le Sicar, gala' ga dë yu na' bunödžjë' Jacob queëbi' José, zxi'inë' Jacob na', dza ni'te. ⁶ Lataj na' zoa tu yeru nisa nachó'önë' Jacobo na' ga rë'. Cate' bidxinë' Jesús ni', guró'ë ra' yeru nisa na' tu' yójxéqui'në' yu'ë nöza. Guca idú huagubidza. ⁷ Ní'irö bidxinu tu nigula Samaria ni' para sí'inu nisa. Jesús rë'ë-nu:

—Benna le guí'ja'.

⁸ Tuzë' zoë' Jesús tu' chisójáquië' bönni' usëda queë' lu yödžö söjxi'gaquië' le ilahuë'. ⁹ Ní'irö nigula Samaria na' rënu Jesús, rñnanu:

—¿Rinábítsenu' neda' le guí'ju', en nacu' bönni' judío? Neda' ni naca' nigula Samaria.

Caní gunnánu tu' cabí ta'dzaga dxi'a bönachi Samaria len bönachi judío.

¹⁰ Bubi'ë didza' Jesús, rë'ë-nu:

—La'tu' núnbë'u le runödžjë' Dios, en Nuzxi na' rë li': "Benna le guí'ja'", li' inabu', ate' Lë' gunnë' quiu' nisa runna yöl-la' na'bán.

¹¹ Ní'irö nigula na' rënu Lë', rñnanu:

—Bönni', biti' nu'u le cuéaju' nisa, ate' yeru nisa ni, dxi'tërö rë'. ¿Gazxi dë nisa na' runna yöl-la' na'bán? ¹² ¿Naru' nácatërötso' Li' zxon ca xúziru' gudödi Jacob, bönni' ni' bennë' queëtu' yeru nisa ni, ga ni guzxi'ë nisa gu'ë, en gulë'ajbi' ca' zxi'inë', en gulë'ajba' ca' böa' bëdxi queë'?

¹³ Bubi'ë didza' Jesús, rë'ë-nu:

—Nüti'tës nu guí'aj nisa ni, leyúböló ubidxi nisa, ¹⁴ pero nu guí'aj nisa na' unödžja' neda', bití'rö ubidxi icja ládxi'da'ahuë', tu' unödžja' queë' nisa na' gaca lu icja ládxi'da'ahuë' ca tu ga ralaj nisa, le gü'i yöl-la' na'bán idú queë'.

¹⁵ Ní'irö nigula na' rënu Lë', rñnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

¹⁶ Jesús rë'ë-nu:

—Guyéaj, yöjlidžë' bönni' quiu', ate' huödu' ni.

¹⁷ Bubi'inu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácatë rño': "Cuntu nu zoa bönni' quia'", ¹⁸ tu' chiguzóalenu' gayu' bönni', ate' bönni' na' zóalenu'-në' na'a, biti' náquië' bönni' quiu'. Didza' ni ru'u, ca nácatë rño'.

¹⁹ Ní'irö nigula na' rënu Lë', rñnanu:

—Bönni', runi neda' nacu' bönni' ru'ë didza' uláz queë' Dios. ²⁰ Xuz xtó'oru' guléquinë' Dios le bach lu guí'a ni, pero rñnali' libí'ili' Jerusalén naca ga ral-la' ilequi bönachi Dios le bach.

²¹ Jesús rë'ë-nu:

—Nigula, guyéajlë' neda'. Za' dza cate' tseaj ládxi'li'-në' Dios Xuz sal-la' biti' idisóali' guí'ado' ni, en biti' tsöjsóali' Jerusalén. ²² Libí'ili' reaj ládxi'li' Nu biti' núnbë'ëli', pero netu' núnbë'ëtu' Nu na' reaj ládxi'tu', tu' benë' queë' Dios ilá' lahui yöl-la' rusólá ni'a quégaquië' bönni' judío. ²³ Na'a, za' dza, en chiridxin dza na', cate' nupa le nácatë ta'yéaj ládxi'gaca Dios, ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë li, tu' rë'enë' Dios Xuz ilácagaquië' queë' bönni' ila'yéaj ládxi'gaquië' Lë' caní. ²⁴ Dios náquië' Bö', ate' nupa ta'yéaj ládxi'gaca Lë', run bayudxi ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë li.

²⁵ Ní'irò nigula na' rënu Lë', rnnanu:

—Nöda' ral-la' guidë' Mesías, Bönni' na' lë' Cristo. Cate' guidirë' Lë' quíxjöi'inë' rë'u yúgu'të.

²⁶ Jesús rë'ë-nu:

—Lë cazë' ru'ilenë' li' didza'.

²⁷ La' ná'asö bulu'dxinë' bönni' usëda queë' Jesús, ate' bulu'bábinë' tu' ru'ilenë'-nu nigula didza', pero biti' burúguinë' nitúë' inábinë' Lë', cabí innë': "¿Bizxi rinábinu' lënu?" o: "¿Bizxi didza' ru'ilenu'-nu?" ²⁸ Ní'irò nigula na' bucá'ananu xichó'önu ni', ate' bójaju la' yödzo, sējōdxinu nupa nacuá' ni', rnnanu:

²⁹ —jGulí'dá, ilé'eli'-në' tu bönni' gudxë' neda' yúgu'të le chinuna'! ¿Naru' cabí nácatsë' Lë' Cristo?

³⁰ Ní'irò bila'rúaj bönachi yödzo na', en bila'dxin ga zoë' Jesús.

³¹ Tsanni ni' sōhuōaju nígula na', bönni' usëda queë' Jesús gulunë' bayudxi, të' Lë':

—Bönni' Usedi, gudagu.

³² Jesús rë' légaquie':

—Dë tu le rahua', le cabí réquibe'eli'.

³³ Ní'irò gula'nabi luzá'agaquie' bönni' usëda queë' tuë' ia'tué', ta'nnë':

—¿Zoa nu chidiguá'tsö le gudahuë'?

³⁴ Ní'irò Jesús rë' légaquie':

—Le nabánida' naca guna' ca rë'enë' Xuza' nasól-lë'ë neda', en údxin guna' xichinë'. ³⁵ Caní rnnali' libí'ili': "Ia'tapa beo' huadxín dza uláparu'." Neda' rea' libí'ili': Gulí'chisa loli' uyuli' bönachi nácacaga ca gapa nadúzgaca, le chinabídxigaca para tsōjláparu'. ³⁶ Bönni' na' rulapë' rizi'ë laxjë', ate' lë na' rulapë' bönni' na', naca para gata' yöl-la' na' bán idú quégaca bönachi, para gaca ulu'dzeja tsōxōn nu raza, en nu rulapa. ³⁷ Naca idútë li lë na' rna caní: Tu nu raza, ate' ia'tú nu tsolapa. ³⁸ Neda' gusól-la'a libí'ili' tsōjlápalí' ga biti' gúzali'. Gulún bönachi yúbölö dxin guláz, ate' libí'ili' ruzí'ili' xibé dxin na' núnagaquie'.

³⁹ Zían bönachi Samaria nacuá' yödzo Sicar na' gula'yéajlë'ë Jesús ni'a que xtídza'nu nigula na' bennu ba nalí queë', gunnánu: "Gudxë' neda' yúgu'të le chinuna'." ⁴⁰ Cate' bila'dxinë' bönni' Samaria ga ni' zoë' Jesús, guláta'yuë' lahuë' ugá'analënë' légaquie'. Jesús bugá'anë' ni' ia'chopa dza. ⁴¹ Caní guca, zíanterë' ca' bönni' ni' gula'yéajlë'ë Jesús ni'a que didza' bë'ë. ⁴² Ní'irò bönni' ni' gulë'-nu nigula na', ta'nnë':

—Na'a réajlë'ëtu' Lë', calégasö ni'a que didza' bë'u li', pero lëscá' tu' biyōnitu' netu' Lë', en nōztu' le nácatë bönni' ni' náquie' Cristo, Nu rusólá bönachi yödzoilió.

Ruñë' Jesús xxi'inë' tuë' bönni' dë lu në'ë

⁴³ Ia'chopa dza ca', buzë'ë Jesús luyú Samaria, en sa'yéajë' luyú Galilea. ⁴⁴ Caní benë', tu' gudíxjö'ë Lë cazë' Jesús, gunnë': "Bönachi uládz queë' nu bönni' ru'ë didza' uláz queë' Dios biti' tun lë' bal." ⁴⁵ Cate' bidxinë' Jesús luyú Galilea, gulunë' bönni' Galilea na' Lë' bal tu' yójáquie' ca' Jerusalén cate' guca Laní Pascua, en bila'lë'enë' le benë' Jesús ni'.

⁴⁶ Ní'irò bójajë' Jesús yödzo Caná luyú Galilea, ga ni' benë' ga bójaca nisa xisi uva. Lu yödzo Capernaum na' zoë' tu bönni' dë lu në'ë uláz queë' bönni' rinná bë'ë, ate' ré'ebi' bi'i bönni' queë' bönni' na' dë lu në'ë. ⁴⁷ Cate' biyōnnë' bönni' ni' chibuzë'ë Jesús luyú Judea, en budxinë' luyú Galilea na', ní'irò guyië' ga na' zoë' Jesús, en gúta'yuë' lahuë' guidë' lidxë', para uduhuënë'-bi' bi'i bönni' queë' na', tu' chirequi gátibi'. ⁴⁸ Ní'irò Jesús rë' lë':

—Biti' ca' tséajlë'ëli' channó cabí ilé'eli' le nácacaga bë', en yugu' yöl-la' huáca guna'.

⁴⁹ Ní'irò bönni' na' dë lu në'ë uláz queë' bönni' rinná bë'ë gudxë' Jesús, rnnë':

—Bönni', gudía'të para cabí gátibi' bi'i quia'.

⁵⁰ Ní'irò Jesús rë' lë':

—Bójaj lidxu'. Nabanbi' bi'i quiu'.

Bönni' ni' guyéajlë'ë didza' bë'ë Jesús, ate' sōhuōjë'. ⁵¹ Tsanni ni' yu'ë nōza sōhuōjë', duzxi'gala'gaquie' lë' bönni' huen dxin queë' ate' gula'guíxjöi'inë' lë', ta'nnë':

—Nabanbi' bi'i quiu'.

⁵² Gunábinë' légaquie' bátaxi gusí lo ruhuóaca ládxi'bi'. Të' lë':

—Ba'ayi, idú huagubidza, burúaj xilá yú'ubi'.

⁵³ Ní'irò gúquibe'enë' xúzibi' bi'i na', bójacabi' cate' ni' bë'lenë' Jesús lë' didza', en gudxë' lë': "Nabanbi' bi'i quiu'." Que lë ni na' guyéajlë'ë Jesús, ate' gula'yéajlë' ca' Lë' bönachi nacuá' lidxë'.

⁵⁴ Yöl-la' huáca ni naca le buropi benë' Jesús cate' ni' zoë' luyú Galilea, gudödi buzë'ë luyú Judea.

5

Ruñë' Jesús tu bönni' nacu'unië' bin ga nazí'i le Betesda

¹ Gudödi guca lë ni, guca laní quégaquië' bönni' judío, ate' guyijë' Jesús Jerusalén. ² Lu yödö na', gala' ga tu'u'uba' bö'cu' zxila', dë tu le zxön yudzu nisa, nazi' le Betesda lu didza' hebreo, en nacuá' gayu' chila don que. ³ Yugu' lu chila na' dëgaquië' zían bönni' té'enë', bönni' nachul-la lógaquië', en bönni' bití' gaca sá'gaquië', en bönni' nacú'unigaquië' bin. Ta'bözë' bata utá cuini nisa na'. ⁴ Caní raca, tu' ruhuötyë' tu gubáz lá'ayi queë' Dios tu chí'i huéaj, en röjtsu'ë lu nisa na', en rutë' nisa na'. Huöacaté' nu bönni' tsöjtsú'utië' lu nisa na' cate' rutá cuini ca naca bití'tës yödözöhuë' raca queë'. ⁵ Zoë' tu bönni' ni', chiguca chizzunu' uruá' iz ré'enë'. ⁶ Cate' bilé'enë' Jesús dë' bönni' huë' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba ré'ënu' huöácu'?

⁷ Bubi'ë didza' bönni' huë' na', rë' Jesús:

—Bönni', cuntú nu zoa cu'u neda' lu nisa na' cate' rutá cuini. Tsanni sa'yéaja' neda', röjtsu'ë bönni' yúbölö zí'aló ca neda'.

⁸ Jesús rë' lë':

—Guyaschi. Buá' le denu', en guzë'e.

⁹ La' böacaté' bönni' na', ate' bu'ë le gúti'në', en guzë'e. Dza na' raca caní naca dza lá'ayi quégaquië' bönni' judío. ¹⁰ Ní'irö bönni' judío unná bë' gulë' bönni' na' nuhuöáquië', ta'nnë':

—Dza lá'ayi naca na'a. Bití' ral-la' u'u le ráti'nu'.

¹¹ Bubi'ë didza' bönni' na', rë' légaquië':

—Bönni' na' bunë' neda' gudxi cazë' neda', gunnë': "Buá' le denu', en guzë'e." Bönni' na' bunë' neda'.

¹² Ní'irö gula'nábinë' lë', ta'nnë':

—¿Nuzxi na' gudxi caní li': "Buá' le denu', en guzë'e"?

¹³ Bití' nōzinë' bönni' na' nuhuöáquië' nuzxi na', tu' chibuzë'ë Jesús lataj ni' tu' nacuá' bōnachi zían ni'. ¹⁴ Gudödi guca lë ni, Jesús yōjxáquië' bönni' na' ga naca chila yudo', ate' rë' lë':

—Buyútsöca'. Chiböácu'. Bití'rö gunu' dul-la', para cabí gaca quiu' tu le nácarö zi' ca lë na' guca quiu'.

¹⁵ Guyijë' bönni' na', yōjtíxjöi'në' yugu' bönni' judío unná bë' Jesús na' bunë' lë'. ¹⁶ Que lë ni na' bönni' judío unná bë' gula'bía lādxí'gaquië' Jesús, en gulë'ënnë' ilútië' Lë', tu' runë' yugu' lë ni cate' naca dza lá'ayi quégaquië'. ¹⁷ Bubi'ë didza' Jesús, rë' légaquië':

—Xuza' ná'atë runë' dxin, ate' neda' ca' runa' dxin.

¹⁸ Que lë ni na' gulë'ënrōnë' bönni' judío unná bë' ilútië' Jesús, calégasö tu' guditsjë' xibá que dza lá'ayi quégaquië', pero lësca' tu' gunnë' Dios caz náquië' Xuzë', ate' caní naca nun cuinë' ca náquië' Dios.

Yöl-la' unná bë' dë lu në'ë Xzí'inë' Dios

¹⁹ Ní'irö bubi'ë didza' Jesús, rë' légaquië':

—Le nácatë rea' libí'ili'. Bití' bi gaca guna' neda', Xzí'inë' Dios, rácasö quia', pero tuz lë na' rilë'eda' runë' Dios Xuz. Yúgu'të le runë' Dios Xuz, lësca' caní runa' neda', Xzí'inë'. ²⁰ Dios Xuz nadxi'inë' neda', Xzí'inë', en ruluf'inë' neda' yúgu'të le runë', ate' yugu' le zxöntörö ca lë ni uluf'inë' neda', le ilún ga ubánili' libí'ili'. ²¹ Ca na' runë' Dios Xuz, rusubanë' nupa nátigaca, en rugú'ë légaquië' yöl-la' na'bán, lësca' caní runa' neda', Xzí'inë', runödzja' quégaca bōnachi yöl-la' na'bán ca ré'ëni quézida'. ²² Cuntú nu ruchí'a rusörörë' Dios Xuz, pero chinudödë' lu na'a neda', Xzí'inë', yúgu'të yöl-la' unná bë' para uchi'a usöröa' bōnachi. ²³ Caní naca para ilún bal yúgu'të bōnachi neda', Xzí'inë', ca na' tun bal Dios Xuz. Nu bití' run bal neda', Xzí'inë', bití' run bal Dios Xuz, nasöl-lë'ë neda', Xzí'inë' na'.

²⁴ Le nácatë rea' libí'ili'. Bönni' na' riyōnnë' didza' ruá'a, en réajlë'ë Dios Xuz na' nasöl-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidé yöl-la' na'bán idú queë'. ²⁵ Le nácatë rea' libí'ili', za' dza, en chiridxín dza na', cate' ila'yōni nupa chinátigaca chí'a neda', Xzí'inë' Dios, ate' nupa ila'yōni xtídza'a, en ilún ca rnna, huóata' yöl-la' na'bán quéguequi. ²⁶ Ca na' dë lu në'ë Dios Xuz unödzjë' yöl-la' na'bán quégaca bōnachi, lësca' caní benë' ga dë lu na'a neda', Xzí'inë', unödzja' yöl-la' na'bán quégaca bōnachi. ²⁷ Lësca' caní budödë' lu na'a yöl-la' unná bë' uchi'a usöröa' bōnachi, tu' naca' Bönni' Guljë' Bōnachi. ²⁸ Bití' ubánili' ca naca lë ni, tu' huadxín dza cate' yúgu'të nupa chinátigaca ila'yōni chí'a, ²⁹ en ulu'rúaj yeru ba. Ulu'bán nupa na' gulún le naca tsahui', en huóata' yöl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

Le naca bë' le náquië' Jesús

³⁰ Gunnë' ca' Jesús:

—Bití' bi gaca guna' la' néda'sö. Ca naca le riyōnda' rë' Xuza' neda', caní ruchí'a rusöröa', ate' ca na' ruchí'a rusöröa' naca tsahui', tu' cabí runa' ca ré'ënisida' neda', pero ca ré'ëni

quézinē' Xuza' nasöl-lē'ē neda', runa'. ³¹ Channō neda' runa' ba nali que la' cuin caza', biti' naca lesaca' lē na' runa' ba nali. ³² Zoa Nu yúbölö Nu run ba nali quia' neda', Lē' Xuza', ate' nōzda' naca lesaca' le runē' ba nali quia'. ³³ Libí'ili' gusöl-la'li' bönni' yōjnábiguequinē' Juan, ate' lē na' benē' ba nali quia' naca idútē li. ³⁴ Neda' biti' naquinda' nu bönni' gunē' ba nali quia', pero ruá'a didza' caní para uláli'. ³⁵ Didza' bē'ē Juan na' gulaca ca tu guí' yōri, le guyeui, en buzení', ate' libí'ili', tu chí'isō guyaza lādxi'li' uzí'ili' xibé bení' quēē'. ³⁶ Na'a, zoa le run ba nali quia' neda' le nácáro idú li ladxe' ca lē na' benē' ba nali quia' Juan. Yugu' le budódē' Dios Xuz lu na'a guna', la' leze na' runa', ate' yugu' lē na' runa', tun ba nali quia', en nácagaca bē' gusöl-lē'ē Dios Xuz neda'. ³⁷ Lēsca' Dios Xuz nasöl-lē'ē neda' runē' ba nali quia'. Catu caz biyónili' chí'ē, en catu caz bilé'eli' lahuē', ³⁸ en cabí nazí' lu ná'ali' xtídzē'ē, tu' cabí réajlē'ēli' neda', Nu na' gusöl-lē'ē. ³⁹ Rusédali' le nazúaj lu guichi lá'ayi, tu' réquili' huáta' yöl-la' na'bán idú queéli' ní'a que lē na' nazúaj lu guichi lá'ayi, ate' lē na' nazúaj lu guichi run ba nali quia' neda'. ⁴⁰ Biti' rē'ēnili' guídali' quia' neda' para gata' yöl-la' na'bán queéli'.

⁴¹ 'Biti' riguilja' yöl-la' ba le ila'gú'u bönachi neda'. ⁴² Neda' núnbē'a libí'ili', en nōzda' biti' nadxí'ili'-nē' Dios. ⁴³ Bidxina' ní uláz queē' Dios Xuz, ate' libí'ili' biti' rizi' lu ná'ali' neda', pero channō huadxín nu yúbölö nu guídi rácasō que, sí' lu ná'ali' nu na'. ⁴⁴ Nacxi caz gaca tséajlē'ēli' Dios channō rizi'ili' yöl-la' run zxón que luzá'ali' tuli' ia'tuli', en biti' riguiljali' yöl-la' run zxón na' za' lu nē'ē la's dui Dios? ⁴⁵ Biti' uzóa íxjali' uzéguia' libí'ili' didza' lahuē' Xuza'. Nu na' uzegui libí'ili' didza' naca lē cazē' Moisés, bönni' na' ruzxōni lādxi'li'-nē', sal-la' gútiē' dza ní'te. ⁴⁶ La'tu' réajlē'ēli'-nē' Moisés, tséajlē'ēli' ca' neda', tu' buzúajē' Moisés lu guichi ca naca quia' neda'. ⁴⁷ Na'a, nácxi caz gaca tséajlē'ēli' didza' ruá'a neda' channō cabí réajlē'ēli' yugu' le buzúajē' Moisés lu guichi?

6

Rugahuē' Jesús zíanrō ca chi-un gayuá' bönachi

(Mt. 14:13-21; Mr. 6:30-44; Lc. 9:10-17)

¹ Gudódi guca lē ni, guyiñē' Jesús ia'tsólá'a Nísado' Que Galilea, nazí' le ca' Nísado' Queē' Tiberias. ² Bönachi zían yōjnógaca Jesús tu' bila'lē'e yugu' yöl-la' huáca benē', cate' bunē' bönni' té'enē'. ³ Ní'irō gurenē' Jesús, guyiñē' ga naca tu lu guí'ado', ga ní' guró'ōlenē' yugu' bönni' usēda queē'. ⁴ Chizóa idxín Laní Pascua cate' tu'subanē' bönni' judío ca benē' Dios, bubéajē' xuz xtó'ogaquiē' luyú Egipto. ⁵ Cate' guchisa lahuē' Jesús, en bilé'enē' bönachi zían zá'gaca ga zoē', ní'irō rē' Felipe:

—¿Gaxzi tsójō'uru' yōta xtila le ilágugaca bönachi zían ní?

⁶ Caní gunnē' Jesús para sí' bē'ē Felipe na', tu' chinōzinē' Lē' naca gunē'. ⁷ Bubi'ē didza' Felipe, rnnē':

—La'tu' sí'iru' yōta xtila len lászjaru' que idú xunu' beo', biti' guequi láti'do' huéaj le ilágugaca bönachi zían ni.

⁸ Ní'irō tu bönni' usēda queē' Jesús, lē' Andrés, bōchē'ē Simón Pedro, rē' Lē', rnnē':

⁹ —Ni zóabi' tubi' bí'i bönni', nuá'abi' gayu' yōta xtila néquiquequini zxoa' cebada, en chópaba' bōla cuídi'do'. ¿Naru' huéqui'tse ugagu le do' ní cate' xō bönachi?

¹⁰ Ní'irō Jesús rē' légaquiē':

—Guli'gún ga ila'bō' bönachi zían ní lu yu.

Lataj na', rō'ōda' daca', ate' gula'bō'ē idú ca chi-un gáyú'ē bönni' ní'. ¹¹ Ní'irō gudélē'ē Jesús yugu' yōta xtila na'. Cate' chigudxē' Dios: "Xclenu", gudísiē' le quégaquiē' bönni' usēda queē', ate' légaquiē' gula'guisiē' le quégaca yúgu'tē nupa na' rō'gaca lu daca' ní'. Lēsca' caní gulunē' quégacaba' bōla cuídi'do' na', ate' gulahuē' tsa gulē'ēnnē' ilahuē'. ¹² Cate' chibulu'huóljanē', Jesús gudxē' yugu' bönni' usēda queē', gunnē':

—Buli'túbí le bizxaj nagá'anagaca, para cabí ilaca ditaj.

¹³ Bulu'tubē' ca', ate' bulu'líē' chinnu ga'bórado' yugu' le bizxaj quégaca gayu' yōta xtila néquiquequini zxoa' cebada na', le bulu'gá'ana quégaquiē' bönni' na' gulahuē'. ¹⁴ Cate' bila'lē'enē' bönni' ní' yöl-la' huáca na' benē' Jesús, ta'nnē':

—Le nácate bönni' ní náquiē' bönni' na' ru'ē didza' uláz queē' Dios, bönni' na' ral-la' guíde' yōdzólió ni.

¹⁵ Tu' réquibe'enē' Jesús té'ēnnē' ila'chē'ē Lē' bayudxi para ilunē' ga inná bē'enē' légaquiē', que lē ni na' buzē'ē ní', sa'yéajē' tuzē' tu lu guí'a.

Rizē'e ní'ē Jesús lu nísado'

(Mt. 14:22-27; Mr. 6:45-52)

¹⁶ Cate' chizá' ral-la, yōjáquiē' bönni' usēda queē' Jesús, ate' bila'dxinē' ra' nísado'. ¹⁷ Gula'benē' tu lē'e bárcodo' ní', en sōjáquiē' ta'dódē' lu nísado' na', para ulu'dxinē' Capernaum. Chinaca chul-la ate' Jesús biti' ridxíninē' ga na' nacu'ē. ¹⁸ Gusí lo recja bō' budunu' lu nísado' na', ate' riyasa ridxía nisa na'. ¹⁹ Cate' chibulu'sē'ē bárcodo' na', le guzá' le naca tsa

rizá'aru' tu hórásö, ní'irö bila'lé'enë' Jesús rizé'e ni'ë lu nísado' na', en zë'ë ribíguë'ë ga na' zēj barco na', ate' guladxi gula'dzöbinë'. ²⁰ Ní'irö Jesús rë' légaquië':

—Neda' caz ni. Biti' gádxili'.

²¹ Ní'irö len yöl-la' rudzeja quégaquië' bulu'guélë'ë Lë' lë'e bárcodo' na', ate' la' bidxintë bárcodo' na' lu yu bidxi ga ni' sôjáquië'.

Bönachi zían tu'guilaj Jesús

²² Dza buropi ni', guléquibe'e bönachi zían na' nagá'anagaca ia'tsölá'a nísado' bidxín tuz bárcodo' ni', ate' Jesús biti' gurénlenë' yugu' bönni' usëda queë' lë'e bárcodo' na', pero légacasë' na' yôjáquië'. ²³ Ní'irö bila'rúaj ia'bal-la bárcodo' lu yödzo Tiberias, ate' bila'dxín tu lataj le dë gála'sö ga ni' gulahuë' yôta xtila cate' ni' Xanru' Jesús gudxë' Dios: "Xclenu" que. ²⁴ Tu' bila'lé'enë' bití'rö zoë' Jesús ni', en biti' nacu'ë bönni' usëda queë' ni', que lë ni na' gula'benë' lë'egaca bárcodo' na', ate' yôjáquië' Capernaum, tu'guiljë' Jesús.

Náquië' Jesús yôta xtila nabánigaca tsaz bönachi

²⁵ Cate' bila'dxín bönachi zían na' ia'tsölá'a nísado' na', yôjxáca'gaquië' Jesús, en të' Lë':

—Bönni' Usedi, çbátaxi bidxinu' ni'?

²⁶ Bubi'ë didza' Jesús, rë' légaquië':

—Le nácatë rea' libí'ili': Ruguíajli' neda', calëga tu' bilé'eli' yugu' yöl-la' huáca bena', pero tu' gudáguli' yôta xtila ni', en böljali'. ²⁷ Guli'gún dxin, calëga para sí'ili' la' huagu ridödi que, pero para sí'ili' la' huagu na' ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljë' Bönachi, gunna' queëli', tu' bulu'ë lahui Xuza' Dios naca' Zxi'inë'.

²⁸ Ní'irö gula'nábinë' Lë', ta'nnë':

—çBizxi run bayudxi guntu' para guntu' le raza ládxë'ë Dios?

²⁹ Bubi'ë didza' Jesús, rë' légaquië':

—Lë ni le raza ládxë'ë Dios, tséajlë'ëli' neda', naca' nu gusöl-lë'ë Lë'.

³⁰ Ní'irö gula'nábinë' Lë', ta'nnë':

—çBizxi le naca bë' runu', le ilé'etu' para tséajlë'ëtu' Li'? çBizxi yöl-la' huáca runu'?

³¹ Gulahuë' xuz gudödi queëru' yôta xtila nazí'i le maná lu lataj cá'asö, ca nazúaj lu guichi lá'ayi, rnna: "Yôta xtila que yehua' yubá Moisés bë'ë quégaquië', gulahuë'."

³² Bubi'ë didza' Jesús, rë' légaquië':

—Le nácatë rea' libí'ili': Calëga Moisés na' bennë' queëli' yôta xtila que yehua' yubá, pero Xuza' Dios runnë' queëli' yôta xtila le naca idú que yehua' yubá. ³³ Yôta xtila na' runnë' Dios quégaca bönachi naca' neda', lë na' birúaj yehua' yubá, en runödzej yöl-la' na'bán quégaca bönachi yödzoiliö ni.

³⁴ Ní'irö të' Lë':

—Xan, bénnatica'sö queëtu' yôta xtila na'.

³⁵ Jesús rë' légaquië':

—Neda' caz naca' yôta xtila nabánigaca tsaz bönachi. Nu za'len neda', huölaj udzé'e tsaz nu na' le naca queë' Dios, ate' nu tséajlë' neda', chinë'aj tsaz le naca queë' Dios. ³⁶ Naca ca na' chigudxi caza' libí'ili': "Sal-la' rilé'eli' neda', biti' ca' réajlë'ëli' neda'." ³⁷ Yúgu'të nupa na' runnë' Xuza' quia', idigaca quia', ate' nupa na' zaca quia', biti' usá'gaca'-në'. ³⁸ Caní naca, tu' bötja' birúaja' yehua' yubá, calëga para guna' ca ré'ënda' neda' caz, pero para guna' ca ré'ënë' Dios Xuz, nasöl-lë'ë neda'. ³⁹ Lë ni le ré'ënë' Xuza' nasöl-lë'ë neda', ré'ënë' cabí unítia' nitú nupa na' bennë' quia', pero usubana' léguequi dza údxi. ⁴⁰ Lë ni le ré'ënë' Dios Xuz nasöl-lë'ë neda', ré'ënë' gata' yöl-la' na'bán quéguequi, yúgu'të nupa na' ila'lé'e neda', Zxi'inë', en ila'yéajlë' neda', ate' neda' usubana' léguequi dza údxi na'.

⁴¹ Ní'irö gula'nnë' queë' Jesús bönni' judío unná bë' tu' gunnë': "Neda' caz naca' yôta xtila na' bötaj, birúaj yehua' yubá." ⁴² Que lë ni na' ta'nnë':

—çNaru' cabí bönni' ni Jesús, zxi'inë' José? Nunbë' cázaru' xuz xinë'ë. çNacxi caz naca na', runnë' bönni' ni: "Bötja' birúaja' yehua' yubá"?

⁴³ Ní'irö bubi'ë didza' Jesús, rë' légaquië':

—Biti' innëli' quia' la' libí'isili'. ⁴⁴ Biti' séqui'në' nitúë' bönni' guidë' quia' channö cabí idigu'ë quia' Xuza' nasöl-lë'ë neda' nu na', ate' neda' usubana' nu na' dza údxi. ⁴⁵ Nazúaj lu guichi lá'ayi ca gula'nnë' bönni' gulu'ë didza' uláz queë' Dios, le rnna caní: Dios usëdinë' yúgu'të bönachi. Que lë ni na', yúgu'të bönni' ta'yönnë' chi'ë Xuza', en nazëdagaquië' lu në'ë Lë' zá'gaquië' quia'.

⁴⁶ Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quezinë' Dios Xuz. ⁴⁷ Le nácatë rea' libí'ili': Núti'tës bönni' réajlë'ë neda' dë yöl-la' na'bán idú queë'. ⁴⁸ Neda' caz naca' yôta xtila nabánigaca tsaz bönachi. ⁴⁹ Gulahuë' xuz xtó'oli' yôta xtila na' nazí'i le maná lu lataj cá'asö, en cate' bizá'a dza quégaquië' gulátie'. ⁵⁰ Neda' naca' yôta xtila ruhuötaj rirúaj yehua' yubá, ate' núti'tës bönni' gahuë' le, biti' ca' gátie' bönni' na'. ⁵¹ Neda' caz naca' yôta xtila na' nabánigaca bönachi, le bötaj birúaj yehua' yubá, ate' channö

núti'tës bönni' gahuë' yôta xtila na', gaca bántica'së' bönni' na'. Yôta xtila na' runödza' neda' naca xipêla'a, le runödza' para gata' yôl-la' na'bán quégaca bönnachi yôdzôliô.

⁵² Ní'irô bönni' judío unná bē' gula'chixi luzá'agaquíë', ta'nnē':

—¿Naru' huácatsô bönni' ni gunnē' queëru' xipélë'è le gáguru'?

⁵³ Que lë ni na' Jesús rē' légaquíë':

—Le nácatē' rea' libí'ili': Channō cabí gáguli' xipêla'a neda', Bönni' Guljē' Bönachi, en channō cabí guf'jali' xichōna', bití' ca' zóalen libí'ili' yôl-la' na'bán na'. ⁵⁴ Núti'tës nu gagu xipêla'a, en guí'aj xichōna', dē que yôl-la' na'bán idú, ate' neda' usubana' nu na' dza údxi. ⁵⁵ Caní gaca, tu' naca xipêla'a la' huagu idú, ate' xichōna' naca tu le naca idú para nu guí'aj le. ⁵⁶ Núti'tës bönni' gahuë' xipêla'a, en guí'jē' xichōna', sóalentic'a'së' bönni' na' neda', ate' neda' sóalentic'a'sa' lē'. ⁵⁷ Ca na' zoē' nabanē' Dios Xuz nasól-lē'è neda', ate' neda' nabánida' Lē', lē'sca' caní íbábinē' neda' núti'tës bönni' gahuë' neda'. ⁵⁸ Lē ni yôta xtila bôtaj birúaj yehua' yubá, en bití' naca ca yôta xtila na' nazí'i le maná, lē na' gulahuë' xuz xtó'oli', en cate' bizá'a dza quégacíë', gulatiē'. Núti'tës bönni' gahuë' yôta xtila ni sóatica'së' íbanē'.

⁵⁹ Yugu' didza' ni bē'è Jesús ga naca tu lu yu'u ga tu'dubē' bönni' judío, en tu'sedē' queë' Dios, ate' guca lë ni tsanni ni' rusédinē' bönachi Capernaum.

Didza' rúnagaca queëru' yôl-la' na'bán idú

⁶⁰ Cate' bila'yönnē' didza' ni, zían bönni' usēda queë' Jesús gula'nnē' que, ta'nnē':

—Banígatē didza' ni. ¿Nuzxi caz gaca si' lu nē'e le?

⁶¹ Réquibē'enē' Jesús ta'nnē' bönni' usēda queë' que xtídzē'è, ate' gunábinē' légaquíë', rnnē':

—¿Naru' run didza' ni libí'ili' zí'?? ⁶² ¿Nacxi caz gaca channō hualé'eli' neda', Bönni' Guljē' Bönachi, huëpa' huôja' ga ni' zoa' zí'alô? ⁶³ Le naca queë' Dios Bō' Lá'ayi naca le runna yôl-la' na'bán queëli'. Le naca bēla'sô cuntú nu uzí' xibé. Didza' na' bē'lena' libí'ili' náacagaca queë' Dios Bō' Lá'ayi, en rúnagaca yôl-la' na'bán quégaca bönnachi. ⁶⁴ Na'a, bál-lalí' bití' réajlë'eli'.

Gunnē' caní Jesús tu' nōzinē' dza ni'te nupa na' bití' ta'yéajlë', enca' nu na' udôdi Lē' lu ná'agaquíë' bönni' ilútiē' Lē'. ⁶⁵ Que lë ni na' gunnē':

—Que lë ni na' chigudxi caza' libí'ili': Bití' séqui'nē' nitúë' bönni' tē'è neda' channō Dios Xuz cabí gu'è lē' lataj.

⁶⁶ Dza na' gulaca chopá láchxi'gaquíë' zían bönni' usēda queë', en bití'rô gula'dálenē' Lē'.

⁶⁷ Ní'irô Jesús gunábinē' ídxínnutē' bönni' usēda queë' na', rē' légaquíë':

—¿Naru' ubíga'tsalí' ca' libí'ili'?

⁶⁸ Bubi'è didza' Pedro, rē' Lē':

—Xan, ¿nuzxi que tséajtu'? Li' napu' didza' rúnagaca queëtu' yôl-la' na'bán idú. ⁶⁹ Netu' réajlë'ëtu' Li', en núnbē'ëtu' Li', nacu' Cristo na' nasól-lē'è Dios, en nacu' ca' Zxf'inē' Dios ban.

⁷⁰ Bubi'è didza' Jesús, rē' légaquíë':

—Gurô caza' libí'ili' chínnulli' ni, pero tuë' bönni' ládajli' libí'ili' dzaga tu' xihui' lē'.

⁷¹ Didza' ni bē'è Jesús ca naca queë' Judas Iscariote, zxf'inē' tu bönni' lē' Simón, tu' náquíë' Judas bönni' na' udôdē' Jesús lu ná'agaquíë' bönni' ilútiē' Lē', en nabábalenē' ia'chinéajë' bönni' usēda queë' Jesús.

7

Bönni' böchi' cazē' Jesús bití' ta'yéajlë'è Lē'

¹ Gudôdi guca lë ni ridē' Jesús luyú Galilea. Bití' gú'unnē' tsejē' luyú Judea tu' tē'ennē' bönni' judío unná bē' nacu'è ni' ilútiē' Lē'. ² Dza ni' chizóa ídxín laní quégacíë' bönni' judío cate' tu'subanē' ca gula'cu'è xuz xtó'ogaquíë' zzan libín lága'do'. ³ Que lë ni na' yugu' bönni' böché'è Jesús gulé' Lē', ta'nnē':

—Birúaj ni, en guyéaj luyú Judea para ila'lé'enē' ca' bönni' usēda quiu' nacu'è ni' yugu' yôl-la' huáca runu'. ⁴ Channō rē'ënē' nu bönni' ilúnbē'è bönachi lē', bití' runē' bagáchi'sô le runē'. Tu' runu' yugu' yôl-la' huáca caní, buluí' cuinu' lógaca yúgu'tē bönachi.

⁵ Caní gula'nnē', tu' cabí ta'yéajlë'è bönni' böché'è Jesús Lē'. ⁶ Ní'irô Jesús rē' légaquíë':

—Bití' ridxini dza quia' para uluí'i lahua' lógaca bönachi, pero dza queëli' tséajli' ni' chizóa caz. ⁷ Bönachi yôdzôliô ni bití' tu'zôa libí'ili' tsólá'alô, pero tu'zôa neda' tsólá'alô tu' runa' ba nalí quégacíë', rnní'a' naca xihui' le tunē'. ⁸ Guli'tséaj libí'ili' laní na'. Bití' tseja' laní na' na'a tu' bití' ridxini dza quia'.

⁹ Cate' chigudxē' légaquíë' lë ni, bugá'anē' luyú Galilea.

Sa'yéajë' Jesús laní quégaca bönachi judío

¹⁰ Gudôdi sôjáquíë' bönni' böché'è Jesús laní na', ní'irô sa'yéajë' ca' Lē', caléga yálajdo', pero bagáchi'sô sa'yéajë'. ¹¹ Ga na' raca laní na', bulu'guiljē' bönni' judío unná bē' Jesús, ta'nnē':

—¿Gazxi zoē' bönni' na'?

¹² Bönachi zían ni' guluí'ida' didza' ca naca queë' Jesús. Bal-lē' ta'nnē':

—Náquíë' dxi'a.

Ia'bal-lë' ta'nnë':

—Biti' náquië' dxi'a tu' rizi' yé'enë' bönachi.

¹³ Biti' bë'ë nitüë' bönni' didza' yálajdo' ca naca queë' Jesús, tu' tadxi bönachi zían na' le ilunë' yugu' bönni' judío unná bë'.

¹⁴ Cate' chibidxiñ gatsaj laní na', blë'ë Jesús ra' yudo', en busédinë' bönachi nacuá' ni'.

¹⁵ Bulu'báñinë' bönni' judío, ta'nnë':

—¿Naxi caz naca, rácadë'ë bönni' ni, en biti' ca' nazëdë' que yudo'?

¹⁶ Bubi'ë didza' Jesús, rë' légaquië':

—Le rusédida' neda', calëga quia' naca, pero queë' Dios Xuz na' nasöl-lë'ë neda'. ¹⁷ Channö rë'ënë' nu bönni' gunë' ca rë'ënë' Dios, huéquebe'enë' bönni' na' channö nequi queë' Dios le rusédida' bönachi o channö rácasö quia' ru'a didza'. ¹⁸ Nu bönni' ru'ë didza' rácasö queë', runë' caní para ilún bal bönachi lë', pero Bönni' na' rë'ënë' ilún bönachi bal Nu nasöl-la' lë', Bönni' ni ru'ë didza' idütë li, en biti' ca' rizi' yë'ë.

¹⁹ "Moisés bennë' queëli' xibá queë' Dios, pero biti' runli' ca rinná bë' xibá na'. ¿Bizx que rizóa ribö'öli' gütili' neda'?

²⁰ Bulu'bí'i didza' bönachi zían na', të Lë':

—Tu' xihui' dzaga li'. ¿Nuzxi caz rizóa ribö'ö guti li'?

²¹ Bubi'ë didza' Jesús, rë' légaquië':

—Tu yöl-la' huáca bena', ate' rubáni' yúgu'tëli'. ²² Le nácatë Moisés bennë' queëli' lë na' narugu lu xipéla'li' le naca bë', pero calëga Moisés caz bennë' queëli' lë na', pero guzxi'ë le lu ná'agaquië' xuz xtá'ahuë'. Na'a, sal-la' naca dza lá'ayi, richúguli' lu xipéla'gacabi' bi'i bönni'do' lë na' naca bë' néquiqueuibi' queë' Dios. ²³ Channö ta'z'í'ibi' lu xipéla'gacabi' lë na' naca bë' cate' naca dza lá'ayi, para cabí quítsjali' xibá queë' Moisés, ¿naru' rilétseli' neda' tu' buna'-në' tu bönni', ate' bóaquië' dxi'ado' cate' naca dza lá'ayi? ²⁴ Biti' ral-la' uchi'a usörö lizili' ca', pero buli' chi'a buli'sörö ca naca le naca idütë li.

Rigúxjö'ë Jesús ga narúajë'

²⁵ Ní'irö' gulu'ë didza' bal-lë' bönni' nacu'ë Jerusalén, ta'nnë':

—¿Naru' calëga bönni' ni Nu na' tu'guiljë' bönni' judío unná bë' para ilütüë' Lë'?

²⁶ Buli'yútsöca', yálajdo' ru'ë didza', en biti' bi'të Lë'. ¿Naru' téquibe'enë' bönni' ta'nná bé'enë' rë'u, le nácatë bönni' ni náquië' Cristo, Nu na' ral-la' inná be'e rë'u? ²⁷ Bönni' ni, nöz queziru' gazxi bönni' Lë'. Cate' guidé' Cristo, cuntú nu inözi gazxi bönni' Lë'.

²⁸ Ní' zoë' Jesús rusédinë' bönachi chila yudo', en cate' biyönnë' didza' ni, ní'irö bë'ë zidzaj didza', rnnë':

—¿Naru' nünbe'etseli' neda', en nözitseli' gazxi bönni' neda'? Bida' ni, calëga rácasö quia', pero Dios caz nasöl-lë'ë neda', ate' Lë', biti' nünbë'ëli'-në' libí'ili'. ²⁹ Neda' nünbe'eda'-në', tu' za'a queë' Lë', ate' Lë' cazë' nasöl-lë'ë neda'.

³⁰ Ní'irö' gulunë' bayudxi ila'zönë' Lë', pero cuntú nu guzxon Lë', tu' cabí ridxini dza queë' tsu'ë lu ná'agaquië'. ³¹ Gula'yéajlë' zían bönachi ni' Lë', ta'nná:

—Cate' guidé' Cristo, ¿naru' gunë' zíanró yöl-la' huáca ca le runë' bönni' ni?

Bönni' yudo' ta'söl-lë'ë nupa ila'zön Jesús

³² Bila'yönnë' bönni' yudo' fariseo yugu' didza' ni tu'f'i bönachi ca naca queë' Jesús, ate' yugu' bixúz unná bë', en yugu' bönni' yudo' fariseo na' gula'söl-lë'ë ni'a ná'agaquië' para tsøjxongaquië' Lë'. ³³ Ní'irö Jesús gunnë':

—Ia'tú chí'isö sóalena' libí'ili', ate' ní'irö huöja' ga zoë' Xuza' nasöl-lë'ë neda'. ³⁴ Uguiljali' neda', pero biti' udzölili' neda'. Ga ni' tsöjsóa' neda' biti' gaca guídali' libí'ili'.

³⁵ Ní'irö të' luzá'agaquië' bönni' judío, ta'nnë':

—¿Gazxi tséajtsë' bönni' ni, ga ni' biti' udzöliru'-në'? ¿Naru' huayéajtsë' ga nacu'ë bönni' judío násilasigaquië' idütë yödžolió, en usédinë' yugu' bönni' zi'tu' ni'? ³⁶ ¿Bizxi rë'ëni inná didza' na' bë'ë: "Uguiljali' neda', pero biti' udzölili' neda'", enca: "Ga ni' tsöjsóa' neda' biti' gaca guídali' libí'ili'?"

Nisa yegu le runna yöl-la' na'bán queëru'

³⁷ Cate' ni' naca dza údxi que laní na', dza na' naca lo, guzuñë' Jesús, en bë'ë zidzaj didza', rnnë':

—Channö zoë' nu bönni' ribidxi icja ládxi'da'ahuë', ral-la' guidé' bönni' na' ga zoa', en guí'jë'. ³⁸ Nu bönni' réajlë'ë neda', gaca queë' ca na' nazúaj lu guichi lá'ayi, rnna: Lu icja ládxi'da'ahuë' bönni' na' ilén le naca ca nisa yegu, lë na' ulu'zi' xibë bönachi, gata' yöl-la' na'bán quéqueui.

³⁹ Didza' ni bë'ë Jesús ca naca queë' Dios Bö' Lá'ayi, Nu ral-la' idisóalen bönni' na' ila'yéajlë'ë Jesús. Caní gunnë' Jesús tu' cabí ridxininë' Dios Bö' Lá'ayi, tu' cabí ruhuépinë' Jesús ga tsépisëtërë'.

Ta' rúaj choplō bōnachi

⁴⁰ Cate' bila'yōni didza' ni, gula'nná bal-la bōnachi zían na', ta'nná:

—Le nácatē Bōnni' ni náquiē' Bōnni' na' ru'ē didza' uláz queē' Dios, Bōnni' na' guzxi' lu nē'ē Dios isōl-lē'ē queēru'.

⁴¹ Ta'nnē' ia'bal-lē':

—Bōnni' ni náquiē' Cristo.

Ta'nná bal-la bōnachi:

—¿Naru' irúajtsē' Cristo luyú Galilea? ⁴² Nazúaj lu guichi lá'ayi le rnna: “Cristo galjē' lada j di'a dza queē' David, en gáquiē' ca' bōnni' Belén le guca ladzē' David na'.”

⁴³ Caní guca, bila'rúaj bōnachi na' choplō tu' nōzinē' Jesús. ⁴⁴ Tē'ennē' bal-lē' ila'zōnē' Jesús, pero cuntú nu bi ben queē'.

Biti' ta'yéajlē'ē Jesús bōnni' unná bē'

⁴⁵ Ní'irō bulu'dxinē' ni'a ná'agaquiē' yugu' bixúz unná bē', en yugu' bōnni' yudo' fariseo ga na' nacu'ē bōnni' yudo' na', ate' légaquiē' gulē' ni'a ná'agaquiē' na', ta'nnē':

—¿Bíx que bití' dichē'ēli-nē'?

⁴⁶ Bulu'bi'ē didza' ni'a ná'agaquiē', ta'nnē':

—Cuntu nu bōnni' ru'ē didza' ca ru'ē didza' Bōnni' ni.

⁴⁷ Ní'irō bulu'bi'ē didza' bōnni' yudo' fariseo na', ta'nnē':

—¿Naru' bē'tsali' lataj guzxi' yé'enē' ca' libí'ili'? ⁴⁸ ¿Naru' guyéajlē'tsē' Lē' nu bōnni' unná bē' o nu bōnni' yudo' fariseo? ⁴⁹ Libí'ili' dxíali' dō' tu' cabí rácali' xibá queē' Dios.

⁵⁰ Zoē' ca' Nicodemo ni', bōnni' na' bidxinē' ga zoē' Jesús chí'i dzō'ólō, tu' náquiē' ca' bōnni' yudo' fariseo, ate' rē' légaquiē':

⁵¹ —¿Naru' richúguru' queē' tu bōnni' gátiē' lu xibá queēru' channō cabí yóniru' lē' zí'alō para inōziru' bi benē'?

⁵² Ní'irō bulu'bi'ē didza' ia'zica'rē' na', tē' lē':

—¿Nácatso' ca' li' bōnni' Galilea? Bulaba le nazúaj lu guichi lá'ayi, ate' uyú' catu caz birúaj nitúē' bōnni' ru'ē didza' uláz queē' Dios luyú Galilea.

⁵³ Ní'irō yōjhuōjgaquiē' lidxi que queēgaquiē'.

8

¹ Guyijē' Jesús ga naca lu Gu'fa Yaga Olivo.

Nígula nagutsajanu xibá que yōl-la' nutsaga na'

² Cate' za' rení' budxinē' Jesús ra' yudo', ate' bila'dxin yúgu'tē bōnachi ga zoē'. Gurō'ē Jesús, rusédinē' légaquiē'. ³ Ní'irō yugu' bōnni' yudo' usedi, en yugu' bōnni' yudo' fariseo duchē'ēgaquiē'-nu tu' nígula ga zoē' Jesús, tu' gula'dzōlinē'-nu ni' riguítspanu xibá que yōl-la' nutsaga na'. Bulu'sudxinē'-nu lógaca bōnachi na' tu'zē náagaca Jesús, ⁴ ate' tē' Lē':

—Bōnni' Usedi, nígula ni guzxoñtu'-nu ni' runnu dul-la' riguítspanu xibá que yōl-la' nutsaga na'. ⁵ Lu xibá queē' Moisés, gunná bē'enē' netu' uládxí'tu'-nu guiōj nu nígula runnu caní, para gátinu. ¿Názxiga Li', nacxi rnno'?

⁶ Caní gula'nnē' para ila'z'í' bē'ē Jesús para ila'zéqui'nē' ulu'zéguiē' Lē' didza'. Ní'irō biyéchuē' Jesús, ruyúē' lu yu, en ruzúajē' lu yu na' len xibōn nē'ē. ⁷ Cate' gula'nábide'enē' Lē', ní'irō buzuínē' Jesús, en rē' légaquiē':

—Núli' cabí nunli' dul-la' isí loli' uládxí'li'-nu guiōj.

⁸ Leyúbólō biyéchuē' Jesús, ruyúē' lu yu, en buguélē'ē ruzúajē' leyúbólō lu yu na'. ⁹ Cate' bila'yōnnē' didza' ni, bulu'xōsa ládxí'do'gaquiē' légaquiē', ate' bila'rúajē' tu tuē'. Gula'sí lógacaquiē' bōnni' gularō ga bidxintē bōnni' cuidí'. Nagá'anē' Jesús ni', dzáganu nígula na' Lē' gatsaj láhui'lō nupa na' tu'zē náagaca Lē'. ¹⁰ Ní'irō buzuínē' Jesús leyúbólō, en cuntú nu bilé'enē' nu ruzegui lēnu didza', pero túzínu nígula na', ate' rē'ē-nu:

—Nígula, ¿gazxi nacuá' nupa na' bulu'zegui li' didza'? ¿Naru' cabí zoa nu bōnni' richúguiē' quiu'?

¹¹ Lēnu rnnanu:

—Cuntu nu caz, Xan.

Ní'irō Jesús rē'ē-nu:

—Lézca' neda', bití' richuga' quiu'. Bōaj lidxu', en bití'rō gunu' dul-la'.

Náquiē' Jesús bení' quégaca bōnachi yōdzóliō

¹² Leyúbólō Jesús bē'lenē' bōnachi didza', rnnē':

—Neda' naca' bení' quégaca bōnachi yōdzóliō. Nu bōnni' zá'lenē' neda', bití' tē' ga naca chul-la que dul-la', pero tu bení' sóalen bōnni' na' le ulufí lē' naca gata' yōl-la' na'bán idú queē'.

¹³ Ní'irō tē' Lē' bōnni' yudo' fariseo, ta'nnē':

—Li' runu' ba nalí que la' cuinsu'. Bití' naca lesaca' le runu' ba nalí. Nítisō naca.

¹⁴ Bubi'ë didza' Jesús, rë' légaquië':

—Sal-la' runa' ba nali' que la' cuinsa', idutë li naca le runa' ba nali', tu' nözda' ga birúaja', en ga tseja', pero libí'ili' biti' nözili' gazxi za'a, en calëga gazxi tseja'. ¹⁵ Libí'ili' ruchi'a rusöröli' ca nácagaca le taca yödžölió ni, pero neda', rásasö quia' cuntú nu bönni' ruchi'a rusöröa' queë'. ¹⁶ La'tu' uchi'a usöröa', ca nácatë uchi'a usöröa', tu' calëga neda'sö uchi'a usöröa', pero Xuza' nasöl-lë'ë neda' gunë' neda' tsözxön. ¹⁷ Lësca' caní lu xibá queë' Moisés nazúaj lu guichi le rnna: Le tunë' ba nali' chopë' bönni', idutë li naca. ¹⁸ Neda' runa' ba nali' que la' cuinsa', ate' Xuza' nasöl-lë'ë neda', runë' ca' ba nali' quia'.

¹⁹ Ní'irö bönni' yudo' fariseo na' gula'nábinë' Lë', ta'nnë':

—¿Gaxi zóatsé' Xuzu'?

Bubi'ë didza' Jesús, rë' légaquië':

—Biti' núnbë'ëli' neda', en biti' núnbë'ëli'-në' Xuza'. La'tu' núnbë'ëli' neda', lësca' Xuza' gúnbë'ëli'-në'.

²⁰ Yugu' didza' ni bë'ë Jesús cate' ni' zoë' rusédinë' bönachi lu chila yudo', ga na' nacuá' guí'ina gapa ta'gu'ë gun que yudo', pero cuntú nu guzxön Lë', tu' cabí ridxini dza queë' tsu'ë lu ná'agaquië'.

Rnnë' Jesús: "Ga tseja' neda', biti' gaca guídali'"

²¹ Leyúböló Jesús rë' légaquië', rnnë':

—Uzá'a yödžölió ni, ate' uguí'jali' nu usólá libí'ili', pero ugá'ana dul-la' nabága'li', en gátili'. Ga tseja' neda', biti' gaca guídali'.

²² Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' biti' gaca guídali'."

²³ Jesús rë' légaquië':

—Libí'ili' nácali' que luyú dë cadxi'iló ni, pero neda' za'a yehua' yubá xitsá'. Libí'ili' nácali' bönachi yödžölió ni, pero neda' biti' naca' bönni' yödžölió ni. ²⁴ Que lë ni na' gudxa' libí'ili': Ugá'ana dul-la' nabága'li', en gátili'. Channö cabí tséajlë'ëli' naca caza' Nu usólá, ugá'ana dul-la' nabága'li', en gátili'.

²⁵ Ní'irö gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' libí'ili' dza ni'te. ²⁶ Zían le ral-la' guía' libí'ili', en uchi'a usöröa' le naca queëli'. Didza' idutë li ru'ë Xuza' nasöl-lë'ë neda', ate' didza' riyönda' ru'ë Lë', ru'í'lena' bönachi yödžölió ni.

²⁷ Biti' gula'yéajni'inë' ru'í'lenë' légaquië' didza' ca naca queë' Dios Xuz. ²⁸ Que lë ni na' Jesús rë' légaquië':

—Cate' idxin dza uchísali' neda', Bönni' Guljë' Bönachi, gútili' neda', ní'irö guéquibe'eli' naca caza' Nu rusólá, en biti' bi runa' rásasö quia', pero ca na' ruluf'inë' Xuza' neda', ca' ruá'a didza'. ²⁹ Xuza' nasöl-lë'ë neda' zóalenë' neda'. Biti' nucá'anë' Xuza' neda' tuza', tu' rúntica'sa' le raza ládxë'ë Lë'.

³⁰ Cate' bë'ë Jesús didza' ni, bönni' zían gula'yéajlë'ë Lë'.

Nupa nácagaca zxi'inë' Dios, en nupa nadžungaca lu na' dul-la'

³¹ Ní'irö Jesús gudxë' yugu' bönni' judío na' ta'yéajlë'ë Lë', rnnë':

—Channö gúntica'sili' ca rnna xtídza'a, gácali' idú bönni' uséda quia'. ³² Gúnbë'ëli' le naca idutë li, ate' le naca idutë li na' usólá libí'ili'.

³³ Bulu'bi'ë didza', të' Lë':

—Abraham naquië' xuz gudödi queëtu', en cuntú nu ben netu' bönni' nadó'ogaca. ¿Rnnatso': "Usólá libí'ili'?"

³⁴ Jesús rë' légaquië':

—Le nácatë rea' libí'ili': Yúgu'të nupa tun dul-la', nadžungaca lu na' dul-la'. ³⁵ Nu naca bönni' nadó'o biti' ugá'anatica'sö lidxë' xan yu'u, pero nu naca zxi'inë' xan yu'u na' rugá'anatica'sö lidxi nu na' naca xan yu'u. ³⁶ Caní naca, channö Nu na' naca Zxi'inë' Dios usólá libí'ili', le nácatë uláli'. ³⁷ Nözda' naquië' Abraham xuz gudödi queëli', pero rizóa ribó'öli' gútili' neda', tu' cabí nazi' lu ná'ali' xtídza'a. ³⁸ Neda' ruá'a didza' ca naca le bilé'eda' ga na' zoë' Xuza', pero libí'ili' runli' le biyönili' ga zoa xuz quézili'.

³⁹ Bulu'bi'ë didza', të' Lë':

—Abraham náquië' xuztu'.

Ní'irö Jesús rë' légaquië':

—La'tu' nácali' idú zxi'ini xi'sóë' Abraham, gunli' ca na' benë' Abraham. ⁴⁰ Na'a, rizóa ribó'öli' gútili' neda', sal-la' ru'í'lena' libí'ili' didza' idutë li, didza' na' biyönda' bë'ë Dios. Biti' benë' Abraham caní. ⁴¹ Libí'ili' runli' ca run xuz quézili'.

Ní'irö të' Lë':

—Netu' biti' ca' nácatu' bi'i lando'. Tuzë Dios náquië' Xuztu'.

⁴² Ní'irö Jesús rë' légaquië':

—La'tu' náquië' Dios idú Xúzili', huadxi'ili' neda', tu' birúaja' neda' ga zoë' Dios, en bida' luyú ni, ate' calëga rácasô quia' bida', pero Dios caz gusôl-lë'ë neda'. ⁴³ ¿Bizx que biti' gaca tsëajni'ili' didza' ru'a'a? Naca tu' cabí rë'ënili' uzë nágali' xtídza'a. ⁴⁴ Xuz quëzili' naca tu' xihui'. Néquili' que tu' xihui', en rë'ënili' gunli' le rizë'ladxi' xúzili' na'. Dza ni'te naca tu' xihui' nu guti bônachi, en cabí nazí' lu në'e le naca idútë li, tu' cabí ruí' didza' idútë li. Cate' rizí' yë' tu' xihui', ca naca caz ruí' didza', tu' naca nu rizí' yë', en naca ca xúzgaca caz nupa ta'zí' yë'. ⁴⁵ Tu' ru'a'a neda' didza' idútë li biti' réajlë'ëli' neda'. ⁴⁶ ¿Núzxilôli' gaca usubága'li' neda' dul-la'? Channö ru'a'a didza' idútë li, ¿bizx que biti' réajlë'ëli' neda'? ⁴⁷ Nu naca queë' Dios, ruzë nagui xtídze'ë Dios, pero libí'ili', tu' cabí nácali' queë' Dios, biti' ruzë nágali' xtídze'ë.

Cristo zoa cazë' zí'atëlö ca Abraham

⁴⁸ Ní'irö bulu'bi'ë didza' yugu' bönni' judío, të' Jesús:

—Catëz gunnatu' cate' gunnatu' nacu' bönni' Samaria, ate' dzaga tu' xihui' Li'.

⁴⁹ Bubi'ë didza' Jesús, rë' légaquië':

—Biti' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsólá'alö.

⁵⁰ Biti' runa' zxôn cuina'. Zoa Nu run zxôn neda', ate' Lë' ruchi'a rusörörë' rë'u. ⁵¹ Le nácate rea' libí'ili': Nu bönni' si' lu në'ë xtídza'a, biti' ca' gátie' bönni' na'.

⁵² Ní'irö yugu' bönni' judío na' të' Lë', ta'nnë':

—Na'a réquibë'etu' dzaga tu' xihui' Li'. Abraham gútië', ate' gulátië' ca' bönni' gulu'ë didza' uláz queë' Dios, pero Li' rnno': "Nu bönni' si' lu në'ë xtídza'a, biti' ca' gátie' bönni' na'."

⁵³ ¿Naru' nácaterötsô' Li' zxôn ca xúziru' Abraham? Gútië' lë', ate' gulátië' ca' bönni' gulu'ë didza' uláz queë' Dios. ¿Nuzxi caz run cuinu'?

⁵⁴ Bubi'ë didza' Jesús, rë' légaquië':

—Channö neda' guna' zxôn cuina', yöl-la' zxôn na' biti' bi gaca. Xuza' runë' neda' zxôn, ate' libí'ili' rnna'li' náquië' Dios queë'li'. ⁵⁵ Libí'ili' biti' núnbë'ëli'-në' Dios Xuz, pero neda' núnbë'a-në'. La'tu' inniá': Biti' núnbë'a-në', gaca' nu rizí' yë' ca na' nácali' libí'ili', rizí' yë'ëli'. Na'a, le nácate núnbë'a-në', en nazí' lu na'a xtídze'ë. ⁵⁶ Xúzili' Abraham budzéjanë' tu' ral-la' ilé'enë' dza soa' yödözilió ni, en sal-la' gútië' dza ni'te, bilé'enë' le, en budzéjade'enë'.

⁵⁷ Ní'irö yugu' bönni' judío na' të' Jesús, ta'nnë':

—Biti' yu'inu' chi-un iz. ¿Naru' bilé'etsenu' Abraham?

⁵⁸ Jesús rë' légaquië':

—Le nácate rea' libí'ili': Zí'atëlö ca soë' Abraham, neda' zoa caza'.

⁵⁹ Ní'irö gula'guélë'ë guíöj para ulu'ladxë' Jesús, pero Lë' bunítitë cuinë', en burúajë' lö'a yudo' na'. Gudödë' gatsaj láhuil'ö ga na' nacu'ë, ate' söhuóje'.

9

Ruínë' Jesús tu bönni' guljë' nachúl-latë lahuë'

¹ Cate' gudödë' Jesús tu lataj, bilé'enë' tu bönni' ni' guljë' nachúl-latë lahuë'. ² Gula'nábinë' Jesús bönni' usëda queë', ta'nnë':

—Bönni' Usedi, ¿nuzxi ben dul-la'? ¿Naru' bönni' ni o xuz xinë'ë tu' guljë' nachúl-latë lahuë'?

³ Bubi'ë didza' Jesús, rë' légaquië':

—Biti' naca tu' benë' dul-la' bönni' ni, en calëga tu' gulunë' dul-la' xuz xinë'ë, pero naca para ilá' lahui yöl-la' huáca queë' Dios ni'a queë' bönni' ni. ⁴ Run bayudxi gunru' xichinë' Xuza' nasöl-lë'ë neda', tsanni ni naca ca lahui' dza. Huadxin dza gaca chul-la que yöl-la' guti, cate' cuntú nu gaca gun dxin. ⁵ Tsanni ni zoa' yödözilió ni, naca' bení' quégaca bônachi yödözilió.

⁶ Cate' Jesús budxi bë'ë didza' ni, gurú'unë' zxóna' lu yu, en benë' gúna'do' len zxóna' na', ate' bugu'ë guna' na' guíöj lahuë' bönni' na' nachul-la lahuë'. ⁷ Ní'irö rë' lë':

—Guyëaj yójtibi lo' lu beaj nisa nazí' i le Silóe.

Silóe naca tu didza' hebreo le rnna: Nasöl-la'.

Ní'irö bönni' na' nachul-la lahuë' guyijë' ni', yójtibi lahuë'. Cate' buzë'ë ni' chirilé'enë'.

⁸ Ní'irö bulu'bani bônachi dzaga yu'u queë', en nupa ni' bila'lë'e lë' zí'atëlö cate' ni' nachul-la lahuë', ta'nná:

—¿Naru' calëga bönni' ni bönni' na' ribö'ë rinabë' nu bi unödzej queë'?

⁹ Bal-lë' ta'nnë':

—Lë' na'.

Ia'bal-lë' ta'nnë':

—Calëga lë', pero ca rna' lahuë' bönni' na', rna' lahuë' ca' bönni' ni.

Lë' rnnë':

—Neda' na'.

¹⁰ Ní'irō gula'nábinē' lē', ta'nnē':

—¿Nacxi caz guca, gualaj guiōj lo'?

¹¹ Bubi'ē didza', rē' légaquiē':

—Bōnni' na' lē' Jesús benē' gúna'do', ate' gudēbē' gúna'do' na' guiōj lahua', en gudxē' neda': "Guyéaj ra' beaj nisa nazí'i le Siloé, yōjtibi lo'." Guyija' ni', yōjtibi lahua', ate' guyálajtē' guiōj lahua'.

¹² Ní'irō gula'nábinē' lē', ta'nnē':

—¿Gazxi zoē' bōnni' na'?

Lē' rē' légaquiē':

—Biti' nōzda'.

Yugu' bōnni' yudo' ta'náb yúdxinē' bōnni' na' gualaj guiōj lahuē'

¹³ Ní'irō gula'chē'ē bōnni' na' zí'alō nachul-la lahuē', en bulu'sudxinē' lē' lógaquiē' bōnni' yudo' fariseo. ¹⁴ Tu' naca dza lá'ayi quégaquiē' cate' benē' Jesús gúna'do' na', en gusaljē' guiōj lahuē' bōnni' na' zí'alō nachul-la lahuē', ¹⁵ que lē' ni na' yugu' bōnni' yudo' fariseo na' gula'nábinē' lē' leyúbölō nacxi guca gualaj guiōj lahuē'. Lē' gudxē' légaquiē':

—Budxiē' gúna'do' guiōj lahua', ate' yōjtiba' le, en rilé'eda'.

¹⁶ Ní'irō gulu'ē didza' bal-lē' bōnni' yudo' fariseo na', ta'nnē':

—Biti' nasöl-lē' Dios bōnni' na', tu' cabí rapa chi'ē dza lá'ayi.

Ia'bal-lē' ta'nnē':

—¿Naru' huácatsō tu bōnni' dul-la' gunē' yugu' yöl-la' huáca runē' bōnni' na'?

Caní guca, bila'rúajē' choplö. ¹⁷ Leyúbölō gula'nábinē' bōnni' na' zí'alō nachul-la lahuē', ta'nnē':

—¿Bizxi rnnno' li' queē' bōnni' na', gusaljē' guiōj lo'?

Lē' rnnē':

—Náquiē' bōnni' ru'ē didza' uláz queē' Dios.

¹⁸ Biti' gula'yéajlē'ē bōnni' judío unná bē' na' guljē' nachúl-latē lahuē' bōnni' na', en gualaj guiōj lahuē', cate' bulu'lídzarē' xuz xinē'ē bōnni' na' gualaj guiōj lahuē', ¹⁹ ate' gula'nábinē' légaquiē', ta'nnē':

—¿Naru' náquiē' bōnni' ni xzí'inili', rnnali' guljē' nachúl-latē lahuē'? ¿Nacxi caz naca rilé'enē' na'a?

²⁰ Bulu'bi'ē didza' xuz xinē'ē na', tē' légaquiē':

—Nōzitu' bōnni' ni náquiē' xzí'initu', en guljē' nachúl-latē lahuē', ²¹ pero nacxi guca, rilé'enē' na'a, bití' nōztu', en nuzzi na' gusalaj guiōj lahuē', bití' nōztu'. Guli'nabi-nē' lē', tu' chináquiē' bōnni' chinaca. Lē' cazē' quíxjö'ē.

²² Caní gula'nnē' xuz xinē'ē bōnni' na' zí'alō nachul-la lahuē', tu' tádxinē' yugu' bōnni' judío unná bē', tu' chigulún xtídzagaquiē' bōnni' judío na' channō nu bōnni' si' lu nē'ē Jesús náquiē' Cristo, tsaz ulu'béajē' bōnni' na' lu yu'u ga tu'dubē' bōnni' judío, en tu'sédē' queē' Dios. ²³ Que lē' ni na' gula'nnē' xuz xinē'ē: "Guli'nabi-nē' lē', tu' chináquiē' bōnni' chinaca."

²⁴ Ní'irō yugu' bōnni' judío unná bē' bulu'lídzē' leyúbölō bōnni' na' zí'alō nachul-la lahuē', ate' tē' lē':

—Ni'a queē' Xanru' Dios gudixjö' le nácatē. Netu' réquibe'etu' bōnni' na' náquiē' bōnni' dul-la'.

²⁵ Ní'irō bubi'ē didza', rnnē':

—Channō náquiē' bōnni' dul-la' bití' nōzda'. Tu le nōzda'. Zí'alō nachul-la lahua', ate' na'a rilé'eda'.

²⁶ Gula'nábinē' lē' leyúbölō, ta'nnē':

—¿Bizxi benē' quíu'? ¿Nacxi benē' gusaljē' guiōj lo'?

²⁷ Bubi'ē didza', rē' légaquiē':

—Chigúdxí caza' libí'ili', pero bití' gú'unili' si' lu ná'ali' xtídz'a'a. ¿Bizx que na' rē'ēnili' yōnili' leyúbölō? ¿Naru' rē'ēnili' tá'ali' ca' Lē'?

²⁸ Ní'irō bulu'lídza zí'ē lē', ta'nnē':

—Li' do'o Lē', pero netu' dá'atu' Moisés. ²⁹ Netu' nōztu' Dios bē'lenē' Moisés didza', pero ca naca queē' bōnni' ni, bití' nōztu' nuzzi caz gúsöl-la' Lē'.

³⁰ Ní'irō bubi'ē didza' bōnni' na', rē' légaquiē':

—Lē' ni run ga rubánida'. Libí'ili' bití' nōzili' nuzxi gúsöl-la' bōnni' ni, ate' Lē' gusaljē' guiōj lahua'. ³¹ Nōziru' bití' riyónnē' Dios yugu' bōnni' dul-la', pero channō reaj ládxē'ē tu bōnni' Dios, en runē' ca rē'ēnē' Lē', Dios riyónnē' bōnni' ni. ³² Dza ni'te bití' riyón nu gunná channō nu bōnni' gusaljē' guiōj lahuē' tu bōnni' guljē' nachúl-latē lahuē'. ³³ La'tu' cabí náquiē' bōnni' ni queē' Dios, bití' bi gaca gunē'.

³⁴ Ní'irō bulu'bi'ē didza', tē' lē':

—Ca gulju' naca bē' nabágu'u dul-la'. ¿Naru' li' ruséditsenu' netu'?

Ní'irō bulu'béajë' lë' ní'ilō.

Nupa nácagaca chul-la niti

³⁵ Biyōnnë' Jesús ca gulunë' bōnni' judío unná bē', bulu'béajë' bōnni' na' zí'alō nachul-la lahuë'. Cate' budzáguë' lë', gudxë' lë':

—¿Ba réajlë'u Xzí'inë' Dios?

³⁶ Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

³⁷ Jesús rë' lë':

—Chibilë'enu' Lë', ate' neda' ni ru'ílena' li' didza', naca' Xzí'inë' Dios.

³⁸ Ní'irō bōnni' na', guyalaj guiōj lahuë', guyéaj ládxë'ë Jesús, en rë' Lë':

—Xan, réajlë'a Li'.

³⁹ Jesús rnnë':

—Para uchi'a usōrōa' bōnachi bida' yōdzōliō ni, para ulu'lë'e nupa nachul-la nanítigaca, en ilaca ca nu nachul-la lahui nupa téquiquegui ta'lë'e.

⁴⁰ Cate' yugu' bōnni' yudo' fariseo na' nacuá'lenë' Jesús bila'yōnnë' didza' ni, ní'irō tē' Lë':

—¿Naru' nachul-la nanítitsatu'?

⁴¹ Bubi'ë didza' Jesús, rë' légaquië':

—La'náru' nachúl-lasō guiōj loli', biti' ibága'li' dul-la'. Na'a rnnali': "Rilé'etu'." Que lë ni na' nabága'li' dul-la'.

10

Rucúdzu'ë didza' Jesús que lë'a quégacaba' bō'cu' xzila'

¹ Gunnë' ca' Jesús:

—Le nácátë rea' libí'ili': Nu bōnni' biti' razië' saca' ga nu riyaza lë'a quégacaba' bō'cu' xzila', pero tsázië' saca' ga yúbölō, bōnni' ni náquië' gubán, en ribán cazë'. ² Nu bōnni' razië' saca' ga nu riyaza náquië' bōnni' run chi'i cazë' bō'cu' xzila' na'. ³ Para tsázië' bōnni' ni, risalaj nu zoa run chi'i ga nu riyaza, ate' ta'yōniba' bō'cu' xzila' na' chi'ë, en tu'únbë'ëba'-në'. Lë' rulidzë'-ba' que queëba' ca légacaba', en rubéajë' yugu' bō'cu' xzila' na'. ⁴ Cate' chinubéajë'-ba' yúgu'tëba' bō'cu' xzila' néquigacaba' queë', rōjnōruë' lógacaba', ate' bō'cu' xzila' na' rōjnógacaba' lë', tu' tu'únbë'ëba' chi'ë. ⁵ Bōnni' yúbölō biti' tsōjnógacaba' lë', pero ulu'zxúnajba' queë', tu' cabí núnbë'gacaba' chí'igaquië' bōnni' yúbölō.

⁶ Le rucudzu' didza' ni gudxë' Jesús légaquië', pero biti' gula'yéajni'inë' lë na' rë' légaquië'.

Náquië' Jesús ca bōnni' rapa chi'ë-ba' bō'cu' xzila'

⁷ Ní'irō Jesús rë' légaquië' leyúbölō, rnnë':

—Le nácátë rea' libí'ili': Neda' naca' ca tu ga ta'yázaba' bō'cu' xzila'. ⁸ Chigula'lë'ë zían bōnni' gula'nnë' nácagaquië' Cristo, pero yúgu'të bōnni' na' bila'dxinë' zí'alō ca neda', nácagaquië' gubán, en ta'bán cazë', ate' biti' bulu'zë nágaba' bō'cu' xzila' na' légaquië'. ⁹ Neda' naca' ca tu ga nu riyaza. Núti'tës bōnni' tsázalenë' neda', ulë' bōnni' na', en gáquië' ca tuba' bō'cu' xzila' rázaba', en rurúajba', en ridzōliba' le ráguba'.

¹⁰ 'Za'zë' bōnni' gubán para cuanë'-ba', en gútië'-ba', en usunítie'-ba'. Neda' bida' para gata' yöl-la' na'bán idú quégaca bōnachi nácagaca ca bō'cu' xzila' quia'. Le nácátë gata' quégaquië' yöl-la' na'bán idú na'. ¹¹ Neda' run chí'igaca' bōnachi quia' ca runë' bōnni' na', lu yöl-la' dxi'i ladxi' queë' rapa chi'ë yugu' bō'cu' xzila'. Bōnni' na' rapa chi'ë-ba' bō'cu' xzila' caní zoa cazë' udōdë' yöl-la' na'bán queë' ni'a quégacaba' bō'cu' xzila' queë'. ¹² Tu bōnni' nazxjë' rapa chi'ë-ba' bō'cu' xzila', cate' rilé'enë' zá'aba' bō'cu' guí'a sínia', rucá'anë'-ba' bō'cu' xzila' na', en ruzxúnajë', ate' bō'cu' guí'a sínia' na' ráguya'aba' yugu' bō'cu' xzila' na', en rusilásiba' légacaba'. Caní runë' bōnni' na' rapa chi'ë-ba' bō'cu' xzila' tu' cabí náquië' idú nu run chi'i-ba' bō'cu' xzila', ate' biti' néquigacaba' que cazë' bō'cu' xzila' na'. ¹³ Ruzxúnajë' bōnni' nazxjë' na' tu' rapa chi'ë-ba' bō'cu' xzila' na' para sí'isë' dumí, en biti' ru'í ládxë'ë-ba' bō'cu' xzila' na'.

¹⁴⁻¹⁵ 'Neda' naca' bōnni', lu yöl-la' dxi'i ladxi' quia' run chí'igaca'-ba' bō'cu' xzila'. Ca na' núnbë'ë Xuza' neda', ate' neda' núnbë'a-në' Xuza', lësca' caní núnbë'egacada' bōnachi quia' nácagaca ca bō'cu' xzila' quia', en rudōda' yöl-la' na'bán quia' ni'a quégacaba' bō'cu' xzila' na', ate' bō'cu' xzila' na' néquiquequiba' quia' núnbë'gacaba' neda'. ¹⁶ Lësca' nacuá'aba' ia'zica'rōba' bō'cu' xzila' quia' biti' nabábagacaba' ni. Lësca' légacaba' ral-la' tsōjxi'gaca'-ba'. Légacaba' ulu'zë nágaba' chí'a, en ilácaba' tuz len ia'zica'rōba' bō'cu' xzila' quia', ate' neda' caz gun chí'igaca'-ba'.

¹⁷ 'Que lë ni na' nadxí'inë' Xuza' neda', tu' rudōda' yöl-la' na'bán quia', gu'a lataj nu guti neda', ate' uzi'a le leyúbölō, ubana' lu yöl-la' guti. ¹⁸ Cuntu nu bōnni' séqui'në' gútië' neda', pero neda' rudōdi caza' yöl-la' na'bán quia', gátia'. Dë lu na'a udōda' le, en dë lu na'a uzi'a le leyúbölō. Caní naca le gunná bé'enë' Xuza' neda'.

¹⁹ Cate' yugu' bönni' judío bila'yönnë' didza' ni, leyúbölö bila'rúajë' choplô ca téquinë' queë'. ²⁰ Zíánë' ta'nnë':

—Yu'u bö' xihui' Lë', en nachixi icjë'. ¿Bizx que ruzë nágalí' Lë'?

²¹ Ia'bal-lë' ta'nnë':

—Biti' ca' ru'ë caní didza' bönni' yu'u bö' xihui' lë'. ¿Naru' huácatsö bö' xihui' usalaj guiöj lógaquië' bönni' nachul-la lógaquië'?

Yugu' bönni' judío unná bë' tu'zöë' Jesús tsölá'alö

²² Raca beo' ziaga, en naca dza na' tunë' laní yödzo Jerusalén, tu'subanë' ca gula'gu'ë yudo' quégaquië' lu në'ë Dios. ²³ Ridë' Jesús ra' yudo' ga naca chila que, nazí' i le Chila Queë' Salomón. ²⁴ Yugu' bönni' judío unná bë' gula'gu'ë Jesús lë'alö, en të' Lë':

—¿Bátaxi caz usanu' runu' ga rō'ōtu' bōniga? Channō nacu' li' Cristo, ca nácatë gudíxjōi' netu'.

²⁵ Jesús rë' légaquië':

—Chigudxi caza' libí'ili', pero bití' réajlë'ëli' neda'. Yugu' dxin runa' tu' dë lu na'a uláz queë' Xuza' nácagaca bë' Nu naca'. ²⁶ Libí'ili' bití' réajlë'ëli' neda', tu' cabí nabábalenli' nupa nácagaca bö'cu' xzila' quia', ca na' chigudxi caza' libí'ili'. ²⁷ Ta'yóniba' bö'cu' xzila' quia' chí'a, en tu'ünbe'eba' neda', ate' neda' nünbe'egacada'-ba', ate' ridíjácalenba' neda'. ²⁸ Neda' runödza' yöl-la' na'bán idú quégacaba', ate' bití' ca' ila'nítiba', ate' cuntú nu sequi' ubéaj légacaba' lu na'a neda'. ²⁹ Xuza' Dios bennë' quia' légacaba', ate' Lë' nápatërë' yöl-la' huáca ca yúgu'të bōnachi, ate' cuntú nu sequi' ubéaj légacaba' lu në'ë Xuza'. ³⁰ Neda', en Dios Xuz, tuz nácatu'.

³¹ Leyúbölö yugu' bönni' judío unná bë' na' bulu'guélë'ë guiöj ulu'ladxë' Jesús. ³² Jesús rë' légaquië':

—Zian le naca dxi'a bena' loli' tu' dë lu na'a uláz queë' Xuza'. ¿Ní'a que bízxilö dxin dxi'a ni uládxí'li' neda' guiöj?

³³ Bulu'bi'ë didza' bönni' judío unná bë' na', të' Lë':

—Ní'a que dxin dxi'a bití' uládxí'tu' li' guiöj, pero tu' cabí rnníó' dxi'a queë' Dios, tu' nacu' li' bōnáchisö, en run cuinu' Dios.

³⁴ Bubi'ë didza' Jesús, rë' légaquië':

—¿Naru' cabí nazúaj lu guichi lu xibá queëli' ca gunnë' Dios, rñna: "Neda' rnníá: Nácali' yugu' dios"? ³⁵ Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ruí'í légaquië' dios, bönni' ni' Dios bë'lenë' légaquië' didza'. ³⁶ Dios bubéajë' neda' quez queë', en gusöl-lë'ë neda' yödžölíö ni. ¿Naru' rnnátsali' quia': "Li' bití' rnníó' dxi'a queë' Dios", tu' gunníá: Zxí'inë' Dios naca"? ³⁷ Channō cabí runa' dxin budödë' Xuza' Dios lu na'a, bití' ral-la' tséajlë'ëli' neda'. ³⁸ Channō runa' dxin budödë' Dios lu na'a, sal-la' bití' réajlë'ëli' neda' caz, guli' tséajlë' le nácagaca bë' dxin na' runa', para guéquibe'eli' náquië' Dios Xuz tuz len neda', ate' neda' ca' naca' tuz len Xuza'.

³⁹ Leyúbölö gula'zóa gula'bö'ë ila'zönë' Jesús, pero Lë' bulë' lu ná'agaquië'.

⁴⁰ Ní'irō guyijë' Jesús leyúbölö ila'tsölá'a yegu Jordán, ga ni' buquile' Juan bōnachi nisa zí'atélö, ate' bugá'anë' Jesús ni'. ⁴¹ Bila'dxin bōnachi zían ga zoë' Jesús, ta'nnë':

—Le nácatë bití' benë' Juan nitú yöl-la' huáca zxön, pero yúgu'të le gunnë' Juan na' ca ral-la' gaca queë' bönni' ni, idütë li zeaj naca.

⁴² Que lë ni na' gula'yéajlë'ë bönni' zían Jesús ga na' zoë'.

11

Le guca cate' gütie' Lázaro

¹ Dza ni' ré'enë' Lázaro, bönni' Betania, le naca lázagacanu María, en Marta. Nácanu Marta na' xzilanu María na'. ² Nácanu María na' nigula zanë' Lázaro, bönni' na' ré'enë', en nácanu ca' nigula na' gúlá unu le rilá' zxiixi ni'ë Xanru', en buzxinu ni'ë len guitsa' ícjanu. ³ Gula'söl-la' nu nigula zanë' Lázaro na' nu yöjödxi Jesús, gunná:

—Xan, buyútsöca', ré'enë' Lázaro, bönni' na' nadxí'inu-në'.

⁴ Cate' biyönnë' Jesús didza' ni, gudxë' nupa nacuá' ni', rnnë':

—Yödžohuë' ni bití' naca le guti lë' tsaz, pero naca para ilá' lahui yöl-la' zxön queë' Dios, ate' ni'a que yödžohuë' ni ilá' lahui ca' yöl-la' zxön quia' neda', Zxí'inë' Dios.

⁵ Jesús nadxí'inë' Marta, en nigula xzilanu Marta na', en Lázaro na'. ⁶ Sal-la' nadxí'inë' Jesús légaquië', cate' biyönnë' ré'enë' Lázaro, bugá'anë' ga na' zoë' ia'chopa dza ca'. ⁷ Cate' bizá'a chopa dza na', Jesús gudxë' yugu' bönni' uséda queë', rnnë':

—Uyéajru' leyúbölö luyú Judea.

⁸ Ní'irō yugu' bönni' uséda queë' të' Lë', ta'nnë':

—Bönni' Usedi, si' gula'zóa gula'bö'ë bönni' judío unná bë' ni' ulu'ladxë' Li' guiöj. ¿Naru' uyéajtsö' leyúbölö ni'?

⁹ Bubi'ë didza' Jesús, rë' légaquië':

—Nacuá' caz chinnu hora lahui' dza. Nu bönni' ridë' lahui' dza, biti' tsøjchégu'ë, tu' rilé'enë', tu' zóalen lë' bení' zoa yödžölió ni. ¹⁰ Channö ridë' bönni' na' chi'í dzö'ölö, røjchégu'ë, tu' cabí zóalen bení' lë'.

¹¹ Cate' budxi bë'ë Jesús didza' ni, ní'irö gudxë' légaquië':

—Rásië' Lázaro, böchi' luzá'aru', ate' tseja' neda', en usubana'-në'.

¹² Ní'irö yugu' bönni' usëda queë' tē' Lë', ta'nnë':

—Xan, channö rásië', huóáquië'.

¹³ Gunnë' caní Jesús tu' chigútië' Lázaro, pero légaquië' téquinë' gunnë': Rásië' Lázaro.

¹⁴ Ní'irö Jesús gudxë' légaquië' yálajdo', gunnë':

—Chigútië' Lázaro. ¹⁵ Rudzējada' tu' cabí zoa' ni', tu' gaca na'a tu le uzí'ili' xibé, le gun ga tséajlë'ëli' neda'. Uyējaju' na'a ga na' dë' Lázaro.

¹⁶ Ní'irö Tomás, bönni' na' tu'ë lë', Bönni' Bilidi' gudxë' ia'zica'rë' bönni' usëda queë' Jesús, rnnë':

—Uyējaju' ca' rë'u, en gátillenru'-në'.

Náquië' Jesús Nu rusubán nupa chinátigaca, enca' Nu nabániru'

¹⁷⁻¹⁹ Dë yödžö Betania gála'sö ga dë Jerusalén na', le naca ca rizá'aru' tu hóratëz. Que lë ni na' chibila'dxinë' zían bönni' judío ga na' nacuá'anu Marta, en María, en tu'huë tsáhuë'ë légacanu tu' gútië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yeru ba. ²⁰ Cate' biyönninu Marta didza' zë'ë Jesús, ní'irö birúajnu yu'u, yöjtságanu Lë', pero María bugá'ananu yu'u na'. ²¹ Marta na' rënu Jesús:

—Xan, la'tu' zu' ni, biti' gátie' bönni' zana'. ²² Lësca' na'a, nözda' yúgu'të le inábinu' Dios, Lë' gunnë' quui'.

²³ Jesús rë'ë-nu:

—Ubanë' bönni' zanu'.

²⁴ Marta rënu Lë':

—Nözda' ubanë' cate' idxín dza údxi cate' ulu'bán nupa chinátigaca.

²⁵ Ní'irö Jesús rë'ë-nu:

—Naca caza' neda' Nu rusubán nupa chinátigaca, enca' Nu nabánigaca bönachi. Nu tséajlë' neda', sal-la' gati nu na', ubán caz, ²⁶ ate' yúgu'të bönni' nabángaqüë', en ta'yéajlë'ë neda', biti' ca' ilátië' tsaz. ¿Réajlë'u lë ni?

²⁷ Marta rënu Lë':

—Ön, Xan. Réajlë'a nacu' Li' Cristo, Zxí'inë' Dios, Bönni' na' guzxi' lu në'ë Dios isöl-lë'ë yödžölió ni.

Ribödxë' Jesús tu' ru'í ládxe'ë nigula zanë' Lázaro

²⁸ Cate' budxi bë'ënu Marta na' didza' ni, böajnu yu'u, yöjlídzanu María, zxílanu, ate' bagáchi'sö rënu lënu:

—Bönni' Usedi zoë' ni, rulidzë' li'.

²⁹ Cate' biyönninu María didza' ni, la' guyástënu, zéajnu ga na' zoë' Jesús. ³⁰ Biti' rázinë' Jesús la' yödžödo' na', pero zóasë' ga na' yöjtságanu Marta Lë'. ³¹ Cate' yugu' bönni' judío na' nacuá'lenë' María na', en tu'huë tsáhuë'ë-nu bila'lé'enë'-nu guyásanu, en birúajnu carelô ga naca lu yu'u, ní'irö yöjnógaquië'-nu, ta'nnë':

—Uyējaju' ra' yeru ba tsøjchödxinu ni'.

³² Ní'irö bidxinnu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, biti' gátie' bönni' zana'.

³³ Cate' bilé'enë' Jesús ribödxinu, en ta'bödxë' ca' bönni' judío na' dzágagaquië'-nu, ní'irö buí'innë', en gunnëda' ládxe'ë. ³⁴ Rnnë':

—¿Gazxi bucáchi'li'-në'?

Të' Lë':

—Gudá uyú'.

³⁵ Gurödxë' Jesús. ³⁶ Ní'irö gula'nnë' bönni' judío na', ta'nnë':

—Buli'yútsöca' ca nadxí'ide'enë' lë'.

³⁷ Bal-lë' ta'nnë':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga biti' gátie' Lázaro?

Rubanë' Lázaro lu yöl-la' guti

³⁸ Leyúbölö gunnëda' ládxe'ë Jesús, ate' bidxinë' ra' yeru ba na'. Ba na' naca tu yeru nadaj lë'ë guí'a guíöj, ate' da' tu guíöjta'a le nusayaj ga nu riyaza le. ³⁹ Jesús gudxë' nupa nacuá' ni', rnnë':

—Guli'cúa guíöj ni.

Ní'irō Marta, nigula zanē' bōnni' nati na', rēnu Lē':

—Xan, chirilē'ē siguti tu' chiguca tapa dza nátiē'.

⁴⁰ Jesús rē'ē-nu:

—¿Naru' cabi chigudxi caza' li' channō réajlē'u, hualé'enu' yōl-la' zxon queē' Dios?

⁴¹ Ní'irō gula'gúē' guiōjta'a na' nusayaj ga nu riyaza yeru ba ga na' yu'ē bōnni' nati na'. Buyúē' Jesús zaca' lúxibalō, rnnē':

—Xuza', rea' Li', xclenu' tu' riyōnnu' neda'. ⁴² Neda' nōzda' riyōntiqui'sinu' neda', pero ruá'a didza' ni para ulu'z'í xibé bōnachi zían ni, en ila'yéajlē' Li' na' nasōl-lu'u neda'.

⁴³ Cate' budxi bē'ē Jesús didza' ni, zidzaj bulidzē', rnnē':

—Lázaro, burúaj nilō.

⁴⁴ Burúajē' bōnni' na' gúquiē' bōnni' nati lu yeru ba, narōligacarō ni'a nē'ē yugu' lári'do', en nagachi' ca' lahuē' ia'tú lári'do'. Ní'irō Jesús rē' légaquiē':

—Buli'li lari' na' narōli ni'a nē'ē, en guli'gu'ē lataj sē'ē.

Tun xtídzē'ē yugu' bōnni' judío unná bē' ilútiē' Jesús

(Mt. 26:1-5; Mr. 14:1-2; Lc. 22:1-2)

⁴⁵ Ní'irō zían bōnni' judío na' gula'yéajlē'ē Jesús, bōnni' na' yōjácálenē' tsōzxōn María, en bila'lē'enē' lē na' benē' Lē'. ⁴⁶ Bal-lē' yōjáciē' ga nacu'ē bōnni' yudo' fariseo, en bulu'siyōnnē' légaquiē' ca na' benē' Jesús. ⁴⁷ Ní'irō bōnni' yudo' fariseo na' bulu'dúbilenē' tsōzxōn bōnni' yudo' tu'ch'i'a tu'sōrōē', en yugu' bixúz unná bē', ta'nnē':

—¿Nacxi caz gunru'? Runē' bōnni' ni zían yōl-la' huáca zxon. ⁴⁸ Channō gūf'isiru-nē' lataj gunē' ca ni run cazē', ila'yéajlē' yúgu'tē bōnachi Lē', ate' idijáciē' bōnni' Roma ni, duquinnajgaquiē' yudo' lá'ayi queēru', en yōdzō queēru'.

⁴⁹ Ní'irō bē'ē didza' Caifás, bixúz lo iz na', en dzáquiē' légaquiē', rē' légaquiē':

—Lib'i'ili' biti' bi nōzili', ⁵⁰ en biti' réquibe'eli' run bayudxi gátie' tuē' bōnni' ni'a quégaca bōnachi, para cabi inti idú yōdzō.

⁵¹ Calēga rācasō queē' bē'ē didza' ni, pero tu' náquiē' bixúz lo iz na', que lē ni na' bē'ē didza' uláz queē' Dios ca ral-la' gátie' Jesús ni'a quégaca bōnachi yōdzō na'. ⁵² Gátie' Jesús, calēgasō ni'a que yōdzō na', pero gátie' ca' para utubē' yugu' zxf'inē' Dios násilasigaquiē', para ilácagaquiē' tuz. ⁵³ Cani guca, la' dza ná'asō gulún xtídzagaquiē' ilútiē' Jesús. ⁵⁴ Que lē ni na' bítirō gudē' Jesús yálajdo' gapa nacuá' bōnachi judío, pero buzē'ē ni', sa'yéajē' tu lataj gala' ga naca lataj cá'asō, ate' bidxinē' yōdzō Efraín, ga ni' bugá'anē', ate' dzágagaquiē' bōnni' usēda queē' Lē'.

⁵⁵ Dza na' chizá' gala' Laní Pascua quégagaquiē' bōnni' judío cate' tu'subanē' ca benē' Dios, bubéajē' bōnachi queē' luyú Egipto. Bila'rúaj bōnachi zían yugu' yōdzō ni', ate' gula'benē', sōjaquíē' Jerusalén cate' si' idxín laní na' para tsōjpá'a cuíngaquiē' ca naca que yudo'. ⁵⁶ Yugu' bōnni' na' nacu'ē Jerusalén tu'guiljē' Jesús, en cate' ni' nacu'ē chila yudo', gula'nabi luzá'agaquiē' tuē' ia'túē', ta'nnē':

—¿Bizxi rusáca'li'? ¿Huídatsē' laní, o biti' guidē'?

⁵⁷ Chigula'nná bē'ē yugu' bixúz unná bē', en yugu' bōnni' yudo' fariseo channō nu nōzi ga zoē' Jesús, ral-la' ududíxjōi'i légaquiē' para gaca tsōjxōngaquiē' Lē'.

12

María rigú'unu le rilá' zxixi ni'ē Jesús

(Mt. 26:6-13; Mr. 14:3-9)

¹ Cate' ni' nagá'anagaca ia'xopa dza cate' idxín Laní Pascua cate' tu'subanē' bōnni' judío ca benē' Dios, bubéajē' bōnachi queē' luyú Egipto, ní'irō bidxinē' Jesús lu yōdzō Betania, ga na' zoē' Lázaro, bōnni' na' gútiē', en bubanē' lu yōl-la' guti. ² Gula'gu'ē tu gū'i' huagu ni' le gahuē' Jesús. Gulú'unu María le ilahuē', ate' nūtsē'ē Lázaro ladaj bōnni' rō'ōlengaquiē' Jesús ga na' tahuē'. ³ Ní'irō gudéla'nu María ca tu guié le rilá' zxixi que yōj susén lasi idú, le nazáca'da', en gulú'unu le ni'ē Jesús. Buzzinu ni'ē len guitsa' ícjanu. Idútē lu yu'u na' guzé bō' zxixi. ⁴ Ní'irō bē'ē didza' tu bōnni' usēda queē' Jesús, lē' Judas Iscariote, zxf'inē' tu bōnni' lē' Simón, en náquiē' bōnni' na' udōdē' Jesús lu ná'agaquiē' yugu' bōnni' yudo', rnnē':

⁵ —¿Bizx que biti' gudó'o le rilá' zxixi na', le nazaca' lázxjaru' que tu iz, ate' huáca nu quisi dumí na' quégaca bōnachi yechi'?

⁶ Gunnē' caní, calēga tu' ru'i'ládxē'ē bōnachi yechi', pero tu' náquiē' gubán, en lē cazē' nu'ē buzudi dumí quégagaquiē', en rubéajlanē' dumí na' tu'chejē' lu buzudi na'. ⁷ Ní'irō Jesús rē' lē':

—Bē'ē-nu lataj, tu' naca lē ni bennu tu le nabá'a para dza igácha'a. ⁸ Yugu' bōnachi yechi' ila'cuá'lentica'sō lib'i'ili', pero neda' biti' ugá'anatica'sa' ga zoáli'.

Tun xtídzagaquiē' bōnni' judío unná bē' ilútiē' Lázaro

⁹ Cate' bila'yōnnē' bōnni' judío zoē' Jesús yōdz Betania, bila'dxinē' zíanē' ni', calēgasō tu' zoē' Jesús ni', pero lēsc'a' tu' tē'ēnnē' ila'lē'enē' Lázaro, bōnni' na' busubanē' Jesús lu yōl-la'

guti. ¹⁰ Ní'irö gulún xtídza'gaquië' yugu' bixúz unná bē', ilútië' ca' Lázaro, ¹¹ tu' ta'yéajlë'ë zían bönni' judío Jesús ni'a queë' Lázaro na', en chinulá'alengaquië' yugu' bixúz unná bē' na'.

*Len yöl-la' ba zxön razië' Jesús Jerusalén
(Mt. 21:1-11; Mr. 11:1-11; Lc. 19:28-40)*

¹² Bönachi zían bila'dxín Jerusalén dza Laní Pascua, ate' dza buropi na' ta'yöni zë'ë Jesús ni'. ¹³ Ní'irö gula'guitsjë' zin, en bila'rúajë' sôjxi'gala'gaquië' Jesús, ate' gulu'ë zidzaj didza', ta'nnë':

—Yöl-la' ba Dios! Yöl-la' ba Bönni' ni zë'ë uláz queë' Xanru', para inná bé'enë' bönachi Israel!

¹⁴ Budzölinë' Jesús tuba' búrrodo', ate' gudxië'-ba' ca na' nazúaj lu guichi lá'ayi, rnna:

¹⁵ Biti' gádxili', libí'ili', zóali' yödzö Sión!

¡Buli'yútsóca, zë'ë Bönni' inná bé'enë' libí'ili'!

¡Dxië'-ba' tuba' búrrodo'!

¹⁶ Cate' ni' si' guca lë ni, biti' gula'yéajni'inë' bönni' usëda queë' Jesús, pero gudödi ni', cate' bubanë' Jesús lu yöl-la' guti, en buëpë' yehua' yubá queë', ní'irö yöjnéquequinë' lë ni nazúaj lu guichi lá'ayi ca ral-la' gaca queë', ate' guca queë' caní.

¹⁷ Lëscá' yugu' bönni' na' gula'cuá'lenë' Jesús cate' ni' bulidzë' Lázaro, bönni' na' yu'ë yeru ba, en busubanë' lë' lu yöl-la' guti, gulunë' ba nalí queë'. ¹⁸ Que lë ni na' ca' bila'rúajë' bönni' yöjxi'gala'gaquië' Jesús, tu' bila'yönnë' ca naca yöl-la' huáca ni benë' Lë'. ¹⁹ Ní'irö gula'nnë' la' légacasë' bönni' yudo' fariseo, ta'nnë':

—Chinaca bë' biti' bi séqui'ru' gunru'. Buli'yú ca dá'gaca yúgu'të bönachi Lë'.

Yugu' bönni' zi'tu' tu'guiljë' Jesús

²⁰ Bal-lë' bönni' zi'tu' dzágagaquië' nupa na' bila'dxín Jerusalén dza Laní Pascua na' para ila'yéaj lúyá'gaquië' Dios. ²¹ Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yuë' lahuë', ta'nnë':

—Bönni', rë'ënitú' ilé'etu'-në' Jesús.

²² Guyijë' Felipe na', en yöjödxë' ca' Andrés. Ní'irö Andrés, en Felipe na' gulë' ca' Jesús.

²³ Bubi'ë didza' Jesús, rë' légagaquië':

—Chizóa idxín dza gátia' neda', Bönni' Guljë' Bönachi, huöja' xilatja' yehua' yubá. ²⁴ Le nácatë rea' libí'ili': Ugá'ana cá'asö tu xisedo' channö cabí igachi' luyú, en údxi que. Channö údxi que xisedo' na', ate' ilén, yënni'tërö unödza. ²⁵ Nu bönni' ruí'i lúdxí'dë'ë yöl-la' na'bán queë', unítie' le, tu' gátie' tsaz bönni' na'. Nu bönni' biti' ruí'i lúdxë'ë yöl-la' na'bán dë queë' yödölió ni gun chí'ë le ga idxinrö dza gata' yöl-la' na'bán idú queë'. ²⁶ Channö rë'ëné' nu bönni' gunë' xichina', ral-la' tē'ë neda' bönni' na', ate' ga ni' tsöjsóá' neda', ni' tsöjsóë' ca' bönni' na' runë' xichina'. Channö runë' xichina' nu bönni', Xuza' Dios gunë' bal bönni' na'.

Rigútxjō'ë Jesús ca si' ilútië' Lë'

²⁷ Gunnë' ca' Jesús:

—Na'a rō'a böniga neda'. ¿Nacxi innatsa'? ¿Naru' innía': Xuza', busölá neda' lu le gaca quia' na'a? Que lë ni na' bida', para guá' ilena' le ral-la' gaca quia' na'a. ²⁸ Xuza', ben ga ilá' lahui yöl-la' zxön quiu'.

Ní'irö biyón chi'i Nu ruí'i didza' yehua' yubá, rnna:

—Chibéna' ga nalá' lahui yöl-la' zxön quia', ate' leyúbölö guna' ga ilá' lahui yöl-la' zxön quia' na'.

²⁹ Bila'yöni bönachi zían nacuá' ni' chí'ni, ate' ta'nná:

—Guziú' na' gunnë.

Ia'bal-la bönachi na' ta'nná:

—Tu gubáz lá'ayi queë' Dios bë'lenë' Lë' didza'.

³⁰ Ní'irö bubi'ë didza' Jesús, rë' légagaquië':

—Biyón chí'ni, calëga para uzi'a xibé neda', pero para uzí'ili' xibé libí'ili'. ³¹ Chibidxín dza uchi'a usöröë' Dios bönachi yödölió ni. Na'a chú'unë' Dios tu' xihui' ní'ilö, nu na' rinná be'e bönachi yödölió ni. ³² Na'a, channö ilútië' bönni' neda', en ulu'chisé' neda' xitsá', guna' ga ulu'dubi yúgu'të bönachi ga zoa'.

³³ Didza' ni bē'ë Jesús naca bē' ca gátie'. ³⁴ Bönachi zían na' tē Jesús, ta'nná:

—Netu' biyónitu' nupa bulu'laba le rnna xibá queë' Dios, lë na' rnna: Sóatica'së' Cristo. ¿Nacxi caz naca, rnno' Lì': "Run bayudxi Bönni' Guljë' Bönachi, ulu'chisé' Lë' xitsá'"? ¿Nuzxi na' Bönni' Guljë' Bönachi?

³⁵ Ní'irö Jesús rë' légagaquië':

—Ia'tú chí'ido'osó sóalena' neda' libí'ili', en naca' bení' queë'li'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítili'. Nu bönni' ridë' ga chul-la niti biti'

nōzinē' gazxi sa'yéajē'. ³⁶ Tsanni ni zóalena' libí'ili', naca' bení' queēli'. Guli'tséajlē' neda' naca' bení' queēli' para ilé'eli' bení' na' naca idú.

Cate' Jesús budxi bē'ē didza' ni, yōjhuōjē' yōjcachi' lahuē' lógaquiē'.

Le run nigui bōnachi judío, para cabí ila'yéajlē' Jesús

³⁷ Sal-la' benē' Jesús zían yōl-la' huáca lógaquiē', bití' gula'yéajlē'ē Lē'. ³⁸ Caní guca lē na' buzúajē' Isaías lu guichi, bōnni' na' bē'ē didza' uláz queē' Dios, gunnē':

Xan, ¿nuzxi caz guyéajlē' didza' bē'ētu'?

¿Nuzxi caz buluí'inē' Xanru' yōl-la' huáca queē'?

³⁹ Caní guca, bití' guca ila'yéajlē'ē Jesús. Guca ca na' gunnē' ca' Isaías:

⁴⁰ Dios benē' ga gula'chul-la gula'nítie',

ate' guca zidi ládxi'do'gaquiē'

para cabí ila'lé'enē' len guiōj lógaquiē',

en cabí ila'yéajni'inē' lu icja ládxi'do'gaquiē'.

Bití' ulu'huóáquiē' quia' para úngaca-nē'.

⁴¹ Bē'ē Isaías didza' ni tu' bilé'enē' yōl-la' zōn queē' Cristo, en bē'ē didza' ca naca queē' Lē'. ⁴² Sal-la' raca caní, gula'yéajlē' bōnachi zían Jesús, ga bidxintē gula'yéajlē'ē bal-lē' bōnni' unná bē' Lē', pero tu' tádxinē' yugu' bōnni' yudo' fariseo, bití' gulunē' ba nalí queē' yálajdo', para cabí ulu'béajē' légaquiē' tsaz ga na' tu'dubē' tu'sedē' queē' Dios. ⁴³ Caní gulunē' tu' tunrē' zōn le tun bōnachi légaquiē' bal ca le runē' Dios légaquiē' bal.

Ilún didza' bē'ē Jesús ga irugu quégaca bōnachi ilátigaca

⁴⁴ Bē'ē zidzaj didza' Jesús, rnnē':

—Nu bōnni' réajlē'ē neda', calēga neda'sō réajlē'ē, pero réajlē'ē ca' Xuza' nasól-lē'ē neda'.

⁴⁵ Lēscá' caní, nu bōnni' rilé'enē' neda', rilé'enē' ca' Xuza' nasól-lē'ē neda'. ⁴⁶ Neda' naca' bení', en bida' yōdzóliō ni, para cabí ulu'gá'anē' ga chul-la yúgu'tē bōnni' ila'yéajlē'ē neda'.

⁴⁷ Channō riyōnnē' nu bōnni' xtídza'a, en bití' runē' le bal, calēga neda' ichuga' queē' bōnni' na' gátie', tu' bida' ni, calēga para ichuga' quégaca bōnachi yōdzóliō ni, pero para usólá' bōnachi yōdzóliō ni. ⁴⁸ Nu bōnni' ruzóē' neda' tsólá'aló, en bití' rizi' lu nē'ē xtídza'a, chizóa le ichugu queē' bōnni' na'.

Didza' na' chibē'lēna' libí'ili' naca tu le ichugu queē' bōnni' na' dza údxi. ⁴⁹ Caní naca, ruá'a didza', calēga rácasó quia', pero Xuza' nasól-lē'ē neda' gudxē' neda' le ral-la' innia', enca' ca ral-la' gu'a didza'. ⁵⁰ Nōzda' gunná bē'ē Dios caní para gata' yōl-la' na'bán idú quégaca bōnachi. Caní naca, didza' na' ruá'a, ruá'a didza' ca na' Xuza' chigudxi cazē' neda'.

13

Jesús riguibē' ní'agaquiē' bōnni' usēda queē'

¹ Ní' naca dza si' idxín Laní Pascua cate' tu'subanē' bōnni' judío ca benē' Dios, bubéajē' bōnachi queē' luyú Egipto. Nōzinē' Jesús chibidxín dza queē' gátie', cate' ral-la' uzé'ē yōdzóliō ni, en huōjē' ga zoē' Xuzē'. Ca na' nadxí'inē' bōnachi queē' naca' yōdzóliō ni, na'a nadxí'inē' légaquiē' ga idxintē gátie' uláz quégaquiē'.

² Satanás tu' xihui' chinagú'u yōl-la' Judas Iscariote, zxi'inē' tu bōnni' lē' Simón, para udódē' Jesús lu ná'agaca nupa iluti Lē'. ³ Nōzinē' Jesús ca naca, birúajē' ga zoē' Dios, en huōjē' ca' ga na' zoē' Dios, ate' Dios Xuzē' chinudódē' lu nē'ē Lē' idutē yōl-la' unná bē' queē'.

⁴ Que lē ni na', cate' ní' tahuē', guzuínē' Jesús, en gudúē' lari' rixóa yenē'. Gudélē'ē tu lari' ruzxini ná'aru' le budē'ē lē'ē. ⁵ Ní'irō gudē'ē nisa tu lu zxiga' guiē', ate' gusí lahuē' riguibē' ní'agaquiē' bōnni' usēda queē', en ruzxinē' ní'agaquiē' len lari' na' da' lē'ē.

⁶ Cate' bidxinē' ga rō'ē Simón Pedro, Pedro na' rē' Lē':

—Xan, ¿naru' Li' quibitso' ní'a?

⁷ Bubi'ē didza' Jesús, rē' lē':

—Lē ni runa', bití' réajni'ininu' na'a, pero huadzé tséajni'inu'.

⁸ Ní'irō Pedro rē' Lē':

—Bití' ca' quibi cazu' Li' ní'a.

Jesús rē' lē':

—Channō neda' bití' quiba' li', bití' ca' séqui'nu' gunu' neda' tsōzōn.

⁹ Ní'irō Simón Pedro rē' Lē':

—Xan, calēgasó ní'a quibu', pero quibu' ca' na'a, en icja'.

¹⁰ Jesús rē' lē':

—Nu nayari, ní'asó run bayudxi tsari, tu' naca cazē' dxi'a idutē', ate' libí'ili' nácali' dxi'a, pero calēga yúgu'tēli'.

¹¹ Gunnē' caní Jesús: "Calēga yúgu'tēli' nácali' dxi'a", tu' nōzinē' núlōgaquiē' na' udōdi Lē'.

¹² Gudōdi gudibē' Jesús ní'agaquiē', buguélē'ē lari' na' buxóa yenē'. Bubō'ē ga tahuē', ate' rē' légaquiē':

—¿Réajni'ili' lè na' si' bena' queéli'? ¹³ Libí'ili' ruí'ili' La': Bönni' Usedi enca': Xan. Dxi'a naca ca rnnali', tu' caní naca'. ¹⁴ Na'a, channò neda' naca' Xanli', en Bönni' Usedi queéli', ate' gudiba' ní'ali', lësca' caní ral-la' gunli' libí'ili', quíbili' ni'a luzá'ali' tuli' ia'tuli'. ¹⁵ Tu le buluf'ida' libí'ili' para gunli' libí'ili' ca na' bena' neda'. ¹⁶ Le nácatè rea' libí'ili': Biti' nayépisètèrè' tu bönni' huen dxin ca xanè', ate' bönni' gubáz bití' nayépisètèrè' ca nu nasöl-la' lè'. ¹⁷ Channò réajni'ili' yúgu'tè lè ni, bica' ba libí'ili' channò gunli' caní. ¹⁸ Didza' ni ruá'a bití' rea' yúgu'tèli'. Nöz quézida' nupa guró caza' neda', pero run bayudxi gaca lè na' nazúaj lu guichi lá'ayi, le rnna: "Nu ráguen neda' tsòzxón, nu ni tá'baga' neda'." ¹⁹ Na'a riguixjöi'ida' libí'ili' zí'aló ca gaca, para cate' gaca caní, tséajlè'èli' zoa caza' neda'. ²⁰ Le nácatè rea' libí'ili': Nu bönni' gunè' bal gubáz isöl-la'a neda', neda' ca' gunè' bal, ate' nu bönni' gunè' neda' bal, gunè' ca' bal Xuza', nasöl-lè'è neda'.

Riguixjö'è Jesús ca gunè' Judas, udödè' Lè'
(Mt. 26:20-25; Mr. 14:17-21; Lc. 22:21-23)

²¹ Cate' Jesús budxi bè'è didza' ni, buí'innè', ate' yálajdo' gunnè':

—Le nácatè rea' libí'ili': Tu bönni' nútsè'è ládjali' udödè' neda'.

²² Ní'iró bulu'yú lo luzá'agaquiè' tuè' ia'tuè' bönni' usèda queè', en gula'cu'è böniga, ate' ta'naba ládxi'gaquiè' nuzxi que na' gunnè' Jesús caní. ²³ Tuè' bönni' usèda queè' Jesús, bönni' na' Jesús nadxi'inè' lè', zoè' cuita lè'è. ²⁴ Simón Pedro bulá'a buluf'isè' bönni' ni para inábinè' Jesús nuzxi que na' gunnè' caní. ²⁵ Ní'iró bönni' na' zoè' cuita lè'è Jesús rè' Lè':

—Xan, ¿nuzxi na' ru'u didza' que?

²⁶ Bubi'è didza' Jesús, rè' lè':

—Náquiè' bönni' na' gu'a-nè' yóta xtila nabisa.

Ní'iró busubisiè' yóta xtila na', en bè'è queè' Judas Iscariote, zxf'inè' tu bönni' lè' Simón.

²⁷ Gudödi gadahuè' Judas yóta xtila na', guyaza Satanás tu' xihui' icja ládxi'da'ahuè'. Ní'iró Jesús rè' lè':

—Lè na' gunu', yójentè na'a.

²⁸ Biti' ta'yéajni'inè' ia'zica'rè' bönni' usèda queè' rő'ögaquiè' tahuè' bizx que na' Jesús gudxè' lè' caní. ²⁹ Tu' nu'è Judas buzudi dumí quégaquiè', téquinè' bal-lè' Jesús gudxè' lè': Yöxi' le gáguru' lani, o gunnè': Bè' lati' quégaca bönachi yechi'. ³⁰ Cate' budxi gadahuè' Judas yóta xtila na', en ni' naca chi'i dzö'ölö, lá' birúajtè'.

Tu xibá cubi

³¹ Cate' chibirúajè' Judas na', ní'iró gunnè' Jesús:

—Na'a chizóa ilá' lahui yöl-la' zxón quia' neda', Bönni' Guljè' Bönachi, en ilá' lahui ca' yöl-la' zxón queè' Dios. ³² Channò ilá' lahui yöl-la' zxón queè' Dios ni'a quia' neda', Zxf'inè', lësca' Lè cazè' Dios gunè' ga ilá' lahui yöl-la' zxón quia' neda', Zxf'inè', en la' guntè' caní. ³³ Libí'ili', zxi'ina'do', ia'tu' chí'isó zóalena' libí'ili'. Uguíljalí' neda', ate' ca na' chigúdxigaca-nè' bönni' judío, lësca' rea' libí'ili' na'a: Ga na' tseja' neda', bití' gaca guidali' rácasö queéli'. ³⁴ Rea' libí'ili' tu xibá cubi le rnna caní: Guli'dxi'í luzá'ali' tuli' ia'tuli'. Ca na' neda' nadxf'ida' libí'ili', lësca' caní ral-la' idxí'ili' luzá'ali' tuli' ia'tuli'. ³⁵ Channò huadxí'í luzá'ali' tuli' ia'tuli', iléquite'e yúgu'tè bönachi dá'ali' neda'.

Rnnè' Jesús innè' Pedro bití' núnbè'è Lè'
(Mt. 26:31-35; Mr. 14:27-31; Lc. 22:31-34)

³⁶ Ní'iró Simón Pedro gunábinè' Jesús, rnnè':

—Xan, ¿gazxi caz tseju'?

Bubi'è didza' Jesús, rnnè':

—Ga na' tseja' neda', bití' gaca sá'lenu' neda' na'a, pero huadzé guídu' ga tseja' neda'.

³⁷ Pedro rè' Lè':

—Xan, ¿bizx que bití' gaca sá'lenu' Li' na'a? Chizóa' udöda' yöl-la' na'bán quia', gátia' tu' nadxf'ida' Li'.

³⁸ Bubi'è didza' Jesús, rè' lè':

—¿Naru' udödu' yöl-la' na'bán quiu' tu' nadxf'inu' neda'? Le nácatè rea' li', zí'aló ca cödxiba' böra, li' tá'bágu'u tsonna luzuí, innó' bití' núnbè'u neda'.

14

Náquiè' Jesús nōza tséajlenru' para idxinru' ga zoè' Dios Xuz

¹ Rnnè' Jesús:

—Bití' cō'li' baniga lu icja ládxi'do'oli'. Guli'tséajlè' Dios, en guli'tséajlè' ca' neda'. ² Lu yu'u lidxè' Xuza' lataj zían nacuá'. La'tu' cabí naca caní, neda' chigudxi caza' libí'ili'. Tseja' na'a, tsöjpá'a lataj queéli' ga tsöjsóali'. ³ Channò huayéaja', en tsöjpá'a lataj queéli' ga tsöjsóali',

huôda' leyúbölö, ate' uchë'a libí'ili' lataj quia', para ga na' tsöjsó'a neda', tsöjsóali' ca' libí'ili'.
⁴ Nöz quézili' ga ni' tseja', en núnbë'ëli' ca' nôza.

⁵ Tomás rë' Lë':

—Xan, biti' nōztu' gazxi na' tseju'. ¿Nacxi caz gaca gúnbë'ëtu' nōza?

⁶ Bubi'ë didza' Jesús, rë' lë':

—Neda' naca caza' nōza, en naca' ca' le naca idútë li, en naca' ca' Nu nabánigaca bōnachi. Ni'a quia' neda'sō gaca nu idxín ga zoë' Dios Xuz. ⁷ La'tu' núnbë'ëli' neda', Xuza' ca' núnbë'ëli'-në'. Na'a, núnbë'ëli'-në', en chibilé'ëli'-në'.

⁸ Ní'irō Felipe rë' Lë':

—Xan, buluf'i netu' Xuzu', ate' nácatë queëtu'.

⁹ Bubi'ë didza' Jesús, rë' lë':

—Felipe, xidzë chiguca zóalena' libí'ili'. ¿Naru' cabí núnbë'ëtso' neda'? Nu bōnni' rilë'enë' neda', rilë'enë' ca' Xuza'. ¿Rnatso': "Buluf'i netu' Xuzu'?" ¹⁰ ¿Naru' cabí réajlë'u zóalen caza'-në' Xuza', ate' Xuza' zóalen cazë' neda'? Yugu' didza' ni ruí'lena' libí'ili', calëga rácasō quia' ruá'a didza' ni, pero Xuza' zóalen cazë' neda', Lë cazë' runë' dxin ni. ¹¹ Guli'tséajlë' neda', zóalen caza'-në' Xuza', ate' Xuza' zóalen cazë' neda'. Channō cabí gaca gunli' caní, guli'tséajlë' neda' ni'a quégaca dxin ni runa'. ¹² Le nácatë rea' libí'ili': Yugu' dxin ni runa' neda', lë'sca' gunë' bōnni' na' réajlë'ë neda', ate' le zxōntërō ca' gunë' bōnni' na' tu' huōja' ga zoë' Dios Xuz. ¹³ Yúgu'të le inábali' Dios Xuz, en ugunli' dxin La' neda', neda' guna' lë na' inábali', para ulu'a lahui neda', Zxí'inë', yöl-la' zxon queë' Dios Xuz. ¹⁴ Bítitës bi inábali', en ugunli' dxin La' neda', neda' guna' le.

Jesús isöl-lë'ë Dios Bō' Lá'ayi, para idisóalenë' bōnachi queë'

¹⁵ Rnnë' ca' Jesús:

—Channō nadxí'ili' neda', guli'gún le rea' libí'ili', ¹⁶ ate' neda' gáta'yua' lahuë' Dios Xuz, ate' Lë' isöl-lë'ë queëli' Nu yúbölö Nu gácalen libí'ili', Nu utipa lādxi'li', en sóalentic'a sō libí'ili'. Nu ni naca Dios Bō' Lá'ayi, Nu ruí' didza' idútë li. ¹⁷ Biti' gaca ulu'z' bōnachi yōdzōliō ni xibë' Lë', tu' cabí gaca ila'lë'e Lë', en biti' gaca ilúnbe'e Lë'. Zóalen cazë' libí'ili', ate' soë' lu icja lādxi'do'oli'. ¹⁸ Biti' ucá'ana' libí'ili' ca' yugu' bi'i uzëbido'. Huôda' udusóalena' libí'ili'. ¹⁹ Ia'tú chí'ido'osō biti'rō ila'lë'e bōnachi yōdzōliō ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'. ²⁰ Dza ní'irō cate' Dios Bō' Lá'ayi na' idisóalenë' libí'ili', inöz quézili' zóalen caza'-në' Xuza' Dios, ate' libí'ili' zóaleni' neda', ate' neda' ca' zóalen caza' libí'ili'. ²¹ Nu bōnni' rizí' lu në'ë xtídza'a, en runë' ca' rnna, naca bë' nadxí'inë' neda'. Xuza' Dios idxí'inë' bōnni' na' nadxí'inë' neda', ate' neda' idxí'ida'-në' bōnni' na', en uluf'i lahua' lahuë'.

²² Judas rë' lë', pero calëga Judas Iscariote, rnnë':

—Xan, ¿nacxi caz gaca uluf'i lo' lotu' netu', en biti' uluf'i lo' lógaca bōnachi yōdzōliō?

²³ Bubi'ë didza' Jesús, rë' lë':

—Nu bōnni' nadxí'inë' neda' gunë' ca' rnna xtídza'a, ate' Xuza' Dios idxí'inë' bōnni' na', ate' guídatu' idisóalentu'-në' bōnni' na' lu icja lādxi'da'ahuë'. ²⁴ Bōnni' na' biti' nadxí'inë' neda' biti' runë' ca' rnna xtídza'a. Didza' na' biyōnili' bë'a neda', calëgasō quia' na', pero naca queë' Dios Xuz nasöl-lë'ë neda'.

²⁵ 'Rë caza' libí'ili' yugu' lë ni tsanni ni zóalena' libí'ili', ²⁶ pero Dios Bō' Lá'ayi gácalenë' libí'ili', en utipë' lādxi'li'. Xuza' Dios isöl-lë'ë Lë' queëli' tu' ugunli' dxin La' neda'. Usédinë' libí'ili' yúgu'të, en usë'ë lādxi'li' ca' naca yúgu'të didza' na' chigudxa' libí'ili'.

²⁷ 'Rucá'ana' queëli' le cuéqui dxi lādxi'li'. Runna' queëli' yöl-la' rō'ō dxi lādxi' quia'. Yöl-la' rō'ō dxi lādxi' na' runna' queëli' biti' naca ca le tunna queëli' bōnachi yōdzōliō ni. Biti' ichixi icja lādxi'do'oli', en biti' gadxi idzōbili'. ²⁸ Chibiyōnili' ca' na' chigudxa' libí'ili': Huōja', ate' huôda' udusóalena' libí'ili'. La'tu' nadxí'ili' neda', udzëjál' cate' ni' gudxa' libí'ili' huōja' ga zoë' Dios Xuz, tu' nayëpisëtërë' Dios Xuz ca neda'. ²⁹ Na'a, chigudxa' libí'ili' zí'alō ca si' gaca, para cate' gaca caní, tséajlë'ëli' neda'.

³⁰⁻³¹ 'Bíti'rō gū'ilena' libí'ili' didza' zían, tu' za' tu' xihui', nu rinná be'e bōnachi yōdzōliō ni. Sal-la' biti' bi dë lu në'ë bi gun quia' neda', ral-la' gaca caní para ilëquibe'e bōnachi yōdzōliō ni nadxí'ida'-në' Dios Xuz, en runa' ca' na' chigudxë' neda' guna'. Guli'chasa, uzá'aru' ni.

15

Ca naca que lubá uva, en ni'a në'e lubá na'

¹ Lë'sca' caní Jesús gudxë' légaquië':

—Naca' neda' ca tu lubá uva le naca idú dxi'a, ate' Xuza' náquië' ca bōnni' guz gú'una rapa chí'ë lubá na'. ² Ugüë' yúgu'të ni'a në'e lubá na' naca' neda', le cabí bi ta'bía, ate' uchí'ë yúgu'të ni'a në'e na' ta'bía, para ila'bía ia'lati'. ³ Libí'ili' chinácali' dxi'a ni'a que didza' na' chibë'lëna' libí'ili'. ⁴ Guli'dá'tica'sō neda', ca na' neda' dá'tica'sa' ca' libí'ili'. Ca naca que ni'a

nē'e lubá na', bití' gaca bi cuía rásasö que, channö cabí dá'tica'sö lubá na', lësca' caní naca queëli', bití' bi gaca gunli' channö cabí tá'tica'sili' neda'.

⁵ 'Naca' neda' ca lubá na', ate' libí'ili' nácali' ca ni'a nē'e. Nu bönni' dá'tica'sē' neda', ca na' neda' dá'tica'sa' lē', bönni' ni náquiē' ca ni'a nē'e lubá na' ribía yenni', tu' channö nulá'alenli' neda', bití' bi gaca gunli'. ⁶ Nu bönni' bití' dá'tica'sē' neda', gaca queē' ca raca quégaca ni'a nē'e lubá na' bití' nácagaca dxi'a, ta'rú'unē' ni'a nē'e na', ate' ila'bidxi. Cate' chinabídxigaca ni'a nē'e na', ulu'tubē' léguequi, en ila'gu'ē léguequi lu guí, ate' tséguigaca.

⁷ 'Channö tá'tica'sili' neda', en gunli' ca rnna xtídza'a, huáca inábali' bi guē'ēnili', ate' neda' guna' lē na' inábali'. ⁸ Gunli' bal Xuza' Dios cate' gunli' xichinē', ate' gácali' ca ni'a nē'e lubá na' ta'bía, en caní gaca bē' nácali' idú bönni' ta'dē'ē neda'. ⁹ Ca na' nadxí'inē' Dios Xuz neda', lësca' caní nadxí'ida' libí'ili'. Guli'gúntica'sö ca ral-la' gunē' bönni' nadxí'ida'-nē'. ¹⁰ Channö gunli' ca rea' libí'ili', gunli' ca ral-la' gunē' bönni' nadxí'ida'-nē', ca na' neda' ca' runa' ca chigudxē' Xuza' Dios neda' guna', en rúntica'sa' le raza ládxi'ē Lē', Bönni' na' nadxí'inē' neda'.

¹¹ 'Yugu' didza' ni rea' libí'ili' para udzéjalenli' tsözxön neda', en gaca idú ca na' udzéjali'. ¹² Lē ni naca le rea' libí'ili' gunli': Guli'dxi'i luzá'ali' tuli' ia'tuli', ca na' neda' ca' nadxí'ida' libí'ili'. ¹³ Biti' gaca idxi'irönē' nu bönni' luzē'ē ca nu bönni' udödē' yöl-la' na'bán queē', gátie' para gácalenē' yugu' böchi' idú bönni' ta'dē'ē neda'. ¹⁴ Libí'ili' nácali' böchi' luzá'a channö gunli' ca na' chigudxa' libí'ili' gunli'. ¹⁵ Biti'rö innia' queëli' nácali' huen dxin quia', tu' cabí nözínē' bönni' huen dxin naca gunē' xanē'. Neda' chigunnia' queëli' nácali' böchi' luzá'a, tu' chibena' ga nözili' yúgu'tē le chigudxē' Xuza' neda' guna'. ¹⁶ Calēga libí'ili' guröli' neda', pero neda' gurö caza' libí'ili', en buzóa' libí'ili' para tséajli' bi tsöjenli', ca na' tun ni'a nē'e lubá na' ta'bía yenni', ate' ugá'anatica'sö lē na' gunli'. Caní gaca, Xuza' Dios gunnē' queëli' yúgu'tē le inábali' Lē', en ugunli' dxin La' neda'. ¹⁷ Lē ni naca le rea' libí'ili' gunli': Guli'dxi'i luzá'ali' tuli' ia'tuli'.

Bönachi yödžöliö tu' zóa tsölá'alö Jesús, en nupa dá'gaca Lē'

¹⁸ Gunnē' ca' Jesús:

—Channö bönachi yödžöliö ni tu' zóa libí'ili' tsölá'alö, nözili' chibulu'zöē' neda' tsölá'alö zí'alö ca tu'zöē' libí'ili' tsölá'alö na'a. ¹⁹ La'tu' nácali' tuz len bönachi yödžöliö ni, huala'dxi'i bönachi yödžöliö ni libí'ili' ca na' ta'dxi'i luzē'eguequi, pero tu' zóa bönachi yödžöliö ni libí'ili' tsölá'alö tu' cabí nácali' tuz len léguequi, tu' gurö caza' neda' libí'ili', en guléaja' libí'ili' ladaj bönachi yödžöliö ni. ²⁰ Guli'tsöjné didza' na' chigudxa' libí'ili', gunnia': Biti' nayépisetērē' nu bönni' huen dxin ca xanē'. Channö gula'bía ládxi'gaca bönachi neda', ila'bía ládxi'gaca ca' libí'ili'. Channö nacuá' nupa tun ca rnna xtídza'a, ilún ca' ca' rnna xtídza'li' libí'ili'. ²¹ Yugu'tē lē ni ilún bönachi queëli' tu' dá'ali' neda', tu' cabí núnbē'gaca Dios Xuz nasöl-lē'ē neda'.

²² 'La'tu' cabí bida', en la'tu' cabí bē'lēna' légaquiē' didza', bití' ila'báguē'ē dul-la', pero na'a tu' bida' ni, bití' bi gaca ila'nnē' que dul-la' nabága'gaquiē' le ubéaj légaquiē' dxi'a. ²³ Nu bönni' ruzöē' neda' tsölá'alö, ruzöē' ca' Xuza' Dios tsölá'alö. ²⁴ La'tu' cabí bena' yugu' yöl-la' huáca ga nacu'ē, yugu' le cuntú nu ben ca gulaca, bití' ila'báguē'ē dul-la'. Na'a, bila'lē'enē' yugu' lē na' bena', ate' tu'zöē' neda' tsölá'alö, en tu'zöē' ca' Xuza' tsölá'alö. ²⁵ Caní raca, para gaca ca rnna xtídžē'ē Dios, le nazí' lu ná'agaquiē', le rnna: Tu'zöē' neda' tsölá'alö, en bití' zoa bizz que.

²⁶ 'Cate' idxinē' Dios Bō' Lá'ayi, Bönni' ru'ē didza' idútē li, en gácalenē' libí'ili', utipē' ládxi'li'. Isöl-la'a Bönni' na' queëli' uláz queē' Dios Xuz, ate' gunē' ba nali' quia' neda'. ²⁷ Libí'ili' ca' gunli' ba nali' quia', tu' zóalen cázali' neda' tsözxön dza ni'te.

16

¹ Gunnē' ca' Jesús:

—Yugu' didza' ni chigudxa' libí'ili', para cabí gaca chopá ládxi'li'. ² Yugu' bönni' judío ulu'béajē' libí'ili' tsaz ga tu'dubē' tu'sedē' queē' Dios, ate' idxin dza cate' nu bönni' gútiē' libí'ili' guéquinē' dxin queē' Dios runē'. ³ Caní ilunē', tu' cabí núnbē'gaquiē' Dios Xuz, en cabí núnbē'gaquiē' neda'. ⁴ Rea' libí'ili' yugu' didza' ni, para cate' idxin dza na', tsöjnéli' didza' ni chigudxi caza' libí'ili'.

Le gunē' Dios Bō' Lá'ayi

Gunnē' ca' Jesús:

—Yugu' didza' ni bití' gudxa' libí'ili' dza ni'te, tu' ni' zóalen caza' libí'ili'. ⁵ Na'a huója', tsöjsóalēna'-nē' Dios Xuz, nasöl-lē'ē neda'. Biti' inábali' neda' nituli' libí'ili', bití' innali': ¿Gazxi tseju? ⁶ Na'a, tu' rea' libí'ili' yugu' didza' ni, risēbi ládxi'li'. ⁷ Neda' rea' libí'ili' le naca idútē li. Gácarö dxi'a queëli' huója', tu' channö cabí huója', bití' idisóalenē' Dios Bō' Lá'ayi libí'ili', Bönni' na' gácalenē' libí'ili', en utipē' ládxi'li', pero channö huója', isöl-la'a-nē', na' idisóalenē' libí'ili'. ⁸ Cate' guidē' Lē', gunē' ga iléquibe'ē bönachi yödžöliö ni nabága'gaca dul-la', en bití'

núnbë'gaca le naca tsahui', ate' ichúguië' Dios quéguequi ilátigaca. ⁹Nabága'gaquië' dul-la' tu' cabí ta'yéajlë'ë neda'. ¹⁰Biti' núnbë'gaquië' le naca tsahui' tu' ilútië' neda', ate' huôja' ga zoë' Dios Xuz, Bönni' na' náquië' tsahui', ate' bítirö' ila'lé'enë' neda'. ¹¹Ichúguië' Dios quégaquië' ilátië' tu' chiguchúguië' que tu' xihui' nu rinná be'e bönachi yödzölió ni.

¹²Ia'zica' zían didza' rë'ënda' gúfilena' libí'ili', pero bití' gaca tséajni'ili' na'a. ¹³Cate' guidë' Dios Bô' Lá'ayi, Bönni' na' ru'ë didza' idútë' li, Lë' usedinë' libí'ili' yúgu'të le naca idútë' li na', tu' cabí gu'ë didza' rácasô queë', pero gu'ë yúgu'të didza' na' yönnë' ru'ë Xuza', en gunë' ga inözili' yúgu'të le ral-la' gaca. ¹⁴Lë' gunë' neda' bal, tu' si'ë le nequi quia', en gunë' ga inözili' le. ¹⁵Yúgu'të le nequi queë' Dios Xuz nequi quia'. Que lë ni na' gunnía' si'ë le nequi quia', en gunë' ga inözili' le.

Yöl-la' risëbi ladxí' queëli' huôáca yöl-la' rudzeja

¹⁶Gunnë' ca' Jesús:

—Yetú chí'ido'osô, en bítirö' ilé'eli' neda', ate' ia'tú chí'ido'osô ca' ulé'eli' neda', tu' huôja' ga zoë' Dios Xuz.

¹⁷Ní'irö' bönni' usëda queë' gulë' luzá'agaquië' tuë' ia'túë', ta'nnë':

—¿Bizxi rna didza' ni rë' rë'u? Rnnë': "Ia'tú chí'ido'osô, en bítirö' ilé'eli' neda', ate' ia'tú chí'ido'osô ca' ulé'eli' neda', en naca tu' huôja' ga zoë' Dios Xuz."

¹⁸Ní'irö' gula'nnë':

—¿Bizxi caz rë'ëni inná didza' ni, gunnë': "Ia'tú chí'ido'osô"? Biti' réajni'itu' didza' ni ru'ë.

¹⁹Réquibe'enë' Jesús të'ënnë' ila'nábinë' Lë', ate' rë' légaquië':

—¿Naru' rinábitsô luzá'ali' ca naca que didza' na' bë'a, gunnía': Ia'tú chí'ido'osô, en bítirö' ilé'eli' neda', ate' ia'tú chí'ido'osô ca' ulé'eli' neda'? ²⁰Le nácatë rea' libí'ili': Códxili', en isëbi ladxí'li', pero bönachi yödzölió ni ulu'dzeja cate' iluti neda'. Ní'irö' sal-la' isëbi ladxí'li', yöl-la' risëbi ladxí' queëli' huôáca yöl-la' rudzeja cate' ulé'eli' neda'. ²¹Tu nigula cate' chizóba gáljabi' bí'ido' queënu, rigu'i rizáca'nu, tu' chibidxín dza queënu, pero cate' chizóabi' tubi' bí'i bönni'do' queënu, bítirö' rójenu lë na' butságanu, tu' rudzéjanu tu' chigúlajibi' tubi' bí'i bönni'do' yödzölió ni. ²²Lësca' caní raca queëli', risëbi ladxí'li' na'a, pero huôda' uduyúa' libí'ili', ate' ní'irö' udzeja ladxí'li', ate' bití' séqui'në' nu bönni' ugüë' yöl-la' rudzeja queëli' na'.

²³'Dza ní'irö' bití' bi inábili' neda'. Le nácatë rea' libí'ili': Yúgu'të le inábili' Dios Xuz, en ugunlí' dxin La' neda', Lë' gunnë' queëli'. ²⁴Ga ridxintë na'a dza bití' rugunlí' dxin La' neda' cate' bi rinábili'-në' Dios Xuz. Guli'naba caní, ate' idéli'li' lë na' inábali', para gaca idú yöl-la' rudzeja queëli'.

Ridéli'në' Jesucristo lu le raca yödzölió ni

²⁵Gunnë' ca' Jesús:

—Yugu' lë na' chibë'lena' libí'ili' didza' bucúdu'a didza'. Huadxín dza cate' bítirö' gúfilena' libí'ili' didza' le rucúdu'a didza', pero yálajdo' gúfilena' libí'ili' didza' ca naca queë' Dios Xuz. ²⁶⁻²⁷Dza na' inábili'-në' Dios, en ugunlí' dxin La' neda', ate' rea' libí'ili', bití' gun bayudxi gáta'yua' lahuë' Dios Xuz uláz queëli', tu' nadxí'inë' Lë cazë' Dios Xuz libí'ili'. Nadxí'inë' libí'ili' tu' nadxí'ili' neda', en réajlë'ëli' birúaja' ga zoë' Dios. ²⁸Birúaja' ga zoë' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huôja' ga zoë' Dios Xuz.

²⁹Ní'irö' yugu' bönni' usëda queë' gulë' Lë', ta'nnë':

—Na'a ru'u didza' yálajdo', en bítirö' rucúdu'u didza'. ³⁰Na'a réquibe'etu' nöz quézinu' Li' yúgu'të, en bití' run bayudxi nu bi inabi yudxi Li', tu' riguixjoi'inu' netu' le si' inábatu'. Que lë ni na' réajlë'ëtu' birúaju' ga zoë' Dios.

³¹Bubi'ë didza' Jesús, rë' légaquië':

—¿Naru' réajlë'tsali' neda' na'a? ³²Buli'yú, huadxín dza, en chiridxín dza na', cate' gásilasili' que queëli', en ucá'anali' neda' tuza', pero bití' soa' tuza', tu' zóalen cazë' Dios Xuz neda'. ³³Yugu' didza' ni chigudxa' libí'ili' para cuéqui dxi ladxí'li', tu' nácali' quia' neda'. Lu yödzölió ni gaca queëli' le usaca' zí' libí'ili', pero buli'tipa ladxí'li'. Neda' chibidéli'da' lu le raca yödzölió ni.

17

Jesús rinábinë' Dios gácalenë' nupa dá'gaca Lë'

¹Cate' budxi bë'ë Jesús yugu' didza' ni, guchisa lahuë', ruyúë' yehua' yubálö, ate' rnnë':

—Dios Xuz, chibidxín dza. Ben ga ilá' lahui yöl-la' zxön quia' neda', Zxí'inu', para gaca guna' ga ilá' lahui yöl-la' zxön quíu' Li'. ²Ben caní tu' chinudödu' lu na'a yöl-la' unná bë' para inná bé'eda' yúgu'të bönachi, en gu'a yöl-la' na'bán idú quégaca yúgu'të nupa na' chibennu' quia'. ³Lë ni naca yöl-la' na'bán idú na', tu' núnbë'gaquië' Li', nacu' la's dui Dios idú, en tu' núnbë'gaquië' ca' neda', Jesucristo, ate' Li' nasól-lu'u neda'.

⁴ 'Neda' chibena' ga nalá' lahui yöl-la' zxön quiu' yödzölió ni, en chibudxi bena' dxin na' budödu' lu na'a. ⁵ Na'a, Xuz, ben ga ilá' lahui yöl-la' zxön napa' tsözxön len Li', para gaca quia' yöl-la' zxön guta' quia' tsözxön len Li' dza ni'te quez cate' si' gata' yödzölió.

⁶ 'Chibulu'a lahui le nacu' Li' lógaquie' bönni' ni bennu' quia', nupa na' guró casu' Li' ladaj bönachi yödzölió. Guléquiné' bönni' ni quiu', ate' bénagacu'-né' quia', ate' tuné' ca rna xtidzu'u. ⁷ Na'a nözguequiné' yúgu'té lè na' bennu' quia' zá'gaca lu no'o Li', ⁸ tu' chibudöda' lu ná'agaquie' didza' na' budödu' Li' lu na'a neda', ate' légaquie' nazí' lu ná'agaquie' le, en téquibe'ené' birúaja' ga zu' Li', ate' ta'yéajlè' Li' nasöl-lu'u neda'.

⁹ 'Neda' ráta'yua' Lo' gácalenu' légaquie'. Ráta'yua' Lo', caléga gácalenu' yúgu'té bönachi yödzölió, pero gácalengacu'-né' bönni' ni chibénagacu'-né' quia', tu' néquiguequiné' quiu'.

¹⁰ Yúgu'té nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca ná'agaca nupa na' rulu'i lahui yöl-la' zxön quia'.

¹¹ 'Na'a, bití'rö ugá'ana' yödzölió ni, pero yugu' bönni' ni ulu'gá'ané' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chí'i nupa ni chibennu' quia', para ilácagaca tuz, ca na' nácaru' rë'u tuz. ¹² Cate' ni' guzóalena' légaquie' yödzölió ni, ben chí'igaca'-né', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-né', ate' nitüé' bití' bunitia'-né', pero tuzé' bönni' na' náquie' ca xzí'ini tu' xihui', en narugu queé' gátí'tsaz. Caní' raca ca nazúaj lu guichi lá'ayi.

¹³ 'Na'a udusóalena' Li', ate' tsanni ni zoa' yödzölió ni, ruá'a yugu' didza' ni para gaca idú yöl-la' rudzeja quégaquie' ca na' raca quia' neda' yöl-la' rudzeja. ¹⁴ Neda' chibudöda' lu ná'agaquie' xtidzu'u, ate' bönachi yödzölió ni tu'zóa légaquie' tsólá'aló tu' cabí ná'agaquie' tuz len léguqui, ca na' naca quia' neda', bití' naca' tuz len bönachi yödzölió ni. ¹⁵ Ráta'yua' Lo', caléga cúagacu'-né' yödzölió ni, pero gun chí'igacu'-né', para cabí ila'dzuné' lu na' tu' xihui'. ¹⁶ Bití' ná'agaquie' tuz len bönachi yödzölió ni ca na' naca quia' neda', bití' naca' tuz len bönachi yödzölió. ¹⁷ Guléaj quez quiu' légaquie', ugunu' dxin le naca iduté li. Le naca iduté li na' naca xtidzu'u. ¹⁸ Ca na' benu' Li', gusöl-lu'u neda' ladaj bönachi yödzölió ni, lësca' caní' runa' neda', risöl-la'gaca'-né' ladaj bönachi yödzölió. ¹⁹ Tu' nadxí'igacada'-né' rudóli cuina' quiu', para ulu'rúajé' ca' légaquie' quez quiu' tu' nazí' lu ná'agaquie' le naca iduté li.

²⁰ 'Ráta'yua' Lo', caléga quégacasé' bönni' ni, pero lësca' quégaquie' bönni' ni' ila'yéajlè' neda' ni'a que didza' ilu'è bönni' ni. ²¹ Ráta'yua' Lo' gunu' ga ilácagaquie' tuz yúgu'té, en ilácagaquie' ca' tuz len rë'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní' ral-la' ilácagaquie' para ila'yéajlè' ia'zica'rö bönachi yödzölió ni, Li' caz gusöl-lu'u neda'. ²² Yöl-la' zxön na' bennu' quia', neda' b'é'a ca' quégaquie', para ilácagaquie' tuz, ca na' nácaru' tuz rë'u. ²³ Li' nacu' tuz len neda', ate' neda' naca' tuz len légaquie', para gaca idú ca ná'agaquie' tuz, en caní' iléquibe'e ia'zica'rö bönachi yödzölió ni, Li' caz gusöl-lu'u neda', ate' nadxí'igacanu'-né' ca na' nadxí'inu' neda'.

²⁴ 'Xúza'do', ré'enda' ila'cuá'lené' neda' bönni' ni bénagacu'-né' quia' ga na' tsöjsó'a, para ila'lé'ené' yöl-la' zxön na' bennu' quia' dza ni'te cate' si' gunu' yödzölió tu' nadxí'inu' neda'. ²⁵ Xuza' tsahui', bönachi yödzölió ni bití' nún'bégaca Li', pero neda' nún'bé' caza' Li', ate' yugu' bönni' ni chinóziguequiné' Li' caz gusöl-lu'u neda'. ²⁶ Bena' ga nöziguequiné' le nacu' Li', en gunra' ca' ga ila'nóziné' lè ni para ca na' nadxí'inu' Li' neda', lësca' caní' ila'dxí'i luzá'agaquie', ate' gaca caza' tuz len légaquie'.

18

Ta'zöné' Jesús

(Mt. 26:47-56; Mr. 14:43-50; Lc. 22:47-53)

¹ Cate' budxi b'é' Jesús yugu' didza' ni, birúajé' ni', ate' sa'yéajlené' yugu' bönni' uséda queé'. Gudodé' ia' tsólá'a yegu Cedrón, en bidxiné' ga ni' nacua' yaga olivo ca', ate' lataj ni guyázalené' yugu' bönni' uséda queé'. ² Lësca' Judas, bönni' na' udodé' Jesús, nún'bé'è la' yéla na', tu' butubé' Jesús yugu' bönni' uséda queé' ni' zían luzuí. ³ Ní'rö guché'è Judas tu' cö' bönni' rójáquie' gudil-la, en yugu' bönni' ni'a ná'agaquie' bixúz unná b'é, en ni'a ná'agaquie' yugu' bönni' yudo' fariseo, ate' yójáquie' ga ni' zoé' Jesús, nuá'agaquie' yugu' gu' yöri, en yugu' le tu'dí'iné'. ⁴ Ní'rö, tu' nöziné' Jesús yúgu'té le ral-la' gaca queé', birúajé' ga ni' zoé', en rë' légaquie'.

—¿Nuzxi riguíljali'?

⁵ Bulu'bi'è didza', t'é' Lë':

—Jesús, bönni' Nazaret, riguíljatu'-né'.

Jesús rë' légaquie':

—Neda' caz.

Judas, bönni' na' rudödë' Jesús lu ná'agaquië', zóalenë' légaquië'. ⁶ Cate' Jesús gudxë' légaquië': "Neda' caz", ní'irö bulu'bíguë'ë cusi zxanlô, en gula'dzô'ë lu yu. ⁷ Jesús gunábinë' légaquië' leyúbölô, rnnë':

—¿Nuzxi riguljali'?

Të' Lë':

—Jesús, bönni' Nazaret, riguljatu-në'.

⁸ Ní'irö bubi'ë didza' Jesús, rnnë':

—Chigúdxá' libí'ili': Neda' caz. Channö riguljali' neda', guli'güf'-gáquië' lataj tsöjhuöjgaquië' bönni' ni.

⁹ Caní gunné' Jesús para idxin didza' na' bë'ë, gunné': "Nupa ni bennu' quia', nitüë' biti' bunítia'-në'." ¹⁰ Ní'irö, tu' nu'ë Simón Pedro tu guíë tuchi', gulecjë' le, en bentë' huë' Malco, tu bönni' huen dxin queë' bixúz lo, guchúguië' guídi náguië' ibëla bönni' na'. ¹¹ Ní'irö Jesús rë' Pedro na':

—Bugú'u guíë tuchi' quiu' lidxi. ¿Naru' cabí ral-la' quí'i saca'a lë na' chinunë' Xuza' ca gaca quia'?

Ridxinë' Jesús lahuë' bixúz lo

(Mt. 26:57-58; Mr. 14:53-54; Lc. 22:54)

¹² Yugu' bönni' na' rôjáquië' gudil-la, en bönni' na' nacu'ë lu në'ë, enca' yugu' bönni' ni'a ná'agaquië' bönni' judío unná bë' gula'zönë' Jesús, en gulúguië' Lë'. ¹³ Ní'irö gula'chë'ë Lë' zí'alô lahuë' Anás, tu' náquië' xto' xxi'inë' Caifás, bönni' náquië' bixúz lo iz na'. ¹⁴ Náquië' Caifás bönni' na' buzéajni'inë' yugu' bönni' judío unná bë', buluí'inë' légaquië' dxí'arô gaca gátie' tuzë' bönni', en calëga iníti idütë yôdzô quégaquië'.

Rnnë' Pedro: "Biti' núnbë'a-në' Jesús"

(Mt. 26:69-70; Mr. 14:66-68; Lc. 22:55-57)

¹⁵ Simón Pedro, en ia'tüë' bönni' usëda queë' Jesús yôjáquië' cúdu'lë' Lë', sönjónaquië' Lë'. Bönni' usëda ni guyázalenë' Jesús lô'a que lidxi bixúz lo, tu' núnbë'ë bixúz lo na' lë'. ¹⁶ Bugá'anë' Pedro ní'ilô ga nu riyaza lô'a na'. Que lë ni na' burúajë' bönni' usëda na' núnbë'ë bixúz lo lë', ate' bë'lenë'-nu didza' nigula na' run chí'inu ga nu riyaza lô'a na', ate' benë' ga guyázië' Pedro lô'a. ¹⁷ Ní'irö nigula na' run chí'inu ga nu riyaza lô'a rënu Pedro, rnnanu:

—¿Naru' cabí do'o ca' li' bönni' ni?

Bubi'ë didza' Pedro, rnnë':

—Calëga neda'.

¹⁸ Tu' run ziaga, yugu' bönni' huen dxin, en yugu' bönni' ni'a ná'agaca bönachi yudo' nabéguigaquië' guí, ate' zuíguequinë' ra' guí na', en tu'tsë'e cuíngaquië'. Lësca' Pedro zuílenë' légaquië', rutsë'e cuinë'.

Bixúz lo rinabi yúdxinë' Jesús

(Mt. 26:59-66; Mr. 14:55-64; Lc. 22:66-71)

¹⁹ Ní'irö gunabi yúdxinë' bixúz lo Jesús para inözinë' nupxi dá'gaca Lë', en naxi naca le rusedinë' Jesús bönachi. ²⁰ Bubi'ë didza' Jesús, rë' lë':

—Lahui' lo bë'lëna' yúgu'të bönachi didza'. Buseditiqui'sida' légaquië' gapa naca lu yu'u ga tu'dubë' tu'sëdë' queë' Dios, enca' chila yudo', ga ni' tu'dubë' yúgu'të bönni' judío, en biti' bi didza' bë'a bagáchi'sô. ²¹ ¿Bizx que rinabi yúdxinu' neda'? Gunabi yudxi nupa ni' bila'yöni didza' bë'lëna' léguequi. Nözguequi quézinë' bönni' na' didza' na' bë'lëna' légaquië'.

²² Cate' budxi bë'ë Jesús didza' ni, tu bönni' ni'a ná'agaca bönachi yudo' gudápë'ë ru'ë Jesús, rnnë':

—¿Naru' caní rubí'tso' didza' lahuë' bixúz lo?

²³ Bubi'ë didza' Jesús, rë' lë':

—Channö biti' gunní'a dxi'a, gudixjô' bízxilô didza' bë'a biti' naca dxi'a, en channö guca dxi'a didza' bë'a, ¿bizx que na' gudápu'u neda'?

²⁴ Ní'irö Anás na' guesöl-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquië' idú bixúz lo.

Leyúbölô rnnë' Pedro: "Biti' núnbë'a-në' Jesús"

(Mt. 26:71-75; Mr. 14:69-72; Lc. 22:58-62)

²⁵ Cate' ni' zuínë' Pedro ra' guí rutsë'e cuinë', yugu' bönni' nacu'ë ni' gulë' lë', ta'nnë':

—¿Naru' cabí do'o ca' li' Jesús na'?

Gudá'baguië' Pedro, rnnë':

—Calëga neda'.

²⁶ Zoë' ni' tu bönni' huen dxin queë' bixúz lo, náquië' di'a dza queë' bönni' na' Pedro guchúguië' guídi náguië', ate' bönni' huen dxin na' rë' Pedro:

—¿Naru' cabí bilé' quézida' li' la' yëla ni', dzagu'-në' Jesús?

²⁷ Leyúbölö gudad'baguië' Pedro, ate' la' gurödxitëba' böra.

Ridxinë' Jesús lahuë' Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Ní'irö gula'chë'ë Jesús, en bulu'zë'ë lidxë' Caifás na', ate' bila'dxinë' yúlalui' queë' bönni' yu'u lu në'ë uláz que yödz Roma, le nazí'i le Pretorio. Chizá' rení' dza na', ate' biti' gula'yázië' yugu' bönni' judío yúlalui' na', tu' téquinë' ila'báguë'ë xíguia' channö ila'yázië' ní', le gun ga biti' gaca ilahuë' xtsö' Laní Pascua, laní na' tu'subanë' ca benë' Dios, bubéajë' bönachi Israel luyú Egipto. ²⁹ Ní'irö birúajë' Pilato, bönni' na' yu'u lu në'ë, en bidxinë' ga na' nacu'ë, ate' rë' légaquië':

—¿Bizxi ruzégui'li'-në' bönni' ni didza'?

³⁰ Bulu'bi'ë didza', të' lë':

—La'tu' cabí nu'ë bönni' ni dö', biti' udöditu'-në' lo'.

³¹ Ní'irö Pilato rë' légaquië', rnnë':

—Libí'i cázali' guli'chë'ë, en buli'chi'a buli'sörö Lë' ca rinná bë' xibá queëli'.

Yugu' bönni' judío të' lë', ta'nnë':

—Biti' dë lu na'tu' nu' gütitu'.

³² Caní guca para idxín xtídzë'ë Jesús, le bë'ë naca ral-la' gátie'. ³³ Ní'irö buázië' Pilato yúlalui' na', ate' bulidzë' Jesús, en rë' Lë':

—¿Nacu' Li' Bönni' Rinná Bé'enë' Bönachi Judío?

³⁴ Bubi'ë didza' Jesús, rë' lë':

—¿Naru' rácasö quiu' rnno' caní, o gulë bönachi li' caní ca naca quia'?

³⁵ Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Li' lu na'a. ¿Bizxi caz benu'?

³⁶ Ní'irö bubi'ë didza' Jesús, rë' lë':

—Rinná bë'a neda', pero calëga ca ta'nná bë' bönachi yödzölió ni. La'tu' rinná bë'a ca ta'nná bë' bönachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' biti' naca ca ta'nná bë' bönachi yödzölió ni.

³⁷ Ní'irö Pilato rë' Lë':

—¿Nácatso' bönni' rinná bë'ë?

Bubi'ë didza' Jesús, rë' lë':

—Naca' ca na' rnno'. Que lë ni na' bida' ga gulja' yödzölió ni, para guna' ba nalí que le naca idütë li. Yúgu'të nupa ni tun le naca idütë li tu'zë náagagaca didza' ruá'a.

³⁸ Pilato rë' Lë':

—¿Bizxi na' le naca idütë li?

Ta'chúquië' queë' Jesús gátie'

(Mt. 27:15-31; Mr. 15:6-20; Lc. 23:13-25)

Cate' budxi gunné' Pilato caní, burúajë' leyúbölö ga na' nacu'ë bönni' judío unná bë' na', en rë' légaquië':

—Biti' bí dö' ridzöliida' nu'ë bönni' ni. ³⁹ Libí'ili' dë tu le nulaga loli' runli' cate' raca Laní Pascua ni, rinábili' neda' usana'-në' queëli' tuë' bönni' nadzunë'. ¿Rë'ënilí' usana'-në' queëli' Bönni' Rinná Bé'enë' Bönachi Judío?

⁴⁰ Ní'irö yúgu'të' gulu'ë zidzaj didza' leyúbölö, ta'nnë':

—¡Calëga bönni' ni, pero Barrabás usanu'-në' queëtu'!

Barrabás na' náquië' gubán.

19

¹ Ní'irö Pilato guchë'ë Jesús, en benë' ga gula'guinë' yugu' bönni' röjáquië' gudil-la Lë'. ² Bönni' röjáquië' gudil-la na' gulunë' tu bregui' ni'a në'e yötsi', ate' bulu'dxië' le icjë' Jesús, en bulu'gacué' Lë' tu lari' tunna xiná chul-la ca naca le tácuë' bönni' ta'nná bë'ë. ³ Ní'irö gula'bigué'ë lahuë' Jesús, en të' Lë':

—¡Bica' bo' Li', Bönni' Rinná Bé'enë' Bönachi Judío!

Ní'irö gula'gápë'ë lahuë'.

⁴ Ní'irö burúajë' Pilato, en rë' yugu' bönni' judío unná bë', rnnë':

—Buli'yú, rubéaja'-në' loli' ni para inözili' biti' bi rudzöliida' le naca dö' nu'ë bönni' ni.

⁵ Ní'irö birúajë' Jesús, dxía icjë' bregui' ni'a në'e yötsi' na', en nácuë' lari' tunna xiná chul-la na'. Pilato rë' légaquië':

—Ni zoë' bönni' ni.

⁶ Cate' yugu' bixúz unná bë', en yugu' bönni' ni'a ná'agaquië' bila'lë'enë' Jesús, zidzaj gula'ë didza', ta'nnë':

—¡Budé'ë lë'e yaga cruz! ¡Budé'ë lë'e yaga cruz!

Pilato rë' légaquië':

—Lib'i cázali' guli'chë'ë, en guli'tsöjdë'ë lë'e yaga cruz. Neda' biti' bi dö' budzö'lida' nu'ë bönni' ni.

⁷ Ní'irö bönni' judío na' t'ë lë':

—Dë queétu' tu xibá, ate' rinná bë' xibá queétu' na' ral-la' gátie' bönni' ni tu' gunné' náquië' Xzfi'në' Dios.

⁸ Cate' biyönnë' Pilato didza' ni, gúdxirönë'. ⁹ Leyúbölö buázië' yúlalui' na', en rë' Jesús:

—¿Gázxité bönni' Li'?

Biti' bi didza' bubi'ë Jesús.

¹⁰ Ní'irö Pilato rë' Lë':

—¿Naru' cabí ubi'tso' didza', quíxjöi'inu' neda'? ¿Naru' cabí nözinu' dë lu na'a udá'a Li' lë'e yaga cruz, en dë lu na'a usana' Li'?

¹¹ Bubi'ë didza' Jesús, rë' lë':

—Biti' bi dë lu no'o gunu' quia' la'tu' cabí nudödë' Dios yöl-la' unná bë' na' lu no'o. Que lë ni na', bönni' na' budödë' neda' lu no'o nabága'rë' xíguia' ca li'.

¹² La' ní'sö rizóa ribö'ë Pilato usanë' Jesús, pero gulu'ë zidzaj didza' bönni' judío unná bë', ta'nnë':

—Channö usanu'-në' bönni' ni, biti' ridzagu'-në' dxi'a César, bönni' rinná bé'enë' idütë yödölió. Nu bönni' run cuinë' bönni' rinná bë'ë, ridá'báguë'ë César na'.

¹³ Cate' biyönnë' Pilato didza' ni, gunná bé'enë' nupa diguá'gaca Jesús, ate' gurö'ë xilatjë' ga ruchi'a rusöröë', lataj na' nazí'i le Lō'a Ga Xzóagaca Guiójt'a'a, en ca naca didza' hebreo nazí'i le Gabata. ¹⁴ La' dza ná'asö naca dza si' idxín Laní Pascua, en naca idú hua gubidza. Ní'irö Pilato gudxë' yugu' bönni' judío unná bë' na', rnnë':

—Ni zoë' bönni' rinná bé'enë' libí'ili'.

¹⁵ Gulu'ë zidzaj didza', ta'nnë':

—¡Bétië'! ¡Bétië'! ¡Budé'ë lë'e yaga cruz!

Pilato rë' légaquië':

—¿Rinábítseli' neda' udá'a-në' lë'e yaga cruz bönni' rinná bé'enë' libí'ili'?

Bulu'bi'ë didza' bixúz unná bë', ta'nnë':

—Cúnturö nu zoa rinná be'e netu'. Tuzë' César rinná bé'enë' netu'.

¹⁶ Que lë ni na' Pilato budödë' Jesús lu ná'agaquië', para tsöjdá'agaquië' Lë' lë'e yaga cruz. Ní'irö gula'guélë'ë Jesús, en gula'chë'ë Lë' ní'ilo.

Tu'dë'ë Jesús lë'e yaga cruz

(Mt. 27:32-44; Mr. 15:21-32; Lc. 23:26-43)

¹⁷ Birúajë' Jesús ni', nu'ë yaga cruz queë', sa'yéajë' lataj na' nazí'i le Lataj Que Böga' Ícjaru', en ca naca didza' hebreo nazí'i le Gólgota. ¹⁸ Bulu'dë'ë Jesús lë'e yaga cruz ni', ate' bulu'dá'lenë' Lë' tsözxön' lë'egaca yaga cruz ia' chopë' bönni'. Tsólá'a huéaj ta'dë'ë, ate' Jesús dë'ë gatsaj láhui'lö chopë' bönni' na'. ¹⁹ Gusól-lë'ë Pilato tu bönni' nu'ë le buzúajë' lu guichi le buzöë' lë'e yaga cruz icjlë' Jesús, le rnna caní: "Jesús, Bönni' Nazaret, Bönni' Rinná Bé'enë' Bönni' Judío." ²⁰ Bulu'labë' zían bönni' judío didza' ni, tu' zoa ga na' bulu'dë'ë Jesús lë'e yaga cruz gála'sö ra' yödzo, ate' didza' na' nuzúajë' len didza' hebreo, en len didza' griego, en len didza' latin. ²¹ Yugu' bixúz unná bë' quégaquië' bönni' judío të' Pilato, ta'nnë':

—Biti' uzúaju', "Bönni' Rinná Bé'enë' Bönni' Judío." Buzúaj caní: "Bönni' ni gunné': Inná bé'eda' bönni' judío."

²² Bubi'ë didza' Pilato, rë' légaquië':

—Le chinuzúaja', tsaz chinuzúaja'.

²³ Cate' yugu' bönni' na' rójáquië' gudil-la budxi bulu'dë'ë Jesús lë'e yaga cruz, gula'guélë'ë lari' gücüë'. Gula'béajë' tápalö, tu có' huéaj guta' que quégaquië'. Gula'guélë'ë ca' lari' guxó'a yenë' Jesús, ate' lari' na' biti' nadía, pero naduba tuz ca naduba. ²⁴ Ní'irö yugu' bönni' na' rójáquië' gudil-la gulë' luzá'agaquië' tuë' ia'tuë', ta'nnë':

—Biti' ichúguru' le, pero dxi'arö gaca uyuru' le gaca bë' para inöziru' nuzxi guequi que.

Caní guca, budxín ca nazúaj lu guichi lá'ayi, le rnna:

Gula'guísië' que quégaquië' lari' nacua',

en que lari' quia' bulu'yüë' le naca bë'.

Caní gulunë' bönni' na' rójáquië' gudil-la.

²⁵ Xinë'ë Jesús, en nigula zxílanu xinë'ë, en María, nigula queë' Cleofas, en María Magdalena gula'cuá'anu gala' ga na' dë'ë Jesús lë'e yaga cruz. ²⁶ Cate' Jesús bilé'enë'-nu xinë'ë, en bilé'enë' ca' zoë' ni' bönni' usëda queë' na' nadxí'inë', gudxë'-nu xinë'ë:

—Na'a, na' zoë' xzí'inu'.

²⁷ Ní'irö gudxë' bönni' usëda queë' na':

—Na' zóanu xinó'o.

Bönni' usêda na' benê' ga yôjsóanu lidxê' la' dza níisô.

Le guca cate' gutiê' Jesús

(Mt. 27:45-56; Mr. 15:33-41; Lc. 23:44-49)

²⁸ Gudôdi ni, tu' nôzinê' Jesús yúgu'tê chibôa budzaga lahui, en para udxín le nazúaj lu guichi lá'ayi, gunnê':

—Ribidxa' nisa.

²⁹ Dê ni' tu' xziga' yudzu nupi zi. Ní'irô yugu' bönni' na' rôjáquiê' gudil-la bulu'guijê' nupi zi na' tu le bululu rixxupi nisa, ate' bulu'zóê' le tu lahui gui, en bulu'dê'ê le ru'ê Jesús para xupê'. ³⁰ Budxi gu'ê Jesús nupi zi na', gunnê':

—Chinácatê.

Ní'irô buzôtaj icjê'. Burúajtê bô' naca cazê', gútiê'.

Tu bönni' reajê' gudil-la runê'ê yaga tuchi' cuita lê'ê Jesús

³¹ Ní'irô, tu' naca dza si' idxín Laní Pascua na', en tu' cabí ral-la' ulu'gá'ana nupa nátagaca lê'egaca yaga cruz cate' naca dza lá'ayi quégaquiê', le naca tu dza lá'ayi xzontê, que lê ni na' yugu' bönni' judío guláta'yue' lahuê' Pilato guíê' bönni' rôjáquiê' gudil-la tsôjitsjagaquiê' xiguichjagaquiê' bönni' dá'gaquiê' lê'egaca yaga cruz, en ulu'zôtjê' légaquiê' lê'egaca yaga cruz na'. ³² Que lê ni na' gula'biguê'ê bönni' rôjáquiê' gudil-la, ate' gula'guitsjê' xiguichjê' bönni' zí'alô, en lêsca' caní gulunê' queê' ia'túê' bönni' na' dá'lenê' Jesús lê'e yaga cruz. ³³ Cate' bila'dxinê' ga na' dê'ê Jesús, en bila'lê'enê' chinátiê', biti' gula'guitsjê' xiguichjê'.

³⁴ Ní'irô tuê' bönni' na' reajê' gudil-la bunê'ê yaga tuchi' cuita lê'ê Jesús, ate' la' birúajtê rôn, en nisa. ³⁵ Neda', Juan, bilé'eda' lê ni, en runa' ba nalí que, ate' le runa' ba nalí naca idútê li. Nôz quézida' ruá'a didza' idútê li, para tséajlê'êli' ca' libí'ili' ca naca queê' Jesús. ³⁶ Gulaca yugu' lê ni para budxín le nazúaj lu guichi lá'ayi, le rnna: "Biti' gatsaj nitú dxita yu'ê." ³⁷ Ia'tú le nazúaj ca' lu guichi rnna caní: "Ulu'yúê' bönni' na' bulu'nê'ê lê'ê yaga tuchi'."

Tu cáchê'ê Jesús

(Mt. 27:57-61; Mr. 15:42-47; Lc. 23:50-56)

³⁸ Gudôdi guca yúgu'tê lê ni, guyijê' José, bönni' yôdzô Arimatea, bönni' dê'ê Jesús, pero bagáchi'sô tu' rádxiné' yugu' bönni' judío unná bê', ate' gunábinê' Pilato gu'ê lê' lataj u'ê Jesús. Pilato bê'ê lê' lataj. Ní'irô bidxinê' José ga na' dê'ê Jesús lê'e yaga cruz, ate' bu'ê Lê'. ³⁹ Lêsca' bidxinê' Nicodemo ni', bönni' na' guyijê' zí'alô yôjyúê' Jesús chi'i dzô'ôlô, nu'ê tu le nuts'i nôri silá' que mirra, en tu le rilá' zxixi, le naca ca tu gayuá' guíê. ⁴⁰ Ní'irô José, en Nicodemo na' gula'gué'ê Jesús, en bulu'chólinê' Lê' yugu' lári'do', ate' gula'gu'ê láhuilô lê na' nuts'i nôri silá' que mirra, en le rilá' zxixi. Gulunê' ca nalêbiguequinê' tunê' bönni' judío cate' tu'cáché'ê tu bönni' nati. ⁴¹ Gala' ga na' bulu'dê'ê Jesús lê'e yaga cruz dê tu luyú ga zeaj da' yaga olivo, ate' gatsaj láhuilô lataj na' zoa tu yeru ba cubi le nadaj lê'ê guí'a guíôj, yeru ba na' cuntú nu ta'güi'inê'. ⁴² Lu yeru ba na' gula'gu'ê Jesús tu' dê gála'sô yeru ba na', en tu' naca dza tu'pê'ê bönni' judío que Laní Pascua.

20

Rubanê' Jesús lu yôl-la' guti

(Mt. 28:1-10; Mr. 16:1-8; Lc. 24:1-12)

¹ Cate' chinaca zílado' dza domingo, en ni' naca chul-la, guyéajnu María Magdalena ra' yeru ba na', ate' bilé'enu chinadúa guíôjta'a na' busayaj ga nu riyaza yeru ba na'. ² Ní'irô bôajnu carelô ga zoê' Simón Pedro, dzáguíê' lê' ia'túê' bönni' usêda, bönni' na' Jesús nadxí'inê' lê', ate' rênú légaquiê':

—Bulu'béajê' Xanru' yeru ba ni', en biti' nôztu' gazxi gula'gu'ê Lê'.

³ Ní'irô bila'rúajê' Pedro, en ia'túê' bönni' usêda na', sôjáquiê' ra' yeru ba na'. ⁴ Tsôzxôn ta'xiti'ê iropê', pero ia'túê' bönni' usêda na' guxítirê' carelô ca Pedro, ate' zí'alô lê' bidxinê' ra' yeru ba na'. ⁵ Biyéchuê', en buyúê' lu yeru ba na', ate' bilé'enê' yugu' lári'do' na' bila'rôlinê' Jesús, nacuá' ni', pero biti' guyáziê' yeru ba na'. ⁶ Ní'irô bidxinê' Simón Pedro cúdzulê' ia'túê' bönni' usêda na', ate' guyáziê' lê' yeru ba na', en bilé'enê' lári'do' na' nacuá' ni'. ⁷ Lêsca' bilé'enê' lári'do' na' gula'xôê' icjê' Jesús, biti' dëlen ia'zica'rô lári'do' na', pero tsólá'alô nudubi quez. ⁸ Ní'irô guyáziê' ca' ia'túê' bönni' usêda na' bidxinê' zí'alô ra' yeru ba na', en bilé'enê' ca na' naca, ate' guyéajlê'ê didza' bê'ê Jesús. ⁹ Caní guca, tu' cabí ta'yéajni'ininê' le nazúaj lu guichi lá'ayi ca run bayudxi gaca queê' Jesús, ate' ubanê' lu yôl-la' guti. ¹⁰ Ní'irô iropê' bönni' usêda na' yôjhuôjgaquiê' lidxigaquiê'.

Rulu'i lahuê' Jesús lonu María Magdalena

(Mr. 16:9-11)

¹¹ Bugá'ananu María ní'lò ra' yeru ba na', ribòdxinu. Tsanni ni' ribòdxinu, biyéchunu, buyunu lu yeru ba na'. ¹² Bilé'enu chopé' gubáz lá'ayi queé' Dios ni', nácugaquié' lari' chiguichi. Ró'ògaquié' ni', tué' ícjalo ba na', en ia'tué' xini'alo ba na' ga ni' gula'gu'é Jesús.

¹³ Yugu' gubáz lá'ayi na' tē' lēnu, ta'nnē':

—Nigúlado', ¿bizx que ribòdxu'?

Rēnu légaquié':

—Tu' bulu'ú'ē Xana', en biti' nōzda' gazxi gula'gu'é Lē'.

¹⁴ Cate' budxi gunnānu caní, bué'cjanu, en bilé'enu-nē' Jesús, zoé' ni', pero biti' réquibe'enu Jesús na'. ¹⁵ Ní'irō Jesús gudxé'-nu:

—Nigúlado', ¿bizx que ribòdxu'? ¿Nuzxi ruguilju'?

Tu' réquinu náquié' Lē' bōnni' rapa chi'ē latja na', rēnu Lē':

—Bōnni', channō li' bu'u-nē', gudíxjōi' i neda' gazxi gulú'u-nē', ate' neda' u'a-nē'.

¹⁶ Ní'irō Jesús gudxé'-nu:

—María.

Ní'irō bué'cjanu, en lu didza' hebreo rēnu Lē':

—Raboni.

Didza' ni rnna: Bōnni' Usedi quia'.

¹⁷ Jesús rē'ē-nu:

—Biti' canu' neda', tu' cabí ruhuépinida' ga zoé' Xuza'. Na'a, guyéaj ga nacu'ē bōchi' luzá'a, ate' yōjōdxí-gáquié': "Caní rnnē' Jesús: Huépa' ga zoé' Xuza', náquié' ca' Xúzili'. Náquié' Dios quia', en Dios queé'li'."

¹⁸ Ní'irō guyéajnu María Magdalena na', yōjtíxjōi'inu yugu' bōnni' usēda queé' Jesús chibilé'enu-nē' Xanru', en ca naca didza' na' gudxé'-nu.

Rulu'i lahué' Jesús lógaquié' bōnni' usēda queé'

(Mt. 28:16-20; Mr. 16:14-18; Lc. 24:36-49)

¹⁹ Cate' chigul-la la' dza ná'asó, le naca dza risí lo gadxi dza, nudúbigaquié' bōnni' usēda queé' Jesús, ate' nayayaj yu'u ga na' nacu'ē tu' tádxinē' bōnni' judío unná bē'. Ní'irō buluf'i lahué' Jesús gatsaj láhui'ló ga na' nacu'ē, en rē' légaquié':

—Gulí'zóa dxi ládxí'li'.

²⁰ Cate' budxi gudxé' légaquié' didza' ni, bulu'ínē' légaquié' nē'ē, en cuita lē'ē. Ní'irō tu'dzéjané' yugu' bōnni' usēda na' tu' tu'lé'enē' Xanru'. ²¹ Ní'irō Jesús rē' légaquié' leyúbóló, rnnē':

—Gulí'zóa dxi ládxí'li'. Ca benē' Xuza', gusól-lē'ē neda', lē'sca' caní risól-la'a libí'ili' tsōjenli' xichina'.

²² Cate' budxi gunnē' caní, bulubé' lógaquié', en rē' légaquié':

—Gulí'sí Dios Bō' Lá'ayi. ²³ Núti'tēs nu uniti loli', nu na' ben dul-la', chiyú'u yöl-la' runiti lo que, ate' núti'tēs nu biti' uniti loli' le, ugá'ana dul-la' que nu na' nun dul-la'.

Biti' réajlě'ē Tomás

²⁴ Tomás biti' zóalenē' légaquié' cate' Jesús buduyúē' légaquié'. Náquié' Tomás tué' bōnni' chínnuē' ni', en tu'ē ca' lē' Bōnni' Bilidi'. ²⁵ Gudōdi ni' ia'zica'rē' bōnni' usēda na' gulē' Tomás, ta'nnē':

—Chibilé'etu'-nē' Xanru'.

Tomás rē' légaquié':

—Channō cabí ilé'eda' nē'ē ga gunnē' bididaj, en unē'a xibón na'a ga na' guné'gaca bididaj na', en unē'a na'a cuita lē'ē ga na' gunnē' yaga tuchi', biti' ca' tséajlě'a.

²⁶ Cate' chigudōdi ia'xunu' dza, nudúbigaquié' bōnni' usēda na' leyúbóló lu yu'u, ate' Tomás na' zóalenē' légaquié'. Sal-la' nayayaj yu'u ga na' nacu'ē, buluf'i lahué' Jesús gatsaj láhui'ló ga na' nacu'ē, en rē' légaquié':

—Gulí'zóa dxi ládxí'li'.

²⁷ Ní'irō Jesús rē' Tomás na':

—Buné' xibón no'o ni, en buyú na'a ni. Buné' no'o cuita lē'a ni, en bítirō gaca chopa ládxu'u, pero guyéajlě' neda'.

²⁸ Ní'irō bubi'ē didza' Tomás, rē' Lē':

—Xána'do', en Dios quia'.

²⁹ Jesús rē' lē':

—Tomás, tu' bulé'enu' neda', réajlě'u. Bica' ba nupa ni' ila'yéajlě' neda' sal-la' biti' ila'lé'eni neda'.

Le rē'ēni gun didza' nazúaj lu guichi ni

³⁰ Benë' Jesús zianrö ca' yöl-la' huáca lógaquië' bönni' usëda queë', le cabí nazúajgaca lu guichi ni. ³¹ Yugu' lë ni nuzúaja' lu guichi para tséajlë'ëli' náquië' Jesús Bönni' na' ru'ë Dios lë' Cristo, Zxi'inë' Dios, en cate' tséajlë'ëli', gata' queëli' yöl-la' na'bán idú tu' réajlë'ëli'-në'.

21

Rulu'i lahuë' Jesús lógaquië' gadxë' bönni' usëda queë'

¹ Gudödi guca lë ni, leyúbölö buluf'i lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' buluf'i lahuë' lógaquië'. ² Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzo Caná que luyú Galilea, en chopë' bönni' zxi'inë' Zebedeo, en ia' chopë' ca' bönni' usëda queë' Jesús. ³ Simón Pedro rë' légaquië':

—Tseaja' tsöjxöna'-ba' böla.

Të' lë' ia'zica'rë', ta'nnë':

—Guntu' li' tsözxön.

Ní'irö yójáquië', en gula'benë' tu lë'e bárcodo', ate' rëla ni' nituba' böla bití' gula'zönë'-ba'.

⁴ Cate' chizá' rení', yöjsöë' Jesús luyú ra' nisa na', pero bití' téquibe'enë' bönni' usëda queë' Jesús Lë' na'. ⁵ Ní'irö Jesús rë' légaquië':

—Zxi'ina'do', ¿naru' cabí deba' lati' böla queëli'?

Bulu'bi'ë didza', të' Lë':

—Nituba'.

⁶ Ní'irö Jesús rë' légaquië':

—Guli'chílay yöxaj böla queëli' tsölá'a ibëla barco, ate' söngacali'-ba'.

Ní'irö gula'chiljé' le, ate' bití'rö guca ulu'béajé' le, tu' naguíraba' böla lë'e yöxaj böla na'.

⁷ Ní'irö bönni' usëda na' nadxi'inë' Jesús lë' rë' Pedro, rnnë':

—¡Xanru' na'!

Cate' biyönnë' Simón Pedro, “Xanru' na”, böácuë' lari' gúcuë', tu' nagúë' le zí'alö, ate' guyázië' lu nisa. ⁸ Bila'dxinë' ia'zica'rë' bönni' usëda na', tu'së'ë barco na', suná'ayöjgaquië' yöxaj ga na' dzó'öba' böla, tu' cabí naca zí'tu' ga dë luyú bidxi. Nácatë ca tu gayuá' löga' ní'aru'.

⁹ Cate' bila'dxinë' luyú bidxi na', bila'lë'enë' rö'ö tu guí' bo' yalaj ni', en zxóaba' tuba' böla láhuilö, en dë ca' yöta ni'. ¹⁰ Jesús rë' légaquië':

—Guli'diguá'a-ba' ni böla na' si' guzxöngacali'-ba'.

¹¹ Gurenë' Pedro lë'e barco na', ate' gú'uyöjé' yöxaj na' zaca' luyú bidxi, nalí'rö-ba' böla zxön, idú tu gayuá' yu' chí'inu-unba'. Sal-la' nácacacaba' böla zían, bití' biröza' yöxaj na'.

¹² Ní'irö Jesús rë' légaquië':

—Guli'dá gáguli'.

Bití' burúguinë' nitúë' bönni' usëda queë' na' inábinë' Lë', innë': “¿Nuzxi Li'?” Nözguequi quézinë' náquië' Xanru'. ¹³ Ní'irö gubíguie' Jesús, en gudélë'ë yöta na', enca' böla na', ate' bë'ë quégaquië'.

¹⁴ Lë ni naca le bunni luzuí buluf'i lahuë' Jesús lógaquië' bönni' usëda queë' gudödi bubané' lu yöl-la' guti.

Jesús ru'ílenë' Simón Pedro didza'

¹⁵ Cate' budxi gulahuë', Jesús rë' Simón Pedro:

—Simón, zxi'inë' Jonás, ¿naru' nadxi'irönu' neda' ca nadxi'iguequinë' bönni' ni neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' zxíla'do' quia'.

¹⁶ Jesús rë' lë' le buropi luzuí, rnnë':

—Simón, zxi'inë' Jonás, ¿naru' nadxi'inu' neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' zxíla' quia'.

¹⁷ Jesús rë' lë' le bunni luzuí:

—Simón, zxi'inë' Jonás, ¿raza ládxa'u neda'?

Buí'innë' Pedro tu' le chibunni luzuí rinabi yúdxinë' lë', gunné': “¿Raza ládxa'u neda'?” Bubi'ë didza' Pedro, rë' Lë':

—Xan, yúgu'të nöz quézinu' Li'. Nözinu' raza ládxa'a Li'.

Jesús rë' lë':

—Bugagu yugu' bö'cu' xzila' quia'. ¹⁸ Le nácatë rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', ulí no'o, ate' nu yúbölö ugacu li' lari', en iché' li' ga ni' bití' gué'ënnu' tseaju'.

¹⁹ Yugu' didza' ni bē'ë Jesús naca bē' naca gátië' Pedro, tsöjtë'ë lē'e yaga cruz, para gaca yöl-la' ba queë' Dios. Cate' budxi gunnë' caní Jesús, gunnë' ca' ia'tú:

—Gudá' neda'.

Ru'ë didza' Jesús ca gaca queë' bönni' usëda na' nadxí'inë'

²⁰ Buécjë' Pedro, en bilé'enë' sōjnáhuë' légaquië' bönni' usëda na' Jesús nadxí'inë' lē'. Náquië' bönni' usëda na' gurö'ë cuita lē'ë Jesús cate' ni' gulahuë', en gudxë' Jesús: "Xan, ¿nuzxi na' udödi Li'?" ²¹ Cate' Pedro bilé'enë' lē', rē' Jesús:

—Xan, ¿bizxi gunë' bönni' ni?

²² Jesús rē' lē':

—Channö rē'ënda' ugá'anë' bönni' ni ga idxinrö dza huöda', bití' ral-la' cō'u böniga. Gudá'a neda' li'.

²³ Guzë' didza' ni ga nacu'ë böchi'ru' ta'yéajlë'ë Cristo. Téquinë' bití' gátië' bönni' usëda na'. Jesús bití' gudxë' lē' bití' gátië', pero caní gunnë': "Channö rē'ënda' ugá'anë' bönni' ni ga idxinrö dza huöda', bití' ral-la' cō'u böniga."

²⁴ Bönni' usëda ni naca' neda', Juan. Runa' ba nalí quéguequi lē' ni, en nuzúaja' yugu' lē' ni lu guichi, ate' nözili' naca idútë' li le runa' ba nalí.

²⁵ Ziánrö ca' le benë' Jesús. Channö nu uzúaj léguequi lu guichi tu tu, rusaca' quia' bití' guequi yödzölió ni ila'cuá' guichi na' ral-la' nu uzúaj. Ca' caz.

LE GULUNË' BÖNNI' GUBÁZ NASÖL-LË'Ë CRISTO Los Hechos

Le guzxí' lu në'ë Dios, isöl-lë'ë Dios Bö' Lá'ayi

¹ Cate' buzúaja' lu guichi zí'aló, quiu' li', Teófilo, neda', Lucas, buzúaja' yúgu'tè le gusí lahuë' runë' Jesús, en rusédinë' ² ga bidxintë dza buëpë' yehua' yubá. Cate' si' huëpë' Jesús yehua' yubá, dzáguië' Dios Bö' Lá'ayi Lë', gunná bë'ë ca ral-la' ilunë' gubáz queë', yugu' bönni' na' gurö cazë'. ³ Gudödi gudí'i guzáquë'ë Jesús, gútië'. Ní'irö bubanë', en buluf'i lahuë' lógaquië' gubáz queë' na'. Buluf'inë' légaquië' zían le gulaca bë' zoë' nabanë', le cabí gaca nu tá'baga'. Zían luzuí buluf'i lahuë' lógaquië' idú ca choá' dza, en bë'lenë' légaquië' didza' ca rinná bë'ë Dios.

⁴ Cate' ni' nacu'ë tsözxön, gunná bé'enë' légaquië' cabí ulu'zë'ë Jerusalén. Jesús gudxë' légaquië', rnnë':

—Guli'cöz ni' le guzxí' lu në'ë Xuza' isöl-lë'ë queëli' ca na' chibusiyón quézida' libí'ili'.

⁵ Gunnë' ca':

—Le nácatë Juan buquillë' bönachi nisa lu nisa. Na'a bití' tse xidzé gaca queëli' le ruluf'i yöl-la' ridila nisa ni, idisóalenë' Dios Bö' Lá'ayi libí'ili'.

Ruhuëpë' Jesús yehua' yubá

⁶ Ní'irö yugu' bönni' ta'yéajlë'ë Jesús, nudúbigaquië' ni', gula'nábinë' Lë', ta'nnë':

—Xan, çnarú' gunu' ga ila'nná bë' bönachi Israel leyúbölö dza ni zóaru' na'a?

⁷ Jesús gudxë' légaquië':

—Bití' nequi queëli' inözili' bizxi dza o bizxi dzö' gunë' Dios Xuz le nuzóë' lu na' cazë'.

⁸ Sí'ili' yöl-la' huáca cate' guidë' Dios Bö' Lá'ayi idisóalenë' libí'ili'. Ní'irö gunli' ba nalí quia' neda' lu yödzo Jerusalén, en idú luyú Judea, en luyú Samaria, en ga idxintëli' idütë yödzoilió.

⁹ Cate' budxi bë'lenë' légaquië' didza' ni, tsanni ni' tu'yusë' ca' Lë', la' buëpitë' xitsá' ga rö'ö tu bôaj le bucache' Lë', atë' bití' rö bila'lë'enë' Lë'. ¹⁰ Tsanni ni' tu'yüë' lúzxibalö cate' ni' buëpë' Jesús, bulu'lu'í lógaquië' chopë' gubáz lá'ayi ga na' nacu'ë, nácuagaquië' lari' chiguichido'os.

¹¹ Chopë' ni' gulë' légaquië', ta'nnë':

—Bönni' Galilea, çbizx que ruyuli' lúzxibalö? Lë' cazë' Jesús ni si' guzë'ë ga zóali', buëpë' yehua' yubá, lësca' caní huödë' leyúbölö ca na' chibilë'eli'-në' söhuöjë' yehua' yubá.

Ta'böë' Matías para tsázië' xilatjë' Judas

¹² Ní'irö gula'zë'ë ga na' rö'ö guí'ado' na' nazí'i le Gu'fa Yaga Olivo, atë' yöjhuöjgaquië' Jerusalén. Guí'ado' ni' dë' gála'sö ga dë' Jerusalén, tsca nazí'gaquië' lataj ta'zë'ë dza lá'ayi quégaquië'. ¹³ Cate' bulu'dxinë' yödzo ni', gula'benë' ga naca buropi cuía lu yu'u, ga ni' ta'cu'ë Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxi'inë' Alfeo, en Simón, bönni' na' ruí'i ládxë'ë ladzë', en Judas, böché'ë Jacobo. ¹⁴ Yúgu'të bönni' ni' tu'lidzë' Dios tsözxön, atë' yugu' böché'ë Jesús, en María, xinë'ë Jesús, en ia'zica'rönu nigula ca' núngaquië' légaquië' tsözxön.

¹⁵ La' dza ná'asö guzuínë' Pedro gatsaj láhui'lö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bönachi nupa nudúbigaca ni'. ¹⁶ Pedro gudxë' légaquië', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunné' Dios Bö' Lá'ayi dza ni'të, le buzúajë' David lu guichi, ca guca queë' Judas, bönni' na' guchë'ë nupa ni' gula'zön Jesús. ¹⁷ Judas na' gubábalenë' rë'u, en bënlenë' rë'u tsözxön dxin ni'. ¹⁸ Gula'zínë' tu la' yëla lazxaq que dö' na' bi'ë bönni' ni. Judas ni' gubixë', en biröza' lë'ë, atë' bila'rúaj yúgu'të le dzö'ö lë'ë. ¹⁹ Cate' bila'yöni bönachi nacua' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön. ²⁰ Caní guca queë' Judas, ca na' nazúaj lu guichi lá'ayi nazí'i le Salmos, le rnna:

Ugá'ana cá'asö lidxë',

en bití' idzöli nu soa yu'u na'.

Rnna ca':

Nu yúbölö tsaza xilatjë'.

²¹⁻²² Run bayudxi na'a cöru'-në' tu bönni' gunë' rë'u tsözxön para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacua'lenë' rë'u cate' ni' buquillë' Juan bönachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

²³ Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo.

²⁴ Ní'irö bulu'lidzë' Dios, ta'nnë':

—Xantu' Dios, nunbë' casu' icja lãdxi'do'gaca yúgu'të bönachi. Buluf'i netu' nulë' chopë' ni chigurö casu' Li' ²⁵ para tsãzië' lu dxin ni para gãquië' gubáz quiu'. Tsãzië' xilatjë' Judas, bönni' ni' bunítie' xilatjë' tu' benë' dul-la', ate' gуйjë' xilataj cazë' lataj chul-la.

²⁶ Ní'irö bulu'zúajë' yugu' lu guichi lãgaquië', tu queë' José, en ia'tú queë' Matías. Bulu'gútsi'në' luzë'eguequi, en bulu'bëajë' tu, ate' birúaj le nazúaj lë' Matías. Caní guca, Matías na' gubábalenë' ia'chinëajë' gubáz queë' Cristo.

2

Dios Bö' Lá'ayi ridisóalenë' lëgaquië'

¹ Cate' chibidxin dza Pentecostës, nudúbigaquië' tsözxön yúgu'të bönni' ta'yéajlë'ë Cristo. ² Tsálido'os biyön bö le birúaj lúxiba, le biyön ca riyön cate' recja bö' budunu', ate' biyön idütë lu yu'u ga na' rő'õgaquië'. ³ Bulu'lu'i lahui yugu' bululu guí'do' lu bö'õs lãgaquië', ate' gula'guisi que queëgaquië'. Bidisóalengaca tu tuë'. ⁴ Caní guca, Dios Bö' Lá'ayi bidisóalenë' yúgu'të, ate' gula'si lãgaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

⁵ Nacu'ë zían bönni' judío yödzo Jerusalén dza na', nãcagaquië' bönni' ta'yéaj lãdxi'gaquië' Dios, en zá'gaquië' narúajgaquië' yúgu'të yödzo idütë yödzülió ni. ⁶ Cate' bila'yönnë' bö na', bulu'dubë' bönni' zían, ate' gula'bö'ë böniga, tu' bila'yönnë', ca naca xtídza'gaquië' que queëgaquië', tu'ë didza' bönni' na' ta'yéajlë'ë Cristo. ⁷ Gula'ná' badxë' yúgu'të, en bulu'bánnë, ta'nnë'.

—Buli'yútsöca'. ¿Naru' calëga bönni' Galilea yúgu'të bönni' ni tu'ë didza'? ⁸ ¿Nacxi caz naca riyóniru' tu'ë xtídza'ru' ca naca didza' ruí'iru' tu turu'? ⁹ Rë'u ni nácaru' bönni' zían yödzo, bönni' narúajgaquië'

luyú Partia, en luyú Media, en luyú Elam,
en luyú Mesopotamia, en luyú Judea, en luyú Capadocia,
en luyú Ponto, en luyú Asia,

¹⁰ en luyú Frigia, en luyú Panfilia, en luyú Egipto,
en luyú Africa, ga nãcarö zi'tu' ga dë luyú Cirene.

'Lësca' nacu'ë bönni' yödzo Roma ni. Bal-lë' nãcagaquië' bönni' judío, en ia'bal-lë' nazí' lu ná'agaquië' le ta'yéajlë'ë bönni' judío Dios. ¹¹ Lësca' nacu'ë ni yugu' bönni' narúajgaquië' Creta, en luyú Arabia. Riyóniru' tu'ë didza' ruí'iru' que queëru', ate' ta'guíxjö'ë yugu' le zxön benë' Dios, le tun ga rubániru'.

¹² Caní guca, bulu'bánnë yúgu'të, en gula'bö'ë böniga. Gulë luzá'agaquië' tuë' ia'túë', ta'nnë'.

—¿Bizxi caz lë ni?

¹³ Bulu'titjë' bal-lë', ta'nnë'.

—¡Ta'zúdxinë'!

Libán benë' Pedro lógaca bönachi zían

¹⁴ Ní'irö Pedro guzuílenë' ia'chinëajë' gubáz na' nasöl-lë'ë Cristo, ate' gusí lahuë' ru'ë zidzaj didza', rë' lëgaquië'.

—¡Libí'ili', bönni' Judea, en yúgu'tëli' nacu'á'ali' yödzo Jerusalén! ¡Lë ni ral-la' inözili'! ¡Buli'zë nãgali' le guía' libí'ili'! ¹⁵ Netu' ni biti' rizúdxitu' ca na' réquili' libí'ili', tu' ni zóaru' si' gala' xsila, ate' cuntu nu rizudxi hora caní. ¹⁶ Lë ni naca le gunnë' Joel, bönni' bë'ë didza' uláz queë' Dios, gunnë'.

¹⁷ Caní rnnë' Dios: Lë ni le gaca dza tsöjsétëgaca.

Isöl-la'a Bö' Lá'ayi quia', tsöjsóalenë' yúgu'të bönachi.

Zxí'inili', bönni', en nigula, ilu'ibi' didza' uláz quia' neda'.

Yugu' bi'i ra'bán ila'lé'ebi' le ulu'a lahui,

ate' yugu' bönni' gula ila'nenë' yëla.

¹⁸ Cate' idxín dza ni' quísia' Bö' Lá'ayi quia',
tsöjsóalenë' huen dxin quia', bönni', en nigula,
ate' ilu'ë didza' uláz quia' neda'.

¹⁹ Ulu'a lahui lúxiba xitsá' le ilún ga ulu'bani bönachi,

ate' yödzülió ulu'a lahui le ilaca bë',

rön, en guí', en dzön ca böaj.

²⁰ Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'ë Dios.

Gaca dza ni' le catu caz rilë'ëru'.

²¹ Ulu'lágaca yúgu'të nupa ni' ulu'lidza Lë' Xanru',

lu yöl-la' réajlë' quëguequi Lë'.

²² 'Buli'zé nágalí' lē ni guía' libí'ili', bōnachi Israel. Dios caz benē' bal Jesús, bōnni' Nazaret ga zóali'. Dios bē'ē Lē' lataj benē' le tun ga rubániru', yugu' yōl-la' huáca, en le taca bē'. Yúgu'tē lē na' benē' Dios lu nē'ē Jesús, ca na' chinōz quézili'. ²³ Lē'sca' caní, Dios bē'ē lataj nu budōdi Jesús lu ná'ali'. Caní guca, ca na' chigunná ládxē'ē Dios gunē', en ca naca le chibucōzē' dza ni'te. Libí'i cázali' guzxonli'-nē' Jesús, en bētili'-nē' lu ná'agaquiē' yugu' bōnni' tuá' dō', bōnni' gulútiē' Lē' cate' ni' bulu'dá'gaquiē' Lē' lē'e yaga cruz. ²⁴ Ní'irō Dios caz busubanē' Jesús na'. Bubéajē' Lē' lu yōl-la' guti, tu' cabí guca ugá'anē' tsaz lu yōl-la' guti na'. ²⁵ Ca naca lē ni, bē'ē didza' David uláz queē' Dios ca naca queē' Jesús, gunnē':

Bilé'etiqui'sida'-nē' Xanru', zoē' lahua'.

Lē' zoē' cuita lē'a ibēla, rizōnē' neda',

para cabí gaca nu bi gun quia'.

²⁶ Que lē ni na' budzeja ládxa'a,

ate' lu yōl-la' rudzeja quia' bil-la'.

Que lē ni na' guna' lōza Lē'

cate' idxín dza gátia'.

²⁷ Xantu' Dios, nōzda' bití' ucá'anú' neda'

lataj chul-la ga nacuá' nupa nátigaca.

Bití' gu'u lataj initi idútē le naca'.

Naca' bōnni' nadxí'i quézinu' Lí'.

²⁸ Buzéajni'inu' neda' ca ral-la' guna'

para idéli'da' yōl-la' na'bán idú.

Gunu' ga udzējada' tu' zóalen cazu' neda'.

²⁹ 'Na'a, libí'ili', bōcha'a. Naca bē' gútiē' xuz xtó'oru' David, en bigáchē'ē yeru ba, ate' ba queē' na' dē ga zóaru' ga ridxintē na'a dza. ³⁰ David na' bē'ē didza' uláz queē' Dios, en gunōzinē' benē' tsutsu Dios didza' le guzxi' lu nē'ē queē', gunē' ga galjē' Cristo ladaj di'a dza queē' si' zá'gaca, ate' Cristo na' inná bē'ē xilatjē' David na'. ³¹ Tu' bilē'enē' David lē ni zí'alō, bē'ē didza' ca guca, busubanē' Cristo, en ca guca, bití' bugá'anē' lataj chul-la ga nacuá' nupa nátigaca, en bití' guniti le naca cazē'. ³² Dios busubanē' Jesús lu yōl-la' guti, ate' ca guca lē ni yúgu'tētu' runtu' ba nalí que. ³³ Caní guca, len yōl-la' huáca queē', Dios buchisē' Lē' xitsá' ga ni' nácatērē' zxon. Na'a, Cristo chigusól-lē'ē Dios Bō' Lá'ayi ni, ate' raca ca na' guzxi' lu nē'ē Dios gunē' lu nē'ē Cristo, ate' Dios Bō' Lá'ayi na' runē' yugu' lē ni rilē'eli', en riyónili'. ³⁴ Bití' buēpē' David na' yehua' yubá, pero lē cazē' David na' gunnē':

Xanru' Dios gudxē' Xana':

Gurō'i cuita lē'a ibēla ga naca lo

³⁵ cate' gunra' ga ulu'zechu zxi'bigaca nupa ta'dá'baga' Lí' lo' Lí'.

³⁶ 'Na'a, bōnachi Israel, ral-la' inōzili' le nácatē. Dios benē' ga náquiē' Lē cazē' Jesús ni Xanru', en Bōnni' Rusólá, bōnni' na' budá'ali'-nē' lē'e yaga cruz.

³⁷ Cate' yugu' bōnni' ni' bila'yōnnē' lē ni, gula'bō'ē bōniga, ate' gulē' Pedro, en ia'zica'rē' bōnni' gubáz queē' Cristo, ta'nnē':

—Bōchi'ru', ¿nacxi gúntsatu'?

³⁸ Ní'irō Pedro gudxē' légaquiē':

—Buli'bf'i ládxili', en guli'dila nisa tu tuli' lu Lē' Jesucristo para uniti lahuē' Dios dul-la' nabága'li', ate' Dios Bō' Lá'ayi idisóalenē' libí'ili', Nu na' isól-lē'ē Dios. ³⁹ Queēli' nequi le guzxi' lu nē'ē Dios, en quégaca zxi'inili', enca' quégaca yúgu'tē bōnachi izá'a, yúgu'tē bōnni' ni' ulidzē' Xanru' Dios légaquiē'.

⁴⁰ Yugu' didza' ni, en ia'bal-la' zían didza' benē' ba nalí Pedro, le guchízíē' icja nágagaquiē', gunnē':

—Guli'gún ga uláli', irúajli' ládjagaca bōnachi tuá' dō' nacuá' dza ni zóaru' na'a.

⁴¹ Caní guca, gula'dila nisa nupa ni' gula'zí' lu nē'eguequi didza' na' bē'ē Pedro. Dza na' ca chi uruá' gayuá' bōnachi gulún légaquiē' tuz. ⁴² Gulunē' yúgu'tē idútē le bulu'sédinē' gubáz nasól-lē'ē Cristo légaquiē'. Guláquiē' tuz tuē' len ia'tuē' yugulāhuē' tsōzxōn le rusá' ládxiru' ca gútiē' Jesús, ate' gulunē' tsōzxōn, bulu'lidzē' Dios.

Ca tun bōnachi queē' Cristo

⁴³ Gulunē' gubáz queē' Cristo zían le run ga rubániru', en zían le taca bē', pero guladxi gula'dzōbi ia'zica'rō bōnachi. ⁴⁴ Yúgu'tē nupa na' ta'yéajlē' Cristo gulaca tuz, ate' bulu'ún tuz yúgu'tē le dē quéguequi. ⁴⁵ Cate' bila'lē'enē' ta'yadzaj nupa nús'a gaca ládjagaquiē', ní'irō yugu' bōnni' bi dē quégaequi gulútiē' le, ate' gula'guisíē' dumi na' que queégaca nupa ni' bi ta'yadzaj. ⁴⁶ Bulu'dubē' tsōzxōn chila yudo' yugu' dza, ate' gulahuē' le rusá' ládxiru' ca gútiē' Xanru'. Caní gulunē' gapa naca lu yu'u lidxigaquiē'. Gulahuē' tsōzxōn, ate' bulu'dzējanē', en gulaca idú ládxigaquiē'. ⁴⁷ Gula'gu'ē Dios yōl-la' ba, ate' yúgu'tē bōnachi gulún légaquiē' bal. Buzanē' Xanru' nupa tu'dubi queē', nupa na' tu'lá tu tu dza.

3

Ruhuóáquiē tu bōnni' bití' raca sē'ē

¹ Tu dza ni' gula' benē' Pedro, en Juan, sōjáquiē' tsōzxōn lu chila yudo', cate' tu' dubi bōnachi tu' lida Dios ni', le naca idú ridōdi xihuó. ² Ga ni' ta' dōdē' zoē' tu bōnni' bití' raca sē'ē dza ni' te ni' náquiē' b'fido'. Yugu' dza rōjuá' gaquiē' lē' ni', en ta' béquiē' lē' ra' yudo' ga nazí' i le Ra' Yu'u Lachi, para inábinē' nu bi unōdzjasō queē' lada nupa ni' ta' yaza lō'a yudo'. ³ Bōnni' ni, cate' bilé'enē' Pedro, en Juan, sōjáquiē' ta' yáziē' lō'a yudo', gúta' yuē' lōgaquiē' bi ulu'nōdzjasē' queē'. ⁴ Ní'irō bulu'yúē' Pedro, en Juan lē', ate' Pedro gudxē' lē':

—Buyú netu'.

⁵ Ní'irō bōnni' na' buzēda' náquiē' lēgaquiē' tu' runē' lōza bi ulu'nōdzjasē' queē'. ⁶ Pedro gudxē' lē':

—Bití' dē dumí plata, dumí oro quia', pero le dēsō quia' gunna' quiu'. Ní'a que yōl-la' huáca que Lē' Jesucristo, bōnni' Nazaret, guyasa, en guzē'e.

⁷ Ní'irō gudélē' Pedro nē'ē ibēla bōnni' huē' na', en buchisē' lē', ate' la' bōacatē ni'ē, en buguitaj bēchaj ni'ē bōnni' na'. ⁸ Ní'irō guzuinē' bōnni' na', ate' guxiti'ē, en guzē'ē. Guyázalenē' tsōzxōn Pedro, en Juan, lō'a yudo', rizē'e ni'ē, en rixítí'ē, en rigu'ē Dios yōl-la' ba. ⁹ Yúgu'tē bōnachi nacuá' ni' ta'lē'e lē' rizē'e ni'ē, en rigu'ē Dios yōl-la' ba. ¹⁰ Caní guca, guládxinē', en bulu'bánninē' ca naca lē' na' guca, tu' bulu'únbē'ē lē', náquiē' bōnni' na' ribō'ē ra' yudo' ga nazí' i le Ra' Yu'u Lachi, rinabē' nu bi unōdzjasō queē'.

Didza' bē'ē Pedro chila yudo'

¹¹ Tsanni ni' bōnni' na' bití' guca sē'ē, ate' bōáquiē', zōnē' ná'agaquiē' Pedro, en Juan, bulu'dubi yúgu'tē bōnachi ga na' nacu'ē chila yudo' nazí' i le: Chila Queē' Salomón, ate' gula'ná' badxē'. ¹² Cate' bilé'enē' Pedro lē' ni, gudxē' bōnachi na':

—Libí'ili, bōnni' Israel, ¿bizx que rubánili' ca naca lē' ni? ¿Bizx que ruyuli' netu', en réquitseli' netu'só buntu'-nē' bōnni' ni, en bentu' ga rizē'e ni'ē len yōl-la' huáca queēztu', o ní'a que le reaj ládxi'tu'-nē' Dios? ¹³ Naca lē' ni le benē' Dios. Náquiē' Dios quégaquiē' xuz gudōdi queēru' Abraham, en Isaac, en Jacob. Lē' cazē' bēntērē' bal Jesús, Zxí'inē'. Jesús ni, libí'í cázali' bētili'-nē' lu ná'agaquiē' bōnni' ta'nná bē'enē' libí'ili'. Cate' gú'unnē' Pilato usanē' Jesús, gudá'baga'li'-nē'. ¹⁴ Buzóali' tsólá'aló Bōnni' Tsahui', en Lá'ayi, ate' gunábili'-nē' Pilato usanē' queēli' tu bōnni' rútiē' bōnachi. ¹⁵ Caní guca, bētili'-nē' Bōnni' runna cazē' yōl-la' na'bán idú queēru'. Ní'irō Dios busubanē' Lē' lu yōl-la' guti, ate' ca naca lē' ni runtú' ba nalí que. ¹⁶ Tu' guyéajlē'ē bōnni' ni Jesús, bōáca ni'ē. Rilé'eli'-nē', en núnbē'eli'-nē'. Tu' réajlē'ē Jesús, Lē' bunē' dxi'ado' bōnni' ni, ate' rilé'eli' yúgu'tēli' le nácatē na'.

¹⁷ Na'a, bōcha'a, nōzda' benli' caní, bētili'-nē' Jesús tu' cabí guyéajni'ili', en bití' gula'yéajni'inē' bōnni' ta'nná bē'enē' libí'ili'. ¹⁸ Caní busudxinē' Dios didza' na' bē'ē z'f'aló, le gula'nnē' bōnni' bulu'ē didza' uláz queē' ca ral-la' qui'í sáqué'ē Cristo. ¹⁹ Que lē' ni na', bulu'bí'í ládxi'li', en bulu'huóaca queē' Dios, para ugúē' dul-la' nabága'li', en gunē' ga huóaca ládxi'li'. ²⁰ Ní'irō isól-lē'ē leyúbóló Jesús, Bōnni' na' buzōē' dza ni' te para gáquiē' Cristo, Bōnni' Rō queē', Bōnni' na' inná bē'enē' libí'ili'. ²¹ Na'a, run bayudxi ugá'anē' yehua' yubá ni' cate' idxinrō dza uduhuénē' tsahui' yúgu'tē le raca, en gaca ca na' chigunná cazē' Dios, lē' na' gula'nnē' bōnni' gulu'ē didza' uláz queē', bōnni' ni' gula'cu'ē dza ni' te. ²² Lē'sca' caní Moisés gudxē' xuz xtó'oru', gunné': "Xanru' Dios isól-lē'ē queēli' tu bōnni' galjē' ládjagaca di'a dza queēli'. Gáquiē' bōnni' gu'ē didza' uláz queē' Dios. Isól-lē'ē Lē' queēli' ca na' gusól-lē'ē neda'. Run bayudxi uzē' nágali'-nē' ca naca yúgu'tē le guíē' libí'ili'. ²³ Yúgu'tē nupa bití' ulu'zē' nágagaca bōnni' ni' gu'ē didza' uláz queē' Dios ila'niti, en ulu'lá'alēn bōnachi queē' Dios."

²⁴ Ca naca dza ni zóaru' na'a, gula'guíxjō'ē yúgu'tē bōnni' gulu'ē didza' uláz queē' Dios ga gudéla'tē zoē' Samuel, en gudōdi ni'. ²⁵ Libí'ili' nácali' zxfí'ini xi'sōgaquiē' bōnni' gulu'ē didza' uláz queē' Dios, ate' nequi queēli' didza' rucá'ana tsahui', le bēnlēnē' Dios xuz xtó'oru', cate' ni' gudxē' Abraham: "Ní'a que le gunē' zxfí'ini xi'sú' ilaca bica' ba yúgu'tē bōnachi yōdzólí'ō." ²⁶ Cate' Dios busubanē' Zxí'inē' lu yōl-la' guti, gusól-lē'ē Lē' z'f'aló queēli' para gunē' ga gácali' bica' ba, en ucá'anali' le cabí naca dxi'a runli'.

4

Ta'dxinē' Pedro, en Juan lōgaquiē' bōnni' yudo' tu'chi'a tu'sōrōē'

¹ Tsanni ni' bōnachi na' tu'ilenē' Pedro, en Juan, didza', yugu' bixúz judío, en yugu' bōnni' yudo' saduceo, en bōnni' ta'nná bē'enē' ní'a ná'agaquiē' bōnni' yudo', bila'dxinē' tsálido'os ga na' nacu'ē. ² Gula'lenē' bōnni' ni tu' tsédinē' Pedro, en Juan, bōnachi, en té' léguequi ulu'bán nupa chinátigaca tu' bubanē' Jesús. ³ Ní'irō gula'zōnē' Pedro, en Juan, ate' gula'gu'ē lēgaquiē' lidxi guíē ga idxinrō dza yúbóló tu' chiridzō' dza na'. ⁴ Zían nupa ni' bila'yōni didza' gulu'ē Pedro, en Juan, gula'yéajlē' Cristo. Na'a, yugu' bōnni' biguú'í'só ta'yéajlē'ē Cristo nácagaquiē' idú chi-un gáyú'ē.

⁵ Dza buropi ni', yugu' bönni' unná bē', en bönni' gula tu'zėjani'inē' bönachi judío, en yugu' bönni' yudo' usēdi, bulu'dubē' lu yōdzō Jerusalén. ⁶ Lēśca' Anás, bixúz lo, en Caifás, en Juan, en Alejandro, enca' yúgu'tē bönni' di'a dza quégaquiē' bixúz lo bulu'dubē' ni'. ⁷ Ní'irō duchē'gaquiē' Pedro, en Juan, ate' bulu'sudxinē' légaquiē' gatsaj láhui'lō ga na' nacu'ē, en gula'nábinē' légaquiē', ta'nnē':

—¿Bizxi yōl-la' unná bē' dē lu ná'ali' runli' lē ni? ¿Nuzxi budōdi lu ná'ali' yōl-la' unná bē' ni?

⁸ Ní'irō Pedro gudxē' légaquiē', zóalenē' Dios Bō' Lá'ayi lē', rnnē':

—Libi'ili', núlōli' rinná bē'eli' netu', bönachi Israel, en libi'ili', bönni' gula. ⁹ Na'a, ¿rinábítseli' netu' ca naca dxin dxi'a bentu' queē' bönni' huē' ni, en nacxi guca, bōáquiē' bönni' ni? ¹⁰ Riguíxjōi'itu' libi'ili' para ila'nōzi yúgu'tē bönachi Israel. Zoē' bönni' ni loli', nuhuóáquiē' tu' ben dxin yōl-la' huáca queē' Jesucristo, bönni' Nazaret, Bönni' ni' budá'ali'-nē' lē'e yaga cruz, pero Dios busubanē' Lē' lu yōl-la' guti. ¹¹ Dios bē'ē didza' ca naca queē' Jesús ni, cate' ni' gunné': "Libi'ili', bönni' rucu'ali' zō'ō, gurú'unali' guiōj na', pero gurō caza' neda' guiōj na' para gaca guiōjlen zō'ō." ¹² Cúnturō nu zoa nu gaca usólá bönachi, tu' cabí zoa yōdzōlió ni ia'tuē' bönni' nuzōē' Dios, nu gaca usólá rē'u.

¹³ Cate' bila'lē'enē' nácagaquiē' rugu ladxí' Pedro, en Juan, en guléquibe'enē' biti' nazēdagaquiē' que yudo', en nácagaquiē' bönni' cá'asō, bulu'bábinē', ate' yōjnéguēquinē' Pedro, en Juan na', gula'cuá'lenē' Jesús. ¹⁴ Lēśca' bila'lē'enē' bönni' na' bōáquiē', zuinē' lógaquiē', ate' biti' guca bi ila'nnē' quégaquiē'. ¹⁵ Ní'irō gula'nná bē'enē' nupa ulu'béaj légaquiē' lō'alō yu'u ga na' nudúbigaquiē', ate' gulún xtidzē'ē la' légacasē'. ¹⁶ Gula'nnē':

—¿Nacxi gúntsaru' quégaquiē' bönni' ni? Le nácátē gulunē' tu le run ga tu'bani bönachi, ate' nōzigaca yúgu'tē bönachi nacuá' Jerusalén lē ni. Biti' gaca tá'baga'ru' le. ¹⁷ Na'a, para cabí sērō didza', en ila'yōni zíanrō ca' bönachi, uzeru' bach légaquiē' para cabí ilu'ilenrē' bönachi didza' ca naca queē' Jesús na'.

¹⁸ Ní'irō bulu'lidzē' Pedro, en Juan, ate' bulu'zenē' bach légaquiē' para cabí ilu'ilenrē' bönachi didza', en para cabí ulu'sédinē' légaquiē' ca naca queē' Jesús. ¹⁹ Ní'irō bulu'bi'ē didza' Pedro, en Juan. Gulē' légaquiē':

—Buli'chi'a bulu'sörō libi'ili' channō naca tsahui' lahuē' Dios uzērō nágatu' xtidza'li' libi'ili' ca xtidzē'ē Dios. ²⁰ ¡Biti' gaca soa dxitu'! ¡Run bayudxi gúf'itu' didza' que le bilé'etu', en le biyōnitu'!

²¹ Ní'irō yugu' bönni' yudo' tu'chi'a tu'sörōē' bulu'zenē' bach légaquiē', pero bulu'sanē' légaquiē' tu' cabí gula'dzōlinē' nacxi ilunē' légaquiē' xíguia'. Caní gulunē' tu' guládxinē' le ilún bönachi lu yōdzō ni', tu' ta'gú'u Dios yōl-la' ba ni'a que lē na' guca. ²² Bönni' na' bōáquiē', en guca queē' lē na' run ga rubániru', chiyú'urē' ca choá' iz.

Ta'nábinē' Dios gunē' ga ilcagaquiē' rugu ladxí'

²³ Cate' bönni' yudo' bulu'sanē' Pedro, en Juan, bōajgaquiē' ga na' nacu'ē luzá'agaquiē', ate' bulu'siyōnnē' légaquiē' yúgu'tē lē na' gula'nnē' yugu' bixúz unná bē', en bönni' gula tu'zėjani'inē' bönachi judío. ²⁴ Cate' bila'yōnnē' lē ni, bulu'lidzē' Dios tsōzxōn, gula'nnē':

—Xantu' Dios, jxōntērō nacu' Li'! ¡Li' nacu' Dios! ¡Benu' lúxibal! ¡Benu' luyú! ¡Benu' nísado'! ¡Benu' yúgu'tē le nacuá' tu tu lataj na'! ²⁵ Uláz quiu' Li' bē'ē didza' David, bönni' huen dxin quiu', ni' zóalenē' Dios Bō' Lá'ayi lē', gunné':

¿Bizx que tun dzatsa bönachi,

en ta'zá' ladxí'gaca le ruá' dō'?

²⁶ Yugu' bönni' ta'nná bē'ē yōdzōlió ni gulún dzatsē',

ate' guláquiē' tuz bönni' unná bē'.

Gula'dá'báguē'ē Xanru' Dios,

enca' Cristo, bönni' gurō cazē' Lē'.

²⁷ Le nácátē guláquiē' tuz Herodes, en Poncio Pilato, en yugu' bönni' izá'a, en yugu' bönni' Israel lu yōdzō ni. Gula'dá'báguē'ē Jesús, Zxí'inu' lá'ayi, Bönni' na' buzú' queétu'. ²⁸ Gulunē' yúgu'tē le bucōzu' zí'atēlō, en guzxi' lu no'o, ate' guca ca na' benu' tsutsu xtidzu' ca ral-la' gaca. ²⁹ Na'a, Xantu', buyú le tu'zenē' bach netu', en ben ga gácatu' rugu ladxí', para gúf'itu' xtidzu' u, netu' bönni' huen dxin quiu'. ³⁰ Ben ga gaca úngacatu' nupa te'e, tu' sóalen yōl-la' huáca quiu' netu', en ben ga gaca gúngacatu' le ilún ga ubánitu', en le ilaca bē'. Gaca caní tu' zóalenē' Jesús, Zxí'inu' lá'ayi, netu'. ¡Ca' gaca!

³¹ Cate' budxi bulu'lidzē' Dios, guzxizi lataj ga na' nacu'ē, ate' Dios Bō' Lá'ayi guzóalenē' yúgu'tē, ate' len yōl-la' rugu ladxí' quégaquiē' gulu'ē xtidzē'ē Dios.

Tu'únē' tuz le dē quégaquiē'

³² Bönachi zían na' ta'yéajlē' Cristo, tuz ca ta'zá' ladxí'guequi, en tuz ca gulúngaca. Biti' gunné' nu bönni' nútsē'ē ladjagaquiē' nequi queēzē' le dē queē', pero bulu'únē' tuz le dē quégaquiē'. ³³ Len yōl-la' huáca zxōn gula'guíxjō'ē gubáz na' nasól-lē'ē Xanru' Jesús ca bubanē' Lē', ate' le buzá' ladxē'ē Dios quégaquiē' gúcalen yúgu'tē'. ³⁴ Cuntu nu bi biyadzaj nu

nutsa' ládjagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxigaquië', gulúti'ë le, ate' dumí que na' yójuá'gaquië', ³⁵ en bulu'dödë' le lu ná'agaquië' gubáz na' nasöl-lë'ë Cristo, ate' légaquië' gula'guísië' le que queégaca nupa bi biyadzaj quéguequi. ³⁶ Zoë' José ni', bönni' bulu'zöë' gubáz na' nasöl-lë'ë Cristo ia'tú lë' Bernabé, le rnna lu didza' xidza', Bönni' Ruhué Tsáhuë'ë. Nabábalenë' zxi'ini xi'sóë' Leví, en gulië' luyú Chipre. ³⁷ Bëti'ë bönni' ni tu cö' xiyüë', ate' yóju'ë dumí que na', en budödë' le lu ná'agaquië' gubáz na' nasöl-lë'ë Cristo.

5

Dul-la' gulunë' Ananías, en Safira

¹ Tu bönni' yúbölö lë' Ananías, bëti'ë tu cö' xiyüë'. Safira, nigula queë', bennu tsözxön lë'. ² Ananías na' bucachi' lanë' late' dumí que yu na', ate' nözinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasöl-lë'ë Cristo. Rnnë':

—Tsa nisö guzxi'a.

³ Pedro gudxë' lë':

—Ananías, ¿naru' guyázatsö Satanás tu' xihui' lu icja ládxi'do'o, en ben ga rizí' yé'enu' Dios Bö' Lá'ayi, ate' bucachi' lanu' late' dumí que xiyü' na'? ⁴ Tsanni ni' nagá'ana yu na' lu no'o, ¿naru' cabí nequi quez quiu'? Gudödi bëti'u le, ¿naru' cabí dë caz lu no'o dumí que na'? ¿Bizx que gurö'ö icju' gunu' caní? Dios caz guzxi' yé'enu', calégasö bönnachi.

⁵⁻⁶ Cate' biyönnë' Ananías didza' ni, gudzö'ë, en gútité'. Ní'irö gula'bíga'tëbi' bi'i ra'bán, ate' bulu'chólibi' lë' lari', en guluá'abi' lë', en yöjçáchi'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

⁷ Ca tsonna hora gudödi ni', bidxinnu nigula queë' Ananías na' ni', en biti' nözinu lë na' guca queë' bönni' queënu. ⁸ Ní'irö Pedro gudxë'-nu:

—Gudíxjö'i' neda'. ¿Naru' guzxi'ili' tsa nisö xiyuli' na'?

Gunnánu:

—Ön, tsa nisö guzxi'itu'.

⁹ Ní'irö Pedro gudxë'-nu:

—¿Bizx que ben tuz xtídzal'i' guzxi' bë' xihui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi'-në' bönni' quiu', ate' ulu'béajbi' ca' li'.

¹⁰ Ní'irö lá' gudzö'tënu xini'ë Pedro, en gútiténu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjçáchi'gacabi'-nu cuita lë'ë bönni' queënu. ¹¹ Que lë ni na' guladxi gula'dzöbi yúgu'të bönnachi queë' Dios, ate' guladxi ca' yúgu'të nupa bila'yöni ca guca lë ni.

Tunë' bönni' gubáz nasöl-lë'ë Cristo le taca bë'

¹² Gulunë' bönni' gubáz na' nasöl-lë'ë Cristo zían le taca bë', en zían yöl-la' huáca zxon lógaca bönnachi lu yödzo. Yúgu'të' bulu'dubë' tsözxön ga naca chila yudo' nazí' le Chila Queë' Salomón. ¹³ Lada'j nupa ni' biti' ta'yéajlë' Cristo, cuntú nu burugui tsöjtá' légaquië', ate' bönnachi lu yödzo ni' gulún légaquië' bal. ¹⁴ Ní'irö ia'bal-la bönnachi zían ca' gula'yéajlë' Cristo, bönni', en nigula. ¹⁵ Cate' bila'lé'ë bönnachi yugu' le tunë' bönni' ni' ta'yéajlë'ë Cristo, yöjuá'agaca nupa te'e gapa naca la' nöza, ate' gula'xóë' léguequi lu da'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queë' cu'u zxul-la bal-la bönnachi huë' na', para ulu'huóaca. ¹⁶ Lësca' bila'rúaj bönnachi yugu' dzaga yödzo, en bila'dxin Jerusalén, nuá'agaca nupa te'e, en nupa ta'guí'i ta'zaca' tu' yú'ugaca bö' xihui' léguequi, ate' bulu'huóaca yúgu'tëguequi.

Bönni' yudo' ta'bía ládxi'gaquië' bönni' gubáz nasöl-lë'ë Cristo

¹⁷ Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'ené' Pedro. ¹⁸ Ní'irö bixúz lo na', en bönni' na' dá'gaquië' lë' gula'zönë' gubáz na' nasöl-lë'ë Cristo, ate' gula'gu'ë légaquië' lidxi guíë'. ¹⁹ Ní'irö bidxinë' gubáz lá'ayi queë' Xanru' chi'i dzö'ölö, ate' gusaljé lidxi guíë na', en bubéajé légaquië'. ²⁰ Gubáz lá'ayi na' gudxë' légaquië', rnnë':

—Guli'tséaj, guli'tsójsóa chila yudo', en guli'tsöjé'len bönnachi ni' didza', quíxjö'i'ili' légaquië' ca naca yöl-la' na' bán idú ni, en ca gaca ila'déli'në' le.

²¹ Cate' bila'yönnë' didza' ni ru'ë gubáz lá'ayi na', gula'yázië' chila yudo' cate' za' rení' zílado', en bulu'sédiné' bönnachi.

La' ní'isö bulu'dubë' bixúz lo, en nupa nacua'len lë' tsözxön, len bönni' yudo' tu'chi'a tu'söröë', en bönni' gula tu'zéajni'inë' bönnachi Israel, ate' gula'söl-lë'ë nupa tsöjaca lidxi guíë para tsöjxi'gaquië' yugu' gubáz na' nasöl-lë'ë Cristo, tu' téquinë' ni' nacu'ë lidxi guíë na'. ²² Cate' ni' a ná'agaquië' bönni' yudo' na' bila'dxinë' ni', biti' yöjçáca'gaquië' légaquië' lu yu'u lidxi guíë na', ate' ní'irö bulu'huóajé' tsöjtíxjö'gaquië' ca'. ²³ Gulé' bönni' yudo' tu'chi'a tu'söröë' na', ta'nnë':

—Le nácaté yöjçáca'tu' nayáyajtë lidxi guíë, ate' nacuá' nupa tun chi'i ra' lidxi guíë na', pero cate' gusalajtu', cuntú nu yöjçáca'tu' lu yu'u na'.

²⁴ Cate' bixúz lo, en yugu' bixúz unná bē', en bōnni' nacuá' lu nē'ē ni'a ná'agaca bōnachi yudo', bila'yōnnē' didza' ni, gula'bō'dē'ē bōniga tu' cabi nōzigueuinē' bizxi guntē lē na' raca. ²⁵ Ní'irō bidxinē' tu bōnni' ni', en gudí'xjōi'inē' légaquiē', rnnē':

—Buli'yútsōca'. Yugu' bōnni' na' gulu'ugacali-nē' lidxi guē' nacu'ē chila yudo' tu'sēdinē' bōnachi.

²⁶ Ní'irō guyijē' bōnni' na' rinná bē'enē' ni'a ná'agaca bōnachi yudo', dzágagaquiē' lē' ni'a ná'agaquiē' na', ate' gula'chē'ē yugu' gubáz na' nasōl-lē'ē Cristo, pero bití' bi gu-lunē' quégaquiē', tu' guládxinē' ulu'ládxí' bōnachi nacuá' ni' légaquiē' guiōj. ²⁷ Cate' chinachē'gaquiē' yugu' gubáz na', bulu'sudxinē' légaquiē' lógaquiē' bōnni' yudo' tu'chí'a tu'sōrōē' na', ate' bixúz lo gunábinē' légaquiē', rnnē':

²⁸ —¿Naru' cabi gúdxida'atu' libí'ili' bití' usédili' bōnachi ca naca queē' bōnni' na'? Na'a, chigudísili' xibá ni idútē yōdzō Jerusalén, en rē'ēnili' usubága'li' netu' xíguia' tu' nōzi yōl-la' guti queē' bōnni' na'.

²⁹ Ní'irō bulu'bi'ē' didza' Pedro, en ia'zica'rē' gubáz na' nasōl-lē'ē Cristo, ta'nnē':

—Run bayudxi uzērō nágu' xtidzē'ē Dios ca xtidza'gaca bōnachi. ³⁰ Libí'ili' bétili-nē' Jesús cate' ni' budá'ali'-nē' lē'ē yaga cruz, pero Dios quégaquiē' xuz xtó'oru' busubanē' Lē'. ³¹ Jesús ni, Dios buzóa cazē' Lē' ga nayēpisētē'rē' cuita lē'ē ibēla, para gáquiē' Bōnni' Lo, en Bōnni' Rusólá, en gunē' ga ulu'bi'í' ládxi'gaca bōnachi Israel, para gaca uniti lahuē' dul-la' nabága'gaquiē'. ³² Ca naca lē' ni, runtu' netu' ba nalí que, ate' lē'sca' runē' Dios Bō' Lá'ayi ba nalí que, Bō' na' risōl-lē'ē Dios quégaca nupa tun ca rnna xtidzē'ē.

³³ Cate' bila'yōnnē' bōnni' yudo' tu'chí'a tu'sōrōē' na' lē' ni, gula'lenē', en gulē'ēnnē' ilútiē' légaquiē'. ³⁴ Ní'irō guzuínē' tu bōnni' yudo' ruchí'a rusōrōē' lógaquiē', lē' Gamaliel, tu bōnni' yudo' fariseo. Rácadē'ē bōnni' ni xibá queē' Moisés, ate' yúgu'tē bōnachi tun lē' bal. Gudxē' nupa na' ulu'béaj yugu' gubáz na' nasōl-lē'ē Cristo lō'alō tu'chí'ido'. ³⁵ Ní'irō gudxē' bōnni' yudo' tu'chí'a tu'sōrōē' na', gunnē':

—Libí'ili', bōnni' Israel, buli'yutēz queē'li' ca naca le rē'ēnili' gunli' quégaquiē' bōnni' ni. ³⁶ Ral-la' tsōjnēli' ca guca zí'atēlō cate' si' idíxn dza ni zóaru' na'a. Birúajē' Teudas, ate' ben cuinē' ca tu bōnni' nayēpisētē'rē'. Guláquiē' bōnni' yōjtá'gaquiē' lē' idú tapa gáyu'tē bōnni'. Yugu' bōnni' rōjáquiē' gudil-la' gulútiē' lē', ate' gulásilasi yúgu'tē nupa ni' yōjtá'gaca lē', ate' gunítisō ca' yúgu'tē le benē' bōnni' na'. ³⁷ Gudōdi guca lē' ni, birúajē' ca' Judas, tu bōnni' Galilea. Benē' caní cate' ni' gula'yú'u lu guichi bōnachi ta'guíxaj lázagaquiē', ate' yōjtá'gaca bōnachi zían lē'. Lē'sca' gulútiē' bōnni' ni, ate' gulásilasi yúgu'tē nupa ni' yōjtá'gaca lē'. ³⁸ Que lē' ni na' rea' libí'ili': Guli'sán-gaquiē' bōnni' ni, en bití' bi gunli' quégaquiē'. Channō naca quégacasō bōnachi lē' ni ta'nnē' o lē' ni tunē', initi caz, ³⁹ pero channō naca queē' Dios, bití' gaca usunítili' le. ¡Buli'yú cuinli' cabi tíl-lalenli'-nē' Dios!

⁴⁰ Ní'irō gulunē' tuz didza' len lē'. Bulu'lidzē' yugu' gubáz na' nasōl-lē'ē Cristo, ate' gula'guínē' légaquiē', en bulu'zenē' légaquiē' bach para cabirō ilufílenē' bōnachi didza' ca naca queē' Jesús. Ní'irō bulu'sanē' légaquiē'. ⁴¹ Bila'rúajē' gubáz na' nasōl-lē'ē Cristo lógaquiē' bōnni' yudo' tu'chí'a tu'sōrōē' na'. Tu'dzéjanē' tu' bē'ē Dios légaquiē' lataj gula'guí'i gula'záquē'ē tu' dá'gaquiē' Jesús. ⁴² Yugu' dza bulu'séditiqui'sinē' bōnachi, en gulunē' libán queē' Jesucristo lu chila yudo', en gapa naca lu yu'u lídixgaca bōnachi.

6

Ta'bōē' gadxi bōnni' para ilácalenē' bōnachi queē' Cristo

¹ Dza ni', tu' gula'yán bōnachi ta'yéajlē' Cristo, yugu' bōnni' judío tu'ē didza' griego gula'nnē' quégaquiē' bōnni' judío tu'ē didza' hebreo tu' nōzi le raca cate' ta'guísíē' le ilágu'nu nigula uzēbi, tu' cuntu nu rufí'le ilágu'nu nigula uzēbi quégaquiē' bōnni' ni' tu'ē didza' griego. ² Ní'irō idíxinnutē' bōnni' gubáz na' nasōl-lē'ē Cristo bulu'tubē' yúgu'tē bōnachi ni' ta'yéajlē' Cristo, ate' tē' légaquiē':

—Bití' naca dxi'a soa dxitu', en cabi guntu' libán que xtidzē'ē Dios, para guntu' dxin cú'utu' le ilágugaca bōnachi. ³ Que lē' ni na', bōchi' luzá'atu', guli'cō gadxē' bōnni' ládjali', para ugú'uru' lu ná'agaquiē' dxin ni'. Yugu' bōnni' na' run bayudxi ilácaquiē' bōnni' tun yúgu'tē bōnachi légaquiē' bal, en nácagaquiē' bōnni' ta'yéajni'i, en naca bē' Dios Bō' Lá'ayi zóalenē' légaquiē'. ⁴ Netu' ni ulídzatica'stu'-nē' Dios, en uséditu' bōnachi xtidzē'ē Dios.

⁵ Yúgu'tē' gula'yaza ládxi'gaquiē' didza' ni, ate' gula'bōē' Esteban, tu bōnni' réajlē'ē Cristo idú ládxiē', en zóalenē' Dios Bō' Lá'ayi lē'. Lē'sca' gula'bōē' Felipe, en Prócoro, en Nicanor, en Timón, en Parmenas, en Nicolás, bōnni' yōdzō Antioquía, bōnni' zí'alō butsé'ē ca runē' para tseaj ládxiē'ē Dios ca tunē' yugu' bōnni' judío. ⁶ Ní'irō bulu'sudxinē' bōnni' na' gula'bōē' lógaquiē' gubáz na' nasōl-lē'ē Cristo. Yugu' bōnni' gubáz na' gula'xóa ná'agaquiē' légaquiē', ni' tu'lidzē' Dios.

⁷ Guzërö xtádzë Xanru', ate' gula'yanda' bönachi ta'yéajlë' Cristo nacua' Jerusalén. Lësca' zían bixúz judío gula'zì' lu ná'agaquië' le réajlë'ëru' Cristo.

Ta'zönë' Esteban

⁸ Esteban na' benë' le tun ga rubániru', en yugu' le taca bë' lógaca bönachi lu yödzo, zóalen yöl-la' huáca queë' Dios lë' le buzá' ládxë'ë queë'. ⁹ Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sedë' queë' Dios, nazí' le Yu'u Quégaquië' Bönni' Nadzángaquië'. Bönni' narúajgaquië' yödzo Cirene, en yödzo Alejandría, en luyú Cilicia, en luyú Asia, gulunë' légaquië' tsózxón. Bönni' ni gula'dil-lalenë' Esteban didza'. ¹⁰ Biti' guca tá'baga'gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bô' Lá'ayi lë'. ¹¹ Ní'irö gula'guízxjë' bönni' ila'zì' yë'ë, ila'nnë': "Netu' biyönitu' didza' ru'ë Esteban ni, rnnë' zì'ë queë' Moisés, en queë' Dios." ¹² Caní guca, bönni' ni gula'gu'ë xilá ládxí'gaca bönachi, tsózxón len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'chë'ë lë' lógaquië' bönni' yudo' tu'chi'a tu'söröë'. ¹³ Lësca' bulu'cu'ë lógaquië' nupa gula'guíxjô' le cabí nácatë, bönni' na' gula'nnë':

—Biti' zoë' dxisö bönni' ni rnnë' zì'ë que yudo' lá'ayi ni, en que xibá queë' Dios. ¹⁴ Biyönitu' didza' bë'ë bönni' ni ca gunë' Jesús, bönni' Nazaret, rnnë' usunítië' yudo' ni, en utsë'ë yugu' le nalëbírú' runru', yugu' lë na' gunná bé'enë' Moisés rë'u.

¹⁵ Ní'irö bönni' yudo' tu'chi'a tu'söröë', en yúgu'të nupa rō'gaca ni' bulu'yúë' Esteban, ate' bila'lë'ë nahuë', rna' ca rna' lahuë' tu gubáz lá'ayi queë' Dios.

7

Didza' bë'ë Esteban, le gunnë' uláz queë'

¹ Ní'irö bixúz lo gunábinë' Esteban na', rnnë':

—¿Naru' nácatë caní?

² Bubi'ë didza' Esteban, rnnë':

—Libí'ili', bönni' gula, en libí'ili', böcha'a. Buli'zë nágali' le guía' libí'ili'. Dios, Bönni' nayépisëtërë', bulu'í' lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsöë' yödzo Harán. ³ Dios gudxë' lë': "Birúaj ladzu', en bulá'alen di'a dza quiu', ate' guyéaj luyú ni' ulu'í'ida' li'." ⁴ Ní'irö birúajë' Abraham luyú Mesopotamia le naca xiyúgaca bönachi Caldea, ate' yöjsöë' yödzo Harán. Lu yödzo ni' gútië' xuzë' Abraham na', ate' lë' buzë'ë ni', ate' Dios guchë'ë lë' luyú ga ni' zóaru' na'a. ⁵ Dios biti' bë'ë lë' lataj guequi queë' luyú ni. Calëga láti'sö bunödzjë' queë' ga soë' luyú ni, pero guzxi' lu në'ë Dios unödzjë' queë' luyú ni, ate' tódi gátie' Abraham guequi luyú ni quégaca xzi'ini xi'söë', sal-la' biti' nacu'í'inihi' bi'í queë'. ⁶ Lësca' caní Dios gudxë' Abraham: "Tsöjáquië' xzi'ini xi'sú' lu xiyúgaca bönachi izá'a, ate' ni' ilácagaquië' ca bönachi zi'tu'. Ilunë' bönni' luyú ni' ga ilácagaquië' xzi'ini xi'sú' bönni' nadó'ogaquië'. Ulu'saca' zi'ë légaquië' idü ca tapa gayuá' iz." ⁷ Lësca' Dios gudxë' lë': "Neda' uzötja' bönachi luyú ni', ga ni' ilácagaquië' xzi'ini xi'sú' bönni' nadó'ogaquië', ate' tódi ni' ulu'rúajë' ni', ate' ilunë' xichina' luyú ni." ⁸ Dios bénlenë' Abraham tu didza' rucá'ana tsahui', en gunná bé'enë' lë' ichúguië' lu xipëla'gaquië' bönni' biguië' nacu'ë lidxë' tu le gaca bë' nazí' lu ná'agaquië' didza' na' rucá'ana tsahui'. Gudödi ni' guquië' Abraham xúzibi' bi'í Isaac, en cate' chigúquibi' xunu' gubidza, guchúguië' lu xipëla'bi' lë na' naca bë'. Isaac na', lësca' caní benë' queëbi' bi'í Jacob, xzi'inë', en caní benë' ca' Jacob quégaca idxinnutëbi' bi'í bönni' queë', nupa ni' gulaca xuz xtó'ogaca idxinnu cö' bönachi Israel.

⁹ Yugu' xuz xtó'oru' na', lu yöl-la' ruzxë'e quégacië', gulúti'ë-bi' bi'í José, böchi'gaquië', lu ná'agaquië' bönni' ni' gulúti'gaquië'-bi' luyú Egipto. Dios guzóalenë'-bi' bi'í José na' ¹⁰ en busölë'-bi' lu le gulaca queëbi'. Dios bë'ë-bi' yöl-la' réajni'i, le ben ga guyaza ládxë'ë-bi' Faraón, bönni' rinná bé'enë' bönachi Egipto, ate' Faraón na' budödë' lu ná'abë' bi'í José yöl-la' unná bë' para gunná bé'ebi' bönachi luyú Egipto, en yúgu'të bönachi nacuá' lidxë' Faraón na'.

¹¹ Ní'irö gúcada' gubín idú luyú Egipto, en luyú Canaán ni, ate' gula'gu'í' gula'zaca' yúgu'të bönachi dza ni'. Biti' bidzöli le ilahuë' xuz xtó'oru'. ¹² Cate' biyönnë' Jacob dé zxoá' xtila luyú Egipto, gusöl-lë'ë yugu' xzi'inë', bönni' ni' nácagaquië' xuz xtó'oru', luyú ni'. Caní guca le zí'alö luzuí yójáquië' ni'. ¹³ Cate' le buropi luzuí yójáquië' luyú Egipto, benë' José ga bulu'únbë'ë böchë'ë lë'. Caní guca, gunözinë' Faraón nupa nácagaca di'a dza queë' José. ¹⁴ Ní'irö gusöl-lë'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalay yu' chinu bönachi. ¹⁵ Caní guca, bidxinë' Jacob luyú Egipto, ga ni' gútië' lë', ate' gulátie' ca' xuz xtó'oru' luyú ni' cate' bizá'a dza que quée'gaquië'. ¹⁶ Cate' gulátie' tu tu xuz xtó'oru', xzi'ini xi'sóagaquië' yójuá'agaquië' légaquië' luyú Siquem, ate' ni' bulu'cáché'ë légaquië' yeru ba lu xzan bulóaj na' gu'uë' Abraham lu ná'agaca xzi'inë' Hemor, bönni' Siquem na'.

17 'Gudödi zían iz, cate' bidxín dza ral-la' gaca le guzxi' lu në'e Dios, lë na' benë' tsutsu xtídzë'ë gunë' queë' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto. 18 Ní'irö guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto. 19 Bönni' unná bë' na' bi'ë dö' quégaca bönachi uládz queëru'. Busaca' zi'ë yugu' xuz xtó'oru' na', en benë' ga bulu'sanë'-bi' bi'i bönni' huë'ëni'do' que quégagaquie', para ilátibi'. 20 La' dza ní'isö gúljabí' ca' bí'ido' Moisés, ate' Dios guyaza ládxë'ë-bi'. Xuz xiná'abi' bulu'sculë'-bi' lídxigaquie' idú ca tsonna beo'. 21 Cate' bidxín dza ulu'sanë'-bi' xuz xiná'abi' para gátibi' bí'ido' Moisés na', bidxinnu nigula xzi'inë' Faraón ga ni' bulu'cá'anë'-bi', ate' yöjxzi'ínu-bi', en buscúluu-bi' ca bi'i que cázanu. 22 Caní guca, bizédabi' bi'i Moisés yúgu'të le táquie' bönni' Egipto, en gúcatë'röbi' zxon ca naca didza' bë'ëbi', en ca nácagaca le benbi'.

23 'Cate' Moisés na' chiyú'ubi' choá' iz, gunná ládxí'bi' tsöjyubi' bönachi uládz queëbi', bönachi Israel. 24 Cate' bidxinbi' ga na' nacu'ë, bilé'ebi'-në' tu bönni' Egipto, rusaca' zi'ë tu bönni' uládz queëbi'. Ní'irö gúcalenbi'-në' bönni' uládz queëbi' na', en bétibi'-ca' bönni' Egipto na'. Caní guca, buzí' labi' bi'i Moisés bönni' na' uládz queë' bönni' uládz queëbi'. 25 Gúquibi' Moisés huala'yéajni'inë' bönni' böchi'bi' gunë' Dios ga usölábi' lë cázabi' légaquie', pero légaquie' bití' gula'yéajni'inë'. 26 Ia'tú dza ca' yöjxáca'bi' ia chopë' bönni' Israel, ta dil-lë', ate' gú'unibi' queúqi dxi'bi' légaquie', en gúdxibi' légaquie': "Libí'ili', böchi'li' naca. ¿Bizx que ruá'ali' luzá'ali' dö'?" 27 Ní'irö bönni' na' ru'ë dö' que luzé'ë budxíguë'ë-bi' bi'i Moisés, gunné': "¿Núzxité buzó'a lí' para inná bé'enu' netu', en uchi'a usöröu' le runtú'?" 28 ¿Naru' rë'ëni'senu' gútiu' ca' neda' ca benu' néajé, bétiu'-në' bönni' Egipto na'?" 29 Cate' Moisés biyönibi' didza' ni', buzxúnajbi' ni', en yöjsóabi' luyú Madián ga ni' guzábí' ca tu bönni' zi'tu'. Luyú Madián na' butsaga ná'aleni'-nu nigula lu yödzö ni', ate' gúljugacabi' chópabi' bi'i bönni' queë'.

30 'Cate' chigudödi choá' iz zoë' ni', buluf'i lahuë' tu gubáz lá'ayi queë' Dios ga zoë' lu guf' que yaga yótsi'do' régui, ga ni' naca lu lataj cá'asö, le rö'ö ra' guf'a nazí'i le Sinaí. 31 Cate' Moisés bilé'ë guf' na', bubáni'në', ate' gubíguie' gala' para ilé'enë' dxi'a, ate' biyönnë' chi'ë Xanru'. 32 Caní gudxë' Xanru' lë': "Neda' naca' Dios quégagaquie' xuz xtó'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guzxi'zidë'ë Moisés, en bítirö burúguinë' uyüë'. 33 Xanru' gudxë' lë': "Guléaj xirachu' nudó'o, tu' naca lá'ayi ga ni' zu' tu' zoa caza' neda', Dios, ni'. 34 Le nácatë' chibilé'eda' le ta'guí'i ta'zaca' bönachi quia' nacuá' luyú Egipto, en chibiyönda' ta'bödxí yeche'. Bötja', zoa' ni' para usölá' légaquie'. Gudá na'a, isöl-la' a lí' luyú Egipto."

35 'Sal-la' bönni' uládz queë' Moisés, bulu'cá'anë' lë' cá'asö, gula'nnë': "¿Núzxité buzó'a lí' para inná bé'enu' netu', en uchi'a usöröu' le runtú'?" Dios gusöl-lë'ë lë' para gáquie' bönni' unná bë', en bönni' rusölá, ca na' gubáz lá'ayi na' queë' Dios gudxë' Moisés, cate' buluf'i lahuë' lu yaga yótsi'do' régui ga na' zoë'. 36 Moisés ni' bubéajë' bönni' uládz queëru' luyú Egipto. Guca caní gudödi benë' le gulún ga bulu'bani bönachi ni', en le taca bë' benë' luyú ni'. Lësca' caní benë' lu nísado' nazí'i le Nísado' Xiná. Caní benë' lógaquie' idú ca choá' iz lu lataj cá'asö. 37 Lë cazë' Moisés na' gudxë' bönachi Israel ni', gunné': "Xanru' Dios isöl-lë'ë queëli' tu bönni' galjë' ladaj di'a dza queëli', ate' gáquie' bönni' gu'ë didza' uládz queë' Dios. Isöl-lë'ë lë' queëli' ca na' gusöl-lë'ë neda'. Lë cazë' run bayudxi uzë nágalí'-në'." 38 Lësca' lë cazë' Moisés na' guzóalenë' bönachi nudúbigaca queë' Dios lu lataj cá'asö, ate' gudzáguie' gubáz lá'ayi queë' Dios lë', Nu na' bël'en lë' didza' lu guf'a Sinaí na'. Moisés na' guzóalenë' xuz xtó'oru', ate' Dios budödë' lu në'ë xibá lá'ayi queë', le ruf'i didza' ca gaca ila'deli' bönachi yöl-la' na' bán, ate' budödë' Moisés xibá ni lu ná'agaca xzi'ini xi'sóagaquie' ga ridxintë queëru' rë'u.

39 'Biti' gulë'ënnë' xuz xtó'oru' ilunë' ca rnna xtídzë'ë Moisés, pero bulu'zóë' lë' tsölá'alö, en gulë'ënnë' tsöjhuöjgaquie' luyú Egipto. 40 Cate' ni' zoë' Moisés na' lu guf'a Sinaí na', légaquie' gulë' Aaron, böché'ë Moisés na', gula'nnë': "Rë'ëni'tu' gunu' yugu' dios queëtu', tu budó' guie', para tsöjñrugaca lotu'. Biti' nöstu' bi guca queë' Moisés, bönni' na' nubéajë' netu' luyú Egipto." 41 Ní'irö gulunë' tu budó' oro le naca ca tu bédxido', ate' gulútië'-ba' bó'cu' zxi'la'do', en gulú'ugaquie'-ba' lo budó' oro na', ate' gulunë' laní lo budó' na' núngaquie'. 42 Que lë ni na' Dios bucá'anë' légaquie', en guléaj ládxë'ë légaquie'. Ní'irö gula'yéaj ládxí'gaquie' yugu' le ta'yëpi lúzxiba. Ca naca lë ni nazúaj lu guichi le gula'nnë' bönni' gulu'ë didza' uládz queë' Dios, le rnna:

Libí'ili', bönachi Israel,

¿naru' gulú'ugacatsali'-ba' quia' neda' böa' bédxi ni'

bétigacali'-ba', en buzéguí'gacali'-ba',

lë na' benli' lu lataj cá'asö idú ca choá' iz?

43 Biti' gulú'ugacali'-ba' quia' neda',

pero biá'ali' le nequi que Moloc, budó' guiöj queëli'.

Biá'ali' ca' tu le naca ca böljaj lúzxiba nazí'i le Refán,

lê na' buzóali' ca dios queëli'.
Yugu' budó' guióy budó' yaga ni,
la' libí'isili' benli' para guyéaj ládxi'li' léguequi.
Que lê ni na', ubéaja' libí'ili' lu xiyuli',
en iché'a libí'ili' zí'tu'ró ga dë luyú Babilonia.

⁴⁴ 'Cate' ni' gula'cu'è xuz xtó'oru' lu lataj cá'asò, guta' quégaquiè' yu'u lari' na' ga gulún chi'è xibá queë' Dios, lê na' naca bē' Dios caz zóalenē' légaquiè'. Gulunē' tu yu'u lari' na' ca na' Dios gunná bē'enē' Moisés, cate' ni' gudxē' lê' gunē' le ca naca lê na' bilé'enē', le bulu'inē' Dios lê' lu guí'a ni'. ⁴⁵ Lésca' bulu'dódē' yu'u lari' na' lu ná'agaquiè' xz'i'ínagaquiè' ga bidxintē dza ni' gulu'è xuz xtó'oru' le luyú ni, cate' ni' dzáguiè' Josué légaquiè', ate' gula'gúē' xiyúgaca bōnachi izá'a, nupa ni' bulágui'è Dios lógaquiè' xuz xtó'oru'. Caní gulunē' zían iz ga bidxintē dza zoē' David. ⁴⁶ Dios guyaza ládxi'è David na', ate' lê' gunábinē' Dios gu'è lê' lataj gunē' tu yu'u ga soē' Dios queë' Jacob. ⁴⁷ Biti' bē'è Dios lê' lataj, ate' Salomón, xz'i'inē' David na' benē' yu'u queë' Dios. ⁴⁸ Caní benē' sal-la' bití' zoē' Dios, Nu nácatērō lo, tu lu yudo' núngaca bōnachi. Ca naca lê ni gunné' tu bōnni' bē'è didza' uláz queë' Dios, gunné':

⁴⁹ Yehua' yubá naca ga rō'a rinná bē'a,
ate' yōdzōlió naca xilibi ni'a.

Rnnē' Xanru': "¿Naru' gúntsalí' tu yu'u ga soa'?"

¿Naru' zóatsō tu lataj ga ral-la' uzí ládxa'a?

⁵⁰ ¿Naru' cabí len na'a caza' bena' yúgu'tē lê ni?"

⁵¹ Ní'irō Esteban na' gudxē' yugu' bōnni' yudo' tu'chi'a tu'söröē' na', gunné':

—Libí'ili', bōnni' zidi, bití' bi raza icja nágalí'. Nazidi icja ládxi'do'oli' ca raca quégaca bōnachi bití' núnbē'gaquiè' Dios. Ridá'baga'tica'sili'-nē' Dios Bō' Lá'ayi. Ca na' gulunē' xuz xtó'oli', runlí' ca' libí'ili'. ⁵² Gula'bía ládxi'gaquiè' xuz xtó'oli' na' yúgu'tē bōnni' ni' gulu'è didza' uláz queë' Dios. Lésca' gulútiē' bōnni' ni' gula'guíxjö'è zí'aló ca ral-la' guidē' Cristo, Bōnni' Tsahui', ate' na'a, cate' ni' bidxinē' Bōnni' Tsahui' na', libí'i cázali' bētili'-nē' lu ná'agaquiè' bōnni' gulútiē' Lē'. ⁵³ Libí'i cázali' dē lu ná'ali' xibá queë' Dios, lê na' gubáz lá'ayi queë' Dios bulu'dódē' lu ná'agaquiè' xuz xtó'oli', pero bití' runlí' ca rnna.

Tútiē' Esteban

⁵⁴ Cate' bōnni' yudo' tu'chi'a tu'söröē' na' bila'yōnnē' didza' ni, gula'lédē'enē' Esteban, ate' lu yöl-la' rilé quégaquiè' lê' gulagu zxéatica' láyē'è. ⁵⁵ Ní'irō buyúē' Esteban na' lúzxibalō, ate' zóalenē' Dios Bō' Lá'ayi lê, bilé'enē' lataj bení' ga zoē' Dios, enca' Jesús, zuínē' cuita lê'è ibēla Dios ga nayépisétērē'. ⁵⁶ Ní'irō gunné':

—Buli'yútsōca'. Rilé'eda' nayalaj lúzxiba, ate' zuínē' Bōnni' Guljē' Bōnachi cuita lê'è ibēla Dios.

⁵⁷ Ní'irō bōnni' yudo' tu'chi'a tu'söröē' na' bulu'sayaj nágagaquiè'. Gula'bōdxi'è zidzaj, en tsōzxōn gula'bía di'è Esteban na'. ⁵⁸ Bulu'béajē' lê' ní'ilō ra' yōdzō na', ga ni' bulu'ladxē' lê' guióy. Yugu' bōnni' ni' tunē' ba nalí le tu'zéguíē' Esteban didza' bulu'cu'è lari' ta'xóa yéngaqiè' xini'è tu bōnni' lê' Saulo cate' ni' bulu'ladxē' Esteban guióy. ⁵⁹ Cate' ni' tu'ladxē' Esteban guióy, lê' bulidzē' Dios, gunné':

—Xána' Jesús. Buzí' bō' naca caza'.

⁶⁰ Ní'irō biyéchuē', buzóa zxibē', en bē'è zidzaj didza', gunné':

—¡Xan! ¡Biti' usubágu'u légaquiè' dul-la' ni!

Cate' budxi bē'è didza' ni, gútité'.

8

Saulo ribía ládxi'è bōnachi queë' Cristo

¹⁻³ Saulo benē' tsōzxōn yugu' bōnni' ni' gulútiē' Esteban.

La' ní'isō yugu' bōnni' ta'yéaj ládxi'gaquiè' Dios guluá'agaquiè' Esteban, ate' yójcáchi'gaquiè' lê'. Gula'bōdxi'dē'è ní'a queë'.

Dza na' yugu' bōnni' judío cabí ta'yéajlē'è Cristo gula'bía ládxi'da'gaquiè' bōnachi queë' Cristo nacua' Jerusalén. Lésca' Saulo gudxía ládxi'è bōnachi queë' Cristo. Guyáziē' gapa naca lu yu'u quégaquiè', ate' guzxōnē' yugu' bōnni', en nigula, ate' gulu'è légaquiè' lidxi guíē.

Ní'irō gulásilasi ia'látí'sō cabí bidáchigaca yúgu'tē bōnachi queë' Cristo idú luyú Judea, en luyú Samaria, ate' légacasē' gubáz na' nasól-lē'è Cristo bulu'gá'anē' Jerusalén.

Raca libán que didza' dxi'a luyú Samaria

⁴ Yugu' bōnni' na' gulásilasiē' yójáquiē' yúgu'tē lataj, ate' gulunē' libán que didza' dxi'a.

⁵ Ní'irō Felipe, tu bōnni' dzáguiē' nupa na' gulásilasi, guyjē' luyú Samaria, ate' benē' libán ni' ca naca queë' Cristo. ⁶ Bulu'dubē' yugu' bōnni' ní', ate' idú ládxi'gaquiè' bulu'zé nágagaquiè' didza' ru'è Felipe na', tu' bila'yōnnē' xtídzē'è, en bila'lé'enē' yugu' le taca bē' runē'. ⁷ Caní guca, tu' benē' ga bulu'rúaj zían bō' xihui' yú'ugaca bōnachi, ta'bōdxi'a zidzaj,

ate' bulu'huóaca zían nupa te'e hué' nacú'uni bin, en nupa biti' guca sá'gaca. ⁸ Caní guca, bulu'dzeja bönachi yödzo ni'.

⁹ Zoë Simón, tu bönni' zí'aló gúquië' bönni' udzá' uné ya'a lu yödzo na', bönni' guzxi' yé'enë' bönachi Samaria na', gunnë' lë cazë' náquië' bönni' nayëpisëtërë'. ¹⁰ Yúgu'të bönachi bulu'zëda' nágagaca bönni' ni, ga riguela' yugu' bönni' cá'asó ga ridxintë yugu' bönni' lo, gula'nnë': "Bönni' ni dë lu në'ë yöl-la' huáca zxön queë' Dios." ¹¹ Caní guca, gulunë' lë' bal, tu' xidzé nazí' yé'enë' légaquië' len yöl-la' gudzá' uné ya'a queë'.

¹² Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. ¹³ Ní'irö guyéajlë'ë ca' Simón na', en bidilë' nisa, ate' gudálentica'së' tsözxön Felipe na'. Cate' bilé'enë' yugu' yöl-la' huáca zxön, en yugu' le taca bë' runë' Felipe, bubánnë' Simón na'.

¹⁴ Cate' yugu' gubáz na' nasöl-lë'ë Cristo nacu'ë Jerusalén bila'yönnë' ca guca lë ni, chinazí' lu ná'agaca bönachi luyú Samaria xtídzë'ë Dios, ní'irö gula'söl-lë'ë Pedro, en Juan ni'. ¹⁵ Cate' Pedro, en Juan na' bila'dxinë' ni', bulu'lídzë' Dios uláz quégaca bönachi ni' ta'yéajlë' Cristo para idisóalenë' Dios Bö' Lá'ayi léguequi. ¹⁶ Ga bidxintë dza na', biti' ridxíninë' Dios Bö' Lá'ayi quégaquië'. Nadlágacasë' nisa para ilácagaquië' tuz len Xanru' Jesús. ¹⁷ Ní'irö Pedro, en Juan na', gula'xóa ná'agaquië' bönachi Samaria na'. Bulu'lídzë' Dios, ate' bidisóalenë' Dios Bö' Lá'ayi légaquië'.

¹⁸ Cate' bilé'enë' Simón, bönni' udzá' na', le guca cate' gubáz na' nasöl-lë'ë Cristo gula'xóa ná'agaquië' bönachi ni', bidisóalenë' Dios Bö' Lá'ayi légaquië', gú'unne' quízxjë' légaquië' dumí, ¹⁹ ate' rë' légaquië':

—Benna ca' yöl-la' huáca ni quia', para cate' ixóa na'a núti'tës bönachi, idisóalenë' Dios Bö' Lá'ayi nu na'.

²⁰ Ní'irö Pedro gudxë' lë', rnnë':

—Íniti dumí quíu' tsözxön len lí', tu' réquinu' len dumí idéli'nu' yöl-la' huáca queë' Dios. ²¹ Biti' nacu' bachi gátsu'u lë ni, tu' dxía le naca ruá' dö' icja ládxí'do'o lahuë' Dios. ²² Bubi' ládxí' ca naca huiá' dö' ni runu', en gúta'yu lahuë' Dios, nadxi ca' uniti lahuë' lí' ca naca lë ni rízá' ládxu'u. ²³ Réquibë'eda' nabágu'u xíguia', en nadzunu' lu yalaj que tu' xihui'.

²⁴ Ní'irö bubi'ë didza' Simón na', rë' légaquië':

—Buli'lídzë' Dios, gáta'yuli' lahuë' Xanru' ni'a quia' neda' para cabí gaca quia' nitú lë na' chigunnáli'.

²⁵ Cate' Pedro, en Juan na' budxi gulunë' ba nalí queë' Cristo lu yödzo ni', en bulu'siyönnë' légaquië' xtídzë'ë Dios, gulunë' ca' libán que didza' dxi'a yugu' lu ládzagaquië' bönni' Samaria, ate' gudödi ni' yöjhuógaquië' Jerusalén.

Felipe, en tu bönni' Etiopía

²⁶ Ní'irö tu gubáz lá'ayi queë' Xanru' bë'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzo Gaza, nöza na' ridödi lu lataj cá'asó.

²⁷ Ní'irö guyu'ë nöza Felipe na', sa'yéajë'. La' nöza ni' yójtágúgië' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queënu dzó'ö lídxinu. Guyijë' Jerusalén bönni' ni para guyéaj ládxë'ë Dios. ²⁸ Na'a, söhuójjë' ladzë', rö'ë lu carreta queë', en rulabë' le nazúaj lu guichi ca gunnë' Isaías, bönni' bë'ë didza' uláz queë' Dios. ²⁹ Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

³⁰ Cate' chigubíguë'ë Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunnë' Isaías, ate' gudxë' lë':

—¿Naru' réajni'inu' lë na' rulabu'?

³¹ Bubi'ë didza' bönni' Etiopía na', gunnë':

—¿Nacxi gaca tséajni'ida' channö cuntu nu zoa uzéajni'i neda'?

Ní'irö gúta'yuë' lahuë' Felipe cuenë', en cö'lenë' lë' tsözxön lu carreta na'.

³² Lë na' nazúaj lu guichi rulabë', rnna caní:

Ca bö'cu' zxíla'do',

gula'chë'ë Lë' para ilútië' Lë',

en ca bö'cu' zxíla'do',

biti' rnnëba' cate' nu richugu lítsa'ba',

ca' benë' Lë', biti' gusalaj ru'ë bi innë'.

³³ Bulu'cá'anë' Lë' cá'asó,

en biti' gulu'ë lataj nu uchi'a usörö Lë'.

¿Nuzxi caz gaca inözi xíguia' nabága'gaca bönachi uládz queë'?

La' légacasë' gulútië' Lë'.

³⁴ Bönni' huödx na' gunábinē' Felipe, rē' lē':

—Ráta'yua' lo' quíxjöi'inu' neda'. ¿Nuzxi que gunnē' caní bönni' na' bē'ē didza' uláz queē' Dios? ¿Naru' queē' cazē', o que nu yúbölö?

³⁵ Ní'irō la' didza' nisō buguélē'ē Felipe, en busiyōnnē' lē' didza' dxi'a ca naca queē' Jesús.

³⁶ Cate' nī' yú'ugaquiē' nōza sōjáquiē', bila'dxinē' ga dē nisa, ate' bönni' huödx na' rē' Felipe, rnnē':

—Buyútsöca'. Ni dē nisa. ¿Naru' huácatsō idila' nisa?

³⁷ Felipe gudxē' lē':

—Channō réajlē'u idú ládxi'u, huáca idilu' nisa.

Lē' bubi'ē didza', rnnē':

—Réajlē'a Jesucristo, náquiē' Zxí'inē' Dios.

³⁸ Ní'irō benē' ga guzóa dxisō carreta queē' na', ate' bulu'huöjtjē' irópatē', yöjtsázagaquiē' lu nisa. Ní'irō Felipe buquillē' bönni' huödx na' nisa. ³⁹ Cate' bulu'rúajē' lu nisa, Dios Bó' Lá'ayi buchē'ē Felipe, ate' bönni' huödx na' bítirō bilé'enē' lē'. Ní'irō buguélē'ē xínözē', sōhuójē' rudzējanē'. ⁴⁰ Cate' chiréqui-be'enē' Felipe, zoē' lu yödzo Azoto. Gudödē' yúgu'tē yödzo nī', ate' benē' libán que didza' dxi'a, ga bidxintē' yödzo Cesarea.

9

Saulo ruhuöáquiē' queē' Cristo

¹ Ní' ruzenē' bach Saulo nupa ta'yéajlē' Xanru', gú'unnē' gútiē' légaquiē'. Para gunē' caní bidxinē' lahuē' bixúz lo, ² en gunábinē' lē' tu guichi unná bē', le tsöju'ē lógaquiē' bönni' unná bē' quégaca yu'u gapa tu'dubē' bönni' judío, en tu'sedē' queē' Dios lu yödzo Damasco, ate' channō utsóxáquiē' yugu' bönni', en nigula ta'yéajlē'ē Jesús nī', gaca ichē'ē légaquiē' nadzúngaquiē' lu yödzo Jerusalén. ³ Tsanni nī' yú'ugaquiē' nōza Saulo, en nupa nacuá'len lē', sōjáquiē', en cate' chizóa ila'dxinē' Damasco, tsárido'os buzeni'da' tu bení' za' lúzxiba, le buzení' ga nī' sōjáquiē'. ⁴ Ní'irō gudzō'ē Saulo lu yu, en biyōnnē' chí'i Nu rē' lē':

—Saulo, Saulo, ¿bizx que ribía ládxi'u neda'?

⁵ Saulo gunábinē' Lē', gunnē':

—¿Nuzxi lí, Xan?

Lē' gunnē':

—Neda' Jesús, Nu ribía ládxi'u. Run zi' cuinu', ridá'bagu'u neda'. Raca quiu' ca na' raca queē'ba' bēdxi, run zi' cuinba' richégu'ba' yaga tuchi' tündē'ē-ba' zì'.

⁶ Ní'irō Saulo guzxízidē'ē, gúdxinē', en gunnē':

—Xan, ¿bizxi rē'ēnu' guna'?

Xanru' gudxē' lē':

—Guyasa, en guyáz lu yödzo, ate' nī' isól-la'a quiu' nu guíē' lí le ral-la' gunu'.

⁷ Guládxinē' yugu' bönni' na' sōjácalenē' Saulo, tu' bila'yōnnē' chí'i na', sal-la' cuntu nu bila'le'enē'. ⁸ Ní'irō bōasē' Saulo luyú, en cate' guxá' guiój lahuē', bití' ca' rilé'enē'. Que lē' nī' na' gula'guélē'ē nē'ē, en gula'ché'ē lē' Damasco. ⁹ Guzóē' nī' tsonna dza nachul-la lahuē', en bití' bi'güf'i gudahuē'.

¹⁰ Zoē' ca' Ananías, bönni' réajlē'ē Cristo, yödzo Damasco, ate' Xanru' buluf'i lahuē' ga zoē' ca tu lu yēla bēchigal, en gudxē' lē':

—Ananías.

Lē' bubi'ē didza', gunnē':

—Ni zoa', Xan.

¹¹ Xanru' gudxē' lē':

—Guyasa, en guyéaj ga naca la' nōza na' nazí'i le Nōza Li, ate' lu yu'u lidxē' Judas gunaba didza' queē' Saulo, bönni' Tarso. Lu yu'u na' rulidzē' Dios. ¹² Chibilé'enē' tu bönni' ca tu lu yēla bēchigal zē'ē tsáziē' ga zoē', lē' Ananías, en ixóa nē'ē lē' para huóálaj guiój lahuē'.

¹³ Ní'irō bubi'ē didza' Ananías, rē' Lē':

—Xan, zían nupa chibulu'siyōnnē' neda' ca runē' bönni' nī, zían le naca dō' nu'ē le benē' quégaca bönachi ta'yéajlē' Li', nacuá' Jerusalén. ¹⁴ Zē'ē ca' nī, dē lu nē'ē uláz quégachiē' bixúz unná bē' sōnē' yúgu'tē nupa tu'lidza Dios len Lo' Li'.

¹⁵ Ní'irō Xanru' rē' Ananías na', rnnē':

—Guyéaj, tu' guró caza' neda' bönni' nī para gunē' libán ca naca quia' lógaca bönachi izá'a, en lógaquiē' bönni' ta'nná bē'enē' légaquiē', enca' lógaca bönachi Israel. ¹⁶ Uluf'ida' lē' le zían le qui'í sáquē'ē uláz quia' neda', gunē' xichina'.

¹⁷ Ní'irō guyijē' Ananías nī', ate' guyáziē' yu'u, en guxóa nē'ē Saulo, ate' rē' lē':

—Bōcha'a Saulo, Xanru' Jesús, Nu na' buluf'i lahui la' nōza ga nī' zo'o, gusöl-lē'ē neda' para huóálaj guiój lo', en idisóalenē' Dios Bó' Lá'ayi lí'.

¹⁸ La' ní'sö gula'guinnaj le naca ca xilácuba' böla lu guiöj lahuë', ate' la' böäljatë guiöj lahuë'. Ní'irö guyasë' Saulo, en bidilë' nisa. ¹⁹ Gudödi ni' gudahuë', en böaca ládxë'ë. Ca chopa tsonna dza guzóalenë' yugu' bönni' ta'yéajlë'ë Cristo nacu'ë Damasco.

Runë' libán Saulo lu yödzo Damasco

²⁰ La' gusi lotë' Saulo runë' libán queë' Cristo gapa naca lu yu'u ga tu'dubë' bönni' judío, en tu'sédë' queë' Dios, rnnë':

—Jesús náquië' Zxi'ini cazë' Dios.

²¹ Bulu'bánninë' yugu'të bönni' ni' ta'yönnë' lë', ta'nnë':

—¿Naru' calëga bönni' ni bönni' na' busunítië' nupa nacuá' Jerusalén, en tu'lidza Dios lu Lë' Jesús? Para gunë' caní bidë' ca' ni para ichë'ë légaquië' nadzúngaquië' lógaquië' bixúz unná bë'.

²² Bidíparö ládxë'ë Saulo, en benë' ga gula'bö'ë böniga bönni' judío nacu'ë Damasco, tu' buluí'inë' légaquië' Jesús naca cazë' Cristo, bönni' na' tunë' löza idinná bé'enë' légaquië'.

Rulë' Saulo lu ná'agaquië' bönni' judío

²³ Cate' chigudödi zían dza, gulún xtídza'gaquië' bönni' judío nacu'ë ni' ilútië' Saulo. ²⁴ Rëla, en të dza gula'bö' nísie' yugu' bönni' judío ga nu ridödi lu zö'ö run chi'i yödzo na' para ilútië' lë', pero güquibe'enë' Saulo le të'ennë' ilunë' queë'. ²⁵ Ní'irö yugu' bönni' ta'yéajlë'ë Cristo gula'guélë'ë Saulo chi'i dzö'ölö, ate' gula'gu'ë lë' tu lu ga'böra zxon naga' du, en bulu'zötjé' lë' ní'ilö lu zö'ö run chi'i yödzo na'.

Rudxinë' Saulo Jerusalén

²⁶ Cate' budxinë' Saulo Jerusalén, gú'unnë' tsöjenë' tsözxön bönni' ni' ta'yéajlë'ë Cristo, pero yugu'të' guládxinë' lë', tu' cabí téquinë' réajlë'ë Saulo na' Cristo. ²⁷ Ní'irö bönni' na' lë' Bernabé gudélë'ë Saulo, en guchë'ë lë' ga na' nacu'ë bönni' gubáz nasöl-lë'ë Cristo. Busiyönnë' légaquië' ca na' guca queë' Saulo, bilé'enë' Xanru' la' nöza, ate' Xanru' caz bé'lenë' lë' didza', en ca na' benë' Saulo lu yödzo Damasco, len yöl-la' rugu ladxí' benë' libán ca naca queë' Jesús. ²⁸ Ní'irö Saulo guzóalenë' légaquië' lu yödzo Jerusalén, ate' gudálenë' légaquië' tsözxön. ²⁹ Lu yöl-la' rugu ladxí' benë' libán Saulo ca naca queë' Xanru', en gudíl-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'. ³⁰ Cate' guléquibe'enë' böchi'ru' ta'yéajlë'ë Cristo lë ni, gula'chë'ë Saulo lu yödzo Cesarea, ate' gula'söl-lë'ë lë' yödzo Tarso, le naca ladzë' Saulo.

³¹ Ní'irö guca tsahui' quégaça yugu'të cö' bönachi queë' Cristo, nacuá' idú luyú Judea, en luyú Galilea, en luyú Samaria, ate' bila'dipa ládxí'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gücalenë' Dios Bö' Lá'ayi légaquië'.

Pedro ruúnë' tu bönni' lë' Eneas

³² Ia'tú le guca, cate' Pedro yöjyüë' yugu' böchi'ru', bidxinë' ga nacu'ë bönni' ta'yéajlë'ë Jesús lu yödzo Lida. ³³ Yöjxáquië' tu bönni' ni' lë' Eneas, chiguca xunu' iz dë' ré'enë', nacu'unië' bin. ³⁴ Pedro gudxë' lë':

—Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'. ³⁵ Yugu'të nupa nacuá' yödzo Lida, en yödzo Sarón bila'lë'ë lë', ate' bulu'huóaca queë' Xanru', tu' chita'yéajlë' Lë'.

Rátinu Dorcas, en rubannu

³⁶ Ia'stú le guca, lu yödzo Joep zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Benu nigula ni zían le nácacaca dxi'a le tácalen bönachi yechí'.

³⁷ Le guca dza ni', gü'ínu Dorcas na', en gútinu. Gudödi gula'guíbinu lënu, gula'guíxjé'-nu tu lu yu'u ga naca buropi cuía. ³⁸ Tu' dë yödzo Lida gála'sö ga na' dë yödzo Joep, ga na' zoë' Pedro, bila'yönnë' bönni' Joep na' ta'yéajlë'ë Cristo zoë' Pedro ni', ate' que lë ni na' gula'söl-lë'ë chopë' bönni' ga na' zoë', ate' guláta'yue' lahuë', të lë':

—Biti' tsenu' guídu' queëtu'.

³⁹ Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bödxinu, en tulufínu lë' lari' quégaquië' bönni', en nigula, yugu' le benu Dorcas cate' ni' zóalennu légacanu. ⁴⁰ Ní'irö Pedro bubéajë' ní'ilö yugu'të nupa nacuá' ni', ate' buzóa zxi'bë', rulidzë' Dios. Ní'irö buécjé' ga dënu Dorcas na', gunné':

—Tabita, guyasa.

La' buxa'të guiöj lonu Dorcas. Cate' bilé'enu-në' Pedro, la' guyástënu, gurö'önu. ⁴¹ Gudélë'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu. ⁴² Ca guca lë ni guzë didza' idú lu yödzo Joep, ate' gula'yéajlë' bönachi zían Xanru' Jesús. ⁴³ Bugá'anë' Pedro yödzo Joep na' zían dza lu yu'u lidxë' Simón, bönni' runë' tsahui' guídi zxa bëdxi.

10

Le benë' Pedro lidxë Cornelio

¹ Zoë' yödzo Cesarea tu bönni' lë' Cornelio, bönni' rinná bé'enë' tu gáyu'ë bönni' rōjáquië' gudil-la, nazi' i lēgaquië' Bönni' Italia Rōjáquië' Gudil-la. ² Cornelio na' reaj lādxë'ë Dios, en rádxiñë' Lë', ate' yúgu'të bōnachi nacuá' lidxë' núngaca lë' tsōzxōn. Runōdzjē' Cornelio dumí zían le rácalen bōnachi yechi', en rulídzatica'së' Dios. ³ Tu dza idú ridōdi xihuō bilé'enë' Cornelio ca tu lu yēla bēchigal, raziē' tu gubáz lá'ayi queë' Dios ga na' zoë', en rē' lë':

—Cornelio.

⁴ Gúdxinē' Cornelio. Buyúē' gubáz lá'ayi na', en gudxë' lë':

—¿Bizxi rnno', Xan?

Gubáz lá'ayi na' gudxë' lë', rnnë':

—Dios riyōnnë' le rulidzu'-në', en nōzinë' ca runu', rácalenu' bōnachi yechi'. ⁵ Na'a, gusōl-la' yugu' bönni' tsōjáquië' yōdzō Jope tsōjlídzagaquië' bönni' na' lë' Simón, zoa ia'tú lë' Pedro. ⁶ Bönni' ni zoë' lidxë' tu bönni' runë' tsahui' guidi zxa bēdxi. Bönni' ni, lēscá' lë' Simón, ate' zoa lidxë' ra' nísado'. Pedro na' guíē' lī' le ral-la' gunu'.

⁷ Cate' chibuzë'ë gubáz lá'ayi na' bé'lenë' lë' didza', bulídzë' Cornelio chópabi' bi'i huen dxin queë', en tuë' bönni' rejë' gudil-la reaj lādxë'ë Dios, en dzáguíē' bōnachi nacuá' lidxë' Cornelio. ⁸ Cate' budxi busiyōnnë' lēgaquië' yúgu'të le guca, gusōl-lë'ë lēgaquië' yōdzō Jope.

⁹ Dza buropi, tsanni ni' yú'ugaquië' nōza, en ta'dxinë' gala' ga dē Jope na', la' ní'sō gurenë' Pedro ícjo'olō yu'u para ulidzë' Dios, ni' naca idú huagubidza. ¹⁰ La' ná'asō ridunë' Pedro, en gú'unnë' gahuë', ate' tsanni ni' tu'pë'ë queë', bilé'enë' le naca ca tu lu yēla bēchigal. ¹¹ Bilé'enë' nayalaj lúzxiba, en ruhuōtaj tu le naca ca tu lari' guitsa' zxōn ga zoë', le naga' idapa la'a. ¹² Lahui lari' na' dxiagacaba' yugu' bōa' guixi' izá'a nacuá' tapa ni'a ná'agacaba', en yugu' bōa' tá'ayōj lē'egacaba' lu yu, en yugu' bōa' zoa xilíagacaba'. ¹³ Ní'irō biyōnnë' chí'i nu rē' lë':

—Pedro, guyasa. Bēti-gacaba', en gudagu.

¹⁴ Bubi'ë didza' Pedro, rnnë':

—¡Calēga, Xan! Catu caz gudahua' le cabí ral-la' gágutu', o le cabí naca dxi'a.

¹⁵ Le buropi luzuí biyōnnë' chí'i nu na' gudxi lë':

—Le nunë' Dios dxi'a, biti' innó' que: "Biti' naca dxi'a."

¹⁶ Tsonna luzuí guca caní, ate' ní'irō la' buēpitē lari' zxōn na' lúzxiba. ¹⁷ Tsanni ni' rō'ë bōniga Pedro, rizá' lādxë'ë bizxi sa'yéaj lē na' bilé'enë' ca tu lu yēla bēchigal, bila'dxinë' bönni' na' nasōl-lë'ë Cornelio lēgaquië' ra' yu'u, ta'nabë' gazxi zoa lidxë' Simón na'. ¹⁸ Cate' bila'dxinë' ni', bulu'lídzë' nupa nacuá' yu'u na', en gula'nábinë' lēgaquië' channō zoë' tu bönni' lë' Simón ni', zoa ia'tú lë' Pedro. ¹⁹ Tsanni ni' rizá' lādxë'ë Pedro ca naca lē na' bilé'enë', Dios Bō' Lá'ayi gudxë' lë', rnnë':

—Buyútsōca'. Chibila'dxinë' tsonnë' bönni' ni, tu'guiljē' lī'. ²⁰ Guyaschi na'a, en bōtaj zcan yu'u. Biti' gaca chopa lādxu'u tséajlenu' lēgaquië', tu' nasōl-la'a neda' yugu' bönni' ni.

²¹ Ní'irō bōtjē' Pedro zcan yu'u ga na' nacu'ë bönni' na' nasōl-lë'ë Cornelio, en gudxë' lēgaquië':

—Neda' bönni' ruguíajlī'. ¿Bizxi huen zá'ali' ni?

²² Bulu'bi'ë didza', tē' lë':

—Cornelio, tu bönni' rinná bé'enë' bönni' rōjáquië' gudil-la, nasōl-lë'ë netu'. Náquië' bönni' tsahui', en rádxiñë' Dios. Yúgu'të bönni' judío tunë' bal bönni' ni, en nadxfíguequinë' lë'. Ia'tú le guca, tu gubáz lá'ayi queë' Dios bé'lenë' lë' didza', en gudxë' lë' isōl-lë'ë nu udulídza lī' guídu' lidxë' para yōnnë' didza' gu'u.

²³ Ní'irō Pedro gulu' lēgaquië' lu yu'u, en bē'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' lēgaquië'. Bal-lë' bōchi'ru' nacu'ë Jope na' gulunë' lë' tsōzxōn.

²⁴ Dza bunni ni', bila'dxinë' Cesarea. Chizóé' Cornelio ribōzë' lēgaquië', ate' chinutubë' yugu' di'a dza queë', en yugu' bōchi' luzé'ë nadxfí'irōnë' lidxë'. ²⁵ Cate' guyázíē' Pedro lō'a, birúajē' Cornelio yu'u, yōjtságuíē' lë'. Biyéchuē' xini'ë Pedro, en guyéaj lādxë'ë lë' ca runru' queë' Dios caz. ²⁶ Pedro buchisë' lë', en gudxë' lë':

—Guyasa. Lēscá' bōnachi yōdzōlió naca' ca nacu' lī'.

²⁷ Ní' tuí'së' ca' didza', guyázatē' Pedro yu'u, en yōjxáquië' nudúbígaca bōnachi zían ni'.

²⁸ Ní'irō Pedro gudxë' lēgaquië', rnnë':

—Libi'ili' nōz quézili' ca rinná bē' xibá queë' Moisés, rnna biti' ral-la' gunë' tu bönni' judío tsōzxōn o tsáalenë' nu bönni' izá'a. Na'a, Dios buluí'inë' neda' biti' ral-la' inní'a' queë' nitúē' bönni' náquië' cá'asō o biti' náquië' dxi'a. ²⁹ Que lē ni na' cate' bulídzali' neda', la' bídatea', en biti' guca chopa lādx'a. Rinaba' na'a, ¿bizx que na' bulídzali' neda'?

³⁰ Ní'irō bubi'ë didza' Cornelio, gunnë':

—Chiguca tapa dza ca zóaru' na'a, idú ridödi xihuö, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rëpi yōsa bení', dulul'i lobi' neda'. ³¹ Caní gúdxibi' neda': "Cornelio. Dios riyönnë' le rulidzu'-në', en nözinë' ca runu', rácalenu' yugu' bönachi yechi'. ³² Na'a, isöl-lu' u nu bönni' lu yödzo Jope para tsöjlidzë' tu bönni' lë' Simón, zoa ia'tú lë' Pedro. Bönni' ni zoë' lidxë' tu bönni' runë' tsahui' guidi zxa bëdxi, en lë' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' li' didza' dxi'a." ³³ Caní guca, la' gusöl-la'tea' nu tsöjlidza' li', ate' tsáhui'do' benu' bidu' ga zóatu' ni. Que lë' ni na' zóatu' ni yúgu'tëtu', nudúbitu' lahuë' Dios para uzë nágatu' le inná bé'enë' Dios li' innó'.

Didza' bë'ë Pedro lidxë' Cornelio

³⁴ Ní'irö gusi lahuë' Pedro ru'ë didza', rnnë':

—Le nácatë réajni'ida' na'a, biti' ruyusë' Dios yöl-la' rinnësö quégaca bönachi, pero tuz ca rilé'enë' rë'u. ³⁵ Dios raza ládxë'ë bönachi idütë yödzoilió, nupa na' tadxi Lë', en tun le naca dxi'a. ³⁶ Gusöl-lë'ë Dios xtídzë'ë ga nacuá' bönachi Israel, en gusöl-lë'ë nu ben libán que didza' dxi'a, le run ga raza dxi'a quégaca bönachi, lë na' bidxin quéëru' lu në'ë Jesucristo. Lë cazë' náquië' Xanru' yúgu'tëru'. ³⁷ Libí'ili' nöz quézili' lë na' guca luyú Judea, le gusi lo guca luyú Galilea gudödi benë' libán Juan para ila'dila bönachi nisa. ³⁸ Nözili' ca benë' Dios le lo guca queë' Jesús, bönni' Nazaret. Gusöl-lë'ë Dios Bö' Lá'ayi, en yöl-la' huáca queë' para sóalengaca Lë'. Nözili' ca na' gudë' Jesús, runë' le naca tsahui', en ruünë' yúgu'të nupa gula'gufi gula'zaca' lu na' tu' xihui'. Caní benë', tu' guzóalenë' Dios Lë'. ³⁹ Na'a, netu' runtu' ba nalí que yúgu'të lë na' benë' Jesús luyú Judea, en lu yödzo Jerusalén, en ca na' guca, gulútië' Jesús, cate' bulu'dë'ë Lë' lë'e yaga cruz. ⁴⁰ Ní'irö Dios busubanë' Lë' cate' guca tsonna dza nátië, en benë' ga bulufi' lahuë' ga zóatu' netu'. ⁴¹ Biti' bulufi' lahuë' lógaca yúgu'të bönachi, pero lotu' netu' bulufi' lahuë'. Dios guröë' netu' dza ni'te para guntu' ba nalí queë' Jesús, ate' güi' gudágulentu' Lë' tsözxön gudödi bubanë' lu yöl-la' guti. ⁴² Gunná bé'enë' Dios netu' guntu' libán lógaca bönachi, ate' runtu' ba nalí queë' Cristo, náquië' Nu buzóa cazë' Dios para uchi'a usöröë' nupa nabángaca, en nupa chinátigaca. ⁴³ Lë'sca' yúgu'të bönni' gulu' lë' didza' uláz queë' Dios gulunë' ba nalí queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

Dios Bö' Lá'ayi ridisóalenë' bönachi izá'a

⁴⁴ Ní' ru'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'. ⁴⁵ Gula'ná' badxë' bönni' judío ta'yéajlë' Cristo, nupa na' bila'dxín ni' tsözxön len Pedro, tu' bidë' Dios Bö' Lá'ayi, Nu na' nasöl-lë'ë Dios Xuz. Bidisóalenë' bönachi ni' biti' nácagaca judío. ⁴⁶ Caní gulunë' tu' bila'yönnë' tu'ë bönni' zi'tu' na' didza' yúbölö, en tunë' Dios xzön. ⁴⁷ Ní'irö bë'ë didza' Pedro, gunné':

—¿Naru' huácatsö nu inná bé'e bönachi ni para cabí ila'dila nisa? Naca bé' Dios Bö' Lá'ayi bidisóalenë' légaquië', ca na' bidisóalenë' netu'.

⁴⁸ Gunná bë'ë Pedro ila'dilë' nisa tu' nazí' lu ná'agaquië' Lë' Xanru' Jesús. Ní'irö yugu' bönni' ni' guláta'yuë' lahuë' Pedro ugá analenë' légaquië' ca chopatsonna dza.

11

Didza' bë'ë Pedro lógaca bönachi queë' Cristo nacuá' Jerusalén

¹ Bila'yönnë' gubáz nasöl-lë'ë Cristo, en böchi'ru' nacu'ë luyú Judea ca na' bönni' biti' nácagaquië' judío gula'zi' lu ná'agaquië' xtídzë'ë Dios. ² Cate' budxinë' Pedro Jerusalén, böchi'ru' judío gula'díl-lalenë' lë' didza'. ³ Gulë' Pedro:

—¿Bizx que yöjtü'ulenu' bönni' biti' nácagaquië' judío, en gudágulenu' légaquië' tsözxön?

⁴ Ní'irö gusi lahuë' Pedro rusiyönnë' légaquië' idütë lë na' guca, rnnë':

⁵ —Guzóa' lu yödzo Jope, en cate' ni' rulidza'-në' Dios, bilé'eda' ca tu lu yëla bëchigal tu le bulufinë' Dios neda'. Bilé'eda' bötaj birúaj lúxhiba tu le naca ca tu lari' guitsa' xzön, naga' idapa la'a, ate' bidxín ga na' zoa'. ⁶ Cate' ni' ruyú'a le para ilé'eda' le dxía láhuilö, bilé'egacada'-ba' böa' guixi' nacuá' tapa n'agacaba', yugu' böa' guixi' sínia, en böa' tá'ayöj lë'egacaba' lu yu, en böa' zoa xilicacaba'. ⁷ Biyönda' chi'i nu gudxi neda': "Pedro, guyasa. Bëti-ba, en gudagu." ⁸ Ní'irö gudxa'-në': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxi'a." ⁹ Ní'irö le buropi luzuí bulidza chi'i lúxhiba na' neda', en gudxi neda': "Le nunë' Dios dxi'a, biti' innó' biti' naca dxi'a." ¹⁰ Tsonna luzuí guca caní, ate' ní'irö idütë lë na' bilé'eda' la' buëpitë lúxhiba. ¹¹ La' ní'isö bila'dxintë' tsonné' bönni' ra' yu'u ga na' zoa', narúajgaquië' yödzo Cesarea, nasöl-lë'ë légaquië' tu bönni' lë' Cornelio. Sududíl'jagaquië' neda'. ¹² Dios Bö' Lá'ayi gudxë' neda': "Guyéajlen légaquië', en cabí gaca chopat lădxu'u." Lë'sca' izxópatë' böchi'ru' ni gula'zálenë' neda' tsözxön. Guyéajtu' Cesarea, ate' guyaztu' lidxë' tu bönni' zoë' ni'. ¹³ Bönni' ni' gudáxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuinë' lahuë', en gudxë' lë': "Na'a isöl-la' gacu'-në'

bönni' tsöj'áquië' yödzo Jope, tsöjlídzagaquië' Simón, zoa ia'tú lë' Pedro. ¹⁴ Bönni' na' usiyönnë' li' naca gaca uló' li', en ulu'lágaca ca' yúgu'të bönachi nacua' lidxu'." ¹⁵ Cate' ni' gusi lahua' ru'ílena' légaquië' didza', bidisóalenë' Dios Bó' Lá'ayi légaquië' ca' na' bidisóalenë' rë'u zí'atëlö. ¹⁶ Ní'irö yójneda' didza' na' bë'ë Xanru', gunné': "Le nácátë Juan buquílë' bönachi nisa lu nisa, pero libí'ili', gaca queëli' le rulu'isó yöl-la' ridila nisa na', idisóalenë' Dios Bó' Lá'ayi libí'ili'." ¹⁷ Que lë ni na', channö Dios gusöl-lë'ë Dios Bó' Lá'ayi quegaquië', la' tuz ca benë' queëru' rë'u réajlë'ëru' Xanru' Jesucristo, çnúzxité neda' inná bé'eda'-në' Dios?

¹⁸ Ní'irö, cate' bila'yönnë' lë ni, gula'cuá' dxië', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' bití' nácagaquië' judío, tu'bí'í ládxi'gaquië' para ila'déli'në' yöl-la' na'bán idú.

Yugu' bönni' nacu'ë Antioquia ta'yéajlë'ë Cristo

¹⁹ Cate' ni' yugu' bönni' judío bití' ta'yéajlë'ë gulútië' Esteban, en gula'bía ládxi'gaquië' ia'zica'rö bönachi ta'yéajlë' Cristo, bulu'zxunnaj bönachi ni, en gulásilasi zían yödzo luyú Fenicia, en luyú Chipre, en lu yödzo Antioquia. Gulunë' libán ni' que xtidzë'ë Dios, pero lógacasö bönachi judío. ²⁰ Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzo Antioquia, guluf'ilenë' ca' didza' yugu' bönni' izá'a. Gulunë' libán lógaquië' que didza' dxi'a ca naca queë' Xanru' Jesús. ²¹ Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

²² Cate' bidxin didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'sól-lë'ë Bernabé tséajë' Antioquia na'. ²³ Cate' Bernabé na' bidxinë' Antioquia, bilé'enë' le ruzá' ládxe'ë Dios quegaquië', en budzéjanë'. Guchízië' icja nágaquië' para ila'día'tica'së' queë' Xanru' idú ládxi'gaquië'. ²⁴ Náquië' Bernabé na' tsahui', en idú zóalenë' Dios Bó' Lá'ayi lë', en idú ládxe'ë réajlë'ë Cristo. Ni'a que libán benë' Bernabé na', bönachi zían lu yödzo na' gula'yéajlë' Xanru'.

²⁵ Gudödi ni', guyijë' Bernabé na' yödzo Tarso, yöjdiljë' Saulo. Cate' budzölinë' lë', buchë'ë lë' Antioquia. ²⁶ Idú ca tu iz gula'cu'ë ni', tunë' tsözxön bönachi queë' Cristo, en tu'sédinë' bönachi zían. Lu yödzo Antioquia na', gusi lo gula'z'í' lógaquië' cristiano le rnna len didza' xidza': Bönachi Queë' Cristo, nupa ni' ta'yéajlë' Lë'.

²⁷ Dza ni' bila'rúajë' Jerusalén, en yójáquië' Antioquia bal-lë' bönni' tu'ë didza' uláz queë' Dios. ²⁸ Guzuínë' Agabo, bönni' dzáguie' yugu' bönni' na', en uláz queë' Dios Bó' Lá'ayi buzéajni'inë' légaquië', gunné':

—Sí' gaca gubín iduté yödzo lió.

Guca gubín na' cate' ni' rinná bë'ë Claudio, lu yödzo Roma. ²⁹ Ní'irö gula'z'í' lu ná'agaquië' bönni' ta'yéajlë'ë Cristo nacu'ë Antioquia, ila'sól-lë'ë tsca le desö que queëgaquië', le gácalen böchi'ru' nacu'ë luyú Judea. ³⁰ Caní gulunë', ate' lë na' bulu'nödzejë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula tapa chi'ë bönachi queë' Cristo nacu'ë Judea.

12

Tútië' Jacobo, en ta'gu'ë Pedro lidxi guié

¹ Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' zí'ë légaquië'. ² Gunná bé'enë' bönni' gulútië' Jacobo, böché'ë Juan. Gulu'ë lë' guié tuchi'. ³ Cate' gúquibe'enë' Herodes gula'yaza ládxi'gaquië' bönni' judío lë ni, benë' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila bití' nazí'í cúa zi que. ⁴ Gudödi gula'zönë' Pedro, gula'gu'ë lë' lidxi guié, en bulu'dödë' lë' lu ná'agaquië' tapa cö' bönni' rójáquië' gudil-la, nacu'ë tapë' tu huéaj cö' na', para uyúgaquië' lë'. Yu'u ládxe'ë Herodes ubéajë' Pedro lógaca bönachi tödi Laní Pascua, laní na' tu'subanë' ca benë' Dios, bubéajë' bönachi judío luyú Egipto. ⁵ Caní guca, nun chí'igacrë' Pedro lu yu'u lidxi guié na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

Dios rubéajë' Pedro lidxi guié

⁶ Cate' si' idxín dza yu'u ládxe'ë Herodes ubéajë' Pedro lidxi guié na', la' dzö' ní'isö dë' rásië' Pedro, ate' nacu'ë chopë' bönni' rójáquië' gudil-la cuita lë'ë Pedro na', en núga'gaquië' lë' chopá du guié. Gula'cu'ë ia'bal-lë' bönni' rójáquië' gudil-la tapa chi'ë ga nu riyaza lidxi guié na'. ⁷ Tsárido'os bulu'í'lahuë' tu gubáz lá'ayi queë' Xanru' ni', ate' buzení'da' bení' lidxi guié. Gudanë' gubáz lá'ayi na' cuita lë'ë Pedro, ate' busubanë' lë', en gudxë' lë':

—Guyaschi.

Ní'irö bulu'huédxi du guié na' naga' ni'a në'ë Pedro. ⁸ Gubáz lá'ayi na' gudxë' lë', gunné':

—Béga' lë'u, en gudá' xirachu'.

La' bentë' Pedro caní. Ní'irö gubáz lá'ayi na' gudxë' lë', rnnë':

—Guxóa lari' cüdzu'u, en gudá len neda'.

⁹ Burúajë' Pedro, sa'yéajlenë' gubáz lá'ayi na', pero biti' réquibe'enë' nácate le runë' gubáz lá'ayi na'. Gúqinë' yélasö rinenë'. ¹⁰ Cate' chigula'dödë' ga nacu'ë bönni' zí'alö, en bönni' buropi cö, bönni' na' rójáquië' gudil-la tapa chí'ë, bila'dxinë' ga zoa le néquini guié le nusayaj ga nu riyaza lidxi guié na', ga nu rurúaj la' nōza que yōdzō. Ga nu riyaza na', rācasō que gualaj. Cate' bila'rúajë' nī', gula'z'ë ga ridzaga ia'turō nōza, ate' nī' gubáz lá'ayi na' la' bulá'alentë' Pedro. ¹¹ Ní'irō réquibe'enë' Pedro, ate' lu icja ládxi'da'azë' gunnë':

—Na'a chinōzda' le nácate gusöl-lë'ë Xanru' gubáz lá'ayi queë', en busölë' neda' lu nē'ë Herodes, en lu yúgu'të le gulë'ënnë' bönni' judío ilunë' quia'.

¹² Tsanni nī' yu'ë nōza Pedro, rízā' ládxë'ë ca naca lë na' guca, ate' bidxinë' lédxinu María, xin'abi' Juan, bi'i na' zoa ia'tú labi' Marcos. Lu yu'u na' nudúbigaca bōnachi zían ta'yéajlë' Cristo, en tu'lidza Dios. ¹³ Cate' bulidzë' Pedro ra' yu'u lō'a, birúajbi' bi'i nigula lëbi' Rode para inōzibi' nuzxi na'. ¹⁴ Cate' búbñë'ëbi' bi'i nigula nī chí'ë Pedro, lu yöl-la' rudzeja queëbi' biti' gusaljbi' yu'u, pero carelō bōajbi' lu yu'u, yōjtíxjōi'ibi' nupa nacuá' nī', rnnabi':

—Zoë' Pedro ra' yu'u.

¹⁵ Ní'irō gulë' lëbi':

—Nachixi icju'.

Lëbi' tsútsurō ben xtídza'bi' naca caní. Ní'irō gula'nnë':

—Calëga lë'. Bixín queë' na'.

¹⁶ Tsanni na' biti' zoa dxíë' Pedro rulidzë' nupa nacuá' lu yu'u. Cate' gula'saljë' yu'u, gula'nítisinë' cate' bila'lë'enë' lë'. ¹⁷ Ní'irō guchisa nē'ë Pedro para ila'cu'ë dxisō, ate' busiyōnnë' légaquië' ca benë' Xanru', bubéajë' lë' lidxi guié. Ní'irō gudxë' légaquië':

—Gulí'siyōnnë' ca' Jacobo, en yugu' bōchi'ru' ca na' guca.

Ní'irō burúajë' Pedro, sa'yéajë' ga yúbölō.

¹⁸ Cate' za' rení' dza na', bönni' rójáquië' gudil-la gula'bō'ë bōniga nacxi guca, bítirō yu'ë Pedro lidxi guié. ¹⁹ Ní'irō gusöl-lë'ë Herodes nupa tsōjxi'gaca Pedro. Cate' biti' bulu'dzölinë' lë', Herodes gunabi yúdxinë' yugu' bönni' na' rójáquië' gudil-la, bönni' gulún chí'ë Pedro. Gudōdi nī' gunná bé'enë' nupa bétigaca yugu' bönni' na' rójáquië' gudil-la. Ní'irō buzë'ë Herodes luyú Judea, sa'yéajë' Cesarea, ate' bugá'anë' nī'.

Ca gútië' Herodes

²⁰ Dza nī'sō rilenë' Herodes bōnachi yōdzō Tiro, en yōdzō Sidón. Zí'alō bōnachi lu xiyúë' Herodes na' gula'söl-la' le biyadzaj quégaca bōnachi lu xiyúgaca yōdzō Tiro, en Sidón na', pero tu' rilenë' Herodes légaquië', bítirō bi ta' söl-lë'ë quégachië'. Ní'irō gulunë' tuz bönni' Tiro, en Sidón na', ate' gulunë' ga soë' Blasto unë quégachië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulë'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégachië'. ²¹ Ní'irō budxië' bë' Herodes dza yōnnë' légaquië', ate' dza na' gurō'ë xilatjë' ga ruchi'a rusōrōë' bi' raca, nácuë' lari' nazaca', en benë' libán lōgaquië'. ²² Ní'irō bulu'lidzë' zidzaj bönni' na', ta'nnë':

—¡Calëga bönni'sō nī! ¡Dios caz nī ru'ë didza'!

²³ La' ná'asō la' bë'të' gubáz lá'ayi queë' Xanru' lë' tu' buzi'ë lë cazë' yöl-la' ba ral-la' gaca queë' Dios. Ní'irō gurō'ë Herodes na' buzuga', ate' gútië' tu' táguba' lë'.

²⁴ Ní'irō guca libán que xtídze'ë Xanru', ate' gula'yán nupa nazí' lu ná'agaca le.

Le zí'alō luzuí rōjéngaquië' Bernabé, en Saulo libán

²⁵ Cate' Bernabé, en Saulo chibulu'dödë' dumí na' lu ná'agaquië' bönni' gula tapa chí'ë bōnachi queë' Cristo nacu'ë Jerusalén, bulu'z'ë nī', yōjhuōjgaquië' yōdzō Antioquia. Gula'ché'ë-bi' ca' bi'i Juan, zoa ia'tú labi' Marcos.

13

¹ Dza ná'asō gula'cu'ë bönni' tu'ë didza' uláz queë' Dios, en bönni' tu'sédinë' bōnachi lu yōdzō Antioquia, tunë' tu zxōn bōnachi queë' Cristo lu yōdzō na'. Caní légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxoñlenë' tsōzxoñ Herodes, bönni' rinná bë'ë luyú Galilea).

² Tsanni nī' nudúbigaquië' bönni' nī queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Gulí'béaj-gáquië' quez quia' Bernabé, en Saulo para tsōjéngaquië' dxin na' bulidza' légaquië' ilunë'.

³ Budxi gulunë' gubasa, en guluílenë' Dios didza', ní'irō gula'xóa ná'agaquië' chopë' nī, en gula'söl-lë'ë légaquië'.

Yugu' gubáz nasöl-lë'ë Cristo tunë' libán luyú Chipre

⁴ Ní'irō yōjáquiē' Bernabé, en Saulo yōdzō Seleucia, tu' gusöl-lë'ē Dios Bō' Lá'ayi légaquiē' nī', ate' nī' gula'benē' tu' lë'e barco le guchē' légaquiē' ga naca tu luyú bidxi lu nísado', nazí'i le Chipre. ⁵ Cate' bila'dxinē' lu yōdzō Salamina luyú na', gulu'ē xtídzē'ē Dios gapa naca lu yu'u ga tu'dubē' bōnni' judío luyú na', en tu'sédē' queē' Dios. Nachē'gaquiē'-bi' bi'i Juan para gunbi' légaquiē' tu zxōn. ⁶ Budxi gula'dōdē' idú gapa dē yōdzōdō' luyú bidxi na' lu nisa zxōn, ní'irō bila'dxinē' yōdzō Pafos. Yōjáca'gaquiē' Barjesús, tu bōnni' judío nī'. Ná'quiē' bōnni' udzá' rinnē' yē'ē, en rnnē' ru'ē didza' uláz queē' Dios. ⁷ Bōnni' ni dzáguiē' Sergio Paulo, bōnni' réajni'i rinná bē'ē. Bōnni' unná bē' na' bulidzē' Bernabé, en Saulo, tu' rē'ēnē' yōnnē' xtídzē'ē Dios. ⁸ Ní'irō bōnni' udzá' na' gudá'baguiē' Bernabé, en Saulo, tu' gú'unnē' gunē' ga biti' tséajlë'ē Dios bōnni' rinná bē'ē. Bōnni' udzá' na' lë' ca' Elimas tsca naca xtídzá'gaca bōnni' izá'a ga na'. ⁹ Ní'irō Saulo, lë' ca' Pablo, buzóa tsutsu lahuē', zóalenē' Dios Bō' Lá'ayi lë'. Ruyúē' Elimas na' ¹⁰ en rē' lë':

—Li', bōnni' rizí' yē', en bōnni' huiá' dō', nacu' ca xzí'ini caz tu' xihui', en bōnni' biti' rilë'ēnē' dxi'a yugu'tē le naca tsahui'. ¿Naru' cabí soa dxitso' ca runu', ridá'bagu'u didza' tsahui' queē' Xanru', en ruzágu'u xinōza nu rē'ēni tséajlë' Lë'? ¹¹ Na'a, Xanru' usaca' zi'ē li', ate' ichul-la lo', en biti' ilë'enu' gubidza nababa dza.

La' guchúl-latē lahuē' Elimas na', ate' gudē' nilō ná'alō, riguilljē' nuzxi sōn nē'ē para ichē' lë'. ¹² Cate' bilë'enē' bōnni' unná bē' na' lë' na' guca, bubánninē' ca naca xtídzē'ē Xanru', ate' guyéajlë'ē Cristo.

Le gulunē' Pablo, en Bernabé lu yōdzō Antioquia luyú Pisidia

¹³ Ní'irō buzē'ē Pablo lu yōdzō Pafos na' len yugu' bōnni' dzágagaquiē' lë', nacu'ē tu lë'e barco, ate' bila'dxinē' yōdzō Perge luyú Panfilia. Lu yōdzō na' bi'i Juan bulá'alēnbi' légaquiē', en bōajbi' Jerusalén. ¹⁴ Gudōdi nī' bulu'zē'ē Perge na', en yōjáquiē' yōdzō Antioquia luyú Pisidia. Lu yōdzō na' cate' nī' naca dza lá'ayi quégaquiē' bōnni' judío, gula'yáziē' lu yu'u ga tu'dubē' tu'sédē' queē' Dios, ate' lu yu'u na' gula'bō'ē. ¹⁵ Ní'irō tu bōnni' zoē' nī' bulabē' guichi ga nazúaj xibá queē' Dios, enca' le nazúaj lu guichi ca gula'nnē' bōnni' gulu'ē didza' uláz queē' Dios. Gudōdi nī' yugu' bōnni' unná bē' que yu'u na' gula'söl-lë'ē nu yōjōdx Saulo, en Bernabé, gunnē':

—Libi'ili', bōchi'tu'. Channō nuá'alí' bi innali' le uzéajni' netu', guli'nnē.

¹⁶ Ní'irō guzuinē' Pablo, en guchisa nē'ē para ila'cu'ē dxisō, gunnē':

—Buli'zē' nágali' le guía' libí'ili', bōnni' Israel, en libí'ili', núlōli' rádxili'-nē' Dios. ¹⁷ Xanru' Dios, Nu ta'yéaj ládxí'gaca bōnni' Israel, gurō cazē' xuz xtó'oru', en benē' ga gula'yándē' cate' nī' náca'gaquiē' bōnni' zi'tu' luyú Egipto. Len yöl-la' huáca zxōn queē' bubeajē' légaquiē' luyú nī'. ¹⁸ Idú choá' iz Dios biá' gulénē' quégaquiē' cate' nī' gula'dē' idú luyú bidxi lu lataj cá'asō. ¹⁹ Cate' budxi busunítie' gadxi cō' yōdzō gula'cuá' luyú Canaán, bunódzjē' xiyúgaca bōnni' nī' quégaquiē' xuz xtó'oru'. ²⁰ Gudōdi nī', le guca idú ca tapa gayuá' yu' chi-un iz, Dios bucu'ē yugu' bōnni' bulu'chí'a bulu'sörōē' légaquiē' ga bidxintē zoē' Samuel, bōnni' bē'ē didza' uláz queē' Dios. ²¹ Ní'irō gula'nábinē' Dios uzóē' tu bōnni' unná bē' quégaquiē'. Dios gurōē' Saúl, xzí'inē' Cis, bōnni' nababē' di'a dza queē' Benjamín. Idú ca choá' iz gunná bē'enē' Saúl na' légaquiē'. ²² Gudōdi nī' Dios gudúē' Saúl na', ate' buzóē' David quégaquiē' para inná bē'ē. Dios benē' ba nalí queē' David nī, gunnē': "Nōzda' runē' David, xzí'inē' Isái, le raza ládxa'a, en gunē' yugu'tē le rē'ēnda' neda'." ²³ Ladaj xzí'ini xi'sōē' David na' benē' Dios ga guljē' Jesús para gáquiē' bōnni' usölē' bōnni' Israel, ca na' guzxi' lu nē'ē Dios zi'atēlō gunē'. ²⁴ Zí'alō cate' si' ilá' lahuē' Jesús, benē' Juan libán lógaca yugu'tē bōnni' Israel para ulu'bi'i ládxí'gaca, en ila'dila nisa. ²⁵ Cate' nī' chízōa údxí gaca libán Juan na', gunnē': "¿Nuzxi réquili' naca' neda'? Biti' naca' Cristo, bōnni' na' ral-la' guidē'. ¡Na'a, buli'yútsōca! Chizōē' idxinē' bōnni' na' ga zoa' nī, ate' neda' biti' naca' lesaca' ilecja' xiráchuē' nudē'ē."

²⁶ Libí'ili', bōcha'a, yugu' xzí'ini xi'sōē' Abraham, en núlōli' zóali' nī, en rádxili'-nē' Dios. Dios caz gusöl-lë'ē queē'li' didza' nī para uláli'. ²⁷ Nupa nacuá' Jerusalén, en bōnni' ta'nná bē'enē' légaquiē' biti' bulu'únbē'ē Jesús, en biti' gula'yéajni'inē' le nazúaj lu guichi le gula'nnē' yugu' bōnni' gulu'ē didza' uláz queē' Dios, sal-la' tu'laba cazē' yugu' didza' nī yugu' dza lá'ayi. Lu yöl-la' cabí réajni'i quégaquiē' gulunē' ga budxín ca rnna didza' nī cate' nī' gula'chúgiē' queē' Jesús gatiē'. ²⁸ Sal-la' biti' budzōli le nabáguē'ē Jesús gatiē', gula'nábinē' Pilato inná bē'enē' bōnni' ilútiē' Lë'. ²⁹ Cate' budxi gulunē' queē' yugu'tē le nazúaj lu guichi ca ral-la' gaca queē', bulu'zótjē' Lë' lë'e yaga cruz, en bulu'cáché'ē Lë' yeru ba. ³⁰ Ní'irō Dios busubanē' Lë' lu yöl-la' guti! ³¹ Zían dza buluí'lahuē' Jesús lógaca nupa yōjácalen Lë' tsōzxōn cate' nī' buzē'ē luyú Galilea, en bidxinē' Jerusalén. Na'a, yugu' bōnni' na' tunē' ba nalí queē' lógaca bōnni'.

³² Caní naca, lësca' netu' nī rusiyōntu' libí'ili' didza' dxi'a ca naca lë' na' guzxi' lu nē'ē Dios gunē' quégaquiē' xuz xtó'oru'. ³³ Lë' na' guzxi' lu nē'ē Dios quégaquiē', Lë' cazē' benē' ga budxín queēru', nácaru' xzí'ini xi'sóagaquiē'. Caní benē' cate' busubanē' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Xzí'ina'. Neda' buzóa

caza' Li'." ³⁴ Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunnë' caní: "Gunná' quiu' le nácagaca bica' ba guzxi' lu na'a lahuë' David." ³⁵ Que lë ni na' nazúaj ca' lu guichi, ga zoa ia'tú salmo, le rnna caní: "Biti' gu'u lataj ugá'anë' bönni' lá'ayi quiu' ga initi le naca cazë'." ³⁶ Le guca queë' David naca bë'. Gudödi benë' dxin lógaca bönnachi uládz queë', ca na' gunná bé'enë' Dios lë', ní'rö gütie', ate' gula'gu'ë lë' yeru ba ga nacu'ë xuz xtá'ahuë', ate' guniti le naca cazë'. ³⁷ Na'a, ca naca queë' Jesús na', Dios busubanë' Lë', ate' bití' guniti le naca cazë' lu yeru ba. ³⁸ Libí'ili', böcha'a, ral-la' inözili' lë' ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni. ³⁹ Na'a, Dios ruünë' tsahui' yúgu'të nupa ta'yéajlë' Jesús, rugüë' yugu' dul-la' na' le cabí guca ugáa xibá queë' Dios, le bë'ë Moisés. ⁴⁰ Guli'gún chi'i cuinli' na'a para cabí gaca queëli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

⁴¹ Buli'yútsöca', libí'ili', bönni' cabí tunë' neda' bal.

Ubánili', pero lu yöl-la' cabí réajlë' queëli' gátili'.

Neda' guna' tu dxin dza ni zóali',

en sal-la' nu uluf'i libí'ili' le rufu'i dxin na', bití' ca' tséajlë'ëli'.

⁴² Cate' bulu'rúajë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sëdë' queë' Dios, ní'rö bönnachi ni' guláta'yu lógaquië' ulu'sédinë' légaquië' ca naca lë ni cate' idxín ia'tú dza lá'ayi quégaquië'. ⁴³ Cate' ni' bulu'rúajë' lu yu'u na' bönni' nudúbigaquië' ni', zían bönni' judío, en bönni' nuhuóacagaquië' judío, yugu' bönni' ta'yéaj ládxi'gaquië' Dios, gulunë' tsözxön Pablo, en Bernabé. Chopë' ni' gulu'ilenë' légaquië' didza', en bulu'së'ë ládxi'gaquië' para ilácatica'së' tsutsu, ilunë' löza le ruzá' ládxi'ë Dios quégaquië'.

⁴⁴ Ia'xunu' gubidza ca' cate' bidxín ia'tú dza lá'ayi quégaquië', bulu'dubë' látu'biqui' yúgu'të bönnachi lu yödzo na' para ila'yönnë' xtídzë'ë Dios. ⁴⁵ Ní'rö bulu'zxë'enë' bönni' judío bití' ta'yéajlë'ë, cate' bila'lé'enë' bönnachi zían na', ate' gula'nnë' que didza' ru'ë Pablo, en gula'dá'báguë'ë le. ⁴⁶ Ní'rö lu yöl-la' rugu ládxi' quégaquië' Pablo, en Bernabé, gulë' yugu' bönni' judío na', ta'nnë':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queëli' bití' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacuá' bönnachi izá'a. ⁴⁷ Lësca' caní gunná bé'enë' Xanru' Dios netu' guntu' libán queë' Cristo lógaca bönnachi izá'a, en naca ca rnna didza' na' bë'ë Dios ca naca queë' Cristo, gunnë':

Nuzóa' Li' para gacu' bení' quégaca bönnachi izá'a,

en gacu' Nu usólá bönnachi idütë yödzólió.

⁴⁸ Cate' bila'yöni bönnachi izá'a nacuá' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú. ⁴⁹ Caní guca, guzë xtídzë'ë Xanru', ate' bila'yöni bönnachi yúgu'të yödzo nacuá' luyú ni'. ⁵⁰ Ní'rö bönni' judío bití' ta'yéajlë'ë na' gula'gu' u yöl-lë'ë yugu' bönni' lo que yödzo ni' para cabí ila'lé'enë' dxi'a Pablo, en Bernabé. Lësca' caní gula'gu' u yöl-lë'ë nigula lo ta'yéaj ládxi'nu Dios. Caní guca, gulunë' ga gula'bia ládxi'gaquië' Pablo, en Bernabé, ate' bulu'láguë' chopë' ni' ní'lö lu xiyúgaquië'. ⁵¹ Ní'rö Pablo, en Bernabé bulu'quinnajë' yu bëchtö da' la' lábagaquië' le rufu'i nagá'ana xíguia' nabága'gaca bönnachi lu yödzo na', ate' yójáquië' lu yödzo Iconio. ⁵² Bulu'dzéjanë' bönni' yödzo Antioquia na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

14

Le gulunë' Pablo, en Bernabé lu yödzo Iconio

¹ Cate' bila'dxinë' Pablo, en Bernabé yödzo Iconio, gula'yu'ë tsözxön lu yu'u ga tu'dubë' bönni' judío, en tu'sëdë' queë' Dios, ate' gulu'ë didza' ni'. Caní guca, zían bönnachi judío, enca' zían bönnachi izá'a gula'yéajlë' Cristo. ² Ní'rö bönni' judío bití' ta'yéajlë'ë gula'gu' u yöl-lë'ë bal-lë' bönni' izá'a, para cabí ila'lé'enë' dxi'a böchi'ru' ta'yéajlë'ë Cristo. ³ Tu' gula'yéajlë' bönnachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu ládxi' gula'ë xtídzë'ë Dios, tu' tu'xöni ládxi'gaquië' Xanru'. Lë cazë' Xanru' bulu'e naca idütë li didza' tu'ë ca naca le ruzá' ládxi'ë Dios quégaca bönnachi, tu' bë'ë légaquië' lataj gulunë' yugu' le taca bë', en le tun ga tu'bani bönnachi. ⁴ Ní'rö bönnachi lu yödzo na' bila'rúaj choplë. Bal-lë' gula'dë'ë bönni' judío bití' ta'yéajlë'ë, ate' ia'bal-lë' gula'dë'ë Bernabé, en Pablo, gubáz na' nasól-lë'ë Cristo. ⁵ Ní'rö bönni' judío bití' ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dubë' para ilu'ë dö' quégaquië' gubáz na' nasól-lë'ë Cristo, en ulu'ládxë' légaquië' guiöj. ⁶ Cate' téquibe'enë' Pablo, en Bernabé lë ni, bulu'zxünnajë' ni', yójáquië' yödzo Lистра, en Derbe luyú Licaonia, ate' gula'dödë' yúgu'të yödzódo' idú gásibi'lö ni', ⁷ gapa ni' gulunë' libán que didza' dxi'a ca naca queë' Cristo.

Tu'ládxë' Pablo guiöj lu yödzo Lистра

⁸ Zoë' tu bönni' lu yödzo Lистра biti' raca së'ë. Rö'ösë' ni' tu' cabí rizë'ë cate' ni' guljë', en catu caz guzë'e ni'ë. ⁹ Bönni' ni ruzë náquië' didza' ru'ë Pablo. Pablo buyüë' lë', en gúquibe'enë' réajlë'ë Cristo para huóáquië'. ¹⁰ Ní'irö Pablo bë'ë zidzaj didza', en rë' lë':

—Guzuí.

La' guxiti'të' bönni' na', en guzë'e ni'ë. ¹¹ Cate' yugu' bönni' Lистра bila'lë'enë' lë na' benë' Pablo, gula'si lógaquië' tu'ë zidzaj didza' lu didza' tu'ë bönni' Licaonia na', ta'nnë':

—¡Yugu' dios bönni' ni! ¡Nuhuó'tjagaquië' ga zóaru', en tu'luf'i cuíngaquië' ca nácaagaquië' bönni'!

¹² Gula'nnë' Bernabé na' náquië' Júpiter, ca lë' dios lo quégaquië', ate' gula'nnë' náquië' Pablo Mercurio, ia'tú dios quégaquië'. Caní gula'nnë' tu' ru'ë didza' Pablo ca na' ta'nnë' runë' Mercurio na'. ¹³ Uoa yudo' que Júpiter ga ni' nacu'ë, cuita nõza ga ni' ta'yaza bönachi lu yödzo na'. La' bidxintë' bixúz que Júpiter na', nachë'ë-ba' yugu' bëdxi, en nu'ë ca' yugu' bregui' yöj, ate' dzágagaca bönachi zían lë'. Gulë'ënnë' ilútië'-ba' bëdxi na' lógaquië' Pablo, en Bernabé para ila'yéaj ládxi'gaquië' légaquië' ca tunë' quégaca dios quégaquië'. ¹⁴ Cate' Bernabé, en Pablo, gubáz na' nasól-lë'ë Cristo, guléquibe'enë' lë ni, gula'chözë' lari' nácaagaquië'. Tu'hu'i'ininë' tu' tunë' bönni' ni le cabí ral-la' ilunë', ate' gula'xiti'ë, en yöjcu'ë gatsaj láhu'i'ló bönachi zían na', en gulu'ë zidzaj didza', të' légaquië':

¹⁵ —¡Libí'ili' bönachi! ¿Bizx que runli' caní? Lësca' bönni' ca libí'ili' nácatu', en rigu'xjöi'itu' libí'ili' lë ni caz ral-la' uca'anali', le cabí nácatë, para guéquili' queë' Dios ban. Dios ni benë' lúz-xiba, en yödzo'lió, en nísado', en yúgu'të le nacuá' tu tu lataj na'. ¹⁶ Yugu' iz chigula'dódi, gulún yúgu'të bönachi ca rnna'so que queëguequi, ate' Dios biti' buzágüë'ë xinózguequi, ¹⁷ pero benë' ga gulaca le tun ba nalí queë', yugu' le nácaaga dxi'a benë' quégaquië'. Risól-lë'ë queëru' nisa guió', en runë' ga ta'yán le rázaru'. Ruzólaj rudzé'enë' rë'u, en runë' ga rudzeja ládxi'ru'.

¹⁸ Sal-la' Bernabé, en Pablo gulë' légaquië' caní, cánnisó bila'déli'në' bulu'záguë'ë xinózguequi bönachi zían na', para cabí ilútië'-ba' bëdxi na' lógaquië'.

¹⁹ Ní'irö bal-lë' bönni' judio biti' ta'yéajlë'ë, narúajgaquië' Antioquia, en Iconio, bila'dxinë' ni', ate' gula'gú'u yól-lë'ë bönachi zían na'. Ní'irö yúgu'të' bulu'ladxë' Pablo guió', en gula'ayöjë' lë' ní'iló ra' yödzo na', tu' téquinë' chinátië'. ²⁰ Ní'irö bulu'dubë' yugu' bönni' ta'yéajlë'ë Cristo idú gási'biló ga dë' Pablo. Guyasë' lë', en buazië' lu yödzo na'. Cate' za' rení' ia'tú dza, burúajlenë' Bernabé, yójaquië' yödzo Derbe.

²¹ Lu yödzo ni' gulunë' libán que didza' dxi'a ca naca queë' Jesucristo, ate' bönachi zían ni' gula'yéajlë' Cristo. Gudödi ni' yójhü'jgaquië' Lистра, en Iconio, en Antioquia. ²² Cate' gula'dödë' Bernabé, en Pablo yugu' yödzo na', bulu'tipë' ládxi'gaquië' bönni' ni' ta'yéajlë'ë Cristo, en bulu'së'ë ládxi'gaquië' ulu'gá'anë' tsutsu ca na' ta'yéajlë'ë Lë'. Gulë' légaquië':

—Rë'u tsaza cázaru' ga rinná bë'ë Dios, run bayudxi quí'í sáca'ru' zían le gaca queëru'.

²³ Bulu'cu'ë yugu' bönni' gula'ilún chi'ë bönachi queë' Cristo tu cö' huéaj bönachi ni' queë' Cristo. Cate' chiguluf'ilënë' Dios didza', en gulunë' gubasa, ní'irö gula'gu'ë légaquië' lu në'ë Xanru', Nu na' ta'yéajlë'ë.

Pablo, en Bernabé tu'dxinë' Antioquia luyú Siria

²⁴ Ní'irö Pablo, en Bernabé gula'dödë' luyú Pisidia, ate' bila'dxinë' luyú Panfilia. ²⁵ Budxi gulunë' libán que xtídzë'ë Cristo lu yödzo Perge, yójaquië' yödzo Atalia. ²⁶ Bulu'zë'ë ni', ate' gula'benë' tu lë'e barco, en bulu'dxinë' yödzo Antioquia, ga na' nacu'ë bönni' queë' Cristo, bönni' na' gula'sól-lë'ë légaquië' tsójéngaquië' libán, cate' ni' gula'gu'ë légaquië' lu në'ë Dios, Nu na' ruzá' ladxí' quégaquië' ilunë' xichinë', dxin na' chibudxi gulunë'. ²⁷ Cate' ni' bulu'dxinë' Antioquia, bulu'dubi bönachi queë' Cristo nacuá' ni'. Ní'irö Pablo, en Bernabé bulu'siyönnë' légaquië' ca nácaaga le zxon benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'. ²⁸ Pablo, en Bernabé bulu'gá'analenë' bönachi ni' ta'yéajlë' Cristo zían dza.

15

Tu'dubë' huen dxin queë' Cristo lu yödzo Jerusalén

¹ Ní'irö bal-lë' bönni' narúajgaquië' luyú Judea bila'dxinë' yödzo Antioquia, ate' bulu'sédinë' böchi'ru', bönni' izá'a ni', ta'nnë':

—Channó cabí irugu lu xipéla'li' ca nalébitu' runtu' ca na' gunná bë'ë Moisés, biti' gaca uláli'.

² Ní'irö Pablo, en Bernabé gula'dil-lalenë' légaquië' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lë' bönni' böchi'ru' ni', para tsójaquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula'tapa chi'ë bönachi queë' Cristo ni', para ilu'ilënë' légaquië' didza' ca naca lë ni raca, tu'sédinë' bönni' na' bönachi le nachixi.

³ Ní'irō yugu' bōnni' queē' Cristo nacu'ē Antioquía bulu'gu'ē légaquiē' nōza, ate' gula'dōdē' lu xiyú yōdzō Fenicia, en luyú Samaria, ate' bulu'siyōnnē' bōchi' luzá'aru' yugu' lataj ni' ca guca, bulu'huóáquiē' bōnni' izá'a queē' Cristo. Lē ni ben ga bulu'dzéjanē' yúgu'tē bōchi' luzá'aru' ni'.

⁴ Cate' bila'dxinē' Pablo, en Bernabé lu yōdzō Jerusalén, yugu' bōnni' queē' Cristo nacu'ē ni', enca' yugu' gubáz nasól-lē'ē Lē', en yugu' bōnni' gula tapa chi'ē gulunē' légaquiē' bal. Pablo, en Bernabé bulu'siyōnnē' légaquiē' yúgu'tē le benē' Dios lu ná'agaquiē'. ⁵ Ní'irō gula'zuínē' bal-lē' bōnni' yudo' fariseo, bōnni' ta'yéajlē'ē Cristo, en ta'nnē':

—Run bayudxi irugu lu xipéla'gaquiē' bōnni' izá'a na' ta'yéajlē'ē Cristo, en inná bé'eru' légaquiē' ilunē' ca rnna bē' xibá queē' Moisés.

⁶ Ní'irō bulu'dubē' gubáz nasól-lē'ē Cristo len bōnni' gula tapa chi'ē bōnachi queē', para ulu'chi'a ulu'sörōē' lē ni raca. ⁷ Gudōdi gulu'ē zían didza', guzuínē' Pedro, en gudxē' légaquiē':

—Libi'ili', bōcha'a. Nōz quézili' ca guca dza ni'te, Dios gurō cazē' neda' para guna' libán lógaca bōnachi izá'a para ila'yōni didza' dxi'a, en ila'yéajlē' Cristo. ⁸ Dios, Nu nunbē' caz le yu'u icja ládxi'do'gaca bōnachi, buzóē' le naca bē' runē' légaquiē' bal, gusól-lē'ē Dios Bō' Lá'ayi quégaquiē', ca na' gusól-lē'ē Lē' queēru'. ⁹ Biti' butsé'ē ca benē' quégaquiē', en queēru', en lēsc'a' bunē' dxi'a icja ládxi'do'gaquiē' tu' ta'yéajlē'ē Cristo. ¹⁰ Na'a, zibixz que run leli'-nē' Dios, rusubága'li' yua' xiyéngaca bōchi' luzá'aru'? Yua' ni, le naca le ta'nná bē' xibá queē' Moisés, biti' guca guá'aru' rē'u, en biti' guca ilu'ē xuz xtó'oru' le. ¹¹ Rē'u ni, réajlē'ēru' nuláru' ni'a que le buzá' ládxi'ē Xanru' Jesús queēru', en ca na' nuláru' rē'u, ulu'lē' ca' légaquiē'.

¹² Cate' budxi bē'ē Pedro didza' ni, yúgu'tē' gula'cu'ē dxisō, ate' bulu'zē nágagaquiē' didza' gulu'ē Bernabé, en Pablo. Bulu'siyōnnē' légaquiē' yugu' le taca bē', en le tun ga tu'bani bōnachi, yugu' le benē' Dios lu ná'agaquiē' ga nacuá' bōnachi izá'a. ¹³ Cate' Bernabé, en Pablo budxi gulu'ē didza' ni, bubi'ē didza' Jacobo, gunnē':

—Libi'ili', bōcha'a. Buli'zē nágali' le guá' libi'ili'. ¹⁴ Simón Pedro chigudixjō'i quézinē' rē'u ca benē' Dios, bulu'e lahui yōl-la' huáca queē' le zí'alō luzuí lógaca yugu' bōnachi izá'a para bubéajē' quez queē' bōnachi nútsa'gaca ládjagaquiē'. ¹⁵ Ca naca lē ni rōljōzgaca xtídz'a'gaquiē' bōnni' gulu'ē didza' uláz queē' Dios, ca na' nazúaj lu guichi lá'ayi, rnna:

¹⁶ Dza tōdi lē ni huóda', en uchisa' Nu inná bē', bōnni' na' tsáziē' xilatjē' David.

Guna' ca run nu ruchisa tu yu'u naguinnaj.

Uchisa' ca' bōnachi ila'cuá' lidxē', nupa nagá'anagaca.

Guna' ca run nu ruchisa tu zō'ō yexu'.

Caní uchisa' le gunná bē'ē David

¹⁷ para ulu'guilaj ia'zica'rō bōnachi Xanru'.

Ulu'guilaj bōnachi izá'a Lē',

ate' si' láguequi: Bōnachi Queē' Dios.

¹⁸ Caní rnnē' Xanru',

Nu na' dza ni'te ben ga naca bē' yúgu'tē lē ni.

¹⁹ Que lē ni na' runi neda' bití' ral-la' gun níguiru' bōnachi izá'a, nupa tu'huóaca queē' Dios. ²⁰ Ral-la' uzúajru' lu guichi quégaquiē' ulu'cá'anē' yugu' le bití' ral-la' ilahuē', le nadōdi lógaca budó' guiōj budó' yaga, en cabí ilunē' le ruá' dō', en cabí ilahuē' xipéla'gacaba' bōa' guixi' bití' narúaj-gácaba' rōn, en cabí ilahuē' xichōnba' bití'tēs bōa' guixi'. ²¹ Dza ni'te nacuá' yúgu'tē yōdzō nupa tun libán lu yu'u gapa tu'dubē' bōnni' judío, en tu'sedē' queē' Dios. Tunē' libán ni' que le buzúajē' lu guichi Moisés. Tu'laba cazē' le yugu' dza lá'ayi.

²² Ní'irō gula'yaza ládxi'gaquiē' gubáz nasól-lē'ē Cristo, en bōnni' gula tapa chi'ē, en yúgu'tē bōnachi queē' Cristo, ila'bōē' bal-lē' bōnni' ládjagaquiē', en ila'sól-lē'ē légaquiē' Antioquía. Tsójacalenē' Pablo, en Bernabé. Chopē' na' gula'bōē', légaquiē' Judas, zoa ia'tú lē' Barsabás, enca' Silas. Nácagaquiē' bōnni' lo ládjagaquiē' bōchi'ru' ni'. ²³ Bulu'zúajē' lu guichi le bulu'dōdē' lu ná'agaquiē' ilu'ē, le rnna caní:

“Netu', gubáz nasól-lē'ē Cristo, en bōnni' gula tun chi'ē, en yugu' bōchi'ru', rugápatu' libi'ili' Dios, bōchi'tu', nácali' bōnachi izá'a zóali' Antioquía, en yugu' yōdzō luyú Siria, en Cilicia. ²⁴ Biyōnitu' ca tun bal-la' bōnachi bila'rúaj ga zóatu', nupa na' bití' nasól-la'tu'. Dutsá'agaquiē' libi'ili' len le ta'nnē', en tu'bequi bōniga icja ládxi'do'oli', tu' ta'nná bē'ē irugu lu xipéla'li', en gunli' ca rinná bē' xibá queē' Moisés. ²⁵ Que lē ni na' guyaza ládxi'tu' cate' chibén tuz xtídz'a'tu', gurōtu' chopē' bōnni', nupa isól-la'tu' para uduyúgaquiē' libi'ili'. Guidlengaquiē' Bernabé, en Pablo, nupa na' nadxi'iru'. ²⁶ Chiyōjāquiē' Bernabé, en Pablo gapa guzóa bōnadxi ilátiē' tu' nadxi'iguequinē' Xanru' Jesucristo. ²⁷ Caní naca, risól-la'tu' Judas, en Silas ga zóali'. Chopē' ni ulu'siyōnnē' libi'ili' lē ni ruzúajtu' lu guichi ni. ²⁸ Dios Bō' Lá'ayi bulu'ínē' netu' le raza ládxi'ē, en lēsc'a' caní raza ládxi'tu' netu', bití' usubága'rōtu' libi'ili' yua', le naca le rinná bē' xibá queē' Moisés, pero yugu' lē nisō run bayudxi gunli':

²⁹ Biti' gáguli' le nadödi lógaca budó' guiöj budó' yaga.

Biti' gáguli' rön.

Biti' gáguli' xipéla'gacaba' böa' guixi' biti' narúaj-gácaba' rön.

Biti' gunli' le ruá' dö'.

Channö gun chi'i cuinli' para gunli' ca rnna yugu' lè ni, gunli' dxi'a."

³⁰ Caní guca, yugu' bönni' na' nasöl-l'gaquié' bila'dxiné' Antioquia. Bulu'tubé' bönachi queé' Cristo nacua' ni', ate' gula'gu'è guichi na' lu ná'agaquié'. ³¹ Cate' chibudxi bulu'labé' le, bulu'dzéjané' ca naca le nazúaj lu guichi na', le ruhué tsahui' légaquié'. ³² Tu' nácagaquié' Judas, en Silas bönni' tu'é didza' uláz queé' Dios bulu'hué tsáhué'è légaquié', en bulu'tipé' ládx'gaquié' böchi'ru' ni', bulu'guné' dxin didza' zían le guluf'ilené' légaquié'. ³³ Gudödi bulu'dzéné' Judas, en Silas ni' nababa dza, ní'irö böchi'ru' ni' bulu'zené' légaquié' dxi'a didza' para tsöjhuöajgaquié' Jerusalén ga nacu'è bönni' gula'söl-lé'è légaquié'. ³⁴ Guyaza ládxé'è Silas bugá'ané' Antioquia. ³⁵ Bulu'gá'ané' ca' Pablo, en Bernabé Antioquia na', ate' bulu'sédiné' bönachi, en guluné' libán que xtídzé'è Xanru'. Lésca' caní gulún zíanrö ca' bönachi.

Risí lahué' Pablo röjené' libán le buropi luzuí

³⁶ Gudödi nababa dza Pablo gudxé' Bernabé:

—Uyéajru' leyúbölö tsöjyúgaru'-né' böchi'ru' nacu'è yúgu'té yödzö gapa chiyöjenru' libán que xtídzé'è Xanru', para ilé'eru' nacxi raca quégaquié'.

³⁷ Gú'unné' Bernabé ila'ché'è-bi' bi'i Juan Marcos, tséajlenbi' légaquié', ³⁸ pero bití' guyaza ládxé'è Pablo ila'ché'è-bi' tséajlenbi' légaquié' tu' bulá'alenbi' légaquié' luyú Panfilia, en bití'rö yöjénlenbi' légaquié' dxin queé' Xanru'. ³⁹ Biti' guca tuz xtídzá'gaquié' Bernabé, en Pablo ga bidxinté bulu'lá'alené' tué' ia'tué'. Bernabé guché'è-bi' bi'i Marcos, ate' gula'bené' tu lè'e barco, yójáquié' luyú Chipre. ⁴⁰ Pablo guröé' Silas para tséajlené' lè'. Ní'irö yugu' böchi'ru' gula'gu'è légaquié' lu né'è Xanru', en gula'nábiné' Lè' uzá' ládxé'è quégaquié', ate' bulu'zé'è Pablo, en Silas ni'. ⁴¹ Gula'dödé' yugu' yödzö luyú Siria, en Cilicia, ate' bulu'tipé' ládx'gaca bönachi queé' Cristo nacua' ni'.

16

Bi'i Timoteo runbi' tsözxön Pablo, en Silas

¹ Gudödi ni' bila'dxiné' Pablo, en Silas yödzö Derbe, en yödzö Listra. Zóabi' tu bi'i bönni' ni', réajlé'èbi' Cristo, lébi' Timoteo. Nácabi' zxi'ininu tu nigula judío réajlé'ènu Cristo, pero xúzibi' bití' náquié' judío. ² Yugu' böchi'ru' nacu'è Listra, en Iconio tuné' ba nalí queébi', ta'nné' runbi' le naca dxi'a. ³ Gú'unné' Pablo tséajlenbi' bi'i ni lè', ate' gudélé'è-bi', en guchúguié' lu xipéla'bi' ca tun bönachi judío. Caní bené' para cabí ila'nné' queébi' bönni' judío nacu'è yugu' yödzö ni', tu' nöziguequiné' yúgu'té' xúzibi' bití' náquié' judío. ⁴ Cate' Pablo, en nupa dzágagacalé' gula'dödé' gapa nacua' yödzö ni', tu tu yödzö na' bulu'dödé' lu ná'agaquié' yugu' böchi'ru' nacu'è gapa ni' yugu' xibá na' guluné' gubáz nasöl-lé'è Cristo, en bönni' gula tapa chi'è bönachi queé', nacu'è Jerusalén. Bulu'dödé' yugu' xibá ni lu ná'agaquié' para iluné' ca rinná bē' xibá na'. ⁵ Caní guca, bönachi yúgu'té cō' bönachi queé' Cristo bila'dipa ládx'gaca ca naca le réajlé'èru' Cristo, ate' gula'yán tu tu dza.

Tu bönni' Macedonia ruliidzé' Pablo lu yéla béchigal

⁶ Pablo, en bönni' dzágagacalé' lè' gula'dödé' luyú Frigia, en luyú Galacia, tu' buzágué'è Dios Bö' Lá'ayi xinözgaquié', para cabí iluné' libán que xtídzé'è Xanru' luyú Asia. ⁷ Cate' bila'dxiné' luyú Misia, gulé'ènné' tsöjáquié' luyú Bitinia, pero Dios Bö' Lá'ayi, Nu risöl-lé'è Jesús queéru', bití' bē'è légaquié' lataj. ⁸ Ní'irö gula'dödé' gala' ga dē Misia, ate' yójáquié' yugu' yödzö Troas. Neda' Lucas, ruzúaja' lu guichi lè ni, guzóa' Troas na', ate' yójsalena'-né' Pablo. ⁹ Lu yödzö ni' Dios buluf'iné' Pablo tu le bilé'ené' lu yéla béchigal. Tu bönni' Macedonia buluf'ilahué' lè', zulfé', en ráta'yue' lahué' Pablo, rnné': "Gudödi ladztu', lu xiyú Macedonia, en gúcalen netu'." ¹⁰ Cate' bilé'ené' Pablo lè ni, lè na' buluf'i lahui lè', la' bē' ládx'i'tétu' tséajtu' luyú Macedonia, tu' gúquibe'etu' Dios chibulidzé' netu' tsöjentu' libán que didza' dxi'a lógaca bönachi luyú ni'.

Le guluné' Pablo, en Silas lu yödzö Filipos

¹¹ Ní'irö gurentu' lè'e barco, en buzá'atu' Troas. Gudöditu' lirá ga bidxintu' yödzö Samotracia, ate' gudödi ia'tú dza bidxintu' yödzö Neápolis. ¹² Buzá'atu' ni', ate' bidxintu' Filipos, yödzö na' nácáro lo ca yúgu'té yödzö nabábagaca tsölá'a ni' luyú Macedonia. Lu yödzö ni' yugu' bönni' Roma nucuá'agaquié' bönachi uládz quégaquié'. Lu yödzö nisö guzóatu' nababa dza. ¹³ Cate' bidxin tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönachi yödzö na', en tu'lidza Dios. Gurö'ötu' ni', en busiyöntu' yugu' nigula nudúbigacanu ni' ca naca xtídzé'è Xanru'. ¹⁴ Nútsa'nu ládjagacanu Lidia, tu nigula Tiatira.

Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzé náganu didza' ru'è Pablo, ate' Xanru' gúcalenè-nu para guzxi' lu ná'anu didza' na' bè'è. ¹⁵ Ní'irò bidílanu lènu nisa, ate' gula'dila ca' nisa bônachi nacuá' lídxi'nu. Gudödi ni' gúta'yunu lotu', gunnánu:

—Channö réquibe'eli' réajlè'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

¹⁶ Ia'tú le guca tu dza tsanni ni' zéajtu' ga na' rulidztu'-nè' Dios, birúajbi' dutságabi' tu bi'i nigula netu' yu'u lèbi' bô' le run ga rinné yá'abi'. Len yöl-la' rinné ya'a queébi' runbi' ga ta'zi'dè'è dumí yugu' bônni' xanbi'. ¹⁷ Bi'i nigula ni sudunóbi'-nè' Pablo, en netu', ru'í'bi' zidzaj didza', rnnabi':

—¡Yugu' bônni' ni tuné' xichiné' Dios nayépisètèrè'! ¡Tu'siyönnè' libi'ili' naca gaca uláli'!

¹⁸ Caní benbi' zían dza. Cate' bítirò guyaza ládxi'è Pablo, buécjè', en bulidzé' bô' na' yu'u lèbi', rnnè':

—Lu Lè' Xanru' Jesucristo, rinná bé'eda' li'. ¡Burúaj icja ládxi'do'obi' bi'i nigula ni!

La' ní'sö burúajtè bô' na'.

¹⁹ Cate' bila'lé'enè' xanbi' chiburúaj bô' na' run ga rinné yá'abi', en bítirò naca lóza ila'zi'è dumí ni'a queébi', que lè ni na' gula'zönè' Pablo, en Silas, ate' gula'ché'è légaquiè' lógaquiè' bônni' yúlahui', nudúbigaquiè' ga naca lu yé'eyi. ²⁰ Bulu'cu'è légaquiè' lógaquiè' bônni' yúlahui' na', ta'nnè':

—Yugu' bônni' ni nácaquiè' judío, en tuné' ga tu'tsatsa bônachi yódzö ni. ²¹ Tu'sédinè' le cabí ral-la' si' lu ná'aru', en bítirò ral-la' gunru', tu' nabábaru' Roma.

²² Ní'irò bônachi zían ni' gula'dá'bagá' Pablo, en Silas, ate' yugu' bônni' yúlahui' gula'nná bé'enè' nupa gula'lecja lari' nácaquiè' Pablo, en Silas, ate' gula'guínè' légaquiè' gubá'ayi.

²³ Gudödi gula'guíndè'è légaquiè', gula'gu'è légaquiè' lidxi guíè. Gula'nná bé'enè' bônni' rusayjè' lidxi guíè na' gun chí'idè'è légaquiè'. ²⁴ Bônni' ni, cate' chigula'nná bé'enè' lè' caní, gulu'è légaquiè' lu yu'u lè'e dxi' lidxi guíè na', en gulu'è ní'agaquiè' yeru yaga ta'zön ní'agaquiè'.

²⁵ Idú guluhuèla Pablo, en Silas tu'lidzé' Dios, en tul-lè' yöl-la' ba queé' Dios, ate' ta'yönnè' yugu' bônni' nadzúngaquiè' lidxi guíè na'. ²⁶ Ní'irò tsárido'os gudödi budó' zxu' bach. Caní guca ga bidxintè guzxi'zi xilibi zó'ò lidxi guíè na', ate' la' gula'yáljatè yúgu'tè gapa nu riyaza, ate' bulu'huédxi ca' yugu' du guíè nága'gaca bônni' nadzúngaquiè' ni'. ²⁷ Bubanè' bônni' na' rusayjè' lidxi guíè. Cate' bilé'enè' nayáljagaca gapa nu riyaza lidxi guíè na', gulecjè' guíè tuchi' queé' para guti cuiné', tu' réquinè' chibulu'zxúnnajè' bônni' nadzúngaquiè' lidxi guíè na'. ²⁸ Ní'irò Pablo zidzaj bulidzé' lè', gunné':

—¡Bíti' bi' gúni cuinu', tu' zóatu' ni yúgu'tètu'!

²⁹ Ní'irò bônni' na' gunabè' guí', ate' gudá'atè' lu yu'u lidxi guíè na'. Guzxi'zidè'è lu yöl-la' radxi, ate' biyéchuè' xín'agaquiè' Pablo, en Silas. ³⁰ Cate' chinubéajè' légaquiè' lidxi guíè na', gudxè' légaquiè':

—Libi'ili', bônni', ¿bizxi ral-la' guna' para ulá'?

³¹ Légaquiè' tè' lè':

—Guyéajlè'è Xanru' Jesucristo, ate' uló' li', en lésca' caní ulu'lágaca bônachi nacuá' lidxu'.

³² Gulu'ilenè' lè' didza' ca naca xtídzè'è Xanru', dzágagaca lè' yúgu'tè bônachi nacuá' lidxè'.

³³ La' ná'asö, ni' naca chí'i dzó'ölö la' guchè'tè' légaquiè', ate' yójtibè' légaquiè' ga dxíagaquiè' huè'. Gudödi ni', la' bidílatè' nisa, ate' gula'dila ca' nisa yúgu'tè bônachi nacuá' lidxè'. ³⁴ Ní'irò guchè'è légaquiè' lidxè', en bè'è le gulahuè'. Rudzéjanè' lè', en tu'dzeja ca' yúgu'tè bônachi nacuá' lidxè' tu' ta'yéajlè'è Dios.

³⁵ Cate' za' rení' dza na', yugu' bônni' yúlahui' gula'sól-lè'è ni'a ná'agaquiè', ate' gulé' bônni' na' rusayjè' lidxi guíè:

—Busán-gáquiè' bônni' na'.

³⁶ Ní'irò bônni' na' rusayjè' lidxi guíè gudíxjöi'inè' Pablo didza' ni, gunné':

—Gula'sól-lè'è bônni' yúlahui' didza' usana' libi'ili'. Na'a, guli'rúaj, en buli'huóaj dxí'ado' ga rizóali'.

³⁷ Ní'irò birúajè' Pablo, en gudxè' yugu' ni'a ná'agaquiè' bônni' yúlahui' na', gunné':

—Chigula'guínè' netu' lógaça bônachi sal-la' bítirò narúguini queétu' ca rinná bé' xibá, en gula'gu'è netu' lidxi guíè, ate' netu' ni nabábatu' Roma. ¿Naru' tu'santsè' netu' bagáchi'só? ¡Bíti' ca' gaca! ¡lídígare' légaquiè' udusángaqiè' netu'!

³⁸ Yójhúojgaquiè' ni'a ná'agaquiè' bônni' yúlahui' na', en bulu'siyönnè' yugu' bônni' yúlahui' didza' ni, ate' légaquiè' guládxiné' cate' bila'yönnè' nabábagaqiè' Pablo, en Silas Roma. ³⁹ Cate' bila'dxinè' lidxi guíè ni', guláta'yué' lógaquiè' Pablo, en Silas cabí ulu'subáguè'è légaquiè' xíguia'. Ní'irò gula'béajè' légaquiè' lidxi guíè na', en guláta'yué' lógaquiè' ulu'rúajè' yódzö na'. ⁴⁰ Ní'irò bila'rúajè' Pablo, en Silas lidxi guíè na', ate' gula'yázié' lídxi'nu Lidia. Cate' chibila'lé'enè' bóchi'ru' nacu'è ni', bulu'chízié' didza' icja nágaagaquiè', en la' bulu'zá'atè' ni'.

17

Yugu' bönachi Tesalónica tunë' dzatsa

¹ Gula'dödë' Pablo, en Silas lu yödzo Anfípolis, en lu yödzo Apolonia, ate' bila'dxinë' lu yödzo Tesalónica, ga ni' zoa tu yu'u ga tu'dubë' bönni' judío, en tu'sedë' queë' Dios. ² Bugá'anë' Pablo ni' idú galaj dza, ate' ca run cazë', gуйijë' ga zoa yu'u na' cate' naca dza lá'ayi quëgaquie' bönni' judío, ate' bë'lenë' légaquie' didza'. ³ Buchila lá'anë', en bulu'inë' légaquie' rusëdi le nazúaj lu guichi lá'ayi run bayudxi qui' sáquë'ë Cristo, Bönni' na' tunë' löza bönni' judío udusölë' légaquie', ate' tódi gátie' ubanë' lu yöl-la' guti. Ní'irö Pablo gudxë' légaquie':

—¡Caní guca queë' bönni' na' lë' Jesús, runa' libán queë' ga ni' zóali'! ¡Bönni' ni náquie' Cristo!

⁴ Ní'irö bal-lë' gula'yéajlë'ë Cristo, ate' gulunë' tsözxón Pablo, en Silas. Lësca' caní zían bönni' izá'a, bönni' ta'yéaj ládxi'gaquie' Dios, gula'yéajlë'ë Cristo. Lësca' zían nigula lo gula'yéajlë'ënu Cristo. ⁵ Ní'irö yugu' bönni' judío bití' ta'yéajlë'ë, lu yöl-la' ruzxë'e quëgaquie' Pablo, bulu'tubë' yugu' bönni' bití' nácaquie' tsahui', bönni' ta'dasë' ca'. Cate' chibulu'tubë' bönachi zían, gulunë' ga gulún dzatsa idú lu yödzo na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa. ⁶ Cate' bití' bulu'dzölinë' Pablo, en Silas, gula'béajë' Jasón, en ia'zica'rë' böchi'ru' nacu'ë ni', ate' gula'chë'ë légaquie' lógauquie' bönni' yúlalui'. Gulu'ë zidzaj didza', ta'nnë':

—Yugu' bönni' na' nutsá'gaquie' bönachi iduté yödzo'lió chibila'dxinë' ca' ni'. ⁷ Jasón ni gulu'ë légaquie' lidxë'. Yúgu'të bönni' ni ta'dá'baguë'ë xibá queë' César, bönni' rinná bë'enë' rë'u, ta'nnë': “Zoë' ia'túë' bönni' rinná bë'ë, lë' Jesús.”

⁸ Cate' bila'yönnë' yugu' bönni' lu yödzo, en yugu' bönni' yúlalui' na' lë ni, gula'bö'ë böniga.

⁹ Ní'irö, gudödi gula'zi'ë bönni' yúlalui' dumí le bulu'cá'anagarë' Jasón, en ia'zica'rë' bönni' na', bulu'sanë' légaquie'.

Le gulunë' Pablo, en Silas lu yödzo Berea

¹⁰ Ní'irö yugu' böchi'ru' ni' la' gula'sól-la'të' Pablo, en Silas, ni' naca chi'i dzö'ölö, ate' sôjáquie' yödzo Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sedë' queë' Dios. ¹¹ Gulácarë' tsahui' bönni' ni ca bönni' nacu'ë Tesalónica, tu' gula'zi' lu ná'agaquie' xtídzë'ë Xanru' idú ládxi'gaquie'. Yugu' dza bulu'labë' dxi'a le nazúaj lu guichi lá'ayi, para ilëquibe'enë' channö nácatë lë na' rnnë' Pablo. ¹² Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo. ¹³ Ní'irö cate' gulëquibe'enë' bönni' judío nacu'ë Tesalónica, lësca' riguixjö'ë Pablo xtídzë'ë Dios lu yödzo Berea, yôjáquie' ni', en gulunë' ca' ni' ga gulún dzatsa bönachi zían. ¹⁴ Ní'irö yugu' böchi'ru' ni' la' gula'sól-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yödzo Berea. ¹⁵ Yugu' bönni' Berea na' gula'chë'ë Pablo lu yödzo Atenas. Ní'irö la' yôjhuöjgacatë' lu yödzo Berea, tu'ú'ë xtídzë'ë Pablo, para ilë' Silas, en bi'i Timoteo, tsôjácacatë' ga ni' zoë' Pablo.

Le benë' Pablo lu yödzo Atenas

¹⁶ Tsanni ni' zoë' Pablo ribözë' Silas, en bi'i Timoteo, lu yödzo Atenas, ruhu'ini ládxië' tu' rilë'ë' ta'yéaj ládxi'gaca yúgu'të bönachi yödzo na' yugu' budó' guiöj budó' yaga. ¹⁷ Que lë ni na' bë'lenë' bönni' judío, en bönni' ta'yéaj ládxi'gaquie' Dios didza' ga naca lu yu'u ga tu'dubë' tu'sedë' queë' Dios. Yugu' dza bë'lenë' nupa ta'dá lu yë'ëyi didza' ca naca xtídzë'ë Cristo. ¹⁸ Bal-lë' bönni' dá'gaquie' le tu'sëdinë' bönni' epicúreo, en le tu'sëdinë' bönni' estoico gulu'ilënë' Pablo didza'. Bal-lë' gula'nnë':

—¿Bizxi rë'ënitse' innë' bönni' huë' didza' ni?

Ia'bal-lë' gula'nnë':

—Réquitu' náquie' nu run libán quëgaca dios zi'tu'.

Caní gula'nnë' tu' runë' libán Pablo lógauquie' que didza' dxi'a queë' Jesús, en que yöl-la' rubán. ¹⁹ Ní'irö gula'guélë'ë në'ë Pablo, en gula'chë'ë lë' lu guf'a ga tu'dubë' tu'ë didza', nazí'i le Areópago, ta'nnë':

—¿Naru' huácatsö yónitu' didza' cubi ni rusiyönnu' netu'? ²⁰ Rusiyönnu' netu' le tun ga rubánitu'. Rë'ënitü' inözitu' bizxi rna didza' ni ru'u.

²¹ Bití'ró ta'yaza ládxi'gaquie' ilunë' bönni' Atenas na', en bönni' izá'a nacu'ë ni', pero ila'yónisinë', en ilu'isë' didza' tu le cubi.

²² Ní'irö guzuinë' Pablo gatsaj láhu'i'lö lö'a Areópago na', gunné':

—Bönni' Atenas, yúgu'të le rilë'eda' naca bë' reaj ládxi'da'ali' yugu' dios quëëli'. ²³ Cate' gudöda' lu yödzo, en buyúgaca' yugu' le reaj ládxi'li', yôjxáca'a ca' tu nichu ga ni' nazúaj le rna caní: “Tu Dios, Cuntu Nu Nunbë' Lë'.” Dios na' reaj ládxi'li'-në' sal-la' bití' núnbë'ëli'-në', Dios ni runa' libán queë' loli'.

²⁴ ¡Dios ni benë' yödzo'lió, en yúgu'të le nacuá' yödzo'lió ni! ¡Náquie' Xani yehua' yubá, en Xani luyú ni, en bití' ca' zoë' tu yudo' núngaca bönachi! ²⁵ Bití' bi riyadzaj queë' le gaca

ulu'nödzej bönachi, tu' runödzej' Lë cazë' quégaca yúgu'të bönachi yöl-la' na'bán, en yúgu'të le riquíniru'.

²⁶ Lë benë' tuzë' bönni' ga zá'gaca yúgu'të bönachi izá'a para ila'cuá' idú yödžölió, en bulu'e dza ila'cuá', en gapa ral-la' ila'cuá'. ²⁷ Dios bucu'ë légaquië' para ulu'guiljë' Lë', channö nácati'tës ila'džölinë' Lë' sal-la' ila'gán ila'zönsë'. Cani' raca sal-la' biti' zoë' zi'tu' ga zóaru' tu turu'. ²⁸ Lë cazë' runë' ga zóaru' nabanru', en bi gaca gunru', en le nácaru'. Naca ca na' gula'nnë' bal-lë' bönni' nütša'gaquië' libí'ili', nupa bulu'zúaj le do' rúl-lali', le ta'nná: "Di'a dza queë' Dios nácaru'." ²⁹ Na'a, channö nácaru' di'a dza queë' Dios, biti' ral-la' innaru' náquië' Dios ca tu budó' guió' budó' yaga, o tu le néquini oro, o plata, o guió', le núngaca bönachi ca naca tu le ta'guinnajso ícaguequi. ³⁰ Dios budöë' cá'asó yugu' le gulunë' lu yöl-la' biti' réajni'i quégaquië' yugu' iz chígula'dödi, pero na'a rinná bé'enë' yúgu'të bönachi idútë yödžölió ulu'bí'i ládxi'gaca. ³¹ Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquië' lu në'ë Jesús, bönni' na' buzóa cazë' Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

³² Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula'nnë':

—Yöniguetu' ia'tú lë ni ru'u didza' que.

³³ Ní'irö burúajë' Pablo gatsaj láhui'lö ga na' nacu'ë, söhuöjë'. ³⁴ Bal-lë' gula'yéajlë'ë Cristo, en gulunë' tsözxón Pablo. Nütse'ë Dionisio, bönni' areópago, ládjagaquië', ate' nütša'nu ca' ládjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

18

Le benë' Pablo lu yödžö Corinto

¹ Gudöi guca lë ni, buzë'ë Pablo yödžö Atenas na', ate' guyijë' yödžö Corinto. ² Yöjxáquië' Aquilo, tu bönni' judío ni'. Guljë' bönni' ni luyú Ponto, en si' bidxingazë' yödžö Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödžö Roma. Guyijë' Pablo ga nacu'ë Aquilo, en Priscila na' ³ tu' naca tuz dxin tunë' Aquilo, en Pablo. Bugá'analenë' légaquië', ate' tsözxón gulunë' dxin, tunë' yugu' yu'u guídido'. ⁴ Cate' nácagaca dza lá'ayi quégaquië' bönni' judío, razie' Pablo lu yu'u ga tu'dubë' tu'sëdë' queë' Dios, ga ni' bë'lenë' légaquië' didza'. Gú'unnë' uluf'inë' yugu' bönni' judío, en yugu' bönni' izá'a nacu'ë ni', naca idútë li le riguixjô'ë ca naca queë' Jesucristo.

⁵ Cate' bila'dxinë' Silas, en bi'i Timoteo ni', nuzá'agaquië' luyú Macedonia, nugu'ide'enë' Pablo, runë' libán que xtídzë'ë Dios, en runë' ba nalí lógaquië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusölë' légaquië'.

⁶ Cate' bönni' judío nacu'ë ni' gula'dá'báguë'ë xtídzë'ë, en gula'nnë' zi'ë que, ní'irö Pablo gudxibë' lari' nácuë' para uluf'inë' légaquië' bítirö nabáguë'ë lë' ni'a quégaquië', ate' gudxë' légaquië':

—La' cuínsili' nabága'li' xíguia' que yöl-la' guti queë'li', calëga neda' nabága'a le. Na'a, uyija' ga nacuá' bönachi izá'a.

⁷ Ní'irö burúajë' Pablo ni', en guyijë' lidxë' Justo, bönni' reaj ládxië'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sëdë' queë' Dios. ⁸ Crispo, bönni' lo que yu'u ga na' tu'dubë' tu'sëdë' queë' Dios guyéajlë'ë Xanru' Jesús, ate' dzágagaca lë' yúgu'të bönachi nacuá' lidxë'. Cate' bila'yönnë' xtídzë'ë Dios, zían bönni' Corinto gula'yéajlë'ë Cristo, ate' gula'dilë' nisa. ⁹ Ní'irö Lë cazë' Xanru' gudxë' Pablo lu yëla bëchigal, gunné':

—Biti' gádxinu', en biti' su' dxisö, quíxjô'u xtídzá'a, ¹⁰ tu' zóalen caza' neda' li', ate' cuntú nu uzapa' në'ë lí' para guá' dö' quiu', tu' néquiguequi quia' bönachi zían lu yödžö ni.

¹¹ Bugá'anë' Pablo ni' idú ca tu iz yu' gatsaj, ate' busëdinë' légaquië' xtídzë'ë Dios.

¹² Cate' bidxín dza rinná bë'ë Galión luyú Acaya, guláquië' tuz bönni' judío biti' ta'yéajlë', ate' gula'dá'báguë'ë Pablo, en gula'ché'ë lë' ga rö'ë ruchi'a rusöröë' Galión na'. ¹³ Gulë' Galión na':

—Bönni' ni rigú'u yöl-lë'ë bönachi para ilunë' bal Dios, ca ridá'baga' xibá queë'tu'.

¹⁴ Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguítsaj xibá queë' César, o tu le ruá' dö', guá' ilena' uzë naga' xtídzá'li' ca ral-la' guna', ¹⁵ pero channö naca didza' bizxaj que didza'sö, o que lágaca bönachi, en ca naca xibá queë'zili', guli'cá'ana tsahui' libí'isili', tu' cabí rë'ënda' neda' gaca' nu uchi'a usörö yugu' le caní.

¹⁶ Ní'irö Galión bulágui'ë légaquië' lu yu'u yúlahui'. ¹⁷ Ní'irö yúgu'të bönni' uládz na' gula'guélë'ë Sóstenes, bönni' lo que yu'u ga tu'dubë' bönni' judío, en tu'sëdë' queë' Dios, ate' gula'guiné' lë' lö'a yúlahui', pero biti' bë' ládxië'ë Galión lë na' raca.

¹⁸ Pablo bugá'ané' lu yödzo na' zían dza, ate' gudödi busiyönné' böchi'ru' nacu'ë ni' didza', guyijé' yödzo Cencrea, ga ni' bené' yütusö icjé', tu' dë tu le nazi' lu në'ë lahué' Dios guné'. Ní'irö gurené' tu lë'e barco, para tsejé' luyú Siria, dzágagaquié' lë' Priscila, en Aquilo. ¹⁹ Cate' bila'dxiné' yödzo Éfeso, Pablo bulá'alené' légaquié' ni'. Guyázié' lu yu'u ga tu'dubé' bönni' judío, en tu'sédé' queé' Dios, ate' bé'lené' nupa nacuá' ni' didza'. ²⁰ Yugu' bönni' ni' gulá'ta'yué' lahué' Pablo ugá'analené' légaquié' ia'lati' xidzé, pero lë' bití' gú'unné'. ²¹ Bé'lené' légaquié' didza', gunné':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö gué'ënné' Dios.

Ní'irö gurené' Pablo tu lë'e barco, en buzé'ë Éfeso na'.

Ridxiné' Pablo Antioquia, ate' risí lahué' röjené' libán le bunni luzuí

²² Gudödi bidxiné' Pablo yödzo Cesarea, gurené' guyijé' Jerusalén, ga ni' yöjyúé' bönachi queé' Cristo, ate' ní'irö buzé'ë ni', en guyijé' Antioquia. ²³ Gudödi zoé' ni' nababa dza, buzé'ë ni', sa'yéajé' tu tu yödzo luyú Galacia, en Frigia. Bené' tsutsu böchi'ru' nacu'ë ni' ca naca le ta'yéajlé'ë Cristo.

Runé' libán Apolos lu yödzo Éfeso

²⁴ Tu dza ni' bidxiné' Apolos, tu bönni' judío lu yödzo Éfeso. Guljé' bönni' ni lu yödzo Alejandria, en nabé'ede'ené' ru'ë didza', en nazédadé'ë le nazúaj lu guichi lá'ayi. ²⁵ Chinazédé' bönni' ni ca naca le reájilé'ëru' Xanru'. Idú ládxé'ë bë'ë didza', en ca nácaté busédiné' bönachi ca naca queé' Jesús, sal-la' núnbë'ë tuz le ruquíla bönachi nisa ca bené' Juan. ²⁶ Gusí lahué' Apolos ru'ë didza' idú ládxé'ë ga naca lu yu'u ga tu'dubé' bönni' judío, en tu'sédé' queé' Dios. Cate' Priscila, en Aquilo bila'yönné' didza' ru'ë Apolos na', gula'ché'ë lë' quez, en bulu'zéajni'iróné' lë' xibá queé' Dios. ²⁷ Cate' gú'unné' Apolos tödé' luyú Acaya, bulu'tipé' ládxé'ë, ate' bulu'zúajé' tu lu guichi le tsöjuá'gaquié' quégaquié' bönni' teaj ládxé'ë Cristo luyú Acaya na', para iluné' Apolos na' bal. Cate' bidxiné' Apolos luyú na', yugu' bönni' ni' teaj ládxé'ë Cristo bulu'zídé'ë xibé didza' ru'ë Apolos na', tu ruzá' ládxé'ë Dios quégaquié'. ²⁸ Caní guca, tu' bucul-lé' Apolos na' yugu' bönni' judío ni' lógaca yúgu'té bönachi, tu' buguné' dxin le nazúaj lu guichi lá'ayi, en bulu'e bönni' na' Jesús naca cazé' Cristo.

19

Le bené' Pablo lu yödzo Éfeso

¹ Tsanni ni' zoé' Apolos lu yödzo Corinto, gudödé' Pablo gapa nacuá' yödzo ia'lati' ra'lö, ate' bidxiné' Éfeso. Yöjxáquié' bal-lé' bönni' ta'yéajlé'ë Cristo ni'. ² Pablo gunábiné' légaquié', rnné':

—¿Naru' bidisóalené' Dios Bö' Lá'ayi libí'ili' cate' ni' guyéajlé'ëli' Cristo? Gulé' lë':

—Bití' nayönitú' channö zoé' Dios Bö' Lá'ayi.

³ Ní'irö Pablo gunábiné' légaquié', rnné':

—¿Nacxi guca le bidí'ali' nisa?

Ta'nné':

—Ca buquílé' Juan bönachi nisa.

⁴ Pablo gunné':

—Buquílé' Juan bönachi nisa, nupa ni' bulu'bí'i ládxí'guequi, ate' Juan caz gudxé' léguequi ral-la' ila'yéajlé' Bönni' na' si' zá'télé' ca lë', ate' Bönni' ni naquié' Jesús, Lë' Cristo.

⁵ Cate' yugu' bönni' na' bila'yönné' didza' ni ru'ë Pablo, bila'dilé' nisa tu' chita'yéajlé'ë Xanru' Jesús. ⁶ Cate' guxóá në'ë Pablo légaquié', en ni' rulidzé' Dios, bidisóalené' Dios Bö' Lá'ayi légaquié', ate' gulu'ë didza' yúbölö, en gulu'ë didza' uláz queé' Dios. ⁷ Guláquié' bönni' ni idú chínnué'.

⁸ Guzöé' Pablo idú ca tsonna beo' ni', ate' guyázié' lu yu'u ga tu'dubé' bönni' judío, en tu'sédé' queé' Dios, ate' lu yöl-la' rugu ladxí' bené' libán lógauquié'. Bé'lené' légaquié' didza', en gú'unné' ulufíné' légaquié' nácaté le rigúxjö'ë ca rinná bë'ë Dios. ⁹ Ní'irö bizídi icja ládxí'do'gaquié' bal-lé', en bití' gula'yéajlé'ë Cristo, ate' gula'nné' zi'ë que xtídzé'ë Xanru' ga nacuá' bönachi zían na'. Ní'irö Pablo bulá'alené' légaquié', ate' bubéajé' quez nupa ta'yéajlé' Cristo. Bé'lené' bönachi ni ta'yéajlé' Cristo didza' yugu' dza ga na' tu'dubé' lu yu'u ga rusédiné' Tiranno bönachi. ¹⁰ Caní béntica'sé' Pablo idú ca chopá iz, ate' caní guca, bila'yöni' yúgu'té bönachi didza' ca naca queé' Xanru' Jesús, bönachi nacu'ë yugu' yödzo luyú Asia, bönachi judío, en bönachi izá'a. ¹¹ Dios bené' yugu' yöl-la' huáca zxón lu në'ë Pablo. ¹² Caní guca, bal-lé' bönni' gula'zi'ë yugu' lári'do' bégué'ë icjé' Pablo, en yugu' lari' tsölá'a bugalé' lë'ë, ate' yöjuá'gaquié' léguequi gapa nacuá' nupa te'e, ate' bulu'huóáquié' ca naca yödzhüé' que queégaquié', en bulu'rúaj bö' xihui' yú'ugaca bönachi na'.

¹³ Ní'irō bal-lē' bōnni' judío udá dzaga tu'béajē' bō' xihui' gulē'ennē' ulu'gunē' dxin Lē' Xanru' Jesús para ulu'béajē' yugu' bō' xihui' yú'ugaca bōnachi, ta'nnē':

—Ni'a que Lē' Jesús, Nu na' runē' libán que Pablo, rinná bé'etu' libí'ili' urúajili'.

¹⁴ Caní gulunē' gadxi bōnni' zxi'inē' Esceva, tu bōnni' judío náquiē' bōnni' lo ladjagaquiē' bixúz unná bē'. ¹⁵ Bubí'i didza' bō' xihui' na', gunná:

—Núnbē'a-nē' Jesús, en núnbē'eda' bōnni' lē' Pablo, pero libí'ili', znúxzitē libí'ili'?

¹⁶ Ní'irō guxiti'ē bōnni' na' yu'u lē' bō' xihui', yōjenē' légaquiē' zī', en bucul-lē' yúgu'tē', tu' guxzéqui'rōnē' ca légaquiē'. Caní guca, xiguídigacasē', en huē' gacatēzē' bulu'zxúnnajē' gadxē' bōnni' na' lu yu'u ni'. ¹⁷ Guzé didza' ca guca lē' ni, atē' bila'yōni yúgu'tē' nupa nacua' lu yōdzō Éfeso, bōnachi judío, en bōnachi izá'a, atē' yúgu'tē' guládxinē' Dios. Que lē' ni na' gulunē' zxōn Lē' Xanru' Jesús.

¹⁸ Lēscá' bila'dxinē' zían bōnni' ta'yéajlē'ē Cristo, en gula'xóalēpē' dul-la' nabága'gaquiē', en gula'guixjō'ē le chigulunē'. ¹⁹ Lēscá' caní gulunē' zían bōnni', zí'alō gulunē' yōl-la' udzá'. Dujuá'agaquiē' yugu' guichi udzá' quégaquiē', atē' bulu'zégui'ē léguequi lógaca yúgu'tē' bōnachi. Bulu'labē' tscá nazáca'gaca guichi na', le guca idú chi un mil dumi plata. ²⁰ Caní guca, guzéda' xtidzē'ē Xanru', en bidéli'da' bōnachi zían. Idú lādxí'gaquiē' gula'yéajlē'ē Cristo.

²¹ Gudōdi gulaca lē' ni, benē' queē' Pablo tsejē' Jerusalén, pero zí'alō ral-la' tōdē' yugu' yōdzō luyú Macedonia, en luyú Acaya, atē' gunné':

—Tōdi tseja' Jerusalén, run bayudxi tseja' ca' Roma.

²² Ní'irō gusól-lē'ē-bi' chópabi' bi'i bōnni' tácalenbi' lē', légacabi' Timoteo, en Erasto, luyú Macedonia, pero bugá'anē' lē' nababa dza luyú Asia na'.

Tu'tsatsa bōnachi lu yōdzō Éfeso

²³ Bulu'tsatsa bōnachi Éfeso dza ni', atē' gula'dá'baguē'ē xtidzē'ē Xanru'. ²⁴ Benē' Demetrio, bōnni' gubēdxi guíē plata ga bulu'tsatsē'. Run cazē' yugu' lidxi budó' guíōj budó' yaga néquieguini plata que dios quégaquiē', lēnu Diana. Gula'zī'ē bōnni' tunē' dxin ni dumi bach. ²⁵ Butubē' Demetrio na' ia'zica'rē' bōnni' tunē' la' dxin nisó, atē' gudxē' légaquiē':

—Bōcha'a, nōz quézili' ca naca dxin runru', runna dumi queēru'. ²⁶ Rilē'eli', en riyōnili' ca runē' Pablo na'. Calégasō Éfeso ni, pero idú luyú Asia chibidéli'nē' bōnachi zían, atē' chibutsē'ē ca tunē', tu' rē' légaquiē': "Yúgu le núngaca bōnachi bití' nácagaca dios." ²⁷ Calégasō zoa bōnadxi ugá'ana cá'asó dxin ni runru', pero lēscá' zoa bōnadxi ugá'ana cá'asó yudo' que dios zxōn lēnu Diana. Caní gaca, ugá'ana cá'asó yōl-la' zxōn queēnu, dios ni ta'yéaj lādxí'gaca-nu bōnachi idútē luyú Asia, enca' idútē yōdzólió.

²⁸ Cate' yugu' bōnni' na' bila'yōnnē' didza' ni, gula'léde'enē', atē' gulu'ē zidzaj didza', ta'nnē':

—Nácatērōnu zxōn Diana, dios queēru' rē'u, bōnachi Éfeso.

²⁹ Caní guca, bulu'tsatsa bōnachi idútē lu yōdzō na', atē' guláquiē' tuz, en carelō yōjáquiē' lō'a yúlahui'. Gulá'ayōjē' Gayo, en Aristarco, bōnni' Macedonia tūngaquiē' Pablo tsōzxōn, ga ni'. ³⁰ Cate' gú'nnē' Pablo tsáziē' ga nacua' bōnachi zían na', bití' ca' gulu'ē lē' lataj bōnni' ta'yéajlē'ē Cristo. ³¹ Lēscá' caní gulunē' bal-lē' bōnni' yúlahui' que luyú Asia, bōnni' ta'lē'enē' Pablo dxi'a. Gula'sól-lē'ē queē' nupa guláta'yu lahuē' bití' tsaziē' lō'a yúlahui' na'. ³² Ga ni' tu'tsatsē', en ta'bōdxi'ē, tu le ta'nnē' bal-lē', en ia'tú le ta'nnē' ia'zica'rē', tu' rō'ōgacasē' barōli bōnni' zían na' tu'tsatsē', en lá'tu'biquí' yúgu'tēgaquiē' bití' nōzguequinē' bizz que na' nudúbigaquiē' ni'. ³³ Ní'irō yugu' bōnni' judío gula'béajē' Alejandro ladaj bōnachi zían na', atē' bulu'dxiguē'ē lē' lógaca bōnachi zían na'. Bulu'e Alejandro na' len nē'ē para ila'bō' dxisó, tu' gú'unnē' gu'ē didza' le gácalen yugu' bōnni' judío na' lógaca yúgu'tēguequi. ³⁴ Cate' guléquibē'enē' náquiē' judío, yúgu'tē' gulu'ē tsōzxōn zidzaj didza' idú ca chopa hora, ta'nnē':

—[Nácatērōnu zxōn Diana, dios queēru' rē'u bōnachi Éfeso!]

³⁵ Ní'irō bōnni' uzúaj que yúlahui' benē' ga gula'bō' dxisó bōnachi zían na', gunné':

—Bōnni' Éfeso, nōzigaca yúgu'tē bōnachi zoa yudo' queēnu Diana, dios zxōn, ni. Rē'u ni, bōnachi Éfeso, run chí'iru' yudo' na', enca' budó' na' bōxaj ga zóaru', le birúaj lúxhiba. ³⁶ Cuntu nu gaca tá'baga' lē' ni. Que lē' ni na' run bayudxi sóali' dxisó, en bití' bi' gúntēzili'. ³⁷ Naché'gacali'-nē' bōnni' ni, en bití' ta'banē' le dzō'ō yudo', en bití' ta'nnē' xihuē'ē queēnu dios queēli'. ³⁸ Que lē' ni na', channó zoa didza' bizzaj quégaquiē' Demetrio, en yugu' bōnni' gubēdxi guíē plata nacua'lenē' lē', len nūti'tēs bōnni', dē' lataj ga nu uzē' nagui légaquiē', en zoa nu uchi'a usoró légaquiē'. Ni' huáca ulu'zegui luzá'agaquiē' didza' tuē' ia'tuē'. ³⁹ Na'a, channó dē' ia'tú le inábali', huáca ucá'anaru' tsahui' le cate' ulu'dubi bōnni' yúlahui' ca na' rinná bē' yúlahui'. ⁴⁰ Zoa bōnadxi nu zegui rē'u didza' ni'a que dzatsa ni guca na'a, inná ridá'baga'ru' yúlahui'. Bití' bi' gaca innaru' bizz que guca dzatsa ni.

⁴¹ Cate' budxi bē'ē didza' ni, busól-lē'ē bōnachi zían na' nudúbigaca ni' tsōhuóigaca lidxiguequi.

20

Sa'yéajë' Pablo luyú Macedonia, en luyú Grecia

¹ Cate' gur'ö dxi dzatsa na' guca lu yödzo Éfeso, bulidzë' Pablo yugu' bönni' ta'yéajlë'ë Cristo, ate' guchizië' icja nágaquie' didza'. Gudödi ni' bunidë' légaquie', en la' bulá'alentë' légaquie'. Birúajë' ni', ate' sa'yéajë' luyú Macedonia. ² Gudödë' yugu' yödzo luyú ni', ruzéajni'ide'enë' böchi'ru' nacu'ë ni', ate' gudödi ni' bidxinë' luyú Acaya. ³ Guzöë' Pablo ni' idú ca tsonna beo'. Cate' chizöa cuenë' tu lë'e barco para tsejë' luyú Siria, güquibe'enë' ta'bö' nisie' bönni' judío lë' para ila'zönë' lë'. Que lë ni na' buguelë'ë nöza söhuojë' luyú Macedonia, ate' bidxinë' yödzo Filipos. ⁴ Sópater, xzi'inë' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, söjácalenë' tsözxön lë'. ⁵ Ní'irö yugu' bönni' ni yöjnórugaquie' lahuë' Pablo, yójáquie' yödzo Troas, ga ni' gula'bözë' lë'. ⁶ Lu yödzo Filipos na', neda', Lucas, yöjsaga'-në' Pablo. Cate' chigudödi laní cate' tahuë' bönni' judío yöta xtila biti' nazí'i cúa zi que, gurentu' tu lë'e barco, en buzá'atu' Filipos na'. Gudödi gayu' dza budzá'gatu' bönni' ni' yöjnórugaquie' lahuë' Pablo, yójáquie' Troas, ate' ni' bugá'anatu' gadxi dza.

Le benë' Pablo lu yödzo Troas

⁷ Dza risí lo le gadxi dza bulu'dubë' bönni' ta'yéajlë'ë Cristo para ilahuë' yöta xtila le rusá' ládxi'ru' ca gútië' Jesucristo. Ni' rusédinë' Pablo légaquie', en tu' ral-la' uzë'ë ni' cate' za' rení' dza na', xidzé bë'ë didza', ga bidxintë gudödi guluhuëla. ⁸ Ga ni' nudúbigaquie' naca lu yu'u xitsá', ate' nacuá' zían le ta'gú'u bení' ga na'. ⁹ Zóabi' bi'i Eutico ni', rö'öbi' ga ra'a lení' que yu'u na', ate' nadödirö yëla lobi' tu' ritunna libán runë' Pablo. Ga ni' rö'öbi' rásibi' bi'i na' naca ga bunni cuía lu yu'u, ate' rásisibi' ca' gubíxitëbi', böxjabi' ga bidxintëbi' zxan yu'u. Nátitëbi' bulu'lisë'-bi'. ¹⁰ Bötjë' Pablo zxan yu'u na', ate' yöjxöë' lëbi', en bunidë'-bi'. Ní'irö gudxë' nupa nacuá' ni':

—Biti' gadxi idzöbili'. Nabanbi'.

¹¹ Cate' chibubenë' Pablo xitsá', gudélë'ë yöta xtila, gudahuë'. Ní'irö Pablo bë'lenë' légaquie' didza' ga bidxintë zila balö. Gudödi ni' burúajë' ni'. ¹² Bi'i bönni' ra'bán na' gubíxibi', bulu'ché'ë-bi' nabanbi', en bulu'zi' xzöndë'ë.

Ca guca bidxintu' Mileto

¹³ Gunörutu' lahuë' Pablo, en yöjchentu' tu lë'e barco, ate' gudöditu' ga bidxintu' yödzo Asón para tsöjtsá'gatu'-në' Pablo ni', para gaca ca na' chibén xtídza'tu', tu' gú'unnë' Pablo tsejë' ni' së'si ni'ë. ¹⁴ Cate' chibudzá'gatu'-në' lu yödzo Asón na', gurénlenë' netu' lë'e barco, ate' guyéajtu' yödzo Mitilene. ¹⁵ Buzá' barco ni', ate' dza buropi bidxintu' tödi li ga zoa luyú bidxi nazí'i le Quio, ate' ia'tú dza ca' gudöditu' tödi li ga dë yödzo Samos, en bidxintu' yödzo Trogilio ga ni' guzóatu' tu chí'i. Ia'tú dza ca' bidxintu' yödzo Mileto. ¹⁶ Caní bentu' tu' chibenë' queë' Pablo tödisë' yödzo Éfeso, para cabí tsenë' luyú Asia, tu' run bayudxi soë' Jerusalén cate' naca dza Pentecostés channö séqui'në'.

Didza' bë'ë Pablo lu yödzo Mileto

¹⁷ Cate' ni' zoë' Pablo lu yödzo Mileto, gusöl-lë'ë nu yöjlidza bönni' gula tapa chí'ë bönachi queë' Cristo nacu'ë Éfeso. ¹⁸ Cate' bila'dxinë' ga zoë' Pablo, lë' gudxë' légaquie':

—Libí'ili' chinöz quézili' ca béntica'sa' ga zóali' ga gudela' bidxina' luyú Asia. ¹⁹ Yugu' dza bena' xichinë' Xanru' lu yöl-la' nöxaj ladxí', ga bidxintë gurödxá' ni'a queë'li', ate' zían le guca quia' le guzxi' bë' neda' ni'a que le ruá' dö' gulunë' quia' bönachi judío biti' ta'yéajlë' Cristo. ²⁰ Béntica'sa' libán ga zóali' que yúgu'të le ruzí'ili' xibë, en buséda' libí'ili' yálajdo' ga nudúbili', en gapa naca lu yu'u lídxili'. ²¹ Bena' ba nalí lógaca bönachi judío, en lógaca bönachi izá'a para ulu'bí'i ládxi'gaca, en ulu'huóaca queë' Dios, en ila'yéajlë' Xanru' Jesucristo. ²² Na'a, Dios Bö' Lá'ayi chinunë' quia' tseja' Jerusalén, en biti' nözda' bizxi gaca quia' ni'. ²³ Yúgu'të yödzo ga ridá', riguxjör'inë' Dios Bö' Lá'ayi neda', rë' neda' ila'gu'ë neda' lídxi guié' bönni' judío biti' ta'yéajlë', en ulu'saca' zi'ë neda'. ²⁴ Biti' bi' runi neda' que lë na' gaca, sal-la' gátia' o cabí gátia', pero ruí' ládxi'sida' údxi guna' le chigudéla'a runa', para guna' dxin na' budödë' Xanru' Jesús lu na'a, le naca guna' libán que didza' dxi'a ca naca le ruzá' ládxi'ë Dios queëru'. Caní guna' len yöl-la' rudzeja.

²⁵ Na'a, yúgu'tëli' na' chibena' libán loli' ca rinná bë'ë Dios, nözda' bíti'rö ulé'eli' neda'. ²⁶ Que lë ni na', le nácatë rea' libí'ili' na'a dza. Biti' nabága'a neda' queë'li' nituli' libí'ili'. ²⁷ Biti' bi' bucáchi'da' libí'ili', pero gudíxjör'ida' libí'ili' yúgu'të le rnnë' Dios. ²⁸ Que lë ni na', guli'gún chí'i cuinli', en guli'gún chí'i yúgu'të bönachi queë' Cristo, tu' nuzöë' Dios Bö' Lá'ayi libí'ili' para gácaleni' légaquie', en gun chí'ili' bönachi queë' Xanru', Bönni' na' gútië' uláz quégaquie', bulaljë' xichönë' le böá'uinë' légaquie'. ²⁹ Chinözda', tödi uzá'a ga zóali', ila'yaza nupa ilë'ëni ulu'suniti bönachi queë' Cristo ga zóali', ilunë' ca tunba' bö'cu' guí'a sinía', tu'sunítiba' yugu' bö'cu' xzila'. ³⁰ Ila'ruájë' bönni' nüttsa'gaquie' ládjali', ate' ilu'ë didza'

biti' nácate para ulu'béajë' quégacasë' nupa ta'yéajlë' Cristo nútsa'gaca ládjali'. ³¹ Que lê ni na', guli'sóa ban ladxí, en guli'tsójné ca bena' neda' idú ca tsonna iz, rêla, en tẽ dza buchízia' icja nágalí' tu tuli' ga bidxintë guródxa' queëli'.

³² Na'a, bõchi' luzá'ado', rigü'a libí'ili' lu në'ë Dios. Rinábida' Lê' uzá' ládxë'ë queëli', en gunë' ca rnna xtídzë'ë. Dios gunë' libí'ili' tsutsu, en gunë' ga idéli'li' gunli' tsõzxõn yugu' bõnni' rô queë'. ³³ Catu caz guzë' ládxá'a le nequi quégaquië' bõchi' luzá'a. Biti' guzë' ládxá'a dumí, o lari' quégaquië'. ³⁴ Nõz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'. ³⁵ Ca naca yúgu'të le bena', buluí'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsójneru' didza' bẽ'ë Xanru' Jesús, gunnë': "Uz'irõ xibë nu bi runõdzaj ca nu bi rizí'."

³⁶ Cate' budxi bẽ'ë Pablo didza' ni, buzóa zxibë', ate' benë' tsõzxõn yúgu'të', bulu'lidzë' Dios. ³⁷ Ní'irõ gula'bõdxë' yúgu'të'. Bulu'nidë' yenë' Pablo, en bulu'tsaga lahuë' lê'. ³⁸ Caní gulunë' tu' bulu'huf'innë' ni'a que didza' na' bẽ'ë Pablo, gunnë': "Bíti'rõ ulé'eli' neda'." Yójacalenë' tsõzxõn lê' ga na' gurenë' lu barco.

21

Sa'yéajë' Pablo Jerusalén

¹ Gudõdi bulá'alentu' légaquië', guyú'utë nõza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudõditu' ia'tú lataj nazí'i le Rodas, ate' buzá'atu' ni', en bidxintu' yõdzõ Pátara. ² Yójxáca'tu' tu barco yúbõlõ ni' le zeaj luyú Fenicia. Gurentu' lê'e barco na', ate' guyú'utë nõza. ³ Gudõditu' ga nalá' Chipre, le guta' tsólá'a yõgõla, ate' guyéajtu' luyú Siria, ga ni' guyaza barco na' lu yõdzõ Tiro, tu' ral-la' tsójcá'ana yua' ni' le dzõ'õ lê'e barco na'. ⁴ Lu yõdzõ Tiro na' yójxáca'tu' tu bõnni' réajlë'ë Cristo, ate' bugá'analentu' lê', en yugu' bõchi'ru' ni' idú gadxi dza. Tu' chibulu'inë' Dios Bõ' Lá'ayi légaquië' le ral-la' gaca queë' Pablo, gulë' lê' bití' tsejë' Jerusalén. ⁵ Cate' chibizá'a dza na', burúajtu' ni', ate' gula'zá'lenë' netu' tsõzxõn yúgu'të' len nigula que quégaquië', en yugu' bi'i quégaquië', ga bidxintëtu' níllo ra' yõdzõ ra'. Ra' nísado' ni' buzóa zxibitu', en bulidztu'-në' Dios. ⁶ Budxi bunida' luzá'atu' tutu' ia'tutu', bubentu' lê'e barco, ate' légaquië' yõjhuõjgaquië' lidxigaquië'.

⁷ Buzá'atë barco na' lu yõdzõ Tiro, ate' ga yõjsé bidxin lu yõdzõ Tolemaida. Burúajtu' lê'e barco na' ni'. Bugápatu' Dios bõchi'ru' nacu'ë ni', ate' bugá'analentu' légaquië' tu dza. ⁸ Cate' za' rení' ia'tú dza, burúajë' Pablo ni', ate' dzágatu'-në' netu' guyéajtu' yõdzõ Cesarea. Ní' guyú'utu' lu yu'u lidxë' Felipe, ate' bugá'analentu' lê'. Runë' Felipe na' libán que didza' dxi'a. Bitsë'ë gadxë' bõnni' ni' bulu'cu'ë dza ni'te para ilácalenë' bõnachi queë' Cristo. ⁹ Nacuá'abi' tapa bi'i nigula ra'bán queë' Felipe na', tu'ibi' didza' uláz queë' Dios. ¹⁰ Gudõdi gudzetu' chopa tsonna dza ni', ní'irõ bidxinë' Agabo ni', bõnni' ru'ë didza' uláz queë' Dios, narúajë' luyú Judea. ¹¹ Bõnni' ni buduyüë' netu', ate' gudélë'ë pan le néquini guídí queë' Pablo. Béguë'ë ni'a na' cuinë', en gunnë':

—Caní rnnë' Dios Bõ' Lá'ayi: "Caní ilunë' bõnni' judío nacu'ë Jerusalén. Ilúguië' bõnni' ni nequi queë' pan guídí ni, ate' ulu'dõdë' lê' lu ná'agaca bõnachi izá'a."

¹² Cate' biyõnitu' didza' ni', gúta'yutu' lahuë' Pablo, netu', en nupa nacuá' ni', para cabí tsejë' Jerusalén. ¹³ Bubi'ë didza' Pablo, gunnë':

—¿Bízi ni runli', ribõdxili', en rusuhuf'inili' neda'? Neda' chizó'a caza' sina', calégasõ ilúguië' neda', pero gátia' ca' lu yõdzõ Jerusalén ni'a queë' Xanru' Jesús.

¹⁴ Tu' cabí guzdxë'qui'tu'-në' didza', bítí'rõ bi gúdxitu'-në', ate' gunnatu':

—Gaca ca raza ládxë'ë Xanru'.

¹⁵ Cate' chigula'dõdi dza na', bupa'atu' queëtu', ate' guyéajtu' Jerusalén. ¹⁶ Gula'zá'lenë' netu' bal-lë' bõnni' ta'yéajlë'ë Cristo, nacu'ë Cesarea, ate' dzáguie' Mnasón, tu bõnni' Chipre, légaquië'. Réajlë'ë Cristo dza ni'te, ate' ral-la' tsójgá'anatu' lidxë' bõnni' ni.

Pablo røjyúë' Jacobo

¹⁷ Cate' bidxintu' Jerusalén, len yõl-la' rudzeja quégaquië' bõchi'ru' ni' ta'yéajlë'ë Cristo gulunë' netu' bal. ¹⁸ Dza buropi na' Pablo guyázalenë' netu' lu yu'u, yõjyutu'-në' Jacobo, ate' nudúbigaquië' ni' yúgu'të bõnni' gula tapa chi'ë bõnachi queë' Cristo nacu'ë Jerusalén. ¹⁹ Cate' Pablo chibugapë' légaquië' Dios, busiýõnnë' légaquië' yúgu'të le benë' Dios lu në'ë lê' ga nacuá' bõnachi izá'a. ²⁰ Cate' bila'yõnnë' lê ni, gula'gu'ë Dios yõl-la' ba. Ní'irõ gulë' Pablo:

—Nõz quézinu', bõchi'tu', cate' xõ zían gáyu'ë bõnni' judío ta'yéajlë'ë Cristo, ate' yúgu'të' túndë'ë bal xibá queë' Moisés. ²¹ Chibila'yõnnë' yugu' le tu'í didza' bõnachi le ta'nñë quíu', ta'nna rigü'u yõl-lu'u yúgu'të bõnni' judío nútsa'gaquië' ladaj bõnachi izá'a, para ulu'cá'anë' le gunná bẽ'ë Moisés, en rinná bé'enu' légaquië' bití' ila'chúguië' lu xpëla'gacabi' bi'i bõnni'do' quégaquië', en bití' ilunë' bal yugu' le nalëbiri' runru' rê'u, bõnachi judío. ²² ¿Nacxi caz gunru' na'a? Ulu'rúaj bõnachi zían cate' ila'yõni chibidxinu' ni. ²³ Na'a, ben lê ni rêtu' li'. Nacuá'lenë' netu' ni tapë' bõnni', chinazí' lu ná'agaquië' lahuë' Dios tu le ilunë'.

²⁴ Guchê'ê yugu' bönni' ni, en ben légaquiê' tsözxön gun dxi'a cuinli' ca naca que yudo', en gudizxaj li' le ral-la' ila'guixjê' para ilün yütusö ícjagaquiê'. Ní'irö ila'nözinê' yúgu'tê bönni' judío bití' nácatê lê na' ta'nnê' quiu', pero lësca' li' runu' le naca dxi'a, en runu' ca rinná bê' xibá queê' Moisés. ²⁵ Ca naca quégaca bönachi izá'a, nupa ni' chita'yéajlê' Cristo, chibén xtídza'tu', en buzúajtu' lu guichi ca ral-la' ilunê'. Bití' run bayudxi ilün chí'ê yugu' lê ni tunê' bönni' judío, pero tuz:

Bití' ilahuê' le ta'gú'u bönachi lógaca budó' guiój budó' yaga.

Bití' ilahuê' rön.

Bití' ilahuê' xipêla'gacaba' böa' guixi' bití' narúaj-gácaba' rön.

Bití' ilunê' le ruá' dó'.

Ta'zönê' Pablo lö'a yudo'

²⁶ Ní'irö Pablo guchê'ê queê' tapê' bönni' na', ate' dza buropi ni' ben dxi'a cuinê' tsözxön len légaquiê' ca naca que yudo'. Ní'irö guyáziê' lö'a yudo', para gaca bê' bizxi dza údxi ilunê' le tu'ün dxi'a cúngaquiê', dza ni' ral-la' tsójuá'agaquiê' le ila'gu'ê lahuê' Dios que queégaquiê'. ²⁷ Cate' chizóa izá'a gadxi dza na', bal-lê' judío narúajgaquiê' luyú Asia bila'lé'enê' Pablo, zo'é lö'a yudo'. Gulunê' ga gulún dzatsa bönachi zían, ate' gula'zönê' Pablo. ²⁸ Gulu'ê zidzaj didza', ta'nnê':

—¡Guli'gácalen netu', bönni' Israel! Bönni' ni rusédinê' yúgu'tê bönachi yúgu'tê lataj ulu'cá'ana cá'asö yödzö queéru', en xibá queê' Moisés, en yudo' queéru' ni. Na'a, chigulu'ê yugu' bönni' izá'a lu yudo' ni. Caní runê', run díťjanê' lataj lá'ayi ni.

²⁹ Caní gula'nnê' tu' bila'lé'enê' Pablo zí'alö lu yödzö dzáguíê' Tróximo, bönni' Éfeso, en téquinê' gulu'ê bönni' ni lu yudo'.

³⁰ Caní guca, bulu'dubi yúgu'tê bönachi yödzö, ate' bila'guirê' ni'. Ní'irö gula'zönê' Pablo, en gulá'ayöjê' lê', bulu'béajê' lê' lö'a yudo', ate' la' bulu'sáyjatê' ga nu riyaza lö'a yudo' na'. ³¹ Cate' chitequi quézinê' ilútiê' Pablo, bídxín didza' lahuê' bönni' lo rinná bé'enê' bönni' rójáquiê' gudil-la. Biyönnê' tun dzatsa yúgu'tê bönachi Jerusalén. ³² Bönni' lo ni la' butúbitê' bönni' rójáquiê' gudil-la, len bönni' ta'nná bé'enê' légaquiê', ate' carelô guyéajlenê' légaquiê' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enê' bönni' rójáquiê' gudil-la, en bönni' na' rójáquiê' gudil-la, bulu'sanê' ta'guinê' Pablo. ³³ Ní'irö gubíguí'ê bönni' lo na', en guzxönê' Pablo, ate' gunná bé'enê' bönni' rójáquiê' gudil-la ilúguíê' lê' len chopá du guíê. Gudödi ni' gunábinê' bönachi zían ni', rnnê':

—¿Nuzxi caz bönni' ni, en bizxi benê'?

³⁴ Ta'bödxí'a bönachi zían na', que queégaca ca ta'nná. Caní guca, bití' bi guca tséajni'inê' bönni' lo na', tu' tu'tsatsa bönachi na', ate' gunná bé'enê' bönni' rójáquiê' gudil-la ila'chê'ê Pablo lu yu'u zxön ga nagá'anagaquiê' bönni' na' rójáquiê' gudil-la. ³⁵ Cate' bila'dxinê' ga naca ni'yépi' que yu'u zxön na', bönni' na' rójáquiê' gudil-la gulu'í'inê' Pablo, tu' dxiadi'igaca bönachi zían légaquiê', ³⁶ en zá'gaca cúdzu'lögaquiê', ta'bödxí'a, ta'nná:

—Guli'gútiê'.

Didza' bê'ê Pablo uláz queê' lógaca bönachi

³⁷ Cate' ni' gula'sí lógachiê' ila'gu'ê Pablo lu yu'u zxön ni', lê' gudxê' bönni' lo na' rinná bé'enê' bönni' rójáquiê' gudil-la, gunné':

—¿Naru' gunnu' neda' lataj guía' li' tu didza'?

Bönni' lo na' gudxê' Pablo:

—¿Rácatso' didza' griego? ³⁸ ¿Naru' calêga li' bönni' Egipto na' dza lahui nisö butubê' yugu' bönni' gula'dá'baguê'ê yúlalui', ate' guchê'ê idú choá' gáyú'ê bönni' huêti bönachi lu lataj cá'asö?

³⁹ Ní'irö Pablo gudxê' lê', gunné':

—Le nácatê naca' neda' bönni' judío. Gulja' Tarso, tu yödzö lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

⁴⁰ Bönni' lo na' bê'ê lê' lataj, ate' guzuínê' Pablo ga naca ni'yépi', en guchisa nê'ê para ila'cuá' dxisö bönachi zían ni'. Cate' chigula'cu'ê dxisö, Pablo bê'lenê' légaquiê' didza' lu didza' hebreo.

22

¹ Caní gunné' Pablo:

—Libí'ili', bönni' gula, en libí'ili' böcha'a. Buli'zê nágali' le guía' libí'ili' ca naca le runa'.

² Cate' bila'yönnê' ru'ê didza' hebreo, gula'cuá'arê' dxisö. Pablo gudxê' légaquiê', rnnê':

³ —Naca caza' neda' bönni' judío. Gulja' lu yödzö Tarso luyú Cilicia, pero guzxóna' lu yödzö ni, ate' busédinê' Gamaliel neda' idú ca naca xibá quégaquiê' xuz xtó'oru'. Bê'tica'sö ládxa'a guyéaj ládxa'a Dios ca runli' libí'ili' na'a. ⁴ Zí'alö gudxia ládxi'gaca'-nê' bönni' nazí' lu

na'agaquië' xtídzë'ë Cristo, en guchë'gaca'-në' ga ilátië'. Guzxóngaca'-në', en gulú'ugaca'-në' lidxi guié, yugu' bönni', en nigula. ⁵ Lësca' huáca ilunë' ba nali yugu' bixúz unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yö'u'a ga nacu'ë böchi'ru' judío lu yödzö Damasco. Guyija' ni' para tsöjxóngaca' nupa ni' ta'yéajlë' Cristo, para idichë'gaca'-në' nága'gaquië' Jerusalén ni, para ilácagaquië' xíguia'.

Rigúxjö'ë Pablo ca böáquië' queë' Cristo

⁶ Ní'irö gunné' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsárido'os guyëpi yösa bení' le za' lúxiba, le buzení' ga na' sa'yéaja'. ⁷ La' yöjota'tea' lu yu, en biyönda' chi'i Nu gudxi neda': "Saulo, Saulo, ¿bizx que ribía ládxi'u neda'?" ⁸ Ní'irö gunábida' lë', gunná: "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u." ⁹ Nupa ni' gula'cuá'len neda' bila'lé'e caz bení' na', en guladxi, pero bití' bila'yöni chi'i Nu na' bulidza neda'. ¹⁰ Ní'irö gudxa'-në': "¿Nacxi guna', Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guié' li' ca naca yúgu'të le ral-la' gunu'." ¹¹ Tu' cabirö rilé'eda' tu' budí'i yösa bení' na' guyépida' lahua', que lë ni na' yugu' bönni' dzágagaquië' neda' gula'guélë'ë na'a, ate' gula'chë'ë neda' ga bidxintea' Damasco.

¹² "Zoë' Ananías ni', tu bönni' runë' iduté ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal. ¹³ Bidxinë' Ananías na' ga zoa', en gudxë' neda': "Saulo, böcha'a, huóalaj guió'lo'." La' ní'isö böálaj guió' lahua', ate' bilé'eda' lë'. ¹⁴ Lë' gudxë' neda': "Dios quégaquië' xuz xtó'oru', dza ni'te guró cazë' li' para inözinu' le ré'ëni quézinë' Lë', en ilé'enu'-në' Bönni' Tshui', Lë' cazë' Xzí'inë', en yönnu' le guié' Lë' cazë' li'. ¹⁵ Caní gaca, tu' ral-la' gunu' ba nali queë' Lë' lógaca yúgu'të bönnachi, usiyönnu' légaquië' ca naca le chibilé'enu', en le chibiyönnu'. ¹⁶ Na'a, ¿bizx que ridzenu'? ¡Guyasa, en bidila nisa! Bulidzë' Xanru' para únë' li' dxi'a, en ugüë' dul-la' nabágu'u."

Cristo gusöl-lë'ë Pablo para gunë' libán lógaca bönnachi izá'a

¹⁷ Gunnë' ca' Pablo:

—Gudödi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla bëchigal. ¹⁸ Bilé'eda'-në' Xanru', ate' gudxë' neda': "¡Guyéaj carelöl! ¡Burúajté Jerusalén ni, tu' cabí ilunë' bal bönni' ni le gunu' ba nali quia'!" ¹⁹ Neda' gudxa'-në': "Xan, nözgaca quézinë' ca bena' neda'. Guyázia' gapa naca lu yu'u ga tu'dubë' tu'sédë' bönni' judío queë' Dios. Gudina' nupa ni' ta'yéajlë' Li', en gulú'ugaca'-në' lidxi guié. ²⁰ Cate' ni' gulútië' Esteban, bönni' ni' benë' ba nali quíu', lësca' zoa' neda' ni', en bena' tuz yugu' bönni' gulútië' lë' tu' ben chi'a lari' nácugaquië' bönni' na' bulu'ladxë' lë' guió'." ²¹ Ní'irö Xanru' gudxë' neda': "Guyéaj, tu' risöl-la'a li' lógaca bönnachi izá'a."

Pablo ru'ilenë' bönni' lo didza', bönni' rinná bé'enë' bönni' röjáquië' gudil-la

²² Nisö ze lo yugu' bönni' judío bulu'zé nágaagaquië' didza' bë'ë Pablo, ate' ní'irö gula'bödxí'ë. Gulu'ë zidzaj didza', ta'nnë':

—¡Gulí'gutië' bönni' ni! ¡Bíti'rö ral-la' soë' ibanë'!

²³ Ní'irö tu' ta'bödxí'ë, en ta'chözë' le nácugaquië' lu yö'l-la' rilé' quégaquië', en tu'chejë' bëchtö yu lu bö'ös, ²⁴ bönni' lo na' rinná bé'enë' bönni' röjáquië' gudil-la gunná bë'ë ulu'gu'ë Pablo lu yu'u zxön na'. Lësca' gunná bé'enë' légaquië' ila'guinë' Pablo para quíxjö'ë le nácate, para ila'nözinë' bizx que na' ta'bödxí'ë bönni' judío caní queë' Pablo. ²⁵ Cate' gulúgui'ë lë' du guidi para ila'guinë' lë', Pablo gudxë' tu bönni' nacu'ë lu në'ë bönni' röjáquië' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntu nu buchi'a busörö neda' channö nabága'a xíguia'.

²⁶ Cate' bönni' na' biyönnë' lë ni, guyijë' yöjtíxjö'i'inë' bönni' lo na' rinná bé'enë' bönni' röjáquië' gudil-la. Rë' lë':

—¿Bizxi caz ni runru'? ¡Bönni' ni nababë' Roma!

²⁷ Ní'irö bidë' bönni' lo na' ga zoë' Pablo, en gudxë' lë':

—¡Gudixjö'! ¡Naru' nababu' li' Roma?

Pablo gudxë' lë':

—Ön, nababa'.

²⁸ Bubi'ë didza' bönni' lo na', gunné':

—Neda' ni, dumí zían gudizxa' para ibaba' Roma.

Ní'irö Pablo gudxë' lë':

—Neda' gubaba' Roma cate' ni' gulja' tu' nabábagaquië' xuz xiná'a Roma.

²⁹ Cate' bönni' na' chizóa ila'guinë' lë' bila'yönnë' lë ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunózinë' nababë' Pablo Roma, tu' chigunná bë'ë ilúguië' lë'.

Ridxinë' Pablo lógaquië' bönni' yudo' tu'chi'a tu'söröë'

³⁰ Dza buropi ni', gú'unnë' bönni' lo na' inözinë' gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guié na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröë'. Ní'irö bubéajë' Pablo ga na' nagú'ugaquië' lë', ate' buzóë' lë' lógaquië'.

23

¹ Ní'irö buyúðë' Pablo lógaquië' bönni' yudo' tu'chi'a tu'söröë' na', en gunné':

—Libí'ili', böcha'a. Ga ridxintë na'a riböza' dxf'ado'. Caní naca, biti' zoa le ruxösa ládx'i'da'ahua' neda' lahuë' Dios.

² Ní'irö Ananías, bixúz lo, gunná bé'enë' nupa nacua' cuita lë'ë Pablo ila'gápë'ë ru'ë.

³ Pablo gudxë' lë':

—Lëzca' caní Dios ubi'ë quiu', li', rulu'f'isö tsahui' cuinu'. ¿Naru' rö'ö cazu' ruchi'a rusöröu' neda' ca rinná bë' xibá, pero ridödi bë'tso' ca rinná bë' xibá na', na' rinná bé'enu' ila'gápë'ë neda'?

⁴ Nupa nacua' ni' të Pablo:

—¿Naru' rulidza zi'tso'-në' bixúz lo queë' Dios?

⁵ Pablo gudxë' légaquië':

—Libí'ili', böcha'a. Nazúaj lu guichi, rnna: “Biti' ulidza zi'u nu rinná be'e bönachi uládz quiu'”, pero neda' biti' gúquibe'eda' náquië' bixúz lo.

⁶ Ní'irö gúquibe'enë' Pablo bal-lë' nácaquië' bönni' yudo' saduceo, ate' ia'bal-lë' bönni' yudo' fariseo. Ní'irö bë'ë zidzaj didza' lógaquië' bönni' yudo' tu'chi'a tu'söröë' na', gunné':

—¡Libí'ili', böcha'a! ¡Naca' bönni' fariseo, en naca' zxi'inë' tu bönni' fariseo! ¡Na'a ruchi'a rusöröli' neda' tu' runa' löza ulu'bán nupa chinátigaca!

⁷ Cate' bë'ë Pablo didza' ni, bila'rúajë' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídzë'ë la' légacasë'. ⁸ Caní gulunë' tu' ta'nnë' bönni' saduceo na' biti' ulu'bán nupa chinátigaca, en biti' nacu'ë gubáz lá'ayi, en biti' nacua' bö' náca-gaca caz bönachi, pero ta'yéajlë' bönni' yudo' fariseo náca-gaca yúgu'të lë' ni. ⁹ Que lë' ni na' gula'bödx'ië'. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídzë'ë, ta'nnë':

—Rusáca'tu' queëtu' biti' bi dö' nu'ë bönni' ni. Channö tu bö' naca caz bönachi bé'len lë' didza', o channö tu gubáz lá'ayi queë' Dios bé'lenë' lë' didza', biti' ral-la' tá'baga'ru'-në' Dios.

¹⁰ Cate' chita'dil-lada' dídzë'ë bönni' judío na', gúdxinë' bönni' lo na' rinná bé'enë' bönni' röjáquië' gudil-la, tu' réquinë' ulu'zxuzxaj ulu'quinnajë' Pablo. Ní'irö gunná bé'enë' bönni' röjáquië' gudil-la tsöjléajgaquië' Pablo ladaj bönni' judío na', en ulu'chë'ë lë' lu yu'u' zxön ga na' nagá'anagaquië' bönni' na' röjáquië' gudil-la.

¹¹ Cate' chinaca chi'i dzö'ölö la' dza ná'asö, buluf'i lahuë' Xanru' ga zoë' Pablo, en gudxë' lë':

—Butipa ládxu'u, Pablo. Ca na' chibenu' ba nali quia' Jerusalén ni, lësca' run bayudxi gunu' ba nali quia' lu yödzö Roma.

Tun xtídza'gaquië' ilútië' Pablo

¹² Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nnë' gunë' Dios légaquië' xíguia' channö cabí ilunë' lë' na' gulún xtídza'gaquië', gula'nnë' biti' ca' ilë'aj ilahuë' ga idxinrö chigulútië' Pablo. ¹³ Nayanrö ca choá'gaquië' bönni' na' gulún tsutsu xtídza'gaquië' caní. ¹⁴ Yójáquië' bönni' ni ga nacu'ë yugu' bixúz unná bë', en bönni' gula tu'zéajni'inë' bönachi judío, ate' gula'nnë':

—Chiben tsutsu xtídza'tu', gunnatu' gunë' Dios netu' xíguia' channö cabí guntu' caní. Biti' guí'aj gágutu' ga gútirötu'-në' Pablo. ¹⁵ Na'a, libí'ili', en bönni' yudo' tu'chi'a tu'söröë', guli'guié' bönni' lo rinná bé'enë' bönni' röjáquië' gudil-la idichë'ë Pablo cuxó para idxinë' ga nudúbili', innali' ré'ënili' inábili'-në' Pablo tu didza' gate ga rë'. Netu' có'ö nistu'-në' la' nōza, ate' gútitu'-në' zí'alö ca idxinë' ni.

¹⁶ Biyónibi' bi'i bönni' queënu nigula zanë' Pablo ca na' ila'bö' nísie' Pablo, ate' guyéajbi', en guyú'ubi' yu'u' zxön na', ate' yójtixjoi'ibi'-në' Pablo. ¹⁷ Pablo bulidzë' tuë' bönni' nacu'ë lu në'ë bönni' röjáquië' gudil-la en gudxë' lë':

—Guchë'ë-bi' bi'i ni lahuë' bönni' lo, tu' nuá'abi' didza' guiëbi'-në'.

¹⁸ Ní'irö bönni' na' gudélë'ë-bi', en guchë'ë-bi' ga na' zoë' bönni' lo na', ate' gudxë' lë':

—Bulidzë' Pablo, bönni' na' yu'ë lidxi gufé, neda', en gúta'yuë' lahua' idigu'a-bi' bi'i ni lo', tu' ré'ënibi' gú'ilenbi' li' didza'.

¹⁹ Bönni' lo na' gudélë'ë ná'abi', en guchë'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

²⁰ Lëbi' gúdxibi'-në':

—Chinúngaquiē didza' bönni' judío iláta'yuē' lo' ichē'u-nē' Pablo cuxō, para idxinē' lógaquiē' bönni' yudo' tu'chi'a tu'sörōē'. Ilē' li' tē'ennē' ila'nábinē' lē' tu didza' gate ga rē',²¹ pero bití' tséajlē'u le ila'nnē' tu' nadōdi choá'gaquiē' ila'bō' nísie' Pablo. Chigulún tsutsu xtídzē'ē gula'nnē' gunē' Dios légaquiē' xíguia' channō cabí ilútiē' lē'. Bití' bi ilē'aj ilahuē' ga idxinrō ilútiē' lē'. Chizóagaquiē' ta'bōzē' si' lu no'o gunu' le ila'nábinē' li'.

²² Ní'irō bönni' lo na' rinná bé'enē' bönni' rójáquiē' gudil-la gunná bé'enē'-bi' cuntu nu guíebi' lē' na' chigúdixibi' lē', ate' ní'irō busól-lē'ē-bi' bi'i ni.

Ridxinē' Pablo lahuē' Félix, bönni' rinná bē'ē luyú na'

²³ Ní'irō bönni' lo na' bulidzē' chopē' bönni' nacu'ē tu gáyu'ē bönni' rójáquiē' gudil-la lu ná'agaquiē' tu tuē', ate' gunná bé'enē' légaquiē' ulu'cōzē' chopa gáyu'ē bönni' rójáquiē' gudil-la ta'zē'ē ní'agaquiē', en tsónnalalaj yu' chiē' bönni' rójáquiē' gudil-la dxíagaquiē' bōa', en chopa gáyu'ē bönni' rójáquiē' gudil-la ilu'ē yaga tuchi' para tsójáquiē' yōdzō Cesarea idú ridōdi xtsō'.²⁴ Lēscá' gunná bé'enē' légaquiē' ulu'cōzē'-ba' tu bōa' cuíē'-ba' Pablo, ate' ila'chē'ē lē' dxí'ado', cabí bi gaca queē', para idxinē' lahuē' Félix, bönni' lo rinná bē'ē uláz que Roma.

²⁵ Gusól-lē'ē ca' tu guichi le rnna caní:

²⁶ “Neda', Claudio Lisias, ruzúaja' quiu' lu guichi, bönni' lo unná bē', Félix. Rugapa' Dios li'.

²⁷ 'Bönni' ni risól-la-a-nē' quiu', gula'zōnē' bönni' judío lē', en gulē'ennē' ilútiē' lē'. Cate' gúquibe'eda' nababē' Roma, guchē'gaca-nē' bönni' rójáquiē' gudil-la, en busólá-nē' lu ná'agaquiē' judío na'.²⁸ Gú'unida' inōzda' bizxi benē', lē' na' tu'zéguiē' lē' didza' bönni' judío, ate' guchē'a-nē' lógaquiē' bönni' yudo' tu'chi'a tu'sörōē' légaquiē'.²⁹ Cate' buédxi didza', gunōzda' tu'zéguiē' lē' didza' ca naca le rinná bē' xibá quégaquiē', en bití' bi nabáguē'ē bönni' ni para nu guti lē', o nu cu'u lē' lidxi guíē'.³⁰ Ní'irō cate' bidxin nu gudíxjōi' neda' ta'bō' nísie' yugu' bönni' judío lē', la' gusól-la'tea' lē' ga zu', ate' gunná bē'egacada-nē' bönni' ni tu'zéguiē' lē' didza' ila' dxinē' lo' li', para ila' guíxjōi' inē' li' bi didza' nápaagaquiē' lē'. ¡Dios gun tsáhuē'ē li'!”

³¹ Ní'irō bönni' na' rójáquiē' gudil-la gula'guélē'ē Pablo, en gulunē' ca na' chigunná bé'enē' légaquiē', ate' gula'chē'ē lē' yōdzō Antípatris, ni' naca chi' dzōlō.³² Cate' za' rení' ia'tú dza bönni' rójáquiē' gudil-la ta'zē'ē ní'agaquiē' yōjhuógaquiē' Jerusalén, ate' bönni' rójáquiē' gudil-la dxíagaquiē' bōa' bulu'ú'ē nōza, dzágagaquiē' Pablo.³³ Cate' bönni' na' rójáquiē' gudil-la nachē'gaquiē' Pablo bila' dxinē' Cesarea, bulu'nōdzjē' guichi na' lu nē'ē bönni' rinná bē'ē uláz que Roma, en bulu'sudxinē' Pablo lahuē'.³⁴ Gudōdi bulabē' bönni' unná bē' guichi na', gunábinē' Pablo gazxi bönni' lē'. Cate' gúquibe'enē' nababē' luyú Cilicia,³⁵ gudxē' lē':

—Yōnida' le innó' cate' ila' dxin ni nupa tu'zegui li' didza'.

Ní'irō gunná bé'enē' ilún chi'ē lē' lu yu'u yúlalui' ga ribō'ē Herodes, bönni' rinná bē'ē, para uchi'a usörōē' bōnachí.

24

Pablo ru'ē didza' uláz queē' lahuē' Félix

¹ Cate' chibizá'a gayu' dza, bidxinē' Ananías, bixúz lo, ni', ate' dzágagaquiē' lē' bal-lē' bönni' gula tu'zéajni'inē', en Tértulo, tu bönni' nazē'ede'enē' didza'. Bila' dxinē' lahuē' bönni' unná bē', ate' gula'nnē' queē' Pablo.² Cate' chibulu'lidzē' Pablo, ate' bidxinē' ni', gusí lahuē' Tértulo ruzégui'ē lē' didza', rnnē':

—Bönni' lo unná bē', Félix. Ní'a quiu' li' ruzi'tu' xibé le run tsahui' netu', ate' lu yöl-la' réajni' quiu' rinná bé'enu' dxí'a bōnachi uládz queētu'.³ Yúgu'tē lē' ni ruzí'tica'stu' xibé gátí'tēs, ate' idú ládxi'tu' rētu' li': “Xclenu'.”⁴ Na'a, para cabí upízjarōtu' li', ráta'yua' lo' gun zxón ládxi'u, yōnnu' tu le do' guíētu' li'.⁵ Gúquibe'etu' bönni' ni rigú'u yöl-lē'ē bōnachi, en runē' ga ta'dá'baguē'ē yúlalui' yugu' bönni' judío nacu'ē idútē yōdzólíō, en náquiē' bönni' lo quégaquiē' bönni' dá'gaquiē' bönni' Nazaret na'.⁶ Lēscá' gú'unnē' gun dítanē' yudo' queētu'. Que lē' ni na' guzzōntu'-nē', en gú'unítu' uchi'a usörōtu' lē' ca naca xibá queētu'.⁷ Ní'irō Lisias, bönni' lo rinná bé'enē' bönni' rójáquiē' gudil-la bidxinē' ga zóatu', en lu yöl-la' sínia' zxón bugúē' bönni' ni lu na'tu'.⁸ Ní'irō gunná bé'enē' Lisias na' idígaca nupa tu'zegui lē' didza' lo' li'. Na'a, li' caz, cate' rinabi yúdxinu'-nē' Pablo ni, huáca inózinu' gate ga rē' yúgu'tē lē' ni ruzéguitu' lē' didza'.

⁹ Lēscá' caní gula'nnē' yugu' bönni' judío ni', gula'nnē' naca caz caní.¹⁰ Ní'irō butásō nē'ē bönni' rinná bē'ē uláz que Roma na' para gu'ē didza' Pablo, ate' lē' bubi'ē didza', gunné':

—Idú ládxa'a quíxjō'a ca naca le runa', tu' chinaca zían iz ruchi'a rusörōu' le raca quégaca bōnachi ladtzu'.¹¹ Le bena' huáca inabu'. Bití' réquini chinnu dza bidxina' Jerusalén para tseaj ládxa'a-nē' Dios.¹² Bití' yōjxáca'gaquiē' neda' nu ridíl-lalena' didza', en bití' bena' ga ulu' tsatsa bōnachi ga naca chila yudo', en cabí lu yu'u ga tu'dubē' tu'sédē' queē' Dios, en cabí lu yōdzō.¹³ Bití' ca' gaca ulu'béaj liē' yugu' lē' ni tu'zéguiē' neda' didza'.¹⁴ Lē' ni rixóalēpa' lo'. Ca runa' xichinē' Dios quégaquiē' xuz xtó'otu' nalēbi ca le tu'sédinē' légaquiē', pero

bönni' judío ni tu'è le: Le ridá'baga' Dios, tu' réajlë'a yúgu'të le rinná bë' xibá queë' Dios, enca' yúgu'të le bulu'zúajë' bönni' gulu'ë didza' uláz queë' Dios. ¹⁵ Ca na' légaquie' tunë' löza Dios, lësa' neda' runa' löza Dios, usubanë' nupa chinátigaca, bönachi tsahui', en bönachi biti' náacagaca tsahui'. ¹⁶ Que lë ni na' ru'i' ládxi'tica'sa' cabí ibága'a le gun ga uxóš ládxi'da'ahua' neda' lahuë' Dios o lógaca bönachi.

¹⁷ 'Gudódi zoa' ga yúbölö idú chopa tsonna iz, budxina' ga nacua' bönachi uláz quia' para unödza' dumí le gácalen bönachi yechi', en unödza' le rigu'a lahuë' Dios. ¹⁸ Tsanni ni' runa' caní, bal-lë' bönni' judío narúajgaquie' luyú Asia bidixáca'gaquie' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönachi zían, en cabí nuna' ga ulu'tsatsa bönachi. ¹⁹ Yugu' bönni' judío ni' ral-la' ila'dxinë' lo' li', en ulu'zéguië' neda' didza' channö nápagauie' neda' didza'. ²⁰ Ila'nnátsöquie' bönni' judío ni channö bulu'dzölinë' bi le cabí naca dxi'a bena' cate' ni' bidxina' lógauie' bönni' yudo' tu'chi'a tu'söröë' légaquie'. ²¹ Tuz cate' ni' zoa' lógauie', bë'a zidzaj didza', gunná: "Ruchi'a rusöröli' neda' na'a tu' runa' löza ulu'bán nupa chinátigaca."

²² Cate' biyönnë' Félix didza' ni, en dxi'ado' chinözinë' ca naca que lë na' rusëdinë' Pablo, buzë láhui'së' ca' didza' bizxaj ni, gunné:

—Catí' idxinë' Lisias, bönni' lo rinná bë'enë' bönni' rójáquie' gudil-la, údxi yónida' ca naca didza' bizxaj queéli'.

²³ Ní'irö Félix gunná bë'enë' tu bönni' nacu'ë lu në'ë bönni' rójáquie' gudil-la zoë' ni', gun chi'ë Pablo, pero gu'ë lë' lataj të' lö'a, en biti' uzáguë'ë xinözgaquie' böchi' luzë'ë duyúgaquie' lë' bi dxin ilunë' queë'.

²⁴ Chopa tsonna dza gudzé, bidë' leyúbölö Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzë náguië' xtídzë'ë ca naca le réajlë'ëru' Jesucristo. ²⁵ Cate' bë'ë didza' Pablo ca ral-la' gácaru' tsahui', en inná bë'e cuinru', ate' idxinru' ga uchi'a usöröë' Dios rë'u dza si' za', ní'irö gudxi bidzöbinë' Félix, en gudxë' Pablo: —Guyéaj na'a. Cate' gapa' lataj ulidza' li'.

²⁶ Lësa' gú'unnë' Félix si'ë dumí le unödzejë' Pablo lë' para usanë' lë', ate' que lë ni na', zían luzui bulidzë' Pablo, en bë'lenë' lë' didza'. ²⁷ Cate' bizá'a chopa iz guyázie' Porcio Festo xilatjë' Félix, ate' tu' gú'unnë' Félix gunë' le tsaza ládxi'gaquie' bönni' judío, bucá'anë' Pablo nadzunë' lidxi guë'.

25

Ridxinë' Pablo lahuë' Festo, bönni' unná bë'

¹ Bidxinë' Festo yödöz Cesarea para tsázië' xilatjë', gáquie' bönni' unná bë' ulaz que Roma. Cate' bizá'a tsonna dza buzë'ë yödöz na', sa'yéajë' Jerusalén. ² Cate' bidxinë' Festo ni' yugu' bixúz unná bë', en yugu' bönni' lo quégaca bönachi judío bila'dxinë' lahuë' para ila'nnë' queë' Pablo, ate' guláta'yuë' lahuë' Festo ³ bi uzá' ládxi'ë quégaquie', isöl-lë'ë nupa tsöjxi'gaca Pablo, para udxinë' Jerusalén. Gulë'ënnë' ila'bö' nísie' lë' la' nöza para ilútië' lë'. ⁴ Bubi'ë didza' Festo, gudxë' légaquie':

—Lu yödöz Cesarea nadzunë' Pablo, ate' ral-la' tseja' ni' cuxö huidzaj nisö. ⁵ Que lë ni na', nútí'tëslöli' dë lu ná'ali', ral-la' sá'lenli' neda', en channö nabáguë'ë bönni' ni' xíguia', huáca uzéguii'-'në' didza' ni'.

⁶ Gudzenë' Festo Jerusalén idú ca xunu' gubidza, ate' ní'irö böajë' Cesarea. Cate' guzá' rení' ia'tú dza gurö'ë ga ruchi'a rusöröë', en gunná bë'enë' nupa tsöjxi'gaca Pablo. ⁷ Cate' chibidxinë' Pablo ni', yugu' bönni' judío narúajgaquie' Jerusalén gula'gu'ë lë' lë'alö, en zían le gula'nnë' queë'. Bulu'zéguië' lë' le tu'subáguë'ë lë' xíguia', pero biti' guca ulu'béaj lië' yugu' lë na' gula'nnë' queë'. ⁸ Ní'irö bë'ë didza' Pablo uláz queë', gunné:

—Bití' bi le ruá' dö' bena' que xibá quégaquie' bönni' judío, en cabí que yudo' quégaquie', en cabí queë' César, bönni' Roma, rinná bë'enë' rë'u.

⁹ Gú'unnë' Festo gunë' le ila'yaza ládxi'gaquie' bönni' judío, ate' bubi'ë didza', gudxë' Pablo:

—¿Rë'ënu' so'o Jerusalén, ga na' soa nu uchi'a usörö li' ca náacagaca lë ni ta'nnë' quiu'?

¹⁰ Bubi'ë didza' Pablo, gudxë' lë':

—Zoa caza' ga rö'ö nu ruchi'a rusörö uláz queë' César, ga na' ral-la' uchi'a usöröu' neda'. Bití' bi huiá' dö' nuna' quégaquie' bönni' judío, ate' chinöz quézinu' lë ni. ¹¹ La'tu' nuna' tu le ruá' dö', o biti'tës le run ga ibága'a xíguia' gátia', biti' tá'baga'a gátia'. Na'a, channö cabí nuna' ca ta'nnë' quia' bönni' ni, cuntú caz nu dë lu në'e udödi neda' lu ná'agaquie'. Rinaba' tseja' lahuë' César ga udxí'a urö quia'.

¹² Cate' Festo chibë'lenë' yugu' bönni' yúlahui' didza', bubi'ë didza', gudxë' Pablo:

—Chigunábu' tsejü' lahuë' César. Lahué' César uyiju'.

Ru'ë didza' Pablo lahuë' Agripa, bönni' unná bë'

¹³ Gudödi chopa tsonna dza, bidxinë' Agripa, bönni' rinná bè'è lu yödzo Cesarea, dzáganu Berenice lè', duyúgaquie' Festo. ¹⁴ Cate' chigula'cu'è ni' zían dza, Festo buluf'inë' Agripa, bönni' rinná bè'è, ca naca queë' Pablo. Gudxë' lè':

—Zoë' tu bönni' ni bucá'anë' Félix lè' lidxi guie'. ¹⁵ Cate' guzóa' Jerusalén, yugu' bixúz unná bè', en bönni' gula tu zéajni'inë', bila dxinë' lahua', ate' gula nnë' queë' bönni' ni. Gula'nábinë' neda' ichuga' queë' gátië'. ¹⁶ Neda' bubi'a didza', gudxa' légaquie' biti' nalébiguequinë' bönni' Roma ila'chúguie' queë' tu bönni' gátië' channö cabí ila'dxini lahuë' nupa tu zegui lè' didza', para gaca ubi'è didza' ca naca lè na' ta'nnë' queë'. ¹⁷ Que lè ni na', cate' bila'dxinë' légaquie' ni, biti' ca' gudzedá', pero cate' guzá' guyeani' ia'tú dza guró'a ga ruchi'a rusöró'a', ate' gunná bé'eda' nupa yójxí'gaca bönni' ni. ¹⁸ Cate' gula'cu'è ni bönni' na' tu'zéguië' lè' didza', biti' bi gula'nnë' queë' ca busaca' quia' ila'nnë'. ¹⁹ Gula'nnë' queë' bal-la didza' bizxaj ca naca le ta'yéajlë'è Dios, en ca naca queë' tu bönni' lè' Jesús, nu na' guti, pero Pablo runë' tsutsu xtídzë'è rnnë' ni zoë' nabanë' leyúbölö. ²⁰ Tu' buchixida' ca nácagaca lè ni, gunábida'-në' Pablo channö rë'në' tsejë' Jerusalén, ga ni' soa nu uchi'a usörö lè' ca nácagaca lè ni. ²¹ Ní'irö cate' gunabë' Pablo tsejë' lahuë' Augusto César para uchi'a usöröë' lè' ni', gunná bé'eda' bönni' röjáquie' gudil-la ilún chí'igarë' lè' cate' gála'rö dza isöl-la'a-në' lahuë' César.

²² Ní'irö Agripa gudxë' Festo na':

—Lézca' neda' rë'ënda' yónida' le innë' bönni' na'.

Festo gudxë' lè':

—Cuxö yönnu' le innë'.

²³ Cate' za' reni' ia'tú dza, len ba zxön bila'dxinë' Agripa, en Berenice ni'. Gula'yázië' ga ral-la' ilu'è didza', dzágagaquie' légaquie' bönni' unná bè', ate' gula'sól-lë'è nupa tsójxí'gaca Pablo. ²⁴ Ní'irö Festo gudxë' Agripa, bönni' unná bè':

—Bönni' unná bè', Agripa, en yúgu'téli' zóali' ni tsözxön len netu'. Ni zoë' rilé'eli'-në' bönni' na', ta'nnë' queë' yúgu'të bönni' judío nacu'è Jerusalén, enca' nupa nacuá' ni, tē' neda' ral-la' gátië'. ²⁵ Runi neda' biti' bi benë' le nabáguë'è xíguia' gátië', pero tu' gunabë' lè cazë' tsejë' ga uchi'a usöröë' Augusto César lè', que lè ni na' chinuna' quia' isöl-la-a-në' lahuë' Augusto. ²⁶ Tu' cabí nózda' bi ral-la' uzúaja' lu guichi le uzegui bönni' ni didza' para isöl-la'a lu nē'è César, xana', que lè ni na' nachë'a-në' loli', en le nácáro lo, nachë'a-në' lo' li', Agripa, bönni' unná bè', para cate' údxi rinábini yudxu'-në', ní'irö inózda' bi ral-la' uzúaja' lu guichi ca naca queë' bönni' ni. ²⁷ Réquida' biti' naca dxi'a isöl-la-a-në' nu bönni' náguë'è ni' channö cabí gaca ulu'a le nabáguë'è.

26

Didza' bè'è Pablo uláz queë' lahuë' Agripa, bönni' unná bè'

¹ Ní'irö Agripa gudxë' Pablo:

—Dë lataj gu'u didza' uláz quiu'.

Buchila nē'è Pablo lahuë' Agripa, ate' gusí lahuë' ru'è didza', rnnë':

² —Bönni' unná bè', Agripa. Raza ládxa'a tu' dë lataj na'a gu'a didza' uláz quia' lo' li' ca naca yúgu'të le tu'zéguië' bönni' judío neda' didza'. ³ Raza ládxi'ra' tu' núnbë'u yúgu'të le nalébiguequinë' tunë' bönni' judío, enca' yugu' lè ni ridil-latu' didza'.

Yugu' le benë' Pablo zí'atëlö

⁴ Gunnë' ca' Pablo:

—Nözguequi quézinë' yúgu'të bönni' judío ca na' bena' ga gudéla'të cuidia' ga nacuá' bönachi uláz quia', enca' lu yödzo Jerusalén. ⁵ Nözguequi quézinë' ca', en huáca ila'guíxjö'è ca na' bena' dza ni'te. Guca' bönni' fariseo. Yugu' bönni' fariseo tui'í ládxi'gacarë' ila'yéaj ládxi'gaquie' Dios ca tunë' ia'zica'rë' bönni' judío. ⁶ Na'a, zoa' ni loli' para nu uchi'a usörö neda' tu' runa' löza Dios, usubanë' bönni' nati, en gunë' ca na' guzxi' lu nē'è légaquie' xuz xtó'otu'. ⁷ Tunë' löza yugu' bönni' idxinnu cö' di'a dza queëtu' ila'déli'në' lè na' guzxi' lu nē'è Dios. Que lè ni na' ta'yéaj ládxi'gaquie' Dios, en tunë' xichinë' rëla, en tē dza. Tu' runa' löza lè ni, nuzéguigaquie' bönni' judío neda'. Caní naca, bönni' unná bè', Agripa. ⁸ Na'a, ¿naru' réquitseli' libí'ili' biti' naca le tséajlë'ëru', usubanë' Dios bönni' nati?

Pablo gudxía ládxi'è bönachi queë' Cristo

⁹ Gunnë' ca' Pablo:

—Lézca' neda', zí'atëlö gúquida' le zían ral-la' guna', tá'baga'a-në' Jesús, bönni' Nazaret. ¹⁰ Caní bena' lu yödzo Jerusalén. Gulu'a zían bönachi ta'yéajlë' Jesús lidxi guie', tu' bulu'dödë' yugu' bixúz unná bè' lu na'a yöl-la' unná bè'. Cate' gulutië' bönachi ni', bénlena' légaquie' tuz didza'. ¹¹ Zían luzuí busaca' zí'a yugu' bönni' ni' para ulu'sán ládxi'gaquie' ca ta'yéajlë'è Cristo. Caní bena' gapa naca lu yu'u ga tu'dubë' bönni' judío, en tu'sédë' queë' Dios. Guléde'eda' légaquie', ate' gudxía ládxa'a légaquie' ga bidxintë guyija' gapa nacuá' yödzo zítu' para tsójxöngaca'-në'.

Rigúxjö'ë Pablo ca böáquië' queë' Cristo

¹² Gunnë' ca' Pablo:

—Para guna' caní guyija' yödzo Damasco, ate' bixúz unná bë' nasöl-la'gaquië' neda' nudödigaquië' lu na'a yöl-la' unná bë'. ¹³ Caní guca, bönni' unná bë', Agripa. Cate' ni' sa'yija' la' nöza, ni' naca idú huagubidza, bilé'eda' tu bení' lúxiba le buzení'rö ca gubidza. Buzení' ga na' zoa', en ga nacuá' nupa sôjácálen neda'. ¹⁴ Ní'irö yúgu'tëtu' gudzö'ötu' lu yu, ate' biyönda' chi'i nu bulidza neda'. Bë'ë didza' hebreo, gunné': "Saulo, Saulo, ¿bixz que ribía ládxu'u neda'? Run zi' cuinu', ridá'bagu'u neda'. Raca quiu' ca raca queëba' bédxi, run zi' cuinba', richégu'ba' yaga tuchi' le túndë'ë-ba' zi'." ¹⁵ Ní'irö gudxa'-në': "¿Nuzxi li', Xan?" Xanru' gudxë' neda': "Neda' ni Jesús, Nu na' ribía ládxu'u. ¹⁶ Na'a, guyasa, en guzuí, tu' bulufi' lahua' li' na'a, para uzó'a' li' gunu' xichina', en gunu' ba nali' que lë ni chibilé'enu', enca' quégaca le uluf'ida' li', ulufi' lahua' ga zu'. ¹⁷ Usölá' li' lu ná'agaquië' bönni' uládz quiu', en lu ná'agaquië' bönni' izá'a, lógaca nupa ni' risöl-la'a li' na'a. ¹⁸ Risöl-la'a li' ga na' nacu'ë para gunu' ga ulu'huóálaj guiöj lógaquië', en ulu'huóáquië' queë' Dios, en ulu'ca'anë' le naca chul-la' que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yazië' lu në'ë Dios. Channö ila'yéajlë'ë neda', Dios uniti lahuë' légaquië', en ugüë' dul-la' nabága'gaquië', ate' ila'déli'në' ila'bábalenë' bönachi chinubéajë' Dios quez queë'."

Benë' Pablo ca naca le buluf'inë' Xanru' lë'

¹⁹ Gunnë' ca' Pablo:

—Qui lë ni na', bönni' unná bë', Agripa, bití' gudá'baga'a guna' le buluf'inë' Dios, zoë' yehua' yubá, neda'. ²⁰ Buzéajni'ida' nupa nacuá' yödzo Damasco, en gudödi ni' nupa nacuá' Jerusalén, en nupa nacuá' luyú Judea, en bönachi yugu' yödzo zi'tu' para ulu'bí'i ládxi'gaca, en ulu'huóáca queë' Dios, en ilún le ilaca bë' chibulu'bí'i ládxi'gaca. ²¹ Tu' bena' caní, yugu' bönni' judío gula'zönë' neda' cate' ni' zoa' lö'a yudo', en gulë'ënnë' ilútië' neda'. ²² Ní'irö gúcalenë' Dios neda', ate' ga ridxintë' na'a dza zoa' idú ládxa'a, runa' ba nali' lógaquië' bönni' cá'asö, en lógaquië' bönni' lo. Bití' ruá'a didza' yúbölö, pero ca gula'nnasë' zí'alö bönni' gulu'ë didza' uláz queë' Dios, enca' ca gunné' Moisés ca ral-la' gaca. ²³ Gula'nnë': "Qui'í sáqué'ë Cristo, en tödi gátië', gáquië' nu isí lo ubán tsaz lu yöl-la' guti, para ulu'ë lahui naca löza ila'dxin bönachi lataj bení', en gaca libán que lë ni lógaca bönachi uládz queëtu', enca' lógaca bönachi izá'a."

Pablo ruzéajni'inë' Agripa para tséajlë'ë Cristo

²⁴ Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunné':

—¡Nachixi icju', Pablo! ¡Tu' nazédado'o, chiguchixi icju'!

²⁵ Ní'irö Pablo gudxë' lë':

—Bití' nachixi icja', rea' li', Festo, ate' didza' ni ruá'a naca idútë li, en naca lesaca'. ²⁶ Lë cazë' Agripa, bönni' ni rinná bë'ë, nözinë' yugu' lë ni, en que lë ni na', idú ládxa'a ruá'a didza' lahuë' lë'. Nözinë' yugu' lë ni, tu' cabí guca bagáchi'sö lë na' guca. ²⁷ Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

²⁸ Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

²⁹ Pablo gudxë' lë':

—Ni'a queë' Xanru' Dios rë'ënda', sal-la' ia'láti'sö o yenni', calégasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero calëga gága'li' du guíë ca ni nága'a neda'.

³⁰ Cate' budxi bë'ë Pablo didza' ni, guzuínë' bönni' lo unná bë' na', ate' gulazuínë' ca' bönni' rinná bë'ë, en Berenice, en nupa rölengaca légaquië'. ³¹ Cate' bila'rúajë' quez, gulu'í xtídza'gaquië', ta'nnë':

—Bití' bi nunë' bönni' ni le nabáguë'ë xíguia' gátië', en calëga tsázië' lidxi guíë.

³² Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

27

Ta'söl-lë'ë Pablo yödzo Roma

¹ Cate' chigulunë' quégaquië' ila'söl-lë'ë netu' lë'e barco para tséajtu' yödzo Roma, luyú Italia, gula'guélë'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bë'enë' tu cö' bönni' rójáquië' gudil-la nazí'ile: Bönni' Queë' Augusto Rójáquië' Gudil-la. ² Gurentu' tu lë'e barco que luyú Adramitio, le ral-la' tödi yugu' yödzo gapa ta'dxin barco ga naca luyú Asia, ate' yú'usötu' ca' lë'e barco na', buzá'atu' yödzo Cesarea. Aristarco, tu bönni' yödzo Tesalónica, le nababa luyú Macedonia dzáguíë' netu'. ³ Cate' za' rení' ia'tú dza, bidxintu' yödzo Sidón, ate' ni' Julio, bönni' na' rinná bë'enë' bönni' rójáquië' gudil-la, lu yöl-la'

dxi'i ladxí' queé', bē'ē Pablo lataj tsejē' ga nacu'ē bōchi' luzē'ē para ilácalenē' lē' bi riyadzaj queé'. ⁴ Gudōdi nī', bubentu' lē'e barco, ate' buzá'atu' nī'. Gudōditu' tsōlá'a ga dē luyú bidxi Chipre ga rō'ō dxi bō' na' recja, tu' za' saca' lotu' bō' recja lu nísado' na'. ⁵ Ní'irō gudōditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yōdzō nababa luyú Licia.

⁶ Bōnni' na' rinná bē'enē' bōnni' rōjāquiē' gudil-la, en nachē'ē netu', yōjxāquiē' tu barco nī' narúaj yōdzō Alejandría que luyú Egipto, barco na' zeaj luyú Italia ga rō' yōdzō Roma. Gulu'ē netu' lē'e barco na'. ⁷ Guzā' barco na' tsahui' lādxí'do' zían dza, ate' len yōl-la' rizáca'sō bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bō' na' recja, gudōditu' tsōlá'a luyú bidxi nazí'i le Creta ga rō'ō dxi bō' na' recja, en bidxintu' ga nalá' yōdzō Salmón luyú Creta na'. ⁸ Lu yōl-la' rizáca'sō gudōditu' tsōlá'a ga dē luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dē gala' ga na' dē yōdzō Lasea.

⁹ Tu' chigudzéda'atu', chigula' zoa bōnadxi gaca ditaj bítitēs barco rizá' lu nísado' na', tu' chigudōdi yugu' dza tunē' gubasa cate' si' idxín beo' ziaga cate' récjada' bō'. Que lē' nī' na' Pablo buzéajni'inē' légaquiē', ¹⁰ rnnē':

—Libi'ili', bōnni', réquibe'eda' ga tseaj barco nī', huazóa bōnadxi gaca ditaj barco nī', en yua' dzō'ō lē'e, en lē'sca' soa bōnadxi queéru' gátiru'.

¹¹ Bōnni' na', rinná bē'enē' bōnni' rōjāquiē' gudil-la, guyéajlē'ērē' le gula'nnē' bōnni' na' dē lu nē'ē barco, en bōnni' xan caz, ca le gunnē' Pablo. ¹² Tu' cabí naca dxi'a lataj nī' ga ta'dxín barco, nazí'i le Buenos Puertos, para ulu'gá'anē' nī' yugu' beo' ziaga, que lē' nī' na' la'tu'biqui' yúgu'tē bōnni' nacu'ē lē'e barco na' gulún tuz xtídza'gaquiē' ulu'zē'ē nī', channō huáca ila'dxínē' ga ta'dxín barco lu yōdzō Fenice, lē'sca' dē luyú bidxi na' nazí'i le Creta, le dē tsōlá'a ga ribía gubidza, ate' gulē'ennē' ulu'gá'anē' nī' yugu' beo' ziaga.

Recja bō' budunu' lu nísado'

¹³ Tu' recja tu bō'do' le za' saca' tsōlá'a ga ridōdi gubidza beo' ziaga, téquinē' chiraca ilunē' ca tē'ennē', ate' bulu'lisē' guié' zī'i naga' du guié' le ruzóa dxisō barco, ate' gudōdi barco na' gala' ra' luyú bidxi na' nazí'i le Creta. ¹⁴ Ia'tú chí'isō ca', guyecja tu bō' budunu' za' lotu', nazí'i le Euroclidón. ¹⁵ Tu' ruzéaj bō' na' recja barco na' tsōlá'aló, ate' tu' cabí guca tseaj barco ga za' bō', ní'irō bē'ētu' lataj bō' na' buzéaj barco na' ga rē'ēni. ¹⁶ Cate' gudōdi barco na' ga bidxintu' tsōlá'a tu luyú bídximo' nazí'i le Cauda, tsōlá'a nī' ga bití' récjada' bō', lu yōl-la' rizáca'sō buchísatu' bárcodo' ná ayōj barco zxon' na' yú'utu'. ¹⁷ Gudōdi burentu' le lahui barco zxon' na', ní'irō bēga'ratu' barco zxon' na'. Zxante barco na' buchólitu' du, para cabí ilá'a lu le ridxía nisa na'. Tu' gúdxitu' tōdi barco na', en inídxí' lu yuzxi lu nísado' na', buzōtjatu' lari' que, le rutubi bō' rusá' barco na'. Canisō bē'ētu' lataj bō' na' recja buzéaj barco. ¹⁸ Cate' za' rení' ia'tú dza, en nī' ruzéajda' bō' budunu' recja barco na', ní'irō gurú'unatu' lu nísado' lati' yua' dzō'ō lē'e barco na'. ¹⁹ Dza bunni, len na' cuintu' gurú'unatu' le tun dxin que barco na' lu nísado'. ²⁰ Cate' chiguca zían dza bití' rilé'etu' gubidza, en nitú bōlaj, en tu' récjada' bō' na' ruzéaj barco na' yú'utu', bítirō runtu' lōza ulatu'.

²¹ Tu' chiguca zían dza bití' nágutū', guzuinē' Pablo gatsaj láhui'lō légaquiē', en gudxē' légaquiē':

—Libi'ili', bōnni', dxí'arō guca la'tu' uzē' nágali' neda', en cabí uzá'aru' luyú Creta, en cabí udutságaru' lē' nī' riguf'i rizáca'ru', en yugu' lē' nī' raca ditaj que barco nī'. ²² Na'a, rea' libí'ili': Tsutsu guli'gún lādxí'li', tu' cabí gátili' nituli' libí'ili' tscali' zóali' nī, sal-la' gaca ditaj barco nī'. ²³ Caní gaca tu' buduluf'i lahuē' neda' gudiyēla tu gubáz lá'ayi queé' Dios. Dios nī' nēquida' queé', en runa' xichiné'. ²⁴ Gubáz lá'ayi na' gudxē' neda', gunnē': "Pablo, bití' gádxinu'. Run bayudxi idxinu' lahuē' César. Tu' nadxí'inē' Dios lí', usólē' yúgu'tē bōnachi nacua'len lí' lē'e barco nī'." ²⁵ Que lē' nī' na', tsutsu guli'gún lādxí'li', tu' ruzxóni lādxá'a-nē' Dios, gaca ca na' chigudxē' gubáz lá'ayi queé' neda'. ²⁶ Caní gaca sal-la' run bayudxi gaca ditaj barco nī' tu luyú bídximo', ga nī' tsōjca'ana rē'u.

²⁷ Cate' nī' chigudōdi chidá' dza, ate' bō' na' recja ruzéaj barco na' lu nísado' nazí'i le Adriático, idú ladxí' yēla guléquinē' bōnni' tunē' dxin lu barco na' chizóa idxín barco gala' tu luyú bidxi. ²⁸ Gula'rú'unē' du lu nísado' na', ate' gula'nōzinē' galaj ósa naca ga bidxintē ga rē' lu nisa. Cate' gudōdi barco na' ia'látido', gula'rú'unē' du na' leyúbölō, en gula'nōzinē' chinaca chinu' ósa. ²⁹ Tu' guládxinē' tsōjdín barco na' lu guíōj, que lē' nī' na', tsōlá'a láhuilō que barco gula'rú'unē' lu nísado' tapa guié' zī'i nága'gaca du guié' le tu'zóa dxisō barco lu nisa. Lu yōl-la' ruúbi ruguf'isō lādxí'do'gaquiē' gula'bōzé' tsení'. ³⁰ Ní'irō gulē'ennē' bōnni' tunē' dxin lu barco ulu'zxúnajē' lē'e barco na'. Bulu'zōtjē' bárcodo' na' dē lahui barco zxon' na' lu nísado'. Gulunē' ca tē'ennē' ilu'ē ia'látí' zī'tu' guié' zī'i na' naga' du guié' le ruzóa dxisō barco na', le zoa saca' tsōlá'a láhuilō. ³¹ Ní'irō Pablo gudxē' bōnni' na' rinná bē'enē' bōnni' rōjāquiē' gudil-la, tsōzxón len bōnni' na' rōjāquiē' gudil-la, gunnē':

—Channō cabí ulu'gá'anē' bōnni' ni lē'e barco ni, bití' gaca uláli'.

³² Ní'irō bōnni' na' rōjáquiē' gudil-la gula'chúguiē' du naga' bárcodo' na', ate' gulu'ē lataj gubixi lu nísado'.

³³ Cate' chizá' rení', Pablo gúta'yue' lógaquiē' bi ilahuē' yúgu'tē'. Gudxē' légaquiē'.

—Na'a chiguca chidá' dza rubéaj yēla loli', en runlí' gubasa, bití' bi náguli'. ³⁴ Que lē ni na', rāta'yua' loli' gáguli' para huóaca lādxi'lí', tu' cabí gátili' nituli' libí'ili'.

³⁵ Cate' Pablo budxi bē'ē didza' nī, gudélē'ē yōta xtila, en gudxē' Dios: "Xclenu'." Caní benē' lógaquiē' yúgu'tē'. Ní'irō buzuxxjē' yōta xtila na', en gusi lahuē' rahuē'. ³⁶ Ní'irō bila'dipa lādxi'gaquiē' yúgu'tē', en gulahuē'. ³⁷ Tscatu' zóatu' lē'e barco na', gúcatu' idú chopa gayuá' yu' tsónnalalaj yu' chizxópatu'. ³⁸ Gudōdi gulahuē', en bulu'huóljanē', ní'irō gula'ru'unē' xzoa' xtila dē lē'e barco na' lu nisa, para ulu'lahuē' yua' dzō'ō lē'e barco na'.

Raca ditaj barco lu nísado'

³⁹ Cate' chiguca lahuē' dza, yugu' bōnni' tunē' dxin lu barco na' bití' bulu'únbē'ē luyú na'. Bila'lē'enē' ga rōjrō' nisa xzōn na' gatsaj lāhui'lō luyú bidxi na', en dē lataj nī' ga naca lachi' ra' nísado'. Gulē'ēnnē' ilunē' ga tsaza barco na' ga nī'. ⁴⁰ Ní'irō bulu'sedxē' yugu' du guíē' nága'gaca yugu' guíē' zī'i tu'zóa dxisō' barco na', en bulu'sanē' léguequi, ate' gula'bixi lu nísado'. Bulu'sedxē' ca' du naga' nē'e yaga le ruzecaj ruxdxi' barco. Ní'irō bulu'chisē' lari' que le rutubi bō', le zoa tsólá'a lāhuilō barco na', ate' ní'irō gusi lo ridōdi barco saca' ga rōjrō' nísado' gatsaj lāhui'lō luyú bidxi na'. ⁴¹ Cate' bidxín barco na' tu lataj ga ridzaga chopa nisa, nī' binidxi' tsólá'a lāhuilō barco na' lu yuzxi lu nísado' na', ate' bugá'anasō' barco na' ga nī'. Bití' rō guca bi utá le, ate' tsólá'a cúdzi'lō barco na', gusi lo riguitsaj nísado' na' le, len yōl-la' rizá' que. ⁴² Ní'irō bōnni' rōjáquiē' gudil-la gulē'ēnnē' ilútiē' bōnni' nadzúngaquiē', para cabí ila'zxúnajē', ila'zxóē' lu nisa na'. ⁴³ Bōnni' na' rinná bē'enē' bōnni' na' rōjáquiē' gudil-la gún'nnē' usólē' Pablo, ate' gunná bē'enē' bōnni' na' rōjáquiē' gudil-la cabí ilunē' ca' nī' tē'ēnnē'. Ní'irō gunná bē'enē' bōnni' taca ila'zxóē' lu nisa, zí'aló légaquiē' ila'yáziē' lu nisa para ila'dxinē' luyú bidxi. ⁴⁴ Gunná bē'enē' ca' yugu' bōnni' nagá'anagaquiē' ila'zxóē' lu yaga dzō'ō lāhuilō barco, en ia'bal-lē' lāhuigaca yágado' que barco na'. Caní guca, bulu'lē' yúgu'tē'. Canísó bila'dxinē' luyú bidxi na'.

28

Le benē' Pablo luyú bidxi nazí'i le Malta

¹ Cate' chibulatu' yúgu'tētu', gunōztu' luyú bidxi ga na' zóatu' nazí'i le Malta. ² Bōnni' xidza' nacu'ē luyú bidxi na' lu yōl-la' dxi'i lādxi' quégaquiē' gulunē' netu' bal. Gula'béquiē' guí', ate' bulu'lidzē' netu' yúgu'tētu' iditsē'e cuintu', tu' ralaj guíōj, en runda' ziaga. ³ Ní'irō Pablo gúchē'ē tu' tsólēn huága zxisi bídxi'do', en cate' gulu'ē le lu guí', birúajba' tuba' bēla sínia' lē'e huágado', rizzúnajba' bōchila que guí' na', ate' yōtí'iniba' yen nē'ē Pablo. ⁴ Cate' bōnni' xidza' na' bila'lē'enē' bēla na', nála'ba' yen nē'ē Pablo, gulē' tuē' ia'tuē':

—Le nácatē bōnni' nī náquiē' nu ruti bōnachi. Sal-la' bulē' lu nísado', dios queēru' lē' Tshui' bití' ru'ē lē' lataj soē' ibanē'.

⁵ Gudxibi nē'ē Pablo, en busládzu'ē-ba' bēla sínia' na'. Yōjxóatēba' lu guí', ate' lē' bití' bi guca queē'. ⁶ Bōnni' xidza' nacu'ē nī' tu'yúē' Pablo, bátacaló cō'ē guí, o tsō'otē' gátie'. Ní'irō cate' chigudzé ta'bōzē', en bila'lē'enē' bití' bi raca queē', ia'tú le guléquinē', ate' gula'nnē' naca cazē' tu dios.

⁷ Lataj nī'isō dē xiyúē' Publio, bōnni' lo que luyú bidxi na', ate' bōnni' nī benē' netu' bal. Lu yōl-la' dxi'i lādxi' queē' gulu'ē netu' lidxē' idú tsonna dza. ⁸ Dza na' dē' ré'enē' xuzē' Publio na', yu'ē xilá, en ré'enē' huē' rōn. Guyáziē' Pablo sōjyúē' lē', en gudōdi bulidzē' Dios, ní'irō guxóá nē'ē bōnni' huē' na', en bunē' lē'. ⁹ Tu' benē' Pablo lē ni, lē'sca' bila'dxin nupa te'e ga zoē', nacuá' luyú bidxi nī, en bulu'huóáquiē'. ¹⁰ Yugu' bōnni' nī gulunē' netu' bal, en zían le gulunē' queētu'. Cate' chizóa zú'atu' luyú nī', bulu'nódzjē' yugu' le naquínitu' queētu'.

Ridxinē' Pablo lu yōdzō Roma

¹¹ Cate' chiguca tsonna beo' zóatu' nī', ní'irō gurentu' tu lē'e barco que yōdzō Alejandria, le bugá'ana luyú bidxi na' yugu' beo' ziaga. Barco nī dá'gaca tsólá'a lāhuilō budó' yaga léguequi Cástor, en Pólux, dios bilidi' quégaca bōnachi Alejandria na'. ¹² Buzá'a barco na' ga nī', ate' bidxín yōdzō Siracusa, ga nī' bugá'anatu' tsonna dza. ¹³ Buzá'atu' nī', ate' gudōditu' tsólá'aló luyú nī, en bidxintu' yōdzō Regio. Cate' za' rení' ia'tú dza, tu' recja bō' za' saca' ga ridōdi gubidza beo' ziaga, buzá'atu' nī', ate' dza buropi na' bidxintētu' yōdzō Puteoli luyú Italia. ¹⁴ Lu yōdzō na' yōjxáca'tu' yugu' bōchi'ru' ta'yéajlē'ē Cristo, ate' guláta'yue' lotu' ugá'analentu' légaquiē' idú xunu' dza. Cate' bizá'a dza na' buzá'atu' nī' para tséajtu' yōdzō Roma, rizē'e nī'atu'. ¹⁵ Chibila'yōnnē' bōchi'ru' nacu'ē Roma chizóa idxintu' nī', ate'

bila'rúajë' idixí'gala'gaquie' netu'. Bila'dxinë' tu yödzo'do' nazí'i le Yë'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquie' Bönni' Yú'ugaquie' Nöza. Cate' Pablo bilé'enë' légaquie', bidipa ládxë'ë, en gudxë' Dios: "Xclenu'."

¹⁶ Cate' bidxintu' Roma, bönni' na' rinná bé'enë' bönni' rójáquie' gudil-la, guchë'ë bönni' na' nadzúngaquie', ate' budödë' légaquie' lu në'ë tu bönni' lo rinná bé'enë' bönni' rójáquie' gudil-la, ate' bë'ë Pablo lataj soë' queëzë', zóalenë' lë' tu bönni' rejë' gudil-la ruyúë' lë'.

Runë' Pablo libán lu yödzo Roma

¹⁷ Cate' chigudödi tsonna dza, bulidzë' Pablo yugu' bönni' lo quégaquie' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquie':

—Libí'ili', böcha'a, sal-la' biti' bi bena' quégaca bönni' ládza'u', en calëga que le nalëbiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquie' bönni' Roma nacu'ë Jerusalén, ate' bulu'sayjë' neda' lidxi guié. ¹⁸ Ní'irö cate' chigula'nabi yúdxinë' neda' bönni' Roma, gulë'ënnë' ulu'sanë' neda', tu' gulë'quibe'enë' biti' nabága'a xíguia' gátia'. ¹⁹ Yugu' bönni' judío ni' gula'dá'báguë'ë nupa na' gulë'ëni ulu'sán neda', ate' ben bayudxi gunaba' tseja' lahuë' César ga uchi'a usöröë' neda', en calëga para uzéguia' bönni' uládz queëru' didza'. ²⁰ Que lë' ni na' bulidza' libí'ili' para ilé'eda' libí'ili', en gú'ílena' libí'ili' didza', tu' nága'a du guié ni tu' runa' löza le runru' löza rë'u, bönni' Israel, gacaté lë' na' guzxi' lu në'ë Dios gata' queëru'.

²¹ Ní'irö légaquie' gulë' Pablo:

—Biti' ridxini queëtu' guichi le za' luyú Judea ca naca lë' na' raca quiu', en cuntun nu ridxini nu naca böchi'ru' judío, nu usiyöni netu' channö nu bi rnnë quiu' le ruá' dö. ²² Na'a, rë'ënitü' yönitu' xtídzü'u, lë' na' riguinnaj icju', tu' chinözütu' ta'nnë bönni' yúgu'të lataj quégaca nupa nazí' lu në'eguequi xibá cubi ni.

²³ Caní guca, bulu'dxië' bë' tu dza, ate' dza na' bila'dxinë' zíanë' ga na' zoë' Pablo. Gusí lahuë' Pablo zílado', ate' ni' gúl-li'ni buzéajni'inë' légaquie', en buchila lá'anë' le rinná bë'ë Dios. Gú'unnë' ulu'finë' légaquie' naca idütë li libán runë' queë' Jesús. Para gunë' caní bugunë' dxin le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios. ²⁴ Bal-lë' gula'zí' lu ná'agaquie' didza' bë'ë Pablo, pero ia'bal-lë' biti' ca' gula'yéajlë'ë. ²⁵ Tu' bila'rúajë' choplô, gula'sí lógaquie' tu'zë'ë ni', ate' Pablo gudxë' légaquie', rnnë':

—Didza' nácátë bë'ë Dios Bö' Lá'ayi, lë' na' gunnë' Isaías, bönni' bë'ë didza' uláz queë' Dios, ca na' buzéajni'inë' xuz xtó'oru', gunnë':

²⁶ Guyéaj lógaca bönni' ni', yödödxí légaquie':

Yöni nágalí', pero biti' tséajni'ili'.

Uyuli' iná'alí', pero biti' ilé'eli'.

²⁷ Yugu' bönni' ni' chinazidi icja ládxi'do'gaquie',

en biti' bi riyaza icja náagaquie'.

Gulunë' ca tun nupa nachul-la guiöj lóguequi

para cabí ila'lé'e len guiöj lóguequi,

en cabí ila'yöni náaguequi

para cabí ulu'zéajni'í ládxi'guequi,

en cabí ilé'ëni ulu'huóaca queë' Dios

para gaca una' lóguequi.

²⁸ Na'a, ral-la' inözili' lë' ni. Dios risöl-lë'ë netu' lógaca bönni' izá'a para ulu'lágaca, ate' légaquie' ila'yönnë'.

²⁹ Cate' Pablo budxi bë'ë didza' ni, bila'rúajë' bönni' judío, ta'díl-lada' dídzë'ë la' légacasë'.

³⁰ Idú chopa iz bugá'anë' Pablo ni', zoë' tu lu yu'u ga na' riguizxjë', ate' benë' bal yúgu'të nupa buduyúgaca Lë'. ³¹ Lu yöl-la' rugu ládxi' benë' libán ca rinná bë'ë Dios. Busédinë' bönni' ca naca queë' Xanru' Jesucristo, ate' cuntun nu buzaga' xinözë'. ¡Ca' naca!

DIDZA' GUSÖL-LĚ'Ě PABLO YÖDZÖ ROMA

Pablo rugapë' Dios bönachi queë' Cristo nacu'ë Roma

¹ Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en guró cazë' neda' para guna' libán que didza' dxi'a queë'.

² Dza ni'te guzxi' lu në'ë Dios isöl-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. ³ Bulu'zúajë' lu guichi yúgu'të le ral-la' gunë' Zxi'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David, ⁴ pero ca naca bö' naca cazë', le naca lá'ayi, naca bë' náquië' Zxi'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti. ⁵ Ni'a que le benë' Jesucristo ruzí'iru' xibé le ruzá' ládxë'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi idütë yödzölió Lë', en ilún ca rnna xtídzë'ë. ⁶ Bitsa'li' libí'ili' ládjagaca bönachi yödzölió na', pero na'a nulidzë' Dios libí'ili' para guéguili' queë' Jesucristo.

⁷ Rugapa' Dios libí'ili', yúgu'tëli' zóali' Roma. Dios nadxi'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queëli' le ruzá' ládxë'ë queëru', en le ribequi dxi ládxi'ru'.

Rë'ënë' Pablo tsöjyüë' bönachi queë' Cristo nacu'ë Roma

⁸ Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queëli' yúgu'tëli', ate' ta'guixjö' bönachi idütë yödzölió ca réajlë'ëli' Jesucristo. ⁹ Idú ládxa'a runa' xichinë' Dios, runa' libán que didza' dxi'a ca naca queë' Zxi'inë'. Nözinë' Dios rulidzatica'sa'-në', en rinábida'-në' gaca tsahui' queëli'. ¹⁰ Rinábitica'sida' Dios, channó naca le rë'ënë' Lë', gunnë' neda' lataj uduyúa' libí'ili'. ¹¹ Caní rinábida'-në' tu' raca ládxa'a ilé'eda' libí'ili' para gaca guna' ga gata' queëli' tu le unödzjë' Dios Bö' Lá'ayi queëli', le gun ga gácali' tsutsu. ¹² Lë na' rë'ënda' naca utipa ládxi'ru' turu' ia'turu', tu' réajlë'ëru' Jesucristo yúgu'tëru'.

¹³ Böchi' luzá'ado', rë'ënda' inözili' lë ni. Zián luzuí bë' ládxa'a guída' ga zóali', pero ga ridxintë na'a bití' runni quia'. Rë'ënda' guída' ga zóali' para guna' ga uzí'ili' xibé libán na' runa', ca na' tu'zì' xibé ia'bal-la bönachi yödzölió ni. ¹⁴ Dë le ral-la' guna' quégaca yúgu'të bönachi, quégaca bönachi nazëdagaca, en quégaca bönachi cabí nazëdagaca, quégaca bönachi ta'yéajni', en quégaca bönachi cabí ta'yéajni'. ¹⁵ Que lë ni na', tsca gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

Yöl-la' huáca zxön que didza' dxi'a

¹⁶ Biti' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ulu'lagaca yúgu'të nupa ta'yéajlë' le. Ga risí lo, rë'ënë' Dios ila'yönnë' bönni' judío le, ate' tódi na' ila'yöni ca' bönachi izá'a. ¹⁷ Didza' dxi'a ni ruluí' rë'u gunë' Dios ga huóácaru' tsahui', channó uyéajlë'ëru' Lë', en bití' gaca chopa ládxi'ru'. Ca naca lë ni nazúaj ca' lu guichi lá'ayi, rnna: "Nu naca tsahui' tu' réajlë' Dios, gata' yöl-la' na'bán que nu na'z."

Xíguia' nabága' gaca bönachi

¹⁸ Dios, Nu zoa yehua' yubá, bulu'e lahui bití' rilé'enë' dxi'a yúgu'të le ruá' dö', en le cabí naca tsahui' tun bönachi. Gunë' xíguia' yugu' bönni' na', lu yöl-la' bití' naca tsahui' quégaquië' ta'dá'baguë'ë le naca idütë li. ¹⁹ Caní gaca quégaquië' tu' nalá' lahui lógaca yúgu'të bönachi le naca bë' zoa cazë' Dios, tu' buluí' quézinë' Dios lë ni ga na' nacu'ë. ²⁰ Dza ni'te cate' si' guta' yödzölió, ga ridxintë na'a dza, yugu' le nunë' Dios náacagaca bë' le cabí gaca ilé'ëru' queë' Dios, ca naca yöl-la' huáca idú queë', en le naca cazë' Dios. Que lë ni na', bití' gaca ila'nnë' bití' nabága'gaquië' xíguia'. ²¹ Cate' ni' gulúnbë'ë Dios, bití' gula'yéaj ládxi'gaquië' Lë' ca ral-la' tseaj ládxi'ru'-në' Dios, en bití' gulé' Lë: "Xclenu'." Que lë ni na', cá'asö böaca le gula'zá' ládxi'gaquië', ate' gula'chul-la gula'nítië' tu' nazidi icja ládxi'do'gaquië'. ²² Sal-la' guléquinë' ta'yéajni'inë' yenni', bulu'huóáquië' bönni' bití' bi nözguequinë' ²³ tu' bulu' cá'anë' yöl-la' bení' queë' Dios Nu zóatica'só, ate' gula'yéaj ládxi'gaquië' budó' guiój budó' yaga, budó' na' náacagaca ca yugu' bönni' tati cazë', en ca yugu' bóa'do' zoa xiligacaba', en ca yugu' bóa' guixi' ta'daba' lu yu, en ca yugu' bóa' bëla tá'ayöj lë'ëba' lu yu ni.

²⁴ Que lë ni na' Dios guléaj ládxë'ë légaquië' para ilunë' yugu' le ta'zë ládxi'gaquië' le ruá' dö', ate' caní guca, bulu'cá'ana cuíngaquië' lu yöl-la' stu' tuë' len ia'tué'. ²⁵ Guca caní tu' bulu'cá'anë' xtídzë'ë Dios, le naca idütë li, ate' gula'zì' lu ná'agaquië' tu le cabí nácatë. Gulunë' bal, en gula'yéaj ládxi'gaquië' yugu' le benë' Dios, en calëga Lë cazë' Dios, Nu na' ral-la' gácatica'só queë' yöl-la' ba. ¡ca' gaca!

²⁶ Que lë ni na' Dios guléaj ládxë'ë légaquië' para ilunë' yugu' le ta'zë ládxi'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'. ²⁷ Lësca' caní

gulunë yugu' bönni' biguiú', bulu'cá'anë' yöl-la' rizóalen nigula, ate' gula'zë ládxi'gaquië' le ruá' dō' túnlenë' tuë' ia'tué', en gulunë' le tun ga nu rutuí'i, tu' gula'cuá'lenë' la' luzá'a bönni'gacasë'. Que lë ni na' gula'gu'i' gula'záquië' lu xipëla'gaquië' yugu' bönni' gulunë' caní tu' bubí'ë Dios quégaquië' ca sa'yéaj dul-la' na' gulunë' tu' nucá'anagaquië' Dios.

²⁸ Tu' cabí gulë'ënnë' ilunë' Dios bal, que lë ni na' guléaj ládxi'ë Dios légaquië' para ila'zá' ládxi'gaquië' le bití' naca dxi'a, en ilunë' le cabí nazaca'.

²⁹ Túntica'së' yúgu'të le cabí naca tsahui', en yugu' le naca stu'.

Tunë' le ruá' dō', en tu'huidi'në'.

Biti' ta'lé'enë' dxi'a luzá'agaquië', en tu'zxé'enë' luzá'agaquië'.

Tutië' luzá'agaquië', en ta'díl-lalenë' luzá'agaquië'.

Ta'zì' yé'enë' bönachi, en zì'të nácagaquië' xihuí'.

Ta'nnë' que luzá'agaquië'.

³⁰ Ta'nnë' le cabí nácatë que luzá'agaquië'.

Biti' ta'lé'enë' Dios dxi'a, en nácagaquië' bönni' bizxaj.

Tun cuíngaquië' lo, en tun ba zxön cuíngaquië'.

Ta'guiljë' le ruá' dō' ilunë', en ta'dá'baguë'ë xuz xiná'agaquië'.

³¹ Nácagaquië' bönni' bití' ta'yéajni'inë', en tun dítxagaquië' xtídza'gaquië'.

Biti' nácagaquië' dxi'i ládxi' ca ral-la' ilácagaquië'.

Biti' tu'niti lahuë' luzá'agaquië'.

Biti' tu'huechi' ládxi'gaquië' luzá'agaquië'.

³² Nözguequi quézinë' le nuzóë' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nöziguequinë' lë ni, calégasö caní tunë', pero ta'yaza ládxi'gaquië' nupa tun ca' caní.

2

Naca tsahui' ichúguië' Dios quégaca bönachi gátigaca

¹ Que lë ni na', bití' gaca ubéaj tsahui' cuinu', nütí'tës nu nacu', richugu bë'u luzó'o. Cate' richugu bë'u luzó'o, rusubaga' cuinu' xíguia', tu' richugu bë'u luzó'o, en lësca' runu' lí'. ² Nöz quéziru' ca ruchi'a rusöröë' Dios. Naca idütë' li ca ruchi'a rusöröë' nupa tun le ruá' dō'. ³ Li' richugu bë'u nupa tun le ruá' dō', en tuz ca runu' lí'. ⁴ ¿Naru' réquitsenu' uló' lí' cate' uchi'a usöröë' Dios? ⁴ ¿Naru' rucá'anatso' cá'asö yöl-la' dxi'i ládxi' idú queë' Dios, en yöl-la' riböza zxön ládxi' queë', en ca runë', ridzenë' para lenë' lí'? ⁵ ¿Naru' cabí nöz quézinu' ruzá' ládxi'ë Dios quiu' yöl-la' dxi'i ládxi' queë' para gunë' ga ubí'i ládxi'u? ⁶ Lu yöl-la' ládxi'do' zidi quiu' bití' rubí'i ládxi'u. Que lë ni na' rusubaga' cuinu' xíguia' gunë' Dios lí' cate' uchi'a usöröë' bönachi, ate' gaca bë' naca ca ral-la' gunë' Dios cate' ichúguië' quégaca bönachi ilátigaca. ⁷ La' dza n'isö ubí'i cazë' Dios que queë' bönni' tsa naca le gulunë' tu tuë'. ⁸ Unödziejë' yöl-la' na'bán idú quégaca nupa túntica'sö le naca dxi'a, tu' tuí'i ládxi'gaquië' ulu'zi'ë xibë' Dios, en ulu'rúajë' dxi'a lahuë' Lë', en ila'cuá'tica'së'. ⁹ Lu yöl-la' rilé queë', Dios gunë' xíguia' nupa ta'dá'baguë', en bití' té'ëni ilún ca rnna le naca idütë' li, pero tun ca rnna le cabí naca tsahui'. ¹⁰ Ila'guí'i ila'záquië', en hu'inida' ládxi'ë yúgu'të bönni' tunë' le ruá' dō'. ¹¹ Ca risí lo gaca caní quégaca bönachi judío, en gaca ca' caní quégaca bönachi izá'a. ¹² Dios gunë' ga ilácagaquië' bica' ba, en gunë' légaquië' bal, en gu'ë le cuéqui dxi ládxi'gaquië' yúgu'të bönni' tunë' le naca tsahui'. ¹³ Ga risí lo gunë' caní quégaca bönachi judío, en gunë' ca' caní quégaca bönachi izá'a.

¹⁴ Caní uchi'a usöröë' Dios bönachi, ate' Lë' bití' runë' bal le ta'nnasö bönachi. ¹⁵ Yúgu'të bönni' na' bití' bila'yönnë' le rinná bë' xibá queë' Dios, en gulunë' dul-la', lësca' ilátië', sal-la' bití' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lë' uchi'a usöröë' légaquië' ca naca le rinná bë' xibá na'. ¹⁶ Caní gaca, tu' cabí nácagaquië' tsahui' lahuë' Dios yugu' bönni' ta'yónisë' xibá queë', pero ulu'huóaca tsahui' lahuë' Lë' yugu' bönni' tunë' ca rnna xibá queë'. ¹⁷ Bönni' na' bití' nácagaquië' judío, en bití' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' bití' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'. ¹⁸ Nupa ni tu'luí'i lahui le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'tué'. ¹⁹ Caní ubí'ë Dios quégaquië' dza ni' uchi'a usöröë' lu na' Jesús cristu yugu' le núnagaquië', en le gula'zá' ládxi'gaquië' yúgu'të. Caní rusëdi didza' dxi'a runa' libán que.

Yugu' bönni' judío, en xibá queë' Dios

¹⁷ Núlöli' rnna'li' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbë'ëli'në' Dios, ¹⁸ nöz quézili' le ré'ënë' Dios gunli', en le rusëdi libí'ili' xibá queë', en réquibe'eli' le nácatëro dxi'a. ¹⁹ Réquili' gaca ulu'í'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca. ²⁰ Réquili' gaca usédili' nupa

biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönachi ca naca yöl-la' réajni'i idú, en le naca idútë li. ²¹ Na'a, libí'ili' rusëdili' ia'zica'rö bönachi. ¿Naru' cabí ral-la' usëdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'? ²² Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guió' budó' yaga. ¿Naru' ribántsali' le dzó'ö lu yudo' quéguequi? ²³ Run ba xzön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asó, en riguitsjali' xibá le gunná bë'ë Lë'? ²⁴ Nazúaj lu guichi lá'ayi ca runli', rnna: Ni'a que le runli' libí'ili' nupa biti' náacagaca judío ta'nnë zi' queë' Dios.

²⁵ Le nácatë ruzi'u xibé lë na' narugu lu xipëlu'u le naca bë' nazí' lu ná'ali' xibá queë' Dios channö runu' ca rinná bë' xibá na' queë' Dios, pero channö riguitsju' xibá le gunná bë'ë Lë', nuhuöácu' ca tu bönni' biti' néquinë' queë' Dios. ²⁶ Que lë ni na', channö zoë' tu bönni' biti' narugu lu xipëlë'ë lë na' naca bë' nu nazí'i xibá queë' Dios, pero runë' idútë ca rinná bë' xibá queë' Lë', bönni' ni náquië' lahuë' Dios ca tu bönni' narugu caz lu xipëlë'ë lë na' naca bë' sal-la' biti' narugu lu xipëla' cazë'. ²⁷ Bönni' na' biti' narugu lu xipëlë'ë lë na' naca bë' nu nazí'i xibá queë' Dios, pero runë' idú ca rinná bë' xibá na' queë' Dios, ca runë' bönni' ni ruluí' nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipëla'li' lë na' naca bë' nazí' lu ná'ali' xibá na' queë' Dios, pero biti' runli' ca rinná bë' xibá queë' na'. ²⁸ Biti' náquië' idú bönni' judío tu bönni' nácasë' caní lu yöl-la' bönáchisö queë', atë' biti' naca idú lë na' naca bë' le narúgusö lu xipëlë'ë nu bönni'. ²⁹ Náquië' idú bönni' judío bönni' na' náquië' caní lu icja ládxi'da'ahuë', en le naca idú le narugu lu xipëlë'ë nu bönni' le naca bë' nu nazí'i xibá queë' Dios, naca tu le yu'u icja ládxi'do'gaca bönachi. Naca que bö' naca cázaru', en calëga que yöl-la' bönáchisö queëru'. Nu bönni' náquië' caní, biti' tun bönachi lë' bal, pero Dios caz gunë' lë' bal.

3

¹ Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipëlë'ë? ² Yenni' ruzi'ë xibé, en zían ca ruzi'ë xibé. Le nácatëro lo, Dios gulu'ë lu ná'agaquië' yugu' bönni' judío didza' lá'ayi queë'. ³ Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rnna xtídzë'ë tu' cabí ta'yéajlë'ë Lë'? ⁴ ¿Biti' ca' gaca! Ral-la' guéquibë'ëru' rúntica'së' Dios ca rnna didza' bë'ë, sal-la' ta'z'í' yë' yúgu'të bönachi. Ca naca queë' nazúaj lu guichi lá'ayi le rnna: Gaca bë' nacu' tsahui' ni'a que didza' ru'u, en uruju' tsahui' channö nu uchi'a usörö Lì'.

⁵ Cate' runru' le ruá' dö', Dios rnnë' biti' naca tsahui' le runru'. Lë ni naca bë' tsahui' náquië' Dios. Nacuá' nupa ta'nná: "Le cabí naca tsahui' le runru' naca bë' náquië' Dios tsahui', atë' que lë ni na' biti' ral-la' gunë' rë'u xíguia'." ⁶ ¿Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöröë' bönachi yödöliö ni?

⁷ Cate' nu rizi' yë', Dios rnnë' biti' ruí'i didza' nu na' ca runë' Lë'. Lë ni naca bë' naca idútë li didza' ru'ë Dios. Ta'nnë' bönni' le ta'z'í' yë'ë légaquië' run ga gaca queë' Dios yöl-la' ba, atë' biti' ral-la' ichúguië' quégaquië', cabí innë' nácagaquië' bönni' dul-la'. ⁸ ¿Naru' huannátsaru': "Guá'aru' dö' para gaca le naca dxi'a"? Nupa na' ta'nnë' zi' queëru' ta'nná rusédiru' caní, atë' tsahui' naca ichúguië' Dios quéguequi.

Yúgu'tëru' nabága'ru' dul-la'

⁹ ¿Bizxi caz innaru' na'a? Ca naca queëtu' netu', bönni' judío, ¿nacárotu' tsahui' ca ia'zica'rö bönachi? ¿Biti' ca' nácatu'! Chibulu'a ni, nabága'gaca dul-la' bönachi judío, atë' nabága'gaca ca' dul-la' bönachi izá'a. ¡Yúgu'të' nabága'gaquië' dul-la'! ¹⁰ Nazúaj lu guichi lá'ayi le rnna: Cuntu nu zoa naca tsahui', cuntu nu caz.

¹¹ Cuntu nu réajni'i.

Cuntu nu riguilaj Dios.

¹² Yúgu'të' ta'dë' ga yúbölo.

Yúgu'të' nanítigaquië'.

Cuntu nu run le naca dxi'a, cuntu nu caz.

¹³ Lubá'agaquië' náacagaca ca yeru ba nayáljagaca.

Len yöl-la' rinnësö quégaquië' ta'z'í' yé'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla sínía'.

¹⁴ Len yugu' didza' tu'ë, tu'didza' yúdxinë' bönachi, en ta'nnë' zi'ë quégaca bönachi na'.

¹⁵ Nacu'ë sina' tütigaquië' bönachi.

¹⁶ Gátitës ga ta'dödë' tu'suntíë', en tu'saca' zi'ë luzá'agaquië'.

¹⁷ Biti' ta'zéqui'në' ila'bözë' dxi'ado'.

¹⁸ Biti' ca' tádxinē' Dios.

¹⁹ Nőziru' yúgu'tē didza' ni bē'ē Dios, rē' yugu' bōnni' na' dē lu ná'agaquiē' xibá queē'. Que lē ni na' cuntu nu gaca inná bití' nabaga' dul-la', ate' yúgu'tē bōnachi idútē yōdzólió, uchi'a usórōē' Dios quéguequi. ²⁰ Tu'í ládxi'gaquiē' yugu' bōnni' judío ilunē' yugu' le rinná bē' xibá queē' Dios para ulu'huóáquiē' tsahui', pero cuntu nu huóáca tsahui' caní, tu' nuzóē' Dios xibá queē' para guéquibe'eru' nabága'ru' dul-la'.

Uláru' tu' réajlě'ēru' Jesucristo

²¹ Na'a, chibulufi' lahui ca gaca huóácaru' tsahui' lahuē' Dios. Biti' gaca huóácaru' tsahui' tu' runru' ca rinná bē' xibá queē' Dios, sal-la' lu xibá queē' na', en lu guichi lá'ayi ga nazúajgaca le gula'nnē' bōnni' gulu'ē didza' uláz queē' Dios, ru'í didza' ca gaca huóácaru' tsahui'. ²² Dios caz runē' ga huóácaru' tsahui' tu' réajlě'ēru' Jesucristo, ate' gunē' ga ulu'huóáca tsahui' yúgu'tē nupa ila'yéajlě' Lē'. Tuz ca nácgaca yúgu'tē bōnachi ²³ tu' núnagaquiē' yúgu'tē dul-la', en bití' ca' nácgacaquiē' tsahui' ca na' náquiē' Dios idú tsahui'. ²⁴ Dios ruzá' ládxi'ē queēru', en nunsē' rē'u tsahui' tu' bōá'uē' Jesucristo rē'u. ²⁵ Dios budōdē' Jesucristo uláz queēru'. Lē' bulaljē' xichōnē', le rigúa dul-la', lē na' uzí'iru' xibé channō uyéajlě'ēru' Lē'. Caní benē' Dios para gaca bē' náquiē' tsahui' Lē' sal-la' lu yól-la' ribóza zxōn ladxí' queē' budōdisē' cá'asō yugu' dul-la' benru' dza ni'te. ²⁶ Caní benē' Dios, bulufi' cuinē' tsahui' dza ni zóaru' na'a, ate' rugá'anē' tsahui' sal-la' rugúē' dul-la' nabága'gaca bōnachi, runē' ga tu'huóáca tsahui' nupa ta'yéajlě' Cristo.

²⁷ ¿Naru' huácatsō gun ba zxōn cuinru' ca naca queēru'? ¡Biti' ca' gácaru'! ¿Bizx que na'? Naca tu' nuláru', calēga tu' runru' ca rinná bē' xibá queē' Dios, pero tu' réajlě'ēsiru' Jesucristo. ²⁸ Na'a, rusáca'ru' queēru' nuhuóáquiē' tsahui' tu' bōnni' tu' réajlě'ē Jesucristo, en calēga tu' runē' ca rinná bē' xibá queē' Dios.

²⁹ Ca naca Dios, ¿náquiē' Dios quégacasō bōnachi judío? ¿Naru' cabí náquiē' ca' Dios quégaca bōnachi izá'a? Ōn, náquiē' ca' Dios quégaca bōnachi izá'a na' ³⁰ tu' zoa Tuz Nu naca Dios. Dios ni gunē' ga ulu'huóáquiē' tsahui' yugu' bōnni' judío tu' ta'yéajlě'ē Jesucristo, yugu' bōnni' na' narugu lu xipéla'gaquiē' lē na' naca bē' nu nequi queē' Dios, en lēscá' caní gunē' ga ulu'huóáquiē' tsahui' yugu' bōnni' zí'tu' tu' ta'yéajlě'ē Jesucristo, en bití' narugu lu xipéla'gaquiē' lē na' naca bē'. ³¹ Na'a, channō nuláru' tu' réajlě'ēsiru' Jesucristo, ¿ba nagá'ana cá'asō xibá queē' Dios? ¡Biti' ca' naca ca', pero nagá'anarō tsutsu xibá queē' na'!

4

Le benē' Abraham rusedi rē'u

¹ ¿Bizxi caz innaru' na'a? ¿Bizxi bidéli'nē' Abraham, xuz xtó'otu' netu', nácatu' judío? ² La'tu' bōáquiē' tsahui' Abraham tu' zoa le ben cazē' lē', gunna gun ba zxōn cuinē', pero calēga lahuē' Dios. ³ Ca naca lē ni nazúaj lu guichi lá'ayi, le rnna: "Abraham guyéajlě'ē Dios, ate' que lē ni na' Dios benē' ga bōáquiē' tsahui' lahuē' Lē'." ⁴ Channō zoa nu bōnni' runē' xichinru', le rigúzjxaru'-nē' bití' naca tu le ruzá' ládxi'ru' queē', pero naca tu le ral-la'ru' queē' bōnni' na'. ⁵ Lēscá' caní channō tu bōnni' réajlě'ē Dios, sal-la' bití' bi dxin benē' bōnni' na', Dios, Nu run ga ulu'huóáca tsahui' bōnachi bití' nácgaca tsahui', rnnē' náquiē' tsahui' lahuē' Lē' bōnni' na', tu' réajlě'ē Lē'. ⁶ Lēscá' caní bē'ē didza' David ca náquiē' bica' ba bōnni', Dios rnnē' náquiē' tsahui' sal-la' bití' bi dxin nunē' bōnni' na'. ⁷ Caní gunnē' David: ¡Bica' ba bōnni' na' Dios runiti lahuē' le bití' naca tsahui' nunē', en rugúē' yugu' dul-la' nabáguē'ē!

⁸ ¡Bica' ba bōnni' na', Dios bití' rusubáguē'ē lē' xíguia' tu' nōzi dul-la' benē' bōnni' na'!

⁹ ¿Naru' nácgacsē' bica' ba bōnni' narugu lu xipéla'gaquiē' lē na' naca bē', o nácgaca ca' caní nupa na' cabí narugu lē na' lu xipéla'gaquiē'? Chigunná cázaru' bōáquiē' Abraham tsahui' lahuē' Dios tu' guyéajlě'ē Lē'. ¹⁰ ¿Bátaxi bōáquiē' tsahui' caní Abraham? ¿Naru' guca cate' ni' chinarugu lu xipélē'ē lē na' naca bē', o guca zí'alō? Bití' guca cate' chinarugu lu xipélē'ē, pero zí'alō guca. ¹¹ Abraham guyéajlě'ē Dios cate' ni' bití' narúguni lu xipélē'ē lē na' naca bē'. Gudōdi na' gurugu lu xipélē'ē lē na' naca bē', le rulufi'sō chinu'huóáquiē' tsahui' lahuē' Dios. Guca caní para gáquiē' Abraham ca xúzgaquiē' yugu' bōnni' ila'yéajlě'ē Dios sal-la' bití' narugu lu xipéla'gaquiē' lē na' naca bē'. Tu' ta'yéajlě'ē Dios, huáca innē' Dios nácgaci' tsahui' lahuē' Lē'. ¹² Náquiē' Abraham xuz xtó'ogaquiē' yugu' bōnni' judío ta'yéajlě'ē Dios. Calēgasō náquiē' xúzgaquiē' bōnni' na' narugu lu xipéla'gaquiē' lē na' naca bē', pero lēscá' náquiē' xúzgaquiē' bōnni' na' tunē' ca benē' Abraham, ta'yéajlě'ē Dios ca na' benē' Abraham cate' ni' bití' narúguni lu xipélē'ē lē na'.

Le guzxi' lu nē'ē Dios gata' queēru' tu' réajlě'ēru' Lē'

¹³ Guzxi' lu nē'ē Dios bi unōdzjē' queē' Abraham, en quégaca zxi'ini xi'sóē', gata' quégacaquiē' la' yōdzólió nisō. Gaca caní, calēga tu' tunē' ca rinná bē' xibá queē' Dios, pero tu'

nuhuóacaguië' tsahui' lahuë' Lë' tu' ta'yéajlë' Lë'. ¹⁴ La'tu' gata' yödžölió ni quégacasó nupa tun ca rinná bē' xibá queë' Dios, biti' gun bayudxi nu tséajlë' Lë', ate' nítisó gaca le guzxi' lu nē'ē Dios. ¹⁵ Rulufi' xibá queë' Dios rē'u nabága'ru' xíguia', le run ga ichúguië' Dios queëru' gátiru'. Ga ni' biti' ridxini xibá queë' na', biti' gaca ila'dá'baga' bōnachi le rinná bē' xibá na'.

¹⁶ Que lē ni na' uzí'iru' xibé le guzxi' lu nē'ē Dios tu' réajlë'ëru' Lë', para gaca bē' naca tu le ruzá' ládxë'ē queëru'. Caní naca, para gaca bē'da' gata' quéqueui' yúgu'tē xxi'ini xi'só' Abraham lē na' guzxi' lu nē'ē Dios, calégasó quégaquië' bōnni' na' dē lu ná'agaquië' xibá queë' Dios, pero lēscá' quégaca nupa ta'yéajlë' Dios ca na' guyéajlë'ē Abraham Dios. Abraham na' náquië' ca xuz xtó'oru' yúgu'tëru' rē'u, réajlë'ëru'-nē' Dios. ¹⁷ Caní náquië' ca na' nazúaj lu guichi lá'ayi, le rnna: "Nuzó'a' li' ca xúzgaca bōnachi idútē yödžölió."

Caní naca, lahuë' Dios, Nu na' guyéajlë'ē Abraham, náquië' xuz gudödi queëru' yúgu'tëru'. Dios ni rusubanë' nupa chinátigaca, en ru'ē didza' que nu biti' zuíni tscá chizó'a caz nu na' biti' zuíni.

¹⁸ Caní naca tu' gudxë' Dios Abraham na': "Ziántërö ila'cuá' xxi'ini xi'sú'." Abraham guyéajlë'ē Dios, en benë' löza lē na' guzxi' lu nē'ē Dios, sal-la' biti' guca ilé'enë' lē na' runë' löza, ate' caní guca, bidéli'nē' náquië' xúzgaca bōnachi idútē yödžölió. ¹⁹ Biti' guca Abraham chopá ládxë'ē ca na' réajlë'ē Dios, sal-la' chiyu'ē ca tu gayuá' iz, en yōjnenë' ca naca que le naca cazë', chinati caz tu' chinagüladë'ē, enca' ca naca queënu Sara queë', nácanu nigula huódx. ²⁰ Biti' guca chopá ládxë'ē, en biti' gúquië' tu' caréajlë' ca naca le guzxi' lu nē'ē Dios gunë' queë', pero bidipa ládxë'ē tu' guyéajlë'ē Dios, ate' gulu'ē Dios yöl-la' ba. ²¹ Idú ládxë'ē benë' löza Dios, napë' yöl-la' huáca gunë' idútē lē na' guzxi' lu nē'ē. ²² Que lē ni na', tu' guyéajlë'ē Abraham Dios, Dios buzóë' queë' náquië' tsahui'.

²³ Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calégasó para uzi'ē xibé Abraham, ²⁴ pero para uzí'iru' xibé ca' rē'u. Rē'u ni, Dios gunë' ga huóácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti. ²⁵ Jesús na', Dios budödë' Lë' para gútië' tu' nōzi dul-la' nabága'ru', ate' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

5

Le rata' queëru' tu' rnnë' Dios nuhuóácaru' tsahui'

¹ Na'a, rnnë' Dios nuhuóácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lē ni na' nuhuóácaru' tuz len Lë'. ² Tu' réajlë'ëru' Jesucristo, ruzí'iru' xibé le ruzá' ládxë'ē Dios queëru', le rutipa ládxí'ru'. Rudzéjaru' tu' runru' löza uzí'iru' ca' xibé yöl-la' xzōn queë' Dios. ³ Calégasó caní rudzéjaru', pero rudzéjaru' ca' cate' rigufi' rizáca'ru', tu' chinöziru' le rigufi' rizáca'ru' rusedi rē'u cōzaru' xzōn ládxí'. ⁴ Cate' ribózaru' xzōn ládxí' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rē'u. ⁵ Cate' runru' löza Lë', biti' ca' raca chopá ládxí'ru'. Caní naca, tu' nuhuóaj nudžë'ē icja ládxí'do'oru' yöl-la' nadxi' queë' Dios rē'u. Runë' Dios Bō' Lá'ayi, Bōnni' gusöl-lë'ē Dios queëru' ga raca caní.

⁶ Cate' ni' biti' ca' guca uláru' rācasó queëru', cate' gúla'rō dza queë', Cristo gútië' uláz queëru', ni' nácaru' bōnachi dul-la'. ⁷ Cuntu nu guë'ëni gati uláz queë' tu' bōnni' tsahui'. Nadxi ca' nu urugui gati uláz queë' tu' bōnni' náquië' idú dxi'a. ⁸ Dios rulufi'nē' rē'u ca nadxi'ide'enë' rē'u, tu' gútië' Cristo uláz queëru' cate' ni' nácaru' bōnni' dul-la'. ⁹ Chinuhuóácaru' tsahui' lahuë' Dios tu' bulaljë' Cristo xichōnë', gútië' uláz queëru'. Que lē ni na' chinácada' löza usölë' Lë' rē'u lu dza ichúguië' Dios quégaca bōnachi dul-la' gátigaca. ¹⁰ Cate' ni' biti' rilé'ëru'-nē' Dios dxi'a, gútië' Xxi'inë' Dios uláz queëru' para huóácaru' tuz len Lë'. Na'a, tu' zoë' nabanë', en chinuhuóácaru' tuz len Lë', chinácada' löza uláru'. ¹¹ Rudzéjaru' lahuë' Dios ni'a que le benë' Xanru' Jesucristo, tu' nuhuóácaru' tuz len Dios ni'a que lē na' benë' Lë'.

Le benë' Adán, en le benë' Cristo

¹² Guyú'u dul-la' yödžölió ni tu' nōzi le benë' tuzë' bōnni', ate' tu' benë' dul-la', guyú'u ca' yöl-la' guti. Que lē ni na' ilátigaca yúgu'tē bōnachi tu' nabága'gaca yúgu'tē bōnachi dul-la'. ¹³ Zí'atëlö ga bidxintë xibá queë' Dios, gulún bōnachi yödžölió ni dul-la', pero biti' busubáguë'ē Dios bōnachi na' xíguia' ca nupa ta'dá'baga' xibá queë' tu' nōzi dul-la' na', tu' biti' ridxini xibá queë' quégaquië'. ¹⁴ Ga gudela' zoë' Adán ga bidxintë zoë' Moisés gulati yúgu'tē bōnachi tu' gula'baga' dul-la', sal-la' biti' gula'dá'baga' tu le gunná bē'ē Dios ca benë' Adán. Nácacaga yúgu'tē bōnachi tuz len Adán tu' nácacaga xxi'ini xi'sóë'. Lē ni rulufi' rē'u ca ilaca tuz len Cristo yúgu'tē nupa ila'yéajlë' Lë'.

¹⁵ Le rúnasë' queëru' Dios biti' naca ca le guca queëru' tu' nōzi dul-la' benë' Adán. Tu' nōzi dul-la' benë' tuzë' bōnni', ilátigaca yúgu'tē bōnachi. Dxi'atërö naca le ruzá' ládxë'ē queëru' Dios, en le rúnasë' queëru'. Ruzá' ládxë'ē queëru' lē ni ni'a que le benë' yetuzë' Bōnni', Jesucristo. ¹⁶ Le rúnasë' Dios queëru' biti' naca ca le guca queëru' tu' nōzi dul-la' na' benë'

tuzë' bönni' na'. Le guchúguië' Dios queë' Adán gátië' tu' nözi dul-la' na' benë', guchúguië' ca' Dios quégaca yúgu'të bönachi gátigaca. Le rúnnašë' Dios queëru' naca para huóácaru' tsahui' lahuë' Lë' sal-la' nabága'ru' dul-la' zían. ¹⁷ Guyú'u yöl-la' guti tu' nözi dul-la' benë' tuzë' bönni'. Nácatërö löza ila'deli' yöl-la' na'bán nupa ulu'huóáca tsahui' lahuë' Dios tu' zoa le ruzá' ládxë'ë queëru' Dios ni'a que le benë' yetuzë' Bönni', Jesucristo.

¹⁸ Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huóáca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quégaquie'. ¹⁹ Bulu'huóáca huen dul-la' bönachi zían tu' cabí benë' tuzë' bönni' ca rnna xtídzë'ë Dios. Lësca' caní ulu'huóáca tsahui' bönachi tu' benë' yetuzë' Bönni' na' ca rnna xtídzë'ë Dios.

²⁰ Guyú'u xibá queë' Dios yödžölíó ni para gaca bë'da' nabága'gaca bönachi dul-la'. Tu' guca bërö nabága'gaca dul-la', guca bërö ca' xžöntërö naca le buzá' ládxë'ë Dios quégaca bönachi. ²¹ Guta' yöl-la' huáca unná bë' que dul-la' guti rë'u. Lësca' caní le ruzá' ládxë'ë Dios queëru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán idú queëru' ni'a que le benë' Xanru' Jesucristo.

6

Naca tsca chinátiru' para cabirö gunru' dul-la' tu' nabániru'-në' Jesucristo

¹ Bizxi caz innaru' na'a? ¿Naru' gúntsaru' dul-la' para gata'rö queëru' le ruzá' ládxë'ë Dios queëru'? ² Biti' gun cázaru' ca'! Naca queëru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'? ³ ¿Naru' cabí nöžili' ca na' naca queëru'? Channö bidílaru' nisa para huóácaru' tuz len Cristo, lë na' bidílaru' nisa rulu'í' rë'u chigudódíru' lu yöl-la' guti tsöžxón len Lë'. ⁴ Ca na' guca, gútílenru'-në' Cristo tsöžxón, lësca' caní bigáchi'lenru'-në' tsöžxón niu' yeru ba cate' ni' bidílaru' nisa. Ca na' busubané' Dios Cristo lu yöl-la' guti len yöl-la' huáca xžón queë', lës caní ca' rë'u nubánlenru'-në' Jesús tsöžxón para gácaru' bönachi idütë cubi queë'.

⁵ Channö nunru' Cristo tsöžxón, gútiru' ca na' gútië' Lë', lësca' caní gunru'-në' tsöžxón, ubanru' lu yöl-la' guti ca na' bubané' Lë'. ⁶ Chinöz quéžiru' lë ni, yöl-la' bönachi queëru' le gužóa zí'alö gudá'len Lë' tsöžxón lë'e yaga cruz, para initi yöl-la' bönachi queëru' na' bënlenru' le dul-la', para cabirö inná be'e le naca dul-la' rë'u. ⁷ Channö nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirö nabága'ru' dul-la' na', ate' bití'rö yú'uru' lu na' dul-la'. ⁸ Na'a, channö nátilenru'-në' Cristo tsöžxón, réajlë'ëru' ubánlenru'-në' ca' tsöžxón, ⁹ tu' chinöziru' bubané' Cristo lu yöl-la' guti, en bití'rö gátië'. Que lë ni na' bití'rö bí gaca gun yöl-la' guti na' queë' Lë'. ¹⁰ Ca na' guca, gútië' Lë', tu luzuísó gútië' tu' nözi dul-la' quégaca yúgu'të bönachi, pero ca na' naca, zoë' nabanë', nabánlenë' Dios. ¹¹ Lësca' caní ral-la' usáca'li' queëli' naca queëli' ca chinati cázali' para cabirö gunli' dul-la', pero zoáli' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

¹² Que lë ni na', bití' gú'ili' lataj le naca dul-la', para cabí gun ga gunli' dul-la' lu le naca cázali' le gati caz. Biti' gunli' ca naca le rizë ládxí'li' le ruá' dō, lu le naca cázali'. ¹³ Biti' udödi cuinli' lu dul-la', bití' gunli' le ruá' dō, pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idütë le naca cázali' para ugúnlenë' le le naca dxi'a. ¹⁴ Biti' gú'ili' lataj le naca dul-la', para cabí gun ga gunli' dul-la', tu' nuzóë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá' ládxë'ë queëru'.

Le rucudzu' didza' ca naca que nu bönni' nadó'o

¹⁵ Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' ládxë'ë Dios rë'u? ¿Biti' ca' gunru' caní! ¹⁶ Chinöz quéžili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lësca' caní gaca channö udödi cuinli' para gunli' dul-la' le gun ga gáti'li', o channö udödi cuinli' para gunli' ca rnna xtídzë'ë Dios, Nu gun ga huóácali' tsahui'. ¹⁷ Na'a, ¡Xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxí'li' runli' ca rinná bë' xibá na' budödi cuinli' lu në'e. ¹⁸ Tu' chinulali' lu na' dul-la', nuhuóácali' ca yugu' bönni' nadó'ogaca lu na' le naca dxi'a. ¹⁹ (Ru'ílena' libí'ili' didza' ca tu'í didza' bönachi, tu' cabí réajni'ili' idütë lu yöl-la' bönachi queëli'.) Zí'alö budödi cuinli' len idütë le naca cázali' lu na' le ruá' dō, en lu na' le cabí naca tsahui', ate' gúcali' ca yugu' bönni' nadó'ogaca lu në'eguequi, en benli' xichini le ruá' dō na'. Na'a, guli'dödi idütë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

²⁰ Cate' ni' nácali' ca yugu' bönni' nadó'ogaca lu na' dul-la', bití' benli' xichini le naca tsahui'. ²¹ Na'a, ¿naru' buzi'itsali' xibé lë na' benli' zí'alö? Na'a lë na' benli' run ga rutuí'ili', en run ga nu gati tsaz. ²² Na'a chinulali' lu na' dul-la', en nácali' ca yugu' bönni' nadó'ogaca

queë' Dios, en ruzí'ili' xibé le run ga nácali' bönachi narúajaga quez queë' Dios, en le run ga dé queëli' yöl-la' na'bán idú. ²³ Lazxaj nu run dul-la' naca yöl-la' guti, pero le rúnmasé' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesucristo.

7

Le rucudzu' didza' yöl-la' nutsaga na'

¹ Böcha'ado', nülöli' núnbë'ëli' xibá queë' Dios. Nöz quézili' rinná be'e xibá na' nu bönni' tsanni ni zoë' nabanë'. ² Naca queëli' ca naca que tu nigula nutsaga ná'lennu-në' bönni', yú'unu lu në'ë bönni' queënu tsanni ni zoë' nabanë' ca rinná bë' xibá que yöl-la' nutsaga na', pero channö chinátië', nurúajnu lu na' xibá na'. ³ Caní naca, tsanni ni zoë' nabanë' bönni' queënu, channö utsaga ná'lennu-në' ia'tué' bönni', gunnu dul-la' le riguitsaj xibá que yöl-la' nutsaga na', pero channö chinátië' bönni' queënu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

⁴ Lësca' caní naca queëli', böcha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná bë' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxë'ë Dios. ⁵ Tsanni ni' guyú'uru' lu na' yöl-la' bönáchisö queëru', le rinná bë' xibá na' ben ga gulaca bë' le guzé ládxí'ru' le ruá' dö', le gulún dxin lu idútë le naca cázaru' para ilún ga gátiru'. ⁶ Na'a nuláru' lu na' xibá na' tu' nati cázaru' tsca naca le rinná bë' xibá na', nurúajnu be'e rë'u zí'alö. Caní naca para gaca gunru' xichinë' Dios lu yöl-la' na'bán cubi le runnë' queëru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

Le dzaga neda' le naca dul-la'

⁷ ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¿Biti' ca' run caní! La'tu' cabí buzéajni'i le rinná bë' xibá na' neda', biti' gunözda' naca dul-la' le runa'. La'tu' cabí zoa lu xibá na' le rnná: "Biti' së ládxu'u le dë que luzó'o", biti' gunözda' naca dul-la' yöl-la' rizé ladxi' le dë que luzá'a. ⁸ Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizé ládxa'a yúgu'të le ruá' dö'. Ga biti' ridxini xibá na', biti' naca bë' le naca dul-la'. ⁹ Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. ¹⁰ Dios gunná bë'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'. ¹¹ Guca bë' nazí' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

¹² Que lë ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë. ¹³ ¿Naru' bentsö lë na' naca dxi'a ga bidxín quia' yöl-la' guti? ¿Biti' ca' naca ca'! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatërö xihui' yúgu'të le naca dul-la'.

¹⁴ Nöziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que. ¹⁵ Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' lë na' ré'ënda' guna'. Le naca dul-la' le cabí rilé'eda' dxi'a, lë na' runa'. ¹⁶ Runa' dul-la' sal-la' biti' ré'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que lë ni na' naca bë'da' naca dxi'a le rinná bë' xibá na'. ¹⁷ Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'. ¹⁸ Nözda' biti' zóalen neda' le naca dxi'a, o huáca innía, lë na' naca dxi'a biti' zóalen le naca yöl-la' bönáchisö quia'. Ré'ënda' guna' le naca dxi'a, pero lá' néda'sö biti' gaca guna' lë na' naca dxi'a. ¹⁹ Biti' runa' le naca dxi'a le ré'ënda' guna', pero rúntica'sa' le biti' naca dxi'a le cabí ré'ënda' guna'. ²⁰ Que lë ni na', channö runa' dul-la' na' biti' ré'ënda' guna', calëga neda' caz runa' le, pero dul-la' na' dzaga neda' run ga runa' dul-la' na'.

²¹ Caní naca le naca queëru' yúgu'tëru'. Cate' ré'ëni'ru' gunru' le naca dxi'a, dzaga rë'u le run ga runru' le ruá' dö'. ²² Lu icja ládxí'da'ahua' raza ládxa'a xibá queë' Dios ²³ pero réquibe'eda' dzaga idútë le naca' le rinná be'e neda', ate' lë ni ridá'bagá' xibá queë' Dios yu'u icja ládxí'da'ahua'. Lë na' dzaga idútë le naca' run ga runa' dul-la'.

²⁴ ¿Bica' bayechi' neda'! ¿Nuzxi caz gaca usólá neda' lu yöl-la' bönáchisö quia' le run ga runa' dul-la'? ²⁵ ¿xclenë' Dios, chinularu' na' a ni'a que le benë' Xanru' Jesucristo! Que lë ni na', tsca naca le yu'u icja ládxí'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga ré'ënda' guna' dul-la'.

8

Le runru' tu' zóalenë' Dios Bö' Lá'ayi rë'u

¹ Que lë ni na, bítirō bi xíguia' nabága'gaquíë' yugu' bōnni' néquiguequinë' queë' Jesucristo, bōnni' na' bítirō tunë' ca rë'ëni yōl-la' bōnáchisō quégaquíë', pero ca rë'ënë' Dios Bō' Lá'ayi tunë'. ² Tu' naca' tuz len Jesucristo, Dios Bō' Lá'ayi, Nu na' nabániru', rácalenë' neda'. Que lë ni na', núlá' lu lë na' ben ga bena' dul-la', enca' lu yōl-la' guti. ³ Chinunë' Dios le cabí guca gun xibá na', tu' cabí bi guzxéqui' gun tu' nácaru' bōnáchisō. Dios gusól-lë'ë Zxí'ini cazë', ate' guljé' bōnachi ca nácaru' rë'u, nácaru' bōnachi dul-la', pero bití' bi dul-la' benë' Lë'. Busubaga' cuinë' dul-la' nabága'ru' rë'u, ate' caní guca, guchúguíë' que dul-la' runru' lu yōl-la' bōnáchisō queëru'. ⁴ Caní benë' para gaca gunru' idútë le naca tsahui' le rinná bë' xibá queë', núlōru' na' bítirō runru' ca rë'ëni yōl-la' bōnáchisō queëru', pero ca rë'ënë' Dios Bō' Lá'ayi runru'.

⁵ Bōnni' tunë' ca rë'ëni yōl-la' bōnáchisō quégaquíë', tuí' ládxi'gaquíë' le naca que yōl-la' bōnáchisō quégaquíë', pero bōnni' tunë' ca rë'ënë' Dios Bō' Lá'ayi, tuí' ládxi'gaquíë' le naca queë' Dios Bō' Lá'ayi. ⁶ Channō ruí' ládxi'siru' le naca que yōl-la' bōnáchisō queëru', tsaz gátiru', pero channō ruí' ládxi'ru' le naca queë' Dios Bō' Lá'ayi, chidë yōl-la' na'bán idú queëru', en ribózaru' dxi ladxí'. ⁷ Nútí'tës nu ruí' ládxi'sō le naca que yōl-la' bōnáchisō que, bití' rilé'e Dios dxi'a, tu' cabí run nu na' ca rinná bë' xibá queë' Dios, en bití' ca' gaca gun caní. ⁸ Que lë ni na', bōnni' na' tunë' ca rë'ëni yōl-la' bōnáchisō quégaquíë' bití' gaca ilunë' le raza ládxi'ë Dios.

⁹ Na'a, bítirō runli' ca rë'ëni yōl-la' bōnáchisō queëli', pero runli' ca rë'ënë' Dios Bō' Lá'ayi tu' zóalen cazë' Lë' libí'ili'. Tu bōnni' bití' zóalenë' Dios Bō' Lá'ayi lë', Nu na' risól-lë'ë Cristo queëru', bití' néquinë' queë' Cristo. ¹⁰ Tu' zóalenë' Cristo libí'ili', chinati caz idútë le guca cázali' tu' nōzi dul-la', ate' na' a nabánili'-në' Dios Bō' Lá'ayi tu' tunë' Dios libí'ili' tsahui'. ¹¹ Bō' Lá'ayi queë' Dios, Nu na' busubán Jesús lu yōl-la' guti, zóalenë' libí'ili'. Lë' cazë' Dios, Nu busubán Jesucristo lu yōl-la' guti, runë' ga nubanli' lu idútë le gúcali' le rati caz. Caní nunë' tu' zóalenë' Dios Bō' Lá'ayi libí'ili'.

¹² Que lë ni na', libí'ili' bōcha'a, dë tu le ral-la'ru', pero calëga que yōl-la' bōnáchisō queëru', para cabirō gunru' ca rë'ëni yōl-la' bōnáchisō queëru' na'. ¹³ Channō runli' ca rë'ëni yōl-la' bōnáchisō queëli', gátili' tsaz, pero channō len yōl-la' huáca queë' Dios Bō' Lá'ayi runli' ga ila'niti le runli' lu yōl-la' bōnáchisō queëli', gata' yōl-la' na'bán idú queëli'.

¹⁴ Yúgu'të nupa tun ca rë'ënë' Dios Bō' Lá'ayi nácacaga zxi'inë' Dios. ¹⁵ Dios Bō' Lá'ayi na' zóalenë' libí'ili' bití' nuzóë' libí'ili' leyúbólō ca bōnni' nadó'ogaca para gadxi idzóbili', pero chinunë' ga nácali' zxi'inë' Dios caz, en runë' ca' ga rulidzaru'-në' Dios, rnnaru': "Abba", le rnna: Dad. ¹⁶ Lë' cazë' Dios Bō' Lá'ayi ruzéajni'inë' bō' naca cázaru', en runë' ga nóziru' nácaru' zxi'inë' Dios. ¹⁷ Channō chinácaru' zxi'inë' Dios, gata' ca' queëru' tsózxón len Cristo le nequi queë' Xúziru' Dios. Caní gaca queëru' channō riguí' rizáca'lenru'-në' tsózxón Cristo para uzí'iru' xibé tsózxón len Cristo yōl-la' zxón queë' Dios.

¹⁸ Runi neda', yugu' lë ni riguí' rizáca'ru' na' a naca tu le cuídido'os tsca naca yōl-la' zxón na' gata' queëru' dza si' za'. ¹⁹ Ta'bōza yúgu'të le nunë' Dios, en ta'zë ládxi'gaca idxintë dza na' ulu'ë lahui Dios yugu' bōnni' nácacagaquíë' zxi'ini cazë'. ²⁰ Yúgu'të lë na' nunë' Dios gula'dódi lu na' le run ga ila'niti, calëga tu' gulë'ëni caz gaca caní, pero tu' benë' Dios ga naca caní. Benë' ca' ga naca lōza que idútë lë na' nunë', ²¹ ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zi' ca' xibé yōl-la' rusólá le nazáca'da' na' ulu'zi'ë xibé yugu' zxi'inë' Dios. ²² Nóziru' ta'guí' ta'zaca' yúgu'të le nunë' Dios ga ridxintë na'a dza, ca na' riguí' rizáca'nu tu nígula chízóa soábi' bí'ido' queënu. ²³ Riguí' rizáca'a, calëgasó yódzolió ni, pero riguí' rizáca'ru' ca' rë'u, sal-la' zóalenë' Dios Bō' Lá'ayi rë'u, Nu na' naca queëru' le ruluí' rë'u ca ral-la' gaca cázaru'. Riguí' rizáca'ru' tsanni ni ribózaru' dza ni' ulu'ë lahui Dios nácaru' idú zxi'inë', dza ni' únë' ca' idútë le naca cázaru'. ²⁴ Tu' runru' lōza lë ni, núláru' rë'u, pero channō gaca ilé'eru' lë na' runru' lōza, bití' naca tu le ribózaru'. Bití' ribózaru' le chirilé'eru'. ²⁵ Na'a, channō runru' lōza tu le cabí gaca ilé'eru', lu yōl-la' ribōza zxón ladxí' ribózaru' le.

²⁶ Lësca caní rácalenë' Dios Bō' Lá'ayi rë'u cate' rudú ládxi'ru', tu' cabí nóziru' bi ral-la' inábiru'-në' Dios, pero Lë' cazë' Dios Bō' Lá'ayi rudódë' xtídza'ru' lahuë' Dios, ate' lu yōl-la' rinaba yudxi queë' rinnëda' ládxi'ë, tsca cabí gaca nu inná. ²⁷ Dios ruyúé' le yu'u icja ládxi'do' gaca bōnachi, en nōzinë' le rë'ënë' innë' Dios Bō' Lá'ayi na', ate' Lë', ca rë'ëni quézinë' Dios, rudódë' xtídza'gaca nupa néquiguequi quez queë' Cristo lahuë' Dios.

Nadéli'tërōru' tu' zóalenë' Cristo rë'u

²⁸ Nóziru' tu'zi'ë xibé bōnni' yúgu'të le naca quégaquíë', bōnni' na' nadxi'iguequinë' Dios, ate' bulidzë' Dios légaquíë' ca nuzóa cazë' gunë'. ²⁹ Yugu' bōnni' na' guró cazë' queë' Dios zí'atëlō, buzóë' ca' quégaquíë' zí'atëlō ilácagaquíë' ca naca cazë' Zxi'inë', para gáquíë' Zxi'inë' lo ladaj zían bōché'ë. ³⁰ Nupa na' buzóë' Dios quégaquíë' zí'atëlō ca ral-la' ilácagaquíë', bulidzë' ca' légaquíë', ate' yugu' bōnni' na' bulidzë', benë' légaquíë' tsahui', ate' yugu' bōnni' na' benë' légaquíë' tsahui', benë' ga tu'zi'ë ca' xibé yōl-la' zxón queë'.

³¹ ¿Bizxi caz innaru' na'a ca nácagaca lë ni? Channö rácalenë' Dios rë'u, bití' ral-la' gádxiru' sal-la' bi ilún bönachi queëru'. ³² Dios, idú ládxë'ë bennë' queëru' Zxí'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsözxön len Zxí'inë' yúgu'të le dë? ³³ ¿Nuzxi caz gaca bi usubaga' nupa na' gurö cazë' queë' Dios? ¿Cuntu nu gaca, tu' run cazë' Dios ga nuhuóácaru' tsahui! ³⁴ ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácarö lo, bubanë' lu yöl-la' guti, ate' na'a zoë' cuita lë'ë ibëla Dios ga nácatërë' zxön, ate' rnnë' dxi'a uláz queëru' lahuë' Dios! ³⁵ Sal-la' bi raca queëru', nöz quéziru' nadxí'inë' Cristo rë'u. Nöziru' nadxí'inë' rë'u: sal-la' riguí' rizáca'ru', o sal-la' risëbi ládxí'ru', o sal-la' ta' bía ládxí'gaca bönachi rë'u, o sal-la' ridunru', o sal-la' riyadzaj le gácuru', o sal-la' zoa bönadxi queëru', o sal-la' ilútië' bönni' rë'u.

³⁶ Ca nácagaca lë ni nazúaj lu guichi lá'ayi, rnna: Tu' néquitu' quiu' Li', túntica'sö bönachi ga gátitu'. Nácatu' ca yugu' bö'cu' xzila', nadödigacaba' lu na' nu guti légacaba'.

³⁷ Na'a, tu' zóalen rë'u Nu na' nadxí' rë'u, nácatërö löza idéli'ru' lu le raca queëru'. ³⁸⁻³⁹ Que lë ni na' runi neda': Bití' bi sequi' gun ga bití'rö idxí'inë' Dios rë'u. Nadxí'inë' rë'u tu' néquiru' queë' Xanru' Jesucristo. Bití' sequi' gun caní yöl-la' guti o yöl-la' na'bán, o yugu' gubáz lá'ayi o nupa ta'nná bë', o yugu' yöl-la' huáca que tu' xihui', o bití'tës bi zoa o bití'tës bi si' za', o tu le dë xitsá'alö o tu le dë cadxí'ilö, o bití'tës bi nunë' Dios.

9

Dios gurö cazë' queë' bönachi Israel

¹ Ruá'a didza' idútë li tu' néquida' queë' Cristo, ate' röjlöz didza' ni le naca queë' Dios Bó' Lá'ayi le yu'u icja ládxí'da'ahua'. ¿Bití' rizi' yë'a! ² Ruhuí'inide'eda', en risëbítica'sö ládx'a a ³ tu' raca ládx'a' guna' ga ulu'lë' böchi' luzá'a, bönni' uláz quia'. La'tu' huácalen légaquië', guë'ëni quézida' ubéaj ládxë'ë Dios neda', en ulá'alena' Cristo. ⁴ Yugu' bönni' uláz quia' na' náacagaquië' zxf'ini xi'sóë' Israel, ate' Dios bë'ë légaquië' lataj ilácagaquië' zxf'ini cazë'. Yöl-la' zxön queë' Dios guzóalen légaquië', ate' Dios budödë' lu ná'agaquië' didza' rucá'ana tsahui', enca' xibá queë'. Bulidzë' légaquië' para tseaj ládxí'gaquië' Lë', ate' budödë' lu ná'agaquië' yugu' le guzxi' lu në'ë gunë' le ilún tsahui' bönachi. ⁵ Náacagaquië' zxf'ini xi'sóagaquië' xuz xtó'otu' Abraham, en Isaac, en Jacob, ate' ladaj dí'a dza quégaquië', ca naca yöl-la' bönachi queë', guljë' Cristo, Nu naca caz Dios, en rinná bé'enë' yúgu'të. ¿Rácatica'sö queë' yöl-la' ba! ¡Ca' gaca!

⁶ Sal-la' yúgu'të bönni' uláz quia' bití' nazi' lu ná'agaquië' Cristo, bití' ral-la' innaru': Nitös böaca xtidzë'ë Dios. Calëga yúgu'të zxf'ini xi'sóë' Israel náacagaquië' idú bönachi Israel, nupa néquiquequi queë' Dios. ⁷ Sal-la' gúljagaquië' zían zxf'ini xi'sóë' Abraham, bití' guláquië' yúgu'të idú zxf'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' zxf'ini xi'sóë' Isaac ilaca idú zxf'ini xi'sú'." ⁸ Caní naca, nupa náacagaca zxf'inë' tu bönni' néquinë' queë' Dios, calëga yúgu'të náacagaquië' zxf'inë' Dios. Lë'sca caní, náacagaca idú zxf'ini xi'sóë' Abraham núpasö na' náljagaca ni'a que lë na' guzxi' lu në'ë Dios. ⁹ Lë na' guzxi' lu në'ë Dios unödzjë' queë' Abraham rnna caní: "Ia'tú iz na'a dza huóda', ate' Sara quiu' uzóanu-bi' tubi' bi'i bönni'do'."

¹⁰ Calëgasö lë ni guca caní, pero lë'sca' cate' Rebeca ni' nuá'anu-bi' yugu' bi'i bönni'do' queë' Isaac, xuz xtó'otu', ¹¹⁻¹³ cate' ni' si' iláljabi', en bití' bi núnigacabi' le naca dxi'a o le ruá' dö', Dios gudxë'-nu Rebeca na', gunné': "Bi'i bönni' zí'alö quiu' gunbi' xichinbi' bi'i buropi." Didza' ni röjlöz lë na' nazúaj lu guichi ca gunné' Dios, le rnna: "Bidxí'ida'-në' Jacob, en calëga Esau." Caní guca, bugá'ana tsutsu le buzöë' tsaz Dios ca naca lë na' chigurö cazë'. Que lë ni na' bití' raca caní ni'a que tu le gaca ilún bönachi, pero naca caní tu' ribö cazë' Dios nu rulidzë'.

¹⁴ ¿Bizxi caz innaru' na'a? ¿Naru' runtsë' Dios le cabí naca tsahui'? ¿Bití' ca' runë' caní! ¹⁵ Dios gudxë' Moisés, gunné': "Huéchi' ládx'a' nu ré'ënda' huéchi' ládx'a', en gü'i ládx'a' nu ré'ënda' gü'i ládx'a'." ¹⁶ Que lë ni na', bití' raca caní ni'a que le té'ëni caz bönachi, o tu' runë' bayudxi nu bönni', pero naca tu' ré'ëni quézinë' Dios, ruhuéchi' ládxë'ë bönachi. ¹⁷ Ca naca lë ni nazúaj lu guichi lá'ayi ca na' Dios gudxë' Faraón, gunné': "Que lë ni na' buzóa' li' ga rinná bë'u para ulu'a lahui yöl-la' huáca quia' ga zu', en guna' ga ilunbé' bönachi idútë yödölió

le naca' neda'." ¹⁸ Caní naca, Dios ruhuéchi' ládxë'ë nu rë'ëni quézinë', en lësca' caní runë' zidzaj icja ládxi'da'ahuë' nu bönni' rë'ënë' gunë' zidzaj icja ládxi'da'ahuë' bönni' na', ca na' benë' queë' Faraón na'.

¹⁹ Na'a guiëli' neda': "Channö caní naca, ¿bizx que rusubáguë'ë Dios bönachi xíguia'? ¿Nuzxi caz gaca tá'baga' le rë'ëni quézinë' Dios gunë'?" ²⁰ ¡Biti' ca' naca caní! ¿Nuzxi caz lí' rnníó' que Dios? ¿Naru' huácatsö tu' yusu' néquini yu gufé bönni' huen rö'ö, inná: "¿Bizx que benu' neda' caní?" ²¹ ¿Naru' cabí dë lu në'ë bönni' huen rö'ö gunë' que guna' na' tu' yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga bití' naca liná'?

²² Rë'ëni quézinë' Dios ulu'ë lahui ca gunë' xíguia' nu ruá' dö' en gunë' ga gaca bë' yöl-la' huáca queë', pero lu yöl-la' riböza zxon ladxí' queë' biá' gulënë' yugu' bönni' ni' ral-la' ichúguie' quégaquie', yugu' bönni' na' nabága'gaquie' xíguia', en run bayudxi usunitié' légaquie'. ²³ Caní runë' Dios para gaca bë' nácatërö lesaca' yöl-la' ruzá' ladxí' queë', lë na' rulu'ë lahui lógaca nupa na' ruhuéchi' ládxë'ë, bönni' na' buzóë' quégaquie' zí'atëlö ulu'zi'ë xibë yöl-la' zxon queë'. ²⁴ Yugu' bönni' caní bulidzë' Dios. Calégasö bulidzë' netu', bönachi judío, pero lësca' bulidzë' bönachi izá'a. ²⁵ Ca naca lë ni nazúaj lu guichi lá'ayi ca na' bë'ë didza' Oseas uláz queë' Dios, gunnë':

Nupa bití' nácgaca bönachi quia',

gu'a láguequi: Bönachi quia',

ate' nupa na' bití' bidxí'ida',

gu'a láguequi: Nupa nadxí'ida'.

²⁶ La' ná'asö ga gunniá' quéguequi:

"Bití' nácali' bönachi quia",

si' láguequi: "Yugu' xzí'inë' Dios ban."

²⁷ Na'a, ca naca quégaca xzí'ini xi'sóë' Israel, Isaías gunnë':

Sal-la' ila'yanë' xzí'ini xi'sóë' Israel,

en iláquie' tsa naca yuzxi tu ra' yegu zxon,

ulu'lë' nabábasë'.

²⁸ Xanru' Dios la' guntë' ga gaca iduté

lë na' ichúguie' quégaca bönachi yödzölió ni.

²⁹ Lësca' caní Isaías bë'ë didza' zí'atëlö, gunnë':

Dios, Xanru' unná bë' idú,

la'tu' cabí bucá'anë' queëru' yugu' xzí'ini xi'sóaru',

ugá'anaru' ca yödzö Sodoma, en yödzö Gomorra,

yugu' yödzö na' busunitié' Dios.

Bönachi Israel, en didza' dxi'a

³⁰ ¿Bizxi caz innaru' na'a? Yugu' bönni' bití' nabábagaquie' Israel chibila'déli'në' nuhuóacagaquie' tsahui' lahuë' Dios, en bití' gulunë' bayudxi ulu'huóaquie' tsahui' lahuë' Dios, pero nuhuóacagaquie' tsahui' tu' ta'yéajlë'ë Dios. ³¹ Na'a, sal-la' gulunë' bayudxi yugu' bönni' Israel ilunë' ca rinná bë' xibá queë' Dios, le ral-la' gun ga ilácagaquie' tsahui', bití' bila'déli'në' le ral-la' gata' quégaquie' tu' tunë' ca rinná bë' xibá na'. ³² ¿Bizx que na' guca caní? Caní guca, tu' cabí gulunë' caní lu yöl-la' réajlë' quégaquie' Dios, pero rácasö quégaquie' gulë'ënnë' ilunë' ca rinná bë' xibá na', ate' que lë ni na' gula'chíxinë', o huáca innaru': Yöjchégu'gaquie' lu lë na' nazí'i le: Guiöj Ga Nu Rójchegu'. ³³ Ca naca lë ni nazúaj lu guichi lá'ayi, rnna:

¡Buli'yú! Uzóa'-në' yödzö Sión bönni' na'

gáquie' ca tu guiöj ga nu tsöjchegu',

guiöj na' gun ga nu ichixi inigui.

Nu tséajlë' Lë', bití' ca' utufí' nu na'.

10

¹ Libí'ili', böcha'ado', le rizë ládxa'a, en le rinábida'-në' Dios gunë' quégaca bönachi Israel naca gunë' ga ulu'lë'. ² Runa' ba nalí quégaquie', idú ládxi'gaquie' tuí' ládxi'gaquie' Dios, pero caléga len yöl-la' réajni' idú. ³ Bití' nözguequinë' ca runë' Dios, runse' ga nácaru' tsahui', pero té'ënnë' ilún cuíngaquie' tsahui' rácasö quégaquie', en bití' ta'cu'ë nōxaj ladxí' lahuë' Dios para gaca gunë' légaquie' tsahui'. ⁴ Budxi benë' Cristo le rë'ëni gun xibá queë' Moisés, benë' ga gaca ulu'huóaca tsahui' yúgu'të nupa ila'yéajlë' Lë'.

⁵ Ca naca que nu huóaca tsahui' tu' run ca rinná bë' xibá queë' Dios, buzúajë' Moisés lu guichi le rnna caní: "Bönni' na' gunë' iduté ca rinná bë' xibá na', soë' ibanë' tu' gunë' caní." ⁶ Na'a, ca naca que nu huóaca tsahui' tu' réajlë' Dios, rnna caní: "Bití' innó' lu icja ládxi'do'o, bití' innó': ¿Nuzxi caz cuen ni' yehua' yubá?" Lë ni naca, para gun nu na' ga huötjë' Cristo, ⁷ en bití' innó': "¿Nuzxi caz huötaj ga dë lataj que nupa chinátigaca?" Lë ni

naca, para gun nu na' ga cuenë' Cristo, urúajë' lu yöl-la' guti. ⁸ Na'a, ¿bizxi caz rnna? Caní rnna: "Gala' ga zu' zoa caz xtídzë'ë Dios. Lu ru'u, en lu icja ládxi'do' o zoa xtídzë'ë na'." Lë ni naca didza' que le réajlë'ëru' Dios runtú' libán que, rnnatu': ⁹ "Channö didza' gu'u gaca bë' Jesús náquië' Xanu', en uyéaj lë'u idú ládxi'u Dios busubanë' Lë' lu yöl-la' guti, uló' li'." ¹⁰ Lu icja ládxi'do' oru' réajlë'ëru' Jesús para gácaru' tsahui', ate' len didza' ru'í'iru', rulu'í'iru' lahui le náquië' Jesucristo para uláru'.

¹¹ Nazúaj lu guichi lá'ayi le rnna: "Biti' ca' ulu'tuf'i yúgu'të nupa ta'yéajlë' Lë'." ¹² Dios, la' tuz ca ru'í' ládxië'ë yugu' bönni' judío, enca' yugu' bönni' idútë yödzölió, tu' Lë cazë' Xanru' náquië' Xángaqüië' yúgu'të, en nápadë'ë bi unödzejë' quégaca yúgu'të nupa tu'lidza Lë'. ¹³ Ca naca lë ni nazúaj lu guichi lá'ayi, rnna: "Ulu'lá yúgu'të nupa ulu'lidza Lë' Xanru'." ¹⁴ ¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca queë'? ¿Nacxi gaca ila'yönnë' channö cuntú nu zoa nu gun libán lógaquië'? ¹⁵ ¿Nacxi caz gaca ilunë' libán channö cuntú nu isöl-la' légaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacua' bönni' rójégaquië' libán que le ribequi dxi ládxi'ru', en tunë' libán que didza' dxi'a."

¹⁶ Na'a, calëga yúgu'të' gula'z'i lu ná'agaquië' didza' dxi'a. Ca naca lë ni, Isaías gunné': "Xan, ¿nuzxi caz guyéajlë' le bentu' libán que?" ¹⁷ Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë' Cristo.

¹⁸ Na'a rnní'a: ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna:

Idútë yödzölió bila'yöni ch'í'iguequi.

Yúgu'të lataj bila'dxin xtídz'a'guequi.

¹⁹ Lësc'a' rnní'a: ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné':

Gun caza' ga uzxé'eli',

tu' idxí'ida' bönachi bití' nabábagaca lib'í'ili'.

Ni'a quégaca bönachi cabí ta'yéajni'i guna' ga leli'.

²⁰ Gudödi ni' gúcadë'ë rugu ladxí' Isaías na', en bë'ë didza' uláz queë' Dios, gunné':

Bila'dzöli neda' nupa bití' gula'guilaj neda'.

Bulu'í' lahua' lógaquië' bönni' bití' bi gula'nábinë' neda'.

²¹ Na'a, ca naca quégaquië' bönni' Israel, Isaías na' bë'ë didza' uláz queë' Dios, gunné': "Idú dza bulí na'a, bulidza' bönachi bití' túngaca ca rnna xtídz'a', en ta'dá'baga' neda'."

11

Nupa nulágaca ladaj bönachi Israel

¹ Na'a rnní'a: ¿Naru' nusán në'ë Dios bönachi Israel? ¡Biti' ca' naca caní! Neda' caz naca' bönni' Israel. Naca' xzí'ini xi'sóë' Abraham, en nababa' di'a dza queë' Benjamín, xzí'ini cazë' Israel na'. ² Dios bití' nusán në'ë bönachi queë', nupa na' guró cazë' queë' dza ni'te. ¿Naru' cabí núnbë'eli' lë na' nazúaj lu guichi lá'ayi ca na' benë' Elías? Bulidzë' Dios, en buzégüië' bönachi Israel didza', gunné': ³ "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzégugacatu'-ba' bôa' bédxido' lo' Li'. Tuza' neda' nagá'ana' quiu', ate' té'ënnë' ilútië' ca' neda'." ⁴ Na'a, ¿bizxi didza' bubi'ë Dios? Caní gunné': "Nun ch'í'igaca caza'-në' quia' tsónnalalaj yu' chi gáyu'ë bönni' bití' tu'zechu xzibagaquië' lo budó' guíój na' nazí'i le Baal." ⁵ Lësc'a' caní naca dza ni zóaru' na'a, nagá'anagaca bal-la bönachi Israel, nupa na' guró cazë' queë' Dios tu' ruzá' ládxië' caní quégaquië'. ⁶ Channö naca le ruzá' ládxië'ë caní quégaquië', bití' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxië'ë queëru' Dios bíti'rö gaca tu le ruzá' ládxië'ë queëru'.

⁷ ¿Bizxi caz innaru' na'a? Lë na' gula'guiljë' bönni' Israel, bití' bila'déli'në', pero chibila'déli' le nupa ni' guró cazë' queë' Dios, ate' ia'zica'rë' na', Dios benë' zidi icja ládxi'do'gaquië'. ⁸ Ca naca lë ni nazúaj lu guichi lá'ayi, rnna: "Dios benë' ga nácaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, bití' ca' ta'yéajni'inë'. Caní naca quégaquië' ga ridxintë dza ni zóaru' na'a. ⁹ Ca naca lë ni bë'ë ca' David didza', gunné': Yugu' lani quégaquië' ulu'huóaca le ila'zón légaquië',

en ca tu yalaj ga ila'rölinë'.

Ilaca ca' le ilún ga ila'chíxinë',

en ca tu le uzí' lëbi légaquië'.

¹⁰ Ila'chul-la guíój lógaquië', para cabí ila'lé'enë'.

Ila'yechu tsaz cúdzu'gaquië' tu' ilu'ë yua'.

Ca gaca ulu'lagaca bönachi bití' nácacaca judío

¹¹ Na'a rnní'a: ¿Naru' gula'chíxinë' yugu' bönni' judío ga bidxintë gula'nítië' tsaz? ¡Biti' ca' guca ca'! Gula'dá'baguë'ë xtidzë'ë Dios, ate' na'a Dios ru'ë lataj ulu'lágaca nupa biti' nácacaga judío para gunë' ga ulu'zxé'enë' yugu' bönni' judío léguequi. ¹² Le gulunë' bönni' judío, gula'chíxinë', ben ga bidxín quégaca bönachi yödžölíó ni le naca ca tu yöl-la' tsahui'. Channó caní guca, guta' yöl-la' tsahui' quégaca nupa biti' nácacaga judío tu' gula'nítië' yugu' bönni' judío, xžöntërö gaca le gata' quéguequi cate' yugu' bönni' judío na' ulu'huóáquië' queë' Dios.

¹³ Na'a rea' libí'ili' biti' nácali' judío, rnní'a: Tu' naca' gubáz nasöl-lë'ë Dios lógaca nupa biti' nácacaga judío, runa' xžön lë na' dë lu na'a ¹⁴ para nadxi ca' huáca guna' ga ulu'zxé'enë' bönni' uládz quia' libí'ili', en caní guna' ga ulu'lë' bal-lë'. ¹⁵ Channó bulu'huóáca bönachi nacuá' idú yödžölíó queë' Dios tu' bulu'nítië' yugu' bönni' judío xilátjagaquië', xžöntërö gaca le gata' quéguequi cate' ulu'huóázië' xilátjagaca cazë' na'. Gaca ca raca cate' tu'bángaca nupa chinátigaca. ¹⁶ Channó rigú'uru' quez queë' Dios cúa nílado' rubéajru' zí'aló, lësca' cúa na' nagá'ana naca queë', en channó uzóaru' quez queë' Dios luí yaga, lësca' ilaca quez queë' ni'a në'e yaga na'.

¹⁷ Nácaquie' bal-lë' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yöjtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichóni yaga olivo dxi'a na'. ¹⁸ Que lë ni na', biti' gun ba xžön cuinli', biti' uzóali' tsólá'aló nupa nácacaga ca ni'a në'e na' narúgugaca. Channó run ba xžön cuinli', ral-la' inözili' calëga libí'ili' rugáguli' luí yaga na', pero luí yaga na' rugagu libí'ili'.

¹⁹ Nadxi ca' innó: "Gula'rugu ni'a në'e yaga na' para gaca tsázia' neda' xilátjagaca." ²⁰ Nácatë didza' ru'u, pero gula'rúgië' tu' cabí gula'yéajlë'ë, ate' yöjtó'oli' yaga na' tu' réajlë'u Dios. Que lë ni na', biti' ral-la' gun ba xžön cuinu', pero ral-la' gádxinu' Dios. ²¹ Channó benë' Dios léguequi xíguia', nupa na' nácacaga caz ni'a në'e yaga dxi'a na', ¿naru' cabí gunë' xíguia' ca' li'? ²² Buyútsöca' na'a ca náquië' dxi'i ladxí' Dios, en ca rúndë'ë ca' xíguia'. Le nácatë rúndë'ë xíguia' nupa na' gula'chixi, pero náquië' dxi'i ladxí' len li'. Que lë ni na', ral-la' gúntica'su' ca sa'yéaj yöl-la' dxi'i ladxí' queë' na', para cabí ichúgië' ca' li' lu yaga queë' na'. ²³ Lësca' caní gaca quégaquië' channó cabí ulu'gá'anë' lu yöl-la' cabí réajlë' quégaquië', tsöjtá'gaquië' leyúbölö lu yaga na', tu' napë' Dios yöl-la' huáca gunë' ga tsöjtá'gaquië' le leyúbölö. ²⁴ Nacu' li' ca tu ni'a në'e gurugu lu yaga olivo guí'a, en yöjtó'o yaga olivo dxi'a ga cuntú nu udá' tu ni'a në'e yaga guí'a. Yénni'tërö huáca quégaquië', nácacaga cazë' ni'a në'e yaga dxi'a na', huáca tsöjtá'gaquië' leyúbölö lu yaga quéguequi cazë' na'.

Ca gaca ulu'lágaca bönachi Israel

²⁵ Bócha'ado', rë'ënda' inözili' lë ni bigachi', para cabí gun ba xžön cuinli' ca naca yöl-la' réajni'i queéli'. Bulu'huóáca bal-la bönachi Israel zidi ladxí', ate' caní lláquië' ga idxinrö dza chinayázgaca yúgu'të bönachi biti' nácacaga judío ga rinná bë'ë Dios, nupa na' ral-la' ulu'lágaca. ²⁶ Tödi na' gata' lataj ulu'lë' ca' yúgu'të bönni' Israel, ca na' nazúaj lu guichi lá'ayi, rnaa:

Irúaj yödžö Sión Nu rusölá,
en ugúa le ruá' dö' nabága'gaca xzí'ini xi'sóë' Jacob.

²⁷ Lë ni naca didza' dzaga gúnlena' légaquië' cate' ugúa' dul-la' nabága'gaquië'.

²⁸ Caní naca, gula'dá'baguë'ë didza' dxi'a, ate' Dios guléaj ládxë'ë légaquië' para gaca uláli' libí'ili', pero nadxi'inë' ca' légaquië', tu' guró cazë' queë' xuz xtó'ogaquië'. ²⁹ Tsaz runödžjë' Dios le runödžjë', en tsaz rulidžë' bönachi. ³⁰ Ca na' naca queéli', zí'atëlö biti' benli' ca rnaa xtídzë'ë Dios, ate' na'a ruhuéchi' ládxë'ë Dios libí'ili' tu' cabí gulunë' yugu' bönni' judío ca rnnë'. ³¹ Lësca' caní naca quégaquië' na'a, biti' tunë' ca rnnë' Dios, pero caní gácasö ga idxinrö dza huéchi' ládxë'ë Dios légaquië', ca ruhuéchi' ládxë'ë libí'ili' na'a. ³² Dios guléaj ládxë'ë yúgu'të bönachi para ila'dá'baguë'ë xtídzë'ë, para gaca huéchi' ládxë'ë yúgu'të'.

³³ Xžöntërö naca yöl-la' tsahui' queë' Dios, lë na' naca yöl-la' huáca xžön, en yöl-la' réajni'i queë'. Cuntú nu gaca tséajni'i le nuzóë' Dios gunë', en biti' gaca nu inözi yugu' le runë' Dios. ³⁴ ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'? ³⁵ ¿Nuzxi caz bi bunódžaj queë' Dios para gun bayudxi bi ubi'ë Dios que? ³⁶ Yúgu'të le dë narúajgaca lu në'ë Dios, en taca lu në'ë, en nácacaga para uzi'ë xibéquequi. ¡Gácatíca'sö queë' Dios yöl-la' ba! ¡ca' gaca!

12

Ral-la' udödi cuinru' quez queë' Dios

¹ ¡Böchi' luzá'ado'! ¡Ruhuéchi' ládxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu

le tsaza ládxë'ë Dios. Lë ni ral-la' gunli', ca sa'yéaj le reaj ládxi'ru'-në' Dios. ² Bítì'rö gunli' la' lëbisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxi'do'oli'. Guli'gún caní para gaca inözili' le naca dxi'a rë'enë' Dios gunli', lë na' raza ládxë'ë, en le naca idú.

³ Na'a, tu' zoa le buzá' ládxë'ë quia' Dios, rea' yúgu'tëli': Biti' gun ba zxön cuinli', le cabí ral-la' gunli', pero ral-la' gácali' nōxaj ladxi' ca ribequi'icjali', tsca naca yöl-la' réajlë' queëli' Dios le bennë' que queëli'. ⁴ Ca na' naca tuz idútë le naca cázaru', sal-la' zían le nagudi' dzágalenru', en calëga tuz dxin tun yúgu'të le zían na' nagudi' dzágalenru', ⁵ lësca' caní naca queëru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'tëru' nácaru' tuz turu' len ia'turu'.

⁶ Tu turu' dë lu ná'aru' tu le bennë' queëru' Dios, ate' nadzá'gaca tu tu tsca naca le buzá' ládxë'ë que queëru'.

Bönni' na' Dios bunödzjë' queë' gu'ë didza' uláz queë', tsca réajlë'ë Lë', ral-la' gu'ë didza' bönni' na'.

⁷ Bönni' na' Dios bunödzjë' queë' gunë' xichinë', dxi'ado' ral-la' gunë' dxin na'.

Bönni' na' Dios bunödzjë' queë' usédinë' bönachi, dxi'ado' ral-la' usédinë' bönachi.

⁸ Bönni' na' Dios bunödzjë' queë' uzéajni'inë' bönachi, dxi'ado' ral-la' uzéajni'inë' légaquië'.

Bönni' bi unödzjë' que nu yúbölö, idú ládxë'ë ral-la' unödzjë'.

Bönni' rinná bé'enë' bönachi, idú ládxë'ë ral-la' gunë' caní.

Bönni' rácalenë' luzë'ë, len yöl-la' rudzeja ral-la' gunë' caní.

Yugu' le ral-la' gun nu nequi queë' Cristo

⁹ Ral-la' idxi'ili' luzá'ali' idú ládxi'li'.

Buli'cá'ana le ruá' dö'.

Guli'güf' ládxi'li' gunli' le naca dxi'a.

¹⁰ Guli'dxi'i-guéquinë' luzá'ali'

ca nadxi'igueli'-në' böchi' cázali'.

Ca runli'-në' bal luzá'ali'

ral-la' gunli' ga gácarë' lo ca nácali' la' cuínsili'.

¹¹ Buli'típatica'sö ládxi'li', en biti' gácali' xöhuëdi.

Guli'gún xichinë' Xanru' idú ládxi'li'.

¹² Buli'dzeja tu' zoa le runli' löza.

Guli'cöz zxön ladxi' cate' bi rigui'i rizáca'li'.

Buli'lídzatica'së' Dios.

¹³ Buli'nödzaj quégaca bönachi queë' Cristo tsca nayádzajaguequinë'.

Guli'güf' lataj ga ila'cuá' nupa ta'dxin queëli'.

¹⁴ Guli'nábinë' Dios gunë' dxi'a

quégaca nupa ta'bía ládxi'gaca libí'ili'.

Guli'naba gaca dxi'a quégaquië',

en biti' udxíali' légaquië' dö'.

¹⁵ Buli'dzéjalen nupa tu'dzeja.

Guli'cödxilen nupa ta'bödxí.

¹⁶ Guli'gaca tuz len luzá'ali'.

Biti' gun ba zxön cuinli',

pero guli'gún tsözxön yugu' bönni' nōxaj ladxi'.

Biti' guéquili' chinadéli'li' idútë yöl-la' réajni'i.

¹⁷ Cuntu nu ubí'ili' que,

biti' guá'ali' dö' que nu ruá' dö' queëli'.

Guli'gún dxi'a quégaca yúgu'të bönachi.

¹⁸ Channö huáca, tsca séqui'li', guli'cöz dxi'a

len yúgu'të bönachi.

¹⁹ Böchi' luzá'ado', biti' uzí' lëbili' bönachi la' libí'isili', pero guli'güf' lataj ubi'ë Dios quégaca bönachi na', tu' nazúaj lu guichí lá'ayi le rnna:

Neda' caza' uzí' lëba'.

Neda' ubi'a quégaca bönachi.

Caní gunnë' Xanru' Dios. ²⁰ Lësca' caní rnna:
Channö zoë' nu bönni' bití' ridzáguie' lí' dxi'a,
en ridunë', bë'ë le gahuë'.

Channö ribidxë' nisa, bë'ë le guí'jë'.

Cate' gunu' caní, gunu' ga utuí'inë' bönni' na'.

²¹ Bití' gu'u lataj inná be'e le ruá' dö' lí',

pero gunná be'e le ruá' dö' na',

ugunu' dxin le naca dxi'a.

13

¹ Yúgu'tëli' ral-la' gunli' ca ta'nnë' bönni' yúlahui'. Dios caz budödë' lu ná'agaquie' yöl-la' unná bë' ná'pagaquie', en nucu'ë xilátjagaquie' bönni' ni dë lu ná'agaquie' yöl-la' unná bë'.

² Que lë ni na', nu ridá'baga' yúlahui' ridá'baga' le nuzóa cazë' Dios, ate' nupa ta'dá'baga' caní, nabága'gaca xigua'. ³ Nacu'ë bönni' yúlahui', calëga para ulu'zenë' bach nu run le naca dxi'a, pero para ulu'zenë' bach nu ruá' dö'. Channö ré'ënu' gunu' ga bití' ulu'zenë' lí' bach, ben le naca dxi'a, ate' uruju' dxi'a lógaquie'. ⁴ Náquie' bönni' yúlahui' ni'a në'ë Dios para gácalenë' lí', pero channö runu' le ruá' dö', ral-la' gádxinu', tu' cabí nu'ë nítisó xiyaga yúlahui'. Náquie' ni'a në'ë Dios para uzí' lëbë', gunë' xigua' nu ruá' dö'. ⁵ Que lë ni na' run bayudxi gunli' ca rnnë' bönni' na' dë lu në'ë, calëgasó tu' budödë' Dios lu në'ë gunë' libí'ili' xigua', pero lësca' para soa dxi ládxi'do'oli' lahuë' Dios. ⁶ Que lë ni na' ca' riguíxaj lálali' que yúlahui', tu' ná'agaquie' bönni' yúlahui' ni'a në'ë Dios, en tunë' le nudódi cazë' lu ná'agaquie'.

⁷ Gulí'guíxaj yúgu'të bönachi le rál-la'li' quëgaquie'. Gulí'guíxaj lálali' lu na' nu ral-la' quíxaj lálali'. Gulí'guíxaj dumi nu ral-la' quíxajali'. Gulí'gadxi nu ral-la' gádxili', en guli'gún bal nu ral-la' gunli' bal. ⁸ Cuntu nu bi ral-la' gál-la'li' que, pero tuz ral-la' idxi'ili' luzá'ali', tu' chibén idú ca rinná bë' xibá queë' Dios nu nadxí'i luzë'e. ⁹ Caní ta'nná bë' xibá na':

Bití' gunu' dul-la' le riguitsaj xibá que yöl-la' nutsaga na'.

Bití' gútiu' bönachi.

Bití' cuanu'.

Bití' inníó' que luzó'o le cabí nácatë.

Bití' së ládxi'u le dë que luzó'o.

Yugu' xibá ni, en yúgu'të xibá ia'zica'rö, údxi gun nu run ca rnna didza' rnna caní:

Bidxí'i luzó'o ca nadxí'i cuinu'.

¹⁰ Nu na' nadxí'i luzë'e bití' bi run que luzë'e le ruá' dö'. Caní naca, nu na' nadxí'i luzë'e run idú ca rinná bë' xibá queë' Dios.

¹¹ Gulí'gún caní tu' nözili' ca raca dza ni zóaru' na'a, en nözili' ca' chibidxín dza usubán ládxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusí lorú' réajlë'ëru' Cristo. ¹² Ga zóaru' na'a naca ca chi'i dzö'ölö, ate' chizóa tödi rëla na', pero ga na' zoë' Cristo naca ca lahui' dza, ate' chizóa tsöjsóaru' ni'. Que lë ni na' ral-la' ucá'anaru' le tun bönachi ga naca chul-la' que dul-la'. Ca na' rugacu cuinë' tu bönni' rejë' gudil-la le run chí'i lë' lu gudil-la, ral-la' taru' lu bení' queë' Dios, le gun chí'i rë'u lu na' tu' xihui'. ¹³ Para gunru' caní ral-la' gunru' dxi'a ca ral-la' gun nu ridá lahui' dza.

Bití' ral-la' súdxiru', en cabí gágulë'ëru'.

Bití' ral-la' gunru' le ruá' dö', en calëga le gun ditaj rë'u.

Bití' ral-la' tál-lalenru' luzá'aru', en cabí uzxë'ëru' luzá'aru'.

¹⁴ Na'a, ral-la' un cuinli' lu icja ládxi'do'oli' ca náquie' Xanru' Jesucristo, en bití' güf'i ládxi'li' gunli' le rizë ládxi'li' lu yöl-la' bönáchisö queë'li'.

14

Bití' ral-la' si' quídza'ru' böchi' luzá'aru'

¹ Gulí'güf' lataj nu réajlë' Cristo gun libí'ili' tsözxön sal-la' bití' naca idú ca réajlë' nu na' Lë'. Bití' tál-lalenli' nu na' ca ná'cagaca le runi nu na' huáca nu gun. ² Ca naca lë ni, nacu'ë bönni' runi légaquie' huáca ilahuë' yúgu'të le tagu bönachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'. ³ Na'a, bönni' na' rahuë' yúgu'të bití' ral-la' uzöë' tsölá'alö nu bönni' bití' rahuë' yúgu'të, en lësca' caní, bönni' na' bití' rahuë' yúgu'të bití' ral-la' si' quídzë'ë bönni' na' rahuë' yúgu'të, tu' nazí' lu në'ë Dios iropë' bönni' na' ta'yéajlë'ë Cristo. ⁴ ¿Nuzxi caz lí', rizí' quídzu'u bönni' huen dxin que nu yúbölö? Bönni' na' náquie' huen dxin queë' Dios, lahuë' Xan cazë' urúajë' tsahui' o bití' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

⁵ Nadxi ca' zoë' nu bönni' runrë' bal tu dza ca runë' bal ia'zica'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'. ⁶ Bönni' na' runë' bal tu dza, runë' le bal para tseaj ládxi'ë Xanru', ate' bönni' na' bití' runë' bal dza

na', para tseaj ládxë'ë Xanru' bití' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxë'ë Xanru', en rë'ë Dios: "Xclenu'", ate' bönni' na' bití' rahuë' yúgu'të, bití' rahuë' le para tseaj ládxë'ë Xanru', en rë'ë ca' Dios: "Xclenu'."

⁷ Bití' zoë' nabanë' queëzë' nitüë' bönni' nabábalenë' rë'u, en bití' ratië' queëzë' nitüë' bönni'. ⁸ Channö zóaru' nabanru', para tseaj ládxí'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequí queëziru' queë' Xanru'. ⁹ Que lê ni na' ca' gütíë' Cristo, en bubanë', para gáquië' Xángaca nupa chinátigaca, en nupa nabángaca.

¹⁰ Na'a lí, ¿bizx que richugu bë'u böchi' luzó'o? ¿Bizx que ruzú' tsölá'alö böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u. ¹¹ Ca naca lê ni nazúaj lu guichi lá'ayi, rnna:

Rnnë' Xanru': "Ni'a quia' neda' caz, ulu'zechu zxiigaca yúgu'të bönachi lahua' neda'.

Ila'guixjō' yálajdo' naca' Dios."

¹² Caní naca, uchi'a usöröë' Dios yúgu'tëru'.

Bití' ral-la' gunru' ga ichixi iníguinë' böchi' luzá'aru'

¹³ Que lê ni na', bití'rö ral-la' ichugu bë'eru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí gunru' ga gunë' dul-la'. ¹⁴ Nöz quezida' bití' bí dë le ráguru' le gaca gun ga bití'rö nácaru' tsahui' lahuë' Dios, ate' röjlöz lê ni didza' bë'ë Xanru' Jesús. Channö réquinë' tu bönni' zoa bi gaca gun ga bití'rö náquië' tsahui' lahuë' Dios, queë' bönni' ni, caní naca. ¹⁵ Channö rusuhuf'innu' böchi' luzó'o, tu' ragu' le runi lê' bití' ral-la' gáguru', bití' runu' ca ral-la' gun nu nadxí'i böchi' luzé'e. Bití' bi ral-la' gagu' le gun ga gaca chopla ládxë'ë bönni' na', gütíë' Cristo uláz queë'. ¹⁶ Que lê ni na' bití' bi gunli' le gun ga ila'nnë xihui' bönachi que le rusáca'li' queëli' naca tsahui'. ¹⁷ Cate' rinná bë'enë' Dios rë'u, bití' ruí'í ládxí'ru' le guí'aj gáguru', pero ruí'í ládxí'ru' gácaru' tsahui', en sóaru' dxi ladxí', en udzëjaru', yugu' le gaca gunru' tu' zóalenë' Dios Bö' Lá'ayi rë'u. ¹⁸ Nütí'tës nu run xichinë' Cristo ca nácgaca lê ni, run le raza ládxë'ë Dios, ate' urúaj dxi'a lógaca bönachi.

¹⁹ Que lê ni na' ral-la' gunru' le ilún ga gata' le ribequi dxi ládxí'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo. ²⁰ Bití' bi ral-la' gagu' le gun ga gaca chopla ladxí' nu na' nuzóë' Dios. Nátatë lê na' ta'nná bönachi: "Yúgu'të dë lataj gáguru'", pero gunru' le ruá' dö' channö gunru' ga ichixi iníguinë' luzá'aru' tu' nözi lê na' ráguru'. ²¹ Gácarö dxi'a cabí gagu' bëla', en cabí guí'ju' xisi uva nal-la, en bití' bi gunu' le gun ga ichixi iníguinë' böchi' luzó'o, o le gun ga gaca chopla ládxë'ë, o le gun ga huðaj ládxë'ë ca réajlë'ë Cristo. ²² Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' bití' ruhösa ládxí'da'ahuë' lê' tu' nözi lê na' runi lê' dë lataj gunë', ²³ pero bönni' na' raca chopla ládxë'ë tu' nözi le rahuë', nabáguë'ë xíguia', tu' runë' le cabí runi lê' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

15

Ral-la' gunru' le raza ládxë'ë böchi' luzá'aru'

¹ Que lê ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxí'gaca ca ta'yéajlë' Cristo. Bití' ral-la' gunru' le raza ládxí'ru' la' cuínsiru'. ² Yúgu'tëru' ral-la' gunru' le raza ládxë'ë böchi' luzá'aru' para gaca dxi'a queë', en idipa ládxë'ë ca réajlë'ë Cristo. ³ Caní ral-la' gunru', tu' cabí benë' Cristo le guyaza ládxë'ë lá' cuínsë', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' guluí' nupa gula'nnë xihui' quíu' Lí, Dios." ⁴ Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lê na' nazúaj lu guichi lá'ayi run ga ribózaru' zxön ladxí', en Nu ruhuë' tsahui' rë'u, gunë' ga gunli' tuz ca rusáca'li' queëli', para gácali' ca na' rë'ënë' Jesucristo. ⁶ Caní ral-la' gunli' para gácali' tuz, cú'uli'-në' tsözxön yöl-la' ba Dios, Xuzë' Xanru' Jesucristo. ⁷ Que lê ni na', para gaca yöl-la' ba queë' Dios, guli'sí lu ná'alí' tulí' ia'tulí' ca na' Cristo guzxi' lu në'ë ca' rë'u. ⁸ Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idütë li didza' ru'ë Dios, ate' benë' ga bulu'dxín le guzxi' lu në'ë Dios unödzejë' quégaquië' xuz xtó'otu'.

Yugu' bönachi izá'a ila'yöni didza' dxi'a

⁹ Bidë' ca' Cristo para benë' ga ila'gú'u Dios yöl-la' ba nupa bití' nácgaca judío tu' ruhuéchi' ládxë'ë Dios légaquië'. Ca naca lê ni nazúaj lu guichi lá'ayi le rnna: Que lê ni na', ulu'a lahui le nacu' Lí' lógaca bönachi idütë yödöliö, en gul-la' quíu' yöl-la' ba.

¹⁰ Ga yúbölö nazúaj lu guichi lá'ayi le rnna:

Libí'ili', bönachi idútë yödzölió,
buli'dzéjalen bönachi queë' Dios.

¹¹ Ga yúbölö nazúaj ca' lu guichi lá'ayi le rnna:

Guli'cu'ë Xanru' yöl-la' ba,

yúgu'téli' biti' nácali' judío.

Guli'tséaj ladxí' Lë',

yúgu'téli' zóali' idútë yödzölió.

¹² Lësca' caní buzúajë' Isaias lu guichi le rnna:

Ilá' lahui Nu nababa dí'a dza queë' Isai.

Gaca lo Nu na' para inná be'e nupa biti' nácacaga judío.

Nupa ni ilún löza Lë'.

¹³ Rinábida-në' Dios, Nu run ga runru' löza, gunë' ga udzëjade'eli', en ga soa dxi ladxí'li' tu' réajlë'eli' Lë', en gunë' ga gaca idú ca runlí' löza, tu' zóalen yöl-la' huáca queë' Dios Bô' Lá'ayi libí'ili'.

¹⁴ Bóchi' luzá'ado'. Chinöz quézida' rúntica'sili' le naca dxi'a, en dëda' yöl-la' réajni'i queëli' para gaca uzéajni'ili' luzá'ali'. ¹⁵ Na'a naca' rugu ladxí', ruzúaja' queëli' lu guichi ni, bócha'a, en rusá'a ladxí'li' tu' zoa le buzá' ladxë'ë Dios quia' neda'. ¹⁶ Que lë ni na' runa' xichinë' Jesucristo lógaca bönachi biti' nácacaga judío, en runa' libán que didza' dxi'a queë' Dios, para gaca ugu'a bönachi biti' nácacaga judío lu në'ë Dios, nupa na' guró cazë' Dios Bô' Lá'ayi queë' Lë'. Ilácagaquië' ca tu le rigú'uru' lu në'ë Dios, le raza ladxë'ë Lë'.

¹⁷ Na'a, tu' rúnlena' tsözxön Jesucristo dxin, dë lu na'a tsaza ladxá'a ca naca le nuna' lu xichinë' Dios. ¹⁸ Lësca' rurúguida' inní'a' ca naca lë na' benë' Cristo lu na'a neda', benë' ga tun bönachi biti' nácacaga judío ca rnna xtídzë'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'. ¹⁹ Lu na'a neda' bugunë' dxin ca' le nácacaga bë' bulu'e lahui Lë', en yugu' yöl-la' huáca xzön benë', en yöl-la' huáca na' queë' Dios Bô' Lá'ayi le guzóalen neda'. Caní guca, gusí lahua' runa' libán lu yödzö Jerusalén, ate' idú gásibi'iló ga ridxintë luyú Ilírico, chinuna' libán que didza' dxi'a ca naca queë' Cristo. ²⁰ Bë' ladxá'a bena' libán que didza' dxi'a ga biti' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguélë'ë lahui dxin xzön chinunë' bönni' yúbölö. ²¹ Ca bena' neda' naca ca na' nazúaj lu guichi lá'ayi le rnna:

Ila'lë'e nupa nacuá' ga cuntú nu ben libán queë' Lë',

en ila'yéajni' nupa catu caz bila'yöni ca naca queë'.

Rë'ënë' Pablo tsejë' yödzö Roma

²² Que lë ni na', sal-la' zían luzuí gú'unida' guída' ga zóali', biti' guca guída'. ²³ Na'a, chibudxi bena' dxin quia' yugu' lataj ni, en chirë'ënda' zían iz guída' ga zóali'. ²⁴ Que lë ni na', cate' tseja' luyú España, tóda' ga zóali' libí'ili', tu' runa' löza uduyúa' libí'ili', en udzëjalenda' libí'ili'. Tódi ni' huáca ugú'uli' neda' nöza. ²⁵ Na'a ral-la' tseja' Jerusalén, tsöju'a tu le gácalen nupa ni' néquiquequi queë' Cristo. ²⁶ Caní guna', le gula'yaza ladxí'gaquië' bönni' nacu'ë luyú Macedonia, en luyú Acaya, bulu'tubë' bi tu'nödzjë' quéguequi bönachi yechi' dzágagaca bönachi queë' Cristo, nacu'ë Jerusalén. ²⁷ Gula'yaza ladxí'gaquië' bönni' biti' nácacagaquië' judío gulunë' lë ni. Le nácatë naca tu le rál-la'gaquië' quégaca bönachi judío ni'. Channó bönni' biti' nácacagaquië' judío tu'zi'ë xibë le nácacaga queë' Dios ni'a que le núngaca bönachi judío, lësca' ral-la' ilácalenë' bönachi judío na', ulu'gunë' dxin le dë quégaquië'. ²⁸ Que lë ni na', cate' údxi udóda' lu ná'agaca bönachi judío lë na' bulu'nödzjë' bönni' ni, ní'irö tóda' ga zóali' libí'ili' cate' tseja' luyú España. ²⁹ Cate' guída' ga zóali', runa' löza idxínlena' yúgu'të le ruzí'iru' xibë ni'a que didza' dxi'a queë' Cristo.

³⁰ Ni'a queë' Xanru' Jesucristo, en ni'a que yöl-la' nadxí'i ruchízië' Dios Bô' Lá'ayi icja ladxí'do'oru', ráta'yua' loli', bócha'ado', ulídzali-në' Dios tsözxön len neda', inábili-në' gácalenë' neda'. ³¹ Guli'nabi-në' Dios gunë' ga ulá' neda' lu ná'agaquië' bönni' biti' ta'yéajlë'ë nacu'ë luyú Judea, en gunë' ga ila'yaza ladxí'gaquië' ila'zi'ë lë na' tsöju'a lu ná'agaquië' bönni' nácacagaquië' queë' Cristo, nacu'ë Jerusalén. ³² Guli'nabi-në' ca', channó naca ca rë'ënë' Dios, gunnë' neda' lataj idxina' queëli' len yöl-la' rudzeja quia', para uzí ladxí'lëna' libí'ili'. ³³ Na'a rinábida-në' Dios, Nu run ga zoa dxi ladxí'ru', sóalenë' yúgu'téli'. ¡Ca' gaca!

16

Tu'gapa Dios luzë'eguequi bönachi queë' Cristo

¹ Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzáganu bönachi queë' Cristo nacuá' yödzö Cencrea. ² Uláz queë' Xanru' guli'sí' lu ná'ali'-nu nigula na', ca ral-la' ilún bönachi queë' Cristo. Guli'gácalen lënu, unödzjali' queënu bítí'tës bi ríquínnu. Lë cázanu gücalennu bönachi zían, en gücalennu ca' neda'.

³ Guli'gapa Dios Priscila, en Aquilo, nupa na' gulunlen neda' tsözxön dxin queë' Jesucristo. ⁴ Chopë' ni gula'dödë' ga guzóa bönadxi ilátië' para gulunë' ga cabí gátia' neda', atë' rea' légaquië': "Xclenli'", en calégasö neda', pero lësca' yúgu'të böchi' luzá'aru' nabábagaquië' gapa nacuá' bönachi queë' Cristo biti' nácagaca judío, tē'ë légaquië': "Xclenli'." ⁵ Guli'gapa Dios bönachi queë' Cristo tu'dubë' lu yu'u lidxígaquië' Priscila, en Aquilo na'. Guli'gapa Dios Epenetö, bönni' na' nadxí'ida'. Bönni' ni guyéajlë'ë Cristo zí'atëlö ca yúgu'të bönachi luyú Acaya. ⁶ Guli'gapa Dios María, nigula na' bennu dxin zxön queë' Cristo ga ni' rudúbili' libí'ili'. ⁷ Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxön lidxi guíë, en nadéli'gaquië' lataj lo ladaj bönni' gubáz nasöl-lë'ë Cristo. Lësca' gula'yéajlë'ë Cristo zí'alö ca neda'.

⁸ Guli'gapa Dios Amplias, bönni' na' nadxí'ida', en néquinë' queë' Xanru'. ⁹ Guli'gapa Dios Urbano, bönni' na' bënlenë' netu' tsözxön dxin queë' Jesucristo. Guli'gapa Dios Estaquis, bönni' na' nadxí'ida'. ¹⁰ Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacuá' lidxë' Aristóbulo. ¹¹ Guli'gapa Dios Herodión, bönni' uládz quia'. Guli'gapa Dios nupa nacuá' lidxë' Narciso, en ta'yéajlë'ë Xanru'. ¹² Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', atë' nadxí'iru'-nu. ¹³ Guli'gapa Dios Rufo, bönni' rô queë' Xanru'. Guli'gapa Dios xetö'ë Rufo na', nácanu ca' ca xiná' caza'. ¹⁴ Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacuá'lenë' légaquië'. ¹⁵ Guli'gapa Dios Filólogo, en Julia, en Nereo, en nigula zanë' Nereo na', enca' Olimpás, en yúgu'të böchi' luzá'aru' ta'yéajlë'ë Cristo, nacuá'lenë' légaquië'.

¹⁶ Guli'gapa Dios luzá'ali', unída'li' luzá'ali' lu yöl-la' nadxí'i queë'li'. Tu'gapë' Dios libí'ili' yúgu'të böchi' luzá'aru' nabábagaquië' gapa nacuá' bönachi queë' Cristo luyú ni.

¹⁷ Na'a, ráta'yua' loli', böcha'ado', guli'gün ga ilaca bë' nupa tun ga irúajli' choplō, en tun ga ichixi iníguili', tu' tsédinë' le cabí röjlöz le nazédali'. Guli'cuíta ga nacuá' bönachi caní ¹⁸ tu' cabí tun xichinë' Jesucristo. Tunë' dxin para bi gata' quégacasë', en ta'z'í' yé'enë' yugu' bönni' nōxaj ladxí', tu'gunë' dxin didza' nōxaj ladxí', en didza' tséajlë'ëru' le cabí nácatë. ¹⁹ Rizé didza' ca na' runli' ca rnna xtídzë'ë Xanru', atë' ta'yōni yúgu'të bönachi. Que lë ni na' rudzédajá' ni'a que le runli' libí'ili'. Na'a, ré'enda' gácali' sina' gunli' le naca dxi'a, en caléga gunli' le ruá' dö'. ²⁰ Dios, Nu run ga zóaru' dxi ladxí', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' ladxë'ë queë'li' le gácalen libí'ili'.

²¹ Bi'i Timoteo, bi'i na' rúnlenb'i neda' tsözxön dxin, rugápabi' Dios libí'ili'. Lucio, en Jásón, en Sosípater, yugu' bönni' uládz quia', tu'gapë' Dios libí'ili'.

²² Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguie' Xanru' neda'.

²³ Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzo ni, rugapë' Dios libí'ili'. Böchi'ru'do' Cuarto rugapë' Dios libí'ili'.

²⁴ Rinábida'-në' Xanru' Jesucristo uzá' ladxë'ë queë'li' yúgu'tëli' le gácalen libí'ili'. ¡Ca' gaca!

Yöl-la' ba Dios

²⁵ Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza. ²⁶ Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë'ë Cristo, en ilún ca rnna xtídzë'ë.

²⁷ ¡Ni'a que le benë' Jesucristo, gácatíca'sö yöl-la' ba queë' la's dui Dios, Nu rácatërö caz! ¡Ca' gaca!

DIDZA' ZÍ'ALÖ GUSÖL-LË'Ë PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Ca rë'ëni quézinë' Dios bulidzë' neda', Pablo, para gaca' gubáz queë' Jesucristo. Böchi'ru' Sóstenes runë' neda' tsözxön. ² Rugapa' Dios libí'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxön len yúgu'të nupa nacua' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'. ³ Ráta'yua' lahuë' Xúziru' Dios, en lahuë' Xanru' Jesucristo uza' ládxë'ë queë'li, en gunë' ga soa dxi icja ládxí'do'oli'.

Yugu' le ruzí'iru' xibë' tu' néquiru' queë' Cristo

⁴ Rética'sa'-në' Dios: "Xclenu" ca naca queë'li, tu' zoa le buzá' ládxë'ë Dios queë'li tu' nácali' tuz len Jesucristo. ⁵ Tu' nácali' tuz len Cristo, Dios chinagú'udë'ë xinözili' yúgu'të le nequi queë'. Rácalenë' libí'ili' ca naca yúgu'të didza' ru'ili', en runë' ga réajni'ili' yúgu'të. ⁶ Caní naca, tu' guzxi' lu ná'ali' idú ládxí'li' le runtu' liná' lo ca naca queë' Cristo. ⁷ Que lë ni na', bití' bi riyadzaj queë'li que le runnë' Dios Bö' Lá'ayi queë'ru', tsanni ni ribózáli' dza na' ilá' lahuë' Xanru' Jesucristo. ⁸ Lë cazë' utipë' ládxí'li' para gaca guá' ilenli' yúgu'të ga idxintë dza údxi, en naca cabí gaca nu bi innë queë'li dza ni huödë' Xanru' Jesucristo. ⁹ Dios runë' ca rnnë', en Lë cazë' bulidzë' libí'ili' para gácali' tuz len Zxí'në', Xanru' Jesucristo.

Narúajgaca choplō bönachi queë' Cristo nacu'ë Corinto

¹⁰ Ní'a queë' Xanru' Jesucristo ráta'yua' loli', böchi' luzá'ado', guli'gún tuz xtídzá'li' yúgu'tëli'. Bití' irúajli' choplō, pero guli' gaca tuz ca rizá' ládxí'li', en ca runi libí'ili'. ¹¹ Caní rea' libí'ili', böchi' luzá'ado', tu' gula' guíxjōi'innë' neda' bönni' nacu'ë lídxi nu Cloé ca runli', ta'nnë' ridil-la dídzá'li'. ¹² Lë ni rnniá: Nadzá'lō didza' ru'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo. ¹³ ¿Naru' birúajtsë' choplō Cristo? ¿Naru' gudá'atsa' neda', Pablo, lë'e yaga cruz uláz queë'li? ¿Naru' bidíłatsali' nisa para gácali' tuz len neda'? ¹⁴ Rea'-në' Dios: "Xclenu", tu' cabí buquila' nisa niturō libí'ili', pero chópasë' Crispo, en Gayo. ¹⁵ Que lë ni na' bití' gaca innali' bidíłali' nisa para gácali' tuz len neda'. ¹⁶ Lësca' buquila' nisa Estéfanas, en nupa nacua' lidxë'. Bití' rōjneda' channō buquila' nisa nu yúbölō. ¹⁷ Gusöl-lë'ë Cristo neda', calëga para uquila' bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

Cristo napa cazë' yöl-la' huáca, en yöl-la' réajni' i queë' Dios

¹⁸ Nupa náacaga chul-la niti téquiguequi cá'asō naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusólá rë'u. ¹⁹ Caní naca, tu' nazúzaj lu guichi lá'ayi le rnná:

Guna' ga huóaca nítisō yöl-la' rácada'

quégaca nupa taca yenni'.

Tsólá'alō ucá'ana' yöl-la' réajni'i

quégaca nupa ta'yéajni'i yenni'.

²⁰ ¿Bizxi caz uzi'tsë' xibë' bönni' réajni'innë' yenni'? ¿Bizxi caz uzi'tsë' xibë' bönni' nabë'ede'enë' ru'ë didza' Dios chibënë' ga böaca cá'asō yöl-la' réajni'i quégaca bönachi yödžoliō ni. ²¹ Dios, lu yöl-la' réajni'i queë', bití' bë'ë lataj ilúnbe'e bönachi yödžoliō ni Lë' ní'a que yöl-la' rácada' quégaquië'. Dios guyaza ládxë'ë busölë' nupa ta'yéajlë' Lë' ní'a que libán na' runru', sal-la' téquiguequi bönachi cá'asō naca.

²² Té'ennë' yugu' bönni' judío ilá'le'enë' yöl-la' huáca náacaga bë', ate' bönni' zì'tu' ta'guiljë' yöl-la' réajni'i. ²³ Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga t'chixi ta'nigui bönachi judío, ate' ia'zica'rō bönachi téquiguequi cá'asō naca. ²⁴ Bönni' na' bulidzë' Dios légaquië', sal-la' náacagaquië' bönni' judío o bönni' zì'tu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios. ²⁵ Téquiguequi bönachi yödžoliō ni le benë' Dios naca bë' bití' bi nōzinë', pero lë na' benë' náparō yöl-la' réajni'i ca yöl-la' réajni'i quégaca bönachi. Téquiguequi le benë' Dios naca bë' nacuídi'në', pero lë na' benë' náparō yöl-la' huáca ca yöl-la' huáca quégaca bönachi. ²⁶ Na'a, böchi' luzá'ado', guli'tsōjnë' ca gúcali' cate' bulidzë' Dios libí'ili'. Bití' gula'cu'ë ládjali' zían bönni' ta'yéajni'innë' lu yöl-la' bönáchisō quégaquië', en bití' gula'cu'ë ládjali' zían bönni' unná bë', en calëga zían bönni' náacagaquië' lo. ²⁷ Téquiguequi bönachi yödžoliō ni yugu' bönni' na' gurōë' Dios bití' bi nōzguequinë'. Caní benë' Dios para gunë' ga ulu'tuí'i nupa ta'yéajni'i. Lësca' caní gurōë' Dios nupa nacuídi'gaca yödžoliō ni para gunë' ga ulu'tuí'i nupa nál-lagaca.

²⁸ Lësca' caní, téquiquequi bönachi yödžölió ni nupa na' guröë' Dios nácacaca cá'asö, en bití' bi nácacaca, en nacuidí'gaca. Caní benë' Dios para gunë' ga ulu'gá'ana cá'asö lë na' tun xžön bönachi yödžölió ni. ²⁹ Que lë ni na', cuntú nu gaca gun ba xžön cuini lahuë' Dios. ³⁰ Dios caz benë' ga nácaru' tuz len Jesucristo, en benë' ga náparu' yöl-la' réajni' queë' Cristo. Tu' náquie' Cristo tuz len rë'u, nuhuóácaru' tsahui', en néquiru' quez queë' Dios, en nuláru'. ³¹ Naca ca na' nazúaj lu guichi lá'ayi, le rnna: "Channö zoa nu bi rë'ëni gun xžön, ral-la' gun xžön Xanru'."

2

Libán runru' queë' Cristo, ca gudë'ë lë'e yaga cruz

¹ Caní guca, böchi' luzá'ado', cate' bidxina' queëli'. Bena' libán loli' que xtídzë'ë Dios, calëga len yöl-la' réajni' quia', en bití' bë'a didza' lu yöl-la' rácada' quia'. ² Cate' ni' guzóalena' libí'ili', bë' ládxa'a cabí gu'a didza' que le yúbölö, pero ca nácatë queë' Jesucristo bë'a didza', ca na' gudë'ë lë'e yaga cruz. ³ Guzóalena' libí'ili' lu yöl-la' ricuidí' quia', ate' lu yöl-la' radxi quia' guxzízida'a. ⁴ Bë'lëna' libí'ili' didza', en bena' libán que xtídzë'ë Dios, calëga ca tuí' didza' bönachi lu yöl-la' rácada' quéguequisö, pero guzóalenë' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idútë li didza' bë'a. ⁵ Caní bena' para gaca tséajlë'ëli' Dios, calëga tu' biyönili' yöl-la' rácada' quégaca bönachi, pero tu' bilë'eli' yöl-la' huáca queë' cazë' Dios.

Dios Bö' Lá'ayi runë' ga núnbë'ëru'-në' Dios

⁶ Ruí'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni bití' naca ca le nápagaca bönachi yödžölió ni, en bití' naca ca le nápagaquie' bönni' ta'nná bë'ë dza ni zóaru' na'a, nupa na' ta'niti caz. ⁷ Ruí'itu' didza' que yöl-la' rácada' nagachi', lë na' runödzjë' Dios, tu' bigachi' yöl-la' rácada' nu buzöë' Dios dza ni'te para uzí'iru' xibë. ⁸ Yugu' bönni' ta'nná bë'ë dza ni zóaru' na'a bití' gulúnbë'ë yöl-la' rácada' na'. La'tu' gulúnbë'ë le, bití' ulu'dë'ë Xanru' nayëpisëtërë' lë'e yaga cruz. ⁹ Naca ca na' nazúaj lu guichi lá'ayi le rnna: Chinupë'ë Dios le ulu'z'í' xibë nupa nadxí'iguequi Lë', yugu' le cuntú nu ble'e, en bití' biyöni,

en bití' gula'zá' ládxi'gaca bönachi ca naca que.

¹⁰ Na'a, Dios nuzéajni'inë' rë'u yugu' lë ni lu në'ë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládxi'da'ahuë' Dios caz.

¹¹ ¿Naru' gaca inöžinë' nu bönni' le yu'u icja ládxi'da'ahuë' ia'tué' bönni'? Tuz bö' naca cazë' bönni' na' nözi lë na'. Lësca' caní, cuntú nu nözi le yu'u icja ládxi'da'ahuë' Dios. Tuzë' Dios Bö' Lá'ayi nöžinë' lë ni. ¹² Rë'u ni, bití' nazí' lu ná'aru' tu bö' ridasö yödžölió ni, pero nazí' lu ná'aru' Dios Bö' Lá'ayi, Nu na' ruchízië' Dios rë'u para gaca gúnbë'ëru' yugu' le buzá' ládxi'ë Dios queëru'. ¹³ Yugu' lë na' buzá' ládxi'ë Dios queëru' ruí'iru' didza' que, calëga len didza' tu'sedinë' bönachi rë'u len yöl-la' rácada' quéguequi, pero len yugu' didza' rusédinë' Dios Bö' Lá'ayi rë'u. Caní naca, ruzéajni'iru' bönachi zóalenë' Dios Bö' Lá'ayi légaquie' ca naca le rusédinë' Dios Bö' Lá'ayi rë'u.

¹⁴ Tu bönni' bití' zóalenë' Dios Bö' Lá'ayi lë' bití' rizí' lu në'ë le rusédinë' Dios Bö' Lá'ayi rë'u, tu' réquinë' ta' rë'sö naca. Bití' gaca tséajni'inë' bönni' na' lë ni, tu' gaca guéquibe'enë' tuzë' bönni' zóalenë' Dios Bö' Lá'ayi lë' le nazaca' lë ni. ¹⁵ Tu bönni' zóalenë' Dios Bö' Lá'ayi lë' gaca guéquibe'enë' le nazaca' yúgu'të, pero cuntú nu gaca guéquibe'e le nazaca' cazë' bönni' na'. ¹⁶ Nazúaj lu guichi lá'ayi le rnna:

¿Nuzxi' caz nözi le rizá' ládxi'ë Xanru'?

¿Nuzxi' caz gaca uzéajni' i Lë'?

Le rizá' ládxi'ë Cristo yu'u icja ládxi'do'oru' rë'u.

3

Nácaru' huen dxin tsöžxžön len Dios

¹ Que lë ni na', böchi' luzá'ado', bití' guca güf'ilëna' libí'ili' didza' ca ruí'ilenä'-në' didza' tu bönni' nudödi cuinë' lu në'ë Dios Bö' Lá'ayi, pero bë'lëna' libí'ili' didza' ca ruí'ilenä' nu naca bönáchisö didza', bití' zóalenë' Dios Bö' Lá'ayi nu na'. Nácali' ca yugu' bi'i huë'ëni. Bití' nácali' tsutsu ca réajlë'ëli'-në' Cristo. ² Busédida' libí'ili' le cabí naca böniga, lë na' guca ca nidxi' güf'ili'. Bití' busédida' libí'ili' le naca böniga ca bëla' gáguli'. Bití' guca tséajni'ili' le naca ca bëla' gáguli', en bití' rácali' na'a. ³ Caní naca, tu' nácali' ca nu naca bönáchisö ga ridxintë na'a dza. Tsanni ni ruzxë'eli' luzá'ali', en ridil-la' dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödžölió ni. ⁴ Cate' zóalen libí'ili' lu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

⁵ ¿Nuzxi' caz naca' neda', Pablo? ¿Nuzxi' caz na' Apolos? Nácatu' huen dxin queë' Dios, ate' ni'a que le bentu' guyéajlë'ëli' Cristo. Tu tutu' runtu' dxin na' bennë' Xanru' que queëtu'. ⁶ Dxin bentu' lu icja ládxi'do'oli' naca ca dxin run nu raza ruzóa. Neda' guza'

xisedo', ate' Apolos gulu'ë nisa, pero Dios benë' ga gulén, en guzxón xisedo' na' nadúz icja ládxi'do'oli'. ⁷ Caní naca, láti'do'os nazáquië' bönni' guz, en láti'do'os ca' bönni' rigü'ë nisa, pero nazáca'dë'ë Dios Nu run ga rilén, en rizxón xisedo' na'. ⁸ Tuz ca nácagaquië' bönni' razë', en bönni' rigü'ë nisa. Dios ubi'ë que queëgaquië' tsca naca dxin runë' tu tuë'. ⁹ Nácatu' huen dxin tsözxón len Dios, ate' libí'ili' nácali' ca la' yëla queë' Dios ga runtú' dxin.

Lësca' caní nácali' ca tu lu' nu runë' Dios. ¹⁰ Ca naca le buzá' ládxe'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'. ¹¹ Dios chigulu'ë tu xilibi zö'ö le naca Lë cazë' Jesucristo, ate' cuntú nu gaca cu'u ia' tu xilibi zö'ö caní. ¹² Dxin runru' queë' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiðj nazáca'da' gaca, o gaca nu gun dxin le naca ca richisa zö'ö le néquini yaga, o guixxi, o guixi' cá'asö. ¹³ Gaca bë' ca naca dxin núngaca tu tu bönachi. Cate' idxín dza ichúguië' Dios quégaca bönachi, ilá' lahui dxin nunru', tu' tódi dxin na' lu guí', ate' guí' na' si' bë' dxin núngaca tu tu bönachi. ¹⁴ Channö dxin nunë' tu bönni' urúaj dxi'a lu guí' na', le naca ca tu zö'ö guchisë', Dios ubi'ë queë' ca sa'yéaj dxin nunë'. ¹⁵ Channö tseguj dxin nunë' tu bönni' le naca ca tu zö'ö guchisë', unítie' le ré'ënë' ubi'ë Dios queë', pero ulá cazë' lë', ate' gaca queë' ca raca que nu rulá tu lu guí'.

¹⁶ ¿Naru' cabí nözili' naca cázali' yudo' queë' Dios, ate' zöë' Dios Bó' Lá'ayi icja ládxi'do'oli'? ¹⁷ Channö nu usuniti yudo' queë' Dios, Dios usunítie' nu na', tu' naca lá'ayi yudo' queë' Dios, ate' libí'ili' naca cázali' yudo' na'.

¹⁸ Biti' si' ye'e cuinli'. Channö réqui nu nutsa' ladjali' rácada' ca tácada' bönachi yödzölió ni, ral-la' huóaca nu na' ca tu bönni' bití' bi nözinë', para gata' que yöl-la' rácada' le naca idú. ¹⁹ Nu bönni' napzë' yöl-la' rácada' que yödzölió ni náquië' tu bönni' bití' bi nözinë' lahuë' Dios. Nazúaj lu guichi lá'ayi le rnna: "Dios runë' ga ila'chixi ila'nigui nupa tácada', rugunë' dxin yöl-la' rácada' quéguequi." ²⁰ Lësca' caní rnna: "Xanru' nözinë' nítisö naca le ta'bequi ícjagaca bönachi tácada'." ²¹ Que lë' ni na', bití' ral-la' gunli' zxon le gaca gunë' tu bönni'. Nequi queëli' yúgu'të. ²² Néquiquequi queëli':

Pablo, en Apolos, en Cefas,
en yödzölió ni,
en yöl-la' na'bán, en yöl-la' guti,
en dza ni zóaru' na'a, en dza si' za'.
Yúgu'të nequi queëli',
²³ ate' libí'ili' néquili' queë' Cristo,
ate' Cristo néquinë' queë' Dios.

4

Dxin tunë' bönni' gubáz nasöl-lë'ë Cristo

¹ Que lë' ni na', ral-la' guéquili' nácatu' netu' huen dxin queë' Cristo, en nazi' lu na'tu' le nagachi' queë' Dios. ² Yugu' bönni', Dios nudödë' lu ná'agaquië' ulu'gunë' dxin le nequi queë', run bayudxi ilunë' idú dxi'a le tunë'. ³ Biti' bi ruí' ládxa'a channö uchi'a usöröli' neda', o channö ulu'chi'a ulu'sörö bönachi yödzölió ni neda'. Biti' ca' ruchi'a rusörö cuina'. ⁴ Biti' ruxös ládxi'da'ahua' neda'. Lë' ni bití' naca bë' bití' nabága'a xíguia'. Xanru' náquië' Nu ruchi'a rusöröë' neda'. ⁵ Que lë' ni na', bití' ral-la' uchi'a usöröli' nu bönni' zí'aló ca idxín dza que. Guli'cöz dza ni' huödë' Xanru', ate' Lë' ubéajë' ga liná' le nagachi' ga chul-la, en ulu'ë lahui le yu'u icja ládxi'do' gaca yúgu'të bönachi. Ní'irö Dios ubi'ë que queëgaca bönachi le gun bal léguequi ca ral-la' gaca quéguequi.

⁶ Na'a, böchi' luzá'ado', ca naca lë' ni, bë'a didza' que le runtú' netu', Apolos, en neda'. Huáca usédali' ca runtú' netu' para gunli' le nazúajsö lu guichi lá'ayi, en bití' gunli' zxon tuë' bönni', en bití' uzóali' tsólá'aló ia'tué'. ⁷ ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë' na' dë lu no'o, ¿bizx que run ba zxon cuinu', réquinu' rácasö quiu' bidéli'nu' lë' na'?

⁸ ¿Naru' réquitseli' nadéli'tëröli'? ¿Naru' réquitseli' rilé'eli' yöl-la' tsahui' queëli'? ¿Naru' réquitseli' rinná bë'ëli', sal-la' bití' rinná bë'ëtu' netu'? Ní'a queë' Xanru' Dios ré'ënda' inná bë'ëli' para gaca inná bë'lentu' libí'ili' tsözxón. ⁹ Runi neda' naca queëtu', bönni' gubáz queë' Dios, ca nuzóë' netu' zéajtu' xibánitë ca na' raca quégagaquië' bönni' chinaru' quégagaquië' ilátie' lahui' lógaca bönachi. Nácatu' ca tu le tu'yuda' bönachi yödzölió ni, enca' ca tu le tu'yúdë' gubáz lá'ayi queë' Dios. ¹⁰ Tu' ré'ënitú' guntu' xichinë' Cristo, ruí'tu' bönachi lataj téquiquequi nácatu' bönni' bití' bi nözqueuinë', pero libí'ili' réquili' rácada'ali' tu' nácali' queë' Cristo. Libí'ili' réquili' chinál-lali', pero téquiquequi bönachi nacuídi'tu' netu'.
Tu' zóa bönachi netu' tsólá'aló,

pero tun libí'ili' bal.

¹¹ Ga ridxintê na'a dza, riduntu', en ribídxitu' nisa.

Biti' dē lari' gācutu'.

Tun bōnachi netu' zi', en biti' zoa lídxitu'.

¹² Rusaca' zi' cuintu', la' nētu'sō runtu' dxin.

Tu'lidza bōnachi netu' zi',

pero netu' rinábatu' le gácalen léguequi.

Ta'bia ládxi'gaca bōnachi netu',

pero ruá' rilentu' le.

¹³ Ta'nnē' queētu',

pero lu yōl-la' nōxaj ladxi' ru'íľentu' légaquiē' didza'.

Ga ridxintê na'a dza nácatu' ca bēbu que yōdzōlió ni,

en ca tu le ta'ru'una yúgu'tē bōnachi.

¹⁴ Ruzúaja' queēli' caní lu guichi, calēga tu' rē'ēnda' guna' ga utu'íli', pero rē'ēnda' uzējajni'ida' libí'ili', runa' ca runē' tu bōnni' ruzējajni'inē' yugu' zxf'ini cazē' tu' nadxf'inē' légacabi'. ¹⁵ Sal-la' gaca zían gáyú'ē bōnni' ila'cuá'alen libí'ili', en ulu'sédinē' libí'ili' ca naca queē' Cristo, tuz nu zoa naca ca xúzili', nu na' ben ga néquili' queē' Cristo. Lu yōl-la' na'bán cubi le nápalí' tu' dzágali' Cristo, neda' caz naca' ca xúzili' tu' busiyōnda' libí'ili' didza' dxi'a.

¹⁶ Que lē ni na', ráta'yua' loli' gūfi' ládxi'li' gunli' ca runa' neda'.

¹⁷ Que lē ni na' ca' risól-la'a-bi' bi'í Timoteo ga zóali'. Tu' rúnlenbi' neda' dxin queē' Xanru' nácabí' ca zxf'ini caza', en nácabí' idú ladxi', ate' nadxf'ida'-bi'. Gunbí' Timoteo ga tsōjnéli' yugu' xibá rusédida' tu' néquida' queē' Cristo, yugu' le rusédida' yúgu'tē lataj lógaca yúgu'tē cō' bōnachi queē' Cristo. ¹⁸ Bál-lali' run ba zxōn cuinli' tu' réquili' bití' rō udxina' ga zóali'. ¹⁹ Na'a, la' udxintea' ga zóali' channō Xanru' gunnē' neda' lataj. Ní'irō guéquibe'eda' calēgasō didza' tu'ē bōnni' tun ba zxōn cuíngaquiē', pero guéquibe'eda' channō zóalen yōl-la' huáca queē' Dios légaquiē'. ²⁰ Channō nazí' lu ná'ali' rinná bē'enē' Dios libí'ili', biti' naca bē' naca caní tu' rnnásili' ca'. Naca bē' naca caní channō zóalen libí'ili' yōl-la' huáca queē' Dios. ²¹ ¿Bízxiłō rē'ēnili'? ¿Naru' rē'ēnili' udxina' ga zóali' len gubá'ayi, para guna' libí'ili' zi', o len yōl-la' nadxf'i, en lu yōl-la' nōxaj ladxi'?

5

Pablo ruchi'a rusörðē' tuē' bōnni' runē' le ruá' dō'

¹ Rizē didza' zóalenē' libí'ili' tuē' bōnni' runē' le ruá' dō', tu' zóalenē' nigula queē' xuzē'. Le ruá' dō' caní bití' ca' tun bōnachi bití' núnbē'gaca Dios. ² Libí'ili' run ba zxōn cuinli', pero ral-la' hu'ínili', en ubējajli' nu na' run dul-la' na' ga zóali'. ³ Sal-la' bití' zóalena' libí'ili' lu idútē le naca', le nácatē zóalena' libí'ili' lu bō' naca caza'. Ca chizóalen caza' libí'ili' chibuchf'a busörðā' nu na' run dul-la' na'. ⁴ Cate' udúbili' queē' Xanru' Jesucristo guna' libí'ili' tsōzxōn lu bō' naca caza'. Ní'irō, len yōl-la' huáca queē' Xanru' Jesús ⁵ buli'dōdē' bōnni' na' lu na' Satanás tu' xihui' para iníti idútē le naca cazē', pero ulá bō' naca cazē' dza nī' huōdē' Xanru'.

⁶ Bití' naca dxi'a gun ba zxōn cuinli' ca naca le runli'. ¿Naru' cabí nōzili' didza' na' rnna: "Cua zído'os que yōta xtila gun ga chazxaj idútē cua nazf'i le"? ⁷ Na'a, guli'cua ga zóali' dul-la' na' le naca ca tu' cua zi' gulás, para gácali' dxi'a. Ní'irō gácali' ca tu' cua cubi le cabí nazí' cua zi' que, ca na' le nácatē chinácali'. Naca queēru' ca chizóaru' Laní Pascua cate' tahuē' yōta xtila bití' nazí' cua zi' que, en chigulútiē'-ba' uláz queēru' bō'cu' zxila' que Laní Pascua na', bō'cu' zxila' na' náquiē' Lē cazē' Cristo. ⁸ Que lē ni na' ral-la' gunru' laní na', calēga zóalen rē'u cua zi' gulás na' le rulu'fí le ruá' dō', en le cabí nazaca', pero ral-la' ugunru' dxin yōta xtila na' bití' nazf'i cua zi' que, yōta xtila na' rulu'fí le naca idú dxi'a, en le naca idútē li.

⁹ Cate' buzúaja' queēli' lu guichi zí'alō, gudxi caza' libí'ili' bití' gunli' tsōzxōn bōnni' tunē' le ruá' dō'. ¹⁰ Gudxa' libí'ili' caní, calēga para ucuítali' tsaz ga nacuá' bōnachi yōdzōlió ni, nupa tun le ruá' dō', en ga nacuá' bōnachi ta'zē ládxi'gaca le dē que lūzē'eguequi, en ga nacu'ē yugu' bōnni' gubán, en bōnachi ta'yéaj ládxi'gaca budó' guiōj budó' yaga. Para gunli' caní gun bayudxi irúajli' yōdzōlió ni. ¹¹ Le rē'ēni inná didza' na' buzúaja' queēli' zí'alō naca para cabí gunli' tu' zxōn tuē' bōnni' rnnē' néquiniē' queē' Cristo, pero runē' dul-la' le lē'e, o rizē ládxi'ē le dē que lūzē'ē, o reaj ládxi'ē tu' budó' néquini, o rinnē xihue'ē, o rizúdxinē', o ribanē'. Bití' ca' gágulenli' tsōzxōn tuē' bōnni' caní. ¹²⁻¹³ Bití' nequi quía' neda' uchi'a usörðā' nupa bití' nabábagaca rē'u. Dios uchi'a usörðē' léguequi. Libí'i cázali' ral-la' uchi'a usörðli' nupa nabábagaca libí'ili'. Que lē ni na', guli'cuē' ga zóali' bōnni' xihui' na'.

6

Bití' ral-la' ichē'ēru' bōchi' luzá' aru' lógaca bōnachi yúlahui'

¹ Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'sörö nupa biti' ta'yéajlê' Cristo libí'ili'? Dxi'arö tséajli' lógaca bönachi queé' Cristo para ulu'chi'a ulu'sörö libí'ili'. ² ¿Naru' cabí nözili' nupa néquiquequi queé' Cristo ral-la' ulu'chi'a ulu'sörö yúgu'tê bönachi yödžölió? Channö libí'i cázali' uchi'a usöröli' bönachi yödžölió, ¿naru' cabí nápalí' yöl-la' réajni'i uchi'a usöröli' didza' bizxaj caní? ³ ¿Naru' cabí nözili' ral-la' uchi'a usöröru' yugu' gubáz lá'ayi? Rúntêrö bayudxi uchi'a usöröru' le taca yödžölió ga ni zóaru' na'a. ⁴ Na'a, channö raca tu le run bayudxi nu uchi'a usörö, lê na' raca yödžölió ni, ¿bizx que rucuá'ali' nupa ulu'chi'a ulu'sörö le, nupa na' biti' bi dë lu nê'eguequi ladjagaca bönachi queé' Cristo? ⁵ Rnní'a caní para guna' ga utuf'ili'. ¿Naru' cabí zóalen libí'ili' nu raca lati' nu gaca uchi'a usörö le raca quégaquiê' böchi' luzá'ali'? ⁶ ¿Nacxi caz gaca tu bönni' réajlê'ê Cristo ichê'ê böchi' luzê'ê yúlahui' ga ulu'chi'a ulu'sörö bönachi biti' ta'yéajlê' Cristo légaquiê'?

⁷ Le nácatê richixi riníguili' tu' ridil-la dídza'li'. ¿Bizx que biti' guá' ilenli' nu ruá' dö' queé'li'? ¿Bizx que biti' guá' ilenli' nu rucáchi'lan le dë queé'li'? ⁸ Libí'ili' ruá'ali' dö', en rucáchi' lanli', ate' runli' caní quégaquiê' böchi' luzá'ali' ta'yéajlê'ê Cristo.

⁹⁻¹⁰ ¿Naru' cabí nözili' biti' ila'yaza bönachi biti' nácagaca tsahui' ga rinná bē'ê Dios? ¿Biti' si' ye'e cuinli'!

Biti' ca' tsaz ga rinná bē'ê Dios nu run le ruá' dö':
Cuntu nu reaj ladxí' budó' guió'j budó' yaga,
en cuntu nu riguitsaj xibá que yöl-la' nutsaga na',
en cuntu nu bönni' run cuinê' ca nigula,
en cuntu nu bönni' zóalenê' la' luzê'e bönni'sê',
en cuntu nu bönni' gubán, en cuntu nu ruhuidi',
en cuntu nu rizudxi, en cuntu nu rinnê xihui',
en cuntu nu rucáchi'lan.

Biti' ca' tsaz nu run caní ga rinná bē'ê Dios.

¹¹ Caní gúcali' bál-lali' libí'ili', pero na'a chinuhuóacali' dxi'a que dul-la' gubága'li', en chinéguili' quez queé' Dios, en chinuhuóacali' tsahui' ni'a que le benê' Xanru' Jesús. Bö' Lá'ayi queé' Dios runê' ga raca caní.

Idútê le naca cázaru' nequi quez queé' Dios

¹² Ta'nná bönachi: "Yúgu'tê dë lataj gunru'." Sal-la' nácatê didza' ni, biti' ral-la' gunru' yúgu'tê. Sal-la' dë lataj guna' yúgu'tê, biti' gu'a lataj bi inná be'e neda'. ¹³ Ta'nná ca' bönachi: "La' huagu naca le tsaz lē'ëru', ate' lē'ëru' naca ga tsudzu la' huagu." Nácatê didza' ni, pero idxín dza usunítie' Dios la' huagu, enca' lē'ëru'. Dios benê' idútê le naca cázaru', calêga para ugunru' le dxin gunru' le ruá' dö'. Naca para uzi' xibê Xanru', ate' Xanru' náquiê' para uzi' xibê' idútê le naca cázaru'. ¹⁴ Dios busubanê' Xanru' Cristo lu yöl-la' guti. Lē'sca' caní, len yöl-la' huáca queé' usubanê' rē'u.

¹⁵ ¿Naru' cabí nözili', idútê le nácali' naca tuz len le naca cazê' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¿Biti' ca' ral-la' gunli' caní! ¹⁶ ¿Naru' cabí nözili' channö tu bönni' zóalenê'-nu nigula udá dzaga, náquiê' tuz len lēnu? Ca naca lê ni nazúaj lu guichi lá'ayi le rma: "Ílácagaquiê' ca tuz bönachi íropê' na'." ¹⁷ Na'a, nu bönni' náquiê' tuz len Xanru', náquiê' tuz len Lē' lu bö' naca cazê'.

¹⁸ Que lê ni na', biti' ca' gunli' le ruá' dö'. Biti'tês dul-la' yúbölö runê' tu bönni', ní'ílö lu le naca cazê' runê' dul-la' na'. Nu bönni' runê' dul-la' le lē'ê, runê' dul-la' le dzaga lē cazê'. ¹⁹ ¿Naru' cabí nözili' idútê le naca cázali' naca yudo' queé' Dios Bö' Lá'ayi? Dios caz nuchizê' Dios Bö' Lá'ayi na' libí'ili', ate' Lē' zoê' icja ladxí'do'oli'. Que lê ni na' biti' nequi queé'zili' idútê le naca cázali'. Na'a, nequi queé' Dios. ²⁰ Dios gú'uê' libí'ili' len tu le zxon le gudizxjê'. Guli'gún dxin idútê le nácali', enca' bö' naca cázali' para gaca queé' Dios yöl-la' ba, tu' néquiquequi queé' Dios idútê le naca cázali', enca' bö' naca cázali'.

7

Rusédinê' Pablo ca naca que yöl-la' nutsaga na'

¹ Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queé' nu bönni' channö cabí sóalenê'-nu nigula. ² Tu' tunda' bönachi le ruá' dö' ga ní' zóali', yúgu'tê bönni' nabábagaquiê' libí'ili' ral-la' ila'cuá'lenê'-nu nigula que queégaquiê', ate' yúgu'tê nigula ral-la' ila'cuá'lennu-nê' bönni' que queégacanú. ³ Bönni' na' zóanu nigula queé' ral-la' gunê' queénu nigula queé' ca naca yöl-la' run que yöl-la' nutsaga na', en la' lēbisö ral-la' gunnu nigula len bönni' queénu. ⁴ Biti' dë lu ná'asónu nigula le naca cázanu, pero bönni' queénu dë lu nē'ê ca' le. Lē'sca' caní, biti' dë lu ná'asê' bönni' le naca cazê', pero nigula queé' dë lu ná'anú ca' le. ⁵ Biti' ral-la' ila'dá'baguê'ê luzá'agaquiê' bönni', en nigula na', nutsaga ná'agaquiê'. Huácasö ca' channö ilunê' tuz didza' biti' ila'dzáguie' tu chí'isö para gaca ulu'lidzê' Dios idú ladxí'gaquiê'. Tödi na', bönni' na' ral-la' sóalenê'-nu nigula queé'

leyúbölö, para cabí sequi' Satanás tu' xihui' gun ga tsázagaquië' nöza dul-la' tu' cabí gaca ila'nná be'e cuíngaquië'.

⁶ Lë ni rea' libí'ili' naca tu le runnë' Xanru' libí'ili' lataj. Biti' naca le gunná bē'ē. ⁷ Runi neda' gácarö dxi'a ulu'gá'anë' tuz yúgu'të bönni', ca na' zoa' tuza' neda'. Tu tuë' bönni' rizi'ë tsca le runödzjē' Dios queë' gunë'. Tuë' rizi'ë tu le runödzjē', ate' ia'tué' rizi'ë ia'tú le runödzjē'.

⁸ Na'a, rea' nupa zoágaca tuz, enca' yugu' nigula uzëbi, gácarö dxi'a quéguequi ulu'gá'ana tuz ca na' zoa' tuz neda'. ⁹ Channö cabí gaca ila'nná be'e cuíngaquië', huáca ulu'tsaga ná'agaquië', tu' gácarö dxi'a ulu'tsaga ná'agaquië', en cabí ila'zë ládxi'gaquië' le ruá' dö'.

¹⁰ Rinná bé'eda' nupa chinutsaga nē'eguequi, en calëga néda'sö runa' xibá ni, pero Lë cazë' Xanru' runë' le, rnnë': "Biti' ulá'alennu tu nigula bönni' queënu." ¹¹ Channö nu nigula ulá'alennu-në' bönni' queënu, ral-la' ugá'anau túzinu, o huóacanu tuz len bönni' queënu na'. Lësca' caní tu bönni' bití' ral-la' ucá'anë'-nu nigula queë'.

¹² Na'a, néda'sö rea' ia'zica'rö bönnachi, en calëga rnnë' Xanru' caní, rnná': Channö zoë' nu böchi' luzá'aru' réajlë'ë Cristo, ate' nigula queë' bití' réajlë'ënu Xanru', en channö rē'ëninu ugá'analennu lë', bití' ral-la' ulá'alennë'-nu. ¹³ Lësca' caní rnná': Channö zóanu nu nigula zanru' réajlë'ënu Cristo, ate' bönni' queënu bití' réajlë'ë Xanru', en channö rē'ënnë' ugá'analennë'-nu, bití' ral-la' ulá'alennu lë'. ¹⁴ ¡Caní ral-la' ilunë'! Bönni' cabí réajlë'ë na', Dios rilé'enë' lë' ca tu bönni' néquinë' quez queë' tu' náquië' tuz len nigula queë' réajlë'ënu Cristo, ate' nigula caní, bití' réajlë'ënu, Dios rilé'enë'-nu ca tu nigula néquinu quez queë' tu' nácanu tuz len bönni' queënu náquië' böchi' luzá'aru' réajlë'ë Cristo. La'tu' cabí naca caní, ilácabi' zxi'ingaguië' ca yugu' bi'i lan lahuë' Dios. Na'a, nácacagabi' quez queë' Dios. ¹⁵ Nu bönni' o nigula nu cabí réajlë' Cristo, channö rē'ëni ulá'alennu nu na' nutsaga ná'alennu, huáca ca'. Bití' run bayudxi ugá'analennu nu na' böchi' luzá'aru' o zanru' nu réajlë' Cristo, tu' bulidzë' Dios rē'u para cózaru' tsáhu'ido'. ¹⁶ ¡Caní ral-la' gaca! Nadxi ca' li', nigula, huáca gunu' ga ulë' bönni' quíu', ate' nadxi ca' li', bönni', huáca gunu' ga ulanu nigula quíu'.

¹⁷ Ral-la' gunru' tu turu' tsca le bennë' queëru' Xanru', enca' tsca guca queëru' cate' bulidzë' Dios rē'u para guéquiru' queë'. Rusédida' yúgu'të cö' bönnachi queë' Cristo xibá ni. ¹⁸ Channö Dios bulidzë' nu bönni' narugu lu xipélë'ë le naca bē' néquinë' queë' Dios, ral-la' ugá'anë' caní, zoa lu xipélë'ë lë' na' naca bē'. Lësca' caní, channö Dios bulidzë' nu bönni' bití' narugu lu xipélë'ë lë' na' naca bē', bití' ral-la' ichúguíë' lë' na' lu xipélë'ë. ¹⁹ Bití' bi nazaca' lë' na' narugu lu xipélë'ë tu bönni', en channö bití' narugu lu xipélë'ë bönni' lë' na' naca bē', bití' bi nazaca'. Le nácada' lesaca' naca gunru' ca rinná bē' xibá queë' Dios. ²⁰ Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'. ²¹ Channö bulidzë' li' cate' ni' nacu' bönni' nadó'o, bití' cö'u bönniga tu' nacu' caní, pero channö gata' quíu' lataj iruju' lu na' xanu', buzí' xibé' lataj na' gata' quíu' iruju'. ²² Channö bulidzë' Xanru' nu bönni' cate' ni' nadó'ë, lahuë' Xanru' náquië' ca nu bönni' narúajë' lu nē'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu nē'ë xanë' na', bönni' ni náquië' ca tu bönni' nadó'o queë' Cristo. ²³ Zxöntërö le gudizxjë' Dios, gú'uë' libí'ili'. Que lë ni na' bití' ral-la' guti' cuinli' lu ná'agaca bönnachi. ²⁴ Que lë ni na' ca', böchi' luzá'ado', ral-la' sóali' lahuë' Dios tsca guca queëli' tu tuli' cate' ni' bulidzë' Dios libí'ili'.

²⁵ Ca naca quégaca nupa bití' nutsaga ná'agaca, bití' bi gunná bé'enë' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' ládxë'ë Xanru' neda'. ²⁶ Tu' taca zían le raca queëru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca nácaaguië' na'a. ²⁷ Channö nutsaga ná'lenu'-nu nigula, bití' ulá'alennu'-nu. Lësca' caní, channö zu' tuzu', bití' quíju' tu nigula para utsaga ná'lennu'-nu. ²⁸ Na'a, channö utsaga ná'lenu'-nu nigula, bití' gunu' dul-la', en channö tu bi'i nigula utsaga ná'alennbi'-në' bönni', bití' gunbi' dul-la', pero ila'guí' ila'zaca' nupa nutsaga ná'agaca yödölió ni, ate' rē'ënda' guna' ga uláli' lu yöl-la' riguí' rizaca' na'.

²⁹ Na'a, rea' libí'ili' lë ni, böchi' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquië'-nu nigula ral-la' iluf' ládxi'gaquië' Dios, ca runë' nu bönni' bití' nutsaga ná'alennë' nigula. ³⁰ Lësca' caní, nupa ta'bödxí yechi' ral-la' ulu'dzeja lahuë' Dios ca run nu bití' ribödxí, ate' nupa tu'dzeja ral-la' ila'cuá' nōxaj lahuë' Dios ca run nu bití' rudzeja, ate' nupa to'o ral-la' ilaca ca nu bití' bi dë' que. ³¹ Nupa tu'gún dxin le dë' yödölió ni ral-la' ilaca ca nu bití' ruí'í ladxí' le dë' yödölió ni, tu' udödi quégaca le rilé'ëru' yödölió ni.

³² Rē'ënda' bití' ubi uguí'ili'. Tu bönni' bití' zóanu nigula queë' ruí'í ládxë'ë le nequi queë' Xanru', naca gunë' le raza ládxë'ë Xanru'. ³³ Tu bönni' nutsaga ná'lennë'-nu tu nigula ruí'í ládxë'ë le raca yödölió, naca gunë' le raza ládxí'nu nigula queë'. ³⁴ Lësca' caní raca queënu tu nigula nutsaga ná'lennu-në' bönni', en queënu nigula na' zóanu túzinu. Nigula na' zóanu túzinu ruí'í ládxí'nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lennu-në' tu bönni' ruí'í ládxí'nu le raca yödölió ni, naca gunnu le raza ládxë'ë bönni' queënu.

³⁵ Yugu' lè ni rea' libi'ili' para uzí'ili' xibé lè ni, en calèga para uzá'ga'a xinó'zili'. Rě'enda' gunli' le ral-la' gunli', para gunli' xichině' Xanru' idú ládxi'li'.

³⁶ Channó zoě' tu bōnni' réquině' biti' naca dxi'a ugá'anabi' túzibi' bi'i nigula ra'bando' queě', en chizóa iz queěbi', en rě'enide'ebi' utsaga ná'aleni'bi'-ně' bōnni', huáca utsaga ná'aleni'bi'-ně'. ¡Biti' gunbi' dul-la'! ³⁷ Channó chinún tsutsu xtídzě'ě bōnni' na', en biti' run bayudxi guně' caní, en dè lu nē'ě naca guně', en chinún tsutsu xtídzě'ě ugá'anabi' túzibi', guně' le naca dxi'a bōnni' na'. ³⁸ Caní naca, nu ruí'i lataj bi'i que utsaga ná'aleni'bi'-ně' bōnni', run le naca dxi'a, pero nu run ga ugá'anabi' túzibi' run le nácáro dxi'a.

³⁹ Nigula na' nutsaga ná'lennu-ně' bōnni', rinná be'e xibá que yöl-la' nutsaga na' lēnu tsanni ni zoě' nabaně' bōnni' queēnu. Channó gátie' bōnni' queēnu, gata' lu ná'anu utsaga ná'lennu-ně' nu bōnni' rě'ēninu, channó réajlě'ě Xanru' bōnni' na'. ⁴⁰ Runi neda' gácarōnu bica' ba channó ugá'anau tūzinu, en réquida' Bō Lá'ayi queě' Dios runě' neda' tzazxón.

8

Le ta'gú'u bōnachi lógaca budó' guiōj budó' yaga

¹ Na'a, gu'a didza' ca naca que le rě'aj ráguru', lè na' gula'gú'u bōnachi lógaca budó' guiōj budó' yaga. Ta'nná bōnachi: "Yúgu'těru' náparu' yöl-la' réajni'i." ¡Nácátě didza' ni! Yöl-la' réajni'i caní run ga run ba zxon cuinru', pero yöl-la' nadxi'i queēru' luzá'aru' run ga rácalenru' luzá'aru'. ² Channó zoě' nu bōnni' réquině' chiréajni'ině', biti' bi réajni'inině' ca ral-la' tséajni'ině', ³ pero nu bōnni' nadxi'ině' Dios, Dios caz zóaleně' bōnni' na'.

⁴ Na'a, ca naca que le rě'aj ráguru', lè na' gula'gú'u bōnachi lógaca budó' guiōj budó' yaga, nōziru' biti' bi nazá'gaca budó' guiōj budó' yaga na' yōdzólió ni, en cūnturó nu zoa naca Dios. ⁵ Sal-la' nacua' le téquiquequi bōnachi nácagaca dios, le nacua' lúzxiba, en le nacua' luyú, ate' zían le tu lídza bōnachi, en tuí'i lágaca: dios, enca': xan, ⁶ pero queēru' rě'u:

Tuzě' náquiě' Dios, Lě' Xuz.

Lě' beně' yúgu'tě le rilé'erru',

ate' zóaru' nabanru' para tseaj ládxi'ru' Lě'.

Tuzě' náquiě' Xanru', Lě' Jesucristo.

Lu nē'ě Lě', Dios beně' yúgu'tě le dē,

ate' nabániru' Lě'.

⁷ Calèga yúgu'tě bōchi' luzá'aru' ta'yéajni'ině' lè ni. Bal-lě', nupa ni' zí'aló gula'yéaj ládxi'gaca budó' guiōj budó' yaga, ga ridxintě na'a dza tē'aj tahuē' le gula'gú'u bōnachi lógaca budó' guiōj budó' yaga, ate' téquině' napa yöl-la' huáca que budó' na'. Tu' cabí naca idú ládxi'gaquiě', que lè ni na' téquině' nabága'gaquiě' xíguia' channó tahuē' lè na'. ⁸ Biti' gun le gu'aj gáguru' ga guně' Dios rě'u bal. Channó gáguru' le, biti' gácarōru' dxi'a, en channó cabí gáguru' le, biti' gácarōru' cá'asó. ⁹ Dē lu ná'ali' gu'aj gáguli' biti'tēs. Gulí'gún chí'i cuinli' para cabí gunli' ga ila'chixi ila'nigui nupa biti' naca idú ca ta'yéajlě' Cristo. ¹⁰ Nadxi' ca' li' réquinu' napu' yöl-la' réajni'i ca naca lè ni, en huáca gagu' biti'tēs. Channó cō'u xilataj budó' guiōj budó' yaga, en gu'aj gagu' le gula'gú'u bōnachi lo budó' guiōj budó' yaga na', ate' channó nu bōchi' luzó'o biti' naca idú ládxi'ě ilé'eně' li', rō'u ragu' ni', nadxi' ca' gunu' ga gahuē' lè na' gula'gú'u bōnachi lo budó' guiōj budó' yaga na'. ¹¹ Caní gaca, tu' réquinu' napu' yöl-la' réajni'i, gunu' ga ichixi iníguině' bōchi' luzó'o biti' naca idú ládxi'ě. ¿Naru' guntso' caní queě' bōchi' luzó'o, ni'a que nu na' gütie' Cristo? ¹² Channó caní gunu', gunu' dul-la' tu' usubágu'u bōchi' luzó'o xíguia', en gunu' ga ichixi iníguině' tu' cabí naca idú ládxi'ě, en gunu' ca' dul-la' le ruzóa Cristo tsólá'aló. ¹³ Que lè ni na', channó le gu'aj gahua' gun ga ichixi iníguině' bōchi' luzá'a, biti'rō gahua' bēla' na', para cabí guna' ga guně' bōchi' luzá'a dul-la'.

9

Le dē lu nē'ě nu bōnni' gubáz nasōl-lě'ě Cristo

¹ ¿Naru' cabí naca' gubáz nasōl-lě'ě Cristo? ¿Naru' cabí nadéli'da' yöl-la' rusólá? ¿Naru' cabí bilé'eda-ně' Xanru' Jesús? ¿Naru' cabí nácali' queě' Cristo ni'a que dxin bena' neda' uláz queě' Xanru'? ² Nadxi' ca' téquiquequi ia'zica'rō bōnachi biti' naca' gubáz nasōl-lě'ě Cristo. Libi'ili' run bayudxi guéquili' naca' gubáz queě' Cristo. Tu' nácali' queě' Xanru', le naca cázali' naca bē' naca' gubáz nasōl-lě'ě Xanru'.

³⁻⁴ Nacua' nupa ta'z'í quidza' neda'. Caní rubi'a didza', rea' légaquiě': Dē lu na'a inaba' le gu'aj gahua' tu' runa' dxin ni. ⁵ Lēscá' caní dē lu na'a utsaga ná'alena'-bi' tubi' bi'i nigula zanru' réajlě'ebi' Cristo para gunbi' neda' tsōzxón ga rida, ca na' tuně' ia'zica'rě' gubáz nasōl-lě'ě Cristo, en yugu' bōnni' bōché'ě Xanru', enca' Pedro. ⁶ ¿Naru' réquili' tuza' neda', en Bernabé ral-la' guntu' dxin lahui' dza, para idzólitu' le gágutu'? ⁷ ¿Nuzxi' caz bōnni' rejë' gudil-la, ate' riguizxjě' la' cuinsě'? ¿Nuzxi' caz bōnni' rudě'ě tu la' yēla que lubá uva, en biti' rahuē' le ribía lubá na'? ¿Nuzxi' caz bōnni' rapa chí'ě-ba' bō'cu' zxila', en biti' rejë' nidxi'

quégacaba' ? ⁸ Biti' guéquilí' la' néda'sō ruá'a caní didza'. Lësca' caní rnna le nazúaj lu guichi lu xibá queë' Moisés. ⁹ Lu xibá queë' Moisés nazúaj lu guichi le rnna: Biti' cu' u' du ruá'aba' bēdxi cate' rulíbiba' xzoa' xtila. Bē'ē Dios didza' nī, calégasō tu' ruí'í lādxē'ē-ba' bēdxi, ¹⁰ pero para uzí'iru' ca' xibé rē'u. Que lē nī na' nazúaj lu guichi didza' na', ate' bōnni' na' rugá'anē-ba' bēdxi, enca' bōnni' na' runē' ga tu'libiba' bēdxi xzoa' xtila, iropē' na' ral-la' ilunē' lōza ila'zi'ē que le rulá' luyú na'. ¹¹ Na'a, channō bentu' dxin ga zóali', le naca ca dxin guz gú'una, lē na' naca queë' Dios Bō' Lá'ayi, ¿naru' réquitseli' bití' ral-la' uzí'itu' xibé tu le do' dē queëli' ca na' ruzi'ē xibé bōnni' guz gú'una le rulapē' ? ¹² Ia'zica'rō bōnachi tu' zéajni'inē' libí'ili' tu'zi'ē xibé le dē queëli'. ¿Naru' cabí rála'tērō uzí'itu' xibé netu' le dē queëli'?

Catu caz buzi'tu' xibé lē nī dē lu na'tu', pero biá' gulentu' yúgu'tē para gaca guntu' libán que didza' dxi'a ca naca queë' Cristo. ¹³ Nōz quézili' ca raca quégacaba' nupa tun dxin que yudo', tu'zi' xibé gun que yudo'. Lësca' caní nupa ta'gú'u rōn quégacaba' bōa' bēdxi lu bucugu lá'ayi queë' Dios, tahuē' bēla' quégacaba' bōa' bēdxi na'. ¹⁴ Lësca' caní nuzōē' Xanru' ca ral-la' gaca quégaquiē' bōnni' tunē' libán que didza' dxi'a. Nupa tu'zi' xibé libán na' tunē' ral-la' ulu'gagu légaquiē'. ¹⁵ Neda' catu caz buzi'a xibé lē nī dē lu na'a, ate' lē nī ruzúaja' lu guichi nī bití' naca le rinábini nu bī gunna quia'. Run ba xzōn cuina' tu' cabí nazxja' cate' runa' libán que didza' dxi'a. Guē'ēnitēra' gátia' ca gu'a lataj nu innē runa' libán na' tu' nazxja'.

¹⁶ Biti' dē lu na' a gun ba xzōn cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channō cabí guna' libán que didza' dxi'a. ¹⁷ La'tu' runa' libán tu' rē'ēni quézida', huáca inaba' lazxa', pero run bayudxi guna' libán, tu' naca tu le busubáguē'ē Dios neda' guna'. ¹⁸ ¿Biziz lazxa' uzi'tsa' xibé channō? Ruzi'a xibé le raza lādx'a tu' cabí nazxja' cate' runa' libán que didza' dxi'a. Biti' ca' ruzi'a xibé lē na' dē lu na'a tu' runa' libán que didza' dxi'a.

¹⁹ Na'a, sal-la' cuntu nu yu'a lu nē'e, chibén cuina' ca tu bōnni' nadō'o quégaca yúgu'tē bōnachi para gaca guna' ga ulu'lágaca zianrō ca' bōnachi. ²⁰ Cate' runa' libán lógaca bōnachi judío, run cuina' ca tu bōnni' judío para gaca guna' ga ulu'lágaca bōnachi judío na'. Bōnachi judío na' tun ca rinná bē' xibá queë' Moisés. Que lē nī na' run cuina' ca tu bōnni' runē' ca rinná bē' xibá na' sal-la' bití' yu'a lu na' xibá na'. Caní runa' para gaca guna' ga ulu'lágaca nupa tun ca rinná bē' xibá na'. ²¹ Cate' runa' libán lógaca bōnachi izá'a, nupa bití' rinná be'e xibá queë' Moisés léguequi, run cuina' ca tu bōnni' zi'tu' na', para gaca guna' ga ulu'lē'. Biti' rucá'ana' cá'asō xibá queë' Dios. Neda' runa' ca rinná bē' xibá queë' Cristo. ²² Run cuina' ca tu bōnni' bití' naca idú ca réajlē'ē Cristo para gaca guna' ga ulu'lágaca nupa na' bití' naca idú ca ta'yéajlē' Lē'. Run cuina' ca nácagaca yúgu'tē bōnachi para gaca guna' ga ulu'lágaca bal-la bōnachi na'. ²³ Lu yúgu'tē lē nī runa', runa' ga ta'yōni bōnachi didza' dxi'a, para gaca uzi'a xibé tsōxzōn len libí'ili' didza' dxi'a na'.

²⁴ Chinōz quézili' ca tunē' bōnni' nūtsa'gaquiē' lu huitaj. Ta'xiti'ē yúgu'tē', pero tuzē' bōnni' idéli'nē' uzí'ē xibé lataj lo. Lësca' caní ral-la' gunlí' xichinē' Dios, gácali' ca bōnni' nūtsa'gaquiē' lu huitaj, para idéli'li' uzí'ili' xibé le ubi'ē Dios queëli'. ²⁵ Yúgu'tē bōnni', cate' tu'pá'a cuíngaquiē' para gaca ila'yáziē' lu huitaj, ta'nná be'e cuíngaquiē' lu yúgu'tē le tunē'. Tunē' caní para ila'déli'nē' tu bregui' zin le inítitē, pero idéli'ru' rē'u tu le uzí'tica'siru' xibé. ²⁶ Que lē nī na', naca' neda' ca tu bōnni' idú lādxē'ē rixiti'ē. Naca' ca' ca tu bōnni', idú lādxē'ē ridil-lē'. Biti' rucudxa' lu bō'ōs. ²⁷ Ca runē' bōnni' na' rulidzē' bōnachi para tsójsázagaca lu huitaj, runa' ca' neda', runa' libán para ulu'lágaca bōnachi. Bōnni' na' nūtsē'ē lu huitaj runē' ga gaca tsutsu idútē le naca cazē', en rinná bē'enē' le. Lësca' caní runa' neda', para cabí unítia' xilatja' lu dxin queë' Dios.

10

Biti' ral-la' tseaj lādxí'ru' budó' guiōj budó' yaga

¹ Ré'ēnda' uzéajni'ida' libí'ili', bōchi' luzá'ado', ca guca quégaquiē' xuz xtó'otu'. Dios benē' ga gulú'u zzul-la tu bōaj yúgu'tē'. Lësca' caní, gula'dōdē' yúgu'tē' gatsaj lāhui'lō nísado'. ² Lu bōaj nī, en lu nísado' nī, guca quégaquiē' ca raca que nu ridila nisa. Lē na' guca quégaquiē' guca bē' guláquiē' tuz len Moisés. ³ Lësca' caní, gulahuē' yúgu'tē' yōta xtildo' na' bunōdzjē' Dios Bō' Lá'ayi quégaquiē'. ⁴ Gulē'ajē' yúgu'tē' nisa na' bunōdzjē' Dios Bō' Lá'ayi quégaquiē', tu' gulē'ajē' nisa birúaj lē'e guiōj na' bulu'e lahui Dios Bō' Lá'ayi, guiōj na' gula'báninē' légaquiē'. Ca guca guiōj na' naca cazē' Cristo, nabániru' Lē'. ⁵ Sal-la' guca caní, bití' guyaza lādxē'ē Dios yúgu'tē'. Que lē nī na' gulátiē' lu lataj cá'asō.

⁶ Yúgu'tē lē nī naca tu le ruzéajni' rē'u, para cabí sē lādxí'ru' le ruá' dō', ca na' gula'zē lādxí'gaquiē' légaquiē'. ⁷ Biti' ral-la' tseaj lādxí'ru' budó' guiōj budó' yaga, ca na' gulunē' bal-lē' légaquiē'. Nazúaj lu guichi lá'ayi le rnna: "Gula'bō'ē bōnni' nī, en gulē'aj gulahuē', ate' gula'yasē', en gulunē' laní que budó' na'." ⁸ Biti' ral-la' gunru' le ruá' dō', ca na' gulunē' bal-lē' légaquiē' le ruá' dō', ate' tu dzasō gulátiē' idú ca tsonna-urua' milē'. ⁹ Biti' ral-la' si'

bé'ëru' Xanru', ca na' gula'zì' bē'ē Lē' bal-lē' légaquiē', ate' gulátiē' tu' gulágu'ya'aba' bēla sínia' légaquiē'. ¹⁰ Lē'sca' caní, bití' ral-la' innēru' queē' Dios ca na' gula'nnē' queē' bal-lē' légaquiē', ate' tuē' gubáz lá'ayi queē' Dios busunitiē' légaquiē'.

¹¹ Yúgu'tē lē ni le gulaca quégaquiē' xuz xtó'otu', tu'zéajni'i rē'u, en nazúaj lu guichi lá'ayi para gun gadxi rē'u, tu' chizóaru' dza chizóa údxi que yódzólió ni. ¹² Que lē ni na', nu réqui chinal-la, ral-la' gun chí'i cuiní, para cabí ichixi inigui. ¹³ Ca naca le ta'zì' bē' libí'ili' raca ca' quéguequi yúgu'tē bōnachi. Dios runē' ca rnnē', en bití' gu'ē lataj bi si' bē' libí'ili' le cabí gaca guá' ilenli', pero cate' bi si' bē' libí'ili', uluf'inē' libí'ili' naca gaca irúajli' lu na' tu' xihui', para gaca guá' ilenli'.

¹⁴ Que lē ni na', bōchi' luzá'ado', bití' tseaj lādxi'li' budó' guiōj budó' yaga. ¹⁵ Ru'ílena' libí'ili' didza' ca ru'ílena' didza' nupa ta'yéajni'i. Buli'chi'a buli'sörö didza' ni gu'a. ¹⁶ Cate' inábiru'-nē' Dios gun lá'ayē' le rē'ajru' cate' rusubanru' ca gútiē' Cristo, lē na' rē'ajru' rulu'í' nácaru' tuz len Cristo, en ruzi'iru' xibé le benē' Cristo cate' bulaljē' xichōnē' cate' gútiē' lē'e yaga cruz. Lē'sca' caní, yōta xtila na' ruzxúxjaru', en rágu'ru', rulu'í' dzágaru'-nē' Cristo, en ruzi'iru' xibé le benē' Cristo cate' budódē' idútē le naca cazē' uláz queēru'. ¹⁷ Sal-la' zianru' nácaru', yúgu'tēru' rágu'ru' tuz yōta xtila na', en que lē ni na' nácaru' ca tuz bōnachi.

¹⁸ Buli'yútsōca' ca tunē' bōnni' Israel. Bōnni' nī' tahuē' lahuē' Dios le ta'gu'ē lu bucugu lá'ayi queē', lē na' tahuē' rulu'í' dzágagaquiē' Dios. ¹⁹ ¿Bizxi rnná didza' ni ru'á'a? Biti' rnniá' napa budó' guiōj budó' yaga yōl-la' huáca, en le ta'gú'u bōnachi lógaca budó' guiōj budó' yaga na' bití' napa yōl-la' huáca. ²⁰ Caní rnniá': Lē na' ta'gú'u bōnachi bití' núnbē'gaquiē' Dios lógaca budó' guiōj budó' yaga, ta'gú'u lógaca bō' xihui', en calēga lahuē' Dios. Ré'ēnda' bití' idzágalí' yugu' bō' xihui'. ²¹ Biti' gaca guí'jali' le rulu'í' nácaru' tuz len Xanru', enca' lē na' uluf'í' nácali' tuz len yugu' bō' xihui'. Biti' gaca gáguli' le rulu'í' dzágaru'-nē' Xanru', enca' le uluf'í' dzágalí' yugu' bō' xihui'. ²² ¿Naru' gúntsaru' ga uzxé'enē' Xanru'? ¿Naru' réquitseli' nápatērōli' yōl-la' huáca ca napē' Lē'?

Le dē lu ná'aru' gunru', en ca ral-la' idxi'igacru'-nē' bōchi' luzá'aru'

²³ Naca idútē li didza' na' rnná: "Yúgu'tē dē lu ná'aru' gunru'." Na'a, neda' rnniá': Calēga yúgu'tē ral-la' gunru'. Yúgu'tē dē lu ná'aru' gunru', pero calēga yúgu'tē gun ga gácaró idú ca réajlē'ëru' Cristo. ²⁴ Ral-la' guí'í lādxi'ru' gunru' le gun ga gaca dxi'a quégaquiē' bōchi' luzá'aru', en calēgasō le gun ga gaca dxi'a que la' cuinsiru'.

²⁵ Biti'tēs bi tuti' bōnachi lu yē'ēyi, huáca gáguli', en bití' bi ral-la' inábali' que, para cabí cuéqui bōniga lādxi'do'oli'. ²⁶ Nazúaj lu guichi le rnná: "Queē' Xanru' nequi yódzólió ni, enca' yúgu'tē le dē yódzólió ni."

²⁷ Channō ulidzē' tu bōnni' bití' réajlē'ē Dios libí'ili' para gu'dali' lidxē', ate' guē'ēnili' tséajli', guli'gagu yúgu'tē le cu'ē loli', en bití' bi inábali' que, para cabí cuéqui bōniga lādxi'do'oli'. ²⁸ Channō nūti'tēs nu guíē libí'ili': "Lē ni gula'gu'ē lo budó' guiōj budó' yaga", bití' gáguli' lē na' para gaca dxi'a que nu na' gudíxjōi' caní libí'ili', en para cabí cuéqui bōniga lādxi'da'ahuē'. ²⁹ Rnniá': Para cabí cuéqui bōniga lādxi'da'ahuē' bōnni' na' gudíxjōi' inē' caní libí'ili', en calēga para cabí cuéqui bōniga lādxi'do'oli' libí'í cázali'.

Nadxi ca' nu inábini nadxi', inná: "¿Bizx que ral-la' uzó'a tsólá'aló le dē lu na'a guna' tu' ribequi bōniga lādxi'da'ahuē' bōnni' yúbölō?" ³⁰ Huáca inná ca' nu na': "Channō guí'a-nē' Dios: Xclenu', nī'a que lē na' rahua', ¿bizx que nu uzegui neda' didza' nī'a que lē na' rahua'?" ³¹ Channō bi gáguli' o bi guí'jali', o bití'tēs bi gunli', guli'gún yúgu'tē para gaca queē' Dios yōl-la' ba. ³² Biti' bi gunli' le gun ga ila'chixi ila'nigui bōnachi judío, en bití' gunli' le gun ga ila'chixi ila'nigui bōnachi bití' nácacaga judío, en bití' gunli' le gun ga ila'chixi ila'nigui bōnachi queē' Dios. ³³ Guli'gún ca runa' neda'. Ru'í lādxa'a guna' le ila'yaza lādxi'gaca yúgu'tē bōnachi, en bití' ru'í lādxa'a guna' le uzi'a xibé la' néda'sō, pero le ulu'zì' xibé ia'zica'rō bōnachi para ulu'lágaca.

11

¹ Guli'gún ca runa' neda', ca na' neda' ca' runa' ca benē' Cristo.

Le tunnu nigula lógaca bōnachi queē' Cristo

² Runa' libí'ili' xzōn, bōchi' luzá'ado', tu' rōjnética'sili' neda', en nazi' lu ná'ali' xibá budóda' lu ná'ali'. ³ Na'a, ré'ēnda' tséajni'ili' rinná bē'enē' Cristo yúgu'tē bōnni', ate' bōnni' rinná bē'enē'-nu nigula, ate' Dios rinná bē'enē' Zxí'inē', Bōnni' na' náquiē' Cristo. ⁴ Channō tu bōnni' rulidzē' Dios, o ru'ē didza' uláz queē' Dios, en dxí'a icjē' xilu'ē, rucá'anē' Cristo cá'asō. ⁵ Na'a, channō tu nigula rulídzanu Dios, o ru'ínu didza' uláz queē' Dios, en bití' bi xzóa ícjanu, rucá'ananu bōnni' queēnu cá'asō, en naca queēnu ca naca queēnu tu nigula narugu guitsa' ícjanu. ⁶ Channō tu nigula cabí bi xzóa ícjanu, ral-la' irugu ca' guitsa' ícjanu. Channō gun ga utuf'ínu nigula na' channō nu chugu guitsa' ícjanu, ral-la' bi ixó'a ícjanu. ⁷ Tu bōnni' bití' bi ral-la' udxí'a icjē' cate' ridxinē' lahuē' Dios, tu' náquiē' ca naca cazē' Dios, ate' lē na' náquiē'

bönni' rulu'í lahui yöl-la' zxön queé' Dios, pero le nácanu nigula na' rulu'í lahui yöl-la' zxön queé' bönni' queénu. ⁸ Cate' bené' Dios bönachi, bití' bubéajé' bönni' na' lu nigula. Nigula na', lu bönni' na' bubéajé'-nu. ⁹ Lësca' caní, bití' bené' Dios bönni' para uzí'nu xibé' nigula, pero bené' nigula para uzi'é xibánu bönni'. ¹⁰ Que lê ni na', nigula na' ral-la' ixóa ícanu le rulu'í zoa nu rinná be'e lënu tu' yúé' gubáz lá'ayi queé' Dios rê'u. ¹¹ Na'a, lahué' Xanru', tu bönni' riquinné'-nu nigula queé', ate' nigula na' riquíninu-né' bönni' queénu. ¹² Ca na' bené' Dios, bubéajé'-nu nigula lu bönni', lësca' caní na'a, yúgu'té bönni' nájlengaquié'-nu nigula, ate' yúgu'té rirúaj lu në'é Dios.

¹³ Buli'chi'a buli'sörö la' libí'isili'. ¿Naru' ral-la' ulídzanu-né' Dios tu nigula bití' bi zxoa ícanu? ¹⁴ ¿Naru' cabí rusédi libí'ili' yöl-la' nácaté quégaca bönachi, ral-la' utuf'iné' bönni' na' ru'é lataj itunna guitsa' icjé'? ¹⁵ Na'a, channö natúnna guitsa' ícanu tu nigula, naca yöl-la' lachi queénu, tu' bē'é Dios queénu guitsa' ícanu para usubín ícanu. ¹⁶ Channö zoa nu gué'ëni tá'baga' didza' ni, canísö nazí' lu na' tu' runtu', en lëbisö tun yugu' cō' bönachi queé' Dios.

Bönachi Corinto tu' cá'ana cá'asö le rê'aj ráguru' para usubanru' ca gútié' Xanru'

¹⁷ Bití' runa' libí'ili' bal ca naca le uzéajni'ida' libí'ili' na'a. Le runli' bití' run ga raca dxi'a queéli' cate' rudúbili' queé' Cristo, pero run ga raca queéli' le cabí naca dxi'a. ¹⁸ Risi lahua' ruzéajni'ida' libí'ili' lê ni ta' guíxjö'i bönachi neda', ta'nná: "Cate' rudúbili' queé' Cristo, narúajli' chopló", ate' réajlé'a nadxi ca' naca caní. ¹⁹ Run bayudxi ila'cuá'alen libí'ili' nupa tu'sedi le cabí nácaté para ilaca bē' nupa nácagaca idú bönachi queé' Cristo. ²⁰ Que lê ni na', cate' rudúbili', lê na' ráguli' tsözxön bití' naca le rê'aj ráguru' para usubanru' ca gútié' Xanru'. ²¹ Caní naca, tu' runli' bayudxi tu' tuli' ráguli' le nuá'ali' que queéli' cate' ráguli' tsözxön, ate' que lê ni na' ridunli' bál-lali', ate' ia'bál-lali' rê'aj ráguli' ga ridxinté rízdúxili'. ²² ¿Naru' cabí zoa lidxili' ga huáca guí'aj gáguli'? Ca na' runli', rucá'anali' bönachi queé' Dios cá'asö, en runli' ga tu'tufí nupa bití' bi dé quéguequi. ¿Bizzi caz guía' libí'ili'? ¿Naru' guntsa' libí'ili' bal? Bití' ca' runa' libí'ili' bal ca naca lê ni runli'.

Le rê'aj ráguru' para usubanru' ca gútié' Xanru'

²³ Xanru' caz budödē' lu na'a lê na' busédida' libí'ili', ca na' bené' Xanru' Jesús yēla ni' cate' nu budödi Lē' lu ná'agaquié' bönni' gulútié' Lē'. Gudélē'é yōta xtila, ²⁴ en cate' budxi gudxé' Dios: "Xclenu", buzuxzjé' le, en gunné': "Guli'gagu. Lê ni naca xipēla'a le nayuzxaj uláz queéli'. Guli'gún caní, para usubanli' ca gaca quia' neda'." ²⁵ Lësca' caní, gudödi gulahué', gudélē'é tu zxi'ga'do', en gunné': "Le yudzu zxi'ga'do' ni naca xichōna', le run tsutsu didza' cubi rucá'ana tsahui'. Guli'gún caní yúgu'té luzuí guí'jali' le, para usubanli' ca gaca quia' neda'." ²⁶ Caní gaca ga idxinté dza huödē' Xanru'. Yúgu'té luzuí gáguli' yōta xtila caní, en guí'jali' que le yudzu zxi'ga'do' caní, ulu'í'ili' lahui ca gútié' Xanru'.

Ca ral-la' gunru' cate' guí'aj gáguru' para usubanru' ca gútié' Xanru'

²⁷ Que lê ni na', núti'tēs nu gagu yōta xtila ni o guí'aj que le yudzu zxi'ga'do' ni queé' Xanru', en bití' run le bal, nabaga' xigua' nu na', en run dul-la', tu' rucá'ana xipēlé'ē Xanru', enca' xichōné' cá'asö. ²⁸ Que lê ni na', ral-la' uchi'a usöröru' la' cuínsiru' tu turu', ate' ní'irō huáca gáguru' yōta xtila ni, en guí'ajru' que le yudzu zxi'ga'do' ni. ²⁹ Núti'tēs nu rê'aj ragu' lê ni, en bití' run le bal tu' cabí réquibe'e rulu'í le guca queé' Xanru', rusubaga' cuini dul-la' ní'a que lê na' rê'aj ragu. ³⁰ Que lê ni na' te'e zian nupa dzágagaca libí'ili', en ta'cuídi', ate' zianguequi chinátigaca. ³¹ La'tu' uchi'a usöröru' la' cuínsiru', bití' uchi'a usöröé' Xanru' rê'u. ³² Channö gun bayudxi uchi'a usöröé' Xanru' rê'u, usaca' zi'é rê'u, para cabí irugu queéru' cate' ichúguie' quéguequi bönachi yödžolió ilátigaca.

³³ Que lê ni na', böchi' luzá'ado', cate' udúbili' para guí'aj gáguli' para usubanli' ca gútié' Xanru', guli'cōza luzá'ali'. ³⁴ Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröé' Dios libí'ili' cate' udúbili'. Nacuá' ia'bal-la le runli', pero uca'ana' tsahui' yugu' lê na' cate' uduyúa' libí'ili'.

12

Yugu'yöl-la' huáca runné' queéru' Dios Bō' Lá'ayi

¹ Na'a, böchi' luzá'ado', rê'ënda' tséajni'ili' ca zeaj naca yöl-la' huáca runné' queéru' Dios Bō' Lá'ayi.

² Nöz quézili' ca guca cate' ni' bití' réajlé'ënili' Cristo, bē'ëli' lataj gula'chē' bönachi libí'ili' ga yübölö. Guyéaj ladxli'li' budó' guió' budó' yaga, le cabí ta'nné. ³ Que lê ni na', ruzéajni'ida' libí'ili' caní, rnniá': Ladaj yúgu'té nupa tu'í didza' uláz queé' Bō' Lá'ayi queé' Dios, cuntú nu gaca inné xihui' queé' Jesús, en nitúé' gaca inné': "Jesús náquié' Xanru'", channö cabí zóalené' Dios Bō' Lá'ayi nu na'.

⁴ Na'a, nadzá'gaca tu tu le runné' Dios Bō' Lá'ayi queéru', pero tuzé' náquié' Bō' Lá'ayi na'. ⁵ Lësca' caní, nadzá'gaca tu tu dxin rigu'ē Xanru' lu ná'aru', pero tuzé' náquié' Xanru' na'.

⁶ Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queëru' para gunru' xichinë'. ⁷ Dios runnë' que queëru' tu le naca bë' náparu' yöl-la' huáca queë' Dios Bô' Lá'ayi, lê na' ruzí'iru' xibé yúgu'tëru'. ⁸ Dios Bô' Lá'ayi runödzjë' queë' tu bönni' yöl-la' huáca ru'ë didza' len yöl-la' rácada', ate' ia'tué' bönni', Lê cazë' Bô' Lá'ayi runödzjë' queë' yöl-la' huáca ru'ë didza' lu yöl-la' réajni'i. ⁹ Lësca' caní, Lê cazë' Dios Bô' Lá'ayi na' runödzjë' queë' ia'tué' bönni' yöl-la' réajlë' Cristo bi gunë', ate' ia'tué' bönni' runödzjë' queë' yöl-la' huáca ru'ünë' nupa te'e. ¹⁰ Ia'tué' bönni' runödzjë' queë' yöl-la' huáca runë' yugu' yöl-la' huáca que yehua' yubá, ate' ia'tué' bönni' ru'ë lê' lataj ru'ë didza' uláz queë' Dios, ate' ia'tué' bönni' runödzjë' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzjë' queë' ia'tué' bönni' yöl-la' huáca ru'ë didza' yúbölö le cabí nazëdë', ate' queë' ia'tué' bönni' yöl-la' huáca rudödë' didza' yúbölö na' bití' nazëdë'. ¹¹ Yúgu'të lê ni runë' Lê cazë' Dios Bô' Lá'ayi, tu' runödzjë' que tu tu bönachi tsca rë'ëni quëzinë'.

Yúgu'tëru' nácaru' ca tuz bönachi

¹² Ca na' naca tuz idütë le naca cázaru', sal-la' zían le nagudi' dzágalenru', ate' le zían na' nagudi' dzágalenru' nácacaga tuz idütë le naca cázaru', lësca' caní naca queë' Cristo. ¹³ Tu' zóalenë' Lê cazë' Dios Bô' Lá'ayi rë'u, lê ni naca queëru' ca tu le nadílaru' nisa, le naca bë' nácaru' ca tuz bönachi, sal-la' nácaru' yugu' bönni' judío, en yugu' bönni' zí'tu', enca' yugu' bönni' nadó'ogaquië', en yugu' bönni' bití' nadó'ogaquië'. Yúgu'tëru', Dios bë'ë rë'u lataj sí'iru' le runödzja cazë' Bô' Lá'ayi.

¹⁴ Na'a, lu idütë le naca cázaru', zían le nagudi' dzágalenru', en calëga tuz. ¹⁵ La'tu' huáca güf'i didza' ní'aru', huanná: "Tu' cabí naca' në'ë bönni', bití' néquida' queë'", didza' ni bití' gun ga bití' nequi queë' bönni' na'. ¹⁶ La'tu' huáca güf'i didza' nágaru', huanná: "Tu' cabí naca' guiöj lahuë', bití' néquida' queë' bönni' ni", didza' ni bití' gun ga bití' nequi queë' bönni' na'. ¹⁷ La'tu' naca guiöj loru' idütë le naca cázaru', ¿nacxi gaca yöniru'? La'tu' naca nágaru' idütë, ¿nacxi gaca ilé'e xzína'ru'? ¹⁸ Na'a, Dios nucu'ë yúgu'të le nagudi' dzágalenru' ca gú'uni quëzinë' Lê'. ¹⁹ La'tu' naca tuz le nagudi' dzágalenru', bití'rö soa idú ca naca cázaru'. ²⁰ Na'a, ca nácaru', zían le nagudi' dzágalenru', pero tuz le nácaru'.

²¹ Que lê ni na', guiöj loru' bití' gaca guië ná'aru', inná: "Bití' riquinda' li'." Lësca' caní, íjaru' bití' gaca guië ní'aru', inná: "Bití' riquinda' libí'ili'." ²² Na'a, yugu' le nagudi' dzágalenru', lê na' réquiru' nácacagarö cuídi'sö, lê ni naquíniöröru'. ²³ Lësca' caní, yugu' le nagudi' dzágalenru', le réquiru' nácacagarö cá'asö, lê ni rugácuröru' dxi'a, en yugu' le réquiru' bití' ral-la' ilá' lahui, rugácuröru' ca' dxi'a. ²⁴ Bití' run bayudxi gunru' caní que le nácarö lachi que le néquiniru'. Dios benë' idütë le naca cázaru', en benë' ga nácarö lesaca' lê na' réquiru' rë'u nácarö cá'asö. ²⁵ Caní benë', ate' bití' narúajgaca choplö le nagudi' dzágalenru', tu' tun chí'i luzë'guequi tu ia'tú. ²⁶ Channö gaca zí' tu le néquiniru', ilaca zí' tsözxön len le yúgu'të le néquiniru' na', en channö tu le néquiniru' zoa bi ruzí' xibé, yúgu'të le nagudi' dzágalenru' tu'zí xibé tsözxön le.

²⁷ Na'a, libí'i cázali' dzágali' idütë le naca cazë' Cristo, ate' tu tuli' nácali' ca yugu' le nagudi' dzágalenë'. ²⁸ Lësca' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo.

Ga naca buropi nucu'ë yugu' bönni' tu'ë didza' uláz queë'.

Ga bunní nucu'ë yugu' bönni' tu'sédinë' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ün nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'luí'inë' rë'u dxin gunru'.

Ní'irö nucu'ë yugu' bönni' tu'ë didza' yúbölö bití' nazëdagaquië'.

²⁹ Calëga yúgu'të' nácacagaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

³⁰ Calëga yúgu'të' dë lu ná'agaquië' ulu'ünë' nupa te'e.

Calëga yúgu'të' tu'ë didza' yúbölö bití' nazëdagaquië'.

Calëga yúgu'të' tu'dödë' didza' yúbölö bití' nazëdagaquië'.

³¹ Gulí'güf' ládxi'li' cu'ë Dios lu ná'ali' yugu' yöl-la' huáca na' nácacagarö lesaca'. Na'a, ulu'ida' libí'ili' tu le nácarö lesaca' ca yúgu'të lê ni.

¹ Sal-la' gaca gu'a xtída'gaca bönachi le cabí nazëda', enca' xtída'gaquie' gubáz lá'ayi queë' Dios, pero channö cabí nadxí'ida' luzá'a, didza' gu'a bití' gácarö lesaca' ca bö le run gui rucödxiru' o guíë rutíl-laru' luzë'e. ² Sal-la' nazí' lu na'a gu'a didza' uláz queë' Dios en tséajni'ida' yúgu'të le nagachi', en yúgu'të didza' réajni'i, en sal-la' naca idú ca réajlë'a Dios ga ridxintë huáca cúa' yugu' gu'a, pero channö cabí nadxí'ida' luzá'a, bití' bi nazáca'a. ³ Sal-la' quísia' idütë le dë quia' para ugahua' yugu' bönachi yechi', en sal-la' udöda' idütë le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, bití' ca' uzi'a xibë lë na' runa'.

⁴ Nu bönni' nadxí'inë' luzë'ë, ribözë' zxön ladxí'.

Náquie' dxi'i ladxí', en bití' ruzxé'enë' luzë'ë.

Nadxí'inë' luzë'ë idú ládxë'ë.

Bití' run ba zxön cuinë', en bití' run cuinë' lo.

⁵ Bití' runë' le ruá' dö'.

Bití' rudúli'në' le dë queë'.

Bití' rilëtenë', en bití' rōjnenë' dö' gulufi bönachi queë'.

⁶ Bití' ca' rudzéjanë' cate' nu run le ruá' dö'.

Rudzéjanë' cate' nu run le naca idütë li.

⁷ Ruá' rilenë' bítitës bi gun luzë'ë queë'.

Réajlë'tica'së' luzë'ë.

Rúntica'së' löza gun luzë'ë le naca dxi'a.

Ribözatica'së' zxön ladxí'.

⁸ Bítirō tōdi que yöl-la' nadxí'i. Huadōdi que le dë lu ná'agaca bönachi ilufi didza' uláz queë' Dios. Huadxin dza cate' bítirō gata' lu ná'agaca bönachi ilufi didza' yúbölō le cabí nazëdagaca, ate' huadōdi que yöl-la' réajni'i quéguequi bönachi. ⁹ Látido'os réajni'iru' na'a, en látido'os ca' ru'iru' didza' uláz queë' Dios. ¹⁰ Cate' idxin le naca idú, ní'irō údxi que lë na' naca látido'os.

¹¹ Cate' ni' naca' b'ido', bë'a didza' ca b'ido', en gulequi icja' ca b'ido', en guzá' ládxa'a ca b'ido'. Cate' bigula' bucá'ana' le nequi que b'ida'ahua'. ¹² Na'a le rilë'eru' naca ca le rilë'eru' cate' ruyú cuinru' tu lu guíë dxilido'. Bití' rilë'eru' idú ca naca. Dza ní'irō ilë'eru' idú ca naca yúgu'të. Na'a núnbë'a látido'os. Dza ní'irō gúnbë'a yúgu'të ca na' Dios caz núnbë'ë neda'. ¹³ Na'a, nacaú'tica'sō yöl-la' réajlë' queëru' Dios, en yöl-la' run löza queëru' Dios, en yöl-la' nadxí' queëru' luzá'aru'. Nacuá' yonna ni, pero le naca lo naca yöl-la' nadxí'i.

14

Yugu' yöl-la' huáca runnë' queëru' Dios Bö' Lá'ayi

¹ Guligún bayudxi idxí'ili' luzá'ali', en guli'güi' ládxí'li' sí'ili' ca' yugu' yöl-la' huáca runnë' queëru' Dios Bö' Lá'ayi, en le naca lo, yöl-la' huáca güf'ili' didza' uláz queë' Dios. ² Nu ru'í' didza' yúbölō le cabí nazëda, calëga bönachi ru'í'ilen didza' nu na'. Dios caz ru'í'ilen didza' nu na', tu' cuntú nu zoa réajni'i didza' ru'í' nu na'. Dios Bö' Lá'ayi ru'ë' nu na' lataj ru'í' didza' ca náacagale le nagachi' queë' Dios. ³ Nu na' ru'í' didza' uláz queë' Dios, ru'í'ilen bönachi didza' para gácarō idú ca ta'yéajlë' Cristo. Rutipa ládxí'guequi, en ruhuë tsahui' léguequi. ⁴ Nu na' ru'í' didza' yúbölō le cabí nazëda run tsutsu la' cuinsi, pero nu ru'í' didza' uláz queë' Dios run tsutsu yúgu'të bönachi queë' Cristo.

⁵ Raca ládxa'a güf'ili' didza' yúbölō le cabí nazëdali' yúgu'tëli', pero le naca lo, rë'ënda' güf'ili' didza' uláz queë' Dios. Ruzf'irōru' xibë nu ru'í' didza' uláz queë' Dios ca ruzi'iru' xibë nu ru'í' didza' yúbölō le cabí nazëda, channö cabí zoa nu udödi didza' yúbölō na' le cabí nazëda, para ilaca tsutsu bönachi queë' Cristo. ⁶ Que lë ni na', böchi' luzá'ado', cate' guída' ga zóali', channö güf'ilena' libí'ili' didza' yúbölō le cabí nazëda', bití' bi uzí'ili' xibë. Uzí'isili' xibë didza' na' güf'ilena' libí'ili' le nulufinë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

⁷ Lëasca' caní raca que le ta'gú'u bö, yugu' le cabí nabángaca, ca naca gui rucödxiru', o ca naca guitarra. Channö cabí tul-la ca ral-la' ilún, ¿nacxi caz gúnbë'ëru' bízxilō le tul-la na', lë na' rul-la gui na', o guitarra na'? ⁸ Channö cabí cōdxi ca ral-la' gun lúzuba' bōa' na' ulidza rë'u lu gudil-la, ¿nuzxi caz upá' cuini para tseaj lu gudil-la na'? ⁹ Lëasca' caní raca queëli'. Channö len lúdxí'li' güf'ili' didza' le cabí taca bönachi, bití' ca' ila'yéajni'i didza' güf'ili'. Caní gaca, nítisō güf'ili' didza'. ¹⁰ Le nácatë nacua' zían didza' yúbölō tu'í' zían cō' bönachi izá'a lu yōdzölō ni, ate' nacua' bönachi ta'yéajni'i tu tu didza' na'. ¹¹ Na'a, channö cabí réajni'ida' didza' ru'ë tu bönni', gaca' ca tu bönni' zítu' lahuë' bönni' na' ru'ë didza', ate' bönni' na' ru'ë didza' gáquie' ca' lahua' neda' ca tu bönni' zítu'. ¹² Lëasca' caní naca queëli'. Ru'í'ida' ládxí'li' sí'ili' yugu' le runnë' queëru' Dios Bö' Lá'ayi. Que lë ni na', guli'güi' ládxí'li' sí'ili' le ilún ga ilácarō tsutsu bönachi queë' Cristo.

¹³ Que lê ni na' ca', nu ru'i didza' yúbölö le cabí nazêda ral-la' ulidza Dios, en inabi Lê' gunnê' que yöl-la' huáca quixjô' le rê'êni inná didza' na' ru'i nu na'. ¹⁴ Cate' rulidza-nê' Dios, channô ruá'a didza' yúbölö le cabí nazêda', lu bö' naca caza' rulidza'-nê' Dios, pero tu' cabí réajni'ida' didza' ruá'a, lu yöl-la' réajni'i quia' biti' ruzi'a xibé didza' na' ruá'a. ¹⁵ ¿Nacxi caz ral-la' guna' channô? Ulidza'-nê' Dios lu bö' naca caza', enca' lu yöl-la' réajni'i quia' ulidza'-nê' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba. ¹⁶ Channô lu bö' naca cazu' rulidza lá'ayu'-nê' Dios, ate' zoa ni' nu riyónisô, channô cabí réajni'i didza' ru'u, ¿nacxi caz gaca inná: "Ca' gaca", ni'a que didza' ru'u, rê'u-nê' Dios: "Xclenu"? ¹⁷ Nadxi ca' dxí'ado' ru'u didza', rê'u-nê' Dios: "Xclenu". Channô cabí réajni'i didza' ru'u, biti' bi' uzi' xibé nu na' riyóni. ¹⁸ Rea'-nê' Dios: "Xclenu", tu' ru'í'ra' didza' yúbölö le cabí nazêda' ca yúgu'têli'. ¹⁹ Lógaca bônachi queê' Dios gué'ênitêrôda' gu'a gáyu'sô didza' le gaca ila'yéajni'i bônachi ca zían gayuá' didza' yúbölö le cabí nazêda', ate' cuntu nu gaca tséajni'i. Gaca usédida' ia'zica'rô bônachi tuzi channô ila'yéajni'i didza' gu'a.

²⁰ Böchi' luzá'ado', biti' gácali' ca bí'ido' ca naca le rizá' ládxili'. Gul'gaca ca bí'ido' para cabí gunli' le ruá' dô', pero guli'gaca bônni' chinácagaca ca naca le rizá' ládxili'. ²¹ Nazúaj lu guichi lá'ayi le rnna: "Len didza' yúbölö, en lu ruá'agaca bônachi izá'a gü'ílená' bônachi ni didza'. Sal-la' guna' caní, biti' ulu'zê nágagaca xtídza'a." ¡Caní rnnê' Xanru'! ²² Caní naca, Dios ru'ê rê'u lataj ru'í'ru' didza' yúbölö le cabí nazêdaru' para gaca tu' le naca bê' lógaca bônachi biti' ta'yéajlê', en calêga lógaca nupa ta'yéajlê' Cristo. Ru'ê rê'u lataj ru'í'ru' didza' uláz queê' Lê' le ulu'z'í' xibé nupa ta'yéajlê' Cristo, en calêga bônachi na' biti' ta'yéajlê'. ²³ Que lê ni na', cate' udúbili' tsôzxôn, yúgu'têli' na' néquili' queê' Cristo, channô gü'íli' didza' yúbölö le cabí nazêdali' yúgu'têli', ate' tsazagaca nupa nazêdagaca láti'do'os, o nupa biti' ta'yéajlê' Cristo, ¿naru' cabí ila'nná: "Nachixi ícjali"? ²⁴ Na'a, channô yúgu'têli' gü'íli' didza' uláz queê' Dios, ate' tsaz nu cabí réajlê' Cristo o nu nazêda láti'do'os, gué'quibe'e nu na' nabaga' xígua', ate' Dios uchi'a usôrôê' Lê'. Caní gué'quibe'e nu na', tu' tseajni'i didza' gü'íli' yúgu'têli'. ²⁵ Gué'quibe'e ca naca le rizá' ládxí' nu na', lê na' bigachi', ate' uzóa xzibi nu na', en tseaj ládxí' Dios, ate' inná: "Le nácatê Dios zóalenê' libí'ili'."

Caral-la' gunru' ga rudúbiru' queê' Cristo

²⁶ Que lê ni na', böchi' luzá'ado', cate' rudúbili' queê' Cristo, rul-lê' tuê' bônni' dzáguie' libí'ili' tu salmo, ate' rusédinê' ia'tuê' tu xibá, ate' ia'tuê' riguixjô'i'nê' libí'ili' tu le bulu'ínê' Dios lê', ate' ia'tuê' ru'ê didza' yúbölö le cabí nazêdê', ate' ia'tuê' rudôdê' didza' yúbölö na' le cabí nazêdê'. Yúgu'tê le gunli' ral-la' gaca le ulu'z'í' xibé nupa tu'dubi queê' Cristo. ²⁷ Cate' nacuá' ni' nupa tu'í' didza' yúbölö le cabí nazêdagaca, biti' ral-la' gü'íli' didza' caní zíanrô ca chopa tsónnasili'. Huáca gu'ê didza' tuzê' bônni' na', ate' tódi na' huáca gu'ê didza' ia'tuê', pero run bayudxi soa nu udôdi didza' yúbölö na' le biti' nazêdali'. ²⁸ Channô cuntu nu zoa nu gaca udôdi didza' yúbölö na' le cabí nazêdali', tu' na' ru'í' didza' yúbölö le cabí nazêda ral-la' soa dxisô ga na' nudúbili', ate' huáca gü'ílen Dios didza' na' lu icja ládxí'da'ahui. ²⁹ Lêscá caní, yugu' bônni' tu'ê didza' uláz queê' Dios ral-la' ilu'ê didza' chopa tsónnasê', ate' ia'zica'rê' bônni' na' tu'ê didza' uláz queê' Dios ral-la' ulu'chi'a ulu'sôrôê' didza' ru'ê bônni' na'. ³⁰ Channô Dios uluf'ínê' tu bônni' rô'ê ni' le rê'êni inná xtídzê'ê, ral-la' soa dxisô nu na' ru'í' didza'. ³¹ Yúgu'têli' huáca gü'íli' didza' uláz queê' Dios tu tuli' para izêdali' yúgu'têli', en idipa ládxí'li' ca' yúgu'têli'. ³² Yugu' bônni' tu'ê didza' uláz queê' Dios huáca ila'nná be'e cuíngauie', en ila'cu'ê dxisô. ³³ Calêga Dios nu run ga rutsátsaru', tu' rê'ênê' Lê' gácaru' ba'a ládxí', ca na' runê' ga nacuá' yúgu'tê cò' bônachi queê' Cristo.

³⁴ Ral-la' ila'cuá'anu dxisô nigula queéli' ga na' rudúbili'. Biti' dê lu ná'agacanu iluf'ínu didza' ni'. Ral-la' ila'cuá'anu nôxaj ca na' rinná bê' xibá queê' Dios. ³⁵ Channô tê'êninu ila'yéajni'ínu ia'lati', ral-la' ila'nábinu bônni' que queégacanu cate' ni' nacu'ê lúdxigaquie'. Biti' ral-la' iluf'ínu didza' yugu' nigula ga na' rudúbiru' queê' Dios.

³⁶ ¿Naru' réquitseli' bunôdzjê' Dios xtídzê'ê lu ruá'ali' libí'isili'? ¿Naru' réquitseli' bidxín xtídzê'ê Dios queézili' libí'ili'? ³⁷ Channô nu bônni' nútsê'ê ládjali' réquinê' ru'ê didza' uláz queê' Dios, o réquinê' zóalenê' Dios Bô' Lá'ayi lê', bônni' ni ral-la' si' lu nê'ê naca xibá queê' Xanru' le ruzúaja' queéli' lu guichi ni. ³⁸ Na'a, channô cabí ru'í' ládxê'ê didza' ni, biti' gü'í' ládxí'li'-nê' bônni' na'.

³⁹ Que lê ni na', böchi' luzá'ado', guli'gü'í' ládxí'li' gü'íli' didza' uláz queê' Dios, en biti' inná bê'eli' nu ru'í' didza' yúbölö le cabí nazêda. ⁴⁰ Ral-la' gunru' yúgu'tê ca sa'yéaj, en lu yöl-la' ba'a ládxí'.

15

Bubanê' Cristo lu yöl-la' guti

¹ Na'a, böchi' luzá'ado', riguixjô'ida' libí'ili' ca naca didza' dxi'a na' bena' libán que ga zóali', lê na' guzxi' lu ná'ali', ate' run ga nácarô idú ca réajlê'êli' Cristo. ² Ni'a que didza'

ni uláli', channö gunli' ca rnna didza' dxi'a na' bena' libán que ga zóali', channö le nácatë guyéajlë'ëli'-në' Cristo.

³ Ga gusí lo budöda' lu ná'ali' le budödë' Dios lu na'a neda'. Caní rnna: "Gútië' Cristo uláz queëru' tu' nabága'ru' dul-la'." Ca naca lë ni nazúaj lu guichi lá'ayi le rnna ben bayudxi benë'. ⁴ Rnna ca: "Bigachë'ë yeru ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rnna ben bayudxi guca queë'. ⁵ Gudödi ni' bulufi lahuë' Cristo, ate' bilé'enë' Pedro Lë', en gudödi ni' idxínutë' gubáz queë' bila'lé'enë' Lë'. ⁶ Ní'irö bulufi lahuë' lógaquië' ziánrö ca gayu' gáyu'ë böchi' luzá'aru' ta'yéajlë'ë Cristo, cate' ni' nudúbigaquië' tsözxón. La'tu'biqui' yúgu'të' böchi'ru' ni' nacu'ë nabángaqië' na'a, sal-la' bal-lë' chinátigaquië'. ⁷ Ní'irö Jacobo bilé'enë' Lë', en gudödi ni' bulufi lahuë' lógaquië' yúgu'të bönni' gubáz queë'.

⁸ Ga yöjsetë bulufi lahuë' ca' lahua' neda'. Ca guca lë ni, naca' ca tu bí'ido' gúljabí cate' chigudödi dza ral-la' gáljabí'. ⁹ Caní naca, tu' nácara' neda' cá'asö ca yúgu'të bönni' gubáz queë', en bití' naca' neda' lesaca' si' la' gubáz queë', tu' gudxia ládxa'a bönni' queë' Dios. ¹⁰ Na'a, tu' buzá' ládxë'ë quia' Dios naca' le naca' na'a, en calëga nítisö buzá' ládxë'ë quia'. Béntëra' neda' xichinë' ca ia'zica'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin. ¹¹ Na'a, channö bena' libán neda' o channö gulunë' libán ia'zica'rë' bönni', lë ni le runtu' libán que, en le guyéajlë'ëli' libí'ili'.

Ubanru' lu yöl-la' guti

¹² Runtu' libán queë' Cristo ca na' bubanë' lu yöl-la' guti. Channö caní naca, ¿nacxi caz naca, rnnali' bál-lali': "Biti' ulu'bán nupa chinátigaca"? ¹³ La'tu' cabí ulu'bán nupa chinátigaca, bití' bubanë' Cristo, ¹⁴ en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queëli' Lë'. ¹⁵ Ia'stú, la'tu' cabí bubanë' Cristo, rizí' yë'ëtu' cate' runtu' ba nali' queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios bití' busubanë' Cristo. ¹⁶ La'tu' cabí ulu'bán nupa chinátigaca, bití' bubanë' Cristo, ¹⁷ en la'tu' cabí bubanë' Cristo, nítisö naca yöl-la' réajlë' queëli' Lë', ate' nagá'anagaca dul-la' nabágali'. ¹⁸ Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'. ¹⁹ Channö tsánnisö ni zóaru' nabanru' huáca uzí'iru' xibë' Cristo, nácaröru' bayechi' ca yúgu'të bönachi.

²⁰ Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti. ²¹ Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia' tuë' bönni' guyú'u yöl-la' rubán quégaca nupa chinátigaca. ²² Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo. ²³ Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquigeequi queë' Cristo cate' huödë'. ²⁴ Ní'irö idxín dza údxí cate' ugüë' Cristo idütë le dë lu në'e, en idütë yöl-la' unná bë', en idütë yöl-la' huáca que tu' xihui', ate' udödë' yöl-la' unná bë' queë' lu në'e Dios Xuz. ²⁵ Run bayudxi inná bë'ë Cristo ga idxinrö dza chibenë' Dios ga ulu'zechu zxi'bigaca lahuë' Lë' yúgu'të nupa ta'dá'baga' Lë'. ²⁶ Le ridá'baga' Lë' le usunítie' ga údxí naca yöl-la' guti. ²⁷ Dios chinudödë' yúgu'të lu në'e Zxi'inë' para inná bë'enë' le. Nazúaj lu guichi lá'ayi, rnna: "Budödë' yúgu'të lu në'e para inná bë'enë' le." Na'a, naca bë' bití' budödi cuinë' lu në'e Zxi'inë', tu' naca cazë' Lë' Nu rudödi yúgu'të lu në'e Zxi'inë'. ²⁸ Cate' idxín dza ni' chinudödë' Dios lu në'e Cristo yúgu'të para inná bë'enë' le, ní'irö Lë' cazë' Zxi'inë' udödi cuinë' lu në'e Dios, Nu na' budödi lu në'e Zxi'inë' yúgu'të, ate' ga údxí, Dios inná bë'enë' tsaz yúgu'të.

²⁹ Bál-lali' ridíalali' nisa uláz quégaca nupa chinátigaca. Channö réquili' bití' ulu'bán nupa na' chinátigaca, ¿bizx que ridíalali' nisa uláz quégaca nupa chinátigaca?

³⁰ Zoa bönnaxi queëtu' gátitu' yúgu'të dza. ¿Bizx que ru'itu' lataj gaca caní channö cabí ubanru' lu yöl-la' guti? ³¹ Yúgu'të dza zoa bönnaxi gátia'. Ríguixjoi'ida' libí'ili' lë ni, böchi' luzá'ado', tu' raza ládxa'a le bena'. Caní naca tu' bena' ga réajlë'ëli' Xanru' Jesucristo. ³² Channö tu' gú'unisida' gudíl-lalena' böa' guixi' sínia' lu yödöz Éfeso, ¿bizxi caz uzi'a xibë? Channö cabí ulu'bán nupa chinátigaca, ral-la' gunru' ca ta'nná bönachi: "Gui'aj gáguru' tu' huátiru' cuxö huidzaj."

³³ Bití' gú'ili' lataj nu si' ye'e libí'ili'. Channö si' lu ná'ali' láti'do'os le cabí nácatë, idütëli' huóacali' chul-la niti. ³⁴ Bulí'bí'í ládxí'li', en bití' gunli' dul-la' tu' cabí núnbë'ëli'-në' Dios bál-lali' libí'ili'. Rnní'a caní para guna' ga utufí'ili'.

Ca ilaca nupa ulu'bán lu yöl-la' guti

³⁵ Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nácacaca cazë' cate' ulu'dxinë'?" ³⁶ Li', bönni' bití' bi' nózinë'. Lë na' rázu' luyú bití' ilén channö cabí initi. ³⁷ Lë na' rázu' luyú naca tu' xisédo'os, nadxi ca' que zxo'a' xtila o que ia'tú guixi' cuando'. Lë na' rázu' bití' naca guixi' cuando' na' ral-la' ilén. ³⁸ Dios runë' ga gaca guixi' cuando' ca nun cazë' que. Ca naca tu' tu' xisédo' na' runë' ga gaca guixi' cuando' que. ³⁹ Lësca' caní,

biti' naca lëbisö bëla' que queëgacaba' yúgu'tëba' böa' guixi'. Zoa tu bëla' queëgaca bönachi, en ia'tú ca naca bëla' queëgacaba' böa' guixi'. Ia'tú ca naca bëla' queëgacaba' biguinni, en ia'tú ca naca bëla' queëgacaba' böla. ⁴⁰ Lësca' caní nadzá' idú ca nácagaca caz nupa nacuá' yehua' yubá ca naca idú ca nácagaca caz nupa nacuá' luyú ni. Zoa tu yöl-la' lachi queëgaca nupa nacuá' yehua' yubá, en ia'tú ca naca yöl-la' lachi queëgaca nupa nacuá' luyú ni. ⁴¹ Zoa tu yöl-la' lachi que gubidza, en ia'tú que beo', en ia'tú queëgacaba' böla' lúxiba. Yöl-la' lachi que tu böla' lúxiba nadzá' ca naca yöl-la' lachi que ia'tú böla' lúxiba. ⁴² Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' iníti. Cate' ubán, ní'irö gaca tu le soa tsaz. ⁴³ Cate' rigachi' lu yeru ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la. ⁴⁴ Cate' rigachi' lu yeru ba naca tu bëla' que yödzölió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzölió ni, en ia'tú ca gaca le idzaga bö' naca cázaru'.

⁴⁵ Nazúaj lu guichi lá'ayi le rnna: "Bönni' na' gusi' lahuë' zoë' luyú ni, lë' Adán, Dios benë' lë' bönni' ban", pero Bönni' na' guyázië' xilatjë' Adán, lë' Cristo, Dios benë' ga náquië' Bö' nabániru'. ⁴⁶ Biti' blë'ë' zí'alö Bönni' na' náquië' Bö'. Bla' zí'alö nu na' naca bönáchisö, ate' ní'irö blë'ë' Bönni' na' náquië' Bö'. ⁴⁷ Bönni' ni' blë'ë' zí'alö, gúquinë' yu. Bönni' na' blë'ë' burópilö, Nu na' naca Xanru', birúajë' yehua' yubá. ⁴⁸ Nupa nacuá' luyú ni nácagaca ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá. ⁴⁹ Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huöëquiru' ca néquinë' Nu na' birúaj yehua' yubá.

⁵⁰ Caní rë'ëni inná lë ni rea' libí'ili', böchi' luzá'ado', rnna: Le néquini bëla', en rön biti' gaca tsaz ga ni' rinná bë'ë Dios, en lësca' caní, lë na' iníti biti' gaca ideli' lë na' soa tsaz. ⁵¹ Buli'yútsöca', rea' libí'ili' tu le bigachi': Biti' gátiru' yúgu'tëru', pero Dios utsë'ë ca nácaru' yúgu'tëru'. ⁵² Tsáldo'os gaca, tsca naca tu le rutásö guiöj loru', cate' cödxí lúzuba' böa' le röjsetë. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsë'ë le néquini' yúgu'tëru'. ⁵³ Lë na' nácaru' le riniti ral-la' huöáca le soa tsaz, ate' le néquini' lë na' ral-la' gati, huöáca tu le catu caz gati. ⁵⁴ Cate' lë na' riniti chinuhuöáca le soa tsaz, enca' lë na' ral-la' gati chinuhuöáca le catu caz gati, ní'irö idxín lë na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'në' Cristo.

⁵⁵ Biti'rö inná be'e yöl-la' guti rë'u.

Biti'rö gaca yöl-la' guti bi gun queëru'.

⁵⁶ Huáca bi gun yöl-la' guti queëru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios. ⁵⁷ ¡Xclenë' Dios! ¡Lë cazë' runë' ga nuláru' lu yöl-la' guti ni'a que le benë' Xanru' Jesucristo!

⁵⁸ Que lë ni na', böchi' luzá'ado', guli'sóa tsutsu. Guli'gaca idú ládxi'li', gúntica'sili' xichinë' Xanru' tu' nöz queézili' biti' runli' nitisö xichinë' Xanru'.

16

Yugu' bönachi Corinto tu'nödzaj queëgacaba' böchi'gaca ta'yádzjanë'

¹ Na'a, ca naca que dumí na' unödzjali', le gácalen böchi'ru' ta'yéajlë'ë Cristo nacu'ë Jerusalén, guli'gún na'a ca na' gunná bé'eda' yugu' cö' bönachi queë' Cristo, nacuá' luyú Galacia. ² Yugu' dza domingo, tu tuli' ral-la' cú'uli' quez lati' dumí, tsca na' Dios runnë' queéli'. Guli'gún chi'i le, para cabí gun bayudxi bi utúbili' cate' idxina' ga zóali'. ³ Cate' ni' idxina' ga zóali', isöl-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bë'gaquië', ate' ilu'ë dumí na' unödzjali'. ⁴ Channö ral-la' tseja' ca' neda', tsöjácalenë' neda'.

Le rë'ëne' gunë' Pablo

⁵ Guída' ga zóali' cate' údxi töda' yugu' yödzö luyú Macedonia, tu' run bayudxi töda' yugu' yödzö na'. ⁶ Réquida' ugá'analena' libí'ili' tu chi'i, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugú'uli' neda' nöza gátitës ga ral-la' tseja'. ⁷ Cate' guída' uduyúa' libí'ili' biti' rë'ënda' tódisa' ni'. Runa' löza sóalena' libí'ili' xidzé, channö gunnë' Xanru' neda' lataj. ⁸ Ugá'ana' ni lu yödzö Éfeso ga idxinrö dza Pentecostés ⁹ tu' dë lataj ni guna' tu dxin xzön queë' Xanru', sal-la' zían nupa ta'dá'baga' neda'.

¹⁰ Channö idxinbi' bi'i Timoteo ga na' zóali', guli'gü'i ládxi'li'-bi', para cabí ubi uguí'ibi' tsanni ni' sóaleni' libí'ili', tu' runbi' xichinë' Xanru' ca na' runa' neda' xichinë'. ¹¹ Que lë ni na', cuntú nu ral-la' uzóa lëbi' tsólá'alö. Guli'gácalen-bi', ugú'uli'-bi' nöza idú tsáhui'do', para udxinbi' ga ni zoa' neda', tu' ribóza'-bi' lëbi', enca' yugu' böchi'ru' túnlenë'-bi' tsözxön dxin.

¹² Ca naca queë' böchi'ru' Apolos, gúta'yua' lahuë' tsejë' tsöjyúë' libí'ili' tsözxön len yugu' böchi'ru', pero biti' rë'ëne' tsejë' na'a. Guidé' cate' séquinië'.

Didza' ru'ë Pablo ga ruúdx

¹³ Buli'subán ládxí'li', en guli'gaca tsutsu ca réajlë'ëli'-në' Cristo. Guli'gaca rugu ladxi', en buli'tipa ládxí'li'. ¹⁴ Len yöl-la' nadxí'i guli'gún bíti'tës bi gunli'.

¹⁵ Na'a, böchi' luzá'ado', chinóz quézili' ca naca queë' Estéfanos, enca' quégaca di'a dza queë'. Nácagaca nupa gula'sí lógaca ta'yéajlë' Cristo ladaj bönachi nacua' luyú Acaya. Bulu'dödi cuíngaquië' para ilunë' xichíngaca bönachi queë' Dios. ¹⁶ Ráta'yua' loli', böchi' luzá'ado', gunli' bal nupa nácagaca ca böchi'ru' na', enca' ca nácagaca nupa tunlen légaquië' tsözxön dxin, en tácalen légaquië'. ¹⁷ Rudzējada' tu' bila'dxinë' Estéfanos, en Fortunato, en Acaico ga zoa', tu' gúcalengaquië' neda' uláz queëli'. ¹⁸ Bulu'huë tsáhuë'ë neda' ca na' bulu'huë tsáhuë'ë ca' libí'ili'. Guli'gún bal bönachi caní.

¹⁹ Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lídxigaquië' tu'gapë' Dios libí'ili'. ²⁰ Yúgu'të böchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

²¹ Neda', Pablo, len na' cuin caza' ruzúaja' lu guichi lë ni, rnnía': Rugapa' Dios libí'ili'.

²² Nu bití' nadxí'i Xanru' Jesucristo, chinabía dö' nu na'.

Gudá Xanru'.

²³ Rinábida'-në' Xanru' Jesucristo uzá' ládxë'ë queëli'. ²⁴ Nadxí'ida' yúgu'tëli' tu' nácaru' tuz len Xanru' Jesucristo. ¡Ca' gaca!

DIDZA' BUROPI GUSÖL-LË'Ë PABLO YÖDZÖ CORINTO

Pablo rugapë Dios bönachi queë' Cristo nacu'ë Corinto

¹ Neda', Pablo, naca' gubáz queë' Jesucristo tu' rë'ënë' caní Dios. Bi'i bóchiru' Timoteo runbi' neda' tsözxón. Rugapa' Dios libí'ili', rudúbili' queë' Dios lu yödzo Corinto, enca' yúgu'téli' néquili' quez queë' Dios luyú Acaya ga na' nababa Corinto. ² Rinábida-në' Xúziru' Dios, en Xanru' Jesucristo uzá' ládxë'ë queë'li', en gunë' ga soa dxi icja ládxi'do'oli'.

Yugu' le gudí'i guzxaqué'ë Pablo

³ Jöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhuë tsáhu'i'tica'só rë'u! ⁴ Dios ruhuë tsáhuë'ë rë'u cate' raca bití'tës bi raca queëru', para gaca huë tsáhu'i'ru' ca' nupa bi raca quéqueui. Ruhuë tsáhu'i'ru' légaquië' ca na' Dios ruhuë tsáhuë'ë rë'u.

⁵ Tsca ta'yán le riguí'i rizáca'ru', ca na' gudí'i guzxaqué'ë Cristo, lësca' caní ta'yán le tu'huë tsáhu'i' rë'u, tu' nácaru' tuz len Cristo. ⁶ Que lë ni na', channö bi riguí'i rizáca'tu', raca caní queëtu' para gaca huë tsáhu'i'tu' libí'ili', en guntu' ga uláli'. Channö Dios ruhuë tsáhuë'ë netu', raca caní para gaca huë tsáhu'i'tu' libí'ili', ate' lu yöl-la' riböza zöxn ladxí' queë'li', gaca guá' ilenli' yugu' le quí'i sáca'li', ca na' raca ca' queëtu'. ⁷ Ruzxöni ládxi'tu'-në' Dios gúntica'së' ga gaca dxi'a queë'li', tu' chinözütu' ca na' riguí'i rizáca'li' tsözxón len netu', lësca' caní ruzí'ili' xibë tsözxón len netu' le ruhuë tsáhuë'ë Dios rë'u.

⁸ Rë'ënitü' inözili', böchi' luzá'ado', ca naca le zían le gulaca queëtu' luyú Asia. Gudödité bë' lë na' guca queëtu', ate' guca zítërö ca le guca guá' ilentu'. Ca' guca, bití'rö bentu' löza sóatu' ibantu'. ⁹ Gúquitu' guca queëtu' ca raca quégaquië' bönni' chinarugu quégaquië' ilatië'. Guca caní queëtu' para cabi uzxöni ládxi'tu' la' cuínsitu', pero uzxöni ládxi'tu'-në' Dios, Nu rusubán nupa chinátigaca. ¹⁰ Dios busölë' netu' lu lë na' ben ga guzóa bönadxi gátitu', ate' rusölë' netu' yúgu'të dza. Runtu' löza usölë' Lë' netu' caní leyúbölö ¹¹ channö gácalenli' netu', ulídza'li'-në' Dios, en inábili'-në' gácalenë' netu'. Dios gunë' ca na' inábili'-në' tsözxón len bönachi zían, uzá' ládxë'ë queëtu', ate' ila'nná: "Xclenë' Dios" ni'a queëtu'.

Rigújxö'ë Pablo bizx que ridzenë' idxinë' Corinto

¹² Lë ni le run ga rudzéjatu'. Bö' naca caztu' rulu'i' netu', len yöl-la' ba'a ladxí' queëtu', en idú ládxi'tu' runtu' bi runtu' yödzüliö ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxë'ë Dios queëtu', en calëga len yöl-la' réajni'i queëztu' bentu' caní. ¹³ Ruzúajso'tu' queë'li' lu guichi le gaca ulábali', en le gaca tséajni'ili'. Raca ládxa'a tséajni'ili' idú ¹⁴ lë na' réajni'ili' lati'. Ni'irö cate' idxin dza huödë' Xanru' Jesucristo, gaca gunli' netu' zöxn ca na' netu' guntu' libí'ili' zöxn.

¹⁵⁻¹⁶ Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili' xibá' chopa luzuí. Tödi ni' huáca gácalenli' neda' ugu'uli' neda' nöza tseja' luyú Judea. Caní gú'unida' guna'. ¹⁷ ¿Naru' réquitseli' guzxf' yë'a tu' butsa'a ca guna'? ¿Naru' réquitseli' lu yöl-la' bönáchisö quia' runa' le rizá'asö icja', en bë'ësa' ca' didza' cate' gunniá': "Caní guna'?" ¹⁸ Ni'a queë' Xanru' Dios, Nu run idútë ca rnna xtídzë'ë, bití' bë'ësa' ca' didza' cate' bë'lëna' libí'ili' xtídzë'ë Dios. ¹⁹ Jesucristo, Zxi'inë' Dios, Nu na' bentu' libán que ga zóali', neda' len Silvano, en Timoteo, bití' ru'isë' ca' didza'. Lë' ru'ë didza' idútë li. ²⁰ Cristo caz runë' ga naca idútë löza yúgu'të le guzxf' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba. ²¹ Dios caz runë' ga runtu' löza tsözxón len libí'ili' néquiru' queë' Cristo, en budödë' lu na'tu' dxin queë' runtu'. ²² Bennë' queëru' le naca bë' néquiru' queë', tu' guchízië' icja ládxi'do'oru' Dios Bö' Lá'ayi, Nu naca queëru' le run ga naca löza yúgu'të le gunné' Dios queëru'.

²³ Ni'a queë' Xanru' Dios, Nu nözi le rizá' ládxa'a, ruá'a didza' idútë li. Nözinë' Lë' bití' bida' ga zóali' lu yödzo Corinto, para cabi gun bayudxi guna' ga huí'inili'. ²⁴ Bití' rë'ënitü' inná bë'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lë'. Rë'ënitü' guntu' le gun ga udzeja ládxi'li'.

2

¹ Que lë ni na' bë' ládxa'a cabi guídatea' queë'li' zí'alö, para cabi guna' ga huí'inili'. ² Channö guna' neda' ga huí'inili', ¿nuzxi caz gun ga udzéjada' neda'? ¿Naru' guntsa' ga huí'ini nu ral-la' gun ga udzéjada' neda'? ³ Que lë ni na' buzúaja' queë'li' lu guichi zí'alö. Bití' gú'unida' guída' ga zóali', para cabi gunli' libí'ili' ga huí'inida' neda', tu' ral-la' gácali' libí'i cázali' le gun ga udzéjada' neda'. Tu' ruzxöni ládxa'a libí'ili', nözda' udzéjali' yúgu'téli' channö udzéjada' neda'. ⁴ Cate' ni' buzúaja' queë'li' lu guichi lë na', gusëbide'e ládxa'a, en buí'inide'e ládxa'a ga

bidxintë gurödxá'. Buzúaja' caní lu guichi, calëga para guna' ga huí'inili', pero para inözili' ca nadxí'ide'eda' libí'ili'.

Ral-la' uniti loru' nu ruá' dö' cate' rubí'i ladxí'

⁵ Channö zoë' tu bönni' ni', bönni' na' busuhuí'ininé' rë'u, calëga neda'sö busuhuí'ininé', pero huáca innaru' busuhuí'ininé' yúgu'tëli' libí'ili'. Rnní'a: "Huaca innaru'", para cabí tódi bë' ichugu bë'a queë' bönni' na'. ⁶ Tscati' gaz xíguia' chibenli' látu'biqui' yúgu'tëli' queë' bönni' na'. ⁷ Na'a, ral-la' uniti loli' bönni' na', en utípali' ládxë'ë, para cabí tódi bë' huí'ininé', en para cabí gaca tsaz chopa ládxë'ë. ⁸ Que lë ni na' ráta'yua' loli' gunli' le gaca bë' nadxí'ili'-në' idú ládxí'li'. ⁹ Que lë ni na' ca' buzúaja' queëli' lu guichi lë na'. Gú'unida' si' bë'a libí'ili' para inözda' channö rúntica'sili' ca rnna xtídza'a. ¹⁰ Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queë' Cristo para gaca bi uzí'ili' xibé. ¹¹ Caní runa', para cabí sequi' Satanás tu' xihui' ucúl-la rë'u, tu' chinöziru' yugu' le rë'ëni gun queëru'.

Gurö'ë böniga Pablo lu yödzo Troas

¹² Cate' bidxina' lu yödzo Troas para guna' libán que didza' dxi'a queë' Cristo, bénnadë'ë Xanru' neda' lataj guna' libán ni'. ¹³ Sal-la' guca caní, gurö'a böniga tu' cabí yøjxáca'a-bi' bi' bóchiru' Tito ni'. Que lë ni na' buzá'alena' bönachi ni', ate' guyi'ja' luyú Macedonia.

Idéli'ru' tu' zóalenë' Cristo rë'u

¹⁴ ¡xclenë' Dios! Riché'tica'së' rë'u ca tu le naca bë' bidéli'në' Cristo yöl-la' rusólá queëru'. Dios rugunë' dxin rë'u para rulu'ë lahui ca gaca ilúnbë'e bönachi Cristo. Le nácaru' naca ca tu le rilá' zxixi, le riguisi gátitës. ¹⁵ Nácaru' ca tu nöri rilá' zxixi, le ruzégui'ë Cristo lahuë' Dios, en le riguisië' lógaca nupa nulágaca, en nupa nanítigaca. ¹⁶ Lógaca nupa na' nanítigaca nácaru' ca tu le rilá' siguti le naca bë' ilátië'. Lógaca nupa na' nulágaca nácaru' ca tu le rilá' zxixi le naca bë' ibántica'siru'. ¿Nuzxi caz naca lesaca' gaca que caní? ¹⁷ Biti' runtu' ca tun zían bönachi, nupa tu gún dxin xtídze'ë Dios ca tu le tuti', en to'o. Tu' nasól-lë'ë Dios netu', idú ládxí'tu' ruí'itu' didza' lahuë' Lë' tu' nácatu' tuz len Cristo.

3

Ca naca didza' le ruín rë'u tuz len Dios

¹ ¿Naru' réquitseli' run ba zxön cuintu' cate' ruí'itu' caní didza'? ¿Naru' runtsö bayudxi uluí'itu' libí'ili' tu guichi le rulu'i' le nácatu'? ¿Naru' ral-la' inábitu' libí'ili' gúnnali' queëtu' tu guichi caní, ca na' tun bal-la bönachi? ² Libí'i cázali' nácali' ca tu guichi le rulu'i' le nácatu', le nazúaj lu icja ládxí'do'otu', ate' yúgu'të bönachi gaca ulu'laba le, en tséajni'iguequi le. ³ Le nácali' nalá' lahui ca tu guichi nuzúajë' Cristo, le gusól-lë'ë lu na'tu'. Biti' nazúaj tu lu guichi, pero Bö' Lá'ayi queë' Dios ban nuzúajë' le, calëga tu lu guiójta'a, pero lu icja ládxí'do'oli' nuzúajë'.

⁴ Ruí'itu' caní didza' tu' ruzxöni ládxí'tu'-në' Dios tu' zóalenë' Cristo rë'u. ⁵ Biti' réquitu' bi gaca guntu' rásasö queëtu', pero Dios runnë' queëtu' yöl-la' huáca bi guntu'. ⁶ Dios caz bennë' queëtu' yöl-la' huáca guntu' xichinë' lu didza' cubi na', le ruín rë'u tuz len Dios. Didza' ni biti' naca tu xibá nazúaj lu guichi, pero naca tu le nusédinë' Dios Bö' Lá'ayi rë'u. Xibá na' nazúaj lu guichisö richugu queëru' gátiru', pero Dios Bö' Lá'ayi nabániru'.

⁷ Yugu' xibá queë' nazúajgaca lu guichi, Dios buzúajë' yugu' lu guiójta'a, ate' bulu'e lahui yöl-la' bení' queë' cate' budódë' le lu në'ë Moisés. Sal-la' gudödi que, gupépitëro yösa bení' lahuë' Moisés. Caní guca, bití' guca ulu'yú bönachi Israel lahuë' Moisés. Channö yöl-la' bení' caní yójtsga xibá na', ate' xibá na' richugu quégaca bönachi ilátigaca, ⁸ zxöntëro naca yöl-la' bení' na' dzaga yugu' le runë' Dios Bö' Lá'ayi. ⁹ Yójtsga yöl-la' bení' lë na' ben ga narugu quégaca bönachi ilátigaca. Zxöntëro naca yöl-la' bení' que lë na' run ga rnnë' Dios nácacaga tsahui' bönachi. ¹⁰ Tu' nácatëro lesaca' yöl-la' bení' na' nalá' lahui na'a, cuídi'sö nagá'ana yöl-la' bení' na' bilá' lahui cate' Dios bunódzjë' xibá queë' quégaca bönachi. ¹¹ Channö guzóa yöl-la' bení' que lë na' guzóa tu chí'ido'osö, zxöntëro naca yöl-la' bení' que lë ni sóatica'sö.

¹² Tu' zoa lë ni runru' löza, ruí'itu' didza' lu yöl-la' rugu ladxí'. ¹³ Biti' runtu' ca benë' Moisés, bucache' lahuë' len tu lári'do', para cabí ulu'yú bönachi Israel yöl-la' bení' na' zeaj riniti. ¹⁴ Gula'chul-la gula'nítië' yugu' bönni' ni'. Ga ridxintë na'a dza cate' tu'labë' guichi que didza' gula na' le ruín bönachi tuz len Dios, naca tsca nagá'ana la' leze lári'do' na' lógaquië', lë na' gaca ugúë' tuzë' Cristo. ¹⁵ Ga ridxintë na'a dza, cate' tu'labë' guichi ga na' nazúaj didza' queë' Moisés, zxoa ca tu lári'do' guiój lógaquië' le run ga nachul-la nanítigaquië'. ¹⁶ Cate' nu ruhuóaca queë' Xanru', rigúa lë na' run ga nachul-la naniti nu na'. ¹⁷ Cate' ni rnnatu': "Xanru'", ruí'itu' didza' queë' Dios Bö' Lá'ayi. Ga zoë' Bö' Lá'ayi queë' Xanru', ni' zoa caz yöl-la' nadzán. ¹⁸ Yúgu'tëru' rë'u bití' bi nusayaj loru'. Nácaru' ca tu guié dxili ga nalá'

yöl-la' bení' que lahuë' Xanru', ate' yöl-la' bení' na' queë' Xanru', Nu naca Bö' Lá'ayi, rutsá' rë'u, en run ga zeaj rácaröru' ca náquië' Cristo caz, en ráta-rö queëru' yöl-la' bení' queë'.

4

¹ Dios buéchi' ládxë'ë netu', en budödë' lu na'tu' dxin ni runtu'. Que lê ni na' bití' raca chopa ládxí'tu'. ² Chibucá'anatu' le tun bönachi bagáchi'sö, en le tun ga rutuí'iru'. Cuntu nu rizí' yé'etu', en bití' rutsá'atu' xtídzë'ë Dios. Tu' ruí'itu' didza' que le naca idütë li, ruí'í ládxí'tu' guntu' le iléquite'e yúgu'të bönachi naca dxi'a lahuë' Dios. ³ Channö zoa nu bití' réajni'ini didza' dxi'a runtu' ba nali' que, nácagacasö nupa nachul-la nanítigaca bití' ta'yéajni'i le. ⁴ Bití' ta'yéajlë' bönachi na'. Ben tu' xihui' ga naca caní, nu na' nun cuini' ca dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxi'a ca naca yöl-la' bení' queë' Cristo, Nu na' naca idú ca náquië' Dios caz. ⁵ Bití' runtu' libán que la' cuínsitu', pero runtu' libán queë' Jesucristo, en rigúxjö'ötu' náquië' Xanru', ate' netu' ni nácatu' huen dxin queéli' tu' nadxí'itu'-në' Jesús. ⁶ Dios, Nu ben ga buzení' bení' ga ní' guca chul-la, náquië' Nu rigú'u bení' icja ládxí'do'oru', le ruzéajni'i rë'u para gúnbë'ëru' yöl-la' bení' queë' Dios, lê na' ruzení' lahuë' Jesucristo.

Tu' réajlë'ëru' Dios runru' ca rë'ënë' Lë'

⁷ Yöl-la' tsahui' ni yu'u icja ládxí'do'oru' rë'u. Nácaru' ca yugu' yusu' yu, para gaca bë' nequi queë' Dios yöl-la' huáca zxön na', en calëga que cázaru'.

⁸ Tu'saca' zì' bönachi netu', pero bití' rudú ládxí'tu'.

Rö'ötu' böniga, pero bití' raca chopa ládxí'tu'.

⁹ Ta'bia ládxí' bönachi netu', pero bití' rubéaj ládxë'ë Dios netu'.

Ta'zé'ede'e netu' yu, pero bití' tu'suniti netu'.

¹⁰ Lu idú le naca caztu' rátitica'stu' tsözxön len Jesús,

na' naca bë' lu le naca caztu' nabánitu' Lë'.

¹¹ Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti. ¹² Caní naca, zoa bönadxi queëtu' gátitu', pero ni'a que lê ni rata' yöl-la' na'bán queéli'.

¹³ Nazúaj lu guichi lá'ayi le rnna: "Guyéajlë'a Dios, ate' que lê ni na' bë'a didza'." Lësca' caní raca queëtu', réajlë'ëtu' Dios, en que lê ni na' ruí'itu' didza'. ¹⁴ Nöztu' ca gunë' Dios, Nu busubán Xanru' Jesús, usubanë' ca' netu' tsözxön len Jesús, en usudxinë' netu' tsözxön len libí'ili' lahuë' Lë'. ¹⁵ Raca caní yúgu'të lê ni para gaca bi uzí'ili' xibë. Channö ila'deli' zianró ca' bönachi le ruzá' ládxë'ë Dios queëru', ila'nnë': "Xclenë' Dios", ate' gaca yöl-la' ba queë' Dios.

¹⁶ Que lê ni na' bití' raca chopa ládxí'tu'. Sal-la' riniti idú le naca caztu', yúgu'të dza rucubë' Dios le nácatu' lu icja ládxí'do'otu'. ¹⁷ Le cuidi'sö riguí' rizáca'ru' ni tu chí'ido'osö run ga gata' queëru' le uzí'da'aru' xibë le sóatica'sö, en le nácatë'rö lesaca' ca gaca gúnbë'ëru'. ¹⁸ Bití' ruí'í ládxí'ru' le rilë'ëru' luyú ni, pero le bití' gaca ilë'ëru' ruí'í ládxí'ru'. Lê na' rilë'ëru', tu chí'ido'osö zoa, pero le cabí gaca ilë'ëru' sóatica'sö.

5

¹ Nöziru' cate' initi idütë le naca cázaru', le naca ca tu yu'u lári'do' yödzöliö ni, Dios chinupë'ë tu le cubi queëru', le naca ca tu yu'u le zoa tsaz ni' yehua' yubá, lê na' nun cazë' Lë'. ² Que lê ni na' rinnë' ládxí'ru' tu' rë'ëni'ru' tsú'uru' le cubi ní', lê na' naca ca tu lidxiru' ni' yehua' yubá. ³ Tsú'uru' le cubi ní' ca na' rácuru' tu lari', para cabí sóaru' ga bití' zoa idütë le naca cázaru'. ⁴ Tsanni ni zóaru' lu idütë le naca cázaru', le naca ca tu yu'u lári'do', rinnë' ládxí'ru' lu yöl-la' risëbi ládxí' queëru'. Bití' runru' caní tu' rë'ëni'ru' ucá'anaru' idütë le naca cázaru', pero rë'ëni'ru' tsú'uru' tsaz le cubi ní'. Caní gaca, ucá'anaru' idütë le naca cázaru' le riniti, ate' tsú'uru' lu yöl-la' na'bán idú. ⁵ Dios chinupë'ë yúgu'të lê ni queëru', ate' guchízië' rë'u Dios Bö' Lá'ayi, Nu naca queëru' le naca bë' naca löza sí'iru' lê na' nupë'ë queëru'.

⁶ Que lê ni na' nadipa ládxí'ru'. Tsanni ni yú'uru' lu le naca cázaru', nöziru' zóaru' zí'tu' ga zoa lidxë' Xanru'. ⁷ Runru' ca runru' tu' réajlë'ëru'-në' Dios, en calëga tu' zoa bi rilë'ëru'. ⁸ Tu' runru' löza lê ni, rë'ëni'ru' ucá'anaru' le naca cázaru' ni para tsöjsóalenru'-në' Xanru'. ⁹ Que lê ni na' ruí'í ládxí'ru' gunru' le raza ládxë'ë Xanru', channö ugá'anaru' lu idütë le naca cázaru' ni, o channö tsöjsóalenru'-në' Xanru' ni'. ¹⁰ Caní runru' tu' run bayudxi idxinru' yúgu'tëru' lahuë' Cristo ga ní' rö'ë ruchi'a rusöröë'. Ní'irö ubi'ë que queëru' tsa naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

Le ruín rë'u tuz len Dios

¹¹ Que lê ni na', tu' rádxitu'-në' Dios, ruí'í ládxí'tu' uzéajni'itu' bönachi. Nözinë' Dios ca naca le yu'u icja ládxí'do'otu', ate' ruzxöni ládxa'a nözili' dxi'a ca' libí'ili' lê na' yu'u icja ládxí'do'otu'. ¹² Bití' rubéaj cuintu' dxi'a loli'. Rë'ëni'ru' gata' lataj queéli' gunli' netu' bal,

para gaca ubf'ili' didza', bi guiëli' yugu' bönni' tun ba zxön cuíngaquië' ca na' tu'lu'isö lahui cuíngaquië', en calëga ca nacagaquië' lu icja ládxi'do'gaquië'. ¹³ Channö nachixi ícjavu', naca para gaca yöl-la' ba queë' Dios, en channö cabí nachixi ícjavu', naca para gaca bi uzi'ili' xibé. ¹⁴ Run bayudxi bi guntu' tu' nadxi'inë' Cristo rë'u, tu' chinöziru' tuz Nu guti uláz quégaca yúgu'të bönachi, en que lë ni na' naca quégaca yúgu'të bönachi tsca nátilengaca Lë' tsözxön. ¹⁵ Lë' gutië' uláz quégaca yúgu'të bönachi para cabirö ilunë' bönni' nabängaquië' le nequi quégacasë', pero le nequi que Nu na' guti uláz quégaquië', en bubán lu yöl-la' guti. ¹⁶ Que lë ni na', bití'rö gúnbë'ëtu' bönachi tsca naca le nalá'gaca láhui'lö, en sal-la' canisö benbë'ëtu'-në' Cristo, bití' núnbë'ëtu'-në' caní na'a. ¹⁷ Channö nuhuóáca nütí'tës bönachi tuz len Cristo, chinaca bönachi cubi nu na'. Chigudödi que le gulaca zí'alö, ate' chinucúbigaca yúgu'të.

¹⁸ Yúgu'të lë ni nunë' Dios, Nu bun rë'u tuz len Lë' lu në'ë Cristo, en budödë' lu na'tu' guntu' libán ca gaca ulu'huóáca yúgu'të bönachi tuz len Lë'. ¹⁹ Libán runtu' rnna caní: "Dios guzóalenë' Cristo, en benë' ga gaca ulu'huóáca bönachi yödzöliö ni tuz len Lë', en bití' röjnenë' dul-la' gula'bagá'." Budödë' lu na'tu' didza' dxi'a ni, ca gaca ulu'huóáca bönachi tuz len Dios. ²⁰ Na'a, nácatu' gubáz queë' Cristo, en raca na'a ca Dios caz ráta'yuë' loli' lu rú'atu' netu'. Que lë ni na' ráta'yutu' loli' uláz queë' Cristo, guli'huóáca tuz len Dios. ²¹ Cristo bití' bi dul-la' benë', pero Dios budödë' Lë' ca tu bönni' dul-la' uláz queëru', para gata' queëru' lataj gácaru' tsahui' ca náquië' Dios caz tu' nácaru' tuz len Cristo.

6

¹ Tu' runtu' dxin tsözxön len Dios, ráta'yutu' loli', rnnatu': Bití' udödili' cá'asö le ruzá' ládxë'ë Dios queëli'. ² Nazúaj lu guichi lá'ayi ca gunné' Dios le rnna:

Tu dza buzá' ládxa'a quiu', biyönda' li',
ate' dza bena' ga gaca uló', gúcalena' li'.

¡Buli'yútsöca! ¡Na'a naca dza ruzá' ládxë'ë queëru'! ¡Na'a naca dza gaca uláru'!

³ Bití' rë'ënitú' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. ⁴ Ni'a que bití'tës bi runtu', ruí'i ládxi'tu' gaca bë' nácatu' huen dxin queë' Dios. Que lë ni na', len yöl-la' riböza zxön ladxí' ruá' rilentu' yugu' le riguí'i rizáca'tu', en yugu' le riyadzaj queëtu', en yugu' le tun ga rő'ötu' böniga. ⁵ Caní bentu' sal-la' gula'zé'ede'e bönachi netu' yu, en gula'gu'ë netu' lidxi guíë, en gula'bía dí'i netu'. Gudödi bë' bentu' dxin, en bití' guta' lataj queëtu' gásitu' o bi gágutu'. ⁶ Bë' ládxi'tu' gaca bë' nácatu' huen dxin queë' Dios. Guca bë' lë ni:

Tu' nácatu' ba'a ladxí', en tu' nápatu' yöl-la' réajni'i,
en tu' riböztu' zxön ladxí', en tu' nácatu' dxi'i ladxí',
en tu' zóalenë' Dios Bö' Lá'ayi netu',
en tu' naca idú ca nadxi'itu' luzá'atu'.

⁷ Ruí'itu' didza' idútë li, ate' zóalen netu' yöl-la' huáca queë' Dios. Le naca tsahui' naca ca tu le rudí'initu' lu gudil-la, enca' le run chí'i netu' lu gudil-la na'.

⁸ Nacuá' nupa tun netu' bal, enca' nupa tu'zóa netu' tsölá'alö.
Nacuá' nupa tu'lidza ditaj netu', enca' nupa tu'lidza tsahui' netu'.
Sal-la' ta'nná bönachi rizí' yë'ëtu', ruí'itu' didza' idútë li.

⁹ Sal-la' nacuá' bönachi bití' núnbë'gaquië' netu',
nacuá' ca' nupa núnbë'gaca netu'.
Ridatu' ga zoa bönadxi gátitu', pero ni zóatu' nabantu'.
Tunë' netu' xíguia', pero bití' tutië' netu'.

¹⁰ Tu'suhuí'ini netu', pero rudzéjatica'stu'.

Nácatu' bönni' yechí', pero runtu' ga rata' yöl-la' tsahui' idú quégaca bönachi zían.
Sal-la' bití' bi dë queëtu', nequi queëtu' yúgu'të le dë.

¹¹ Idú ládxi'tu' ruí'ilentu' libí'ili' didza', böchi' luzá'ado', zóali' Corinto. Buluí'itu' libí'ili' ca ruí'i ládxi'da'tu' libí'ili'. ¹² Channö cabí nácaru' tuz bití' naca tu' cabí ruí'i ládxi'tu' libí'ili', pero libí' cázali' bití' ruí'i ládxi'li' netu'. ¹³ Na'a, ruí'ilena' libí'ili' didza' ca runë' tu bönni' ruí'ilenë'-bi' xzí'inë' didza', rnníá': Bulí'bi' queëtu' ca rúnlentu' libí'ili'. Guli'güf' ladxí' netu'.

Nácaru' ca tu yudo' ga yu'ë Dios ban

¹⁴ Bití' gácali' tuz len bönachi bití' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

¹⁵ ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' bití' réajlë'ë?

¹⁶ ¿Nacxi gácatsö ilaca tuz yudo' queë' Dios, en budó' guiöj budó' yaga?

Libí' cázali' nácali' ca tu yudo' ga yu'ë Dios ban. Ca naca lë ni, Dios caz gunné':
Sóalena' légaquië', en tálena' légaquië'.

Gaca' Dios quégaquië', ate' légaquië' iláquië' bönachi quia'.

¹⁷ Que lë ni na', gunnë' ca' caní:

Guli'rúaj ládjagaquië', en buli'lá'alén légaquië'.

Rnnë' Xanru': "Biti' gútsa'li' le ruá' dō', ate' si' lu na'a libí'ili'.

¹⁸ Neda' gaca' xuz cázali', ate' libí'ili' gácali' xzí'ina', bönni', en nigula."

Caní rnnë' Xanru', Nu napa caz idútë yöl-la' huáca.

7

¹ Böchi' luzá'ado', néquiquequi queëru' yugu' lë ni guzxi' lu në'ë Dios. Que lë ni na' ral-la' un cuinru' dxi'a, en ubéajru' yúgu'të le rucá'ana cá'asō idútë le naca cázaru', en bō' naca cázaru'. Lu yöl-la' radxi queëru' Dios ral-la' guéquiru' quez queë' Lë'.

Ca bulu'bí'i ládxi'gaca nupa ta'yéajlë' Cristo

² Guli'sí' lu ná'ali' netu'.

Cuntu nu biá'atu' dō' que, nu dzaga libí'ili'.

Cuntu nu bentu' ga ichixi inigui.

Cuntu nu guzxi' yé'etu'.

³ Ruá'a caní didza', calëga para usubága'a libí'ili' xíguia', pero naca ca na' chigunní'a zí'alō, rnní'a: Zoa' sina' ibánlena' libí'ili' o gátílena' libí'ili' tu' ruí'i ládxa'a libí'ili'. ⁴ Ruzxónida' ládxa'a libí'ili', en rúnda'a libí'ili' zxön. Sal-la' zían le riguí'i rizáca'tu', nadípada' ládxa'a, en rudzéjade'e ládxa'a.

⁵ Cate' bidxintu' luyú Macedonia, ga ridxintë na'a dza, bití' rata' queëtu' lataj uzí' ládxi'tu', pero zían le taca queëtu'. Ta'díl-lalen bönachi netu', ate' lu icja ládxi'do'otu' yú'ugaca le tun ga rádxitu'. ⁶ Ní'irō Dios, Nu rutipa ladxí' nu chizóa gaca chopá ladxí', butipë' ládxi'tu' cate' budxinbí' bi'i Tito ga guzóatu'. ⁷ Bití' gúcasō tu' budxinbí' queëtu', pero tu' gudíxjōi'ibi' ca' netu' ca na' libí'ili' butípali' ládxi'bi'. Gudíxjōi'ibi' netu' ca na' rē'énide'eli' ulé'eli' neda', en ca na' ruhuí'inili' nī'a que lë na' guca nī', enca' ca ruí'i ládxi'li' neda'. Yúgu'të lë ni ben ga rudzeja ládxa'a.

⁸ Sal-la' le buzúaja' queëli' lu guichi zí'alō ben ga buí'inili', bití' ruhuí'inda' na'a. Zí'alō buí'inida' cate' gúquibe'eda' ben ga buí'inili' libí'ili' tu' chí'ido', ⁹ pero na'a rudzéjada', calëga tu' buí'inili', pero tu' ben yöl-la' ruhuí'ini queëli' na' ga bubí'i ládxi'li'. Dios bugunë' dxin yöl-la' ruhuí'ini queëli', para cabí ichixi iníguli' nī'a que le bentu' netu'. ¹⁰ Yöl-la' ruhuí'ini na' rugunë' dxin Dios run ga nu ubí'i ladxí' para ulá nu na', ate' que lë ni na' bití' ral-la' huí'iniru' que. Yöl-la' ruhuí'ini le naca que yōdzōlió ni run ga ilátigaca bönachi. ¹¹ Buli'yútsōca' ca bugunë' Dios dxin yöl-la' ruhuí'ini queëli' na'.

Ben ga ruí'i ládxi'li'-në' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxili'-në' Dios.

Ben ga bē' ládxi'li' gunli' ca rnna xtídzë'ë Dios.

Ben ga nadxí'ili'-në' Dios idú ládxi'li'.

Ben ga gú'unili' gunli' xíguia' nu na' ben dul-la'.

Benli' le naca bē' bití' bi' dul-la' nabága'li' nī'a que lë na' guca.

¹² Que lë ni na', sal-la' buzúaja' caní lu guichi na', bití' guca nī'a que nu na' ben dul-la', en calëga nī'a que nu na' gudí'i guzxca', pero para gaca bē' lahuë' Dios le nácatë ruí'i ládxi'li' netu'. ¹³ ¡Lë ni butipa ládxi'tu'! Calëgasō bidipa ládxi'tu', pero rudzéjade'e ládxi'tu' tu' rudzéjabi' bi'i Tito nī'a que le benli' libí'ili', tu' butípali' ládxi'bi'.

¹⁴ Bena' libí'ili' zxön lobí' Tito, ate' bití' benli' ga utuf'ida'. Bē'lentica'stu' libí'ili' didza' idútë li, ate' lësca' caní naca idútë li didza' bē'lentu'-bi' Tito cate' bentu' libí'ili' bal. ¹⁵ Zeaj rácarō idú ca nadxí'ibi' bi'i Tito libí'ili' cate' rōjnebi' ca na' benli' ca rnna xtídzá'tu', en ca na' benli'-bi' bal lu yöl-la' radxi Dios queëli' en lu yöl-la' nōxaj ladxí' queëli'. ¹⁶ Rudzéjade'eda' tu' gaca uzxóni ládxa'a libí'ili' idú ládxa'a.

8

Ca ral-la' unōdzaj nu réajlë' Cristo le dë que

¹ Na'a, böchi' luzá'ado', rē'énitu' quíxjōi'itu' libí'ili' ca naca le buzá' ládxi'ë Dios quégaca yugu' cō' bönachi queë' Cristo luyú Macedonia. ² Sal-la' yenni' gula'guí'i gula'záquië' lu yugu' le guzxi' bē' légaquië', bulu'dzéjade'enë', en idú ládxi'gaquië' bulu'nōdzjadë'ë sal-la' nácagaquië' bönachi yechi'. ³ Neda' runa' ba nalí quégaquië', idú ládxi'gaquië' bulu'nōdzjadë'ë tsca gula'zéqui'në', en bulu'nōdzjarë' tsca gula'zéqui'në'. ⁴ Gula'nábide'enë' netu', en guláta'yudë'ë lotu' gúf'itu' légaquië' lataj tsōzxön len netu' ilácalenë' böchi'ru' ta'yéajlë'ë Cristo. ⁵ Gulunrë' ca guquí ícjatu' ilunë'. Bulu'dōdi cuíngaquië' zí'alō lu në'ë Xanru', enca'

lu na'tu' netu', le naca le raza ládxë'ë Dios. ⁶ Que lë ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runódzjali' lu yöl-la' dxi'i ladxi' queéli', ca na' gusi lobi' benbi' zí'alö. ⁷ Nácali' lo ca naca yúgu'të le runli', ca réajlë'ëli' Cristo, en ca réajni'ili', en ca ruzéajni'ili' bönachi, en ca ruí'i ládxi'li' luzá'ali', enca' ca nadxí'ili' netu'. Lësca' caní ral-la' gácali' lo ca gácalenli' luzá'ali', lu yöl-la' dxi'i ladxi' queéli' bi unódzjali' quégaquië'.

⁸ Biti' rinná bé'eda' libí'ili' gunli' caní. Ruá'a didza' ca tun ia'zica'rö bönachi, tu'nódzaj idú ládxi'gaca, para guna' ga gunli' le gaca bé' naca idú ca nadxí'ili' luzá'ali'. ⁹ Nöz quézili' le buzá' ládxë'ë Xanru' Jesucristo queéru'.

Bilé'enë' yöl-la' tsahui' pero para gácalenë' libí'ili' bōaquië' yechi' para gata' queéli' yöl-la' tsahui', tu' gúquië' Lë' yechi'.

¹⁰ Caní runi neda': Dxi'arö gaca queéli' údxi gunli' lë na' gusi loli' runli' chiguca tu iz. Gúcali' lo, calëgasö ca bunódzjali', pero lësca' ca gú'unili' unódzjali'. ¹¹ Na'a, idú ládxi'li' buli'siyudxi gunli' lë na' gusi loli' runli', idú ládxi'li' bunódzjali'. Buli'nódzaj na'a tsca séqui'li'. ¹² Channö rë'ënilí' bi unódzjali', Dios runë' bal le runódzjali' tsca naca le dësö queéli'. Biti' rinabë' unódzjaröli' tsca le dësö queéli'.

¹³ Biti' rë'ënda' guna' ga unódzjali' le gácalen ia'zica'rö bönachi ga idxintë yadzaj queéli'. ¹⁴ Rë'ënda' gaca tuz ca dë queéli', en quégaquië'. Na'a dëda' queéli' le gaca unódzjali' para bi gata' quégaca nupa ni' riyadzaj quéguequi. Ní'irö cate' bi yadzaj queéli', légaquië' huáca bi ulu'nódzjë' queéli' para caní gaca tuz ca dë queéli', en quégaquië' yúgu'tëli'. ¹⁵ Lësca' caní nazúaj lu guichi lá'ayi le rnna: "Nu na' butúbida', bití' bugá'ana que, ate' nu na' butubi láti'do'os, bití' biyadzaj que."

Ca runbi' bi'i Tito, enca' nupa dzáagaca lëbi'

¹⁶ jxclenë' Dios, tu' benë' Lë' ga ruí'i ládxi'bi' bi'i Tito libí'ili', ca na' ruí'i ládxa'a neda' libí'ili'! ¹⁷ Calëgasö runbi' ca rnna xtídza'a bi rinábida'-bi', pero tu' ruí'i ladxi' cázabi' libí'ili', rásasö queëbi' gú'unibi' tsöyubi' libí'ili'.

¹⁸ Risöl-la'tu'-në' tsözxön len lëbi' böchi'ru' na' tun lë' bal yúgu'të cö' bönachi queë' Cristo, tu' runë' dxi'a dxin que didza' dxi'a. ¹⁹ Ia'stú, gula'bö yugu' cö' bönachi queë' Cristo bönni' ni, para tséajlenë' tsözxön netu' guá'atu' lë na' runódzjali', para gaca yöl-la' ba queë' Xanru', en gaca bé' ca' ruí'i ládxi'ru' luzá'aru' ta'yéajlë'ë Cristo. ²⁰ Caní gaca, gunë' netu' tsözxön para cuntú nu bi gaca innë' queëtu', ca rúnlentú' dumí na' runódzjada'ali', le gácalen bönachi yechi'. ²¹ Ruí'i ládxi'tu' guntu' le naca dxi'a, calëgasö lahuë' Xanru', pero lësca' lógaca bönachi.

²² Risöl-la'tu'-në' ca' ia'tüë' böchi'ru' tsözxön len légaquië', ate' zían luzuí guzxi' bé'ëtu' lë', ate' naca bé' rë'ënë' gácalenë' rë'u idú ládxë'ë. Ia'stú, tu' ruzxöni ládxë'ë libí'ili', rë'ënitëronë' ca' gácalenë' rë'u lu dxin ni. ²³ Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxön dxin para gácalentu' libí'ili'. Channö nu bi inaba ca nácagaquië' ia'zica'rë' böchi'ru' na', nasöl-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo. ²⁴ Gulí'gún ga gaca bé' nadxí'ili' légaquië' para iléquibe'e yugu' cö' bönachi queë' Cristo runli' caní, en ila'nözi naca idütë li didza' dxi'a ruí'itu' ca naca queéli'.

9

Ca naca dumí rutúbiru' le gácalen yugu' böchi'ru'

¹ Ca naca le runódzjali' quégaquië' böchi'ru' ta'yéajlë'ë Cristo, bití' run bayudxi uzúaja' queéli' lu guichi ni. ² Chinözda' ca rë'ënilí' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxi'a runli'. Rigúixjöi'ida' légaquië' ca naca queéli', zóali' luyú Acaya, chiguca tu iz chizóa gunli' lë ni, ate' tu' ruí'i ládxi'li' gunli' lë ni, bidipa ládxi'gaca lá'tu'biqui' yúgu'të bönachi ni ta'yéajlë' Cristo. ³ Na'a, risöl-la'a yugu' böchi'ru' ni queéli' para gaca bé' naca idütë li didza' ruí'itu' ca naca queéli', ate' naca ca na' chigunní'a queéli', chizóa gunli' lë na' gácalen yugu' luzá'aru'. ⁴ Channö ila'zá'alen bal-la bönachi Macedonia ta'yéajlë' Cristo neda' tsözxön, ate' gaca bé' bití' zuíni gunli' lë na', ní'irö utuí'itu' tu' buzxöni ládxi'tu' libí'ili', ate' libí'i cázali' ca' ral-la' utuí'ili'. ⁵ Que lë ni na' gúquida' ral-la' isöl-la'a yugu' böchi'ru' ni para ila'dxinë' ga zóali' zí'alö ca neda', ate' ilácalenë' libí'ili' para udxí utúbili' lë na' guzxi' lu ná'ali' unódzjali'. Caní gaca, údxi utúbili' dumí na' zí'alö ca idxina', ate' gaca bé' runódzjali' tu' rë'ëni cázali', en calëga tu' rinná bé'ëtu' libí'ili' bi unódzjali'.

⁶ Guli'tsøjné lē na' rnna:

Nu raza ruzóa láti'do'os, láti'do'os ca' uzi'.

Nu raza ruzóa sizxōni, sizxōni ca' uzi'.

⁷ Tu tuli' ral-la' unōdzjali' tsca na' chinuzóali' icja lādxí'do'oli', en calēga lu yōl-la' ruhuf'ini queēli' o tu' run bayudxi, tu' nadxí'inē' Dios nu runōdzaj idú lādxí'. ⁸ Dios gaca gūnnadē'ē queēli' ca riquinili' para gata' queēli' yúgu'tē lē na' riquinili', ate' ugá'ana queēli' para gaca gácalenli' nu bi riyádzaj que. ⁹ Lē'sca' caní nazúaj lu guichi lá'ayi le rnna:

Idú lādxē'ē bunōdzjē' quégaca bōnachi yechi'.

Naca bē'tica'só yōl-la' dxi'i lādxí' queē'.

¹⁰ Dios, Nu runna queēru' bi gaz uzóaru', enca' bi gu'aj gáguru', gunnē' ca' queēli' bi unōdzjali', le naca ca lē na' nu raza ruzóa, en gunē' ca' ga ila'yán le ilápali' le nácagaca yugu' le dxi'a runli'. ¹¹ Dios gunē' ga gáta'da' queēli' yōl-la' tsahui' para gaca unōdzjada'ali'. Caní gaca, yugu' le unōdzjali', lē na' quisitu' uláz queēli', gun ga ila'nná bōnachi zían: "Xclenē' Dios." ¹² Lē na' runōdzjali' le gácalen yugu' bōchi'ru', calēgasō gū'i quégaquie' le ta'yádzjanē', pero gun ga ila'nnē': "Xclenē' Dios." ¹³ Cate' gunli' caní, ila'gu'ē Dios yōl-la' ba tu' gaca bē' runli' ca rnna didza' dxi'a queē' Cristo ca na' rnnali' runli'. Ila'gu'ē Lē' yōl-la' ba ca', tu' nácali' dxi'i lādxí', runōdzjali' quégaquie', enca' quégaca ia'zica'rō bōnachi. ¹⁴ Ulu'lidzē' Dios, en ila'nábinē' Lē' gácalenē' libí'ili' tu' nadxí'iguequinē' libí'ili' ni'a que le buzá' lādxí'dē'ē Dios queēli'. ¹⁵ ¡Xclenē' Dios, bennē' tu le nácada' lesaca' queēli'!

10

Yōl-la' unná bē' dē lu nē'ē Pablo

¹ Ta'nná bōnachi naca' nōxaj lādxí' cate' zóalena' libí'ili', pero cate' zoa' zi'tu' ga zóali' naca' rugu lādxí' ca ruzúaja' lu guichi. Tu' náquie' nōxaj lādxí', en dxi'i lādxí' Cristo, neda', Pablo, ráta'yua' loli' ² cabí gunli' ga gun bayudxi gaca' rugu lādxí' len libí'ili' cate' idxina' ga zóali'. Chizóa gaca' rugu lādxí' len nupa ni' ta'nná runtu' dxin ni lu yōl-la' bōnáchisō queētu'. ³ Le nácatē nácatu' bōnachi, pero calēga rásasō queētu' runtu' xichinē' Dios. ⁴ Yugu' le rudf'initu' lu gudil-la, bití' nácagaca ca le tu'dí'ini bōnachi yōdzóliō ni lu gudil-la, pero yugu' le rudf'initu' lu gudil-la nápagaca yōl-la' huáca queē' Dios, le ruguntu' dxin para usunítitu' le nál-lagaca que tu' xihui'.

⁵ Rusunítitu' yugu' didza' bití' nácatē le tu'zxōni lādxí'gaca bōnachi, en yúgu'tē le tun ga tun ba zxōn cuínguequi, en le tun ga cabí ilunbē' Dios. Runtu' ga gaca ila'nná bē'enē' yúgu'tē le ta'zá' lādxí'gaquie', lē na' tun ga ta'dá'baguē'ē Dios, ate' runtú' ca' ga tunē' ca' rnnē' Cristo. ⁶ Tōdi gunli' le gaca bē' naca idú ca runli' ca rnna xtídzē'ē Cristo, sóatu' sina' guntu' xíguia' yúgu'tē nupa ni' ta'dá'baga' xtídzē'ē.

⁷ Ruyuli' le nalá' láhuisō. Channō réquinē' nu bōnni' dzáguiē' libí'ili' néquinē' queē' Cristo, ral-la' guéquibe'enē' ca' lē ni: Ca na' lē' néquinē' queē' Cristo, lē'sca' caní netu' néquitu' queē' Cristo. ⁸ Bití' ca' rutuf'ida' sal-la' gudōdi bē' ben ba zxōn cuina' ca naca yōl-la' unná bē' budōdē' Xanru' lu na'tu'. Lē na' dē lu na'tu' naca para guntu' ga gácarō idú ca réajlē'ēli' Cristo, en calēga para usunítitu' libí'ili'. ⁹ Bití' ré'ēnda' guéquili' ré'ēnda' gun gádxida' libí'ili' ni'a que le ruzúaja' queēli' lu guichi ni. ¹⁰ Nacuá' ni' nupa ila'nná: "Yugu' le ruzúajē' Pablo queēru' lu guichi, rulidza zi'ē ré'u, en ralē' didza', pero cate' zóalenē' ré'u runē' nōxaj lādxí', en didza' gúlado' ru'ē." ¹¹ Nu na' ru'f'i caní didza' ral-la' guéquibe'e lē ni: Ca na' nácatu' cate' bi ruzúajtu' queēli' lu guichi tsanni ni zóatu' zi'tu' ga zóali', gácatu' ca' lu le guntu' cate' ni' sóalentu' libí'ili'.

¹² Le nácatē bití' nácatu' rugu lādxí' para innatu' nácatu' lēbi ca nácagaca nupa ni' tun ba zxōn cuínguequi. Nácagaca nupa ni' yugu' bōnni' bití' bi nōzguequinē'. Lu le ta'za'sō lādxí'gaquie' tu'zōē' ca ral-la' ilaca bōnachi, en tu'chí'a tu'sórōē' la' légacasē' tsca naca lē na' ta'za'sō lādxí'gaquie'. ¹³ Netu' bití' gunrō ba zxōn cuintu' ca ral-la' guntu', pero ca nácatē dxin budōdē' Dios lu na'tu', ate' lu dxin ni, ral-la' guntu' le ga ni' zóali' libí'ili'. ¹⁴ Channō budōdē' Dios lu na'tu' dxin guntu' ga zóali', bití' ca' gudōdi bē'ētu' ca bentu' cate' bidxintu' ga zóali', en bentu' libán que didza' dxi'a ga na' zóali'. ¹⁵ Bití' run ba zxōn cuintu' ca naca dxin núngaca ia'zica'rō bōnachi, pero ca nacasō dxin na' budōdē' Dios lu na'tu'. Runtu' lōza gácarō idú ca réajlē'ēli' Cristo para gaca guntu' dxin ga zóali' le nácáro lesaca', tsca naca le budōdē' Dios lu na'tu' guntu'. ¹⁶ Ní'irō gaca guntu' libán que didza' dxi'a ga nacuá' yōdzō dzō'ō zi'tu' rō ga zóali'. Caní gaca, bití' gun bayudxi gun ba zxōn cuintu' ni'a que dxin núngaca ia'zica'rō bōnachi, lē na' budōdē' Dios lu nē'eguequi.

¹⁷ Nazúaj lu guichi lá'ayi le rnna:

Nu ré'ēni bi gun zxōn,

le ben cazē' Xanru' ral-la' gun zxōn.

¹⁸ Nurúajē' dxi'a tu bōnni' cate' rnnē' Xanru' nurúajē' dxi'a, en calēga cate' ru'ē caní didza' bōnni' na' que la' cuinsē'.

11

Ca nácagaquië' Pablo, en bönni' tun cuíngaquië' gubáz queë' Cristo

¹ Ré'ënda' guá' ilenli' neda' tsanni ni gu'a didza' lu yöl-la' bití' bi nözi quia'. Buli'sá' ládxí'li' quia'. ² Ruí'í ládxa'a libí'ili' ca na' Dios caz ruí'í ládxë'ë libí'ili', tu' nácali' ca nácabi' tubi' bi'í nigula ra'bando', naca idú ládxí'bi', rusudxina'-bi' lahuë' Cristo para utsaga ná'alénbi' Lë cazë'. ³ Rádxida' idxín queéli' nu sí' ye'e libí'ili', en gun ga usanli' ca nadxí'ili'-në' Cristo idú ládxí'li', ca na' guca queënu Eva, nigula queë' Adán, cate' guzxi' ye'e Satanás tu' xihui' lënu lu yöl-la' sina' que. ⁴ Caní rnní'a' tu' idú ládxí'li' ruí'ili' nu za' queéli' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizí' lu ná'ali' tu bö', en tu didza' dxi'a le nadzá'gaca ca nácagaca Bö' Lá'ayi na', en didza' dxi'a na' guzxi' lu ná'ali' lu na'tu' netu'. ⁵ Réquida' bití' nácara' cuídi'so ca nácagaquië' bönni' ni' nácaterögaquië' lo, ate' réquili' nácagaquië' gubáz queë' Cristo. ⁶ Nadxi ca' naca' cuídi'so ca ruá'a didza', pero bití' naca' cuídi'so ca naca yöl-la' réajni' napa'. Zían luzuí, en zían ca buluí'itu' libí'ili' ca naca yöl-la' réajni' nāpatu'.

⁷ Nadxi ca' bití' naca dxi'a tu le bena', bití' bi buquixxa' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili' xzön. ⁸ Buguna' dxin le nequi quéguequi ia' zica'rö cö' bönachi queë' Cristo, tu' guzxi'a dumi bulu'nödzejë' légaquië' quia' para guca bena' dxin ga zóali' libí'ili'. ⁹ Cate' guzóalena' libí'ili', en biyadzaj quia', bití' busaca' zi'a nituli' libí'ili', pero lë na' biyadzaj quia', gulunnë' quia' böchi'ru' bila'ruájë' luyú Macedonia, en bila'dxinë' ga zoa'. Catu caz busaca' zi'a libí'ili', ate' la' lëbisö ca guna'. ¹⁰ Ni'a que le naca idütë li queë' Cristo le zóalen neda', bití' soa' dxisö, gun ba xzön cuina' ca naca lë ni idú luyú Acaya. ¹¹ ¿Naru' réquitseli' rnní'a' caní tu' cabí nadxí'ida' libí'ili'? Nözinë' Dios nadxí'ida' libí'ili'.

¹² Gúntica'sa' ca runa' na'a, para cabí gata' quégaquië' lataj ilún ba xzön cuíngaquië' bönni' ni' ta'nnasë' nácagaquië' gubáz queë' Cristo, en ta'nnë' tunë' xichinë' Lë' ca runtu' netu'. ¹³ Bití' ca' nácagaquië' gubáz nasöl-lë'ë Cristo. Ta'z' yë'ë ca naca dxin tunë', en tun cuíngacasë' gubáz queë' Cristo. ¹⁴ Bití' ral-la' ubániru' ca tunë' bönni' na'. Lësca' Satanás caz, tu' xihui', ruluí' cuini ca tu gubáz lá'ayi queë' Dios, ridë' lu bení'. ¹⁵ Que lë ni na' bití' ral-la' ubániru' channö yugu' huen dxin que tu' xihui' na' tu'lufi' cuíngaquië' ca nupa tun xichini Nu na' naca tsahui'. Udxí quégaquië' ca sa'yéaj le tunë'.

Yugu' le gudí'í guzáquë'ë Pablo

¹⁶ Leyúbölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'güi' neda' lataj gu'a didza' ca tu bönni' nachixi icjë', para gun ba xzön cuina' tu chí'ido'. ¹⁷ Didza' ni ruá'a bití' naca le rinná bë'ë Xanru', pero ruá'a didza' ca tu bönni' nachixi icjë', run ba xzön cuina'. ¹⁸ Nacu'ë zían bönni' tun ba xzön cuíngaquië' ca nácagaca le tunë' lu yöl-la' bönáchisö quégaquië'. Que lë ni na', neda' ca' gun ba xzön cuina'. ¹⁹ Tu' réquili' rácada'ali', idú ládxí'li' ruí'ili' lataj ilu'ë didza' yugu' bönni' nachixi icjagaquië'. ²⁰ Ruí'ili' ca' lataj nu gun libí'ili' bönni' nadó'ogaca, o nu cúa le dë queéli', o nu inná be'e libí'ili', o nu ucá'ana libí'ili' cá'asö, o nu capa' ru'ali'. ²¹ Rutuí'ida' rnní'a' lë ni: Bití' bentu' caní queéli' tu' gudödi bë' gúcatu' nōxaj ladxí'.

Channö zoa nu naca rugu ladxí' para gun ba xzön cuini, neda' ca' gaca' rugu ladxí', en gu'a didza' ca tu bönni' nachixi icjë'.

²² ¿Naru' nácagaquië' bönni' hebreo?

Lësca' naca' neda'.

¿Naru' nácagaquië' bönni' Israel?

Lësca' naca' neda'.

¿Naru' nácagaquië' xzi'ini xi'sóë' Abraham?

Lësca' naca' neda'.

²³ ¿Naru' nácagaquië' huen dxin queë' Cristo?

Lësca' nácaterä' neda'.

(Na'a ruá'a didza' ca tu bönni' nachixi icjë' cate' rnní'a' caní.)

Béntëra' dxin ca gulunë' légaquië'.

Guyu'a lidxi guíë zíanrö luzuí ca gula'yu'ë légaquië'.

Gula'zé'eda' neda' yu bönachi zíanrö luzuí ca guca quégaquië'.

Guzó'a bönadxi gátia' zíanrö luzuí ca guzó'a quégaquië'.

²⁴ Gayu' luzuí yugu' bönni' judío gula'guiné' neda' guídi.

Tu tu luzuí na' gula'guiné' neda' chënna uruá' luzuí.

²⁵ Tsonna luzuí gula'guiné' neda' gubá'ayi.

Tu luzuí bulu'ládxë' neda' guídj.

Tsonna luzuí guzó'a' tu lë'e barco le guca ditaj, en bötaj lu nísado'.

Tu luzuí guzó'a' idú tu yëla, en tu dza lu nisa que nísado'.

²⁶ Zián luzuí cate' ni' yu'a nōza,
 gudōda' gapa guzōa bōnadxi quia' yugu' lu yegu,
 en gapa guzōa bōnadxi quia' lu ná'agaquiē' gubán,
 en gapa guzōa bōnadxi quia' lu ná'agaquiē' bōnni' uládz quia',
 en gapa guzōa bōnadxi quia' lu ná'agaquiē' bōnni' zi'tu',
 en gapa guzōa bōnadxi quia' lu yōdzō,
 en gapa guzōa bōnadxi quia' lu lataj cá'asō,
 en gapa guzōa bōnadxi quia' lu nísado',
 en gapa guzōa bōnadxi quia' lu ná'agaquiē' bōnni' ta'z'í yē'ē, ta'nnē' náacagaciē' bōchi'ru'
 ta'yéajlē'ē Cristo.

²⁷ Bena' dxin zi'i, en gudú ládxa'a.

Zián luzuí biti' guta' quia' lataj gásia'.

Guduna', en gubídx'a nisa.

Zián luzuí biti' guta' quia' bi gahua', o ga utsē'e cuina', o lari' gácua'.

²⁸ Ia'stú, yúgu'tē dza ruúbí ruguí'da' tu' ru'í'da' ládxa'a yúgu'tē cō' bōnachi queē' Cristo.

²⁹ Cate' nu ricuidi', neda' ca' ricuidi'da'. Cate' nu run ga ichixi iníguinē' tu bōchi'ru', rileda' nu run caní. ³⁰ Channō run bayudxi gun ba zxōn cuina', gun ba zxōn cuina' ca naca le náacagaca bē' ricuidi'da'. ³¹ ¡Dios, Xuzē' Xanru' Jesucristo, gácatíca'sō queē' yōl-la' ba! ¡Lē' nōzinē' ruá'a didza' idútē li! ³² Cate' ni' guzōa' lu yōdzō Damasco, bōnni' ni' guta' lu nē'ē uláz queē' bōnni' rinná bē'ē, lē' Aretas, bucu'ē yugu' bōnni' gula'bō' nísíē' para ila'zōnē' neda', ³³ pero yugu' bōchi'ru' ni' bulu'dōdē' neda' tu ga ra'a bení' que yu'u, yu'a tu ga bōra zxōn, en bulu'zōtjē' neda' ní'ilō lu zō'ō run chi'i yōdzō na'. Caní guca, bulá' lu ná'agaquiē' bōnni' ni' gula'bō' nísíē' neda'.

12

Yugu' le bulu'ínē' Dios Pablo

¹ Le nácatē biti' ral-la' gun ba zxōn cuina'. Sal-la' caní naca, na'a gu'a didza' ca náacagaca le bulu'ínē' Xanru' neda', en le buzéajni'ínē' neda'. ² Nūnbē'a-nē' tu bōnni' réajlē'ē Cristo, chiguca chidá' iz zoa nu guchē' lē' yehua' yubá. Biti' nōzda' channō guyijē' ni' lu idútē le naca cazē', o lu bō' naca cazē'. Tuzē' Dios nōzinē'. ³ Nōzda' guyáziē' lataj lachi queē' Dios, nazí'i le paraíso. Biti' nōzda' channō guyijē' ni' lu idútē le naca cazē', o cabí. Tuzē' Dios nōzinē'. ⁴ Tsanni ni' zōē' ga na', biyōnnē' le tun ga nu rubani, yugu' le biti' dē' lataj nu gū'i didza' que. ⁵ Bōnni' ni huáca guna' lē' zxōn, pero biti' gun ba zxōn cuina'. Tuz gun ba zxōn cuina' tu' ricuidi'da'. ⁶ La'tu' guē'énida' gun ba zxōn cuina', biti' gaca' bōnni' biti' bi nōzinē', channō inniá' le naca idútē li. Na'a, biti' gun ba zxōn cuina' tu' cabí rē'ēnda' nu gunrō neda' bal tsa le bilé'e bena' neda', o tsa naca didza' biyōni bē'a neda'.

⁷ Ní'irō, para cabí tōdi bē' gun ba zxōn cuina' tu' bilé'eda' lē' na' tun ga nu rubani, Dios buzōē' tu huē' lu xipéla'a le riláda' ca rilá ga rinē' tu yōtsi'. Huē' na' guca ca tu le bugún dxin tu' xihui', para busaca' zi' neda'. Caní guca quia' para cabí tōdi bē' gun ba zxōn cuina'. ⁸ Tsonna luzuí gata'yua' lahuē' Xanru', en gunábida' Lē' ugúē' xihuē'a na'. ⁹ Xanru' gudxē' neda': "Nácatē quiu' le ruzá' ládxa'a quiu'. Uzí'teru' xibé le ruzá' ládxa'a quiu' cate' ricuidi'nu'." Que lē' ni na', rudzéjádē'eda' tu' ricuidi'da'. Tu' raca caní quia', rácalentē'rō yōl-la' huáca queē' Cristo neda'. ¹⁰ Que lē' ni na', tu' nadxí'ida'-nē' Cristo, rudzéjádē' cate' ricuidi'da', en cate' nu rulidza neda' zi', en cate' bi riyadzaj quia', en cate' nu ribíá ladxí' neda', en cate' bi raca quia'. Cate' nacuídí'da', nápatērō caza' yōl-la' huáca queē' Lē'.

Pablo ru'í ládxe'ē bōnachi queē' Cristo nacuá' Corinto

¹¹ Naca' tu bōnni' biti' bi nōzinē' tu' bē'a didza' ca naca le dxi'a bena' neda'. Libí'i cázali' benlí' bayudxi bena' caní. Libí'ili' ral-la' gunlí' neda' bal, ate' sal-la' biti' bi naca' neda', biti' ca' nácara' cuídí ca náacagaciē' bōnni' ni' nácada'gaciē' lo, ta'nnē' náacagaciē' gubáz queē' Cristo. ¹² Yugu' le bena' lu yōl-la' ribōza zxōn ladxí' quia' ga ni' zóali' náacagaca bē' naca' gubáz queē' Cristo. Bilé'eli' yugu' le bena', le náacagaca bē', en le tun ga nu rubani, en yugu' yōl-la' huáca zxōn que yehua' yubá. ¹³ Tuz le cabí bena' ga zóali' le bena' ga nacuá' ia'zica'rō cō' bōnachi queē' Cristo. Biti' busaca' zi'a libí'ili' bi gúnnali' le gu'aj gahua'. Bulí'niti lo neda' tu' cabí bena' caní queéli'.

¹⁴ Chizōa guída' ga zóali' le bunní luzuí. Biti' bi inaba' gúnnali' quia'. Rē'ēnda' gunna cuin cázali' quia', en calēga bi dē' queéli'. Yugu' bi'i huē'énido', biti' run bayudxi ulu'gágubi' xuz xíná'agacabi'. Xuz xíná'agacabi' na' ral-la' ulu'gahuē' xzí'inígaquiē'. ¹⁵ Idú ládxa'a utōa' yúgu'tē le dē' quia', en udōdi cuina' ni'a queéli' para gaca bi uzí'ili' xibé, sal-la' réquida' cate' nadxí'irōda' libí'ili', zeaj ruhuéchi' yōl-la' nadxí'i queéli' neda'.

¹⁶ Nōz quézili' biti' busaca' zi'a libí'ili'. Na'a, bál-lali' innali' guca' sina', ate' len didza' biti' nácatē buzi'a xibali'. ¹⁷ ¿Naru' réquitseli' guzxi' yé'eda' libí'ili' cate' gusól-la'a yugu' gubáz

quia' ga zóali'? ¹⁸ Gúta'yua' lobi' bi'i Tito tséajbi' ga zóali', ate' gusöl-la'a-në' böchi'ru' na' tsözxön len lëbi'. ¿Naru' réquitseli' buzí'ibi' xibali' bi'i Tito? ¿Naru' cabí bentu' la' lëbisö ca runtu' bi'i Tito, en neda', enca' la' lëbisö didza' bë'ëtu'?

¹⁹ ¿Naru' réquitseli' rubéaj cuintu' dxi'a loli' libí'ili'? Lahuë' Dios ruí'itu' didza' uláz queë' Cristo, böchi' luzá'ado', ate' yúgu'të le runtu' nácacaga para gácarö idú yöl-la' réajlë' queëli' Cristo. ²⁰ Rádxida' bití' gácali' ca rë'ënda' gácali' cate' guída' ga zóali', ate' neda' bití' gaca' ca rë'ëni' libí'ili' gaca'. Rádxida' ridil-la dídza'li', en ruzxé'eli' luzá'ali', en rileli' luzá'ali', en rulidza dítlali' luzá'ali', en rnnëli' que luzá'ali', en run ba zxon cuinli', en rutsátsali'. ²¹ Cate' guída' ga zóali', channö caní raca queëli', rádxida' gunë' Dios ga utuí'ida' ca naca queëli', ate' gun bayudxi cödxá' ni'a quégaca zían nupa ni' gulún dul-la', en bití' bulu'bí'i ládxí'gaca ca nácacaga le cabí naca tsahui' gulúngaca, en yugu' le gula'zë ládxí'guequi le cabí naca dxi'a.

13

Pablo ruzéajni'inë' bönachi Corinto, en rugapë' Dios légaquië'

¹ Le bunní luzuí ni guída' ga zóali'. Nazúaj lu guichi lá'ayi le rnna: "Run bayudxi ila'cuá' chopá tsonna nupa ilún ba nalí channö nu bi' uzegui luzé'e didza'." ² Chibuzéajni'ida' nupa gulún dul-la' cate' ni' guzóalena' libí'ili' le buropi luzuí, ate' na'a ruzéajni'ida' légaquië' leyúbölö, enca' yúgu'të nupa tun dul-la', sal-la' ni zoa' zi'tu', rnní'a: Channö guída' ga zóali' leyúbölö bití' gaca' nōxaj ladxi' para til-la' légaquië'. ³ Rinábali' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Bití' ca' ricuúdi'në' Cristo cate' bi' runë' queëli', pero lu yöl-la' huáca zxon queë' runë' bi' runë' queëli'. ⁴ Le nácatë gudë'ë lë'e yaga cruz ca nu ricuúdi', pero zoë' nabanë' tu' zóalen yöl-la' huáca queë' Dios Lë'. Netu' ca' ricuúdi'tu' tsözxön len Lë', pero tu' nabatu' tuz len Lë' nabantu', ate' zóalen netu' yöl-la' huáca queë' Dios bi' guntu' ga ni' zóali'.

⁵ Bulí'yú cuinli' channö réajlë'ëli' Cristo o cabí. Gulí'sí' bë' la' cuínsili'. ¿Naru' cabí nōzili' zóalenë' Jesucristo libí'ili' channö le nácatë réajlë'ëli' Lë'? ⁶ Runtu' löza chinöz quézili' le nácatë netu' réajlë'ëtu' Cristo. ⁷ Rulídzatu'-në' Dios rinábitu'-në' gácalenë' libí'ili', para cabí guá'ali' dö', calëga para urúajtu' dxi'a netu', pero para gunli' libí'ili' le naca tsahui' sal-la' guéquili' richixi riníguitu' netu'. ⁸ Bití' ca' gaca tá'baga'tu' le naca idütë li, pero gácasö guntu' ca sa'yéaj le naca idütë li. ⁹ Que lë ni na' rudzéjatu' cate' ricuúdi'tu', ate' libí'ili' ridipa ládxí'li'. Rulídzatica'stu'-në' Dios, rinábitu'-në' gunë' ga gaca idú ca réajlë'ëli' Cristo. ¹⁰ Que lë ni na' ruzúaja' queëli' lu guichi lë ni tsanni ni zoa' zi'tu' ga zóali'. Ní'irö cate' guída' ga zóali' bití' gun bayudxi usaca' zi'a libí'ili', pero uguna' dxin yöl-la' unná bë' nudödë' Xanru' lu na'a, le naca para utipa' ládxí'li', en calëga para usunítia' libí'ili'.

¹¹ Na'a, böchi' luzá'ado', dipa ládxí'li'. Gulí'güí' ládxí'li' gaca idú ca réajlë'ëli' Cristo. Gulí'güí' ládxí'li' ca' lë ni rea' libí'ili'. Gulí'gaca tuz len luzá'ali', en gulí'cöza dxi'ado'. Rinábida'-në' Dios sóalenë' libí'ili'. Lë' nadxí'inë' rë'u, en runë' ga ribözaru' dxi'ado'.

¹² Gulí'gapa Dios luzá'ali', tulí' ia'tulí', en unída'li' luzá'ali'. ¹³ Yúgu'të böchi' luzá'aru' ni tu'gapë' Dios libí'ili'.

¹⁴ Rinábida'-në' Dios gunë' ga gata' queëli' yúgu'tëli' le ruzá' ládxë'ë Xanru' Jesucristo queëru', en idxí'inë' ca' libí'ili', en gunë' ga gácali' tuz len Dios Bö' Lá'ayi. ¡Ca' gaca!

DIDZA' GUSÖL-LĒ'Ē PABLO LUYÚ GALACIA

Ruzúajĕ' Pablo quégaca bônachi luyú Galacia

¹ Neda', Pablo, naca' gubáz queĕ' Cristo. Biti' gula'söl-la' bônachi neda'. Jesucristo caz gusöl-lĕ'ĕ neda', en nunĕ' Xúziru' Dios tu zxôn Lĕ'. Lĕ' busubanĕ' Jesús lu yöl-la' guti. ² Ruzúaja' queĕli' lu guichi ni, libí'ili', yugu' cō' bônachi tu'dubi queĕ' Cristo luyú Galacia. Núngaquiĕ' yugu' bōchi'ru' ni tu zxôn neda'. ³ Rinábida' Xúziru' Dios, enca' Xanru' Jesucristo uzá' ládxĕ'ĕ queĕli', en gunĕ' ga soa dxi icja ládxĭ'do'oli'. ⁴ Jesucristo caz budōdi cuinĕ' lu yöl-la' guti tu' nōzi dul-la' nabága'ru' para busölĕ' rĕ'u lu le naxihui' raca dza ni zóaru' na'a. Benĕ' caní tu' naca ca rĕ'ĕni quézinĕ' Xúziru' Dios. ⁵ ¡Gácatica'sō queĕ' Dios yöl-la' ba! ¡Ca' caz!

Tuz naca le rinnĕ dxi'a queĕ' Jesucristo

⁶ Rubánide'eda' ca runli', rucá'anatĕli' Dios. Lĕ' bulidzĕ' libí'ili' para guéquili' queĕ' tu' nōzi le ruzá' ládxĕ'ĕ Jesucristo queĕru', atĕ' na' a rĕ'ĕnili' si' ladxi' ná'ali' tu le rinnĕ dxi'a izá'a. ⁷ Le nácatĕ bití' ca' zoa ia' tū le rinnĕ dxi'a pero ruá'a caní didza' tu' nacu'ĕ bōnni' tu'tsĕ'ĕ libí'ili', en tĕ'ĕnĕ' ulu'tsĕ'ĕ le rinnĕ dxi'a queĕ' Cristo. ⁸ Channō zoa nu gun ba nali' que tu le rinnĕ dxi'a le cabí naca tuz ca naca lĕ na' bentu' ba nali' que loli' libí'ili', rinábida'-nĕ' Dios udxíĕ' dō' nu na' run caní. Ral-la' udxíĕ' neda' dō' channō guna' caní, en channō gunĕ' caní tu gubáz queĕ' Dios zĕ'ĕ yehua' yubá, Dios caz udxíĕ' ca' lĕ' dō'. ⁹ Chigunná caza' caní zí'alō, atĕ' na'a rnní'a caní leyúbōlō: Channō zoa nu gun ba nali' que tu le rinnĕ dxi'a le cabí naca tuz ca naca lĕ na' chiguzxí' ladxi' ná'ali', rinábida'-nĕ' Dios udxíĕ' dō' nu na'.

¹⁰ ¡Réquitseli' rĕ'ĕnda' cū'uli' neda' yöl-la' zxôn cate' ru'a caní didza'? ¡Biti' ca! Rĕ'ĕnda' urúaja' tsahui' lahuĕ' Dios. ¿Réquili' rĕ'ĕnda' uzaca' baládxĭ'lengaca bônachi neda'? La'tu' rĕ'ĕnda' uzaca' baládxĭ'lengaca bônachi neda', bití' gaca' huen dxin queĕ' Cristo.

Naca bōaquiĕ' Pablo bōnni' gubáz queĕ' Cristo

¹¹ Ral-la' inōzili' lĕ ni, bōchí' zána'do'. Le rinnĕ dxi'a na' runa' ba nali' que bití' gulĕn icja lo ládxĭ'da'ahuiguequi bônachi. ¹² Cuntu nu bōnni' budōdĕ' lu na'a le rinnĕ dxi'a na', en calĕga nu bōnni' busĕdinĕ' neda' le. Jesucristo caz buzĕajni'inĕ' neda' ca naca le rinnĕ dxi'a queĕ'. ¹³ Chibiyōn quézili' ca na' ben caza' neda' zí'atĕlō cate' ni' nazí' lu na'a ca tequi le bach Dios bōnni' judío. Nōzili' ca bena', yenni' gudxia nahua' bōnnachi queĕ' Dios ta'yíja ladxi' Cristo, en gú'unda' usulu usunítia' lĕguequi. ¹⁴ Lu le tequi le bach Dios bōnni' judío, guyĕpisĕtĕra' neda' ca lá'tu'biq' yúgu'tĕ luzá'a bōnni' judío yú'ugaquiĕ' iz ca yu'a neda', tu' guzxi'rō ladxi' na' ca lĕguequi le bulu'dōdĕ' xuz xtō'oru' loru' ca tun cazĕ'. ¹⁵ Caní bena' neda', pero tu' náquiĕ' dxi'i'ladxi' Dios, gurō cazĕ' neda' zí'atĕlō ca gulja', atĕ' bulidzĕ' neda' para guna' xichinĕ'. ¹⁶ Ní'irō, cate' gú'uni quézinĕ' Dios, benĕ' ga núnbĕ'a-nĕ' zxi'inĕ', en gusöl-lĕ'ĕ neda' tsōjena' libán que le rinnĕ dxi'a ca naca queĕ' Lĕ' lógaca bônachi izá'a. Cate' benĕ' caní, bití' yōdilja' nu naca bônachi nu usedi neda'. ¹⁷ Cabí guyija' yōdzō Jerusalén para tsōyúa' nupa ni' nácagaca bōnni' gubáz queĕ' Cristo zí'alō ca neda', pero guyija' luyú Arabia, atĕ' gudōdi ni' bōja' yōdzō Damasco.

¹⁸ Caní guca, chigudōdi tsonna iz cate' ni' guyija' yōdzō Jerusalén, yōyúa'-nĕ' Pedro, atĕ' bugá'analena' lĕ' idú ca chidá' gubidza. ¹⁹ Tsanni ni' zoa' ni' bití' ca' bilé'eda' ia'turĕ' bōnni' gubáz queĕ' Cristo, pero tuzĕ' Jacobo, bōnni' bōchĕ'ĕ Xanru' bilé'eda'. ²⁰ Didza' ni ruzúaja' queĕli' lu guichi nácatĕ. Ní'a queĕ' Dios bití' ca' rizí' yĕ'a.

²¹ Gudōdi ni' guyija', gudōda' yugu' yōdz luyú Siria, en luyú Cilicia. ²² Yugu' dza ni' bití' núnbĕ'gaquiĕ' neda' bōchi'ru' tu'dubĕ' queĕ' Cristo gapa naca luyú Judea. ²³ Gula'nōzisinĕ' lĕ na' gula'guixjō' quia' ia'zica'rō bōnnachi, gula'nná: "Bōnni' na' gudxia nahuĕ' rĕ'u zí'alō, runĕ' libán na'a que le reja ládxĭ'ru', lĕ na' gú'unĕ' usulu usunítie'." ²⁴ Caní guca, gula'gu'ĕ yöl-la' ba Dios tu' nōzda' neda'.

2

Bōnni' gubáz queĕ' Cristo guzxi' lu ná'agaquiĕ' Pablo

¹ Cate' chigudōdi chidá' iz, guyĕajlena' Bernabĕ, en budxina' yōdzō Jerusalén. Guchĕ'a-bi' Tito, dzágabi' neda'. ² Guyija' ni', en bĕ'lĕna' didza' tsólá'alō bōnni' ni' yu'u lu ná'agaquiĕ' dxin queĕ' Cristo, atĕ' gudíxjōi'ida' lĕgaquiĕ' ca naca libán runa' que le rinnĕ dxi'a lógaca bōnnachi izá'a. Caní bena' tu' gú'unda' cabí ugá'ana nítisō dxin na' chibena', enca' dxin ni runa' na'a. ³ Sal-la' nácabi' Tito, bi'i luzá'a, bi'i griego, bití' gulunĕ' bōnni' ni ga irugu lu xpĕla'bi' lĕ na' naca bĕ' bōnnachi queĕ' Dios ca tun cazĕ' bōnni' judío. ⁴ Le nácatĕ gula'cuá' bal-la bōnnachi ni', nupa ni' ta'zĭ' yĕ', ta'ná nácagaca bōchi'ru', atĕ' gulĕ'ĕni ilún ga irugu lu xpĕla'bi' Tito lĕ na' naca bĕ'. Yugu' bōnni' ni núngaquiĕ' tu zxôn rĕ'u pero tu'yusĕ' ca runru'

para iléquitebe'ené' ca nuláru' lu yöl-la' unná bé' que le rinná bé' xibá queé' Moisés tu' nácaru' tuz naca cubi, pero biti' ru'f'i ládxa'a ca huóácaru' leyúbölö huen dxin tsaz lu xibá na'. ⁵ Biti' ca' bé'tu' légaquie' lataj. Cani bentu' para gun chí'itu' le nácaté que le rinné dxi'a para gaca uzí'ili' xibé le rinné dxi'a na'.

⁶ Yugu' bönni' ni' réquiru' yu'u lu ná'agaquie' dxin queé' Cristo biti' bi gula'nná be'e neda' le naca cubi, pero biti' ru'f'i ládxa'a ca ná'agaquie'. Dios biti' ruchi'a rusörö' rë'u ca tu'chi'a tu'sörö bönnachi rë'u. ⁷ Biti' bi gula'nná be'e neda' tu' guléquitebe'ené' Dios nudödë' lu na'a dxin queé', para tsöjena' libán que le rinné dxi'a lógaca bönnachi izá'a, ca na' nudödë' lu në'ë Pedro dxin queé', para gunë' libán que le rinné dxi'a lógaca bönnachi judío. ⁸ Len yöl-la' huáca queé', Dios benë' neda' bönni' gubáz queé' para usédida' bönnachi izá'a, ca na' benë' Pedro bönni' gubáz queé' para usédinë' bönnachi judío.

⁹ Jacobo, en Pedro, en Juan, bönni' ni' réquiru' yu'u lu ná'agaquie' dxin queé' Cristo, guléquitebe'ené' Dios nudödë' lu na'a dxin ni. Que lé ni na' guzxi' ladxi' ná'agaquie' neda', enca' Bernabé, ate' bentu' tuz didza' tsöjentu' xichinë' Dios lógaca bönnachi izá'a neda', en Bernabé, ate' légaquie' ilunë' xichinë' Dios lógaca bönnachi judío. ¹⁰ Gulá'ta'yusë' lotu' tsönetu' gácalentu' bönnachi yechi', ate' lé ni naca tu le ru'f'itica'sö ládxa'a runa'.

Ca guca cate' Pablo gudíl-lalenë' Pedro lu yödzo Antiquá

¹¹ Cate' bidxinë' Pedro lu yödzo Antioquía, gudíl-lalena' lë' didza' tu' lë cazë' guchixinë' ca benë'. ¹² Cani guca tu' zí'atëlö gudágulenë' tsözxön yugu' bönnachi izá'a ni. Benë' cani ga bila'dxinrë' bal-la bönni' dá'gaquie' Jacobo. Ní'irö gusi lahuë' rubíguie', en bítirö gudágulenë' tsözxön bönnachi izá'a na' tu' gúdxinë' bi ilunë' bönni' na' nazí' lu ná'agaquie' ilunë' ga irugu lu xpéla'gaca bönnachi izá'a ca rinná bé' xibá queé' Moisés. ¹³ Ní'irö ia' zí'ca'rë' bönni' judío ni' ta'yija ládxe'ë Cristo gulunë' tu' zxön Pedro ca runë' lu yöl-la' radxi queé', ate' cani guca ga bidxintë' gulunë' ga gúdxinë' ca' Bernabé, ate' lë' benë' tu' zxön légaquie'. ¹⁴ Cate' bilé'eda' biti' tunë' ca naca le nácaté le rusedi rë'u le rinné dxi'a, gudxa'-në' Pedro lógaca yúgu'të nupa ni' nudúbigaca queé' Cristo, gunniá: "Li' nacu' bönni' judío, pero runu' li' ca túngaca bönnachi izá'a, en caléga ca tunë' bönni' judío. ¿Bizx queé' rë'ënu' gunu' ga ilúngaca bönnachi izá'a ca tunë' bönni' judío?"

Nulágaca bönnachi judío ca na' nulágaca ca' bönnachi izá'a

¹⁵ Gudxa' ca' Pedro: "Rë'u ni nácaru' bönni' judío tu' ná'agaquie' xuz xiná'aru' judío, en caléga bönnachi izá'a, nupa cabí núnbë'gaca Dios. ¹⁶ Nöz queziru' cuntu nu huóáca tsahui' lahuë' Dios tu' run nu na' tsca rinná bé' xibá queé' Moisés, pero huóáca tsahui' tuzi nu na' reja ladxi' Jesucristo. Lës cani ca' rë'u reja ládxi'ru' Jesucristo para huóácaru' tsahui' lahuë' Dios, en caléga tu' runru' tsca rinná bé' xibá queé' Moisés. Cuntu caz nu huóáca tsahui' lahuë' Dios tu' run tsca rinná bé' xibá queé' Moisés.

¹⁷ Na'a, réquiru' nuhuóácaru' tsahui' tu' reja ládxi'ru' Cristo, pero channö naca bé' nácaru' bönni' dul-la' ca ná'agaca bönnachi izá'a, ¿innátsaru' runë' Cristo ga runru' dul-la'? ¿Biti' caz! ¹⁸ Channö ru'f'i ládxa'a uchisa' le chibuquinja', lë ni naca bé' riguitsja' xibá le gunná bé'ë Dios. ¹⁹ Tu' cabí guca uzóa' didza' xibá na' gunná bé'ë Moisés, guca quia' tsca chinátia'. Tu' cani naca, nulá' na'a lu xibá na' para soa' ibana', en guna' ca rë'ënu' Dios. ²⁰ Naca quia' ca chigútílena' tsözxön Cristo lë'e yaga cruz ga na' gútië' Lë'. Que lë ni na' caléga neda' ni zoa' nabana', pero Cristo zoë' nabanë' lu icja ládxi'da'ahua'. Tsca naca zoa' nabana' na'a, naca tu' reja ládxa'a Lë' xzí'inë' Dios, Bönni' na' bidxi'inë' neda', en budödi cuinë' lu yöl-la' guti uláz quia' neda'. ²¹ Biti' rë'ënda' uzóa' tsölá'alö le ruzá' ládxe'ë queëru' Dios. Channö huáca huóáquie' tsahui' tu' bönni' lahuë' Dios tu' runë' tsca rinná bé' xibá queé' Moisés, ní'irö nítisö gútië' Cristo."

3

Le rinná bé' xibá queé' Moisés, en le reja ládxi'ru' Cristo

¹ Libí'ili', tu' canöz, libí'ili', bönni' Galacia. ¿Nuzxi gulú'utsö libí'ili' nëbi para cabirö uzóali' didza' le nácaté? Gate ga rë' buluf'itu' libí'ili' le sa'yéaj ca gútië' Jesucristo lë'e yaga cruz. ² Gudíxjörí' neda' lë ni. ¿Bidisóalënë' libí'ili' Dios Bö' lá'ayi tu' benli' ca rinná bé' xibá queé' Moisés o tu' guyiya ládxi'li' le rinné dxi'a biyönili'? ³ ¿Nacxi guca nácali' tu' canöz cani? Gusi loli' nácali' bönnachi queé' Dios tu' zóalenë' libí'ili' Dios Bö' lá'ayi. ¿Réquitseli' huáca udxí gunli' ga guéquili' queé' Dios rácasö queéli'? ⁴ ¿Guca nítisö guca queéli' yúgu'të lë na' guzxcaca' gudí'ili'? ¿Biti' ca' guca cani! ⁵ Cate' Dios risöl-lë'ë queéli' Dios Bö' lá'ayi, en ru'ë libí'ili' lataj gunli' yugu' yöl-la' huáca que yehua' yubá, ¿runë' cani tu' runli' ca rinná bé' xibá queé' Moisés o tu' reja ládxi'li' le rinné dxi'a na' biyönili'?

⁶ Lu guichi lá'ayi rna: Abraham guyiya ládxe'ë Dios, ate' Dios gunné' náquie' bönni' tsahui' tu' guyiya ládxe'ë Lë'. ⁷ Que lë ni na' ral-la' inözili', nupa na' ta'yija ladxi' Dios ná'agaca idú xzí'ini'xi'sóe' Abraham. ⁸ Lu guichi lá'ayi ru'f'i didza' zí'atëlö ca gunë' Dios, innë'

nácagaquíe' tsahui' bönni' izá'a ila'yija láchxë'è Lë'. Que lë ni na' Dios gudíxjoi'inë' Abraham zí'atëlö ca naca le rinnë dxi'a, gunnë': "Lu në'ë Zxi'ini xi'sú' guna' ga gaca dxi'a quégaca bönachi idutë yödölíö." ⁹ Caní naca, Abraham guýija láchxë'è Dios, ate' Dios benë' ga guca dxi'a queë'. Lës caní ca' na'a, Dios runë' ga raca dxi'a quégaca yúgu'të nupa ta'yija ladxí' Lë'.

¹⁰ Nupa na' tu'zxöni ladxí' ulu'huóaca tsahui' tu' túngaca ca rinná bë' xibá queë' Moisés, nabága'gaca xíguia'. Caní naca tu' nazúaj lu guichi lá'ayi, le rnna: "Yúgu'të nupa na' cabí túngaca idutë ca rinná bë' xibá na' nabága'gaca xíguia'." ¹¹ Na'a, naca bë' cuntú nu huóaca tsahui' lahuë' Dios tu' run nu na' le rinná bë' xibá na', tu' zoa lu guichi lá'ayi le rnna: "Nu na' nuhuóaca tsahui' lahuë' Dios soa ibán tu' reja ladxí' Lë'." ¹² Ca na' nuhuóaca tsahui' lahuë' Dios nu na' reja ladxí' Cristo nadzá' ca naca que nu na' ruzxöni ladxí' nuhuóaca tsahui' tu' run ca rinná bë' xibá queë' Moisés. Zoa lu guichi lá'ayi le rnna: "Nu na' run idutë ca rinná bë' xibá na' soa ibán tu' run caní."

¹³ Cristo busölë' rë'u lu le richugu queëru' le rinná bë' xibá na' tu' bë'è latja nu guchugu queë' uláz queëru'. Caní naca tu' zoa lu guichi lá'ayi le rnna: "Narugu quégaca yúgu'të nupa na' dá'gaca lë'e yaga." ¹⁴ Caní guca queë' Cristo para gaca gunë' Dios ca na' guzxi' lu në'ë queë' Abraham, gunë' ga gaca dxi'a quégaca bönachi izá'a lu në'ë Jesucristo, en para gaca gunë' ga idisóalenë' Dios Bõ' lá'ayi rë'u channö uyija láchxi'ru' Lë', ca na' guzxi' lu në'ë Dios gunë'.

Le rinná bë' xibá queë' Moisés, en le guzxi' lu në'ë Dios gunë' queëru'

¹⁵ Na'a, böchi' zána'do', uzúaja' queéli' tu le rucudzu' didza', tu le raca queëru'. Cate' chopá bönni' chigulunë' tuz xtídza'gaquíe', en chigulunë' tsutsu didza' na', cuntú nu gaca utsá' didza' na', en cabí gaca nu bi udá' lë'e didza' na'. ¹⁶ Dios guzxi' lu në'ë bi gunë' queë' Abraham, en que zxi'ini xi'sóe'. Ga zoa lu guichi lë ni, bití' rnna: "Quégaca zxi'ini xi'sú'", le ruí' didza' que zían bönachi, pero rnna: "Que zxi'ini xi'sú'." Lë ni ruí' didza' que tuz bönni', Lë' Cristo. ¹⁷ Lë ni na' le rë'ënda' innía': Dios benë' tuz didza' len Abraham, en guzxi' lu në'ë gunë' ca na' gunnë'. Le nazúaj lu xibá queë' Dios, le benë' Dios tapa gayuá' yu' chi-uruá' iz gudödi ni' cate' gudxë' caní Abraham, bití' gaca ugúa lë na' guzxi' lu në'ë Dios gunë', en cabí gaca usulu le. ¹⁸ Na'a, channó ral-la' gunru' ca rinná bë' xibá na' para sí'iru' le guzxi' lu në'ë Dios gunsë', bití'rö naca tu le guzxi' lu ná'asë' gunë'. Dios runsë' caní tu' caní guzxi' lu në'ë bi gunë' queë' Abraham.

¹⁹ Channö caní naca, ¿bixx queë gunná bë'è Dios xibá na' nazúajgaca lu didza' queë'? Dios gunná bë'è caní para gaca bë' xíguia' nabága'ru', pero gúcasö caní ga bidxintë dza na' bilá' lahuë' zxi'ini xi'sóe' Abraham na', Bönni' na' guzxi' lu në'ë Dios gunë' queë' lë na'. Yugu' le gunná bë'è Dios lu xibá queë', gusöl-lë'è yödölíö ni lu ná'agaquíe' gubáz lá'ayi queë', ate' Moisés budödë' didza' ca nácagaca xibá na'. ²⁰ Bití' naquín nu udödi didza' cate' naca tuz nu run tuz didza', ate' Dios, tuz náquie'.

Bixx queë gunná bë'è Dios le zóagaca lu xibá queë'

²¹ Le nazúajgaca lu xibá queë' Dios, ¿ta'dá'gaca lë na' guzxi' lu në'ë Dios gunë'? ¿Bití' ca'! La'tu' gunná bë'è Dios tu xibá le gaca gun ga sóaru' ibanru' tsaz, ní'rö huáca huóacaru' tsahui' lahuë' Dios channö gunru' ca na' rinná bë' xibá na'. ²² Tsca naca lë na' nazúaj lu guichi lá'ayi, yúgu'tëru' nabága'ru' dul-la'. Caní naca para gaca sí'iru' lë na' guzxi' lu në'ë Dios gata' queëru' cate' tseja láchxi'ru' Jesucristo.

²³ Zí'atëlö ga bidxín dza gaca tseja láchxi'ru' Cristo, le rnna xibá na' gunná be'e rë'u, ca na' zoa le rinná be'e tu bönni' yu'è lidxi guíë. Caní guca ga bidxintë dza bilá' lahui gaca huóacaru' tsahui' channö uyija láchxi'ru' Lë'. ²⁴ Caní naca, le nazúaj lu xibá queë' Dios gunná be'e rë'u, lë na' busedi rë'u ca tu bönni' usedi ga bidxintë dza bilá' lahuë' Jesucristo, para gaca huóacaru' tsahui' lahuë' Dios channö uyija láchxi'ru' Lë'. ²⁵ Na'a, tu' bidxín dza gaca huóacaru' tsahui' channö uyija láchxi'ru' Cristo, bití'rö inná be'e rë'u lë na' busedi rë'u.

²⁶ Yúgu'tëli' nácali' bi'í queë cazë' Dios tu reja láchxi'li-në' Jesucristo, en chinácali' tuz len Lë'. ²⁷ Yúgu'të nupa nadílagaca nisa para huóacagaca tuz len Jesucristo, nuhuóacagaca ca náquie' Lë cazë'. ²⁸ Bití'rö narúaj choplö bönni' judío, en bönni' izá'a, en cabí narúaj choplö bönni' náquie' tsaz huen dxin, en bönni' nazán, en cabí narúaj choplö bönni', en nigula, tu' cate' böácali' tuz len Jesucristo, yúgu'tëli' böácali' ca' tuz len luzá'ali' tuli' ia'tuli'. ²⁹ Na'a, channö néquili' queë' Cristo, nácali' ca' zxi'ini xi'sóe' Abraham, ate' nazí'ili' lë na' guzxi' lu në'ë Dios gunnë' queë' Abraham.

4

¹ Lë ni le rë'ënda' innía': Tsanni ni ribözabi' tu bi'í bönni'do' sí'ibi' bi ral-la' gunnë' xúzibi' queëbi', ni' nácabí' bí'ido', en bití' nayëpisëtëröbi' ca raca que tu nu naca tsaz huen dxin, sal-la' le nácatë nequi queëbi' yúgu'të. ² Tsanni ni' nácabí' bí'ido', nacué' nupa tun chi'í lëbi', en tu'gün dxin le nequi queëbi' ga idxintë dza chinuzóë' xúzibi' queëbi'. ³ Lës caní raca

ca' queëru'. Tsanni ni' gúcaru' ca bí'ido', gunná be'e xibá na' rë'u ca raca quégaca bônachi yödžolió ni'. ⁴ Cate' bizá'a dza, Dios gusól-lë'ë xzí'ini cazë' ni. Gúquië' xzí'ininu tu nigula ca nácaru' rë'u, en gunná be'e le zoa lu xibá quégaca bônni' judío Lë'. ⁵ Caní guca queë' para guca busólë' nupa na' rinná be'e le zoa lu xibá léguequi, para gaca huôácaru' bi'i queë' Dios.

⁶ Para gaca bë' chinácali' bi'i queë' cazë', Dios guchizë' Dios Bô' lá'ayi ládxí'do'oli', ate' Lë cazë' rulidžë' Dios uláz queëli', rnnë': "Xuza'." ⁷ Caní naca, chinácali' bi'i queë' Dios, en bití'rô nácali' ca yugu' bônni' tsaz nácaquaquië' huen dxin. Na'a, tu' nácali' bi'i queë' cazë' Dios, Lë cazë' nazí' ladxi' në'ë guequi queëli' le nequi queë' tu' nácali' tuz len Cristo.

Pablo ru'i ládxë'ë bônni' Galacia ta'yija ládxë'ë Cristo

⁸ Cate' ni' bití' núnbë'ëli'-në' Dios, gúcali' ca yugu' bônni', tsaz nácaquaquië' huen dxin, en benli' dxin quégaca budó' néquini. Bití' ca' nácaaga budó' na' Dios. ⁹ Na'a, tu' núnbë'ëli'-në' Dios, o huáca innaru': Tu' núnbë'ë Dios libí'ili', žbixz queë' rë'ëni' ubí'ili' yugu' lu xibá cané na' cabí nu uzí' xibé? ŽRë'ëni' huóacali' huen dxin tsaz, en gunli' ca rinná bë' xibá na'? ¹⁰ Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz. ¹¹ Rádxida' bi gaca queëli'. ŽNaru' nuhuóaca nítisô dxin bena' para gúnbë'ëli' le nácatë? ¹² Ráta'yuá' loli', bôchi' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' bôaca' neda' ca gúcali' libí'ili'. Bití' bi le cabí naca dxi'a benli' quia' neda'.

¹³ Chinôž quézili' bizz queë' na' gusí lahua' runa' libán loli' que le rinnë dxi'a. Bena' libán ni' tu' guí'ida'. ¹⁴ Bití' bucá'anali' neda' cané, en cabí buzóali' neda' tsólá'alô sal-la' bigútili' ca guca yödžohuë' quia' na'. Benli' neda' bal, tuz ca gunli' bal tu gubáz lá'ayi queë' Dios, o ca runli' bal Jesucristo caz. ¹⁵ Budžéjalë'ëli' dza ni'. ŽBizí' guca queëli' tu' cabirô raca caní? Lë ni gaca inní'a' ca guca queëli': La'tu' huáca gunli', bubéajli' guiôž lo quézili', le gúnнали' quia'. ¹⁶ Na'a, žréquili' nuhuóaca' tu nu riléde'e libí'ili' tu' gudxa' libí'ili' le nácatë?

¹⁷ Bônni' ni' tu'tsë'ë libí'ili' tu'i ládxë'ë libí'ili', pero calëga para gaca dxi'a queëli'. Të'ënë' ilunë' ca ucá'anali' netu' para gúnë'ë libí'ili' légaquië'. ¹⁸ Na'a, naca dxi'a zoa nu ru'i' ladxi' libí'ili', pero tuz channô naca para gaca dxi'a queëli'. Caní ru'ítica'sô ládxa'a libí'ili', en calëgasô cate' ni' zóalena' libí'ili'. ¹⁹ Libí'ili', xzí'ina'do'. Ca na' raca queënu nigula chizóa sóabi' bí'ido' queënu, rigufí rizáca'nu, lës caní rigufí' rizáca'a neda' ni'a queëli' leyúbölô ga idxinrô dza gácali' idú ca náquië' Cristo. ²⁰ Nácaru' la' zóalena' libí'ili' na'a para gaca guí'ilená' libí'ili' didza' nadzá'alô, tu' ruúbi rugufí'ile'da' ni'a queëli'.

Le rucudzu' didza' ca guca quégacanu Agar en Sara

²¹ Na'a, libí'ili', nuli' rë'ëni' uzó'a cuinli' lu xibá queë' Moisés, guli'ná'tsóca' didza' ni gu'a. ŽCatu caz buzë' nágalí' le rnna xibá na'? ²² Rnna xibá na' caní: gula'cuá'abi' chópabi' bi'i bônni'do' queë' Abraham. Tubí' gúcabí' xzí'ininu tu nigula tsaz nácanu huen dxin, ate' ia'tubi' gúcabí' xzí'ininu nigula nazannu. ²³ Xzí'ininu nigula huen dxin na' gúlajbi' lu ni'a lu na' tu bônni' tsa talajbi' yúgu'të bí'ido', pero xzí'ininu nigula nazannu na' gúlajbi' tu' guzxí' lu në'ë Dios gunë' ga galajbi'. ²⁴ Lë ni naca ca tu le rucudzu' didza'. Ca guca quégacanu chópanu nigula ni sa'yéaj ca naca chopa didza' Dios benlenë' bônachi. Tu didza' na' naca le buzóë' Dios lu guí'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácaaga ca xzí'ininu Agar, en nácaaga ca huen dxin tsaz lu xibá na'. ²⁵ Le gúcanu Agar na' sa'yéaj ca' ca naca guí'a Sinaí na' le zoa luyú Arabia, en sa'yéaj ca' ca naca yödžô Jerusalén na'a dza, tu' naca yödžô na' ca tu bônni' tsaz náquië' huen dxin tsôžxôn len nupa nacua' lu yödžô na'. ²⁶ Jerusalén na' zoa yehua' yubá nazán, ate' rë'u ni nácaru' bônachi uládz que yödžô ni'. ²⁷ Nazúaj lu guichi lá'ayi le rnna:

Budzeja, nigula huódx, cabí nacua' xzí'inu'.

Lu yöl-la' rudzeja quíu' guródxia',

sal-la' catu caz guca quíu' le rigufí' rizáca'nu nigula chizóa sóabi' bí'ido' queënu.

Budzeja tu' sal-la' nusán në'eguequi bônachi li',

gunë' Dios ga ila'yántërô xzí'inu'

ca bi'i queënu nigula zóalennu bônni' queënu.

²⁸ Libí'ili', bôchi' zána'do', rë'u ni nácaru' ca gúcabí' Isaac, xzí'inë' Abraham. Nácaru' ca yugu' xzí'ini xi'sóë' Abraham, guzxí' lu në'ë Dios gata' queë'. ²⁹ Dza ni', bi'i na' gúlajbi' ca talajbi' yúgu'të bí'ido', gudxí'a ná'abi' bi'i na' gúlajbi' tu' nôzi yöl-la' huáca queë' Dios Bô' lá'ayi. Lës caní raca ca' queëru' na'a, ta'bia no bônachi yödžolió ni' rë'u. ³⁰ ŽBizí' rnna le zoa lu guichi lá'ayi? Caní rnna: "Gurú'una-nu nigula na' tsaz nácanu huen dxin tsôžxôn len xzí'ininu, tu' bití' gaca xzí'ininu nigula na' sí'ibi' tsôžxôn xzí'ininu nigula nazannu le guzxí' lu në'ë Dios guequi queëbi' xzí'ininu nigula nazannu na'." ³¹ Caní naca, bôchi' zána'do'. Bití' nácaru' ca nácabí' xzí'ininu nigula na', tsaz gúcanu huen dxin, pero nácaru' ca xzí'ininu nigula nazannu na'.

5

Gulí'gún chí'i cuinli', ugá'anali' lu yöl-la' nazán

¹ Chinazanru' tu' busanë' Cristo rë'u. Gulí'sóa tsutsu channö, ugá'anali' lu yöl-la' nazán na'. Biti' uzóa cuinli' leyúbölö lu xibá queë' Moisés para cabí gácali' ca tu bönni', tsaz náquië' huen dxin.

² Buli'zë nágali' neda'. Neda', Pablo, rea' libí'ili', channö ruí'ili' lataj nu ichugu lu xpéla'li' ca rinná bë' xibá na', bití' ca' uzi'ili' xibé le benë' Cristo. ³ Leyúbölö rë'enda' guí'a' nútí'tës bönni' ru'ë lataj nu ichugu lu xpélë'ë caní, run bayudxi gunë' idutë ca le rinná bë' xibá queë' Moisés. ⁴ Nuli' réquili' huóacali' tsahui' lahuë' Dios tu' runli' ca rinná bë' xibá na', chibulá'alenli'-në' Cristo. Chibusán ná'ali' le ruzá' ládxë'ë Dios queëru'. ⁵ Rë'u ni ruzxöni ládxí'ru' huóacaru' tsahui' lahuë' Dios ni'a que yöl-la' huáca queë' Dios Bö' lá'ayi tu' reja ládxí'ru' Cristo. ⁶ Channö nácaru' tuz len Jesucristo, bití' bi run channö narugu lu xpéla'ru' ca rinná bë' xibá na' o channö cabí narugu caní lu xpéla'ru'. Le run bayudxi naca tseja ládxí'ru' Cristo, le run ga idxí'iru' luzá'aru'.

⁷ Dxi'ado' guca ca gusí loli' runli' dza ni'. ¿Nuzxi ben ga bucá'anali' le nácate? ⁸ Biti' benë' Dios, Bönni' rulidzë' libí'ili', ga benli' caní. ⁹ Biti' gal-la ládxí'li' lë na' rnna: "Látí'sö cúa zi que yóta xtila ruhuóáx idutë cúa ga nayú'u cúa zi na'." ¹⁰ Tu' nácaru' tuz len Xanru', runa' löza ca naca queëli', sa' ládxí'li' tuz ca rizá' ládxá'a neda', ate' Dios gun zí'ë bönni' na' rutsë'ë libí'ili', nútí'tës nu naca bönni' na'.

¹¹ Ca naca quia' neda', böchi' zána'do', nacuá' nupa ta'nná rusédida' bönachi ral-la' irugu lu xpéla'guequi ca rinná bë' xibá queë' Moisés. Channö runa' caní, ¿bizx queë ta'bía nahuë' bönni' judío neda'? La'tu' rusédida' caní, cuntu nu ilë neda' tu' runa' libán ca gútië' Cristo lë'e yaga cruz. ¹² Ca naca que nupa ni' tu'tsá' libí'ili', té'ëni irugu lu xpéla'li' lë na', nácöru la' ila'chugu tsaz cuínguequi.

¹³ Ca naca queëli', böchi' zána'do', Dios bulidzë' libí'ili' para gácali' bönachi nazángaca. Biti' ugunli' dxin yöl-la' nazán na' para gunli' ca rizësö ládxí'li', pero para gunli' dxin que luzá'ali', tuli' ia'tuli', tu' nadxi'ili' luzá'ali'. ¹⁴ Yúgu'të le rinná bë' xibá queë' Dios rusudxín nu na' run ca rinná bë' xibá na' rnna: "Ral-la' idxí'inu' luzó'o ca nadxi'í cuinu'." ¹⁵ Channö rizi' quidza'li' luzá'ali' tuli' ia'tuli', runli' ca tunba' böa' guí'a' sínia', táguya'aba', en táguba' luzá'aba'. Buli'yú tsate' usulu usunitili' luzá'ali' tuli' ia'tuli'.

Le runru' lu yöl-la' bönáchisö queëru', en le runru' len yöl-la' huáca queë' Dios Bö' lá'ayi

¹⁶ Lë ni na' rea' libí'ili': Gulí'gúí' latja inná bé'enë' libí'ili' Dios Bö' lá'ayi, ate' ní'irö bití'rö gunli' ca rizësö ládxí'li' lu yöl-la' bönáchisö queëli'. ¹⁷ Yugu' le rizë ládxí'ru gunru' lu yöl-la' bönáchisö queëru' bití' röjlöz le rë'ënë' Dios Bö' lá'ayi gunru', ate' lë na' rë'ënë' Dios Bö' lá'ayi bití' röjlöz le rë'ëniru' gunru' lu yöl-la' bönáchisö queëru'. Chopa ni, bití' röjlözgaca, en que lë ni na' bití' gaca gunli' ca rë'ëni quézili'. ¹⁸ Channö ruí'ili' lataj inná bé'enë' Dios Bö' lá'ayi libí'ili', bití'rö inná be'e xibá queë' Moisés libí'ili'.

¹⁹ Naca bë' le tun bönachi lu yöl-la' bönáchisö quéguequi.

Tun dul-la' le riguitsaj xibá que yöl-la' nutsaga na', enca' dul-la' le lë'e.

Tun yugu' le naxihui', en yugu' le catsahui'.

²⁰ Téquiguequi le bach budó' néquiniguequi.

Tun yöl-la' gudzá'.

Tu'dí'i luzë'eguequi, en ta'díl-lalen léguequi.

Tu'zxë'e luzë'eguequi, en ta'lé nupa na', en tu'huídi'.

Ta'ruaj choplö, en tu'béaj tsölá'alö nupa dá'gaca léguequi.

²¹ Ta'zë ladxí' le dë que luzë'eguequi, en ta'guilaj xíguia'.

Ta'zudxi, en tagu lë'e.

Tu'dödi bë' ca túnguequi.

Le zían le caní túnguequi. Neda' ruxösa' ládxí'li' na'a para cabí gunli' caní ca na' buxösa' ládxí'li' zí'alö, rnní'a: Nupa túngaca caní bití' ca' ila'deli' ila'yú'u ga na' rinná bé'ë Dios.

²² Channö zóalen Dios Bö' lá'ayi rë'u runru' caní:

Nadxi'iru' luzá'aru'.

Rudzeja ládxí'ru'.

Zoa dxi ládxí'do'oru'.

Ribözaru' zxön ladxí'.

Ruí'í ládxí'ru' luzá'aru'.

Nácaru' dxi'í ladxí'.

Rusudxinru' xtídzá'ru'.

²³ Nácaru' nöxaj ladxí'.

Rinná be'e cuinru'.

Biti' ca' gunná bë'ë Moisés rë'u para cabí gunru' yugu' le caní. ²⁴ Nupa néquiquequi queë' Cristo bitirô tun ca tē'ëni quez, en cabí tun le ta'zësô ladxí' lu yöl-la' bönáchisô quéquequi. ²⁵ Dios Bô' lá'ayi runnë' yöl-la' na'bán queëru'. Lë' cazë' ral-la' inná bé'enë' rë'u ca naca yúgu'të le runru'.

²⁶ Biti' ral-la' gun ba zxôn cuinru', en cabí utsá'aru' luzá'aru', en cabí uzzé'ëru' luzá'aru' turu' ia'turu'.

6

Ral-la' gácalenru' luzá'aru' turu' ia'turu'

¹ Na'a, böchi' zána'do', channö ilé'eli' runë' dul-la' tu bönni' böchi'li', nuli' zóalenë' Dios Bô' lá'ayi libí'ili', ral-la' gunli' ga ubí'i ládxë'ë bönni' na', pero run bayudxi gunli' caní lu yöl-la' nōxaj ladxí' queëli', en uyú cuinli' tsate' cu'u tu' xihui' libí'ili' nōza dul-la'. ² Guli' gácalen luzá'ali' tuli' ia'tuli' tsca naca yuá' nabága'li'. Channö gunli' caní uzóali' didza' le gunná bë'enë' Cristo rë'u.

³ Channö zoa nu réqui chinadeli' yöl-la' nayëpisë, en bití' bi nadelí' nu na', nu ni na' rizí' ye'e la' cuinsi'. ⁴ Tuhuëaj tuhuëajë' bönni' ral-la' uchi'a usöröë' que le runë'. Ní'irö channö urúajë' dxi'a, huáca gun ba zxôn cuinë' nī'a que le chinunë', en bití' gun bayudxi uyúë' ca nūngaca ia'zica'rö bönachi channö ba benrë' dxi'a o cabí. ⁵ Tuhuëaj tuhuëajë' bönni' ral-la' gu'ë le nusubáguë'ë Dios lë'.

⁶ Channö zoa nu rusedi libí'ili' ca naca le rinnë dxi'a, ral-la' unödzejali' nu na' rusedi libí'ili' lati' que yúgu'të le do' dë queëli'.

⁷ Biti' si' ye'e cuinli' tu' cuntú nu gaca si' ye'e Dios. Ulápali' tsca naca le rázali'. ⁸ Channö le rázali' naca yugu' le runli' ca rizësô ládxí'li' lu yöl-la' bönáchisô queëli', le ulápali' gaca yöl-la' guti. Channö le rázali' naca yugu' le runli' ca raza ládxë'ë Dios Bô' Lá'ayi, ulápali' le gunnë' Dios Bô' lá'ayi queëli', le naca yöl-la' na'bán idú. ⁹ Caní naca, bití' ral-la' huöa ladxí'ru' gunru' le naca dxi'a, tu' channö cabí huöa ladxí'ru', idxín dza uláparu'. ¹⁰ Que lë' ni na', bátati'tës gata' queëru' lataj, ral-la' gunru' le naca dxi'a quégaca yúgu'të bönachi, en le naca lo, ral-la' gunru' caní quégaca böchi' zanru' ta'yija ladxí' Cristo.

Le buzúajë' Pablo lu guichi ga ruúdx

¹¹ Buli'yú cate' bach didza' nī ruzúaja' lu guichi len na' cuina'. ¹² Nupa na' tē'ëni ilún ga irugu lu xpëla'li' ca rinná bë' xibá queë' Moisés, tūngaca caní para ulu'rúaj dxi'a lógaca bönachi, en cabí bi ilún quéquequi tu' tūngaca libán ca gütie' Cristo lë'e yaga cruz. ¹³ Yugu' bönni' na' ta'zi' lu ná'agaquië' le narugu lu xpëla'gaquië' ca rinná bë' xibá queë' Moisés, bití' tu'zöë' didza' idutë ca rnna xibá na'. Tē'ënë' ilunë' ga irugu lu xpëla'li' para gaca ilún ba zxôn cúngaquië' tu' ta'nná bë'enë' libí'ili' para irugu lu xpëla'li' caní. ¹⁴ Ca naca quia' neda', cú'usa' yöl-la' ba le benë' Xanru' Jesucristo cate' gütie' lë'e yaga cruz. Tu' nözi le benë' Cristo lë'e yaga cruz, yugu' le dë yödzülió ni naca quia' ca tu le chinati, bití' ruí'i ladxá'a le, ate' neda' naca' quégaca bönachi yödzülió ni ca tu bönni' nati, bití' tuí'i ladxí' neda'. ¹⁵ Channö nácaru' tuz len Jesucristo, bití' bi run channö narugu lu xpëla'ru' ca rinná bë' xibá na' o channö cabí narugu lu xpëla'ru' caní. Le run bayudxi naca gácaru' bönachi cubi niu' lë'e ladxí'do'oru'. ¹⁶ Yúgu'të bönni' na' tunë' ca rinná bë' xibá runa' nī, en yúgu'të bönni' na' néquiquequinë' queë' Dios, rinábida-në' Dios gunë' ga soa dxi ladxí'do'gaquië', en huéchi' ládxë'ë légaquië'.

¹⁷ Na'a zë lo, cuntú nu bönni' ral-la' utsë'ë neda', tu' nácagaca bë' butsóa zóagaca lu xpëla'a naca' huen dxin queë' Xanru' Jesús.

¹⁸ Na'a, böchi' zána'do', rinábida-në' Xanru' Jesucristo uzá' ládxë'ë queëli' yúgu'tëli'. Ca' caz.

DIDZA' GUSÖL-LË'Ë PABLO YÖDZÖ ÉFESO

Pablo rugapë' Dios bönachi queë' Cristo nacué' Éfeso

¹ Neda', Pablo, naca' gubáz nasöl-lë'ë Jesucristo tu' gú'uni quézinë' Dios gaca' caní. Rugapa' Dios libí'ili, zóali' Éfeso. Néquili' quez queë' Dios, en réajlë'ëli' Jesucristo. ² Rinábida-në' Xúziru' Dios, enca' Xanru' Jesucristo uzá' ládxë'ë queë'li', en gunë' ga soa dxi icja ládxí'do'oli'.

Le naca queë' Dios Bô' Lá'ayi rata' queëru'

³ ¡Ral-la' cú'uru-në' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ládxë'ë queëru' yúgu'të le naca dxi'a que yehua' yubá, le runë' Dios Bô' Lá'ayi ga rata' queëru'. ⁴ Zí'atëlö ca benë' Dios yödžöliö ni, gurö cazë' rë'u para guequiru' quez queë' tsözxön len Cristo, en gácaru' bönachi lá'ayi queë', en gácaru' idú dxi'a lahuë' Lë'. ⁵ Dios bucözë' zí'atëlö si' lu në'ë rë'u ca xzí'ini cazë' tsözxön len Jesucristo, tu' guyaza ládxë'ë gaca caní, en tu' naca le gú'uni quézinë' gunë'. ⁶ ¡Ral-la' cú'utica'siru-në' Dios yöl-la' ba nì'a que le buzá' ládxë'ë queëru', yugu' le bénnasë' queëru' tu' nácaru' tuz len Xzí'inë', Nu na' nadxí'inë'! ⁷ ¡Cristo böá'uë' rë'u cate' nì' gú'tië' uláz queëru' para gaca uniti lahuë' Dios rë'u ca naca dul-la' nabága'ru'! ¡Xöntërö naca le buzá' ládxë'ë Dios queëru', ⁸ lë na' rúnnadë'ë Lë' queëru'! ¡Lu yöl-la' rácada' queë', en lu yöl-la' réajni' queë' ⁹ benë' Dios le bucözë' queëru', atë' buluf'inë' rë'u lë na' bigachi', le buzóa cazë' zí'atëlö usudxinë' lu në'ë Cristo! ¹⁰ Lë na' buzóa cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'të le dë, le nacué' yehua' yubá, en le nacué' yödžöliö ni.

¹¹ Tu' nácaru' tuz len Cristo, Dios gurö cazë' rë'u zí'atëlö para guequi queëru' le nequi queë' Xúziru' Dios, lë na' bucözë' queëru' ca naca le gú'uni quézinë' Dios, Nu run yúgu'të ca rë'ëni quézinë' Lë'. ¹² Caní benë' Dios para cú'uru-në' yöl-la' ba ca naca yöl-la' xzön queë', rë'u ni ruzxöni ládxí'ru-në' Cristo zí'atëlö ca ia'zica'rö bönachi. ¹³ Lësca' caní guca queë'li'. Cate' biyönili' didza' idütë' li, didza' dxi'a ca gaca uláru', guyéajlë'ëli' Cristo, atë' Dios buzóë' queë'li' le naca bë' nácali' queë', tu' guchizië' icja ládxí'do'oli' Dios Bô' Lá'ayi, Nu na' guzxi' lu në'ë Dios isöl-lë'ë queëru'. ¹⁴ Tu' zóalenë' Dios Bô' Lá'ayi rë'u, naca löza guequi queëru' le nequi queë' Xúziru' Dios cate' údxi huóá'uë' rë'u, rë'u na' chinéquiru' queë'. Caní naca para gaca yöl-la' ba que yöl-la' xzön queë'.

Pablo rinábinë' Dios gunné' queëru' yöl-la' réajni'

¹⁵ Que lë ni na', cate' biyönda' ca réajlë'ëli'-në' Xanru' Jesús, en ca nadxí'ili' yúgu'të bönachi queë' Dios, ga ridxintë na'a dza ¹⁶ bití' ca' rusana' rea-në' Dios: "Xclenu'", ca naca queë'li'. Røjneda' libí'ili' cate' rulidza-në' Dios. ¹⁷ Rinábida-në' Dios queë' Xanru' Jesucristo, Dios na' náquië' Xúziru' nayëpisëtërë', rinábida-në' isöl-lë'ë Dios Bô' Lá'ayi queë'li', Bô' na' runna yöl-la' réajni' queëru', en rulu'í rë'u ca naca cazë' Dios, para gaca idú ca núnbë'ëru-në'. ¹⁸ Rinábida-në' Dios uzéajni'inë' libí'ili' lu icja ládxí'do'oli' para gaca inözili' ca naca le runru' löza, lë na' bulidzë' libí'ili' para uzí'ili' xibë, en para inözili' ca naca yöl-la' tsahui' que yehua' yubá, le guequi quégaca nupa néquiguequi queë' Dios, ¹⁹ enca' para inözili' cate' xzön naca yöl-la' huáca queë', le rácalen rë'u ni réajlë'ëru' Lë'. Yöl-la' huáca xzön ni naca la' lëbisö na' bulu'e lahui Dios ²⁰ cate' nì' busubanë' Cristo lu yöl-la' guti, en benë' ga gurö'ë cuita lë'ë Lë cazë' ga nayëpisëtërë' nì' yehua' yubá. ²¹ Rinná bé'enë' nupa nì' ta'nná bë', en nupa nì' dë lu në'eguequi, en nupa nì' nadéli'gaca yöl-la' huáca, en nupa nì' nácacaga xan. Cristo nayëpisëtërë' ca yúgu'të nupa nadéli'gaca yöl-la' unná bë' yödžöliö nì, en lu yödžöliö si' za'. ²² Dios budödë' lu në'ë Cristo yúgu'të le dë para inná bé'enë' le, en buzóë' Lë' quégaca bönachi queë' para gáquië' Xanru' lu yúgu'të le nequi queëru'. ²³ Yugu' bönachi queë' Cristo nácacaga ca idütë le naca cazë', atë' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

2

Nuláru' tu' nadxí'inë' Dios rë'u

¹ Dios chibennë' yöl-la' na'bán idú queë'li', sal-la' gúcali' zí'atëlö ca bönni' nátigaca tu' nözi dul-la' nabága'li', en nì'a que dö' biá'ali'. ² Dza nì' benli' lëbisö ca tun bönachi bití' nácacaga tsahui' nacué' yödžöliö nì, en benli' ca gú'uni tu' xihui', nu rinná bë' lu bö'ös, en rugún dxin nupa bití' túngaca ca rnna xtídzë'ë Dios. ³ Lësca' caní gúcaru' yúgu'tëru' rë'u. Benru' ca guzësö ládxí'ru', en ca guyaza ládxí'ru' lu yöl-la' bönáchisö queëru'. Que lë ni na' gubága'ru' dul-la' lahuë' Dios le nun ga gunë' rë'u xíguia' ca gunë' quéguequi ia'zica'rö bönachi. ⁴⁻⁵ Ní'irö cate' nì' nácaru' ca bönni' nátigaca tu' nözi dul-la' gubága'ru', Dios busubanë' rë'u lu yöl-la' guti tsözxön

len Cristo tu' buéchi' ládxë'ë rë'u, en bidxi'ide'enë' rë'u. Nuláli' tu' zoa le buzá' ládxë'ë Dios queéli'. ⁶ Dios busubanë' rë'u tsòzxön len Cristo para gunë' ga cõ'oru' tsòzxön len Lë' ga ni' rinná bë'ë yehua' yubá. ⁷ Caní benë' Dios, en buluí'inë' bönachi si' zá'gaca ca naca yöl-la' tsahui' que le buzá' ládxë'ë queëru', tu' budödë' Jesucristo ni'a queëru', le naca bë' ca nadxi'ide'enë' rë'u. ⁸ Nuláli' tu' zoa le buzá' ládxë'ë Dios queéli' tu' réajlë'ëli' Cristo. Busölë' libí'ili', calëga tu' nacuá' le naca dxi'a benli' libí'ili', pero tu' naca le runsë' Dios. ⁹ Cuntu nu gaca gun ba zxön cuini tu' nulá, tu' cabí nulá nu na' tu' nacuá' le naca dxi'a nun nu na'. ¹⁰ Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácagaca dxi'a, le bucözë' zí'atëlö gunru'.

Rö'ö dxi icja ládxi'do'oru' lahuë' Dios ni'a que le benë' Cristo

¹¹ Gulí'tsójné ca gúcali' zí'atëlö. Gúcali' bönachi izá'a, en que lë ni na' yugu' bönni' judío, bönni' na' ta'chúguie' lu xipëla'gaquie' le naca bë' dá'gaquie' Dios, en nazí' lágaquie' bönni' narugu lu xipëla'gaquie', ta'nnë' nácali' libí'ili' bönni' biti' narugu lu xipëla'gaquie'. ¹² Dza ni' nubíga'li' ga zoë' Cristo. Gúcali' bönni' zí'tu' lógaca bönachi Israel, en biti' buzí'ili' xibé didza' benë' tsutsu Dios, en guzxi' lu në'ë bi gata' quégaca bönachi queë'. Guzóali' yödzölíö ni, biti' zoa le runli' löza, en biti' núnbë'ënilí-në' Dios. ¹³ ¡Na'a, nácali' tuz len Jesucristo! ¡zí'atëlö nubíga'li' libí'ili' zí'tu' ga zoë' Dios, pero na'a nudxíguë'ë Dios libí'ili' gála'sö tu' gútië' Cristo uláz queëru'! ¹⁴ Lë cazë' Cristo runë' ga rö'ö dxi icja ládxi'do'oru' lahuë' Dios. Lë' benë' ga yugu' bönni' judío, en yugu' bönni' zí'tu' bulu'huóáquie' tuz bönachi, en busúlë' yöl-la' rilé le guléaj légaquie' chopló ca tu zö'ö zxön. ¹⁵ Lë ni benë' Cristo cate' gútië' uláz queëru', en gudúë' yugu' xibá, en yugu' le rinná bë' nazúajgaca lu xibá quégaca bönachi judío, ate' chopá cõ' bönachi na', bunë' tuz bönachi cubi, nupa nácagaca tuz len Lë cazë'. Caní benë', en gulequi dxië' yöl-la' rilé na'. ¹⁶ Cate' gútië' Cristo lë'e yaga cruz, busúlë' yöl-la' rilé na', ate' chopá cõ' bönachi na', bunë' légaquie' ca tuz bönachi, en gulequi dxië' icja ládxi'do'gaquie' lahuë' Dios.

¹⁷ Caní guca, buluí'i lahuë' Cristo, en benë' libán que didza' dxi'a ca ribequi dxië' yúgu'të bönachi, libí'ili' na' nácali' bönachi izá'a, en zóali' zí'tu' ga zoë' Dios, enca' bönachi judío nacuá' gála'sö. ¹⁸ Na'a, ni'a que le benë' Cristo, gaca ibíga'ru' lahuë' Xúziru' Dios, tu' zóalenë' Lë cazë' Dios Bõ' Lá'ayi rë'u, sal-la' nácaru' bönachi judío o bönachi izá'a. ¹⁹ Que lë ni na', libí'ili', bönachi izá'a, biti'rö nácali' ca bönachi zí'tu' zóali' tu luyú'biti' nequi queéli', pero nabábalenli' bönachi queë' Dios. ¡Chínacali' ca bi'i queë' cazë' Dios! ²⁰ Libí'ili' nácali' ca tu yu'u zoa tsaz. Nácali' ca yugu' guiöj zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquie' ca guiöj lo que xilibi zö'ö na'. ²¹ Idútë yu'u na' le nácali' libí'i cázali' riyasa lahui xilibi zö'ö na' naca cazë' Cristo, en nacuá' tu'lapa yugu' guiöj que, para gaca tu yudo' lá'ayi le naca tuz len Xanru'. ²² Libí'i cázali' nácali' tuz len Cristo Nu buzóa libí'ili' para gácali' ca tu yu'ó na' na' yu'ë Dios, tu' dzáguë' Dios Bõ' Lá'ayi libí'ili'.

3

Náquie' Pablo huen libán que didza' dxi'a lógaca bönachi izá'a

¹ Que lë ni na', neda', Pablo, yu'a lidxi' guie' tu' runa' libán queë' Jesucristo para uzí'ili' xibë', libí'ili', bönachi izá'a. ² Réquida' chinöz quézili' ca benë' Dios, budödë' lu na'a dxin runa' para uzí'ili' xibë' le ruzá' ládxë'ë queëru'. ³ Dios bulu'e lahui le bigachi' queë', en buzéajni'inë' neda' ca naca. Ca naca lë ni chibuzúaja' láti'do' queéli' lu guichi. ⁴ Cate' ulábali' lë ni, gúnbë'ëli' le réajni'ida' ca naca le bigachi' ca naca queë' Cristo. ⁵ Dza ni'te cuntu nu buzéajni'inë' Dios ca naca le bigachi' na', pero na'a, lu në'ë Dios Bõ' Lá'ayi, chibulu'ë lahui Dios ca naca, tu' buluí'inë' yugu' bönni' gubáz lá'ayi queë', en yugu' bönni' tu'ë didza' uláz queë'. ⁶ Caní rnna lë na' bigachi': "Ni'a que didza' dxi'a ila'deli' bönachi izá'a tsòzxön len bönachi judío le nequi queë' Dios, ate' ulu'huóáquie' ca tuz bönachi, en ulu'z'ie xibë tsòzxön len légaquie' le guzxi' lu në'ë Dios unödzjë' quégaguie' tu' dá'gaquie' Jesucristo." ⁷ Dios buzá' ládxë'ë quia' le bennë' quia'. Lu yöl-la' huáca zxön queë' benë' neda' huen libán que didza' dxi'a queë'. ⁸ Nacra' cá'asó ca yúgu'të bönachi queë' Dios, pero Lë' buzá' ládxë'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'. ⁹ Dios budödë' lu na'a guna' ga iléquibe'e yúgu'të bönachi ca naca le buzóa cazë' Dios dza ni'te, lë na' naca tu le bigachi' queë' Dios, Nu ben yúgu'të le rilé'ëru'. ¹⁰ Caní guca, para iléquibe'e yúgu'të nupa ta'nná bë', en nupa dë lu në'eguequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácagaca bönachi queë' Cristo. ¹¹ Dios benë' lë ni, busudxinë' lë na' buzóa cazë' dza ni'te, le benë' lu në'ë Xanru' Jesucristo. ¹² Tu' nácaru' tuz len Cristo, nazí'iru' lataj ibíga'ru' idú ladxi'ru' lahuë' Dios, tu' réajlë'ëru' Lë'. ¹³ Que lë ni na' ráta'yua' loli' biti' gaca chopá ládxi'li' tu' nözi le riguí' rizáca'a neda' para gácalena' libí'ili', le naca tu le uzí'ili' xibë'.

Ca naca yöl-la' nadxi'i queë' Cristo

¹⁴ ¡Que lë ni na', ruzechu xziba' lahuë' Xuzë' Xanru' Jesucristo! ¹⁵ Ca lë', naz'i ca' lágaca yúgu'të bönachi queë', nupa nacua' yehua' yubá, en nupa nacua' yödžöliö ni. ¹⁶ Rinábida-në' Xúziru' Dios, lu yöl-la' xzön queë', le nazáca'da', gunnë' queë'li' yöl-la' huáca queë' Dios Bō' Lá'ayi, en gunë' ga gálali' lu icja ládxi'do'oli'. ¹⁷ Rinábida-në' Cristo soë' icja ládxi'do'oli' tu' réajlë'ëli' Lë'. Rinábida-në' gunë' ga sóali' tsaz lu yöl-la' nadxí'i queë', en bití' tséaj bō' icja ládxi'do'oli' ca nadxí'ili-në', ¹⁸ para gaca tséajni'ili' tsözxön len yúgu'të bönachi queë' Cristo ca naca yöl-la' nadxí'i queë', tsca ga ridxín ní'lö, en ná'alö, en cadxí'lö, en xitsá'alö. ¹⁹ Rinábida-në' Dios gunë' ga gúnbë'ëli' yöl-la' nadxí'i na', le cabí gaca gúnbë'ëru' idú ca naca, para sóalen libí'ili' idú le naca cazë' Dios.

²⁰ ¡Na'a, yöl-la' ba Dios, Nu gaca gúntërö ca gaca inábaru' o ca gaca sa' ládxi'ru', ugunë' dxin yöl-la' huáca queë' lu icja ládxi'do'oru'! ²¹ ¡Gácatíca'sö queë' Dios yöl-la' ba lógaca bönachi queë' Cristo, en lahuë' Lë' cazë' Jesucristo, na'a dza, en yúgu'të dza zá'gaca! ¡Ca' gaca!

4

Dios Bō' Lá'ayi nunë' rë'u tuz

¹ Na'a, neda' ráta'yua' loli', yu'a lidxi guíë ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'. ² Guli'gaca nōxaj ladxí', en dxi'i ladxí'. Guli'cöz xzön ladxí'. Guli'güi' ladxí' luzá'ali' tuli' ia'tuli' lu yöl-la' nadxí'i queë'li'. ³ Guli'güi' ladxí' gácatíca'sili' tuz ca na' chinunë' Dios Bō' Lá'ayi libí'ili', gunli' caní lu yöl-la' ribōza tsáhui'do' queë'li' le rutsaga libí'ili'.

⁴ Tuz naca idútë le naca cazë' Cristo le nadzágaru' rë'u.

Tuzë' náquië' Dios Bō' Lá'ayi dzáquië' rë'u.

Tuz naca le runru' löza, lë na' bulidzë' rë'u Dios para uzí'iru' xibé.

⁵ Tuzë' náquië' Xanru'.

Tuz le réajlë'ëru'.

Tuz le bidílaru' nisa.

⁶ Tuzë' náquië' Dios Nu naca Xúziru' yúgu'tëru'.

Lë' rinná bé'enë' yúgu'tëru'.

Rugunë' dxin yúgu'tëru'.

Ribōza cazë' Lë' lu icja ládxi'do'oru' yúgu'tëru'.

⁷ Tu turu' nazí'iru' tu yöl-la' huáca queë' Dios tsca naca le bennë' Cristo que queëru'. ⁸ Naca caní ca na' nazúaj lu guichi lá'ayi le rnna:

Buëpë' yehua' yubá, guchë'ë zían bönachi gula'dzúngaca.

Gudisíë' quégaca bönachi le runódzjasë' quégaquië'.

⁹ ¿Bizxi rë'ëni inná lë na' rnna: buëpë'? Rusëdi rë'u bötjë' zí'alö, en bidxinë' yödžöliö cadxí'lö ni. ¹⁰ Nu na' bötaj naca Bönni' na' buëpë' xitsá'tërö ní' yehua' yubá para budzë' yúgu'të len le naca cazë' Lë'. ¹¹ Cristo caz bennë' que queëru' yugu' yöl-la' huáca queë':

Bë' lataj bal-lë' bönni' iláquië' gubáz queë'.

Benë' ga tu'ë didza' uláz queë' Dios ia'bal-lë' bönni'.

Gusöl-lë'ë ia'bal-lë' tsöjéngaquië' libán que didza' dxi'a.

Bucu'ë ia'bal-lë' para ilún chi'ë bönachi queë'.

Bucu'ë ia'bal-lë' para ulu'sëdinë' bönachi queë'.

¹² Cristo caz bupë'ë bönachi queë' caní para gaca ilún xichinë', para ilún ga ilaca idú nupa nácacaga ca idútë le naca cazë' Lë'. ¹³ Caní gaca ga idxintë dza huóácaru' tuz yúgu'tëru' ca réajlë'ëru' Cristo, en ca núnbë'ëru'-në' Zxí'inë' Dios. Gácaru' nál-la, en huóácaru' idú ca náquië' Lë' cazë' Cristo. ¹⁴ Bití'rö gácaru' ca yugu' bí'ido', ca nácacaga nupa na' tu'tsa'të ca túngaca, en nácacaga ca tu le nachë' lu yegu, o ca tu le rōjchë' bití'tës bō' recja, tu' ta'z'í lu nē'eguequi bití'tës didza' nu rusëdi léguequi, nu na' rizi' ye'e léguequi len yöl-la' sina' que, en run ga ta'chixi ta'nigui. ¹⁵ Na'a, rë'u ni, tu' nadxí'iru' luzá'aru', ral-la' güi'iru' didza' le naca idútë li para gaca huóácaru' idú ca náquië' Cristo, en gácaru' tuz len Lë', Nu naca Xani idú le naca cazë', le nácaru' rë'u. ¹⁶ Cristo caz runë' ga rutsaga dxi'a idútë le naca cazë', le nácaru' rë'u, ate' idútë le naca cazë' na' naguela' tsözxön ní'a que lë na' run tuz idútë le naca cazë'. Cate' tu turu' runru' xichinru', rë'u na' dzágaru' le naca cazë', idútë rizxön, en raca idú, ca na' zeaj rácarö idú ca nadxí'iru' luzá'aru'.

Yöl-la' na'bán cubi náparu' tu' nácaru' tuz len Cristo

¹⁷ Uláz queë' Xanru' rea' libí'ili' lë ni, en rigu'a le lu ná'ali', rnní'a: Bití'rö gunli' ca tun nupa bití' núnbë'gaquië' Dios, nupa na' tun ca ta'za'sö ládxi'guequi, ¹⁸ en nachul-la nanitigaca icja ládxi'do'guequi. Tu' cabí nōzguequinë' le nácatë, en nazídigaquië', bití' nazí'gaquië' yöl-la' na'bán na' runnë' Dios queëru'. ¹⁹ Bití' ca' tu'tuf'inë'. Nudödi cuíngaquië' lu le ruá' dö. Idú ládxi'gaquië' tunë' yúgu'të le cabí naca tsahui'. ²⁰ Nupa ní' bulu'sedi libí'ili' ca naca queë' Cristo, bití' ca' bulu'sedi libí'ili' gunli' ca tun bönachi caní. ²¹ Le naca idútë li biyónili' ca naca

queë' Cristo, en le nácali' queë' tu'sédinë' libí'ili' le naca idútë li na' zóalen Jesús. ²² Guli'nná be'e yöl-la' bônáchisö queëli' le gúcali' zí'alö, lë na' riniti ni'a que yöl-la' rizë ladxi' queëli' le ruá' dö' le guzxi' ye'e libí'ili'. ²³ Ral-la' huóacali' cubi lu icja ládxi' do'oli', en lu bö' naca cázali'. ²⁴ Ral-la' sí'ili' yöl-la' bônachi cubi le nunë' Dios ca naca cazë' Lë', le ruluf'i cuini ni'a que le naca dxi'a, en le naca tsahui' runli', en run ga gaca gunli' caní.

²⁵ Que lë ni na', bití'rö si' yë'ëli'. Yúgu'tëru' ral-la' gü'ilenru' luzá'aru' didza' le nácatë, tu' dzágaru' yúgu'tëru' idútë le naca cazë' Cristo.

²⁶ Channö hualéli', bití' ral-la' gunli' dul-la'. Bití' ileli' xidzé. ²⁷ Bití' bi gunli' le gü'í lataj tu' xihui' ucúl-la libí'ili'.

²⁸ Nu bönni' ribanë' ral-la' usanë' yöl-la' gubán queë', en tsázië' huen dxin para gata' queë' bi unödzjë' quégaca nupa ta'yadzaj.

²⁹ Bití' gü'íli' didza' xihui', pero guli'güf' didza' dxi'a, yugu' le ilácalen nu yöni, en ilún ga gaca dxi'a que nu na'. ³⁰ Bití' usuhu'í'ni'li' Dios Bö' Lá'ayi, tu' naca bë' néquili' queë' Dios tu' zóalenë' Dios Bö' Lá'ayi libí'ili', ate' idxín dza údxi usölë' libí'ili' lu dul-la'.

³¹ Guli'cúa ladaj libí'ili' yöl-la' ruzxë'e, en yöl-la' ridzá'a, en yöl-la' rilë, en yöl-la' ridil-la didza', en yöl-la' rutsaga yudxi, en yúgu'të yöl-la' bití' rilë'e luzá'ali' dxi'a.

³² Ral-la' gácali' dxi'i ladxi', en huéchi' ládxi'li' luzá'ali' tuli' ia'tuli', en uniti loli' luzá'ali' tuli' ia'tuli', ca na' benë' Dios, buniti lahuë' libí'ili' tu' nácali' tuz len Cristo.

5

Ca ral-la' ilaca nupa nácgaca ca bi'i queë cazë' Dios

¹ Tu' nácali' ca bi'i queë cazë' Dios, ate' nadxf'inë' libí'ili', guli'güf' ladxi' gácali' ca náquië' Lë'. ² Ca naca yúgu'të le runli':

Ral-la' idxí'ili' luzá'ali' ca na' benë' Cristo.

Bidxí'inë' rë'u, en budödi cuinë' lu yöl-la' guti uláz queëru'.

Ben cuinë' ca böa' bédxido' rútiru'-ba' lahuë' Dios tu' nözi dul-la' nabága'ru'.

Gúquië' ca' ca tu le rilá' zxxi le raza ládxë'ë Dios le rigú'uru' lu bucugu lá'ayi queë'.

³ Tu' nácali' queë' Dios, bití' ca' gunli' le ruá' dö', en bití' gunli' le cabí ral-la' gunli', en bití' uhuídi'li'. Ní'irö cuntú nu gaca bi innë queëli'.

⁴ Bití' gü'íli' didza' xihui', o didza' canöz, o didza' cá'asö, yugu' le cabí ral-la' gunli',

pero nácarö dxi'a guíëli'-në' Dios: "Xclenu'."

⁵ Chinöz quézili' nitué' bönni' runë' le ruá' dö' bití' ca' tsázië' ga rinná bë'ë Cristo tsözxön len Dios, o nu bönni' runë' le cabí ral-la' gunë', o nu bönni' ruhuídi'në'. Nu na' ruhuídi' naca ca nu reaj ladxi' budó' guiöj budó' yaga. ⁶ Bití' gü'íli' lataj nu si' ye'e libí'ili' len didza' bití' nácatë. Tu' nözi dul-la' caní Dios gunë' xíguia' nupa bití' túngaca ca rnna xtídzë'ë. ⁷ Bití' ca' gunli' tuz bônachi caní.

⁸ Zí'atëlö guzóali' ga naca chul-la' que dul-la', pero na'a zóali' lu bení', tu' nácali' tuz len Xanru'. Guli'gaca ca bônachi ta'dá lu bení', ⁹ tu' run bení' na' ga gácaru' dxi'i ladxi', en ga gü'iru' didza' le naca idútë li, en ga gácaru' tsahui'. ¹⁰ Guli'güf' ladxi' inózili' le raza ládxë'ë Xanru'. ¹¹ Bití' gütsa'li' nupa tun le ruá' dö', lë na' tunë' ga naca chul-la' que dul-la', pero buli'bëaj ga liná' yugu' lë na' tunë'. ¹² Utuf'iru' gü'iru' didza' ca naca le tun bônachi na' bagáchi'sö. ¹³ Cate' bi ubëajru' ga liná', gaca bë' yúgu'të tscá nácgaca, tu' gun le naca bení' ga gaca bë' yúgu'të. ¹⁴ Que lë ni na' nazúaj lu guichi lë na' rnna:

Bubán, li' na' rasiu'.

Guyasa ladaj nupa nátigaca.

Cristo uzení'ë quiu'.

¹⁵ Buli'yú cuinli' ca runli'. Bití' gácali' nupa bití' ta'yéajni'ini, pero guli'gaca bônachi ta'yéajni'i. ¹⁶ Guli'sí' xibë lataj dë queëli' tu' chizóaru' dza bití' raca dxi'a queëru'. ¹⁷ Bití' gácali' bönni' bití' bi nözguequinë'. Guli'güf' ladxi' tséajni'ili' le rë'ënë' Xanru' gunli'.

¹⁸ Bití' súdxili', tu' gun yöl-la' rizudxi ga nítili' tsaz.

Guli'güf'ida' lataj inná bé'enë' Dios Bö' Lá'ayi libí'ili'.

¹⁹ Guli'güf'ilen luzá'ali' didza' tuli' ia'tuli',
ugunli' dxin yugu' le rul-la légaca salmo,
en yugu' le rul-la yöl-la' ba Dios,
en yugu' le rul-la nagu'ë Dios Bô' Lá'ayi icja ládxi'do'oru'.
Idú ládxi'ru' ral-la' gúl-laru' queë',
le cú'uru'-në' Dios yöl-la' ba.

²⁰ Guli'gún dxin Lë' Xanru' Jesucristo,
en guli'guíetica'së' Xúziru' Dios: "Xclenu'" ca naca yúgu'të.

Ca ral-la' gunru' quégaca di'a dza queëru'

²¹ Guli'gún ca rnna xtídza' luzá'ali' tuli' ia'tuli' para caní gunli'-në' Dios zxön.

²² Libí'ili', yugu' nigula, guli'gún ca rnna xtídza'gaquië' bönni' que queëli', ca na' ral-la' gunli' ca rnna xtídze'ë Xanru'. ²³ Caní ral-la' gunli', tu' rinná bé'enë' bönni' nigula queë' ca na' runë' Cristo, rinná bé'enë' bönachi queë'. Cristo náquië' ca' Nu rusólá bönachi queë', nupa na' dzágagaca le naca cazë' Lë'. ²⁴ Ca na' tun bönachi queë' Cristo ca rnna xtídze'ë, lësca' caní ral-la' ilunnu nigula ca rnna xtídza'gaquië' bönni' que queëgacan u' ca naca yúgu'të le raca.

²⁵ Libí'ili', yugu' bönni', ral-la' idxí'ili'-nu nigula que queëli' ca na' Cristo nadxí'inë' bönachi queë', en budödi cuinë', gútië' uláz quégaquië'. ²⁶ Gútië' Cristo para bubéajë' quez queë' Dios bönachi queë' na', ate' nayárigaca tu lu nisa le naca xtídze'ë. ²⁷ Gútië' uláz quégaquië' para gaca usudxinë' légaquië' lahuë' Dios, nácagaquië' ca tu lari' lachi, bití' nuá' bösaj le në'aj, en bití' naxú'una, en bití' zoa nitú le run ditaj le, pero runë' ga ilácagaquië' idú dxi'a, cuntú nu gaca bi innë' quégaquië'. ²⁸ Ral-la' idxí'ili'-nu nigula que queëli' ca na' nadxí'i cuinli'. Nu bönni' nadxí'inë'-nu nigula queë', nadxí'i cuinë'. ²⁹ Cuntú nu bönni' runí zì' cuinë', pero rugahuë', en run chi' cuinë', ca runë' ca' Cristo, ca rúnlenë' bönachi queë', ³⁰ nupa dzágagaca idütë le naca cazë'.

¡Rë'u ni dzágaru' le naca cazë' Lë'!

¡Ñequiniru' xipélë'ë, en dxita queë'!

³¹ Lësca' caní nazúaj lu guichi lá'ayi le rnna: "Que lë ni na' tu bönni' ral-la' ucá'anë' xuz xinë'ë para tsöjsóalenë'-nu nigula queë', ate' irópatë' ulu'huóáquië' tuz." ³² Lë na' nazúaj lu guichi ni rulufí lahui tu le naca idütë li, ate' neda' réquida' ruí' didza' ca' ca naca queë' Cristo, en quégaca bönachi queë' na'. ³³ Lësca' ruí' didza' ca naca queëli'. Yúgu'tëli' libí'ili', bönni', ral-la' idxí'ili'-nu nigula que queëli' ca na' nadxí'i cuinli', ate' yugu' nigula ral-la' ilunnu bal bönni' que queëgacan u'.

6

¹ Libí'ili', yugu' bí'ido', ral-la' gunli' ca rnna xtídza'gaquië' xuz xiná'ali' para caní gunli' ca rnna xtídze'ë Xanru'. Ral-la' gunli' le naca tsahui'. ² Xibá zí'aló na' benë' Dios le nachë' tu le guzxi' lu në'ë gunë', naca lë na' rnna: "Ben bal xuz xinó'o, ³ ate' gaca dxi'a quiu', ate' xidzé su' ibanu' yödölió ni."

⁴ Libí'ili', yugu' xuz, bití' gun leli' xzí'inili', pero buli'xön légacabi', en guli'sína' légacabi', en buli'sëdi légacabi' ca raza ládxe'ë Xanru'.

⁵ Libí'ili', núlöli' nácali' bönni' nadó'ogaca, guli'gún ca rnna xtídza'gaquië' xanli' luyú ni idú ládxi'li', gunli' légaquië' bal lu yöl-la' radxi queëli', en gunli' xichíngaquië' ca ral-la' gunli' xichinë' Cristo. ⁶ Guli'gún xichíngaquië', calégasö cate' ni' tu'yúë' libí'ili' para urúajli' dxi'a lógaquië', pero idú ládxi'li' guli'gún xichíngaquië' ca raza ládxe'ë Dios, ca na' ral-la' gunli' xichinë' Cristo. ⁷ Idú ládxi'li' guli'gún xichíngaquië', ate' caní gaca, gunli' xichinë' Xanru', en calégasö xichíngaca bönachi. ⁸ Nöz quézili' ca gunë' Xanru'. Ubi'ë que queëru' tsca naca le dxi'a runru' sal-la' nadzanru', o sal-la' nácaru' bönni' nadó'ogacië'.

⁹ Libí'ili', nacua' queëli' bönni' nadó'ogaca, guli'gún dxi'a caní quégaca huen dxin queëli' na', en bití' uzéli' ba nadx légaquië'. Guli'tsöjnë ca naca queëli', yú'uli' lu në'ë Xanru' zoë' yehua' yubá la' ca nácatë quégaquië', ate' Lë' bití' rutsë'ë ca runë' que que bönachi.

Dios runnë' queëru' le tun chi'i rë'u

¹⁰ Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queë'. ¹¹ Guli'gún chi'i cuinli', ugunli' dxin yugu' le runnë' Dios queëru', le tun chi'i rë'u, para gaca sóali' tsutsu cate' guë'ëni si' bë' tu' xihui' libí'ili'. ¹² Bití' ridí-lalenru' bönachi néquiguequini bëla', en dxita, pero ridí-lalenru' yöl-la' unná bë' quégaca bô' xihui' ta'dá lu bö'ös, en dzágagaca nupa ta'nná bë', en nupa nadéli'gaca yöl-la' unná bë', en nupa dë lu ná'agaca, nupa nacua' yödölió ni ga naca chul-la que chul-la'. ¹³ Que lë ni na':

Guli'sí' yúgu'të le runnë' queëru' Dios le tun chi'i rë'u,
para cate' idxín queëru' dza ni' ilaca le nácagaca xihui',
gaca guá' ilenli',
en cate' údxi gunli' caní, ugá'anali' tsutsu.

¹⁴ Guli'sóa tsutsu.

Guli'sí' le naca idútê li,

le gaca queéli' ca tu guídi guga' lě'eli'.

Guli'gaca tsahui' tu' gun chi'i libí'ili' le naca tsahui'

ca run tu lari' yōdx run chi'i luchu'ē bōnni' rejē' gudil-la.

¹⁵ Guli'sóa sina' para gunli' libán que didza' dxi'a

le ribequi dxi icja lādxi'do'oru' lahuē' Dios,

ca na' ruzóa cuinē' sina',

en ridē'ē xiráchuē' tu bōnni' rejē' gudil-la.

¹⁶ Le naca lo, yōl-la' réajlě' queéli' Cristo

gaca queéli' ca tu le naca tsutsu uzēli' loli',

para cabí gál-la' yugu' le usán tu' xihui' libí'ili',

le nácagaca ca yaga tuchi'do' zoa guí' láhuilōguequi.

¹⁷ Yōl-la' rusólá gaca queéli' ca tu lu'u guíē le gun chi'i ícjali'.

Xtídzē'ē Dios gaca queéli' ca tu guíē tuchi'

le runnē' Dios Bō' Lá'ayi queēru',

para utíl-lalenru' le naca xihui'.

¹⁸ Guli'gún yúgu'tē lē ni,

en buli'lidzē' Dios inábili'-nē' gácalenē' libí'ili'.

Buli'lidzatica'sē' Dios zóalenē' Dios Bō' Lá'ayi libí'ili'.

Para gunli' caní ral-la' usubán lādxi'li' en cabí huōaj lādxi'li',

inábili'-nē' Dios gácalenē' nupa néquiguequi queē'.

¹⁹ Buli'lidzē' Dios, inábili'-nē' gácalenē' ca neda', en gunnē' quia' didza' cate' ral-la' gu'a

didza', en gunē' ga gaca' rugu lādxi' cate' guna' libán para uzéajni'ida' bōnachi ca naca le

bigachi' que didza' dxi'a. ²⁰ Dios budödē' lu na'a didza' dxi'a na' para guna' libán que, ate'

tu' bena' caní yu'a lidxi guíē ni. Buli'lidzē' Dios channō, inábili'-nē' gunē' ga gaca' rugu lādxi'

para guna' libán que didza' dxi'a ca ral-la' guna'.

Ruúdx didza' bē'ē Pablo

²¹ Tíquico, bōchi'ru' na' nadxí'iru'-nē', en runē' xichinē' Xanru' idú lādxē'ē, quíxjöi'inē'

libí'ili' idú ca raca quia', en ca runa' neda' ni. ²² Que lē ni na', isöl-la'a-nē' queéli', ate'

uluf'inē' libí'ili' ca raca queétu', ate' caní utipē' lādxi'li'.

²³ Rinábida'-nē' Xúziru' Dios, enca' Xanru' Jesucristo gunē' ga soa dxi icja lādxi'do'oli', en

gata' queéli' yōl-la' nadxí'i le dzaga yōl-la' réajlě' queéli' Cristo, yúgu'tēli' na' néquili' queē'.

²⁴ Le ruzá' lādxē'ē Dios queēru' gaca queéli', yúgu'tēli' na' nadxí'ili'-nē' Xanru' Jesucristo,

naca idú yōl-la' nadxí'i queéli' Lē'. ¡Ca' gaca!

DIDZA' GUSÖL-LĚ Ě PABLO YÖDZÖ FILIPOS

Pablo rugapě' Dios bönachi queě' Cristo nacua' Filipos

¹ Neda', Pablo, enca' bi'i Timoteo, nactu' huen dxin queě' Jesucristo. Rugapa' Dios libí'ili', réajlě'eli' Cristo, en libí'ili', dē lu ná'ali' xichině' Cristo, en libí'ili', run chí'ili' bönachi queě' Cristo. Zóali' Filipos, en néquili' queě' Dios, en nácali' tuz len Jesucristo. ² Rinábida-ně' Xúziru' Dios, enca' Xanru' Jesucristo gunnē' queéli' le ruzá' ládxě'ě queėru', en gunē' ga soa dxi icja ládxí'do'oli'.

Pablo rinábině' Dios bi guně' quégaca bönachi ta'yéajlě' Cristo

³ Rea-ně' Dios: "Xclenu", cate' rizá' ládxa'a queéli'. ⁴ Cate' rulidza'-ně' Dios, en rinábida-ně' gácaleně' libí'ili', rudzeja ládxa'a ⁵ tu' rōjneda' ca bēnleni' neda' tsōzxōn dxin que didza' dxi'a. Gusí loli' runli' dxin na' dza ni' si' biyōnili', en runli' le ga ridxintē na'a dza. ⁶ Dios gusí lahuē' runē' tu le naca dxi'a lu icja ládxí'do'oli'. Ruzxōni ládxa'a Lě' gúntica'sē' caní ga idxintē dza huōdē' Jesucristo. ⁷ Ca na' rizá' ládxa'a queéli' naca ca ral-la' guna' tu' nadxí'ide'eda' libí'ili'. Yúgu'tēli' ruzí'ili' xibē tsōzxōn len neda' le ruzá' ládxě'ě Dios queėru', tsanni ni yu'a lidxi guíē, en lēasca' caní benli' cate' ni' bē'a didza', cate' na' bena' libán que didza' dxi'a le bena' ga bidxín queéli' tsaz. ⁸ Nōzině' Dios ca nadxí'ide'eda' libí'ili'. Naca ca na' nadxí'ide'eně' Lě' cazē' Jesucristo rē'u. ⁹ Rinábida-ně' Dios gunē' ga idxí'rōli' luzá'ali', en gáta'da' queéli' yōl-la' rácada', en yōl-la' réajini' idú ¹⁰ para gaca cōli' le nácatērō dxi'a. Channō gaca caní queéli', gácali' idú dxi'a, ate' cuntú nu gaca bi innē queéli' dza ni' huōdē' Cristo. ¹¹ Le nácali' naca bē' le naca dxi'a runē' Cristo lu icja ládxí'do'oli' para ilá' lahui yōl-la' zxōn queě' Dios, en gaca queě' yōl-la' ba.

Zóaru' nabanru' para gácaru' ca náquiē' Cristo

¹² Bōchi' luzá'ado', rē'ēnda' inōzili' lē ni: Yúgu'tē le guca quia' gulácalen neda' para guzxéqui'rōda' bena' libán que didza' dxi'a. ¹³ Caní guca, yúgu'tē ni'a ná'agaquiē' bōnni' yúlahui', en ia'zica'rē' bōnni' ni nōzguequinē' yu'a lidxi guíē ni tu' runa' xichině' Cristo. ¹⁴ Tu' yu'a neda' lidxi guíē ni ben ga látu'biqiu' yúgu'tē bōchi'ru' nácagacarē' rugu ladxí', ate' tu'zxōni ládxí'gaquiē' Xanru', en bítirō tádxinē' tunē' libán que xtídzē'ě Dios.

¹⁵ Le nácatē bal-lē' tunē' libán queě' Cristo tu' tu'zxé'eně' neda', en ta'dil-lē', pero ia'bal-lē' tunē' libán queě' idú ládxí'gaquiē'. ¹⁶ Yugu' bōnni' tu'zxé'eně' na' tunē' libán queě' Cristo lu yōl-la' run ba zxōn cuíngaqiē', en calēga idú ládxí'gaquiē'. Tē'ēnnē' ulu'saca' zī'ē neda' tsanni ni yu'a lidxi guíē. ¹⁷ Yugu' bōnni' idú ládxí'gaquiē' na', lu yōl-la' nadxí' quégaguiē' tunē' libán queě', tu' nōzguequinē' Dios caz budōdē' lu na'a dxin runa', runa' libán que didza' dxi'a. ¹⁸ Bítirō run lē na' ga rō'a bōniga. Rudzéjada' tu' raca libán queě' Cristo nácatitēs, sal-la' tunē' libán idú ládxí'gaquiē' o bítirō tunē' le caní.

Na'a, rudzéjarōda' ¹⁹ tu' chinōzida' ulá' lu le raca quia', yu'a lidxi guíē ni, tu' rulídzali-ně' Dios, en tu' rácaleně' Dios Bō' Lá'ayi neda'. Náquiē' Bō' risól-lē'ě Jesucristo queėru'. ²⁰ Caní rē'ēnda', en ruzxōni ládxa'a-ně' Dios, gunē' ga bítirō utuí'ida', en gunē' ga gaca gu'a didza' lu yōl-la' rugu ladxí', ate' lu na'a neda' gácatica'sō yōl-la' ba queě' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. ²¹ Ca runi neda', channō zoa' nabana', naca para gaca' ca náquiē' Cristo, en channō gátia', naca tu le uzí'ira' xibē. ²² Channō huáca guna' dxin le gácalen didza' dxi'a queě' Cristo channō sōasa' ibana', bítirō nōzda' bízxilō ral-la' cōa'. ²³ Naca bōniga cōa'. Rē'ēnda' gátitea' para tsōjsóalentea-ně' Cristo, tu' gácatērō dxi'a quia', ²⁴ pero runrō bayudxi sōasa' ibana' para séqui'da' gácalena' libí'ili'. ²⁵ Tu' chinōzida' naca caní, nōzda' ca' ugá'analeña' libí'ili' para gácalena' libí'ili' para gácarō idú ca réajlě'eli' Cristo, ate' udzéjarōli' tu' réajlě'eli' Lě'. ²⁶ Caní naca, udusóalena' libí'ili' leyúbolō, le gun ga tsaz ládxí'li'-ně' Jesucristo ni'a que le gunē', gácaleně' neda'.

²⁷ Gulí'gúf'sō ladxí' gácali' ca sa'yéaj didza' dxi'a queě' Cristo. Caní gaca, channō uduyúa' libí'ili' o channō soa' zī' tu', huayónida' nácali' tsutsu, en nácali' tuz, runli' tsōzxōn dxin que le réajlě'ėru' le za' queėru' ni'a que didza' dxi'a. ²⁸ Bítirō gúf'ili' nupa bítirō ta'lé'e libí'ili' dxi'a lataj ilún gadxi libí'ili'. Lē ni uluf'i légaquiē' ila'nítie', pero uláli' libí'ili', le gaca bē' rácaleně' Dios caz libí'ili'. ²⁹ Dios ru'e libí'ili' lataj gunli' xichině' Cristo, calēgasō ca réajlě'eli' Lě', pero lēasca' ca riguí' rizáca'li' cate' runli' xichinē'. ³⁰ Na'a, gaca gunli' neda' tsōzxōn gúf'i ládxí'ru' gunru' libán que didza' dxi'a. Bilé'e quézili' ca gudí'i guzáca'a cate' bena' caní zī'alō, ate' riyōnili' ca riguí' rizáca'a ca' na'a.

2

Gúquiē' Cristo nōxaj ladxí', ate' bidéli'ně' yōl-la' zxōn

¹ Cristo runë' ga rutipa lădxî'li',
en lu yôl-la' nădxî'i queë' ruhuéchi' lădxë'ë libî'ili',
en runë' ga năcali' tuz len Dios Bô' Lă'ayi,
en ga nădxî'ili' luză'ali',
en ga ruhuéchi' lădxî'li' luză'ali' tuli' ia'tuli'.

² Na'a guli'gún ga udzējārō lădxa'a. Para gunli' caní, ral-la' gácali' tuz len luză'ali', en gaca lēbisō ca nădxî'ili' luză'ali' tuli' ia'tuli'. Lēšca' caní ral-la' gácali' tuz lu bō' naca cázali', en ca rizá' lădxî'li'. ³ Ca naca le runli', biti' bi ral-la' gunli' lu yôl-la' rudul-li' queēli', o para gun ba xzōn cuinli', pero dxi'ado' ral-la' gunli' yúgu'tē, en cabí guéquil' nadéli'rōli' libî'ili' ca luză'ali'. ⁴ Guli'gúf lădxi' gaca dxi'a ca' que luză'ali', en calēga queēzili'.

⁵ Ral-la' gácali' nōxaj lădxi' ca na' gúquiē' Jesucristo nōxaj lădxi'. ⁶ Lē' naca cazē' lēbisō ca náquiē' Dios caz, pero biti' gúquinē' ral-la' gunē' bayudxi ugá'anē' lēbisō ca na' náquiē' Dios. ⁷ Bucá'ana cazē' yúgu'tē le napē', en ben cuinē' ca tu bōnni' nadō'o. Guljē' ca talaj bōnachi, en gúquiē' idú bōnachi. ⁸ Cate' nī' náquiē' bōnni', gúquiē' nōxaj lădxi', en benē' ca rnna xtídzē' Dios, en gútiē'. Gudē' lē'e yaga cruz ca na' raca queē' nu bōnni' nabáguē'ē dul-la'. ⁹ Que lē ni na' Dios buchisē' Lē', en benē' ga náquiē' lo nī' yehua' yubá, en benē' ga lē' tu le năcatērō lo ca yúgu'tē lăgaca bōnachi. ¹⁰ Caní benē' Dios para cate' ila'yōni ca na' lē' Jesús, ulu'zechu xzibigaca yúgu'tē nupa nacuá' yehua' yubá, en lu yōdzōliō, en lu lataj chul-la. ¹¹ Yúgu'tē ila'guíxjō'ē yálajdo' Jesucristo náquiē' Xanru' para gaca yôl-la' ba queē' Xúziru' Dios.

Ral-la' gácaru' ca tu le ta'gú'u bení' yōdzōliō ni

¹² Que lē ni na', bōchi' luză'ado', ca na' benli' ca rnna xtídză'a cate' nī' zóalena' libî'ili', runrō bayudxi gunli' ca rnna xtídză'a na'a, tsanni ni zoa' zī'tu' ga zóali'. Guli'gún xichinē' Xanru' ga idxintē dza údxi usōlē' libî'ili'. Guli'gún caní lu yôl-la' radxi queēli' Lē', en lu yôl-la' rixxizi. ¹³ Lē' cazē' Dios runē' dxin lu icja lădxî'do'oli'. Runē' ga rē'ēnili' gunli' le raza lădxē'ē Lē', en runē' ca' ga séqui'li' gunli' lē na'.

¹⁴ Guli'gún yúgu'tē le ral-la' gunli', en biti' bi innēli' que, en biti' til-la dídza'li'. ¹⁵ Caní ral-la' gunli', para cabí gaca nu bi innē queēli', pero caní gácali' ca xzî'ini cazē' Dios, năcali' idú dxi'a yōdzōliō ga ni zóali' ladaj bōnachi biti' năcagaca tsahui', en nucă'anagaca Dios. Libî'ili' rigú'uli' bení' lădjagaquiē' ca na' ta'gú'u bení' bōlaj lúzixba cate' nī' naca chul-la, ¹⁶ cate' ruí'ili' lōgaquiē' didza' ibániguequinē'. Channō caní gunli', huacă udzējade'eda' nī'a que le naca cázali' dza huōdē' Cristo, tu' inōzda' biti' guca nítisō guzóa bōnadxi gátia', en calēga nítisō bena' dxin. ¹⁷ Yôl-la' réajlē' queēli' Cristo naca tu le raza lădxē'ē Dios. Sal-la' gun bayudxi gátia' para gaca idú yôl-la' réajlē' queēli' Lē', udzējada', en uzí'lēna' xibē tsōzxōn yúgu'tēli'. ¹⁸ Lēšca' caní ral-la' udzējali' libî'ili', en uzí'lēni' tsōzxōn neda' xibē.

Ca tunbi' bi'i Timoteo, en bi'i Epafrodito

¹⁹ Channō caní rē'ēnē' Xanru' Jesús, runa' lōza isōl-la'tea'-bi' bi'i Timoteo ga zóali', ate' nī'irō udzējada' cate' huōdabi' ududíxjō'ibi' neda' catēze raca queēli'. ²⁰ Túzibi' lēbi' rizá' lădxî'bi' ca na' rizá' lădxa'a neda', en ruí'ida' lădxî'bi' libî'ili'. ²¹ Yúgu'tē bōnni' ia'zica'rō, le naca quegacasē' tuí' lădxî'gaquiē'. Biti' tuí' lădxî'gaquiē' xichinē' Cristo. ²² Nōz quezili' ca benbi' bi'i Timoteo, ca na' burúajbi' dxi'a. Bénlenbi' neda' tsōzxōn dxin que didza' dxi'a, ate' năcabi' quia' ca tubi' bi'i bōnni' rúnlenbi'-nē' tsōzxōn xúzibi' dxin. ²³ Isōl-la'-a-bi' bi'i Timoteo ga zóali' cate' inōzda' nacxi gaca quia' nī' ²⁴ sal-la' ruzxōni lădxa'a-nē' Xanru' gunē' ga uduyútea' libî'ili'.

²⁵ Lēšca' réquida' run bayudxi isōl-la'-a-bi' bfi' bōchi'ru' Epafrodito ga zóali'. Bi'i ni bénlenbi' neda' tsōzxōn dxin queē' Cristo, ate' gudíl-lalentu' tu' xihui'. Libî' cázali' gusōl-la'li'-bi' ga zoa' para gácalenbi' neda'. ²⁶ Lē cázabi' rē'ēnibi' uduyúbi' libî'ili', en ruí'ida' lădxî'bi' libî'ili' tu' biyōnili' ben bayá' queēbi'. ²⁷ Le năcatē gúf'ibi', en guquí gátibi', pero buéchi' lădxē'ē-bi' Dios, en calēgasō lēbi', pero buéchi' lădxē'ē ca neda', para cabí isēbirō lădxa'a ca na' risēbi lădxa'a na'a. ²⁸ Que lē ni na', gú'unirōda' isōl-la'-a-bi' queēli' para gaca udzējali' leyúbōlō cate' ulē'eli'-bi', en bitirō isēbi lădxa'a neda'. ²⁹ Guli'sí' lu ná'alí' lēbi' lu yôl-la' rudzeja queēli', tu' năcabi' bi'i bōchi'ru' réajlē'ēbi' Cristo. Guli'gún bal yúgu'tē bōnachi năcagaca ca năcabi' lēbi', ³⁰ tu' guzóa bōnadxi queēbi' gátibi' tu' benbi' xichinē' Cristo, en tu' gúcalenbi' neda' uláz queēli'.

3

Le naca idú tsahui'

¹ Na'a, bōchi' luză'ado', buli'dzeja tu' năcali' tuz len Xanru'! Biti' rupizxaj neda' uzúaja' queēli' leyúbōlō lē na' buzúaja' queēli' zí'alō, tu' gácalen lē ni libî'ili'. ² Guli'gún chi'i cuinli' lōgaca nupa nī' tuá' dō'. Năcagaca ca yugu' bō'cu' sínia', nupa na' tun bayudxi irugu lu xipēla'gaquiē' bōnni' le naca bē' nazí' lu ná'gaquiē' xtídzē'ē Dios. ³ Rē'u nadéli'ru' lē na' naca idútē li, le naca bē' nazí' lu ná'aru' le runnē' queēru' Dios. Tu' réajlē'ēru' Dios, zóalēnē'

Dios Bö' Lá'ayi rë'u, ate' rudzéjaru' tu' nácaru' tuz len Jesucristo. Biti' ca' ruzxóni ládxi'ru' tu' le runru' rásos' queëru'. ⁴ Lá'tu' ruzxóni ládxi'ru' lë ni, lësca' neda' chinadéli'da' bi uzxóni ládxa'a. Channö zoë' nu bönni' réquinë' ulë' tu' nacua' le nunë', neda' nadéli'röda' ca bönni' na'.

⁵ Gurugu lu xipëla'a lë na' naca bë' cate' ni' gúquida' xunu' dza.

Gulja' ladaj di'a dza quégaca bönachi Israel.

Nababa' xxi'ini xi'sóë' Benjamín.

Xuz xiná'a nácaquie' idú bönachi hebreo.

Guca' bönni' yudo' fariseo ca na' bena' ca rinná bë' xibá queë' Dios.

⁶ Bë'da' ládxa'a xibá na' ga bidxintë gudxía ládxa'a bönachi queë' Cristo.

Tsca gaca gáquie' tsahui' tu bönni' tu' runë' ca rinná bë' xibá na', cantu nu bi guca innë' quia'.

⁷ Na'a, yúgu'të lë na' bena' xzön zí'alö, nuzóa' tsölá'alö tu' néquida' queë' Cristo. ⁸ Calégasö yugu' lë na', pero nuzóa' ca' tsölá'alö yúgu'të le dë, para gaca gúnbe'eda-në' Xanru' Jesucristo, le nácatërö lesaca' ca yúgu'të lë na'. Para gúnbe'eda' Lë' gurú'una' ní'llö yúgu'të, en réquida' naca ca bëbu, para uzi'a xibë' Cristo, ⁹ en para gaca' tuz len Lë'. Nuhuóaca' tsahui', calëga tu' runa' ca rinná bë' xibá na', pero Dios caz bunë' neda' tsahui' tu' réajlë'a Cristo, ca na' ruünë' tsahui' yúgu'të nupa ta'yéajlë' Lë'. ¹⁰ Rë'ënisida' gúnbë'a-në' Cristo, en sóalen yöl-la' huáca queë' Dios neda', lë na' busubán Cristo lu yöl-la' guti, ate' guna' Lë' tsözxön, qui'i saca'a ca na' gudfi' guzxáque'ë Lë', en soa' sina' gátia' ca gútië' Lë', ¹¹ tu' runa' löza Dios, usubanë' ca' neda' lu yöl-la' guti.

Le runru' para idxinru' xilátjaru'

¹² Biti' rnnia' chinadéli'da' yúgu'të lë ni gunnë' quia', en biti' réquida' chinaca' idú tsahui'. Na'a, runa' bayudxi idéli'da' yúgu'të lë na', tu' chibidéli'në' Jesucristo neda'. ¹³ Böchi' luzá'ado', biti' ca' nadéli'da' yugu' lë ni, pero tuz le runa' bayudxi. Ruzál-la' ládxa'a le chibidéli'da', ate' runa' bayudxi idéli'da' le za'. ¹⁴ Runa' ca runë' tu bönni' rixiti'dë'ë para idxinë' xilatjë' para idéli'në' tu le uzi'ë xibé. Caní runa' para idéli'da' lë na' bulidzë' Dios rë'u para gata' queëru' ni' yehua' yubá tu' nácaru' tuz len Jesucristo.

¹⁵ Caní ral-la' gunru' yúgu'tëru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida-në' Dios uzéajni'inë' libí'ili'. ¹⁶ Na'a, ca naca lë na' bídéli'ru', ral-la' gúntica'siru' caní.

¹⁷ Böchi' luzá'ado', guli'gún ca na' runa' neda'. Chibuluf'itu' libí'ili' ca ral-la' gunli'. Buli'yú ca tun nupa na' tun ca na' bentu' netu'. ¹⁸ Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxí quia', rnnia': Le tunë' zían bönni' run ga nácaquie' ca nupa biti' tal'é Cristo dxi'a, tu' tu'zöë' tsölá'alö le ben cazë' Lë' lë'e yaga cruz. ¹⁹ Yugu' bönni' tunë' caní, tsöjiqué' lu guf' gabila, tu' naca le ta'zësö ládxi'gaquie' dios quégauque', ate' tun ba xzön cuíngaquie' ni'a que lë na' ral-la' gun ga ulu'tu'inë'. Tufi' ládxi'së le dë yödözölö ni, ²⁰ pero rë'u ni ru'fi' ládxi'ru' le dë yehua' yubá ga nabábaru', en ribözaru' dza huödë' Xanru' Jesucristo, Nu rusölá rë'u, urúajë' yehua' yubá na'. ²¹ Lë' utsë'ë idútë le naca cázaru', le riniti caz, en gunë' ga huódca ca naca idútë le naca cazë' Lë', le sóatica'sö. Caní gunë' len yöl-la' huáca xzön queë' le ugunë' dxin para inná bé'enë' yúgu'të.

4

Ral-la' udzëjalentica'siru'-në' Xanru'

¹ Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxi'ide'eda' libí'ili', en rë'ënda' uduyú'a libí'ili'. Runli' ga rudzëjada', en nácali' ca tu le ruzi'a xibé.

² Libí'ili', Evodia, en Sintique, ráta'yua' loli' gácali' tuz ca ral-la' ilaca nupa néquiquequi queë' Xanru'. ³ Na'a, bócha'a idú, rë'ënda' gácalenu' iropanu ni, tu' gulúnlennu neda' dxin, cate' buntu libán que bídca' dxi'a. Lësca' bulu'dzáguie' Clemente, en ia'zica'rë' luzá'a na' netu'. Chinazúajgaca lágaquie' yehua' yubá ga na' nazúajgaca lágaca nupa chinadéli'gaca yöl-la' na'bán idú.

⁴ Buli'dzëjalentica'sö-në' Xanru'!

Leyúbölö, rnnia': ¡Buli'dzeja!

⁵ ¡Guli'gaca dxi'i ladxi' len yúgu'të bönachi!

¡Chizóa huödë' Xanru'!

⁶ Biti' ubi ugu'ili', pero guli'nabi-në' Dios le riquinili', en guli'guie': "Xclenu" ca naca yúgu'të lë na' rinábali'. ⁷ Dios gunë' ga gaca queëli' le cuéqui dxi icja ládxi'do'oli', lë na' nadódirö bë' ca le gaca ila'yéajni'i bönachi. Lë na' ribequi dxi icja ládxi'do'oru' gun chi'i icja ládxi'do'oli', en le rizá' ládxi'li' tu' nácali' tuz len Jesucristo.

Ral-la' sa' ládxi'ru' le nácgaca dxi'a

⁸ Ga ruúdxitë, böchi' luzá'ado', guli'sá' ládxi'li':

Yúgu'të le naca dxi'a, en le naca bica' ba,

en le naca idútë li, en le naca idú,
 en le naca tsahui, en le naca ba'a,
 en le naca lachi, en le ral-la' gunru' bal.

⁹ Guli'gún ca na' busédida' libí'ili, lê na' guzxf' lu ná'ali' tsca na' bē'lēna' libí'ili' didza', en tsca na' bena' ga ni' zóali'. Dios, Nu runna queēru' le ribequi dxi icja lādxi'do'oru' sóalenē' libí'ili'.

Le tsahui' gulunē' yugu' bōnni' Filipos queē' Pablo

¹⁰ Rudzėjálēnda'-nē' Xanru' tu' ruí'i lādxi'li' neda' leyúbölö. Biti' rnní'a' gul-la lādxi'li' neda', pero biti' guta' queēli' lataj gácalenli' neda' z'falö. ¹¹ Lēsc'a' caní, biti' rnní'a' caní tu' zoa bi riyadzaj quia', tu' nazēda' tsaza lādxa'a le dēsö quia'. ¹² Chigudōda' lu yöl-la' yechi', en lu yöl-la' tsahui'. Nazēda' soa' nácati'tēs, sal-la' nōljada' o nabila riduna', en sal-la' dēda' quia' o zoa bi riyadzaj quia'. ¹³ Yúgu'tē huazéqui'da' tu' rutipē' Cristo lādxa'a. ¹⁴ Benli' dxi'a cate' ni' gúcalenli' neda', en butípali' lādxa'a cate' gudí'i guzxac'a.

¹⁵ Libí'ili', bōnni' Filipos, nōz quézili' ca guca quia' dza ni' cate' buzá'a luyú Macedonia, para yōjena' libán que didza' dxi'a. Tsca nacua' bōnachi queē' Cristo, cúnturö nu gúcalen neda', pero libí'isili' gúcalenli' neda'. Gusöl-la'li' quia' bi bunödzejali', tu' guzxf' lu ná'ali' libán bena' neda'. ¹⁶ Tsanni ni' guzóa' yōdzö Tesalónica, tu chopa luzuí gusöl-la'li' quia' le bunödzejali' cate' ni' biyadzaj quia'. ¹⁷ Biti' ruí'i lādxa'a bi si'a, pero rē'ēnda' gáta'rö queēli' le uzí'ili' xibé yehua' yubá. ¹⁸ Rea' libí'ili': Chiguzxi'a yúgu'tē lê na' gusöl-la'li' quia', ate' gudödité bē' tsca le biyádzjada'. Ben ga naca caní lê na' gusöl-la'li' lu ná'abi' bi'i Epafrodito. Lê na' bunödzejali' naca ca tu le rilá' zixi le ridxintē lahuē' Dios, en ca tu le rigú'uru' lahuē' Dios le raza lādxe'ē. ¹⁹ Dios gunnē' queēli' yúgu'tē le riyadzaj queēli', tsca naca yöl-la' tsahui' rō'ö yehua' yubá, tu' nácali' tuz len Jesucristo. ²⁰ ¡Gácatica'sö queē' Xúziru' Dios yöl-la' ba! ¡Ca' gaca!

Yugu' bōnachi queē' Cristo tu' gapa Dios luzē'eguequi

²¹ Uláz quia' neda', guli'gapa Dios nupa ni' néquiquequi queē' Dios tu' nácagaca tuz len Jesucristo. Tu' gapē' Dios libí'ili' böchi' luzá'aru' núnagaquē' neda' tsözxön ni. ²² Lēsc'a' yúgu'tē nupa ni' néquiquequi queē' Dios, tu' gapa Dios libí'ili', en lēsc'a' caní, yugu' bōnni' huen dxin nacu'ē lidxē' bōnni' rinná bē'ē idú luyú Roma tu' gapē' Dios libí'ili'.

²³ Rinábida'-nē' Xanru' Jesucristo uzá' lādxe'ē queēli' yúgu'tēli'. ¡Ca' gaca!

DIDZA' GUSÖL-LĒ'Ē PABLO YÖDZÖ COLOSAS

Pablo rugapë' Dios bönachi queë' Cristo nacu'ë Colosas

¹ Neda', Pablo, naca' gubáz queë' Jesucristo tu' rë'ënë' Dios caní, ate' dzágabi' bi'i böchi'ru' Timoteo neda'. ² Rugapa' Dios libí'ili', zóali' Colosas. Nácali' böchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queëli', en gunë' ga soa dxi icja ládxí'do'oli'.

Pablo rulidzë' Dios, en rë' Lë': "Xclenu"

³ Rética'stu'-në' Dios, Xuzë' Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queëli' ⁴ tu' biyönitu' didza' ca réajlë'ëli' Jesucristo, en ca nadxfí'ili' yúgu'të nupa néquiguequi quez queë' Dios. ⁵ Caní runli' tu' runli' löza le nuzóë' Xanru' queëli' ni' yehua' yubá, lë na' biyönili' que cate' bë'lentu' libí'ili' didza', le naca löza sí'ili' ni'a que didza' dxi'a. ⁶ Didza' dxi'a na' bidxín queëli' ca ridxín ca' idütë yödzülió. Run dxin, en raca libán que, idütë yödzülió, la' tuz ca raca ga zóali', dza ni'te ga ridxintë na'a dza, cate' ni' biyönili', en bënbe'ëli' idütë le ruzá' ládxë'ë queëru' Dios. ⁷ Epafras, bönni' nadxfí'iru'-në', busëdinë' libí'ili' lë ni. Lë' rúnlenë' netu' tsözxön dxin, en rácalenë' libí'ili'. Náquië' huen dxin idú queë' Cristo. ⁸ Bönni' ni gudíxjöi'inë' netu' ca nadxfí'ili' luzá'ali', ate' runë' Dios Bö' Lá'ayi ga gaca gunli' caní.

⁹ Que lë ni na' netu' ca', dza ni'te ga ridxintë na'a dza, tu' réquibe'etu' lë ni, biti' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbe'ëli' idú le rë'ëni quëzinë' Lë', en gunnë' queëli' yúgu'të yöl-la' rácada', en yöl-la' réajni' i le rigü'ë Dios Bö' Lá'ayi rë'u. ¹⁰ Caní rinábitu'-në' para gaca gunli' ca ral-la' ilún nupa néquiguequi queë' Xanru', gunli' yúgu'të le raza ládxë'ë Lë', en séqui'li' gunli' yúgu'të le naca dxi'a, en gácarö idú ca núnbe'ëli'-në' Dios. ¹¹ Rinábitu'-në' utipë' ládxí'li', en gunnë' queëli' yöl-la' huáca idú queë', para gaca guá' ilenli' yúgu'të, en cözali' zxön ladxí', en udzeja ládxí'li'. ¹² Lu yöl-la' rudzeja queëli' guli'guié' Dios Xuz: "Xclenu", tu' budödë' lu ná'aru' gata' queëru' lataj lu bení' queë', en gunru' tsözxön nupa néquiguequi quez queë'. ¹³ Dios Xuz na' busölë' rë'u lu na' nu rinná bë' lataj chul-la, en budödë' rë'u ga na' rinná bë'ë Zxí'ini cazë', Nu nadxfí'inë'. ¹⁴ Zxí'inë' na' böá'uë' rë'u, tu' gütie' uláz queëru', ate' buniti lahuë' rë'u ca naca dul-la' gubágaru'.

Nuhuóácaru' tuz len Dios tu' gütie' Cristo uláz queëru'

¹⁵ Cristo náquië' tuz ca náquië' Dios caz, Nu biti' gaca ilé'eru'. Zoa cazë' Lë' zí'atëlö ca yúgu'të le benë' Dios. ¹⁶ Lu në'ë Cristo benë' Dios yúgu'të le dë, le nacua' lúzxiba, en le nacua' luyú, yugu' le rilé'eru', en yugu' le cabí gaca ilé'eru', lë na' nácacaga lataj lo, en yugu' yöl-la' unná bë', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'të benë' Dios lu në'ë Cristo para uzi'ë xibë Lë'. ¹⁷ Cristo zoa cazë' zí'alö ca yúgu'të le dë, ate' yúgu'të nacua'tica'so ni'a queë' Lë'. ¹⁸ Cristo náquië' Xángaca bönachi queë', en runödziejë' quëgaquië' yöl-la' na'bán. Náquië' ca' Nu gusi lo bubán tsaz lu yöl-la' guti. Zí'alö Lë' bubanë' tsaz lu yöl-la' guti para tsépisëtërë' ca yúgu'të le dë. ¹⁹ Caní guca, tu' guyaza ládxë'ë Dios Xuz sóalen Cristo idütë le naca cazë' Lë'. ²⁰ Ni'a que le benë' Cristo, Dios benë' ga gaca ulu'huóaca tuz len Lë' yúgu'të le dë, le nacua' luyú, en le nacua' lúzxiba. Bunë' léguequi tuz len Lë' tu' bulaljë' Cristo xichönë' cate' gütie' lë'e yaga cruz.

²¹ Libí'ili', zí'atëlö nulá'alenli'-në' Dios, en gúcali' ca yugu' bönni' biti' ta'lë'enë' Dios dxi'a lu icja ládxí'do'oli' ni'a que dö' biá'ali', pero na'a chibunë' libí'ili' tuz len Lë'. ²² Caní guca, tu' budödë' cuinë' Cristo, en gütie' uláz queëli' para gaca usudxinë' libí'ili' lahuë' Dios, nácali' quez queë', en idú dxi'a, ate' cuntú nu bi gaca innë queëli'. ²³ Caní gaca channó ugá'anali' tsutsu ca réajlë'ëli' Cristo. Gácali' ca tu' yu'u zxoá ga rë' xilibi zö'ö que, en biti' tseaj bö' ládxí'do'oli' ca runli' löza didza' dxi'a biyönili', lë na' raca libán que idütë yödzülió le benë' Dios xzan lúzxiba. Dios buzóë' neda', Pablo, para gaca' huen dxin que didza' dxi'a na'.

Dxin budödë' Dios lu në'ë Pablo

²⁴ Rudzéjada' na'a ca naca le riguí' rizáca'a para gácalena' libí'ili', en ruúdxí rizá'a lu idütë le naca' le riguí' rizáca'lëna' tsözxön Cristo uláz que idú le naca cazë' Lë', le naca bönachi queë'. ²⁵ Dios benë' ga naca' huen dxin quégaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios. ²⁶ Ruzéajni'ida' bönachi le nagachi', lë na' bigachi' dza ni'te, ate' cuntú nu benbë' le, pero na'a Dios chibuluf'inë' bönachi néquiguequi quez queë' ca naca que. ²⁷ Dios gú'uni quëzinë' gunë' ga ilúnbe'e yugu' yöl-la' tsahui' idú que le nagachi' ni, lë na' ta'yóni bönachi izá'a. Caní rnna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queë'."

²⁸ Runtu' libán queë' Cristo, en rusá'atu' láchix'gaca yúgu'të bönachi, ate' rusëditu' léguequi idütë yöl-la' réajni'i, para gaca usudxintu' yúgu'të bönachi lahuë' Dios, naca idü láchix'gaca tu' nácagaca tuz len Jesucristo. ²⁹ Para gaca caní runa' dxin, en ru'i láchix'a údx guna' lë ni, rugúna' dxin yöl-la' huáca idü na' runnë' Cristo quia'.

2

¹ Ré'enda' inözili' ru'ida' láchix'a runa' le gácalen libí'ili', enca' le gácalen bönachi yödzo Laodicea, en le gácalen ca' yúgu'të nupa bití' ila'lé'eni neda'. ² Runa' caní para ila'dipa láchix'gaquie', en iláquie' tuz lu yöl-la' nadxí'i, en ulu'zi'ë xibë yúgu'të yöl-la' tsahui' que yöl-la' run löza idü le runna yöl-la' réajni'i queëru'. Caní raca para ilúmbë'ë le bigachi' queë' Dios Xuz, lë na' naca cazë' Cristo. ³ Lu në'ë Cristo ruzí'iru' xibë yúgu'të yöl-la' tsahui' que yöl-la' rácada', en yöl-la' réajni'i. ⁴ Lë ni rea' libí'ili', para cabí gaca nu si' ye'e libí'ili', nu gú'i' didza' tséajlë'ëru' le cabí nácate'. ⁵ Sal-la' zoa' zi'tu' ga zóali' lu idütë le naca', lu bö' naca caza' zóalena' libí'ili', en rudzéjada' tu' rilé'eda' rō'ō xibá queëli', en nácali' tsutsu ca réajlë'ëli' Cristo.

⁶ Que lë ni na', ca na' guzxi' lu ná'ali' Xanru' Jesucristo, lësca' caní ral-la' gunli' yúgu'të le gunli', dzáguie' Lë' libí'ili'. ⁷ Ca na' nun ga rë' luí yaga, enca' ca na' nayás zō'ō lu xilibi zō'ō, guli'sóalen Cristo. Guli'sóa tsutsu ca réajlë'ëli' Lë', ca na' chinazédali'. Guli'guítica'së' Dios: "Xclenu'."

Le cubi nácaru' tu' dzágaru'-në' Cristo

⁸ Guli'gún chi'i cuinli' para cabí gú'i'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nнасë' nácagaca idütë li, ca naca le ta'lëbi tun bönachi, en ca naca le tu'sedi bönachi le naca que yödzoili ni, en calëga le naca xtidzë'ë Cristo.

⁹ Idütë le naca cazë' Dios zóalen Cristo sal-la' böáquie' bönachi, ¹⁰ ate' libí'ili' nápalí' idütë le náquie' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquie'. ¹¹ Narugu lu xipëla'gaquie' bönni' judío le rulu'fí dá'gaquie' Dios, pero libí'ili', tu' dzágali' Cristo, zóalen libí'ili' le rulu'fí néquili' queë' Dios, le cabí néquini lu n'ia lu ná'agaca bönachi. Yugu' bönni' judío tu'gúë' tu guídido', pero libí'ili', nadúa idütë yöl-la' bönachi queëli' le bénlenli' queë' Dios, pero na'a Dios nunë' ga nabánlenli'-në' tsözxön Cristo, lë'e yaga cruz. ¹² Cate' bidí'ali' nisa guca ca bigáchi'lenli'-në' Cristo tsözxön yeru ba, en bubánlenli'-në' tsözxön tu' guyéajlë'ëli' Dios, len yöl-la' huáca queë' busubanë' Cristo lu yöl-la' guti. ¹³ Zi'atëlō gúcali' ca nupa chinátigaca tu' nōzi dul-la' gubága'li', en bití' guzóalen libí'ili' le rulu'fí néquili' queë' Dios, pero na'a Dios nunë' ga nabánlenli'-në' tsözxön Cristo, en buniti lahuë' libí'ili' ca naca yúgu'të dul-la' gubága'li'. ¹⁴ Dios busúluë' yugu' le nabága'ru' le nazúajgaca lu xibá queë', lë na' tu'zegui rë'u didza'. Bugúë' lë na' nabága'ru', en budë'ë le lë'e yaga cruz ca tu le nabáguë'ë Cristo. ¹⁵ Cate' gútië' Cristo lë'e yaga cruz, bugúë' yöl-la' huáca unná bë' quégaca bö' xihui' unná bë', en quégaca bö' xihui' dë lu në'eguequi yöl-la' huáca, tu' bulu'e lahuí le nácagaca bö' xihui' na', en bugúë' idütë le guta' lu në'eguequi.

Ral-la' gú'i' láchix'ru' le naca que yehua' yubá

¹⁶ Que lë ni na', bití' gú'i'ili' lataj nu uzegui libí'ili' didza' ca naca le rë'aj ráguli', o tu' cabí runli' zxön yugu' dza lani, o tu' cabí runli' zxön beo' si' ruzë, o tu' cabí runli' zxön yugu' dza lá'ayi quégaca bönachi. ¹⁷ Yúgu'të lë ni naca ca tu bixín que le ral-la' gaca, ate' le rulu'fí yúgu'të lë ni náquie' Cristo caz. ¹⁸ Bití' gú'i'ili' lataj nu gun ga unítili' le ral-la' sí'ili', nu runda' bayudxi ga ilaca nōxaj láchix'gaca bönachi, en ilún zxön yugu' gubáz lá'ayi. Tu'gutsa' cuíngaquie' le cabí bila'lé'enë', en tun ba zxön cuíngaquie' ca naca le dzō'ōsō ícagaquie' lu yöl-la' bönáchisō quégagaquie'. ¹⁹ Nu run caní bití' da' Cristo. Náquie' Xanru', en ruzóë' tsutsu idütë le naca cazë', le nácaru' rë'u. Rugahuë' le, en runë' ga naca tuz n'ia que le zeaj lu dxita lu bin, ate' rizxön idütë le naca cazë' ca rë'ënë' Dios uxōnë' le.

²⁰ Libí'ili' chinátilenli'-në' Cristo para cabirō ila'nná be'e xibá que yödzoili libí'ili'. ¿Bixz que runli' tsca ni nácali' que yödzoilió, en runli' ca ta'nná bë' xibá que? ²¹ Caní ta'nná yugu' xibá que yödzoilió ni:

Bití' quítjanu' lë ni.

Bití' gagu' lë na'.

Bití' canu' ia'tú le dë.

²² Yúgu'të lë ni ila'niti cate' chibugunru' léguequi dxin. Caní nácagaca le ta'nná bë' bönachi, en yugu' xibá nazí' lu në'eguequi. ²³ Le nácate', yugu' xibá ni, téqui bönachi nápagaca yöl-la' réajni'i. Tun ga tu'lufí' cuínguequi ca bönachi yudo', en ga tu'lufí' cuínguequi nōxaj láchix', en ga tu'saca' zí'gaca idütë le zeaj naca caz, pero xibá ni bití' ca' tácalen rë'u para gaca inná bé'ëru' yugu' le rizé láchix'ru' lu yöl-la' bönáchisō queëru'.

3

¹ Na'a, channö nubánlenli'-në' Cristo, guli'güi' ladxí' le nácagaca que yehua' yubá ga ni' rō'ë Cristo cuita lē'ë ibēla Dios, ga náquiē' lo. ² Guli'sá' ladxí' le taca xitsá'alō, en calēga le taca luyú ni. ³ Naca queēli' tsa chinátali', ate' yōl-la' na'bán queēli' rapa chi'ë Cristo ga ni' zoa cazē' Dios. ⁴ Cristo nabánili' libí'ili'. Cate' uluf'i lahuē' Lē', n'firō uluf'i loli' ca' libí'ili' tsōzxōn len Lē' lu bení' queē'.

Yōl-la' na'bán gula, en yōl-la' na'bán cubi

⁵ Que lē' ni na', guli'gún ga ila'niti le nacuá'len libí'ili' que yōdzōlió ni: Yugu' le ruá' dō', en le nácagaca xihui', en yugu' le rizē lādxi'li' le ruá' dō', en yugu' le rizē lādxi'li' le naca xihui', en yōl-la' ruhuidi'.

Yōl-la' ruhuidi' naca lēbi ca nu reaj ladxí' budó' guiōj budó' yaga, tu' cabí reaj ladxí' Dios nu ruhuidi'. ⁶ Tun bōnachi yugu' le caní, ate' gunē' Dios xíguia' yúgu'tē nupa bití' túngaca ca rnna xtídzē'ë. ⁷ Yugu' dul-la' caní benli' ca' libí'ili' cate' ni' nadódili' lu nē'eguequi. ⁸ Na'a, bítí'rō gunli' yugu' lē ni:

Bítí'rō idzá'ali', en bítí'rō leli'.

Bítí'rō nu gunli' zí', en bítí'rō innē xíhui'li'.

Bítí'rō innali' le ruá' dō'.

⁹ Bití' sí' yé'eli' luzá'ali' tuli' ia'tuli' tu' chinucá'anali' le gúcali' zí'alō, en yugu' le benli' zí'alō. ¹⁰ Chinácali' bōnachi cubi, ate' tu tu dza ricúbili', ruhuóacarōli' ca naca Nu na' bun libí'ili', para gūnbē'eli' Lē' idú ca náquiē' Lē'. ¹¹ Tu' chidzágaru'-nē' Cristo:

Bítí'rō nácaru' bōnni' zí'tu', en bōnni' judío.

Bítí'rō nácaru' bōnni' narugu lu xipéla'gaquiē' le naca bē' nu da' Dios, en bōnni' bití' narugu lu xipéla'gaquiē' lē na' naca bē'.

Bítí'rō nácaru' bōnni' ta'yéajni'inē', en bōnni' bití' ta'yéajni'inē'.

Bítí'rō nácaru' bōnni' nadó'ogaquiē', en bōnni' bití' nadó'ogaquiē'.

Na'a, Cristo náquiē' yúgu'tē le nácagaca lesaca', en dzáquiē' yúgu'tēru'.

¹² Dios nadxí'inē' libí'ili', en gurōē' libí'ili' para guéquili' quez queē'. Que lē' ni na', ral-la': Gūf'i lādxi'li' luzá'ali', en gácali' dxi'i ladxí', en nōxaj ladxí', en cuidi' ladxí', en cōzali' zxōn ladxí'.

¹³ Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benē' Cristo, buniti lahuē' libí'ili'. ¹⁴ Le nazáca'tērō ca yúgu'tē lē ni, ral-la' idxi'ili' yúgu'tē bōnachi, tu' naca yōl-la' nadxí'i le run ga nácaru' tuz, en ga nácaru' idú. ¹⁵ Guli'gūr' lataj le ribequi dxi'icja lādxi'do'oru' inná bē' lu icja lādxi'do'oli', lē na' runnē' Dios queēru'. Que lē' ni na' bulidzē' libí'ili', para gácali' tuz lu idútē le naca cazē' Cristo. Guli'guiē' Dios: "Xclenu'."

¹⁶ Guli'sí' lu ná'ali' xtídzē'ë Cristo le gaca queēli' tu yōl-la' tsahui' zxōn. Tu' zóalen libí'ili' yōl-la' réajni'í queē' Dios, buli'sedi, en buli'zējni'í luzá'ali' tuli' ia'tuli'. Idú lādxi'li' guli'gula yugu' salmo queē' Dios, en yugu' le rul-la yōl-la' ba, en yugu' le rul-la lá'ayi, ate' guiēli'-nē' Dios: "Xclenu'." ¹⁷ Yúgu'tē le runli', le naca didza' ruí'ili' o le naca dxin runli', guli'gún yúgu'tē lu Lē' Xanru' Jesús, en guiēli'-nē' Dios Xuz: "Xclenu'", dzáguiē' Cristo libí'ili'.

Le ral-la' gunru' que luzá'aru' tu' néquiru' queē' Cristo

¹⁸ Libí'ili', nigula nutsaga ná'alenli' bōnni' queēli', guli'gún ca rnna xtídz'a'gaquiē' bōnni' que queēli' ca ral-la' gunli', tu' néquili' queē' Xanru'.

¹⁹ Libí'ili', bōnni' nutsaga ná'alenli' nigula queēli', guli'dxi'í nigula que queēli', en bití' uzéli' bach légacanu.

²⁰ Libí'ili', bi'í ra'bán, guli'gún ca rnna yúgu'tē xtídz'a'gaquiē' xuz xiná'ali'. Lē ni raza lādxē'ë Xanru'.

²¹ Libí'ili', núlōli' nácali' xúzgaca bí'ido', bití' tōdi bē' usína'li' xzf'inili', para cabí huōaj lādxi'gacabi'.

²² Libí'ili', núlōli' nácali' bōnni' nadó'ogaquiē', guli'gún ca rnna yúgu'tē xtídz'a'gaquiē' xanli' luyú ni. Calégasō gunli' caní cate' tu'yúē' libí'ili' ca na' tun nupa té'eni ilún ga ila'yaza lādxi'gaca bōnachi, pero idú lādxi'li' guli'gún xichíngaquiē'

ca ral-la' ilún nupa tadxi Dios.

²³ Ca naca yúgu'tè le runli', guli'gún idú ládxi'li', gaca ca runli' xichinë' Xanru', en calégasô ca runli' xichíngaca bônachi.

²⁴ Chinôz quézili' ubi'è Xanru' queéli', gunnè' queéli' le chinupè'è Dios quégaca nupa náacagaca xxi'ini cazè'. Caní gaca, tu' runli' xichinë' Xanru' Jesucristo.

²⁵ Nu ruá' dō, ubi'è Xanru' que nu na' ca naca dō ruá' nu na', tu' cabí utsé'è Dios ca ral-la' ubi'è que queégaca bônachi.

4

¹ Libí'ili', núlōli' nácali' xángaca bônachi, guli'gún le naca tsahui', en le naca dxi'a ca rugunli' dxin yugu' bōnni' huen dxin queéli'. Guli'tsōjné zoa ca' Xanli' yehua' yubá.

² Libí'ili', yúgu'téli', buli'lídatica'sé' Dios. Buli'subán ládxi'li' ulídzali'-nè' Dios, en guli'guíè: "Xclenu'."

³ La' ná'asô cate' rulídzali'-nè' Dios, guli'nabi-nè' ca' gácalenè' netu', en gunnè' netu' lataj quíxjō'otu' xtídzè'è Xanru', para gaca uzéajni'itu' bônachi le bigachi' ca naca queè' Cristo. Tu' runa' caní nadzuna' lídxi guíè ni. ⁴ Guli'nabi-nè' ca' Dios, gunnè' neda' lataj usalaj lá'ana' le bigachi' na' ca ral-la' guna'.

⁵ Lu yōl-la' réajni'i queéli', guli'gún le runli' lógaca nupa biti' ta'yéajlè' Cristo. Guli'gunda' dxin yugu' dza uzá' ládxi'è Dios queéli', gunli' xichinë'. ⁶ Ral-la' guí'ili' didza' ca raza ládxi'è Dios, en ca ral-la' gun nupa néquiguequi queè'. Ral-la' inózili' ca' naca ral-la' ubi'ili' didza', bi guíèli' tu tu bônachi.

Yugu' bônachi queè' Cristo tu'gapa Dios luz'eguequi

⁷ Tiquico quíxjōi'inè' libí'ili' le raca quia' ni. Náquiè' bōchi'ru' nadxí'iru'-nè'. Náquiè' ca' huen dxin idú queè' Xanru', en rúnlenè' neda' tsōzxón dxin queè' Xanru'. ⁸ Que lè ni na' risól-la'a-nè' ga zóali', para uzéajni'inè' libí'ili' le raca quia', en utipè' ládxi'li'. ⁹ Onésimo, bōchi'ru' na' nabábalenè' libí'ili' sa'yéajlenè' lè' tsōzxón. Náquiè' ca' bōchi'ru' nadxí'iru'-nè', en réajlè'è Xanru'. Chopè' ni ulu'siyōnnè' libí'ili' yúgu'tè le raca ni.

¹⁰ Aristarco, bōnni' na' yú'ulenè' neda' tsōzxón lídxi guíè rugapè' Dios libí'ili'. Bi'i Marcos, bi'i bōnni' queènu nigula zanè' Bernabé rugápabi' Dios ca' libí'ili'. Chigudxa' libí'ili' bi gunli' queèbi' bi'i Marcos na'. Channō huídabi' ga zóali', guli'gún-bi' bal. ¹¹ Bōnni' ni lè' Jesús, en zoa ia'tú lè' Justo lèscá' rugapè' Dios libí'ili'. Nacuá' zían bônachi judío ta'yéajlè' Cristo, pero tsónnasè' ni ladaj bônachi judío tunè' dxin que le rinná bē'è Dios tsōzxón len neda', en tu'huí' zxóndè'è neda'. ¹² Epafra, bōnni' ni nababè' ca' libí'ili' rugapè' Dios libí'ili'. Náquiè' huen dxin queè' Cristo, en idú ládxi'è rulídzè' Dios, en ráta'yutica'sé' lahuè' gácalenè' libí'ili' para gácali' idú ládxi', en sóali' ca' sina' gunli' yúgu'tè le ré'èni quézinè' Dios. ¹³ Runa' ba nalí queè' Epafra na', ruí'ida' ládxi'è libí'ili' enca' nupa nacua' yōdzō Laodicea, en nupa nacua' yōdzō Hierápolis. ¹⁴ Demas, enca' Lucas tu'gapè' Dios libí'ili'. Náquiè' Lucas bōnni' na' ruínè' bônachi, ate' nadxí'iru'-nè'.

¹⁵ Guli'gapa Dios bōchi'ru' nacu'è Laodicea, enca' Ninfas, en bônachi queè' Cristo nacua' lídxiu' Ninfas na'. ¹⁶ Cate' údxi ulábalí' guichi ni ga ni' zóali', guli'gún ga ulu'laba le bônachi queè' Cristo nacua' Laodicea. Buli'laba ca' libí'ili' guichi na' ila'sól-la' bônachi Laodicea na' queéli'. ¹⁷ Guli'guíè Arquipo: "Bē' ládxi'u' gunu' dxin na' budódè' Xanru' lu no'o."

¹⁸ Neda', Pablo, ruzúaj caza' lu guichi dídza'do' ni, rnniá': Rugapa' Dios libí'ili'. Guli'tsōjné ca raca quia' nadzuna' lídxi guíè ni. Rinábida'-nè' Dios uzá' ládxi'è queéli' le naca dxi'a. ¡Ca' gaca!

DIDZA' ZÍ'ALÖ GUSÖL-LĒ'Ē PABLO YÖDZÖ TESALÓNICA

Pablo rugapë' Dios bönachi queë' Cristo nacua' Tesalónica

¹ Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queë'li', en gunë' ga soa dxi icja ládx'i'do'oli'.

Yugu' le taca bē' ta'yéajlë' bönachi Tesalónica Dios

² Rética'stu'-në' Dios: "Xclenu" cate' rójnetu' ca naca queë'li' yúgu'tëli'. Rójnética'stu' libí'ili', bi rinábitu'-në' Dios ni'a queë'li' cate' rulidztu'-në'. ³ Rójnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácatia'sili' tsutsu tu' runli' löza Xanru' Jesucristo. ⁴ Böchi' luzá'atu', Dios nadxí'inë' libí'ili', ate' nöztu' gurö cazë' Lë' libí'ili'. ⁵ Caní naca, tu' bidxín queë'li' didza' dxi'a runtu' libán que, calëga len didza'sö, pero lësca' len yöl-la' huáca bidxín queë'li', ate' Dios Bö' Lá'ayi benë' tsutsu le, ate' idú ládx'i'li' benli' löza le. Nöz quézili' ca gúcatu' ga zóali' tu' nadxí'itu' libí'ili'.

⁶ Libí'ili' butsa' cuinli', ate' runli' ca runtu' netu', enca' ca benë' Xanru', tu' guzxi' lu ná'ali' xtidzë', ate' sal-la' gudí'i guzxacá'da'ali', budzëjálí' tu' zóalenë' Dios Bö' Lá'ayi libí'ili'. ⁷ Caní naca, chinácali' tu' le naca bē' lógaca yúgu'të bönachi ta'yéajlë' Cristo nacua' luyú Macedonia, en luyú Acaya. ⁸ Caní naca, tu' guzë xtidzë'ë Xanru' ni'a queë'li'. Calëgasö luyú Macedonia, en luyú Acaya, pero lësca' yúgu'të lataj guzë didza' ca réajlë'ëli' Dios. Caní naca, biti' bi run bayudxi innatu', ⁹ tu' ta'guixjö' lá' léguequisö bönachi ni' queëtu' ca benli' netu' bal, en ca na' butsa' cuinli'. Bucá'anali' yugu' budö' guiöj budö' yaga, en böácali' queë' Dios para gunli' xichinë' Dios ban, Nu naca idú Dios. ¹⁰ Na'a, ribözali' dza huödë' Xzi'inë' Dios, írúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusölá rë'u lu dul-la', para cabí soa le gun ga ichúguie' Dios queëru' dza si' za'.

2

Xichinë' Dios benë' Pablo yödzö Tesalónica

¹ Böchi' luzá'atu', nöz quézili' biti' guca nítisö dxin queë' Dios bentu' cate' ni' bidxintu' ga zóali'. ² Nözili' ca guca queëtu' lu yödzö Filipos, ca na' gudí'i guzxacá'tu', ate' guluá' dö' bönachi ni' queëtu'. Ní'irö cate' bidxintu' ga zóali' gúcatu' rugu ladxí' tu' guzóalenë' Dios queëru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'. ³ Cate' ni' guchízatu' icja nágalí' xtidzë'ë Dios, bē'ëtu' didza', calëga tu' nazí'i ye'e netu', en calëga tu' bi guzë ládx'i'tu' le dë queë'li', en biti' guzxi' ye'etu' libí'ili'. ⁴ Tu' nuzxöni ládxë'ë Dios netu', budödë' lu na'tu' guntu' libán que didza' dxi'a queë', ate' canisö ruí'itu' didza'. ⁵ Nöz quézili' catu caz b'ë'untu' libí'ili' didza' le gun zxön libí'ili', en biti' gulëaj tsahui' cuintu' ca run nu bi rizë ladxí' le dë queë'li'. Nöz quézinë' Dios naca caní. ⁶ Biti' gudí'latu' yöl-la' ba le naca que yödzöliö ni, lë na' cú'uli' libí'ili' netu', en calëga le ilá'gú'u bönachi netu'. Sal-la' dë lu na'tu' inná bē'etu' libí'ili' tu' nácatu' gubáz nasöl-lë'ë Cristo ⁷ guzóalentu' libí'ili' dxi'i ládx'i'do', en bentu' ca runnu xiná'agacabi' bi'i huë'ënido', run chí'inu légacabi' dxi'i ládx'i'do'. ⁸ Caní guca, bidxí'ide'etu' libí'ili', ga bidxintë' gú'unitu' udödötu' lu ná'ali', calëgasö didza' dxi'a queë' Dios, pero lá'tu'biquí' udödi caztu' yöl-la' na'bán queëtu', tu' nadxí'ide'etu' libí'ili'. ⁹ Rójneli', böchi' luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zi'i, ate' rëla, en tē dza bentu' dxin para cabí usaca' zí'itu' nituli' libí'ili'.

¹⁰ Libí'ili' na' réajlë'ëli' Cristo, huáca gunli' ba nalí, ate' nözinë' Dios ca na' gudá'untu' libí'ili' idú ca raza ládxë'ë Dios, en idú dxi'ado', en ca na' cuntu nu gaca bi innë que. ¹¹ Lësca' caní nözili' ca bentu' ca runë' tu' bönni' quégacabi' xzi'inë', guchízatu' icja nágalí', en butípatu' ládx'i'li' tu tuli'. ¹² Busá'atu' ládx'i'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bē'ë Lë' lu bení' queë'.

¹³ Que lë ni na' ca', rética'stu'-në' Dios: "Xclenu". Caní runtu' tu' guzxi' lu ná'ali' xtidzë'ë Dios le biyönili' bē'ëtu' didza', calëga ca xtidza' bönáchisö, pero ca le nácatë naca, xtidzë'ë Dios naca. Xtidzë'ë na' run dxin lu icja ládx'i'do'oli' libí'ili', réajlë'ëli' Cristo. ¹⁴ Böchi' luzá'atu', raza queë'li' ca raza quégaca bönachi queë' Dios, nupa néquiguequi queë' Jesucristo luyú Judea. Caní naca tu' chigudí'i guzxacá'da'ali' lu ná'agaca bönachi uláz quégaquië', lëbisö ca na' gula'guí' gula'záquië' légacuië' lu ná'agaca bönachi uláz quégaquië', nupa ni' nácagaca bönni' judío. ¹⁵ Yugu' bönni' judío na' gulútië' Xanru' Jesús, en gulútië' ca' yugu' bönni' gulu'ë didza' uláz queë' Dios. Gula'bía ládx'i'gaquië', en bulu'láguë' ca' netu'. Biti' tunë' le raza ládxë'ë Dios, tu' cabí ta'lé'enë' dxi'a yúgu'të bönachi izá'a. ¹⁶ Tu' zágue'ë ca' xinöztu', para cabí

guntu' libán lógaca bônachi izá'a na' biti' nabábagaca légaquié', tu' ru'í'ilentu' léguequi didza' para ulu'lágaca. Caní raca, tu' zántica'sè' dul-la' nabága'gaquié', en chinabága'gaquié' xíguia' le run ga ichúguie' Dios quégaquié'.

Pablo rē'ēnē' tsōjyūē' bōchi'ru' nacu'ē Tesalónica

¹⁷ Na'a, bōchi' luzá'atu', ruhu'í'initu' ca runē' tu bōnni' uzēbi tu' nulá'alentu' libí'ili' tu chí'ido', pero sal-la' biti' rilé'etu' libí'ili', biti' nál-la ládxi'tu' libí'ili'. Que lē ni na', ru'í' ládxi'rōtu' ulé'etu' loli', tu' rizēda' ládxi'tu' guntu' caní. ¹⁸ Que lē ni na' ca' gú'unitu' guídatu' ga zóali', ate' neda', Pablo, le nácatē bē' ládxa'a guída' chopa tsonna luzuí, pero Satanás, tu' xihui', buzaga' xinōztu'. ¹⁹ ¿Bizxi caz naca le run ga runtu' lōza, o le run ga rudzéjatu', o le ral-la' idéli'tu', le uzí'itu' xibé lahuē' Xanru' Jesucristo cate' huōdē'? ¿Naru' cabí libí'í cázali' na'? ²⁰ Libí'í cázali' nácali' le run ga nácatu' bica' ba, en le run ga rudzéjatu'.

3

¹ Que lē ni na', cate' bítirō guca guá' ilentu', ben xtídza'tu' ugá'anatu' chópatu' lu yōdzō Atenas, ² ate' gusól-la'tu'-bi' bi'í bōchi'ru', Timoteo ga zóali'. Nácabi' bi'í huen dxin queē' Dios, en rúnlenbi' neda' tsōzxón libán que didza' dxi'a queē' Cristo. Gusól-la'tu'-bi' ga zóali' para cuéqui' libí'ili' tsutsu, en ichízabi' icja nágali' ca ral-la' tséajlē'ēli' Cristo, ³ para cabí soa nu gaca chopa ladxí' nī'a que le tu'saca' zī' bōnachi nī netu'. Nōz quézili' zóaru' yōdzóliō nī para guá' ilenru' le caní. ⁴ Lēscā' cate' nī' guzóalentu' libí'ili', busiyōntu' libí'ili' ca chizóa gaca le ulu'saca' zī' rē'u, le gaca ca na' chiguca queētu', ate' nōz quézili' lē na'. ⁵ Que lē ni na', cate' bítirō guca guá' ilena', gusól-la'a-bi' bi'í Timoteo ga zóali', para ududíxjōi'ibi' neda' ca naca queēli' ca réajlē'ēli'-nē' Cristo, en channō cabí gulú'u tu' xihui' libí'ili' nōza dul-la', nu na' rigú'u bōnachi nōza dul-la', en channō cabí bōáca nítisō dxin na' bentu' ga zóali'.

⁶ Cate' buzá'abi' bi'í Timoteo ga zóali', en budxinbi' ga zóatu', busiyōnbi' netu' le naca dxi'a. Bē'ēbi' didza' ca na' réajlē'ēli' Cristo, en ca na' nadxfí'igacali'-nē' yugu' bōchi' luzá'aru', en ca na', lu yōl-la' dxi'í ladxí' queēli' rōjnética'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' libí'ili'. ⁷ Que lē ni na', bōchi' luzá'atu', cate' nī' gudí' guzxáca'tu' yúgu'tē lē ni, en zían le guca queētu', bidxin didza' queētu' le buí'í zxōn netu' cate' biyōnitu' ca réajlē'ēli'-nē' Cristo. ⁸ Na'a, nuhuóaca ládxi'tu' tu' riyōnitu' rō'oli' tsutsu ca réajlē'ēli'-nē' Xanru'. ⁹ ¿Nacxi caz gaca guíētu'-nē' Dios: "Xclenu" ca ral-la' guntu' nī'a que yúgu'tē le run ga rudzeja ládxi'tu' lahuē' Dios queēru' nī'a que le nácali' libí'ili'? ¹⁰ Bayudxi rulidztu'-nē' Dios, en rinábitu'-nē' rēla, en tē dza para gaca ulé'etu' libí'ili', en usá'atu' le riyadzaj queēli' ca naca le réajlē'ēli'-nē' Cristo.

¹¹ Na'a rinábitu'-nē' Xúziru' Dios, enca' Xanru' Jesucristo, cu'ē netu' nōza ga idxintu' ga zóali'. ¹² Lēscā' rinábitu'-nē' Xanru' gunē' ga gala, en gaca idú ca nadxfí'ili' luzá'ali' tu'li' ia'tuli', en ca nadxfí'ili' yúgu'tē bōnachi, ca na' netu' nadxfí'itu' ca' libí'ili'. ¹³ Rinábitu'-nē' gunē' ga gaca tsutsu, en idú dxi'a icja ládxi'do'oli' lahuē' Xúziru' Dios ca sa'yéaj le naca lá'ayi, ate' gunē' caní ga idxinrō dza huōdē' Xanru' Jesucristo, dzágagaca bōnachi lá'ayi queē' Lē'.

4

Le runru' le raza ládxe'ē Dios

¹ Ia'stú, bōchi' luzá'atu', nī'a queē' Xanru' Jesús ráta'yutu' loli', en richízatu' icja nágali' para gunli' ca naca le chinazédali' lu na'tu' ca ral-la' gunli' le raza ládxe'ē Dios. Ca na' chirunli', ca' ral-la' gúntica'sili'.

² Chinōz quézili' yugu' le gunná bé'etu' libí'ili' uláz queē' Xanru' Jesús. ³ Le rē'ēnē' Dios naca gácali' idú dxi'a, en bítirō gunli' le cabí naca tsahui', ⁴ en inōzili' tu tuli' nacxi ral-la' sōalenli'-nu nigula que queēli' idú ca sa'yéaj le naca lá'ayi, en gunli' légacanu bal. ⁵ Bítirō ral-la' sōalenli'-nu nigula queēli' lu yōl-la' rizē ladxí' le ruá' dō', ca na' tun bōnachi biti' nabábagaca Dios, en bítirō nūnbē' gaca Dios. ⁶ Ca nábagaca lē ni, cuntū nu ral-la' tōdi bē', en cabí si' ye'e bōchi' luzé'e bagáchi'sō, tu' ichúguie' Lē cazē' Xanru' quégaca yúgu'tē nupa tun le caní, gunē' ca na' chigúdxitu' libí'ili', en bentu' ba nali' que loli'. ⁷ Dios bulidzē' rē'u, calēga para gunru' le ruá' dō', pero para gácaru' idú dxi'a. ⁸ Caní naca, nu ruzóa tsōlá'alō lē ni, calēga bōnáchisō ruzóa tsōlá'alō, pero Dios caz ruzóa tsōlá'alō, tu' gusól-lē'ē Lē cazē' Dios Bō' Lá'ayi queēru', Nu ru'í' caní didza'.

⁹ Bítirō run bayudxi uzúaja' queēli' lu guichi ca ral-la' idxí'igacali'-nē' bōchi' luzá'ali', tu' chinazédali' la' libí'isili' lu nē'ē Dios idxí'ili' luzá'ali' tuli' ia'tuli'. ¹⁰ Le nácatē nadxfí'igacali'-nē' yúgu'tē bōchi' luzá'aru' nacu'ē luyú Macedonia. Na'a, ráta'yutu' loli', bōchi' luzá'atu', para idxí'igacarōli'-nē' ca' yúgu'tē bōchi' luzá'ali'. ¹¹ Ráta'yutu' loli' ca', gū'í ládxi'li' cōzali' dxi'ado', en gunli' yugu' le dē lu ná'asili', en gunli' dxin len na'a cuinli' ca na' chigunná bé'etu' libí'ili'. ¹² Gunná bé'etu' libí'ili' caní para gaca gunli' le naca dxi'ado' lógaca nupa bítirō nabábagaca libí'ili', en caní gaca, bítirō bi' yadzaj queēli'.

Ca gaca cate' huodë' Xanru' Jesucristo

¹³ Lësca', böchi' luzá'atu', rë'ënitü' inözili' ca raca quégaca nupa chinátigaca, para cabí huf'inili' ca tun ia'zica'rö bönachi bití' zoa le tun löza. ¹⁴ Channö réajlë'ëru' gütie' Jesús, en bubanë', lësca' caní ral-la' uzxöni lädxi'ru'-në' Dios gunë' ga huódalengaca tsözxön Jesús nupa nu' chigulati, en gula'yéajlë' Lë'.

¹⁵ Que lë ni na' riguixjöi'itu' libí'ili' xtídzë'ë Xanru' le rnna caní: "Rë'u ni zóaru' nabanru', en ugá'anaru' ga idxinrö dza huodë' Xanru' Jesucristo, bití' tsöjtságaru'-në' Cristo zí'alö ca nupa chigulati." ¹⁶ Caní gaca, tu' huötjë' Lë cazë' Xanru', en irüajë' yehua' yubá, ate' yön chí'ë, len yöl-la' unná bë' ulidzë', ate' yön ca' chí'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo. ¹⁷ Ní'irö rë'u ni zóaru' nabanru', en nagá'anaru' luyú ni, uchisë' rë'u tsözxön len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóalenticá'siru'-në' Xanru'. ¹⁸ Que lë ni na', guli'hui' zxön luzá'ali' tuli' ia'tuli' ca náacagaca didza' ni.

5

¹ Na'a, ca naca dza na', o rëla na' cate' ilaca lë ni, bití' run bayudxi uzúaja' queëli' lu guichi, böchi' luzá'atu'. ² Libí'ili' chinöz quézili' dxi'a ca gaca dza cate' huodë' Xanru'. Idxinë' tsárido'os ca ridxinë' gubán chí'i dzö'ölö. ³ Cate' ila'nná bönachi: "Raca dxi'a queëru', en bití' bi gaca queëru'", ní'irö lá' idxintë le usuniti léguequi, lë na' idxín quéguequi ca na' ridxín le riguí' rizáca'nu nigula na' chizó'a sóabi' bí'ido' queënu, ate' cuntú nu nutsa' ladaj bönachi yödžolió ni nu ulá cate' gaca lë na' gaca dza na'. ⁴ Na'a, böchi' luzá'atu', bití' zóali' chul-la niti, en que lë ni na' bití' idxín dza ni' queëli' bagáchi'só ca ridxinë' bönni' gubán. ⁵ Yúgu'tëli' nácali' bönachi que bení, en que lahui' dza. Bití' nácaru' bönachi que chí'i dzö'ölö, en calëga que le naca chul-la. ⁶ Que lë ni na', bití' ral-la' tódi yëla loru' ca raca quégaca nupa bití' nabábagaca rë'u, pero ral-la' usubán lädxi'ru', en cözaru' ba'a lädxi'do'. ⁷ Nupa tasi, chí'i dzö'ölö tasi, en nupa ta'zudxi, chí'i dzö'ölö ca' ta'zudxi. ⁸ Na'a, rë'u ni, nácaru' que lahui' dza, en ral-la' cözaru' ba'a lädxi'do', tu' chinácuru' xzaru' le run chí'i rë'u, le naca yöl-la' réajlë' queëru' Dios, en yöl-la' nadxí'i, ate' le runru' löza uláru' naca ca tu lu'u guié le run chí'i ícjaru'. ⁹ Caní naca, tu' nuzóë' Dios rë'u ni, calëga para idxinru' ga ichúguie' queëru', pero para uláru' tu' ruzxöni lädxi'ru'-në' Xanru' Jesucristo, ¹⁰ tu' gütie' Jesús uláz queëru' para sóaru' íbanru' tsözxön len Lë' cate' huodë', sal-la' chinátiru' o sóaru' íbanru' dza ni'. ¹¹ Que lë ni na' ral-la' utípali' lädxi'li' tuli' ia'tuli', en gunli' tsutsu tuli' ia'tuli' ca na' chirunli'.

Pablo richizië' icja náagagakië' böchi' luzë'ë ta'yéajlë'ë Cristo

¹² Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'ë libí'ili' uláz queë' Xanru', en tu'sá lädxi'li'. ¹³ Ráta'yutu' loli' ca', gunli' légaquië' bal lu yöl-la' nadxí'i queëli', tu' tunë' dxin na'. Guli'cöza dxi'ado' tuli' len ia'tuli'.

¹⁴ Lësca' caní richizatu' icja nágali', böchi' luzá'atu', para usá'ali' lädxi'gaca nupa bití' túngaca dxin, en utípali' lädxi'gaca nupa tu'huöaj lädxi'guequi, en gácalenli' nupa bití' naca tsutsu ca ta'yéajlë' Cristo, en gácali' nöxaj lädxi' lógaca yúgu'të bönachi.

¹⁵ Guli'gún chí'i cuinli' para cabí uzí' lëbi luzá'ali', en cabí guá'ali' dö' que nu ruá' dö' queëli', pero guli'güf' lädxi'li' gúntica'sili' le naca dxi'a que luzá'ali' tuli' ia'tuli', en quégaca yúgu'të bönachi.

¹⁶ Bulí'dzéjatica'sö,

¹⁷ en bulí'lídzatica'së' Dios,

¹⁸ en guli'guíë' Lë: "Xclenu'."

Caní ral-la' gunli' ni'a que yúgu'të le raca queëli', tu' náacagaca lë ni le rë'ënë' Dios gunli' tu' nácali' queë' Jesucristo.

¹⁹ Bití' uzó'a dxili' le rulídzatica'së' Dios Bö' Lá'ayi libí'ili'.

²⁰ Bití' uzóali' tsólá'alö xtídzë'ë bönni' ru'ë didza' uláz queë' Dios.

²¹ Guli'sí' bë' yúgu'të, en guli'sí' lu ná'ali' le naca dxi'a.

²² Bití' bi gútsa'li' le ruá' dö'.

²³ Lë cazë' Dios, Nu run ga zoa dxi'icja lädxi'do'oru', gunë' ga gácali' idú dxi'a, en gun chí'ë bö' naca cázali', en icja lädxi'do'oli', en idütë le nácali', ate' cuntú nu gaca bi innë queëli' dza ni' huodë' Xanru' Jesucristo. ²⁴ Runë' Dios ca rnnë', Bönni' na' bulidzë' libí'ili'. Lë cazë' gunë' yugu' lë ni.

Pablo rigü'ë yugu' böchi' luzë'ë lu në'ë Dios

²⁵ Böchi' luzá'atu', bulí'lídzë' Dios, en inábili'-në' gácalenë' netu'.

²⁶ Bulí'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queëli'.

²⁷ Ní'a queë' Xanru' Dios ruchi'a libí'ili' ulábali' guichi ni lógaca yúgu'të böchi' luzá'aru' nabábagakië' Cristo.

²⁸ Rinábida'-në' Xanru' Jesucristo uzá' lädxë'ë queëli' le náacagaca dxi'a queë'. ¡ca' gaca!

DIDZA' BUROPI GUSÖL-LË'Ë PABLO YÖDZÖ TESALÓNICA

Pablo rugapë' Dios bönachi queë' Cristo nacué' Tesalónica

¹ Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'. ² Rinábitu' Xúziru' Dios, en Xanru' Jesucristo, uzá' ládxë'ë queëli', en gunë' ga soa dxi icja ládxi'do'oli'.

Dios ichúguië' quégaca bönachi dul-la' ila'nítigaca cate' huödë' Cristo

³ Ral-la' guítica'stu'-në' Dios: "Xclenu'" ca naca queëli', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxí'ili' luzá'ali' tulí' ia'tulí' zeaj rácarö idú. ⁴ Que lë ni na', len yöl-la' rudzeja riguixjö'ötu' ca naca queëli' lógaca bönachi queë' Dios ni, tu' ribözali' zxön ladxi', en réajlë'ëli' Dios sal-la' ta'biada' ládxi'gaca bönachi libí'ili', en rigufí' rizáca'da'ali', pero ruá' rilenlí' yúgu'të. ⁵ Yugu' lë ni taca bë' naca tsahuí' ca ruchi'a rusööröë' Dios bönachi. Ru'ë lataj rigufí' rizáca'li' na'a, para gácali' lesaca' tsázali' ga ni' rinná bë'ë Lë'.

⁶ Naca tsahuí' ca gunë' Dios, ubi'ë quégaca nupa tu'saca' zí' libí'ili', gunë' ga ila'guí' ila'zaca' nupa na'. ⁷ Ia'stú, libí'ili' rigufí' rizáca'li' na'a, ate' ubi'ë Dios queëli', gunë' ga uzí' ládxi'li' tsözxön len netu', dza ni' ila' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxön, en ulu'lu'ë lahui yöl-la' huáca zxön queë'. ⁸ Ilá' lahuë' Cristo dza ni' ca tu'guí' zxön cate' ni' gunë' zí' nupa bití' núnbë'gaca Dios, en bití' túngaca ca rnna didza' dxi'a queë' Xanru' Jesucristo. ⁹ Yugu' bönni' caní, uzí' lëbë' légaquië', ate' tsaz tsöjtsázagaquië' lu guí' gabila. Ilá'cuitë' tsaz lahuë' Xanru', ca nalá'gaca yöl-la' zxön queë', en yöl-la' huáca queë'. ¹⁰ Caní gaca dza ni' cate' huödë' para gaca queë' yöl-la' ba ni'a que le nácgaca bönachi lá'ayi queë', ate' ulu'bani ni'a que le benë' ga nácgaca yúgu'të nupa ta'yéajlë' Lë'. Caní gaca ca' queëli' tu' guyéajlë'ëli' le bentu' ba nalí que loli' ca naca queë' Jesús.

¹¹ Que lë ni na' ca', rulídzatica'stu'-në' Dios queëru', en rinábitu'-në' gácalenë' libí'ili', en gunë' ga gácali' lesaca' idéli'li' lë na' bulidzë' libí'ili' para uzí'ili' xibë. Lësca' rinábitu'-në' gunë' ga gaca idú yúgu'të le ruí' ládxi'li' gunlí' le naca dxi'a, en yúgu'të dxin runlí' lu yöl-la' réajlë' queëli' Lë'. Len yöl-la' huáca queë' Dios huáca gunlí' lë ni. ¹² Caní gaca, gaca yöl-la' ba que Lë' Xanru' Jesucristo ni'a que le runlí', ate' gácali' libí'ili' bica' ba ni'a que le gunë' Lë', gaca ca naca le buzá' ládxë'ë queëli' Dios queëru', enca' Xanru' Jesucristo.

2

Ulu'i lahuë' Bönni' Xihui'

¹ Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' loli', böchi' luzá'atu', ² para cabí' güi'ili' lataj nu gun chixi libí'ili' ca nácgaca le guzxí' lu ná'ali'. Bití' cuéqui böniga icja ládxi'do'oli' ni'a que bi ta'nnë' bönni' ta'z' yë'ë, ta'nnë' zóalenë' Dios Bö' Lá'ayi légaquië', o ni'a que bi didza' tu'i bönachi, o ni'a que bi nazúaj tu lu guichi ta'nnë' netu' gusöl-la'tu', le rnna: "Chigudödi dza huödë' Xanru'." ³ Bití' ca' güi'ili' lataj nu si' ye'e libí'ili', tu' cabí' idxín dza ni' huödë' Jesús channö cabí' ila'la' lahui zí'alö zían nupa ila'dá'baga' Dios, ate' ilá' lahuë' Bönni' Xihui', bönni' na' ral-la' tsázíë' lu guí' gabila. ⁴ Bönni' ni uzáguë'ë, ate' lu yöl-la' run ba zxön cuinë' tá'baguë'ë yúgu'të le nequi queë' Dios, o le tun zxön bönachi lu yöl-la' run Dios bal quéguequi. Gunë' bönni' na' caní ga idxintë cö'ë ca Dios caz lu yudo' ga naca xilatjë' Dios, en gun cuinë' ca Dios.

⁵ ¿Naru' cabí' röjneli' busiyönda' libí'ili' yugu' lë ni cate' ni' zóalena' libí'ili'? ⁶ Na'a, núnbë'ëli' Nu ruzaga' xinözë' Bönni' Xihui' na', para cabí' ilá' lahuë' zí'alö ga idxinrö dza queë'. ⁷ Chirún dxin le nagachi' que le naca xihui', pero ná'atë zoa Nu ruzaga' xinözë' Bönni' Xihui' na' ga idxinrö dza ucuita cuini Nu na' ruzaga' xinözë'. ⁸ Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítie' lë' len le tsépi yösa bení' que dza huödë'. ⁹ Cate' idxinë' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí' nácátë, gunë' yúgu'të yöl-la' huáca zxön, en yúgu'të le ilaca bë', en yúgu'të le ilún ga ulu'bani bönachi. ¹⁰ Len yöl-la' huáca que le cabí' nácátë, gunë' caní lógaca nupa ila'niti tu' cabí' gula'z' lu në' eguequi idú ládxi'guequi le naca idútë li, para ulu'láguequi. ¹¹ Que lë ni na' Dios gu'ë lataj idxín quéguequi tu nu run yöl-la' huáca, nu si' ye'e léguequi para ila'yéajlë' le cabí' nácátë. ¹² Caní gaca para ila'baga' xígua' yúgu'të nupa bití' gula'yéajlë' le naca idútë li, pero gula'yaza ládxi'gaca le cabí' naca tsahuí'.

Nupa gurö cazë' Dios para ulu'lágaca

¹³ Böchi' luzá'atu', libí'ili' na' nadxí'inē' Xanru' libí'ili', ral-la' guíetica'stu'-nē' Dios: "Xclenu'" ni'a que le naca queéli', tu' chigurō cazē' Dios libí'ili' dza ni'te para uláli' ni'a que le runē' Dios Bō' Lá'ayi, para gácali' idú tsahui' tu' réajlě'ēli' le naca idútě li. ¹⁴ Para gaca caní queéli', Dios caz bulidzē' libí'ili', para idéli'li' gunli' tsōzxōn Xanru' Jesucristo lu bení' queē'. Caní gaca ni'a que didza' dxi'a runtu' libán que.

¹⁵ Que lē ni na', böchi' luzá'atu', guli'sóa tsutsu, en guli'gún chi'i didza' na' nazédali', le bē'lentu' libí'ili', en buzúajtu' queéli' lu guichi. ¹⁶⁻¹⁷ Rinábitu'-nē' Xanru' Jesucristo, en Xúziru' Dios, utipē' ládxi'li', en gunē' ga gácali' tsutsu ca naca yúgu'tě le naca tsahui' runli', en yúgu'tě didza' dxi'a ruí'ili'. Lē cazē' nadxí'inē' rē'u, en bennē' queēru' le ruhuí' zōxōntica'sō rē'u, en le naca dxi'a runru' lōza, yugu' lē na' buzá' ládxi'ē Dios queēru'.

3

Le ral-la' inábiru'-nē' Dios

¹ Ia'stú, böchi' luzá'atu', buli'lidzē' Dios, en inábili'-nē' gácalenē' netu', runtu' libán ni, para sē xtídzē'ē Xanru', ate' ilún le bal bōnachi, para gaca ni ca na' guca ga ni' zóali' libí'ili'. ² Inábili'-nē' ca' para ulatu' lu ná'agaquiē' bōnni' xihui' tuá' dō', tu' cabí ta'yéajlě' yúgu'tě bōnachi Dios. ³ Na'a, tu' runē' Xanru' ca rnnē', gunē' ga gácali' tsutsu, en gun chi'ē libí'ili', para cabí idzunli' lu na' tu' xihui'. ⁴ Ruzxōni ládxi'tu'-nē' Xanru' ca naca queéli', gunli' yugu' lē ni si' gunábitu' libí'ili', ca na' chirunli'. ⁵ Rinábitu'-nē' Xanru' usē'ē ládxi'li' para idxí'ili'-nē' Dios, en cōzali' zōxn ladxí' ca na' benē' Cristo.

Ca run bayudxi gunru' dxin

⁶ Ni'a que Lé' Xanru' Jesucristo ruchí'atu' libí'ili', böchi' luzá'atu', icuítali' ga nacu'ē böchi' luzá'aru' ta'dasē' ca', en bití' tunē' ca naca xibá buséditu' libí'ili'. ⁷ Nōz quézili' ral-la' gunli' ca runtu' netu'. Bití' gudásitu' ca' netu' ga ni' zóali'. ⁸ Bití' gudágusōtu' le bēnnali' queētu', pero lu yōl-la' ruúbi rugu'i, en lu yōl-la' ricuidi' bentu' dxin rēla, en te dza para cabí usaca' zí'itu' nituli' libí'ili'. ⁹ Caní bentu' para gácatu' loli' ca tu le luluf'i libí'ili' ca ral-la' gunli', sal-la' dē lu na'tu' inábatu' bi gunli' queētu'. ¹⁰ Lē'sca' cate' ni' guzóalentu' libí'ili', buchí'atu' libí'ili' caní, le rnna: "Channō cabí rē'ēnē' nu bōnni' gunē' dxin, bití' gūf'ili' le gahuē'." ¹¹ Canísō rnnatu' tu' riyōnitu' nútsa'gaquiē' ládjali' yugu' bōnni' ta'dasē' ca', bití' bi dxin tunē', pero ta'dasē' ca' bi tun bi ta'nnē'. ¹² Ni'a queē' Xanru' Jesucristo ruchí'atu' yugu' bōnni' tunē' caní, en richízatu' icja nágagaquiē' ilunē' dxin lu yōl-la' ribōza dxi'ado', para gaca ilahuē' le nequi quégacasē'.

¹³ Na'a, böchi' luzá'atu', bití' soa dxili', gúntica'sili' le naca dxi'a. ¹⁴ Channō nūti'tēs bōnni' bití' gunē' ca rnna xtídzá'tu', le ruzúajtu' lu guichi ni, guli'gún ga gaca bē'ē bōnni' na', en bití' gunli' tsōzxōnlē' para utuf'inē'. ¹⁵ Bití' ral-la' ilé'eli'-nē' ca tu bōnni' bití' rilé'enē' libí'ili' dxi'a, pero guli'sá' ládxi'ē ca böchi' cázali'.

Pablo rigu'ē lu nē'ē Dios yugu' böchi'ru' nacu'ē Tesalónica

¹⁶ Rinábitu'-nē' Xanru' gúntica'sē' ga cuía dxi icja ládxi'do'oli' ca naca yúgu'tě le runli', en sóalenē' yúgu'těli'. Lē cazē' runē' ga rō'ō dxi icja ládxi'do'oru'.

¹⁷ Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bē' yúgu'tě guichi risōl-la'a. Canísō ruzúaja' lu guichi. ¹⁸ ¡Le ruzá' ládxi'ē Xanru' Jesucristo queēru' gaca queéli' yúgu'těli'! ¡Ca' gaca!

DIDZA' ZÍ'ALÖ GUSÖL-LË'Ë PABLO QUEËBI' BI' TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasöl-lë'ë Jesucristo. Caní naca' tu' caní gunná bē'ë Dios, Nu rusölá rē'u, enca' tu' gunná bē'ë caní Xanru' Jesucristo, Nu na' runru' löza. ² Rugapa' Dios li', bōcha'ado' Timoteo. Nacu' ca zxi'ini caza' tu' benru' tsōzxōn xichinē' Dios. Rinábida'-nē' Xúziru' Dios, enca' Xanru' Jesucristo uzá' ládxē'ë quiu', en huéchi' ládxē'ë li', en gunē' ga soa dxi icja ládxí'do'o.

Pablo rusē'ë ládxí'bi' Timoteo ca naca xibá cabí naca idú

³ Ráta'yua' lo' na'a gunu' ca na' gúta'yua' lo' cate' ni' gуйяя' luyú Macedonia, para ugá'anu' lu yōdzō Éfeso, en inná bé'enu' bal-lē' bönni' ni' cabí ulu'sédinē' tu' xibá yúbölö, ⁴ en cabí ilunē' zxon yugu' didza' ridasö, en lágaca zíanterö cō' xuz xtó'ogaca bōnachi, yugu' le tun ga tuf'i ládxí'gaca bōnachi le nácagaca nítisö. Yugu' le caní bití' tun tsutsu bōnachi queē' Dios ca naca le ta'yéajlē' Lē'.

⁵ Le rē'ëni gun lē ni rea' li', naca para ila' dxi'i bōnachi luzē'eguequi, naca idú ládxí'gaca, en gaca dxi'a le ta'zá' ládxí'gaca, en gaca idú le ta'yéajlē' Dios. ⁶ Ca nácagaca lē ni, bití' bulu'rúajē' bal-lē' bönni' dxi'a, pero gula'guélē'ë tu' nöza yúbölö, en tunē' bal yugu' le bití' nácatē. ⁷ Tē'ënnē' ulu'sédinē' bōnachi ca naca le rinná bē' xibá queē' Dios, sal-la' bití' ta'yéajni'inē' lē na' tu'sédinē', en bití' ta'yéajni'inē' le ta'nnē' nácatē.

⁸ Rē'u nöziru' naca dxi'a xibá gunná bē'ë Dios, channö nu rugún le dxin ca ral-la' gun. ⁹ Lē ni nöziru': Dios gudixjē' xibá queē', calēga para inná be'e bōnachi tsahui', pero para inná be'e bōnachi caní:

Nupa ta'dá'bagá' le rinná bē' xibá na'.

Nupa bití' túngaca ca rinná bē' xibá na'.

Nupa tu'cá'ana Dios cá'asö.

Nupa tun le naca xihui'.

Nupa bití' túngaca Dios zxon.

Nupa tu'cá'ana le nequi queē' Dios cá'asö.

Nupa tuti xuz xiná'aguequi.

Nupa tuti bōnachi.

¹⁰ Nupa tun le ruá' dö'.

Yugu' bönni' nacuá'lenē' la' löjōdxi bönni'gaquiē'.

Nupa ta'bán yugu' bi'ido'.

Nupa ta'zì' yē'.

Nupa tun tsutsu xtídza'guequi, ta'nná le cabí nácatē.

Nupa ta'dá'bagá yugu' xibá tsahui'.

¹¹ Nöziru' naca caní tu' bidxín queēru' didza' dxi'a buzá' ládxē'ë Dios queēru'. Lē' náquiē' lá'ayi, en budödē' lu na'a didza' dxi'a na' runa' libán que.

Pablo rē' Cristo: "Xclenu'" tu' buéchi' ládxē'ë lē'

¹² Rea'-nē' Xanru' Jesucristo, Nu rutípa ládxá'a, "Xclenu'" tu' buzxoní ládxē'ë neda', en buzöé' neda' guna' xichinē'. ¹³ Caní benē' sal-la' zí'alö neda' gunné' zì'a queē', en gudxiá ládxá'a bōnachi queē', en zían le bi'a dö' quéguequi, pero Cristo buéchi' ládxē'ë neda', tu' bena' caní lu yöl-la' bití' réajni' quia' cate' ni' bití' réajlē'ënida' Lē'. ¹⁴ Na'a, zxonterö naca le buzá' ládxē'ë quia' Xanru' Jesucristo, lē na' run ga réajlē'ëru' Lē', enca' ga nadxi'iru'-nē'.

¹⁵ Didza' iduté' li lē ni, en le naca lesaca' ila'zì' lu ná'agaca yúgu'tē bōnachi, le rnna: Lē cazē' Jesucristo bidē' yōdzölíö ni para busölē' bōnachi dul-la', ate' busölē' neda' sal-la' nácara' bönni' dul-la' ca yúgu'tē bōnachi. ¹⁶ Que lē ni na' buéchi' ládxē'ë neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxon ladxí' idú queē', para gaca' tu le rulu'i lógaca nupa ila'yéajlē' Lē', en gata' quéguequi yöl-la' na'bán idú. ¹⁷ Na'a rnní'a: ¡Yöl-la' ba Dios, Nu rinná bē'tica'sö, Nu catu caz údxi que, en Nu bití' gaca ilē'ëru', la's dui Dios Nu nözi caz yúgu'tē! ¡Queē' Lē' gácatíca'sö yöl-la' run bal, en yöl-la' ba, na'a dza, en yúgu'tē dza zá'gaca! ¡Ca' gaca!

¹⁸ Zxi'ina'do' Timoteo, rudōda' lu no'o xibá ni para gunu' xichinē' Dios ca runē' tu bönni' idú ládxē'ë rejē' gudil-la, en para uzi'u xibé yugu' le gula'guixjō' zí'alö nupa ni' gulu'i' didza' uláz queē' Dios ca gaca quiu'. ¹⁹ Len yöl-la' réajlē' quiu' Cristo ral-la' gunu' caní, naca idú dxi'a icja ládxí'do'o. Chígula'chixi gula'nigui bal-la bōnachi, nupa bulu'zóa tsölá'alö le

réajlë'ëru' Cristo. ²⁰ Caní gulunë' Himeneo, en Alejandro, nupa na' busana' lu na' Satanás tu' xihui' para ila'zëdë' ca ral-la' ilunë', para cabirö ila'nnë' zi'ë que le nequi queë' Dios.

2

Le rusedi rë'u ulídzaru'-në' Dios

¹ Que lë ni na' le naca lo le richizia' icja nágagaca bönachi naca ca ral-la' ulídzaru'-në' Dios, en ca ral-la' gáta'yuru' lahuë', en ca ral-la' inábiru'-në' gunnë' bi riquíniru', en ca ral-la' guiëru'-në': "Xclenu'." Yugu' lë ni ral-la' gunru' uláz quéguequi yúgu'të bönachi. ² Lësca' caní ral-la' gunru' uláz quégaca nupa ta'nná bë', en quégaca yúgu'të nupa nágagaca lo. Caní ral-la' gunru' para gaca dxi'a queëru', en gata' queëru' yöl-la' ribôza tsáhui'do'. Ral-la' gunru' caní lu yöl-la' réajlë' queëru' Dios, en lu yöl-la' ba'a ladxí' queëru'. ³ Lë ni naca dxi'a, en le raza ládxë'ë Dios, Nu rusólá rë'u. ⁴ Dios caz rë'enë' ulu'lágaca yúgu'të bönachi, en rë'enë' ilúnbë'e le naca idútë li. ⁵ Tuzë' náquië' Dios, en tuzë' bönni' ruúnë' dzaga Dios, en bönachi. Nu ni naca Jesucristo, Nu gulaj bönachi. ⁶ Lë cazë' budôdi cuinë' lu yöl-la' guti, le benë' tu' nôzi dul-la' nabága' gaca yúgu'të bönachi. Dios benë' ba nali queë' cate' bidxin dza queë' gútië'. ⁷ Ca naca lë ni, Dios buzóë' neda' para guna' libán que, en gaca' gubáz nasöl-lë'ë Cristo, para usédigacada' bönachi izá'a ca naca le réajlë'ëru' Cristo, en ca naca le naca idútë li. Riliteda', en biti' ca' rizí' yë'a.

⁸ Na'a, rë'ënda' ulu'lidzë' bönni' Dios, en iláta'yuë' lahuë' gátitës, nácagaquië' idú dxi'a, en cabí ila'lenë' luzá'agaquië', en cabí ila'dil-la dídza'gaquië'. ⁹ Lësca' caní, rë'ënda' ilácunu nigula le naca ba'a. Le naca lachi le ral-la' ulu'lu'ínu lahui naca yöl-la' nòxaj ladxí', en le naca idú ladxí', en calëga le tu'pá'asinu icja lógacanu len oro, en yugu' bugá, en lari' nazáca'da'. ¹⁰ Yugu' le dxi'a tunnu ulu'lu'i lahui le nácagacanu ca na' run le tácunu le naca ba'a. Caní ral-la' ilunnu nigula núnbë'gacanu Dios. ¹¹ Ral-la' ila'cuá'anu yugu' nigula dxisö cate' nu rusedi légacanu, en ila'cuá'anu nòxaj. ¹² Biti' runna' yugu' nigula lataj ulu'sédinu, en calëga ila'nná bé'enu yugu' bönni'. Ral-la' ila'cuá'anu dxisö ga nudúbigaca bönachi queë' Cristo. ¹³ Caní ral-la' gaca, tu' buzóë' Dios zí'alö Adán, atë' gudôdi na' buzóë'-nu Eva. ¹⁴ Adán na', biti' guzxi' ye'e tu' xihui' lë', pero nigula queë', guzxi' ye'e lënu. Caní guca, gudítsjanu xibá queë' Dios, ¹⁵ pero ulanu nu nigula ruzóanu-bi' bí'ido' channö gúntica'sinu ca röljölz le réajlë'ëru' Dios, en yöl-la' nadxí'i, en channö gácanu idú dxi'a, en idú ladxí'.

3

Ca ral-la' ilácagaquië' bönni' tapa chi'ë bönachi queë' Cristo

¹ Didza' idútë li lë ni rnna: Channö ru'í láchxë'ë nu bönni' gáquië' nu gapa chi'i bönachi queë' Cristo, dxin dxi'a rizë láchxë'ë. ² Nu bönni' rapa chi'ë bönachi queë' Cristo run bayudxi gáquië'.

Tu bönni' cuntu nu gaca bi innë queë'.

Zoa túzinu nigula queë'.

Ral-la' gáquië' ban ladxí', en idú ladxí', en nòxaj ladxí'.

Ral-la' gu'ë ga ila'cu'ë böchi'ru' ta'dxinë' lidxë'.

Ral-la' gáquië' bönni' nazéqui'de'enë' usédinë' bönachi.

³ Biti' gáquië' bönni' re'jë', en calëga bönni' sínia'.

Biti' gáquië' bönni' rizë láchxí'së' si'ë dumi.

Ral-la' gáquië' bönni' dxi'i ladxí', en zxön ladxí'.

Biti' gáquië' bönni' ruhuídi'në'.

⁴ Ral-la' gáquië' bönni' rinná bé'enë' dxi'a bönachi nacué' lidxë'.

Ral-la' ilunbi' zxi'inë' ca rnna xidzë'ë lu yöl-la' run bal xúzgacabi'.

⁵ ¿Naru' huácatsö tu bönni' gapa chi'ë bönachi queë' Dios channö cabí raca inná bé'enë' dxi'a bönachi nacué' lidxë'? ⁶ Biti' ral-la' gáquië' tu bönni' si' gusi lahuë' të'ë Cristo, para cabí tódi bë' gun ba zxön cuinë', en biti' gaca queë' ca na' guca que tu' xihui', nu ben ba zxön tuini, atë' Dios guchúguië' que tsójgá'ana lataj chul-la'. ⁷ Lësca' ral-la' gáquië' bönni' ta'nná dxi'a queë' nupa cabí nabábagaca bönachi queë' Cristo, para cabí soa nu uzóla lë' tsólá'alö, en para cabí idzunë' lu yalaj que tu' xihui'.

Ca ral-la' iláquië' bönni' tácalenë' bönachi queë' Cristo

⁸ Lësca' caní ral-la' iláquië' bönni' tácalenë' bönachi queë' Cristo:

Ral-la' iláquië' bönni' idú láchxí'gaquië'.

Biti' iláquië' bönni' tu'rixë' didza'.

Biti' iláquië' bönni' té'ajë'.

Biti' iláquië' bönni' ta'zé láchxí'së' dumi.

⁹ Ral-la' gaca ilapa chi'ë idútë le réajlë'ëru' Cristo.

Ral-la' ilaca idú dxi'a icja láchxí'do'gaquië'.

¹⁰ Yugu' bönni' ni ral-la' si' b'ë'li' légaquie' z'älö, ate' n'irö gata' lu ná'agaquie' ilácalenë' bönachi queë' Cristo, channö cabí zoa nu gaca bi innë quégaquie'. ¹¹ Lësca' caní, nigula que queëgaquie' ral-la' ila'cuá'anu idú ládxi'gacanu, en cabí ilácanu unnë que luz'é. Ral-la' ilácanu zxon ladxí, en ilácanu li ladxí' lu yúgu'të le tunnu. ¹² Yugu' bönni' ilácalenë' bönachi queë' Cristo ral-la' soa túzinu nigula que queëgaquie'. Lësca' ral-la' ila'nná b'ë'enë' dxi'a zxi'inigaquie', enca' bönachi ulidxi que queëgaquie'. ¹³ Run bayudxi gaca caní, tu' ta'déli'në' lataj ga ilún bal bönachi xtídza'gaquie', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxí' para ilu'ë didza' ca naca le réajlë'ëru' Jesucristo.

Le bigachi' que le reaj ládxi'ru'-në' Dios

¹⁴ Yugu' didza' ni ruzúaja' quiu' lu guichi, sal-la' runa' löza uduyútea' li'. ¹⁵ Channö huadzéda', ruzúaja' quiu' didza' ni para inózinu' naca ral-la' gunu' lógaca bönachi nacua' lidxë' Dios, nupa nácacaga bönachi queë' Dios ban, en nácacaga tsutsu, en ta'guixjō' dxi'a le naca idütë li. Nácacaga ca yugu' ya' zxon, en le nunida'gaca zō'ō, le nácacaga tsutsu, en ta'zōn yu'u. ¹⁶ Le nácatë, zxöntërō naca le bigachi' que le reaj ládxi'ru'-në' Dios, ca na' nazúaj lu guichi le rnna:

Dios buluf'i lahuë', gúquie' bönachi.

Guca bë' náquie' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lógaca bönachi izá'a.

Gula'yéajlë' bönachi yödžolió Lë'.

Dios buchisë' Lë' xitsá' ga nayëpisëtërë'.

4

Nupa ulu'huđaj ládxi'gaca ca naca le réajlë'ëru'-në' Cristo

¹ Yálajdo' riguixjō'ë Dios Bö' Lá'ayi, rnnë': Dza tsöjsëtëgaca, ila'dá'baga' bal-la bönachi Cristo. Ulu'huđaj ládxi'gaquie' ca naca le réajlë'ëru' Cristo. Ulu'zë nágagaquie' xtídza'gaca bönachi nacua'len bö' ta'zi' yë' léguequi, ate' ulu'zë nágagaquie' yugu' xibá quéguequi bö' xihui'. ² Ulu'zë nágagaquie' xtídza'gaca bönachi tu'lu'isō tsahui' cuinguequi. Yugu' bönachi na' tu'i didza' le cabí nácatë, en chinazidi ládxi'do'guequi, para cabí uxōsa léguequi. ³ Caní naca, tu' zágue'ë xinóžguequi nupa tē'ni ulu'tsaga ná'agaca, en ta'nná b'ë'enë' bönachi para cabí ilágugaca le nagu'ë Dios para uzí'iru' xibé, lë na' huáca ilágugaca nupa ta'yéajlë' Dios, nupa ná' chinunbë'gaca le naca idütë li, en tē' Dios: "Xclenu" cate' tahuë' le. ⁴ Dxi'a naca yúgu'të le benë' Dios, en biti' bi ral-la' uzóaru' tsólá'alō channö ráguru' le, en rëru'-në' Dios: "Xclenu". ⁵ Rusedi xtídžë'ë Dios rë'u, Lë' ünë' dxi'a yúgu'të le gáguru' channö ulídžaru'-në' Dios, en inábiru'-në' gun lá'ayë' lë na' gáguru'.

Ca rurúajë' dxi'a huen dxin queë' Jesucristo

⁶ Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazëdu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chi'u. ⁷ Gurú'una yugu' didza' ridasō que yödžolió ca naca didza' tu'ínu yugu' nigula gula. Béntica'sō le gun ga gácarō nál-la ni'a no'o, pero idú uzi'u xibé gunu' ca rë'ënë' Dios. ⁸ Láti'do'os uzi'u xibé gunu' le gun ga gácarō nál-la ni'a no'o, pero idú uzi'u xibé gunu' ca rë'ënë' Dios. Cate' runru' caní, lë ni run ga runru' löza sóaru' ibanru' yödžolió ni, enca' sóaru' ibanru' dza zá'gaca, tōdi uzá'aru' yödžolió ni. ⁹ Didza' idütë li lë ni, en le naca lesaca' ila'zi' lu ná'agaca yúgu'të bönachi. ¹⁰ Que lë ni na', rusáca'da' zi' cuinru' runru' dxin, tu' runru' löza Dios ban. Cristo gútië' para usölë' yúgu'të bönachi. Tu'zi' xibé le benë' nupa na' ta'yéajlë' Lë'.

¹¹ Gunná b'ë, en busesi bönachi ilún yugu' lë ni. ¹² Cuntu nu ral-la' uzóa li' tsólá'alō tu' nacu' bi'i ra'bán, pero ral-la' gunu' le uluf'i nupa ta'yéajlë' Dios ral-la' ilún ca runu' li'. Caní uluf'ínu' légaquie':

Len didza' ru'u, en len le runu'.

Ca nadxi'ínu' luzó'o, en ca ru'u lataj zóalenë' Dios Bö' Lá'ayi li'.

Ca runu' ca rnno', en ca nacu' idú tsahui'.

¹³ Tsanni za'a idxina' quiu', bē'tica'sō ladxí' ulabu' guichi lá'ayi lógaca bönachi nacua' ga ni' zu'. Guchiza icja nágagaquie' lë ni, en busesi légaquie'. ¹⁴ Biti' udōdu' cá'asō le buzá' ládxë'ë Dios quiu', lë na' bennë' quiu' ca na' gula'nná nupa ni' guluf'i didza' uláz queë' Dios, cate' ni' bönni' gula tapa chi'ë bönachi queë' Cristo gula'xóa ná'agaquie' li', en bulu'lidzë' Dios.

¹⁵ Béntica'sō yugu' lë ni. Bē'tica'sō ládxu'u gunu' caní, para ila'lé'e yúgu'të bönachi ca na' zeaj ridéli'nu' le nequi queë' Cristo. ¹⁶ Gudapa chi'i cuinu', en gudapa chi'i xibá rusédiru'. Béntica'sō yugu' lë ni, ate' channö gunu' caní, uló' li', en ulu'lágaca ca' nupa ila'yōni li'.

5

Ca ral-la' gunbi' Timoteo ni'a quégaca bönachi queë' Cristo

¹ Biti' uzenu' bach yugu' bönni' gula, pero guchiza icja nágagaquië' didza', tsca nácacagaquië' xuz cazu'.

Guchiza icja nágagacabi' bi'i bönni' ra'bán didza', tsca nácacagabi' bi'i böchi' cazu'.

² Guchiza icja nágagacanu nigula gula didza', tsca nácacagacu xiná' cazu'.

Guchiza icja nágagacabi' bi'i nigula ra'bán didza', tsca nácacagabi' bi'i zan cazu', ca na' röjlöz le naca idú dxi'a.

³ Ben bal yugu' nigula ba guti bönni' que queégacanu, nácacagacu túzinu. ⁴ Channö zóanu tu nigula caní nacua'abi' bi'i queënu o xzí'ini xi'sóanu, ral-la' ila' zédabi' ilunbi' ca rë'ënë' Dios, para ilácalenbi' zí'alö bönachi nacua' lidxigacabi', en ulu'bi'ibi' quégaquië' xuz xiná'agacabi'. Lë ni naca dxi'a, en le raza ládxi'ë Dios. ⁵ Na'a, nigula na' nagá'ananu túzinu, runnu löza Dios, ate' rëla, en te dza rinábatca'sinu lahuë' Dios, en rulídzanu Lë' ni'a quégaca bönachi queë', ⁶ pero nigula túzinu na' runnu ca naca le rizé ládxi'nu nácanu ca tu nigula chinátinu cate' ni zóanu nabannu. ⁷ Lësca' caní, gunná be'e bönachi nacua' ga ni' zu', para ilün ca sa'yéaj yugu' lë ni, para ilaca bönachi cuntú nu gaca bi inné quéguequi. ⁸ Channö zoa nu bönni' cabí rugahuë' yugu' di'a dza queë', en le nácarö lo, channö cabí rugahuë' bönachi nacua' lidxë', chigudá'baguë'ë le réajlë'ëru' Cristo, en nácarë' xihui' ca nu cabí réajlë' Dios.

⁹ Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí bucá'ananu-në' bönni' queënu para sóalennu-në' ia' tüë' bönni'. ¹⁰ Run bayudxi soa nu gun ba nalí queënu ca nácacaga le dxi'a runnu.

Gácalenli'-nu channö buscúlunu-bi' yugu' bí'ido', en channö ru'ínu ga ila'cuá' böchi'ru' zá'gaquië' yödzö zi'tu', en channö ru'ínu le ilë'aj ilágugaca bönachi queë' Dios, en channö rácalennu nupa ta'guí' ta'zaca', en channö rúntica'sinu yúgu'të le naca dxi'a.

¹¹ Yugu' nigula túzinu bití' yu'igacanu tsónnalalaj iz, bití' ibábagacanu nupa gácalenli', tu' ilunnu ca ta'zësö ládxi'gacanu, en ila'dá'baga'nu Cristo, en ilë'ëninu ulu'tsaga ná'agacanu leyúbölö. ¹² Caní gaca, ila'baga'nu dul-la' tu' tu'zóanu tsölá'alö le gula'yéajlë'ënu Cristo zí'alö. ¹³ Lësca' ilácanu nigula xöhuëdi, en nigula ta'dasö ca', en calégasö ilácanu xöhuëdi, pero lësca' ilácanu nigula inné que luz'é, en tsöjgútsa'gacanu ga yúbölö, en ila'nnanu le cabí nácatë. ¹⁴ Que lë ni na', rë'ënda' ulu'tsaga ná'gacanu leyúbölö nigula túzinu caní yú'ugacanu iz cuidí', en ulu'scúlunu-bi' yugu' bí'ido', en ila'nná bé'ënu bi'i nacua'abi' yu'u que quégacanu, para cabí ilu'ínu nu ridá'baga' rë'u lataj bi inné queëru', rë'u na' réajlë'ëru' Cristo. ¹⁵ Caní ral-la' gaca, tu' chibulu'biga'nu bál-lagacacnu, ate' tunnu ca rë'ëni Satanás tu' xihui'.

¹⁶ Channö nútí'tës bönni' o nigula nu réajlë' Cristo, nacua'anu nigula túzinu lidxigaca nupa na', ral-la' ilácalen légacanu, para cabí ulu'saca' zí' bönachi queë' Cristo. Caní gaca, bönachi queë' Cristo na' gaca ilácalen yugu' nigula nagá'anagacanu túzinu.

¹⁷ Benró bal yugu' bönni' gula tapa chí'ë bönachi queë' Cristo, yugu' bönni' na' ta'nná bë'ë dxi'a, en bëntëro ca' bal yugu' bönni' gula na' tunë' dxin, tunë' libán, en tu'sédinë' bönachi. ¹⁸ Nazúaj lu guichi lá'ayi le rnna: "Biti' cu'u du ruá'aba' bédxi na' rulíbibá' zxoá' xtila." Rnna ca: "Náquië' lesaca' nu bönni' huen dxin si'ë lazxjë'."

¹⁹ Bití' si' lu no'o didza' ru'ínu ruzegui didza' tu bönni' gula rapa chí'ë bönachi queë' Cristo, channö cabí nacua' chopá tsonna nupa tun ba nalí que le benë'. ²⁰ Nupa túntica'sö dul-la', busidxi léguequi lógaca yúgu'të bönachi queë' Cristo para iladxi ia'zica'rö bönachi ni' Dios. ²¹ Ni'a queë' Xanru' Dios, en Xanru' Jesucristo, en ni'a quégaquië' gubáz lá'ayi rö queë', rinná bé'eda' li' gunu' ca ta'nná didza' ni. Tuz ca ral-la' uchi'a usöröu' yúgu'të bönachi, en bití' gunu' bal tuzë' bönni'. ²² Cuntu nu bönni' ixóatë no'o, cabí gunu' ga gáquië' huen dxin queë' Cristo, para cabí ibágu'u le runë' channö gunë' bönni' na' dul-la'.

²³ Bití'rö guí'ju' nísasö. Tu' rúntica'sö bayá' lë'u ral-la' guí'ju' láti'do' xisi uva nal-la para cö' dxi'a lë'u.

²⁴ Yugu' dul-la' quéguequi bal-la bönachi ila'lá' lahui zí'alö cate' si' ila'dxin ga uchi'a usöröë' Dios léguequi, ate' tödi ni' ila'lá' lahui dul-la' nabága'gaca ia'zica'rö bönachi. ²⁵ Lësca' caní, ila'lá' lahui dxin dxi'a núngaca bönachi, ate' channö cabí nalá'gaca lahui, cuntú nu bönni' gaca ucáchë'ë tsaz dxin na' nunë'.

6

¹ Yúgu'të bönni' nadó'ogaca ral-la' ilúndë'ë bal xángaqië', para cabí gaca nu inné zi' que La lá'ayi queë' Dios, en que xibá queë'. ² Nupa ni' nacué xángaca ta'yéajlë'ë Cristo, bití' ral-la' ulu'cá'ana cá'asö légaquië' tu' nácacagaquië' böchi'guequi. Ral-la' ilunrö dxi'a xichíngaqië'

tu' ta'yéajlë'ë Cristo, bönni' ni' tu'zi'ë xibé dxin dxi'a na', tu' nadxfi'inë' Lë cazë' légaquië'. Ca naca lë ni, busedí bönnachi nacua' ni', en guchiza le icja náagaguië'.

Le reaj lãdxi'ru'-në' Dios le ruzi'iru' xibé

³ Channö zoa nu bönni' rusëdinë' xibá yúbölö, en biti' rusëdinë' yugu' didza' dxi'a queë' Xanru' Jesucristo, ca naca xibá na' rusedi rë'u ca ral-la' gunru' ca rë'ënë' Dios, ⁴ bönni' ni run ba zxön cuinë', en biti' bi nözinë'. Didza' biti' naca dxi'a rizë lãdxë'ë ca nácgaga didza' böniga, en didza' bizxaj, yugu' le tun ga tu'zxë'e bönachi luzë'eguequi, en ta'dil-lalen luzë'eguequi didza'. Lësca' tun didza' caní ga ta'nnë'zi' bönachi que luzë'eguequi, en ta'zá lãdxi'gaca que luzë'eguequi le cabí nácatë. ⁵ Lësca' caní tun ga ta'dil-latíca'së' didza' bönni' biti' ta'yéajni'inë', nupa biti' nazi' lu në'eguequi le naca idútë li. Téquini huáca ila'zi' dumí zían channö ilúngaca tsözxön nupa ta'yéaj lãdxi'gaca Dios. Gucuíta ga nacua' bönachi caní. ⁶ Zxön naca le ruzi'iru' xibé cate' len yöl-la' riböza zxön lãdxi' reaj lãdxi'ru'-në' Dios. ⁷ Biti' bi nuá'aru' cate' ridxinru' yödölió, en lësca' caní, biti' bi uá'aru' cate' uzá'aru' yödölió ni. ⁸ Que lë ni na', channö dësö queëru' le gáguru', en le gácuru', ral-la' udzéjaru'. ⁹ Yugu' bönni' té'ënnë' gata' quégaquië' yöl-la' tsahui', gaca quégaquië' le si' bë' légaquië' le xihui', ate' ila'yu'ë lu yalaj que tu' xihui', ate' lu yöl-la' biti' bi nözi quégaquië' zían le ila'zë lãdxi'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'nítië' tsaz. ¹⁰ Tu' ta'zë lãdxi'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zë lãdxi'gaquië' le, bulu'cá'anë' le gula'yéajlë'ë Cristo, en chiraca quégaquië' zían le tu'saca'zi' légaquië'.

Nu run dxin queë' Cristo naca ca tu bönni' rejë' gudil-la

¹¹ Na'a, bönni' queë' Dios, gucuíta ga raca le caní. Bë'tica'sö lãdxu'u gunu' le naca tsahui', en le rë'ënë' Dios. Guyéajlë'tica'së' Cristo, en bidxfi' yugu' luzó'o.

Bë' lãdxi' gacu' zxön lãdxi', en nöxaj lãdxi'.

¹² Ca runë' tu bönni' idú lãdxë'ë rejë' gudil-la, ben dxin que le réajlë'ëru' Cristo, ate' beni' quiu' yöl-la' na'bán idú.

Para gaca caní bulidzë' Dios li'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zían nupa tun ba nali que didza' bë'u. ¹³⁻¹⁴ Ní'a queë' Xanru' Dios, Nu na' nabánigaca yúgu'të le nacua', enca' ni'a queë' Jesucristo, Nu ben ba nali le naca dxi'a le gunné' yálajdo' lahuë' Poncio Pilato, rinná bé'eda' li' gun chi'u yugu' lë na' gunná bé'enë' Cristo rë'u. Ral-la' gacu' idú tsahui', en biti' bi gunu' le güi'í lataj nu bi innë' quiu', ga idxintë dza ni' ulufi' lahuë' Xanru' Jesucristo. ¹⁵ Cate' idxín dza na' huödë' Jesús, Dios ulu'ë lahui Lë'.

jDios náquië' lá'ayi!

jTuzë' Lë' dë lu në'ë yöl-la' unná bë',

en rinná bé'enë' yúgu'të nupa ta'nná bë',

en náquië' ca' Xángaca yúgu'të nupa nácgaga xan!

¹⁶ jTuzë' Lë' zóaticá'së'!

jZöë' lu bení' ga biti' gaca nu idxín rácasö que!

jCatu caz nu bilé'e Lë', en biti' gaca nu ilé'e Lë'!

jQueë' Lë' gácatíca'sö le run Lë' bal, en yöl-la' unná bë'!

jCa' gaca!

¹⁷ Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxön cúingaguië', en para cabí ulu'zxöni lãdxi'gaquië' yöl-la' tsahui' na' biti' naca löza. jRal-la' ilunë' löza Dios ban, Nu rúnnada' queëru' yúgu'të le ruzi'iru' xibé! ¹⁸ Gunná be'e légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödjië' quégaca bönachi yechi', en ilu'í lãdxi'gaquië' léguequi. ¹⁹ Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

Le gulu'ë Pablo lu ná'abi' bi'i Timoteo

²⁰ Böcha'ado' Timoteo, ben chi'i le nadödi lu no'o. Gucuíta ga nacua' nupa tuí'i didza' cá'asö, en yugu' didza' biti' nazaca', en yugu' didza' bizxaj, yugu' didza' na' tuí'i nupa ta'nñasö tácada', ate' nazi' yé'eguequi ca naca lë na' tun. ²¹ Bal-la bönachi gula'zi' lu në'eguequi yugu' didza' caní, ate' gula'chixi gula'nigui ca naca le réajlë'ëru' Cristo.

Rinábida'-në' Dios uzá' lãdxë'ë quiu' le nácgaga dxi'a queë'.

jCa' gaca!

DIDZA' BUROPI GUSÖL-LĒ'Ē PABLO QUEËBI' BI'I TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasöl-lĕ'ĕ Cristo. Caní naca' tu' rĕ'ĕnĕ' Dios gaca' caní, para caní gaca le guzxi' lu nĕ'ĕ, gunnĕ' queëru' yöl-la' na'bán idú, le ruzá' ládxĕ'ĕ Jesucristo queëru'. ² Rugapa' Dios li', bócha'ado' Timoteo. Nacu' ca xzi'ini caza' tu' benru' tu xzön xichinĕ' Cristo, ate' nadxi'ida' li'. Rinábida'-nĕ' Xúziru' Dios, enca' Xanru' Jesucristo, uzá' ládxĕ'ĕ quiu', en huéchi' ládxĕ'ĕ li', en gunĕ' ga cō' dxi icja ládxĕ'ĕ do'o.

Timoteo ral-la' gunbi' ba nali queë' Jesucristo

³ Rea'-nĕ' Dios: "Xclenu" ca naca quiu' cate' rulidza'-nĕ' Dios. Biti' rizóa dxía' rinaba' ni'a quiu' rĕla, en te dza lahuĕ' Dios, Nu na' runa' xichinĕ' idú ládxa'a ca na' gulunĕ' xuz xtá'ahua'. ⁴ Cate' rōjneda' ca na' gurōdxu', rizĕ ládxa'a ulĕ'eda' li', para gaca udzĕjada' idú ládxa'a. ⁵ Rea'-nĕ' Dios: "Xclenu" tu' zoa le run ga rōjneda' ca réajlĕ'u Cristo idú ládxu'u. Lĕsca' caní, gula'yéajlĕ'ĕnu xinō' o gula Loida, enca' xinō' o Eunice Lĕ' zí'alō ca li', ate' runa' lōza, lĕsca' caní réajlĕ'u Lĕ' na'a.

⁶ Tu' naca caní, rusá'a ládxu'u para usubanu' le bennĕ' Dios quiu', lĕ na' bidxín quiu' cate' ni' guxóa na'a li', en bulidza'-nĕ' Dios. ⁷ Bō' na' bennĕ' Dios queëru' bití' naca tu bō' le gun ga gádxiru', pero bennĕ' queëru' Bō' Lá'ayi Nu run ga náparu' yöl-la' huáca, en run ga nadxi'iru' luzá'aru', en run ca' ga rinná be'e cuinru'. ⁸ Que lĕ ni na', bití' utuf'inu' gunu' ba nali queë' Xanru', en bití' utuf'inu' ca raca quia' neda' ni, nadzuna' lidxi guíĕ tu' runa' xichinĕ', pero ben tsōzxōn nupa ta'guí'i ta'zaca' tu' tun libán que didza' dxi'a. Dios gunnĕ' yöl-la' huáca quiu' para gunu' caní. ⁹ Dios caz busölĕ' rĕ'u, en bulidzĕ' rĕ'u para gácaru' idú dxi'a. Bití' bulidzĕ' rĕ'u tu' zoa le dxi'a benru', pero bulidzĕ' rĕ'u tu' gú'uni quézinĕ' Lĕ', en tu' ruzá' ládxĕ'ĕ caní queëru'. Dza ni'te buzōĕ' caní queëru' zí'atĕlō ca guta' yōdzōlió ni, tu' néquiru' queë' Jesucristo. ¹⁰ Na'a, chibuluf'i lahuĕ le ruzá' ládxĕ'ĕ Dios queëru', tu' buluf'i lahuĕ' Jesucristo Nu rusólá rĕ'u. Bugüĕ' yöl-la' guti, en bulu'e lahuĕ yöl-la' na'bán idú na', le cabí ca' initi. Caní naca ca rnna didza' dxi'a.

¹¹ Cristo buzōĕ' neda' para guna' libán que didza' dxi'a na', en para gaca' gubáz queë' para usĕdigacada' bōnachi izá'a. ¹² Que lĕ ni na' riguf'i rizáca'a ca' yugu' le raca quia' ni, pero bití' rutuf'ida', tu' núnbĕ'a Nu na' réajlĕ'a. Runa' lōza Lĕ', napĕ' yöl-la' huáca gapa chi'ĕ le budōda' lu nĕ'ĕ ga idxintĕ dza ni' huōĕ'.

¹³ Didza' dxi'a na' biyōnnu' bena' libán que ral-la' gaca quiu' tu le ruluf'i ca ral-la' usĕdinu' bōnachi ca réajlĕ'ĕru' Jesucristo, en ca nadxi'iru' Lĕ'. ¹⁴ Ben chi'i le naca dxi'a na' nadōdi lu no'o, ate' gaca gunu' caní len yöl-la' huáca queë' Dios Bō' Lá'ayi, Nu zóalen rĕ'u.

¹⁵ Chinōz quézinu' ca na' gulunĕ' zian bōnni' ta'yéajlĕ'ĕ Cristo nacu'ĕ luyú Asia bulu'béaj ládxĕ'gaquiĕ' neda'. Figelo, en Hermógenes nabábagaquiĕ' bōnni' ni. ¹⁶⁻¹⁷ Rinábida'-nĕ' Xanru' Dios huéchi' ládxĕ'ĕ bōnachi nacuá' lidxĕ' Onesíforo, tu' butipĕ' ládxa'a bōnni' ni zian luzuí. Cate' bidxinĕ' Roma, idú ládxĕ'ĕ buguiljĕ' neda', ate' budzōlinĕ' neda'. Bití' butuf'inĕ' ni'a quia' neda' tu' nadzuna' lidxi guíĕ ni, nága'a du guíĕ. ¹⁸ Rinábida'-nĕ' Xanru' huéchi' ládxĕ'ĕ lĕ' dza ni' idxinĕ' lahuĕ' Dios. Chinōz quézinu' ca na' gúcalenĕ' bōnni' ni rĕ'u, cate' ni' guzóaru' yōdzō Ēfeso.

2

Ral-la' gácabi' Timoteo ca tu bōnni' idú ládxĕ'ĕ rejĕ' gudil-la

¹ Na'a, xzi'ina'do', butipa ládxu'u ca naca le ruzá' ládxĕ'ĕ Jesucristo quiu'. ² Didza' biyōnnu' bĕ'a lógaca zían nupa tun ba nali que, didza' ni budōdi lu ná'agaquiĕ' bōnni' tunĕ' ca ta'nnĕ', bōnni' gaca ulu'sédinĕ' ca' ia'bal-la bōnachi.

³ Ral-la' guá' ilenu' le ulu'saca' li' zí' ca na' ruá' rilĕn nu naca bōnni' queë' Jesucristo idú ládxĕ'ĕ rejĕ' gudil-la. ⁴ Nu bōnni' rejĕ' gudil-la, bití' ca gútsĕ'ĕ yugu' le tun bōnachi yōdzōlió ni, para tsaza ládxĕ'ĕ bōnni' na' nuzōĕ' lĕ' gáquiĕ' bōnni' queë' rejĕ' gudil-la. ⁵ Lĕsca' caní, nu nutsa' lu huitaj, bití' bi'ideli' channō cabí run ca ral-la' gun. ⁶ Nu bōnni' gúz gú'una runĕ' dxin, zí'alō lĕ' uzi'ĕ xibĕ lĕ na' razĕ'. ⁷ Busá' ládxu'u lĕ ni rea' li', ate' Xanru' caz gunĕ' ga tséajni'inu' yúgu'tĕ.

⁸ Yōjné ca guca queë' Jesucristo. Guljĕ', en gúquiĕ' xzi'ini xi'sóĕ' David, en gudōdi gútiĕ', bubanĕ' lu yöl-la' guti. Caní rnna didza' dxi'a runa' libán que. ⁹ Tu' runa' libán que didza' dxi'a, riguf'i rizáca'a le raca quia', ga ridxintĕ nága'a lidxi guíĕ ni, ca raca queë' tu bōnni' huía' dō', pero bití' ca' nága'tĕ xtídzĕ'ĕ Dios. ¹⁰ Que lĕ ni na' ruá' rilĕna' yúgu'tĕ lĕ ni tu' nadxi'ida'

nupa gurôê' Dios, para ulu'lê' ca' légaguiê'. Jesucristo caz runê' ga ulu'lágaca bônachi na' para ila'cuá' lu bení' idú queê'. ¹¹ Catêz naca lê ni rnna:

Channô nátilenru' Lê', sóalenru'-nê' ca' ibanru'.

¹² Channô guá' ilenru' le qui'i sáca'ru', inná bê'lenru' ca' Lê'.

Channô ridá'baga'ru' Lê', Lê' tá'baguê'ê' ca' rê'u.

¹³ Sal-la' bití' runru' ca rnnaru', Lê' rúntica'sê' ca rnnê'.

Lê' bití' gaca tá'baguê'ê' le náquiê'.

Nu bônni' huen dxin queê' Cristo rurúajê' dxi'a

¹⁴ Busá' ládxi'gaca nupa nacuá' ga nî' zu' ca naca lê ni, ate' nî'a queê' Xanru' Dios gunná be'e légaguiê' para cabí ila'dil-la didzê'ê' ca nácagaca didza' cabí nazáca'gaca. Yugu' didza' caní tun ga ila'niti nupa tu'zê nagui léguequi. ¹⁵ Bê'tica'sô ládxi'u urúaju' dxi'a lahuê' Dios para gacu' ca tu bônni' huen dxin bití' rutuí'inê' ca naca dxin nunê'. Dxi'ado' ral-la' ugunu' dxin didza' idútê li. ¹⁶ Na'a, gucuíta ga nacuá' nupa tuí'i didza' bití' nazaca', en didza' cá'asô, tu' tun didza' caní ga ilunrê' le cabí rê'ênê' Dios. ¹⁷ Ila'zê didza' tu'ê ca rizxôn huê' nudzu' le ridúdu' rilá. Himeneo, en Fileto nabábagaquiê' nupa tuí'i didza' caní. ¹⁸ Iropê' ni gula'chixi gula'níguinê' ca naca le naca idútê li, tu' ta'nnê' chigudôdi dza ral-la' ulu'bân nupa chinátigaca, ate' gula'béquiê' baróli bal-la bônachi ga ridxintê bítí'rô ta'yéajlê' Cristo. ¹⁹ Le benê' tsutsu Dios zóatica'sô, en dê tu le naca bê', le rnna: "Núnbê'ê' Dios nupa néquiquequi queê'." Rnna ca: "Gulí'cuíta ga raca le ruá' dô', yúgu'têli' libí'ili' néquili' queê' Cristo."

²⁰ Tu lu yu'u xzôn yú'ugaca le néquini, calégasô oro, en plata, pero lêsca' le néquini yaga, en yu. Bal-la tu'gún bônachi léguequi dxin ga liná', ate' ia'bal-la tu'gún léguequi dxin ga bití' naca liná'. ²¹ Para gácaru' ca naca lê na' tu'gún bônachi dxin ga liná', en para gaca gunru' le naca dxi'a, en gácaru' lesaca' ugunê' Xanru' rê'u dxin, ral-la' ucuítaru' ga raca le ruá' dô'. Channô gunru' caní, gácaru' lesaca' gunru' yúgu'tê dxin dxi'a.

²² Gurú'una le tun ga nu sê ladxí' le ruá' dô' ca raca quégaquiê' bônni' ra'bando'. Bê' ladxí' gacu' tsahui'. Ben le run ga réajlê'u Cristo, en le run ga nadxí'ínu' yugu' luzó'o, en le run ga ribózu' dxi'ado'. Ca nácagaca lê ni, ben tsôzxôn nupa tu'lidza Xanru', naca idú dxi'a icja ládxi'do'guequi. ²³ Na'a, gurú'una yugu' didza' cá'asô, en didza' bití' nazaca', tu' chinóz quézinu' tun didza' caní ga ta'dil-la didza' bônachi. ²⁴ Bônni' huen dxin queê' Xanru' bití' ral-la' til-lalenê' bônachi didza', pero ral-la' gáquiê' nôxaj ladxí' lógaca yúgu'tê bônachi. Ral-la' gaca usédinê' bônachi, en gáquiê' ca' xzôn ladxí'. ²⁵ Lu yôl-la' nôxaj ladxí' ral-la' uzéajni'inê' nupa ta'dá'baga' le runê' libán que. Channô gunê' caní, nadxi ca' Dios gu'ê légaguiê' lataj ulu'bí'i ládxi'gaguiê' para ilúnbê'ê' le naca idútê li. ²⁶ Caní ulu'lê' lu yalaj que tu' xihui' ga nadzúngaquiê', ate' ulu'huóáquiê' tsahui' para ilunê' ca rê'ênê' Dios.

3

Ca ilaca bônachi dza tsôjsétégaca

¹ Lêsca' ral-la' inózinu' lê ni: Dza tsôjsétégaca ilaca dza ila'guí'i ila'zaca' bônachi. ² Yugu' dza nî' ila'cu'ê bônni' ilácagaquiê' caní:

Ila'dxí'i la' cuíngacasê', en ulu'huidí'nê'.

Ilún ba xzôn cuíngaquiê', en ulu'lui'í cuíngaquiê' xzôn.

Ila'nnê' zi'ê que le naca lá'ayi.

Ila'dá'baguê'ê' xuz xiná'agaquiê'.

Ilácagaquiê' bônni' cabí ta'yaza ládxi'gaguiê'.

Bití' ilunê' ca rê'ênê' Dios.

³ Bití' ila'dxí'inê' ca ral-la' ilunê'.

Ilácagaquiê' zidzaj ladxí'.

Ila'nnê' que luzá'agaquiê'.

Bití' ila'nná be'e cuíngaquiê'.

Ilácagaquiê' bônni' dza'a.

Bití' ila'lé'enê' dxi'a le naca dxi'a.

⁴ Ilácagaquiê' hueti luzê'e, en bití' ila'dzáquiê' dxi'a.

Ulu'lui'í cuíngaquiê' ca bônni' nayépiségaguiê'.

Ila'dxí'inê' le ila'yázasô ládxi'gaguiê', en calêga Dios.

⁵ Ulu'lui'í cuíngaquiê' ca bônni' núnbê'gaquiê' Dios.

Ila'dá'baguê'ê' le ruzá' ládxi'ê Dios queêru'.

Gucuíta ga nacuá' bônachi caní. ⁶ Lêsca' caní, lu yôl-la' banísa quégaquiê' ila'yazê' gapa naca lu yu'u, en ila'zî' yé'enê' yugu' nigula bití' bi nôzguequinu para ila'zî' lu ná'agacanu le ulu'sédinê'. Ila'bága'nu nigula na' dul-la' zían, en ilu'i' ládxi'gacanu yugu' le ila'zê'sô ládxi'gacanu le cabí nazaca'. ⁷ Ila'yónitica'sinu nigula ni didza' ilún libán que bônachi, pero bití' ca' ila'déli'nu ila'yéajni'ininu le naca idútê li. ⁸ Ca na' guláquiê' Janes, en Jambres, bônni'

ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idütë li. Ilácagaquië' chul-la niti, en ila'chixinë' ca naca le réajlë'ëru' Cristo. ⁹ Biti' ila'déli'rönë', pero gaca bë' nácagaquië' bönni' bití' bi nózguequinë' lógaca yúgu'të bönnachi, ate' gaca quégaquië' ca na' guca quégaquië' Janes, en Jambres na'.

Le rigu'ë Pablo lu ná'abi' bi'i Timoteo

¹⁰ Nöz quézinu' ca naca le rusédida' bönnachi, en ca runa'. Nözinu' ca' le ru'í ládxa'a guna', en ca réajlë'a Cristo, en ca naca' nójax ladxí', en ca nadxí'ida' luzá'a, en ca riböza' zxon ladxí'. ¹¹ Nözinu' ca' yugu' le gula'bía ládxi'gaca bönnachi neda', en yugu' le gudí' i guzácaxa'a, le gulaca quia' lu yödzo Antioquia, en lu yödzo Iconio, enca' lu yödzo Listra. Yugu' le gula'bía ládxi'gaca bönnachi ni' neda' biá' guléna', ate' Xanru' Jesús busölë' neda' lu yúgu'të lë na'. ¹² Yúgu'të nupa të'ëni ilaca idú' a tu' néquiguequi queë' Jesucristo, lësca' ila'gu'í ila'záquië' yugu' le ila'bía ládxi'gaca bönnachi légaquië'.

¹³ Na'a, bönni' tuá' dö', en bönni' ta'z'í yë'ë ilácarë' xihui'. Ila'z'í yé'enë' bönnachi, ate' ila'z'í ye'e bönnachi ca' légaquië'.

¹⁴ Na'a, ben chi'i yugu' le buzëdu', en le guzxi' lu no'o, tu' nunbë' casu' nupa bulu'sedi li'. ¹⁵ Ga gudela' nacu' bi'ido' núnbë'u le nazúajgaca lu guichi lá'ayi, le huáca ulu'zéajni'ide'e li' para uló' tu' réajlë'u Jesucristo. ¹⁶ Yúgu'të le nazúajgaca lu guichi lá'ayi guchizië' Dios icja ládxi'do'gaca bönnachi queë', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugu'u rë'u tu nöza, en usedi rë'u para gácaru' tsahui'. ¹⁷ Caní run, para gaca sina' nu naca queë' Dios, en gácada' gun yúgu'të le naca dxi'a.

4

¹⁻² Ni'a queë' Xanru' Dios, enca' Xanru' Jesucristo, rinná bé'eda' li' gunu' libán que xtídzë'ë Xanru'. Lë cazë' uchi'a usöröë' nupa ni nabángaca, en nupa chinátigaca, dza ni' huödë' idinná bë'ë. Bë' ladxí' gunu' lë ni channó raca dxi'a quiu' o bití' raca dxi'a. Lu yöl-la' zxon ladxí', guléaj ga liná' le tun bönnachi. Busá' ládxi'gaquië', en guchiza icja nágagaquië' ca naca lë na' rusédiru'. ³ Caní ral-la' gunu' tu' idxín dza cate' bití' ulu'zë nágagaquië' xibá tsahui', pero ilë'ëninë' ila'yönnë' le ta'dánisinë'. Ca ta'zësó ládxi'gaquië' ulu'tubë' quégaquië' nupa ulu'sedi légaquië'. ⁴ Ulu'cá'anë' le naca idütë li, en ila'z'í lu ná'agaquië' yugu' didza' ridasó. ⁵ Na'a, ral-la' gacu' zxon ladxí' lu yúgu'të le runu'. Biá' gulén le ulu'saca' li' z'í. Ben libán que didza' dxi'a. Idú ládxi'u ben dxin le budödë' Cristo lu no'o gunu'.

⁶ Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödölió ni chizóa idxín. ⁷ Ca runë' tu bönni' idú ládxië' rejë' gudil-la, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlë'ëru' Cristo. ⁸ Ia'stú, naca löza quia' idéli'da' le ral-la' ila'z'í nupa nácagaca tsahui', le gunnë' Xanru' quia' dza ni', ate' tsahui' naca ca ruchi'a rusöröë' rë'u. Calégasó quia' neda' gunnë' le, pero lësca' gunnë' le quégaca yúgu'të nupa ta'dxi'í Lë', en idú ládxi'guequi ta'böza dza huödë'.

Le buzúajë' lu guichi Pablo gunbi' Timoteo

⁹ Bë' ladxí' guídateo' ga ni zoa' ¹⁰ tu' guléaj ládxië' Demas neda', tu' nadxí'inë' le ruzië' xibë yödölió ni, ate' guyijë' yödzo Tesalónica. Crescente guyijë' luyú Galacia, ate' bi'í Tito guyéajbi' luyú Dalmacia, tu' caní ben bayudxi ilunë'. ¹¹ Tuzë' Lucas zóalenë' neda'. Guchë'ë-bi' bi'í Marcos para guí dalenbi' li' tsózxón, tu' nácabi' gúnlenbi' neda' tsózxón xichinë' Cristo. ¹² Gusöl-la'a-bi' bi'í Tíquico lu yödzo Éfeso. ¹³ Cate' guídu', biá' quia' lari' guitsa' na' bucacá'ana' lu yödzo Troas lu yu'u lidxë' Carpo, en biá' ca' quia' yugu' guichi, en le naca lo, biá' quia' yugu' guichi néquiguequini guídi.

¹⁴ Alejandro, bönni' gubëdxi guíë, zían le bi'ë dö' quia'. Lë cazë' Xanru' ubi'ë queë' ca nácagaca le benë' bönni' ni quia'. ¹⁵ Ben chi'i cuinu' queë' bönni' ni, tu' ridá'baga'dë'ë didza' runru' libán que.

¹⁶ Cate' le zí'aló luzuí bidxina' lógaquië' bönni' yúlalui', cuntú nu gúcalen neda', pero bulu'béaj ládxi'gaca yúgu'të bönnachi neda'. Biti' rë'ënda' uzí' lëbë' Dios légaquië'. ¹⁷ Guzóalenë' Xanru' neda', en butipë' ládxa'a para údxi guna' libán que xtídzë'ë para ila'yöni yúgu'të bönnachi izá'a le. Caní guca, busölë' Xanru' neda', ate' guca quia' tsca burúaja' lu ruá'aba bëdxi guixi'. ¹⁸ Lë cazë' Xanru' usölë' neda' lu yúgu'të le cabí raca dxi'a, en gun chi'ë neda' ga idxíntea' ga rinná bë'ë Lë' ni' yehua' yubá. ¡Gácatica'só queë' yöl-la' ba yúgu'të dza zá'gaca! ¡Ca' gaca!

Pablo rugapë' Dios bönnachi queë' Cristo

¹⁹ Bugapa Dios Priscila, en Aquilo, enca' bönnachi nacua' lidxë' Onesíforo. ²⁰ Bugá'anë' Erasto lu yödzo Corinto, ate' bucacá'ana'-në' Tróximo luyú Mileto tu' ré'enë'. ²¹ Bë' ladxí' guídu'

ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios li'.

²² Rinábida'-në' Xanru' Jesucristo sóalenë' li'. ¡Gácalen li' le ruzá' ládxë"ë Dios quiu'! ¡Ca' gaca!

DIDZA' GUSÖL-LĚ'Ě PABLO QUEĚBI' BI'I TITO

Pablo rugapë' Dios bi'i Tito

¹ Neda', Pablo, naca' huen dxin queë' Dios, en gubáz nasöl-lě'ě Jesucristo. Gusöl-lě'ě neda' para guna' ga ila'yéajlě' bönachi chiguró cazě' Dios, para ulu'únbě' le naca idútě li ca ral-la' gun nu nunbě' Dios. ² Caní naca' tu' runa' löza uzi'a xibě yöl-la' na'bán idú le guzxi' lu ně'ě Dios gunnē' queëru' dza ni'te, cate' si' gusi lo rata' yúgu'tě le dē, ate' run cazě' Lě' le nazi' lu ně'ě guně'. ³ Cate' bidxín dza que, Dios bulu'e lahui xtídzě'ě, le gulu'ě lu na'a guna' libán que. Caní gunná bē'eně' Dios, Nu busölá rě'u, neda'. ⁴ Rugapa' Dios li', bōcha'ado' Tito. Nacu' idú zxi'ini caza' tu' naca lěbisō ca réajlě'ěru' Cristo. Rinábida'-nē' Dios Xuz, en Xanru' Jesucristo Nu busölá rě'u, uzá' ládxě'ě quiu', en huéchi' ládxě'ě li', en guně' ga soa dxi icja ládxi'do'o.

Dxin queë' Cristo runbi' bi'i Tito luyú Creta

⁵ Que lě ni na' bucá'ana' li' luyú Creta, para usó'o le riyadzaj quégaca bönachi queë' Cristo nacua' ni', para iláčagaca idú bönachi queë' Cristo, en para ucú'u bönni' gula yúgu'tě yōdzō para ilún chi'ě bönachi queë' Cristo nacua' tu tu yōdzō ni', ca na' chigunná bē'eda' li' gunu'. ⁶ Nu bönni' gula rapa chi'ě bönachi queë' Cristo ral-la' gáquiē':

Bönni' cuntu nu bi gaca inně queë'.

Zoa tūzinu nigula queë'.

Yugu' zxi'ině' ral-la' ila'yéajlě'ěbi' Cristo.

Biti' soa nu gaca inně quégacabi' ta'dá dzágasibi' ca',

o ta'dá'baga'bi' xuz xiná'agacabi'.

⁷ Nu bönni' rapa chi'ě bönachi queë' Cristo run bayudxi:

Biti' runě' le gū'i lataj nu bi inně queë' ca runě' xichině' Dios.

Biti' gáquiē' bönni' zidi o bönni' icja dza'a,

o bönni' re'jě', o bönni' ribíxjaně',

o bönni' rizě ládxi'sě' dumí.

⁸ Ral-la' gu'ě ga ila'cu'ě bōchi'ru' ta'dxině' lidxě'.

Ral-la' sě ládxě'ě guně' le naca dxi'a.

Ral-la' gáquiē' bönni' réajni'i, en bönni' tsahui'.

Ral-la' gádxině' Dios, en inná bē'e cuině'.

⁹ Ral-la' gun chi'ě didza' idútě li ca chinazēdē',

para gaca ichízí' icja náagaca bönachi ca sa'yéaj xibá dxi'a,

en para gaca usayjě' rú'agaca bönachi ta'nně que.

¹⁰ Caní ral-la' gáquiē' tu' ta'dá'baguě'ě zían bönni', en tu'ě didza' biti' nazaca', en ta'z'í yé'eně' bönachi. Zían bönni' tuně' caní nácaquiē' judío. ¹¹ Yugu' bönni' ni, run bayudxi gunu' ga tsayaj ruá'agaquiē', tu' tuně' ga ta'chixi ta'nigui yúgu'tě bönachi nacua' yu'u gapa ta'yáziē', en tu'sedině' le cabi ral-la' ulu'sedině'. Caní tuně' para ila'z'í'sě' dumí.

¹² Tuě' bönni' gubábě' bönachi Creta ga na' zu', bönni' na' bē'ě didza' uláz que yudo' quégaquiē', gunnē': "Ta'z'í yé'tica'sě' bönni' Creta, en nácaquiē' ca bōa' gu'a sínia'. Nácaquiē' bönni' huágulě'ě xōhuēdi." ¹³ Didza' ni beně' ba nalí quégaquiē' naca idútě li. Que lě ni na' gudil-la légaquiē' para gaca idú ca ta'yéajlě'ě Cristo, ¹⁴ en para cabi ulu'zě nágaquiē' yugu' didza' ridasō quégaquiē' bönni' judío, en biti' iluně' ca ta'nná bē' bönachi nucá'anagaca le naca idútě li.

¹⁵ Yúgu'tě naca dxi'a quégaca nupa náagaca dxi'a, pero quégaca nupa náagaca xihui', en biti' ta'yéajlě', biti' bi naca dxi'a, pero náagaca xihui' ga ridxintě le ta'bequi ícaguequi, en le ta'zá' ládxi'gaca. ¹⁶ Ta'nně' núnbē'gaquiē' Dios, pero le tūgaquiē' biti' rōjlōz le ta'nně' tu' nácaquiē' bönni' tu'dí'ině' Dios. Ta'dá'baguě'ě xtídzě'ě, en biti' ca' gaca iluně' le naca dxi'a.

2

Xibá dxi'a le ral-la' usēdiru'

¹ Na'a, ral-la' gu'u didza' le rōjlōz xibá dxi'a.

² Busedi yugu' bönni' gula:

Biti' ral-la' ilě'ajě'.

Ral-la' iláquiē' ba'a ladxi', en bönni' ta'yéajni'ině'.

Ral-la' gaca idú ca ta'yéajlě'ě Cristo.

Ral-la' ila'dxi'ině' luzá'agaquiē', en ila'bōzě' zxon ladxi'.

³ Busedi yugu' nigula gula:

Ilunnu le raza ládxě'ě Dios.

Cabi ila'nněnu que luzá'agacanu, en cabi ilě'ajnu.

Ral-la' ulu'sédinu le naca dxi'a.

⁴ Ral-la' ulu'sédinu' nigula ni' yú'ugacanu iz cuidi' para ila' dxi'inu bönni' que queégacanu, enca' xzi'inigacanu.

⁵ Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chí'inu le dē lídixagacanu, en ilácanu dxi'a.

Ral-la' ilunnu bal bönni' que queégacanu.

Ral-la' cabí bi ilunnu le gūi'i lataj nu innē zi' que xtídzē'ē Dios.

⁶ Busedi yugu' bönni' ni' nacu'ē iz cuidi':

Ral-la' ilácagaquiē' bönni' ta'yéajni'inē'.

⁷ Ral-la' gúntica'su' le naca dxi'a,

ulu'i'inu' bönachi caní ca ral-la' ilúngaca.

Ca rusédinu' ral-la' uluf'i nacu' idú ladxi', en ba'a ladxi'.

⁸ Ral-la' usédinu' didza' dxi'a le cabí gaca nu bi innē que.

Caní gunu' ga utuí'inē' bönni' ridá'baguē'ē,

en bití' gaca bi innē' queéli' runlí' le ruá' dō'.

⁹ Busedi bōchi'ru' ni' ta'yéajlē'ē Cristo, en nadó'ogaquiē':

Ral-la' ila'cu'ē nōxaj lōgaquiē' xāngaquiē'.

Ral-la' ilunē' yúgu'tē le ila'yaza lādxi'gaquiē' xāngaquiē'.

Bití' ral-la' tá'baga'gaquiē' le ta'nná bē'ē.

¹⁰ Bití' bi ulu'cáchi'lanē'.

Ral-la' ulu'luf'i cuíngaquiē' tsahui' ca naca yúgu'tē le tunē'.

Caní uluf'i lo naca dxi'a xibá queē' Dios, Nu busólá rē'u.

¹¹ Cristo, bönni' na' buzá lādxi'ē Dios queēru' chibuluf'i lahuē' lōgaca yúgu'tē bönachi para ulu'lágaca. ¹² Lē' rusédinē' rē'u uca'anaru' le cabí raza lādxi'ē Dios, en cabí sē lādxi'ru' le naca que yōdzōlió ni, pero cōzaru' zxōn ladxi', en gácaru' tsahui' dza ni zóaru' na'a, en gunru' ca rē'ēni quézinē' Dios. ¹³ Ral-la' cōzaru' le runru' lōza le gun ga gácaru' bica'ba, lē na' gaca dza ni' cate' uluf'i lahuē' Jesucristo lu bení idú queē'. Náquiē' Dios zxōn, Nu rusólá rē'u. ¹⁴ Lē cazē' budōdi cuinē' uláz queēru', para bōá'uē' rē'u lu yúgu'tē le naca xihui', ate' ruunē' rē'u tsahui' para gácaru' bönachi queē', en gūi'i lādxi'ru' gunru' le naca dxi'a.

¹⁵ Yugu' lē ni bē' didza', en guchiza icja nágagaca bönachi ni', ate' len yōl-la' unná bē' gudil-la léguequi. Béntica'sō caní, para cabí si' lataj nu uca'ana cá'asō xtídzu'u.

3

Le ral-la' ilún bönachi ta'yéajlē' Cristo

¹ Busá lādxi'gaquiē' bōchi'ru' ni' ilunē' ca ta'nnē' bönni' dē lu ná'agaquiē', en bönni' yúlalui', para ilunē' ca rnaa xtídzá'gaquiē'. Ral-la' ila'cu'ē sina' ilunē' le naca dxi'a. ² Bití' bi le ruá' dō' ral-la' ila'nnē' que luzá'agaquiē', en bití' ila'díl-lalenē' légaquiē' didza', pero ral-la' ilácagaquiē' nōxaj ladxi', en idú ladxi' lōgaca yúgu'tē bönachi.

³ Lē'sca' rē'u, zí'aló gúcaru' yugu' bönni' bití' ta'yéajni'inē', en gudá'baga'ru' Dios. Gudarur' naníturi', en gúcaru' ca nupa nadó'ogaca, tu' benru' le guzē lādxi'ru' le ruá' dō', en ia'bal-la le guyaza lādxi'ru'. Benru' ca' le ruá' dō', en buzxi'ēru' luzá'aru'. Bití' bila'lē'e bönachi rē'u dxi'a, ate' rē'u bití' bilé'ēru' dxi'a luzá'aru' turu' ia'turu'. ⁴ Ní'irō bulu'e lahui Dios, Nu rusólá rē'u. Naca bē' náquiē' idú dxi'a, en nadxí'inē' yúgu'tē bönachi, ⁵ tu' busólē' rē'u, calēga tu' zoa bi le naca dxi'a benru' rē'u, pero tu' buéchi' lādxi'ē rē'u. Bunē' rē'u dxi'a, en benē' ga nácaru' bönachi cubi. Dios Bō' Lá'ayi rucubē' rē'u. ⁶ Dios gusól-lē'ē Dios Bō' Lá'ayi queēru' tu' néquiru' queē' Jesucristo, Nu rusólá rē'u. ⁷ Buzá lādxi'ē queēru', en bunē' rē'u tsahui' para gata' yōl-la' na'bán idú queēru', le runru' lōza gunnē' queēru'.

⁸ Didza' iduté li lē ni nuzúaja' lu guichi. Rē'ēnda' usédide'enu' yugu' bönni' ni' yugu' lē ni para iluf'i lādxi'gaquiē' ilúntica'sē' le naca dxi'a tu' ta'yéajlē'ē Dios. Lē ni naca dxi'a, en nácada' lesaca' ila'z'í' lu ná'agaca yúgu'tē bönachi. ⁹ Na'a, bití' gu'u lataj nu gūi'i didza' le cabí nazaca', o nu gūi'i ladxi' ca nágagaca lágaca zianterō cō' xuz xtó'ogaca bönachi, o nu tsōjgutsa' yugu' didza' bizxaj, en yugu' le ridil-la didza' ca naca que xibá queē' Moisés, tu' cabí bi nazáca'gaca le caní, ate' cuntu nu uzí' xibé didza' caní.

¹⁰ Channó zoa nu bönni' ni', rubéajē' choplō bönachi queē' Cristo, tōdi usó' o lādxi'ē tu' ia'tú luzuí, bubéajē' bönni' na'. ¹¹ Nōz quézinu' chibōáquiē' caní nu bönni' bití' náquiē' tsahui', en runē' dul-la'. Chinabáguē'ē xígua' ni'a que lē na' runē'.

Le buzúajē' Pablo lu guichi le gunbi' bi'i Tito

¹² Cate' isól-la'a-nē' Artemas o Tíquico ga zu', bē' ladxi' guídu' ga ni zoa' lu yōdzō Nicópolis, tu' chinuna' quia' ugá'ana' ni yugu' beo' ziaga. ¹³ Zenas, bönni' na' rudōdē' didza' ca rinná bē' bönachi yúlalui', enca' Apolos, ila'dxinē' ga ni' zóali'. Bugú'u légaquiē' nōza lu yōl-la' rácalen, para cabí bi yadzaj quégaquiē'. ¹⁴ Busedi yugu' bōchi' luzá'aru' ilúntica'sē' le naca dxi'a, en

bi ulu'nödzejë' quégaca nupa bi riyadzaj quéguequi, para gaca bë' caní le nácaqaquië' queë' Cristo.

Pablo rugapë' Dios bönachi queë' Cristo

¹⁵Yúgu'të nupa nacuá'len neda' tu'gapa Dios li'. Bugapa Dios nupa ni' nadxí'igaca rë'u tu' ta'yéajlë' Dios. Le ruzá' ládxë'ë Dios queëru' gácalen yúgu'tëli'. ¡Ca' gaca!

DIDZA' GUSÖL-LĚ'Ě PABLO QUEĚ' FILEMÓN

Pablo rugapĕ' Dios Filemón

¹ Neda', Pablo, dzágabi' neda' bi'i böchi'ru' Timoteo. Nadzuna' lidxi guię tu' runa' xichinĕ' Jesucristo. Rugapa' Dios li', Filemón. Nacu' bönni' nadxí'itu', en runu' xichinĕ' Cristo ca runtu' netu'. ² Rugapa' Dios Apia, nigula quiu'. Nácanu zanru' réajlĕ'ĕnu Cristo. Rugapa' Dios ca' xzí'inu', Arquipo. Nácabi' queĕ' Jesucristo ca tu bönni' rejĕ' gudil-la, tu' runbi' xichinĕ' Lĕ' ca runtu' netu'. Lĕsca' rugapa' Dios bönnachi queĕ' Cristo tu'dubĕ' lu yu'u lidxu'. ³ Rinábida'-nĕ' Xúziru' Dios, enca' Xanru' Jesucristo, uzá' ládxĕ'ĕ queĕli', en gunĕ' ga soa dxi icja ládxi'do'oli'.

Ca runĕ' Filemón tu' réajlĕ'ĕ Cristo

⁴ Rĕtica'sa'-nĕ' Dios queĕru' "Xclenu'", en röjnética'sida' li' cate' rulidza'-nĕ'. ⁵ Caní runa' tu' ridxín quia' didza' ca nadxí'inu'-nĕ' Xanru' Jesús, en réajlĕ'u Lĕ', en nadxí'inu' ca' yúgu'tĕ bönnachi rö queĕ'. ⁶ Rinábida'-nĕ' Dios gunĕ' ga gunda' dxin libán runu' ca naca le réajlĕ'u Cristo, para ulu'z' xibĕ nupa nacuá' ni' yúgu'tĕ le naca dxi'a, le ruzá' ládxĕ'ĕ Jesucristo queĕru'. ⁷ Rudzĕjada', en ruzí' xzōna' tu' nadxí'inu' yugu' böchi'ru', en benu' li', böcha'a, ga bulu'huóaca ládxi'gaca bönnachi ta'yéajlĕ' Cristo.

Filemón ral-la' uniti lahuĕ'-bi' Onésimo, bi'i nadó'o queĕ'

⁸ Que lĕ ni na', sal-la' dĕ lu na'a tu' naca' gubáz nasöl-lĕ'ĕ Cristo inná bé'eda' li' ca ral-la' gunu', ⁹ ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guię tu' runa' xichinĕ' Jesucristo. ¹⁰ Ráta'yua' lo' uláz queĕbi' Onésimo, bi'i na' bena' ga böácabi' queĕ' Cristo, en que lĕ ni na' nácabi' ca xzí'ini caza' ga ni nadzuna' lidxi guię.

¹¹ Bi'i ni, zí'aló biti' gúcabi' lesaca' quiu', pero na'a nácabi' lesaca' quiu' li', enca' quia' neda'. ¹² Bi'i ni rusöl-la'a-bi' ga zu'. Ben bal lĕbi' ca neda' caz runu' bal, tu' nadxí'ida'-bi'. ¹³ Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi guię tu' runa' libán que didza' dxi'a, ¹⁴ pero biti' bi' rĕ'ĕnda' guna' le cabi naca didza' quiu', para cabi guna' bayudxi gácalenu' neda', pero huáca gácalenu' neda' tu' rĕ'ĕni quĕzinu' ca'. ¹⁵ Nadxi ca' que lĕ ni na' buzá'abi' Onésimo ga zu' tu' chí'ido' para udxinbi' tsaz ga zu'. ¹⁶ Na'a, biti'rö gácabi' quiu' ca tu bi'i nadó'o, pero gácabi' quiu' ca bi'i böchi'cazu', tu' nácabi' bi'i böchi'ru' réajlĕ'ĕbi' Cristo, en nadxí'iru'-bi'. Nácabi' caní quia' neda', ate' ral-la' gácaröbi' ca' caní quiu', calĕgasö ca böchi' luzó'o, pero lĕsca' ca bi'i böchu'u réajlĕ'ĕbi' Xanru' Jesucristo.

¹⁷ Que lĕ ni na', channö nunu' neda' tuz, ben lĕbi' bal ca neda' caz runu' bal. ¹⁸ Channö bi' xíguia' benbi' quiu' o channö bi' rál-la'bi' quiu', gunnátĕz neda' ral-la'a. ¹⁹ Neda', Pablo, len na'a caza' ruzúaja' quiu' lu guichi lĕ ni: Neda' caz quizzxa' bi' rál-la'bi', en calĕga guía' li': Lĕsca' ral-lu'u quia' yúgu'tĕ le dĕ quiu' tu' bena' neda' ga napu' yöl-la' na'bán idú. ²⁰ Ca' gaca, böcha'a. Channö dĕ le uzi'a xibó' tu' néquiru' queĕ' Xanru', ben lĕ na' chigúta'yua' lo' tu' naca' böchu'u réajlĕ'a Cristo, ate' caní gunu' ga huóaca ládxa'a.

²¹ Ruzúaja' quiu' lu guichi ni, tu' ruzxöni ládxa'a li', gunu' ca rnna xtídza'a, en nözda' gunu' ia'lati' ca lĕ na' chigúta'yua' lo'. ²² Lĕsca' rinaba' lo' upó'o quia' ga soa' lu yu'u lidxu', tu' runa' löza urúaja' lidxi guię ni, ate' guída' ga zóali' tu' rulídzali'-nĕ' Dios, en rinábali' lahuĕ' ni'a quia' neda'.

Pablo ruzúajĕ' lu guichi le rugapa Dios Filemón

²³ Epafra, bönni' yu' ulenĕ' neda' tsözxön lidxi guię ni tu' runĕ' xichinĕ' Jesucristo, rugapĕ' Dios li'. ²⁴ Lĕsca' tu'gapĕ' Dios li' Marcos, en Aristarco, en Demas, en Lucas, yugu' bönni' ni túnlenĕ' neda' tsözxön dxin queĕ' Cristo.

²⁵ Rinábida'-nĕ' Xanru' Jesucristo uzá' ládxĕ'ĕ queĕli'. ¡Ca' gaca!

DIDZA' RUZÉAJNI'I YUGU' BÖNACHI HEBREO

Dios bë'lenë' rë'u didza' lu ru'ë Zxi'ini cazë'

¹ Zián luzuí, en zián ca benë' Dios, bë'lenë' xuz xtó'oru' didza' dza ni'te lu ruá'agaquië' bönni' gulu'ë didza' uláz queë'. ² Na'a, ga ruúdxí xtídzë'ë, dza ni zóaru' na'a, Dios bë'lenë' rë'u didza' lu ru'ë Zxi'ini cazë'. Dios buzóë' Lë' para guequi queë' Zxi'inë' yúgu'të le nequi queë' Lë', ate' lu në'ë Zxi'inë' na', Dios benë' yödzölió ni. ³ Zxi'inë' na' náquië' ca tu le ruluf'i lahui yöl-la' zxon queë' Dios, en ca náquië' Zxi'inë' ruluf'i lahui idú le náquië' Dios caz. Run cazë' ga nacuá'tica'sö yúgu'të, rugunë' dxin didza' ru'ë, en yöl-la' huáca queë'. Cate' budxi benë' le ruún rë'u dxi'a que le naca dul-la' nabága'ru', yöjchó'ë cuita lë'ë ibëla Dios, Nu rō'ō rinná bë' xitsá'tërö.

Zxi'inë' Dios nayëpisëtërë' ca yugu' gubáz lá'ayi

⁴ Zxi'inë' Dios nayëpisëtërë' ca yugu' gubáz lá'ayi queë' Dios, tu' nácaterö lo le lë', lë na' Dios gulu'ë Lë' tu' náquië' Zxi'ini cazë', ca lágaquië' gubáz lá'ayi queë' na'. ⁵ Dios catu caz gudxë' tuë' gubáz lá'ayi queë' ca na' gudxë' Zxi'inë'. Gunnë': Zxi'ina' nacu'. Buzó'a' Li' na'a.

Catu caz bë'ë didza' queë' tuë' gubáz lá'ayi ca na' bë'ë didza' ca naca queë' Zxi'inë'. Gunnë':

Naca' Xuzë', ate' Lë' náquië' Zxi'ina'.

⁶ Lësca' caní, cate' Dios buzóë' Bi'i que cazë' lu yödzölió ni, gunnë': Yúgu'të gubáz lá'ayi queë' Dios ila'yéaj ládxi'gaquië' Lë'.

⁷ Ca nácaagaquië' gubáz lá'ayi queë', rnna:

Lë' runë' ga nácaagaquië' gubáz lá'ayi queë' ca bö' recja, ate' gubáz lá'ayi huen dxin queë', runë' ga nácaagaquië' ca guí.

⁸ Na'a, ca naca cazë' Zxi'inë', rnnë':

Ga rō'u rinná bë'u, inná bë'tica'su', Dios.

Tsahui' naca ca rinná bë'u.

⁹ Nadxi'inu' le naca tsahui', en calëga le ruá' dö'. Que lë ni na' Dios budödë' lu no'o yöl-la' unná bë', en benë' ga ruzi'itëru' Li' xibë yöl-la' unná bë' ca le tu'z'í' xibë luzó'o.

¹⁰ Lësca' caní rnnë':

Li', Xan, cate' gusí lo, benu' yödzölió, ate' len ná'asu' buzú' lúzxiba.

¹¹ Huadödi quéguequi, pero Li', tsaz idí'u.

Yúgu'të itëbígaca ca ritëbi lari',

¹² en ca lari' utubu' léguequi, en utsó'o léguequi, pero Li', catu caz utsá' cuinu' en catu caz igulu'.

¹³ Dios catu caz gudxë' tuë' gubáz lá'ayi queë' ca gudxë' Zxi'inë', gunnë':

Gurö'ö cuita lë'a ibëla

cate' gunra' ga ulu'zechu zxíbigaca lo'

nupa bití' ta'lé'e Li' dxi'a.

¹⁴ Yúgu'të gubáz lá'ayi queë' Dios nácaagaquië' bö' huen dxin queë' Dios, ate' nasöl-lë'ë légaquië' para ilácalenë' nupa ni nulágaca.

2

Biti' ral-la' ucá'anaru' cá'asö yöl-la' rusölá

¹ Que lë ni na', ral-la' güf'i ládxi'röru' le chibiyóniru', para cabí gaca chopá ládxi'ru'. ² Guca bë' naca idütë li didza' na', le bidxín dza ni'te lu ná'agaquië' gubáz lá'ayi queë' Dios, ate' yúgu'të nupa gula'dödi bë' ca rnna didza' na', en bití' gulún ca rnna, Dios benë' léguequi xíguia' ca na' röjlöz le gulúngaca. ³ Lësca' caní bití' ca' uláru' rë'u lu xíguia' na' channö ucá'anaru' cá'asö yöl-la' rusölá ni, le benë' Lë' cazë' Xanru' libán que zí'alö, ate' nupa bila'yöni Lë' bulu'lu'i rë'u naca idütë li. ⁴ Lësca' caní Dios caz benë' tsözxón légaquië' ba nalí, tu' benë' le nácacaca bë', en le tun ga rubániru', en yugu' yöl-la' huáca zxon. Gudísië' ca' yugu' le runödzejë' Dios Bö' Lá'ayi quégaquië' tsca gú'uni quézinë' Dios.

Dios benë' ga böáquië' Jesús idú ca nácaru' rë'u

⁵ Dios biti' budödë' yödzülió si' za' lu ná'agaquië' gubáz lá'ayi que yehua' yubá queë', lë na' ru'iru' didza' que. ⁶ Na'a, ca naca lë ni, nazúaj lu guichi lá'ayi didza' bë' nu run ba nali le rnna:

Dios, rubánide'eda' tu' ru'í ládzu'u bönachi.

Rubánide'eda' tu' rácalenu' léguequi.

⁷ Ia'láti'só cá'asó ca yugu' gubáz lá'ayi que yehua' yubá quiu' benu' bönachi.

Buzú' quéguequi yöl-la' xzön, en yöl-la' run bal,

en budödu' yúgu'të le benu' Li' lu në'eguequi.

⁸ Yúgu'të budödu' lu në'eguequi para lla'nná be'e le.

Nazúaj lu guichi lá'ayi lë na' rnna: "Budödu' lu në'eguequi yúgu'të." Biti' bi buca'anë' le cabi budödë' lu në'eguequi, pero ga ridxintë na'a dza, biti' rilë'eru' yu'u lu në'eguequi yúgu'të. ⁹ Réquibe'eru' le guca queë' Jesús. Tu chí'isó, Dios benë' ga böáquië' ia'láti'só cuidi' ca yugu' gubáz lá'ayi que yehua' yubá queë'. Guljë' bönachi para gütie', ate' gudí'i guzxaqué'ë Jesús lu yöl-la' gütí uláz quegaca yúgu'të bönachi, tu' buzá ládxe'ë Dios queëru' caní. Tu' benë' Jesús caní, Dios benë' ga rata' queëru' yöl-la' xzön, en yöl-la' run bal.

¹⁰ Dios benë' yúgu'të le rilë'eru', en runë' ga nacuá'tica'só. Dios benë' ca ral-la' gunë' cate' benë' ga naca bë' náquië' Cristo idú tsahui' ni'a que le gudí'i guzxaqué'ë. Caní benë' Dios queë' Cristo, Nu bideli' yöl-la' rusólá para gaca ichë'ë bönachi zían yehua' yubá queë'. ¹¹ Cristo ruünë' tsahui' bönachi para ilequi quez queë' Dios. Tuzë' náquië' Xúzguequi nupa na' ruünë' Cristo tsahui', en Xuz cazë'. Que lë ni na', biti' ca' rutuí'inë' Zxí'inë' Dios cate' rnnë' nácaquië' böchi' luzë'ë. ¹² Ca naca lë ni nazúaj lu guichi lá'ayi le rnna:

Usiyönda' böchi' luzá'a ca nacu' Li', Dios.

Gatsaj láhui'lö bönachi tu'dubi quiu',

gul-la' yöl-la' ba quiu'.

¹³ Lësca' caní rnnë':

Uzxöni ládxa'a-në' Dios.

Ga yúbölö nazúaj le rnnë':

¡Buli'yútsöca' neda', en yugu' xzí'inë',

nupa na' Dios bennë' quia'!

¹⁴ Que lë ni na', tu' néquiqueuinë' bëla' en rön yugu' xzí'inë' na', lësca' caní Cristo ben cuinë' ca nácaquië'. Guljë' bëla' en rön. Caní guljë' para guca gütie', en caní guca busunitie' yöl-la' huáca unná bë' que tu' xihui', nu na' dë lu në'e guti bönachi. ¹⁵ Caní benë' Cristo para guca busanë' yúgu'të nupa gulaca ca bönni' nadó'ogaquië' tsanni ni nacuá' nabángaca, tu' guladxi yöl-la' guti. ¹⁶ Naca bë' biti' benë' caní para gácalenë' yugu' gubáz lá'ayi que yehua' yubá queë' Dios, pero para gácalenë' yugu' xzí'ini xi'sóë' Abraham. ¹⁷ Que lë ni na', ben bayudxi böáquië' Cristo idú ca nácaquië' böchi' luzë'ë na', para gáquië' lahuë' Dios tu bixúz lo, tu bixúzi runë' ca rnnë', en ruhuéchi' ládxe'ë bönachi, enca' para gunë' le gun ga gata' lu në'ë ugüë' dül-la' nabága'gaca bönachi. ¹⁸ Na'a, tu' gudí'i guzxaqué'ë Lë cazë' Cristo, ate' guzxi' bë' tu' xihui' Lë', que lë ni na' napë' yöl-la' huáca gácalenë' nupa ni, rizi' bë' tu' xihui' léguequi.

3

Jesús nayëpisëtërë' ca Moisés

¹ Que lë ni na', böchi' luzá'ado', libí'ili' na' nácali' quez queë' Dios tu' bulidzë' Dios libí'ili', buli'yú dxi'a ca náquië' Jesucristo. Náquië' gubáz nasól-lë'ë Dios, enca' bixúz lo que le nazí' lu ná'aru'. ² Jesús ni runë' ca rnna xtídzë'ë Dios, Nu na' buzóa Lë' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönachi queë' Dios. ³ Nayëpisëtërë' Jesús ca Moisés, para gaca queë' yöl-la' ba, ca na' nácárë' lo bönni' nequi queë' tu yu'u ca naca huen dxin zoë' lu yu'u na'. ⁴ Yúgu'të yu'u, zoa nu ben le, pero Dios náquië' Nu ben yúgu'të le rilë'eru'. ⁵ Le nácátë Moisés benë' ca rnna xtídzë'ë Dios lógaca bönachi queë' Dios, pero gúquië' ca tu bönni' huen dxin, ate' benë' ba nali que didza' ral-la' gu'ë Dios, ⁶ pero Cristo runë' ca rnna xtídzë'ë Dios, en náquië' Zxí'ini cazë', ate' nacuá' lu në'ë bönachi queë' Dios. Rë'u ni, nácaru' bönachi na' queë' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxi'ru', enca' ca rudzéjalenru' lë na' runru' löza.

Dë lataj ga ulu'zí' ládxi'gaca bönachi queë' Dios

⁷ Que lë ni na', nazúaj lu guichi ca rnnë' Dios Bö' Lá'ayi le rnna:

Na'a, channö riyónili' didza' ru'ë Dios,

⁸ biti' gácali' zidi lu icja ládxi'do'oli'

ca na' gulaca nupa ni' gula'dá'baga' Dios

cate' ni' gula'z'í' bë' Lë' lu lataj cá'asó.

⁹ Gula'z'í' bë'ë xuz xtó'oli' neda' ni'

sal-la' bila'lë'enë' le bena' idú ca choá' iz.

¹⁰ Que lë ni na' guléda' bönachi dza ni', en gunniá':

"Ta'chixitica'sinë' ca ta'zá' ládxi'gaquië'.

Biti' tē'ennë' ila'nözinë' le rē'enda' ilunë'."

¹¹ Que lë ni na' guléda' légaquië', en bena' tsutsu xtídza'a, gunniá':

"Biti' ila'yázië' ga ulu'z'í ládxi'gaquië' tsózxón len neda'."

¹² Guli'gún chí'i cuinli', bōchi' luzá'ado', para cabí gácali' nituli' libí'ili' tu bōnni' xihui' cabí réajlë'ë, en para cabí usanli'-në' Dios ban. ¹³ Na'a, buli'zéajali' i tuli' ia'tuli' yúgu'të dza, tsanni ni naca dza ni zóaru' na'a, para cabí si' ye'e le naca xihui' libí'ili', en para cabí gácali' nituli' libí'ili' zidi lu icja ládxi'do'oli'. ¹⁴ Yúgu'tëru' gunru' tsózxón Cristo channó gácaru' tsutsu ga idxinrō dza údxi, ca na' gusi lo ridipa ládxi'ru'.

¹⁵ Caní ral-la' gunru' tsanni ni rnna:

Na'a, channó riyónili' chí'ë Dios,

biti' gácali' zidi lu icja ládxi'do'oli',

ca na' gulaca nupa ni' gula'dá'baga' Dios.

¹⁶ ¿Nupxi na' bila'yōni xtídzë'ë Dios, en gula'dá'baga' Lë'? Gulún caní yúgu'të nupa ni' bubéajë' Moisés léguequi luyú Egipto. ¹⁷ ¿Nupxi na' gulénë' Dios idú ca choá' iz? Gulaca nupa ni' gulún dul-la', ate' gulati lu lataj cá'asō. ¹⁸ ¿Nupxi ni' benë' tsutsu xtídzë'ë Dios, gunnë' bití' ila'yaza ga ulu'z'í ládxi'guequi tsózxón len Lë'? Gulaca nupa ni' bití' gulún ca rnna xtídzë'ë Dios. ¹⁹ Na'a, réquibe'eru' bití' guca ila'yázië' tu' cabí gula'yéajlë'ë Dios.

4

¹ Na'a, tsanni ni nagá'ana le guzxi' lu në'ë Dios queëru' para gaca tsú'uru' lataj queë' ga uzí' ládxi'ru', ral-la' gádxiru' para cabí unitiru' lataj tsú'uru' ni'. ² Biyōnru' rē'u didza' dxi'a ca na' bila'yōnnë' légaquië', pero légaquië' bití' bulu'zi'ë xibé didza' na' bila'yōnnë', tu' cabí gula'yéajlë'ë Dios cate' bila'yōnnë' le. ³ Rē'u ni réajlë'ëru' Dios, en tsú'uru' lataj queë' ga uzí' ládxi'ru'. Raca ca na' gunnë' Dios:

Que lë ni na' guléda' légaquië'

en bena' tsutsu xtídza'a, gunniá':

Biti' tsú'ugaquië' ga ulu'z'í ládxi'lenë' neda'.

Dë lataj tsú'uru' rē'u ga uzí' ládxi'lenru'-në' Dios, sal-la' budxi benë' Dios xichinë' dza ni'te cate' ni' benë' yōdzōliō ni, en chiruzí' ládxi'ë. ⁴ Nazúaj lu guichi lá'ayi ga ru'í didza' ca naca que dza igadxi, le rnna: "Buzí' ládxi'ë Dios dza igadxi yugu' lu dxin benë'." ⁵ Ga yúbōlō rnna: "Biti' tsú'ugaquië' ga ulu'z'í ládxi'lenë' neda'." ⁶ Nupa ni' bila'yōni zí'alō didza' dxi'a, bití' guyú'ugaca ni' tu' cabí gulún ca rnna xtídzë'ë Dios. Que lë ni na', ral-la' tsú'ugaca bönachi yúbōlō ni'. ⁷ Que lë ni na' ca', Dios bulu'e tu dza yúbōlō, gunnë': "Na'a dza." Caní naca, cate' chigudōdi iz zían, bē'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channó riyónili' didza' ru'ë Dios,

biti' gácali' zidi lu icja ládxi'do'oli'.

⁸ La'tu' benë' Josué ga bulu'zi' ládxi'gaquië' cate' gula'yu'ë lu xiyúgaquië', bití' bē'ë Dios didza' gudōdi ni' que ia'turō dza cate' nu uzí' ládxi'len Lë'. ⁹ Que lë ni na', nagá'ana quégaca bönachi queë' Dios lataj ila'déli'në' ga ulu'z'í ládxi'gaquië'. ¹⁰ Nupa tsú'ugaca ga ulu'z'í ládxi'lengaca Dios, ulu'z'í ládxi'gaquië' lu dxin tunë', ca na' buzí' ládxi'ë Dios yugu' lu dxin benë' Lë'. ¹¹ Que lë ni na', ral-la' güi' ládxi'ru' tsú'uru' ga ni' uzí' ládxi'lenru'-në' Dios. Biti' ral-la' tá'baga'ru' xtídzë'ë ca na' gulún nupa ni' bití' gula'yéajlë' Dios, en bití' gula'yu'ë ni'.

¹² Xtídzë'ë Dios naca ban caz, en napa caz yōl-la' huáca. Richúgurō ga rē' ca guié tuchi' natuchi' iropa ru'í. Richugu ridxin ga ta'dzaga bō' naca cázaru', en le zoa lu icja ládxi'do'oru', enca' rōxaj ga ridxintë lu dxita lu bin. Run ga naca bē' le ribequi ícaru', en le rizá' ládxi'ru'. ¹³ Biti' bi gaca ucáchi'ru' ga bití' gaca ilé'enë' Dios le. Yúgu'të le nun cazë' Dios nalá' lahui, en narúaj ga liná' lahuë' Dios. Lahuë' Lë' run bayudxi quíxjō'oru' le nunru'.

Jesús náquië' bixúz lo, Nu nácatërō zxón

¹⁴ Zoa queëru' tu bixúz lo, nácatërë' zxón, Nu na' gudōdi ni' yehua' yubá, Jesús, Zxí'inë' Dios. Que lë ni na' ral-la' ugá'anaru' tsutsu ca naca le nazi' lu ná'aru'. ¹⁵ Zoa queëru' tu bixúz lo, Nu gaca huéchi' ladxí' rē'u ca nácgaca le raca queëru', tu' guzxi' bē' tu' xihui' Lë cazë' iduté ca na' rizí' bē' tu' xihui' na' rē'u, pero bití' bi dul-la' benë' Lë'. ¹⁶ Que lë ni na', idú ládxi'ru' ral-la' ibíga'ru' gala' ga rō'ë rinná bē'ë Dios, Bōnni' ruzá' ladxë'ë queëru', en inábaru' lahuë' huéchi' ladxë'ë rē'u, en uzá' ladxë'ë queëru', para gácalenë' rē'u cate' bi raca queëru'.

5

¹ Dios ribō cazë' nútí'tës bixúz lo lada'j bönachi, en ruzóë' lë' para gunë' yugu' le runë' lahuë' Dios uláz quégaca bönachi, en cu'ë lahuë' Dios yugu' le tu'nōdzaj bönachi, en yugu' bōa' bēdxí tütigaquië'-ba' lu bucugu lá'ayi tu' nōzi dul-la' nabága'gaquië'. ² Bixúz lo na', tu' raca queë'

lëbisô ca raca quégaca bônachi, gaca gáquiê' zxôn ladxî' len nupa náacagaca yugu' bônni' canôz, en nupa ta'chixi ta'nigui. ³ Que lê ni na', tu' náquiê' bixúz lo na' bônáchisô, ral-la' cu'ê lahuê' Dios bôa' bédxi na' tútigaquiê'-ba' lu bucugu lá'ayi ni'a que dul-la' nabaga' cazê', ca na' runê' ca' ni'a que dul-la' nabága'gaca bônachi.

⁴ Cuntu nu gaca gun cuini bixúz lo, pero Dios rulidzê' nu ral-la' gaca bixúz lo, ca na' bulidzê' Aaron. ⁵ Lësca' caní guca queê' Cristo. Biti' ben cuinë' bixúz lo, pero Dios buzôé' Lê' ca bixúz lo. Ca naca lê ni, Dios gudxê' Lê':

Li' nacu' Zxi'ina'.

Buzôa' Li' na'a.

⁶ Lësca' caní gudxê' Lê' le nazúaj ga yúbölô, gunnê':

Li' nácatuca'su' bixúz,

ca na' gúquiê' Melquisedec bixúz.

⁷ Cristo, cate' ni' zoa cazê' yôdzôliô ni, bulidzê' Dios, en gúta'yuê' lahuê'. Gurôdxi'ê, en gurôdxê' lahuê' Dios, Bônni' guca usôlê' Lê' lu yôl-la' guti, ate' Dios biyônne' Lê' tu' gúdxinê' Lê' idú ládxê'ê. ⁸ Sal-la' gúquiê' Zxi'inê' Dios, bizêdê' gunê' ca rnna xtídzê'ê Dios tu' gulaca queê' yugu' le gudí' guzxaquíê'ê. ⁹ Cate' chigúquiê' Cristo idú ca ral-la' gáquiê' tu bixúz lo, Dios benê' Lê' Bônni' rusôlê' tsaz yúgu'tê nupa tun ca rnna xtídzê'ê. ¹⁰ Ní'irô Dios buzôé' Lê' para gáquiê' bixúz lo ca na' gúquiê' Melquisedec na' bixúz lo.

Zoa bônadxi queêru' huôaj ládxî'ru', en tá'bagá'ru'-nê' Cristo

¹¹ Ca naca lê ni, zían le ral-la' gú'ilentu' libí'ili' didza', le naca bôniga quíxjô'itu' libí'ili', tu' cabí réajni'inili'. ¹² Chigudôdi dza ral-la' gaca usédili' bônachi xtídzê'ê Dios, tu' chibiyônili' xidzé, pero riquinili' nu quíxjô'i' libí'ili' leyúbölô yugu' le cabí naca bôniga nazí' lu nê'e nu si' réajlê'. Nagá'anali' ca yugu' bi'i huê'ênido' ta'quinibi' nidxi', en calêga la' huagu tsutsu. ¹³ Yúgu'tê bônni' naquíniguequiê' nu usedi légaquiê' lê na' bití' naca bôniga, náacagáquiê' ca yugu' bí'ido' té'ajbi' nidxi'. Biti' nazêdagaquiê' ca sa'yéaj le naca tsahui'. ¹⁴ La' huagu tsutsu tu'zî' xibé nupa chinál-lágaca, nupa na' gaca iléquibe'ê le naca dxi'a, en le cabí naca dxi'a, tu' nugúngaquiê' dxin yôl-la' réajni'i' quégagáquiê'.

6

¹ Que lê ni na', bití' ral-la' usédatica'siru' yugu' xibá buzêdaru' cate' si' gusí lo riyôniru' ca naca queê' Cristo. Ral-la' tsôjnôrôru' para gácaru' idú bônachi queê' Cristo. Biti' naquíní usêdaru' leyúbölô yugu' xibá bití' naca bôniga:

ca ral-la' ubí'i ládxî'ru',

en ca bití'rô gunru' le ruá' dô',

en ca ral-la' tséajlê'êru'-nê' Dios,

² en ca naca xibá que le ridílaru' nisa,

en ca rioxá ná'aru' bônachi ta'yéajlê' Cristo,

en ca ral-la' ulu'bân nupa nátagaca,

en ca gunê' Dios, ichúquiê' quégaca bônachi tuá' dô'.

³ Caní gunru' channô gunnê' Dios rê'u lataj.

⁴⁻⁶ ¿Naru' huácatsô gunru' ga ulu'bí'i ládxî'gaca leyúbölô nupa tu'huôaj ladxî', en ta'dá'bagá' Dios? Channô bidxín quéguequi bení' queê' Dios, en bulu'zî' xibé le runôdzjê' Dios zoê' yehua' yubá, en gulaca tuz len Dios Bô' Lá'ayi, en channô bulu'zî' xibé didza' dxi'a queê' Dios en yôl-la' huáca que dza si' za', en channô ní'irô tu'huôaj ladxî', en ta'dá'bagá' Dios, bití' ca' gaca nu gun ga ulu'bí'i ládxî'gaca leyúbölô, tu' gaca tsca ulu'dá' leyúbölô Zxi'inê' Dios lê'e yaga cruz en ilún tsca ulu'titaj Lê' lahui' lógaca bônachi. ⁷ Nupa tun caní náacagaca ca yu na' ruzí' xibé nisa guiôj le ribixi láhuilô zían luzuí. Channô yu na' runôdzaj le tu'zî' xibé nupa tá'ana yu na', raza ládxê'ê Dios le, ⁸ pero channô ruzôasô yu na' lubá yôtsí', en bêsigá', naca ditaj, en nabía dô', en naca para nu uzegui le.

Le runru' lôza le run ga nácaru' tsutsu

⁹ Sal-la' ruí'itu' caní didza', libí'ili' na' nadxí'itu', réquitu' ruzí'ili' xibé le náacagacârô dxi'a, le tu'zî' xibé nupa nulágaca. ¹⁰ Dios náquiê' tsahui', en bití' gal-la ládxê'ê dxin tsahui' benlí', en yugu' le benlí' tu' nadxí'ili' Lê'. Gúcalenli' nupa néquiguequi quez queê' Dios, en runlí' xichínguequi. ¹¹ Na'a, rê'énitu' gú'i ládxî'li' luzá'ali' tu ia'tuli', en gunlí' caní ga idxinrô dza údxî, para gata' idú queéli' lê na' runlí' lôza. ¹² Rê'énitu' cabí gácali' xôhuêdi, pero gunlí' ca tun nupa ta'yéajlê' Dios, en ta'bôza zxôn ladxî', para idéli'li' yugu' le guzxi' lu nê'ê Dios gunnê' queêru'.

¹³ Caní gaca, tu' benê' tsutsu Dios xtídzê'ê cate' guzxi' lu nê'ê bi gunnê' queê' Abraham. Tu' cabí zoa nu nácarô lo ca Dios, que lê ni na' buzetaj cuinë', cate' ni' benê' tsutsu xtídzê'ê. ¹⁴ Caní gunnê' Dios: "Le nácatê guna' ga gaca dxi'a quiu', en guna' ga ila'yánda'abi' zxi'ini xi'sú." ¹⁵ Gulôzê' Abraham zxôn ladxî', ate' bidéli'nê' le guzxi' lu nê'ê Dios gunnê' queê'.

¹⁶ Cate' tu bönni' runë' tsutsu xtídzë'ë, ruzötjë' nu nácaterö lo ca lë', ate' lë ni ruzóa dxisö yúgu'të didza' bizxaj, tu' nunë' tsutsu xtídzë'ë. ¹⁷ Que lë ni na' Dios benë' tsutsu le guzxi' lu në'ë gunë', en buzötaj cuinë', tu' gú'unnë' ulu'ínë' nupa ulu'z'í xibë le guzxi' lu në'ë unödzejë' quéguequi, nácada' löza, en tsaz naca le nuzóa lahuë' gunë'. ¹⁸ Le guzxi' lu në'ë Dios, en le benë' tsutsu, chopá ni catu caz idzá gaca, en ca naca quégaca chopá ni, bití' gaca si' yë'ë Dios. Caní benë' Dios para gácada' löza queëru' tu le huë tsahui' rë'u. Ruzxöni ládxi'ru' Lë' idéli'ru' lë na' runru' löza le gunnë' s'íru'. ¹⁹ Lë na' runru' löza ruzóaticasö tsutsu icja ládxi'do'oru', en naca ca tu du guíë ruzóa dxisö barco. Lë na' runru' löza run chi'ë Cristo ni'a queëru' ga ni' zoë' Dios yehua' yubá, le nadxín lu lataj lá'ayi na' zoa cúdzi'lö lari' nala' lu yudo' rö'ö yehua' yubá. ²⁰ Guyázië' Jesús uláz queëru' ca Nu röjnöru loru' ga ni' zoë' Dios, ate' Dios nuzóë' Lë' náquië' tsaz bixúz lo ca na' gúquië' Melquisedec bixúz lo.

7

Jesús náquië' bixúz lo ca gúquië' Melquisedec

¹ Melquisedec gúquië' bönni' na' gunná bë'ë lu yödzo Salem, enca' bixúz queë' Dios, nayëpisëtërë'. Cate' suzë'ë Abraham, söhuöjë' gudödi guca gudil-la cate' bucul-lë' yugu' bönni' ta'nná bë'ë, birúajë' Melquisedec na', yöjtságuie' Abraham, en gunábinë' Dios gun lá'ayë' Abraham. ² Abraham bë'ë queë' tu cö' tu' chi cö' que yúgu'të le bidéli'në' lu gudil-la na'. Ca lë' Melquisedec na' rnna lu didza' xidza': "Bönni' Unná Bë' Tshui", en náquië' ca' Bönni' unná bë' que yödzo Salem, le rnna lu didza' xidza': "Bönni' Unná Bë' Ribequi Dxië'." ³ Biti' zoa lu guichi le rnna gula'cu'ë xuz xinë'ë, o xuz xtá'ahuë', en bití' nazúaj dza guljë' o dza gütíë', pero náquië' ca náquië' Zxi'ínë' Dios tu' náquië' tsaz bixúz lo.

⁴ Buli'yútsöca' na'a, ca na' gúquië' zxön Melquisedec na', tu' lë cazë' xúziru' Abraham bë'ë queë' tu cö' tu' chi cö' que lë na' guléajë' lu ná'agaquie' bönni' ta'nná bë'ë ni' bucul-lë' lu gudil-la. ⁵ Lu xibá queë' Moisés, Dios rinná bë'enë' yugu' xzi'ini xi'sóë' Leví, nupa nácagaca bixúz, ila'zi'ë' tu cö' tu' chi cö' que le ta'z'í bönachi Israel, sal-la' nácagaca di'a dza quégauie', tu' nácagaquie' yúgu'të' xzi'ini xi'sóë' Abraham. ⁶ Melquisedec na' bití' náquië' di'a dza quégauie', pero guzxi'ë' tu cö' tu' chi cö' lu në'ë Abraham, nu na' bidéli' yugu' le guzxi' lu në'ë Dios gunnë' queë'. Lësca' Melquisedec na' gunábinë' Dios gun lá'ayë' Abraham, ⁷ ate' cuntú nu gaca tá'baga' lë na' rnna: Nu nadéli'rö lahuë' Dios rinábini Dios gun lá'ayë' nu nacuídi'rö. ⁸ Na'a, dza ni zóaru' na'a, nupa ta'z'í tu cö' tu' chi cö' lu ná'agaca bönachi nácagaca ca' bönachi tati caz, pero Melquisedec na', zoa le run ba nali queë' le rnna zoë' nabanë'. ⁹ Na'a, huáca innaru' queë' Leví, en quégaca xzi'ini xi'sóë', nupa na' ta'z'í tu cö' tu' chi cö' lu ná'agaca bönachi, lësca' gula'guizjë' tu cö' tu' chi cö' cate' ni' Melquisedec na' guzxi'ë' tu cö' tu' chi cö' lu në'ë Abraham, xuz gula gudödi quégauie'. ¹⁰ Caní naca, tu' huáca innaru' Abraham ni' nu'ë lë'ë Leví, en yugu' xzi'ini xi'sóë' cate' ni' yöjtságuie' Melquisedec lë', tu' cabí náljaniguequinë'.

¹¹ Ta'z'í bönachi Israel xibá gunná bë'ë Moisés lu ná'agaca bixúz, nupa nácagaca xzi'ini xi'sóë' Leví ga nababë' ca' Aarón, bixúz lo. Na'a, la'tu' guca ulu'huóaca bönachi idú tsahui' lahuë' Dios tu' tun ca rinná bë' xibá queë' Moisés, bití' ben bayudxi soa ia'túë' bixúz ca gúquië' Melquisedec, en calëga ca gúquië' Aarón. ¹² Channö rutsë'ë Dios ca ral-la' gáquië' bixúz, run bayudxi utsë'ë ca' ca naca xibá queë'. ¹³ Xanru', Nu na' nazúaj lu guichi ca naca queë' yugu' lë ni, nababë' ia'turö cö' xzi'ini xi'sóë' Israel ca le nababë' Leví na', ate' que cö' xzi'ini xi'sóë' ga nababë' Xanru', cuntú nu guca bixúz lahuë' Dios. ¹⁴ Naca caní tu' naca bë' guljë' Xanru' lu cö' di'a dza queë' Judá, ate' Moisés bití' bë'ë didza' queë' Judá na' cate' bë'ë didza' quégaca nupa ral-la' ilaca bixúz.

¹⁵ Nácaterö bë' lë ni n'a que le raca na'a. Ca na' gúquië' Melquisedec bixúz, chibulufi lahuë' ia'turë' bixúz, Jesús. ¹⁶ Bönni' ni, bití' gúquië' bixúz tu' rinná bë' xibá ca ral-la' ilaca di'a dza queë', pero náquië' bixúz tu' napë' yöl-la' huáca que yöl-la' na'bán le catu caz údxi. ¹⁷ Nazúaj lu guichi lá'ayi le run ba nali queë' le rnna:

Tsaz nacu' bixúz

ca na' gúquië' Melquisedec bixúz.

¹⁸ Na'a, nadúa xibá gula ni', tu' cabí gudapa yöl-la' huáca unná bë', en bití' bi guca gun. ¹⁹ Xibá queë' Moisés na' bití' guca un bönachi idú tsahui'. Na'a, chiguyú'u tu le runru' löza le nácáro dxi'a, le run ga gaca ibíga'ru' gala' ga zoë' Dios.

²⁰ Cate' benë' Dios ga náquië' Jesús bixúz, benë' tsutsu xtídzë'ë. ²¹ Dios bití' benë' tsutsu xtídzë'ë cate' bucu'ë bönachi ni' ca bixúz, pero cate' benë' ga náquië' Jesús bixúz, benë' tsutsu xtídzë'ë, gunnë':

Bena' tsutsu xtídz'a'a neda', Xanu', gunniá':

"Bití' utsá'a ca guna'.

Tsaz nacu' bixúz

ca na' gúquië' Melquisedec bixúz."

²² Que lê ni na', Cristo náquië' Nu run ga naca lôza didza' rucá'ana tsahui' le nácarô dxi'a ca lê na' guca zí'alô. ²³ Yugu' bixúz ni' guláquië' bônni' zían, tu' cabí guca ulu' gá'anë' yôdzôlió ni' tu' gulátië', ²⁴ pero tu' zóatica'së' Jesús, tsaz náquië' bixúz, en bití' gaca nu huóáza xilatjé' para gaca bixúz. ²⁵ Que lê ni na', tsaz gaca usölë' nupa ta'biga' gala' ga zoë' Dios, nupa tu'gún dxin Lê', tu' zóatica'së' nabanë', en rnnë' dxi'a uláz quégaquië' lahuë' Dios.

²⁶ Ben bayudxi soa tu bixúz lo caní queëru'. Náquië' lá'ayi, en idú tsahui', en bití' náquië' tsôzxôn bônachi dul-la', pero nayëpisëtërë' ca yúgu'të le nacuá' ni' yehua' yubá. ²⁷ Jesús ni, bití' náquië' ca yugu' bixúz lo yôdzôlió ni, tu' ben bayudxi gula'gu'ë rôn lahuë' Dios yugu' dza, ate' gulútië'-ba' bôa' bédxi lahuë' Lê' tu' nôzi dul-la' nabága'gaca cazë', ate' gudôdi ni' gulunë' caní tu' nôzi dul-la' nabága'gaca bônachi. Na'a, Jesús, tsaz gulu'ë rôn lahuë' Dios, cate' ni' budôdi cuinë' lahuë' Dios, en bulaljë' xichôn cazë' tu' nôzi dul-la' nabága'gaca yúgu'të bônachi. ²⁸ Lu xibá queë' Moisés bônachi bití' nácagaca idú dxi'a nácagaca bixúz, pero gudôdi bidxin xibá queë' Moisés, Dios benë' tsutsu xtídzë'ë, cate' benë' ga náquië' Xzí'ini cazë' bixúz lo, tu' náquië' idú tsahui' ca ral-la' gáquië' bixúz.

8

Jesús náquië' Bixúz Lo queëru'

¹ Na'a, ca rnná lê na' si' gunnía', naca caní: Zoa queëru' tu Bixúz Lo caní. Gurô'ë cuita lê'ë ibëla Dios, ate' rô'ë, rinná bë'ë yehua' yubá ni'. ² Lê' runë' dxin ca Bixúz Lo lu lataj nácaterô lá'ayi, le naca yudo' le naca idútë, lê na' buchisë' Xanru', en calëga bônachi. ³ Dios rucu'ë yúgu'të bixúz lo para lá'gu'ë yugu' le tu'nôdzaj bônachi, enca' xichôngacaba' bôa' bédxi lahuë' Dios. Que lê ni na' ben bayudxi soa bi gulu'ë Cristo lahuë' Dios. ⁴ La'tu' zoë' luyú ni, bití' ca' gáquië' bixúz, tu' nacuá'tica'së' bixúz ni, nupa ta'gú'u yugu' le tu'nôdzaj bônachi lahuë' Dios ca rinná bë' xibá queë' Moisés. ⁵ Yugu' bixúz ni tunë' dxin que tu le rulu'isô, en le naca ca tu bixin que lê na' rô'ô yehua' yubá. Caní naca, tu' gúdxidë'ë Dios Moisés cate' si' uchisë' yú'udo' na' néquini guídi, gunné': "Buyútsôca', ben yúgu'të idú ca naca lê na' buluí'ida' lí' lu guí'a ni'." ⁶ Na'a, Bixúz Lo queëru' ni runë' dxin que le nácaterô lesaca', ate' ni'a que le benë' Lê' zoa tu didza' rucá'ana tsahui' queëru' le nácaterô lesaca', en le ruí'i didza' que le nácaterô lesaca' guzxi' lu në'ë Dios gata' queëru'.

⁷ La'tu' gudapa didza' na' rucá'ana tsahui' le guzóa zí'alô idútë yôl-la' huáca, bití' ben bayudxi soa didza' burôpi ni rucá'ana tsahui'. ⁸ Na'a, Dios rulu'ë bití' gulaca bônachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Bulí'yútsôca', gunné' Xanru': Zá'gaca dza

cate' uzóa' tu didza' cubi ucá'ana tsahui',
le gúnlena' bônachi Israel, en bônachi Judá.

⁹ Bití' gaca ca guca didza' rucá'ana tsahui' na',

lê na' bënlena' xuz xtó'ogaquië',

dza ni' gudéla'a ná'agaquië',

en bubéaja' légaquië' luyú Egipto.

Tu' bulu'cá'anë' didza' quia' rucá'ana tsahui',

neda' bucá'ana' légaquië', rnnë' Xanru'.

¹⁰ Que lê ni na', caní gaca didza' ucá'ana tsahui'

gúnlena' bônachi Israel

tôdi yugu' dza ni', rnnë' Xanru'.

Uchízia' icja ládxi'do'gaquië' xibá quia'

en uzúaja' le lu icja ládxi'do'gaquië'.

Ní'irô gaca' Dios quégaquië'

ate' légaquië' iláquië' bônachi quia'.

¹¹ Bití' gun bayudxi nu usedi luzë'e, inná:

Bénbë'ë Xanru', tu' ilúnbë'ë yúgu'të neda',

ga isí lo nu naca cá'asô, ga idxintë nu naca lo.

¹² Huéchi' ládxa'a légaquië',

en uniti lahua' le cabí naca tsahui' gulunë',

en bití'rô tsôjneda' dul-la' nabága'gaquië'.

¹³ Cate' ni' ru'ë Dios didza' que tu didza' cubi rucá'ana tsahui', naca tu' chibigula lê na' guzóa zí'alô, ate' chizóa idúa lê na' nagula, en chinaca gulasi.

9

Lataj lá'ayi dë luyú, en lataj lá'ayi dë yehua' yubá

¹ Na'a, didza' rucá'ana tsahui' na' guzóa zí' aló, dzágagaca xibá le ca ral-la' ila'yéaj ládxi'gaca bônachi Dios, en lataj lá'ayi bidzága le guca que luyú ni. ² Caní naca lataj lá'ayi na' néquini guídi. Lu lataj na' dē láhuiló, nazí'i le Lataj Lá'ayi, gula'cuá' le nuá' guí, en bucugu lá'ayi ga ni' gula'gu'ē yugu' yōta xtildo' lahuē' Dios. ³ Cúdzi'ló le buropi lari' nal-la' lu yu'u na' zoa lataj ni' nazí'i le, Lataj Idú Lá'ayi, ⁴ ate' lu lataj ni' gula'cuá' tu bucugu néquini oro ga na' bulu'zégui'ē nōri, enca' tu guí'ina ga yu'u didza' rucá'ana tsahui', en nacu guí'ina na' oro. Lu guí'ina na' gula'cuá' xzíga'do' na' néquini oro, le nadzá' yōta xtildo' na' nazí'i le maná, enca' xuyaga queē' Aarón, lē na' bubō' ni'a nē'e, enca' yugu' guíōj blaga na', nazúaj láhuilóguequi didza' rucá'ana tsahui'. ⁵⁻⁶ Lahui guí'ina na' gula'cuá' chopá gubáz lá'ayi néquiguequini oro, légaca querubín que lataj ga buluí'i lahuē' Dios, ate' bulu'xzóa xiliguequi láhuiló lataj ga ni' gulu'ē bixúz lo rōn tu' nōzi dul-la'. Caní bulu'cu'ē yugu' lē ni. Biti' dē lataj uzúaja' na'a idútē ca nágaca lē ni.

Ta'yázatica'sē' yugu' bixúz lu lataj zoa láhuiló, ga na' tunē' dxin quégaquie' que le ta'yéaj ládxi'gaquie' Dios. ⁷ Tuzē' bixúz lo guyáziē' lu lataj buropi ni' tu luzuísó tu iz, en bi'ē rōn le gulu'ē lahuē' Dios tu' nōzi dul-la' nabaga' cazē', enca' tu' nōzi dul-la' nabága'gaca bônachi, dul-la' gulunē' le cabí guléquibe'enē'. ⁸ Caní ruzéajni'inē' Dios Bō' Lá'ayi rē'u, bití' ca' guca idxinru' lahuē' Dios caz tsanni ni' tu'gunē' dxin lataj lá'ayi na' zoa láhuiló lu yu'u lá'ayi na' néquini guídi, lē na' bidzága didza' rucá'ana tsahui' le guzóa zí' aló. ⁹ Yugu' lē ni naca tu le ruluf'isó que le raca na'a dza. Yugu' le gula'gu'ē lahuē' Dios, en rōn quégacaba' bōa' bēdxi na' gulútiē'-ba' lahuē' Dios bití' guca ulu'ún idú dxi'a icja ládxi'do'gaquie' bōnni' ni' gula'yéaj ládxi'gaquie' Dios caní. ¹⁰ Yugu' lē ni buluí'i lahui quégacasó le gulē'aj gulahuē', en ca ral-la' ila'guibi cuíngaquie', en quégaca xibá ca ral-la' gaca que idú ca zeaj naca cazē'. Yugu' lē ni buzōē' Dios quégaquie' ga bidxintē dza ral-la' utsē'ē yúgu'tē.

¹¹ Na'a, chibuduluf'i lahuē' Cristo, en náquie' Bixúz Lo que le naca idú dxi'a, le bilá' lahui ni'a que le benē' Lē'. Lataj lá'ayi ga na' guyáziē' Lē' nácáro lo, en nácáro idú, en bití' néquini lu ni'a lu ná'agaca bônachi, en bití' naca que luyú ni. ¹² Na'a, chiguyáziē' Cristo lu lataj lá'ayi na', caléga len xichóngacaba' bēdxi'do', en xichóngacaba' chivo, pero len rōn queē' cazē'. Guyáziē' lu lataj idú lá'ayi tu luzuísó, ate' caní guca, benē' ga nuláru' tsaz. ¹³ Le nácátē xichóngacaba' bēdxi, en chivo, en dō queēba' bēdxi'do' bulu'zégui'ē'-ba', yugu' le gula'gu'ē lu ícagaca nupa nabága'gaca dul-la', guca ulu'gúa dul-la' na' nabága'gaca bônachi para ulu'ún légaquie' dxi'a idú ca zeaj naca cazē' ca naca que yól-la' yudo' quégaquie'. ¹⁴ Na'a, gúntērō ca' xichōnē' Cristo, tu' budōdi cuinē' queē' Dios, en gúquie' idú tsahui', ate' zóalenē' Dios Bō' Lá'ayi Lē', Nu zóatica'só. Na'a, xichōnē' Cristo ruún idú dxi'a icja ládxi'do'oru' lu yugu' le gubága'ru' le tun ga ni gati, para gaca gunru' xichinē' Dios ban.

¹⁵ Que lē ni na' náquie' Jesucristo Nu ben tsutsu didza' cubi rucá'ana tsahui', tu' gútiē' Lē', en bugúē' dul-la' gula'baga' bônachi cate' ni' zoa didza' gula rucá'ana tsahui'. Gútiē' ca' para gaca ila'z'ē lē na' guzxi' lu nē'ē Dios unódzjē' quégaquie' bōnni' bulidzē', le zóatica'só. ¹⁶ Cate' ratiē' nu bōnni', en nucá'anē' tu didza' ca ral-la' ila'guisiē' le nequi queē', run bayudxi gaca bē' chinátiē' bōnni' na' para gaca ilunē' ca rnna didza' na' nucá'anē'. ¹⁷ Cate' chinátiē' bōnni' na', gaca ilunē' ca rnna didza' na', pero tsanni ni zoē' nabanē', bití' ca' gaca ilunē' ca rnna didza' na'. ¹⁸ Que lē ni na', didza' na' rucá'ana tsahui' le guzóa zí' aló guca lesaca' tu' bidzága rōn didza' na', le ruluf'isó zoa nu guti. ¹⁹ Cate' ni' gudáxiōi'inē' Moisés bônachi ni' ca nágaca yúgu'tē xibá queē' Dios, gudélē'ē rōn quégacaba' bēdxi'do', en quégacaba' chivo, le nutsi' nisa, ate' len tu guíxi'do' nazí'i le hisopo, en litsa'ba' bō'cu' xzila' le nē'aj xiná, buchéajē' rōn, en nisa na' lahui guichi ga na' nazúaj xibá na', enca' láhuigaca bônachi. ²⁰ Ní'irō gudxē' légaquie': "Lē ni naca rōn le run tsutsu didza' rucá'ana tsahui' le gunná bē'enē' Dios rē'u para gunru' ca rnna." ²¹ Lē'sca' caní buchéajē' Moisés rōn na' lu lataj lá'ayi néquini guídi, en lahui yúgu'tē le tu'gunē' dxin para ila'yéaj ládxi'gaquie' Dios. ²² Ca na' rinná bē' xibá na', látu'biqui' yúgu'tē ral-la' un dxi'a rōn léguequi, ate' channó cabí tu'laljē' rōn, bití' udúa dul-la'.

Xichōnē' Jesucristo rugúa dul-la'

²³ Caní naca, ben bayudxi guzóa le bun dxi'a yudo' luyú ni le naca tu le ruluf'isó ca naca lē na' rō'ō yehua' yubá, pero ca naca lē na' rō'ō yehua' yubá, ben bayudxi soa le un dxi'a nupa ila'yaza le, le nácáro lesaca' ca xichóngacaba' bōa' bēdxi'do' caní. ²⁴ Bití' guyáziē' Cristo lataj lá'ayi néquini lu ni'a lu ná'agaca bônachi, lē na' naca tu le ruluf'isó ca naca le naca idú, pero guyáziē' yehua' yubá caz para gaca uluf'i lahuē' na' lahuē' Dios uláz queēru'. ²⁵ Bixúz lo zoē' luyú ni raziē' lataj nácátērō lá'ayi tu tu iz len rōn quégacaba' bōa' bēdxi, pero bití' run bayudxi tsáziē' Cristo zían luzuí para udódi cuinē' lahuē' Dios. ²⁶ La'tu' guca caní, gun bayudxi qui'í sáquē'ē Cristo, en gátiē' zían luzuí dza ni'te cate' guta' yōdzólió ga ridxintē na'a dza, pero na'a cate' naca dza údxi, tsaz buluí'i lahuē' tu luzuísó, en budōdi cuinē' lahuē' Dios, cate' gútiē' para bugúē' dul-la' nabága'ru'. ²⁷ Ca na' run bayudxi ilátigaca bônachi tu luzuísó ate' tōdi ní' uchí'a usōrōē' Dios léguequi, ²⁸ lē'sca' caní, gútiē' Cristo tu luzuísó, cate' budōdi

cuinë' lahuë' Dios para bugüë' dul-la' nabága'gaca bönachi zían. Na'a, uluf'i lahuë' le buropi luzuí, caléga para ugüë' dul-la', pero para usölë' tsaz nupa ta'böza Lë'.

10

¹ Xibá na' gunná bë'ë Moisés guca tu le rulu'isó ca zeaj naca le tsahui' si' zá'gaca, en bití' guca idú ca náacaga. Que lë ni na', xibá na' queë' Moisés bití' guca un idú tsahui' nupa ni' bila'dxín lahuë' Dios, en biá'gaca rön quégacaba' böa' bëdxido', lë na' gula'gú'utica'së' lahuë' Dios yugu' iz. ² La'tu' guca un légaquië' idú tsahui', bití' gula'gú'utica'së' rön ni' lahuë' Dios, tu' cabirö iléquibe'enë' bönni' guca caní quégaquië' nabága'gaquië' dul-la' channö chibulu'huöáquië' idú tsahui'. ³ Rön ni' gula'gu'ë lahuë' Dios yugu' iz busá' ládxi'gaquië' nabága'gaquië' dul-la'. ⁴ Caní guca, tu' cabí guca xichöngacaba' bëdxi, en chivo ugúa dul-la'.

⁵ Que lë ni na', cate' bidxinë' Cristo yödölió ni, gudxë' Dios ca na' nazúaj lu guichi lá'ayi le rnna:

Bití' rë'ënu' nu cu'u rön quégacaba' böa' bëdxi lo'
pero benu' ga naca' bönáchisö.

⁶ Bití' raza ládxu'u nu uzegui'-ba' böa' bëdxi lo',
o nu cu'u xichöngacaba' lo' tu' nözi dul-la'.

⁷ Ní'irö gunná': Ni zoa' para guna' ca rë'ënu' Li', Dios.
Naca ca na' nazúaj lu guichi lá'ayi ca gaca quia'.

⁸ Lë na' nazúaj zí'alö rnna: "Bití' rë'ënë' Dios nu cu'u rön quégacaba' böa' bëdxi lahuë'." Didza' ni rulu'í rë'u bití'rö raza ládxë'ë Dios lë ni sal-la' lu xibá queë' Moisés rinná bé'enë' Dios nu gun caní. ⁹ Gudödi ni' rnna: "Ni zoa' para guna' ca rë'ënu' Li', Dios." Didza' ni rulu'í rë'u rugüë' Dios lë na' gula'gu'ë lahuë' zí'alö, en ruzóë' xilataj le gulu'ë Zxí'ini cazë' lahuë'. ¹⁰ Na'a, Dios ruünë' rë'u idú tsahui' tu' benë' Cristo ca rë'ënë' Dios cate' ni' budödi cuinë' lahuë' Dios uláz queëru', en gütíë' tu luzuísö.

¹¹ Le nácatë yúgu'të bixúz luyú ni zuíqueuinë' yugu' dza, en tunë' xichíngaquië', en la' tuz ca tunë', ta'gu'ë lahuë' Dios zían luzuí xichöngacaba' böa' bëdxi, yugu' le cabí gaca ulu'gúa dul-la'. ¹² Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yöjchö'ë cuita lë'ë ibëla Dios. ¹³ Ribözë' ni' dza gunë' Dios ga ulu'zachu zxíbigaca lahuë' nupa bití' ta'lé'e Lë' dxi'a. ¹⁴ Ní'a que tuz le gulu'ë lahuë' Dios, tsaz benë' ga náacaga idú tsahui' nupa na' bunë' dxi'a, en bubéajë' léguequi quez queë' Dios. ¹⁵ Lësca' caní Dios Bö' Lá'ayi rune' ba nalí loru', tu' gunné' zí'alö lë na' nazúaj lu guichi le rnna:

¹⁶ Caní gaca didza' uca'ana tsahui' gúnlena' légaquië'
tödi yugu' dza ni', rnnë' Xanru'.

Uchízia' icja ládxi'do'gaquië' xibá quia',
en uzúaja' le lu icja ládxi'do'gaquië'.

¹⁷ Gudödi na' gunné':

Bití'rö tsöjneda' dul-la' nabága'gaquië'
en dö' biá'gaquië'.

¹⁸ Que lë ni na', channö chinadúa dul-la', bití'rö run bayudxi nu bi cu'u lahuë' Dios tu' nözi dul-la'.

Huáca ibíga'ru' gala' ga zoë' Dios

¹⁹ Na'a, yugu' böchi' luzá'ado', idú ládxi'ru' gaca idxinru' lahuë' Dios caz, ni'a que xichönë' Jesucristo. ²⁰ Tséajlenru' tu nöza cubi, en idú tsahui' le nuzóë' Cristo, le ridxín cúdzi'lö lari' na' busayaj ga nu riyaza lataj idú lá'ayi na', o huáca innaru', nöza na' gusaljë' Cristo ni'a queëru' tu' budödë' idütë le naca cazë'. ²¹ Jesús náquië' queëru' tu bixúz nayépisëtërë', en rinná bé'enë' bönachi queë' Dios. ²² Que lë ni na' huáca ibíga'ru' gala' ga zoë' Dios idú ládxi'ru', en lu yöl-la' run löza queëru', tu' réajlë'ëru' Cristo, tu' chibunë' dxi'a icja ládxi'do'oru', para cabí uxösa ládxi'do'oru' rë'u, ate' gudibë' idütë le naca cázaru' len le naca tu nisa nácatëro idú. ²³ Ral-la' gácaru' tsutsu, en cabí gaca chopá ládxi'ru' ca naca le runru' löza que le nazí' lu ná'aru', le guzxi' lu në'ë Dios gunné' queëru', ate' Lë' runë' ca rnnë'. ²⁴ Ral-la' utipa ládxi'ru' turu' ia'turu', para gunru' ga idxí'iröru' luzá'aru', en gúnörö' ca' le naca tsahui'. ²⁵ Bal-la bönachi bití'rö tu'dubi len rë'u. Bití' ral-la' gunru' ca tun bönachi na', pero ral-la' utipa ládxi'ru' turu' ia'turu', en gúnörö' caní tu' rilé'ëru' chizöa idxín dza huödë' Xanru'.

²⁶ Channö zéajlenru' runru' dul-la' tödi núnbë'ëru' le naca idütë li, bití' ca' nagá'ana bi gaca cú'uru' lahuë' Dios le ugúa dul-la'. ²⁷ Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguie' Dios quégaquië' ila'yázië' lu guí' gabila, lë na' uzéguitica'sö nupa ta'dá'baga' Dios. ²⁸ Cate' nu bönni' buzóë' xibá queë' Moisés tsölá'alö, gulútië' lë' channö chopá tsonna bönachi gulún ba nalí que le benë', ate' cuntu nu buéchi' ladxi' bönni' na'. ²⁹ Na'a, nu bönni' uzóë' tsölá'alö Zxí'inë' Dios, en uzóë' tsölá'alö ca' xichönë' le run tsutsu

didza' rucá'ana tsahui', le ruún rë'u dxi'a, ibága'rë' ca' xíguia'. Nu bönni' gunë' caní ucá'anë' cá'asö Dios Bõ' Lá'ayi, Nu ruzá' ladxí' queëru' le riquíniru'. ³⁰ Caní gaca, tu' núnbë'ëru'-në' Dios, Nu gunná: "Quia' neda' nequi yöl-la' ruzí' lëbi. Neda' ubi'a quégaca bönachi, rnnë' Xanru'." Lësca' caní gunnë': "Xanru' uchi'a usöröë' bönachi queë'." ³¹ Ral-la' gadxi idzöbi nu ral-la' si' xíguia' lu në'ë Dios ban.

³² Guli'tsöjnë yugu' dza chigula'dödi cate' ni' si' bidxín queëli' bení', ate' biá' gulenli' zían le bulu'saca' zi'ë libí'ili'. ³³ Bulu'lidza ditaj bönachi libí'ili', en bulu'dxia libí'ili' dö' lahui' lógaca bönachi, ate' benli' tsözxön ca' nupa gula'guí' gula'zaca' caní. ³⁴ Caní guca, tu' buéchi' ladxí'li' nupa nadzúngaca lidxi guíë, en lu yöl-la' rudzeja queëli' biá' gulenli' nupa gula'béaj lidxi'li' yugu' le guta' queëli'. Caní benli' tu' nözili' nequi queëli' le nácarö dxi'a, en le zóatic'a'sö ni' yehua' yubá. ³⁵ Na'a, biti' ucá'anali' lë na' runli' löza, le nachë' tu le zxön ubi'ë Dios queëli'. ³⁶ Run bayudxi cözali' zxön ladxí', para cate' chibenli' ca rë'ënë' Dios, sí'ili' le guzxi' lu në'ë gunnë' queëli', ca na' nazúaj lu guichi lá'ayi, ca gunnë' Dios le rnna:

³⁷ Ia'tú chí'ido'osö idxinë' Bönni' na' ral-la' guidë'.

Biti' ca' tsenë'.

³⁸ Ní'irö nu naca tsahui' lahua' neda',

ulá nu na' tu' réajlë' neda'.

Channö huöaj ladxí', en tá'baga' neda',

biti'rö tsaz ladxá'a na na'.

³⁹ Na'a, rë'u ni, biti' nácaru' ca nupa tu'huöaj ladxí', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusölá.

11

Ca naca yöl-la' réajlë' queëru' Dios

¹ Na'a, tu' réajlë'ëru' Dios, naca löza queëru' sí'iru' le runru' löza, ate' naca bë' zoa le cabí gaca ilë'ëru'. ² Caní gula'yéajlë'ë xuz xtó'oru' Dios, ate' que lë ni na' nazúaj lu guichi lá'ayi ca guca quégacuië' le rnna: Bulu'rúajë' tsahui' lahuë' Dios.

³ Tu' réajlë'ëru' Dios, réquibe'ëru' benë' Lë' yödzüliö ni len didza' bë'ësë'. Lësca' caní, cate' benë' Dios yúgu'të le rilë'ëru', bugunë' dxin le cabí nalá.

⁴ Tu' guyéajlë'ë Abel Dios, gulu'ë rön queëba' böa' bëdxido' lahuë' Dios, tu le nácatërö lesaca' ca le gulu'ë Caín lahuë' Dios, en que lë ni na' Dios benë' ba nalí queë' Abel na', gunnë' náquië' tsahui', en benë' bal lë na' gulu'ë lahuë'. Sal-la' chinátie' Abel na', ga ridxintë na'a dza, naca tsca ru'ë didza', tu' guyéajlë'ë Dios.

⁵ Tu' guyéajlë'ë Enoc Dios, gudödë' ni' yehua' yubá, en biti' ca' gútië', ate' bití'rö nu budzüli lë, tu' buchë'ë Dios lë, ate' nazúaj lu guichi lá'ayi ca naca queë' le rnna: "Zí'alö ca buchë'ë Dios lë, benë' Enoc le raza ladxë'ë Dios." ⁶ Na'a, channö cabí réajlë'ëru' Dios, biti' gaca gunru' le raza ladxë'ë Lë, ate' para ibíga'ru' gala' ga zoë' Dios, run bayudxi tséajlë'ëru' zoa cazë' Lë, en rubi'ë que nu ruí' ladxí' Lë'.

⁷ Cate' ni' Dios buzéajni'inë' Noé ca ral-la' ilaca le cabí rilë'eninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupë'ë barco zxön na' nazí'i le Arca, ate' lë'ë barco na' bulu'lá bönachi di'a dza queë' Noé. Tu' guyéajlë'ë Noé Dios, benë' ga naca bë' narugu quégaca bönachi yödzüliö ilátigaca, ate' bidéli'në' gúquië' tsahui' lahuë' Dios, le ta'deli' nupa ta'yéajlë' Lë'.

⁸ Cate' ni' Dios bulidzë' Abraham, tu' guyéajlë'ë Abraham Lë, benë' ca rnna xtídzë'ë Dios, en buzë'ë ladzë' para tsejë' lataj ni' ral-la' si'ë ca tu le guequi tsaz queë', ate' birúajë' ladzë' sal-la' biti' nözinë' gazxi na' ral-la' tsejë'. ⁹ Tu' guyéajlë'ë Abraham Dios, gúquië' ca tu bönni' zítu', en guzöë' luyú na' Dios guzxi' lu në'ë unödzjë' queë'. Guzöë' lu yu'u guidido', en lëbisö ca gulunë' Isaac, en Jacob, zxi'ini xi'sóë' Abraham, nupa ni' guzxi' lu në'ë Dios unödzjë' queëquei lë na' guzxi' lu në'ë unödzjë' queë' Abraham. ¹⁰ Caní benë' Abraham, tu' benë' löza idéli'në' yödzo na' röö tsaz xilibi zö'ö que, le nuzöë' Dios xilibi zö'ö que, ate' gulu'ë le ga na' zoë' Lë cazë'.

¹¹ Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queënu yöl-la' huáca buzóanu-bí' bí'ido'. Buzóanu-bí' bi'i bönni'do' sal-la' chigudödi izi queënu, tu' guyéajlë'ënu Dios gunë' ca rnna xtídzë'ë na' guzxi' lu në'ë queënu. ¹² Que lë ni na', sal-la' chibigúlädë' Abraham, gula'cuá'abi' ziantëröbi' zxi'ini xi'sóë'. Gula'cuá'abi' tsca röö'öba' bölj lúxiba, en tsca röö'ö yuzxi tu ra' nisa zxön, cuntú nu gaca ulaba légacabi'.

¹³ Yúgu'të bönni' ni gulátie', en biti' gula'zi'ë lë na' guzxi' lu në'ë Dios unödzjë' quégacuië', pero gula'yéajlë'ë Dios, ate' zítu' zítu'sö bila'lë'enë' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácacacuië' ca bönni' zítu', en bönni' ta'dazë' yödzüliö ni. ¹⁴ Yugu' bönni' tu'ë caní didza', tu'lu'ë ta'guiljë' tu lataj le gaca ládzagauië'. ¹⁵ La'tu' gula'zá' ladxí'gauië' caní que luyú ga ni' bila'rúajë', le nácaté ulu'dzülinë' nacxi

huóajgaquié' ni', ¹⁶ pero gula'zá' ládxi'gaquié' que luyú na' nácarô dxi'a, le rô' yehua' yubá. Que lê ni na' biti' rutuf'iné' Dios cate' ta'nné' náquié' Dios quégaquié', tu' chinupé'ê tu yôdzô quégaquié'.

¹⁷ Tu' gúyējājlē'ê Isaac Dios, cate' guzxi' bē'ê Dios lē', budôdē'-bi' bi'i Isaac queē' lahuē' Dios ca na' tu'dôdē'-ba' yugu' bôa' bēdxi tūtigaquié'-ba' lahuē' Dios. Guzôē' sina' Abraham gūtiē'-bi' bi'i bōnni' z'f'ālô queē' na' lahuē' Dios sal-la' nácabi' bi'i na' guzxi' lu nē'ê Dios unôdzjē' queē'. ¹⁸ Cani benē' sal-la' gudxē' Dios lē', gunnē': "Lu ná'abi' bi'i Isaac quiu' ichísagaca'-bi' zxi'ini xi'sú'." ¹⁹ Cani benē' Abraham, tu' gúquibē'enē' napē' Dios yôl-la' huáca usubanē'-bi' lu yôl-la' guti, ate' ca tu lugá'a luséqui', huáca innaru' buzi'ê-bi' lu yôl-la' guti sal-la' biti' guti cázabi'.

²⁰ Tu' gúyējājlē'ê Isaac Dios, gunábinē' Dios gun lá'ayē'-bi' bi'i Jacob, enca' bi'i Esaú ca zeaj naca le ulu' z'f'ibi' xibé dza si' za'. ²¹ Tu' gúyējājlē'ê Jacob Dios, cate' ni' chizôa gātiē' gunábinē' Dios gun lá'ayē'-bi' tu tubi' zxi'inē' José, ate' gúyējājlē'ê Dios, ni' nayéchuē' lu xiyaga queē'. ²² Tu' gúyējājlē'ê José Dios, cate' ni' chizôa gātiē', bē'ê didza' que dza na' ila' rúajē' zxi'ini xi'sôē' Israel luyú Egipto, ate' gunná bē'ê ca ral-la' ilu'ê dxiata queē' luyú ga na' tsôjcu'ê.

²³ Tu' gula'yējājlē'ê Dios, cate' gúljabī' b'f'ido' Moisés, xuz xiná'abi' bulu'cáché'ê-bi' idú ca tsonna beo', tu' bila'lē'enē' nácabi' bi'i bōnni'do' na' lachi, en biti' guládxinē' bōnni' rinná bē'enē' bōnachi Egipto, bōnni' na' gunná bē'ê ilútiē'-bi' yugu' bi'i bōnni'do' na'. ²⁴ Tu' gúyējājlē'ê bi' Moisés Dios, cate' guzxonbi', b'f'irô bē'ēbi' lataj nu uzôa lēbi' bi'i bōnni' queēnu nigula zxi'inē' Faraón, bōnni' na' rinná bē'enē' bōnachi Egipto. ²⁵ Cani benbi' tu' gúquibī' nácarô dxi'a nu usaca' zi' lēbi' tsôzxôn len bōnachi queē' Dios ca uz'f'ibi' xibé tu ch'f'isô yugu' le tu'z'f' xibé nupa tun dul-la'. ²⁶ Gúquibī' nácarô lesaca' nu ulidza ditaj lēbi', ca na' gaca ca' queē' Cristo, ca idéli'bi' yugu' yôl-la' tsahui' quégaca bōnachi Egipto, tu' guzá' ládxi'bi' ca naca le ubi'ê Dios queēbi'. ²⁷ Gudôdi ni', tu' gúyējājlē'ê Moisés Dios, birúajē' luyú Egipto, en biti' gúdxinē' yôl-la' rilé queē' bōnni' rinná bē'enē' bōnachi Egipto, ate' biá' gulénē' ca run nu rilé'ê Dios, Nu na' biti' gaca ilé'erru'.

²⁸ Tu' gúyējājlē'ê Moisés Dios, benē' Laní Pascua ca gunná bē'enē' Dios lē', en buchējājlē' rôn ra' yu'u lúdxigaquié', para cabi guti zxi'inigaquié' nu na' ral-la' usuniti yugu' bi'i bōnni' z'f'ālô quégaca bōnachi Egipto. ²⁹ Tu' gula'yējājlē'ê yugu' bōnni' Israel Dios, gula'dôdē' luyú bidxi gatsaj láhui'lô nísado' naz'f' le Nisa Xiná. Cate' gulē'ennē' ila'dôdē' ca' bōnni' Egipto ni', gula'yēpinē' nisa, en gulátigaquié' lu Nisa Xiná na'.

³⁰ Tu' gula'yējājlē'ê bōnni' Israel Dios, cate' budxi gula'dôdē' idú gāsibi'ilô yôdzô Jericó yugu' dza idú gadxi dza, bila'gúinnaj yugu' zô'ô gulún ch'f' yôdzô na'. ³¹ Tu' gúyējājlē'ênu Rahab Dios, nigula ru'f'inu lataj bōnachi, biti' gútinu tsôzxôn len bōnachi Jericó na' biti' gulún ca rnna xtídzē'ê Dios, tu' bennu bal bōnni' Israel na' buduyúlanguaquié' le rácalen bōnachi Jericó.

³² ¿Bíxirô ral-la' inniá'? Riyadcaj lataj uzúaja' ca gulunē' Gedeón, en Barac, en Sansón, en Jeffé, en David, en Samuel, enca' yugu' bōnni' gulu'ê didza' uláz queē' Dios.

³³ Tu' gula'yējājlē'ê Dios, bulu'zôtjē' z'f'ian yôdzô zxôn.

Gulunē' le naca tsahui', ate' gula'déli'nē' le guzxi' lu nē'ê Dios unôdzjē' quégaquié'.

Bulu'sayjē' ruá'agacaba' bēdxi guixi'.

³⁴ Bulu'lē' yugu' lu gu'f' zxôn.

Bila'rúajē' lu ná'agaca nupa gulē'ēni iluti légaquié' len guifé tuchi'.

Dios bunē' légaquié' tsutsu cate' ni' gula'cuídi'nē'.

Bulu'huóáquié' ca' tsutsu lu gudil-la.

Bulu'láguifé' bōnni' guixxi yu rōjáquié' gudil-la quégaquié' bōnni' z'f'itu'.

³⁵ Yugu' nigula dza ni' bulu'z'f'inu bi'i que quégacanu nubángacabi' lu yôl-la' guti.

Ia'bal-lē' bōnni' ni' gulátiē' lu ná'agaquié' bōnni' ni' bulu'saca' zi'ê légaquié', en tu' cabi gulē'ennē' ulu'cá'anē' Dios, biti' gula'zi'ê lataj nu usán légaquié'. Cani gulunē' para ila'déli'nē' yôl-la' rubán lu yôl-la' guti, lê na' guléquinē' nazáca'rô. ³⁶ Ia'bal-lē' biá' guléngaquié' yôl-la' rutitaj, en xiguia' que gubá'ayi, ate' gula'dzunē' lidxi guifé, nága'gaquié' lu guifé. ³⁷ Bulu'ládxi' bōnachi bal-lē' guioj, en gula'chôzē' ia'bal-lē'. Gula'zi' bē'ê légaquié', en gulútigaca z'f'iangáquié' len guifé tuchi'. Gula'dôdē' ná'alô ní'ilô, nácugaquié' guídi z'f'agacaba' bō'cu' z'f'ila', en chivo. Guláquié' yechi', en gula'guí'f' gula'záquē'ê, ate' bulu'dxíá bōnachi légaquié' dô'. ³⁸ Cani guláquié' bōnni' na', ate' biti' galaca bōnachi yôdzôlió ni lesaca' ulu'z'f' xibégaquié'. Gula'dasē' lu lataj cá'asô, en yugu' lu guí'a, ate' gula'cuá'asē' yugu' z'f'ian bulóaj, en yugu' yeru luyú. ³⁹ Yúgu'tē' bulu'rúajē' tsahui' lahuē' Dios tu' gula'yējājlē'ê Lē', sal-la' biti' gula'zi'ê luyú ni le guzxi' lu nē'ê Dios unôdzjē' quégaquié'. ⁴⁰ Cani guca, tu' nupē'ê Dios ni'a queēru' tu le nácarô dxi'a para cate' unē' légaquié' idú dxi'a, rê'u ni gunru' légaquié' tsôzxôn.

12

Ral-la' uyuru'-nē' Cristo

¹ Que lē ni na', lēšca' rē'u, tu' nacuá' idú gásibi'ilō ga ni zóaru' ziantērō nupa tun ba nali ca ta'yéajlē' Dios, ral-la' ucá'anaru' yúgu'tē le ruá' dō' le naca ca tu le naca zī' nuá'aru', enca' yúgu'tē dul-la' nazōngaca rē'u, ate' lu yōl-la' ribōza zxōnladxi' queēru', ral-la' gunru' xichinē' Dios, le naca tsca xiti'ru' lu huitaj le zoa loru'. ² Ral-la' uyuru'-nē' Jesús, Nu na' run ga gaca tséajlē'ēru' Dios, en Nu run ga raca idú yōl-la' réajlē' queēru' Lē'. Jesús gudí' guzjáquē'ē lē'e yaga cruz, en biá' gulēnē' yōl-la' rutuf'i que, tu' gú'unnē' idéli'nē' yōl-la' rudzeja na' uzi'ē xibé, ate' yōjchō'ē cuita lē'ē ibēla Dios, ga ni' rō'ē rinná bē'ē.

³ Buli'yúē' Jesús, ca na' gudí' guzjáquē'ē le bulu'saca' zi'ē bōnni' dul-la' Lē', para cabi icuidi'li', en para cabi gaca chopá lādxi'li'. ⁴ Ga ridxintē na'a dza, biti' bi biá' gulenli' ga idxintē nu gun libí'li' huē' tu' ridá'baga'li' le naca dul-la'. ⁵ Nadxi ca' chizá' ral-la lādxi'li' lē na' ruzéajni'inē' Dios libí'li'. Nácali' ca yugu' zxi'ini cazē', ca na' nazúaj lu guichi le rnnē': Zxi'ina', biti' uzú' tsólá'alō le gunē' Xanru', cate' usēdi uzéajni'inē' li', en biti' huóaj lādxi'u cate' uní'inē' li'.

⁶ Xanru' runí'inē' nu nadxi'inē', en rusēdi ruzéajni'inē' yúgu'tē nupa ta'zī' lu nē'e ilaca zxi'ini cazē'.

⁷ Ral-la' guá' ilenli' le uní'inē' Dios libí'li', tu' runē' Dios caní queēli' tsca nácali' zxi'ini cazē'. Biti' ca' zóabi' tubi' bí'ido' biti' uní'inē'-bi' xúzibi'. ⁸ Na'a, channō cabi runí'inē' Dios libí'li' ca na' runē' quégaca yúgu'tē zxi'ini cazē', ní'irō nácali' ca yugu' bi'i lan, en biti' nácali' idú zxi'inē' Dios. ⁹ Ia stú, cate' ní' nácaru' bí'ido', gula'cu'ē xuz xiná'aru' luyú ni, bulu'ní'inē' rē'u, pero runru' légaquie' bal. Ca' naca, ral-la' gūnrōru' ca rnna xtdídzē'ē Xúziru' zoē' yehua' yubá para sóaru' ibanru' tsaz. ¹⁰ Yugu' xuz xiná'aru', tu' chí'sō bulu'ní'inē' rē'u tsca le guléquisinē' naca dxi'a, pero cate' runí'inē' Dios rē'u, naca para gaca tu le uzí'iru' xibé, para gácaru' idú lá'ayi ca naca cazē' Lē'. ¹¹ Le nácatē biti' nalá' lahuí na'a le uzí'iru' xibé que le runí'inē' rē'u, pero run ga ruhu'íniru'. Channō gū'iru' lataj usēdi rē'u le runí'inē' rē'u, gun ga cózaru' dxi'ado', en ga gácaru' tsahuí'.

Soa bōnadxi queēru' channō cabi uzē' nágaru' chí'ē Dios

¹² Que lē ni na' buli'ún tsutsu ná'ali' le rōjxéqui'guequi, enca' xzíbili' le ta'xzizi, en idipa lādxi'li' para gunli' le naca dxi'a. ¹³ Guli'sóa nōza tsahuí', para cabi gunli' ga ucá'ana nu ricuidi' lādxi' nōza na', pero guli'gún ga huóaca lādxi' nu na'.

¹⁴ Guli'gú' lādxi'li' cózalenli' dxi'a yúgu'tē bōnachi, en gácali' tsahuí' lahuē' Dios, tu' channō cabi gunli' caní, biti' gaca ilé'eli'-nē' Xanru'. ¹⁵ Guli'gún chí'i cuinli' para cabi soa nu ucá'ana le ruzá' lādxi'ē Dios queēru', en para cabi soa nu gaca ca tu guixi' silá', para cabi utsá' libí'li', en cabi gun ga cabi gácali' tsahuí' zianli' libí'li'. ¹⁶ Guli'gún chí'i cuinli' para cabi gun nu dzaga libí'li' le ruá' dō', o le cabi naca tsahuí', ca na' benē' Esaú, zxi'inē' Isáac. Esaú na' bēti'ē le ral-la' gata' lu nē'ē tu' náquie' bi'i bōnni' huaca queē' xuzē' para guzxi'ē tu le do' gudahuē'. ¹⁷ Chinōz quézili' ca na' guca queē' Esaú gudōdi ní' cate' gú'unnē' idéli'nē' le inabē' xuzē' lahuē' Dios para gaca le tsahuí' queē'. Buéchi' lādxi'ē xuzē' lē', pero biti' guta' lataj ubí'i lādxi'ē Esaú na' sal-la' gudilaj lādxi'ē le len yōl-la' ribōdxi queē'.

¹⁸ Ca raca queēli' biti' naca ca guca quégauie' bōnni' Israel. Légaquie' gula'biguē'ē gala' ga zoa tu guí'a le gaca nu can, ate' guyegui guí'a ni', en bōaca chul-la lahuí' dza tu' gurō'ō bōaj gasaj, en guyégada' bō'. ¹⁹ Bila'yōnnē' ta'bōdxi lúzuba' bōa', enca' chí'ē Dios Nu bē' didza'. Cate' bila'yōnnē' lē ni, gulá'ta'yú' lahuē' Moisés para cabirō gū'ilenē' Dios légaquie' didza'. ²⁰ Caní gulunē' tu' cabi guca guá' iléngaquie' lē na' gunná bē'enē' Dios légaquie', gunnē': "Channō tsōjlibiba' tuba' bōa' guí'ido'os guí'a ni, ral-la' ulu'lādxi'ē-ba' guiōj, o ulu'dōdē-ba' yaga tuchi'." ²¹ Lē na' bila'lē'enē' ben gádxida' légaquie', ate' Moisés gunnē': "Radxi ridzōbida', en rizzizida'a."

²² Na'a, libí'li' ral-la' gádxitērōli' tu' ribíga'li' gala' tu lu guí'a nazí'i le Sión, en ga zoa yōdzō queē' Dios ban, le nazí'i le Jerusalén que yehua' yubá, ga na' nacu'ē gubáz lá'ayi guizxi yu queē' Dios. ²³ Ribíga'li' gala' ga ni' nudúbigaca zxi'ini cazē' Dios lahuē' Lē', nupa na' nazúajgaca láguequi lu guichi ni' yehua' yubá, enca' ga zoē' Dios Nu ruchi'a rusōrōē' yúgu'tē bōnachi, en ga na' nacuá' yugu' bō' gulaca cazē' yugu' bōnni' tsahuí', tu' bunē' Dios légaquie' tsahuí'. ²⁴ Ribíga'li' ca' ga zoē' Jesús, Nu ben tsutsu didza' cubi na' rucá'ana tsahuí', enca' ga nagu'ē Jesús rōn queē' le run ga runiti lahuē' Dios rē'u, rōn na' run le nácarō dxi'a ca le ben xichōnē' Abel, lē na' ben ga guchúguie' Dios queēbi' bi'i bōché'ē.

²⁵ Que lē ni na', guli'gún chí'i cuinli' para cabi tá'baga'li' Nu na' ruí' didza'. Biti' ca' bulu'lá nupa ni' gula'dá'baga' nu na' bulidza légaquie' luyú ni. Nácatērō lōza biti' ca' uláru' rē'u channō tá'baga'ru' Nu na' rulidza rē'u, zoē' yehua' yubá. ²⁶ Dza ni' guzxi' luyú ni tu' biyōn chí'ē Dios, pero na' chiguzxi' lu nē'ē, gunnē': "Ia'tú luzuísō, en calégasō luyú uxízia', pero

lúzxiba ca' uxízia'." ²⁷ Cate' ni' rnné': "Ia'tú luzuísö", lê ni rulu'í rë'u ral-la' udúa yugu' le gaca ila'xzizi, lê na' rë'ö yödzüliö ni, ate' ulu'gá'ana le cabí gaca ila'xzizi, lê na' rë' yehua' yubá. ²⁸ Que lê ni na', tu' ral-la' idéli'ru' tu lataj ga inná bē'ëru', le cabí izxizi, ral-la' guiëru'-nē' Dios: "Xclenu'", ate' lu yöl-la' ba'a ladxí, en lu yöl-la' radxi Lē' tseaj ladxí'ru' Lē' ca na' raza ladxē'ē Lē', ²⁹ tu' náquiē' Dios queëru' ca tu guí' le rusuniti le cabí naca idú tsahui'.

13

Le ral-la' gunru' le raza ladxē'ē Dios

¹ Ral-la' idxí'tica'sili' luzá'ali' tuli' ia'tuli'. ² Guli'tsöjné ral-la' uzóali' lídxili' nu idxín ga zóali'. Cate' gulún caní bal-la bōnachi, bulu'cuá' lídxiguequi gubáz lá'ayi que yehua' yubá queē' Dios, sal-la' bití' guléquibe'e nácagaquiē' gubáz lá'ayi.

³ Guli'tsöjné nupa nadzüngaca lidxi guiē' tsca nunli' légaquiē' tsözxön, nadzunli' ca' lidxi guiē'. Guli'guí' ladxí'li' yugu' bōnni' ta'bía ladxí'gaca bōnachi légaquiē', tsca libí'ili' riguí' rizáca'lenli' légaquiē' tsözxön.

⁴ Ral-la' gunli' bal yöl-la' nutsaga na', ate' tu tuē' bōnni' ral-la' sóalenē'-nu nigula queē' lu yöl-la' ba'a ladxí' queē', tu' ichúguiē' Dios quégaca nupa tun le ruá' dō', en nupa ta'guítsaj xibá que yöl-la' nutsaga na'.

⁵ Bití' bi uhuí'di'li', pero guli'tsaza ladxí'li' tsca le dē queē'li' na'a, tu' chigunnē' Dios: "Catu caz uca'ana' li', en bití' ca' ubéaj ladxá'a li'." ⁶ Caní naca, huáca innaru' idú ladxí'ru' lê na' rnna:

Xanru' náquiē' Nu rácalen neda'.

Bití' ca' gádxida' bi gun bōnachi quia'.

⁷ Guli'tsöjné yugu' bōnni' tu'yúē' libí'ili', nupa na' tu'sedinē' libí'ili' xtídzē'ē Dios. Buli'yú ca nadéli'gaquiē', en guli'gún ca tunē' lu yöl-la' réajlē' quégaquiē' Dios.

⁸ Lēbisö ca náquiē' Jesucristo, néaje, en na'a, en cá'tica'sö. ⁹ Bití' güi'ili' lataj yugu' xibá izá'a, en xibá nadzá' ichē'gaca libí'ili' nōza yúbölö. Naca dxi'a gunli' tsutsu icja ladxí'do'oli' ca naca le ruzá' ladxē'ē Dios queē'li', en calēga ca nácagaca xibá que le rē'aj ráguru', lê na' bití' ulu'zí' xibé nupa tu'í ladxí'gaca léguequi.

¹⁰ Zoa queëru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'alö. ¹¹ Bixúz lo que yu'u lá'ayi na' gulu'ē xichōngacaba' bōa' bēdxi lu lataj idú lá'ayi tu' nōzi dul-la', pero bulu'zéguiē' bēla' cá'sö quégacaba' gaca na' nílö ra' yödzö. ¹² Lēscá' caní gudí' guzáquē'ē Jesús nílö ra' yödzö para bunē' bōnachi dxi'a len rōn queē' cazē'. ¹³ Tsöjtá'aru'-nē' Jesús, sal-la' ila'béaj bōnachi rē'u lu yödzö, en sí'iru' tsözxön len Lē' lê na' bulu'lidza ditaj bōnachi Lē'. ¹⁴ Bití' zoa tu yödzö queëru' yödzölíö ni le soa tsaz, pero riguljaru' lê na' sí' za'. ¹⁵ Que lê ni na', ral-la' cú'utica'siru' nē' Dios yöl-la' ba, ugunru' dxin Lē' Jesucristo. Yöl-la' ba na' naca ca tu le rigú'uru' lahuē' Dios. Len ruá'a cuinru' guiëru'-nē' Dios: "Xclenu'" ní'a que le náquiē' Lē'. ¹⁶ Bití' gal-la ladxí'li' gunli' le naca dxi'a, en gácalenli' luzá'ali' tuli' ia'tuli', tu' naca lê ni ca tu le rigú'uru' lahuē' Dios le raza ladxē'ē Lē'.

¹⁷ Guli'gún ca rnna xtídzagaquiē' bōchi'ru' tu'yúē' libí'ili', en guli'gü' lataj ila'nná bē'enē' libí'ili', tu' tapa chí'ē bō' naca cázali', ca tunē' yugu' bōnni' ral-la' ila'guíxjö'ē lahuē' Dios le nūngaquiē'. Guli'gún caní para ilunē' dxin na' lu yöl-la' rudzeja quégaquiē', en calēga lu yöl-la' risēbi ladxí' quégaquiē', tu' cabí uzí'ili' xibé dxin na' ilunē' lu yöl-la' risēbi ladxí' quégaquiē'.

¹⁸ Buli'lidzē' Dios, inábili'-nē' gácalenē' netu', tu' runtu' löza soa dxi icja ladxí'do'otu', para cabí uxōsa netu', ate' ruí' ladxí'tu' gúntica'situ' le naca dxi'a. ¹⁹ Le nácarö lo, ráta'yua' loli' inábili'-nē' Dios ugu'ē neda' tu nōza para udxina' ga zóali' bayöntē.

Dios uzá' ladxē'ē queëru' le gácalen rē'u

²⁰ Na'a, rinábitu'-nē' Dios, Nu run le rucá'ana rē'u tsahui', en Nu busubán Xanru' Jesucristo lu yöl-la' guti, Nu na' naca Bōnni' Lo Uyú Bō'cu' Zxila', tu' bulajlē' rōn queē' le run tsutsu didza' rucá'ana tsahui', le zoa tsaz, ²¹ rinábitu'-nē' gunē' ga gácali' idú tsahui', para gaca gunli' yúgu'tē dxin dxi'a, en gunli' ca rē'ēnē' Lē', ate' gunē' queē'li' le raza ladxē'ē Lē', tu' néquili' queē' Jesucristo. ¡Queē' Cristo gácatica'sö yöl-la' ba! ¡Ca' gaca!

²² Ráta'yua' loli', bōchi' luzá'ado', güí' ladxí'li' didza' ni rzéajni' libí'ili', tu' naca láti'do'os lê ni ruzúaja' queē'li'. ²³ Ral-la' inözili' chiburúajbi' bi' Timoteo, bi' bōchi'ru'do', lidxi guiē', ate' channö idxintēbi' ga zoa' ni, gunbi' neda' tsözxön uduyútu' libí'ili'.

²⁴ Buli'gapa Dios bōchi'ru' tu'yúē' libí'ili', enca' yúgu'tē bōnachi rō queē' Dios. Tu'gapa Dios libí'ili' bōnachi ta'yéajlē' Cristo nacua' luyú Italia.

²⁵ ¡Dios uzá' ladxē'ē queē'li' yúgu'tēli'! ¡Ca' gaca!

LE BUZÚAJË LU GUICH SANTIAGO

Santiago rugapë Dios bönni judío ta dë'ë Cristo

¹ Neda', Jacobo, naca' huen dxin queë' Dios, enca' queë' Xanru' Jesucristo. Rugapa' Dios libí'ili', nácali' idxinnu cō' di'a dza quégaca bönachi Israel, násilasili' idú yōdzolió ni.

Yöl-la' réajni'i le runnë Dios queëru'

² Böchi' luzá'ado', cate' gaca bi gaca queëli' le si' bē' libí'ili', ral-la' udzējali' idú lādxi'li' ³ tu' nōz quézili', cate' bi raca queëli' le rizi' bē' libí'ili' ca réajlë'ëli' Cristo, lē ni rusedi libí'ili' cōzali' zxōn lādxi'. ⁴ Guli'gūi' lādxi'li' gaca idú yöl-la' zxōn lādxi' queëli', para údxi gácali' bönni' ta'yéajni'inē, en biti' bi yadzaj queëli' ca nácacaga lē ni.

⁵ Channō zoa ladaj libí'ili' nu biti' réajni'ini, nu na' ral-la' inabi-nē Dios, ate' Dios caz gunnë' yöl-la' réajni'i que, tu' runōdzjē' yōdxi yana' quégaca yúgu'tē bönachi, en biti' ca' réqui quézinē' gunnë' queëru'. ⁶ Na'a, nu bi rinabi-nē Dios, run bayudxi tséajlë' Lē, en cabí gaca chopa lādxi'. Nu raca chopa lādxi', raca que ca raca que bidxina' que nísado' cate' rutá bō' le, ruzéaj bō' le nilō ná'alō. ⁷ Nu naca caní biti' ral-la' gun lōza si' bi unōdzjē' Xanru'. ⁸ Bönni' na' reaj bō' lādxi'da'ahuē' biti' ridzōlinē' nácalō gunē'.

⁹ Channō zoë' tu bönni' böchi'ru' réajlë'ë Cristo, en náquiē' cá'asō yōdzolió ni, ral-la' udzējanē' tu' chinadéli'nē' tu lataj lo lahuē' Dios. ¹⁰ Bönni' böchi'ru' na' rilē'enē' yöl-la' tsahui' queë' ral-la' udzējanē' cate' runē' Dios ga bítirō ruzxōni lādxi'ē lē na' dē queë'. Nu ruzxōni lādxi' yöl-la' tsahui' que, gaca que nu na' ca raca que xiyija guixi'do', la' ridōditē que. ¹¹ Caní naca, tu' gaca que nu na' ca raca que xiyija guixi'do' na' cate' rilēn gubidza, en rudzá'ada', la' ribidxitē guixi' na', en riguinaj xiyija, en riniti yöl-la' lachi que. Lēsa' caní gaca queë' bönni' rilē'enē' yöl-la' tsahui' queë', inítiē' tsanni ni runē' dxin riguiljē' yöl-la' tsahui' na'.

Le ta'zì bē' rē'u

¹² Bica' ba bönni' böchi'ru' na' ruá' rilenē' le rizi' bē' lē'. Cate' chiburúajē' tsahui', idéli'nē' yöl-la' na'bán idú, ca na' rideli' nu nutsa' lu huitaj, nu rideli' tu bregui' zín. Bönni' böchi'ru' na' náquiē' bica' ba tu' idéli'nē' yöl-la' na'bán idú na' guzxi' lu nē'ē Dios unōdzjē' quégaca nupa nadxi'iguequi Lē'. ¹³ Cate' bi raca queëru' le run ga guē'éniru' gunru' le ruá' dō', bítirō ral-la' innaru': "Dios rizi' bē'ē rē'u len le naca xihui'." Dios bítirō rizi' bē'ē nu bönni' len le cabí naca dxi'a. ¹⁴ Na'a, channō nu bi raca que le rizi' bē' le len le cabí naca dxi'a, naca tu' rizē lādxi' le ruá' dō', ate' lē ni ben ga gú'uni gun le ruá' dō'. ¹⁵ Lē na' rizē lādxi'ru' le ruá' dō' run ga gunru' dul-la', en cate' chibudxi benru' dul-la' na', la' dul-la' ná'asō rusubaga' rē'u xíguia' gátiru'.

¹⁶ Böchi' luzá'ado', bítirō si' ye'e la' cuínsili'. ¹⁷ Yúgu'tē le naca dxi'a, en yúgu'tē le naca idú le ruzi'iru' xibē, zá' gaca saca' xitsá'alō, en ta'rúaj ga zoë' Xúziru' Dios, Nu ben yugu' le ta'yēpi yōsa lúxhiba, yugu' le tu'sá' cuínguequi, pero Lē' bítirō rutsá' cuinē', en bítirō rutsē'ē ca runē', rúnatica'sē' queëru' le naca tsahui'. ¹⁸ Ca ré'ēni quézinē' Dios, benē' ga nácaru' bönachi cubi queë'. Bugunē' dxin didza' queë' le naca idútē li, para gácaru' ca tu gulapa zí'alō queë' ladaj yúgu'tē nupa na' gurō cazē' Dios.

Le reaj lādxi'ru'-nē Dios le naca li lādxi'

¹⁹ Que lē ni na' rea' libí'ili', böchi' luzá'ado', yúgu'tēli' ral-la' sóali' sina' yōnili', pero bítirō ral-la' innētēzili', en bítirō ilētēzili'. ²⁰ Nu na' riletēz bítirō run le naca tsahui' lahuē' Dios. ²¹ Que lē ni na', guli' cá'ana yúgu'tē le ruá' dō', en yúgu'tē le zían le cabí naca tsahui', ate' lu yöl-la' nōxaj lādxi' guli'sí' lu ná'ali' didza' na' chinayaza icja lādxi'do'oli', tu' huáca gun didza' ni ga uláli'.

²² Na'a, guli' gún ca rnna didza' ni, en cabí yōnisili', tu' channō yōnisili' didza' ni, si' yé'eli' la' cuínsili'. ²³ Nu riyōnisō didza' ni, en bítirō run ca rnna, nu ni naca ca tu bönni' ruyúē' lahuē' tu lu guē dxiili, ²⁴ tu' ruyú cuinē', en sōhuōjē', ate' la' ral-latē lādxi'ē ca rinē'ē. ²⁵ Na'a, nu bönni' bítirō ral-la' lādxi'ē le riyōnnē', pero ruí' lādxi'ē xibá queë' Dios le naca idú li, en le gaca gun ga uláru', ate' ugá'anē' tsutsu, en gúntica'sē' ca rinná bē' xibá na', gaquiē' bica' ba ca naca yúgu'tē le runē'.

²⁶ Channō nu bönni' ladaj libí'ili' réquinē' naca dxi'a ca reaj lādxi'ē Dios, pero bítirō rapa chí'ē lúdxē'ē para cabí innēsē' ca', bönni' ni rizi' yé'enē' la' cuínsē', ate' bítirō raza lādxi'ē Dios ca reaj lādxi'ē bönni' na' Lē'. ²⁷ Le reaj lādxi'ru'-nē' Dios, le naca idú, en le naca dxi'a, naca gácalenru' yugu' bi'i uzēbido', enca' yugu' nigula nagá'ananu tūzinu, cate' ta'guí' ta'zaca' nupa na', en cabí gútsa'ru' le cabí naca tsahui' le raca yōdzolió ni.

2

Tuz ca ral-la' gunru' bönachi bal

¹ Böchi' luzá'ado', channö réajlë'ëli' Xanru' Jesucristo, Nu nácatërö lo, biti' ral-la' utsá'ali' ca gunli' bal tu tu bönachi. ² Channö tsázië' tu bönni' ga na' nudúbili', en nagu'ë xibön në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö, ³ channö gunli' bal bönni' na' nácuë' lari' nazáca'da', en guiëli'-në: "Gurö'ölen rë'u ga ni naca dxi'a", pero guiëli' bönni' yéchi'do' na': "Ná'asö guzu", o guiëli'-në: "Gurö'i lu yu ni." ⁴ Channö caní runli', rutsá'ali' ca runli' bal tu tu luzá'ali', en run cuinli' ca nu ruchi'a rusörö luzë'e, biti' naca dxi'a ca rizá' ládxi'li'.

⁵ Böchi' luzá'ado', buli'zë nágalí' lë ni. Dios gurö cazë' yugu' bönni', sal-la' téquiguequi bönachi yödžoliö ni nácaquaquië' cá'asö, para ila'déli'në' yöl-la' tsahui' lahuë' Lë' tu ta'yéajlë'ë Cristo, en gata' quégaquië' lataj ga ni' rinná bë'ë Lë'. Gata' quégaquië' lë na' guzxi' lu në'ë Dios unödzjë' quégaca nupa ta'dxi'i Lë'. ⁶ Libí'ili' rucá'anali' cá'asö bönachi yechi' ca', en runli' bal yugu' bönni' dë yöl-la' tsahui' quégaquië', ate' bönni' na' dë yöl-la' tsahui' quégaquië' tu'saca' zi'ë libí'ili', tu' tu'gunë' libí'ili' dxin. Lësca' tu'dödë' libí'ili' lu ná'agaquië' bönni' yúlahui'. ⁷ Yugu' bönni' na' dë yöl-la' tsahui' quégaquië' ta'nnë zi'ë ca' que Lë' Jesucristo le nazáca'tërö, en ca naca Lë' nazí'ili' lali': "Nupa Dá'gaca Cristo."

⁸ Runli' dxi'a channö runli' idú ca rinná bë' xibá lo, le nazúaj lu guichi, en rnna caní: "Ral-la' idxi'inu' luzó'o ca nadxí'i cuinu'." ⁹ Na'a, channö rutsá'ali' ca runli' bal tu tu bönachi, runli' dul-la', en nabága'li' xíguia' lu xibá queë' Dios, tu' riguítajali' xibá na'. ¹⁰ Channö runë' tu bönni' idú ca rinná bë' xibá queë' Dios, pero channö ichíxinë' ca naca tuz le rinná bë' xibá na', chinabáguë'ë xíguia' que idútë le rinná bë' xibá na'. ¹¹ Lë cazë' Dios gunnë: "Biti' gunu' dul-la' le riguítaj xibá que yöl-la' nutsaga na'", en gunnë ca': "Biti' gútiu' bönachi." Na'a, channö cabi runu' dul-la' le riguítaj xibá que yöl-la' nutsaga na', pero rútiu' bönachi, nabágu' u xíguia' que idútë xibá queë' Dios. ¹² Ca innali', en ca gunli', ral-la' gunli' ca ral-la' ilún nupa uchi'a usöröë' Dios légaquië' ca rinná bë' xibá na', le run ga uláru'. ¹³ Nupa cabi tu'huechi' ládxi'gaca luzë'eguequi, uchi'a usöröë' Dios léguequi, ate' cuntu nu huéchi' ládxi' léguequi, pero nupa na' tu'huechi' ládxi'gaca luzë'eguequi ulu'rúaj dxi'a cate' uchi'a usöröë' Dios léguequi.

Le ral-la' gunru' tu' réajlë'ëru' Cristo

¹⁴ Böchi' luzá'ado', biti' bi' uzi'ë xibé tu bönni' channö innasë: "Réajlë'a Cristo", pero biti' runë' le naca tsahui'. Biti' gaca ulë' bönni' na' channö innasë' réajlë'ë Cristo. ¹⁵ Channö nacu'ë böchi' luzá'aru' ta'yéajlë'ë Cristo, en biti' dë le ilácuë', en calëga le ilahuë', ¹⁶ ate' channö tu nu dzaga libí'ili' guiëšö légaquië': "Böaj lidxili' tsáhu'i'do'. Chibö'aj budzé'eli'", pero channö cabi unödzaj quégaquië' lë na' ta'yádzjanë', biti' ca' gúcalen légaquië'. ¹⁷ Lësca' caní raca que nu bönni' rnnasë' réajlë'ë Cristo. Channö cabi runë' le naca bë' naca idú ca réajlë'ë Lë', biti' naca lesaca' yöl-la' réajlë' queë'.

¹⁸ Nadxí ca' guië' tu bönni' luzë'ë: "Li' réajlë'ësu' Cristo, ate' neda' runa' le naca tsahui'. Biti' gaca ulu'i'nu' neda' réajlë' lu Cristo channö cabi zoa le naca tsahui' runu'. Neda' ulu'i'da' li' réajlë'a Cristo ni'a que le naca tsahui' runa'." ¹⁹ Li' réajlë' lu tuzë' náquië' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxizi tádxida' Lë'. ²⁰ Li', bönni' biti' bi' nöžinë'. Ral-la' inözi quézinu' channö zoa nu rnnasö réajlë' Cristo, pero biti' run le naca tsahui', biti' naca lesaca' yöl-la' réajlë' Lë' que nu na'. ²¹ Naca bë' burúajë' xúzi'ru' Abraham tsahui' lahuë' Dios ni'a que lë na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na' tun bönachi ta'gú'u le tu'zegui' lahuë' Dios, sal-la' biti' buzégui'ë-bi'. ²² Na'a gaca inözili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë na' benë'. ²³ Caní guca lë na' nazúaj lu guichi lá'ayi le rnna: "Abraham guyéajlë'ë Dios, ate' Dios bilé'enë' lë na' benë' ca tu le ben ga boáquië' Abraham tsahui'." Que lë ni na' guzxi'i lë: "Luzë'ë Dios."

²⁴ Na'a, rilé'e quézili' naca bë' rurúajë' tu bönni' dxi'a ni'a que le runë', en calëgasö tu' réajlë'ë Dios. ²⁵ Lësca' caní guca queënu Rahab, nigula bë'ënu bönachi lataj. Lësca' naca bë' burúajnu dxi'a tu' zoa tu le tsahui' bennu, lë na' bennu cate' ni' bennu bönni' tu'yulan bal, en gúcalennu légaquië' para bulu'guélë'ë yöjhuöjgaquië' nöza yúbölö. ²⁶ Ca na' raca que idútë le naca cázaru' channö cabi yu'u bö', chinati, lësca' caní naca que le réajlë'ëru' Cristo channö cabi nalá' yöl-la' run que, biti' naca lesaca'.

3

Yugu' le rnna lúdxí'ru'

¹ Böchi' luzá'ado', biti' guntëz zían cuinli' bönni' tu'sédinë' bönachi, tu' chinöz quézili' zítërö uchi'a usöröë' Dios rë'u, núlöru' rusédiru' bönachi. ² Yúgu'tëru' runru' zían le richixi riníguiru'. Channö cabi richixi riníguinë' tu bönni' ca naca didza' ru'ë, bönni' ni náquië' idú tsahui', en

raca inná be'e cuinë' ca naca yúgu'tè le runè'. ³ Cate' rigú'uru' guié ruá'agacaba' bôa' para gunru' ga ilunba' ca rê'ëni'ru', gaca inná bé'eru' légacaba' lu idútè le tunba'. ⁴ Buli'yú' ca' ca naca quéguequi barco. Sal-la' xzöntëro naca tu barco, en rëcjada' bô' ruzéaj le, cuídi'do'os naca nè'e xiyágui barco na' le ruzecaj rudxi'i barco para tseaj gáti'tës ga gué'ënnë' bônni' rusé'ë le. ⁵ Lësca' caní naca lúdx'i'ru'. Sal-la' cuídi'do'os naca, ziantëro le rnna lúdx'i'ru' na'. Buli'yútsôca' ca run guí'. Sal-la' guí'do'os ribíbiru', tu guí'a sibi huayégui. ⁶ Lësca' lúdx'i'ru' na' naca ca tu guí'. Yúgu'tè le ruá' dō' raca yōdzōliō ni rnna lúdx'i'ru', en tu' dzaga lúdx'i'ru' na' idútè le naca cázaru', que lë ni na' run ga raca xihui' idútè le nácaru'. Le rnna lúdx'i'ru' ribequi guí', le ruzegui' rë'u ca naca yúgu'tè le runru', ate' tu' rnna caní lúdx'i'ru' na', naca que tsca chinaguéla'tè guí' le nabequi' tu' xihui'. ⁷ Yúgu'tëba' bôa' guixi' ta'daba' luyú, en yugu' bôa' zoa xilíagacaba', en yugu' bôa' tá'ayōj lë'ëba' lu yu, enca' yúgu'tëba' bôa' dzō'ôba' lu nísado', huáca ila'nná be'e bônachi luyú ni légacaba', ⁸ pero cuntu nu bônni' gaca inná bé'enë' lúdx'ë, tu' rnna lúdx'i'ru' le ruá' dō', en biti' gaca nu uzaga' xinōzi. Ziantëro le rnna lúdx'i'ru' le naca ca tu le nachë' yōl-la' guti. ⁹ Len la' lúdx'i'ru' ná'asō rulidza tsáhui'ru'-në' Dios Xuz, en rulidza dítjaru' ca' yugu' bônni', ate' benë' Dios légaquië' ca naca cazé' Lë'. ¹⁰ Caní naca, len la' ruá'asiru' na' rulidza tsáhui'ru' bônachi, en rulidza dítjaru' bônachi. Bōchi' luzá'ado', biti' ral-la' gaca caní. ¹¹ Biti' ca' ta'lén nisa siziá', en nisa zōna' la' tuzi ga ta'lén. ¹² Bōchi' luzá'ado', tu yaga higo biti' gaca cuía le ribía yaga olivo, ate' tu lubá uva biti' gaca cuía le ribía yaga higo na'. Lësca' caní, nitú ga rilén nisa biti' gaca ila'lén nisa zōna', en nisa siziá'.

Yōl-la' réajni'i le naca idú

¹³ Channō zoë' tu bônni' ládjali' rácadë'ë, en réajni'de'enë', lu yōl-la' nōxaj ladxi' queë' ral-la' ulu'ë náquië' caní ni'a que le naca tsahui' runè'. ¹⁴ Na'a, channō ruzxé'eli' luzá'ali', en runli' dxin para ila'gú'u bônachi libí'ili' yōl-la' ba, biti' ral-la' gun ba xzōn cuinli' ca naca yōl-la' réajni'i queëli'. Nu run caní rizí' yë', en ridá'baga' le naca idútè li. ¹⁵ Yōl-la' réajni'i caní biti' naca le runōdzjë' Dios, pero que yōdzōliō ni naca, enca' quégaca bônachi yōdzōliō ni, en que tu' xihui'. ¹⁶ Yugu' bônni' tu'zxé'enë' luzá'agaquië', en tē'ënnë' ila'gú'u bônachi légaquië' yōl-la' ba, lësca' ta'dil-la didzé'ë, en tunë' yúgu'tè le ruá' dō'. ¹⁷ Yugu' bônni' nápaqaquië' yōl-la' réajni'i na' runōdzjë' Dios:

Tunë' le naca idú tsahui', en ta'bōzë' dxi'ado'.

Nácagaquië' xzōn ladxi', en nōxaj ladxi'.

Tu'huechi' ládxi'gaquië' bônachi,

en tunë' le naca dxi'a.

Tuz ca tu'chí'a tu'sōrōë' luzá'agaquië',

en biti' ta'béaj bē'ë luzá'agaquië'.

¹⁸ Nupa tuí'i ládxi'gaca ila'bequi dxi le raca, ta'bōza dxi'ado', para gaca ca' dxi'a idútè le zeaj naca caz.

4

Nupa tun xzōn le nacuá' yōdzōliō

¹ ¿Bizx que na' ridíl-lali', en raca didza' bizxaj queëli'? Raca caní queëli' tu' rizé ládxi'li' zían le rizé ládxi'li' tu' tuli', en que lë ni na' ridíl-lalenli' luzá'ali'. ² Zían le ruhuídí'li', en tu' cabí rizí'ili' le, que lë ni na' rútili' bônachi. Ruzxé'eli' le dë que luzá'ali', en tu' cabí ridé'li'li' le, que lë ni na' rizóa ribō'ōli', en ridíl-lali'. Biti' rata' queëli' le rē'ënilí', tu' cabí rinábili'-në' Dios lë na'. ³ Sal-la' zoa bi rinábali', biti' bi rizí'ili', tu' cabí naca dxi'a ca rinábali', tu' rē'ënilí' lë na' rinábali' para ugunli' le dxin ca raza ládxi'sili'. ⁴ Libí'ili', bônachi nusanli'-në' Dios, ¿naru' cabí nōzili' channō runli' xzōn le nacuá' yōdzōliō ni, chinuhuóacali' ca nu biti' rilé'e Dios dxi'a? Núti'tës nu rē'ëni gun xzōn le nacuá' yōdzōliō ni, nuhuóaca ca nu biti' rilé'e Dios dxi'a'. ⁵ Biti' rnna sō ca' le nazúaj lu guichi lá'ayi le rnna: "Dios risól-lë'ë Dios Bō' Lá'ayi queëru', Nu zóalen rë'u, ate' Lë' nadxi'inë' rë'u, en rudúli'në' rë'u channō rusanru'-në'." ⁶ Na'a, xzöntëro le ruzá' lúdx'ë Dios queëru', tu' nazúaj lu guichi lá'ayi le rnna: "Dios ruzáguë'ë xinózguequi nupa tun ba xzōn cuínguequi, pero ruzá' lúdx'ë quégaca nupa nácagaca nōxaj ladxi'." ⁷ Que lë ni na', guli'sóa nōxaj ladxi' lahuë' Dios. Guli'nná be'e tu' xihui', ate' uzzunnaj ga zóali'. ⁸ Guli'gú'i ládxi'li' sóalenli'-në' Dios, ate' Lë' idisóalenë' libí'ili'. Libí'ili', bônachi dul-la', guli'gaca tsahui', en biti'rō gunli' dul-la'. Libí'ili', núlōli' reaj bō' ládxi'do'oli', en chopa le nadxi'ili', guli'gún dxi'a icja ládxi'do'oli'. ⁹ Guli'sëbi ládxi'li', en buli'huf'ini, en guli'cōdxi. Na'a ruzxidxi, pero ral-la' cōdxi'li'. Rudzéjali', pero ral-la' huf'inili'. ¹⁰ Guli'gaca nōxaj ladxi' lahuë' Xanru', ate' Lë' gunë' ga tsépisëli'.

Biti' ral-la' ichugu bē'ëru' le run luzá'aru'

¹¹ Bōchi' luzá'ado', biti' innëli' que luzá'ali' tuli' ia'tuli'. Nu bônni' rinnë' que bōchi' luzé'ë, en rilaga yudxé' le runë', bônni' ni rinnë' que xibá queë' Dios, en ruchi'a rusōrōë' le rinná bē' xibá na'. Na'a, channō ruchi'a rusōrōu' le rinná bē' xibá na', run cuinu' nu ruchi'a rusōrōë'

le, en biti' runu' ca rinná bē' xibá na'. ¹² Na'a, tuzē' náquiē' Dios, Nu ben xibá na', en náquiē' ca' Nu ruchi'a rusōrōē' le runru'. Lē cazē' gaca usōlē' bōnachi o usunítie' bōnachi na'. Na'a, ¿núzxitē run cuinu', rilaga yudxu' luzó'o?

Biti' gaca gunru' löza le gaca cuxō huidzaj

¹³ Na'a, buli'zē' nágali, núlōli' rnnali': "Cuxō huidzaj tséajtu' yōdzō ni', ate' sóatu' ni' tu iz, en zían le gá'utu', en úti'tu', ate' caní gáta'da' dumí queé'tu'." ¹⁴ Biti' nōzili' bíxzi gaca cuxō huidzaj. ¿Nacxi caz naca queé'ru', tscá zóaru' yōdzōlió ni? Nácaru' ca bōchila le nalá' tu chí'do'osó, en la' rinítie'. ¹⁵ Que lē ni na', caní ral-la' innali': "Channō guē'ēnnē' Xanru', sóaru' ibanru', en tu ia'tú le gunru'." ¹⁶ Na'a, libí'ili', lu yōl-la' run ba zxon queéli' rigú'uli' yōl-la' ba la' cuínsili'. Yúgu'tē le caní le runli' zeaj naca le ruá' dō'. ¹⁷ Channō nōziru' le naca dxi' le ral-la' gunru', en biti' gunru' lē na', runru' dul-la'.

5

Santiago rusē'ē lādxí'gaquiē' bōnni' dē yōl-la' tsahui' quégaquiē'

¹ Libí'ili', bōnni' rilé'eli' yōl-la' tsahui', guli'cōdxi, en guli'cōdxi'a, tu' si' za' dza ilé'eli' yōl-la' yechi'. ² Chinaca ditaj yōl-la' tsahui' queéli', ate' chinutōgacaba' le ráculi' bōljado' que. ³ Chinaca que dumí oro, en dumí plata queéli' ca naca que gué nazōn yōni que, ate' yōni que na' naca ca tu le ruzegui libí'ili' didza', ate' gaca queéli' ca tu guí' le usuniti libí'ili'. Caní gaca queéli', tu' busó' butúbili' queézili' yōl-la' tsahui' dza ni zóaru' chirōjsétégaca. ⁴ ¡Buli'yútsōca! Yugu' bōnni' huen dxin gula'lapē' yōla queéli' chita'naba yúdxinē' lāzxjagaquiē', tu' cabí riguízjanili' légaquiē', ate' lē na' ta'nabē' bōnni' huen dxin na' chibidxín didza' na' lahuē' Xanru', ate' Lē rinná bé'enē' ni'a nē'ē guizxi yu. ⁵ Benli' ga buné'eli', en guí' gudágutica'sili' le rnasō queéli' lu yōdzōlió ni. Buxōn cuinli', pero chizóa idxín dza údxi queéli'. Gaca queéli' ca raca queēba' bēdxin renni', chibú'u dza gútiru'-ba'. ⁶ Richúguli' quégaquiē' bōnni' tsahui', en rútili' légaquiē', ate' légaquiē' biti' ta'dá'baguē'ē libí'ili' cate' rútili' légaquiē'.

Cōzaru' zxon lādxi', en ulídzaru'-nē' Dios

⁷ Na'a, bōchi' luzá'ado', guli'cōza zxon lādxi' ga idxinrō dza huōdē' Xanru'. Buli'yú ca runē' tu bōnni' guz gú'una. Lu yōl-la' ribōza zxon lādxi' ribōzē' guiōjsiu', en guiōj cusu lin, ate' tōdi ni' ulapē', en utubē' yōz zían. ⁸ Lēscá caní, libí'ili' na' réajlē'ēli' Cristo, guli'cōza zxon lādxi', en buli'tipa lādxi'li', tu' chizá' gala' dza huōdē' Xanru'. ⁹ Bōchi' luzá'ado', biti' innēli' que luzá'ali' tuli' ia'tuli', para cabí ibága'li' xíguia'. ¡Buli'yútsōca! ¡Chirudzaga lo udxinē' Xanru', ate' uchi'a usōrōē' le runli'! ¹⁰ Bōchi' luzá'ado', buli'yú ca guca quégaquiē' bōnni' gulu'ē didza' uláz queē' Xanru'. Nácalaquiē' ca tu le rulu'í rē'u ca ral-la' guí'í sáca'ru', en cōzaru' zxon lādxi'. ¹¹ Na'a, nucuá'aru' légaquiē' ca yugu' bōnni' guláquiē' bica' ba, nupa ni' gula'guí'í gula'zaca'. Chibiyōnili' ca benē' Job. Gulōzē' zxon lādxi' sal-la' gudí'í guzxacá'dē'ē, ate' nōzili' ca' ca benē' Xanru' queē' ga búdxitē. Ruhuéchi'da' lādxē'ē Xanru' rē'u, en ruí'í lādxē'ē rē'u.

¹² Bōchi' luzá'ado', le nacatēró lo naca lē ni rea' libí'ili': ¡Biti' uzōtjali' Nu zoa yehua' yubá, en biti' uzōtjali' le nacua' luyú ni, en biti' uzōtjali' bítitēs bi run tsutsu xtídza'li'! Cate' innali' "Ōn" ral-la' innásili' "Ōn." Cate' innali' "Biti'" ral-la' innásili' "Biti'." Caní ral-la' gunli', para cabí ibága'li' xíguia' lahuē' Dios.

¹³ Channō riguí' rízaca' nu dzaga libí'ili', ral-la' ulidza Dios nu na'. Channō zoa nu rudzeja, ral-la' gul-la' yōl-la' ba nu na'. ¹⁴ Channō re'e nu dzaga libí'ili', ral-la' ulidza bōnni' gula tapa chí'ē bōnachi queē' Cristo, para ulu'lidzē' Dios, en ila'nábinē' Lē' únē' bōnni' huē' na'. Ral-la' ila'gu'ēlē' le za, en ulu'gunē' dxin Lē' Xanru'. ¹⁵ Cate' ulu'lidzē' Dios, en ta'yéajlē'ē gunē' Cristo ga huóaqiē' bōnni' huē' na', ní'rō gunē' Xanru' ga huóáa uzōē', en channō benē' dul-la' bōnni' huē' na', Xanru' uniti lahuē' lē'. ¹⁶ Que lē ni na', guli'xóalēpi dul-la' nabága'li' tuli' ia'tuli', en guli'naba que luzá'ali' tuli' ia'tuli' lahuē' Dios para únē' libí'ili', para urúaj yōdzōhuē' na' ré'eli'. Le rulidzē' tu bōnni' tsahui' Dios, le runē' idú lādxē'ē, nácada' lesaca'. ¹⁷ Elías, bōnni' ni' bē'ē didza' uláz queē' Dios, gúquiē' tu bōnni' yōdzōlió ca nácaru' rē'u, pero cate' bulidzē' Dios, en gunábinē' Lē' para cabí galaj guiōj, idú tsona iz yu' xopa beo' biti' gulaj guiōj luyú ni. ¹⁸ Gudōdi ni' bulidzē' Dios leyúbólō, ate' bóalaj guiōj, ate' bunōdzaj le gulazē' yugu' bōnni' dza ni'.

¹⁹ Bōchi' luzá'ado', lē ni ral-la' inōzili'. Channō nunbē' nu bōnni' dzáguiē' libí'ili' le naca idútē li, en richixi riníguinē', ate' zoa nu gun ga ubí'í lādxē'ē bōnni' na' richixi riníguinē', ²⁰ nu na' gun ga ubí'í lādxē'ē bōnni' dul-la' na' gudē' ga yúbólō, usōlē' bōnni' dul-la' na' lu yōl-la' guti, en gunē' ga uniti lahuē' Dios dul-la' zían nabáguē'ē bōnni' na'. ¡Ca' gaca!

DÍDZA'DO' ZÍ'ALÖ BUZÚAJĒ PEDRO

Pedro rugapĕ' Dios nupa ta'dá' Cristo

¹ Neda', Pedro, naca' gubáz nasöl-lĕ'ĕ Jesucristo. Ruzúaja' queĕli' lu guichi ni, libí'ili' násilasili' zí'tu' gapa dĕ ládžali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. ² Guró cazĕ' Xúziru' Dios libí'ili' ca na' bucözĕ' dza ni'te, para guéquil' quez queĕ' lu nĕ'ĕ Dios Bō' Lá'ayi, en gunli' ca rnna xtídzĕ'ĕ Cristo, en gácali' idú tsahui' nĭ'a que xichōnĕ' Cristo. Rinábida'-nĕ' Dios uzá' ládxĕ'ĕ queĕli', en gunĕ' ga soa dxi icja ládxi'do'oli'.

Le rúntica'siru' lōza

³ ¡Yöl-la' ba Dios, Xuzĕ' Xanru' Jesucristo! ¡Lu yöl-la' ruhuéchi' ladxi' xžōn queĕ' bucubĕ' yöl-la' na'bán queĕru' tu' busubanĕ' Jesucristo lu yöl-la' guti! ¡Lĕ ni run ga rúntica'siru' lōza, ⁴ en gun ga idéli'ru' lĕ na' rapa chi'ĕ Dios queĕru' yehua' yubá! Lĕ na' rapa chi'ĕ Dios, le unōdzĕ' quégaca bōnachi queĕ', biti' inĭti, en biti' itĕbi, en biti' igula. ⁵ Tu' réajlĕ'ĕli' Lĕ', lu yöl-la' huáca xžōn queĕ', Dios gun chi'ĕ libí'ili' cate' idinxrō dza ni' uzí'ili' xibĕ yöl-la' rusölá idú na' chinupĕ'ĕ queĕru', en ulu'ĕ lahui dza údxi.

⁶ Que lĕ ni na' rudžĕjade'eli', sal-la' na'a ral-la' quí'i sáca'li' tu chí'ido' tu' taca zían le ta'zĭ' bĕ' libí'ili'. ⁷ Tu' ruá' rilenli' yugu' lĕ na' ta'zĭ' bĕ' libí'ili', naca bĕ' naca idú ca réajlĕ'ĕli' Cristo. Lĕsca' caní rizí' bĕ'ĕru' oro, le inĭti, cate' ruch'aru' le lu guí'. Que lĕ ni na', cate' chinazí' bĕ' yöl-la' réajlĕ' queĕli' Cristo, le nácarō lesaca' ca oro, gaca queĕli' yöl-la' xžōn, en yöl-la' run bal dza ni' uluf'i lahuĕ' Jesucristo.

⁸ Libí'ili' nadxí'ili'-nĕ' Cristo sal-la' catu caz bilé'eli' Lĕ'. Réajlĕ'ĕli' Lĕ' sal-la' biti' rilé'eli'-nĕ' na'a, ate' rudžĕjali'. Yöl-la' rudzeja xžōn queĕli' le cabí gaca quíxjō'ōru' tsca naca, naca idútĕ li. ⁹ Caní naca, tu' ridéli'li' yöl-la' rusölá que bō' naca cážali', le rata' queĕli' tu' réajlĕ'ĕli'-nĕ' Cristo.

¹⁰ Dza ni'te yugu' bōnni' gulu'ĕ didza' uláz queĕ' Dios bulu'sĕdĕ' dxi'ado' ca naca yöl-la' rusölá na' dĕ queĕru' na'a, ate' gulu'ĕ didza' ca naca le ruzá' ládxĕ'ĕ Dios queĕru'. ¹¹ Bō' Lá'ayi dzáguĕ' Cristo buzĕajni'inĕ' zĭ'atĕlō bōnni' na' gulu'ĕ didza' uláz queĕ' Dios, en buluf'inĕ' légaquĕ' ca ral-la' quí'i sáquĕ'ĕ Cristo, enca' ca gaca queĕ' yöl-la' xžōn tōdi na'. Que lĕ ni na' gulu'ĭ ládxi'gaquĕ' ila'nōžinĕ' bátaxi gaca lĕ ni, en nuzxi na' gaca que lĕ na' buluf'inĕ' Bō' dzáguĕ' Cristo légaquĕ'. ¹² Dios buluf'inĕ' bōnni' na' gulu'ĕ didza' uláz queĕ' biti' naca tu le ila'lĕ'enĕ' légaquĕ', pero rĕ'u ni rilĕ'ĕru' lĕ na' gulu'ĕ didza' que, ate' libí'ili' riyōnili' na'a ca naca que. Yugu' bōnni' tunĕ' libán que didza' dxi'a tu'ĕ didza' que lĕ ni, ate' zóalen yöl-la' huáca queĕ' Dios Bō' Lá'ayi légaquĕ', Nu na' risöl-lĕ'ĕ Dios zoĕ' yehua' yubá queĕru', ate' té'ennĕ' gubáz lá'ayi queĕ' Dios ila'nōžinĕ' ca naca lĕ na' gulu'ĕ didza' que dza ni'te.

Dios rulídzĕ' rĕ'u para gácaru' lá'ayi

¹³ Que lĕ ni na', guli'sóa ban ladxi', en guli'cōžatica'sō bá'ado'. Idú ládxi'li' buli'xžōni ládxi'li' lĕ na' uzá' ládxĕ'ĕ queĕli' Dios dza ni' uluf'i lahuĕ' Jesucristo. ¹⁴ Guli'gún ca rnna xtídzĕ'ĕ Dios, en biti' gūf'ili' lataj yugu' le rizĕ ládxi'li' ila'chĕ' libí'ili' ga yúbōlō, ca na' benli' dza ni' biti' núnbĕ'ĕnili'-nĕ' Dios. ¹⁵ Ral-la' gácali' lá'ayi ca naca yúgu'tĕ le runli', ca na' náquĕ' lá'ayi Dios, en bulídzĕ' libí'ili' para guéquil' queĕ'. ¹⁶ Lĕsca' caní nazúaj lu guichi lá'ayi, ca na' gunnĕ' Dios le rnna: "Guli'gaca lá'ayi, tu' naca' neda' lá'ayi."

¹⁷ Rĕli'-nĕ': "Xuztu" cate' rulídzali'-nĕ' Dios, ate' Lĕ', lĕbisō ca ruch'i'a rusōrōĕ' yúgu'tĕ bōnachi tsca naca le núngaca tu tu bōnachi na'. Que lĕ ni na' ral-la' gádxili' Lĕ' tsanni ni zóali' yōdzōliō ni, le cabí naca idú ládžali'. ¹⁸ Dios busölĕ' libí'ili' lu lĕ na' gúcali' dza ni' cate' benli' ca náçagaca le cá'asō bulu'dōdĕ' xuz xtō'oli' loli'. Nōž quĕzili' bóá'uĕ' libí'ili', calĕga len tu le inĭti ca naca oro, en plata, ¹⁹ pero len xichōnĕ' Jesucristo le nácatĕrō lesaca', tu' budōdi cuinĕ', en gúquĕ' ca tuba' bō'cu' xzila' náçaba' idú dxi'a, bóa'do' tutiĕ'-ba' lahuĕ' Dios para ugúa dul-la'. ²⁰ Dios guró cazĕ' Cristo zĭ'atĕlō ca benĕ' yōdzōliō ni, ate' dza ni zóaru' na'a benĕ' ga buluf'i lahuĕ' para uzí'ili' xibĕ'. ²¹ Nĭ'a que le benĕ' Cristo réajlĕ'ĕli'-nĕ' Dios, busubanĕ' Lĕ' lu yöl-la' guti, en benĕ' ga náquĕ' lo. Caní naca, réajlĕ'ĕli'-nĕ' Dios, en ruzxōni ládxi'li' Lĕ'.

²² Na'a, chinún cuinli' dxi'a tu' runli' ca rnna le naca idútĕ li, en naca idú ca nadxí'ili' yugu' bōchi' luzá'ali' ta'yéajlĕ'ĕ Cristo. Que lĕ ni na', idú ládxi'li' ral-la' idxí'ili' luzá'ali' tuli' ia'tuli'. ²³ Chibōáljali' leyúbōlō, calĕga tu' nuzōagaca bōnachi tati caz libí'ili', pero nuzōa Nu zoa caz libí'ili', en náljalēnli' xtídzĕ'ĕ Dios, le naca ban, en le zóatica'sō. ²⁴ Caní naca, tu' nazúaj lu guichi lá'ayi le rnna:

Yúgu'tĕ bōnachi náçagaca ca naca guixi'.

Yöl-la' lachi quéqueui naca ca xiyija guixi' na'.

Ribidxi guixi' na', en riguinnaj xiyija,

²⁵ pero xtidzë'ë Dios zóatica'sò.

Didza' ni bidxín queëli' lu didza' dxi'a.

2

¹ Que lë ni na', guli' cá'ana yúgu'të le ruá' dö'. Bítirö si' yë'ëli', en bitir' ubéaj dxi'a cuinli' lógaca bönachi. Bítirö uxzë'eli', en bitir' innëli' que luzá'ali'. ² Ral-la' së ládxi'li' le naca queë' Dios Bò' Lá'ayi para gálali' ca na' tunbi' bi'i huë'ënido', ta'zë ládxi'bi' nidxi'. Caní ral-la' gunli' ga idxinrö dza uláli', ³ channö réquibe'eli' náquië' Xanru' dxi'i ladxi'.

Cristo náquië' ca tu guiøj naca ban

⁴ Guli'biga' ga zoë' Xanru'. Náquië' ca tu guiøj naca ban. Náquië' ca tu guiøj bulu'cá'ana bönachi cá'asò pero naca tu le guró cazë' Dios le nazáca'tërö. ⁵ Lësca' caní, libí'ili' nácali' ca yugu' guiøj nabángaca. Guli'gúu' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bò' Lá'ayi. Lu yudo' na' gácali' ca bixúz néquiquequinë' quez queë' Dios, ate' lu në'ë' Jesucristo gaca udödili' yugu' le runnë' Dios Bò' Lá'ayi queëli' lahuë' Dios, lë na' raza ládxië'ë Dios. ⁶ Que lë ni na' nazúaj ca' lu guichi lá'ayi le rnna:

Rigu'a lu zö'ö yödzö Sión tu guiøj lo squin zö'ö, le guró caza' neda', en naca lesaca'.

Nu réajlë' Lë', bitir' ichixi inigui.

⁷ Naca guiøj ni queëli' libí'ili' na' réajlë'ëli' Cristo tu le nazáca'da', pero quégaca nupa bitir' ta'yéajlë' Cristo, naca ca na' nazúaj lu guichi lá'ayi le rnna:

Guiøj na' bulu'zöë' bönni' tu'cu'ë zö'ö tsölá'alö, tu' guléquinë' naca cá'asò, guiøj ni chinaca guiøj lo squin zö'ö.

⁸ Lësca' caní nazúaj lu guichi lá'ayi le rnna:

Guiøj ni gun ga tsøjchégu'gaca bönachi, en gun ga tsöjtsö'ögaca.

Le nacaté yøjchégu'gaquië' bönni' bitir' ta'yéajlë'ë Cristo, tu' gula'chíxinë' cate' bulu'zöë' xtidzë'ë Dios tsölá'alö. Dios bucu'ë légaquië' para ilunë' caní.

Nupa néquiquequi quez queë' Dios

⁹ Libí'ili' nácali' bönachi guró cazë' Dios. Yúgu'tëli' nácali' bixúz queë' Bönni' Unná Bë' Lá'ayi. Nácali' ca tu yödzö nequi quez queë' Dios. Nácali' bönachi que cazë' Dios. Caní nácali' para gaca gunli' libán que le zxön benë' Dios, Bönni' na' bulidzë' libí'ili' para birúajli' ga naca chul-la que dul-la', en guyázali' lu bení' idú queë'.

¹⁰ Zí'atëlö bitir' gúcali' bönachi queë' Dios, pero na'a chinácali' bönachi queë'.

Zí'atëlö cuntú nu buéchi' ladxi' libí'ili', pero na'a Dios caz ruhuéchi' ládxië'ë libí'ili'.

Zóaru' nabanru' para gunru' ca rë'ënë' Dios

¹¹ Böchi' luzá'ado', nácali' ca bönachi zítu', en ridásili' yödzölió ni. Que lë ni na', ráta'yua' loli', bitir' güi'ili' lataj ila'nná be'e le rizësö ládxi'li' libí'ili', yugu' le ta'díl-lalen bö' naca cázali'. ¹² Guli'gún le naca dxi'a lógaca bönachi bitir' núnbë'gaquië' Dios. Caní gaca, channö ulu'zegui libí'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

¹³ Tu' néquili' queë' Xanru', guli'gún bal yúgu'të bönni' ta'nná bë'ë, bönni' na' nucuá'agaca bönachi légaquië', sal-la' náquië' bönni' rinná bé'enë' iduté yödzölió, tu' náquië' bönni' lo unná bë', ¹⁴ o channö náquië' bönni' rinná bé'enë' tu yödzö, nu na' nuzöë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a. ¹⁵ Caní rë'ënë' Dios gunli' para ila'bö' dxíë' yugu' bönni' bitir' bi nözguequinë', en bitir' núnbë'gaquië' Lë', cate' ila'lé'enë' le naca dxi'a na' runli'.

¹⁶ Guli'gaca ca yugu' bönni' nazánagaquië', pero bitir' ugunli' dxin yöl-la' nazán queëli' para gunli' le ruá' dö'.

Guli'gaca ca yugu' bönni' nadó'ogachië' queë' Dios.

¹⁷ Guli'gún bal yúgu'të bönachi.

Guli'dxi'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' iduté yödzölió.

Le gudí' i guz xáquë'ë Cristo ruzéajni' i rë'u ca ral-la' gunru'

¹⁸ Núlöli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasó gunli' bal yugu' bönni' xanli' na' nácaagaquië' tsahui', en tu'i ládxi'gaquië' libí'ili',

pero guli'gún bal ca' yugu' bönni' xanli' na' tu'saca' zi'ë libí'ili' lu dxin runli' queégaquië'.
¹⁹ Channó quí'i sáca'li', en bití' bi nabága'li', ate' guá' ilenli' lè na' tu' réquili' naca ca rë'ënë' Dios, urúajli' tsahui' lahué' Dios. ²⁰ Na'a, channó ruá'ali' dō', ate' yugu' bönni' yúlahui' iluné' libí'ili' xíguia', ¿naxci caz uzí'ili' xibé sal-la' len yöl-la' ribōza xzōn ladxí' queéli' guá' ilenli' lè na' gaca queéli'? Channó ribōzali' xzōn ladxí', en ruá' rilenli' le riguí' rizáca'li', ate' benli' le naca dxi'a, ní'irō urúajli' dxi'a lahué' Dios. ²¹ Dios bulidzë' libí'ili' para quí'i sáca'li' caní, tu' gudí'i guzxáquë' è Lë cazë' Cristo uláz queéli', en buzōë' queéli' tu le rulufí libí'ili' ca ral-la' gunli', para quí'i sáca'li' ca na' gudí'i guzxáquë' è Lë.
²² Cristo bití' bi dul-la' benë', en catu caz guzxi' yë'ë.

²³ Cate' bulu'dídza' yúdxinë' Lë',
 bití' butsagui yúdxinë' légaquië'.
 Cate' bulu'saca' zi'ë Lë',
 bití' buzenë' légaquië' le bach,
 pero budōdi cuinë' lu nē'ë Dios,
 Nu na' ruchi'a rusōrōë' le runru' ca sa'yéaj.

²⁴ Lë cazë' Cristo guzxi'ë dul-la' queëru' lu idú le naca cazë' cate' ní' gútië' lë'e yaga cruz, para gácaru' ca yugu' bönni' nati, para cabirō gunru' dul-la', pero sóaru' ibanru' para gunru' le naca dxi'a. Lë' gúquië' hué' uláz queëru' para huóácaru' rë'u dxi'a. ²⁵ Gúcali' ca yugu' bō'cu' xzila' nanítigacaba', pero na'a budxinli' queë' Cristo, Nu ruyú libí'ili', en rapa chí'ë bō' naca cázali'. Náquië' queéli' ca tu' bönni' uyú bō'cu' xzila'.

3

Ca ral-la' ilún nupa nutsaga ná'gaca

¹⁻² Lësca' caní, libí'ili' nigula, ral-la' gunli' bal bönni' que queéli', en channó cabí ta'yéajlë'ë xtidzë'ë Cristo, ila'yéajlë'ë Lë' cate' ila'lé'enë' le naca dxi'a runli', en ca na' nácali' ba'a ladxí', en runli' légaquië' bal, sal-la' bití' bi didza' ruí'ilenli' légaquië' ca naca queë' Cristo. ³ Yöl-la' lachi queéli' bití' naza le zoa láhuisō, tsa rupá'ali' ícjali', en tsa nácacaga le néquini oro nusí cuinli', en lari' nazáca'da' náculi'. ⁴ Yöl-la' lachi queéli' ral-la' gaca le yu'u icja ládxi'do'oli'. Yöl-la' lachi le ridiá'tica'sō naca yöl-la' nōxaj ladxí', en yöl-la' ba'a ladxí', le nazáca'da'gaca lahué' Dios. ⁵ Lësca' caní guca yöl-la' lachi queégacanu nigula gula'yéaj ládxi'nu Dios, nigula na' gula'cuá'anu dza ní'te. Bulu'xzōni ládxi'nu Dios, en gulunnu bal bönni' que queégacanu. ⁶ Caní bennu Sara, tu' bennu ca rnna xtidzë'ë Abraham, bönni' queënu, en bulídzanu lë', gunnānu: "Xan." Libí'ili' ca' gunli' ca bennu Sara na' channó gunli' le naca dxi'a, en bití' bi gádxili'.

⁷ Lësca' caní, libí'ili', bönni', ral-la' gūfí ládxi'li' nigula que queéli'. Guli'gún légacanu bal, calégasō tu' nōta'gacanu ca yöl-la' nál-la queéli', pero lësca' tu' nadéli'gacanu yöl-la' na'bán na' runnë' Dios queëru', lëbisō ca nadéli'li' libí'ili'. Guli'gún caní para cabí uzaga' tu' xihui' xinōzili' cate' ulídzali'-në' Dios.

Huaguí' huazáca'ru' sal-la' gunru' le naca dxi'a

⁸ Ga ruúdxitë, guli'gaca tuz tuli' len ia'tuli' yúgu'tëli', en guli'gū' ládxi'li' luzá'ali' tuli' ia'tuli'. Guli'gaca dxi'i ladxí', en xzōn ladxí'. ⁹ Bití' ubí'ili', cabí guá'ali' dō' que nu ruá' dō' queéli', en bití' utsaga yúdxili' nu rutsaga yudxi libí'ili', pero caní ubí'ili', inábili'-në' Dios gunë' ga gaca bica' ba nu na', tu' bulidzë' Dios libí'ili' para gácali' bica' ba. ¹⁰ Caní naca le nazúaj lu guichi lá'ayi le rnna:

Nu bönni' rë'ënë' uzi'ë xibé yöl-la' na'bán queë', en cōzë' dxi'ado',
 ral-la' ucá'anë' didza' xihui', en cabirō si' yë'ë.

¹¹ Ral-la' ucá'anë' le ruá' dō', en gunë' le naca dxi'a.

Ral-la' gūfí ládxi'ë cōzë' xzōn ladxí', en gúntica'sé caní,

¹² Xanru' rapa chí'ë yugu' bönni' tsahui'

en ruzë náguië' le tu'lidzë' Lë',
 pero ruzáguë'ë xinōzguequi nupa tua' dō'.

¹³ ¿Nuzxi' caz guá' dō' queéli' channó ruí' ládxi'li' gúntica'sili' le naca tsahui'? ¹⁴ Sal-la' quí'i sáca'li' cate' runli' le naca tsahui', gácali' bica' ba. Cuntu nu gádxili', en bití' ubí' ugi'ili' ¹⁵ pero bulí'xzōni ládxi'li'-në' Cristo, en gū'ili' Lë' lataj inná bé'enë' lu icja ládxi'do'oli'. Guli'sōa sina' quí'xjō'ili' yúgu'të nupa ila'nabí libí'ili' bizx que runli' lōza Cristo, en gunli' lë ni lu yöl-la' nōxaj ladxí' queéli', en lu yöl-la' run bal nupa na'. ¹⁶ Guli'gúntica'sō le naca dxi'a lahué' Dios, en channó nacua' nupa ta'nnë xihui' que le naca tsahui' runli' tu' réajlë'ëli' Cristo, ní'irō ulu'tufí' tu' nōzi le ta'nnë queéli'. ¹⁷ Channó quí'i sáca'li', dxi'arō gaca channó naca tu' runli' le naca dxi'a, en calëga tu' ruá'ali' dō', channó Dios rë'ënë' quí'i sáca'li' caní.

¹⁸ Lë cazë' Cristo gudí'i guzxáquë'ë, en gútië' uláz queëru' para bugúë' dul-la' nabága'ru'. Lë' náquië' dxi'a, pero gútië' ní'a queëru', yugu' bönni' dul-la'. Caní benë' para bunë' rë'u tuz

len Dios. Lu yöl-la' bönachi queë' gütie' pero lu bö' naca cazë' ni zoë' nabanë' lu le cubi le naca cazë'. ¹⁹ Lu bö' naca cazë' guyijë' yöjenë' libán lógaca bö' nadzúngaca. ²⁰ Bö' ni gulaca cazë' yugu' bönni, dza ni'te gula dá'baguë'ë xtidzë'ë Dios, dza ni' zoë' Noé, cate' ni' gulözë' Dios lu yöl-la' riböza xzön ladxí' queë', en biti' busiúdxë' légaquië', tsanni ni' benë' Noé barco xzön na'. Lë'e barco na' bulu'la nabábasö bönachi lu nisa. Gulaca xunu' bönachi, bönni, en nigula. ²¹ Nisa ni' naca tu le rulufi' ca naca nisa ga na' ridílaru' nisa, le naca bë' nulacu' lu yöl-la' guti tu' bubanë' Jesucristo lu yöl-la' guti. Lë na' ridílaru' nisa biti' naca tu le run dxi'a le nácaru' láhuiso, pero rulufi' rufi' ladxí'ru' gaca dxi'a icja ladxí'do'oru' lahuë' Dios. ²² Jesucristo bubenë' yehua' yubá, ga na' yöjchö'ë cuita lë'ë ibëla Dios, en rinná bé'enë' yugu' gubáz lá'ayi, en nupa ni' ta'nná bë', en nupa nadéli'gaca yöl-la' xzön.

4

Ral-la' ugunru' dxin yöl-la' huáca queë' Dios para gunru' xichinë' Cristo

¹ Que lë ni na', ca na' gudí' guzxaqué'ë Cristo lu le naca cazë', lëscá' libí'ili' ral-la' soa cözali' quí'í sáca'li'. Nu na' rigufi' rizáca' a tu' da' le naca tsahui' chibucá'ana dul-la'. ² Na'a isí lo, ral-la' gúntica'sili' ca rë'ënë' Dios, en calëga ca rizësö ladxí'li' lu yöl-la' bönachi queëli'. ³ Tsca'ti' gaz le chibenli' chibenli'. Biti'rö gunli' ca na' tun nupa biti' núnbë'gaca Dios. Dza ni'te benli' yugu' le cabí ral-la' gunli'. Guzé ladxí'li' le ruá' dö'. Guzúdxili'. Gudödi bë' güfi' gudáguli', en guyéaj ladxí'li' budó' guiój budó' yaga, le rigútiné' Dios. ⁴ Na'a, tu'bánnë' bönni tunë' caní tu' cabirö runli' tsözxön légaquië' cate' tunë' le ruá' dö' caní, en que lë ni na' tu'tsaga yúdxinë' libí'ili'. ⁵ Légaquië' run bayudxi ulu'lufi' cuíngaquië' lahuë' Dios, ate' Lë' chizóa uchi'a usöröë' nupa nabángaca, en nupa chinátigaca. ⁶ Que lë ni na' guca libán que didza' dxi'a lógaca nupa chinátigaca, nupa na' Dios buchí'a busöröë' léguequi cate' ni' gula'cuá' yödzóliö ni, ca na' ruchí'a rusöröë' yúgu'të bönachi. Guca libán lóguequi para ilá'cuá' lu yöl-la' na'bán lu bö' nácacaga caz, ca na' zoa cazë' Dios lu yöl-la' na'bán.

⁷ Chizóa idxín dza údxí que yúgu'të le dë. Que lë ni na', guli'gaca ba'a ladxí', en buli'subán ladxí'li' para gaca ulídzali'-në' Dios. ⁸ Tu' runtë bayudxi, guli'dxí'í luzá'ali' tuli' ia'tuli', ate' channö dzágali' lu yöl-la' nadxí'í, gácali' sina' uniti loli' yugu' luzá'ali' tua' dö' queëli'. ⁹ Guli'gufi' lataj ilá'cuá' böchi' luzá'ali' lidxili', en biti' innëli' quégaquië'. ¹⁰ Ral-la' ugunli' dxí'ado' dxin yugu' le buzá' ladxë'ë Dios queëli', en gácalenli' luzá'ali' tuli' ia'tuli'. ¹¹ Nu bönni' runë' ba nali, ral-la' gunë' ba nali que xtidzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácatíca'sö queë' Dios yöl-la' ba, en yöl-la' unná bë'í! ¡Ca' gaca!

Le ila'gu'í ila'zaca' bönachi ta'yéajlë' Cristo

¹² Böchi' luzá'ado', biti' ubánili' tu' nözi le ta'z'í bë'da' libí'ili'. Biti' naca tu le cabí núnbë'gaca bönachi. ¹³ Guli'dzéjade' tu' dë lataj queëli' gunli'-në' tsözxön Cristo lu le rigufi' rizáqué'ë Lë' ni'a que bönachi queë' para gaca udzéjali' ca' dza na' huödë' Cristo, cate' ilé'eli' yöl-la' xzön queë'. ¹⁴ Channö tu'dzaga yudxi bönachi libí'ili' tu' dá'ali' Cristo, bica' ba libí'ili', tu' naca bë' zóalenë' Dios Bö' Lá'ayi libí'ili', Nu na' za' yehua' yubá. Bönachi yödzóliö ni tu'dzaga yudxi Lë', pero libí'ili' runli'-në' bal. ¹⁵ Channö rigufi' rizáqué'ë nu bönni' dzáguie' libí'ili', ral-la' gaca caní tu' dë'ë Cristo, en calëga tu' rútië' bönachi, o ribanë', o ru'ë dö', o tu' yöjgütsë'ë ga yúbölö. ¹⁶ Na'a, channö nülöli' rigufi' rizáca'li' tu' dá'ali' Cristo, biti' ral-la' utufi'li', pero guli'cu'ë Dios yöl-la' ba tu' nazí' lali' bönachi queë' Cristo.

¹⁷ Chibídxín dza isí lahuë' Dios uchi'a usöröë' bönachi rö queë'. Channö z'falö uchi'a usöröë' rë'u, ¡nácxitë'rö gaca quégaca nupa biti' túngaca ca rnna didza' dxi'a queë' Dios? ¹⁸ Channö naca böniga ulu'lágaca nupa tun le naca dxi'a, ¡nácxitë'rö gaca quégaca nupa ta'dá'bagá' Dios, en tun dul-la'? ¹⁹ Caní naca, yugu' bönni' ni ta'gu'í ta'zaquë'ë tu' rë'ënë' Dios gaca caní, ral-la' ilúntica'së' le naca tsahui', en ulu'dödë' bö' nácacaga cazë' lu në'ë Dios, tu' ben cazë' Lë' légaquië', en runë' ca rnna xtidzë'ë.

5

Pedro ruzéajni'inë' nupa ta'yéajlë' Cristo

¹ Na'a, ruzéajni'ida' libí'ili', bönni' gula tapa chí'ili' nupa néquiguequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudí' guzxaqué'ë Cristo, ate' guna' ca' tsözxön libí'ili', uzí'iru' xibé yöl-la' xzön na' ilá' lahui. ² Guli'gaca ca bönni' tu'yüë' bö'cu' xzila, gun chí'ili' bönachi na' Dios busu'ë lu ná'ali'. Guli'gún caní idú ladxí'li' ca rë'ënë' Dios, en calëga tu' run bayudxi queëli', o tu' rizë ladxí'li' dumí. Guli'gún xichinli' tu' rë'ënisili', ³ en calëga tu' rë'ënil' inná bé'esili' nupa na' nagu'ë lu ná'ali'. Guli'gufi' ladxí'li' gácali' tu le rulufi' ca ral-la' ilaca nupa na' run chí'ili'. ⁴ Caní naca, cate' ulu'í lahuë' Cristo, bönni' lo uyú bö'cu' xzila, idéli'li' tu le uzí'ili' xibé le catu caz iníti.

⁵ Lësca' caní, bi'i cuidi', guli'gún ca ta'nnë' yugu' bönni' gula. Yúgu'tëli' ral-la' gunli' bal luzá'ali', tuli' ia'tuli', lu yöl-la' nōxaj ladxi' queëli', tu' nazúaj lu guichi lá'ayi le rnna: Dios ruzáguë'ë xinōzguequi nupa tun ba zxōn cuínguequi pero rácalenë' nupa nácagaca nōxaj ladxi'.

⁶ Guli'sóa nōxaj ladxi' lu në'ë Dios, ate' Lë' uchišë' libí'ili' cate' izá'a dza. ⁷ Guli'cú'u yúgu'të le run ga ruúbi ruguf'ili' lu në'ë Dios, tu' ruí'i ládxë'ë libí'ili'.

⁸ Guli'gaca ba'a ladxi', en buli'subán ládxí'li', tu' zoa tu' xihui', nu bití' rilé'e libí'ili' dxi'a, ridá idú gásibi'ilö, en naca ca tuba' bēdxi guixi' ribōdxi'aba', riguiljba' nu gáguba'. ⁹ Guli'gaca tsutsu ca réajlë'ëli' Cristo, en guli'zága' xinōza tu' xihui', tu' nōzili' ta'guí'i ta'záquë'ë böchi' luzá'ali' idútë yōdzōlió ni ca na' riguf'i rizáca'li' libí'ili'. ¹⁰ Ní'irō cate' chigudí'i guzxáca'li' tu chí'isō, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë cazë' Dios ruzá' ládxë'ë queëru' yúgu'të le ruzí'iru' xibé, en bulidzë' rë'u para uzí'iru' xibé yöl-la' zxōn queë' le zóatica'sō tu' nácaru' tuz len Jesucristo. ¹¹ ¡Gácatíca'sō yöl-la' ba, en yöl-la' unná bē' queë' Lë'! ¡Ca' gaca!

Pedro ruzenë' didza' nupa ta'dá' Cristo

¹² Dídza'do' ni ruzúaja' queëli' lu guichi lu në'ë Silvano. Réquida' náquië' böchi'ru' idú ladxi'. Ré'ēnda' utipa' ládxí'li', en runa' ba nalí loli', le nácatë lë ni naca le ruzá' ládxë'ë queëru' Dios. ¡Guli'gaca tsutsu tu' ruzí'ili' xibé lë ni!

¹³ Yugu' bōnachi queë' Cristo nacua' Babilonia tu'gapa Dios libí'ili'. Dios gurō cazë' lēguequi ca na' gurōë' libí'ili'. Lësca' bi'i Marcos rugápabi' Dios libí'ili'. Nácabi' ca zxf'ini caza'. ¹⁴ Guli'gapa Dios luzá'ali' tuli' ia'tuli', en lu yöl-la' nadxf'i queëli' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxí'do'oli', yúgu'tëli' na' néquili' queë' Jesucristo. ¡Ca' gaca!

DÍDZA'DO' BUROPI BUZÚAJË' PEDRO

Pedro rugapë' Dios nupa ta'dá' Cristo

¹ Neda', Simón Pedro, naca' huen dxin queë' Jesucristo, en gubáz nasól-lë'ë Lë'. Rugapa' Dios libí'ili', réajlë'ëli'-në' Jesús. Lëbisó ca nazáca'gaca yöl-la' réajlë' queëli' Lë', en yöl-la' réajlë' queëtu' Lë'. Dios benë' ga réajlë'ëli' Lë' tu' naca cazë' tsahui', en tu' náquië' ca' Xanru' Jesucristo, Nu na' rusóla rë'u, tsahui'. ² Rinábida'-në' Dios gunë' ga gata' queëli' iduté le ruzá' ládxë'ë queëru', en gunë' ga soa dxi icja ládxi'do'oli' tu' núnbë'ëli'-në' Dios, enca' Xanru' Jesús.

Le nácagaca nupa ta'yéajlë' Cristo

³ Lu yöl-la' huáca zxön queë', Dios chibennë' queëru' yúgu'të le riquíniru' para gata' queëru' yöl-la' na' bán idú, en para gácaru' ba'a ladxi', tu' núnbë'ëru' Nu na' bulidza rë'u para gata' queëru' yöl-la' zxön queë', en le naca tsahui' queë'. ⁴ Tu' runë' caní, benë' ga gaca uzí'iru' xibé yugu' le zxön, en le naca tsahui' guzxi' lu në'ë gunnë' queëru', ate' tu' naca caní nuláru' lu le ruá' dö' raca yödölió ni tu' ta'zë ládxi'gaca bönachi le cabí naca tsahui'. Nuláru' para gácaru' ca náquië' Lë cazë' Dios. ⁵ Que lë ni na':

Channö réajlë'ëli' Cristo,

guli'güf' ládxi'li' gácali' dxi'i ladxi'.

Channö chinácali' dxi'i ladxi',

guli'güf' ládxi'li' gata' ca' queëli' yöl-la' rácada'.

⁶ Channö nápalí yöl-la' rácada',

guli'güf' ládxi'li' inná be'e cuinli'.

Channö rinná be'e cuinli',

guli'cöza zxön ladxi'.

Channö ribózáli' zxön ladxi',

guli'sóa ba'a ladxi'.

⁷ Channö zóali' ba'a ladxi',

guli'dxi'i luzá'ali'.

Channö nadxi'ili' luzá'ali',

guli'dxi'i ca' yúgu'të bönachi.

⁸ Channö caní runli', en zeaj rácarö idú ca runli' caní, lë ni gun ga bití' gaca nítisö yöl-la' réajlë' queëli' Lë', ate' tseaj gácarö idú ca núnbë'ëli'-në' Xanru' Jesucristo. ⁹ Nu bönni' bití' ruí' ládxë'ë gunë' caní, náquië' ca tu bönni' nachul-la nanítië', tu' chizá' ral-la ládxë'ë bunë' Cristo lë' tsahui', en bugüë' yugu' dul-la' gubáguë'ë zí'atëlö. ¹⁰ Que lë ni na', böchi' luzá'ado', ral-la' güf'itë'rö ládxi'li' guéquibe'eli' bulidzë' Dios libí'ili', en gurö cazë' libí'ili'. Channö gunli' caní, bití' ca' ichixi iníguili'. ¹¹ Caní gaca, idú ládxë'ë Dios gúnnasë' queëli' lataj tsázali' ga inná bë'tica'së' Xanru' Jesucristo, Nu rusóla rë'u.

¹² Que lë ni na' gúntica'sa' ga tsöjnëli' yugu' lë ni sal-la' chinöz quézili' le, en rugunli' dxin le naca iduté li na' chiguzxi' lu ná'ali'. ¹³ Runi neda' ral-la' usubana' ládxi'li' ca nácagaca lë ni tsanni ni zoa' nabana'. ¹⁴ Ral-la' guna' caní tu' nözda' si' gátia'. Xanru' Jesucristo chigudxi cazë' neda' gaca caní quia'. ¹⁵ Que lë ni na' ruí'ida' ládxa'a guna' ga tsöjnëtica'sili' yugu' lë ni tódi gátia'.

Nupa bila'lë'e yöl-la' zxön queë' Cristo

¹⁶ Bití' bë'lentu' libí'ili' tu didza' ridasö lu yöl-la' sina' queëtu', cate' buzéajni'itu' libí'ili' ca ral-la' idxín dza huödë' Xanru' Jesucristo, napë' yöl-la' unná bë' zxön. Netu' bilé'e quézitu' yöl-la' zxön queë'. ¹⁷ Bilé'etu' Lë' cate' Xúziru' Dios benë' Lë' bal, en bë'ë Lë' yöl-la' zxön, ate' biyón chi'ë Dios, le birúaj lataj bení' queë', cate' gunnë': "Bönni' ni náquië' Zxi'ina'. Nadxí'ida' Lë', en raza ládxa'a Lë'." ¹⁸ Netu' biyón quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

¹⁹ Lë na' guca, naca bë'da' zeaj nácatë didza' gulu'ë yugu' bönni' uláz queë' Dios, ate' ral-la' güf'i ládxi'li' didza' na', tu' naca ca tu guí' ruzení' tu ga naca chul-la ga idxintë dza uzení' lu icja ládxi'do'oli' Nu na' naca ca bölj hui sila queëru'. ²⁰ Lë ni runda' bayudxi tséajni'ili': Cuntu nu bönni', rácasö queë' bití' gaca tséajni'inë' didza' bë'ë tu bönni' uláz queë' Dios. ²¹ Yugu' didza' gulu'ë yugu' bönni' uláz queë' Dios bití' ca' gulu'ë tu' gulë'ëni quézinë', pero gulu'ë didza' uláz queë' Dios le guchizië' Dios Bö' Lá'ayi icja ládxi'do'gaquië'.

¹ Yugu' bönni' ta'zì' yë'ë gula'cuá'lenë' bönachi Israel, en gula'nnë' nácagaquië' bönni' tu'ë didza' uláz queë' Dios. Lësca' caní yugu' bönni' ila'zì' yë'ë ila'cuá'lenë' libí'ili', en ulu'sédinë' libí'ili' le cabí nácátë. Lu yöl-la' sina' quégaquië' ulu'sédinë' libí'ili' xibá quégacase' le gun ga soa bönadxi queëli' ucá'anali' le naca idütë li. Ila'dá'baguë'ë ca' Xanru', Nu busölá rë'u. Le ilunë' gun ga usunítie' Dios légaquië'. ² Zianli' libí'ili' gunli' légaquië' tsözxön le lu ruá' dö' ilunë', ate' tu' gunli' bál-lali' caní ila'nnë xihui' bönachi que didza' dxi'ä le naca idütë li. ³ Lu yöl-la' ruhuidi' quégaquië' ulu'sédinë' libí'ili' le cabí nácátë, para gata' quégaquië' dumí queëli'. Chinarugu quégaquië' bönni' ni, ate' naca löza ila'nítie' tsaz.

⁴ Dios biti' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nága'gaquië' du guíë ga naca chul-la na', ga na' ta'bözë' dza usiúdxë' Dios légaquië'. ⁵ Lësca' caní, biti' buniti lahuë' bönachi gula'cuá' dza ni'te cate' gusöl-lë'ë nisa guiöj le busuniti yödzo'lió le beti bönachi nácagaca xihui', pero busölë' Noé lu nisa na', bönni' ni' benë' libán que le naca tsahui'. Dios busölë' ca' ia'gadxi di'a dza queë' Noé na' lu nisa. ⁶ Lësca' caní, Dios guchúguië' quégaca bönachi gula'cuá' yödzo' Sodoma, en yödzo' Gomorra. Busunítie' léguequi lu guí, ate' bulu'huóaca dö. Le guca quéguequi naca tu le rulu'fi le run gadxi nupa tua' dö'. ⁷ Cate' busunítie' yugu' yödzo' na', Dios busölë' Lot, tu bönni' tsahui', lu guí na'. Buí'inida' ládxë'ë Lot cate' bilë'enë' le xihui' gulún bönachi tuá' dö' na'. ⁸ Caní guca, tu' guzóalenë' bönni' tsahui' na' léguequi, ate' bilë'enë', en biyönnë' le ruá' dö' na' gulúngaca, ate' tu' gúquië' tsahui' gusëbi ládxë'ë yúgu'të dza ni'a que yugu' le cabí naca tsahui' gulúngaca. ⁹ Caní naca, Xanru' nözínë' usölë' nupa na' tadxi Lë' lu na' nu run ga tsázagaca bönachi nōza dul-la', pero nucözë' xíguia' gunë' nupa biti' nácagaca tsahui' ga idxinrö dza ichúguië' quéguequi ila'niti tsaz.

¹⁰ Ichúguda'arö quégaquië' bönni' ni tunë' yugu' le ta'zë ládxë'ë le ruá' dö', en ta'dá'baguie' yöl-la' unná bë' queë' Xanru'. Nácagaquië' rugu ladxí, en zidi ladxí. Biti' tádxinë' tu'lidza ditjë' gubáz lá'ayi ta'dë' lu bení'. ¹¹ Gubáz lá'ayi na' nápagacatërë' yöl-la' unná bë', en yöl-la' huáca ca yugu' bönni' na', pero gubáz lá'ayi na' biti' tu'huázxjanë' nu ulu'zéguië' didza' lahuë' Xanru'.

¹² Yugu' bönni' ni nácagaquië' ca böa' guixi', biti' bi ta'yéajni'iba', pero náljagacaba' para nu sön légacaba', en guti légacaba'. Ta'nnë xihuë'ë que le cabí ta'yéajni'inë', ate' ila'nítie' tsaz ca raca quégacaba' böa' guixi' na'. ¹³ Dios ubi'ë quégaquië' le ila'guí' ila'záquë'ë, tu' bulu'saca' zì'ë bönachi. Téquinë' naca xibágaquië' tu'zì'ë xibë le raca na'a dza. Nácagaquië' ca tu huë' nudzu', en tu le run ditaj cate' ni' tahuë' tsözxön len libí'ili', ate' tu'dzéjanë' tu' ta'zì' yé'enë' libí'ili'.

¹⁴ Lu yöl-la' rizë ladxí' quégaquië' le ruá' dö' tu'yúë-nu yugu' nigula. Biti' nacu'ë dxisö túngaquië' dul-la'. Túngaquië' ga ta'chixi ta'nigui nupa biti' nácagaca tsutsu ca ta'yéajlë' Cristo. Ta'guílatica'së' yugu' le tu'huídi'në'. Dios chinuchúguië' quégaquië' ilátigaquië'. ¹⁵ Bulu'cá'anë' le naca idütë li, ate' nachul-la nanítigaquië'. Tunë' ca benë' Balaam, zxf'inë' Beor, bönni' ni' bidxf'inë' dumí, ate' benë' le ruá' dö' tu' nazxjë'. ¹⁶ Dios buzenë' le bach Balaam na' tu' benë' le ruá' dö' na'. Tuba' búrrodo'bë'tenba' lë' didza' ca na' tu'f'i didza' bönachi, ate' buzaga'ba' xinözë' Balaam ga na' sa'yéajë' lu yöl-la' ridá'baga' queë'.

¹⁷ Nácagaquië' bönni' ni ca tu buduá' chibu'í' nisa que, enca' ca tu böaj le richë' bö' budunu'. Chinabá'a xilátjagaquië' lataj chul-la. ¹⁸ Caní nácagaquië' tu' tu'ë didza' yugu' le xzön lu yöl-la' biti' bi nözi quégaquië', en tu'gunë' dxin yugu' le ta'zë ládxí'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nácagaca chul-la niti. ¹⁹ Të' bönachi ila'deli' yöl-la' rusölá, pero légaca cazë' nadzúngaquië', en tunë' bayudxi le ruá' dö'. Nadzúngaquië' yúgu'të bönni' lu na' bi rinná be'e icja ládxí'do'gaquië'. ²⁰ Channö bulu'lë' lu le cabí naca tsahui' nacuá' yödzo'lió ni tu' gulúnbë'ë Xanru' Jesucristo, Nu rusölá rë'u, ate' ní'irö ta'röli le cabí naca tsahui' na' légaquië' leyúbölö, en ta'nná be'e légaquië', le nácátë nabága'gacatërë' xíguia' ga rōjsetë ca le gula'báguë'ë zì'alö. ²¹ Dxi'arö gaca quégaquië' la'tu' catu caz ilúnbë'ë Nu ruzóa rë'u nōza tsahui' ca le gaca quégaquië' channö gulúnbë'ë Lë', ate' ní'irö bulu'cá'anë' xibá lá'ayi bë'ë Dios quégaquië'. ²² Chibudxin quégaquië' didza' na' rnna: Ruhue'caba' bö'cu', ruhuóáguba' le si' gúbaba'. Ruyázaba' cuchi na' si' gudíbiru'-ba' lu guna'.

3

Naca löza huödë' Xanru'

¹ Didza' ni naca le buropi ruzúaja' queëli' lu guichi, böchi' luzá'ado'. Lu irópatë guichi na' rui'í ládxá'a usubana' ládxí'li' ca nácagaca lë ni. ² Guli'tsöjné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Guli'tsöjné ca' xibá na' Xanru', Nu rusölá rë'u, gunná bé'enë' rë'u, lë na' bulu'sédinë' bönni' gubáz nasöl-lë'ë Lë' libí'ili'.

³ Ral-la' tsöjnéli' lè ni naca lo. Dza tsöjsétëgaca ulu'lu'i lahuë' bönni' ilunë' le ta'zë lãdxë'ë le ruá' dö'. ⁴ Ulu'titjë', ila'nnë': "¿Gazxi caz lè na' guzxi' lu në'ë Cristo? Gunnë': Huöda' leyúbölö. Dza ni'te cate' gulátië' xuz xtó'oru', yúgu'të raca tuz ca guca cate' gusi lo rata' yödzölió ga ridxintë na'a dza." ⁵ Tu'zóë' tsölá'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhui'lö nisa. ⁶ Len nisa ca' busunítië' Dios yödzölió dza ni'te cate' ni' gusöl-lë'ë nisa guiöj le beti yugu' bönachi dul-la'. ⁷ Lúzxiba, en yödzölió ni le nacuá' na'a dza, Dios nucu'ë léguequi ga idxinrö dza usunítië' léguequi lu guí'. Caní gaca tu' gunnë' caní Dios caz. Uzégui'ë léguequi dza ni' ichúguië' quégaca bönachi biti' nácagaca tsahui' gátigaca.

⁸ Biti' gal-la lãdxi'li' lè ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz nácagaca queë' ca tu dza. ⁹ Biti' ridzenë' Xanru' gunë' le guzxi' lu në'ë gunë'. Téquiguequi bal-la bönachi ridzenë', pero ribözë' zxön lãdxi', en ruá' rilenë' rë'u tu' cabí rë'ënë' initi nitú bönachi, pero rë'ënë' ulu'bí'i lãdxi'gaca yúgu'të bönachi.

¹⁰ Tsárido'os idxin dza huödë' Xanru' ca ridxinë' tu bönni' gubán chi'i dzö'ölö. Lu dza na' huadödi que lúzxiba len tu bö zxön. Ila'niti yúgu'të le nacuá' lu guí' zxön. Ila'yegui yödzölió ni, en le nacuá' yödzölió ni.

¹¹ Channö caní gaca, ila'niti yúgu'të lè ni, ¿bizxi caz ral-la' gunli'? Ral-la' gácali' ba'a lãdxi', en udödi cuinli' lu në'ë Dios. ¹² Ral-la' cözali' dza huödë' Xanru', en güi' lãdxi'li' gunli' ga idxinrö bayön dza ni' cate' initi lúzxiba, ate' ila'niti yúgu'të le nacuá' ni lu guí'. ¹³ Caní gaca, pero rë'u ribözaru' le guzxi' lu në'ë Dios. Gunë' tu lúzxiba cubi, en tu luyú cubi ga ni' soa le naca tsahui'.

¹⁴ Que lè ni na', böchi' luzá'ado', tsanni ni ribözali' yugu' lè ni, guli' güi' lãdxi'li' gácali' idú tsahui' lahuë' Dios, ate' gunli' ga cuntú nu bi gaca innë queëli', en cözali' dxi'ado' cate' idxinrö dza ni'. ¹⁵ Ral-la' inözili' ribözë' Dios zxön lãdxi' para gata' quégaca bönachi lataj ulu'lágaca, ca na' gunnë' ca' böchi'ru' Pablo. Buzúajë' queëli' lu guichi, zóalen lè' yöl-la' réajni' na' bë'ë Xanru' queë'. ¹⁶ Yúgu'të lu guichi ruzúajë', ru'ë didza' ca nácagaca lè ni, sal-la' nútsa'gaca ca' léguequi yugu' didza' nácagaca böniga tséajni'iru'. Yugu' didza' caní tu'chixinë' bönni' biti' nözguequinë', en bönni' biti' naca idú lãdxi'gaquië'. Lësca' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

¹⁷ Chinöz quézili' lè ni, böchi' luzá'ado'. Que lè ni na' guli'gún chi'i cuinli', para cabí ila'zif ye'e bönachi biti' nácagaca tsahui' libí'ili', en para cabí ilún ga tseaj bö' icja lãdxi'do'oli' ca réajlë'ëli' Cristo. ¹⁸ Guli' güi' lãdxi'li' gácarö idú ca núnbë'ëli'-në' Xanru' Jesucristo, Nu rusölá rë'u, ate' ruzi'ili' xibë'. ¿Yöl-la' ba Lë' na'a dza, en yúgu'të dza zá'gaca! ¿Ca' gaca!

DÍDZA'DO' ZÍ'ALÖ BUZÚAJĖ' JUAN

Didza' nabániru'

¹ Rusiyöntu' libí'ili' ca naca queë' Bönni' na' zoa cazë' dza ni'te, le biyöñitu' bë'ë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi. ² Bönni' na' nabánigaca bönachi buluí' lahuë', ate' bilé'etu' Lë'. Runtu' ba nali queë', en rulú'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibudulú'i lahuë' ga zóaru'. ³ Le bilé'etu', en le biyöñitu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxí'inë' Dios. ⁴ Ruzúajtu' queëli' lu guichi lë ni para gaca udzëjaru' idú ládxi'ru'.

Dios náquië' beni'

⁵ Lë ni naca didza' biyöñitu' bë'lenë' Jesús netu', ate' le rusiyöntu' libí'ili'. Caní rnna: Dios náquië' beni', ate' nitú le naca chul-la que dul-la' bití' zóalen Lë'. ⁶ Channö innaru': "Nácaru' tuz len Dios", pero channö runru' le naca chul-la que dul-la', lë ni naca bë' rizí' yë'ëru', en bití' runru' le naca idútë li. ⁷ Na'a, channö runru' le naca tsahui', en ridaru' lu beni' ca na' Lë' náquië' tsahui', en zoë' lu beni', nácaru' tuz turu' len ia'turu', ate' xichönë' Jesucristo, Zxí'inë' Dios ruún rë'u dxi'a, en rugúa yúgu'të dul-la' nabága'ru'.

⁸ Channö runru': "Bití' bi dul-la' runru'", rizí' yë'ëru' la' cuínsiru', en bití' nazí' lu ná'aru' le naca idútë li. ⁹ Channö ixóalëpiru' lahuë' Dios dul-la' nabága'ru', Lë' runë' ca rnnë', en náquië' tsahui'. Uniti lahuë' dul-la' nabága'ru', en únë' rë'u tsahui', ugúë' yúgu'të le ruá' dö' dzaga rë'u. ¹⁰ Channö innaru': "Bití' bi dul-la' nabága'ru'", naca ca innaru': "Dios rizí' yë'ë", ate' bití' runru' ca rnna xtídzë'ë.

2

Cristo náquië' Nu rudödi xtídza'ru' lahuë' Dios

¹ Libí'ili', zxi'ina'do', ruzúaja' queëli' lu guichi lë ni, para cabí gunli' dul-la'. Na'a, channö nútí'tës nu gun dul-la', zoa nu rudödi xtídza'ru' lahuë' Dios Xuz, Lë' Jesucristo, Nu naca tsahui'. ² Naca cazë' Bönni' budödi cuinë', en gútië' para bugúë' dul-la' nabága'ru' lahuë' Dios. Calégasö gútië' para bugúë' dul-la' nabága'ru' rë'u, pero gútië' ca' para bugúë' dul-la' nabága'gaca bönachi idútë yödölió.

³ Channö runru' ca naca le gunná bë'enë' rë'u, nöziru' chinúnbë'ëru' Lë'. ⁴ Nu rnna: "Neda' núnbë'a-në' Dios" pero bití' run ca rinná bë' xibá queë', nu ni rizí' yë', en bití' run le naca idútë li. ⁵ Nu run ca rnna xtídzë'ë Dios, le nácatë nadxí'i nu ni Dios ca ral-la' gun. Channö runru' caní, nöziru' néquiru' queë' Dios. ⁶ Lësca' caní, nu rnna: "Neda' néquida' queë' Cristo", ral-la' gaca nu na' ca' gúquië' Cristo cate' gudë' yödölió ni.

Tu xibá cubi

⁷ Böchi' luzá'ado', ruzúaja' queëli' lu guichi xibá ni. Bití' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyöñili' dza ni'te. ⁸ Lësca' naca ca ruzúaja' queëli' lu guichi tu xibá cubi, lë na' le nácatë benë' Jesús ca rnna, ate' runli' ca' libí'ili' ca rnna, tu chiridödi que le naca chul-la que dul-la', ate' beni' idú chiruzeni'.

⁹ Nu rnna: "Zoa' lu beni'", pero bití' rilé'e dxi'a böchi' luzë'e, nu ni ni run le naca chul-la que dul-la'. ¹⁰ Nu nadxí'i böchi' luzë'e zoa lu beni', ate' le run ga nu ichixi inigui bití' zóalen nu na'. ¹¹ Le naca chul-la que dul-la' run ga nu bití' rilé'e dxi'a böchi' luzë'e, en ga ridá nu na' ga chul-la. Bití' nözi ga zeaj, tu' run le naca chul-la na' ga nachul-la naniti nu na'.

¹² Ruzúaja' queëli' lu guichi, zxi'ina'do', tu' chibunít lahuë' Dios dul-la' nabága'li', tu' runë' le guzxi' lu në'ë gunë'. ¹³ Ruzúaja' queëli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Ruzúaja' queëli' lu guichi, bi'i ra'bán, tu' chibucúl-lali' tu' xihui'.

¹⁴ Chibuzúaja' queëli' lu guichi, zxi'ina'do', tu' núnbë'ëli'-në' Dios Xuz. Chibuzúaja' queëli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Chibuzúaja' queëli' lu guichi, bi'i ra'bán, tu' nácali' bi'i nál-la, en nazí' lu ná'ali' xtídzë'ë Dios, en chibucúl-lali' tu' xihui'.

¹⁵ Bití' idxí'isili' yödölió ni, en calëga le dë yödölió ni. Channö zoa nu nadxí'i yödölió, bití' nadxí'i Dios Xuz. ¹⁶ Caní naca, tu' naca le tun bönachi yödölió ni le cabí rë'ënë' Dios Xuz, pero naca le të'ëni bönachi yödölió ni.

Tunë' le riyaza ladxí' yöl-la' bönáchisö quégaquië'.

Tunë' le ruá' dö' le ridani guiöj lógaquië'.

Tun ba zxön cuíngaquië' ni'a que le dë quégaquië'.

Caní nácagaca le ruá' dö' tunë'. ¹⁷ Huadödi que yödölió ni, enca' que le ta'zë ládxi'gaca bönachi, pero nu run ca rë'ënë' Dios sóatica'sö.

Nu ruf'i didza' idütë li, en nu rizi' yë'

¹⁸ Zxi'ina'do', chizóaru' dza údxi, en ca na' chibiyónili' huidë' bönni' ridá'baguë'ë Cristo, lësca' na'a chigusí lo nacu'ë zían bönni' ta'dá'baguë'ë Cristo. Que lë ni na' nöziru' chizóaru' dza údxi. ¹⁹ Bila'rúajë' bönni' caní ládjaru', pero biti' guláquië' tuz len rë'u. La'tu' guláquië' tuz len rë'u, ila'cuá'lentica'së' rë'u. Na'a, bila'rúajë' para gaca bë' biti' nácagakië' yúgu'të' tuz len rë'u.

²⁰ Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'të'. ²¹ Buzúaja' queéli' lu guichi, tu' chinözili' le naca idütë li, en calëga tu' cabí nözili' le. Nözili' ca' biti' ca' rizi' yë' nu nözi le naca idütë li.

²² ¿Nuxi caz na' nu rizi' yë'? ¿Naru' cabí naca nu na' ridá'baga' náquië' Jesús Nu gusöl-lë'ë Dios? Naca nu ni bönni' ridá'baguë'ë Cristo, tu' ridá'baguë'ë náquië' Dios Xuzë' Jesús, en ridá'baguë'ë ca' náquië' Jesús Zxi'inë' Dios. ²³ Nütitës nu ridá'baga' Dios Zxi'ini, biti' ca' zóalenë' Dios Xuz nu na'. Nütitës nu rnna yálajdo' Jesús náquië' Zxi'inë' Dios, lësca' zóalenë' Dios Xuz nu na'.

²⁴ Na'a, guli'güi' lataj le biyónili' dza ni'te ugá'analentica'sö libí'ili'. Channö le biyónili' dza ni'te ugá'analentica'sö libí'ili', lësca' libí'ili' ugá'analentica'sö libí'ili'-në' Dios Zxi'ini, enca' len Dios Xuz. ²⁵ Le guzxi' lu në'ë Dios naca lë ni: Gunnë' gunnë' yöl-la' na'bán idú queëru'.

²⁶ Chibuzúaja' queéli' lu guichi lë ni ca naca quégaca nupa ta'z' ye'e libí'ili'. ²⁷ Na'a, zóalenë' Dios Bö' Lá'ayi libí'ili'. Cristo gusöl-lë'ë Lë' queéli', ate' Lë' cazë' zóalentica'së' libí'ili'. Que lë ni na' biti' ríquini' nu usedi libí'ili', tu' chizóalen Nu na' libí'ili', en rusedi libí'ili'. Didza' idütë li ru'ë Lë', en biti' rizi' yë'ë. Ca na' chinazédali', guli'sóalentica'së' Cristo.

²⁸ Na'a, zxi'ina'do', guli'sóalentica'së' Cristo para cate' ulufi lahuë' Lë', gácaru' rugu ladxí, en biti' utuf'iru' sóaru' lahuë' Lë' cate' huödë'. ²⁹ Channö nözili' náquië' Dios tsahui', ral-la' inözili' ca' yúgu'të nupa tun le naca tsahui' nácagaca zxi'inë' Dios.

3

Nupa nácagaca zxi'inë' Dios

¹ Buli'yú ca nadxí'ide'enë' Dios Xuz rë'u, benë' ga nazí'ilaru' zxi'inë' Dios caz. Que lë ni na' bönachi yödölió ni biti' ca' núnbë'gaca le nácaru', tu' cabí gulúnbe'e Jesús. ² Böchi' luzá'ado', na'a chinácaru' zxi'inë' Dios, en biti' naca bé'eni le ral-la' gácaru'. Nöziru' cate' ulufi lahuë' Jesús, gácaru' ca náquië' Lë', ate' ilë'eru'-në' catëz náquië' Lë'. ³ Nütitës nu run löza gaca ca náquië' Jesús, rufi' ladxí' nu na' gaca dxi'a ca na' náquië' Jesús dxi'a.

⁴ Nütitës nu run dul-la' riguitsaj xibá queë' Dios, tu' naca dul-la' le riguitsaj xibá. ⁵ Nözili' bulufi lahuë' Jesús para bugüë' dul-la' nabága'ru', en biti' bi dul-la' runë' Lë'. ⁶ Nütitës nu dzaga Lë' biti' run dul-la'. Nütitës nu run dul-la' catu caz bilé'e Jesús, en biti' núnbe'e Lë'. ⁷ Zxi'ina'do', guli'gün chi' cuinli' para cabí nu si' ye'e libí'ili'. Nu run le naca tsahui', naca tsahui' nu na' ca na' náquië' Jesús tsahui'. ⁸ Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que lë ni na' budulu'fi lahuë' Zxi'inë' Dios, para usuníti'e yugu' le nun tu' xihui'.

⁹ Nütitës nu naca zxi'inë' Dios biti' rúntica'sö dul-la', tu' zóalentica'sö le guzxi' lu në'ë Dios Xuz nu na'. ¹⁰ Caní naca bë' nupa nácagaca zxi'inë' Dios, en nupa nácagaca zxi'ini tu' xihui'. Nütitës nu biti' run le naca tsahui', en biti' nadxí' böchi' luzë'e biti' nequi queë' Dios.

Ral-la' idxí'iru' yugu' böchi'ru' ta'yéajlë'ë Cristo

¹¹ Lë ni naca didza' biyónili' dza ni'te, le rnna: Ral-la' idxí'iru' luzá'aru' turu' ia'turu'. ¹² Biti' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi'i böchë'ë. ¿Bizx que bëtië'-bi' bi'i böchë'ë? Bëtië'-bi' tu' gulaca le benë' Caín na' le ruá' dö', pero le benbi' bi'i böchë'ë, gulaca tsahui'.

¹³ Böcha'ado', biti' ubánili' channö cabí ta'lé'e bönachi yödölió ni libí'ili' dxi'a. ¹⁴ Nöziru' chigudódiru' lu yöl-la' guti, en chidë yöl-la' na'bán idú queëru' tu' nadxí'iru' yugu' böchi'ru'. Nu biti' nadxí' böchi' luzë'e, chinati caz nu na'. ¹⁵ Nütitës nu biti' rilé'e dxi'a böchi' luzë'e, naca huëti bönachi nu na', ate' nözili' nu rutí bönachi biti' dë yöl-la' na'bán idú que. ¹⁶ Caní núnbë'ëru' yöl-la' nadxí' le naca idú. Naca ca budödë' Jesús yöl-la' na'bán queë', en Gutiérrez uláz queëru'. Lësca' caní rë'u ral-la' udódiru' yöl-la' na'bán queëru', para gácalenru' yugu' böchi'ru'. ¹⁷ Na'a, nütitës nu dë yöl-la' tsahui' que, lë na' dë yödölió ni, ate' rilé'e böchi' luzë'e, bi riyadzaj queë', en biti' ruhuëchi' ladxí' lë', bi unódzaj queë', ¿naru' nadxí'itsö nu na' Dios? ¹⁸ Libí'ili', zxi'ina'do', ral-la' idxí'iru' luzá'aru', calëga len didza'sö o lu yöl-la' rinnë'sö queëru', pero idú ladxí'ru', enca' len idütë yöl-la' run queëru' ral-la' idxí'iru' luzá'aru'.

Le runru' löza lahuë' Dios

¹⁹⁻²⁰ Channö caní nadxí'iru' yugu' böchi' luzá'aru', nöziru' néquiru' que Nu na' naca idütë li, ate' lahuë' Dios huáca cō dxi icja ládxi'do'oru' channö ruxōsa ládxi'do'oru' rē'u, tu' rācada'arē' Dios ca ládxi'do'oru', ate' Lē' nözinē' yūgu'tē. ²¹ Böchi' luzá'ado', channö cabí ruxōsa ládxi'do'oru' rē'u, dē le runru' löza lahuë' Dios ²² tu' nöziru' gunnē' queēru' bítitēs bi inábaru' lahuë'. Caní naca, tu' runru' ca rinná bē' xibá queē', en le raza ládxē'ē Lē'. ²³ Lē' ni naca xibá queē', para tséajlë'ëru'-nē' Jesucristo, Zxf'inē' Dios, en idxí'iru' luzá'aru' ca na' chigunná bé'enē' rē'u. ²⁴ Zóalen Dios nu run ca rinná bē' xibá queē', ate' Dios caz zóalenē' nu na'. Caní nöziru' dzágatica'sē' Lē' rē'u, tu' chigúsól-lē'ē Dios Bō' Lá'ayi queēru'.

4

Le naca bē' zóalenē' Dios Bō' Lá'ayi rē'u

¹ Böchi' luzá'ado', bítí' tséajlë'ëli' nútítēs bönni' rnnē' zóalenē' Dios Bō' Lá'ayi lē', pero guli'sí' bē' bönni' na', channö zóalenē' Dios Bō' Lá'ayi lē', tu' ta'dē' zían bönni' ta'z'í' yē'ē yōdzólió ni. Ta'nnē' tu'ē' didza' uláz queē' Dios. ² Caní gūnbē'ëli'-nē' nu bönni' zóalenē' Dios Bō' Lá'ayilē'. Nequi queē' Dios bönni' na' rnnē' yálajdo' ca bidē' Jesucristo, Nu gúsól-lē'ē Dios, rnnē' guca cazē' bōnachi. ³ Lē'sca' caní, bítí' nequi queē' Dios nu bönni' bítí' rnnē' yalaj lulu ca bidē' Jesucristo, rnnē' bítí' guca cazē' bōnachi. Bönni' ni néquinē' que nu na' ridá'bagá' Cristo, bönni' na' chibiyónili' ral-la' guidē', ate' na'a chiridē' yōdzólió ni.

⁴ Zxf'ina'do', néquili' queē' Dios, en chibucúl-lali' nupa na' ta'z'í' yē', tu' náparō Nu na' zóalen libí'ili' yōl-la' huáca unná bē' ca nu na' ridá' yōdzólió ni. ⁵ Légaquie' nácaquie' bōnachi yōdzólió. Que lē' ni na' tu'ē' didza' que le naca que yōdzólió, ate' bōnachi yōdzólió ni tu'zē' nága-gaca légaquie'. ⁶ Néquiru' rē'u queē' Dios. Nu nunbē' Dios ruzē' nagui rē'u. Nu bítí' nequi queē' Dios bítí' ruzē' nagui rē'u. Caní núnbē'ëru' nu na' yu'u le Bō' ru'í' didza' le naca idütë li, enca' nu na' yu'u le tu' bō' rizí' yē'.

Náljalēn Dios yōl-la' nadxí'i

⁷ Böchi' luzá'ado', ral-la' idxí'iru' luzá'aru', tu' náljalēn Dios yōl-la' nadxí'i, ate' nútítēs nu nadxí'i luzē' e náljalēn ca' Dios, en núnbe' e Dios. ⁸ Nu bítí' nadxí'i luzē' e, bítí' núnbe' e Dios, tu' náljalēn Dios yōl-la' nadxí'i. ⁹ Caní bulu' e lahui Dios ca nadxí'inē' rē'u, gúsól-lē'ē la's dui Zxf'ini cazē' yōdzólió ni, para gata' yōl-la' na'bán idú queēru' ni'a queē' Lē'. ¹⁰ Caní naca bē' yōl-la' nadxí'i idú, calēga ca nadxí'iru'-nē' Dios, pero ca na' Lē' bidxí'inē' rē'u, en gúsól-lē'ē Zxf'ini cazē' para gútiē', en caní bugúē' dul-la' nabágaru'.

¹¹ Böchi' luzá'ado', channö caní bidxí'ide'enē' Dios rē'u, lē'sca' rē'u ral-la' idxí'iru' luzá'aru'. ¹² Catu caz nu bilé' e Dios, pero channö nadxí'iru' luzá'aru', Dios zóalenē' rē'u, ate' naca bē' nadxí'iru'-nē' Dios idú ládxi'ru'. ¹³ Nöziru' zóalenru'-nē' Dios, ate' Lē' zóalenē' rē'u, tu' guchíziē' Dios Bō' Lá'ayi rē'u. ¹⁴ Netu' bilé'etu' le benē' Dios Xuz, en runtu' ba nalí que. Lē' gúsól-lē'ē Zxf'ini cazē' Nu rusólá bōnachi yōdzólió. ¹⁵ Nu bönni' rnnē' yálajdo' náquie' Jesús Zxf'inē' Dios, Dios zóalen cazē' bönni' na', ate' lē' zóalenē' Dios.

¹⁶ Rē'u ni nöziru', en réajlë'ëru' nadxí'inē' Dios rē'u. Yōl-la' nadxí'i náljalēn Dios, ate' nu bönni' nadxí'inē' luzē' e, zóalenē' bönni' na' Dios, ate' Dios zóalenē' lē'. ¹⁷ Caní run dxin yōl-la' nadxí'i lu icja ládxi'do'oru', run ga bítí'rō rádxiru' dza ichúguie' Dios quegaca bōnachi ilátigaca. Ca náquie' Jesús, nácaru' ca' rē'u yōdzólió ni. ¹⁸ Channö nadxí'iru'-nē' Dios, bítí' bi gádxiru'. Cate' nadxí'iru'-nē' Dios idú ládxi'ru', runē' ga bítí' rádxiru'. Nu radxi, riguí' rizáca'a. Nu na' radxi, bítí' nadxí'i Dios idú ladxi'.

¹⁹ Rē'u ni nadxí'iru'-nē' Dios, tu' zí'alō bidxí'i quézine' Lē' rē'u. ²⁰ Channö nu inná: "Neda' nadxí'ida'-nē' Dios", pero bítí' rilé' e dxi'a böchi' luzē' e, nu ni rizí' yē'. Nu bítí' nadxí'i böchi' luzē' e nu rilé' e caz, ¿nacxi' caz gaca idxí'i Dios, en catu caz bilé' e Lé'? ²¹ Caní gunná bé'enē' Jesús rē'u. Gunnē': Nu nadxí'i Dios, ral-la' idxí'i ca' böchi' luzē' e.

5

Ca gaca idéli'ru' lu le raca queēru' yōdzólió ni

¹ Nútítēs bönni' réajlë'ë Jesús náquie' Cristo, náquie' zxf'inē' Dios, ate' nútítēs bönni' nadxí'inē' Dios Nu buzóa lē', ral-la' idxí'inē' ca' luzē' e nu naca bi'i queē' Dios. ² Caní réquibe'ëru' nadxí'iru' yugu' bi'i queē' Dios. Naca caní channö nadxí'iru'-nē' Dios, en runru' ca rinná bé'enē' rē'u. ³ Caní naca bē' nadxí'iru'-nē' Dios. Naca caní channö runru' ca rinná bé'enē' rē'u, ate' lē' na' rinná bé'enē' rē'u bítí' naca bōniga. ⁴ Nútítēs bönni' náquie' bi'i queē' Dios ridéli'nē' lu le raca yōdzólió ni. Chibidéli'ru' lu le raca yōdzólió tu' réajlë'ëru'-nē' Dios. ⁵ ¿Nuzxi' na' rideli' lu le raca yōdzólió? Run caní nu réajlë' náquie' Jesús Zxf'inē' Dios.

Dios Bō' Lá'ayi runē' ba nalí queē' Cristo

⁶ Caní blē'ē Jesucristo. Bidē' bidilē' nisa, en bulaljē' xichōnē'. Calégasō bidilē' nisa, pero lē'sca' bulaljē' xichōnē'. Dios Bō' Lá'ayi náquie' Nu run ba nalí queē', tu' naca idütë li didza'

ru'ë Dios Bö' Lá'ayi. ⁷ Tsonna nupa tun ba nali queë' Jesús yehua' yubá ni', Dios Xuz, en Dios Xzí'ini, lë' ca' Didza', en Dios Bö' Lá'ayi. Yonnë' ni nacagaquië' tuz. ⁸ Lë'sca' caní, tsonna le tun ba nali queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rôn ni' bulaljë' lë'e yaga cruz, ate' yonna ni, tuz ca ta'nná. ⁹ Channö si' lu ná'aru' le tun ba nali bônachi, le runë' ba nali Dios nácatërö lesaca'. Lë na' benë' ba nali Dios naca le benë' ba nali queë' Jesús, gunnë' náquië' Xzí'ini cazë'. ¹⁰ Nu réajlë' Xzí'inë' Dios, nazí' lu në'e le nunë' ba nali Dios. Nu cabí réajlë' Dios, naca ca rnna nu na': Dios rizí' yë'ë. Caní naca, tu' cabí guyéajlë' le benë' ba nali Dios queë' Xzí'inë'. ¹¹ Lë ni naca le benë' ba nali Dios. Gunnë' chibennë' yöl-la' na'bán idú queëru', ate' Xzí'inë' na' náquië' Nu nabániru' caní. ¹² Nu bönni' zóalenë' Xzí'inë' Dios lë', dë yöl-la' na'bán idú queë'. Nu bönni' bití' zóalenë' Xzí'inë' Dios lë', bití' dë yöl-la' na'bán idú queë'.

Ca nöziru' dë yöl-la' na'bán idú queëru'

¹³ Libí'ili' na' réajlë'ëli'-në' Xzí'inë' Dios, ruzúaja' queëli' lu guichi lë ni para inözili' chidë yöl-la' na'bán idú queëli', en para gaca idú ca réajlë'ëli'-në' Xzí'inë' Dios.

¹⁴ Lë ni naca le ruzxöni ládxi'ru' Lë'. Channö bi inábiru' Lë' ca rë'enë' Lë', Lë' riyönnë' rë'u. ¹⁵ Channö nöziru' riyönnë' rë'u ca naca bi rinábiru' Lë', nöziru' ca' ideli' quéziru' lë na' rinábaru'.

¹⁶ Channö ilë'eru' böchi' luzá'aru' runë' dul-la' le cabí nachë' yöl-la' guti, ral-la' inábaru' queë' lahuë' Dios, ate' Lë' unödzjë' yöl-la' na'bán queë'. Caní rnní'a: Ral-la' inábali' quégaca nupa tun dul-la' le cabí nachë' yöl-la' guti. Dë dul-la' le nachë' yöl-la' guti. Bití' rnní'a inábali' que nu run dul-la' caní. ¹⁷ Yúgu'të le cabí naca tsahui' naca dul-la', pero dë dul-la' le cabí nachë' yöl-la' guti. ¹⁸ Nöziru' bití' rúntica'sö dul-la' nu naca xzí'inë' Dios, tu' rapa chi'ë Xzí'ini cazë' Dios nu na', ate' tu' xihui' bití' sequi' bi gun que.

¹⁹ Nöziru' yú'uru' lu në'ë Dios, ate' yúgu'të bônachi tuí'i ládxi'gaca le dë yödzölió ni yú'ugaca lu na' tu' xihui'.

²⁰ Na'a, nöziru' chibidë' Xzí'inë' Dios, en bennë' yöl-la' réajni'i queëru', para gúnbë'ëru' Nu na' naca idútë li. Zóalenru' Nu na' naca idútë li tu' zóalenru'-në' Jesucristo, Xzí'inë' Dios. Nu ni naca Dios idú, en Nu runna yöl-la' na'bán idú queëru'. ²¹ Xzí'ina'do', guli'gún chi'i cuinli' para cabí tseaj ládxi'li' yugu' budó' guiöj budó' yaga. ¡Ca' gaca!

DÍDZA'DO' BUROPI BUZÚAJË' JUAN

Núnbë'ëru' le naca idútë li, en yöl-la' nadxí'i

¹ Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxön len yúgu'të zxi'inu'. Nadxi'ida' libí'ili' tu' núnbë'ëru' le naca idútë li, en calégasö neda', pero lësca' yúgu'të nupa chinúnbë'gaca le naca idútë li ta'dxi'i libí'ili'. ² Nadxi'itu' libí'ili' tu' núnbë'ëru' le naca idútë li, le zóaléntica'sö rë'u. ³ Rinábida'-në' Dios Xuz, en Xanru' Jesucristo, Zxi'ini cazë' Dios, uzá' ládxë'ë queë'li, en huéchi' ládxë'ë libí'ili', en gunë' ga soa dxi icja ládxi'do'oli' tu' núnbë'ëli' le naca idútë li, en nadxi'ili' luzá'ali'.

⁴ Budzëjade'eda' cate' biyönda' tunbi' zxi'inu' ca naca le naca idútë li, tu' tunbi' ca na' gunná bé'enë' Dios Xuz rë'u. ⁵ Na'a, ráta'yua' lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lëbisö lë na' gunná bé'enë' rë'u dza ni'te. Gunnë' ral-la' idxí'iru' luzá'aru'. ⁶ Caní naca bë' nadxi'iru'-në' Dios. Naca caní channö runru' ca rnna le gunná bé'enë' rë'u. Lë na' gunná bé'enë' rë'u naca para idxí'iru' luzá'aru' ca na' chibiyönili' dza ni'te.

Nupa tē'ëni ila'zì' ye'e rë'u

⁷ Lë ni riguxjöi'ida' libí'ili', tu' chita'dá zían nupa ta'zì' yë' yödzölió ni, nupa na' bitì' ta'zì' lu në'eguequi ca bidë' Jesucristo, gúquië' idú bönachi. Nu na' run caní, naca nu rizì' yë', en nu ridá'baga' Cristo. ⁸ Guli'gún chi'i cuinli' para cabí initi le nadé'li' tu' guzxi' lu na'li' Cristo, pero guli'güi' ládxi'li' idé'li'li' idútë le ral-la' sí'ili' lu në'ë Dios.

⁹ Núti'tës nu riguela' nōza yúbölö, en rucá'ana xtídzë'ë Cristo, bitì' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxi'inë' nu na'. ¹⁰ Channö núti'tës nu za' ga zóali', en rusedi xibá yúbölö, bitì' ulëbili' nu na' lídxili', en bitì' guië'li' le: "Guyú'u len netu'."

¹¹ Nu rë le: "Guyú'u len netu'", run tsözxön nu na' ca naca le ruá' dö' run nu na'.

Runë' Juan löza idxinë' ga nacu'ë böchi' luzë'ë

¹² Sal-la' le zían ral-la' uzúaja' queë'li' lu guichi, bitì' rë'ënda' uzúaja' yúgu'të lu guichi. Runa' löza guída' ga zóali', ate' güi'iru' didza' ruá'a cuinru', para gaca udzëjaru' idú ládxi'ru'.

¹³ Zxi'ininu nigula zxilu', nigula rö queë' Dios, tu'gápabi' Dios lí'. ¡Ca' gaca!

DÍDZA'DO' BUNNI BUZÚAJĚ' JUAN

Le naca tsahui' runě' bōnni' lē' Gayo

¹ Neda', bōnni' gula run chi'a bōnachi queē' Cristo, rugapa' Dios li', Gayo dxi'i ladxi'. Nadxi'ida' li' tu' nūnbě'ēru' le naca idútě li.

² Bōcha'ado', rinábida'-nē' Dios guně' ga gaca dxi'a quiu' lu yúgu'tě le runu', en su' ca' dxi'a, ca na' raca dxi'a que bō' naca cazu'. ³ Rudzėjada' tu' ta'dxině' yugu' bōchi'ru' ga zoa', en tuně' ba nali quiu', ta'nně' nacu' li ladxi', en runu' ca naca le naca idútě li. ⁴ Biti' bi dē le runrō ga rudzėjada' ca lē ni, riyōnda' tun nupa nácagaca ca bi'i que caza' ca rna le naca idútě li.

⁵ Bōcha'ado', runu' le naca tsahui', rácalenu' bōchi'ru', en runu' ca' le nácarō lesaca', rácalenu' bōchi'ru' bití' nūnbě'enu' légaquiē'. ⁶ Yugu' bōchi'ru' ni tuně' ba nali quiu' lógaca bōnachi queē' Cristo ni, ta'guíxjō'ē ca na' nadxi'inu' légaquiē'. Runu' le naca dxi'a, rugú'u légaquiē' nōza, en rácalenu' légaquiē' ca na' sa'yéaj gunu' quégaca nupa tun xichině' Dios, para ulu'ú'ē nōza. ⁷ Légaquiē' bila'ruájě' ni tu' nadxi'igaquiē' Jesús, en bití' bi ta'zi'ē lu ná'agaca bōnachi bití' ta'dá' Cristo. ⁸ Que lē ni na' ral-la' gunru' bal bōnachi tun caní, para gúnlenru' légaquiē' dxin que le naca idútě li.

Le cabí naca tsahui' runě' Diótrefes

⁹ Chibuzúaja' lu guichi le uzéajni'i bōnachi queē' Cristo ni', pero Diótrefes, bōnni' ni' raza ládxě'ē gáquiē' lo ládjagaquiē', bití' runě' netu' bal. ¹⁰ Que lē ni na', channō huida' ga zóali', usá'a ládxí'li' cate' udúbili' ca nácagaca le runě'. Rizí' quídzě'ē netu', en rnně' queētu' le cabí nácatē. Bití' rizxōn ládxě'ē tsa lē nisō, pero lēscá' bití' runě' bal bōchi'ru' ta'dxině' ni', ate' ruzáguē'ē xinōzguequi nupa ni' tē'ēni ilūn légaquiē' bal, en rubéajě' nupa na' ladaj bōnachi queē' Cristo.

¹¹ Bōcha'ado', bití' gunu' ca tun nupa tua' dō, pero ca tun nupa tun le naca tsahui' gunu'. Nu run le naca tsahui' nequi queē' Dios, pero nu ruá' dō' catu caz benbē' Dios.

Le naca tsahui' runě' Demetrio

¹² Yúgu'tě bōchi'ru' tuně' ba nali queē' Demetrio, ate' naca bē' runě' le naca idútě li. Lēscá' netu' runtú' ba nali queē', ate' nōzili' nácatē lē ni runtú' ba nali queē'.

Le rinabě' Juan lahuē' Dios

¹³ Ziánrō ca' le gú'unida' uzúaja' quiu' lu guichi, pero bití' rē'ēnda' uzúaja' le lu guíchisō. ¹⁴ Na'a, runa' lōza ilé'eteda' li', ate' gú'iru' didza' ruá'a cuinru'.

¹⁵ Rinábida'-nē' Dios guně' ga soa dxi icja ládxí'do'o. Nupa ni ta'dxi'i rē'u tu'gapa Dios li'. Lēscá' li', bugapa Dios tu tu nupa ni' ta'dxi'i rē'u. ¡Ca' gaca!

DÍDZA'DO' BUZÚAJĚ' JUDAS

Judas rugapě' Dios nupa nulidzě' Dios

¹ Neda', Judas, tsaz naca' huen dxin queě' Jesucristo, en naca' ca' bõchě'ě Jacobo. Rugapa' Dios libi'ili, nulidzě' Dios Xuz libi'ili, en nadxi'ině' libi'ili, en rapa chi'ě libi'ili' tu' nácali' tuz len Jesucristo. ² Rě'ěnda' inõzili' ca' ruhuéchi'da' lãdxě'ě Dios libi'ili, en nadxi'ide'eně' libi'ili, enca' ruzóadě'ě dxi icja lãdx'i'do'oli'.

Nupa tu'sedi le cabi nácatě

³ Libi'ili, bõchi' luzá'ado', gúcada' lãdxa'a uzúaja' queěli' lu guichi ca naca yõl-la' rusõlá naděli'ru', pero run bayudxi uchízia' icja nágalí' para idú lãdx'i'li' tıl-lalenli' nupa ta'dá'baga' le réajlě'ěru'-ně' Dios, lě na' budõdě' Dios tsaz lu ná'agaca nupa néquiguequi quez queě' para ulu'zě didza' que lógaca yúgu'tě bõnachi. ⁴ Cani run bayudxi guna' tu' bagáchi'sõ chigula'yázaleně' bal-lě' bõnni' rě'u, Dios buzõě' quégaquiě' dza ni'te ichúguie' quégaquiě' ila'nitiě' tsaz. Biti' ta'yéaj lãdx'i'gaquiě' Dios bõnni' caní. Tu' zoa le ruzá' lãdxě'ě Dios queěru', téquině' huáca iluně' le ruá' dõ'. Ta'dá'baguě'ě Xanru' Jesucristo. Tuzě' Lě' rinná bē'eně' rě'u.

⁵ Chinõz quézili' lě ni, pero rě'ěnda' usá'a lãdx'i'li' ca beně' Xanru' Dios. Sal-la' busõlě' bõnachi Israel cate' bubéajě' léguequi luyú Egipto, gudõdi ni' busunítiě' nupa bitsa'gaca lãdjaguequi, en bití' gula'yéajlě' Lě'. ⁶ Lěsca' caní, yugu' gubáz lá'ayi queě' Dios, nupa ni' bití' gulún xichingaqueiě', pero bulu'cá'aně' xilátjagaqueiě', Dios busayjě' légaquiě' tu lataj chul-la. Nága'gaquiě' tsaz ni' ga idxinrõ dza usiúdxě' Dios yõdzõliõ ni'. ⁷ Lěsca' caní guca quégaca yõdzõ Sodoma, en yõdzõ Gomorra, enca' yugu' yõdzõ dzágagaca léguequi. Ca na' guluně' gubáz lá'ayi na', gula'dá'baguě'ě Dios, lěsca' caní guluně' bõnni' yugu' lu yõdzõ na'. Bulu'dõdi cuíngaqueiě' para guluně' le ruá' dõ', en le gula'zēsõ lãdx'i'gaquiě' le tun ga nu rutufi'. Na'a, tu' busaca' zi'ě Dios légaquiě' lu guí' le cabirõ ulu, lě na' guca quégaquiě' naca tu le run gadxi yúgu'těru', para cabi gunru' la' lěbisõ.

⁸ Sal-la' gulaca lě ni, la' canisõ tuně' bõnni' ni, bõnni' rõjácáleně' yěla ta'něně'. Tun dítjaně' idutě le naca cazě'. Ta'dá'baguě'ě le rinná bē'eně' Dios rě'u, en ta'nně' zi'ě quégaca nupa ta'nná bē' yehua' yubá. ⁹ Miguel caz, gubáz lá'ayi lo, cate' gudí' laleně' tu' xihui' para gaca u'ě idú le naca cazě' Moisés, bití' burúguině' udxíě' dõ' tu' xihui' na', pero gudxě' le: "Xanru' uzeně' li' bach." ¹⁰ Yugu' bõnni' ni ta'nně' zi'ě quégaca le runě' Dios, yugu' le bití' ta'yéajni'ině', ate' yugu' le ta'yéajni'ině' rãcasõ quégaquiě' ca na' tunba' bõa' guixi' bití' ta'yéajni'iba', lě ni tu'guně' dxin, en caní tu'dxia dõ' cuíngaqueiě'.

¹¹ Bica' bayechi' légaquiě' tu' chiguluně' dul-la' ca na' beně' Caín, ate' lu yõl-la' ruhuidi' quégaquiě' chigula'chixi gula'níguině' ca na' guchixi guníguině' Balaam para si'ě dumí, ate' chinarrugu quégaquiě' ilátiě' ca na' gútiě' Coré cate' gudá'baguiě' Moisés. ¹² Yugu' bõnni' ni táguleně' tsõzõn libi'ili' cate' ráguli' yugu' gúii' huagu lu yõl-la' nadxi'i' queěli'. Tuně' ga ta'chixi ta'nigui nupa dzágagaca libi'ili', tu' tē'aj tagu lizě'. Nácagaquiě' ca yugu' bõnni' ral-la' ulu'gágugaquiě'-ba' bõ'cu' zxila', pero la' cuíngacasě' tu'gahuě'. Nácagaquiě' ca bõaj lúzxiba bití' nachě'gaca nisa, ate' ruá' bõ' léguequi ná'alõ ní'ilõ. Nácagaquiě' ca' ca yugu' yaga chibidxin dza bi ila'bía, pero bití' bi ta'bía. Nácagaquiě' ca' ca yugu' yaga chigula'bidxi idú luí, en chinalãdzu'gaca. ¹³ Nácagaquiě' ca' ca nísado' cate' riyasa ridxia, ate' ribõ' bidxina' que, lě na' rulufi' ca naca yõl-la' stu'tuně'. Nácagaquiě' ca yugu' bõaj lúzxiba nucá'anagacaba' xinõzgacaba'. Dios chinuně' quégaquiě' ila'yáziě' tsaz lataj chul-la.

¹⁴ Ca naca quégaquiě' bē'ě ca' didza' Enoc uláz queě' Dios. Enoc na' gúquiě' tu bõnni' gubábaleně' le igadxi cõ' zxi'ini xi'sóé' Adán. Gunně': "Buli'yútsõca, zě'ě Xanru', ate' dzágagaca Lě' zian gayuá' bõnachi néquiguequi quez queě'. ¹⁵ Zě'ě para guně' xíguia' yúgu'tě bõnachi, en ichúguie' quégaca yúgu'tě nupa tua' dõ' ila'niti tsaz." Cani guně' tu' nõzi yúgu'tě didza' zi' gula'nně' bõnni' dul-la' na' queě' Lě'. ¹⁶ Yugu' bõnni' caní ta'nně' queě', en ta'zi' quidzě'ě, en tuně' ca naca le ta'zēsõ lãdx'i'gaquiě'. Tu'ě didza' lu yõl-la' run ba zxõn cuíngaqueiě', en para ulu'zi'ě xibéguqui, tu'ě didza' le ta'gú'u bõnachi yõl-la' zxõn.

Judas rusě'ě lãdx'i'gaca nupa ta'yéajlě' Cristo

¹⁷ Na'a, bõchi' luzá'ado', guli'tsõjně' yugu' didza' gulu'ě bõnni' gubáz queě' Xanru' Jesucristo dza ni'te. ¹⁸ Yugu' bõnni' na' gulě' libi'ili': "Yugu' dza tsõjsétégaca ulu'lu'fi' lógaquiě' bõnni' ulu'titjě' le naca lá'ayi, en iluně' ca naca le ta'zēsõ lãdx'i'gaquiě' le ruá' dõ'." ¹⁹ Yugu' bõnni' ni tuně' ga irúajli' choplõ. Tu'ě didza' lu yõl-la' bõnáchisõ quégaquiě', en bití' zóaleně' Dios Bõ' Lá'ayi légaquiě'.

²⁰ Na'a, bõchi' luzá'ado', guli'sóa tsutsu lu yõl-la' réajlě' queěli' Dios le naca idú lá'ayi. Buli'lidzě' Dios, ugunli' dxin yõl-la' huáca queě' Dios Bõ' Lá'ayi. ²¹ Buli'gá'analeně' Dios, Nu

nadxí'i rě'u, en guli'cöza dza ni' uluí'i lahuë' Xanru' Jesucristo, Nu ruhuéchi' ládxë''ë rě'u para gata' yöl-la' na'bán idú queëru'.

²² Guli'gún ga ila'dipa ládxi'gaca nupa raca chopa ládxi'gaca. ²³ Guli'gún ga ulu'lě', le gaca tsca ubéajli' légaquië' lu guí'. Lu yöl-la' radxi queëli' buli'huéchi' ládxi'li' ia'zica'rö bönachi. Guli'gún chi'i cuinli', para cabí gunli' tsözxön légaquië', en cabí gútsa'li' le ruá' dö' tunë'.

Le rigú'uru' Dios yöl-la' zxön

²⁴⁻²⁵ Dios la's dui, Nu nözi caz yúgu'të, en Nu busölá rě'u ni'a que le benë' Xanru' Jesucristo, napë' yöl-la' huáca gun chí'ë libí'ili', para cabí ichixi iníguili', en usudxinë' libí'ili' lahuë' Lë' ga zoë' lu bení' idú. Gunë' ga gácali' idú tsahui', en ga udzėjade'eli'. ¡Gaca caz queë' Dios yöl-la' ba, en yöl-la' zxön, en yöl-la' naca lo, en yöl-la' unná bë', na'a dza, en yúgu'të dza zá'gaca! ¡Ca' gaca!

LE BULU'INĒ' DIOS JUAN

Apocalipsis

Le bulu'e lahui Dios ca naca queē' Jesucristo

¹ Lē ni naca le bulu'e lahui Jesucristo, le bē'ē Lē' lataj Dios uluf'inē' yugu' huen dxin queē' ca naca le run bayudxi ilacatē. Jesucristo gusōl-lē'ē tuē' gubáz lá'ayi queē', nu na' buzéajni'i neda', Juan, huen dxin queē' Cristo. Gubáz lá'ayi na' buluf'inē' neda' ca naca lē ni. ² Neda', Juan, ruzúaja' lu guichi ni le naca idútē li ca naca yúgu'tē le bilé'eda', en runa' ba nalí que xtidzē'ē Dios, en que le benē' ba nalí Jesucristo.

³ Bica' ba nu ulaba didza' ni, ate' bica' bágaca nupa ulu'zē nágagaca nu na' ulaba xtidzē'ē Dios ni, en ilún ca rnna lē ni nazúaj lu guichi, tu' chizóa gaca.

Juan ruzúajē' le uzéajni'i gadxi cō' bōnachi queē' Cristo

⁴ Neda', Juan, ruzúaja' lu guichi didza' ni le uzéajni'i gadxi cō' bōnachi queē' Cristo nacua' luyú Asia. Dios, Bōnni' zoa cazē', en guzóatica'sē', en ral-la' huōdē', rinábida'-nē' uzá' ládxē'ē queēli', en gunē' ga cō'ō dxi icja ládxí'do'oli', ate' dzágagaca gadxi bō' Lē' nacua' lahuē' Lē' ga ni' rō'ē rinná bē'ē. ⁵ Dzáguiē' ca' Jesucristo Lē'. Jesús ni runē' ca rnnē', en runē' ba nalí queē' Dios. Zí'aló Lē' bubanē' tsaz lu yōl-la' guti, en rinná bē'enē' bōnni' ta'nná bē'ē yōdzóliō ni. Lē' nadxí'inē' rē'u, en gudibē' rē'u, tu' bugtūē' dul-la' nabága'ru' len xichōnē' le bulaljē' lē'e yaga cruz, cate' gútiē' uláz queēru'. ⁶ Jesucristo benē' ga rinná bē'ēru', en ga nácaru' yugu' bixúz, para cú'uru'-nē' Dios, Xuzē' Jesús, yōl-la' ba. ¡Yōl-la' ba Lē', en gácatíca'so queē' yōl-la' unná bē'! ¡Ca' gaca!

⁷ ¡Buli'yútsōca'! ¡Zē'ē Cristo lu bōaj lúxiba! ¡ila'lé'e Lē' yúgu'tē bōnachi, enca' nupa ni' gulún Lē' huē', en bētīgaca Lē'! ¡ila'bōdxi yechi' yúgu'tē bōnachi yōdzóliō ni cate' ila'lé'e Lē'! ¡La'tu' gácatē caní! ¡Ca' gaca!

⁸ Caní rnnē' Lē': "Neda' naca' Bōnni' zoē' zí'aló, enca' Bōnni' rōjsétiē' ca naca le risí lo, en le ruúdxitē." Caní rnnē' Xanru', Bōnni' napa cazē' yōl-la' huáca. ¡Zoa cazē' Lē', en guzóatica'sē', en si' ulē'ē!

Rilē'enē' Juan yōl-la' xzōn queē' Jesucristo

⁹ Neda', Juan, naca' bōchi' luzá'ali', en tsōzxōn riguí' rizáca'lena' libí'ili', en tsōzxōn len libí'ili' ruzi'a xibé le rinná bē'ē Dios, en nadéli'da' yōl-la' ribōza xzōn ladxi' na' runnē' Jesucristo queēru'. Nadzuna' tu luyú bidxi ni gatsaj láhui'lō nísado', nazí'i le Patmos. Nadzuna' tu' bena' libán que xtidzē'ē Dios, en tu' bena' ba nalí queē' Jesucristo. ¹⁰ Lu dza lá'ayi queē' Xanru', guzóalenē' Dios Bō' Lá'ayi neda', ate' biyōnda' cúdu'la' chi'ē tu bōnni' rulidzē' zidzaj. Biyōn chi'ē ca ribōdxi lúzuba' bōa' bēdxi. ¹¹ Bōnni' ni gudxē' neda': "Neda' naca' Bōnni' zoē' zí'aló, en Bōnni' rōjsétiē' ca naca le risí lo, en le ruúdxitē. Buzúaj lu guichi le riyōnnu', en rilē'enu', ate' gusōl-la' le quéguequi gadxi cō' bōnachi quia' nacua' luyú Asia, nupa nacua':

Lu yōdzō Éfeso,
lu yōdzō Esmirna,
lu yōdzō Pérgamo,
lu yōdzō Tiatura,
lu yōdzō Sardis,
lu yōdzō Filadelfia,
lu yōdzō Laodicea."

¹² Buécja' para ilé'eda' Bōnni' na' rulidzē' neda'. Cate' buécja', bilé'eda' gadxi le nuá'gaca guí' le néquiquequini oro. ¹³ Ladaj gadxi le nuá'gaca guí' na' bilé'eda' tu Bōnni' rinē'ē ca tu bōnni'. Nácue' tu lari' tunna le ridxín xini'ē, en luchu'ē nasíē' tu le néquini oro. ¹⁴ Chiguíchido'os naca guitsa' icjē' ca naca xzila' o ca riná' bōgui', ate' rēpi yōsa bení' guiōj lahuē' ca guí'. ¹⁵ Rēpi yōsa bení' ni'ē ca guiē' bronce dxílido', le nudzē'eda' lu guí' ca bo' yalaj. Zidzaj biyōn chi'ē ca riyōn tu yegu xzōn. ¹⁶ Lu nē'ē ibēla xzōagacaba' gadxi bōlaj bení', ate' rirúaj didza' ru'ē le naca ca tu guiē' tuchi' natuchi' iropa la'a. Rēpi yōsa bení' lahuē' ca gubidza cate' rudzá'a.

¹⁷ Cate' bilé'eda' Lē' gudzō'a xini'ē ca tu bōnni' nati. Ní'irō Lē' guxóa nē'ē neda' len nē'ē ibēla, en gudxē' neda': "Biti' gádxinu'. Neda' naca' Bōnni' zoē' zí'aló, en rōjsétiē'. ¹⁸ Naca' Nu nabán caz. Gútia', ate' na'a zóatic'a'sa' nabana'. Dē lu na'a inná bē'eda' yōl-la' guti, en lataj ga nacua' nupa nátīgaca. ¹⁹ Buzúaj lu guichi lē na' chibilé'enu', en le raca na'a, enca' le ral-la' gaca tōdi na'a. ²⁰ Lē ni naca le nagachi' ca naca quégacaba' gadxi bōlaj bení' na' bilé'enu' xzōagacaba' lu na'a ibēla, en ca naca gadxi le nuá'gaca guí' le néquiquequini oro. Gadxi bōlaj

bení' na' sa'yéajgacaba' gadxi gubáz quégaca gadxi cō' bōnachi quia', ate' gadxi le nuá'gaca guí' na' sa'yéajgaca gadxi cō' bōnachi quia' na'."

2

Didza' gusōl-lē'ē yōdzō Ēfeso

¹ Gunnē' ca' Bōnni' na': "Buzúaj lu guichi didza' ni isōl-lu'u queē' gubáz quia' zóalenē' bōnachi quia' lu yōdzō Ēfeso. Caní uzúaju' lu guichi: Ru'ē didza' Bōnni' na' zxóagacaba' gadxi bōlaj bení' lu nē'ē ibēla, en ridē' gatsaj lāhui'lō gadxi le nuá'gaca guí' na' néquiguequini oro. ² Caní rnná': Neda' nōz quézida' yugu' le runli', en ca rúnda' ali' dxin. Nōzda' ribōzali' zxōn ladxi', en biti' gaca guá' ilenli' nupa tua' dō'. Nōzda' chiguzxí' bē'ēli' nupa ta'nná' nácagaca gubáz quia' pero bití' ca' nácagaca, ate' na'a nōzili' ta'z'í' yē'. ³ Ribōzali' zxōn ladxi', en chigud'í' guzxáca'li' tu' dá'ali' neda', pero bití' gucuidi' lādxi'li'. ⁴ Na'a, dē tu le ruzegui libí'ili' didza': Bití'rō nadxí'ili' neda' ca na' bidxí'ili' neda' zí'alō. ⁵ Que lē ni na', guli'tsōjné ca na' benli' zí'alō, lē na' busanli', ate' na'a, buli'bí'í lādxi'li', en guli'gūn ca na' benli' zí'alō. Channō cabí ubí'í lādxi'li', guídatia' queēli', ate' ugúa' le nuá' guí' queēli' xilataj. ⁶ Na'a, zoa tu le rácalen libí'ili'. Bití' rilé'eli' dxi'a le tunē' bōnni' nicolaíta, nupa na' ta'yéaj lādxi'gaca budó' guiōj budó' yaga, en tun le ruá' dō', lē na' lēasca' bití' rilé'eda' dxi'a. ⁷ Nu riyōni ral-la' uzē nagui lē ni rnnē' Dios Bō' Lá'ayi, ruí'ilenē' yugu' cō' bōnachi quia' neda', Cristo, didza', rnnē': Nupa ila'deli' lu le raca yōdzōlió, guna' ga ilágugaca le ribía yaga da' gatsaj lāhui'lō luyú lachi queē' Dios, le gun ga ila'cuá'tica'sō nabán."

Didza' gusōl-lē'ē yōdzō Esmirna

⁸ Gunnē' ca': "Lēasca' caní, buzúaj lu guichi didza' ni isōl-lu'u queē' gubáz quia' zóalenē' bōnachi quia' lu yōdzō Esmirna. Caní uzúaju' lu guichi: Ru'ē didza' Bōnni' na' zoē' zí'alō, en náquiē' ca' Nu rōjsete, Bōnni' na' gútiē', en bubanē' tsaz. ⁹ Caní rnná': Neda' nōz quézida' le runli', en ca rígu'í' rizáca'li'. Nōzda' nácali' yechi', pero le nácate rilé'eli' yōl-la' tsahui' le naca idú. Nōzda' ca' ca ta'nnē' queēli' nupa ni' ta'nná' nácagaca bōnachi judío, pero bití' ca' nácagaca caní. Nupa ni ta'dá' Satanás, tu' xihui'. ¹⁰ Biti' ca' gádxili' le ral-la' quí'í sáca'li'. Tu' xihui' na' gun ga idzunli' bál-lali' libí'ili' lidxi' guíē'. Caní si' bē' libí'ili', ate' quí'í sáca'li' idú ca chi dza. Guli'tséajlē' neda' ga idxintē dza gátili', ate' neda' gunna' yōl-la' na'bán idú queēli'. ¹¹ Nu riyōni ral-la' uzē nagui lē ni rnnē' Dios Bō' Lá'ayi, ruí'ilenē' didza' yugu' cō' bōnachi quia' neda', Cristo, rnnē': Nupa ila'deli' lu le raca yōdzōlió, bití' bi gun yōl-la' guti' quéguequi, lē na' gaca le buropi luzuí' quégaca nupa ila'cuá'tica'sō lu guí' gabila."

Didza' gusōl-lē'ē yōdzō Pérgamo

¹² Gunnē' ca': "Lēasca' caní buzúaj lu guichi didza' ni isōl-lu'u queē' gubáz quia' zóalenē' bōnachi quia' lu yōdzō Pérgamo. Caní uzúaju' lu guichi: Ru'ē didza' Bōnni' na' nu'ē' guíē' tuchi' na' natuchi' iropa la'a. ¹³ Neda' nōz quézida' le runli'. Nōzda' ca' zóali' ga ni' rinná' bē' Satanás, tu' xihui', pero ni ruzxōni lādxi'li' neda'. Biti' ca' nusanli' ca' réajlē'ēli' neda'. Biti' busanli' le yugu' dza ni' cate' gulutiē' Antipas, bōnni' ni' bēntica'sē' ba nalí quia', en gútiē' ga ni' zoa Satanás, tu' xihui'. ¹⁴ Na'a, dē tu chopa le tu'zegui libí'ili' didza': Nacuá' len libí'ili' bal-la bōnachi lu yōdzō Pérgamo, nazi' lu nē'eguequi xibá queē' Balaam, bōnni' ni' busédinē' Balac benē' ga gula'chixi gula'nigui bōnachi Israel, ate' gulahuē'-ba' yugu' bōa' bēdxido' gulútigaquiē'-ba' lógaca budó' guiōj budó' yaga, en gulunē' le ruá' dō'. ¹⁵ Lēasca' caní nacua' len libí'ili' nupa ni' nazi' lu nē'eguequi xibá quégaca bōnachi nicolaíta, lē na' bití' rilé'eda' neda' dxi'a. ¹⁶ Que lē ni na', buli'bí'í lādxi'li' na'a. Channō cabí ubí'í lādxi'li', guídatea' ga zóali', en tál-lalena' légaquiē' len didza' rirúaj ruá'a, le naca ca tu guíē' tuchi'. ¹⁷ Nu riyōni ral-la' uzē nagui lē ni rnnē' Dios Bō' Lá'ayi, ruí'ilenē' yugu' cō' bōnachi quia' neda', Cristo, didza', rnnē': Nupa ila'deli' lu le raca yōdzōlió, guna' ga ilágugaca yōta maná nagachi'. Unódzja' ca' tu guiōj chiguichido' quégaquiē', ate' lu guiōj na' nazúaj tu la cubi, cuntú nu nunbē' le, pero nupasó na' ila'z'í' le, ilúnbē'e la na'."

Didza' gusōl-lē'ē yōdzō Tiatira

¹⁸ Gunnē' ca': "Lēasca' caní, buzúaj lu guichi didza' ni isōl-lu'u queē' gubáz quia' zóalenē' bōnachi quia' lu yōdzō Tiatira. Caní uzúaju' lu guichi: Ru'ē didza' Zxi'inē' Dios, Bōnni' na' dxía guiōj lahuē' nácagaca ca guí', ate' ni'ē' nácagaca ca guíē' bronce dxílido'. ¹⁹ Caní rnnē': Neda' nōz quézida' le runli'. Nōzda' ca' nadxí'ili' neda', en ca réajlē'ēli' neda'. Nōzda' ca' ca runli' xichina' lu yōl-la' ribōza zxōn ladxi' queēli'. Nōzda' nácarō idú ca runli' yugu' lē ni ca benli' zí'alō. ²⁰ Nacuá' tu chopa le tu'zegui libí'ili' didza': Ruí'ili'-nu lataj nigula na' lēnu Jezabel, rnnanu ruí'inu didza' uláz queē' Dios, ate' ni'a que le rusédinu rizí' yé'enu bōnni' tunē' xichina'. Rusédinu légaquiē' le run ga tunē' le ruá' dō', en tahuē'-ba' bōa' bēdxido' ta'gu'ē' léga'caba' lógaca budó' guiōj budó' yaga. ²¹ Neda' bē'a-nu lataj ubí'í lādxi'nu, pero bití' rē'ēninu ucá'ananu le ruá' dō' na' runnu. ²² Que lē ni na' chú'una-nu tu le gátinu

ga na' quí'i sáca'nu lu xihué'ënu tsözxón len nupa gulún tsözxón len lënu le ruá' dö'. Caní guna' na'a channó cabí ulu'bí'i ládxi'guequi para cabiró ilún dul-la' na'. ²³ Guna' ga ilátibi' zxi'íninu. Caní gaca, iléquibe'e yúgu'tè cō' bōnachi quia' ruyúa' le ta'bequi ícjaguequi, en le ta'zá' ládxi'gaca bōnachi, ate' ubí'a queéli' tsa naca le runlí'. ²⁴ Ia'zica'li' zóali' yōdzō Tiatira, núlōli' bití' nazí' lu ná'ali' lē na' rusédinu, en bití' nazédali' lē na' ta'nná bōnachi nī' naca le nayéajni' idú, pero le nácatē naca xtídza' Satanás, tu' xihui', rea' libí'ili'. Bití' usubága'a libí'ili' ia'tú le ral-la' gunlí'. ²⁵ Na'a, lē na' chinazí' lu ná'ali', guli'gún chí'i ga idxintē dza huōda'. ²⁶ Bōnni' nī' ila'déli'nē' lu le raca yōdzōlió, en ilunē' ca rē'ēnda' neda' ga údxitē, neda' guna' ga ila'nná bé'enē' bōnachi idútē yōdzōlió. ²⁷ Ca na' budōdē' Xuza' Dios yōl-la' unná bē' lu na'a, neda' ca' guna' ga ila'nná bé'enē' yugu' yōdzō, ate' gata' lu ná'agaquiē' tu xiyaga guíē, ate' ulu'zxuzxjē' bōnachi na' ca nu ruzxuzxaj zxiga' yō'ōna néquini yu. ²⁸ Gu'a ca' le naca ca bōlaj hui sila quégaquiē'. ²⁹ Nu riyōni ral-la' uzē nagui lē ni rnnē' Dios Bō' Lá'ayi, ru'ilenē' yugu' cō' bōnachi quia' neda', Cristo, didza'."

3

Didza' gusōl-lē'ē yōdzō Sardis

¹ Gunnē' ca': "Lēscā' caní buzúaj lu guichi didza' ni isōl-lu'u queē' gubáz quia' zóalenē' bōnachi quia' lu yōdzō Sardis. Caní uzúaju' lu guichi: Ru'ē didza' Bōnni' na' nacua'len Lē' gadxi bō' na', ate' xzōagacaba' gadxi bōlaj bení' lu nē'ē ibēla, rnnē': Neda' nōz quézida' le ruá' dö' runlí', en nōzda' chinati cázali' sal-la' téquiguequi bōnachi zóali' nabanli'. ² Buli'subán ládxi'li'. Guli'gún tsutsu le nacua'len libí'ili', le chizóa' ilátigaca, tu' réquibe'eda' le runlí' bití' naca idú tsahui' lahuē' Dios. ³ Guli'tsōjné na'a xibá na' biyōnili' le guzxi' lu ná'ali'. Guli'gún ca rnna xtídze'ē Dios, en buli'bí'i ládxi'li'. Channó cabí usubán ládxi'li', guída' ga zóali' tsárido'os ca na' ridxinē' tsárido'os gubán, en bití' inōzili' bizxi dza na' guída' ga zóali'. ⁴ Nacuá'len bal-la bōnachi libí'ili' lu yōdzō Sardis, nupa bití' nácagaca xihui'. Ila'dalen nupa ni neda', nácugaca lari' chiguichido'os le rulu'í nuhuóacagaca idú tsahui', en nácagaca lesaca' gaca caní quéguequi. ⁵ Nupa ila'deli' lu le raca yōdzōlió ugácu' lēguequi lari' chiguichido'os, en bití' usúlua' lāguequi chinazúajgaca lu guichi ga nazúajgaca lágaca nupa nadéli'gaca yōl-la' na'bán idú. Si' lu na'a nupa ni lahuē' Xuza' Dios, enca' lōgaquiē' gubáz lá'ayi queē'. ⁶ Nu riyōni ral-la' uzē nagui lē ni rnnē' Dios Bō' Lá'ayi, ru'ilenē' yugu' cō' bōnachi quia' neda', Cristo, didza'."

Didza' gusōl-lē'ē yōdzō Filadelfia

⁷ Gunnē' ca': "Lēscā' caní buzúaj lu guichi didza' ni isōl-lu'u queē' gubáz quia' zóalenē' bōnachi quia' lu yōdzō Filadelfia. Caní uzúaju' lu guichi: Ru'ē didza' Bōnni' na' náquiē' lá'ayi, en ru'ē didza' idútē li, en dē lu nē'ē zxi'ini guíē queē' David, bōnni' gunná bē'ē. Bōnni' na' ru'ē didza' risálajē' ga nu riyaza, ate' cuntu nu gaca usayaj le, en rusayjē' ga nu riyaza, ate' cuntu nu gaca isalaj le. ⁸ Bōnni' ni rnnē': Neda' nōz quézida' le runlí'. Nōzda' nápalí' láti'do'os yōl-la' huáca, pero runlí' ca rnna xtídza'a, en bití' rutuf'ili' rnnali' néquili' quia'. Que lē ni na' nuzóa' lolí' tu ga nu tsaz le nayalaj, ate' cuntu nu gaca usayaj le. ⁹ Buli'yútsōca', ta'dē' bōnni' nī' Satanás, tu' xihui', en ta'z'í' yē'ē, ta'nnē' nácagacuiē' bōnachi judío ta'yéaj ládxi'gaca Dios, pero bití' nácagaquiē' caní, guna' ga ila'dxinē' lolí', en ulu'zechu xzibigaquiē' xinf'ali'. Ní'irō iléquibe'enē' nadxi'ida' libí'ili'. ¹⁰ Tu' benlí' ca rnna xtídza'a, en gulōzali' zxōn ladxi', gun chí'a libí'ili' dza na' ila'guí'i ila'zaca' yúgu'tē bōnachi lu yōdzōlió nī, lē na' gaca para si' bē' lēguequi. ¹¹ ¡Si' guída'! Que lē ni na' guli'gún chí'i le nápalí', para cabí gaca nu gun ga cabí si'ili' lē na' ral-la' gunna' queéli'. ¹² Núlōli' nī' idéla'li' lu le raca yōdzōlió, neda' guna' ga gácali' tsutsu ca nácagaca ya'zxōn, ate' sóali' yudo' ga na' zoē' Dios, en catu caz irúajli' nī'. Udá'a libí'ili' ca lē' Dios quia', enca' ca lē yōdzō queē' Dios le naca Jerusalén cubi, le huótaj irúaj yehua' yubá lu nē'ē Dios. Lēscā' udá'a libí'ili' Lá' cubi. ¹³ Nu riyōni ral-la' uzē nagui lē ni rnnē' Dios Bō' Lá'ayi, ru'ilenē' yugu' cō' bōnachi quia' neda', Cristo, didza'."

Didza' gusōl-lē'ē yōdzō Laodicea

¹⁴ Gunnē' ca': "Lēscā' caní buzúaj lu guichi didza' ni isōl-lu'u queē' gubáz quia' zóalenē' bōnachi quia' lu yōdzō Laodicea. Caní uzúaju' lu guichi: Ru'ē didza' Bōnni' na' zoē' tsaz, Bōnni' runē' ca rnnē', en ru'ē didza' idútē li ca runē' ba nalí, en náquiē' ca' Bōnni' na' gulén lu nē'ē yúgu'tē le benē' Dios. ¹⁵ Caní rnnē': Neda' nōz quézida' le runlí'. Ca runlí' naca ca nisa bití' naca ziaga, tu' cabí rucá'anali' tsaz neda', en bití' naca ca nisa zōgui', tu' cabí dá'ali' neda' idú ládxi'li'. Dxí'arō gaca la' gácali' ca nisa ziaga o ca nisa zōgui'. ¹⁶ Na'a, tu' nácali' ca nisa nati yúlasō, en bití' nácali' ca nisa ziaga, en bití' nácali' ca nisa zōgui', chū'una' libí'ili' ca run nu ruhuēbi nisa nati yula na'. ¹⁷ Libí'ili' rnnali' rilé'eli' yōl-la' tsahui' queéli', en raca dxi'a queéli', en bití' bi riyadzaj queéli', pero bití' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguídisó! ¹⁸ Que lē ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí', para gata' yōl-la' tsahui' idú

queëli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queëli' le run ga nu rágutufi'. Ral-la' gá'uli' ca' quia' le gun ga ulu'huóaca guiój loli' para gaca ilé'eli' le naca quia'. ¹⁹ Neda' ruzeda' bach, en run zi'a yúgu'tè nupa nadxfí'ida' channö cabí tun le naca dxi'a. Que lè ni na', buli'bí'í ládxi'li', en guli'gún xichina' idú ládxi'li'. ²⁰ Buli'yútsöca', neda' caz zuína' ga nu riyaza, en rulidza'. Channö nütí'tès nu yöni chi'a, en isalaj quia', tsázia', en gágulen' nu na', ate' nu na' gágulen neda'. ²¹ Núlöli' idéli'li' lu le raca yödöliö, neda' guna' ga cö'öli' tsözxön len neda' ga na' rö'a rinná bē'a, ca na' benē' ca' Xuza' quia' neda'. Bidéli'da' neda' lu le guca quia', ate' guró'lēna' Xuza' tsözxön ga na' rö'ē rinná bē'ē. ²² Nu riyöni, ral-la' uzē nagui lè ni rnnē' Dios Bö' Lá'ayi, ru'ilēnē' didza' yugu' cö' bönachi quia' neda', Cristo."

4

Yöl-la' ba ta'gu'ē Dios yehua' yubá

¹ Gudödi gulaca yugu' lè ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'é bönni' nu na' biyönda' zí'alö, ate' bulidza zidzaj ca ribödxí lúzuba' böa' bēdxi. Chi'í ni bulidza neda', gunná: "Gudá xitsá'alö ni, ate' neda' ulufí'ida' li' le run bayudxi ilaca tödi ni."

² La' n'isö guzóalenē' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bē', en bilé'eda' ca' Nu na' rö'ö lataj na'. ³ Rēpi yōsa bení' Nu na' rö'ö lataj na', ca na' rēpi yōsa bení' guiój jaspe, en guiój cornalina, yugu' guiój nazáca'da'. Idú gásibi'ilö lataj na' zoa biguita' le naca lachi ca naca guiój esmeralda, le rēpida' yōsa bení'. ⁴ Idú gásibi'ilö lataj na' nacuá' ca' ia'tapa uruá' lataj gapa ta'bō' nupa ta'nná bē', ate' yugu' lataj na' rö'ögaquiē' tapa uru'ē bönni' gula, nácugaquiē' lari' chiguíchido'os, en dxiágaca ícagaquiē' le néquiquequini oro. ⁵ Ta'rúaj yōsa, en guziú' rinnē lu lataj lo ga ni' rö'ö Nu na', ate' bö zxön ru'u. Lahui' lo lataj na' tu'zeni' gadxi le ta'gú'u bení', le nácagaca gadxi bö' dzágagaca Dios. ⁶ Ca dödlölö lahui lataj ni dē tu ca naca tu nísado' le rēpi yōsa bení' ca guiój jara.

Nacuá' tapa nupa nabángaca cuiti lataj na', tsölá'a huéaj, ate' zían guiój lógaca dxiágaca zaca' cúdzi'löguequi, en láhuilöguequi. ⁷ Tu nu nutsa' ladaj tapa ni nalá' ca nácaba' bēdxi guixi'. Nu na' buropi nalá' ca nácaba' bēdxi, ate' nu na' bunni nalá' lahui ca naca lo bönni', ate' nu budapi nalá' ca nácaba' bisiá' ruzuba'. ⁸ Idápatē nupa ni, nacuá' xopa xilígaca que queēguequi, ate' idá'alöguequi, en lē'elöguequi xiliguequi dxiáda'gaca zían guiój lóguequi. Rēla, en te' za' bití' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquiē' Xanru' Dios!

¡Napa cazē' yöl-la' huáca!

¡Guzóa cazē' Lē', en zoa cazē', en chizóa ulē'!

⁹ Nupa na' nabángaca ta'gú'u yöl-la' ba Nu na' rö'ö rinná bē', en zóatica'sö nabán. Tun bal Nu na', en tē Nu na': "Xclenu'." Bátati'tès tun idapa na' caní, ¹⁰ tu'tsaga lógaca tapa uru'ē bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sö, en tu'cu'ē le néquiquequini oro dxiá ícagaquiē' lahui' lo lataj ga ni' rö'ö rinná bē' Nu na', ta'nnē':

¹¹ ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quiu' yöl-la' unná bē' tu' benu' yúgu'tè le dē!

¡Ca rē'ēni quézinu' nacuá', en gula'sí lo nacuá'!

5

Tu guichi, en Bönni' náquiē' Bö'cu' Zxíla'do'

¹ Ní'irö bilé'eda' tu guichi lu na' ibēla Nu na' rö'ö lataj lo. Guichi na' naca tu guichi nudubi, en dá'gaca didza' lē'elö, en láhuilö. Naguela' guichi na' gadxi le nusáyajgaca le. ² Bilé'eda'-nē' tuē' gubáz lá'ayilo, ate' bē'ē zidzaj didza', gunné': "¿Nuzxi naca lesaca' uladzu' le naguéla'gaca guichi ni, en usalaj le?"

³ Cuntu nu guca usalaj guichi na', en bití' guca nu uyú le, calēga nu zoa yehua' yubá, en calēga nu zoa luyú, en calēga nu zoa zxánilö luyú. ⁴ Ní'irö gurödxá' tu' cabí bidzöli nu naca lesaca' usalaj guichi na', en bití' bidzöli nu naca lesaca' ulaba le, en cuntu nu naca lesaca' uyú le. ⁵ Ní'irö tuē' bönni' gula ni' gudxē' neda', gunné': "Bití' cödxu'. Bönni' na' náquiē' ca bēdxi guixi', en nabábalenē' zxf'ini xí'sóē' Judá, en náquiē' ca' zxf'ini xí'sóē' David, chibidéli'nē' lu yúgu'tè le raca, en séqui'nē' uládzú'ē le naguéla'gaca guichi ni, en usalaj le'."

⁶ Ní'irö bilé'eda'-nē' Bönni' náquiē' Bö'cu' Zxíla'do', zuínē' lahui' lo lataj lo na' zoa gatsaj láhuilö nupa na' nabángaca, en gatsaj láhuilē' ca' yugu' bönni' gula na'. Dxié' hué' ca naca que tu bö'cu' zxíla' zoa nu bēti lēba' lahué' Dios, nacuá' gadxi lúzuba', en gadxi guiój loba', le tu'lufi' ca nácagaca gadxi bö' na' dzágagaca Dios, nasöl-lē'ē lēguequi idútē yödöliö. ⁷ Gudödē' Bönni' náquiē' Bö'cu' Zxíla'do', en gudélē'ē guichi na' lu na' ibēla Nu na' rö'ö lataj lo na'. ⁸ Cate'

chigudélë'ë guichi na', bulu'zóa xzíbiguequi idapa nupa na' nabángaca, en idapa uru'ë bönni' gula na' lahuë Bönni' na' náquië Bö'cu' Zxíla'do'. Tu tuë bönni' gula na' zongaquië' le rul-la nazí'i le arpa, en nuá'agaquië' ca' yugu' xzíga'do' néquiqueuini oro, yugu' le yúdzugaca yalaj, lë na' rulu'f'i yöl-la' rulidza Dios quégaca bönachi queë'. ⁹ Tul-lë' tu le rul-la yöl-la' ba, le naca cubi, le rnna caní:

Nacu' lesaca' quélu'u guichi na',
en uládu'u le naguéla gaca le,
tu' bë'u lataj yugu' bönni' gulútië' Li',
ate' len xichónu' böá'uu' bönachi para ilequi queë' Dios,
nupa nácagaca bönachi izá'a nacuá' iduté yödzölió,
bönachi tu'f'i yúgu'të didza' yúbölö,
en nabábagaca yúgu'të yödzö,
en yúgu'të luyú nacuá' iduté yödzölió.

¹⁰ Benu' ga nácagaquië' bönni' ta'nná bë'ë
en ga nácagaquië' bixúz queë' Dios queëru'.
Benu' ga ta'nná bë'ë lu yu yödzölió.

¹¹ Ní'irö buyúa', en biyönda' chí'igaquië' gubáz lá'ayi zían. Zían gáyu'ë, en gáyu'ë nacu'ë.
Nacu'ë idú gásibi' ilö lataj lo na' tsózxón len nupa na' nabángaca, enca' yugu' bönni' gula na'.

¹² Tu'ë zidzaj didza' yúgu'të, ta'nnë':
jBönni' na' náquië Bö'cu' Zxíla'do' gulútië',
náquië' lesaca' gata' yöl-la' unná bë' lu në'ë,
en yöl-la' tsahui', en yöl-la' réajini', en yöl-la' huáca!
jNáquië' lesaca' gunru'-në' bal, en tseaj ládxi'ru' Lë',
en cú'uru'-në' yöl-la' ba!

¹³ Ní'irö biyönda' tul-la yúgu'të le benë' Dios yehua' yubá, en lu yu yödzölió, en xzánilö luyú, en lu nísado'. Tul-la yúgu'të le nacuá' yugu' lataj na', ta'nná:

jYöl-la' ba Nu na' rö'ö lataj lo,
enca' Bönni' na' náquië Bö'cu' Zxíla'do'!
jGúntica'siru'-në' bal
en cú'utica'siru'-në' yöl-la' ba,
ate' inná bé'tica'së' Lë'!

¹⁴ Idápatë nupa na' nabángaca ta'nná: "jCa' gaca!"

Ní'irö idapa uru'ë bönni' gula na' bulu'tsaga lógaquië' lu yu, en gula'yéaj ládxi'gaquië' Nu na' zóatica'sö.

6

Yugu' le naguéla gaca guichi

¹ Ní'irö bilé'eda'-në' Bönni' náquië Bö'cu' Zxíla'do', ate' buládu'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyön chí'i ca guziú' rinnë, gunná: "jGudá uyú'!"

² Buyúa', en bilé'eda'-ba' tuba' böa' chiguichi, ate' nu na' dxía lëba' zön tu uxiti' yaga. Gulu'ë lë' tu le néquini oro udxixë' icjé', ate' birúajë' ca tu nu nácaterö lo para idéli'në' lu gudil-la.

³ Cate' buládu'ë le buropi le naguela' guichi na', biyönda' nu buropi na' nabán, ate' gunná: "jGudá uyú'!"

⁴ Ní'irö birúajba' ia'tuba' böa', nácaba' xiná. Bulu'dödë' lu në'e nu na' dxía lëba' yöl-la' huáca unná bë' tsöjtúa yöl-la' riböza dxi'a tsáhui'do' quégaca bönachi, en gun ga iluti luzë'eguequi. Bulu'nödzjé' queë' tu guië tuchi' zxön.

⁵ Cate' buládu'ë le bunni le naguela' guichi na', biyönda' nu bunni na' nabán, ate' gunná: "jGudá uyú'!"

Buyúa', en bilé'eda'-ba' tuba' böa' gasaj, ate' nu na' dxía lëba' zön tu xzigóns. ⁶ Biyönda' ru'f'i didza' tu chí'i gatsaj láhuilö tapa na' nabángaca, ate' gunná: "Chopa guië zxoá' xtila len lazzaj que tu dza huen dxin tu' gaca gubín, en xopa guië zxoá' cebada len lazzaj que tu dza huen dxin, pero biti' gunu' ga yadzaj le naca za, en biti' bi' gunu' que xisi uva nal-la."

⁷ Cate' buládu'ë le budapi le naguela' guichi na', biyönda' ru'f'i didza' nu budapi na' nabán, ate' gunná: "jGudá uyú'!"

⁸ Buyúa', en bilé'eda'-ba' tuba' böa' gulaj, ate' nu na' dxía lëba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacuá' yödzölió para guti léguequi len guië tuchi', en len yöl-la' ridún, en len yugu' yödzöhuë', en len yugu' böa' guixi' sinia' dzö'öba' luyú.

⁹ Cate' buládu'ë le guyu' le naguela' guichi na', bilé'eda' zxan bucugu yehua' yubá ni' yugu' bö' gulaca cazë' bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'. ¹⁰ Gulu'f'i zidzaj didza' yugu' bö' ni, gula'nná: "jXantu' Lá'ayi, runu'

ca rnno'! ¿Bátaxi caz uchi'a usöröu' queétu', en uzí'i lēbu' yugu' bönni' nacu'è yödölió tu' gulútiē' netu'?"

¹¹ Bulu'nödzejē' quéquequi yugu' lari' chiguíchido'os ilácuē', en gulē' léguequi: "Ral-la' uzí' lādxi'li' ia'tú chí'ido'osó, ga idxinrō dza ila'dxín yúgu'tē luzá'ali' huen dxin queē' Cristo ni, yugu' bönni' na' ral-la' iluti bönnachi légaquiē' ca' ca na' bétigaca libí'ili'."

¹² Cate' buládu'ē le buzxopi le naguela' guichi na', buyúa', en bilé'eda' gudödida' budó' zxu' luyú. Bōaca gasaj gubidza, en guca ca tu lari' guitsa' gasaj, ate' bōaca beo' xiná ca naca rōn. ¹³ Gula'guinnaj bōlaj lúzxiba lu yu, le guca ca raca que yaga higo, cate' ta'guinnaj le ribía cate' rutá le bō' budunu'. ¹⁴ Gudödi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'tē guí'ado', enca' yúgu'tē gapa zoa luyú bidxi lu nísado'. ¹⁵ Ní'irō yugu' bönni' ta'nná bē'ē luyú, en yugu' bönni' lo, en yugu' bönni' ta'lé'enē' yöl-la' tsahui', en yugu' bönni' ta'nná bē'enē' bönni' rōjáquiē' gudil-la, en yugu' bönni' dē lu ná'agaquiē', en yúgu'tē nupa nadó'ogaca, en yúgu'tē nupa bití' nadó'ogaca bulu'cachi' lógaquiē' gapa naca zxan bulóaj, en gapa naca lē'e guió'j lu guí'ado'. ¹⁶ Gulē' yugu' guí'ado' na', en yugu' lē'e guió'j na': "Gulí'dubága' netu', en buli'cachi' netu', para cabí ilé'e Nu na' rō'ō lataj lo ni' netu', en para cabí ideli' yöl-la' rilé queē' Bönni' na' náquiē' Bō'cu' Zxíla'do' netu'. ¹⁷ Chibidxín dza ulu'í lahui yöl-la' rilé quégaquiē', ate' ¿nuzxi caz sequí' guá' ilén le?"

7

Tu gayuá' yu' tapa-un milē' bönni'

¹ Gudödi gulaca yugu' lē ni bilé'eda' tapa gubáz lá'ayi zuíguequinē' idapa la'a yödölió. Tu'záguē'ē xinó'z gaca idapa bō' recja tsólá'a huéaj luyú, para cabí tsecja bō' luyú yödölió, en para cabí tsecja lu nísado', en para cabí utá yaga. ² Bilé'eda' ca' ia'tuē' gubáz lá'ayi zē'ē rirúajē' ga rilén gubidza. Nu'ē tu le udē'ē nupa ná'cagaca queē' Dios ban le gaca bē' léguequi. Bē'ē zidzaj didza', en bulidzē' idapē' gubáz lá'ayi ni' nadödi lu ná'agaquiē' yöl-la' huáca unná bē' ilún dí'tjanē' luyú, en nísado'. ³ Gudxē' légaquiē': "Biti' gun dí'tjali' luyú, en nísado', en yugu' yaga cate' udá'arötu' tu le gaca bē' ra' xigágaquiē' bönni' huen dxin queē' Dios queéru'."

⁴ Biyōnda' tsca ná'cagacaquiē' bönni' da' légaquiē' lē na' naca bē'. Ná'cagacaquiē' idú tu gayuá' yu' tapa-un milē' ladaj yúgu'tē cō' zxi'ini xi sóē' Israel. ⁵ Yugu' bönni' na' da' légaquiē' lē na' naca bē' ná'cagacaquiē':

Chinnu milē' di'a dza queē' Judá.

Chinnu milē' di'a dza queē' Rubén.

Chinnu milē' di'a dza queē' Gad.

⁶ Chinnu milē' di'a dza queē' Aser.

Chinnu milē' di'a dza queē' Neftalí.

Chinnu milē' di'a dza queē' Manasés.

⁷ Chinnu milē' di'a dza queē' Leví.

Chinnu milē' di'a dza queē' Isacar.

⁸ Chinnu milē' di'a dza queē' Zabulón.

Chinnu milē' di'a dza queē' José.

Chinnu milē' di'a dza queē' Benjamín.

Bönnachi guí'xi yu' ná'cagaca lari' chiguíchido'os

⁹ Gudödi guca lē ni buyúa', en bilé'egacada' bönnachi zían, cuntú nu gaca ulaba léguequi. Nabábagaquiē' yúgu'tē yödö' tu'í didza' yúbölō idútē yödölió. Zuíguequinē' ca dódilō lahui lataj lo, ga na' rō'ē ca' Bönni' na' náquiē' Bō'cu' Zxíla'do', en ná'cagacaquiē' lari' chiguíchido'os, en zōngaquiē' zin. ¹⁰ Tu'ē zidzaj didza' yúgu'tē, ta'nnē':

yöl-la' rusólá za' lu nē'ē Dios queéru', rō'ē lataj lo ni, en za' ca' lu nē'ē Bönni' na' náquiē' Bō'cu' Zxíla'do'!

¹¹ Zuíguequinē' yúgu'tē gubáz lá'ayi idú gásibi'ilō lataj lo na', enca' idú gásibi'ilō ga nacu'ē bönni' gula, enca' idú gásibi'ilō ga nacuá' idapa na' nabángaca, ate' tu'tsaga lógaquiē' lu yu ca dódilō lahui lataj lo na', en ta'yéaj lādxi'gaquiē' Dios, ¹² ta'nnē':

¡Ca' gaca! ¡Yöl-la' ba Li', Dios queétu'!

¡Napu' yöl-la' zxōn, en yöl-la' réajni'il!

¡Rētu' Li': "Xclenu", en runtu' Li' bal!

¡Napu' yöl-la' unná bē', en yöl-la' huáca!

¡Gácatíca'sō caní quiu', Dios queétu'!

¡Ca' gaca!

¹³ Ní'irō gunábinē' neda' tuē' bönni' gula na', gunné': "¿Nupxi na' ná'cagaca lari' chiguíchido'os, en gapxi bönni' légaquiē'?"

¹⁴ Neda' gudxa' lē': "Xan, li' nōz quézinu'."

Lë' gudxë' neda': "Nupa ni gula'gu'i gula'záca'da'. Gula'guíbë' lari' nácugaquië', en bulu'ún léguequi chiguichido'os len xichônë' Bónni' na' náquië' Bô'cu' Zxíla'do'. ¹⁵ Que lë' ni na' nacu'ë ca dódilô lahui lataj lo ga rō'ë rinná bē'ë Dios, en tunë' dxin lahuë' Lë' rëla, en tē dza lu yudo' queë'. Nu na' rō'ô lataj lo ni gun chi'i légaquië' tu' zóalentic'a sō légaquië'. ¹⁶ Biti'rō ila'dunë', en biti'rō ila'bidxë' nisa, en biti'rō ila'yéguinë' gubidza, en biti'rō iléquinë' xilá ¹⁷ tu' uyúë' Bónni' na' náquië' Bô'cu' Zxíla'do' légaquië' ca nu uyú bō'cu' zxíla'. Zoë' gatsaj láhui'lô lataj lo na'. Ichë'ë légaquië' gapa ralaj nisa le ruí'i yöl-la' na'bán, ate' Dios uzxië' lógaquië' nisa ta'bōdxë'."

8

Le igadxi le naguela' guichi

¹ Cate' buládu'ë le igadxi le naguela' guichi na', gurō'ô dxi yehua' yubá idú gatsaj hora. ² Ní'rō bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dōdë' lu ná'agaquië' gadxi lúzuba' bōa' bēdxi. ³ Ní'rō bidë' ia'tuë' gubáz lá'ayi, nu'ë tu' zxi'ga'do' néquini oro, en guzuinë' ra' bucugu yehua' yubá ni'. Gulú'udë'ë yalaj lu nē'ë para ugutsë' le len yöl-la' rulidza Dios le gulún yúgu'të bōnachi queë' Cristo, en uzégu'i'ë le lu bucugu na' néquini oro, le zoa lahui lo lataj lo na'. ⁴ Gurén dzōn que yalaj na' zoa lu nē'ë gubáz lá'ayi na', en guca tuz len yöl-la' rulidza Dios le gulún bōnachi queë' Cristo, ate' bidxín ga na' rō'ë Dios. ⁵ Ní'rō gubáz lá'ayi na' bulí'ë zxi'ga'do' na' len bō' yalaj dxía lu bucugu na', ate' gurú'unë' le luyú. Gunnë guziú', ate' bō zidzaj biyón. Guyëpi yōsa, en gudōdi budó' xzu'.

Tu'cōdxë' lúzuba' bōa' bēdxi

⁶ Ní'rō igádxitë' gubáz lá'ayi na' zōngaquië' gadxi lúzuba' bōa' bēdxi na' gula'cu'ë sina' ulu'cōdxë' léguequi.

⁷ Bucōdxë' gubáz lá'ayi zí'alō lúzuba' bōa' bēdxi, ate' gurō'ô guiōi bōgui' yōla sunna, en guí' nutsi'i rōn, ate' bulu'huōxaj luyú. Guyegui tu' cō' tsa tu' tsonna cō' le dē luyú ni, ate' guyegui ca' tu' cō' tsa tu' tsonna cō' yaga. Guyegui ca' yúgu'të guixi' ya'a.

⁸ Bucōdxë' gubáz lá'ayi buropi na' lúzuba' bōa' bēdxi, ate' gubixi tu' le naca ca tu' guí'a zxōn régui lu nísado', ate' ia'láti'do'os ca gatsaj tu' gatsaj nísado' na' bōáca rōn. ⁹ Guti tu' cō' tsa tu' tsonna cō' le nabángaca dzō'ô lu nisa zxōn na', ate' guca ditaj tu' cō' tsa tu' tsonna cō' le ta'dōdi láhui'lō nisa na'.

¹⁰ Bucōdxë' gubáz lá'ayi bunní lúzuba' bōa' bēdxi, ate' bōxaj tu' bōlaj lúzxiba, le régui ca tu' guí' yōri gapa dē nisa yegu, enca' gapa ralaj nisa, ate' guca caní que ia'láti'do'os ca gatsaj tu' gatsaj nisa na' rō'ô luyú. ¹¹ Bōlaj ni lēba' Ajenjo, le naca tu' le silá', ate' bōáca silá' ia'láti'do'os ca gatsaj tu' gatsaj nisa gapa na' dē nisa, en guca ca naca le silá' na', ate' gulati bōnachi zían ni'a que nisa na' bōáca silá'.

¹² Bucōdxë' gubáz lá'ayi budapi lúzuba' bōa' bēdxi, ate' bōáca chul-la ia'láti'do'os ca gatsaj tu' gatsaj gubidza, en lēsa' caní guca que beo', ate' bōáca chul-la tu' cō' tsa tu' tsonna cō' bōlaj. Caní guca, bití' buzení' gubidza ia'láti'do'os ca gatsaj tu' gatsaj dza, en bití' bulu'zeni' bōlaj, en beo' ia'láti'do'os ca gatsaj tu' gatsaj rēla.

¹³ Ní'rō buyúa', en biyōnda' ru'ë zidzaj didza' tuë' gubáz lá'ayi ridōdë' gatsaj láhui'lō lúzxiba, en rnnë' "¡Bica' bayechi' libí'ili'! ¡Bica' bayechi' libí'ili'! ¡Bica' bayechi' libí'ili' zóali' luyú ni cate' ulu'cōdxë' ia'tsonné' gubáz lá'ayi na' lúzuba' bōa' bēdxi!"

9

¹ Bucōdxë' gubáz lá'ayi guyu' lúzuba' bōa' bēdxi, ate' bilé'eda' nu naca ca tu' bōlaj lúzxiba bōxaj luyú, ate' bulu'nōdzjē' nu na' zxi'ini guië' que lataj chul-la. ² Gusaljē' lataj chul-la na', ate' gurén dzōn que lataj chul-la, le guca ca dzōn ríru'aj ga tu'zégui'ë bulá'do', ate' gula'chul-la gubidza, en lúzxiba ni'a que dzōn na'. ³ Lu dzōn na' bila'rúajba' bōchí'zu, yugu' le gula'zxóasiba' luyú, ate' Dios bē'ë légacaba' lataj iládu'ba' bōnachi ca tunba' xōjnō' dzō'ōba' luyú. ⁴ Gunná bé'enë' légacaba' bití' ilún dí'jaba' guixi' rō'ô luyú, en bití' ilún dí'jaba' yugu' le naca ya'a, en calēga yugu' yaga, pero gácasō iládu'ba' bōnachi na' bití' da' lē na' naca bē' nu nequi queë' Dios ra' xigágaquië'. ⁵ Bití' bē'ë légacaba' lataj ilútiba' légaquië', pero ulu'saca' zí'isiba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xōjnō'. ⁶ Yugu' dza na' ilē'ënë' yugu' bōnni' iluti cuíngaquië', pero bití' ila'zéqui'në'. Ilē'ëninë' ilátië', pero ucuíta cuini yöl-la' guti.

⁷ Nalá'gacaba' bōchi'zu na' ca nácagacaba' bōa' nácugacaba' le néquiguequini guië', para tsōjácaba' gudil-la. Dxíagaca ícjagacaba' le nácagaca ca tu' le néquini oro. Naca lógacaba' ca naca lógaca bōnachi. ⁸ Naca guitsa' ícjagacaba' ca naca guitsa' ícjanu nígula. Nácagaca láyi'gacaba' ca nácagaca láyi'ba' bēdxi guixi'. ⁹ Nácugaca luchú'ugacaba' le néquini guië'. Ta'gú' u bō xilíagacaba' ca na' ta'gú' u bō carreta na' ayōjagacaba' bōa' ta'xíti'ba' lu gudil-la. ¹⁰ Nácagaca xibángacaba' ca naca xibángacaba' xōjnō', zoa lí'í'gacaba'. Lu xibángacaba' na' zoa le tu'dí'iniba', para ilunba'

zi' bônachi idú ca gayu' beo'. ¹¹ Zoa nu rinná be'e légacaba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

¹² Chigudödi tu le rusuniti bônachi, le za' zí'alö, pero zá'gaca ia' chopá le ulu'suniti bônachi.

¹³ Bucödxé' gubáz lá'ayi buzxopi lúzuba' böa' bédxi, ate' biyönda' tu chí'i ruí'i didza' gatsaj láhui'lö tapa le nácgaca ca lúzuba' bédxi dá'gaca tapa squin bucugu na' néquini oro, le rö' lahué' Dios. ¹⁴ Chí'i ni ruí'ilen didza' gubáz lá'ayi buzxopi na' si' bucödxé' lúzuba' böa' bédxi, en rnna: "Busedxi idápaté' gubáz xihui' na' nága'gaca ra' yegu Eufates."

¹⁵ Ní'irö bulu'sedxé' tapa gubáz xihui' na', chinucözé' Dios léguequi para la' ná'asö, le naca dza na', en beo' na', en izi na', para ilútgaca tu cö' tsa tu tsonna cö' bônachi nacuá' yödzöliö.

¹⁶ Biyönda' tsca nácgacquié' bönni' röjáquié' gudil-la dxíagacquié'-ba' böa', en dzágagacquié' tapa gubáz xihui' na'. Nácgacquié' idú chopá gayuá' mil milé'.

¹⁷ Bilé'egacada'-ba' böa' na' ca tu lu bixín, ate' nupa ta'bía légacaba' nacu luchú'guequi le naca gui'do'os, en ya'a ca lúzuba, en gulaj. Nácgaca ícgagacaba' böa' na' ca ícjaba' bédxi guixi', ate' lu ruá'agacaba' ta'rúaj guí', en dzön, en tu le ruzégui'da', nazí'i le azufre. ¹⁸ Yugu' lè na' ta'rúaj ruá'agacaba' bétigaca tu cö' tsa tu tsonna cö' bônachi nacuá' luyú, lè na' nácgaca guí', en dzön, en lè na' ruzégui'da'. ¹⁹ Yugu' le tu'dí'iniba' böa' na' ta'rúaj ruá'agacaba', en dzö'ö lu xibángacaba', tu' nácgaca xibángacaba' ca yugu' bëla zoa ícgagacaba' le tu'dí'iniba'.

²⁰ Ia' zica'rö bônachi, nupa bití' gulati lu chopá ni tu'suniti, bití' bulu'bí'i ládxi'guequi para cabirö ilúngaca ca na' túngaca, en bití' bulu'sán ta'yéaj ládxi'guequi yugu' bö' xihui', en yugu' budó' guió' budó' yaga, yugu' budó' na' bití' ta'lé'e, en bití' ta'yöni, en bití' gaca sá'gaca. ²¹ Bití' bulu'bí'i ládxi'guequi para cabirö iluti bônachi, en caléga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

10

Gubáz lá'ayi, nuá' lu në'ë tu guichido'

¹ Ní'irö bilé'eda'-nè' ia'tué' gubáz lá'ayi nál-la, böjté' birúajé' yehua' yubá, nácué' böaj lúzuba, en zoa ca tu biguítá' ícjálé'. Répi yösa bení' lahué' ca run gubidza, ate' nácgaca ni'é ca ya'zxön ta'yegui. ² Zoa lu në'ë tu guichido' nayalaj, ate' tu ni'é ibëla nulibé' lu nísado', en ia'tú ni'é yögöla nulibé' luyú bidxi. ³ Ní'irö bë'ë zidzaj didza', ate' biyön chí'è ca riyön cate' ribödxí'aba' bédxi guixi', en cate' budxi bë'ë zidzaj didza' na', bila'yöni chí'igaca gadxi guziú'. ⁴ Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ruí'i didza' yehua' yubá, rë neda': "Bucáchi'sö didza' ni guluí'i gadxi guziú' na'. Bití' uzúaju' didza' na' lu guichi."

⁵ Ní'irö gubáz lá'ayi na' bilé'eda'-nè' zuíné' lu nísado', en luyú bidxi, guchisa në'ë ibëla zaca' lúzibälö, ⁶ ate' ben tsutsu xtídzé'è ni'a que Nu na' zoa caz, Nu na' ben yehua' yubá, en le nacuá' ni', enca' yödzöliö, en le nacuá' ni', enca' nísado', en le nacuá' ni', ate' gunné': "¡Bíti'rö tse! ⁷ Cate' ucödxé' gubáz lá'ayi igadxi lúzuba' böa' bédxi, usudxiné' Dios le nagachi' queé', lè na' buluf'iné' yugu' huen dxin queé', bönni' ni' gulu'ë didza' uláz queé'."

⁸ Ní'irö chí'i na' biyönda' rirúaj yehua' yubá bë'len neda' didza' leyübölö. Gunná: "Guyéaj, yöjxi' guichido' nayalaj na' zöné' gubáz lá'ayi na' nulibé' lu nísado', en luyú bidxi."

⁹ Guyija' ga na' zoé' gubáz lá'ayi na', en gunábida'-nè' gunné' guichido' na' quia'. Gubáz lá'ayi na' gudxé' neda', gunné': "¡Guzxi', gudagu! Lu ru'u gaca zxixi ca naca bidxína'do' queéba' buz, pero lè'u huóaca silá'."

¹⁰ Guzzi'a guichido' na' zöné', en gaduhua' le. Lu ruá'a guca zxixi ca naca bidxína'do' na', pero cate' budxi gaduhua' le, böaca silá' lè'a. ¹¹ Ní'irö gudxé' neda': "Ral-la' gu'u didza' leyübölö uláz queé' Dios lógaca zían cö' bônachi izá'a, en gapa nacuá' yúgu'té yödzö, en gapa tuí'i zían didza' yübölö, en lógaca zían bönni' unná bë'."

11

Chopé' bönni' tuné' ba nali

¹ Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queé' Dios. Burixi ca' bucugu lá'ayi que, en bulaba nupa nacuá' ni' ta'yéaj ládxi'gaca Dios. ² Bucá'ana ca' lö'a que yudo' na' dë ní'ilö, en bití' urixu' le, tu' nadödi lu ná'agaca bônachi izá'a, ate' ulu'libi ulu'léaj yödzö lá'ayi na' idú ca chopá-un beo'."

³ Gudxé' ca' neda': "Ísöl-la'a chopé' bönni' iluné' ba nali quia', ate' ilu'ë didza' uláz quia' idú ca chinnu gayuá' yu' tsónnalalaj dza, nácgacquié' lari' le naca bödzádzado'." ⁴ Chopé' bönni' ni tuné' ba nali, nácgacquié' chopá yaga olivo na' nazúaj lu guichi lá'ayi ca naca quégaquié', en nácgacquié' ca' chopá le nuá'gaca guí' na' nacuá' lahué' Dios, Xani yödzöliö. ⁵ Channö gué'ëni nu guá' dö' quégaquié', irúaj guí' ruá'agacquié' le usuniti nu na' rë'ëni guá' dö' quégaquié', en guti nu na', enca' nupa ta'dá'baga' légaquié'. ⁶ Chopé' ni dë lu ná'agacquié' ulu'zágué'ë xinöza

nisa guiöj lúzhiba, para cabí galaj guiöj tsca dza na' ral-la' ilu'ë didza' uláz queë Dios, ate' dë lu ná'agaquië' ca' ilunë' ga huôaca nisa rôn, en ilunë' ga gatsaj yôdzôhuë' yôdzôliô. Ilunë' caní bálati'tës luzuí ilë'ënnë'. ⁷ Cate' údxi ilunë' ba nali, irúajba' bôa' sínia' lataj chul-la, en til-lalenba' légaquië', en ucúl-laba' légaquië', en gútiba' légaquië'. ⁸ Le gulaca cazë' ila'túlusô ca' la' nôza lu yôdzô zxôn, ga nì' gudë'ë ca' Xanru' lë'e yaga cruz, en ca rucúdz'u' ru' didza', nazí'i le ca' Sodoma, enca' Egipto. ⁹ Idú ca tsonna dza yu' gatsaj bônachi yúgu'të yôdzô, en yúgu'të bônachi izá'a, en bônachi tufí zían didza' yúbölö, en bônachi yúgu'të luyú, ila'lé'eni le gulaca cazë', en bití' iluf' lataj nu ucache' légaquië' yeru ba. ¹⁰ Ulu'dzéjade'e nupa nacuá' yôdzôliô tu' gulátie', ate' lu yöl-la' rudzeja quéguequi ila'söl-la' le ulu'nôdzaj quégaca luzé'eguequi, tu' bulu'saca' zi'ë chopë' ni gulu'ë didza' uláz queë Dios bônachi nacuá' yôdzôliô.

¹¹ Ní'irô cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuínë', ate' guladxi gula'dzôbi yúgu'të nupa bila'lé'e légaquië'. ¹² Ní'irô bë' zidzaj didza' tu chi'i yehua' yubá, en gudxi légaquië': "Gulí'cuén ni."

Gula'benë' lu bôaj lúzhiba zaca' yehua' yubálö, ate' nupa na' gula'dá'baga' légaquië' bila'lé'e légaquië'. ¹³ La' ní'isô gudôdida' budó' zxu', ate' biguinna' tu cö' tsa tu chi cö' yugu' yu'u dzö'ö lu yôdzô na', ate' lu budó' zxu' na', gulati tsónnalalaj yu' chi gayuá' bônachi. Guladxi gula'dzôbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

¹⁴ Chigudôdi le buropi le rusuniti bônachi, ate' chizó'a idxín le bunni le usuniti léguequi.

Rucôdxë' gubáz lá'ayi igadxi lúzuba' bôa' bëdxi

¹⁵ Bucôdxë' gubáz lá'ayi igadxi lúzuba' bôa' bëdxi, ate' guluf'i zidzaj didza' yugu' chi'i yehua' yubá, ta'nná:

Gapa ta'nná bë' bônachi yôdzôliô
nadôdigaca lu në'ë Xanru' Dios,
en lu në'ë Cristo.
Lë' inná bë'tica'së'.

¹⁶ Ní'irô idapa uru'ë bônni' gula na' rō'ôgaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxí'gaquië' Dios. ¹⁷ Ta'nnë':

jXantu' Dios, napa cazu' yöl-la' huáca!
jGuzó'a cazu', en zoa cazu', en ral-la' guída cazu'!
jXclenu', tu' chibugunu' dxin yöl-la' huáca zxôn quiu',
en risi lo' rinná bë'u!

¹⁸ jGula'lé bônachi yugu' yôdzô
pero chibidxín dza gunu' léguequi xíguia'!
jNaca dza uchi'a usôrôu' nupa chinátigaca!
jUbi'u quégaquië' huen dxin quiu',
yugu' bônni' gulu'ë didza' uláz quiu',
nupa néquiquequi quez quiu', en gulún bal Lo',
nupa nácagaca cá'asô, en nupa nácagaca lo!
jChibidxín dza usunítu' nupa bulu'suniti yôdzôliô!

¹⁹ Ní'irô guyalaj yudo' queë Dios rō'ô yehua' yubá, ate' bilá' lahui guí'ina lá'ayi ga yu'u didza' rucá'ana tsahui' le nunë' Dios. Guyëpi yôsa, en gulú'u bô zidzaj, en gunné guziú' luyú. Gudôdi budó' zxu', en gurô'ö guiöj bôguí' yôla sunna.

12

Tunu nigula, en tuba' bëla zxôn xitsini'

¹ Ní'irô bilá' lahui yehua' yubá tu le naca bë'da', buluí'i lonu tu nigula nácunu le naca ca gubidza, en zoa zzan ní'anu beo'. Dxía ícjanu tu le néquini oro ga dxíagacaba' chinnu bôlaj bení'. ² Nigula ni chizó'a soa bí'ido' queënu, en ribôdxinu tu' rúdia' lë'ënu. Riguf'i robzá'nu ruzóanu bí'ido' queënu. ³ Ní'irô ia'tú le naca bë' bilá' lahui yehua' yubá. Buluí'i loba' tuba' bëla zxôn xitsini'. Nácaba' xiná guí'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'. ⁴ Len xibanba' gu'uyôjba' tu cö' tsa tu tsonna cö' bôlaj lúzhiba, en gurú'unaba' légacaba' luyú. Guzuí'ba' bëla zxôn xitsini' na' lonu nigula na' chizó'a sóabi' bí'ido' queënu. Zóaba' sina' gáguba'-bi' bí'ido' queënu na' ca gáljabí' na'. ⁵ Buzóanu-bi' tubi' bi'i bônni'do' ral-la' inná bé'ebi' yúgu'të yôdzô len tu xiyaga guié. La' bucuítatë'ë-bi' Dios bí'ido' queënu na', en buchisë'-bi' ga nì' zoa cazë' Lë', rō'ë lataj lo ga na' rinná bë'ë. ⁶ Buzúnnajnu nigula na', zéajnu lu lataj cá'asô, ga nì' chinupë'ë Dios lataj queënu. Ulu'gahuë'-nu ni' idú ca chinnu gayuá' yu' tsónnalalaj dza.

⁷ Gudôdi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá'gaquië' lë' gula'díl-lalenë'-ba' bëla zxôn xitsini' na'. Gula'díl-la bëla zxôn na', en yugu' gubáz xihui' dá'gaca lëba' ⁸ pero bití' bila'deli' lu gudil-la na'. Que lë ni na' bití'rô bidzôli xilátjagaca yehua' yubá. ⁹ Caní guca, gula'rú'unë'-ba' bëla zxôn xitsini' na' ní'ílo.

Nácaba' bëla na' zóaba' dza ni'te, lëba' tu' xihui'. Gula'ru'unë' tu' xihui' yödžölió, dzágagaca le gubáz xihui' na' dá'gaca le.

¹⁰ Ní'irö biyönda' tu' chi'i ru'í zidzaj didza' yehua' yubá, rnna: "Na'a chibidxin dza nulu'ë lahui yöl-la' rusölá nunë' Dios, en yöl-la' huáca queë', en le rinná bë'ë, enca' le rinná bë'ë Cristo, tu' chigula'ru'unë' ní'ölö nu na' buzegui yugu' böchi' luzá'aru' didza'. Rëla, en tã dza buzegui légaquië' didza' lahuë' Dios queëru'. ¹¹ Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nali queë'. Biti' gulu'í ládxi'gaquië' yöl-la' na' bán queégaquië', pero gulatië'. ¹² Que lë ni na' gaca yöl-la' rudzeja yehua' yubá. ¡Buli'dzeja libí'ili', zóali' ni'! ¡Bica' bayechi' libí'ili' zóali' yödžölió, en lu nísado', tu' chibötaj tu' xihui', en bidxin ga zóali'! Riléde'e tu' xihui' na' tu' chiréquibe'e ia'tú chí'isó dë lataj que."

¹³ Cate' gúquibe'eba' bëla zxön xitsini' na' chigula'ru'unë'-ba' luyú, ní'irö yösóa régu'ba'-nu nigula na' buzóanu bi'í bönni'do' na' queënu. ¹⁴ Ní'irö Dios bë'ë-nu nigula na' chopa xiliba' bisia' nácgaca zxön para gaca sunu, en icútanu ga na' zóaba' bëla zxön xitsini' na', en idxinnu xilátjanu lu lataj cá'asó. Ní' ulu'gahuë'-nu idú tsonna iz yu' gatsaj. ¹⁵ Bëla zxön xitsini' na' gúbaba' nisa zile zaca' cúdzulönu, le guca ca tu nisa yegu, en gu'uniba' gua'të nigula na'. ¹⁶ Ní'irö luyú gúcalen nigula na'. Guyalaj luyú na', en gü'í nisa yegu na' gúbaba' bëla zxön xitsini' na'. ¹⁷ Ní'irö bëla zxön xitsini' na' guléde'eba'-nu nigula na', ate' guyéjba' yöjtíl-lalenba' nupa nagá'anagaca queënu di'a dza queënu, nupa na' tun ca rnna le gunná bë'ë Dios, en nazi' lu né'eguequi le nunë' Jesucristo ba nali.

13

Chópaba' böa' sínia'

¹ Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chí lúzuba'. Dxíagaca lúzuba' chí le néquini oro, ate' láhuigaca ícjaba' da' tu la le naca xihui' le cabí rilé'e Dios dxi'a. ² Böa' sínia' na' bilé'eda'-ba' riná'aba' ca nácaba' tu bédxito', nacua' ní'aba' ca nácgaca ní'aba' oso, ate' ruá'aba' naca ca naca ruá'aba' bédxi guixi'. Bëla zxön xitsini' na' budódiba' lu na'aba' böa' sínia' ni yöl-la' huáca queëba', enca' xilátjaba' ga rinná bë'ëba', en yöl-la' unná bë' zxön queëba'. ³ Dxía huë' tu ícjaba' böa' sínia' na', le naca le guti lëba', pero buniti huë' na', ate' bulu'bani yúgu'të bönachi yödžölió, en yöjdá'gaca böa' sínia' na'. ⁴ Gula'yéaj ládxi'gaquië'-ba' bëla zxön xitsini' na', tu' budódiba' yöl-la' unná bë' queëba' lu ná'aba' böa' sínia' na'. Gula'yéaj ládxi'gaquië'-ba' böa' sínia' na', en gula'nnë': "¿Nuzxi caz naca zxön ca naca zxön böa' sínia' na', en nuzxi caz sequí' tíl-lalen lëba'?"

⁵ Guta' lu ná'aba' böa' sínia' na' bë'ëba' didza' ba zxön, en didza' xihui' le rinnëba' queë' Dios. Idú ca chopa-un beo' guta' lu ná'aba' yöl-la' unná bë'. ⁶ Gusí loba' rinnëba' queë' Dios, en rinnë' xihui'ba' que Lë' Dios, en que lataj lá'ayi queë', en quégaca nupa nacua' yehua' yubá. ⁷ Guta' lu ná'aba' gudíl-lalenba' nupa néquiquequi quez queë' Dios, en bucúl-laba' légaquië'. Guta' ca' lu ná'aba' gunná bë'eba' yúgu'të bönachi izá'a, bönachi yúgu'të yödžö, en bönachi tu'í yúgu'të didza' yúbölö, en bönachi idútë yödžölió. ⁸ Yúgu'të bönachi nacua' yödžölió gula'yéaj ládxi'gaca böa' sínia' na', nupa na' bití' nazúajgaca láguequi lu guichi que yöl-la' na' bán, guichi na' buzúajë' Bönni' na' náquië' Bö'cu' Zxíla'do' queë' Dios cate' si' guta' yödžölió. Buzóa cazë' Dios gútië' Bönni' na' ni'a quégaca bönachi queë'.

⁹ Channö nu riyöni, ral-la' uzé nagui. ¹⁰ Nupa nucu'ë Dios idžúngaca, ral-la' idžúngaca, ate' nupa nucu'ë Dios para nu guti léquequi len guíë tuchi', len guíë tuchi' ilátigaca. Que lë ni na', ral-la' ila'böza zxön ladxí' nupa néquiquequi queë' Dios, en ta'yéajlë' Lë'.

¹¹ Gudódi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopa lúzuba' ca naca lúzuba' bö'cu' zxíla', en ruí'iba' didza' ca na' ruí'iba' didza' bëla zxön xitsini' na'. ¹² Dë lu ná'aba' böa' sínia' ni yúgu'të yöl-la' unná bë' queëba' böa' sínia' bidxinba' zí'aló, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'të bönachi nacua' yödžölió böa' sínia' zí'aló na', böa' na' buniti huë' le guti lëba'. ¹³ Böa' buropi na' runba' ca' le nácgaca bë' ga ridxintë runba' ga ruhuóxaj guí' le za' lúzxiiba, en ruhuóxaj luyú lógaca yúgu'të bönachi. ¹⁴ Rizí' yé'eba' bönachi nacua' yödžölió len le nácgaca bë' dë lu ná'aba' runba' loba' böa' sínia' zí'aló na'. Rinná bë'eba' bönachi nacua' yödžölió ilunë' tu budó' ca nácaba' böa' sínia' na' gúcaba' huë' que guíë tuchi', ate' nabanba'. ¹⁵ Dë lu ná'aba' runba' ga soa íbán budó' na' naca ca nácaba' böa' sínia' zí'aló na', en gü'í didza' budó' ni, en gun ga nu guti yúgu'të nupa bití' ila'yéaj ládxi'gaca le. ¹⁶ Benba' ga gudá' yúgu'të bönachi tu le naca bë' dá'gaca lëba', nupa nácgaca cá'asó, en nupa nácgaca lo, nupa ta'lé'e yöl-la' tsahui', en nupa nácgaca yechi', nupa bití' nadó'ogaca, en nupa nadó'ogaca. Budá'aba' le lu ná'agaca íbëla o ra' xigágaca bönachi na'. ¹⁷ Cuntu nu gaca bi ga'u o bi guti' channö cabí da' nu na' lë na' naca bë', o channö cabí da' nu na' laba' böa' sínia' na', o le nabábaba' nuá'aba'. ¹⁸ Na'a riquínnu'

yöl-la' réajni'i. Nu napa yöl-la' réajni'i ral-la' ulábatêz tsca le nabábaba' nuá'aba' bôa' sínia' na', le naca ca le nababê' tu bônni', ate' le nabábaba' na' naca xopa gayuá' yu' tsónnalalaj yu' xopa.

14

Le tul-lê' tu gayuá' yu' tapa-un milê' bônni'

¹ Gudôdi ni' buyúa', en bilé'eda-nê' Bônni' na' náquiê' Bô'cu' Xzila'do' zuínê' lu guf'ado' nazí'i le Sión. Nacuá'lenê' Lê' tu gayuá' yu' tapa-un milê' bônni', da' ra' xigágaquiê' Lê' Bônni' na' náquiê' Bô'cu' Xzila'do', enca' Lê' Xuzê'. ² Ní'irô biyônda' tu le rigú'u bô' yehua' yubá, le rinnê zidzaj ca rinnê tu yegu zxôn, en ca rinnê guziú'. Biyônda' le riyôn cate' ta' guínniê' lê'e tu le rul-la zê zían du que. ³ Tul-lê' tu le rul-la cubi, nacu'ê ca dôdilô lahui lataj lo ni', enca' ca dôdilô lahui ga na' nacuá' idapa nupa na' nabángaca len yugu' bônni' gula na'. Cúnturô nu gaca gul-la le rul-la ni, pero légacasê' tu gayuá' yu' tapa-un milê' bônni' ni, bônni' na' bôa'uê' Cristo légaquiê' ladaj bônachi yôdzôliô. ⁴ Nácagaquiê' bônni' ni idú ladxi'. Biti' gula'cuá'lenê' nigula, tu' nácagaquiê' idú bônni' ra'bán. Sôjácalenê' Bônni' na' náquiê' Bô'cu' Xzila'do' gátí'tês ga sa'yéajê'. Cristo caz bôa'uê' légaquiê' ladjagaca bônachi, ate' nácagaca nupa bulu'dôdi cuíngaqiê' zí'alô queê' Dios, enca' queê' Bônni' na' náquiê' Bô'cu' Xzila'do'. ⁵ Catu caz gula'z'í yê'ê, ate' cuntu nu gaca bi innê quégaquiê' ga na' nacu'ê ca dôdilô lahui lataj lo ga rô'ê Dios.

Didza' rôjuá'gaquiê' tsonna gubáz lá'ayi

⁶ Ní'irô bilé'eda' ia'tuê' gubáz lá'ayi, ridôdê' lu bô'ôs lúzxiiba, en rôju'ê didza' dxi'a zóatica'sô para gunê' libán que lógaca nupa nacuá' yôdzôliô, bônachi idútê luyú, yúgu'tê bônachi izá'a, en bônachi tuí' yúgu'tê didza' izá'a, en bônachi yúgu'tê yôdzô. ⁷ Ru'ê zidzaj didza', rnnê': "¡Gulí'gádxí Dios, en gulí'cu'ê yöl-la' ba tu' chizôa uchi'a usôrôê' bônachi! ¡Gulí'tséaj ládxe'ê Dios, nunê' lúzxiiba, en luyú, en nísado', en gapa ralaj nisa!"

⁸ Ia'tuê' gubáz lá'ayi sôjnáhuê' gubáz lá'ayi ni, en rnnê': "¡Chibudxi que yôdzô Babilonia! ¡Chibudxi que yôdzô zxôn na'! Caní guca que, tu' gulún nupa nacuá' ní' ga gula'z'í lu ná'agaquiê' bônni' yúgu'tê yôdzô ilunê' ca nácagaca le ta'zê ládxi'gaquiê' le ruá' dô'."

⁹ Ia'tuê' gubáz lá'ayi sôjnáhuê' gubáz lá'ayi buropi ni, en ru'ê zidzaj didza', rnnê': "¡Channô nu tseaj ládxi'-ba' bôa' sínia' na', enca' budó' queê'ba', en guí'i lataj ta' ra' xigué o lu nê'e le naca bê' da' lëba', ¹⁰ gunê' Dios nu ni xigua' lu yöl-la' rilê queê'! ¡Qui'i saca' nu na' lu guf', en lu lë na' ruzégui'da', lógaca gubáz lá'ayi, en lahuê' Bônni' na' náquiê' Bô'cu' Xzila'do'! ¹¹ Cuéntica'sô dzôn que guí' ga ni' quí'i saca' nu na'. Rêla, en te dza quí'i saca', ate' catu caz gata' lataj ulu'z'í ládxi'gaca nupa ila'yéaj ládxi'gaca-ba' bôa' sínia' na', en budó' queê'ba'. Biti' ulu'z'í ládxi'gaca nupa iluf'i lataj ta' laba' léguequi. ¹² Que lë ni na' nupa na' néquiquequi queê' Dios, en tun ca rnna le gunná bê'ê, en ta'yéajlê' Jesús, ral-la' ila'bôza zxôn ladxi'."

¹³ Ní'irô biyônda' chí'i nu ruí'i didza' yehua' yubá, en rê neda': "Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlê' Xanru!"

Dios Bô' Lá'ayi rnnê': "¡Ca' gaca! ¡Ulu'z'í ládxi'gaquiê' lu dxin gulunê', en ulu'z'í'ê xibê ca sa'yéaj le gulunê'!"

Tu'z'í'ê le rulá' luyú

¹⁴ Ní'irô buyúa', en bilé'eda' tu bôaj lúzxiiba chiguí'chido'os, ate' lu bôaj na' rô'ê tu bônni' náquiê' ca náquiê' Bônni' Guljê' Bônachi, ate' dxia icjê' tu le néquini oro, ate' zônê' tu guíê tuchi' lu nê'ê. ¹⁵ Birúajê' tuê' gubáz lá'ayi lu yudo' rô'ô yehua' yubá, ate' bê'ê zidzaj didza', en gudxê' Nu na' rô'ô lu bôaj na', gunnê': "¡Bugún dxin guíê tuchi' quiu', en guchugu zxoa' xtila, tu' chibidxin dza nu uzí' le! ¡Chinabídx do que le dê yôdzôliô!"

¹⁶ Ní'irô Nu na' rô'ô lu bôaj na' bugún dxin guíê tuchi' idútê yôdzôliô, ate' buzi'ê le rulá' luyú.

¹⁷ Ní'irô birúajê' tu gubáz lá'ayi lu yudo' zoa yehua' yubá. Nu'ê ca' tu guíê tuchi'. ¹⁸ Birúajê' ia'tuê' gubáz lá'ayi ra' bucugu ni', dê lu nê'ê inná bé'enê' guí', ate' bê'ê zidzaj didza', en bulidzê' gubáz lá'ayi zí'alô na' nu'ê guíê tuchi', gunnê': "¡Bugún dxin guíê tuchi' quiu', en butubi tu' xôa huéaj le ta'bía lubá uva rô'gaca yôdzôliô, tu' chiná le ta'bía lubá uva!"

¹⁹ Ní'irô gubáz lá'ayi ni bugunê' dxin guíê tuchi' idútê yôdzôliô, en butubê' le ta'bía lubá uva rô'gaca luyú, ate' yôjchú'unê' le ta'bía lubá uva na' lu yeru zxôn ga izí xisi. Yugu' lë ni ruluf'i ca gunê' Dios, gunê' xigua' bônachi nacuá' yôdzôliô. ²⁰ Bulu'libê' le ta'bía lubá uva na' lu lerui zoa ní'lô ra' yôdzô, ate' lu lerui na' birúaj rôn, en gurén ga bidxintê ruá'agacaba' bôa', en gudôdi rôn na' idú tsca gaca sá'aru' idú chinu dza.

15

Yugu' gubáz lá'ayi nuá'gaquiê' gadxi yôdzôhuê'

¹ Bilé'eda' ia'tú le nácada' bē' yehua' yubá, le run ga nu rubani. Bila'rúajē' gadxi gubáz lá'ayi, nuá'agaquiē' gadxi yōdzōhuē' rōjsétegaca, le ugunē' dxin Dios, údxi gunē' xíguia' bōnachi yōdzōlió.

² Bilé'eda' ca' tu le naca ca tu nísado' le rēpi yōsa bení' ca guiōj jara le nutsí'i guí'. Nupa na' bulu'xicia lu bōa' sínia' na', en lu budó' queēba', en lu laba', zuígaca lu lē na' naca ca tu nísado', en nuá'agaquiē' le tul-la, yugu' le bē'ē Dios queégaquiē'. ³ Tul-lē' le rul-la na' bil-lē' Moisés, bōnni' huen dxin queē' Dios. Naca tu le rul-la queē' Bōnni' na' náquiē' Bō'cu' Zxíla'do'. Ta'nnē':

¡Li', Xantu' Dios, zxōntērō nacu' Li'!

¡Zxōntērō naca yúgu'tē le benu',

le tun ga rubánitu'!

¡Li' rinná bē'enu' yugu' yōdzō!

¡Idú dxí'ado', en idú tsahui' naca ca bi runu'!

⁴ ¿Nuzxi caz cabí gadxi Li', Xantu'?

¿Nuzxi caz cabí cu'u Li' yōl-la' ba?

¡Tuzu' Li' nacu' lá'ayi!

¡Ila'dxin bōnachi yúgu'tē yōdzō,

en ila'yéaj lādxi'guequi Li'

tu' ta'lé'e naca tsahui' yúgu'tē le runu'!

⁵ Gudōdi guca lē ni, buyúa', en bilé'eda' gualaj yudo' yehua' yubá ga ni' dē lataj lá'ayi que le naca bē' zóalenē' Dios bōnachi queē'. ⁶ Bila'rúajē' gadxi gubáz lá'ayi lu lataj lá'ayi na', nuá'agaquiē' gadxi yōdzōhuē' na'. Nácugaquiē' lari' nazáca'da' le rēpi yōsa bení', en nuga'gaca luchú'ugaquiē' le néquiquequini oro. ⁷ Ní'irō tu nu nutsa' ladaj idapa nupa na' nabángaca, bē' que queégaquiē' gadxi gubáz lá'ayi na' gadxi zxíga'do' néquiquequini oro, en yúdzugaca le rulu'i yōl-la' rilé queē' Dios, Bōnni' zoa cazē'. ⁸ Lu lataj lá'ayi na' bidzá'a dzōn, tu' zoa ni' yōl-la' bení', en yōl-la' huáca zxōn queē' Dios. Cuntu nu sequi' tsaza lu lataj lá'ayi na' cate' gátsjarō gadxi yōdzōhuē' na' nuá'agaquiē' gadxi gubáz lá'ayi na'.

16

Yugu' zxíga'do' yúdzugaca le rulu'i yōl-la' rilé queē' Dios

¹ Ní'irō biyōnda' chí'i nu ru'i zidzaj didza' lataj lá'ayi na', en rē gadxi gubáz lá'ayi na', rnna: "¡Guli'tséaj! ¡Guli'tsōjlálaj gadxi zxíga'do' na' lu yōdzōlió, le yúdzugaca lē na' rulu'i yōl-la' rilé queē' Dios!"

² Guyijē' gubáz lá'ayi zí'aló, en yōjlaljē' le yudzu zxíga'do' na' zōnē' lu yōdzōlió. Lē na' yudzu zxíga'do' na' ben ga gutsaj yudzu' ya'a le riláda' idútē le naca caz nupa na' da' léguequi le naca bē' dá'gaca bōa' sínia' na', enca' nupa na' ta'yéaj lādxi'gaca budó' queēba'.

³ Ní'irō guyijē' gubáz lá'ayi buropi, en yōjlaljē' le yudzu zxíga'do' na' zōnē' lu nísado', ate' nisa na' bōaca rōn ca naca rōn queē' tu bōnni' nati, ate' gulati yúgu'tē nupa nabángaca nacuá' lu nísado' na'.

⁴ Guyijē' gubáz lá'ayi bunni, en yōjlaljē' le yudzu zxíga'do' na' zōnē' gapa dē yegu, en gapa ralaj nisa, ate' gapa dē nisa na' bulu'huóaca rōn. ⁵ Ní'irō biyōnda' ru'ē didza' gubáz lá'ayi na' dē lu nē'ē rinná bē'enē' nisa na', rnnē': "¡Xantu' Dios Lá'ayi! ¡Zoa cazu', en guzóa cazu'! ¡Tshui' nacu' tu' richugu' caní quégaca bōnachi ⁶ tu' bulu'laljē' rōn quégaca nupa néquiquequi quez quiu', en quégaca nupa gulu'i didza' uláz quiu'! ¡Na'a, Li' runu' ga ilē'ajē' rōn, tu' caní ral-la' gaca quégagaquiē'!"

⁷ Ní'irō biyōnda' ru'i didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yōl-la' unná bē'! ¡Idútē li, en tsahui' naca ca richugu' quégaca bōnachi!"

⁸ Guyijē' gubáz lá'ayi budapi na', en yōjlaljē' le yudzu zxíga'do' na' zōnē' lu gubidza, ate' gubidza na', bē'ē Dios le lataj uzégui'da' bōnachi len guí' que. ⁹ Gula'yégui'da' yúgu'tē bōnachi tu ruzégui'da' gubidza, pero bití' bulu'bí' lādxi'gaca, en bití' gula'gú'u Dios yōl-la' ba. Gula'nnē' zí'i queē' Dios, Bōnni' dē lu nē'ē inná bē'enē' yugu' lē ni tu'saca' zí' bōnachi.

¹⁰ Guyijē' gubáz lá'ayi guyu' na', en yōjlaljē' le yudzu zxíga'do' zōnē' lu xilataj bōa' sínia' ga na' rinná bē'ēba', ate' guró'ō chul-la gapa rinná bē'ēba'. Ní'irō, tu' gula'guí'i gula'zaca' bōnachi, guláguya'a lúdx'iquequi, ¹¹ pero bití' bulu'bí' lādxi'gaca para cabirō ilúngaca le ruá' dō' tunē'. Gula'nnē' zí'i queē' Dios zoē' yehua' yubá tu' ta'guí'i ta'zaca', en tu' dxiagaca yudzu' ya'a na'.

¹² Guyijē' gubáz lá'ayi buzxopi na', en yōjlaljē' le yudzu zxíga'do' na' zōnē' lu yegu zxōn nazi'i le Eufrates, ate' gubidxi nisa yegu na' para ibá'a nōza ga ila'dōdi nupa ta'nná bē', nupa ila'rúaj zaca' ga rilén gubidza.

¹³ Ní'irō bilé'eda' bēla zxōn xitsiní' na', en bōa' sínia' na', en bōnni' ru'ē didza' uláz quégacaba'. Bila'rúaj tsonna bō' xihui' tun ditaj bōnachi lu ruá'agaca nupa na'. Nalá'gaca

ca nalá'gacaba' buludzu. ¹⁴ Nácagaca yonna bö' ni bö' que tu' xihui', bö' na' tun le nácagaca bē' le ilún ga ulu'bani bōnachi. Yōjaca bö' xihui' na' idú yōdzōlió, en yōjtúbigaca nupa ta'nná bē', para tsōjáquiē' lu gudil-la na' gaca lu dza xzōn queē' Dios, Bōnni' napa cazē' yōl-la' unná bē'. ¹⁵ Cani rnnē' Dios: "¡Buli'yútsōca'! Guída' tsárido'os ca ridxinē' tu bōnni' gubán. Bica' ba nu zoa ban ladxí, en run chí'i le nacu nu na', en rúntica'sō dxi'a, para cabi gun bayudxi ta xiguidisō, en para cabi utuf'i nu na' lahui' lógaca bōnachi." ¹⁶ Yugu' bö' xihui' na' bulu'tubi yugu' bōnni' ta'nná bē'ē, ate' bulu'dubē' tu lataj nazi'i le lu didza' hebreo: Armagedón.

¹⁷ Guyijē' gubáz lá'ayi igadxi na', en yōjlaljē' le yudzu xziga'do' na' zōnē' lu bō'ōs, ate' bē' zidzaj didza' tu nu zoa lu lataj lá'ayi zoa yehua' yubá ga dē lataj lo na', rnna: "Chinaca."

¹⁸ Ní'rō guyēpi yōsa, en gurō'ōda' bö, en gunnē guziú'. Gudōdida' budó' xzu', le gudōdida'rō ca gudōdi tsanni ni nacuá' bōnachi yōdzōlió. ¹⁹ Birúaj tsonna cō'ōlō yōdzō xzōn na', ate' gula'guinnaj yōdzō nacuá' yōdzōlió. Yōjnenē' Dios le naca xihui' gulún bōnachi yōdzō xzōn na' nazi'i le Babilonia, ate' lu yōl-la' rilé queē' benē' xíguia' nupa nacuá' ni'. ²⁰ Bila'gachi' yugu' luyú bidxi dzo'ō lu nísado', ate' bít'i rō' gula'lá' yugu' guí'ado'. ²¹ Bōxaj ca' guiōj bōgui' yōla sunna, le za' lúxiba, en yōjsóa ícjagaca bōnachi, ate' nál-lí' tu tu guiōj bōgui' na' ca tu gayuá' guíē, ate' yúgu'tē bōnachi gula'nnē xihui' queē' Dios tu' nōzi guiōj bōgui' na' tu bulu'sáca'da' zi'i léguequi.

17

Dios richúquiē' queēnu nigula udá dzaga

¹ Ní'rō bidxinē' tuē' gubáz lá'ayi ga zoa', nababē' gadxi gubáz lá'ayi na' gula'zōnē' gadxi xziga'do' na' néquiquequini oro. Bē'lenē' neda' didza', gunnē': "Gudá ni, ate' uluf'ida' li' ca gunē' Dios, gunē'-nu xíguia' nigula udá dzaga na', rō'ōnu lu nísado' zlán. ² Gula'cua'len lēnu nupa ta'nná bē' luyú yōdzōlió, en gulún le ruá' dō', ate' gula'zudxi nupa nacuá' yōdzōlió ni, tu' gulunlen lēnu le bít'i naca dxi'a."

³ Dios Bö' Lá'ayi guzōalenē' neda', ate' gubáz lá'ayi na' guchē'ē neda' tu lu lataj cá'asō, ate' bilé'eda'-nu tu nigula ni' dxianu cūdu'ba' tuba' bōa' sínia', nácaba' xíná guí'ido'os. Dxiagaca gadxi ícjaba', en chí lúzuba', en dá'gaca ca' lēba' le ta'nnē xihui' queē' Dios. ⁴ Nigula na' dxianu lēba' nácumu lari' xíná chul-la, en lari' xíná guí'ido'os. Nazi'i biquitaj queēnu le néquiquequini oro, en yugu' guiōj nazaca', en yugu' bugá. Lu ná'anu rō'ō tu xziga'do' néquini oro, en yudzu le nácagaca xihui', en le ruá' dō' runnu. ⁵ Ra' xigánu dá'gaca ca lēnu, le tu'luf'i tu le nagachi', en ta'nná caní: "Yōdzō Babilonia Le Naca Lo", en "Xíná'agacanu Nigula Udá Dzaga", en "Xíná'agaca Le Xihui' Dzō'ō Yōdzōlió." ⁶ Gúquibe'eda' nazúdxinu nigula na' tu' bennu ga gulaj rōn quégaca nupa néquiquequi queē' Dios, en quégaca nupa na' zoa nu bēti léguequi tu' gulún ba nálí queē' Jesús. Cate' bilé'eda'-nu, bubánide'eda'. ⁷ Gudxē' gubáz lá'ayi na' neda', gunnē': "¿Bizx que rubáninu? Uzéajni'ida' li' lē na' nagachi', le ruluf'i ca naca nigula ni, enca' le ruluf'i ca naca bōa' sínia' na' dxianu-ba', bōa' na' dxiagaca gadxi ícjaba', en chí lúzuba'. ⁸ Bōa' sínia' na' bilé'enu' guzōaba' zí'alō, pero bít'i zóaba' na'a. Bōa' ni chizóa irúajba' lataj chul-la, ate' tséajba' ga nitiba' tsaz. Ulu'bánide'e nupa nacuá' luyú cabi nazúdzagaca láguequi lu guichi que yōl-la' na'bán, le buzúajē' Dios dza ni'te quez cate' si' gata' yōdzōlió. Cate' ila'lé'eni bōa' sínia' na' guzōaba' zí'atēlō, pero bít'i zóaba' na'a, ulu'bani tu' nubanba'.

⁹ Lē ni naca tu le uzéajni' i nu gaca tséajni'i: Gadxi ícjaba' na' tu'luf'i gadxi guí'ado' gapa rō'ōnu nigula na'. ¹⁰ Lēsa' caní gadxi ícjaba' na' tu'luf'i gadxē' bōnni' ta'nná bē'ē. Gáyu'ē bōnni' ni chigudōdi quégaquiē'. Tuē' bōnni' ni rinná bē'ē na'a, ate' ia'tué' bít'i ridxíninē', pero cate' guidē', inná bē'ē tu chí'ido'osō. ¹¹ Bōa' sínia' na' guzōaba', pero bít'i zóaba' na'a, ruluf'i tu bōnni' izxunu', inná bē'ē. Nunē' tsózxōn bōnni' gadxi na', ate' tōdi ni nítíē' tsaz.

¹² Chi lúzuba' na' bilé'enu' tu'luf'i chiē' bōnni' ila'nná bē'ē. Bít'i ta'z'íninē' yōl-la' unná bē', pero ila'zi'ē yōl-la' unná bē' tu chí'ido'osō, en ila'nná bē'ē tsózxōn len bōa' sínia' na'. ¹³ Chiē' bōnni' ni, lēbisō nácaquiē', ate' ulu'dōdē' yōl-la' unná bē' quégaquiē', en le nazi' lu ná'agaquiē' lu ná'aba' bōa' sínia' na'. ¹⁴ Ila'díl-lalenē' Bōnni' na' náquiē' Bō'cu' Zxíla'do', pero Lē' ucul-lē' légaquiē', tu' náquiē' Xángaca yúgu'tē nupa nácagaca xan, en náquiē' Bōnni' rinná bē'enē' yúgu'tē nupa ta'nná bē'. Nupa nacuá'len Lē', bulidzē' Dios léguequi, en gurōē' léguequi, ate' tsaz dá'gaca Lē'."

¹⁵ Gubáz lá'ayi na' gudxē' ca' neda', gunnē': "Yugu' nísado' na' bilé'enu' gapa ni' rō'ōnu nigula udá dzaga na', tu'luf'i bōnachi yugu' yōdzō, en yugu' bōnachi izá'a, en bōnachi tu'i yugu' didza' yúbōlō, en bōnachi yugu' luyú. ¹⁶ Chi lúzuba' bōa' sínia' na' bilé'enu', en tu'luf'i chiē' bōnni', bít'i ila'lé'enē'-nu nigula udá dzaga na' dxi'a, ate' ulu'cá'anē'-nu cá'asō, en xiguidisō. Ilahuē' xipēla'nu, en ulu'zégui'ē-nu len guí'. ¹⁷ Dios uchíziē' icja ladxí'do'gaquiē' chiē' bōnni' na' le gun ga ilunē' ca rē'ēni quézinē' Lē', ate' ilácagaquiē' tuz, en ulu'dōdē' yōl-la' unná bē' quégaquiē' lu ná'aba' bōa' sínia' na' para gaca ca rnna xtídzē'ē. ¹⁸ Nigula na' bilé'enu'-nu ruluf'i yōdzō xzōn na' rinná be'e nupa ta'nná bē' yōdzōlió ni."

18

Riguinnaj yödzo Babilonia

¹ Gudödi na' bilé'eda-né' ia'tué' gubáz lá'ayi ruhuötjé' rirúajé' yehua' yubá, en dē lu nē'ē yöl-la' unná bē' xzōn, ate' guyēpi yōsa bení' luyú ni'a que yöl-la' bení' queē' gubáz lá'ayi na'.

² Bē'ē zidzaj didza' gubáz lá'ayi na', gunnē':

¡Chibiguinnaj! ¡Chibiguinnaj Babilonia, yödzo xzōn na'!

¡Chibóaca xilataj tu' xihui', en xilátjagaca bō' xihui' tun ditaj bōnachi!

¡Yugu' biguinni xitsini', en yugu' biguinni xihui' tu'zóaba' xilátajgacaba' ni'!

³ Caní guca que yödzo na' ni'a que le gulún bōnachi nacuá' ni'.

Gulunē' ga gulún bōnachi yúgu'tē yödzo ca nácagaca le ta'zēsō ladxí' le ruá' dō'.

Nupa ta'nná bē' luyú yödzólió gulunlen légaquiē' le ruá' dō',

ate' guta' yöl-la' tsahui' quégaquiē' bōnni' to'o tuti' nacu'ē yödzólió

tu' guyánda' yugu' le nazaca' gula'zē ladxí' bōnachi ni'.

⁴ Ní'irō biyōnda' ruí' didza' ia'tú nu zoa yehua' yubá, rnna:

Gulí'ruáj lu yödzo na', libí'ili' néquili' quia'

para cabí gunli' dul-la' tsōxzōn len légaquiē',

en para cabí quí'i sáca'li' le gaca quégaquiē'.

⁵ Nayánda' dul-la' nabága'gaquiē',

en chinayasa nadxín caz lúzxiba,

pero Dios rōjnenē' le ruá' dō' nūgaquiē'.

⁶ Bulí'bí'i quégaquiē' ca na' gulunē' queēli'.

Bulí'bí'i quégaquiē' chopá cō' tsca le gulunē'.

Bulí'bí'i quégaquiē' chopá cō' tsca le naca xihui' gulunē' queēli'.

⁷ Gulí'gún ga ila'guí'i ila'záquiē', en ila'bōdxi yéché'ē

tsca guca yöl-la' ba, en yöl-la' xzōn guluf'i cúngaquiē'.

Ta'zá' ladxí'gaquiē', ta'nnē':

Rō'otu' ni, rinná bē'ētu'.

Biti' nácatu' uzēbi, en catu caz cōdxi yéchi'tu'.

⁸ Que lē ni na', tu dzasō ila'dxín quégaquiē' le ila'guí'i ila'záquiē',

yöl-la' guti, en yöl-la' ribōdxi yechi', en yöl-la' ridún.

Iléguiē' lu guí', tu' napa cazē' yöl-la' huáca xzōn Xanru' Dios.

Lē cazē' usiúdxē' quégaquiē'.

⁹ Ní'irō gunnē': "Ila'bōdxi nupa ta'nná bē' luyú yödzólió, en gulún le ruá' dō' tsōxzōn len

légaquiē', en bulu'z'í' xibé le nequi quégaquiē'. Ila'bōdxi, en ila'bōdxi yéché'ē cate' ila'lé'enē'

dzōn que yödzo xzōn na' régui. ¹⁰ Zi'tu' z'í'tu'sō ila'cu'ē tu' iládxinē' ca gaca xíguia' le gaca que

yödzo na', ate' ila'nnē': ¡Bica' bayechi' Babilonia, yödzo xzōn ni, le gúcada' lo! ¡Tu dzasō guca

xíguia' que!"

¹¹ Ní'irō gunnē': "Ila'bōdxi ca' bōnni' to'o tuti' nacu'ē yödzólió, en ila'bōdxi yéché'ē ni'a

que yödzo na' tu' cabirō soa nu ga'u bi ilúti'ē ni'." ¹² Cúnturō nu ga'u ni':

Le néquiguequini oro, en plata,

en yugu' guíój zaca', en yugu' bugá,

en yugu' lari' nazáca'da', en lari' xiná chul-la,

en lari' dxi'ado', en lari' xiná guí'ido'os,

en yugu' yaga rilá' zxixi,

en le néquiguequini dxita nazáca'da',

en le néquiguequini yaga nazáca'da',

en le néquiguequini guíē cobre,

en le néquiguequini guíē,

en le néquiguequini guíój jara.

¹³ Cúnturō nu ga'u ni':

Canel, en yugu' le rilá' zxixi, en yalaj,

en le rilá' zxixi que mirra, en que yōj olíbano,

en xisi uva nál-la, en le naca za,

en yiōzja dxi'ado', en xzoa' xtila,

en yugu' búrrodo', en yugu' bō'cu' zxila',

en yugu' bōa', en yugu' carreta,

en yugu' bōnni' huen dxin, en ia'bal-la bōnachi.

¹⁴ Nupa na' to'o tuti' ilē légaquiē', ila'nná:

Nadúagaca le guzē ladxí'li'.

Chigudōdi quégaca yöl-la' tsahui',

en le nácagaca lachí queēli',

ate' bítir'ró idzólili' léguequi.

¹⁵ Ní'iró gunné: "Ila'bòdxé' bōnni' to'o tuti' na', tu' guta' quégaquié' yōl-la' tsahui' tu' gulúti'ē lu yōdzō na', ate' ila'cu'ē zì'tu' zì'tu'sō tu' iládxinē' ca gaca xigua' le gaca que yōdzō na', en ila'bòdxi yéché'ē." ¹⁶ Ila'nné:

¡Bica' bayechi' yōdzō ni guca zxōn!

Guca ca tu nigula náccunu lari' nazáca'da',
en lari' xiná chul-la, en lari' xiná gu'ido'os,
en nazí'i biquitaj queēnu le néquiquequini oro
en le néquiquequini guiōj zaca', en yugu' bugá.

¹⁷ Tu dzasō guniti yōl-la' tsahui' que yōdzō ni.

Ní'iró gunné: "Yúgu'tē bōnni' xan barco, en nupa nacua' lē'egaca barco na', en nupa tu'sá' yugu' barco na', en nupa tun dxin lu nísado', ila'cu'ē zì'tu' zì'tu'sō." ¹⁸ Cate' ila'lé'enē' dzōn que yōdzō na' régui, ila'bòdxé', en ila'nné: "¿Bízxlō yōdzō guca zxōn ca naca yōdzō ni?"

¹⁹ Ní'iró gunné:

Ulu'dxié' bēchtō ícjagaquié'.

Ila'bòdxé', en ila'bòdxi yeché'ē, ila'nné'.

¡Bica' bayechi' yōdzō ni guca zxōn!

Yōl-la' tsahui' que yōdzō ni ben ga guta' yōl-la' tsahui'
quégaca yúgu'tē nupa náccagaca xan barco lu nísado'.

Tu dzasō guniti yōdzō ni.

²⁰ Bulí'dzeja ca gaca que yōdzō ni, libí'ili' zóali' yehua' yubá,

enca' libí'ili' néquili' queē' Dios,

libí'ili', bōnni' gubáz queē',

en libí'ili', bōnni' ruí'ili' didza' uláz queē'.

Bulí'dzeja, tu' chiguchúguié' Dios que yōdzō ni

ni'a que bi gulún queéli' nupa nacua' lu yōdzō ni.

²¹ Ní'iró tué' gubáz lá'ayi nál-la buchisé' tu guiōj zxōn le naca ca tu guichi riyētu, ate' gurú'uné' le lu nísado', gunné:

La' canísō gaca que yōdzō Babilonia,

tu' iguinnaj yōdzō na' guca lo,

ate' bítir'ró nu udzōli le.

²² Bítir'ró nu yōni lu yōdzō na' nupa ta'guinni lē'e le rul-la,

en calēga nupa tu'cōdxi gui

en calēga nupa tu'cōdxi lúzuba' bōa' bēdxi.

Bítir'ró udzōli bōnni' huen dxin ni',

en bítir'ró yōni bō rigú'u le rutu ni'.

²³ Bítir'ró uzení' nitú guí' lu yōdzō na',

en bití' yōni chí'ē bōnni' rutsaga nē'ē ni',

en calēga chí'ibi' bi' i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li' lu yōdzō ni,

en guzxi' yé'eli' bōnachi idútē yōdzōlió len yōl-la' gudzá' queéli'.

²⁴ Lu yōdzō ni gulaj xichōngaquié' bōnni' gulu'ē didza' uláz queē' Dios,

en xichōngaca nupa néquiquequi queē' Dios,

enca' xichōngaca yúgu'tē bōnachi yōdzōlió,

tu' bētigaca nupa nacua' yōdzō ni léguequi.

19

¹ Gudōdi lē ni biyōnda' tu'í zidzaj didza' bōnachi zían nacua' yehua' yubá, ta'nná:

¡Yōl-la' ba Dios! ¡Yōl-la' rusólá runé',

ate' yōl-la' zxōn, en yōl-la' unná bē' napē' Dios queēru'!

² ¡Naca idútē li, en tsahui' ca rusiúdxé'!

¡Guchúguié' que yōdzō na' naca ca tu nigula udá dzaga,

en quégaca bōnachi lu yōdzō na' ila'niti tsaz!

¡Gulún ditaj bōnachi yōdzōlió tu' nōzi le ruá' dō' guluné'!

¡Dios buzí' lēbē' légaquié'

tu' gulútié' yugu' huen dxin queē'!

³ Leyúbōlō gula'nné: "¡Yōl-la' ba Dios! ¡Cuéntica'sō dzōn ga régui yōdzō na'!"

⁴ Idapa uru'yē bōnni' gula ni' bulu'tsaga lógaquié' lu yu tsōzxōn len idapa nupa ni' nabángaca, en ta'yéaj ládxi'gaquié' Dios, Bōnni' rō'ē lataj lo queē'. Gula'nné: "¡Ca' gaca! ¡Yōl-la' ba Dios!"

⁵ Ní'iró biyōnda' ruí'í didza' tu nu zoa lataj lo na', rnna:

¡Gulí'cu'ē Dios queēru' yōl-la' ba

yúgu'tèli' runli' xichinë', libí'ili' na' rádxili' Lè',
nàcali' bònachi cá'asò, en bònachi lo!

Lani que yöl-la' rutsaga na' queë Bönni' náquië Bõ'cu' Xzila'do'

⁶ Biyönda' ca' nu ruí'i zidzaj didza', le biyón ca riyón cate' tuí' didza' bònachi zían, en biyón ca' ca riyón ga ridödi tu yegu zxön, o ca riyón cate' rinnë guziú', ate' rnna:

¡Yöl-la' ba Dios tu' risí lahuë' rinná bë'è!

¡Napa cazë' yöl-la' huáca!

⁷ ¡Ral-la' udzeja ládxí'ru', en uzí'iru' xibë',

en cú'uru'-në' yöl-la' ba

tu' chibidxín dza lani que yöl-la' rutsaga na'

queë Bönni' na' náquië Bõ'cu' Xzila'do'!

¡Si' lu në'ë Cristo nupa néquiquequi queë'!

¡Chinabá'a queëbi' bi'i utsaga ná'alénbi' Lè'!

¡Nácabi' le rulufí' nupa na' néquiquequi queë'!

⁸ ¡Dios ru'ë-bi' lataj gácubi' lari' nazáca'da'

le naca idú, en rëpi yösa bení'!

Lari' nazáca'da' na' rulufí' le naca tsahui' núngaca nupa néquiquequi queë' Dios.

⁹ Ní'irö gubáz lá'ayi na' gudxë' neda', gunnë': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë lani que yöl-la' rutsaga na' queë' Bönni' náquië' Bõ'cu' Xzila'do'!"

Gudxë' ca' neda': "¡Yugu' didza' idútë li ni ru'ë didza' Dios cazí'!"

¹⁰ Buzóa xziba' xini'ë gubáz lá'ayi na' para tseaj ládxa'a lë', pero gudxë' neda': "¡Biti' gunu' caní' Neda' ca' naca' huen dxin queë' Dios ca nacu' li', en ca nácagaquië' böchi' luzó'o nazi' lu ná'agaquië' le naca idútë li ca naca queë' Jesús. ¡Guyéaj ládxë'ë Dios!"

Nupa tufí' didza' uláz queë' Dios, tufí' didza' le naca idútë li ca naca queë' Jesús.

Bönni' dxíë'-ba' böa' chiguichi

¹¹ Ní'irö bilé'eda' nayalaj lúzxiba, ate' bulufí' loba' tuba' böa' chiguichi, ate' lë' Bönni' dxíë'-ba', Nu Run Ca Rnna, enca' Nu Ruí' Didza' Le Nácate. Caní' lë' tu' ruchí'a rusöröë' ca naca le naca idútë li, enca' caní' tsejë' gudil-la. ¹² Rëpi yösa bení' guiöj lahuë', le nácagaca ca guí', en dxíagaca icjë' zían le néquiquequi oro. Nazúaj lahuë' tu le lë', le cuntú nu nözi, pero tuzë' Lë' nözinë'. ¹³ Nácüë' tu lari' në'aj rön, en lë' ca' "Nu Naca Xtídzë'ë Dios." ¹⁴ Rönógaquië' Lë' ni'a në'ë guizxi yu nacu'ë yehua' yubá, dxíagaquië'-ba' böa' chiguichi, en nácagaquië' lari' nazáca'da', le naca chiguichido'os, en bití' naca bösaj. ¹⁵ Rirúaj ru'ë le naca ca tu guíë tuchi' le gúninë' zí' bònachi yugu' yödzo. Inná bé'enë' légaquië' len tu xiyaga guíë, en gunë' légaquië' xíguia', le gaca quégaquië' ca raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yöl-la' unná bë'. ¹⁶ Nazúaj lu lari' nácüë', enca' lu xigatsjë' ca lë', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Nácagaca Xan."

¹⁷ Ní'irö bilé'eda'-në' tuë' gubáz lá'ayi zuínë' lu gubidza, ate' bë'ë zidzaj didza', en gudxë'-ba' böa' ta'daba lúzxiba, rnnë': "¡Guli'dá, bulí' dubi ga ni gáguli' lani zxön queë' Dios! ¹⁸ Gáguli' xipéla'gaca nupa ta'nná bë', en xipéla'gaca nupa ta'nná bë' enca' bönni' rójáquië' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca yúgu'të bònachi, nupa bití' nadó'ogaca, en nupa nadó'ogaca, nupa nácagaca cá'asò, en nupa nácagaca lo."

¹⁹ Ní'irö bilé'eda'-ba' böa' sínia' na', enca' yugu' bönni' ta'nná bë'ë yödzoilió, en bönni' rójáquië' gudil-la guizxi yu quégaquië', nudúbagaquië' para ilúnlenë' gudil-la Bönni' dxíë'-ba' böa' chiguichi, dzágagaca Lë' ni'a në'ë guizxi yu. ²⁰ Bidzunba' böa' sínia' na', enca' bönni' na' bë'ë didza' uláz queëba', bönni' na' benë' yugu' le nácada' bë' loba', en guzxi' yé'enë' nupa ni' gulufí' lataj nu uzúaj láhuiguequi lë na' naca bë' dá'gaca lëba', en gula'yéaj ládxí'gaca budó' queëba'. Böa' sínia' na', enca' bönni' na' bë'ë didza' uláz queëba', gula'ru'uné' léguequi nabángacasò ca' ga rō'ō guí' zxön le réguilen lë na' ruzégui'da'. ²¹ Bönni' na' dxíë'-ba' böa' chiguich bëtië' yúgu'të nupa na' gudá'gaca léguequi len guíë tuchi' na' rirúaj ru'ë, ate' bulu'huöljaba' yúgu'tëba' böa' na' ta'daba' lúzxiba, tu' guláguba' xipéla'guequi.

20

Chi gayuá' iz

¹ Gudödi lë ni bilé'eda' ruhuötjë' tu gubáz lá'ayi, zë'ë yehua' yubá, en zönë' xzí'ini guíë que lataj chul-la, ate' nu'ë tu du guíë yödx. ² Guzxönë'-ba' bëla zxön xitsiní' na', nácaba' bëla guzóaba' dza ni'te, bëla na' lëba' Tu' Xihui', enca' Satanás, ate' béguë'ë-ba', en bucá'anë'-ba' caní' chi gayuá' iz. ³ Yöjchú'unë'-ba' lataj chul-la, en busayjë' lataj na', ate' budë'ë tu le riguela' le rusayaj lataj na' para cabirö si' yé'eba' bònachi yugu' yödzo ga izá'arö chi gayuá' iz na', ate' tödi ni' ral-la' yédxiba' tu chí'ido'.

⁴ Ní'irō bilé'eda' yugu' lataj gapa ta'bō' nupa ta'nná bē', ate' nupa bila'deli' ulu'chi'a ulu'sōrō le raca ta'bō' yugu' lataj na'. Bilé'eda' ca' yugu' bō' gulaca caz bōnachi bulu'rixē' yénguequi yugu' bōnni' bití' nácagaequi' tsahui' tu' gulún ba nali' queē' Jesús, en tu' gulún libán que xtidzē'ē Dios. Yugu' bōnachi ni bití' gula'yéaj lādxí'gaca bōa' sínia' na', en budó' queēba', en bití' gulu'i' lataj nu uzúaj ra' xigáquequi, o lu nē'eguequi lē na' naca bē' nu da' lēba'. Bulu'bán nupa ni lu yōl-la' guti, ate' gula'nná bē'len Cristo chi gayuá' iz, ⁵ pero ia' zica'rō bōnachi nátigaca bití' bulu'bán. Cate' izá'arō chi gayuá' iz na' ulu'bán. Yōl-la' rubán lu yōl-la' guti guca ni naca le raca zí'alō. ⁶ ¡Bica' ba, en bica' lá'ayi nupa ta'deli' yōl-la' rubán na' raca zí'alō! ¡Yōl-la' guti le raca burópilō bití' bi gaca gun quéquequi, pero ilácagaca bixúz queē' Dios, enca' queē' Cristo, ate' ila'nná bē'len Lē' chi gayuá' iz na'!

⁷ Cate' izá'a chi gayuá' iz na', ulu'sanē' Satanás ga na' nadzún. ⁸ Urúaj Satanás, en tsōjzxi' ye'e bōnachi yugu' yōdzō nacuá' idapa la'a yōdzōlió. Si' ye'e ca' bōnachi yōdzō Gog, en yōdzō Magog, ate' utubi lēguequi lu gudil-la. Tsca nácagaca nupa ni, nácagaca ca naca yuzxi rō'ō tu ra' yegu xzōn. ⁹ Guizxi yusō gula'dōdē' idutē luyú, ate' gula'cu'ē lē'ajlō lataj ga na' nacuá' bōnachi néquiquequi queē' Cristo, le naca yōdzō na' nadxi'inē' Dios. Ní'irō benē' Dios ga bōxaj guí' le birúaj yehua' yubá, le buzegui' légaquie'. ¹⁰ Tu' xihui' na' nazí' ye'e légaquie', yōjchú unagaquie' le ga rō'ō guí' xzōn que lē na' ruzégui'da', ga na' chizóaba' bōa' sínia' na', enca' bōnni' na' bē'ē didza' uláz queēba'. Ila'guí'ila'zaca' ni' rēla, en te dza yúgu'tē iz zá'gaca.

Ta'dxín bōnachi lahuē' Dios ga rō'ē ruchi'a rusōrōē'

¹¹ Ní'irō bilé'eda' tu lataj lo chiguichi, en bilé'eda' ca' Nu rō'ō ruchi'a rusōrōē' lataj na'. Lahui' lo Nu ni gula'nititē yōdzōlió, en lúxiba, ate' bití'rō budzōli xilátjaguequi. ¹² Bilé'eda' ca' nupa chinátigaca, nupa nácagaca lo, en nupa nácagaca cá'asō, zuíguequinē' lahuē' Dios. Gula'yálaj guichi, en guyalaj ca' ia'tú guichi ga na' nazúajgaca lágaca nupa nadéli'gaca yōl-la' na'bán idú. Buchi'a busōrōē' Dios nupa na' chinátigaca tsca naca le nazúaj yugu' lu guichi na', lē na' gulúngaca. ¹³ Lu nísado' bulu'rúaj nupa chinátigaca, nacuá' lu nísado'. Lu yōl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busōrōē' Dios tu tsca naca le gulúngaca. ¹⁴ Ní'irō yōjtsázagaca yōl-la' guti, en lataj chul-la ga ni' rō'ō guí' xzōn le naca lataj que yōl-la' guti le raca burópilō. ¹⁵ Nupa bití' nazúajgaca lu guichi quégaca nupa nadéli'gaca yōl-la' na'bán idú yōjtsázagaca lataj na'.

21

Tu lúxiba cubi, en tu luyú cubi

¹ Gudōdi na' bilé'eda' tu lúxiba cubi, en tu luyú cubi, tu' chigudōdi quégaca lúxiba na', en luyú na' gula'cuá' zí'alō. Bití'rō dē nísado'. ² Neda', Juan, bilé'eda' yōdzō lá'ayi na', le naca Jerusalén cubi, ruhuótaj, rirúaj yehua' yubá ga zoē' Dios, en chinaba' a que ca nabá'a queēbi' bi'í nigula chizóa utsaga ná'alēnbi' tu bōnni'. ³ Biyōnda' ru'í didza' nu rnna yehua' yubá: "¡Buli'yútsōca'! ¡Ga zoē' Dios zóalen bōnachi! ¡Sóalenē' lēguequi, ate' lēguequi ilácagaca bōnachi queē'! ¡Dios caz sóalenē' lēguequi, en gáquie' Dios quéquequi! ⁴ Dios uzxié' nisa ribōdxi zoa guiōj lóguequi. Cúnturō nu gati, en cúnturō nu cōdxi, en cúnturō nu cōdxi yechi', en cúnturō nu qui' saca', tu' chigudōdi quégaca lē na' gulaca zí'alō."

⁵ Ní'irō Nu na' rō'ō lataj lo ni' gunná: "¡Buyútsōca'! ¡Yúgu'tē ruúna' cubi!"

Gudxi ca' neda': "¡Buzúaj lu guichi lē ni, tu' naca idutē li didza' ni, en naca lōza!"

⁶ Ní'irō gudxi neda': "¡Chinaca caz! ¡Neda' naca' Nu zoa zí'atēlō, enca' Nu rōjsete ca naca le risí lo, en le ruúdxitē! ¡Nu ribidxi nisa, neda' guna' ga guí'aj nisa na' runna yōl-la' na'bán! ⁷ Nupa ila'deli' lu le raca yōdzōlió, gaca quéquequi yúgu'tē lē ni. Neda' gaca' Dios quéquequi, ate' lēguequi ilácagaca zxi'ini caza', ⁸ pero nupa tadxi, en nupa bití' ta'yéajlē' neda', en nupa nácagaca xihui', en nupa tuti bōnachi, en nupa tun le bití' naca tsahui', en nupa nácagaca udzá, en nupa ta'yéaj lādxí'gaca budó' guiōj budó' yaga, en yúgu'tē nupa ta'zí' yē', chizóa ribōza xilátjaguequi lu guí', ga ni' rō'ō guí' xzōn que lē na' ruzégui'da', lē na' naca yōl-la' guti le raca burópilō."

Yōdzō Jerusalén le naca cubi

⁹ Ní'irō tuē' gubáz lá'ayi nababē' gadxē' gubáz lá'ayi ni' gula'zōnē' gadxi zxi'ga'do' yúdxugaca gadxi yōdzōhuē' yōjsétegaca, bidē' ga zoa'. Gudxē' neda': "¡Gudá ni! ¡Ulu'ida' li' bi'í nigula na' si' utsaga ná'alēnbi' Bōnni' na' náquie' Bō'cu' Zxíla'do'!"

¹⁰ Guzóalenē' Dios Bō' Lá'ayi neda', ate' guchē'ē gubáz lá'ayi na' neda' tu lu guí'a sibi, en bulufínē' neda' yōdzō lá'ayi Jerusalén, ruhuótaj, rirúaj yehua' yubá ga zoē' Dios. ¹¹ Yōdzō ni rēpi yōsa bení' tu' zóalen le yōl-la' bení' queē' Dios. Rēpi yōsa bení' ca rēpi yōsa bení' tu guiōj nazáca'da' ca naca guiōj guí'do'os nazí'i le jaspe. Naca yōdzō na' yení'ido' ca naca guiōj jara. ¹² Zoa tu zō'ō xzōn, en sibi idú gāsibi'ilō yōdzō na'. Lē'e zō'ō na' nacuá' chinnu gapa nu riyaza. Ra' gapa nu riyaza na' nacu'ē chinnuē' gubáz lá'ayi tapa chí'ē. Tu tu ga nu riyaza na' nazúaj tu tu lágaca idxinnu cō' di'a dza zxi'ini xi'sóē' Israel. ¹³ Lē'e zō'ō le ruyú saca' ga

rilén gubidza nacuá' tsonna gapa nu riyaza, en saca' ga za' bö' ziaga nacuá' tsonna gapa nu riyaza, en saca' tsölá'a ga ridödi gubidza beo' ziaga nacuá' tsonna gapa nu riyaza, en saca' ga ribía gubidza nacuá' ca' tsonna gapa nu riyaza. ¹⁴ Zxan zö'ö que yödzo na' nacuá' chinnu xilibi zö'ö, ate' lë'egaca xilibi zö'ö na' nazúajgaca lágaquië' idxinutë' bönni' gubáz queë' Bönni' na' náquië' Bö'cu' Zxíla'do'.

¹⁵ Gubáz lá'ayi na' ru'ílenë' neda' didza' zönë' tu yaga urixi le néquini oro para urixë' tsca naca yödzo na', en tsca nácagaca gapa nu riyaza, en tsca naca zö'ö que. ¹⁶ Yödzo na', lédi'i nácagaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixë' tsca naca yödzo na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que. ¹⁷ Burixë' ca' yöl-la' yödx que zö'ö na', naca tu gayuá' yu' tapa-un dxita, tsca naca dxita que na' bönnachi, lë na' ruríxinë' gubáz lá'ayi na'.

¹⁸ Zö'ö na' néquini guiöj jaspe, ate' yödzo na' néquini órotëz, le naca yení'ido' ca naca guiöj jara. ¹⁹ Yugu' xilibi zö'ö que yödzo na' nazí'gaca biquitaj guiöj nazáca'da'gaca.

Xilibi zö'ö zí'aló néquini guiöj jaspe.

Le buropi néquini guiöj zafiro.

Le bunni néquini guiöj ágata.

Le budapi néquini guiöj esmeralda.

²⁰ Le guyu' néquini guiöj ónice.

Le buzxopi néquini guiöj cornalina.

Le igadxi néquini guiöj crisólito.

Le izxunu' néquini guiöj berilo.

Le igá néquini guiöj topacio.

Le idxi néquini guiöj crisoprassa.

Le idxinéaj néquini guiöj jacinto.

Le idxinnu néquini guiöj amatista.

²¹ Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá. Luyú la' nōza lo que yödzo na' néquini órotëz, le naca yení'ido' ca naca guiöj jara.

²² Biti' bilé'eda' tu yudo' lu yödzo na', tu' náquië' Xanru' Dios yudo' que, napa cazë' iduté yöl-la' unná bë', en lësca' caní náquië' Bönni' náquië' Bö'cu' Zxíla'do', náquië' yudo' que yödzo na'. ²³ Biti' run bayudxi tsení'gaca gubidza, en beo' lu yödzo na', tu' uzení' yöl-la' bení' queë' Dios lu yödzo na', ate' lësca' Bönni' náquië' Bö'cu' Zxíla'do' náquië' le uzení' ni'. ²⁴ Bönnachi yugu' yödzo, nupa nulágaca, ila'dá lu bení' que yödzo na', ate' yugu' bönni' ta'nná bë'ë yödzo'lió idiguá'agaquië' yöl-la' tsahui' quégaquië' lu yödzo na'. ²⁵ Catu caz tsáyajgaca gapa nu riyaza lu yödzo na' lahui' dza, ate' lataj na' catu caz gaca rëla. ²⁶ Bönnachi yugu' yödzo idiguá'agaquië' ni' le nácagaca lesaca', en yöl-la' tsahui' quégaquië'. ²⁷ Tu le ruá' dö' bití' ca' tsaza ni', en calëga tu le naca xihui', en calëga nu rizi' yë', pero tsázagacasö ni' nupa nazúajgaca láguequi lu guichi queë' Bönni' náquië' Bö'cu' Zxíla'do', ga na' nazúajgaca lágaca nupa nadéli'gaca yöl-la' na'bán.

22

¹ Ní'irö gubáz lá'ayi na' buluf'inë' neda' tu yegu yení'ido', le naca nisa yegu le runna yöl-la' na'bán. Rëpi yōsa bení' yegu na' ca rëpi yōsa bení' guiöj jara. Rirúaj yegu na' lu lataj lo ga rō'ë Dios, en ga rō'ë ca' Bönni' náquië' Bö'cu' Zxíla'do'. ² Rizá' yegu ni gatsaj láhui'ló nōza lo que yödzo na'. Tsölá'a huéaj ra' yegu na' rō'ö tu yaga le runna yöl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágu'gaca yaga na' nácagaca le tu'ún bönnachi yugu' yödzo. ³ Biti' soa ni' nitú le dxía dö'. Soa lu yödzo na' lataj lo ga rō'ë Dios, enca' ga rō'ë Bönni' náquië' Bö'cu' Zxíla'do', ate' yugu' huen dxin queë' ila'yéaj ládxi'gaquië' Lë'. ⁴ Ila'lë'enë' lahuë' Lë', ate' le nazí'i Lë' nazúaj ra' xigágaquië'. ⁵ Biti' gaca rëla ni', ate' nupa nacuá' ni' bití' ila'quínna tu le cu'u bení', en calëga bení' que gubidza, tu' gáquië' Xanru' Dios bení' quégaquië'. Nupa nacuá' ni' ila'nná bë'tica'sö.

Chizóa huödë' Cristo

⁶ Ní'irö gubáz lá'ayi na' gudxë' neda', gunné': "Didza' ni naca iduté li, en naca löza. Xanru' Dios, Nu ruchiza Bö' Lá'ayi icja ládxi'do'gaquië' yugu' bönni' tu'ë didza' uláz queë', chigusöl-lë'ë gubáz lá'ayi queë' para uluf'inë' yugu' huen dxin queë' le ral-la' gácatë. ⁷ Caní rnnë' Jesucristo: ¡Chizóa huöda'! ¡Bica' ba nu run ca rnna didza' ruá'a uláz queë' Dios, le nazúaj lu guichi ni!"

⁸ Neda', Juan, biyönda', en bilé'eda' yugu' lë ni. Gudödi biyönda', en bilé'eda' yugu' lë ni, buzóa zxiba' xini'ë gubáz lá'ayi na' buluf'inë' neda' yugu' lë ni para guna' lë' zxon. ⁹ Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca nácagaquië' böchi' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rnna le nazúaj lu guichi ni. ¡Ben zxon Dios!"

¹⁰ Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóailaca yugu' lë ni. ¹¹ Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'." ¹² Rnnë' Jesús: "¡Chizóa huóda! Nu'a lu na'a le nadéli' gaca bönachi, ate' ubi'a que queë'guequi tscá naca le gulúngaca. ¹³ Neda' naca' Nu zoa zí'atëlö, enca' Nu rōjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxí."

¹⁴ Ní'irö gunné': "¡Bica' ba nupa nayari le nácugaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yōdzö na'!
¹⁵ Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj lādxi' gaca budó' guió'j budó' yaga, en nupa ta'yaza lādxi' gaca ta'z' yë' ila'cuá' ní'ilö ra' yōdzö na'. ¹⁶ Neda', Jesús, gusöl-la'a gubáz lá'ayi quia', ate' buluf'inë' libí'ili' yugu' lë ni, libí'ili' na' dzágali' yugu' cō' bönachi quia'. Neda' naca' di'a dza queë' David, enca' zxf'ini xi'sóë'. Naca' ca' bōlaj hui sila."

¹⁷ Tu'ë didza' Dios Bö' Lá'ayi, enca' bi'i nigula utsaga ná'alénbi'-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizë lādxi' le, ral-la' guídi, en guí'aj nisa le runna yöl-la' na'bán!

¹⁸ Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnní'a: Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúaj gaca lu guichi ni. ¹⁹ Lë'sca' caní, channö nu cúa bítí'tës didza' ni ruá'a uláz queë' Dios, en nazúaj lu guichi ni, Dios ugüë' ca' xilataj nu na' lu guichi ga nazúaj gaca lágaca nupa nadéli' gaca yöl-la' na'bán idú, enca' lu yōdzö lá'ayi, ca na' nazúaj qué'guequi lu guichi ni.

²⁰ Xanru', Nu run ba nalí qué'guequi lë ni rnnë': "¡Ön! ¡Huódatea!"

¡Ca' gaca! ¡Gudá, Xantu' Jesús!

²¹ Rinábida'-në' Xanru' Jesucristo uzá' lādxë'ë queë'li' yúgu'tëli'. ¡Ca' gaca!